


Kotimo Kawe Someaka

Masane Oyapo



The New Testament in the Fasu Language of Papua New Guinea

**Kotimo Kawe Someaka Masane Oyapo  
The New Testament in the Fasu Language of Papua New Guinea  
Nupela Testamen long tokples Fasu long Niugini**

copyright © 2011 Wycliffe Bible Translators, Inc.

Language: Fasu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 18 Apr 2025 from source files dated 31 Aug 2023

e56f9062-586b-51c4-85a0-29d4f916a414

## Contents

FRT . . . . .	1
Matiu . . . . .	2
Maka . . . . .	63
Ruki . . . . .	100
Yone . . . . .	162
Tarira Aporo . . . . .	205
Rome . . . . .	260
1 Korini . . . . .	294
2 Korini . . . . .	321
Karesia . . . . .	340
Efesase . . . . .	351
Firipai . . . . .	361
Korosi . . . . .	368
1 Tesaronaeaka . . . . .	375
2 Tesaronaeaka . . . . .	381
1 Timoti . . . . .	385
2 Timoti . . . . .	394
Taetase . . . . .	400
Fairimone . . . . .	405
Hipuru . . . . .	407
Yamese . . . . .	429
1 Pita . . . . .	437
2 Pita . . . . .	445
1 Yone . . . . .	450
2 Yone . . . . .	457
3 Yone . . . . .	459
Yuti . . . . .	461
Some Faremaresa Tarisia . . . . .	464
Read the New Testament . . . . .	492
Some Kepo Tariakosa . . . . .	504

# Kotimo Kawe Someaka Masane Oyapo

## The New Testament in the Fasu language of Papua New Guinea

### Nupela Testamen long tokples Fasu long Niugini

*Kotimo Kawe Someaka Masane Oyapo*  
 The New Testament in the Fasu language of Papua New Guinea  
 [faa]

Translation by Wycliffe Bible Translators

© 2011 Wycliffe Bible Translators, Inc.

Print publication 2011 by Wycliffe Bible Translators

Web version  
 2013, Wycliffe Bible Translators, Inc.  
[www.Wycliffe.org](http://www.Wycliffe.org)

<http://pngscriptures.org>

[www.ScriptureEarth.org](http://ScriptureEarth.org)

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/3.0>

**Your are free to share** – to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

**Notice** – For any reuse or distribution, you must make clear to others the license terms of this work.

#### Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating**. Na tu, **yu no ken senism Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela**.

**Nu Tesetwane sawi yano motosane oyapo.**

## Matiu

### Matiu sawi one mahemakapukusa someane oyapo.

Yasumo aporo hakāsa pura metane Matiupo. Matiu yano motosa meta Rífaipo. Fana Matiumo Rome kamanipoko makata rakisiapo. Epo makata rakirane, ipi takese mora aporopo.

Yasu ipi Kotimo unihaeaka rekeasimo murikimasa aporo Keresoane ipipo. Yu aporo hinamomo ayiáka hemakapusimo Matiumo sawi one popasapo. Fana Yu aporo porofete aporomo Kereso peraka makata ayiakakosane sawia popasapo. Asiamo ípu popasane fasereperakano asekea Matiumo popasapo. Yasu hepene yapura hisiapoko keremisi 30 faraka Matiumo sawi one popasapo.

### Matiu sawia some kepo parakuraka popasane oyapo.

1:17 Eparahamemo wainepe pesa aeyaka Yasu takapesapo.

1:18-25 Yasu takapesapo.

1:18-2:23 Yasu takapesa maiya amo aporo metakiramo kekerehoko pesapo.

3:1-12 Yone he tapukumareramo aporo hinamo hea tapukumurisiapo.

3:13-17 Yonemo Yasuane hea tapukumaresapo.

4:1-11 Satanemo Yasuane mokopipiraka somesa nine Yasumo kaisiafapo.

4:12-18:35 Kariri hauaka á Yasu koraka reke makata rakisiapo.

19:1-20:34 Yasumo Kariri hauakane metakarikia Yarusarame sitia hisiapo.

21:1-27:66 Yasu Yarusarame sitia rea maiya amo Yutasemo eane parakesapo. Paraker-akano Yasu waseremaka hukurukua rusua kusuapo.

28:1-20 Yasu turikia purakano aporo hinamo metakiramo eane asesapo.

### Eparahamemo aporo wainepe pesane oyapo.

Ruki 3:23-38

<sup>1</sup> Éparahamemo aporo ira wainepe pesa á Yasu faserepesane oyapo. Yasu Keresomo makasa kaua kekemané Téfetepo. Téfetemo makasa kaua kekemané Éparahamepo.

<sup>2</sup> Éparahamemo ipi maeyane Aísakepo. Aísakemo ipi maeyane Yákopepo. Yákopemo aporo hokosa hokono murisiapo. Hokono murisiane meta Yútapo.\*

<sup>3</sup> Yútamō ípu hinamo Téma arumaka aporo hokosa tetá hokono maresane meta Sérapo, meta Péresepo. Péresemo ipi maeyane Héseronepo. Héseronemo ipi maeyane Rámepo.

<sup>4</sup> Rámemo ipi maeyane Amínatapepo. Amínatapemo ipi maeyane Násonepo. Násonemo ipi maeyane Saómonepo.

<sup>5</sup> Saómonemo ipi hinamo Réhape arumaka aporo hokosa hokono maresane Póasepo. Póasemo hinamo Rúte arumaka aporo hokosa hokono maresane Opetepo. Opetemo ipi maeyane Yésepo.

<sup>6</sup> Yésemo ipi maeyane Téfetepo. Téfete ane ipi unihaeaka reapo. Téfetemo Yurayamo hinamo yaroane arumaka hokosa hokono maresane Sórromonepo.

<sup>7</sup> Sórromonemo ipi maeyane Ríapomepo. Ríapomemo ipi maeyane Apaísapo. Apaísamo ipi maeyane Ésapo.

<sup>8</sup> Ésamo ipi maeyane Yihósafatepo. Yihósafatemo ipi maeyane Yóramepo. Yóramemo ipi maeyane Usáyapo.

<sup>9</sup> Usáyamo ipi maeyane Yótamepo. Yótamemo ipi maeyane Éhasepo. Éhasemo ipi maeyane Hesekáyapo.

<sup>10</sup> Hesekáyamo ipi maeyane Manásapo. Manásamo ipi maeyane Émonepo. Émonemo ipi maeyane Yosáyapo.

<sup>11</sup> Yosáyamo ipi maeyane Yakóyakinipo.† Arirakano Yosáyamo aporo hokosa metakira soko hokono murisiapo. Yosáyamo hokosa hokono murisia maiya amo Isiraya aporo ane tipura keako Pápironé hauaka á karikia pusuapo.

<sup>12</sup> Karikia pusuakipoko Yakóyakinimo ipi maeya hokono maresane Siátiopo. Siátiomo ipi maeyane Serápapeopo.

<sup>13</sup> Serápapeomo ipi maeyane Apiútepo. Apiútemo ipi maeyane Eraíyakimero. Eraíyakimemo ipi maeyane Ésopo.

<sup>14</sup> Ésomo ipi maeyane Sétokepo. Sétokemo ipi maeyane Ékimepo. Ékimemo ipi maeyane Eriútepo.

\* **1:2:** Yákopemo aporo hokosa kenosu hokono murisia amo Yu aporo ira keno suane kepomaresapo.

Yahóyakinimo yano meta yano motosa Yakonaepo.

† **1:11:**

<sup>15</sup> Eriútemo ipi maeyane Ereásapo. Ereásamo ipi maeyane Mátanepo. Mátanemo ipi maeyane Yákopepo.

<sup>16</sup> Yákopemo ipi maeyane Yósefepo. Yósefemo ipi hinamoane Maríapo. Maríamo hokosa takapesane Yasupo. Yasu ipi unihaeaka rekeasimo Kotimo máfaraka maresasamo ipi yano motosa Keresopo.

<sup>17</sup> Asiamo Eparahamemo aporo ira wainepe pusuane menorape pukua, senakiane (14) Tefetepo. Tefetemo aporo ira wainepe pusuane menorape pukua, senakiane (14) Pápirone hauaka á tipura keako pusua maiya amo aporo hokosa hokono maresa ayapo. Pápirone hauaka á tipura keako pusua aeyaka kepomarekea menorape pukua, senakiane (14) Keresopo.

*Yasu Kereso takapesane oyapo.*

*Ruki 2:1-7*

<sup>18</sup> Yasu Kereso takapesane oyapo. Ipi kályia Maria ane Yosefemo arumakasiraka fairaka rea maiya amo, Maria tua Ho Kotesamo hokosa makerakano umisapo.

<sup>19</sup> Umirakano asekeea Maria faisa aporo Yosefeane ipi tau reke, somemane motosane kekemaraka tau keneamo reasasamo epo hemakapuraka, "Maria aporo metayaki purakanareapo. Asiamo eaki kára hukuruane aporo suamo e makaiyanapaka faisane tau metakariakosapo."

<sup>20</sup> Aiyaka hemakapukua reakipoko, kituamo Unihae Kotimo hepene aporo peraka Yosefeaki someraka, "Tefetemo aporo ira Yosefeo. Ní hinamo Maríane arumako karekekeea metakariakopo. Ni apea Maríane karikia punie. Ipi umisa akayane Ho Kotesamo hokosa eaki makesapo.

<sup>21</sup> Hokosane aporo hokosa takapeakosapo. Takaperakano e yano motoraka Yasu yano motoanie. Yasu yano motosa kepoamo Isiraya aporo hinamomo makata watikisane rakiraka risikino, i fanasinapaka epo mafasiakosapo."

<sup>22-25</sup> Airakano Yosefe turikia puraka Unihae Kotimo hepene aporomo somesane kaki-maka, Maríane ipi apea karikia pusuapo. Pukua Maríia hokosa takapeasiraka kaya maiya amo, Yosefe eyaki hakása yao pusuafapo. Maríia umiraka kayane aporo hokosa takaperakano asekeea hokosane yano motoraka Yasu yano motosapo. Yasu pesane, makata ane su aiyakasiraka, wate fana porofete aporomo Kotimo someane kaikia sawia popasapo.

Sawia popasane oyapo. "Kaisie, hinamo sakora umiraka kakakosapo. Umiraka kaina aporo hokosa takapeakosapo. Takaperakano e yano motoraka Emánio yano motoanie," aiyaka Unihae Kotimo somerakano porofete aporomo kaikia popahoareapo. (*Aisaia 7:14*)

Popasane faserepesa ayareapo. Arirakano namo meaka Emánio yano motosa kepoane, Kotiane isuyaki rekenapo. Aiyaka yano motosapo.

## 2

*Maiya apera taku aeyaka aporo pesane oyapo.*

<sup>1</sup> Herote unihaeaka rea maiya amo, Yutía hauaka á Petereheme taonea Yasu takapesapo. Takapesa maiya amo, maiya apera taku aeyaka ti makata asera aporo Yarusarame sitia pesapo.

<sup>2</sup> Pekeia ipu someraka, "Hokosa kawe takapesane Yu aporo unihaeaka rekeakosane mayare? Maiya apera takua ti makata haku kumuku fasereperakano asekeea isiaipo hemakapuraka, 'Yu aporomo unihaeane takapereapo.' Aiyaka hemakapukua eaki kekeré-hoko isu perakayiapo."

<sup>3</sup> Airakano Herotemo kaikia unihae metamo e hurutapirapaka mahisisapo. Mahisisane Yarusarame aporomo kairaka fosafapo.

<sup>4</sup> Arirakano Herotemo mahisiraka reke, pirisiti aporo kárane soko, Kotimo somemane tisa aporoane soko, e rea sarimahoko peaesapo. Perakano asekeea Herotemo someraka, "Kotimo unihaeaka rekeasimo murikimasa aporo Kereso pusiehokosaposane, hauaka ma takapeakosaposare?"

<sup>5</sup> Airakano ipu someraka, "Yutía hauaka á Petereheme taonea takapeakosaposapo." Aiyaka takapeakosaposane wate fana porofete aporomo poparaka,

<sup>6</sup> "Yutía hauaka á Petereheme taonee kisiane ape wakasemapo. Wakasema nina apea Unihae takapeakosasamo apeane fanahokosapo. Unihaeamo Isiraya aporo hinamo su Kotimo murikimasane epo asekeea rekeakosapo." Aiyaka porofete aporomo popahoareapo. (*Maika 5:2*)

Aiyaka ipu Heroteaki somesapo.

<sup>7</sup> Someaka farakano Herotemo kaikia i pusiesapo. I pusuakipoko Herote ipi haku reke, ti makata asera aporoane peaesapo. Perakano iaki someraka, "Repo ti makatane sere mamo asesare?"

<sup>8</sup> Airakano ipu ti makata asesa sereane somesapo. Somerakano Herotemo kaikia someraka, "Petereheme taonea hokosa takapesane kope pusie. Pukua hokosa takapesane kokoa aseraka, anoaki somehoko poparipeanie. Nōmo soko hokusane kekerehoko pukusakipoko, anoaki somehoko poparipeanie."

<sup>9</sup> Aiyaka Herotemo somerakano ipu kaikia pusuapo. Puraka fana i maiya apera takua risike ti makata asesane ti makata hakāsa nine efera hunia rekeno asesapo. Aseane ti makatane fanaraka purakano ipu asepe pusuapo. Ti makatane hokosa takapesa apea erekeraka rekeno

<sup>10</sup> aseraka kára sesasapo.

<sup>11</sup> Sesaraka pukua apea yorokoa aseane, hokosa ipi kaityia Mariayaki kakeno asesapo. Aseraka i kakuna porokoa toke hokosaki kekeresapo. Ipu makata mahimuraka taesane mokoa pekea, hokosaki yaku kasapo. Karaka eke korótó soko,<sup>\*</sup> ira pi wape yamona yano motosa ferekese soko, ira pi meta wape yamona yano motosa mua soko makatane mokoa pesane yaku kasapo.

<sup>12</sup> Kaka marekea i namina apea poparipuraka, Heroteaki somehoko pusuafapo. Asiamo kituamo "Herote aseako pukupo." Airakano kaikia, Herotemo apeane koaraka ikia kara meta aeyaka i namina apea pusuapo.

#### *Yasu Iyipi hauaka karikia pusuane oyapo.*

<sup>13</sup> Aporo pesane pusuakipoko, Yosefemo kituamo Unihae Kotimo ipi hepene aporomo Yosefeaki someraka, "Ne takahikia pusie. Hokosane rusua kukusakipoko Herotemo kokoa asekosapo. Aserapaka hokusane soko, hokusamo ipi kaiyiane soko, karikia, Iyipi hauaka tekatarikia pusie. Pukua hauaka á risike nōmo poparipeaerakan peanie."

<sup>14</sup> Aiyaka hepene aporomo makokorotaerakan kaikia, ere yiamo Yosefe takahikia hokosa soko, ipi kaityia soko, karikia, Iyipi hauaka á risikiako tekatarikia pusuapo.

<sup>15</sup> Pukua Herote kukusiraka hitafe rea maiya amo i Iyipi hauaka á risiapo. Iyipi hauaka á risikiako pusiraka, wate fana Kotimo somerakano porofete aporomo kaikia poparaka, "Iyipi hauaka aeyaka nōmo hokosa peaerakan peakosapo." Aiyaka Kotimo somerakano porofete aporomo kaikia popasane faserepesa ayareapo.

#### *Aporo hokosa rusua kukusimo Herotemo somesane oyapo.*

<sup>16</sup> Asiamo ti makata asera aporoane Herote rea poparipeanafonorakan Herotemo hemakapuraka, "Aporoamo anoaki kotafe hokoa rureapo." Aiyaka hemakapuraka ipi kára sapeasapo. Saperaka reke epo hemakapuraka, "Aporo kimisi pesamo ti makata asesa sere ane, somesa sere hakasa yiamo Isiraya aporomo unihaeane takapereapo. Takapesa sere ane menorape pekea, sere o pauanane hokosa kapokararakasiapo." Aiyaka Herotemo hemakapuraka someraka, "Hokosa kapokarasane soko, apapusane soko suane rukua fahoanie. Petereheme taonea soko, Petereheme taone makeraka á risiane soko, aporo hokosa suane rukua fahoanie." Airakano kaikia aporo hokosa suane rukua fasapo.

<sup>17</sup> Rusuane rusiraka wate fana porofete aporo Yaremayamo popasane yaiya faserepesa ayareapo. Porofete aporoamo popasane oyapo.

<sup>18</sup> "Aporomo kaiyiáne Rama apea hinamomo kára hiripurakan kaiyakoso. Hinamo ipi yano motosa Reseremo ipi hokosapoko kára hiripurakan kaiyakoso. Hokosa su rukua fasakipoko and mauwaraka somehoane soko epo kakipayarakano asekosapo." Aiyaka porofete aporomo wate fana popasane kakaro yaiya faserepesa ayareapo. (*Jeremaia 31:15*)

*Yosefemo Iyipi hauaka metakarikia, hokosa soko, ipi kaityia soko karikia, Kariri hauaka á poparipesapo.*

<sup>19</sup> Keseke Herote kurakano asekea, Yosefe Iyipi hauaka reakipoko kituamo Unihae Kotimo hepene aporo pekea Yosefeaki someraka,

<sup>20</sup> "Ne takahisie. Aporo hokosa kukusimo rukusapoko hemakapukua rea aporoane kusuapo. Kusuasamo hokosa soko, hokusamo ipi kaityia soko, karikia hisie. Hikia Isiraya hauaka á risikiako poparihisie."

<sup>21</sup> Airakano Yosefe turikia pukua, takahikia hokosa soko, hokusamo ipi kaityia soko, karikia, Isiraya<sup>†</sup> hauaka á poparihisapo.

<sup>22</sup> Poparihinka kaiyiáne Herotemo maeya Akerease ipi ata finihaoa reke, Yutía hauaka á unihaeaka rekenapakano kaisiapo. Kaikia Yosefe Yutía hauaka á pukusane karekekeea

\* **2:11:** Korótó soko, ira pi wape yamonane soko mone karamo roponapo. Asiamo aporo pesamo Yasuaki karaka, ipu hemakapuraka Yasuane aporo unihae kára rekeakoso. † **2:21:** Isiraya hauaka kára á hauaka kekepo fete feteraka asekea reane meta Yutía hauakapo. Meta Kariri hauakapo. Meta Sameria hauakapo.

reapo. Karekekeea reakipoko kituamo Yutía hauaka á hiakoporakano, Kariri hauaka á pusuapo.

<sup>23</sup> Pukua Nasare apea risikiako pusuapo. Risikiako pusuane pusiraka, wate fana porofete aporo metakiramo somesane oyapo. “E Nasare aporopo, aiyaka aporo suamo aihokosapo.” Aiyaka porofete aporomo somesane faserepesa ayareapo.

### 3

*Yone he tapukumareramo some kasane oyapo.*

*Maka 1:1-8; Ruki 3:1-18; Yone 1:19-28*

<sup>1</sup> Wakasema risina keseke, Yutía hauaka ima yaoa Yone he tapukumarerane pekea aporo hinamoaiki some karáka,

<sup>2</sup> “Kotimo unihaeaka asekeea rekeakosa maiyane makesasamo, repo makata watikisane metakarikia eaki risikiako parihoanie. Epo re asekeea rekeasimo eaki risikiako parihoanie,” aisapo.

<sup>3</sup> Aisa aporoane wate fana porofete aporo Aesayamo poparaka,  
“Aporo ima yaoa rekeakosapo. Reke epo sakepamo someraka, ‘Unihae peakosane ikia kára makotehoanie. Ikia kárane hahaesekeno maereketaehoanie.’ Aiyaka ima yaoa aporoamo somehokosapo.” Aiyaka Aesayamo popasane Yone ane popasapo. (*Aisaia 40:3*)

<sup>4</sup> Ima yaoa Yone rea maiya amo saro kamo iti pasu pesa osoraka, saro kau terakae hikia, kitaro kesé asia nekea, sao he wapesa asia nekea ayíáka reapo.

<sup>5</sup> E rea hauaka á aporo hinamo Yarusarame siti aeyaka soko, Yutía hauaka aeyaka soko, he Yotane makeraka aeyaka soko, aporo hinamo yakai pesapo.

<sup>6</sup> Pekea ipu makata watikisane hufitaerakano, Yonemo iane he Yotanea tapukumurisi- apo.

<sup>7</sup> Yonemo hea tapukumuriraka reke aseane Ferese aporo soko, Satusi aporo soko, i metakira hea tapukumuriasimo perakano asekeea, Yonemo iaki someraka, “Re su heseka ayireapo.\* Kotimo reaki kára saperaka fanasinapaka epamo reaki somerakano, re teketarikia perakanare?

<sup>8</sup> Airakano ira kotesamo wate koteaka perapo. Aina ayíáka repo himu watikisane metakarikia risikiako parisane asekeasimo koteaka susu risikianie.

<sup>9</sup> Ayíáka risikiafunusa nine repo hemakapuraka, ‘Isu Eparahamemo aporo irasasamo Kotimo aporoane isupo. Asiamo isu siaraka risikinapo.’ Aiyaka hemakapukupo. Eparahamemo aporo ira parihoasimo Kotimo eke ane maka, aporomano parihoane sia aporo- mano maparihokosapo.

<sup>10</sup> Asiamo aporomo ira tokorakosakipoko kapi máfaraka area ayíáka, maiya omo Kotimo fanasina motoakosane ayíáka makeraka rekenapo. Ira wate koteaka peanafonona ira ane tokoraka mokoateraka iramo inakasimo paitiyakosapo.

<sup>11</sup> Repo himu watikisane metakarikia risikiako parirakano, nōmo reane he hákasa tapukumurirakanapo. Ano reakipoko keseke aporo kára meta peakosapo. Peraka epo Ho Kotesa soko, ira rufi soko re murikosapo. E aporo kárasasamo aporo raipamo epo tamaka ososane fisiraka maka apura ayíáka nōmo maka puane siahoasifareapo. E aporo kárasasamo nōmo epoko raiparaka rakiako ayiane, ano wakasemasasamo nōmo rakiiane siahoasifareapo. Ano eyaki siasafapo.

<sup>12</sup> Aporo kára ane peraka epo sipete asia foke maka peakosapo. Maka peraka hauaka moroa witi haetaesene fokemo fauhoe, witi namo ane ereketae hurupeperakano, ane mokoa apea taehokosapo. Witi kau ane fofomo mokoa pukua takua hurupeperakano, ane mokoateraka ira rufi kopakapunafonona á paitiyakosapo.” Aiyaka Yonemo somesapo.

*Yonemo Yasuane hea tapukumaresane oyapo.*

*Maka 1:9-11; Ruki 3:21-22; Yone 1:29-34*

<sup>13</sup> Yone ima yaoa rea maiya amo, Yasu Kariri hauaka metakarikia Yonemo e hea tapukumareasimo he Yotanea pesapo.

<sup>14</sup> Perakano Yonemo waeraka someraka, “Nómo ano hea tapukumareane siahoasireapo. Nōmo ne hea tapukumareane siahoasifareapo.”

<sup>15</sup> Airakano Yasumo someraka, “Wae. Nōmo someane nōmo kakimasie. Kotimo makata koteaka rakiniesane etapo makata su koteaka rakikia rosaka taehoko yumo nōmo ano hea tapukumaresie.” Airakano Yonemo aoraka Yasuane hea tapukumaresapo.

<sup>16</sup> Hea tapukumareraka hea sokoperaka ima yapura hianine, tiane kikisi aka kikisi rorakano aseane, Kotimo Ho Kotesa mena nume asia apera ayíáka pekea, Yasua karaparakano asesapo.

\* <sup>3:7</sup> Kotimo re fanasinapaka kaumo hea tapukumuriasimo apere, aiyaka epo somesapo.

<sup>17</sup> Asekea risia maiya amo hepene aeyaka someraka, “Eane nōmo nī hokosapo. E nōmo himu tumurumo kára hemakapukua seserakanapo.” Aíyaka somerakano kaisiapo.

## 4

*Yasumo watikiaka rakismo Satanemo eaki mokopipisane oyapo.*

*Maka 1:12-13; Ruki 4:1-13*

<sup>1</sup> Yasu hea tapukumarekea faraka reakipoko Satanemo Yasuaki mokopipihoasimo Ho Kotesamo Yasu ima yaoa karikia pusuapo.

<sup>2</sup> Pukua sere foti (40) su reámo, sere soko ereamo soko Yasumo makata nesafapo. Nena himu raru reke sere foti ane (40) fahoa e namo kakaro kára meamosapo.

<sup>3</sup> Meamoraka reakipoko Satanemo Yasu kau aseakosakipoko mokopipiraka someraka, “Ne Kotimo hokosasamo, nōmo eke atoane maka nī nakosakipoko farawa maparisie.”

<sup>4</sup> Airakano Yasumo someraka, “Wae. Kotimo sawia popasane oyapo. ‘Apromano koteaka rekeako, farawa hákasa nenaka koteaka rerafapo. Koteaka rekeako Kotimo somesane kakimarakano koteaka rerapo.’ Aíyaka Kotimo sawia popahoareapo.” (*Lo 8:3*)

<sup>5</sup> Aíyaka somerakano Satanemo Yasuane Yarusarame sitia karikia hikia Kotimo ape kopo yapura karikia hikia risike someraka,

<sup>6</sup> “Ne Kotimo hokosasamo, nī yia hauaka atura hurupesie. Huruperakano Kotimo hepene aporoaki ‘E ararerasic,’ airakano ne korakea ekemo kareakohoamo hepene aporomo hokonomo ne máfaraka maka rekeakosapo.” Aíyaka Kotimo sawia popahoareapo. (*Buk Song 9:11-12*)

<sup>7</sup> Airakano Yasumo someraka, “Wae. Kotimo some meta Kotimo sawia popasane oyapo. ‘Ni Unihae Kotiane kau aseakosakipoko aiyakakopo.’ Aíyaka Kotimo sawia popahoareapo.” (*Lo 6:16*)

<sup>8</sup> Aíyaka somerakano Satanemo Yasu karikia tūri kára terayia hisiapo. Hikia risike kamani kekepomo hauaka kekepoa unihaeaka asekea risiane soko, hauaka sua makata namo kakaro kotesa suane soko, Yasuaki tarisiapo.

<sup>9</sup> Tariraka Yasuaki someraka, “Nōmo ano rea kako pekeea kake kakuna porokoa anoaki kekererakano, makata su aserane nōmo unihaeaka asekea rekeasimo né mareakosapo.”

<sup>10</sup> Airakano Yasumo someraka, “Satane ne pusie. Kotimo sawia popasane oyapo. ‘Nōmo Unihaeane Kotipo. Koti ipiaki hákasa kekerehoanie. Epoko hákasa rakinie.’ Aíyaka Kotimo sawia popahoareapo.” (*Lo 6:13*)

<sup>11</sup> Aíyaka Yasumo somerakano Satane pusuapo. Pusuakipoko hepene aporo peraka Yasuane arareraka asekea risiapo.

*Kariri hauaka á Yasumo makata rakira kepomaresane oyapo.*

*Maka 1:14-15; Ruki 4:14-15; Yone 4:1-3*

<sup>12</sup> Yonemo unihae Heroteaki aiyakakopo, airakano Herotemo Yoneane tipura makesapo. Yone tipura makesapakano kairaka Yasu hauaka ane metakarikia, Kariri hauaka á pusuapo.

<sup>13</sup> Pukua Nasare apea waka reane metakarikia pukua, Kapaneame taonea waka reapo. Arirakano he Kariri he fua Sépuru aporo iramo hauaka soko, Nafatari aporo iramo hauaka soko hauaka á Kapaneame taone kisiaapo. Taone kisia á Yasu waka reapo.

<sup>14</sup> Waka rekeasiraka wate fana porofete aporo Aesayamo popasane faserepesa ayareapo. Aesayamo popasane oyapo.

<sup>15</sup> “Sépuru aporo iramo hauaka á soko, Nafatari aporo iramo hauaka á soko, he Yotane yaoraka á soko, he Kariri makeraka hauaka á soko, Yú aporo akiyaki Yu aporo hoanafonosa

<sup>16</sup> ane ereraka risiapo. Ereraka risia aporo hinamoamo Kotimo faesane aseakosapo. Arirakano kurámo mataisa hauaka á aporomano risiane, sere maiyamo faena aiyáka faehokosapo.” Aíyaka popasane faserepesa ayareapo. (*Aisaia 9:1-2*)

<sup>17</sup> Yasu Kapaneame taonea pusua maiya amo epo makata rakirane kepomaresapo. Kepomarekea some karaka, “Koti unihaeaka rekeakosa maiyane faserepesapo. Faserepesasamo repo himu watikisane metakarikia eaki risikiako parirasie,” aisapo.

*Aporo kitafasuaki Yasumo someraka, “Anoyaki peae,” aisane oyapo.*

*Maka 1:16-20; Ruki 5:1-11*

<sup>18</sup> Yasu he Kariri fua pukua aseane Saemone ipi mamanea Enitu tetā asesapo. Arirakano Saemone ipi yano motosa meta Pitapo. Ipi soko, ipi mamanea Enitu soko tetapō makata rakirane pokoa pisinisi rakirapo. Rakiraka risike, tetapō pokoa mokoako hea kasipu kokomarerakano, asesapo.

<sup>19</sup> Asiamo Yasumo tetāki someraka, “Ano patera asesie. Ano patera aserakano tetápō pokoa amora aiyáka aporo hinamo anoa paohokosane pasimokoasimo, nōmo teto muriki-marakanapo.”

<sup>20</sup> Aiyaka somerakano tati kasipuane wate foakaya metakarikia, Yasuyaki hakāsa pusuapo.

<sup>21</sup> Wakasema pukua Yasumo aseane aporo tetā meta risikino asesapo. Asesane Sepetemo hokosa tetā, meta Yamese meta ipi mamanea Yone, tetā wafayayaki kasua risike, kasipu potakahesa petokoraka risikino asesapo. Aseraka tetāne peasimo Yasumo wásapo.

<sup>22</sup> Wárakan wate foaka tetapō wafayane soko, kasuane soko, metakarikia, tati Yasuyaki hakāsa pusuapo.

*Aporomano makata tasa Yasumo mafasane oyapo.*

*Maka 3:7-12; Ruki 6:17-19*

<sup>23</sup> Kariri hauaka ape sumu sua Yasu koraka reke, Yu aporomo sarimana ape sua Kotimo some kotesane some karáka, Koti unihaeaka reane some kasapo. Some karáka aporomano makata kára tasane soko makata wakasema tasane soko, makata tasa kekepo suane Yasumo mafasapo.

<sup>24</sup> Yasumo aporo makata tasane mafasapakano Siria aporomo kairaka Yasu rea aporomano makata tasa su karikia pesapo. Aporomano makata tasa kekepo tape pusuane karikia pesapo. Karikia pesane metakira kau teraka, metakira yatafumo ho mokoa, metakira masuara, metakira kau soko, hokono soko, nariraka korosakataesa aporo su ayíáka makata tape pusuane Yasumo mafasapo.

<sup>25</sup> Ayíáka mafárapako asekea aporo hinamo yakaimo Yasu asekehaerape pusuapo. Pusuane Kariri hauaka aeyaka soko, Tekáporisi hauaka aeyaka soko, Yarusarame siti aeyaka soko, Yutía hauaka aeyaka soko, he Yotane yaoraka hauaka taku aeyaka soko, aporo hinamo yakai pekea Yasu asekehaerape pusuapo.

## 5

*Kotimo makotenane oyapo.*

*Ruki 6:20-23*

<sup>1</sup> Aporo hinamo yakai pesane Yasumo asekea, ūri teraya hikia kayapo. Kayakipoko ipi aporo hakāsa pura pekea eyaki hakāsa toke

<sup>2</sup> Yasumo iaki someraka,

<sup>3</sup> ‘Aporo hinamo metakiramo someraka, ‘Kotimo menane ano forokoa reasasamo, Kotimo hemakapusua ayíáka nōmo hemakapusakipoko seseripo.’ Aisa aporo hinamoane Kotimo unihaeaka asekea rerapo. Asekea reke Kotimo aporo hinamoane makoterakano i seseraka risirapo.

<sup>4</sup> Arirakano aporo hinamo metakiramo hihiripuraka risikino Kotimo iane kuku-nameaka mauanapo. Mauaraka ayíáka makoterakano i seseraka risirapo.

<sup>5</sup> Arirakano aporo hinamomo naminane makáraraka rupiáka somehoanafonoraka, naminane mawakasemaraka auaraka risikino, namina hauaka wo makatane asekea risiki-asimo Kotimo i murikimaka marerapo. Murikimaka ayíáka makoterakano i seseraka risirapo.

<sup>6</sup> Arirakano aporo hinamo metakiramo meamoraka risike makata nakosa soko, he soko nako seséna ayíáka, Kotimo ereketae hemakapurane ayíáka seseraka risikino, seséna aporo hinamoaki Kotimo ereketae hemakapurane siaraka karápo. Kaka ayíáka makoterakano i seseraka risirapo.

<sup>7</sup> Arirakano aporo hinamo metakiramo, aporo hinamo metaki kamenakaraka hemakapurako, kamenakana aporo hinamoane, Kotimo kamenakaraka hemakapurapo. Kamenakaraka hemakapukua ayíáka makoterakano, i seseraka risirapo.

<sup>8</sup> Arirakano aporo hinamomo makata watikiaka hemakapusuane kosoraka, koteaka susu hemakapura aporo hinamoamo Kotiane asekoso. Asekosa aporo hinamoane Kotimo ayíáka makoterakano i seseraka risirapo.

<sup>9</sup> Arirakano metamo metaki saperaka rekeno, sapesane mafahoasimo aporo hinamo metamo maroporakano, eaki Kotimo someraka, ‘Ne nōmo hokosapo.’ Áirapo. Asiamo aporo hinamoane Kotimo ayíáka makoterakano i seseraka risirapo.

<sup>10</sup> Arirakano aporo hinamo metakiramo Kotiane kekemarako, ereketae susu rakisi-asamo, iane aporo metamo mokoatikirakano, iane Kotimo unihaeaka asekea rerapo. Asekea reke Kotimo iane ayíáka makoterakano, i seseraka risirapo.

<sup>11</sup> Asiamo repo ano patera asesasamo reaki aporo metakiramo ekeneraka, rukua mokoatikiraka, kotafe topakamarakano, reane Kotimo makoterakano seséraka risikianie.

<sup>12</sup> Seséraka risike hepene yapura repo makata ropo kotesa kára toasasamo, kakaro kára seseraka risikianie. Asiamo wate fana aporomo Kotimo some kará porofete aporoane mokoatikisa ayíáka, re soko ayíáka mokoatikihokosapo.” Aiyaka Yasumo somesapo.

*Yasumo kifiri soko, faenane soko, takumeaka somesane oyapo.  
Maka 4:21; Maka 9:50; Ruki 14:34-35; Ruki 11:33*

<sup>13</sup> Yasumo someraka, "Makata torenapaka kifiri rukua taesa atoa ayiáka, aporomo makata watikisane hauaka sua suakataehokohoamo kifirimo<sup>\*</sup> rusua pórasha asiane repo. Arirakano kifiri wapesane farakano, efera hunia mawapenafapo. Kifiri wape fasa néna taehoane siahoasifasekeno, kifiriane mokoatenapo. Mokoatesane aporo puraka korakemo fininapo.

<sup>14</sup> Arirakano hauaka wo katorakano sere maiyamo faena ayiáka faena asiane repo. Arirakano ape úri teriyá kisiane kakamasakipoko makata metamo matainafapo.

<sup>15</sup> Arirakano aporomo nafa pakimaka motokoa taramomo karotapirafapo. Nafa pakimaka apea waremaresa faerakano aporo hinamo suamo aserapo.

<sup>16</sup> Nafa pakimaka waremaresa kára faeraka area ayiáka, repo ayiáka koteaka rakiraka risikino aporo hinamo suamo aseraka, repo Ata hepene yapura areaki kekerehokosapo," aiyaka Yasumo somesapo.

*Kotimo somemane motosane Yasumo somesane oyapo.*

<sup>17</sup> Yasumo someraka, "Repo hemakapuraka, 'Fana Kotimo somemane motosane soko, Kotimo some kará porofete aporomo somesane soko, Yasumo rukupateraka metakari-akosapo.' Aiyaka hemakapukupo. Kotimo somemane motosane soko, porofete aporomo somesane soko, rukupateraka metakariakosakipoko, ano pesafapo. Kotimo somemane motosane soko, porofete aporomo somesane soko hakása nine siaraka ayiakakosakipoko, ano pesapo.

<sup>18</sup> Hao, kaisie. Nómo some one kakaro somerakaripo. Hepene yapurane soko, hauaka kára one soko, fahoasiraka area maiya amo, Kotimo somemane ane soko rekeakosapo. Somemane popasane hakása meta soko metakariakosafapo. Ayiakakosapo aiyaka popasane, su kakaro yaiyakakosapo.

<sup>19</sup> Asiamo aporo metamo hemakapuraka, 'Kotimo somemane metane fanapo. Metane kesekepo. Kesekeane metakariane siahoasireapo.' Aiyaka hemakapuraka, aporo metakiramo soko, Kotimo somemane wakasemané metakarisimo, epo some karakano, some akara aporoane Kotimo unihaeaka asekeea rea aporo kesekeane epo. Arirakano aporomo Kotimo somemane suane kakimaka, aporo metakiramo soko kakimakasimo some karakano, some akara aporoane Kotimo unihaeaka asekeea rea aporo fanane epo.

<sup>20</sup> Hao, kaisie. Nómo some one kakaro somerakaripo. Fere aporomo soko, Kotimo somemane tisa aporomo soko, ipu namina ereketaeraka<sup>†</sup> hemakapukua rakiraka risiane, repo marokeraka ereketaeraka hemakapunafonorakanone re Kotimo unihaeaka rea hauaka á hiakosafapo." Aiyaka Yasumo somesapo.

*Aporoaki sapenane Yasumo somesane oyapo.*

<sup>21</sup> Yasumo someraka, "Wate fana repo makasa kaua kekemaki somesane somepe pekea repo soko kaisiapo. Kaisiane oyapo. 'Aporo kukusimo rukupo. Aporo meta nómo rusua kurakanone, né hukurukua fanasihokosapo.' Aiyaka somehoareapo. (Kisim Bek 20:13; Kisim Bek 21:12)

<sup>22</sup> Somesa nine nómo reaki some meta one somerakanapo. Aporo metamo ipi aporo tákéaki saperakan, e fanasihoasimo hukurura apea hukurukusapo. Arirakano aporo metamo ipi aporo tákéaki saperaka hikumisia ekenerakano, Yarusarame sitia hukurura kepo kaira aporo káramo maropohoasimo karikia pukusapo. Arirakano aporo metamo ipi aporo tákéaki mokoatikiraka saperaka someraka, 'Ne himu rekerifapo.' Aiyaka yakasa ho mareraka mokoatikarakaka somesa kasá aporoane heao hauaka ira rufia pusiehokosapo.

<sup>23</sup> Asiamo maiya metamo Kotiaki makata yaku akaramo nōmo hemakapuraka, 'Nómo aporo tákemo anoaki mahisiraka rekenapo.' Aiyaka hemakapukua

<sup>24</sup> Kotiaki makata yaku kakakosane haru kafararaka fore teporoa taeraka nōmo ní tákemo neaki mahisisane fana hokono mokoa mafahoko punie. Pukua titi hokono mokoa mafaraka pariperaka makata yaku kakakosapoko taesane kakanie.

<sup>25</sup> Arirakano aporo metamo neaki someraka, 'Nómo ano apihoanie.' Aiyaka ne hukuruko ikia kara puraka risike, nōmo eaki mahisisane metakarinie. Metakarikia api kaka, tetápo titi makata watikisane mafahoanie. Mafahoanafonorakanone hukuarura maiya amo hukurura kepo kaira aporomo terakaiyamosaki ne tarikia someraka, 'Aporoane tipura makeanie.'

<sup>26</sup> Airakano neaki api kakaniesane siaraka kakanafonorakanone, ne tipura makesane tonotaehekosafapo." Aiyaka Yasumo somesapo.

\* **5:13:** Makata nakosa kifiri rusua wapenapo. Aiyáka kifiri wapena asiane repo. † **5:20:** Aporomo asekeasimo Fere aporomo ereketaeraka sikiraka risia nine i aporo himu tetáraka risike, i namina makáraraka hemakapukua risiapo.

*Aporomo hinamo hakimarané Yasumo some kasane oyapo.*

<sup>27</sup> Yasumo someraka, "Makata fana somesesuane repo kaisiapo. Kaisiane oyapo 'Hinamo hakimakopo.' Aiyaka somesesupo. (Kisim Bek 20:14)

<sup>28</sup> Somesa nine nōmo some meta one somerakanapo. Aporomo hinamo aseraka himu puraka, 'Hinamo ane hakimakaripi,' aiyaka hemaka apura yiamo hinamoane himumo hakimarananapo.

<sup>29</sup> Asiamo ne hi tumurumo makata watikisané rakisimo kirimarakano, hiane pokomaka mamakatehoanie. Hi wakasema hakásamo ne kau suane heao hauaka á karikia purapaka, hi wakasema hakásane pokomayane siahoasireapo.

<sup>30</sup> Arirakano ne hokino tumurumo watikiaka rakirakano hokinoane patekemaka mamakatehoanie. Hokino tumuruamo kau su kirimarakana heao hauaka á karikia purapaka, hokino hakásane patekemaka mamakatehoane siahoasireapo." Aiyaka Yasumo somesapo.

*Aporomo hinamo fimarerane Yasumo somesane oyapo.*

*Matiu 19:9; Maka 10:11-12; Ruki 16:18*

<sup>31</sup> Yasumo someraka, "Makata fana some kasesuane oyapo. 'Aporomo ipi asea fimesane aporo suamo asekeá hemakapusimo hinamoaki sawi poparaka karáka, "Ne fimarerakanapo." Aiyaka sawi poparaka kakanie.' Aiyaka some kasesupo. (Lo 24:1)

<sup>32</sup> Some kasa nine nōmo reaki some meta one somerakanapo. Aporomo ipi hinamo arumasane aporo metayaki mokome punafonorakano yia, fimarerakanone aporoamo rara-porakanapo. Hinamo fimesane aporo metamo arumarakano Kotimo asekeá hemakapusimo, 'Hinamoane aporo rea pura hinamoreapo. Arirakano aporoamo hinamoane hakimarananapo.' Aiyaka Kotimo hemakapurapo. Asiamo rarapo kepoane hinamo fimesesa aporo ayapo." Aiyaka Yasumo somesapo.

*"Aumaraka somehokopo," aiyaka Yasumo somesane oyapo.*

<sup>33</sup> Yasumo someraka, "Wate fana repo makasa kaua kekemaki somesane somepe pekea repo soko kaisiapo. Kaisiane oyapo. 'Nōmo makata rakiakoso, aiyaka aumaraka somesane metakariakopo. Unihaemo asekeasimo nōmo aumaraka someraka ayiakakos-aposane kakaro ayiakanie,' aiyaka somehoareapo. (Wok Pris 19:12; Namba 30:2; Lo 23:21)

<sup>34</sup> Makasa kaua kekemamo somesa nine, nōmo reaki some meta one somerakanapo. Makata meta yano hokoa aumahokopo. Hepene yapura Koti unihaeaka sea kára kayasasamo, hepene yapurane yano hokoa aumahokopo.

<sup>35</sup> Arirakano Koti ipi hepene yapura kake, hauaka kára one epo korakemo finiraka kayasasamo, hauaka kara one soko, yano hokoa aumahokopo. Arirakano Yarusarame sitiane soko yano hokoa aumahokopo. Yarusarame sitiane Unihae Káramo sitipo.

<sup>36</sup> Arirakano repo wamoane soko yano hokoa aumahokopo. Wamoan uni itiane hakesane soko, eresane soko, repo aporomanomo marerafapo.

<sup>37</sup> Asiamo some kakarorakae aihoasimo oroko makata aumarane soko, yátafu aumarane soko, Kotiaki hokino soneraka aumarane soko, su kepoane Satanepo. Asiamo makata ane yano hokoa aumaraka aumahokopo. Aohoko hemakapuraka kakaro aohoanie. Waehoko hemakapuraka kakaro waehoanie." Aiyaka Yasumo somesapo.

*Rukuroponane Yasumo somesane oyapo.*

*Ruki 6:29-30*

<sup>38</sup> Yasumo someraka, "Makata fana somesesuane repo kaisiapo. Kaisiane oyapo. 'Aporomo ne hi rukua faurakano, e soko hi fauhoasimo rukua ropohoanie. Aporomo ne akai ruraka mere rukurokorakano, e soko mere rukurokohoasimo nōmo rukuropo-hoanie.' Aiyaka somesesuane repo kaisiapo. (Kisim Bek 21:24; Wok Pris 24:20; Lo 19:21)

<sup>39</sup> Ipu somesa nine nōmo reaki some meta one somerakanapo. Aporomo watikisamo ne mokoatikirakano nōmo eaki ropo mokoatikhokopo. Aporomo ne akai pare tumurua rurakano, nōmo rukuroponafaraka akai pare kasakai takua soko rusimo tarinie.

<sup>40</sup> Arirakano hukurura kepo kaira aporomo kaiyisimo aporo watikisamo neaki hukurukua someraka, 'Nōmo pasu ososane ano makasie.' Airakano pasu ososane e karaka, pasu ososa metane soko e kakanie.

<sup>41</sup> Arirakano kamani aporomo neaki paroaka someraka, 'Nōmo makata fato tame yia yaku maka pusie.' Airakano nōmo seseraka e arareraka yamenoa soko yaku maka punie.

<sup>42</sup> Asiamo aporomo neaki makasierakano nōmo kakanie. Aporomo neaki makata fore makasierakano kakanie. Waehokopo." Aiyaka Yasumo somesapo.

*"Aporomo ne mokoatikirakano nōmo eaki himu tumurumo hemakapunie." Aiyaka Yasumo somesane oyapo.*

*Ruki 6:27-28; Ruki 6:32-36*

<sup>43</sup> Yasumo someraka, "Makata fana somesesuane repo kaisiapo. Kaisiane oyapo. 'Aporo tákemo neaki himu tumurumo hemakapurakano nōmo soko eaki himu tumurumo hemakapunie. Aporomo neaki hisirakano nōmo soko eane hisihoanie.' Aiyaka fana somesesuane. (Wok Pris 19:18)

<sup>44</sup> Somesa nine nōmo reaki some meta one somerakanpo. Aporo metamo nē mokoatikirakano, nōmo eaki himu tumurumo hemakapunie. Eane Kotimo ararehoasimo kurikurihoanie.

<sup>45</sup> Eane hemakapukua kurikuriraka reke, repo Ata hepene yapura reamo makata rakira ayíáka, reane ipi hokosa pariraka ayíáka rakirakanapo. Asiamo aporo watikisamo hauaka á soko, aporo kotesamo hauaka á soko, ipu suamo hauaka á sere maiyamo faehoasimo, Kotimo sere maiyane makarapo. Arirakano kotafe somera aporo soko, kakaro somera aporo soko, ipu suamo hauaka á yao peasimo Kotimo makarapo.

<sup>46</sup> Aporo tákemo ne himu tumurumo hemakapurakano, nōmo soko eane ropo himu tumurumo hemakapusuakipoko, 'Kotimo anoaki makata ropo kakakosapo.' Aiyaka hemakapurane siahoasireare? Wae, siahoasifareapo. Nōmo ropo himu tumurumo hemakapukua rekeno, ne takese mora aporo area ayíáka rekenapo. Aporo watikisamo hemaka apura ayíáka repo ayíáka hemakapurakanapo. Arirakano repo aporo tákane soko hemakapurara yia, aporo metakirane soko himu tumurumo hemakapunie.

<sup>47</sup> Nōmo ni aporo ira ane hákasa makoteraka, aporo metane asekepayaraka makefehoane siahoasireare? Wae, ane siahoasifareapo. Nōmo ni aporo ira hákasaki makoteraka, aporo metane asekepayaraka makeferaka rekeno, ne nena aporo area ayíáka rekenapo.

<sup>48</sup> Asiamo nōmo Ata hepene yapura reamo koteaka reke aporo hinamo suane himu tumurumo hemaka apura ayíáka, ne soko koteaka reke, aporo hinamo suane himu tumurumo hemakapunie." Aiyaka Yasumo somesapo.

## 6

*"Aporo himu tetáraka arisia ayíáka re risikiakopo." Aiyaka Yasumo somesane oyapo.*

<sup>1</sup> Yasumo someraka, "Nōmo Kotiaki patera asekea rakirane aporo suamo asekea ne makáraraka kekerehoasimo rakiakopo. Nōmo ni yia makáraraka rupiraka sikiraka rakiakopo. Nōmo Kotiaki patera asekea rakiraka, aporo suamo asekea ne makáraraka kekerehoasimo rakirakano, nōmo Ata hepene yapura reamo neaki makata ropo kakakosapoko asiane, nōmo ni yiamo aiyanamo, nōmo makata ropoane huruperakanapo.

<sup>2</sup> Asiamo aporo makata forokoa reane nōmo asekea makata akara maiya amo, tau kakanie. Aporo suamo asekea ne makáraraka kekerehoasimo, aporo su hikumisia kakakopo. Aporo su hikumisia akaráraka ayíáka, aporo himu tetáraka hemakapukua reamo\* ayíáka makata karápo. Ipu makata karáne Yu aporomo sarimana apea soko, ikia kára soko, makata karápo. Ayíáka makata karakano, aporomo asekea kekereraka, 'Epo makata kára akare.' Airakanone, aporoamo makata ropoane sia amara ayapo. Asiamo nōmo reaki kakaro somerakaripo.

<sup>3</sup> Arirakano aporo makata forokoa reane nōmo makata karáka, tau kakanie.<sup>†</sup> Aporo metakiramo aseakohoamo, i hikumisia kakakopo. Arirakano aporo metakiramo kaiyakoamo, somehokopo.

<sup>4</sup> Faremarekea kakakosakipoko ayíáka kakanie. Akara maiya amo titi haku toke karakano, nōmo faremarekea rakisiante nōmo Ata hepene yapura reamo aseraka epo ne makotehokosapo." Aiyaka Yasumo somesapo.

*Kurikurinane oyapo.*

*Ruki 11:2-4*

<sup>5</sup> Yasumo someraka, "Nōmo kurikuriraka aporo himu tetáraka reamo kurikurisane kaikia, ayíáka kekemarakaka kurikurihokopo. Aporo metamo ikia kara reke kurikuriraka, anakano aporo metamo Yu aporomo sarimana apea aporo suamo kaiyisimo kurikuriraka anapo. Arirakano, aporo suamo aseraka someraka, 'E aporo kotesapo.' Airakanone aporoamo makata ropoane sia amara ayapo. Asiamo nōmo reaki kakaro somerakaripo.

<sup>6</sup> Arirakano nōmo kurikuriraka nōmo ni apea ni haku pukua ikia koro mapirkika reke, kurikurihoanie. Nōmo ni haku kurikuriraka reke, ni Ata aporomanomo asekeanafonosane fararekeno eaki kurikurihoanie. Kurikurinane ni Atamo kaikia ne makotehokosapo.

\* **6:2:** Aporo himu tetá reane metakira Fereze aporopo. † **6:3:** Tau kayane pisini meaka uyáka popasapo. Nōmo ni honoko kasakaimo, ni honoko tumurumo makata karáne aseakohoamo tau kakanie, aiyaka popasapo.

<sup>7</sup> Nena aporomo hemakapuraka, 'Kára kurikurirakano Kotimo kaiyakosapo.' Aíyaka hemakapuraka, ipu some kára waseremaka some nokone pukua kurikurinapo.

<sup>8</sup> Ipu kurikurina ayíáka, nómó kekemaraka kurikurihókopo. Nómó makata siaraka tokoanafonosane soko, himu siaraka rekeanafonosane soko, nómó kurikurihoasiraka, ní Ata hepene yapura reamo fana hemakapurakayiapo.

<sup>9</sup> Asiamo repo kurikuriraka úyaka kurikurihoanie. 'Atao. Ne isiapo Ata hepene yapura rekenapo. Ne yano motosa kakaro kára haku kotesa susuane makama fanahoasimoripo.

<sup>10</sup> Aporo sumo himua ne uniihaeaka rekeasimo hemakapurakaripo. Hepene yapura nómó ní hemakapusua aina ayíáka, hauaka wo soko ayikasimo hemakapurakaripo.

<sup>11</sup> Pipu makata nakosane pipu yía nasimo, siaraka makanie.

<sup>12</sup> Aporo metamo isuaki mokoatikirakano, isiapo ropo mokoatikinane mafaraka mamrerurakano asekea, isiapo watikisane soko, nómó mafaraka mameraruhoanie.

<sup>13</sup> Isu kau aseakosane peakohoamo nómó isu asekea rekeanie. Satanemo isu mokopipi-hokoamo isu mafasinie.' Aíyaka kurikurihoanie.

<sup>14</sup> Asiamo aporomo neaki watikiaka rakisiáne, nómó ropo mokoatikihoanafonoraka metakarirakano, nómó Ata hepene yapura reamo nómó watikisane soko metakariakosapo.

<sup>15</sup> Arirakano aporomo neaki watikiaka rakisiáne, nómó ropo mokoatikinane metakari-ianafonorakano, nómó watikisane soko, nómó Ata hepene yapura reamo metakari-akosafapo." Aíyaka Yasumo somesapo.

*Kotimo seséhoasimo makata nakosa sokoainane oyapo.*

<sup>16</sup> Yasumo someraka, "Makata nakosa sokoairaka<sup>‡</sup> aporo himu tetáraka risiamo sokoaiana ayíáka, nómó ayíáka sokoaihókopo. Ipu hi kumisi yuyukuraka risike, ipu makata nakosa sokoaisane, aporo suamo hemakapusimo, meamoraka koraka risirapo. Meamoraka koraka risiane aporo suamo asekea kekererakano, ipu makata ropoane sia amara ayapo.

<sup>17</sup> Arirakano nómó Kotimo seséhoasimo makata nakosa sokoairaka aporo suamo hemakapukoamo, ní hi kumisi kusuraka, uni iti unisakemo rakinie.

<sup>18</sup> Rakikia aporo suamo aseakohoamo tau makata nakosa sokoairakano, nómó faremarekea sokoaisane nómó Ata ipi hákasamo aserakanapo. Aseraka epo ne makotehokosapo." Aíyaka Yasumo somesapo.

*Hepene yapura makata mahimuna ane taehoasimo Yasumo somesane oyapo.*

*Ruki 12:33-36*

<sup>19</sup> Yasumo someraka, "Hauaka wo makata mahimuraka taesane metane mopenapo. Metane surisurimo nenapo. Metane hakimora aporomo ape ikia koro mapirisiane soko, roparaka hakimorapo. Anapaka hauaka wo makatane mahimuraka taehokopu.

<sup>20</sup> Nómó makata mahimuna ane hepene yapura taehoasimo rakinie. Hepene yapura makata taesane aporo metamo hakimorafapo. Surisurimo soko nenafapo. Moperaka soko mopenafapo.

<sup>21</sup> Asiamo nómó hauaka wo makatane mahimuraka sarimaraka taeraka rekeno hauaka wo makatane hákasa hemakapukusapo. Arirakano hepene yapura makata mahimuna ane sarimaraka taeraka rekeno hepene yapura makata taesane hákasa hemakapukua rekeakosapo." Aíyaka Yasumo somesapo.

*"Ní kaumo nafa ásiáne ní hipo," aisane oyapo.*

*Ruki 11:34-36*

<sup>22</sup> Yasumo someraka, "Ní kaumo nafa ásiáne ní hipo. Ní himo makata su koteaka asekea takéeka rekeno ní kauane faeraka rekeakosapo.

<sup>23</sup> Ásiáne ne hi meraka reke, ne kauane soko, katoraka rekeakosapo. Katosakipoko faesa reane katosamo suaka taehokosapo. Suaka taerakanato katosane kárahokosapo." Aíyaka Yasumo somesapo.

*"Hauaka wo makatane hemakapukupo." Aíyaka Yasumo somesane oyapo.*

*Ruki 16:13; Ruki 12:22-31*

<sup>24</sup> Yasumo someraka, "Aporo posesa tetápoko aporo raipa hakásamo rakirafapo. Aporo raipa hakásamo aporo posesa tetápoko rakiraka, metaki seseraka rakiraka, metaki hisiraka rakiakosapo. Aina ayíáka aporomo Kotipoko hemakapukua rakirane soko, monepoko hemakapukua rakirane soko, tetáraka rakiane siahoasifareapo.

<sup>25</sup> Asiamo nómó some one neaki somerakanapo. Ne hitaferaka rekeako he soko, makata nakosane soko, makata akipoko kára himu nekea hemakapukupo. Patera yase risirapaka pasu osohokosane, kára himu nekea hemakapukupo. Hitafe areamo makata nená hákasa

<sup>‡</sup> 6:16: Maiya metakiramo aporomo Kotiaki kurikurihoko makata nakosa sokoairaka ayíáka kurikurinapo.

ayare? Kaua pasu osohokosa hákasa ayare? Wae, hákasa ayafapo. Kotimo neaki himu ha kasasamo makata nakosane soko, neaki kakasifareare? Ao, epo neaki sia kakakosapo. Neaki kauane kasasamo pasu osohokosane soko, epo neaki kakasifareare? Ao, epo sia kakakosapo.

<sup>26</sup> Mená koraka torane asekeanie. Menámo makata nakosa pororafapo. Witi hae surakano menámo popatenafapo. Witi hae keseke nakosakipoko apea taenafapo. Tae-hoanafonorakano menáki nómó Ata hepene yapura reamo makata nakosa karakanapo. Menáki karásasamo aporomanoaki kakasifareare? Ao. Aporomanoane ipi kará hemakapukua kakakosapo.

<sup>27</sup> Arirakano aporomanomo ipi himu hemakapuramo, 'Ano kukusane hisiripo.' Aíyaka himu nekea rekeno, e kukusa sere motosane marokehokosare? Wae, marokehokosafapo.

<sup>28</sup> Arirakano pasu makosakipoko himu nekea rekeakopo. Sako wemeane hemakapunie. Sako wemeane taneheakosakipoko sako wememo namina yia makata rakirare? Wae, makata rakirafapo. Sako weme suhoasimo sako wememo pasu susane maka irinare? Wae, sako wememo ipi hemakapukua wateane sunapo.

<sup>29</sup> Hao, kaisie. Wate fana Soromone aporo kára unihaeakaa reke, ipi pasu kotesa ososapo. Soromonemo pasu ososane kotesa nine, sako weme wateane namo kakaro kotesapo.

<sup>30</sup> Arirakano asane tanehekeea risiane Kotimo makoteraka wate karápo. Karakano asane pipu tanehekeea risiane, wakasema keseke iramo paiyiane kukua kerapo. Kukua kesane, maiya wakasemamo tanehekeea risia nine, Kotimo asekeea rerapo. Kotimo asane asekeea area ayíáka, nómó pasuane fahokohoamo, Kotimo neane ayíáka asekeea rekenapo. Kotimo ne asekeea rekeno yia, nómó Kotiaki himumo hakása wakasemarakaa hemakapurakanapo.

<sup>31</sup> Kotimo reane asekeea rerasamo úyaka hemakapukupo, 'Makata nakosa ma mokoakosare? He ma takamakosare? Pasu fasakeno ma mokoakosare?' Aíyaka himu nekea kára hemakapukupo.

<sup>32</sup> Arirakano nena aporomo maiya suamo makata nakosane soko, pasuane soko, kára himu tumurumo hemakapurapo. Arirakano makata nakosane soko, pasu osohokosane soko, farakano mokoakosane nómó Ata hepene yapura reamo hemakapurapo.

<sup>33</sup> Asiamo Kotimo ne unihaeakaa asekeea rekeasimo matumuruhoanie. Kotiane ereketaeraaka area ayíáka ereketaeraaka rekeako himu tumurumo ayíáka hemakapunie. Ayíáka hemakapukua rekeno makata nakosa soko, pasu soko, siaraka mokoakosapo.

<sup>34</sup> Asiamo rau ayiakakosane rau yia hemakapunie. Pipu hemakapukupo. Pipu waforohokosane pipu sere ayapo. Rau waforohokosane rau sere ayapo." Aíyaka Yasumo somesapo.

## 7

*"Aporo metane hokomaka somehokopo," aisane oyapo.*

*Ruki 6:37-38; Ruki 6:41-42*

<sup>1</sup> Yasumo someraka, "Nómó aporo metane mawakasemahoasimo hokomaka someraka, E watikiaka are. Ano koteaka rekenapo. E area ayíáka ano rekenafapo." Aihokopo. Aihoanafonorakano aporo metakiramo soko, Kotimo soko, neaki ayíáka somehokosafapo.

<sup>2</sup> Nómó aporo meta ayíáka mawakasemarakaa hokomaka somerakano, aporo metakiramo soko, neaki ayíáka mawakasemarakaa hokomaka somehokosapo. Arirakano nómó someane parakuraka akara ayíáka, neaki aporo metakiramo soko, ayíáka parakuraka neaki kakakosapo.

<sup>3</sup> Nómó ní maémo hia makata pepeno wakasema akayane nómó aseraka yia, nómó ní hia makata pepeno kára akayane, marirakano asekepayarakanare?

<sup>4-5</sup> Asekepayarakaa yia ní maeaki someraka, 'Ne hia makata pepeno wakasema akayane, nómó maka mamakatehokosapo.' Aíyaka somerakanone ne aporo himu tetáraka rekenapo. Fana nómó ní hia makata pepeno kára akayane maka mamakatehoanie. Mamakateraka faraka, ní maémo hia makata pepeno wakasema akayane maka mamakatehokosakipoko koane nómó ní himo sia koteaka aseakosapo.

<sup>6</sup> Arirakano Kotiaki makata yaku kakakosane kásaki kakakopo. Arirakano saro perakano saro hikumisi neneme yia, sekete kokomareakopo. Kokomarerakano seketeane saromo finiraka reke, oropatea kenetapikia marekea, neane kekemarakaa rukua motokoa nakosapo." Aíyaka Yasumo somesapo.

*Kurikurinane oyapo.*

*Ruki 11:9-13*

<sup>7</sup> Yasumo someraka, "Makata makosakipoko Kotiaki kurikurihoanie. Kurikurirakano Kotimo neaki makakosapo. Himo aseako koanie. Korakano kokoa aseraka makosapo. Ikia koro ropakamakasimo paroparohoanie. Paroparorakano Kotimo ropakamakosapo.

<sup>8</sup> Asiamo makata mako Kotiaki kurikurirakano makosapo. Makata aseako himo korakano kokoa asekosapo. Nómó ikia koroa paroparorakano, Kotimo ropakamakosapo.

<sup>9</sup> Arirakano nómó ní hokosamo someraka, ‘Atao, ano asipa makasie.’ Airakano nómó ní hokosaki eke kakakosare? Wae, eke kakakosafapo.

<sup>10</sup> Arirakano hokosamo someraka, ‘Ano pokoa makasie.’ Airakano nómó eaki yapaká kakakosare? Wae, yapaká kakakosafapo.

<sup>11</sup> Asiamo ne himu watikisa yiamo nómó hokosaki makata kotesa karápo. Akara ayiáka, nómó Ata hepene yapura reamo soko, repo makata makasie aisa aporo hinamoaki Atamo makata namó kakaro kotesane kakakosapo.

<sup>12</sup> Asiamo aporo metamo ne ayiakasimo nómó hemakapuraka, nómó soko aporo metaki ayiakanie. Asiamo ropo aina someane Mosesemo somemaneane soko, porofete aporomo somesane soko, some kepoane hakásá yiylareapo.” Aiyaka Yasumo somesapo.

*Ikia kara Yasumo takumeaka somesane oyapo.*

*Ruki 13:24*

<sup>13</sup> Yasumo someraka, “Fanasina hauaka ikia kara kuru parausakipoko aporo pukusane mawetenafapo. Mawetehoanafonorakano aporo yakai ikia kara á purapo. Arirakano ne yaiya rera hauaka á hiakosakipoko ikia kara makoropasa á hinie.

<sup>14</sup> Makoropasasamo maweteraka wafororaka yorokoa yaiya rera hauaka á hiakosapo. Ikia karane wakasemasasamo aporo hukusimo kokoa asekea hirapo.” Aiyaka Yasumo somesapo.

*Ira wate Yasumo takumeaka somesane oyapo.*

*Ruki 6:43-44*

<sup>15</sup> Yasumo someraka, “Kotafe porofete aporomo Kotimo some kará porofete aporo pariraka some karápo. Ipu someane repo kakimarakarihoamo, kotafe hókokekea some-hokosapo. Asiamo kotafe porofete aporo ayarihoamo, koteaka asekeanie. Saro wofe irirasane kotafe saro pipi pariraka risikirihamo, koteaka asekea takeanie.

<sup>16</sup> ‘Kotimo some kará aporore? Kotimo some kará apororakapo.’ Aiyaka takekea hemakapukusakipoko, epo makata rakirane asekea takeanie. Aporomo makata rakirane, sako wate asiapo. Sako utumua sako karepe wate pekerisia tumarafapo. Arirakano kiáne ira foke wate pekerisia tumarafapo.

<sup>17</sup> Ira kotesamo wate kotesa susu perapo. Ira watikisamo wate watikisa susu perapo.

<sup>18</sup> Ira kotesamo wate watikisa perafapo. Ira watikisamo wate kotesa perafapo.

<sup>19</sup> Iramo wate kotesa peanafononane, aporomo tokoraka mamakateraka, iramo inakasimo pairapo.

<sup>20</sup> Asiamo kotafe Kotimo some kará aporo pariraka rakirakano asekeanie. Asekea hemakapuraka, ‘E Kotimo some kará aporofapo.’ Aiyaka hemakapunie.” Aiyaka Yasumo somesapo.

*Aporoaki Yasumo someraka, “Ano metakarikia pusie,” aihokosane oyapo.*

*Ruki 13:25-27*

<sup>21</sup> Yasumo someraka, “Aporo metakiramo anoaki someraka, ‘Unihae, Hokopusuo,’ aiyaka kaumo wára aporoane Kotimo ipi unihaeaka asekea rea aporomano akiyaki pao-hokosafapo. Asiáne nómó Ata hepene yapura reamo hemakapusua kekemaraka rakira aporo hinamoane, i háksa paohokosapo.

<sup>22</sup> Hukururakana sere amo aporo hinamo yakaimo anoaki someraka, ‘Unihae, Hokopusuo, ne yano motosa makárahoasimo, Kotimo someane isiaipo kaikia someane some kasapo. Ne yano hokoa yatafuaki metakarikia pusierakano, i pusuapo. Ne yano motosa kárasasamo isiaipo wakapuaka rakirakano, aporo metakiramo asekea fofasapo.’

<sup>23</sup> Airakano nómó someraka, ‘Reane nómó aserafapo. Re aporo watikisamaso ano metakarikia re pusie,’ aihokosapo.” Aiyaka Yasumo somesapo.

*Aporo tetámo ape tetá kisiáne Yasumo takumeaka somesane oyapo.*

*Ruki 6:47-49*

<sup>24</sup> Yasumo someraka, “Aporomo koteaka hemakapukua hauaka parosakipoko ape kisia paroaka area ayiáka, nómó some kakimasa aporoane ayiáka rerapo.

<sup>25</sup> Ape kisiakipoko atifo yaoyaki kára peraka, he huku puraka, hauaka parosa á ape kisisamo rakarimaka purafapo.

<sup>26</sup> Arirakano aporo koteaka hemakapurafaraka hauaka sakipua ape kisia area ayiáka, nómó some kakipayasa aporoane ayiáka rerapo.

<sup>27</sup> Ape kisiakipoko yao kára atifoyaki kára peraka, he huku purapo. Puraka ape hauaka sakipua kisiáne rakarimaka puraka anu airapo,” aiyaka Yasumo somesapo.

<sup>28</sup> Someane some kaka farákano aporo hinamo yakaimo kaikia himu faraka fofasapo.

<sup>29</sup> Kotimo somemane tisa aporomo some akara ayíáka Yasumo ayíáka some kasafapo. Epo wakapuaka some karakano kairaka, "Someane enahoasifareapo." Aíyaka aporo hinamo fofasapo.

## 8

*Aporo toropakesa Yasumo mafasane oyapo.*

*Maka 1:40-45; Ruki 5:12-16*

<sup>1</sup> Yasu ūri terayia hikia kayane pariperakano, aporo yakaimo epo makata rakirane asekehaerape pusuapo.

<sup>2</sup> Asekehaerape puraka aporo toropakesa Yasu rea peraka, Yasu ipi yano motosa káraro, ayíáka hemakapukua kakuna porokoa kake someraka, "Unihaeo, nómó ano mafahoko seseraka soko metao, seserire?"

<sup>3</sup> Airakano Yasumo ipi hokono máfaraka aporoane sakairaka someraka, "Ao, ano seseripo. Ne makata takamasane farasie." Aíhoanine aporo toropakesane wate foaka fasapo.

<sup>4</sup> Farakano asekea Yasumo someraka, "Ne fasane aporo metakiraki somehokopo. Pirisiti aporo rea pukua, ne kau toropakesa fasane pirisiti aporoaki tarinie. Tarikia, Mosesemo somemanemo ayíakanie aisane kekemaraka, makata yaku Kotiaki ayíáka kakanie.\* Ne fasane aporo hinamo suamo asekea hemakapusimo ayíáka kakanie." Aíyaka Yasumo somesapo.

*Aporo terakaiyamosa satinimo aporo raipa makata takamasa Yasumo mafasane oyapo.*

*Ruki 7:1-10*

<sup>5</sup> Yasu pukua Kapaneame taonea perakano, Rome aporo terakaiyamosa satini peraka Yasuaki someraka,

<sup>6</sup> "Nómó aporo raipa makata kára takamaraka, kau nariraka korosakataeraaka apea warekenapo."

<sup>7</sup> Airakano Yasumo someraka, "Ano ní peraka e mafahokosapo."

<sup>8</sup> Airakano aporo terakaiyamosa satinimo someraka, "Unihaeo, ano aporo wakase-masasamo ne aporo kárasasamo iti siasafapo. Asiasamo nómó apea ne peane siahoasi-fareapo. Ne aporo makata takamasa warea punafonoraka o reke, aporo makata takamasane farasie aisie. Nómó farasie airakano nómó aporo raipa makata takamasese fahokosapo.

<sup>9</sup> Arirakano ano asekea rea aporoamo anoaki rakisierakano nómó rakirapo. Arirakano nómó aporo asekea reaki pusierakano ipi purapo. Peaerakano ipi perapo. Nómó aporo raipaki rakisierakano, epo rakirapo. Nómó aira ayíáka, nómó soko aporo makata takamasane farasierakano, e fahokosapo."

<sup>10</sup> Airakano someane Yasumo kaikia sesesapo. Seseraka asekehaerape pesa aporoaki someraka, "Nómó reaki kakaro somerakaripo. Rome aporo terakaiyamosa satini ane Yu aporofapo. Yu aporohoanafonosa reamo anoaki himu hakásaraka hemaka apura ayíáka, Isiraya hauaka Yu aporo metamo anoaki ayíáka himu hakásaraka hemakapurafareapo.

<sup>11</sup> Hao, kaisie. Koti unihaeaka rea hauaka á Eparaheme soko, Aisake soko, Yakope soko, iyaki hakása toke makata nakosakipoko, Yu aporohoanafonosane yakai hiakosapo. Arirakano maiya apera hauaka taku aeyaka soko, maiya apura hauaka taku aeyaka soko, i yakai hiakosapo.

<sup>12</sup> Arirakano Yu aporo hinamo Koti unihaeaka rea hauaka á hiakosapoko asiáne, ipu anoaki himu hakásaraka hemakapunafonorakano, iane Kotimo kakaro metakariakosapo. Katosa hauaka á pusiehokosapo. Pusierakano pukua á risike, i hihiripuraka saperaka akai kirisihokosapo." Aíyaka Yasumo somesapo.

<sup>13</sup> Asiamo Rome aporo terakaiyamosa satiniaki Yasumo someraka, "Ní apea paripusie. Nómó anoaki himu hakásaraka hemaka apura yaiya nómó rakirakanapo." Aíyaka somehoa-nine aporo raipa makata takamasane fasapo.

*Aporo hinamo yakai makata tasa Yasumo mafasane oyapo.*

*Maka 1:29-34; Ruki 4:38-41*

<sup>14</sup> Yasu pukua Pitamo apea yorokoa aseane, Pitamo ipi aseamo kaíyia makata takamasa kau sisipuraka warekeno asesapo.

<sup>15</sup> Aseraka hinamoamo hokonoa Yasumo sakaihoane, makata takamaraka kau sisipusane fasapo. Farakano asekea, hinamoane takahikia makata nakosa paikia Yasuaki kasapo.

\* **8:4:** "Aporo ipi kau toropakesane fasasamo mena soko metao, saro sipi mano soko metao, rukua paikia Kotiaki kakanie." Aíyaka Mosesemo somesapo.

<sup>16</sup> Arirakano wakasema nina samapu yao nene horamo, aporo hinamo yakai yatafumo ho mosane Yasu rea aporo metakiramo karikia pesapo. Karikia perakano yatafuaki Yasumo ipi akaimo hákasa some hora yiamo yatafuane metakarikia pusuapo. Arirakano aporo hinamo makata tasane soko suane Yasumo mafasapo.

<sup>17</sup> Mafasane mafahoasiraka wate fana porofete aporo Aesayamo popasapo. Popasane oyapo, "Isiapo makata tasane wakasema soko kára epo mafanapo." Aiyaka popasane faserepesa ayareapo. (*Aisaia 53:4*)

*Aporomo himu tetáraka risike Yasuaki someraka, "Ne patera aseakosapo," aisane oyapo.*

<sup>18</sup> Aporo hinamo yakai Yasu yaki sarimasane Yasumo asekea, ipi aporo hakása puraki someraka, "Isu kasua ripaka he Kariri taku ra purakapo."

<sup>19</sup> Airakano e rea Kotimo somemane tisa aporo meta peraka Yasuaki someraka, "Tisao, ne taku ra purakano soko, taku ro purakano soko, sapeaka hinakano soko, ano neyaki hakása koraka rekeakosapo."

<sup>20</sup> Airakano aporoane kau aseakosakipoko Yasumo eaki someraka, "Yákasa ipi hauaka rapia warápo. Mena ipi usia warápo. Ipu ape waráne risikinapo. Arirakano Ano Aporomanomo Tákeane ape wará uni katane rekenafapo."

<sup>21</sup> Airakano aporo hakása meta Yasuyaki hakása puraka ipi someraka, "Unihaeo, ano neyaki peakosapoko asiáne, fana nōmo ní ata kurakano hauaka marekeea faraka, neyaki peakosapo."

<sup>22</sup> Airakano Yasumo someraka, "Ní ata metakarikia, anoyaki peanie. Aporo ano patera asekeanafonosamo aporo kusuane hauaka mareakosapo. Aporo ano patera asekeanafonosane i aporo kusua asiapo. Aporo kusua asiasamo ipu aporo kusuane hauaka muriane siahokosapo," aisapo.

*Atifoyaki he kupayaki kára pesane Yasumo mafasane oyapo.*

*Maka 4:35-41; Ruki 8:22-25*

<sup>23</sup> Yasu kasua ripaka ipi aporo hakása pura soko, eyaki hakása kasua ripaka pusuapo.

<sup>24</sup> Ripaka puraka Yasuane kasua wasápo. Wasakipoko yao foaka peraka atifoyaki he kupayaki kára pesapo. He kupa kára peraka, kasu tua he wakekeraka, kasu kenepesahopo.

<sup>25</sup> Keneppeakorakano asekea, aporo hakása puramo Yasu maturikia someraka, "Unihaeo, isu araresie. Kasu keneperaka isu he nasireapo."

<sup>26</sup> Airakano Yasumo iaki someraka, "Repo marirakano namorakanare? Anoaki kakaro himu hakásaraka kára hemakapurakanafareapo. Wakasemarako hemakapureapo." Aiyaka Yasu takahikia atifoaki soko, he kupaki soko, "Farasie," airakano, atifo soko, he kupa kára pesane soko, foaka fasapo. Faraka he auasapo.

<sup>27</sup> He auarakano asekea, aporo hakása puramo fofaraka someraka, "Yasumo someane atifomo soko, he kupamo soko, kakimarako fane. Fasasamo aporoane eparakapo," aisapo.

*Aporo tetá yatafumo ho mosa Yasumo mafasane oyapo.*

*Maka 5:1-20; Ruki 8:26-39*

<sup>28</sup> He kekea kaya kasu roko hikia, Katára hauaka á kasu karimarekea hikia aseane, aporo tetá yatafumo ho mosa aporo kusua taena kunkia aeyaka perakano asesapo. Aporo tetane irirasasamo tetapō kunkia makeraka aporo meta purafapo.

<sup>29</sup> Asiamo Yasu kasua ripaka pekea kasu matapea karikimarerakano asekea, aporo tetane Yasu rea pesapo. Peraka Yasuaki poaeraka someraka, "Ne Kotimo hokosapo. Nómo eto mayiakakosare? Fanasihokosa maiyané haru faserepeasiraka nōmo etoaki fanasiraka kau teraya iyiya rerane kakako perakaiare?"

<sup>30</sup> Aiyaka aseane saro yakai makeraka makata nenaka risikino asesapo.

<sup>31</sup> Asekea yatafumo Yasuaki someraka, "Nómo isu pusierakane saro tua risikiako pusiesie."

<sup>32</sup> Airakano iaki Yasumo someraka, "Re pusie," airakano yatafu pukua saro tua risiapo. Saro tua risikirakano saro su ūri kakafae aeyaka foaka sosonoraka peraka, he fesere mosakipoko aeyaka eteraka he numua hurupeperaka saro suane he nekea kukua kesapo.

<sup>33</sup> Kukua kerakano asekea, saro asekea risia aporoane apea teketarikia hisiapo. Hinaka aporo yatafumo ho mosa mafasane soko, saro kukua kesane soko, makata asesane su somesapo.

<sup>34</sup> Somerakano ape aeyaka aporo suamo Yasu aseako pesapo. Peraka himu faraka Yasuaki someraka, "Isiapo hauakane ne metakarikia pusie," aisapo.

<sup>1</sup> Yasumo Katára hauakane metakarikia, kasu ripaka poparipekeia ipi taonea\* fosápo.

<sup>2</sup> Fókoa risike aseane, aporo korosakataesane fefeneakua makekeia ira paka maka perakano asesapo. Maka pesa aporoamo aporo korosakataesane Yasumo mafahoasimo Yasuaki himu hakásaraka hemakapukua maka perakano asekeia, Yasumo aporo korosakataesaki someraka, "Hameo, mapirarakia hemakapunie. Nómó himu watikisane nómó mafarakanapo."

<sup>3</sup> Airakano Kotimo somemane tisa aporo metakiramo namina susu hemakapuraka, "Aporo himu watikisa mafarakanapo airakane Kotimo airaka sikirakae. Epo Kotiane mawakasemarakae."

<sup>4</sup> Aiyaka hemakapurakano ipu hemakapusuane Yasumo aseraka someraka, "Repo mari-rakano ano mahokopariakanare?"

<sup>5</sup> Aporomo himu watikisa mafanane kárare? Aporo makata takamasa mafanane wakasemare? Meta mane kárare? Meta mane wakasemare? Wae, tati siasapo.

<sup>6</sup> Aporomanomo Tákeane anopo. Hauaka wo aporo himu watikisane nómó mafahoasimo Kotimo ano murikimaka maresapo. Maresasamo repo asekeasimo aporo korosakataesaki nómó takahisierakanapo." Aiyaka aporo korosakataesaki Yasumo someraka, "Ne takahisie. Takahikia ní asakapuane maweroraka maka nómó ní apea pusie."

<sup>7</sup> Airakano aporoane takahikia ipi apea pusuapo.

<sup>8</sup> Purakano aporo hinamo sarimasamo aseraka fofasapo. Fofaraka ipu hemakapuraka, "Makata watikisa mafana wakapuane Kotimo aporoaki kayereapo." Aiyaka hemakapuraka ipu Kotiaki kekeresapo.

*Yasumo Matiuaki peae, aisane oyapo.*

*Maka 2:13-17; Ruki 5:27-32*

<sup>9</sup> Yasumo hauakane metakarikia puraka aseane, takese mora aporo yano motosa Matiu,<sup>†</sup> takese mora oposea kakeno asesapo. Aseraka Matiuaki Yasumo someraka, "Ne ano patera aseako peae." Airakano Matiu takahikia Yasuyaki hakása pusuapo.

<sup>10</sup> Pukua Matiumo apea pauraka ape namoa yorokoa toke, Yasu soko ipi aporo hakása pura soko toke, iyaki takese mora aporo metakira soko, aporo himu watikisa soko, sarimarakaa toke, makata nesapo.

<sup>11</sup> I suane hakása toke makata nenakano, Ferese aporomo aseraka, Yasumo aporo hakása puraki someraka, "Marirakano repo tisane takese mora<sup>‡</sup> aporoyaki aporo himu watikisayaki hakása toke makata nenakanare?"

<sup>12</sup> Aiyaka ipu somerakano Yasumo kairaka iaki someraka, "Aporo koteaka reane mitikromo mafahoko purafapo. Aporo makata takamasane mitikromo mafahoko purapo.

<sup>13</sup> Asiamo aporo himu watikiaka risiromo watikisane metakarikia risikiako parihoasimo iaki peeahoko ano perákayiapo. Aporo kotesane peeahoko ano perákayiapo. Asiamo Kotimo sawia popasane enomako hemakapunie. Kotimo someraka, 'Anoaki makata rukua paikia yaku karakano asekeia nómó wakasema sesenapo. Arirakano aporo metaki kamenakaraka himu purakano asekeia nómó kára sesenapo.' Aiyaka popasamo kepoane hemakapukusakipoko koanie." Aiyaka Yasumo somesapo. *(Hosea 6:6)*

*Kotimo asekeasimo makata nakosa sokoainane Yasumo somesane oyapo.*

*Maka 2:18-22; Ruki 5:33-39*

<sup>14</sup> Yasu rea Yone he tapukumareramo aporo hakása pura peraka Yasuaki someraka, "Kotimo asekeasimo isiapo soko, Ferese aporomo soko, maiya metakiramo makata nakosa nekeia, maiya metakiramo makata nakosa sokoainapo. Nómó aporo hakása puramo maiya suamo makata nakosa nenaka risikinapo. Ipu makata nakosa sokoaihoanafononane mainakanonare?"

<sup>15</sup> Airakano Yasumo ipiane takumeaka someraka, "Aporomo hinamo arumarakano aporo suamo hokono keraka seseaka makata nenapo. Makata nenaka aporo hinamo kawe apia iyaki hakása rekeno, i himu hisihoanafonoraka seseraka risike, makata nakosa sokoainafapo. Arirakano aporo hinamo kawe apiane<sup>§</sup> aporo metakiramo waseremaka apura maiya amo, ipu himu hisiraka makata nakosane sokoaihokosapo.

<sup>16</sup> Arirakano pasu paté koasakipoko pasu kawe paremarekea irisane, pasu kaweanne kuruhenaka pasu patéane fe taku aeyaka hatirirurapo. Hatiriruraka kára koahokosapo. Anapaka pasu patéyaki pasu kaweyaki sarimarakaa irinafapo.

<sup>17</sup> Arirakano nanikose kau aporomo maka petoro irinapoo. Waene he kawe metekesane petoro patéa takamanafapo. Takamarakano waene he kaweanne ponoponoraka petoro

\* 9:1: Yasu sisimaraka reke, Kotimo makata rakirane rakiraka rea maiya amo, Kapaneame taonea reapo. † 9:9: Matiu ane yano motosa meta Rífaipo. ‡ 9:11: Takese mora aporoamo mone sapeane hakimosapo. Anakano asekeia aporomo iaki sesesafapo. § 9:15: Takume someamo kepoane aporo hinamo kawe apia asiane Yasu ipipo.

patéane faurakosapo. Fauraka petoro kakeraka waene he sakuriakosapo. Sakuriraka waene he soko petoro soko tetákara fahokosapo. Arirakano waene he kawe metekesane petoro kawea takamarakano petoro faunafapo. Fauhoanafonoraka, tetákara tati siaraka risikiakosapo." Aíyaka Yasumo somesapo.

*Hinamo hokosa kusua Yasumo maturikia taesane oyapo. Arirakano hinamo meta makata takamasamo Yasumo pasua sakaihoane mafasane soko oyapo.*

*Maka 5:21-43; Ruki 8:40-56*

<sup>18</sup> Yone he tapukumareramo aporo hakása puraki Yasumo someraka rea maiya amo, Yu aporomo sarimana ape asekea rea aporo metane pesapo. Pekea kakuna porokoa kake Yasuaki someraka, "Nómo hinamo hokosa kawe kusuapo. Kusua nine ne peraka, e sakaihoane turikia pukua hitaferaka kakakosapo."

<sup>19</sup> Airakano Yasu takahikia eyaki hakása pusuapo. Puraka ipi aporo hakása pura soko, eyaki hakása pusuapo.

<sup>20-21</sup> Purakano asekea hinamo meta patera aeyaka pekea, ipi himumo hemakapuraka, "Ano keremisi keno sumo wake apea makama yiaraaka kayapo. Kayasasamo, Yasumo pasua nómo sakaihoane ano wake apea makama yiaraaka kayane fahokosapo." Aíyaka hemakapuruka Yasu purakano asekea, e patera aeyaka pekea Yasumo pasu ke huhua sakaisapo.

<sup>22</sup> Sakairakarakan Yasumo kaikia rekeako pariraka, hinamoaki someraka, "Hinamo ne karekekeka kakakopo. Mapiraraka kakanie. Nómo anoaki himu hakásaraka hemaka apura yiamo, ne makata takamasane mafarakayiapo." Aihoanine hinamoane makata takamasane wate foaka fasapo.

<sup>23</sup> Farakano i pukua Yu aporomo sarimana ape asekea rea aporomo apea pauraka, ape namoa yorokoa pukua aseane, hokosa kusuakipoko hinamomo hihiripuraka, metakiramo kamenakaraka hihiripurakan asekea,

<sup>24</sup> Yasumo iaki someraka, "Re su yaoa pusie. Hinamo hokosane kusuafapo. E wayereapo." Airakano aporo hinamo suamo Yasuaki hokomarekea keasapo.

<sup>25</sup> Kearaka i yaoa purakano asekea, hokosa kusua warea apea Yasu yorokoa pukua, hokosa hoknoa maka máfaraka maturikia taesapo.

<sup>26</sup> Maturikia taerakano asekea, hokosa ane maturikia taesane hauaka makea aporo hinamo suaki somepe pusuapo.

*Aporo tetá hi fausane Yasumo mafasane oyapo.*

<sup>27</sup> Yasu puraka kaiyáne aporo tetá hi fausane Yasu kekemarape peraka Yasuaki wáraka, "Tefetemo \*\* aporo ira Yasuo, nómo eto kamenakaraka araresie."

<sup>28</sup> Airakano Yasu apea pekea yorokoa reke aseane, aporo tetá hi fausane perakano asekea, Yasumo tetáki someraka, "Tetápo hemakapuraka, 'Eto hi fausane nómo mafahoasi-mosapo,' aíyaka hemakapurakanare?" Airakano tetápō someraka, "Ao, Unihaeo, nómo eto mafahoasimo hemakapurakaripo."

<sup>29</sup> Airakano tetá hia epo sakairaka someraka, "Tetápo hemakapuraka eto mafahoasi-mosapo, aíyaka hemakapusuasamo tetó mafarakapanapo."

<sup>30</sup> Aihoanine tetá hi fausane faraka koteaka asesapo. Farakano asekea Yasumo tetáki paroaka someraka, "Tetápo hi fausa mafasane aporo hinamo metaki somehokopo," aisapo.

<sup>31</sup> Airakano yia tetápō Yasumo rakisiane aporo hinamo suaki somepe pusuapo.

*Aporo me fasane Yasumo mafasane oyapo.*

<sup>32</sup> Aporo tetá hi fausa mafasane pusuakipoko, aporo meta yatafumo ho masa me fasane aporo metakiramo karikia pesapo.

<sup>33</sup> Karikia perakano Yasumo yatafuaki someraka, "Ne metakarikia pusie." Airakano yatafuane pusuapo. Purakano aporo me fasamo koteaka somesapo. Somerakano aporo sarimاسماو کاکیا fofaraka someraka, "Epo rakirane hakureapo. Isiraya hauaka wo isiapo aporo metamo aiyáka rakirakano fana isiapo asesafapo."

<sup>34</sup> Aíyaka somerakano Ferese aporomo someraka, "Wae, yatafu metakarikia pusiehoasimo, yatafumo unihae Satanemo wakapuanne Yasumo maka yatafu pusierakano apure," aisapo.

*Aporo hinamo suane Yasumo kamenakaraka hemakapusuane oyapo.*

<sup>35</sup> Taone sua soko, ape sumu wakasema á soko, Yasu koraka reke, Yu aporomo sarimana ape sua Yasumo some kotesa some kape pusuapo. Epo some karáka, "Koti unihaeaka rekenapo," aíyaka some kotesane some kasapo. Some karáka rea maiya amo, aporo metakira makata kára tasane soko, wakasema tasane soko, suane Yasumo mafasapo.

\*\* 9:27: Wate fana Yu aporo hinamoane Tefetemo unihaeaka asekea reapo. Tefetemo aporo ira wainepe pusuane Yasu faserepesapo.

<sup>36</sup> Mafaraka reke aporo hinamo suane Yasumo asekea hemakapuraka, “Saro sipi wafaya faseskeno saro sipi mokome pusua, hasaka korapo. Arirakano saro sipi metakira fafaoraka risirapo. Aina ayiáka aporo hinamo arisiane ayiáka risikinapo.” Aiyaka Yasumo aporo hinamo supoko kamenakaraka hemakapusuapo.

<sup>37</sup> Kamenakaraka hemakapukua aporo yakaiane, aporo hakása metamo ararehoanafonosakipoko, Yasumo ipi aporo hakása puraki takumeaka someraka, “Ira wate súsane kárareapo. Asiáne ira wateane tuakosane aporo hukusireapo.

<sup>38</sup> Asiamo ira wate súsane aporo raipamo tuako pusiehoasimo hemo wafayaki kurikurihoanie.” Aiyaka Yasumo somesapo.

## 10

*Aporo hakása pura kenosu yano taesane oyapo.*

*Maka 3:13-19; Ruki 6:12-16*

<sup>1</sup> Yasumo ipi aporo hakása pura keno suaki peaerakano pesapo. Perakano ipu yatafuane metakarienia pusiehoasimo, i murikimaka wakapu kasapo. Ipu aporo makata kára tasane soko, wakasema tasane soko, ipu mafahoasimo, iaki Yasumo wakapu kasapo.

<sup>2</sup> Ayiáka Yasumo aporo kenosu murikimaka iaki tarira aporo\* yano motosapo. Ipu yano taesane oyapo. Saemone ipi yano motosa meta Pita, arirakano meta Saemonemo ipi mamanea Enitu, arirakano meta Sepetemo maeya Yamese, arirakano meta Yamesemo ipi mamanea Yone,

<sup>3</sup> arirakano meta Firipi, arirakano meta Patóromiu, arirakano meta Tomase, arirakano meta takese mora aporo Matiu, arirakano meta Afiasemo maeya Yamese, arirakano meta Tátiasi,

<sup>4</sup> arirakano meta Rome kamanimo Yu aporo asekea reane metakariakosakipoko hemakapura aporo Saemone, arirakano meta Yasu parakehokosa aporo Yutase Isekerio, ayiáka Yasumo aporo kenosuane murikimasapo. Murikimasane tarira aporo ayapo.

*Aporo keno sumo makata rakiako pusiesane oyapo.*

*Maka 6:7-13; Ruki 9:1-6*

<sup>5</sup> Aporo keno suaki Yasumo someraka, “Re uyáka punie. Puraka Yu aporo hoanafonosamo apea pukupo. Sameria aporomo apea pukupo.

<sup>6</sup> Saro sipi rosaka tarikia arisia ayiáka Isiraya aporo hinamoane ayiáka risikinapo. Iaki somehoko pusie.

<sup>7</sup> Pukua some karáka, ‘Koti unihaeaka rekeakosa maiyane faserepesapo.’ Aiyaka somehoanie.

<sup>8</sup> Aporo hinamo makata takamasane mafahoanie. Arirakano aporo hinamo kusuane maturikia taehoanie. Arirakano aporo hinamo toropakesane mafahoanie. Arirakano yatafumo aporo hinamo ho mosane yatafuane metakarienia pusiehoanie. Aiyaka mafana wakapuanre repo yaku mosasamo, repo aporo hinamo suane yaku mafahoanie.

<sup>9</sup> Asiamo re puraka, mone sawi soko, siufa mone hae soko, mone kusua soko, mone suane pausia kesane mokoa pukupo.

<sup>10</sup> Re kimisi puraka aku soko, pasu meta soko, mokoa pukupo. Tamaka soko, tatia soko, makata suane mokoa pukupo. Asiamo repo makata rakirane rakisiakipoko repo araresa aporomo reaki makata nakosa kayane siahoasireapo.

<sup>11</sup> Re kimisi pukua apea pauraka repo kairaka, ‘Koteaka rera aporo epare?’ Aiyaka kaiyinie. Kaiyiáne tarirakano, apea yorokoa ape hakása yía waka risikianie. Ape sumu meta pukusakipoko ape ne wasa aeyaka punie.

<sup>12</sup> Ape wará tarirakano á pukua, ape wafaya hokono maka eaki someraka, ‘Ano perakayiapo. Kotimo ne makoterakano ne auaraka rekeasimo hemakapurakaripo.’ Aiyaka some kakanie.

<sup>13</sup> Some kasane ape wafayamo kaikia peaerakano, puraka auaraka rerane eaki some kakanie. Arirakano ape wafayamo peakoporakano auaraka rerane apea some kakakopo. Apeane metakarienia punie.

<sup>14</sup> Arirakano aporo metakiramo reaki terehoanafonoraka, repo someane kakipayarakano, taoneane metakarienia punie. Puraka namina hisisasamo aporoaki Kotimo seserakanafapo. Aiyaka ipu hemakapusimo yapakeraka korakea kokotonemosane rerakatapikia marekeaa metakarienia punie.

<sup>15</sup> Hao, kaisie. Nómō reaki kakaro somerakaripo. Hukuarura maiya amo aporo hinamo Sotome taonea soko Komora taonea soko watikiaka rakiraka risiane fanasihokosane

\* **10:2:** Tarira aporoane pisini meaka aposo, aiyaka yano motosapo. Tarira aporoane Yasumo aporo hakása pura ayapo.

kárahokosapo. Arirakano repo some kayane kakipayasa taonea aporo hinamo risiane fanasihokosane namo kakaro kárahokosapo." Aíyaka Yasumo somesapo.

*Mokoatikihokosa maiya faserepeako sene oyapo.*

*Maka 13:9-13; Ruki 21:12-17*

<sup>16</sup> Aporomo hakása puraki Yasumo someraka, "Kaisie. Reane saro sipi auasa ásiapo. Aporo watikisane saro wofe irirasa ásia risiakipoko nōmo re saro sipi ásiáne pusierakanapo. Arirakano kuyare tau apura ayiáka re tau punie. Aporomo re mokoatikinapaka tau punie. Arirakano mena numemo makata meta mokoatikihoanafonona ayiáka, repo soko ayiáka aporo meta mokoatikhokopo.

<sup>17</sup> Aporomo re mokoatikinapaka asekeanie. Re aporo metakiramo waseremokoa hukurura apea hukurukua, ayiáka Yu aporomo sarimana apea ira faimo reane rukusapo.

<sup>18</sup> Arirakano repo ano patera asesasamo, kamani aporomo soko, aporo uniháemo soko, reane hukurusimo aporo metakiramo reane waseremokoa kosapo. Waseremokoa hukururakano repo iaki soko, Yu aporohoanafonosaki soko, anoane makáraraka somehokosapo.

<sup>19</sup> Reane hukururakano repo somehokosane karekeakopo. Asiamo re somehokosane repo himura mahemakapurarakano repo somehokosapo.

<sup>20</sup> Repo namina metamo hemakapusua somehokosafapo. Atamo Ho Kotesamo reaki some karakano, epo some kasa hakása nine, repo somehokosapo. Repo siaraka somehokosapo.

<sup>21</sup> Arirakano aporomo ipi mamaneane aporo metamo rusimo parakehokosapo. Arirakano wafayamo ipi hokosane aporo metamo rusimo parakehokosapo. Arirakano hokosamo ipi wafaya kalyia tetáne aporo metamo rusimo parakehokosapo.

<sup>22</sup> Re ano patera asesasamo reane aporo suamo hisihokosapo. Hisirakano yia aporo hinamomo anoaki patera asesane metakarirafaraka yaiya anoaki hemakapuraka risikino, aporo hinamoane Kotimo mafasiakosapo.

<sup>23</sup> Taone meta á re mokoatikirakano takaripukua taone meta á punie. Taonea soko ipu reane mokoatikirakano yaiya takaripukua taone meta á punie. Nōmo some one kakaro somerakaripo. Aporomanomo Tákeane anopo. Repo Isiraya hauaka taone sua nōmo someane some kepe pukua, some kaka fahoasiraka, taone hukusi metakira some karaka arisiamo ano paripeakosapo." Aíyaka Yasumo somesapo.

*"Anoa paosa aporo hinamo uyáka risikiakosapo." Aíyaka Yasumo somesane oyapo.*

*Ruki 12:2-7*

<sup>24</sup> Yasumo someraka, "Sukuru aporomo ipi tisane marokenafapo. Arirakano aporo raipamo ipi wafayane marokenafapo.

<sup>25</sup> Tisa area yaiya sukuru hokosa soko yaiya kekemaraka risike siahoasireapo. Arirakano makata rakira wafaya area yaiya aporo raipa soko, yaiya kekemaraka risike siahoasireapo. Arirakano ape wafaya ásiáne anopo. Aporo metakiramo anoaki mokoatikiraka someraka, 'Ne Satane Piaóipupo,' airakasupo. Áisa ayiáka anoa paosa aporo hinamooaki soko, ayiáka kára mokoatikiraka aihokosapo.

<sup>26</sup> Asiamo reane mokoatikhokosa aporoaki namohokopo. Makata faremaresane mafekemahokosapo. Makata mahamesane hufitaehokosapo.

<sup>27</sup> Nōmo reaki hákasa somerakano, re katosa arisia, ayiaka risiane keseke someamo kepoane repo hemakapuraka, faeana ayiáka faehokosapo. Faesane aporo suamo kaiyisimo nōmo somesane iaki somehoanie. Nōmo reaki tau somesane aporo suamo kaiyisimo ape kára á sakepamo somehoanie.

<sup>28</sup> Aporomo ne kau kukuámo rurakano aporoaki namohokopo. Arura aporoamo ne hoane makurafapo. Arirakano ne kau soko, ho soko, mokoatikiraka heao hauaka á pusie, aira Kotiaki namohoanie.

<sup>29</sup> Arirakano maketea mena muri asia aporomo roponapo. Roporaka mena muri ásiáne tetá mone hae kusua hakásamo (1 toe) roponapo. Mena muri ásiáne hakásá kurakanone, repo Atamo aserapo. Repo Atamo ahoanafonorakano mena muri ásiáne hakásá huruperaka kurafapo.

<sup>30-31</sup> Mena muri wakasemane Kotimo asekeea rerapo. Mena muri wakasemane asekeea rerasasamo, re aporomanóane Kotimo namo kakaro kára hemakapuruka asekeea rekenapo. Asekeea reke re uni iti suane epo hakásá hakásaraka menoaka hemakapuruka fasapo. Uni iti menoraka asekeea rerasasamo re namohokopo." Aíyaka Yasumo somesapo.

*Yasu patera asesa aporoane soko, Yasu patera asekeeanafonosa aporoane soko, Yasumo somesane oyapo.*

*Ruki 12:8, 9*

<sup>32</sup> Yasumo someraka, "Aporo hinamo suamo kaiyisimo aporo metamo someraka, 'Ano Yasu patera aserakanapo.' Aiyaka somerakano, nōmo Ata hepene yapura reamo kaiyisimo nōmo someraka, 'Ano patera asesa aporo ane ayapo,' aihokosapo.

<sup>33</sup> Arirakano aporo hinamo suamo kaiyisimo aporo metamo someraka, 'Ano Yasu patera aseako hisiripo.' Aiyaka somerakano, aporoane nōmo Ata hepene yapura reamo kaiyisimo nōmo someraka, 'Aporoane ano patera asesafapo. Ano patera asekeanafonosasamo eane nōmo metakirakanapo,' aihokosapo." Aiyaka Yasumo somesapo.

*"Aporo fasikia risikiakiso ano pesapo."* Aiyaka Yasumo somesane oyapo.

*Ruki 12:51-53; 14:26-27*

<sup>34</sup> Yasumo someraka, "Repo hemakapuraka, 'Yasu pesasamo hauaka wo aporo su tākeraka tau auaraka risikiakosapo,' aiyaka hemakapukupo. Ano pesasamo aporo hinamo su tākeraka tau auaraka risikiakosafapo. Aporo hinamo metakiramo anoaki himu hakásaraka hemakapuruka, arirakano aporo hinamo metakiramo anoaki himu hakásaraka hemakapunafonosasamo tau auaraka risikiakosafapo. Ano wo pesasamo aporo hinamo namina yia fasikia yunuraka risikiakosapo.

<sup>35</sup> Asiamo ano pesasamo aporomo ipi wafaya tati rakumarekea risikiakosapo. Arirakano hinamomo ipi kalyia tati rakumarekea risikiakosapo. Arirakano hinamomo ipi apiamo kalyia tati rakumarekea risikiakosapo.

<sup>36</sup> Arirakano aporomo ipi aporo ira hakásayaki, ipi ape hakása risia namina raku-marekea yunuraka risikiakosapo.

<sup>37</sup> Arirakano aporomo ipi wafaya soko metao, ipi kalyia soko metao, himu matumururaka hemakapuraka ano makama kesekearaka hemakapurakano, aporoane anoyaki siaraka rekenafapo. Arirakano aporo metamo ipi aporo hokosa soko metao, ipi hinamo hokosa soko metao, matumururaka hemakapuraka ano makama kesekearaka hemakapurakano, aporoane anoyaki siaraka rekenafapo.

<sup>38</sup> Ano ira matopesa paremareraka kukusakipoko ira matopesane nōmo n̄l maka pura ayíáka, repo soko, hauaka wo makatane su makama kesekearaka ira matopesa maka, <sup>†</sup> ano finihaoa fini kafo kepe peanafonorakano, re anoyaki siaraka rekenafapo.

<sup>39</sup> Aporomanomo hauaka wo areamo hitaferaka rekeakosane hákasa hemakapurakano, aporoamo Kotiyaki yaiya rerane kokoa makosafapo. Arirakano aporomo anoaki hemakapuraka, hauaka wo kau hitaferaka rekeakosane makama kesekearaka hemakapurakano, aporoamo Kotiyaki yaiya rerane kokoa makosapo." Aiyaka Yasumo somesapo.

*Makata ropo kakakosaposane oyapo.*

*Maka 9:41*

<sup>40</sup> Aporo kenoso kimisi pukorakano Yasumo someraka, "Re apea peane aporomo re tereraka pasimorakano ane, ano pasimarakano. Ano pasimarakano ane, ano pusiesa Kotiane soko pasimarakano.

<sup>41</sup> Arirakano porofete aporoane Kotimo some kará aporopo. Kotimo some kará aporosasamo, some kará aporoane aporo metamo tereraka pasimarakano some kará aporo kimisi pesaki Kotimo makata ropo akara yaiya, aporo meroaki soko, makata ropo hakása nineraka kakakosapo. Arirakano aporo ereketaeraka rerasasamo aporo metamo e pasimarakano, aporo ereketaeraka reraki Kotimo makata ropo akara yaiya, pasimasa aporoaki soko, makata ropo hakása nineraka kakakosapo.

<sup>42</sup> Arirakano anoa paosa aporo wakasemaki aporo metamo someraka, 'Ne Yasu patera asesasamo nōmo ne he nasimo karakanapo.' Aisa aporoaki Kotimo makata ropo kakakosapo. Nōmo some one kakaro somerakaripo." Aiyaka Yasumo somesapo.

## 11

*Yone he tapukumareramo ipi aporo hakása puraki someraka, "Yasu rea pukua, 'Ne Keresore?' aiyaka kaiyinie," aisane oyapo.*

*Ruki 7:18-35*

<sup>1</sup> Aporo hakása puraki Yasumo some kaka faraka, apeane metakarikia ape sumu metakira ape makeraka risia á Yasumo some kakako pusuapo.

<sup>2</sup> Yone tipura reke kaiyiane, "Keresomo Kotimo wakapuyaki rakirakanapo." Airakano epo kairaka ipi aporo hakása pura metakiraki someraka, "Yasu rea kaiyako pusie," aisapo.

<sup>3</sup> Pusierakano i pukua Yasu kairaka, "Kotimo aporo pusierakano peakosapo airakasuanne nere? Aporo metare? Aporo meta perakarihoamo isu kau risikiae?"

<sup>†</sup> **10:38:** Repo ira matopesa maka pura someamo kepoane oyapo. Aporo Keresoa paosasamo aporo metamo hisiraka eane rusua kukusimo rakirakanone, Keresoa paosa aporoamo hemakapuraka, "Ano Yasupoko kukusapo," aiyaka hemakapurapo.

<sup>4</sup> Airakano iaki Yasumo someraka, "Re pukua repo makata kaisiane soko, makata asesane soko, Yoneaki somehoanie.

<sup>5</sup> Amano hi fausane mafasa koteaka aserakanapo. Arirakano amano korake matipusane maraesas koteaka purakanapo. Arirakano amano toropakesane mafasa koteaka risikinapo. Arirakano amano senaki tisane mafasa koteaka kairakanapo. Arirakano amano kusuane mafareasa turikia tarikia risikinapo. Arirakano amano makata forokoa risiaki soko, Kotimo some kaiyanafonosa aporo hinamoaki soko, Kotimo some kotesa some karakanapo.

<sup>6</sup> Asiamo anoaki himu hakásaraka hemakapurane metakarirafaraka yaiya hemakapuraka risikino, aporo hinamoane Kotimo makotenapo. Áiyaka makata suane repo Yoneaki somehoanie." Áiyaka aporo pesaki Yasumo some kasapo.

<sup>7</sup> Some kaka faraka aporoane paripurakano asekeea Yasumo aporo yakai sarimasaki someraka, "Yonemo ima yaoa some karakano, repo ima yaoa yakapa aseako pusuare? Fofak atifomo mahohoanane aseako pusuare? Wae, fofak atifomo mahohoanane aseako pusuafapo.

<sup>8</sup> Repo fofak aseako punafonoraka yakapa aseako pusuare? Aporo kau rakisiane aseako pusuare? Wae, aporo kau rakisiane unihaemo apea reraapo. Aporo kau rakikia ima yaoa rerafapo.

<sup>9</sup> Asiane repo yakapa aseako pusuare? Kotimo some kará porofete aporo aseako pusuare? Ao, repo Kotimo some kará porofete aporo kárane asesapo.

<sup>10</sup> Wate fana Kotimo sawia Kotimo some kará porofete aporo metamo popasane oyapo. Mafasira aporoaki Kotimo someraka, 'Ne pusíraka aporo metamo fana some kakako nōmo pusiehokosapo. Aporoamo ne ikia kara pukusane makotehokosapo.' Áiyaka Kotimo somerakan Kotimo some kará porofete aporomo kaikia popasapo. (*Malakai 3:1*)

Arirakano Kotimo aporo fana pusiehokosane Yoneane popasapo.

<sup>11</sup> Nōmo some one kakaro somerakaripo. Nōmo some kakasiraka aporo su wainepe pusuamo aporo makama fansane Yone he tapukumarera ipipo. Arirakano ano perakano aporo metamo someraka, 'Ano aporo wakasemané Unihae Yasumo ano asekeea rekenapo,' Aira aporoamo 'Unihae peakosapo,' áiyaka somesa aporoane makama kesekenapo.

<sup>12</sup> Aporo hinamo ape kakarua hiakosakipoko ikia koro mapirisikino rukuropaka taeana ayiáka, Koti unihaeaka rea hauaka hiakosakipoko aporo hinamomo ikia koro rukuropakataehokosakipoko wakapurakanapo. Yone he tapukumarera rea maiyamo asia ayiáka, yumo soko anakanapo.

<sup>13</sup> Yone he tapukumareramo some kakasiraka, Unihae peakosane Kotimo some kará porofete aporomo popasapo. Arirakano Kotimo somemane popasane hakása nineraka popasapo.

<sup>14</sup> Asiamo ipu somesane repo kairakanone nōmo someane soko kaiyinie. Iraíya pari-pekosapo aisane Yonepo.

<sup>15</sup> Re senaki risiamo kairaka koteaka kaisie.

<sup>16</sup> Maiya omo aporo hinamo risiane nōmo mayiáka somehokosare? Nōmo takumeaka somerakanapo. 'Hokosamo hauaka moroa enaraka namina yia hokosa metakiramo hokosa metakiraki someraka,

<sup>17</sup> 'Isiapo wiroke takiane repo seseaka paoraka hakása kesarakarifapo. Isiapo hiripuhoane repo soko paoraka hiripurakarifapo,' aisapo. Asiamo i arisia ayiáka, re soko ayiáka risikinapo.

<sup>18</sup> Ayiáka risiamo kepoane oyapo. Yone he tapukumarerane peraka makata nakosa sokoairaka, waene he soko nesafapo. Nanafonorakano asekeea, repo someraka, 'Yoneane yatafumo ho mayereapo,' aisapo. Áiyaka re Yonea paosafapo.

<sup>19</sup> Arirakano Aporomanomo Táke ano peraka, makata nakosa soko waene he soko napo. Nenakan asekeea repo someraka, 'Yasumo nako fitiraka sapekeamo nenareapo. Waene he soko kára nenareapo. Arirakano aporo takese morane soko, aporo metakira himu watikisane soko ipi tákereapo.' Áiyaka someraka re anoa paosafapo. Paohoanafonosa nine Kotimo hemakapusuane nōmo kekemaraka rakirakan, aporomo asekeea hemakapuraka, 'Kotimo hemakapusuane ereketaahoareapo,' aiyaka hemakapusuapo." Áiyaka Yasumo somesapo.

*Yasumo wakapuaka rakisiane asesa aporomo namina himu watikisane metakarikia risikiako parihoanafonorakano fanasihokosane oyapo.*

*Ruki 10:13-15*

<sup>20</sup> Korasini taonea soko, Pesaita taonea soko, Kapaneame taonea soko, Kotimo wakapumo hemakapukua rakira Yasumo makata yakai rakirakan, aporo hinamo risiamo

asesapo. Asekeia yia ipu himu watikisane metakarikia risikiako parisafapo. Risikiako parihoanafonorakano Yasumo iaki hukurukua someraka, "Re yaiya watikiaka risikinapo.

<sup>21</sup> Uao. Enahoasifareapo. Korasini aporo hinamo reo, Pesaita aporo hinamo reo, repo aseraka yia repo makata watikisane metakarianafonorakano, re kára fanasihokosapo. Repo taonea Kotimo wakapumo hemakapukua rakirane nōmo rakisiapo. Rakisiane Yu aporohoanafonosamo Taia taonea soko, Saetone\* taonea soko, nōmo rakisia satiki, ipu makata watikisane wate fana metakariafunupo. Metakarikia ipu makata watikiaka rakisisamo i kaiyarakia risike, kaua ororomo paikia pasu pitikini makafirikia arupekea ayíáka tokoafunupo. Ayíáka toke ipu makata watikisane metakarikia risikiako parihoafunupo. Asiáne nōmo rakisiane ipu asesafapo.

<sup>22</sup> Kaisie. Takekea hukurukua fanasina maiya amo Taia aporo hinamoane soko, Saetone aporo hinamoane soko, wakasema kára fanasihokosapo. Repo aseraka yia risikiako parihoanafonosakipoko re kára fanasihokosapo.

<sup>23</sup> Kapaneame aporo, repo hemakapuraka, 'Isu hokopukua risikiakoripo.' Aíyaka hemakapukua hepene taone yapurane máfana ayíáka repo namina yano motosa máfahoko hemaka apure. Asiamo keseke heao hauaka atura re mokoasuhokosapo. Asiamo Kapaneame aporo, repo taonea nōmo makata wakapuaka rakisia ayíáka, Sotome taonea Kotimo some kará porofete aporomo wakapuaka rakisia satiki Sotome aporomo ipu makata watikisane metakarikia risikiako parihoafunupo. Asiamo Kotiaki risikiako parisa satiki, Sotome taoneane Kotimo pakimareafunufapo.

<sup>24</sup> Kaisie. Kotimo hukuarura maiya amo Sotome aporo hinamoane Kotimo wakasema kára fanasinane motoakosapo. Repo asekeia yia makata watikisa metakarikia risikiako parihoanafonosakipoko, re namo kakaro kára fanasinane motoakosapo." Aíyaka Yasumo somesapo.

*Yasumo kurikurisane oyapo.*

*Ruki 10:21-22*

<sup>25</sup> Maiya amo Yasumo Kotiaki seseraka someraka, "Atao, hepene yapura soko, hauaka wo soko, nōmo unihaeaka asekeia rekenapo. Asekeia reamo aporomo makata su enomasaki† nōmo ní faremarea makata ane mafekemaraka tarirakanafapo. Asiáne nōmo ní hokosa asiáki‡ nōmo makata faremareasane mafekemaraka tarirakanapo. Tarirakanó nōmo neaki suserakanapo.

<sup>26</sup> Atao, nōmo ní hemakapusua aporoaki tarirakanapo." Aíyaka Yasumo kurikurisapo.

<sup>27</sup> Kurikuriraka faraka aporoaki Yasumo someraka, "Makata kepo suane nōmo Atamo anoaki tarisiapo. Arirakano nōmo hemakapusuane soko, nōmo ainane soko, nōmo Atamo ipi hákasamo aseraka hemakapurapo. Arirakano nōmo Atamo hemakapusuane soko epo ainane soko, nōmo ní hákasamo aseraka hemakapurapo. Hemakapukua nōmo ní aporo hinamo hemakapusuaki Atamo ainane soko, hemakapurane soko tarirakanano, aporo hinamoamo aseraka hemakapusuapo.

<sup>28</sup> Repo makata rakikia hisiraka yoferaka, makata umisa kára maka pukua hisiraka, wakapu faraka yoferakano, ano area fenekeea kakako peanie. Perakano né koteaka auamaka rekeakosapo.

<sup>29</sup> Arirakano saro ponomakau tetámo makata hakásá rakipe pusimo kesoa ira motokoa taponapo. Ira motokoa tapoana ayíáka repo anoaki someraka, 'Nōmo irane ano kinua motokoa taporasie,' aihoanie. Arirakano nōmo makata atarirane repo enomakanie. Ano auaraka keneamo reasasamo nōmo ainane repo enomakanie. Enomarakano repo hoane yofenafaraka wakapuaka rekeakosapo. Yasumo someamo kepoane oyapo. Fere se aporomo somemaneane umisapo. Asiáne Yasumo somemaneane ofosapo.

<sup>30</sup> Asiamo anoyaki makata rakipe pusimo ne kinua nōmo irane motokoa taponane sisapo. Makata rakira umisane nōmo maofonapo." Aíyaka Yasumo somesapo.

## 12

*Fenena maiya kepoane Yasumo somesane oyapo.*

*Maka 2:23-28; Ruki 6:1-5*

<sup>1</sup> Fenena maiya hakásá metamo witi hemoa Yasu soko, ipi aporo hakásá pura soko pusuapo. Puraka aporo hakásá purane meamorakano, witi hae súsane tukua nesapo.

\* **11:21:** Wate fana Taia taonea soko Saetone taonea soko aporo hinamomo kára watikiaka rakisiapo. † **11:25:** Aporomo makata su enomasane metakira Fere se aporopo. Metakira Satusi aporopo. Metakira Kotimo somemane tisa aporopo. Aporoamo makata enomasasamo ipu hemakapuraka, namina siaraka risikinapo, aíyaka hemakapusuapo.

‡ **11:25:** Hokosa asiáne Yasumo aporo hakásá pura aporopo.

<sup>2</sup> Nenakano Ferese aporomo aseraka, Yasuaki someraka, "Nōmo aporo hakāsa puramo makata arakirane asesie. Ipu makata rakiraka, fenena maiya yaposane mamosoane."

<sup>3-4</sup> Airakano Yasumo someraka, "Wate fana Tefete soko epo ipi aporo hakāsa pura soko kára meamorakano, Tefeteane Kotimo apea yorokoa Kotipoko farawa taesane maka nesapo. Arirakano Kotipoko farawa taesane Tefetemo soko, ipi aporo hakāsa puramo soko nakohoamo yaposapo. Asiamo pirisiti aporomo namina hákasamo nenane yaposafapo. Asiane Tefete ipi pirisiti aporohoanafonosa yiamo farawa yaposane nesapo.\* Aiyaka Kotimo sawia popahoareapo. Popasane repo menoraka kepo hemakapurakarire? Wae, repo hemakapurakarifapo.

<sup>5</sup> Airakano fenena maiyamo Kotimo apea pirisiti aporomo Kotiaki makata kakayia rukua paikia kaka, aiyáka ipu makata rakirapo. Aiyáka rakirakano, Kotimo iane hukurrafapo. Aiyaka Kotimo sawia somemane popasane repo menoraka kepo hemakapurakarifapo.

<sup>6</sup> Hao, kaisie. Repo hemakapuraka, 'Kotimo apeane fanareapo.'† Aiyaka hemakapusua nine, Kotimo apeane kesekeraka rekenapo. Ano wo areane fanaraka rekenapo.

<sup>7</sup> Asiamo nōmo aporo hakāsa puramo watikiaka rakianafonosa nine, repo iane hukuruuapo. Asiamo Kotimo sawia popasane oyapo. Kotimo someraka, 'Nōmo somemane maresane repo kaumo kekemaraka, anoaki makata yaku karakano nōmo seserakanafapo. Asiamo aporo hinamo metakirane repo kamenakaraka ararehoasimoripo.' Aiyaka Kotimo somerakanoso popasane kepoano repo hemakapurakarifapo. Repo hemakapusua satiki ane repo nōmo aporo hakāsa purane hukurufunufareapo. (Hosea 6:6)

<sup>8</sup> Aporomanomo Tákeane anopo. Yape fenena maiyamo makata aiyakanie aiyaka marerane, nōmo unihaeaka asekeea rekenapo." Aiyaka Yasumo somesapo.

### *Aporo hokono narisa Yasumo mafasane oyapo.*

*Maka 3:1-6; Ruki 6:6-11*

<sup>9</sup> Yasumo someaka faraka, Yasu pukua Yu aporomo sarimana apea yorokoa aseane

<sup>10</sup> aporo hokono narisa rekeno asesapo. Yasumo hasaka somerakarihoamo hukurukusakipoko, Ferese aporomo someraka, "Fenena maiya amo aporo hinamo makata tasane, aporo metamo mafarakanone, aporoamo Kotimo somemane mamosorakanare?"

<sup>11</sup> Airakano iaki Yasumo someraka, "Fenena maiya amo repo namina aporo metamo saro sipi hauaka kutua huruperakano, saro sipiane nōmo ketaka maka máfahokosare? Ao, máfahokosapo.

<sup>12</sup> Asiamo saro sipiane aporomo hakāsa wakasemarako hemakapurapo. Anakano aporo hinamoane Kotimo namo kakaro kára hemakapukua ararenapo. Asiamo fenena maiyamo aporo hinamo arareana amo, Kotimo somemaneane mamosorakanafapo."

<sup>13</sup> Aiyaka Yasumo Ferese aporoaki someaka faraka, aporo hokono narisaki someraka, "Ne hokono raerasie." Airakano epo hokonoane raesapo. Raeraka hokono taku meta koteaka area aiyáka, hokono narisane soko faraka koteaka reapo.

<sup>14</sup> Koteaka rekeno asekeea Ferese aporoane pukua namina susu someaka marakā, "Yasuanne kukusimo isiapo rukusapo. Asiamo mayíaka runarakapo." Aiyaka Ferese aporomo someaka masapo.

### *Kotimo aporo raipa murikimasa aporo, Yasuane oyapo.*

<sup>15</sup> Ferese aporomo hemakapusuane Yasumo aseraka, taoneane metakarikia pusuapo. Puraka aporo hinamo yakai eyaki hakāsa pusuapo. Pukua aporo hinamo makata tasa suane Yasumo mafasapo.

<sup>16</sup> Mafaraka iaki someraka, "Anoane aporo hinamo suaki somehokopo," aisapo.

<sup>17</sup> Aisane aihoasiraka Kotimo some kará porofete aporo Aesayamo Kotimo sawia Yasuanne popasapo. Popasane oyapo. Kotimo eane someraka,

<sup>18</sup> "Nōmo aporo raipane epo. Eane nōmo murikimasapo. Murikimaka nōmo eaki himu tumurumo kára hemakapukua seserakanapo. Eaki nōmo Ho Kotesa mareakosapo. Marerakanoso, nōmo ereketae maroponane Yu aporo hinamohoanafonosaki epo somehokosapo.

<sup>19</sup> Epo tafatafahokosafapo. Epo kára me rukusafapo. Ikia kara á aporo hinamo suamo kaiyisimo, epo sapekeamo wáhokosafapo.

\* <sup>12:3-4:</sup> "Tefetemo neane siahoasiseneno, nōmo aporo hakāsa purane meamoraka risiasamo ipu soko neane siahoasireapo." Aiyaka Yasumo somesapo. † <sup>12:6:</sup> Kotimo fenena maiya yaposane kesekepo.

20 Fofako kokomesa<sup>‡</sup> hakása soko, epo pateketaehokosafapo. Nafa pakimaka kokoraka kopakapuko makerakano, epo kopakataehokosafapo. Aporo hinamo suane epo arareraka rakipe pukua, ayíáka ereketae maroponane epo makama fanahokosapo.

21 Makama fanahokosasamo eaki Yu aporo hoanafonosamo hemakapusapo. Hemakapusuka Kotimo ayiakakosaposane aseakosakipoko, kau risikinapo.” Aiyaka Kotimo somerakanano Aesayamo popasapo. (Aisaia 42:1-4)

*“Yasupe Satane tati hakása yiyereapo.” Aiyaka Ferese aporomo somesane oyapo.  
Maka 3:20-30; Ruki 11:14-23*

22 Maiya amo aporo meta yatafumo ho maraka, hi fauraka, mé fasane aporo metakiramo Yasu rea karikia pesapo. Karikia pesane Yasumo aporoane masfarakano, ipi mé fasane faraka koteaka someaka, anakano ipi hi fausane soko faraka koteaka asekeá ásiapo.

23 Anakano aporo hinamo suamo asekeá fofaraka someraka, “Mafana aporoane Tefetemo aporo ira wainepe pesa aporo meta fasere peakosaporakasuane, érakanareapo.”

24 Aiyaka somesane Ferese aporomo kairaka someraka, “Yatafumo unihae yano motosa Piaóspu<sup>§</sup> e Yasuyaki rekenapo. Reasasamo Piaóspumo wakapuamo yatafu pusierakano apure.”

25 Aiyaka somerakano ipu hemakapusuane Yasumo aseraka takumeaka someraka, “Aporo namina hauaka hakása risia yíamo parakuraka weraka, aporoane koaka tarikia, kekepo kekeporaka risike, hauakane kauanehokosapo. Arirakano aporo ape sumu hakása namina parakuraka weraka arupukusapo. Arirakano aporo ira hakása namina soko parakuraka weraka arupukusapo.

26 Aina ayíáka Satanemo yatafuaki pusie satiki, ane ipi táké tati awera ayíáka weafunupo. Satanemo ipi aporo tákéyaki parakuraka wera satiki i arupufunupo.

27 Asiamo repo someraka, Piaóspu anoyaki reasasamo epo wakapumo yatafuaki pusierakano pusuapo, ayíáka repo somerakanapo. Arirakano repo namina aporo metakiramo yatafuaki pusiehokosakipoko, epa iyaki paoraka reare? Epamo wakapumo yatafuaki pusiesare? Repo someraka, ‘Piaóspumo wakapumo ásiapo.’ Aiyaka repo some paripeakosafapo. ‘Kotimo wakapumo ásiapo.’ Aiyaka repo somehokosapo. Asiamo nōmo rakisimo wakapuamo kepoane hemakapusakipoko, repo namina aporoamo ainane hemakapunie.

28 Arirakano yatafu pusiehoasimo Kotimo Ho Kotesa anoyaki reasasamo, epo wakapumo pusierapo. Yatafu purakano asekeá, repo úyaka hemakapunie. ‘Kotimo unihaeaka asekeá rekeakosa maiyane faserepesapo.’ Aiyaka hemakapunie.

29 Arirakano aporo metamo aporo waremo makata kemoane hakimokoariraka, fana aporo wareane sakomo taporaka motokoa marekea, epo apea yorokoa makata hakimorapo. Aporo wareane tapohoasiraka, e yaiya wareraka rekeno asekeá, epo apea hakimokoako yororafapo.

30 Arirakano ano patera asekeanafonoraka risia aporo hinamoamo, anoaki yunuraka rekenapo. Arirakano anoa paosa aporo hinamo repo, aporo hinamo metakira pasimokoanafonorakanone, aporo hinamoane repo mapakataerakanapo.

31 Asiamo nōmo reaki kakaro somerakaripo. Aporo hinamomo watikiaka rakirane soko, aporo hinamo meta mawakasemarakana somerane soko, Kotimo mafahoasireapo. Arirakano Ho Kotesane aporo hinamo metamo mawakasemarakano, Kotimo mafahokosafapo.

32 Arirakano Aporomanomo Tákeane anopo. Anoaki aporo hinamo metamo himeteraka mawakasemarakana somerakano, Kotimo eane mafahoasireapo. Arirakano Ho Kotesamo wakapuane metamo aseraka someraka, ‘Ane Satanemo wakapupo.’ Aiyaka Ho Kotesane mawakasemarakano, aporo hinamo ane, yumo hauaka wo areamo soko, keseke maturikia taena maiya amo soko, Kotimo mafahokosafapo.” Aiyaka Yasumo somesapo.

*Ira wateane Yasumo takumeaka somesane oyapo.  
Ruki 6:43-45*

33 Yasumo someraka, “Ira kotesamo ira wate kotesa perapo. Arirakano ira watikisamo ira wate watikisa perapo. Ira wate aseraka ira namoane hemakapurapo.

34 Asiamo re heseka ayireapo. Re watikiaka risike repo mayíáka koteaka somehokosare? Aporo hinamomo himua makesane akai aeyaka tonoherapo.

<sup>‡</sup> 12:20: Fofako soko, nafa soko, takumeaka somesamo kepoane aporo hinamomo Kotiaki wakasemarakana himu hemakapusuane Kotimo metakariakosafapo. <sup>§</sup> 12:24: Piaóspuane Satanemo yano motosa metane ayapo.

<sup>35</sup> Mahimura makatane himumo hemakapurapo. Aporo kotesamo himumo koteaka hemakapuraka akaimo kekemaraka koteaka somerapo. Aporo watikisamo himumo watikiaka hemakapuraka, akaimo kekemaraka watikiaka somerapo.

<sup>36</sup> Asiamo hukurukua takekea parakuna maiya amo, aporo hinamomo nenakamaka somesa akipoko Kotimo aporo hinamoaki kaiyakosapo. Kaikia iane parakuuhokosapo.

<sup>37</sup> Parakuanamo aporo hinamo metakiramo ipi some ana yiama, eaki fanasina hauaka á pusiehokosapo. Arirakano aporo hinamo metakiramo soko ipi akaimo some ana yiama, hepene yapura hisiehokosapo.” Aiyaka Yasumo somesapo.

*“Kotomo wakapumo hemakapukua rakirane isuaki tarinie.” Aisane oyapo.  
Maka 8:11-12; Ruki 11:29-32*

<sup>38</sup> Kotimo some mane tisa aporomo soko, Ferese aporomo soko, Yasuaki someraka, “Tisao, ne Koti aeyaka pesarihoamo isiaipo hemakapukusakipoko, Kotimo wakapumo hemakapukua rakirane nómó rakinie. Rakirakano isiaipo aseakoripo.”

<sup>39</sup> Airakano Yasumo someraka, “Maiya omo aporo hinamo watikiaka risike Kotiaki himu hakásaraka hemakapura faraka metaki mokome hemakapuraka someraka, ‘Isiaipo aseako Kotimo wakapumo hemakapukua rakirane nómó rakikitakae.’ Airakano repo someane nómó kakimaka rakiakosafapo. Yonaki makata tarisiane hákasa reaki tariakosapo.

<sup>40</sup> Asiamo Kotimo some kará porofete aporo Yona pokoa kára túa, sere isiamō soko, ere isiamō soko, kayapo. Yona pokoa tua kaya ayiáka Aporomanomo Táke anoane hauaka atura sere isiamō soko, ere isiamō soko, ayiáka rekeakosapo.

<sup>41</sup> Arirakano Yonamo Kotimo someane some karakano, Ninefa aporo hinamomo namina watikisane metakarikia risikiako parisapo. Asiakipoko Kotimo hukuarura maiyamo, Ninefa aporo hinamo amo, aporo hinamo maiya omo watikiaka risiasamo ipu watikisane tarikia somehokosapo. Asiamo repo makata watikisane metakarianafonosakipoko, ipu reane hukurukusapo. Arirakano Yona makama kesekesane anopo. Ano pekeea some karakano, maiya omo aporo hinamomo makata watikisane metakarirakarifapo.

<sup>42</sup> Arirakano Soromone koteaka hemakapukua somesane kaiyako, ketayia takua hauaka yameno aeyaka hinamo kuini ane pesapo. Asiakipoko Kotimo hukuarura maiyamo amo, aporo hinamo maiya omo risiamō nómó someane kakimakanafonosa aki, hinamo kuini amo iane hukurukusapo. Arirakano Soromone makama kesekesane anopo. Ano maiya yumo aporo hinamoyaki hakása reke, Kotimo someane some kayane repo kairakarifapo.” Aiyaka Yasumo somesapo.

*Yatafu pariperane oyapo.  
Ruki 11:24-26*

<sup>43</sup> Yasumo someraka, “Yatafumo aporo ho masane metakarikia pukua hauaka porasakipoko á koraka rerapo. Koraka reke e ape wakakosa soko, e fenekea kakakosa soko, koane fasekeno

<sup>44</sup> ipi hemakapuraka, ‘Aporo túra ape ayiáka waka reane metakarikia pusuasamo, á rekeako paripurakapo.’ Aiyaka paripekeea aseane aporo túra ape ayiáka feaosa kakamasa makata su kotesekeno aserapo.

<sup>45</sup> Asekeea ipi yatafu téke yatipinusu pasimorapo. Yatafu yatipinusu pasimosa amo, yatafu fana reamo watikisane marokeraka, ipu namo kakaro kára watikiaka rakirapo. Iane pasimokoa pekeea, aporoamo tura apea ayorora ayiáka yorokoa risirapo. Risikirakano aporoamo namo kakaro watikiaka rerapo. Fana yatafu hakása rea maiya amo, aporoamo watikisane wakasemanapo. Arirakano kari suane pekeea risikirakano, aporoamo watikisane káranapo. Aina ayiáka maiya omo aporo hinamo risiamō watikiaka rakirakano iaki ayiakosapo.” Aiyaka Yasumo somesapo.

*Yasumo ipi kałyia soko ipi mamanea soko pesane oyapo.  
Maka 3:31-35; Ruki 8:19-21*

<sup>46</sup> Yasumo aporo suaki some karaka rea maiya amo, ipi kałyia soko, ipi mamanea soko pesapo. Pekeea hauaka moroa risike ipu someraka, “Isiaipo Yasuaki makata somehokoripo.”

<sup>47</sup> Aiyaka somerakano aporo metamo kaikia Yasu ape kakarua reakipoko someraka, “Nómó ní amamo soko, ní maemo soko, neaki makata somehoko pekeea, hauaka moro atura arisie.”

<sup>48</sup> Arirakano Yasumo eaki someraka, “Nómó ama epare? Nómó mae epare?”

<sup>49</sup> Aiyaka Yasu ipia paosa aporo hinamo sarimasaki hokonomo tariraka someraka, “Nómó ama soko, nómó mae soko, re atoa ayapo.

<sup>50</sup> Asiamo aporo hinamomo nómó Ata hepene yapura reamo hemakapusuane kekemaraka rakirakano aporo hinamoane nómó mae, nómó papā, nómó ama ayapo.” Aiyaka Yasumo somesapo.

## 13

*Makata mano potesa Yasumo takumeaka somesane oyapo.*

*Maka 4:1-9; Ruki 8:4-8*

<sup>1</sup> Sere amo Yasu apeane metakarikia pukua he fua kayapo.

<sup>2</sup> Kayakipoko, aporo hinamo yakai sarimaraka hauaka taperakano, Yasu takahikia pukua kasua kake, aporo he fua risiaki makata somesapo.

<sup>3</sup> Some yakai takumeaka epo somesapo. Epo someraka, "Aporomo makata mano poterape pusuapo.

<sup>4</sup> Poterape pusua maiya amo, makata mano metakira ikia kara hurupepesapo. Hurupepesane menamo nesapo.

<sup>5</sup> Arirakano makata mano metakira eke kima hauaka wakasemasakipoko hurupepesane, aroaka tanehekea pikinu koteaka pusufapo.

<sup>6</sup> Pikinu koteaka punafonoraka, maíyamo ruraka sisipuraka yoferaka kukua kesapo.

<sup>7</sup> Arirakano makata mano metakira, makata mano keta risia arakarua hurupepesapo. Hurupepesane makata mano keta risia akiyaki hakasa tanehesapo. Tanehenaka makata keta risiane popakeraka makata manoane karotapiraka serekesapo.

<sup>8</sup> Arirakano makata mano metakira hauaka kotesakipoko hurupepesane tanehekea wate pesapo. Wate peraka, metakira wate wane harote su (100) pekea, metakira wate sekeseti su (60) pekea, metakira wate teti su (30) pekea, ayiáka pesapo.

<sup>9</sup> Re senaki risiamo kairaka koteaka kaisie." Aiyaka Yasumo somesapo.

*Maiya suamo Yasumo takumeaka susu somesane oyapo.*

*Maka 4:10-12; Ruki 8:9-10*

<sup>10</sup> Aporo hakasa pura pekea Yasuaki kairaka, "Marirakano nōmo aporo suaki takume susu somerakanare?"

<sup>11</sup> Airakano Yasumo someraka, "Repo kaiyisimo Koti unihaeaka rea mahamesane some kepoane yumo reaki hufitaeaka somerakanapo. Arirakano aporo suaki some kepoane hufitaeaka somerakanafapo.

<sup>12</sup> Koti unihaeaka reane some kepoane repo hemakapurakanapo. Hemakapurakanaro reaki makata meta soko tariakosapo. Tarirakano repo hemakapusuane karahokosapo. Arirakano aporomo kepo hemakapunafonoraka, fana kaisiane soko meraruhokosapo.

<sup>13</sup> Ipu himo aseraka aseke, kepoane koteaka hemakapurafapo. Ipu senakimo kairaka kaikia, himumo koteaka hemakapurafapo. Asiamo iaki takume susu somerakanapo.

<sup>14</sup> Ipu hemakapunafonoraka kakipayasane kakipayahoasiraka wate fana Kotimo some kará porofete aporo Aesayamo someraka,

'Ipu kairaka kaiyakosapo. Kaisia nine kepoane hemakapukusafapo. Ipu aseraka aseakosapo. Asesa nine kepoane koteaka hemakapukusafapo.'

<sup>15</sup> Asiamo aporo hinamo suane himu mahimeteraka risikinapo. Ipu himo aserapaka hikumisiapo. Ipu senakimo kairane kaiyako hisiraka senaki tisapo. Ipu himumo hemakapuko hisiraka koteaka hemakapurakanafapo. Ipu himu watikisane nōmo mafahoasimo i'anoaki risikiako parirakanafapo.' Aiyaka Aesayamo somesane faserepesa ayareapo. (*Aisaia 6:9-10*)

<sup>16</sup> Arirakano repo himo aseraka aseke hemakapurakanapo. Repo senakimo kairaka kaikia hemakapurakanapo. Asiasamo seseraka risikianie.

<sup>17</sup> Nōmo reaki kakaro somerakaripo. Repo makata asesane Kotimo some kará porofete aporo yakaimo soko, Koti hemakapura aporo ereketaeraka risiamo soko, ipu aseakoripo aisa nine, ipu asesafapo. Repo makata kaisiane ipu kaiyakaripo aisa nine, ipu kaisiafapo." Aiyaka Yasumo somesapo.

*Makata mano potesa takume kepoane oyapo.*

*Maka 4:13-20; Ruki 8:11-15*

<sup>18</sup> Yasumo someraka, "Repo hemakapusimo makata mano potesa takume kepoane oyapo.

<sup>19</sup> Makata mano ikia kara hurupepesa asiane oyapo. Aporo hinamoane Kotimo unihaeaka aseke rekenapo, aisane aporomo kaikia kepoane koteaka hemakapunafonorakan, some kaisiane Satanemo foaka hakimarapo.

<sup>20</sup> Arirakano makata mano eke kima hurupepesa pikinu

<sup>21</sup> koteaka punafonona asiane oyapo. Aporo hinamomo Kotimo someane wate foaka kaikia seserakao ayiáka, namo kakaro kakimaraafapo. Kakimakanafonoraka maiya wakasemamo kakimaka risiakipoko, keseke makata watikisa fasereperakano soko metao, aporo metakiramo Kotimo some kakimasa aporo hinamoaki mokoatikirakano soko metao, arirakano aseke Kotimo some kaisiane foaka metakarirapo.

<sup>22</sup> Arirakano makata mano keta risiakipoko arakarua makata mano hurupepesa, wate koteaka peanafonosa ásiáne oyapo. Aporo hinamomo Kotimo someane kairaka yia, hauaka wo makata tomekesa hemakapuramo soko, makata kemo kára mokoa seseraka hemakapuramo soko, tetá amo Kotimo someane karotapirapo.

<sup>23</sup> Arirakano makata mano hauaka kotesakipoko hurupepesa wate sakepamo pesa ásiáne oyapo. Aporo hinamomo Kotimo someane kakimaka namo kakaro himu hakásaraka hemakapukua risikino, ira wate wane harote su (100) apera ayíáka risirapo. Arirakano metakira sekeseti su (60), arirakano metakira teti su (30) ayíáka apera ayíáka, aporo hinamoa ayíáka risirapo." Áiyaka Yasumo somesapo.

*Koane soko kerewa soko sarimaraka tanehesane Yasumo takumeaka somesane oyapo.*

<sup>24</sup> Yasumo aporo hinamo suaki takumeaka someraka, "Kotimo unihaeaka aseke rea ásiáne oyapo. Aporomo koane mano kotesa hemoa potesapo.

<sup>25</sup> Poteraka marekea ereamo aporo su wasakipoko yunu aporo peraka koane potesakipoko kerewa hae poteraka marekea pusuapo.

<sup>26</sup> Pusuakipoko makata mano potesane tanehekeea wate apera maiya amo aseane, kerewa soko koaneyaki hakása tanehekeea wate perakano asesapo.

<sup>27</sup> Aseraka aporo raipamo pekea hemo wafayaki someraka, 'Unihaeo, nómó hemoa koane mano hákasa potesare? Koane mano hákasa potesakipoko mayíáka kerewane hakása tanehesare?

<sup>28</sup> Airakano hemo wafayamo someraka, 'Yunu aporomo tau pekea kerewa hae ane, koane hemoa potehoareapo.' Airakano aporo raipamo hemo wafayaki kairaka, 'Kerewane fikia mokoatehoare? Kerewane mayikaere?

<sup>29</sup> Airakano hemo wafayamo someraka, 'Wae, repo kerewane fikia mokoateraka, koane ane hasaka rakare mokoatenapaka kerewane fiakopo.

<sup>30</sup> Hakása su yaiya risikiasimo metakarinie. Keseke namosekeno nako tuamora maiya amo, aporo raipaki nómó someraka, "Kerewane fana popateraka faturaka ira paiyáko taeraka marekea, koane namoane tukua apea taerasie," 'aihokosapo." Áiyaka Yasumo takumeaka somesapo.

*Ira máseta hae maposa Yasumo takumeaka somesane oyapo.*

*Maka 4:30-32; Ruki 13:18-19*

<sup>31</sup> Aporo hinamo suaki Yasumo takume meta someraka, "Aporo hinamo Kotimo unihaeaka aseke reane, ira maseta hae aporo metamo ipi hemoa maposa ásiápo.

<sup>32</sup> Maseta hae kakaro wakasema yiamo, pauaka henaka hemoa makata porosane marokeraka ira pariraka káranapo. Káraraka reakipoko ira eya mena koraka torane pekea, menamo ape kirapo. Aina ayíáka aporo hinamo Kotimo unihaeaka aseke reane ásiápo." Áiyaka Yasumo somesapo.

*Farawa pirirane Yasumo takumeaka somesane oyapo.*

*Ruki 13:20-21*

<sup>33</sup> Yasumo takume meta someraka, "Aporo hinamo Kotimo unihaeaka aseke reane, farawa pirira ásiápo. Hinamomo farawa paiyakosakipoko farawa tarámo hakása maka makata pirirayaki sarimaraka kekerorakano, makata piriramo farawane hemakapukua pirirapo." Áiyaka Yasumo somesapo.

*Aporo hinamo suaki Yasumo takumeaka somesane oyapo.*

*Maka 4:33-34*

<sup>34</sup> Yasumo somesa maiya amo aporo hinamo yakai sarimasaki Yasumo takumeaka someraka, kakaro hufitaeraka somesafapo. Takumeaka susu somesapo.

<sup>35</sup> Somehoasiraka wate fana Kotimo some kará porofete aporomo Yasuane somesane oyapo. Unihaeo ipi someraka, "Aporo suaki nómó takumeaka somehokosapo. Hauaka kepomaresa maiya amo makata mahamesane, yumo some kepo su kakaro feakataeraka somerakanapo," Aisane faserepesa ayareapo. *(Buk Song 78:2)*

*Koane soko kerewa soko sarimaraka tanehesane takume someamo kepoane oyapo.*

<sup>36</sup> Aporo hinamo yakai sarimasane, Yasumo metakarikia pukua apea yorosapo. Yororakanano aporo hakása pura pekea Yasuaki someraka, "Hemoa kerewa soko, koaneyaki hakása tanehesa takume someamo kepoane isuaki hufitaeraka somesie."

<sup>37</sup> Airakano Yasumo someraka, "Koane mano kotesa hemoa potena aporoane anopo. Aporomanomo Tákeane anopo.

<sup>38</sup> Asiamo hemo ásiáne hauaka kára oyapo. Koane mano kotesa ásiáne Koti unihae paosa aporo hinamopo. Kerewa hae ásiáne Satanea paosa aporo hinamopo.

<sup>39</sup> Yunu aporomo kerewa hae potesa asíane Satanepo. Wate namosekeno tuamora ayíáka, hauaka one fa ana sere amo ayiakakosa ayapo. Aporo raipamo kerewane popateraka, koane namoane tukua apea taehokosa aporoane hepene aporopo.

<sup>40</sup> Kerewa faturaka iramo apaira ayíáka, keseke hauaka one fa ana maiya amo ayíáka paipayakosapo.

<sup>41</sup> Aporomanomo Tákeane anopo. Nōmo hepene aporo pusierakano peraka, aporomo watikiaka rakisimo kirimana aporoane soko, watikiaka rakira aporoane soko, su mokoa iramo inakasimo ira á mokoasuhokosapo.

<sup>42</sup> Mokoasusa á i fanasiraka risike hihiripuraka akai kirisiraka risikiakosapo.

<sup>43</sup> Maiya amo sere maiya sesakereraka faeana ayíáka ereketaeraka risia aporo hinamoane Ata unihaeaka reamo hauaka á ayíáka faehokosapo. Re senaki risiamo kairaka koteaka kaisie.” Áiyaka Yasumo somesapo.

*Yasumo takume metakira somesane oyapo.*

<sup>44</sup> Yasumo takume meta someraka, “Kotimo aporo unihaeaka asekea reane, makata namo kakaro kotesa mahimuna makatane maua kekeea, hemoa kokomaresa ásiapo. Aporo meraruamo peane, makata namo kakaro mahimuna makatane asekea, himu faraka epo yia mokosekesapo. Mokosekeraka marekea pukua, kára seseraka ipi makata kemo su mokoa aporo metaki roporaka mone mosapo. Mone mokoa moneamo hemoane roposapo,” áiyaka Yasumo somesapo.

<sup>45</sup> Arirakano Yasumo takume meta soko someraka, “Kotimo unihaeaka asekea reane, pisinisi aporomo sekete kotesa ropohoko kope pura asiapo.

<sup>46</sup> Pisinisi aporoamo sekete kope pukua sekete namo kakaro kotesa aseraka ropohoko, ipi makata kemo su mokoa aporo metaki roporaka mone mosapo. Mone mokoa moneamo seketeane roposapo.” Áiyaka Yasumo takumeaka somesapo.

*Kasipu pokoa morane Yasumo takumeaka somesane oyapo.*

<sup>47</sup> Yasumo takume meta someraka, “Kotimo unihaeaka asekea reane kasipu pokoa mora ásiapo. Pokoa mokoakosakipoko kasipu hea kokomaresapo. Kokomaresa á pokoa kekepo kekepo suane kesekeno mosapo.

<sup>48</sup> Mosane komarusekeno aporomo kasipuane maka, he fea motokoa marekea toke, pokoane parakusapo. Parakuraka pokoa kotesane mokoa kasu tisia taeraka, pokoa watikisa nanafononane mokoatesapo.

<sup>49</sup> Asia ayíáka keseke hauaka one fa ana maiya amo ayiakakosapo. Aporo kotesayaki watikisayaki suasuaraka risiane hepene aporomo parakuhokosapo. Aporo hinamo watikisane parakuraka mokoa, iramo inakasimo mokoasuhokosapo.

<sup>50</sup> Mokoasusane fanasina hauaka á risike hihiripuraka akai kirisiraka risikiakosapo,” áiyaka Yasumo somesapo.

<sup>51</sup> Asiamo Yasumo ipi aporo hakása puraki someraka, “Nōmo reaki somesane su hemakapurakarire?” Airakano ipu “Ao, hemakapurakaripo,” aisapo.

<sup>52</sup> Airakano Yasumo some meta someraka, “Nōmo Koti unihaeaka asekea reane somerakan, Kotimo somemane tisa aporomo kakimaka anoa paosa aporoane ape wafaya ásiapo. Asiamo ape wafayamo makata kemo kotesa taesane mokoa, kawe taesane soko, fana taesane soko, mokoa aporoaki karápo. Akara ayíáka Kotimo somemane tisa aporomo kakaro some kawe kaisiane soko, fana kaisiane soko some karápo.” Áiyaka Yasumo somesapo.

*Yasumo ipi Nasare apea some karakano aporomo kakipayasane oyapo.*

*Maka 6:1-6; Ruki 4:16-30*

<sup>53</sup> Yasumo áiyaka takumeaka someaka faraka Kapaneame taoneane metakarikia,

<sup>54</sup> Nasare apea ipi pusuapo. Pukua á reke Yu aporomo sarimana apea makata some karakano, aporo hinamomo kairaka fofasapo. Fofaraka ipu someraka, “Kotimo hemakapura some kotesane epo ma kaisiarakapo. Epo Kotimo wakapumo hemakapukua arakirane ma enomasarakapo.

<sup>55</sup> Aporoane ipi kapenetamo hokosapo. Ipi katyiane Mariapo. Arirakano ipi mamaneane Yamese soko, Yosefe soko, Saemone soko, Yutase soko ipo.

<sup>56</sup> Ipi ifia isuyaki hakása tokenapo. Ipu taka ayíáka rakirakarifapo. Epo hákasa wakapuaka arakirane ma enomasarakapo,” aisapo.

<sup>57</sup> Áiyaka ipu Yasuaki himu hakásaraka hemakapunafonoraka fasikia risiapo. Fasikia risikino Yasumo iaki someraka, “Kotimo some kará porofete aporomo ipi ape sumu aporo hakása risia amo soko, ipi ape wará aporo hakása risia amo soko, eane makama fanaraka hemakapurafapo. Hemakapunafonorakano yia, ape sumu meta á aporo hinamo

metakiramo Kotimo some kará porofete aporoane makama fanaraka hemakapurapo." Aiyaka Yasumo somesapo.

<sup>58</sup> Someraka ipi apea aporo hinamomo eaki himu hakásaraka hemakapunafosasamo Yasumo Kotimo wakapumo hemakapukua rakirane kára rakisiafapo.

## 14

*Yasumo wakapuaka rakisiane Herotemo kaikia himeteraka reane oyapo.*

*Maka 6:14-16; Ruki 9:7-9*

<sup>1</sup> Yasu ipi Kariri hauaka á some karaka rea maiya amo, Kariri hauaka asekea rea aporoane Herotepo.\*

<sup>2</sup> Arirakano Yasumo wakapuaka rakiraporakano, Herotemo kairaka, ipi aporo raipaki someraka, "Aporo wakapuaka rakirane Yone he tapukumarera ayarakanareapo. E rusua kusuane maturikia taerakanareapo. Maturikia taesasamo wakapuaka arakirane Yonemo wakapuaka rakirakanareapo," aisapo.

*Yone he tapukumarerane Herotemo uyáka rusua kusuane oyapo.*

*Maka 6:14-29; Ruki 3:19-20*

<sup>3-4</sup> Herote Kariri hauaka asekea rea aporomo ipi mamanea Firipipo. Firipimo asea Herótiaeane Herotemo hakimarakia rekeno asekea, Yonemo Heroteaki hukurukua someraka, "Hinamoane nómō hakimarakia areane somemane motosomas mamosoane." Airakano Herotemo Yoneane tipura makeako aporo terakaiyamosaki someraka, "Yoneane waseremasie." Airakano aporo terakaiyamosamo Yoneane waseremaka hokonoa taporaka tipura makesapo.

<sup>5</sup> Tipura makekeea, Yone kukusimo rukusapoko asiane, Yu aporo metakiramo someraka, "Yoneane Kotimo some kará porofete apororeapo." Airakano kaikia Herotemo hemakapuraka, "Nómō Yone rusua kurakanone, aporo yakaimo anoaki sapehoasireapo." Aiyaka hemakapuraka aporomo eaki sapenapaka namoraka reke, Yone rukusapoko asiáne, metakarisiapo.

<sup>6</sup> Metakarikia Heroteane ipi takapesa serea paurakano hemakapuko hokono keraka, aporo suamo asekeasimo Herótiasemo ipi faraya hinamo sakoramo taneseraka kesasapo.

<sup>7</sup> Taneseraka kesarakano asekea, Herotemo seseraka hinamo sakoraki someraka, "Nómō makata makasierakano, nómō neaki makakosapo. Nómō kakaro somehoanafonorakano solo Kotimo aseakosapo." Aiyaka aumaraka somesapo.

<sup>8</sup> Somerakano Herótiasemo ipi farayaki hokokaka someraka, "Yone he tapukumarerane wamo patekemaka, merakia motokoa, anoaki makasiehoanie. E kakaro rusua kusuane aseako ipi wamoane makasiehoanie." Airakano someane ipi farayamo kakimaka Heroteaki yaiya somesapo.

<sup>9</sup> Somerakano unihae Herotemo kaikia mahisiraka reapo. Mahisiraka reke epo hemakapuraka, nómō makakosapo aiyaka aumaraka somesane, aporo hokono akera sarimasa suamo kaisiasamo, wamo patekemakaniesane metakarike, kaíyanapaka epo somesane metakarisiapao.

<sup>10</sup> Metakarirafaraka aporo terakaiyamosamo Yone wamo pateketaehoasimo tipura apea pusiesapo.

<sup>11</sup> Airakano tipura apea pukua Yone wamo pateketaeraka merakia motokoa maka pekea hinamo sakoraki kasapo. Karakano maka ipi katyia Herótiaeaki kasapo.

<sup>12</sup> Arirakano Yonemo ipi aporo hakásá pura peraka Yone oto susuane maka pukua hauaka marekea Yasuaki Yone rusua kusuane somehoko pusuapo.

*Aporo fae taoseneaki (5,000) Yasumo farawa kasane oyapo.*

*Maka 6:30-44; Ruki 9:10-17; Yone 6:1-14*

<sup>13</sup> Yone he tapukumarerane rusua kusuaporakano Yasumo kairaka, Yasu kasua ripaka pukua, ima yaoa aporo fasakipoko ipi haku fore rekeako pusuapo. Pusuaporakano kairaka aporo hinamo yakai ipu namina apeane metakarikia, Yasu kekemarape he fe ikia pusuapo.

<sup>14</sup> Pukua sarimasakipoko Yasu pekea kasu karimarekea aseane aporo hinamo su sari-masekeno asesapo. Aseraka iane kamenakasapo. Kamenakaraka hemakapukua, aporo hinamo makata tasane epo mafasapo.

<sup>15</sup> Mafaraka reke samapu maiya tuakeramo Yasuaki ipi aporo hakásá puramo someraka, "Hauaka wo ima yaosakipoko aporo hinamo risikinafapo. Maiya tukesasamo aporo hinamo sarimasaki ipu namina makata nakosa ropohoko apea poparipusiesie."

<sup>16</sup> Airakano Yasumo someraka, "Ipusierakane marirakanore? Repo namina iaki makata nakosa kakanie."

\* **14:1:** Yasu takapesa maiya amo Herote rea ayafapo.

<sup>17</sup> Airakano aporo hakāsa puramo someraka, "Makata nakosa farawa kakoreasu, pokoa tetá ayiáka tokenapo. Makata meta kakenafapo."

<sup>18</sup> Airakano Yasumo someraka, "Makata nakosane anoaki makasie."

<sup>19</sup> Aíyaka aporo hinamo suaki Yasumo someraka, "Re su asanea toae." Aíyaka i toakipoko farawa kakoreasu pokoa tetá mokoa reke, hepene yapura asekea, Kotiaki suseraka kurikuriraka faraka, farawa mosoraka aporo hakāsa puraki karakano, aporo hakāsa puramo aporo hinamo suaki kasapo.

<sup>20</sup> Karakano aporo hinamo suamo siaraka nesapo. Nekea faraka farawa soko pokoa soko momo yia tokeno, aporo hakāsa puramo mate kenosua kekea komarusuapo.

<sup>21</sup> Aporo makata nesa susuane menoraka fae taosenepo (5,000). Hinamo soko hokosa soko i suane menosafapo. I menohoaanafonosamo soko, ipu suamo nesapo.

*Yasu he kima finiraka pusuane oyapo.*

*Maka 6:45-52; Yone 6:16-21*

<sup>22</sup> Aporo hinamo suamo makata nekea farakano, Yasumo ipi aporo hakāsa puraki someraka, "Re fana kasua ripaka he fe taku ra hisie. Arirakano aporo hinamo sarimasane ipu namina apea poparipusie, aihoko ano fore o rekenapo." Airakano i kasua ripaka hisiapo.

<sup>23</sup> Hisiakipoko aporo hinamo su sarimasane soko namina apea poparipusuapo. Popari-pusuakipoko Yasu ipi haku ūria kurikurihoko hisiapo. Hikia ereamo Yasu ipi haku kurikuriraka reapo.

<sup>24</sup> Kurikuriraka reakipoko aporo hakāsa pura kasua ripaka he numua puane, he kupamo kasu unia ruraka he kupa atifoyaki kára peraka kasu maka paripurakanoraka kasu roane pusuafapo.

<sup>25</sup> Kasu roraka risike, yao fia makehoramo Yasu ane kasu tapukurea makeraka he kima finirape pesapo.

<sup>26</sup> Perakanano aporo hakāsa puramo asekea namo kakaro himu faraka toke kokoaeraka wáraka, "Yakasa ho apere."

<sup>27</sup> Aíyaka namoraka wárakanano iaki Yasumo wate foaka someraka, "Anopo. Re namohokopo. Namoraka himu haruhokopo. Paroaka risikianie."

<sup>28</sup> Airakano Pitamo someraka, "Unihaeo, nere? Nesekeño nómó anoaki he kima finirape peaesie."

<sup>29</sup> Airakano Yasumo someraka, "Ne peae." Aíyaka somerakanano Pitamo kasu metakarikia, Yasu rea he kima finirape puraka

<sup>30</sup> kaiyiáne, atifomo e kaua rurarakano kaisiapo. Kairaka namoraka e hea keneperakanano wáraka, "Unihaeo, ano masie."

<sup>31</sup> Airakano wate foaka Yasumo hokonomo Pita maka someraka, "Nómó anoaki himumo hakasa wakasemaraka hemakpureapo. Nómó hemakapuraka, 'Sia puraka soko metao, hea keneperaka soko metao ayakanarakapo.' Aíyaka marirakanano himu tetáraka hemakapurakanare?"

<sup>32</sup> Aíyaka tetá kasua parohoane atifo fasapo.

<sup>33</sup> Farakanano asekea aporo kasua toamo Yasuaki kekereraka someraka, "Né kakaro Kotimo hokosapo." Aíyaka kekereraka somesapo.

*Kenésare hauaka á aporo hinamo risia makata tasane Yasumo mafasane oyapo.*

*Maka 6:53-56*

<sup>34</sup> He kekeá kaya kasu rokoa teraporaka, Yasu soko, Yasumo ipi aporo hakāsa pura soko, kasu rokoa pukua, Kenésare hauaka á pausapo.

<sup>35</sup> Paurakanano aporomo aseraka hemakapuraka, "Ane Yasureapo." Aíyaka hemakapukua some mareraka, "Yasu pesane hauaka makea somehoko pusie." Aíyaka some marerakanano pukua somesapo. Somerakanano kaikia aporo hinamo su makata tasane Yasumo mafaoasimo karikia pesapo.

<sup>36</sup> Karikia pesa aporomo Yasuaki someraka, "Aporo hinamo makata tasamo nómó pasu ke huhua sakaihoane siahoasisekeno aosie." Airakano Yasumo aosapo. Aoraka epo pasu huhuanne aporo hinamo makata tasamo sakaihoane ipu makata tasane fasapo.

## 15

*Makasa kaua kekemamo someamo Kotimo someane matekeamenane oyapo.*

*Maka 7:1-13*

<sup>1</sup> Ferese aporomo soko, somemané tisa aporomo soko, Yarusarame sitiane metakarikia Yasu rea pekea kairaka,

<sup>2</sup> "Marirakano nōmo aporo hakāsa puramo isiapo makasa kauamo ayakanie, aiyaka somepe pesane koaretaeraka risikinare? Koaretaeraka, ipu makata nakosakipoko hokono kusurakarifapo. Hokono kusunafaraka makata maka anene."

<sup>3</sup> Airakano Yasumo iaki kairaka, "Marirakano repo makasa kaua kekemamo ayikanie, aiyaka somepe pesane mafanahokosakipoko, repo Kotimo somemane koaretaeraka risikinare?"

<sup>4</sup> Kaisie. Kotimo somemane motosane oyapo. Kotimo someraka, 'Ni Atape ama tetāne koteaka hemakapukua makotehoanie,' aisapo. (*Kisim Bek 20:12; Lo 5:16*)

Kotimo somemane meta soko someraka, 'Aporomanomo ipi atane soko metao, ipi amane soko metao, yakasa ho mareraka ekenerakano e kakaro kukusimo runie.' (*Kisim Bek 21:17; Wok Pris 20:9*)

Aiyaka Kotimo somesa nine

<sup>5</sup> repo someraka, 'Aporomo ipi ataki soko metao, ipi amaki soko metao, someraka, "Nōmo tetōaki makata yaku kakakosapoko asiāne, nōmo metakarikia Kotiaki karakanapo." Aisa aporoamo ipi ata ama tetāne makotehoanie aiyaka Kotimo somemane motosane metakarikia koaretaenane siareapo.' Aiyaka repo Kotimo somemane ane mawakasemarakanapo.

<sup>6</sup> Aiyaka repo namina makasa kaua kekemamo ayikanie, aiyaka somepe pesane mafanahokosakipoko, Kotimo somemaneane repo some sesekeraka akaye. Some sesekeraka kake, repo atape ama tetāne asekea rekeakosane metakarirakanapo.

<sup>7</sup> Re himu tetāraka arisie. Wate fana Kotimo some karā porofete aporo Aesayamo reane kakaro somesapo. Somesane oyapo.

<sup>8</sup> Kotimo someraka, 'Aporoamo anoaki akaimo kekereraka yia himumo anoaki hemakapurakanafapo.

<sup>9</sup> Himumo anoaki hemakapunafonoraka, nena akai susuamo anoaki kekerenapo. Ipu namina aporomanomo hemakapusuane some karakanapo. Some karakaya nōmo somemaneane ipu some karakanafapo.' Aiyaka Kotimo somerakano Aesayamo popasapo." (*Aisaia 29:13*) Aiyaka Yasumo somesapo.

*Aporo hinamo himu mawatikinamo kepoane oyapo.*

*Maka 7:14-23*

<sup>10</sup> Aporo hinamo su sarimahoasimo Yasumo peaeaka perakano iaki someraka, "Kaisie. Kaikia hemakapunie.

<sup>11</sup> Aporomo soko, hinamomo soko ipi akaimo makata anenamo ipi yia mawatikinafapo. Arirakano akai aeyaka some watikisa tonoheramo ipi yia mawatikinapo." Aiyaka Yasumo somesapo.

<sup>12</sup> Keseke e rea ipi aporo hakāsa pura pekeea eaki someraka, "Nōmo some karakasuane, Ferese aporomo kaikia mahisisapakae. Nōmo kaisiare?"

<sup>13</sup> Airakano Yasumo someraka, "Makata mano porosane nōmo Ata hepene yapura reamo poroanafonosane su fiakosapo.

<sup>14</sup> Asiamo aporo hi taku tetākara fausamo ikia kara atarira aiyáka, Ferese aporomo aiyáka tarirakanapo. Aporo hi taku tetākara fausamo aporo hi taku tetākara fausa metane karikia purakano, tetā tetākara kutua etehokosapo. Anapaka re Ferese aporoyaki paohokopo."

<sup>15</sup> Airakano Pitamo someraka, "Takume kepoane isuaki somesie."

<sup>16</sup> Airakano Yasumo someraka, "Repo kepoane yaiya hemakapurakarifare?

<sup>17</sup> Makata nesane katukunua pukua katukunu aeyaka fako otoa pukua fakonapo.

<sup>18</sup> Airirakano himumo watikiaka hemakapusuane akaimo soko watikiaka someanamo, ipi yia mawatikinapo.

<sup>19</sup> Asiamo aporo hinamo himua makata watikiaka hemakapukua risirane oyapo. Watikiaka hemakapurane soko, aporomano rusua kukuko hemakapurane soko, hinamo hakimako hemakapurane soko, aporo rea puko hemakapurane soko, makata kemo hakimako hemakapurane soko, kotafe topakamaraka somehoko hemakapurane soko, aporomano hokomaka somehoko hemakapurane soko, makata ane himua risiane akaimo somerapo.

<sup>20</sup> Makata amo aporomano ipiane mawatikinapo. Asiamo makata nako hokono kusuhoanafononamo aporomano ipiane mawatikinafapo." Aiyaka Yasumo somesapo.

*Yu aporohoanafonosa hinamomo Yasuaki himu hakásaraka hemakapusuane oyapo.*

*Maka 7:24-30*

<sup>21</sup> Yasumo soko ipi aporo hakāsa puramo soko, apeane metakarikia puraka, Yu aporohoanafonosamo hauaka á, pukua Taia taoneane soko, Saetone taoneane soko, makeraka pusuapo.

<sup>22</sup> Pukua á reakipoko Yu aporohoanafonosa hinamo, Kenane aporo ira wainepe pesa hinamo ane kayapo. Hinamoane Yasu rea peraka paroaka someraka, "Tefetemo aporo ira Unihaeo, nómō ano kamenakarakaraka arareriasie. Nómō hinamo hokosa yatafumo ho masa mokoatikisane káraro." Aiyaka hinamoamo somesapo.

<sup>23</sup> Aiyaka somerakano yía Yasumo eaki makata meta somesafapo. Somehoanafonora- raka Yasu purakano, ipi aporo hakása pura pekea eaki efera hunia soko, efera hunia soko paroaka someraka, "Hinamoane isu kekemerape peraka wáká kikirape apere. Hi- nameamo hokosane arareriasie airakane nómō arareriasie. Arareraka ipi paripusiesie."

<sup>24</sup> Airakano Yasumo someraka, "Yu aporo suane saro sipi rosaka tarisia ásiápo. Asiasamo Yu aporo hinamo hákasa ararehoko Kotimo ano pusierakasupo. Yu aporohoanafonosane ararehoko ano pusierakasufapo." Aiyaka Yasumo somesapo.

<sup>25</sup> Somerakano Yasu rea hinamoane pekea kakuna porokoa kake someraka, "Unihaeo, ano arareriasie."

<sup>26</sup> Airakano Yasumo someraka, "Hokosamo makata nakosane kásamo nasimo mamakate- hoane siahosifareapo."

<sup>27</sup> Airakano hinamoamo someraka, "Unihaeo, kakarorakae. Ásiáne ape wafayamo ape teporo aeyaka makata nenaka momo hurupeperakano, kásamo soko nenapo."

<sup>28</sup> Airakano Yasumo someraka, "Hinamo, nómō anoaki himu hakásaraka hemakapurane káraro. Nómō hemaka apura ayíáka nómō ayiakakosapo." Aihoanine hinamo hokosa yatafumo ho masane fasapo.

#### *Aporomano yakai makata tasane Yasumo mafasane oyapo.*

<sup>29</sup> Yasumo Yu aporohoanafonosamo hauakane metakarikia pukua, he Kariri he fua pusuapo. Pukua úria hikia kayapo.

<sup>30</sup> Kayakipoko aporomano yakai peraka, aporomano korake matipusa soko, aporomano hokono narisa soko, aporomano hi fausa soko, aporomano me fasa soko, aporomano metakira makata tasane soko mokoa pesapo. Mokoa pekea Yasu rea kumisi neneamea mokoa pekea taerakano, Yasumo asekeea aporo hinamo makata tasa suane epo mafasapo.

<sup>31</sup> Asiamo aporomano me fasa mafasamo koteaka somesapo. Hokono narisa mafasane hokono koteaka raesapo. Korake matipusa mafasane koteaka koraka risiápo. Hi fausa mafasamo koteaka asesapo. Ayíáka aporomano suane Yasumo mafasapo. Mafarakano aporomano sarimasamo asekeea fofaraka yía sesesapo. Seseraka Isiraya aporo hinamomo Kotiane kekeresapo.

#### *Aporo fo taoseneaki (4,000) Yasumo makata nakosa kasane oyapo.*

*Maka 8:1-10*

<sup>32</sup> Yasumo ipi aporo hakása puraki makata somehoko peaeraka perakan, iaki someraka, "Sere isiamo aporo hinamo yakai anoyaki sarimaraka risike, makata nakosane fapo. Fasasamo nómō iane kamenakaripo. Iane himu raru ikia kara meamoraka yofenapaka pusiehoko hisiripo."

<sup>33</sup> Airakano aporo hakása puramo someraka, "Isu arisia one ima yaosasamo aporomano sarimasaki farawa siaraka nasimo kakakosane ma mokoakosare?"

<sup>34</sup> Airakano Yasumo iaki kairaka, "Repo farawa yakapusu tokenare?" Airakano ipu someraka, "Farawa yatipinusu pokoa fete hukusi tokenapo." Aiyaka ipu somesapo.

<sup>35</sup> Aiyaka somerakano aporo hinamo suaki Yasumo someraka, "Re su hauaka á toae."

<sup>36</sup> Aiyaka i tokeno, farawa yatipinusu, pokoa hukusi soko Yasumo mokoa, Kotiaki suseaka kurikuriraka faraka, farawa mosoraka aporo hakása puraki karaka rekeno, ipu aporo hinamo su sarimasaki takupe pusuapo.

<sup>37</sup> Takupe pukua faraka aporomano su sarimasamo siaraka nesapo. Nekea siarakan farawa momoane aporo hakása puramo mokoa, mate yatipinusua kekeea komarusuapo.

<sup>38</sup> Arirakano aporo farawa nesa susuane menosane fo taosenepo (4,000). Arirakano hinamo soko, hokosa fete soko, iane menosafapo. I menohoanafonosamo soko makata ane nesapo.

<sup>39</sup> Nekea faraka aporomano yakai sarimasane Yasumo pusiesapo. I purakano Yasu kasua ripaka kasu rokoá Mákatane hauaka á pusuapo.

## 16

*Ferese aporo Satusi aporo ipu Yasu kau aseakosakipoko Yasumo rakisimo somesane oyapo.*

*Maka 8:11-13; Ruki 12:54-56*

<sup>1</sup> Yasu reakipoko Ferese aporo soko, Satusi aporo soko pekea, ipu Yasu kau aseakosakipoko Yasuaki mokopipiraka somesapo. Ipu someraka, "Kotimo murikimasane

nereapo aihoko nōmo rakirane isiaipo aseako nōmo rakikitakae. Kotimo hepene yapura makata ainane isiaipo aseako nōmo rakikitakae."

<sup>2</sup> Airakano Yasumo someraka, "Samapu maiya tuakeramo ti surakano aseraka repo someraka, 'Kupa kakasireapo,' airapo. Arirakano sere metamo mituru fiarakano aseane ti kokorasakipoko katorakano aseraka repo someraka, 'Pipu yao peasireapo,' airapo.

<sup>3</sup> Aiyaka repo ti aseraka yao peakosane soko, yao kotehkosane soko, repo aseraka takekeha hemakapurapo. Ane aseraka hemakapura yaiya maiya omo Kotimo wakapumo hemakapurakanafapo. Arirakano Yonamo Kotimo rakira rakisimo Kotimo murikimasapo. Murikimasane aporo hinamo suamo asekeha hemakapusimo Yonaki asia aiyaka anoaki soko aiyakakosapo.\* Aiyakakosa hákasane repo asekeasimo tariakosapo. Makata meta reaki tariakosafapo." Aiyaka someaka faraka Yasu rukunekeraka pusuapo.

<sup>4</sup> Aporomanomo someraka, "Kotimo murikimasapo nesekenone, isiaipo aseako Kotimo wakapumo hemakapurakua rakirane rakikitakae. Aiyáka rakirane aseako kope apura maiya amo aporo hinamo risiane watikiaka risikinapo. Aporo hinamoamo Kotiaki hemakapurakanafapo. Arirakano Yonamo Kotimo rakira rakisimo Kotimo murikimasapo. Murikimasane aporo hinamo suamo asekeha hemakapusimo Yonaki asia aiyaka anoaki soko aiyakakosapo.\* Aiyakakosa hákasane repo asekeasimo tariakosapo. Makata meta reaki tariakosafapo." Aiyaka someaka faraka Yasu rukunekeraka pusuapo.

"Ferese aporope Satusi aporo iane makata pirira asiapo. Ipu himu tetáraka hemakapusuane repo mokoakopo." Aiyaka Yasumo somesane oyapo.

Maka 8:14-21; Ruki 12:1

<sup>5</sup> Yasu soko, ipi aporo hakása pura soko, kasua ripaka rokoa teraporaka hikia, he fe takurra risike someraka, "Isiaipo farawa mokoa pesafapo. Isiaipo merarusapo."

<sup>6</sup> Airakano iaki Yasumo someraka, "Ferese aporomo soko, Satusi aporomo soko, ipu makata pirira ásiane repo mokoakohoamo asekeanie."

<sup>7</sup> Aiyaka Yasumo takumeaka somerakano some kepoane ipu himeteraka me rukua someraka, "Isiaipo farawa mokoa peanafonosekeno airakae."

<sup>8</sup> Airakano ipu hemakapusuane Yasumo aseraka someraka, "Repo anoaki himumo hákasa wakasemaraka hemaka apure. Marirakano repo namina susu me rukua someraka, farawa fareaporakanare?

<sup>9</sup> Nōmo some kepoane repo yaiya mahimeterire? Aporo fae taosene (5,000) sarimasaki farawa kakoreasu kaka faraka, farawa momo yia tokeno mate kenosua kekea komarusuane, repo hemakapurakarifare?

<sup>10</sup> Arirakano aporo fo taosene (4,000) sarimasaki farawa yatipinusua kaka faraka, farawa momo yia tokeno mate yatipinusua kekea komarusuane repo hemakapurakarifare?

<sup>11</sup> Nōmo reaki namo kakaro farawa ane somehoanafonosasso, nōmo someamo kepoane repo hemakapurakarifapo. Nōmo some kepoane úyaka somerakanapo. Ferese aporomo soko, Satusi aporomo soko, ipu makata pirira ásiane mokoakohoamo asekeanie."

<sup>12</sup> Airakano Yasumo someamo kepoane aporo hakása puramo hemakapuraka, "Ferese aporope Satusi aporo ipu someane makata pirira asiapo. Ipu someane isiaipo kakimakohoamo Yasumo airakae. Kakaro farawa makata pirirané mokoakohoamo epo somerakarifapo," aisapo.

"Yasu, ne Keresopo." Aiyaka Pitamo somesane oyapo.

Maka 8:27-30; Ruki 9:18-21

<sup>13</sup> Yasu Sisaría Firimai taone makea peraka, ipi aporo hakása puraki someraka, "Aporomanomo Táke anoane aporo metakiramo epapakasur?"

<sup>14</sup> Airakano ipu someraka, "Aporo metakiramo someraka, 'Ne Yone he tapukumarerane turikia pureapo.' Airakano aporo metakiramo someraka, 'Ne Iraíyareapo.' Airakano aporo metakiramo someraka, 'Ne Yaremayaareapo.' Airakano aporo metakiramo someraka, 'Ne porofete aporo metareapo.' airakasupo."

<sup>15</sup> Airakano Yasumo someraka, "Repo namina hemakapusuane ano epapaka hemakapurakanare?"

<sup>16</sup> Airakano Saemone Pitamo someraka, "Koti yaiya reramo hokosane nepo. Kotimo Unihaeaka rekeasimo murikimasapo Keresoane nereapo."

<sup>17</sup> Airakano Yasumo someraka, "Yonemo hokosa Saemoneo, Kotimo ne makoterakanapo. Makoterakanoso seseaka rekeanie. Nōmo hemakapurakua somesane aporomanomo neaki some kasane nōmo somerakanafapo. Nōmo Ata hepene yapura reamo neaki tarirakano, nōmo aiyaka somerakae.

\* <sup>16:4:</sup> Koaretaena aporoaki Yonamo some kakako pusua aiyaka Yasuane soko, hauaka wo koaretaena aporoaki somehoko pesapo. Yonane sere isiamo pokoa tua kaya aiyaka, Yasu soko, kunikia motosane sere isiamo wareapo. Pokoamo Yona yokotaesa aiyaka Yasu soko kunikia motosane maturikia taesapo.

<sup>18</sup> Hao, kaisie. Pita, nōmo yano motosa amo kepoane ekepo. Arirakano nōmo anoane somesane eke asiapo. Nōmo anoane somesa ayiáka, aporo hinamo metakiramo ayiáka kakimaka somerakanone, iane nōmo pasimokoakosapo. Aporo hinamoane anoa paosa aporo hinamo ayapo. Asiamo Hetisi hauaka aeyaka, kuramo wakapumo anoa paosa aporo hinamoane marutaehokosafapo.

<sup>19</sup> Arirakano aporo hinamo Kotimo asekea reane ipu hemakapusimo, nōmo ikia koro ropakamakosapo. Ikia koro kimo ropaka amara ayiáka, nōmo anoane some kakasimo nōmo ne murikimarakanapo. Asiamo hauaka wo aporomo watikiaka rakirakano, nōmo asekea maroporaka, 'Metakarisie,' airakano, hepene yapura soko Kotimo 'Metakarisie,' airakanapo. Arirakano hauaka wo aporomo koteaka rakirakano, nōmo asekea, 'Kotehoareapo,' airakano, hepene yapura soko Kotimo, 'Kotehoareapo,' airakanapo."

<sup>20</sup> Aiyaka Yasumo ipi aporo hakāsa puraki me paroaka someraka, "Ano Keresoane aporo suaki somehokopo." Aisapo.

*Yape menomo Yasumo someraka, "Aporomo ano kukusimo rukusapo," aiyaka somesane oyapo.*

*Maka 8:31-9:1; Ruki 9:22-27*

<sup>21</sup> Maiya amo ipi aporo hakāsa puraki Yasumo someraka, "Ano ayiakaniesasamo, Yarusarame sitia hinaka, Yu aporo sisimamo soko, pirisiti aporo káramo soko, Kotimo somemane tisa aporomo soko, ano mokoatikirakano, himu nekeia kau teraka ayiáka rusua kukusapo. Rusua kusuane sere isiamo ano maturikia taehokosapo."

<sup>22</sup> Airakano aporo hakāsa pura sarimaraka risiane metakarikia, Pitamo Yasuane karikia wakasema pukua Yasuaki matasoraka sikiraka someraka, "Unihaeo, Neane rusua kukusapo, aiyaka somehokopo. Kotimo ne ararehoasimoripo. Nōmo airakane ayiakako-hoamoripo."

<sup>23</sup> Airakano Yasumo rekeako pariraka Pitaki someraka, "Sataneo. Né ano patera takua pusie. Satanemo somera aiyaka nōmo somehokopo. Kotimo hemakapusuane kekemaraka hemakapunafonoraka, aporomanomo hemakapurane nōmo kekemaraka hemaka apure. Aiyaka hemakapuraka ikia kara pukusa matasona kepoane nepo."

<sup>24</sup> Airakano aporo hakāsa puraki Yasumo someraka, "Repo ano patera aseako ano ira paremareraka kukusimo ira matopesa nōmo ni makatiraka apura ayiáka, re soko, repo hemakapusuane metakarikia ira matopesa makatiraka puraka, ano finisa re soko fini kafo kepe punie.

<sup>25</sup> Aporomanomo hauaka wo areamo hitaferaka rekeakosane hákasa hemakapukua raki-raka rekeno, aporoane Kotiyaki yaiya rekeakosafapo. Arirakano aporomanomo metamo someraka, 'Yasupoko ano kuane soko siahoasireapo. Epoko hákasa rakikia rekeakosapo.' Aiyaka hemakapukua, kurane namonafaraka rekeno, aporoane Kotiyaki yaiya rekeakosapo.

<sup>26</sup> Arirakano aporomanomo hauaka kára wo makata kemo suane mokoa sarimaraka reke, Kotiyaki yaiya rerane epo metakarikia rekeno, akura maiya amo makata yakapamo e ararehokosare? Yaiya rerane ropohoko yakapamo roponare? Wae. Yaiya rerane roponafapo.

<sup>27</sup> Atamo faesayaki hepene aporoyaki ayiáka Aporomanomo Táke anoane paripeakosapo. Pariapera maiya amo aporo suamo makata rakisiarie asekea takeakosapo. Takekea aporo koteaka rakisiaki makata ropo kotesa kakakosapo. Aporo watikiaka rakisiaki makata ropo watikisa kakakosapo.

<sup>28</sup> Nōmo reaki kakaro somerakaripo. Re metakira yumo risiane kukusiraka aseane, Aporomanomo Táke anoane peraka unihaeaka rekeno aseakosapo." Aiyaka Yasumo somesapo.

## 17

*Yasu kau hakuraka faesane oyapo.*

*Maka 9:2-13; Ruki 9:28-36*

<sup>1</sup> Sere namasu faraka Yasumo Pita soko, Yamese soko, Yamesemo ipi mamanea Yone soko, i karikia üri teraya hisiapo. Hikia namina hakāsa risike

<sup>2</sup> aseane Yasu kau hakuraka reke sere maiyamo faeana ayiáka, Yasumo hikumisiane faeraka reke, ipi pasu ososane soko namo kakaro pakaeraka faesapo.

<sup>3</sup> Faeraka rekeno ipu aseane, Mosesepo Iraíyaki tetá Yasuyaki hakāsa risike somerakano asesapo.

<sup>4</sup> Aseraka Pitamo Yasuaki someraka, "Unihaeo, Isu o pesane kotesapo. Nōmo, 'Ao, seseripo,' airakanone nōmo ape mano isia kiakosapo. Meta nepoko, meta Mosesepoko, meta Iraíyapoko ayiáka kiakosapo. Ne seserire?"

<sup>5</sup> Aíyaka Pitamo someraka rea yiamo, ako kára faesamo wate foaka iane karotapisiapo. Ako karotapisia arakaru aeyaka someraka, "Eane nōmo ní hokosapo. E nōmo himu tumurumo kára hemakapukua seserakanapo. Epo someane kaikia hemakapukua risikianie." Aíyaka somesapo.

<sup>6</sup> Aíyaka somerakano aporo hakása puramo kaikia, hauaka uaka peperaka fofaraka namosapo.

<sup>7</sup> Namorakano i warisia Yasu pekea i kaua sakairaka someraka, "Re turikitarirasie. Namohokopo."

<sup>8</sup> Aíyaka somerakano, i turikitariraka himo kokoa, ra asekeea, ro asekeea aseane, aporo meta rekeanafonoraka Yasu hákasa rekeno asesapo.

<sup>9</sup> Arirakano i ūri teraya aeyaka peraka risike Yasumo paroaka someraka, "Aporomanomo Tákeane anopo. Ano kukua maturikia taehoasiraka repo kituamo asera ayíáka asesane aporo hinamo metaki somehokopo."

<sup>10</sup> Airakano aporo hakása puramo someraka, "Kotimo somemane tisa aporomo someraka, 'Kereso peasisiraka Iraíya fana peakosapo.' Aisane marirakano ipu aisare?"

<sup>11</sup> Airakano Yasumo someraka, "Kotimo somemane tisa aporomo someraka, 'Iraíya fana peraka makata su makotehokosapo.' Aisane kakaro aisapo.

<sup>12</sup> Arirakano nōmo some one kakaroripo. Iraíya peakosaposane fana pesapo. Pesane ipu asekeea hemakapuraka, 'Iraíya peakosaposane ereapo.' Aíyaka hemakapusuafapo. Hemakapurafaraka ipu hemakapusua rakiraka eane mokoatikisapo. Mokoatikisa ayíáka Aporomanomo Táke anoane soko kau tehoasimo mokoatikihokosapo."

<sup>13</sup> Airakano aporo hakása puramo hemakapuraka, "Iraíya peakosaposane, Yone he tapukumarera ayaareapo, aiyaka Yasumo somerakae." Aiyaka ipu hemakapusuapo.

*Yatafumo hokosa ho masane Yasumo mafasane oyapo.*

*Maka 9:14-29; Ruki 9:37-42*

<sup>14</sup> Yasu soko, ipi aporo hakása pura Pita soko, Yamese soko, Yone soko i pukua, aporo hinamo yakai sarimaraka risiakipoko á pausapo. Pauraka Yasu rea aporo meta peraka, kakuna porokoa kake someraka,

<sup>15</sup> "Unihaeo, nōmo aporo hokosane efera hunia masuaraka rukumotoraka káranapo. Maiya metamo ira paisia huruperapo. Maiya metamo hea huruperapo. Anasasamo nōmo e kamenarakara ararerasie.

<sup>16</sup> Asiamo nōmo aporo hakása pura risiakipoko, nōmo hokosane karikia peane ipu mafarakasafapo."

<sup>17</sup> Airakano Yasumo someraka, "Aporo hinamo maiya yumo risiamon Kotiaki himu hakásaraka hemakapukua riskianafonoraka watikiaka risikinapo. Maiya suamo repo hasaka hemakapukua risikino, nōmo repoko maiya suamo yaiya wafororaka rakiraka rekeakosare? Reyaki ano maiya káramo rekeno yia, repo anoaki himu hakásaraka hemakapukua risikirifapo. Ano rea wo hokosane karikia peae."

<sup>18</sup> Airakano hokosa karikia pesapo. Karikia perakan yatafuaki Yasumo paroaka someraka, "Ne metakarikia pusie." Aihoanine yatafu metakarikia pusuapo. Yatafu purakano hokosane fasapo.

<sup>19</sup> Yasumo hokosa mafarakano aporo hakása puramo asekeea, keseke i Yasu rea pekea hakása toke Yasuoki someraka, "Isiapo yatafuane metakarikia pusierakano punafonosane marirakanonare?"

<sup>20</sup> Airakano Yasumo someraka, "Repo Kotiaki hemakapusuane namo kakaro wakase-masasamo yatafuaki someraka, 'Ne metakirikia pusie,' airakano pusuafapo. Nōmo some one kakaro somerakaripo. Repo Kotiaki himu hakásaraka hemakapusuane ira maseta hae\* tati siasekenone, ūriaki someraka, 'Urí ne hauaka one metakarikia, hauaka meta rekeako pusie,' airakano pukusapo. Makata rakira hakása meta repo rakiane siahoasifapo, aisa meta kakenafapo.

<sup>21</sup> [Asiamo yatafu one metakarikia pusie, airakano yatafu pusimo makata nakosa sokoairaka kake Kotiaki kurikurihoanie. Kurikuriraka makata nakosa sokoihoanafonraka, yatafu one metakarikia pusierakano pukusafapo.] Aiyaka Yasumo somesapo.

*Yape tetámo Yasumo someraka, "Aporomo ano kukusimo rukusapo," aisane oyapo.*

*Maka 9:30-32; Ruki 9:43-45*

<sup>22</sup> Yasu soko, ipi aporo hakása pura soko, i Kariri hauaka risiakipoko Yasumo iaki someraka, "Aporomanomo Tákeane anopo. Ano rusua kukusimo aporomo ano parakehokosapo.

<sup>23</sup> Parakeraka ano waseremaka kukusimo rukusapo. Ano rusua kusuane sere isia faraka maturikia taehokosapo." Airakano aporo hakása puramo kairaka himu fasapo.

\* 17:20: Ira maseta hae wakasema yiamo ira namo kára rekeako purapo.

*"Yasumo Kotimo apepoko takese mone motorare?" Aisane oyapo.*

<sup>24</sup> Yasu soko, ipi aporo hakāsa pura soko, Kapaneame taonea pesapo. Pekea Pita rea Kotimo apepoko takese mora aporo pekea, Pitaki kairaka, "Nómo tisamo Kotimo apepoko takese mone motorare?"

<sup>25</sup> Airakano Pitamo aosapo. Aoraka Pita apea pariperakano, Pitamo somehoasiraka Yasumo Pitaki fana somesapo. Yasumo someraka, "Saemoneo, hauaka wo aporo unihaeemo aporo epaki takese mone makasierakanare? Unihaeemo ipi hokosaki takese mone makasierakanare? Aporo hinamo metakiraki takese mone makasierakanare? Nómo hemakapusuane yakapare?"

<sup>26</sup> Airakano Pitamo someraka, "Aporo hinamo metakiraki takese mone makasie, airapo." Airakano Yasumo someraka, "Ao, Unihae Kotimo soko ipi hokosaki takese mone motosie, airafapo.

<sup>27</sup> Aina ayiáka nōmo metakariafununine, takese mora aporomo mahisihokohoamo, nōmo takese mone motoakosapo. Pita, ne pukua kíiamo he motokoa pokoa makosapo. Pokoa fana masa á kíma fatirimaraka, mone hae pokoa akai matoa kesaka rekeno aseakosapo. Asekea mone haeanne maka, eto itiaki Kotimo apepoko takese taehoaniesasamo, moneane takese mora aporoaki kakanie." Aiyaka Yasumo somesapo.

## 18

*Aporo fanaraka reamo kepoane oyapo.*

*Maka 9:33-37; Ruki 9:46-48*

<sup>1</sup> Maiya amo aporo hakāsa puramo Yasuaki someraka, "Kotimo unihaeaka asekea rea paosa aporoane epa fanāreare?"

<sup>2</sup> Airakano i risiakipoko hokosa mano Yasumo peaeraka perakano Yasumo hokosaki someraka, "Isu hikumisi ereke reae." Aiyaka ipi aporo hakāsa puraki someraka,

<sup>3</sup> "Nōmo some one kakaro somerakaripo. Hokosa manomo e ipiane makárarakaka hemakapurafapo. Repo namina ane makárarakaka hemakapurane rukupateraka metakarikia, hokosa mano ayiáka risikianie. Hokosa mano ayiáka risikianafonorakanone, Kotimo unihaeaka asekea rea hauaka á hiakosafapo.

<sup>4</sup> Hokosa e ipiane makárahoanafonoraka area ayiáka, aporomano e ipiane makárahoanafonoraka ayiáka rekeno asekea, eane Kotimo unihaeaka asekea rea paosa aporo fana ane épo.

<sup>5</sup> Aporomanomo e ipiane makárahoanafonoraka anoaki hemakapukua rea aporoamo hokosa asíane ararerakanone ane, ano soko ararerakanapo." Aiyaka Yasumo somesapo.

*Makata watikiaka rakisimo aporomo mokopipina kepoane oyapo.*

*Maka 9:42-48; Ruki 17:1-2*

<sup>6</sup> Yasumo someraka, "E ipi makárahoanafonoraka rea aporomo watikiaka rakisimo, aporomo mokopipirakano, mokopipina aporoane mawia eke kára kita humarekea maka, he tawara numua he nasimo makasuhoane siahoasireapo.

<sup>7</sup> Aporomo watikiaka rakisimo kirimana aporo hinamo ane fanasihokosane enahoasi-fareapo. Makata watikisane fasereperapo. Matakata watikisa faserepeasimo kirimana aporo hinamo ane fanasihokosane enahoasifareapo.

<sup>8</sup> Arirakano nōmo hokonomo watikiaka rakiraka nōmo ní himuane mawatkinapaka. Mawatkinapaka hokono takuane patekemaka mamakatehoanie. Hokono tetákara reke ira kopakapunafonona hauaka á makasuhoamo, hokono hakāsa takuane patekemaka mamakateraka, hokono hakāsa reke, yaiya rerane kepomarekea rakiraka reke siahoasireapo. Arirakano nōmo korakemo watikiaka rakiraka, nōmo ní himuane mawatkinapoko. Mawatkinapaka korake takuane patekemaka mamakatehoanie. Korake tetákara reke ira kopakapunafonona hauaka á makasuhoamo, korake takuane patekemaka mamakateraka, korake hakāsa reke yaiya rerane kepomarakea rakiraka reke siahoasireapo.

<sup>9</sup> Nōmo himo makata asekea watikiaka rakiraka, ni himuane mawatkinapaka, hi takuane pokomaka mamakatehoanie. Hi tetákara reke heao hauaka á ira rufia makasuhoamo, hi takuane pokomaka mamakateraka, yaiya rerane kepomarekea rakiraka reke siahoasireapo.

<sup>10</sup> E ipi makárahoanafonoraka rea aporoane hokomakopo. Aporoane hepene aporomo asekea risikinapo. Asekea risike nōmo Ata hepene yapura rea á, Atamo hikumisi nenemea risikinapo.

<sup>11</sup> [Aporomanomo Tákeane anopo. Aporo himu watikisane nōmo mafasiako ano pesapo."] Aiyaka Yasumo somesapo.

*"Saro pipi hasaka kosapo." Aiyaka takumeaka somesane oyapo.  
Ruki 15:3-7*

<sup>12</sup> Yasumo someraka, "Reaki nōmo takume one somerakano repo mayiáka hemakapukusare? Aporo metamo ipi saro pipi risiane menoraka wane harote (100) ayiáka risiapo. Risiane hakásá meta ipi haku rosaka pusua hasaka kosapo. Hasaka kosane aporo amo metakarisire? Wae. Metakarisiafapo. Saro pipi sarimaraka risiakipoko menoraka naeneti naene (99) risiapo. Naeneti naene (99) risikino aseraka naeneti naeneane ūria yia risikasimo metakarikia, hakásá rosaka pusuane koako hisiapo.

<sup>13</sup> Koako hikia kokoa aseraka kára sesesapo. Asiamo nōmo kakaro somerakaripo. Saro pipi naeneti naene (99) risiane saro pipi wafayamo aseraka sesenapo. Saro pipi hakásá meta rosaka pusuane kokoa aseraka namo kakaro kára sesenapo.

<sup>14</sup> Aina ayiáka nōmo Ata hepene yapura reamo hemakapuraka, 'E ipi makárahoanafonosa aporo hakásá meta hasaka koane siahoasifareapo.' Aiyaka Atamo hemakapurapo." Aiyaka Yasumo somesapo.

*"Kakimara aporo ni maemo neaki mokoatikirakano uyáka maropohoanie." Aiyaka Yasumo somesane oyapo.*

<sup>15</sup> Yasumo someraka, "Kakimara aporo ni maemo neaki mokoatikirakanone, mokoatikisane metakarisimo titi hakásá risike eaki somehoanie. Somehoane epo kakimaka, epo neaki mokoatikisane metakarikia, teto titi koteaka maeaka risikiakosapo.

<sup>16</sup> Asiāne aporo amo nōmo someane kakipayarakano, nōmo aporo metakira pasimokoa somehoko punie. Aporo hakásá soko metao, aporo tetá soko metao pasimokoa somehoko punie. Pukua eaki hukururaka somerakano kairaka, someane kakarorakae aihoasimo, aporo tetámo soko metao, aporo isiamo soko metao, ayiáka somehoane siahoasireapo.

<sup>17</sup> Asiāne ipu someane aporo amo yaiya kakipayarakano anoa paosa aporo suaki somehoanie. Somehoane taka someane koarenterakano, eane metakarikia kikisiraka risikianie. Metakarikia Yu aporo hoanafonosa soko, takese mora aporo soko, re kikisiraka kekeporaka arisia ayiáka, aporoane ayiáka kikisiraka risikianie.

<sup>18</sup> Nōmo someraka one kakaro somerakaripo. Hauaka wo aporomo watikiaka raki-rakan, nōmo asekea maroporaka, 'Metakarisie,' airakan, hepene yapura soko Kotimo, 'Metakarisie,' airakanapo. Arirakan hauaka wo aporomo koteaka rakirakan, nōmo asekea, 'Kotehoareapo,' airakan, hepene yapura soko Kotimo, 'Kotehoareapo,' airakanapo.

<sup>19</sup> Nōmo some meta one soko somerakanapo. Kakimara aporo tetámo himu hakásaraka someaka maka hemakapukua ayiaka Kotiaki kurikurirakan, nōmo Ata hepene yapura reamo kairaka makata ayikaniesane, hakásá nineraka rakiakosapo.

<sup>20</sup> Repo aporo tetámo soko metao, aporo isiamo soko metao, ano yano motosane hemakapukua sarimarakanano ano soko pekea reyaki hakásá rekeakosapo." Aiyaka Yasumo somesapo.

*"Kakimara aporo ni maemo mokoatikirakano ropo eaki paripurafaraka mameruhohanie." Aiyaka Yasumo somesane oyapo.*

<sup>21</sup> Yasu reakipoko Pita pekea kairaka, "Unihaeo, kakimara aporo nōmo maemo maiya suamo ano mokoatikirakan, ropo eaki paripurafaraka yape yakapusumo nōmo mameruhokosare? Yape yatipinusumo mameraruhoane siahoasireare?"

<sup>22</sup> Airakan Yasumo someraka, "Yape yatipinusumo mameraruhoane siahoasifareapo. Nōmo menonafaraka epo neaki mokoatikisane nōmo kára mameraruhoanie. Mameruhokosane hokono u susuane u senaki sumo mameraruhoanie." Aiyaka Yasumo somesapo.

*Aporomo neaki mokoatikirakano mameruhokosa kepoane Yasumo takumeaka somesane oyapo.*

<sup>23</sup> Yasumo someraka, "Kotimo aporo hinamo unihaeaka asekea rea asiāne oyapo. Aporo unihaeaka reamo ipi aporo raipaki someraka, 'Nōmo reaki mone ropo mako kasane pipu mone ropo mokoa peae.'

<sup>24</sup> Airakan aporo raipa metamo mone kára tene mirione kina (K10,000,000) ropo kakasimo aporo metakiramo karikia pesapo. Aporo raipa karikia pesamo mone ropo kakasimo namo kakaro kara ropo kakafunusa nine

<sup>25</sup> mone fareapo, aisapo. Airakan aporo unihaeo someaka mareraka, 'Aporo raipa mone kakafonosamo ipi makata kemoane ropohoanie. Roporaka e ipi soko, epo ipi asea soko, epo ipi hokosa soko su ropohoanie. Ipu suamo nena raiparaka rakisimo aporo metamo iane roporaka mone mosane anoaki mokoa peanie.'

<sup>26</sup> Aíyaka someaka marerakano aporo raipa amo kaikia kakuna porokoa kake kuku-nameaka someraka, 'Unihaeo, haru ayiakakopo. Wakasema nina keseke mone suane nōmo néaki kakakosapo.'

<sup>27</sup> Airakano aporo unihaemo kamenakaraka hemakapukua someraka, 'Mone namo kakaro kára ane nōmo anoaki kakafunusa nine, nōmo metakarirakanapo. Keseke nōmo soko neaki makasie, aihokosafapo. Pipu nōmo mamerarurakanapo.'

<sup>28</sup> Aíyaka somerakano kaikia, aporo raipane pukua aporo raipa meta mawia mokotenek-eraka someraka, 'Fana nōmo neaki tene kina (K10) ropo mako kasane pipu ní makasie.'

<sup>29</sup> Airakano ipi aporo raipa tékeane kakuna porokoa kake kukunameaka someraka, 'Wakasema nina keseke nōmo neaki kakakosapo.'

<sup>30</sup> Airakano aporo raipa amo waesapo. Wæraka ipi aporo raipa tékeane hukurukua tipura makesapo. Makerakano asekea someraka, 'Fana neaki mone kasá akipoko, nōmo mone ropo kakafonorakano né tipura yaiya rekeakosapo.' Aíyaka ipi aporo raipa tékeane tipura makerakano,

<sup>31</sup> aporo raipa metakiramo asesapo. Aseraka kára mahisiraka ipu makata asesane aporo unihaeaki somesapo.

<sup>32</sup> Somerakano aporo unihaemo ipi aporo raipa peaesapo. Perakano aporo unihaemo someraka, 'Né aporo raipa watikisapo. Nōmo anoaki, "Haru ayiakakopo," aisasamo nōmo anoaki mone ropo kakafunusa nine nōmo mamerarusapo.

<sup>33</sup> Mameraruraka nōmo néaki kamenakaraka hemaka apura ayiáka, nōmo soko ní aporo raipa tékeki ayiáka kamenakaraka hemakapufunureapo.'

<sup>34</sup> Aíyaka aporo unihaemo epo aporo raipaki saperaka tipura makesapo. Makekea someraka, 'Ne kau tehoasimo tipura asekea rea aporomo né ruraka kau tehosapo. Anoaki mone ropo kakafonorakano tipura yaiya rekeakosapo. Anoaki mone karakano ne tonotaehosapo,' aisapo.'

<sup>35</sup> Aíyaka Yasumo takumeaka someaka faraka, ipi aporo hakása puraki someraka, 'Repo namina aporo tékemo re mokoatikirakano, repo himu mahisisane fana mafaraka mameraruhoanafonorakano, ane unihaemo ipi aporo raipaki rakisia ayiáka, nōmo Ata hepene yapura reamo reaki ayiáka rakiakosopo.' Aíyaka Yasumo somesapo.

## 19

*Aporomo hinamo fimarerane Yasumo somesane oyapo.*

*Maka 10:1-12; Ruki 16:18*

<sup>1</sup> Yasumo someaka faraka Kariri hauakane metakarikia pukua, he Yotane yaoraka taku ra Yutía hauaka á reapo.

<sup>2</sup> Reakipoko aporo hinamo yakai Yasu kekemarape perakano asekea aporo hinamo makata tasane Yasumo mafasapo.

<sup>3</sup> Mafaraka Yasu reakipoko Fere se aporo peraka, Yasu kau aseakosakipoko ipi hasaka somehoasimo, ipu mokopipiraka someraka, 'Aporomo ipi hinamo fimareakosane kepo kakeno fimareane siahoasireare? Kepo kakeno fimareane somemaneane mamoso-hoasireare?"

<sup>4-5</sup> Airakano Yasumo someraka, 'Wate fana kepomaresa maiya amo Kotimo aporo soko hinamo soko tetákara rakisiapo. Rakiraka Kotimo someraka, 'Aporomo ipi kaiyia ipi wafaya metakarikia hinamo arumaraka, ipi hinamoyaki hakása paoraka tati kau hakásaraka risikinapo.' Aíyaka Kotimo somerakano Kotimo sawia popasane repo asesare? Ao, repo asesapo.

<sup>6</sup> Asiamo aporomo hinamo arumaka tati kau hakásaraka risirasamo tetáraka risikinafapo. Tati hakásapo. Asiamo aporo hinamo tati Kotimo masarimasane aporo metamo maparakuhoane siahoasifareapo.'

<sup>7</sup> Airakano Fere se aporomo Yasuaki someraka, 'Fana Mosesemo someraka, 'Hinamo arumasa fimareako hinamoaki sawi poparaka kakanie.' Aisane marirakano Mosesemo aoraka fimareane siareapo aisare?"

<sup>8</sup> Airakano Yasumo someraka, 'Aporomo Kotimo someane koaretaesasamo Mosesemo aporoaki, 'Hinamo fimareane siahoasireapo,' aisapo. Asiáne Kotimo kepomarekeea rakisia maiya amo Kotimo aisafapo.

<sup>9</sup> Nōmo reaki some one somerakanapo. Aporomo hinamo arumasane, hinamoane ipi aporo metayaki punafonoraka koteaka kakeno yía, ipi apiamo hisiraka e fimarekeea hinamo meta arumarakano, aporoamo hinamo metane hakimarakanapo."

<sup>10</sup> Aíyaka Yasumo somerakano, ipi aporo hakása puramo Yasuaki someraka, 'Nōmo aporomo hinamo arumara someane kakaro hosekenone aporomo hinamo arumarafaraka nena risike siahoasireapo.'

<sup>11</sup> Airakano Yasumo someraka, "Repo airaka ane aporo suamo kakimakasifareapo. Kotimo aporo metakira nena risikiasimo ararerakano hinamo arumako hemakapurane fasapo.

<sup>12</sup> Kaisie. Aporo suamo hinamo arumarafapo. Aporo metakira haku hakusa risirapo. Arirakano aporo metakira makeposa hinamo arumakasifa asia takaperapo. Ipi kałyiamo takaperaka yia anapo. Arirakano aporo metakirane aporo metakiramo mokoatikiraka maropakeraka risike hinamo arumarafapo. Arirakano aporo metakiramo hemakapuraka, 'Koti unihaeamo makata rakirane rakiakosakipoko nōmo hinamo arumakosafapo.' Aiyaka hemakapukua hinamo arumarafapo. 'Hinamo arumakosafapo.' Aiyaka hemakapurane himura siarakano hinamo metakarinie." Aiyaka Yasumo somesapo.

*Aporo hinamomo Yasu rea hokosa karikia pesane oyapo.*

*Maka 10:13-16; Ruki 18:15-17*

<sup>13</sup> Yasu reakipoko hokosa karikia pesapo. Hokosa karikia pesane Yasumo hokonomo sakairaka Kotiaki kurikurihoasimo karikia pesapo. Karikia pesa aporo hinamoaki Yasumo aporo hakāsa puramo himu mahisiraka someraka, "Hokosa karikia peakopo."

<sup>14</sup> Airakano Yasumo someraka, "Ano rea hokosa peane siahoasireapo. Perakano mata-sohokopo. Hao, kaisie. Aporo hinamo e ipiane makāranafaraka hokosa mano ayíáka risiane, Kotimo unihaeaka asekeea rekenapo."

<sup>15</sup> Aiyaka someaka hokosane Yasumo hokonomo sakaisapo. Sakairaka faraka Yasumo i metakarikia pusuapo.

*Makata kemo káraraka rea aporoane Koti unihaeaka rea paoraka waforonapo, aisane oyapo.*

*Maka 10:17-31; Ruki 18:18-30*

<sup>16</sup> Yasu reakipoko aporo meta peraka someraka, "Tisao, ano Kotiyaki yaiya rekeakosakipoko, nōmo makata kotesa yakapa rakiakosare?"

<sup>17</sup> Airakano Yasumo someraka, "Makata kotesane anoaki marirakano kairakanare? Koti ipi hákasa kotesapo. Ne Kotiyaki yaiya rekeakosakipoko, pipu paohoko hemakapuraka Kotimo somemane kakimaka rekeanie."

<sup>18</sup> Airakano aporoamo someraka, "Somemane meta mane kakimaka rekeakosare?" Airakano Yasumo someraka, "Aporo kukusimo rukupo. Hinamo hakimakopo. Makata meta hakimakopo. Aporo metaki kotafe topakamahokopo. (Kisim Bek 20:12-16; Lo 5:16-20)

<sup>19</sup> Ní ata soko ní ama soko koteaka hemakapukua makotehoanie. Nōmo níane himu tumurumo hemaka apura ayíáka, ní aporo táke metane ayíáka himu tumurumo hemakapunie." (Wok Pris 19:18)

<sup>20</sup> Airakano aporoamo someraka, "Somemaneane nōmo kakimaka yaiya reapo. Makata meta yakapa rakiakosare?"

<sup>21</sup> Airakano Yasumo someraka, "Ne sia koteaka susu rekeako nōmo makata kemo suane ropohoko pusie. Pukua makata kemoane roporaka marekea, mone mosane aporo makata forokoa risiaki kakanie. Kaka farakanó nōmo makata mahimunane hepene yapura tokoakosapo. Asiamo nōmo ní makata kemo kaka faraka ano patera aseako peanie."

<sup>22</sup> Airakano aporo raua amo kairaka ipi makata kemoane kárásasamo aporo metakiraki kakako hisiraka, Yasuane metakarikia pusuapo.

<sup>23</sup> Purakano asekeea Yasumo ipi aporo hakāsa puraki someraka, "Nōmo reaki kakaro somerakaripo. Makata kemo káraraka rea aporoane Koti unihaeaka rea paohokosane namo kakaro waforonapo.

<sup>24</sup> Some one nōmo kakaro somerakaripo. Pasu irina nitoro kakarua saro kamo kokoro puane tapenapo. Aina ayíáka makata kemo káraraka rea aporoane Koti unihaeaka rea paohokosane namo kakaro waforonapo."

<sup>25</sup> Airakano aporo hakāsa puramo kairaka fofaraka someraka, "Aporo makata kemo kárásane Koti unihaeaka rea paohokosane, namo kakaro waforonapo, airakae. Asiamo aporo epa Kotimo unihaeaka asekeea rekeako mafasiakosare?"

<sup>26</sup> Airakano Yasumo ipi aporo hakāsa purane asekeea someraka, "Aporoane Kotimo unihaeaka asekeea rekeasimo, aporomo ipi yiamo mafasirafapo. Mafasirane Koti ipi hákasa siapo."

<sup>27</sup> Airakano Pitamo someraka, "Isiapo makata kemo su metakarikia, ne patera aseako pesapo. Asiasamo isiapo makata yakapa mokoakosare?"

<sup>28</sup> Airakano Yasumo someraka, "Hao, kaisie. Some one kakaroripo. Aporomanomo Tákeane anopo. Keseke makata su makawena maiya amo ano unihaeaka rekeakosapo. Uniheaka reke sea kára faesa susu á kakakosapo. Kakeno re soko anoyaki sarimaraka sea

metakira keno sua re tokoakosapo. Toke, Isiraya aporo ira keno suane repo koteaka asekea risikiakosapo.

<sup>29</sup> Aporo hinamo suamo hakása hakásaraka anoaki hemakapuraka nōmo rakirane rakiakosakipoko, ipi ape metakarikia, mae metakarikia, papā metakarikia, apu metakarikia, ata metakarikia, ama metakarikia, hokosa metakarikia, hauaka metakarikia, ayiáka makata su metakarikia rea aporo hinamoamo makata ropo kára mokoa Kotiyaki yaiya rekeakosapo.

<sup>30</sup> Asiamo yumo aporo hinamo yakai fanaraka risiane kesekehokosapo. Aporo hinamo yakai yumo kesekeea risiane fanahokosapo." Aiyaka Yasumo somesapo.

## 20

*"Hemo wafayamo makata rakira aporo pasimosapo." Aiyaka Yasumo takumeaka some-sane oyapo.*

<sup>1</sup> Yasumo someraka, "Aporo hinamoane Kotimo unihaeaka asekea rea asíane oyapo. Mituru fiarakano hemo wafaya koraka reke, sako karepe hemoa aporomo rakisimo, aporo pasimokoako koraka reapo.

<sup>2</sup> Koraka reke makata rakiakaporoane aseraka iaki someraka, "Repo sere hakásamo rakiakano reaki yokotae wane kina (K1) hakása hakásaraka kakakosapo." Aiyaka somehoane ipu aorakano hemo wafayamo kaikia iaki someraka, "Re makata rakiako pusie," aisapo.

<sup>3</sup> Pusiesakipoko maiya tokonamo hemo wafaya efera hunia koraka reke, hauaka moroa aseane aporo metakira nena risikino asesapo.

<sup>4</sup> Aseraka iaki someraka, "Re hemoa rakiako pusie. Nōmo hemakapusuane makata ropo siahoasiseken reaki kakakosapo." Airakano i makata rakiako pusuapo.

<sup>5</sup> Pusuakipoko maiya tipi maiya kenomo soko, samapu maiya isiamoo soko, hemo wafayamo aporo metakiramo hemoa rakisimo makata ropo fana somesa hakása yaiya somesapo. Somerakanoo i makata rakiako pusuapo.

<sup>6</sup> Samapu maiya kakoreamo hemo wafaya efera hunia pukua hauaka moroa aporo nena risikino aseraka iaki someraka, "Repo maiya suamo marirakano nenakamaka risikinare?"

<sup>7</sup> Airakano ipu someraka, "Hemo asekeea rea aporoamo isuaki rakinie, aisafapo." Airakano hemo wafayamo someraka, "Re pukua sako hemoa rakinie," aisapo. Aiyaka somerakanoo i makata rakiako pusuapo.

<sup>8</sup> Ererakano hemo wafayamo hemo asekeea rea aporoaki someraka, "Hemoa rakiraka risia aporoane su peaeahoanie. Perakano asekeea iaki makata ropo kakanie. Karaka aporo samapu pesane fana kakanie. Amo patera aporo mituru maíyamo pesane kakanie. Amo patera aporo fiarakano pesane kesekeea kakanie."

<sup>9</sup> Aiyaka hemo wafayamo somerakanoo aporo maiya kakoreamo pesaki yokotae wane kina (K1) hakása hakásaraka kasapo.

<sup>10</sup> Aiyákakarakano asekeea aporo mituru fiarakano pesamo hemakapuraka, 'Taki yokotae wane kina (K1) akarane, isuaki yokotae wane kina (K1) kakakosaposane meta ripakamarekeea kakakosapo.' Aiyaka hemakapusuane iaki soko, yaiya yokotae wane kina (K1) kasapo.

<sup>11</sup> Karakano ipu hemo wafayaki mahisiraka someraka,

<sup>12</sup> 'Aporo maiya kakoreamo pesamo wakasema rakisiapo. Isu mituru fiarakano pekeakaripapeku pukua samapu metakarisiapo. Isu maiyamo sisipuraka kikipuraka rakikia hisiraka kára waforosapo. Aporo maiya kakoreamo pesaki soko isuaki soko hakasa yineraka kayane siahoasifareapo.'

<sup>13</sup> Airakano aporo mituru fiarakano pesa metaki hemo wafayamo someraka, 'Hao, kaisie. Nōmo reane pasimosa maiya amo nōmo reaki makata ropo yokotae wane kina (K1) kakakosapo. Aihoane nōmo aorakano kaisiapo. Asiamo etapo iti someaka masane nōmo mamosorakanafapo.

<sup>14</sup> Yokotae wane kina (K1) hakása nine maka pusie. Yokotae wane kina (K1) one nōmo ní makata ropo ayapo. Nōmo hemakapusuane aporo fana pesane soko, aporo kesekeea pesane soko, makata ropo hakasa yineraka kakakosapo.

<sup>15</sup> Nōmo ní menane nōmo ní hemakapukua kayane siahoasireapo. Asiamo aporo metakiraki nōmo hemakapuraka mone kára karakano nōmo anoaki mahisirakanare?" Aiyaka hemo wafayamo somesapo."

<sup>16</sup> Somesamo kepoane oyapo. "Aporo kesekeraka risiane fanahokosapo. Aporo fanaraka risiane kesekehokosapo." Aiyaka Yasumo someapo.

*Yape isiamoo Yasumo someraka, "Aporomo ano kukusimo rukusapo." Aiyaka somesane oyapo.*

*Maka 10:32-34; Ruki 18:31-33*

<sup>17</sup> Yasu Yarusarame sitia hinaka aporo su metakarikia ipi aporo hakāsa pura keno suyaki wakasema hikia iaki hakāsa someraka,

<sup>18</sup> "Hao, kaisie. Isu Yarusarame sitia hinakanapo. Yarusarame sitia aporo metakiramo, Aporomanomo Táke anoane hukurusimo parakeraka wasere maka karikia pukusapo. Pirisiti aporo káramo soko, Kotimo somemane tisa aporomo soko, hukurusimo ano karikia pukusapo. Karikia pukua ipu ano kukusimo ira paremaresie, aihokosapo.

<sup>19</sup> Aiyaka ano kukusimo Yu aporo hoanafonosamo ano ira paremareakosakipoko karikia pukusapo. Karikia purakano Yu aporo hoanafonosamo ano mokoatikiraka mahokoparihokosapo. Ano kaua rukua ira matoperaka paremareakosapo. Paremarerakano ano kukusapo. Kurakano sere isiamo Kotimo ano maturikia taehokosapo." Aiyaka Yasumo somesapo.

*Sepetemo maeya tetá Yasumo hokono tumuru takua soko kasakai takua soko kakasimo somesane oyapo.*

*Maka 10:35-45*

<sup>20</sup> Sepetemo aseamo ipi hokosa Yamesepe Yone tetáyaki hakāsa Yasu rea pekea, hinamoamo kakuna porokoa kake Yasuaki someraka, "Nōmo someane nōmo kakimaka ayiáka rakisimoripo."

<sup>21</sup> Airakano Yasumo someraka, "Nōmo ayiáka yakapa rakisimore?" Airakano hinamoamo someraka, "Ne unihaeaka area maiya amo, nōmo hokosa meta ne hokono tumuru takua kayae, anakano hokosa meta ne hokono kasakai takua kayae, aihosasimoripo."

<sup>22</sup> Airakano Yasumo someraka, "Nōmo somerakane kepoane nōmo ní hemakapurakari-fapo. Mokome somerakae." Aiyaka Yasumo tetáki someraka, "Nōmo kapo\* he nena tetápo soko nasireare?" Airakano tetapō someraka, "Ao, etapo nakosapo."

<sup>23</sup> Airakano Yasumo someraka, "Nōmo kapo he nena hakāsa yia tetápo kakaro nakosapo. Arirakano ano hokono tumuru takua kakakosane soko, hokono kasakai takua kakakosane soko, nōmo kayae aihokosafapo. Nōmo ní hemakapusua aeyaka murikimakosafapo. Nōmo ní Atamo ipi hemakapusua aeyaka sia maroporaka murikimasapo," aisapo.

<sup>24</sup> Arirakano aporo hakāsa pura kaeyakosumo kairaka mamanea tetáki hisisapo.

<sup>25</sup> Hisirakano aporo hakāsa pura suaki Yasumo peaesapo. Perakano asekea Yasumo iaki someraka, "Yu aporo hoanafonosamo namina aporo unihaeamo aporo metakiraki kára masamasarapo. Aporo unihaeane ipi káraraka reasasamo, aporoaki masamasarapo.

<sup>26</sup> Aina ayiáka re ayiáka risikiakopo. Repo namina aporo metamo hemakapuraka, 'Ano aporo káraraka rekeariripo.' Aiyaka hemakapuraka aporo wakasemamo arakira ayiáka repo aporo supoko arareraka rakinie.

<sup>27</sup> Asiamo aporo metamo hemakapuraka, 'Ano aporo fanaraka rekeariripo.' Aiyaka hemakapuraka aporoamo aporo raipamo arakira ayiáka rakinie.

<sup>28</sup> Aporomanomo Tákeane anopo. Asiamo aporo raipamo arakira ayiáka aporomo anopoko ayiáka rakismo ano pesafapo. Aporomanomo supoko aporo raipamo arakira ayiáka nōmo rakiako ano pesapo. Aporomanomo namina watikisapoko fanasihokohoamo nōmo farimaka ano kukuko pesapo." Aiyaka Yasumo somesapo.

*Aporo tetá hi mesa Yasumo mafasane oyapo.*

*Maka 10:46-52; Ruki 18:35-43*

<sup>29</sup> Yariko taoneane i metakarikia purakano, aporo hinamo yakai Yasuyaki hakasa puraka ikia kara asekehaerape pusuapo.

<sup>30</sup> Pusua maiya amo aporo tetá hi taku tetákara mesa, ikia kara fea toke Yasu perakarakano kairaka, sakepamo wáraka, "Tefetemo aporo irao, Unihaeo, nōmo etoane kamenakaraka arareriasie."

<sup>31</sup> Airakano aporo yakaimo paroaka someraka, "Wáhokopo. Me fasie." Airakano tetapō efera hunia sakepamo wáraka, "Unihaeo, ne Tefetemo aporo irao, etoane kamenakaraka arareriasie."

<sup>32</sup> Airakano Yasumo kairaka e pesane wasuaka rukua asekea reapo. Asekea reke tetáki Yasumo someraka, "Tetápo sesehoasimo nōmo mayiakasimore?"

<sup>33</sup> Airakano tetapō someraka, "Unihaeo, etapo himo koteaka aseako seseripo."

<sup>34</sup> Airakano Yasumo tetáne kamenakaraka tetá hia sakaihoane wate foaka faraka tetapō himo koteaka asekea Yasuyaki hakāsa pusuapo.

---

\* <sup>20:22:</sup> Yasumo kapo takumeaka somesane ipi mokoatikiraka rusua kukusane somesapo. "Ano mokoatikirakan kukusa ayiáka teto soko kukusare?" Aiyaka somesapo.

## 21

*Yasu saro toki matia ripaka Yarusarame sitia hisiane oyapo.*

*Maka 11:1-11; Ruki 19:28-40; Yone 12:12-19*

<sup>1</sup> Aporo hinamo yakai Yasuyaki hakasa ikia kara hisiapo. Hikia Yarusarame siti makeraka pesapo. Yarusarame sitiane makeraka turi Orofe rekenapo. Uri Orofe makeraka Pefasi ape kisia a i pausapo. Pauraka Yasumo aporo hakasa pura tetaki

<sup>2</sup> someraka, "Teto ape tameyia pusie. Pukua aseane ape fari yia saro toki kaifyia humaresa, manoyaki risikino asekosapo. Aseraka saro tokiane kaifyia manoyaki tetakara fatarimaka ano rea wo karikia peanie.

<sup>3</sup> Arirakano aporo metamo tetoaki someraka, "Tetapo marirakanonare?" Airakano tetapo eaki someraka, 'Saro toki aeyaka Unihaem makata rakiakosapo. Epo aisasamo saro one etapo karikia purakanapo.' Airakano aporo amo tetoaki, 'Ao, siareapo. Maka pusie,' aihokosapo." Aiyaka Yasumo somesapo.

<sup>4</sup> Yasumo aiyaka somehoasiraka wate fana Kotimo some kará porofete aporomo some-sane oyapo.

<sup>5</sup> "Aporo hinamo Saeone\* sitia risiaki someraka, 'Asesie. Repo Unihae kárane apere. Repo Unihae auaraka reane saro toki matia ripaka apere. Saro toki matia ripasane saro tokiane manopo.' aihokosapo." Aisane fasere apera ayareapo. (*Sekaraia 9:9*)

<sup>6</sup> Asiamo tetā pukua Yasumo somesa hakasa yine kakimaka rakisiapo.

<sup>7</sup> Rakiraka saro toki kaifyia manoyaki tetakara karikia pesapo. Karikia perakano aporo yakaimo ipu pasuane saro toki matia furumurikia marekeia, Yasu a ripasapo.

<sup>8</sup> Ripaka kakeno aporo hinamo yakai ipu suamo ikia kara a ipu pasu ifunusapo. Arirakano aporo hinamo metakiramo makata ku popateraka ikia kara a ifunusapo.

<sup>9</sup> Ifunusakipoko Yasu peraka aporo hinamo metakira fanaraka, metakira kesekeraka ayíaka pesapo. Ipu wárapé peraka, "Tefetemo aporo ira wainepe pesa aporo né káraro. Unihae Kotimo né pusierakano pesane, Kotimo makoterakanapo. Né namo kakaro fanaraka rekenapo." Aiyaka ipu Yasuane kekeresapo.

<sup>10</sup> Kekereraka i su Yarusarame sitia wárapé perakano aporo hinamo a risiamo asekea himu faraka someraka, "Aporo aperane epare?"

<sup>11</sup> Airakano aporo hinamo yakaimo someraka, "Aporo aperane porofete aporopo. Kotimo some kará aporo Yasupo. Kariri hauaka Nasare apea reane epo." Aiyaka aporo hinamo yakaimo Yasuane kekeresapo.

*Kotimo apea aporomo makata roporaka risane Yasumo pusiesane oyapo.*

*Maka 11:15-19; Ruki 19:45-48; Yone 2:13-22*

<sup>12</sup> Kotimo ape makeraka, rurusa tua Yasu yorokoa puraka aseane, aporomo makata roporaka risikino asekea, i suane Yasumo rukuhaeraka pusiesapo. Arirakano aporo metakiramo teporoa mone taeraka sanasiraka risiakipoko, Yasu peraka ipu teporo suane maparitaesapo. Arirakano mena nume asia roporaka risia aporo amo sea ane soko Yasumo maparitaesapo.

<sup>13</sup> Maparitaeraka iaki Yasumo someraka, "Kotimo sawia Kotimo somesane porofete aporomo popasane oyapo. Nomo apeane aporo hinamomo someraka, 'Kotimo apeane Kotiaki wára kurikuri aepo,' airapo. Aira nine Kotimo ape one repo hakimora aporomo kunikia pariraka amarere." (*Aisaia 56:7*)

Aiyaka Yasumo somesapo.

*Kotimo apea hokosa fetemo Yasuaki kekeresane oyapo.*

<sup>14</sup> Kotimo apea Yasu reakipoko aporo hinamo hi fausa soko, korake matipusa soko, perakano Yasumo mafasopo.

<sup>15</sup> Arirakano hokosa fetemo Yasuaki kekereraka wáraka, "Tefetemo aporo ira wainepe pesa aporo, né káraro," aiyaka wásapo. Wárakan kaikia pirisiti aporo káramo soko, Kotimo somemane tisa aporomo soko mahisiraka sapesapo. Arirakano Kotimo wakapumo hemakapukua rakirane Yasumo rakirakano asekea ipu mahisiraka sapesapo.

<sup>16</sup> Saperaka Yasuaki ipu kairaka, "Hokosa fetemo wárakané nómó kairakarire?" Airakano Yasumo someraka, "Ao, nómó kairakaripo. Hokosa fetemo wárakané Kotimo sawia popasane repo menosafare? Kotimo sawia popasane oyapo. 'Hokosa fete suamo anoaki seseraka kekerohoasimo, sesenane iaki Kotimo kakakosapo.' Aiyaka popasapo." (*Buk Song 8:2*)

<sup>17</sup> Aiyaka Yasumo someraka faraka aporo hinamo Kotimo apea sarimasane soko, Yarusarame sitiane soko, epo metakarikia pukua Petene apea wasápo.

\* **21:5:** Saeone sitiane yano motosa metane Yarusarame sitipo.

*Himu hakásaraka kurikurinane Yasumo somesane oyapo.*

*Maka 11:12-14, 20-24*

<sup>18</sup> Mituru Yasu Yarusarame sitia hinaka meamosapo.

<sup>19</sup> Meamorakano ira foke ikia kara rekeno, foke wate nakosakipoko tumako peraka, aseane ira foke namo ku susu rekeno asesapo. Asekea Yasumo someraka, “Ira foke one waté efera hunia peakosafapo.” Aihora yiāmo ira fokeane wate foaka porasapo.

<sup>20</sup> Porarakano aporo hakasa puramo asekea fofaraka someraka, “Ira fokeane mayiáka wáte foaka porarakanare?”

<sup>21</sup> Airakano Yasumo someraka, “Nōmo reaki some one kakaro somerakaripo. Repo himu tetáraha hemakapukua risikianafonoraka Kotiaki himu hakásaraka hemakapukua risikianie. Ayiáka risikino, nōmo ira fokeaki somesa ayiáka repo ira fokeaki soko, ūriaki soko, ayiáka somerakano ayiakakosapo. Repo ūri aseraka someraka, ‘Uri ne takahikia he tawara sokoperasie.’ Airakano ayiakakosapo.

<sup>22</sup> Asiamo repo Kotiaki himu hakásaraka hemakapukua risike, makata metapoko hemakapukua Kotiaki kurikurirakano Kotimo ayiáka rakiakosapo.” Aiyaka Yasumo somesapo.

*“Yasumo arakirane epamo maresare?” Aisane oyapo.*

*Maka 11:27-33; Ruki 20:1-8*

<sup>23</sup> Kotimo ape rurusua tua Yasu yorokoa pukua some karaka rea maiya amo pirisiti aporo káramo soko, Yu aporo sisimamo soko, e rea pekeea someraka, “Nōmo arakirane epamo maresare? Neaki epamo ayiáka rakinie aisare?”

<sup>24</sup> Airakano Yasumo iaki someraka, “Nōmo soko, reaki makata hakasa meta akai kairakanapo. Kaiyiáne repo anoaki some pariperakano, kaikia anoaki rakiniesane nōmo reaki somehokosapo.

<sup>25</sup> Yonemo aporo hinamo hea tapukumurianiesane epamo ayiakaniesare? Kotimo ayikaniesare? Aporomo ayiakaniesare? Repo anoaki somesie.” Airakano aporo ipu namina susu tafatatafaraka someraka, “Isiapo Yasuaki yakapa somehoanarakapo. Isiapo someraka, ‘Kotimo ayiakaniesapo,’ aiyaka somerakanone, Yasumo isuaki someraka, ‘Marirakano Yonemo someane kakipayasare?’ aihokosapo.

<sup>26</sup> Arirakano isiapo someraka, ‘Aporomo ayiakaniesapo,’ aiyaka somerakanone, aporo hinamo suamo isuaki mahisiraka sapehokosapo. Asiamo aporo hinamo suamo hemakapuraka, ‘Yone ipi porofete aporopo. Ipi Kotimo some kará aporopo.’ Aiyaka ipu hemakapusuasamo iaki namorakanapo. Asiamo aporo hinamo suamo isuaki sapehoko昊amo isiapo Yasuaki some paripukusafapo.”

<sup>27</sup> Aiyaka namina tafatatafaraka Yasuaki someraka, “Yonemo aporo hinamo hea tapukumurianiesane epamo ayiakaniesarakapo. Isu himeteripo.” Airakano Yasumo someraka, “Repo anoaki some paripeanafonosasamo anoaki rakiniesa kepoane nōmo reaki somerakanafapo.” Aiyaka Yasumo somesapo.

*“Wafayamo hokosa tetáki makata rakinie,” aiyaka Yasumo takumeaka somesane oyapo.*

<sup>28</sup> Pirisiti aporo kára soko, Yu aporo sisima soko risiaki Yasumo takumeaka someraka, ‘Aporo hakásamo aporo hokosa tetá reapo. Asiamo hokosa fanaki wafayamo someraka, ‘Hokosao, pipu ne sako karepe hemoa makata rakiako pusie.’

<sup>29</sup> Airakano hokosa amo someraka, ‘Ano hisiripo. Pukusafapo.’ Aisa nine keseke ipi hemakapuraka, ‘Nōmo fana hisisane metakarikia, efera makata rakiako pukusapo,’ Aiyaka hemakapukua rekeako parisapo.

<sup>30</sup> Arirakano hokosa kesekeaki wafayamo someraka, ‘Hokosao, pipu ne sako karepe hemoa makata rakiako pusie.’ Airakano hokosa amo someraka, ‘Ao, ano pukusapo.’ Aisa nine e pusuafapo.”

<sup>31</sup> Aiyaka Yasumo iaki akai kairaka, “Hokosa meta mamo ipi wafayamo someane kaki-masare? Repo mayiáka hemakapurakanare?” Airakano ipu someraka, “Hokosa fanamo kakimasapo.” Airakano Yasumo iaki someraka, “Some one kakaroripo. Koti unihaeaka rea paonane, takese mora aporo soko, aporo rea pura hinamo soko fana paorakanapo. Re kesekenapao.

<sup>32</sup> Asiamo re ereketaeraka risikiasimo, Yonemo reaki some karakano repo kaki-masafapo. Arirakano takese mora aporomo soko, aporo rea pura hinamomo soko kaki-masapo. Kakimaka risikino repo aseraka yia, Yonemo someane repo kakimakosakipoko asiáne himu hakásaraka hemakapukua risikisufapo.” Aiyaka Yasumo somesapo.

*Sako karepe hemo aporomo asekea risia Yasumo takumeaka somesane oyapo.*

*Maka 12:1-12; Ruki 20:9-19*

<sup>33</sup> Yasumo pirisiti aporo káraki soko, aporo sisimaki soko, someraka, "Kaisie. Nōmo reaki takume meta somerakanapo. Hemo wafayamo sako karepe hemoa porokoa rurusapo. Rurusa tua sako wate nenekeaneraka he pusimo eke karoraka maua asia rakisiapo. Arirakano aporomo hemoane koteaka asekea rekeasimo huturu ape kisiapo. Kikimarekea hemoane aporo metakiramo asekea risikasimo epo murikimasapo. Murikimaka faraka hemo wafayamo ipi hemoane metakariaka hauaka meta á pusuapo.

<sup>34</sup> Pusuakipoko sako karepe wateane ikia ahera maiya amo, hemo asekea risia aporomo sako karepe wateane parakuraka, metakira hemo wafayaki kakasimo, hemo wafayamo aporo raipa metakiraki mokoako pusiesapo.

<sup>35</sup> Pusiesane hemoa perakano hemo asekea risia aporomo aporo raipa metane ira faimo rukua, anakano aporo raipa metane namo kakaro rusua kukua, anakano aporo raipa metane ekemo karekea asiapo.

<sup>36</sup> Arirakano fana hemo wafayamo aporo raipaki sako wate mokoako pusiesane aporo hukusipo. Efera hunia mokoako pusiesane aporo yakai pusiesapo. Pusierakano pusuan aporo fana pusiesane hemo asekea risia aporomo mokoatikisa ayíáka, aporo kesekeea pusiesane soko, ayíáka mokoatikisapo.

<sup>37</sup> Arirakano keseke hemo wafayamo hemakapuraka, 'Hemo asekea risia aporomo nōmo hokosane mokoatikihokosafapo. Eane ipu hemakapukua makotehokosapo.' Aiyaka hemakapukua reasasamo hemo wafayamo ipi hokosane pusiesapo.

<sup>38</sup> Pusiesane hemoa perakano aseraka, hemo asekea risia aporomo namina susu someraka, 'Hemo wafayamo hokosa apere. Asiamo keseke ipi wafayane kusuakipoko finihaoa e reke, hemo one epo asekea rekeasireapo. Anapaka isiaipo eane rukusapo. Rusua kurakano hemo one isiaipo isina wafayaraka asekea risikiakosapo.'

<sup>39</sup> Aiyaka hokosane waseremaka ruru tapikia tama takua makasuraka rusua kusuapo." Aiyaka Yasumo takumeaka somesapo.

<sup>40</sup> Aiyaka someraka faraka epo aporo suaki akai kairaka, "Hemo wafaya perakano hemo asekea risia aporoane mayiakakosare?"

<sup>41</sup> Airakano aporo suamo Yasuaki someraka, "Hemo wafayamo hemo asekea risia aporo watikisane kakaro mokoatikiraka rusua kukusapo. Rusua kurakano, aporo metakiramo hemoane koteaka asekea risikasimo muriakosapo. Murisiamo sako karepe wate ikia aheramo sako wate mokoa hemo wafayaki kakakosapo."

<sup>42</sup> Airakano iaki Yasumo someraka, "Some one Kotimo sawia popasane repo menosafare? Kotimo sawia popasane oyapo.

'Ape kira aporomo ira warupi mamakatesane aporo metamo maka pekea tipia mapohareapo. Mapohoareane Kotimo ipi ayíáka rakireapo. Ayíáka rakisikeno isiaipo aseraka, 'Ane kotehoareapo,' airapo.' Aiyaka Kotimo sawia popahoareapo. (*Buk Song 118:22-23*)

<sup>43</sup> Asiamo nōmo reaki kakaro somerakaripo. Koti unihaeaka asekea reane Yu aporomo hisisamaso Kotimo iane metakariakosapo. Metakirirakano aporo hinamo suamo Kotiaki himu hakásaraka hemakapukua risikiakosane Kotimo unihaeaka rekeakosapo.

<sup>44</sup> Asiamo ira warupia aporo hinamo metakira terafaka ruraka kakaro etehokosapo. Arirakano ira warupi maposane huruperaka ruraka kakaro rukutaihokosapo." Aiyaka Yasumo ipi yine ira warupi ayíáka takumeaka somesapo.

<sup>45</sup> Arirakano pirisiti aporo káramo soko Ferese aporomo soko Yasumo takumeaka somerakan kairaka hemakapuraka, "Yasumo someraka ane isuane somerakae."

<sup>46</sup> Aiyaka hemakapuraka Yasu waseremakasapo asiáne metakarisapiro. Asiamo aporo hinamo suamo hemakapuraka, "Yasu porofete aporo Kotimo some kará apororeapo." Aiyaka hemakapusuasamo ipu Yasu waseremayane, aporo hinamo suamo iaki mahisiraka sapenapaka metakarisapiro.

## 22

*Hokono akeramo aporo hinamo peaniesane peanafonorakano Yasumo takumeaka somesane oyapo.*

*Ruki 14:16-24*

<sup>1</sup> Yasumo aporoaki efera hunia takumeaka someraka,

<sup>2</sup> 'Kotimo unihaeaka asekea rea asiáne oyapo. Aporo unihaeaka reamo ipi hokosamo hinamo arumara maiya amo hokono keakosakipoko, makata nakosa sarimaraka taesapo.

<sup>3</sup> Taeraka aporo fana murikimasaki\* yumo peaniehoko, pusie aiyaka ipi aporo raipaki somesapo. Somerakano i pukua, aporo fana murikimasaki peaesapo. Peaeahoane aporoane namina hisiraka pesafapo.

\* 22:3: Aporo fana murikimasane Yu aporopo.

<sup>4</sup> Peanafonorakano asekeea, aporo unihaemo aporo raipa metakiraki someraka, ‘Aporo peaesaki efera hunia someraka, “Yumo peae. Makata nakosa su sarimaraka taesapo. Saro ponomakau soko, saro ponomakau mano kaniamo soko rukua taeraka, makata su sarimaraka taesapo.” Aíyaka somehoko pusie.’

<sup>5</sup> Airakano aporo raipa pukua peaehoane, aporo peaesaa amo kakipayaraka, aporo metamo ipi hemoa rakiako pukua, arirakano aporo metamo ipi pisinisi rakiako pusuapo.

<sup>6</sup> Arirakano aporo peaesaa metakiramo aporo raipane waseremokoa mokoatikiraka rusa kusuapo.

<sup>7</sup> Rusua kurakano aporo unihaemo kaikia saperaka ipi ame aporoaki peaesapo. Perakano asekeea aporo unihaemo iaki someraka, ‘Aporo rusua kusua aporoane kukusimo runie. Ipu apeane soko inakasimo paayinie.’ Airakano aporo unihaemo ame aporo puraka aporo unihaemo somesa hakása nine ipu ásiapo.

<sup>8</sup> Arirakano aporo raipa metakiraki aporo unihaemo someraka, ‘Makata nako makata su sarimasapo. Sarimaraka aporo peaesane i watikiaka risike i siaraka risikianafonosasamo, iane nōmo metakarirakanapo.

<sup>9</sup> Asiasamo re pukua ikiakao aporo hinamo metakira soko perakano aseraka hokono akera peaehoanie.’

<sup>10</sup> Airakano aporo raipa ikia akoapura, aporo hinamo su watikisa soko, kotesa soko, aseraka peaesapo. Peaeraka karikia pekea, makata pakinakosa apea yorokoa sarimahoane apeane tapesapo.

<sup>11</sup> Ape taperakano aporo hinamo apea kesane, aporo unihaemo aseako pesapo. Peakea aseane hinamo aruamara a sarimaraka, aporo hinamo suamo hinamo arumara pasu kotesa osoraka, aporo hakása meta hinamo arumara pasu kotesane osohoanafonosekeno asesapo.

<sup>12</sup> Aseraka aporoaki aporo unihaemo someraka, ‘Ne hinamo arumara pasu kotesa metakarikia osohoafareapo. Ne kaýanafaraka, manakano mapirarakaa pesare?’ Airakano aporoane me kauraka reapo.

<sup>13</sup> Asiamo aporo raipaki aporo unihaemo someraka, ‘Aporoane korakea soko hokonoa soko taporaka katosa hauaka takua makasuhoanie. Arirakano katosa hauaka á aporo hinamo arisismo hiripuraka saperaka akai kikitihokosapo,’ aisapo.

<sup>14</sup> Hao, kaisie. Aporo hinamo yakai peaesaa nine aporo hinamo hukusiane takekea pasimorakanapo.” Aíyaka Yasumo somesapo.

*Takese mone kakakosane Yasumo somesane oyapo.*

*Maka 12:13-17; Ruki 20:20-26*

<sup>15</sup> Ferec aporomo sarimaraka someraka, “Yasumo hasaka somehoasimo isiapo e makosakipoko isu mahoperape pukua, úyaka somehokosapo.” Aíyaka ipu tau me rukua someaka masapo.

<sup>16</sup> Me rukua someaka maka faraka, Ferec aporo metakira soko Heroteaki patera asesa aporo metakira soko, Yasu rea pusie, aisapo. Airakano pukua Yasu rea pekea, Yasuaki ipu someraka, “Tisao, nōmo someane namo kakaro somerakae, aíyaka isiapo hemakapurakaripo. Aporo koteaka risikiasimo kakaro Kotimo ainane nōmo some karakarakae. Aporomo neaki mokoatikihokosane nōmo hemakapurafaraka kakaro somerakae. Aporo kárane sesehoasimo nōmo some karakarifapo.

<sup>17</sup> Asiamo isiapo neaki makata hakása kairakanapo. Isiapo Yu aporomo Rome aporo unihaeaki takese mone kayane siahoasirare? Kayane Kotimo somemananee mamoso-hoasireare?”

<sup>18</sup> Airakano ipu yapake someane Yasumo kaisiapo. Arirakano ipu Yasu mokoatikihokosakipoko mahoperape pesane Yasumo aseraka, iaki someraka, “Re aporo himu tetáraka arisie. Nōmo hasaka somerakano nōmo ní some yiamo kakinumo maká arura ayíaka, ano nílane rusimo repo aíyaka somerakae.

<sup>19</sup> Takese mone hae motoakosane nōmo aseako maka peae.” Airakano mone hae maka perakano asekeea

<sup>20</sup> Yasumo someraka, “Epa hikumisi mone haee rekerire? Epa yano motosa popahoareare?” Airakano ipu someraka, “Rome aporo unihae Sisa hikumisireapo. Ipi yano motosa popahoareapo.”

<sup>21</sup> Airakano Yasumo someraka, “Rome aporo unihaemo menane ipiaki kakanie. Kotimo menane Koti ipiaki kakanie.”

<sup>22</sup> Airakano ipu kaikia fofaraka Yasu metakarikia pusuapo.

*Aporo kusua maturikia taehokosane Yasumo somesane oyapo.*

*Maka 12:18-27; Ruki 20:27-40*

<sup>23</sup> Sereamo Yasu rea Satusi aporo peraka, Yasuaki makata akai kaiyako pesapo. Ariarakano ipu hemakapusuane aporo kusua ipi kauyaki hoyaki kakaro kusuane maturikia taenafapo. Aiyaka hemakapukua ipu Yasuaki someraka,

<sup>24</sup> "Tisao, Mosesemo somesane oyapo. 'Aporomo hokosa hokono mareanafonoraka kurakano, epo hinamo yaroane ipi mamaneamo arumarapo. Aporo kusua amo hokosa wainenaka sikiraka wainasimo, hinamo yaroane ipi mamaneamo arumarapo.' Aiyaka Mosesemo somesesupo.

<sup>25</sup> Asiamo hauaka wo mamanea yatipinusu risiapo. Mamanea fanamo hinamo arumasane hokosa hokono mareanafonoraka kurakano,

<sup>26</sup> mamanea kusuamo patera yiamo hinamo yaroane arumasapo. Epo hokosa hokono mareanafonoraka e soko kusuapo. Kurakano epo patera yiamo hinamo yaroane arumasapo. Arumasane epo hokosa hokono mareanafonoraka kurakano, ayipe pukua mamanea yatipinu suamo hinamo yaro hakáane arumaraka hokosa hokono maresafapo.

<sup>27</sup> Keseke hinamo manokonomasane kusuapo.

<sup>28</sup> Kusuane maturikia taeana maiya amo hinamoane epamo hinamore? Eane aporo yatipinusumo arumasapo."

<sup>29</sup> Airakano Yasumo someraka, "Kotimo some sawia popasane soko, Kotimo wakapuane soko repo himeteraka hasaka hemaka apure.

<sup>30</sup> Aporo kusua maturikia taerakano, hepene aporo arisia ayíáka risikiakosapo. Ayíáka arisia maiya amo aporo kusua maturikia taesamo hinamo kusua maturikia taesane arumarafapo.

<sup>31</sup> Arirakano aporo kusua maturikia taena amo kepoane nōmo reaki somerakanapo.

<sup>32</sup> Kotimo sawia popasane Kotimo someraka, 'Eparahamemo Kotiane anopo. Aisakemo Kotiane soko anopo. Yakopemo Kotiane soko anopo.' Aiyaka popasane repo menoraka kepoane re himeteane. Kepoane oyapo. Kotiane aporo kusua maturikia taeraka hitafe arisiama Kotipo. Eparahame soko Aisake soko Yakope soko kakaro kukua hitaferaka risikianafonorakanone, 'Ipu Kotiane anopo,' aiyaka Kotimo aihoafunufareapo." (*Kisim Bek 3:6*)

<sup>33</sup> Aiyaka Yasumo somerakano aporo yakaimo kairaka himu faraka fofasapo.

*Kotimo somemane fanane oyapo.*

*Maka 12:28-34; Ruki 10:25-28*

<sup>34</sup> Satusi aporomo somesane, Yasumo someamo hurutapikia somesapo. Somerakano ipu kaikia me kauraka risiapo. Me kauraka risikino asekeea, Fereze aporomo sarimaraka someraka, "Isiapo mayíáka Yasu hurutapiakosare?" Aiyaka me rusuapo.

<sup>35</sup> Me rukua faraka, ipu aporo hakáa somemane kaira aporoamo, Yasumo hasaka somehoasimo mahoperaka someraka,

<sup>36</sup> "Tisao, Kotimo somemane meta mane fanare?"

<sup>37</sup> Airakano Yasumo someraka, "Koti ane nōmo unihaepo. Unihaeaki nōmo himu tumurumo hemakapurunie. Nōmo homo soko eaki hemakapurunie. Nōmo himu hemakapuramo soko eaki hemakapurunie." (*Lo 6:5*)

<sup>38</sup> Ane somemane namo kakaro fanapo.

<sup>39</sup> Arirakano somemane metáne soko hakáa yinesane oyapo. Nōmo níane himu tumurumo hemaka apura ayíáka nōmo aporo tékeane ayíáka himu tumurumo hemakapurunie. (*Wok Pris 19:18*)

<sup>40</sup> Asiamo somemane tetáne nōmo reaki somerakane porofete aporomo somesane soko, Mosesemo somemane popasane soko kepoane hakáa yiýapo." Aiyaka Yasumo somesapo.

*"Keresoane mayíáka hemakapurakarire?" Aiyaka Yasumo Fereze aporoaki akai kaisiane oyapo.*

*Maka 12:35-37; Ruki 20:41-44*

<sup>41</sup> Fereze aporo sarimaraka risia maiya amo, Yasumo iaki makata akai kairaka,

<sup>42</sup> "Keresoane<sup>†</sup> repo mayíáka hemakapurakarire? Epamo wainepe pekea Keresoane faserepeakosare?" Airakano ipu someraka, "Tefetemo wainepe pesa aporo ira á Keresoane faserepeakosapo."

<sup>43</sup> Airakano Yasumo someraka, "Keresoaki Tefetemo someraka, 'Nōmo Unihaepo.' Aiyaka Ho Kotesamo tarirakano somesapo. Somesane wate fana Kotimo sawia popasane oyapo.

<sup>44</sup> Tefetemo someraka, 'Nōmo Unihaeaki, Unihae Kotimo someraka, "Ne ano hokono tumuru takua kayae. Hokono tumuru takua aporo hokopusua akaya ayíáka kayae. Kakeno nōmo yunuane nōmo rukumosakatapiakosapo," aisapo.' Aiyaka Kotimo somesane Tefetemo popahoareapo. (*Buk Song 110:1*)

<sup>†</sup> 22:42: Kereso yano motosa amo kepoane oyapo. Kotimo unihaeaka rekeasimo murikimasa aporo ayapo.

<sup>45</sup> Asiamo Tefetemo Keresoaki ‘Ne nōmo Unihaepo,’ aisane marirakano aisare? Arirakano makasa kauamo ipi hokosa wainepe pukusaki Unihaepo, airafapo. Asiamo Tefetemo Keresoaki Unihaepo, aisasamo, Tetefe takapeasiraka keresoane wate fana yaiya reapo. Asiāne repo someraka, ‘Tefetemo wainepe pesa á Kereso faserepeakosapo,’ ariakae.”

<sup>46</sup> Airakano ipu kaikia some paripesafapo. Maiya amo aporo hakāsa metamo Yasuaki efera hunia makata akai kaisiafapo. Ipu someane Yasumo hurutapirakano asekeia ipu makata meta efera hunia akai kaisiafapo.

## 23

*“Kotimo somemane tisa aporomo soko Ferese aporomo soko arakira ayiáka repo soko ayiáka rakiakopo,” aiyaka Yasumo somesane oyapo.*

*Maka 12:38-40; Ruki 11:43, 46; Ruki 20:45-47*

<sup>1</sup> Sereamo aporo hinamo yakai sarimasaki soko ipi aporo hakāsa puraki soko Yasumo someraka,

<sup>2</sup> “Somemane Mosesemo some kasane Kotimo somemane tisa aporomo soko Ferese aporomo soko some kepoane some karápo. Some karákā tisa aporomo wakapuaka some akara ayiáka, ipu ayiáka some karápo.

<sup>3</sup> Ipu some akarane repo kakimakanie. Asiamo i arisia ayiáka re risikiakopo. Asiamo ipu aporo metakiraki some karakano yia someane ipu namina kekemaraka rakirafapo.

<sup>4</sup> Aporo metakiramo makata fato umisa makatihoasimo ipu taporaka aporoamo kinua makatiraka marerapo. Makatiraka marekea ipu wakasema soko ararenafapo.

<sup>5</sup> Ararenafaraka namina yiamo aporomo asekeasimo mafekemaraka rakirapo. Asiamo Kotimo some sawia, popasane weroraka hokonoa soko taporaka, hikumisia soko taeraka, wakasema popake tumuraka taenapo. Arirakano ipu pasu ososane, pasu ke huhu hohoroposa osonapo.\*

<sup>6</sup> Ipu makata sesenane oyapo. Hokono akera maiya amo aporomo i makáraraka hokopusuamo sea i tokoako seane iaki tarisimo sesenapo. Arirakano Yu aporomo sarimana apea pukua aporo hinamo su sarimaraka toakipoko, i kumisi neneme sapea sea tokoako sesenapo.

<sup>7</sup> Arirakano aporo hinamo sarimaraka risiakipoko i purakano, aporomo i hokono mokoasimo sesenapo. Hokono moraka iaki makáraraka someraka, ‘Tisao,’ aihoasimo Ferese aporomo kára sesenapo.

<sup>8</sup> Arirakano aporo metamo reane makáraraka someraka, ‘Tisao,’ aihoasimo rakiakopo. Asiamo repo tisane ano hákasapo. Re su kakimara aporo hinamo hakāsa yineraka risíki-napo.

<sup>9</sup> Isiapo Ata Koti hákasa hepene yapura rekenapo. Asiasamo hauaka wo aporo meta makáraraka repo Ata Koti area ayiáka rekeasimo makárahokopo.

<sup>10</sup> Aporo metamo reane makáraraka someraka, ‘Unihaeo,’ aihoasimo rakiakopo. Repo unihae hakāsa rekenapo. Eane Keresopo. Kotimo eane unihaeaka rekeasimo murikimasapo.

<sup>11</sup> Arirakano re namina aporo meta fanaraka reke aporoamo aporo wakasemamo arakira ayiáka aporo supoko arareraka rakinie.

<sup>12</sup> Asiamo aporomo e ipiane makárarakan aporoane Kotimo mawakasemahokosapo. Arirakano aporomo ipiane mawakasemarakano aporoane Kotimo makárahokosapo.” Aiyaka Yasumo somesapo.

*Kotimo somemane tisa aporo soko Ferese aporo soko himu tetáraka risiane oyapo.*

*Maka 12:40; Ruki 11:39-42, 44, 52; Ruki 20:47*

<sup>13</sup> Yasumo someraka, “Kotimo somemane tisa aporo re soko, Ferese aporo re soko enahoasifareapo. Re asekeanie. Re su aporo himu tetaraka arises. Aporo hinamo Koti unihaeaka asekeia rea paohokohoamo iane repo matasonapo. Asiamo re Koti unihaeaka asekeia rea paohoanafonraka hisiraka risikinapo. Aporo hinamo metakira Kotiaki paohoko sesesane repo matasoraka risikinapo.”

<sup>14</sup> Kotimo somemane tisa aporo re soko, Ferese aporo re soko enahoasifareapo. Re asekeanie. Re su aporo himu tetaraka arises. Repo hinamo yaromo ape soko, makata kemo soko hakimorapo. Hakimoraka yia, Kotiaki kurikuriana maiya amo some nokone pukua

\* <sup>23:5:</sup> Pasu ke huhu hohoroposa osona amo kepoane oyapo. Kotimo Moseseki someraka, “Nōmo somemane repo meraruhokohoamo repo pasu ke huhusa osohoanie,” aisapo. Asiamo aporomo asekeia Ferese aporo makárahaoasimo ipu pasu ke huhu hohoroposa ososapo.

kurikurinapo. Aporomo aseraka, 'E kotehoareapo,' aihoasimo aiyaka kurikurinapo. Ana akipoko re fanasihokosane kárahokosapo.

<sup>15</sup> Kotimo somemane tisa aporo re soko, Ferese aporo re soko enahoasifareapo. Re asekeanie. Re su aporo himu tetaraka arisie. Ferese aporo hoanafonosa hakása Ferese aporo hoasimo repo pasimako kimisi kára purapo. Pukua hauaka kára koraka nina, hea soko yaoraka ayíáka koraka risirapo. Koraka risike aporo hakásá pasimarakano, aporoane Ferese aporo pariraka, aporoane repo yiamo heao hauaka pusierakanapo. Asiamo aporoamo watikiaka rakirako, ipi watikiaka arakiramo repo watikisané marokehokosapo. Asiamo aporoamo watikiaka rakisimo, tarira kepoane repo.

<sup>16</sup> Aporo hi taku tetákara fausamo aporo metakiraki ikia kara atarira ayíáka repo ayíáka atarire. Re asekeanie. Aporo reo, enahoasifareapo. Repo someraka, 'Aporomo aumaraka someraka, "Kotimo apepo." Aiyaka yano hokoa ipi aumaraka somesane metakariane sihoasireapo. Arirakano Kotimo apea korótótaesane aporomo aumaraka someraka, "Korótópo." Aiyaka yano hokoa ipi aumaraka somesane parosa yaiya kakakosapo.' Aiyaka repo somerapo.

<sup>17</sup> Aporo hi taku tetákara fausane himu maparitaesa arisia ayíáka, re ayíáka risikinapo. Asiamo meta mane fanare? Korótó fanare? Kotimo ape fanare? Asiamo korótó Kotimo apea taesasamo Kotimo apeane namo kakaro kotesapo.

<sup>18</sup> Arirakano repo someraka, 'Aporomo aumaraka someraka, "Eke karoraka taesapo." Aiyaka yano hokoa ipi aumaraka somesane metakariane sihoasireapo. Arirakano eke karosa kima Kotiaki makata yaku kakakosakipoko taesane, aporomo aumaraka someraka, "Makata taesa ayapo." Aiyaka yano hokoa ipi aumaraka somesane parosa yaiya kakakosapo.' Aiyaka repo somerapo.

<sup>19</sup> Aporo hi taku tetákara fausane himu maparitaesa arisia ayíáka re ayíáka risikinapo. Asiamo meta mane fanare? Eke karosa kima Kotiaki makata yaku kakakosakipoko makata taesane fanare? Ekeane fanare? Asiamo eke taehoanafonosa Kotiaki makata yaku kakakosane mayíáka paitayosare? Paiyanafonoraka mayíáka Kotiaki kakakosare? Pairakano makata yakuane haku kotesa susu parihokosapo. Kotesa susu parihokosasamo ekeane fanare?

<sup>20</sup> Asiamo aporomo aumaraka someraka, 'Eke karoraka taesapo.' Aiyaka someraka eke karoraka taesane soko, eke karosa kima makata taesane soko, suane aumarapo.

<sup>21</sup> Arirakano aporomo aumaraka someraka, 'Kotimo apepo.' Aiyaka aumaraka somerakano, Kotimo apeane soko, Kotimo apea makata risiane soko, aumarapo.

<sup>22</sup> Arirakano aporomo aumaraka someraka, 'Hepene yapura ayapo.' Aiyaka somerakano Koti unihaeaka rea amo sea ane aumaraka, Koti ipiane sea á kayasamo Kotiane soko aumarakanapo.

<sup>23</sup> Kotimo somemane tisa aporo re soko, Ferese aporo re soko enahoasifareapo. Re asekeanie. Re su aporo himu tetaraka arisie. Repo sereto asia kaeyako su mosane, tokonasu namina moraka, kaeyako hakásane Kotiaki karápo. Makata wakasemané repo karakayia, somemane kára metakira kakipayanapo. Koteaka takekea hemakapunesane repo hemakapurafapo. Aporo meta kamenakaraka hemakapunesane soko, repo ayíáka hemakapurafapo. Kotiaki himu hakásaraka hemakapunesane soko, repo ayíáka hemakapurafapo. Asiamo makata kaeyako hakásá Kotiaki karáne soko, somemane metakira kakipayasane soko, su kakimakafunureapo.

<sup>24</sup> Aporo hi taku tetákara fausamo aporo metakiraki ikia kara atarira ayíáka repo tarirakanapo. Re risiane uyáka risikinapo. He nakosa saro inini huruperakanó makata wakasemané repo maka mamakatenapo. Mamakateraka yia repo saro kamo asia kára ane neketurapo.<sup>†</sup>

<sup>25</sup> Kotimo somemane tisa aporo re soko, Ferese aporo re soko enahoasifareapo. Re asekeanie. Re su aporo himu tetaraka arisie. Repo kapo soko, meraki soko, kima takua hákasa kusuraka, kakarua kusuhoanafonona ayíáka reane asiapo. Re kaumó siaraka risikiako ayíane, re himua makata watikisa komarukua risike ayíane. Ayíáka risike repo makata hakimokoako, hemakapukua arirakano repo namina hemakapusane soko, kekemaraka ayíáka re risikinapo.

<sup>26</sup> Ferese aporo re, aporo hi taku tetákara fausa arisia ayíáka risikinapo. Kapo kakaruane soko, meraki tuane soko, fana kusuhoanie. Kakaruane kusuraka faraka, kima takuane soko kotehokosapo. Aina ayíáka repo himu hemakapurane fana makotehoanie. Makoterakano re sia koteaka risikiakoso.

<sup>†</sup> **23:24:** Makata watikisa wakasemané Ferese aporomo asekepayanafapo. Arirakano makata watikisa kárane ipu asekepayarako yaiya rakiraka risikinapo.

<sup>27</sup> Kotimo somemane tisa aporo re soko, Ferese aporo re soko enahoasifareapo. Re asekeanie. Re su aporo himu tetaraka arisie. Aporo kusua hauaka murisiane kima yapura pene pakaesamo pairapo. Paisiane kima yapura kotesa nine, tamo atura aporo kusua toresa kikiane tokenapo. Aina ayíáka re ayíáka risikinapo.

<sup>28</sup> Arirakano aporomo re aseraka hemakapuraka, 'I aporo kotesapo.' Aíyaka hemakapusua nine, re himu tetáraka hemakapurane soko himu watikisane soko risikinapo." Aíyaka Yasumo somesapo.

*Kotimo somemane tisa aporo soko, Ferese aporo soko, fanasihokosane motoakosane oyapo.*

*Ruki 11:47-51*

<sup>29</sup> Yasumo efera hunia someraka, "Kotimo somemane tisa aporo re soko, Ferese aporo re soko enahoasifareapo. Re asekeanie. Re su aporo himu tetaraka arisie. Kotimo some kará porofete aporo soko, Kotiaki hemakapukua risira aporoane soko, rusua kusua hauaka murisiane repo rakikia makotenapo.

<sup>30</sup> Makoteraka repo someraka, 'Isiapo makasa kaua kekema risia maiya amo, isu risisia satiki, makasa kaua kekema arareraka, Kotimo some kará porofete aporoane rufunufapo.' Aíyaka repo somerapo.

<sup>31</sup> Repo namina kepoane hufitaeraka somerakae. Repo makasa kaua kekemamo Kotimo some kará porofete aporoane rusua kusuapo. Arirakano makasa kaua kekema hakasamo wainepe pesane repo. Repo ainane soko hakásia yiyo.

<sup>32</sup> Asiamo repo makasa kaua kekemamo ayíakanafonosane repo ayiakanie.

<sup>33</sup> Re hesike ayireapo. Repo makasa kaua kekema hesike asía amo wainepe pesane pesasamo re soko, hesike ayireapo. Heao hauaka á re pusiehokosane mayíáka metakari-akosare? Metakariakosafapo.

<sup>34</sup> Asiamo repo kaiyisimo Kotimo some kará porofete aporomo soko, koteaka hemakapukua takekeea somera aporomo soko, Kotimo somemane tisa aporomo soko some kakako nōmo pusiehokosapo. Perakano repo aporo metakira ira matopesa paremarekea rusua kukuapo. Aporo metakira Yu aporomo sarimana apea sako patesamo rukusapo. Rukua mokoatikirakanu aporoane teketerakia pukusapo. Pukua ape meta pukua, apea soko mokoatikirakanu, teketerakia pukua, ape meta ayíáka teketerakia koraka tokoakosapo.

<sup>35</sup> Asiamo Kotiaki hemakapukua rea aporo, Aepo fana rusua kusuakipoko, amo patera aporo metakira soko rusua kusuapo. Keseke Perekayamo maeya Sekaráya Kotimo apea rusua kusuapo. Eke karosa taesane makama taku raraka Kotipoko ape rumu kikisisane makama taku roraka tipia reane e rusua kusuapo. Asiamo repo makasa kaua kekemamo watikiaka hemakapukua rakisia ayíáka, repo soko watikiaka rakiako hemakapurapo.

<sup>36</sup> Nōmo reaki kakaro somerakaripo. Aporo su koteaka risiane rusua kusuasamo, aporo hinamo maiya omo risiane Kotimo fanasihokosapo." Aíyaka Yasumo somesapo.

*Yarusarame sitia aporo hinamo risiane Yasumo hemakapusuan oyapo.*

*Ruki 13:34-35; 19:41-44*

<sup>37</sup> Yasumo someraka, "Yarusarame aporo hinamo reo, repo Kotimo some kará porofete aporoane rusua kurakasupo. Kotimo pusiesa aporoane repo ekemo karerakasupo. Yarusarame aporo hinamo reo, mena kaiyiamo mena mano sarimaraka auamo mafainapo. Aina ayíáka efera hunia soko, efera hunia soko, nōmo re sarimaraka ayíakanakosapoko asiane, repo anoaki hisisapo.

<sup>38</sup> Hao, kaisie. Yarusarame aporo hinamo reo, repo ape kamaka risikiakosapo. Apea aporo hinamo waka risikiakosafapo.

<sup>39</sup> Nōmo reaki kakaro somerakaripo. Repo ano efera hunia aseakosafapo. Arirakano kesekere repo someraka, 'Kotimo pusiesa aporo aperane Kotimo makotehoasimoripo,' aíyaka somerakanu maiya amo repo ano aseakosapo." Aíyaka Yasumo somesapo. (Buk Song 118:26)

## 24

*Kotimo ape ekeane kokoromokotehokosane Yasumo somesane oyapo.*

*Maka 13:1-2; Ruki 21:7-19*

<sup>1</sup> Yasumo Kotimo apeane metakarikia purakano, ipi aporo hakásia puramo Kotimo apeane somehokosakipoko Yasuaki tarisiapo.

<sup>2</sup> Tarirakano Yasumo someraka, "Kotimo apeane repo aserakarire? Hao, kaisie. Nōmo reaki kakaro somerakaripo. Apeane eke ripaka kisiane ekeane ipu kokoromokotesa hakásia hakásaraka tokoakosapo," aíyapo.

*Makata umisa kekepo faserepeakosane oyapo.**Maka 13:3-13; Ruki 21:7-19*

<sup>3</sup> Yasu ūri Orofea hikia kayakipoko ipi aporo hakāsa pura pekea, namina hakāsa toke Yasuaki akai kairaka, "Masinaka Kotimo eke apeane kokorotaehokosare? Arirakano ne paripeakosane makata yakapamo isuaki tariakosare? Arirakano maiya fahokosane makata yakapamo tariakosare?"

<sup>4</sup> Airakano Yasumo someraka, "Aporo metamo reaki kotafe somerakano someane kakimaraapaka asekeanie.

<sup>5</sup> Aporo yakai peakosapo. Pekea ipu kotafe someraka, 'Ano Keresopo. Unihae makārasane anopo.' Aiyaka ano yano hokoa kotafe somerakano, someane aporo hinamo yakaimo kakimakosapo.

<sup>6</sup> Aporo metakiramo aporo metakirayaki werakanaporakano, repo kaiyakosapo. Arirakano aporo metakiramo aporo metakirayaki werakanapo, aiyaka kotafe tokomako pukua somerakano, repo kaiyakosapo. Repo kairaka himu fahokopo. Aporomo weakosane fana faserepeakosapo. Arirakano fahokosa maiyane haru faserepeakosafapo.

<sup>7</sup> Arirakano aporo hauaka metamo aporo hauaka metayaki wekea, arirakano kamani metamo kamani metayaki werakano ayiakakosapo. Arirakano hauaka kekepoa makata nakosa farakano aporo hinamo kāra meamohokosapo. Arirakano hauaka kekepoa momani yakai peakosapo.

<sup>8</sup> Asiamo hinamo ipi himura hokosa kayane takapeakosakipoko kāra mokoweraka mati tuaka pukua aina ayiáka momani perakano soko, makata nakosa farakano soko, yunu werakano soko, makata umisane kepomareraka ayiakakosapo.

<sup>9</sup> Maiya amo aporo watikisamo re mokoatikihoasimo waseremokoa karikia pukusapo. Karikia pukua re rusua kukusapo. Re ano patera asesakipoko aporomano hauaka sua risiam reaki hisihokosapo.

<sup>10</sup> Hisirakano ano patera asesa aporo hinamo yakaimo ano metakarikia poparitariakosapo. Poparitarikia metakiramo metakira parakehokosapo. I namina yia, metamo metaki hisi, arirakano metamo metaki hisi ayiáka risikiakosapo.

<sup>11</sup> Arirakano kotafe some kará porofete aporo yakai fasereperaka some karakano, aporo hinamo metakiramo kotafe someane kakimakosapo. Kakimaka hasaka hemakapukusapo.

<sup>12</sup> Arirakano aporo hinamomo watikiaka rakirane kārahokosapo. Kāraraka anoaki patera asesa aporo hinamo yakaimo himu hakásaraka hemakapukua sesenane fahokosapo.

<sup>13</sup> Arirakano aporo hinamo Kotiaki patera asesane metakarirafaraka, yaiya hemakapukua risike, rakipe pukua rosaka taerakano, aporo hinamoane Kotimo mafasiakosapo.

<sup>14</sup> Ano unihaeaka reane aporomano hauaka sua risiam kaiyisimo, hauaka sua anoaki patera asesa aporo hinamo suamo some kotesane some kakakosapo. Some kasakipoko, fahokosa maiyane faserepeakosapo." Aiyaka Yasumo somesapo.

*Makata watikisa faserepeakosane oyapo.**Maka 13:14-23; Ruki 21:20-24*

<sup>15</sup> Yasumo someraka, "Wate fana Kotimo some kará porofete aporo Taniomo someraka, 'Koti mawakasemahokosakipoko Kotimo apea aporomo makata watikisane mareakosapo.' Aiyaka Taniomo somesane faserepeakosapo. Arirakano makata watikisane fasereperakan repo sawi one menona aporo hinamomo aseraka Yasumo someane repo hemakapukusapo. *(Daniel 9:27; 11:31; 12:11)*

<sup>16</sup> Asiamo Yutia aporo hinamo reo, makatane fasereaperamo re tekatarikia ūria hinie.

<sup>17</sup> Maiya amo aporo ape kopo<sup>a</sup>\* reane ipi ape kakarua makata kemo mokoako puane siahoasifareapo. Asiamo ipi ape kopo rea aeyaka foaka takaripunie.

<sup>18</sup> Aporo meta ipi hemo tipia reane apea pasu mako puane siahoasifareapo.

<sup>19</sup> Hinamo umisa soko, hinamo hokosa kiri kałyia soko, tekatarikia hiane kāra waforohokosapo.

<sup>20</sup> Yakimo soko metao, fenena maiya amo soko metao, tekatarikia pukusa maiyane fasereperapaka kurikurihoanie.

<sup>21</sup> Re tekatarikia pukua arisia maiya amo mokoatikihokosane kārahokosapo. Hauaka kara one kepomaresa maiya amo soko, yumo soko mokoatikihokosane fana asiafapo. Arirakano mokoatikiraka faraka, keseke ayiáka mokoatikihokosafapo.

<sup>22</sup> Arirakano mokoatikihokosa maiya fasereaperamo, yaiya mokoatikiraka risikinone, aporo hinamo suane kukua keakosapo. Kukua kerapaka Kotimo murikimasa aporo

\* <sup>24:17:</sup> Yu aporomo ape kopoane motokotaeraka kirapo. Kikimaka namina hikia auamaka ape kopo torapo. Yapura hiakosakipoko inima wareware ape pasakaia rakirapo.

hinamoane hemakapuraka, mokoatikihokosa maiya sapeane Kotimo rukupateraka makitakehokosapo.

<sup>23</sup> Arirakano aporo metamo reaki someraka, 'Hao, kaisie. Aporo one Unihae makárasane epo. E Keresopo,' aihokosapo. Arirakano aporo metamo reaki someraka, 'Hao, kaisie. Kereso pekea, rekenapo,' aihokosapo. Asiamo aporo metakiramo aiyaka somerakanone, ipu someane kakimakopo.

<sup>24</sup> Aporo metakira kotafe Kereso pariraka faserepeakosapo. Arirakano aporo metakira kotafe porofete aporo pariraka faserepeakosapo. Fasereperaka aporo hinamomo i patera asekeasimo ipu makata wakapu rakira kára rakiakosapo. Rakirakano aporo hinamomo asekefafhokosapo. Kotimo murikimasa aporo hinamomo ipu makata ainane kau aseako kirimaraka rakiakosapo.

<sup>25</sup> Kaisie. Maiyane faserepeasiraka makata ayiakakosane nōmo reaki somerakanapo.

<sup>26</sup> Asiamo aporomo reaki someraka, 'Kereso ima yaoa rekenapo,' Airakano kákimaaka aseako pukupo. Arirakano aporo metamo someraka, 'Kereso apea fararekenapo.' Airakano kakimakopo.

<sup>27</sup> Arirakano maiya apera takua yamakereraka faesane, maiya apura takua soko faenapo. Aina ayíáka ano aperamo ayíáka peakosapo. Aporomanomo Tákeane anopo.

<sup>28</sup> Arirakano makata kusua kakeno mena sakarekepomo sarimanapo." Aíyaka Yasumo somesapo.

*Yasu paripeakosane oyapo.*

*Maka 13:24-27; Ruki 21:25-28*

<sup>29</sup> Yasumo someraka, "Mokoatikihokosa maiyane faraka wate foaka sere maiyamo erehokosapo. Ere maíyamo faehokosafapo. Ti makata hepene yapunaka hauaka wo hurupepehokosapo. Hepene yapura makata kára risiane mahohohokosapo.

<sup>30</sup> Maiya amo hepene yapunaka Aporomanomo Táke ano paripeakosane makata wakapu kára metamo tariakosapo. Makata tarirakano hauaka kara wo aporomanomo su risiamo aseraka hihiripuhokosapo. Hihiripuraka aseane ano hepene yapunaka ti pakae a wakapuyaki faesa kárayaki perakano aseakosapo.

<sup>31</sup> Aserakano pikoro rukusapo. Rurakano hepene aporo yakai nōmo pusierakano peraka, nōmo murikimasa aporo hinamo hauaka sua risiane pasimokoakosapo. Nōmo murikimasa aporo hinamo patera takua risiane soko, ketaya takua risiane soko, ketaya takua risiane soko, kumisi neneme takua risiane soko, hauaka sua nōmo murikimasa aporo hinamoane pasimokoa sarimahokosapo." Aíyaka Yasumo somesapo.

*Irafokeane Yasumo takumeakea somesane oyapo.*

*Maka 13:28-31; Ruki 21:29-33*

<sup>32</sup> Yasumo someraka, 'Ira foke takumeane oyapo. Ira foke parusane yoarerakano repo aseraka hemakapuraka, 'Kupa kakako makerakanapo.' Aíyaka repo hemakapurapo.

<sup>33</sup> Aina ayíáka nōmo makata ayiakakosaposane fasereperakano aseraka repo hemakapuraka, 'Yasu peako makerakanapo,' aíyaka hemakapunie. Arirakano, 'Aporo ape kakarua yoroako ikia koro makeraka area ayíáka, Yasu ayíáka peako makerakanapo.' Aíyaka repo hemakapunie.

<sup>34</sup> Nōmo reaki kakaro somerakaripo. Aporo hinamo maiya hakása yiamo hokono murisiane i kukusiraka hitaferaka arisiamo, nōmo ayiakakosaposane fasereperakano aseraka, ayiana ayareapo. Aíyaka aseakosapo.

<sup>35</sup> Asiamo ti yapurane soko hauaka kára one soko fahokosapo. Arirakano nōmo someane fahokosafapo. Yaiya rekeakosapo." Aíyaka Yasumo somesapo.

*"Ano paripeakosa maiyane aporo metamo hemakapurafapo." Aíyaka Yasumo somesane oyapo.*

*Maka 13:32-37; Ruki 17:26-30, 34-36*

<sup>36</sup> Yasumo someraka, "Ano peakosa sereane soko maiya hi awane soko aporomanomo hemakapurafapo. Hepene aporomo soko Kotimo hokosa nōmo soko hemakapurafapo. Nōmo Atamo ipi hákasamo hemakapurapo.

<sup>37</sup> Arirakano Noa rea maiya amo aporo hinamo risia ayíáka ano paripeakosa maiya amo aporo hinamo ayíáka risikiakosapo.

<sup>38</sup> Noa rea maiya amo he peasiraka aporo hinamomo makata nakosa soko, he soko nekea aporomo hinamo arumokoa, hinamomo aporo pukua ayíáka risiapo. Ayíáka risiakipoko Noa kasua ripasapo.

<sup>39</sup> Riparakano aporo hinamo suane meraruamo risiakipoko he hukupesapo. He hukuperaka makata su mokoa pusuapo. Asiamo Aporomanomo Táke anoane pariapera maiya amo Noa rea maiya amo asia ayíáka ayiakakosapo.

<sup>40</sup> Año pariapera maiya amo, aporo tetá hemoa risiane meta nōmo pasimaraka, meta yia metakariakosapo.

<sup>41</sup> Hinamo tetámo makata rakiraka toane, meta nōmo pasimaraka, meta yia metakariakosapo.

<sup>42</sup> Ayiakakosasamo repo asekea risikianie. Repo unihae paripeakosa sereane repo hemakapurafaraka asekea risikianie.

<sup>43</sup> Arirakano aporo makata hakimoramo aporo metamo apea makata kemo hakimokoako perapo. Makata kemo hakimokoako peakosane, maiya hi awane ape wafayamo hemakapurafapo. Ere wakopemo soko metao, ere tipiamo soko metao, fia makeanamo soko metao, hakimora aporo apea tau peakosane, ape wafayamo hemakapurafapo. Hemakapunafononasamo sere soko, ereamo soko, warafaraka ape asekea rerapo.

<sup>44</sup> Aina ayíáka repo soko ayíáka asekea risikianie. Aporomanomo Táke anoane paripeakosa maiyane soko, maiya teane soko, maiya hi awane soko, repo hemakapunafonosasamo re asekea risikianie." Aiyaka Yasumo somesapo.

*Aporo raipa risia Yasumo takumeaka somesane oyapo.*

*Ruki 12:41-46*

<sup>45</sup> Yasumo someraka, "Aporo raipamo koteaka hemakapuraka ipi wafayaki himu hakásaraka hemakapukua uyáka rerapo. Wafayamo eaki someraka, 'Nōmo ape asekea rekeanie. Aporo apea risiaki makata nakosa sia kakanie. Yapa marekea kakakopo.' Aiyaka someaka marekea pukua,

<sup>46</sup> keseke pariperaka aseane aporo raipamo rakiniesane rakirakan asekea kára sesehokosapo. Seseraka e makotehokosapo.

<sup>47</sup> Ape wafayamo ipi aporo raipane makáraraka eaki someraka, 'Nōmo makata kemo suane asekea rekeanie,' aihokosapo.

<sup>48</sup> Arirakano aporo raipa watikisa uyáka rerapo. Aporo raipa watikisamo hemakapuraka, 'Ape wafaya pusua haru paripeakosafapo.'

<sup>49</sup> Aiyaka hemakapuraka aporo raipa metakira he watikisa nekea himu maparitaeraka, amano rura aporo akiyaki hakasa toke, he watikisa nenapo.

<sup>50</sup> Aiyáka reke ipi wafaya paripeakosa sereane soko, maiya hi awane soko, hemakapunaforaka reakipoko, ipi wafayane pariperapo.

<sup>51</sup> Pariperaka aporo raipa fanasiraka rukua marekea eaki someraka, 'Ne pusie. Aporo himu tetáraka risia akiyaki rekeako pusie. Hauaka á i risike hihiripuraka akai kirisiraka risikinapo. Á ne soko rekeako pusie.' Aiyaka ape wafayamo somehokosapo." Aiyaka Yasumo takumeaka somesapo.

## 25

*Hinamo sakora kaeyakosu toane Yasumo takumeaka somesane oyapo.*

<sup>1</sup> Yasumo someraka, "Unihae paripeakosa maiya amo, Koti unihaeaka asekea areamo asia ayíáka, ayiakakosane oyapo. Hinamo sakora kaeyako sumo nafa mokoa ape metakarikia aporo hinamo kawe arumasane ikiia kara sapenako pusuapo.

<sup>2</sup> Hinamo kaeyako suamo kakoreasu metamo koteaka hemakapusuafapo. Arirakano hinamo kakoreasu metamo koteaka hemakapusuapo.

<sup>3</sup> Asiamo koteaka hemakapunafonosa hinamomo nafa hákasa mokoa puraka, keresene petoroa takamaraka mokoa pusufapo.

<sup>4</sup> Arirakano koteaka hemakapusu hinamomo nafa mokoa keresene soko petoroa takamaraka mokoa pusuapo.

<sup>5</sup> Arirakano aporo hinamo kawe arumasane haru peanafonorakano hinamo kaeyakosu pusuanne wakakorakan wasápo.

<sup>6</sup> Waka kesakipoko ere tipiamo aporo metamo wáraka, 'Aporo hinamo kawe arumakosane apere. Repo soko aseako peae.' Aiyaka wásapo.

<sup>7</sup> Wárakan o hinamo kaeyako suane turikia tarikia nafa pakimokoa,

<sup>8</sup> koteaka hemakapunafonosa hinamomo koteaka hemakapusu hinamoaki someraka, 'Isiapo nafane kopaka apure. Repo keresene isiapo nafa wakasema takamarasie.'

<sup>9</sup> Arirakano koteaka hemakapusu hinamomo someraka, 'Wae, isiapo reaki takamaheane siahoasifareapo. Isu supoko kereseneane siahoanarakapo. Keresene fanapaka re namina sitaoa pukua haku roporasie.'

<sup>10</sup> Airakano ipu keresene ropohoko pusuapo. Pusuakipoko aporo hinamo kawe arumakosane pesapo. Perakano keresene siaraka takamokoa pesa hinamoane eyaki namina hakasa makata nakosa apea yorokoa hisiapo. Hinakano ikiia koro mapirisiapo.

<sup>11</sup> Mapirisiakipoko koteaka hemakapunafonosa hinamo kakorea suane kesekeea peraka hauaka moro aeyaka wáraka, 'Unihaeo, Unihaeo, ikia koro ropakamasie. Isu peakoripo.'

<sup>12</sup> Airakano unihaeemo someraka, 'Nómo kakaro somerakaripo. Reane nómo aserafapo.' Aiyaka epo somesapo.

<sup>13</sup> Ayiakakosasamo repo asekea risikianie. Asiamo ano paripeakosa maiya teane soko, maiya hi awane soko, repo hemakapunafonoraka asekea risikianie." Aiyaka Yasumo somesapo.

*Aporo raipamo makata rakisiane Yasumo takumeaka somesane oyapo.*

*Ruki 19:11-27*

<sup>14</sup> Yasumo someraka, "Unihae paripeakosa maiya amo ayiakakosane oyapo. Hemo wafaya kimisi pukusakipoko ipi aporo raipamo ipi moneane asekea risikiasimo peaerakanano pesapo.

<sup>15</sup> Asiamo aporo raipamo ainane hemo wafaya amo aseraka, iaki makata hakásá yinesa kasafapo. Aporo hakásá metamo namo kakaro wakapuaka rakisiasamo eaki fae taosene kina (K5,000) asekea rekeasimo kasapo. Arirakano aporo hakásá metamo wakapuaka rakisiasamo eaki tu taosene kina (K2,000) asekea rekeasimo kasapo. Arirakano aporo hakásá metamo wakasema wakapuaka rakisiasamo eaki wane taosene kina (K1,000) kasapo. Kaka marekea ipi kimisi pusuapo.

<sup>16</sup> Kimisi pusuakipoko fae taosene kina mosa aporoamo pisinisi rakiraka, fae taosene kina meta soko, mokoa akiyaki sarimasapo.

<sup>17</sup> Arirakano tu taosene kina mosa aporoamo pisinisi rakiraka, tu taosene kina meta soko, mokoa akiyaki sarimasapo.

<sup>18</sup> Arirakano wane taosene kina mosa aporoamo hauaka rakea, ipi asekea rea aporoamo wane taosene kina kasomaresapo.

<sup>19</sup> Asiamo maiya kára faraka aporo raipamo sia rakisiarihoamo, hemo wafayamo aseako paripesapo.

<sup>20</sup> Pariperakano fae taosene kina mosa aporoamo fae taosene kina meta soko mokoa akiyaki sarimasane, hemo wafayaki kasapo. Karaka epo someraka, 'Unihaeo, nómo anoaki fae taosene kina karakano, nómo pisinisi rakiraka fae taosene kina meta soko, mosane nepoko mone suane taesa ayapo.'

<sup>21</sup> Airakano hemo wafayamo someraka, 'Koterakae. Ne aporo raipa kotesapo. Nómo anoaki himu hakásaraka hemakapukua koteaka rakireapo. Nómo neaki wakasema asekea rekeasimo maresane nómo koteaka rakisiasamo, nómo makata kára asekea rekeasimo nómo mareakosapo. Nómo unihaeane anopo. Nómo neaki seseripo. Nómo soko sesehoanie. Iti hakásá seseaka risikiakosapo,' aisapo.

<sup>22</sup> Arirakano tu taosene kina mosa aporoamo hemo wafaya rea pekea someraka, 'Unihaeo, nómo anoaki tu taosene kina karakano, nómo pisinisi rakiraka tu taosene kina meta soko mosane nepoko taesa ayapo.'

<sup>23</sup> Airakano hemo wafayamo someraka, 'Koterakae. Ne aporo raipa kotesapo. Nómo anoaki himu hakásaraka hemakapukua koteaka rakireapo. Nómo neaki wakasema asekea rekeasimo maresane nómo koteaka rakisiasamo, nómo makata kára asekea rekeasimo nómo né mareakosapo. Nómo unihaeane anopo. Nómo neaki seseripo. Nómo soko sesehoanie. Iti hakásá seseaka risikiakosapo,' aisapo.

<sup>24</sup> Arirakano wane taosene kina mosa aporoamo hemo wafaya rea pekea someraka, 'Unihaeo, nómo hemakapuraka, "Ne aporo warepo. Ne ni hemo wafaya rekeno yia, aporo raipamo nepoko nómo hemoa makata porosane, wate perakano, nómo makasie, airapo."\* Aiyaka nómo hemakapusuakipoko

<sup>25</sup> ano namoraka reke nómo moneane hauaka rakea kokomaresapo. Kokomaresane kefomaka nómo ní menane neaki karakanapo.'

<sup>26</sup> Airakano hemo wafayamo someraka, 'Ne aporo raipa namo kakaro watikisapo. Ne kau hisiraka rakikia are. Nómo hemakapuraka, "Nómo hemo poroanafonoraka makata nakosa morapo."

<sup>27</sup> Aiyaka hemakapuraka nómo moneane nómo pánikia motoafunureapo. Motorakano mone wakasema meta soko kima ripaka mareafunupo. Ano pariperaka mone umuraka taesane soko, mone wakasema ripasane soko, mokoafunupo,'aisapo.

<sup>28</sup> Asiasamo hemo wafayamo aporo metakiraki someraka, 'Wane taosene kina ipiaki asekea rekeasimo kasane fimasie. Fimaka tene taosene kina mosa aporoaki wane taosene kinane kakanie.'

\* <sup>25:24:</sup> Aporo raipamo wafayamo ainane ereketaesapo. Asiamo hemo soko, makata porosane soko ipimenapo. Hemo wafayamo ipi aporo raipaki makata ropo karapo. Asiamo wate perakano hemo wafayamo morakano ipi watikiaka rakirakanafapo.

<sup>29</sup> Asiamo aporomo makata meta toaki, makata meta soko kakakosapo. Karakano ipi menane kára tokoakosapo. Arirakano makata meta tokoanafonosa aporoamo makata meta kakeno fimakosapo.

<sup>30</sup> Aporo raipa watikisane yao eresa hauaka takua makasurasie. Hauaka á aporo hinamo hihiripuraka mere kirisiraka risikiakosapo.' Aiyaka hemo wafayamo somesapo." Aiyaka Yasumo takumeaka somesapo.

*Unihaeo pekea hauaka wo amano suane takeakosane oyapo.*

<sup>31</sup> Yasumo someraka, "Aporomanomo Tákeane anopo. Ano peraka faesayaki hepene aporo suyaki hakása peakosapo. Peraka ano unihae kárasamo sea faesa susu á kakakosapo.

<sup>32</sup> Kakeno ano kumisi nenemea aporo hinamo hauaka su aeyaka karikia perakan sarimahokosapo. Sarimasane nōmo takekeea parakuhokosapo. Asiamo saro sipiyaki saro nanikoseyaki suasuaraka risiane, saro sipi wafayamo takekeea parakuhokosapo.

<sup>33</sup> Parakuraka saro sipi hokono tumuru takua murikia, saro nanikose hokono kasakai takua murikia, aiyáka parakuhokosapo.

<sup>34</sup> Arirakano ano unihaeaka reke ano hokono tumuru takua, amano takekeea murisiaki úyaka somehokosapo. 'Nōmo Atamo re makotesane peae. Re Kotimo hokosasamo reane nōmo unihaeaka asekeea rekeakosapo. Anoyaki risikiako peae. Wate fana hauaka kara one kepomaresa maiya amo, re anoyaki risikiakosane Kotimo maroporaka maresapo.

<sup>35</sup> Arirakano ano meamorakano repo anoaki makata nakosa karakasupo. Ano he narirakano repo ano he nasimo karakasupo. Ano kumuku perakan repo apea ano peaeaka pasimarakasupo.

<sup>36</sup> Ano makata forokoa reke pasu fasekeno, repo ano arareraka pasu karakasupo. Ano makata takamaka warekeno, repo ano ararerakasupo. Ano tipura makerakano, repo ano ararehoko perakasupo.' Aiyaka nōmo somehokosapo.

<sup>37</sup> Aiyaka somerakano Kotiaki ereketae hemakapusua aporo hinamomo anoaki úyaka somehokosapo. 'Unihaeo, ne meamorakano, masinaka isiapo neaki makata nakosa karakasure? Né he narirakano, masinaka isiapo né he nasimo karakasure?

<sup>38</sup> Né masinaka kumuku perakan, isiapo né peaeaka pasimarakasure? Né pasu fasekeno, isiapo masinaka neaki pasu karakasure?

<sup>39</sup> Né makata takamaka warekeno, masinaka isiapo né ararerakasure? Né tipura makerakano, masinaka isiapo né aseako perakasure?" Aiyaka Kotiaki ereketae hemakapusua aporo hinamomo amo somehokosapo.

<sup>40</sup> Aiyaka somerakano nōmo iaki úyaka some paripukusapo. 'Nōmo reaki kakaro somer-akaripo. Nōmo ní mae parisa soko, ní papá parisa soko, hakása meta wakasemaraka reane repo ararerakasuane ano araresapo,' aihokosapo.

<sup>41</sup> Arirakano ano hokono kasakai takua aporo hinamo murisiaki úyaka somehokosapo. 'Re su watikisapo. Satanepoko soko, Satanemo aporo raipapoko soko, ira kopakapuna-fononane maroporaka maresapo. Re soko ano metakarikia á pusie, aihokosapo.

<sup>42</sup> Asiamo ano meamorakano repo anoaki makata nakosa karakasufapo. Ano he narirakano repo anoaki he nasimo karakasufapo.

<sup>43</sup> Ano kumuku perakan, repo ano peaeaka pasimarakasufapo. Ano makata forokoa reke pasu fasekeno, repo anoaki pasu karakasufapo. Ano makata takamaka warekeno, repo ano araresafapo. Ano tipura makerakano repo ano aseako perakasufapo.' Aiyaka nōmo somehokosapo.

<sup>44</sup> Aiyaka somerakano, ipu anoaki úyaka somehokosapo. 'Unihaeo, né meamoraka rekeno soko, he nariraka rekeno soko, kumuku perakan soko, pasu fasekeno soko, makata takamaka rekeno soko, tipura makerakano soko, masinaka isiapo né asekepayarakasure?' Aiyaka ipu somehokosapo.

<sup>45</sup> Aiyaka somerakano nōmo iaki úyaka some paripukusapo. 'Nōmo reaki kakaro somer-akaripo. Aporo hinamo wakasemaraka rea hakása meta, repo ararehoanafonoraka, aseke-payarakasue anopo. Repo ano asekepayarakasupo.' Aiyaka nōmo some paripukusapo.

<sup>46</sup> Asiamo i yaiya fanasihokosakipoko taku atura purakano, Kotiaki ereketae hemakapusua aporo hinamoane Kotiyaki risikiakosakipoko, taku yapura hiakosapo," Aiyaka Yasumo somesapo.

## 26

*"Yasu kukusimo waseremakosapo." Aiyaka somesane oyapo.*

*Maka 14:1-2; Ruki 22:1-2; Yone 11:45-53*

<sup>1</sup> Yasumo makata aiyakakosane someaka faraka ipi aporo hakása puraki someraka,

<sup>2</sup> "Yape tetá faraka, Ape Farimaresa Hemakapuko Hokono Keakosapo. Hokono akera maiya amo, Aporomanomo Táke anoane ira matopesa paremarekea rusua kukusapo. Rusua kukusimo aporomo ano parakehokosapo," aisapo.

<sup>3</sup> Arirakanó pirisiti aporo fanane ipi yano motosa Kaiafasépo. Epo apea pirisiti aporo kára soko, Yu aporo sisima soko su sarimasapo.

<sup>4</sup> Sarimaraka ipu me rukua someraka, "Yasuane mahoperaka waseremaka rusua kucusimo rukusapo.

<sup>5</sup> Asiamo honoko akera maiyamo, Yasu waseremayane siahoasifareapo. Aporo yakai sarimasamo isuyaki werapaka isiapo waseremakosafapo," aisapo.

*Petene apea wera wape yamona Yasu wamoameta rekemaresane oyapo.*

*Maka 14:3-9; Yone 12:1-8*

<sup>6</sup> Petene apea Saemone toropakesa fasamo apea, Yasu reakipoko

<sup>7</sup> hinamo meta peraka eke kotesa petoro pariraka rakisiane maka pesapo. Petoro maka pesa á wera namo kakaro wape yamona, mone káramo roponane kesapo. Kesane Yasu teboro makeraka kake makata nenaka kakeno, hinamoamo wera wape yamona Yasu wamoameta rekemaresapo.

<sup>8</sup> Rekemarerakanó asekea, aporo hakása puramo saperaka namina susu someraka, "Hinamoamo werane marirakanó nenakamakaya rekemarekeea farakanare?

<sup>9</sup> Werane aporo metaki roporaka mone kára mokoafunureapo. Mone mosane aporo makata forosaki kakafunureapo."

<sup>10</sup> Airakanó ipu hemakapusuane Yasumo asekea someraka, "Marirakanó hinamoane mahisihoasimo aiyaka somerakanare? Hinamoamo ano wamoameta rekemarerane makata rakira kakaro kotesane ayapo.

<sup>11</sup> Asiamo aporo makata forosane maiya suamo reyaki hakása risikiakosapo. Asiāne ano maiya suamo reyaki hakása rekeakosafapo.

<sup>12</sup> Ano kau kunikia motoakosakipoko hinamoamo wera wape yamona ano kau makotera ka rekemareakosane murikimaka rekemarerakasapo.

<sup>13</sup> Hao, kaisie. Nōmo reaki kakaro somerakaripo. Hauaka kara wo aporomo anoane some akara maiya amo hinamoamo wera rekemaresane soko aporo hinamomo hemakapusimo ipu somehokosapo." Aiyaka Yasumo somesapo.

*Yutasemo Yasu parakehokosapo, aisane oyapo.*

*Maka 14:10-11; Ruki 22:3-6*

<sup>14</sup> Aporo hakása pura hakása meta yano motosa Yutase Isekerio ipi pirisiti aporo kára risiakipoko puraka,

<sup>15</sup> hokokaraka someraka, "Nōmo Yasuane parakerakanone repo anoaki yakapa kakakosare?" Airakanó ipu Yutaseaki someraka, "Isiapo neaki siufa mone hae teti (30)\* kakakosapo."

<sup>16</sup> Aiyaka karakanó Yutasemo, "Yasu mayiáka parakehoaepi," aiyaka Yasu parakehokosaka ikia karane kosapo.

*Ape Farimaresa Hemakapuko Hokono Akeramo makata nakosakipoko Yasu ipi aporo hakása purayaki sarimasane oyapo.*

*Maka 14:12-21; Ruki 22:7-14; Yone 13:21-30*

<sup>17</sup> Farawa Pirianafonona Nakosakipoko honoko kera kepoamarera maiya amo Yasu rea aporo hakása pura pekea someraka, "Ape Farimaresa Hemakapuko Hokono Keraka makata nakosane, ape ma sarimaraka taehokosare?"

<sup>18</sup> Airakanó Yasumo someraka, "Yarusarame sitia puraka aporo metaki úyaka someranie. Tisamo someraka, 'Ano kukusa maiyane makerakanapo. Makesasamo Ape Farimaresa Hemakapuko Hokono Keakosakipoko nōmo apea nōmo aporo hakása purayaki makata nakosapo.' Aiyaka Yasumo somerakasapo, aihoanie." Aiyaka Yasumo someaka marerakanó,

<sup>19</sup> somesane yaiya kekemarakaka aporo hakása pura pukua makata nakosa sarimaraka taesapo.

<sup>20</sup> Samapu Yasu ipi aporo hakása pura kenosuyaki apea pusuapo. Pukua teboro makeraka

<sup>21</sup> makata nenaka toa maiya amo Yasumo someraka, "Nōmo reaki kakaro somerakaripo. Repo aporo hakása metamo ano parakehokosapo."

<sup>22</sup> Airakanó ipu himu sesenafaraka mahisiraka, namina kaipe puraka, "Unihaeo, Né parakehokosane anore?" Aiyaka kaipe pusuapo.

\* <sup>26:15</sup>: Siufa mone hae tetiane mone kárupo.

<sup>23</sup> Kaipe purakano Yasumo someraka, “Nōmo farawa maka he waira kokoamarera yiamo, aporo metamo soko kokomarerakano aporo ayapo. Aporoamo ano parakehokosapo.

<sup>24</sup> Aporomanomo Tákeane anopo. Ano aporomanomo ayiakakosane Kotimo sawia porofete aporomo poparaka maresane yaiya ayiakakosapo. Ano parakeana aporoane fanasihokosane itifiakosafapo. Aporoane hokono mareanafonosa satiki ane kotehoa-funureapo.”

<sup>25</sup> Airakano Yutase Yasu parakehokosa aporoamo Yasuaki someraka, “Tisao, né parake-hokosane anore?” Airakano Yasumo Yutaseaki someraka, “Ao, nōmo somesa ayapo.” Aíyaka Yasumo somesapo.

*Aporo hakāsa puraki Yasumo farawa soko waene he soko kasane oyapo.*

*Maka 14:22-26; Ruki 22:15-20; 1 Korini 11:23-25*

<sup>26</sup> Ipu makata nenaka toa maiya amo Yasumo farawa maka Kotiaki suseaka kurikurisapo. Kurikuriraka faraka epo farawa maka mosoraka, ipi aporo hakāsa puraki kaka someraka, “Farawa one repo maka nesie. One ano kaupo,” aisapo.

<sup>27</sup> Arirakano kapo he maka Kotiaki suseaka kurikuriraka faraka iaki karaka someraka, “Repo suamo nesie.”

<sup>28</sup> He one ano yapipo. Kotimo aporo hinamoyaki kawe someaka masane hemakapusimo, ano yapi pukusa ayapo. Aporo hinamo yakaimo himu watikisane yapiamo mafahokosapo.

<sup>29</sup> Hao, kaisie. Waene he one nōmo efera hunia hauaka wo nakosafapo. Ata umihaeaka reamo hauaka á reyaki hakāsa sarimarakwaene he kaweanekakosapo.” Aíyaka Yasumo somesapo.

<sup>30</sup> Aíyaka somerakano ipu Kotiaki kekereraka kesasapo. Kesarako faraka apeane metakarikia üri Orofea hisiapo.

*“Yasu nōmo aserafapo.” Aíyaka Pitamo somehokosane Yasumo somesane oyapo.*

*Maka 14:27-31; Ruki 22:31-34; Yone 13:36-38*

<sup>31</sup> Aporo hakāsa puraki Yasumo someraka, “Pipu ereamo ano anakano asekea, repo suamo anoaki himu hakásaraka hemakapurafaraka ano metakariakosapo. Arirakano Kotimo sawia Kotimo somesa popasane oyapo. ‘Saro sipi wafayane nōmo kukusimo rurakan, saro sipi suane teketariákosapo.’ Aíyaka popasane ayiakakosapo.” (*Sekaraia 13:7*)

<sup>32</sup> Ayiakakosa nine ano maturikia taerakano Kariri hauaka á ano fana pusuakipoko, re keseko pekeia isina hakāsa sarimahokosapo.”

<sup>33</sup> Airakano Pitamo Yasuaki someraka, “Ipu suamo neane metakarirakano, nōmo ne kakaro metakariakosafapo.”

<sup>34</sup> Airakano Yasumo Pitaki someraka, “Nōmo kakaro somerakaripo. Pipu ereamo kokoroko mehoasiraka nōmo ‘Yasu aserafapo,’ aíyaka yape isiamo nōmo kotafe some-hokosapo.”

<sup>35</sup> Airakano Pitamo someraka, “Wae. Ano neyaki hakasa kuraka, Maiyaka néane aserafapo, aihokosare?” Airakano aporo hakāsa pura suamo Pitamo someane hakasa nine kekemaraka somesapo.

*Kesemané hauaka Yasumo kurikurisane oyapo.*

*Maka 14:32-42; Ruki 22:39-46*

<sup>36</sup> Yasu aporo hakāsa purayaki Kesemané hauaka á puraka, Yasumo iaki someraka, “Re o toae. Ano wakasema pukua kurikurihokosapo.”

<sup>37</sup> Aíyaka Yasumo Pita soko, Sepetemo maeya tetá soko karikia puraka, Yasu ipi kára himu nekeia mahisiraka sesenafaraka reapo.

<sup>38</sup> Aíyaka reye Yasumo iaki someraka, “Ano himu kára mahisiraka reke ano kukusireapo. Re o toae. Anopoko hemakapusua o toae. Re wakakopo.”

<sup>39</sup> Aíyaka Yasumo someaka marekeia wakasema pukua, uakapekeia hikumisimo hauaka nanireke kurikuriraka, “Atao, nōmo anoaki makata umisa maresapo. Maresane siasekenone makata umisane nōmo masie. Asiāne nōmo hemakapusua aeyaka ayi-akakopo. Nōmo ní hemakapusua aeyaka ayiakanie.”

<sup>40</sup> Aíyaka kurikuriraka faraka aporo hakāsa pura isiane toakipoko peraka, aseane i wakakesekeno asesapo. Asekeia i maturikia taeraka Pitaki someraka, “Re maiya hi awa hakásamo anoyaki hakása turikia asekeia risikiasifareapo.”

<sup>41</sup> Asiamo re mokopipirakano repo watikiaka rakipe purapaka hitafe risike kurikuri-hoanie. Repo himumo kurikurihoko seseraka, asiane kaumo yoferaka wakakosapo.”

<sup>42</sup> Aíyaka Yasu yape tetá pukua kurikuriraka, “Nōmo Atao, makata umisane nōmo anoaki makasapo. Makasane nōmo makanafonorakano fahokosafapo. Makata umisane fahoasimo nōmo makasapo. Nōmo hemakapusua aeyaka nōmo ayiakakosapo.”

<sup>43</sup> Aiyaka kurikuriraka faraka aporo hakāsa pura toakipoko, Yasu peraka aseane i wakakesekeno asesapo. Anakano i wakako hi kumikia nekeraka kakaro wakakesapo.

<sup>44</sup> Wakakesekeno metakarikia, Yasu wakasema pukua yape isiamo kurikurisapo. Kurikuriraka fana kurikurisa hakāsa yine kurikurisapo.

<sup>45</sup> Kurikuriraka faraka aporo hakāsa pura toakipoko Yasu pariperaka someraka, “Re yaiya wakakesesare? Re su turisie. Aporomanomo Táke anoane parakeraka aporo watik-isamo ano waseremakosa maiyane maiyane yuyapo.

<sup>46</sup> Re su takahisie. Takahikia isu purakapo. Aporo ano parakehokosane apere,” aisapo.

*Yasu waseremasane oyapo.*

*Maka 14:43-52; Ruki 22:47-53; Yone 18:2-12*

<sup>47</sup> Yasumo somesa maiya amo aporo hakāsa pura meta yano motosa Yutase peraka, aporo yakai eyaki hakāsa pesapo. Aporo pesane aporo metakiramo poke mokoa pekea, aporo metakiramo ira rokopa menane mokoa pekea, aporo metakiramo ferepe menane mokoa pesapo. Aporo pesane pirsiti aporo káramo soko, Yu aporo sisimamo soko, iane pusierakano pesapo.

<sup>48</sup> Aporoane peasiraka parakena aporo Yutasemo fana someraka, “Aporo nōmo maka-nurakano aporo ayapo. Eane waseremakanie.”

<sup>49</sup> Aisasamo Yasu rea Yutase ereketae pekea someraka, “Tisao,” aiyaka epo Yasuane makusanuso.

<sup>50</sup> Makanurakano Yasumo someraka, “Hameo, nōmo ayiakakosane ayikanie.” Airakano aporo yakai peraka Yasu waseremasapo.

<sup>51</sup> Waseremarakano Yasumo aporo hakāsa pura aporo hakāsa metamo ipi ferepe teaka maka, pirsiti aporo fanamo aporo raipa meta senaki rukusakaretapisiapo.

<sup>52</sup> Rukusakaretapirakano Yasumo someraka, “Nōmo ferepe terakaea rusaka maresie. Aporomanomo ferepemo werakano ferepemo eane rukusapo.

<sup>53</sup> Aporomo ano mokoatikina maiya amo nōmo Ataki wárakano Atamo hepene aporo hokono u yakai meno豪asifa asia amo ano ararehoko pusiehokosapo, aiyaka Atamo hepene aporo ane pusiehokosane repo himeterire?

<sup>54</sup> Arirakano ano kukusaposane Kotimo sawia popasane ayiakasimo hepene aporo pusiehokosafapo.”

<sup>55</sup> Aiyaka Yasumo aporo su sarimasaki someraka, “Repo ferepe mokoa pekea, poke mokoa pekea, ano waseremako pekea arisiane ano hakimora apororeare? Maiya suamo Kotimo apea ano reke some karakano, repo ano waseremarakasufapo.

<sup>56</sup> Asiamo Kotimo sawia Kotimo some kará porofete aporomo poparaka anoaki ayiakakosaposane fasereapera ayapo.” Aiyaka somerakano Yasumo ipi aporo hakāsa pura suamo e metakarikia tekatarisiapo.

*Pirisiti aporo Kaiafase rea á Yasu karikia pusuane oyapo.*

*Maka 14:53-65; Ruki 22:54-55, 63-71; Yone 18:13-14, 19-24*

<sup>57</sup> Pirisiti aporo fanane Kaiafasepo. Kaiafasemo apea Yasu waseremasa aporoamo eane karikia pusuapo. Apea Kotimo somemanane tisa aporo soko, Yu aporo sisima soko, Kaiafaseyaki sarimarakra risiakipoko ipu Yasuane karikia pusuapo.

<sup>58</sup> Karikia purakano Pita wakasema yamenoa kekemarape pusuapo. Kekemarape puraka pirisiti aporo fanamo ape hauaka moroa pauraka aporo terakaiyamosa toakipoko Pita soko kayapo. Kake Yasuaki makata hukuarurane aseako kayapo.

<sup>59</sup> Arirakano pirisiti aporo káramo soko, Kotimo somemanane tisa aporomo soko, Yu aporo sisimamo soko, ipu aporo metakiraki peaesapo. Pekea aporoamo Yasuaki hukurukua topakamaraka somehoko peaesapo. Ipu hemakapuraka, “Aporo metakiramo Yasu hukurukano Yasu fanasiraka rusua kukusapo.” Aiyaka topakamaraka somehoasimo kosapo.

<sup>60</sup> Kosa maiya amo aporo metakiramo Yasuaki kotafe topakamaraka somesa nine, ipu someane kairaka Yasu rusua kukunie, aiyaka somehoasimo ipu tafaraka siasafapo.

<sup>61</sup> Keseke aporo tetá peraka someraka, “Aporoamo someraka, ‘Kotimo ape nōmo rakaritaeraka sere isia faraka efera hunia kiakosapo.’ Aisane etapo kaisiapo.”

<sup>62</sup> Arirakano pirisiti aporo fanaraka reane takahikia Yasuaki someraka, “Nōmo some paripukusare? Néaki makata hukurusuane kepo yakapare?”

<sup>63</sup> Arirakano Yasumo makata somehoanafonorakano pirisiti aporo fanamo someraka, “Koti yaiya reasasamo nōmo neaki aikai kairakano nōmo aumaraka some paripeanie. Kotimo ne unihaeaka rekeasimo murikimasa aporo Keresoane nére? Kotimo hokosa ane nére? Nōmo somesie.”

<sup>64</sup> Arirakano Yasumo someraka, “Ao, nōmo ní someraka ayapo. Hao, kaisie. Koti ipi namo kakaro wakapuaka rekenapo. Asiamo keseke Aporomanomo Táke anoane Kotimo

hokono tumuru takua kakeno repo aseakosapo. Ano hepene aeyaka akoyaki perakano repo aseakosapo."

<sup>65</sup> Airakano pirisiti aporo fanamo kaikia mahisiraka, ipi pasu makoaraka someraka, "Aporoamo Kotiane mawakasemarakae. Epo yiamo Koti mawakasemarakano e hukuruko aporo meta peahokosafapo. Ipi yiamo Kotiane mawakasemarakano repo akaire.

<sup>66</sup> Kairaka repo hemakapusuane yakapare? Isiapo Yasuane mayiakakosare?" Airakano ipu someraka, "E rusua kukunie."

<sup>67</sup> Aiyaka Yasu hikumisia torofaeraka, aporo metakiramo hokono mamuraka ruraka, aporo metakiramo hokono namamo ruraka someraka,

<sup>68</sup> "Ne Keresosasamo ne arurane epamo rurakarire? E yano hosie. Asiamo Kotimo porofete aporoaki somesa ayiáka, ne mokoatikiana aporoane Kotimo yano honakanó kaikia nómó yano hosie." Aiyaka ipu somesapo.

*Pitamo someraka "Yasuane nómó aserafapo." Aiyaka kotafe somesane oyapo.*

*Maka 14:66-72; Ruki 22:56-62; Yone 18:15-18, 25-27*

<sup>69</sup> Hauaka moroa Pita kakeno hinamo raipa meta peraka eaki someraka, "Ne Kariri aporo Yasuyaki hakásá purapao."

<sup>70</sup> Airakano Pitamo waeraka aporo suamo kaiyisimo someraka, "Nómó somerakane ano himeteripo. Ano Kariri aporo Yasuyaki hakásá purafapo."

<sup>71</sup> Airakano Pita ape tarua hikia rekeno, hinamo raipa metamo aporo toaki Pitane tarikia someraka, "Aporoane Nasare aporo Yasuyaki hakásá pusuapo."

<sup>72</sup> Airakano Pitamo aumaraka someraka, "Aporoane nómó aserafapo."

<sup>73</sup> Airakano wakasema tuina aporo risiámó Pita rea pekea someraka, "Nómó me isiapo kaiyiáne Kariri aporomo merakae. Yasumo someane isiapo kairasasamo nómó someane soko isiapo kaiyiáne, Yasumo aporo hakásá puramo somerakae."

<sup>74</sup> Airakano Pitamo ekeneraka aumaraka someraka, "Aporoane nómó aserafapo. Nómó kotafe somerakano Kotimo ano fanasihoane siahoasireapo." Aihoanine wate foaka yia mena kokorokomo mesapo.

<sup>75</sup> Merakano kaikia Yasumo fana somesane Pitamo hemakapusuapo. Hemakapuraka ape metakarikia yaoa pukua kára hiripusapo. Asiamo fana Yasumo someraka, "Mena kokorokomo mehoasiraka nómó yape isiámó 'Yasuane nómó aserafapo,' aihokosapo." Aiyaka Yasumo somesane Pitamo hemakapukua kára hiripusapo.

## 27

*Pairate rea Yasu karikia pusuane oyapo.*

*Maka 15:1; Ruki 23:1; Yone 18:28-32*

<sup>1</sup> Mituru fiarakano pirisiti aporo kára soko, Yu aporo sisima soko i sarimaraka, Yasu rusua kukusane me rukua someraka risiapo.

<sup>2</sup> Ipu someraka risina me rukua someaka faraka, Yasu sakomo taporaka marekea, Pairate rea Yasu karikia pusuapo. Arirakano Yutía hauaka ane Rome kamani aporo Pairatemo aseke reapo.

*Yutase kusuane oyapo.*

*Tarira Aporo 1:18-19*

<sup>3</sup> Yasuane Pairate rea hukurusimo karikia purakano aseke, Yasu parakesa aporo Yutasemo aseraka ipi himu kára nekea hemakapuraka, "Katuaka yia parakehoae. Siufa mone hae teti (30) kásane nómó fimakakosapo." Aiyaka hemakapuraka pirisiti aporo kára soko Yu aporo sisima soko i risiakipoko pekea someraka,

<sup>4</sup> "Nómó watikiaka rakisiapo. Yasumo watikiaka rakianafonosa nine, nómó e parake-sapo." Airakano ipu someraka, "Kepo nipo. Isiapo menafapo."

<sup>5</sup> Airakano mone hae mokoa pesane fikia Kotimo ape asikurua mokoasuraka, metakarikia pukua, Yutase ipi mawia sakomo kita humarekea huruperaka kusuapo.

<sup>6</sup> Kurakano pirisiti aporo káramo mone fimoikoasusane mokoa, me rukua someraka, "Aporo rusua kukusimo mone one kasasamo, Kotimo apea mone taesa akiyaki mone one sarimahoane siahoasifareapo." Aiyaka ipu somesapo.

<sup>7</sup> Aiyaka someraka mone ane mokoa, hauakamo orotipi rakira aporomo hauakane roposapo. Arirakano hauaka roposane aporo kimisi pesa kurakano hauaka á muriasimo roposapo.

<sup>8</sup> Asiamo hauakane yano motoraka Yapi Hauakapo. Aiyaka yano taerape pusuane, sawi one popana maiya amo soko, aiyaka hauakane yano hosapo.

<sup>9</sup> Asiamo hauaka ane ropohoasiraka porofete aporo Yaremayamo popasane oyapo. "Eane ropohoko Yu aporo káramo someraka, 'Siufa mone hae teti (30) ane siahoasireapo.' Aiyaka someaka masakipoko mone hae teti (30) ane mokoa

<sup>10</sup> hauakamo orotipi rakira aporomo hauakane roposapo. Roposane Kotimo ayiakakos-  
aposane ásiapo." Aiyaka Yaremayamo popasane faserepesa ayareapo. *(Jeremaiā  
32:6-9)*

*Pairatemo Yasuaki somesane oyapo.*  
*Maka 15:2-5; Ruki 23:2-5; Yone 18:33-38*

<sup>11</sup> Rome aporo unihaeaka rea hikumisi nenemea Yasu rekeno Yasuaki akai kairaka, "Yu  
aporomo unihaeana nere?" Airakano Yasumo someraka, "Nómo someraka ayapo."

<sup>12</sup> Airakano pirititi aporo káramo soko, Yu aporo sisimamo soko, Yasuaki hukurukua  
somerakano Yasumo some paripesafapo. Ipi watikiaka rakianafonosa nine, epo táfaraka  
some paripesafapo.

<sup>13</sup> Some paripeanafonorakano Pairatemo someraka, "Ipu makata kára hukuarurane  
nómo kairakarire?"

<sup>14</sup> Aihōane Yasumo some paripeanafonorakano asekeea Rome aporo unihaeemo hemaka-  
puraka, "Me kauraka asekeea areane manakanarakapo," aiyaka hemakapusuapo.

*"Yasu rusua kukunie." Aisane oyapo.*  
*Maka 15:6-15; Ruki 23:13-25; Yone 18:39-40*

<sup>15-19</sup> Pairatemo hemakapuraka, "Yu aporomo Yasuaki kakanakeraka rusua kukusimo  
ano rea karikia pesapo," aiyaka hemakapusuapo. Hemakapukua Yasu hukuarura maiya  
amo Yasumo someane Pairatemo kairaka rekeno, Pairatemo aseamo Pairate rea aporo  
meta pusiesapo. Pusierakano aporoane pukua Pairateaki someraka, "Nómo ní hinamomo  
someakea maresane oyapo. 'Pipu nōmo kituamo aporo kotesa Yasuane asesasamo himumo  
kára hemakapukua rekenapo. Asiasamo somemane mamosohoanafonona aporo kotesane  
fanasihokopo. Metakarinie,' airakasapo." Aiyaka aporo pesamo somerakano Pairatemo  
kaisiapo.

Arirakano Ape Farimaresa Hemakapuko Hokono Akera maiya amo tipura makesa  
aporomo hakásá metane Rome kamani aporo unihae tonotaenapo. Tipura makesa aporo  
hakásá metane tonotaehoasimo Yu aporomo murikimaraka, "Aporoane tonotaehoanie,"  
aiyaka murikimarakanano kamani unihae tonotaenapo. Asiamo Yasu hukuarura maiya  
amo aporo kakaro watikisa yano motosa Parápase\* tipura makesa rekeno asekeea, Yu  
aporomo yakai sarimasaki Pairatemo someraka, "Aporo tonotaehokosane epa tonotaeho-  
hoko hemakapurakanare? Parápase soko metao, Yasu Kereso soko metao, epa tonotaeho-  
kosare?" aisapo.

<sup>20</sup> Arirakano pirititi aporo káramo soko, Yu aporo sisimamo soko, ipu aporo su sari-  
masaki hokokaraka someraka, "Yasuane rusua kuraka Parápase tonotaehoanie, aihoanie."

<sup>21</sup> Aisakipoko Rome kamani aporo unihae Pairatemo someraka, "Aporo tetáne epa  
tonotaehoko hemakapurakanare?" Airakano ipu someraka, "Parápase tonotaehoanie."

<sup>22</sup> Airakano Pairatemo someraka, "Yasu Keresoane maiyakaere?" Airakano ipu suamo  
someraka, "E ira matopesa paremarekea rusua kukunie."

<sup>23</sup> Airakano Pairatemo someraka, "Marirakano rusua kukunierakanare? Epo watikiaka  
makata yakapa rakisiare?" Airakano ipu sakepamo wáraka, "E ira matopesa paremarekea  
rusua kukunie."

<sup>24</sup> Aiyaka ipu sakepamo wáraka risiapo. Ayiáka risikino aporomo weakosane Pairatemo  
asekeea hemakapuraka, "Nómo someane ipu kakipayarakanapo." Aiyaka aporo suamo  
asekeasimo aporo su hikumisia reke, hemo ipi hokono kusuraka someraka, "Aporoane  
rusua kurakano nōmo kererefapo. Repo kererepo. Ano hokonoa makata parareane  
kusuraka fana ayapo."

<sup>25</sup> Airakano aporo hinamo suamo someraka, "Yasuane rurakano kerereane isiapo  
menapo. Isiapo hokosamo soko menapo."

<sup>26</sup> Airakano Parápase Pairatemo tonotaeraka, Yasu matia sakomo runiesapo. Rurakano  
asekeea someraka, "Yasu ira matopesa paremareako karikia punie," aisapo.

*Yasuane ame aporomo mainamaresane oyapo.*  
*Maka 15:16-20; Yone 19:2-3*

<sup>27</sup> Kamani aporo unihaeamo ame aporo peraka, Yasuane kamanimo afea karikia pukua,  
Yasu rea ame aporo su sarimasapo.

<sup>28</sup> Sarimaraka Yasumo pasuane su hororaka, pasu susa osoraka marekea,

\* <sup>27:15-19:</sup> Parápase tipura makesane yano motosa metane Yasupo. Yasuane epo yakopo.

<sup>29</sup> hati kotesa unihae káramo karotapira ayíáka karotapikia maresapo. Asiane hati karotapisiane kakaro hatifapo. Yasu mainamareraka sako keta risia hati pariraka raki-akosakipoko, kita apera ayíáka pekea weroraka rakisiapo. Rakisiane Yasu wamoa karotapikia maresapo. Karotapikia Yasu hokono tumuru takua kepayia patekemasa hokono sikiinia marekea kakuna porokoa mahokopariraka someraka, “Yu aporomo unihaeo, né aporo kárapo.”

<sup>30</sup> Aíyaka Yasu kaua torofaeraka, kepayia hokonoa maresane maka Yasu wamoa rusuapo.

<sup>31</sup> Rukua mahokopariraka faraka, pasu susa kau rakisiane horomaka, ipi pasuane osoraka marekea ira matopesa paremareako karikia pusuapo.

*Yasu ira matopesa paremaresane oyapo.*

*Maka 15:21-32; Ruki 23:26-43; Yone 19:17-27*

<sup>32</sup> Yasu karikia puraka aseane Sairíni aporo ipi yano motosa Saemone perakano asekea, ira matopesane maka pusiesapo.

<sup>33</sup> Maka pusierakano i pukua Kokóta hauaka á pausapo. Arirakano Kokóta hauakane namo meaka Uni Kiki hauakapo.

<sup>34</sup> Kokóta hauaka á pauraka risike Yasumo nasimo waene he soko munamuna asíayaki sarimarakka kekeroraka kasapo.<sup>†</sup> Karakano Yasumo sareraka nesafapo.

<sup>35</sup> Nanafonorakano ame aporomo Yasu ira paremareraka, Yasumo pasuane parakuraka mokoakosakipoko ipu kase enana ayíáka enasapo.

<sup>36</sup> Enaraka toke Yasuane aporo metamo ararehokoamo asekea toapo.

<sup>37</sup> Ame aporomo Yasu uni kima yapura eaki hukurusuane ira tumusakipoko poparaka paremaresapo. Poparaka paremaresane oyapo. “Aporo one Yasupo. Yu aporomo Unihae epo.” Aíyaka poparaka paremaresapo.

<sup>38</sup> Maiya amo hakimora aporo tetá Yasuyaki hakása ira matopesa paremurisiapo. Meta Yasu hokono tumuru takua paremarekea maporaka, meta Yasu hokono kasakai takua paremarekea maporaka, Yasu tipia paremarekea maposapo.

<sup>39</sup> Yasu paremarea rekeno, aporo metakira e paremarea makeraka puraka mainamareraka siraraka, unia rokoraka someraka,

<sup>40</sup> “Nómo fana someraka, ‘Kotimo ape rakaritaeraka yape isia faraka efera hunia kiki-makosapo,’ airakasupo. Aisasamo nómo ní yia ararerasic. Né Kotimo hokosasekenone ira matopesane metakarikia o peae.”

<sup>41</sup> Airakano pirisiti aporo káramo soko, Kotimo somemanne tisa aporomo soko, Yu aporo sisamamo soko, Yasuane ayíáka mainamareraka someraka,

<sup>42</sup> “Yasumo aporo metakirane araresapo. Araresa nine ipiane ararehoasifareapo. Ipi Isiraya aporo unihaeepo. Ipi ira matopesa metakarikia o perakanone, isiapo eaki himu hakásaraka hemakapukusapo.

<sup>43</sup> Ipi Kotiaki himu hakásaraka hemakapukua reke someraka, ‘Ano Kotimo hokosapo.’ Airakano Kotimo eane seseraka arareraka soko metao eane ararehoafunureapo,” aisapo.

<sup>44</sup> Airakano hakimora aporo Yasu takua ira matopesa paremurisia amo soko Yasuaki yaisapo.

*Yasu kusuane oyapo.*

*Maka 15:33-41; Ruki 23:44-49; Yone 19:28-30*

<sup>45</sup> Hauaka sua sere tuaro (12) korokomo kepomarekea eresapo. Ereraka reane samapu maiya isiamo faesapo.

<sup>46</sup> Samapu maiya isia makenamo, Yasumo Yu aporo meaka sakepamo wáraka, “Irae, Irae, rama sapakatani.” Aíyaka namo meaka someraka, “Nómo Kotio, nómo Kotio, nómo ano marirakano metakarisiare?”

<sup>47</sup> Airakano kaikia aporo metakira makeraka risiamo someraka, “Epo Iraíyaki warakae.”

<sup>48</sup> Airakano aporo hakása meta foaka pukua he watera asia he kisa a kokomarekea fofako turua tapomarekea Yasumo nasimo makama yapurasapo.

<sup>49</sup> Aporo metakiramo someraka, “Harufapo. Iraíyamo Yasuane ararehoko perakari-hoamo, isiapo kau risikinapo.”

<sup>50</sup> Airakano Yasumo efera hunia sakepamo wáraka, epo hemakapuraka, “Ano ho puane siahoasireapo,” aíyaka hemakapukua kusuapo.

<sup>51</sup> Yasu kusua maiya amo Kotimo apea pasu waremaresane yapunaka koarape atura pusuapo. Koarape pukua taku haku taku hakusapo. Ayiaka momani soko kára peraka, eke hemakapukua koaraka

<sup>†</sup> 27:34: Kau tenane fahoasimo waene he munamuna asíayaki aporomo nenapo.

<sup>52</sup> aporo kusua motosa kunikia ekemo mapirisiane hemakapukua ropaka pusuapo. Ropaka puraka aporo Kotiaki himu hakásaraka hemakapukua risia kusuane Kotimo maturikia taesapo.

<sup>53</sup> Aporo maturikia taesane Yasu maturikia taesakipoko iane soko kunikia metakarikia Yarusarame sitia purakano aporo yakaimo iane asesapo.

<sup>54</sup> Arirakano ame aporo soko satiniyaki Yasu asekea risia amo aseane momani peraka makata su anakano asekea himu faraka someraka, "Aporoane kakaro Kotimo hokosapo," aisapo.

<sup>55</sup> Arirakano hauaka wakasema tame yia hinamo yakai asekea risiapo. Asiamo Yasu Kariri hauaka koraka rekeno hinamoamo Yasu araresapo. Arareraka Yasu Yarusarame sitia perakano i soko pesapo. Peraka Yasu pipu yia ira matopesa paremarerakano, wakasema tame yia risike asesapo.

<sup>56</sup> Asesa hinamoane yano taesane oyapo. Meta, Makatara hinamoane Mariapo. Meta, Maria Yamesepe Yosefe tetapó kałyiapo. Meta Sepetemo hokosamo kałyiapo. Iisiane soko, hinamo metakira soko ipu makata suane asesapo.

*Yasu kunikia motosane oyapo.*

*Maka 15:42-47; Ruki 23:50-55; Yone 19:38-42*

<sup>57</sup> Samapu maiya tuakeramo Arimatá aporo pesapo. Ipi makata kemo kára toapo. Ipi yano motosa Yosefepo. Eane Yasu patera asesapo.

<sup>58</sup> E Pairate rea pukua someraka, "Yasu kusuane nōmo kunikia motoako maka puaere?" Airakano Pairatemo ame aporoaki someraka, "Yasu kusuane fatarimaka Yosefeaki kakanie." Aýaka someaka maresapo.

<sup>59</sup> Someaka marerakano kairaka, Yasuane fatarimaka Yosefeaki kasapo. Karakano Yosefemo Yasu kusuane pasu pakaesa kotesamo taposapo.

<sup>60</sup> Taporaka Yosefemo maka pukua ipi eke kunikia fana rasa á, aporo meta fana motoanafonakipoko, á Yasu motosapo. Motokoa marekea kunikia kakaru mapiriakosakipoko, eke kára tafeasa keperemarape pukua, kunikia kakarua mapirikia pusuapo.

<sup>61</sup> Arirakano Makatara hinamo Maria soko, Maria meta soko, kunikia makeraka ereketaeraka toapo.

*Yasu kusuane aporo metamo tau maka purapaka aporo terakaiyamosamo asekea risiane oyapo.*

<sup>62</sup> Fenena maiya á pauhokosakipoko kakoreamo, makata su sarimaraka taesapo. Taesa sereane faraka pirisiti aporo kára soko, Fereze aporo soko, Pairate rea sarimaraka someraka,

<sup>63</sup> "Unihaeo, Isiapo makata one hemakapurakanapo. Kotafe hora aporo Yasuane kukuṣiraka epo someraka, 'Ano kusuane yape isia faraka maturikia taehokosapo,' airakasupo.

<sup>64</sup> Aisasamo yape isia omo kunikiane kakaro mapiriasimo nōmo someaka mareanie. Airakano Yasu kusua kunikia motosane ipi aporo hakásra pura pekea, tau hakimaka aporo suaki someraka, 'Yasuane Kotimo maturikia taesapo.' Aýaka somerakanone aporo suamo kakimakosapo. Kakimaka ipu kotafe hora amo kotafe hora fanane marokehokosapo. Ayiakakohoamo kunikia ane kakaro mapirinie. Aýaka someaka mareanie."

<sup>65</sup> Airakano Pairatemo someraka, "Aporo terakaiyamosamo asekea risikiako pusiehokosapo. Re pukua eke tafea mapirisiane repo kakaro koteaka mapirinie."

<sup>66</sup> Airakano i pukua eke tafea mapirisiane ropakamarapaka ororomo fea tipe pusuapo. Ayiáka mapirikia faraka aporo terakaiyamosamo asekea risikiasimo murisiapo.

## 28

*Yasu maturikia taesane oyapo.*

*Maka 16:1-20; Ruki 24:1-10; Yone 20:1-18*

<sup>1</sup> Fenena maiya farakano yatipunumo\* yao kawe fiarakano mituru Makatara hinamo Maria soko, Maria meta soko kunikia aseako pusuapo.

<sup>2</sup> Maiya amo wate foaka momani kára peraka, hepene yapunaka Unihae Kotimo hepene aporo pekea eke tafea kunikia ikia koro mapirisiane keperemafearaka, eke kima yapura asekea kayapo.

<sup>3</sup> Yamakeremo faeana ayiáka hepene aporo hikumisia ayiáka faesapo. Ipi pasuane ako kakaro pakaesa asíapo.

\* **28:1:** Yasu turikia pusua sereane yatipinupo. Arirakano Yu aporomo sokó menoraka, yatipinumo kepo marekea soko menonapo.

<sup>4</sup> Hepene aporoane aporo terakaiyamosamo aseraka kára namoraka fofaraka hamisisir-aka ku pesapo.

<sup>5</sup> Arirakano hepene aporomo hinamoaki someraka, "Hinamo teto namohokopo. Nōmo hemakapuanetetápoyasuira paremarekearusrusukusuaneaseako kope apere."

<sup>6</sup> Yasu o rekerifapo. Epo ipi someraka, 'Ano maturikia taehokosapo,' aisane yasiapo. E kau motosa fasane aseako teto peae.

<sup>7</sup> Asekea faraka ipi aporo hakása puraki somehoko foaka pusie. Puraka úyaka somehoanie. 'Yasu maturikia taesapo. E fana Kariri hauaka á pukua reakipoko, re kesekeaperaka Kariri hauaka á easeakosapo.' Aíyaka somehoanie. Asiamo nōmo tetoakí some ane somehoko pesapo."

<sup>8</sup> Airakano hinamo tetáne fofaraka kára seseraka kunikiane metakarikia, aporo hakása puraki somehoko fofoaka pusuapo.

<sup>9</sup> Purakano asekea Yasumo tetáne sapenekeaperaka someraka, "Mituru, teto auaraka risikianie." Airakano tetápekeakakunaporoktoke Yasuane korakeamaka e kekere-sapo.

<sup>10</sup> Kekererakano Yasumo someraka, "Teto namohokopo. Nōmo ní mae parisaki úyaka somehoanie. 'Kariri hauaka á pusie. Hauaka á ano aseakosapo.' Aíyaka somehoko pusie." Aíyaka Yasumo somesapo.

*Aporo terakaiyamosamo somesane oyapo.*

<sup>11</sup> Hinamo tetáne pusuakipoko aporo terakaiyamosa kunikia asekea risiane, aporo metakira Yarusaramesitapuraka, makata su ásiane pirisiti aporo káraki somesapo.

<sup>12</sup> Somesane pirisiti aporo káramo Yu aporo sisimayaki toke me rusuapo. Me rukua someaka maka aporo terakaiyamosaki mone karáka someraka,

<sup>13</sup> "Aporo hinamo suaki úyaka somehoanie. 'Ereamoisuwakakesakipoko Yasu kusukunikiamotosaneipi aporo hakása puramohakimasesapo.' Aíyakakotafe somehoanie.

<sup>14</sup> Airakano kamani aporo unihaimo kairaka re hukurukohoamo, isiapo reane fari-maka, eane matasohokosapo."

<sup>15</sup> Airakano aporo terakaiyamosamo mone mokoa ayíáka pirisiti aporo káramo somesane ipu kakimasapo. Kakimaka kotafe somesane somekoaka marekeasomerakano, arirakano nōmo sawi one popana maiya amo soko, someane yaiya kotafe somerakano Yu aporo hinamomokakimarakanapo.

*Aporo hakása puraki Yasumo somesane oyapo.*

*Maka 16:14-18; Ruki 24:36-49; Yone 20:19-23*

<sup>16</sup> Yasumo ipi aporo hakása pura Kariri hauaka á pusuapo. Fana Yasumo someraka úria hiniesá aporo hakása pura kinusu hikia,

<sup>17</sup> Yasu aseraka kára kekeresapo. Kekereraka yia i metakiramo aseraka namina susu someraka, "Aporoane Yasureare?" Aíyaka himutetáraka hemakapusuapo.

<sup>18</sup> Aíyakahemakapukua i risiakipoko Yasu pekeasomeraka, "Hepene yapuramo hemakapura wakapu suane soko, hauaka omo hemakapura wakapu suane soko, anoaki kasapo.

<sup>19</sup> Kasasamo hauaka sua re puraka aporo hinamomo ano patera asekeasimo some kakanie. Some kayane kakimarakano, kakimasa aporo hinamoane Ata Koti yano motosa soko, Kotimo hokosa ano yano motosa soko, Ho Kotesa yano motosa soko, isu yano motosa á paorakan, aporo hinamoane hea tapukumurianie.

<sup>20</sup> Nōmo reaki ayiakaniesane repo iaki some kakanie. Nōmo ayiakaniesane tisa aporomo somera ayíáka repo somehoanie. Hao, kaisie. Maiya suamo ano reyaki rekenapo. Maiya fa ana maiyamo soko ano reyaki yaiya rekeakosapo." Aíyaka Yasumo somesapo.

## **Maka Maka sawi one mahemakapukusa someane oyapo.**

Yasu hepene yapura hisiakipoko keremisi tuaneti fae su (25) faraka, sawi one popasapo. Yasumo aporo kenosu eyaki hakāsa pusimo murikimasane, Maka ane murikimasafapo. Asiane Makamo Yasumo hemakapukua rakisiane asesapo. Yu aporohoanafonosamo Yasuane koteaka hemakapusimo Makamo sawi one popasapo. Keseke Porepe Pánapase teta kimisi purakano, Makamo tetáne araresapo. Arirakano Maka ane kakaro yano motosane Yone Makapo.

### **Maka sawia some kepo parakuraka popasane oyapo.**

1:1-8 Yone hea tapukumareramo Yasuane some kasapo.

1:9-13 Yasu hea tapukumarekea faraka reakipoko Satanemo Yasuaki mokopipiraka hkokakako pesapo.

1:14-10:52 Yasumo some kaka rakisiapo.

11:1-19 Yasu saro tok i matia ripaka Yarusarame sitia peraka, Kotimo apea aporomo makata roporakano Yasumo rukua koakataesa.

11:20-12:44 Aporo yano motosa káraraka risia aporoamo Yasumo hasaka somerakari-hoamo, makata yakai Yasuaki somesapo.

13:1-37 Keseke makata ayiakacosane Yasumo somesapo.

14:1-15:47 Yasuane wasere maka hukurukua rusua kusuapo.

16:1-20 Yasu kusuane turikia pusuapo.

*Yone he tapukumareramo Yasumo ikia kara makotesane oyapo.*

*Matiu 3:1-12; Ruki 3:1-18; Yone 1:19-28*

<sup>1</sup> Kotimo hokosa Yasu Keresoane hemakapusimo some kotesa kepomaresane oyapo.

<sup>2</sup> Wate fana Kotimo somerakano porofete aporo Aesayamo kaikia popahoareapo. Popasane oyapo.

Kotimo ipi hokosaki someraka, "Hao, kaisie. Né pusiraka aporo metamo fana some kakako nōmo pusiehokoso. Aporoamo ne ikia kara pukusane maropohokoso. Ikia kara maropoana ayiáka aporo hinamomo himu hemakapusane maropohokoso. Ipu neane hemakapusimo some kakakoso." (*Malakai 3:1*)

<sup>3</sup> E ima yaoa rea maiya amo aporo hinamomo kaiyako perakano epo wakapuaka someraka, 'Unihae peakosane ikia kara makotehoanie. Ikia karane hahaezeno maereketaeahoanie,' aihokoso." Aiyaka Kotimo somerakano wate fana Yasu peasiraka Aesayamo kaikia popahoareapo. (*Aisaia 40:3*)

<sup>4</sup> Popasa hakása nine keseke Yone he tapukumarerane ima yaoa pukua rea ayareapo. Faserepeke reke aporo hinamoaki someraka, "Repo makata watikisane Kotimo mafahosimo, makata watikisane metakarinie. Metakarikia eaki risikiako parirakano, re nōmo hea tapukumuriakoso," aisapo.

<sup>5</sup> Áisa maiya amo, Yone rea hauaka á Yutía hauaka aeyaka soko, Yarusarame siti aeyaka soko, aporo hinamo yakai pesapo. Pekeea ipu makata watikiaka rakisiane hufitaerakan i Yonemo he Yotanea tapukumuriakoso.

<sup>6</sup> Maiya amo Yonemo saro kamo itimo pasu pesane osoraka saro narikose kau terakae hikia, kitaro kesé asia nekea, wakaiyia he metekeraka nekea, ayiáka reapo.

<sup>7</sup> Reke epo some karaka, "Ano reakipoko keseke aporo kára meta peakosapo. Peraka epo ano marokehokoso. Enamo kakaro káraro. E aporo kárasasamo, aporo raipamo epo tamakane fisina ayiáka, ano kako pekeea epo tamakane nōmo fisihoane siahoasifareapo. E aporo kárasasamo, nōmo epoko raiparaka rakiako ayiane soko, ano wakasemasasamo, nōmo rakiane siahoasifareapo. Ano eyaki siasafapo.

<sup>8</sup> Nōmo re hea hákasa tapukumuriakanapo. Arirakano epo re himua Ho Kotesa muriakoso," aiyaka Yonemo somesapo.

*Yonemo Yasu hea tapukumaresane oyapo.*

*Matiu 3:13-17; Ruki 3:21-22; Yone 1:29-34*

<sup>9</sup> Yasu Kariri hauaka Nasare ape aeyaka Yone rea pesapo. Perakano Yonemo e he Yotanea tapukumaresapo.

<sup>10</sup> Hea tapukumaresane ropaka hekeia ima yapura hianine, tiane kikisi aka, kikisi rorakano, aseane Ho Kotesa mena nume asia ti yapunaka pekeea Yasu rea pesapo.

<sup>11</sup> Perakano, ipu aseraka risiakipoko, hepene aeyaka Kotimo someraka, "Né, nōmo ní hokoso. Néane nōmo himu tumurumo hemakapukua seserakanapo." Aiyaka somerakano kaisiapo.

*Yasumo watikiaka rakisimo Satanemo e mokopipisane oyapo.*

*Matiu 4:1-11; Ruki 4:1-13*

<sup>12</sup> Ho Kotesamo Yasuaki someraka, "Ne ima yaoa rekeako pusie," airakano pusuapo.

<sup>13</sup> Pukua sere foti amo (40) Yasu ima yaoa reakipoko, Satanemo e mokopipihokosakipoko perakano asesapo. Arirakano yasaro soko, yákasa soko pesapo. Perakano yia hepene aporomo e arareraka asekea risiapo.

*Yasu Kariri hauaka á pusuane oyapo.*

*Matiu 4:12-17; Ruki 4:14-15; Yone 4:1-3*

<sup>14</sup> Herotemo Yone tipura makesakipoko Yasu Kariri hauaka á pukua Kotimo some kotesane some kasapo.

<sup>15</sup> Some karaka, "Kotimo murikimasa maiyane fasereperakanapo. Yumo Koti ipi unihaeaka asekea rekeakosa maiya ane fasereperakanapo. Asiasamo repo himu watikisane metakarikia eaki risikiako parirasie. Kotimo some kotesane kakimasie," aísapo.

*Aporo kitafasuaki Yasumo someraka, "Ano patera asesie," aisane oyapo.*

*Matiu 4:18-22; Ruki 5:1-11*

<sup>16</sup> Yasu he Kariri fua pukua reke aseane Saemone soko ipi mamanea Enitu soko tetapō pokoa mokoako hea kasipu kokomareraka risikino asesapo. Arirakano tetapō makata rakirane pokoa pisinisi rakirapo.

<sup>17</sup> Asiamo Yasumo tetáki someraka, "Ano patera asesie. Ano patera aserakano tetápo pokoa amora ayiáka aporo hinamo anoa paohokosane pasimokoasimo nōmo teto murikimarakapano."

<sup>18</sup> Aiyaka somerakano tati kasipuane wate foakayia metakarikia Yasuyaki hakasa pusuapo.

<sup>19</sup> Wakasema pukua Yasumo aseane Sepetemo maeya Yamesepe ipi mamanea Yone tetá kasua risike kasipu potakahesa petokoraka risikino asesapo.

<sup>20</sup> Aseraka tetáne peasimo Yasumo wásapo. Wárakano tetapō wafaya Sepeteane soko, ipi aporo raipane soko, i namina kasu yia risikino metakarikia, tetá Yasuyaki hakasa pusuapo.

*Yatafumo aporo ho masane oyapo.*

*Ruki 4:31-37*

<sup>21</sup> Kapaneame taonea pauraka fenena maiya amo, Yu aporomo sarimana apea pukua Yasumo some kasapo.

<sup>22</sup> Some karakanó aporo hinamomo kaikia fofaraka himu fasapo. Kotimo somemane tisa aporomo some akara ayiáka, aporomanomo hemaka apura ayiáka, Yasumo some kasafápo. Aporo yano motosa fanamo some akara ayiáka some karakanó kaikia, "Someane enahoasifareapo," aiyaka aporo hinamo kára fofasapo.

<sup>23</sup> Arirakano Yu aporomo sarimana apea, aporo hakása yatafumo e ho masa reke

<sup>24</sup> epo wáraka, "Yasu né Nasare aporopo. Nōmo isu yatafuane mayiakakosare? Isu mokoatikirako pesare? Né nōmo aserapo. Ne Kotimo pusiesane né Kotimo ipi hokosasamo namo kakaro kotesane népo."

<sup>25</sup> Airakano Yasumo yatafuaki someraka, "Wae, nōmo mehokopo. Nōmo aporo ho masane metakarikia pusie."

<sup>26</sup> Airakano yatafumo aporo ho masane mahamisisiraka marekea, aporo ho masane metakarikia ipi kokoeraka wárape pusuapo.

<sup>27</sup> Purakano asekea aporo hinamo su risiane fofaraka, namina susu someraka, "Ane marirakanarakapo. Some akarane some kawereapo. Aporo hokopusuamo some akara ayiáka some akare. Kotimo ipi ayiakaniesane kekemarakana yatafu pusierakano yatafumo kakiimaka apure," aisapo.

<sup>28</sup> Aiyaka aporo hinamo Kariri hauaka sua pukua, Yasumo makata rakisiane aporo hinamo suaki somesapo.

*Aporo yakai makata tasa Yasumo mafasane oyapo.*

*Matiu 8:14-17; Ruki 4:38-41*

<sup>29</sup> Yu aporomo sarimana apeane Yasumo metakarikia pukua Enitupe Saemone tetapō apea pukua yororakano, Yamesepe Yone tetá soko apea yorokoa pusuapo.

<sup>30</sup> Puane ipu Yasuaki foakayia someraka, "Saemonemo ipi aseamo kafyia kau sisipuraka makata takamaka warekenapo," aisapo.

<sup>31</sup> Airakano hinamo makata takamasa warea á Yasu pukua hinamoane hokonoa maka e máfahoane kau sisipusane fasapo. Farakano hinamoamo ipoko makata nakosa paikia kasapo.

<sup>32</sup> Arirakano wakasema nina maiya tuakeramo aporo hinamo metakira makata tasane soko, aporo hinamo metakira yatafumo i ho mosane soko, Yasu rea karikia pesapo.

<sup>33</sup> Karikia perakano aporo hinamo yakai Saemonemo ape ikia koroa sarimaraka kau risiakipoko

<sup>34</sup> Yasumo aporo hinamo yakai makata tasa kekepoane mafasapo. Yatafu yakaiai metakarikia pusierakano pusuapo. Yatafumo Yasuane hemakapusuasamo, Yasumo iaki someraka, "Repo mehokopo," aiyaka Yasumo somesapo.

*Ape sumu yakai á some kakako Yasu pusuane oyapo.*

*Ruki 4:42-43*

<sup>35</sup> Mitoru fiahoko makeanamo Yasu takahikia pukua, ima yaoa aporo fasakipoko á kurikurisapo.

<sup>36</sup> Kurikurihoko pusuakipoko Saemone soko, ipi aporo táké soko, ipu Yasu koako pusuapo.

<sup>37</sup> Pukua ipu Yasuane kokoa aseraka someraka, "Né aporo suamo korakanapó."

<sup>38</sup> Airakano iaki Yasumo someraka, "Ape sumu metakira soko ano purakapo. Pukua apea nómō Kotimo someane some kakakosapo. Asiamo Kotimo someane some kakako ano hauaka kára wo pesapo." Aiyaka Yasumo somesapo.

<sup>39</sup> Yasu Kariri hauaka ape sumu sua koraka reapo. Koraka reke Yu aporomo sarimana apea some kakako pukua, Yu aporomo sarimana ape meta soko some kakako pukua, Yu aporomo sarimana ape meta soko, some kakako pukua asiapo. Yatafuaki soko Yasumo pusierakano pusuapo.

*Aporo toropakesa Yasumo mafasane oyapo.*

*Matiu 8:1-4; Ruki 5:12-16*

<sup>40</sup> Yasu rea aporo toropakesa pesapo. "Yasuane yano motosa kárapo," aiyaka hemakapuka e kakuna porokoa kake someraka, "Nómō ano mafahoko seseraka soko metao seserire?"

<sup>41</sup> Airakano aporoane Yasumo kamenakaraka ipi hokono máfaraka e sakairaka\* someraka, "Ao, ano seseripo. Né makata takamasane farasie," aisapo.

<sup>42</sup> Aihoanine aporo toropakesane wate foaka fasapo.

<sup>43</sup> Faraka e siaraka rekeno asekeea Yasumo aporo toropakesaki me paroaka someraka, "Né pusie.

<sup>44</sup> Ne toropakesa fasane aporo metakiraki somehokopo. Piriape aporo rea á né pukua, kau toropakesa fasane piriape aporoaki tarinie. Tarikia Mosesemo somemananeane kekemaraka makata yaku Kotiaiki kakaniesane yaiya kakanie. Makata kakakosane piriape aporomo Kotipoko taehokosapo. Taena maiya amo né kau toropakesane kakaro fasapo, airakano aporo hinamo suamo kaikia hemakapusuasapo." Aiyaka Yasumo somesapo.

<sup>45</sup> Somerakano yia, aporo toropakesa fasamo kakipayaraká pukua aporo hinamo suaki somesapo. Someaka haerakano aporo hinamo suamo kaisiapo. Yasu reakipoko aporo hinamo su peraka, taperapaka taone sua Yasu pusuafapo. Yasuane ima yaoa reapo. Ima yaoa rekeno aporo hinamo yakai peraka, sape akayaka soko, sape royaka soko, taku rayaka soko, taku atura aeyaka soko, aporo hinamo su Yasu rea pesapo.

## 2

*Aporo korosakataesane Yasumo mafasane oyapo.*

*Matiu 9:1-8; Ruki 5:17-26*

<sup>1</sup> Sere hakásá soko metao, sere tetá soko metao farakano, Yasu Kapaneame taonea paripesapo. Yasuane paripesapakano aporo hinamo suamo kaisiapo.

<sup>2</sup> Kaikia aporo hinamo yakai pekea sarimaraka ape tapesapo. Ape taperaka ikia koroa kausekeno, Yasu ape kakaru tipia reke, aporoaki some kotesane some kasapo.

<sup>3</sup> Some karaka rekeno aporo kitafasumo aporo korosakataesane fefeneakua makekeea, maka pekeea

<sup>4</sup> aseane, aporo hinamo kára sarimasakipoko, Yasu rea pusifasekeno, aporo korosakataesane maka ape kopo yapura maka hikia, Yasu ipi rea unia kima aeyaka ape kopo feteketaera-ka, ape kopo aeyaka fefeneakua tau metafirirakano metafirirakanoraka, asukuru Yasu rea á motosapo.

<sup>5</sup> Motoraka aporo korosakataesa maka pesa aporo kitafasuamo Yasuaki himu hakásaraka hemakapurakano asekeea, Yasumo aporo korosakataesaki someraka, "Hameo, né himu watikisane nómō mafarakanapo."

<sup>6</sup> Airakano Kotimo somemanane tisa aporo metakira á toamo namina susu hemakapuraka,

<sup>7</sup> "Koti ipi hákasamo aporo himu watikisane mafánapo. Aporomanomo mafánafapo. Asiamo Yasumo Kotiane mawakasemarakae. Epo aiyaka somehoane siahoadifareapo."

\* **1:41:** Aporo toropakesane fasikia rerapo. Aporo metamo e kaua sakairafapo.

<sup>8</sup> Aíyaka ipu hemakapurakano, wate foaka ipu hemakapusuane Yasumo aseraka iaki someraka, "Repo marirakano ano mahokoparirakanare?"

<sup>9</sup> Aporo korosakataesaki nōmo someraka, 'Né himu watikisane nōmo mafarakanapo,' airane wafororakanafapo. Himu watikisa faraka soko metao, fahoanafonoraka soko metao, repo aserafapo. Asiāne nōmo someraka, 'Né makata takamasane nōmo mafarakanapo,' airane wafororakanafapo. Aporo korosakataesa takahirane repo aserakanapo.

<sup>10</sup> Aporomanomo Tákeane anopo. Hauaka wo aporo hinamomo himu watikisane nōmo mafahoasimo, Kotimo ipi anoaki ayikananesapo. Ayikaniesa hakásá yine nōmo maka, repo asekeasimo aporo korosakataesaki nōmo takahisierakanapo." Aíyaka Yasumo aporo korosakataesaki someraka,

<sup>11</sup> "Takahikia, asakapu maweroraka ní apea maka pusie."

<sup>12</sup> Airakano aporoane takahikia ipi asakapu wate foakayia maweroraka maka pusuapo. Maka purakano aporo hinamomo suamo asekea himu faraka, Kotiaki kekereraka someraka, "Fana makata aina ane isiapo asesafapo. Pipu makata hakureapo," aíyaka ipu suamo somesapo.

*Yasumo Rífaiaiki peae, aisane oyapo.*

*Matiu 9:9-13; Ruki 5:27-32*

<sup>13</sup> Yasu he kekeia kaya á pukua he fua reke aseane, aporo hinamomo yakai sarimarakano, Yasumo iaki some kasapo.

<sup>14</sup> Some kaka faraka pukua Yasumo aseane, Afiasemo maeya Rífaí ane ipi takese mora oposea kakeno asesapo. Asekea someraka, "Né ano patera aseako peae." Airakano Rífaí takahikia Yasuyaki hakásá pusuapo.

<sup>15</sup> Pukua Rífaímo apea pauraka, ape namoa yorokoa Yasu soko, ipi aporo hakásá pura soko, toke iyaki aporo himu watikisa soko, takese mora aporo\* metakira soko, sarimarakana namina hakásá makata nenaka toapo. Aporo yakai toane metakira Yasuane kekemarakana pusuapo.

<sup>16</sup> Kekemarakana pusua aporoane metakira aporo watikisa soko, takese mora aporo soko, i Yasuyaki hakásá toke makata nenakano, Fereze aporomo namina somemanane tisa aporomo asesapo. Aseraka ipu Yasumo aporo hakásá puraki someraka, "Takese mora aporoyaki aporo himu watikisayaki Yasu hakásá toke makata anenane kakaro watikirareapo."

<sup>17</sup> Áirakano Yasumo kaikia iaki someraka, "Aporo koteaka reane mitikoromo mafahoasimo purafapo. Aporo makata takamasane mitikoromo mafahoasimo purapo. Asiamo aporo hinamomo himu watikiaka risiane, ipu watikisane metakarikia risikiako parihoasimo, iaki peahoko ano perakayiapo. Aporo kotesane peahoko ano perakayiafapo." Aíyaka Yasumo somesapo.

*Kotimo asekeasimo aporo hinamomo suamo makata nakosa sokoainane Yasumo somesane oyapo.*

*Matiu 9:14-17; Ruki 5:33-39*

<sup>18</sup> Maiya metamo Yone he tapukumareramo ipi aporo hakásá puramo soko, Fereze aporomo soko, makata nakosa sokoairaka risiapo. Sokoairaka risia maiya amo aporo metakiramo Yasuaki someraka, "Nómo aporo hakásá puramo makata nakosa sokoainahoanafonorane mainakanonare? Yonemo ipi aporo hakásá puramo makata nakosa sokoainapo. Fereze aporomo ipu aporo hakásá puramo makata nakosa sokoainapo. Asiāne nōmo aporo hakásá puramo makata nakosa sokoainafapo."

<sup>19</sup> Airakano Yasumo takumeaka someraka, "Aporomo hinamomo arumarakano, aporo suamo hokono keraka seseaka makata nenapo. Makata nenaka aporo hinamomo kawe apia iyaki hakásá rekeno, i himu hisihoanafonoraka i seseraka risike, makata nakosane sokoainafapo.

<sup>20</sup> Arirakano aporo hinamomo kawe apia aporo metakiramo waseremaka apura maiya amo, himu hisiraka makata nakosane sokoaihokoso.

<sup>21</sup> Arirakano pasu paté koasakipoko pasu kawe paremarekea irisane, pasu kaweanekuruhenaka pasu patéane fe taku aeyaka hatirirurapo. Hatiriruraka kára koahokoso. Anapaka pasu patéyaki pasu kaweyaki sarimarakia irinafapo.

<sup>22</sup> Arirakano nanikose kau aporomo maka petoro asia ayiáka irinapo. Waene he kawe metekesane petoro patéa takamanafapo. Takamarakano waene he kawemo ponoponoponaraka petoro patéane faurakoso. Fauraka petoro kakeraka waene heane sakuriakoso. Sakuriraka waene he soko, petoro soko, tetákara fahokoso. Arirakano waene he kawe metekesane petoro kawea takamarakano, petoroane faunafapo." Aíyaka Yasumo

\* **2:15:** Takese mora aporoamo mone sapeane hakimosapo. Anakano asekea aporomo i sesesafapo.

ipi some kawe kasane soko, ipu fana somesane soko, tetane sarimaraka kekemahoane siahoasifareapo, aiyaka Yasumo takumeaka somesapo.

*Ferena maiya amo kepoane Yasumo somesane oyapo.*

*Matiu 12:1-8; Ruki 6:1-5*

<sup>23</sup> Fenena maiya hakāsa metamo, witi hemoa Yasu soko, ipi aporo hakāsa pura soko i pusuapo. Puraka aporo hakāsa puramo witi hae susane tukua nesapo.

<sup>24</sup> Nenakano Fere se aporomo aseraka Yasuaki someraka, “Nómo ní aporo hakāsa puramo makata aturane asesie. Ipu makata arakirane fenena maiyamo yaposapo. Yaposane mamosoanane mairakanonare?”

<sup>25-26</sup> Airakano asekeea, Yasumo ipu hasaka hemakapusuane tariakosakipoko, Tefeteane Kotimo sawia popasane iaki someraka, “Wate fana pirisiti aporo kára ípi yano motosa Apiaita, e rea maiya amo, Tefete soko ipi aporo hakāsa pura soko meamosapo. Meamosa maiya amo, Tefete ipi Kotimo apea yorokoa aseane, Kotipoko farawa taesane Apiatamo karakano Tefetemo nenaka, ipi aporo hakāsa puraki soko, farawa taesane kasapo. Kasáne Kotipoko farawa taesane aporo hinamo ipu nakohoamo yapo motosapo. Pirisiti aporomo namina hakāsa makata nenáne yaposafapo. Ásiáne Tefete ipi pirisiti aporohoanafonosa yiamo farawa yaposane nesapo.<sup>†</sup> Aiyaka Kotimo sawia popahoareapo. Popasane repo menoraka kepoane hemakapurakarire? Wae, repo hemakapurakarifapo.

<sup>27</sup> Arirakano aporo ararehokosakipoko fenena maiyane Kotimo maresapo. Fenena maiyane makotehokosakipoko aporoane maresafapo.

<sup>28</sup> Aporomanomo Tákeane anopo. Yape fenena maiya amo makata aina ane ano unihaeaka rekenapo.” Aiyaka Yasumo Fere se aporoaki somesapo.

### 3

*Aporo hokono narisa Yasumo mafasane oyapo.*

*Matiu 12:9-14; Ruki 6:6-11*

<sup>1</sup> Efera hunia Yu aporomo sarimana apea Yasu yorokoa aseane, aporo hokono narisanrekeno asesapo.

<sup>2</sup> Airakano fenena maiya amo aporo hokono narisa Yasumo mafarakarihoamo, Ferese aporomo asekeea risisapo. Fenena maiya amo Yasumo rakirakano asekeea hukuruksakipoko, asekeea risiapo.

<sup>3</sup> Asekeea risikino, Yasumo aporo hokono narasaki someraka, “Né pekea tipi o reae,” aisapo.

<sup>4</sup> Aiyaka epo Fere se aporoaki someraka, “Fenena maiyámo koteaka rakiane soko metao, watikiaka rakiane soko metao, makata rakira meta mamo Kotimo somemanane mamosorakarire? Aporo meta kurapaka ararenane soko metao, aporo meta rurane soko metao, makata meta mamo Kotimo somemanane mamosorakarire?” Airakano ipu me kausapo.

<sup>5</sup> Me kaurakano asekeea, Yasumo saperaka iane asekehaesapo. Aseane ipu himumo kakimako hisirakano asekeea Yasumo iaki himu mahisisapo. Ásiáne epo aporo hokono narasaki someraka, “Né hokono máfaraka raerasie.” Airakano hokono raehoane narisanefasapo.

<sup>6</sup> Aporoane hokono narisanefarakano asekeea, Fere se aporoane Yu aporomo sarimana apeane metakarikia pukua, wate foaka Kini Herotemo ipi aporo raipayaki namina susu someaka maraka, “Yasuane kuku simo isiapo rukusapo. Isiapo mayiáka rukusare?” aiyaka someaka masapo.

*He kekea kaya a aporo yakai sarimasane oyapo.*

*Matiu 4:24-25; Ruki 6:17-19*

<sup>7</sup> Yasu ipi aporo hakāsa pura soko, pukua he kekea kaya ápusuapo. Purakano iyaki aporo yakai asekehaerape pusuapo. Pusuane Kariri hauaka aeyaka soko, Yutia hauaka aeyaka soko,

<sup>8</sup> Yarusarame siti aeyaka soko, Itumea hauaka aeyaka soko, he Yotane yaoraka hauaka taku aeyaka soko, Saetone taone aeyaka soko, Taia taone aeyaka soko, aporo hinamo yakaimo kaiyiane Yasumo aporo hinamo makata takamasane mafasapakano kaikia, i é rea pesapo.

<sup>9-10</sup> Aporo hinamo pesane i yakai makata tasane Yasumo mafasapo. Mafarakano asekeea aporo hinamo makata tasa suamo Yasuane kaua sakaihoko pesapo. Pekea ipi kaua ipu suamo sakairakano asekeea Yasumo ipi aporo hakāsa puraki someraka, “Aporo

<sup>†</sup> **2:25-26:** “Tefetemo makata nesasamo nōmo aporo hakāsa purane meamorakano makata nesane hasakasafapo.” Aiyaka Yasumo kepoane iaki somesapo.

hinamo kára peraka taperipo. Asiamo ano kasua kakakosapo. Kasu he fea sakomo kita humareanie,"aisapo.

<sup>11</sup> Airakano aporo hinamo tua yatafu risiamo Yasuane asera yiamo Yasu hikumisia hurupekea wareke wáraka, "Né Kotimo hokosapo."

<sup>12</sup> Airakano Yasumo yatafuaki someraka, "Aporo hinamo suamo kaiyakohoamo ano Kotimo hokosapo, aihekopo." Aiyaka Yasumo paroaka somesapo.

*Aporo hakása pura kenosu yano taesene oyapo.*

*Matiu 10:1-4; Ruki 6:12-16*

<sup>13</sup> Yasu üria hinaka, Yasumo ipi aporo sesesa susuane peaesapo.

<sup>14</sup> Perakan asekea, aporo kenosu murikimasapo. Murikimasane i tarira aporopo, aisapo. Murikimasane eyaki kikinaraka hakása pukusakipoko murikimaka, arirakano epo someane some kakakosakipoko murikimaka,

<sup>15</sup> arirakano yatafuane metakarikia pusie aihokosakipoko murikimaka ayíaka rakisimo iaki wakapuane kasapo.

<sup>16</sup> Asiamo aporo kenosu murikimasane oyapo. Saemone ipi yano motosa metane Pita, aiyaka Yasumo yano motosapo.

<sup>17</sup> Arirakano meta Sepetemo maeya Yameise, arirakano meta Yamesemo ipi mamanea Yone tetâ ane Poanesi, aiyaka Yasumo yano motosapo. Ipu Poanesi yano motosa kepoane namo meaka Yao Kikirira aiyaka yano motosapo.

<sup>18</sup> Arirakano meta Enitu, arirakano meta Firipi, arirakano meta Patóromiu, arirakano meta Matiu, arirakano meta Tomase, arirakano meta Afiasemo maeya Yameise, arirakano meta Tátiese, arirakano meta Rome kamanimo Yu aporo asekea reane metakarikosakipoko hemakapura aporo Saemone,

<sup>19</sup> arirakano meta Yasu parakehokosa aporo Yutase Isekerio, ayíaka Yasumo aporo kenosu murikimasapo. Murikimaka faraka Yasu ipi apea pusuapo.

*"Yasupe Satane tati hakása iyiareapo," aiyaka Kotimo somemane tisa aporomo somesane oyapo.*

*Matiu 12:22-37; Ruki 11:14-23*

<sup>20</sup> Efera hunia Yasu reakipoko aporo yakai sarimaraka káraserkeno maiya suamo Yasumo makata rakiraka reke, epo soko ipi aporo hakása puramo soko, ipu makata nesafapo.

<sup>21</sup> Makata nesafapakano, Yasumo ipi aporo iramo kaisiapo. Yasu masuasapakae, aisasamo ipu Yasu pasimako pesapo.

<sup>22</sup> Arirakano Kotimo somemane tisa aporo Yarusarame siti aeyaka pekea ipu someraka, "Yatafumo unihae yano motosa Piaósipumo, Yasu ho maka, e Yasuyaki hakása reasasamo, Piaósipumo wakapuane Yasumo maka yatafu pusierakano apure."

<sup>23</sup> Airakano Yasumo iaki someraka, "Re su peae." Aiyaka perakan asekea Yasumo iaki takumeaka someraka, "Satanemo ipi yia aporo raipane mayíaka pusierare?

<sup>24</sup> Aporo namina hauaka hakása risia yiamo parakuraka weraka aporoane koaka tarikia kekepo kekepoaka risike ape kauanehokosapo.

<sup>25</sup> Arirakano aporo ira hakása namina parakuraka weraka arupukua fahokosapo.

<sup>26</sup> Aina ayíaka Satanemo yatafuaki pusie satiki, ipi téke tati awera ayíaka weafunupo. Satanemo ipi aporo tékeyaki parakuraka wera satiki, i arupukua fahoafunupo.

<sup>27</sup> Arirakano aporo metamo aporo warémo\* apea makata kemo hakimokoariraka, fana aporo waréane sakomo taporaka motokoa marekea, ipi apea yorokoa makata hakimorapo. Aporo waréane tapohoa siraka, ipi yaiya waréraka rekeno asekea ipi apea hakimokoako yorokoa purafapo.

<sup>28</sup> Asiamo nōmo reaki kakaro somerakaripo. Aporo hinamomo kekepo watikiaka rakirapo. Watikiaka rakirane soko, Kotiane mawakasemarako somerane soko, Kotimo mafahokosapo.

<sup>29</sup> Asiáne Ho Kotesane aporo hinamomo mawakasemarakano, yumo soko, keseke soko, Kotimo kakaro mafahokosafapo. Aporo hinamomo Ho Kotesane mawakasemarako somesasamo, makata watikisaneyaki yaiya rekeakosapo,"aisapo.

<sup>30</sup> Asiamo ipu someraka, "Yatafumo Yasu ho masasamo Yasumo wakapuaka arakire." Aisa akipoko Yasumo iaki aiyaka somesapo.

*Yasumo ipi katyia soko ipi mamanea soko pesane oyapo.*

*Matiu 12:46-50; Ruki 8:19-21*

<sup>31</sup> Yasumo ipi katyia soko, ipi mamanea soko pesapo. Pekea hauaka moroa risike someraka, "Yasu peahoanie."

\* <sup>3:27:</sup> Aporo waréane takumeaka somesamo kepoane Satanepo. Aporo waréane tapora aporoane Yasupo.

<sup>32</sup> Airakano aporo hinamo yakai Yasuyaki hakāsa sarimaraka toamo Yasuaki someraka, “Nōmo ní ama soko, ní mae soko, ní papā soko, hauaka moro atura risike, né peaearakae.”

<sup>33</sup> Airakano Yasumo someraka, “Nōmo ama soko, nōmo mae soko, kepoane kaisie.”

<sup>34</sup> Aiyaka eaki himu hakāsara hemakapura aporo hinamo toane Yasumo asekehaeraka someraka, “Nōmo ama asiāne soko nōmo mae asiāne soko repo.

<sup>35</sup> Asiāmo aporomo soko, hinamomo soko, Kotimo hemakapusuane kekemaraka raki-rakanaporo hinamoane nōmo mae nōmo papā nōmo ama asiāpo.” Aiyaka Yasumo somesapo.

## 4

*Makata mano potesa Yasumo takumeaka somesane oyapo.*

*Matiu 13:1-9; Ruki 8:4-8*

<sup>1</sup> Yasu he fea pukua efera hunia iaki some kasapo. Some karaka reke aseane aporo hinamo yakai sarimarakan asekea, ipi takahikia pukua kasu hea tapuku reakipoko e kasua reke, aporo hinamo he fua risiaki some kasapo.

<sup>2</sup> Some yakai takumeaka some kasapo. Ipu hemakapusimo someraka,

<sup>3</sup> “Hao, kaisie. Aporomo makata mano poterape pusuapo.

<sup>4</sup> Poterape pusua maiya amo makata mano metakira ikia kara hurupepesapo. Hurupepesane menamo nesapo.

<sup>5</sup> Arirakano makata mano metakira eke kima hauaka wakasemasakipoko hurupepesane foaka tanehesa nine, pikinu koteaka pusufapao.

<sup>6</sup> Pikinu koteaka punafonosasamo maíyamo ruraka sisipuraka kuane yoferaka kukua kesapo.

<sup>7</sup> Arirakano makata mano metakira makata mano keta risia arakarua hurupepesapo. Hurupepesane makata mano keta risia akiyaki hakāsa tanehesapo. Tanehenaka makata keta risiane popakeraka, makata manoane karotapiraka serekera kate pesafapo.

<sup>8</sup> Arirakano makata mano metakira hauaka kotesakipoko hurupepesane tanehekeea wate pesapo. Wate peraka, metakira wate teti su (30) pekea, metakira wate sekeseti su (60) pekea, metakira wate wane harote su (100) aiyáka pesapo.

<sup>9</sup> Re senaki risiāmo kairaka koteaka kaisie. Kaikia hemakapunie.” Aiyaka Yasumo iaki somesapo.

*Maiya suamo Yasumo ipi takumeaka somesane oyapo.*

*Matiu 13:10-17; Ruki 8:9-10*

<sup>10</sup> Aporo hinamo yakai pukua fasekeno aporo hukusi Yasuyaki risike, aporo kenosu fana murikimasane Yasuyaki risike ipu Yasuaki someraka, “Takume kepoane yakapare?”

<sup>11</sup> Airakano Yasumo iaki someraka, “Repo kaiyisimo Koti umihaeaka rea mahamesane pipu yumo some kepoane reaki hufitaeraka somerakanapo. Asiāne nōmo murikimakanafonosa aporoaki takumeaka susu somerakananopo.

<sup>12</sup> Kotimo sawia poparaka ayiakakosapo, aisa amo kepoane porofete aporomo kakaro popahoareapo. Popasane oyapo.

‘Aporo hinamomo himo aseraka aseakosapo. Asesa nine kepoane koteaka hemakapu-rafapo. Ipu senakimo kairaka kaiyakosapo. Kaisia nine kepoane koteaka hemakapu-rafapo. Ipu himumo koteaka hemakapukusane hisiraka risirapo. Asiāmo ipu himu watikisané metakarikia Kotiaki risikiako parisa satiki, Kotimo ipu watikisané mafahoafunureapo.’ Aiyaka porofete aporo Aesayamo popahoareapo.” Aiyaka Yasumo iaki somesapo.

*Makata mano potesa amo takume kepoane oyapo.*

*Matiu 13:18-23; Ruki 8:11-15*

<sup>13</sup> Yasumo ipi aporo hakāsa puraki someraka, “Repo takume some one kairakarifare? Takume some one hemakapunafonoraka repo takume suane mayiáka kepoane hemakapukusare?

<sup>14</sup> Hao, kaisie. Makata mano poterape pura aporo asiāne, Kotimo some kará aporopo. Makata mano asiāne, Kotimo somepeo.

<sup>15</sup> Makata mano ikia kara hurupepesa asiāne, aporo ikia kara fea risiāmo Kotimo someane some kasane kairakano, Satane wate foaka pekea someane hakimarapo.

<sup>16</sup> Arirakano eke kima hurupepesa asiāne oyapo. Aporomo Kotimo someane kairaka wate foaka someane seseaka kaikia hemakapurapo.

<sup>17</sup> Pikinu koteaka punafonona aiyáka koteaka kakimaka rerafapo. Makata watikisa fasereperakano soko metao, Kotimo some kakimasa aporoaki mokoatikirakano soko metao, Kotimo someane maiya wakasema kaisia nine, foaka metakarirapo.

<sup>18</sup> Arirakano makata mano keta risia arakarua makata mano hurupepesa asiane oyapo. Aporomo Kotimo someane kaikia yia

<sup>19</sup> hauaka wo makata tomekesa kára hemakapurane soko, mone kára mokoako seseraka hemakapurane soko, hauaka wo makata ane mokoako totoraka hemakapurane soko, makata ísia amo Kotimo someane karotapiraka wate koteaka perafapo. Wate peanafonosa ayíáka, aporo hinamo metakiramo Kotiane hemakapusimo soko, Kotimo sesehoasimo soko, ayíáka rakiako hemakapurafapo.

<sup>20</sup> Arirakano hauaka kotesakipoko hurupepesa asiane oyapo. Aporomo Kotimo someane kaikia kakaro kakimaka risikino, wate apera ayíáka perapo. Wate perane metakira teti su (30), metakira sekeseti (60), metakira wane harote su (100) ayíáka wate tumokoasimo kára perapo." Aíyaka Yasumo takume amo kepoane somesapo.

*Yasumo nafa takumeaka somesane oyapo.*

*Matiu 5:15; Ruki 8:16-18*

<sup>21</sup> Yasumo ipi aporo hakása puraki someraka, "Nafa pakimaka motokoa taramomo karotapirare? Nafane ape wara pete petaua motorare? Wae, nafa pakimaka apea waremarerapo.

<sup>22</sup> Aina ayíáka Kotimo some faremaresane kakamaraka mafekemahokosapo. Makata mahamesane hufitaehkokesapo.

<sup>23</sup> Re senaki risiamo kairaka, koteaka kaisie.

<sup>24</sup> Nōmo someane koteaka kaikia hemakapunie. Repo makata akara ayíáka reaki kakakosapo. Makata meta soko ripaka marekea kakakosapo.

<sup>25</sup> Aina ayíáka repo nōmo someane koteaka hemakapuko, kepoane kope pukua hemakapurakano, some meta kepoane soko hemakapusimo Kotimo né ararehokosapo. Asiāne nōmo someane koteaka kokoa hemakapunafonosasamo, fana makata kaisiane soko meraruhokosapo." Aíyaka Yasumo iaki somesapo.

*"Kotimo aporo unihaeaka asekeea reane oyapo." Aíyaka Yasumo takumeaka somesane oyapo.*

<sup>26</sup> Yasumo someraka, "Aporo hinamomo Kotiane hemakapususamo Kotimo iane unihaeaka asekeea rerapo. Asekeea rera asiane oyapo. Aporomo koane hae poteraka marekea,

<sup>27</sup> apea hikia ereamo waka mituru fiarakano turikia pukua, maiya suamo ariraka rekenone makata mano potesane taneherapo. Sere soko ereamo soko taneherapo. 'Mayiáka pauaka herare?' Aíyaka aporoamo mahimeteraka,

<sup>28</sup> arirakano makata mano ipi hemakapukua hauaka aeyaka pauaka hekeia, fana ku murikia, amo tipia huhu murikia, amo keseke koane namo nakosane torapo.

<sup>29</sup> Koane namo nakosane namoraka parosekeno, aporomo tumarapo. Marirakano tumarare? Namo nakosa maiya á pausekeno tumarapo." Aíyaka Yasumo iaki somesapo.

*Ira máseta hae maposa Yasumo takumeaka somesane oyapo.*

*Matiu 13:31-32; Ruki 13:18-19*

<sup>30</sup> Yasumo someraka, "Kotimo unihaeaka asekeea reane makata yakapa asíare? Repo hemakapusimo takume somehokosane yakapa somehoasimore?

<sup>31</sup> Kotimo aporo hinamo unihaeaka asekeea rea asíane oyapo. Ira máseta hae aporomo ipi hemoa potesa asiapo. Máseta haeanie namo kakaro wakasemapo. Hae meta wakasema ayíáka anafapo.

<sup>32</sup> Máseta hae kakaro wakasema yiamo, pauaka henaka hemoa makata porosane marokeraka ira pariraka káranapo. Kárarako reakipoko ira eya á mena koraka torane pekea menamo ape kirapo. Aina ayíáka fana Kotimo aporo hinamo hukusiane unihaeaka asekeea rea nine, keseke aporo hinamo kárane unihaeaka asekeea rekeakosapo." Aíyaka Yasumo iaki somesapo.

*Aporo suaki Yasumo takumeaka somesane oyapo.*

*Matiu 13:34-35*

<sup>33</sup> Yasumo ipi someane aporo hinamomo hemakapusimo epo takume yakai some kasapo. Some kasane ipu sia kairakano, some takume metakirane soko some kasapo.

<sup>34</sup> Aporo suaki epo takumeaka hakása somesapo. Arirakano ipi aporo hakása pura naminha hákasa risike some kepoane hufitaeraka somesapo.

*Atifoyaki he kupayaki kára pesane Yasumo mafasane oyapo.*

*Matiu 8:23-27; Ruki 8:22-25*

<sup>35</sup> Maiya hakása yiamo samapu yao nene horamo, Yasumo ipi aporo hakása puraki someraka, "Isu he Kariri taku ra purakapo."

<sup>36</sup> Airakano aporo su sarimasane metakarikia, Yasu kasua kakeno i soko, kasu yia ripaka pusuapo. Kasu meta soko aporo metakiramo rokua hakása purakano asekeea

<sup>37</sup> Yasu kasu kenoa kake uni kata motokoa wareapo. Wasakipoko yao peraka atifo soko, he kupayaki kára pesapo. He kupa kára peraka, kasu tua he wakekeraka, kasu kenepesahopo.

<sup>38</sup> Kenepeakorakano asekea, aporo hakása puramo Yasu maturikia someraka, "Tisao, isu he nekea kukua keasireapo. Nómó isu hemakapurakarire?"

<sup>39</sup> Airakano Yasu turikia pukua atifoaki soko, he kupaki soko someraka, "Farasie. Auarasie." Airakano atifo soko, he kupa kára pesane soko fasapo.

<sup>40</sup> Farakano asekea Yasumo iaki someraka, "Repo marirakano namorakanare? Repo anoaki kakaro himu hakásaraka hemakapurakanafareapo."

<sup>41</sup> Airakano i fofarakana namina yia someraka, "Yasumo someane atifomo soko, he kupamo soko, kakimaraka fane. Ayiáka arakirane e aporo eparakapo," aisapo.

## 5

*Yatafumo aporo ho masa Yasumo mafasane oyapo.*

*Matiu 8:28-34; Ruki 8:26-39*

<sup>1</sup> He Kariri kekeia kaya kasu rokua hikia, Keresa hauaka á kasu karimarekea

<sup>2</sup> hikia aseane, yatafumo aporo ho masa sapenako pesapo.

<sup>3</sup> Aporoane aporo kusua taena kunikia á reke, eane aporo metakiramo tapohoane soko siasafapo. E mokowerakano waya hatisamo soko tapohoane siasafapo.

<sup>4</sup> Fana maiya káramo aporo ho masane wayamo epo hokono soko korake soko taposapo. Taposane ipi waréraka wakapuraka wayane marutusapo. Maruturakano aporomo e makao ayiane soko, ipi wakapu siasafapo.

<sup>5</sup> Ereamo soko, sere soko, e kunikia reke, üria hikia nenakamaka wirisusuraka koraka reapo. Ipi kaua ekemo rusuane yokoaemosususapo.

<sup>6</sup> Yameno anaka epo Yasuane aseraka foaka Yasu rea pekea kakuna porokoa kake Yasuaki kekeresapo.

<sup>7-8</sup> Kekererakano asekea Yasumo yatafuaki someraka, "Yatafu né ho watikisapo. Né aporoane metakarikia pusie, "aisapo. Airakano yatafumo aporo ho masane tura reke sakepamo wáraka someraka, "Yasu, ne namo kakaro unihae Kotimo hokosao, nómó ano mayiakakosare? Nómó ano fanasiraka kau teraka yaiya rerane kakakopo."

<sup>9</sup> Airakano Yasumo someraka, "Né yano motosa epare?" Airakano yatafumo someraka, "Isu mukisakipoko ano yano motosa Mukisapo.

<sup>10</sup> Hauaka one metakarikia hisiripo. Hauaka one metakarikia pusiehokopo."

<sup>11</sup> Ayíaka ipu aseane saro yakai üri kakafaea makata nenakano aseraka someraka,

<sup>12</sup> "Nómó isu pusierakane saroane tua risikiako pusies."

<sup>13</sup> Airakano Yasumo someraka, "Ao. Ayisie." Airakano yatafumo aporo ho masane metakarikia pukua saro tua risiapo. Risikirakano saro su tu taosene ane (2,000) üri kakafae aeyaka foaka sosonoraka peraka, he fesere mosakipoko aeyaka eteraka, he numua hurupeperaka saro suane he nekea kukua kesapo.

<sup>14</sup> Kukua kerakano asekea, saro asekea risia aporoane teketarikia apea hikia, apea risia aporoaki soko, ima risia aporoaki soko someraka, makata su asesane somesapo. Somerakano aporo suamo makata ásiane aseako pesapo.

<sup>15</sup> Pekea Yasu rea aseane, aporo ho yatafu mukisamo fana masane, koteaka reke pasu osoraka koteaka hemakapukua rekeno asesapo. Aseraka namosapo.

<sup>16</sup> Asesa aporoamo aporo yatafumo ho masa mafasane soko, saro kukua kesane soko, makata su asesane somesapo.

<sup>17</sup> Somerakano aporo suamo Yasuaki someraka, "Isiapo hauaka one metakarikia, ne pusie."

<sup>18</sup> Airakano Yasu kasu ripaka pukusakipoko rekeno, aporo ho masa mafasamo someraka, "Año neyaki hakása perakapo."

<sup>19</sup> Airakano Yasumo waesapo. Waeraka epo someraka, "Ní apea parihikia, ní aporo tákéki Unihaemo né araresane somehoanie. Unihaemo ne kamenakaraka hemakapukua araresane somehoanie."

<sup>20</sup> Airakano aporoane paripukua, ape sumu kaeyakosu yano motosa Tekáporisi á someraka, "Yasumo ano uyáka araresapo." Airakano aporo su fofasapo.

*Hinamo hokosa kusua Yasumo maturikia taesane oyapo. Arirakano hinamo meta soko makata takamasamo Yasumo pasua sakaihoane mafasane oyapo.*

*Matiu 9:18-26; Ruki 8:40-56*

<sup>21</sup> Yasu kasua ripaka pukua he Kariri kekeia kaya taku ra poparipukua aseane, aporo hinamo yakai sarimaraka risikino asekea Yasu he fea reapo.

<sup>22</sup> Reke aseane Yu aporomo sarimana ape asekea rea aporoane pekea, ipi yano motosa Yairasepo. Yairase pekea Yasu aseraka kakuna porokoa kake epo

<sup>23</sup> Yasuaki someraka, "Nōmo hinamo hokosa kukusireapo. Asiasamo nōmo hokonomo e sakairako peae. Sakairakano e makata tasane faraka e kukusafapo."

<sup>24</sup> Airakano Yasu eyaki hakāsa pusuapo. Tetayaki aporo hinamo yakai hakāsa kafukua pusuapo.

<sup>25</sup> Kafukua purakano, hinamo meta patera aeyaka pekea, ipi keremisi kenosumo wake apea makama yiaraka kayapo.

<sup>26</sup> Maiya káramo mitikoro aporo metakiramo rakiane soko hinamoane ipi fasafapo. Epo mone suane mitikoro aporoaki kaka, asiāne soko fahoaanafonoraka ipi makata takamasane kárasapo.

<sup>27-28</sup> Makata takamasa káraraka kake, Yasumo aporo hinamo makata tasa mafarakana-pakanō kaikia, hinamoamo ipi himumo hemakapuraka, "Yasumo pasua nōmo sakai-hoane, ano wake apea makama yiaraka kayane fahokosapo." Aiyaka hemakapukua Yasu patera aeyaka pekea ipi pasua sakaisapo.

<sup>29</sup> Sakaihoane wate foaka ipi wake apea makama yiaraka kayane fasapo. Farakarakano kaisiapo.

<sup>30</sup> Arirakano Yasu ipi meraruamo puraka reke kaiyiáne, ipi wakapu purakarakano kaisiapo. Kaikia ipi pariaseraka, aporo hinamo suaki someraka, "Epamo nōmo pasua sakairakayiare?"

<sup>31</sup> Airakano ipi aporo hakāsa puramo someraka, "Wae. Aporo hinamo yakaisakipoko nōmo mayiáka aseakosare? Ipu né kaua hisirimaka purakayapiro. Pasua sakaianane marirakano airakanare?"

<sup>32</sup> Airakano Yasumo pariaseraka ipi pasua epamo sakaisarihoamo aseako pariaserane,

<sup>33</sup> hinamoane ipi wake apea makama yiaraka kayane farakarakano, kaikia fofaraka hamisisiraka, kakuna porokoa kake makata su asiane Yasuaki somesapo.

<sup>34</sup> Somerakano Yasumo kaikia eaki someraka, "Hinamo neo, nōmo anoaki himu hakásaraka hemaka apura yiamo ne makata takamasane mafarakayapiro. Ní tau koteaka kakanie. Ní makata takamasane kakaro fasapo," aisapo.

<sup>35</sup> Aisa maiya amo aporo metakira pekea, Yu aporomo sarimana ape asekea rea aporomo ape aeyaka pekea, Yairaseaki someraka, "Nōmo hinamo hokosa namo kakaro kusuapo. Kusuasamo tisaki efera hunia somehokopo. Metakarisie."

<sup>36</sup> Airakano someane Yasumo kaikia kakipayaraka, Yu aporomo sarimana ape asekea rea aporoaki someraka, "Himu fahokopo. Anoaki himu hakásaraka hemakapunie," aisapo.

<sup>37</sup> Aiyaka Yasumo Pita soko, Yameise soko, ipi mamanea Yone soko, karikia pukua aporo suaki peakopo, aisapo.

<sup>38</sup> Aiyaka i pukua, Yu aporomo sarimana ape asekea rea aporomo apea pauraka aseane, aporo hinamo yakai sarimaraka, hokosa kusuapoko kára yaiya hihiripuraka tokeno asesapo.

<sup>39</sup> Asekea Yasu apea yorokoa aporo hinamo suaki someraka, "Marirakano hihiripurakanare? Hokosane wáyereapo. Kusuafapo." Aiyaka hokosa ane maturikia taehokosane epo somesapo.

<sup>40</sup> Aiyaka somerakano aporo hinamo suamo Yasuaki hokomarekea keasapo. Kearakano asekea Yasumo i suaki someraka, "Re su yao hauaka moro atura pusie," aisapo. Purakano asekea hokosa amo kaiyia soko, wafaya soko, Yasumo karikia pukua, aporo isia eyaki hakāsa pesane soko karikia hokosa warea apea yorokoa,

<sup>41</sup> hokosa hokonoa Yasumo maka ipi meaka someraka, "Tarita kumi," aiyaka somesapo. Arirakano namo meaka, "Masira, né turikia pusie," aisapo.

<sup>42</sup> Aíhoane hinamo hokosa ane turikia pusuapo. Turikia pukua koraka reapo. Arirakano masira turikia pusua ane keremisi kenosu fasapo. Masira ane koraka rekeno aseraka i su fofasapo.

<sup>43</sup> Fofarakano Yasumo iaki someraka, "Aporo hinamo metakiraki somehokopo. Hokosane makata nakosa kakanie," aisapo.

## 6

*Nasare apea Yasumo some karakano aporomo kakipayasane oyapo.*

*Matiu 13:53-58; Ruki 4:16-30*

<sup>1</sup>Yairasemo apeane metakarikia Yasu ipi apea paripusuapo. Paripukua ipi aporo hakāsa purane soko, namina eyaki hakāsa poparipusuapo.

<sup>2</sup> Poparipuraka risike, fenena maiya amo Yu aporomo sarimana apea pukua, Yasumo some karakano, aporo hinamo metakiramo kaikia fofasapo. Fofaraka ipu someraka,

"Epo makata suane ma kaisiare? Kotimo hemakapusua some kotesa somerakano ma kaisiarakapo. Epo Kotimo wakapumo hemakapukua arakirane epo hokonomo rakisiane ma enomasarakapo.

<sup>3</sup> Eane kabeneta aporopo. Eane Mariamo maeyapo. Epo ipi mamanea ane Yamese soko, Yosefe soko, Yutase soko, Saemone soko, suane isiapo aserapo. Epo ipi ifiane isina hakāsa tokenapo." Aiyaka ipu Yasuaki himu hakásaraka hemakapunafonoraka hisiraka risiapo.

<sup>4</sup> Hisiraka risikino Yasumo iaki someraka, "Kotimo some kará porofete aporomo ipi ape sumu aporo hakāsa risia amo soko, ipi aporo iramo soko, ipi amámo kepomo soko, ipi ape wará aporo hakāsa risiromo soko, eane makama fanaraka hemakapurafapo. Hemakapunafonorakano yia, ape sumu meta á aporo hinamo metakiramo Kotimo some kara porofete aporoane makama fanaraka hemakapurapo," aiyaka Yasumo somesapo.

<sup>5</sup> Yasumo makata wakasema rakiraka, aporo hukusi makata tasa hokonomo sakaihoane fasa nine, Kotimo wakapumo hemakapukua rakirane ipi kára rakisiafapo. Aporo hinamomo Yasuaki himu hakásaraka hemakapunafonorakano, kára rakisiafapo.

<sup>6</sup> Eaki himu hakásaraka hemakapunafonosane Yasumo ipi himu nekea kára hemakapusuapo.

*Aporo keno sumo makata rakiako pusiesane oyapo.*

*Matiu 10:5-15; Ruki 9:1-6*

Ape sumu fete sua Yasu pukua some kasapo.

<sup>7</sup> Some karaka Yasumo ipi aporo kenosu murikimasane peaesapo. Perakano asekeea aporo tetá tetákha hauaka meta pukua, arirakano yaiya aporo tetá meta hauaka meta pukua, ayiakasimo murikimasapo. Murikimaka ipu yatafumo aporo ho masane metakarikia pusiehoasimo iaki wakapu kasapo.

<sup>8</sup> Kaka someraka, "Kimisi puraka makata kára mokoakopo. Tatia maka puane siahoasireapo. Arirakano makata nakosa soko, ku soko, mone hae soko, makata ane mokoa pukupo.\*

<sup>9</sup> Tamaka osohoane siahoasireapo. Arirakano pasu tetá osohokopo.

<sup>10</sup> Re puraka ape sumu á pauraka, apea yorokoa ape hakāsa yia waka risikianie. Ape wafaya mahisihokohoamo ape meta wakako mokome pukupo. Ape sumu meta pukusakipoko, ape ne wasa aeyaka punie.

<sup>11</sup> Ape meta á aporomo reaki terehoanafonoraka, repo someane kaiyako hisirakan asekeea apeane metakarikia punie. Korakea kokotonomosane rerakatapikia marekea metakarikia punie. Kokotonomosane iyaki hakāsa yaiya rekeasimo aína ayiáka, ipu watikisane iyaki yaiya rekenapo. Aiyaka repo tarinie." Aiyaka Yasumo aporo kenosuaki somesapo.

<sup>12</sup> Arirakano aporo kenosu pukua some karaka, "Aporo hinamo repo makata watikiaka rakisiane metakarikia Yasuaki risikiako parihoanie," aiyaka some kasapo.

<sup>13</sup> Yatafuaki soko ipu pusierakano pusuapo. Wera maka aporo makata tasa kaua sisihohane fasapo.

*Yasumo wakapuaka rakisiane Herotemo kaikia himeteraka reane oyapo.*

*Matiu 14:1-2; Ruki 9:7-9*

<sup>14</sup> Yasumo wakapumo hemakapukua rakiraporakano Yasu yano motosa Herotemo kairaka aporo metakiramo someraka, "Yasu ipi Yone he tapukumarera ayareapo. Yone he tapukumarerane maturikia taerakano e pukua wakapuaka rakirakanapo."

<sup>15</sup> Airakano aporo metakiramo someraka, "Yasuane Iraiya fana reane paripeareapo." Airakano aporo metakiramo someraka, "Yasuane porofete aporo meta reapo. Wate fana Kotimo some kará porofete aporo rea ayiáka e are."

<sup>16</sup> Airakano Herotemo kaikia someraka, "Yone nōmo mawi pateketaerasiesane Kotimo maturikia taesapo," aisapo.

*Yone he tapukumarerane Herotemo rusua kusuane oyapo.*

*Matiu 14:3-12; Ruki 3:19-20*

<sup>17</sup> Kariri hauaka asekeea rea aporoane Herotepo. Herotemo ipi mamanea yano motosa Firipipo. Firipimo ipi asea yano motosa Herótiasepo. Herótiasane, Herotemo haki arumaka rekeno asekeea

<sup>18</sup> Yonemo Heroteaki hukurukua someraka, "Ní maemo hinamoane nōmo haki arumaka areane, somemane motosane nōmo mamosoane."

<sup>19</sup> Aisasamo hinamo Herótiasemo kaikia Yoneaki hisiraka kake, e kukusimo ruko seseaka hemakapusuapo. Hemakapusua nine e rusua kusuafapo.

\* **6:8:** Aporo mēromo iane ararehoasimo makata kemo mokoa pukupo, aisapo.

<sup>20</sup> Arirakano Herotemo Yoneaki namoraka reke, Yone waseremaka hokonoa taporaka tipura makeaniesapo. Tipura makesa rekeno asekea, Herotemo hemakapuraka, "Yone ipi ereketaeraka reke ipi Kotiaki hemakapukua are." Aíyaka Herote namoraka reke, Yone rusuafapo. Arirakano aporo metakiramo soko Yone rukusaporakano, Herotemo waesapo. Maiya metakiramo, Yonemo someane Herotemo kaikia seséaka kaisia nine himetesapo.

<sup>21</sup> Herote ipi takapesa serea paurakan hokono keraka, Herotemo ipi kamani aporo soko, ame aporo satini soko, Kariri hauaka aporo kára soko, i suaki hokonó keako peaesapo.

<sup>22</sup> Perakan asekea Herótiasemo ipi faraya Herotemo apea taneseraka kesasapo. Taneseraka kesarakano asekea Herotemo seséraka, aporo su pesamo soko sesésapo.

<sup>23</sup> Asiamo hinamo hokosa sakoraki Herotemo someraka, "Nómo makata makasierakanó nōmo neaki makakosapo. Nōmo makata asekea rea sapeane neaki makakosapo. Nōmo kakaro somehoanafonorakano soko, Kotimo aserakanapo," aíyaka aumaraka somesapo.

<sup>24</sup> Somerakanó Herótiasemo faraya pukua, ipi kaíyiaki someraka, "Nōmo yakapa makasiehokosare?" Airakano Herótiasemo someraka, "Yone he tapukumareramo wamoane makasiehoanie. E kakaro rusua kusuane aseako ipi wamoane makasiehoanie."

<sup>25</sup> Airakano Herótiasemo farayane wate foaka pukua, unihae Heroteaki someraka, "Yone he tapukumareramo wamoane patekemaka, tísia motokoa anoaki makasie."

<sup>26</sup> Airakano unihae Herotemo kaikia mahisiraka reapo. Mahisiraka reke makakosapo, aíyaka aumaraka somesane, aporomo hokono akera maiya ámo suamo kaisiasamo, patekemakanies metakariane kaiyanapaka ipi somesane kekemasapo.

<sup>27</sup> Kekemaraka wate foaka aporo terakaiyamosamo Yone wamo pateketaehoasimo tipura apea pusiesapo.

<sup>28</sup> Airakano tipura apea pukua, Yone wamo patekemaka tísia motokoa maka pekea hinamo sakoraki kasapo. Karakano maka ipi kalyia Herótiasaki kakako maka pusuapo.

<sup>29</sup> Arirakano Yonemo ipi aporo hakása pura peraka Yone oto susuane maka pukua kunikia motosapo.

*Aporo yakai fae taoseneaki (5,000) Yasumo farawa kasane oyapo.*

*Matiu 14:13-21; Ruki 9:10-17; Yone 6:1-14*

<sup>30</sup> Yasumo ipi tarira aporo murikimasane e rea paripekea ipu makata rakisiane soko, ipu some kasane soko, makata suane Yasuaki somesapo.

<sup>31</sup> Someraka risike aporo hinamo yakai perakano purakano, perakano purakano, ari-raka risike tarira aporomo makata nena maiyane fasapo. Asiamo Yasumo tarira aporoaki someraka, "Re hákasa anoyaki nena yaoa peae. Maiya wakasemamo fenako peae."

<sup>32</sup> Airakano i hákasa pukua nena yao taku ra pukusakipoko kasua ripaka roko a pusuapo.

<sup>33</sup> Purakano aporo hinamo yakaimo asekea hemakapuraka, "I taku ra apure," aíyaka hemakapukua, i korakemo taku ra fofoka a pusuapo. Puraka ape sumu fete su aeyaka aye aye. Pukua Yasu soko, ipi aporo hakása purane soko, i peasiraka, aporo hinamo yakai he fe ikia kara anakia aye aye, fana pauraka sarimasapo.

<sup>34</sup> Sarimasakipoko i kasua ripaka pesane, ima foraka aseane aporo hinamo yakai risikino asekea iane Yasumo kára kamenakasapo. Saro sipimo namina wafaya fasekeno mahimeteraka arisia aiyáka, i mahimeteraka risikinapo, aíyaka Yasumo hemakapuraka, ipu koteaka hemakapusimo Yasumo iaki some meta some kaka, some meta soko some kaka, aiyáka makata kára iaki some kasapo.

<sup>35</sup> Arirakano yao nenehoramo Yasumo ipi aporo hakása pura pekea Yasuaki someraka, "Hauaka wo ima yaosakipoko aporo hinamo risikinafapo."

<sup>36</sup> Maiya tukerapaka aporo hinamo sarimasamo ipu namina makata nakosa ropohoko apea poparipusiesie. Ima ape manoa soko ape sumu wakasema soko á makata nakosa ropohoko poparipusiesie."

<sup>37</sup> Airakano Yasumo someraka, "Repo namina makata nakosa iaki kasie." Airakano ipu someraka, "Aporo hinamo suamo makata nakosane isu pukua, tu harote kinamo (K200)<sup>†</sup> farawa roporaka iaki kakakosare? Asiamo isiapo tu harote kina ane (K200) fasasamo, maiyáka mokoakosare?" aíyaka ipu Yasuaki somesapo.

<sup>38</sup> Aíyaka somerakanó Yasumo iaki someraka, "Farawa yakapasu tokenare? Aseako pusie." Airakano ipu kope pukua, paripekea Yasuaki someraka, "Makata nakosane farawa kakoreasu, pokoa tetá aiyáka tokesapo."

<sup>39</sup> Airakano Yasumo someraka, "Aporo hinamo parakuraka su metakira taku rā asane kotesakipoko á toaesie. Arirakano i metakira sarimaraka taku rō asane kotesakipoko á toaesie."

<sup>†</sup> **6:37:** Ipu namina meaka mone hae tanariase tu harote ane somesapo. Asiane isiapo hemakapusakipoko tu harote kina popasapo. Arirakano ipu moneane siufa mone hae asiane yano motosa tanariasepo. Mone hae tanariase tu haroteane mokoako, sere tu haroteamo aporomo rakirapo.

<sup>40</sup> Airakano i parakuraka toke, aporo hinamo metakira fifiti (50) sarimaraka taku ra toke, aporo hinamo metakira wane harote (100) sarimaraka taku ro toke ayíáka i su asanea toapo.

<sup>41</sup> Tokeno asekea Yasumo farawa kakoreasu, pokoa tetá mokoa reke, hepene yapura asekea súseraka kurikurisapo. Kurikuriraka faraka farawa mosoraka, aporo hakása puraki kaka, aporo hinamo suane kakasimo Yasumo iaki kasapo. Pokoa tetáne soko, aporo hinamo suaki kakasimo Yasumo kasapo.

<sup>42</sup> Karakan i aporo hinamo hokosa suamo siaraka mokoa nesapo.

<sup>43</sup> Nekea faraka farawa soko, pokoa soko, momo yia tokeno, aporo hakása puramo mate kenosua kekeea komarusuapo.

<sup>44</sup> Arirakano aporo makata nesa suane menoraka fae taosenepo (5,000). Hinamo soko, hokosa soko, iane menosafapo. I menohoaafonosamo soko makatane sia nesapo.

*Yasu he kima finirape pusuaney oyapo.*

*Matiu 14:22-33; Yone 6:16-21*

<sup>45</sup> Aporo hinamo suamo makata nekea farakano Yasumo ipi aporo hakása puraki someraka, "Re fana kasua ripaka he fe taku ra hisie. Hikia Pesaita taonea hinie. Arirakano aporo hinamo sarimasane i namina apea poparipusie, aihoko ano fore o rekenapo." Airakano i kasua ripaka hisiapo.

<sup>46</sup> Hisiakipoko aporo hinamo su sarimasane soko namina apea poparipusuapo. Popari-pusuakipoko Yasu ipi haku üria kurikurihoko hisiapo.

<sup>47</sup> Hikia ereamo Yasu ipi haku üria reke kurikuriraka reapo. Reke aseane aporo hakása pura kasua ripaka rokao purakano asesapo.

<sup>48</sup> Aseane he kupa atifoyaki kára peraka, kasu maka paripurakanoraka kasu roane punafonorakano asesapo. Yao fia makehoromo kasu tapukurea á Yasu he kima finirape pesapo. Finirape pekea, kasu marokeraka pukusapoko asiáne,

<sup>49-50</sup> e he kima finirape perakano, i kasua toamo aseinka hemakapuraka yakasa horihoamo hemakapukua kokoaeraka wásapo. Wárakan Yasumo iaki foaka someraka, "Anopo. Re namohokopo. Namoraka himu fahokopo. Paroaka risikianie."

<sup>51</sup> Áiyaka kasu i toa á Yasu parohoane atifo fasapo. Farakano asekea aporo kasua toane kára fofasapo.

<sup>52</sup> Fana farawa kakoreasu Yasumo mosoraka karakano, aporo hinamo hokosa yakaimo katu siaraka nesane mahimetesapo. Ipu himo asesa nine himumo kepoane hemakapusufapo. Kakaro mahimetesapo.

*Kenesare hauaka aporo makata tasa Yasumo mafasane oyapo.*

*Matiu 14:34-36*

<sup>53</sup> He Kariri kekeea kaya kasu rokao teraporaka Yasu soko, Yasumo ipi aporo hakása pura soko, Kenesare hauaka hisiapo. Hikia kasu matapea pauraka kasu kita hukumaresapo.

<sup>54</sup> Hukumarekea ima fokoa pukua, wate foaka aporo hinamo ipu hemakapuraka, "Ane Yasureapo."

<sup>55</sup> Áiyaka hemakapukua apea fofaoka pukua, aporo hinamo makata tasa gefeneakua makekeea, Yasu á rekenapakano kaikia, e area mokoa pesapo.

<sup>56</sup> Yasu koraka rea ape sumu wakasema á soko, ape sumu kára á soko, ima yaoa ape manoa soko, perakano asekea hauaka rusua kakamasakipoko aporo hinamo makata tasane á taesapo. Taeraka ipu Yasuaki someraka, "Nómo pasu ke huhua isiapo sakaihoane siahoasisekeno ane nómo aosie." Airakano Yasumo aosapo. Aorakano pasu huhu á ipu sakaihoane aporo hinamo makata tasane foakaya fasapo.

## 7

*Makasa kaua kekemamo someamo Kotimo someane matekeamenane oyapo.*

*Matiu 15:1-9; Ruki 11:37-41*

<sup>1</sup> Ferese aporo soko, Kotimo somemane tisa aporo soko Yarusarame siti aeyaka pekea Yasu rea sarimasapo.

<sup>2</sup> Sarimaraka aseane, Yasumo ipi aporo hakása pura metakiramo hokono kusuhoanafonraka makata nenakano asekea hemakapuraka, "Aporoamo hasaka arakire. Ayíáka arakiramo ipu himuane mokoatikiane. Ipu Yu aporo sisimamo somemane ane mamosoane." aiyaka Ferese aporomo hemakapusuapo.

<sup>3</sup> Arirakano Yu aporo sisimamo soko, Ferese aporomo soko ainane hokono kari aeyaka rotoraka kusuhoanafonraka, makata maka nenafapo. Yu aporo sisima makasa kauamo aiyakanie, aisane kekemarakaa, hokono kusuraka makata nenapo.

<sup>4</sup> Makata ropona ape aeyaka pekea, fana i kau kusuraka faraka makata nenapo. Makata nakosakipoko hokono kusuna ayíáka, kapo soko orotipi soko meraki soko kusunapo.

<sup>5</sup> Asiamo Ferese aporope Kotimo somemane tisa aporo ipu Yasuaki someraka, "Mariarakano nōmo aporo hakāsa puramo isiapo makasa kauamo ayiakanie, aiyaka somepe pesane koaretaeraka risikinare? Koaretaeraka ipu makata nakosakipoko hokono kusurakarifapo. Hokono kusuhoanafonoraka makata maka anene."

<sup>6</sup> Airakano Yasumo iaki someraka, "Re himu tetáraka arisiane porofete aporo Aesayamo kakaro somehoareapo. Somesane Kotimo sawia popasane oyapo.

Kotimo someraka, 'Aporoamo anoaki akaimo kekereraka himumo anoaki hemakapurakanafapo.

<sup>7</sup> Himumo anoaki hemakapunafonoraka nena akai susuamo anoaki kekerenapo. Ipu namina hemakapusuane some karakanapo. Some karaka yia, nōmo somemane ane metakarikia ipu namina aporomanomo somemane ane some karakanapo.' Aiyaka Kotimo somerakano Aesayamo popahoareapo. (Aisaia 29:13)

<sup>8</sup> Asiamo repo Kotimo somemaneane koaretaeraka makasa kaua kekemamo ayiakanie aiyaka somepe pesane kakimarakanapo," aiyaka Yasumo iaki somesapo.

<sup>9</sup> Efera hunia Yasumo iaki someraka, "Repo makasa kauamo ayiakanie aiyaka somepe pesane makama fanaraka, repo Kotimo somemane koaretaenane oyapo.

<sup>10</sup> Kotimo ipi somemane Moseseaki someaka mareraka, 'Ní atape ní ama tetāne koteaka hemakapukua makotehoanie,' aihoareapo. Some meta soko someraka, 'Aporo hinamo metamo ipi atane soko metao, ipi amane soko metao, yakasa ho mareraka ekenerakano, e kakaro kukusimo runie,' aiyaka Kotimo someaka maresane Mosesemo aporo suaki somehoareapo. (Kisim Bek 21:12; Lo 5:16; Kisim Bek 21:17)

<sup>11</sup> Somesa nine repo someraka, 'Aporomo soko, hinamomo soko, ipu namina ataki soko metao, ipu namina amaki soko metao someraka, "Tetoaki makata yaku kakakosapoko asiāne metakarikia, Kotiaki karakanapo." Aiyaka re Ferese aporomo aporo hinamomo some karakanapo.'

<sup>12</sup> Some karakano aporo hinamomo ipi ata ama tetā ararehokosapoko asiane, metakarakanapo. Asiamo ama ata ararenane repo matasorakanapo.

<sup>13</sup> Makata matasona yakai metakira soko repo rakirakanapo. Asiamo repo namina makasa kaua kekemamo ayiakanie aiyaka somepe pesane mafanahokosakipoko, Kotimo somemaneane repo mokosekeraka arisie. Makasa kaua kekemamo someane repo kaki-maka ayiakanie airakae," aiyaka Yasumo iaki somesapo.

#### *Aporo hinamo himu mokoatikinamo kepoane oyapo.*

*Matiu 15:10-20*

<sup>14</sup> Aporo hinamo su sarimahoasimo Yasumo peaeaka perakano, iaki someraka, "Repo suamo kaisie. Kaikia hemakapunie.

<sup>15</sup> Makata yao aeyaka pekeaa aporo hinamo tua apuramo ipi yia mawatikinapopo. Tu aeyaka yaoa tono apuramo ipi yia mawatikinapo.

<sup>16</sup> [Repo senakimo kairaka koteaka kakimakanie.]

<sup>17</sup> Aiyaka Yasumo someaka faraka, aporo hinamo sarimasane metakarikia, apea yorokoa purakano, Yasumo ipi aporo hakāsa puramo someraka, "Aporomano tua mawatikina takume kepoane yakapare?"

<sup>18</sup> Airakano Yasumo someraka, "Repo soko kepoane yaiya hemakapurakarifare? Makata yao aeyaka pekeaa aporo hinamo tua apuramo ipi himu yia mawatikinapopo.

<sup>19</sup> Makata yao aeyaka himua purafapo. Katukunua pukua, katukunu aeyaka fako otoa pukua katisokopo apea purapo. Asiamo makata nena suamo re himuane mawatikinapopo," aiyaka Yasumo ipi somesapo.

<sup>20</sup> Yasumo efera hunia someraka, "Aporomanomo himu aeyaka tonoaheramo ipi yia mawatikinapo.

<sup>21</sup> Himu aeyaka aporo hinamo ipu himumo makata watikisa hemakapurane oyapo. Watikiaka rakiako hemakapurane soko, makata kaýasa rakiako hemakapukua aporo hokosa takéyaki puko hemakapurane soko, makata kemo hakimako hemakapurane soko, aporomano rusua kukuko hemakapurane soko, hinamo hakimako hemakapurane soko, aporo rea puko hemakapurane soko,

<sup>22</sup> aporo meta menane makaripi aiyaka hemakapurane soko, watikiaka rakiako hemakapurane soko, kotafe somehoko hemakapurane soko, hinamo rea puko hemakapurane soko, e area ayiáka ano ayiáka rekearipi aiyaka hemakapurane soko, kotafe topakamaraka somehoko hemakapurane soko, e ipi makama fanaraka rekeari hemakapurane soko, mokome rakiako hemakapurane soko, makata suane himua risirapo.

<sup>23</sup> Himua risia makatane tū aeyaka tonoaheramo, aporomano ipi yia mawatikinapo." Aiyaka Yasumo ipi somesapo.

*Yu aporo hoanafonosa hinamomo Yasuaki himu hakásaraka hemakapusuane oyapo.*  
*Matiu 15:21-28*

<sup>24</sup> Apeane Yasumo metakarikia puraka, Yu aporo hoanafonoso hauaka á pukua, Taia taone á soko, Saetone taone á soko makeraka pusuapo. Pukua aporomo e aserapaka e apea yorokoa ape kakarua pusuapo. Pusua nine e aporomo asesapo.

<sup>25-26</sup> Yasu perakasaporakano wate foaka Yu aporo hoanafonosa hinamomo kaisiapo. Hinamoamo hauakane Siria hauaka ayapo. Siria hauaka parakurakano sape á ipi takapesa hauaka yano motosane Finisia hauakapo. Hinamoamo ipi hokosa wakasema nine, yatafumo ho marakano asekeia hinamoane pekea Yasu korake á kakuna porokoa kake someraka, "Nómo hinamo hokosa yatafumo ho masapo. Yatafuaki nómo pusiehoanie."

<sup>27</sup> Airakano Yasumo hinamoaki takumeaka someraka, "Fana hokosamo" \* nasimo kayane siahoasireapo. Makata nakosa hokosapoko taesane kásaki kayane siahoasifareapo. Fana hokosamo nasimo karakanapo."

<sup>28</sup> Airakano hinamoane ipi Yu hinamohoanafonosa nine, Kotimo e ararehoasimo himu hakásaraka hemakapusuasamo, Yasuaki someraka, "Unihaeo, kakarorakae. Asiáne hokosamo makata nenaka momo hurupeperakano, kásá teporo petaua risiamo nenapo."

<sup>29</sup> Airakano Yasumo someraka, "Nómo makata somerakasakipoko né ní apea seseaka pusie. Nómo ní hinamo hokosa yatafumo ho masane yatafu metakarikia pusuapo."

<sup>30</sup> Airakano hinamoane ipi apea paripukua aseane, ipi hinamo hokosa yatafumo ho masane, yatafu metakarikia puraka, hinamo hokosane ipi koteaka apea warekeno asesapo.

*Aporo senaki tisa soko, aru tapaya mesa soko, Yasumo mafasane oyapo.*

<sup>31</sup> Taia taone hauakane metakarikia pukua Saetone taone ane soko marokeraka pukua, he Kariria pukusakipoko taone kaeyako su yano motosa Tekáporisia pukua

<sup>32</sup> aseane, aporo senaki tisa aru tapaya mesa aporo metamo karikia, Yasu rea peraka Yasuaki someraka, "Nómo hokonomo aporoane sakairasie."

<sup>33</sup> Airakano aporo senaki tisane Yasumo karikia aporo hinamo yakai sarimasane metakarikia, tetá hákasa wakasema pukua, tati haku risike, Yasumo ipi hokonomo aporo senaki tisa taku tetákara paremarekea faraka, Yasu ipi hokonoa torofaeraka aporo aru tapaya mesane arrua sakaisapo.

<sup>34</sup> Sakairaka reke ipi hepene yapura asekeia aporoane kamenakaraka, kaiyáraka someraka, aporo senaki tisaki someraka, "Né senaki tisane ropakapusie," aisapo. Aíyaka Yasumo ipi meaka someraka, "Efata."

<sup>35</sup> Aihohane aporo senaki tisane faraka koteaka kairaka, aru tapaya mesane soko faraka ipi koteaka somerakano, asekeia

<sup>36</sup> Yasumo ipi aporo suaki someraka, "Anoane aporo metakiraki somehokopo," aisapo. Airakano ipu kakipayaraka ipu makata asesane kára somesapo. Efera hunia Yasumo iaki somehokopo aisane, ipu kakipayaraka kára somerakano

<sup>37</sup> kairaka, aporo hinamo metakiramo Yasuaki kára sesésapo. Seséraka someraka, "Epo makata su koteaka rakirareapo. Aporo senaki tisamo koteaka kaiyisimo epo mafahoareapo. Aporo aru tapaya mesamo soko koteaka somehoasimo epo mafahoareapo," aisapo.

## 8

*Aporo yakai fo taoseneaki (4,000) Yasumo makata nakosa kasane oyapo.*  
*Matiu 15:32-39*

<sup>1</sup> Efera hunia aporo hinamo su Yasu rea pekea sarimaraka, makata nakosa fasokino, Yasumo ipi aporo hakásá puraka someraka,

<sup>2</sup> "Sere isiammo aporo hinamo yakai anoyaki hakásá sarimaraka risike, makata nenane fasapo. Fasasamo nómo iane kára kamenakaripo.

<sup>3</sup> Iane himu raru puraka ikia kara meamoraka yofehokosapo. I metakira yameno aeyaka pesapo."

<sup>4</sup> Airakano aporo hakásá puramo someraka, "Isu arisia one ima yaosasamo aporo sari-masaki farawa siaraka nasimo kayane siahoasifareapo. Kakakosane ma mokoakosare?"

<sup>5</sup> Airakano Yasumo someraka, "Repo farawa yakapasu tokenare?" Airakano ipu someraka, "Farawa yatipinusu tokenapo."

<sup>6</sup> Airakano Yasumo aporo suaki someraka, "Re hauaka á toae." Aíyaka i tokeno asekeia, Yasumo farawa yatipinusu mokoa reke Kotiaki suseaka kurikuriraka, faraka farawa

\* <sup>7:27:</sup> Takume kepoane oyapo. Hokosane Yu aporopo. Kásane Yu aporo hoanafonosa ayapo.

mosoraka, aporo hinamo suaki kakasimo ipi aporo hakāsa puraki karaka someraka, "Farawa one aporo hinamo su sarimasaki takupe pusie," aisapo.

<sup>7</sup> Aiyaka keseke pokoa fete hukusi tokeno asekea, Yasumo Kotiaki suseaka kurikurisapo. Kurikuriraka faraka, aporo hakāsa puraki someraka, "Aporo hinamo suaki takusie," airakano takupe pusuapo.

<sup>8</sup> Takukua aseane aporo hinamo ipu suamo siaraka nenakano asekea, farawa momoane aporo hakāsa puramo mokoa maté yatipinusua kesapo.

<sup>9</sup> Arirakano aporo farawa nesa su sarimaraka menosane fo taosenepo (4,000). Arirakano hinamo soko, hokosa fete soko, menosafapo. I menohoanafonosamo soko, makata sia nesapo.

<sup>10</sup> Aporo hinamo su sarimaraka farawa nesane Yasumo pusiesapo. I purakano Yasu kasua ripaka aporo hakāsa pura soko kasua ripaka, kasu rokoa Taomanuta hauaka á pusuapo.

*Yasumo rakirane kau aseakosakipoko Ferese aporope Satusi aporo ipu somesane oyapo.*

*Matiu 16:1-4; Ruki 12:54-56*

<sup>11</sup> Ferese aporo pekea Yasuaki tafatafaraka someraka, "Kotimo murikimasane nesekenone, nōmo makata rakirane isiapo aseako nōmo rakikitakae. Kotimo hepene ya-pura makata ainane isiapo aseako nōmo rakikitakae." aiyaka someraka Yasuane ipi kau aseakosakipoko epo rakisimo somesapo.

<sup>12</sup> Somerakano, Yasu ipi himu mahisiraka someraka, "Aporo hinamo maiya omo arisi-amo ipu ano kau aseakosakipoko someraka, 'Kotimo murikimasane nesekenone, nōmo rakirane isiapo aseako nōmo rakikitakae,' airakane mainakano airakare? Nōmo kakaro somerakaripo. Maiya omo aporo hinamo arisia omo asekeasimo Kotimo wakapumo hemakapukua rakirane nōmo rakiakosafapo."

<sup>13</sup> Aiyaka marekea, Yasumo iane metakarikia kasua ripaka, he yaoraka taku ra pusuapo.

*"Ferese aporoane makata pirira asiapo. Ipu himu tetaraka hemakapusuane repo mokoakopo," aiyaka Yasumo somesane oyapo.*

*Matiu 16:5-12*

<sup>14</sup> Aporo hakāsa purane Yasuyaki kasu rokoa pukua ipu farawa mokoa peakosane meraruraka pesapo. Pekea kasua risike aseane farawa hakāsa kasua kakeno asesapo.

<sup>15</sup> Arirakano Yasumo iaki takumeaka someraka, "Ferese aporomo soko, Herotemo soko, ipu watikiaka hemakapurane farawa pirira asiapo. Asia ane repo morapaka asekeanie. Ipu watikiaka hemakapurane kárahoarea ayiáka, reane ayiakakohoamo asekeanie."

<sup>16</sup> Aiyaka Yasumo somerakano, some kepoane ipu himeteraka namina susu me rukua someraka, "Isiapo farawa mokoa peanafonosasamo airakae."

<sup>17</sup> Airakano ipu hemakapusuane Yasumo aseraka someraka, "Marirakano repo namina susu me rukua someraka, farawa fareaporakanare? Nōmo some kepoane repo yaiya mahimeteraka risikiakosare? Repo himumo koteaka hemakapurakarifare?"

<sup>18</sup> Repo himo aseraka yia, koteaka aserakarifapo. Senakimo kairaka yia, koteaka kairakarifapo. Nōmo makata rakisiane repo meraruraka arisie.

<sup>19</sup> Aporo yakai fae taosene (5,000) sarimasa amo, farawa kakoreasuane nōmo mosoraka kaka faraka, farawa momo yia tokeno maté yakapasua repo kesare?" Airakano ipu someraka, "Maté kenosua kesapo."

<sup>20</sup> Airakano Yasumo someraka, "Aporo yakai fo taosene (4,000) sarimasaki nōmo farawa yatipinusu kaka faraka, farawa momo yia tokeno maté yakapasua repo kesare?" Airakano ipu someraka, "Maté yatipinusua kesapo."

<sup>21</sup> Airakano Yasumo someraka, "Ane repo yaiya himeterire? Farawa fasokino himu fahokopo, kára hemakapukopo," aisapo.

*Pesaita taonea aporo hi fausa Yasumo mafasane oyapo.*

<sup>22</sup> Yasu ipi aporo hakāsa purayaki Pesaita taonea pekea aseane, aporo metakiramo aporo hi fausa karikia pekea Yasuaki someraka, "Eane sakairasie."

<sup>23</sup> Airakano asekea Yasumo aporo hi fausane hokono maka taone metakarikia pukua ruru tapikia yao takua karikia pukua, Yasumo aporo hi fausa hia torofaeraka eane sakairaka someraka, "Nōmo himo yakapa aserakarire?"

<sup>24</sup> Airakano aporo hi fausamo someraka, "Nōmo aseane aporomanoane ira asera ayiáka aseraka sikiripo. Ira asera ayiáka aporomanoane ayiáka apure."

<sup>25</sup> Airakano efera hunia aporo hi fausane Yasumo sakaihoane, hi fakarikia makata su koteaka asesapo. Hi fausane kakaro mafarakano, koteaka aseke waperaka asesapo.

<sup>26</sup> Koteaka aserakano, Yasumo eaki someraka, "Ní apea pusie. Pesaita taone yia paripukupo," aiyaka Yasumo somesapo.

*"Yasu, né Keresopo." Aiyaka Pitamo somesane oyapo.*

*Matiu 16:13-20; Ruki 9:18-21*

<sup>27</sup> Yasu soko, ipi aporo hakāsa pura soko, i pukua, Sisaría Firipai taone makeraka pusuapo. Á pusua maiya amo, Yasumo ipi aporo hakāsa puraki someraka, "Aporo hinamo suamo anoane epapakasure?"

<sup>28</sup> Airakano ipu someraka, "Aporo metakiramo someraka, 'Né Yone he tapukumarerane turikia pureapo.' Aiyaka somerakasupo. Arirakano aporo metakiramo someraka, 'Né porofete aporo Iraiyareapo.' Aiyaka somerakasupo. Arirakano aporo metakiramo someraka, 'Né porofete aporo metareapo.' airakasupo."

<sup>29</sup> Airakano Yasumo someraka, "Repo namina hemakapusuane, ano epapaka hemakapurakanare?" Airakano Pitamo someraka, "Kotimo Unihaeaka rekeasimo murikimasa aporo Keresoane nereapo."

<sup>30</sup> Airakano Yasumo someraka, "Ano Keresoane aporo suaki somehokopo." aisapo.

*Yape menomo Yasumo someraka, "Aporomo ano kukusimo rukusapo." aiyaka somesane oyapo.*

*Matiu 16:21-28; Ruki 9:22-27*

<sup>31</sup> Aporo hakāsa puramo hemakapusimo Yasumo iaki tariraka some kasane oyapo. Yasu ipi Aporomanomo Tákehokosakipoko hauaka wo pesapo. Asiāne ipi kára himu nasimo aporomo é mokoatikihokosapo. Yu aporo sisimamo soko, pirisiti aporo káramo soko, Kotimo somemane tisa aporomo soko eane hisiraka patera tariakosapo. Patera tarikia eane kukusimo rukusapo. Sere isia farakano maturikia taehokosapo. Aiyaka ayiakakosane, Yasumo ipi aporo hakāsa puraki some kasapo.

<sup>32</sup> Some kasane kakaro hufitaeraka somesapo. Hufitaeraka somerakano, Pitamo Yasuane karikia, wakasema pukua someraka, "Neane rusua kukusapo, aiyaka somehokopo."

<sup>33</sup> Airakano Yasu rekeako pariraka, ipi aporo hakāsa purane asekea Pitaki someraka, "Satanemo somera aiyaka nómo somehokopo. Kotimo hemakapurane kekemaraka hemakapunafonoraka, aporomanomo hemakapurane nómo kekemaraka hemaka apure. Sataneo, né ano patera sapea pusie." aiyaka Yasumo somesapo.

<sup>34</sup> Yasumo aporo suane soko, ipi aporo hakāsa purane soko, peaesapo. Perakano asekea epo someraka, "Repo ano patera aseako, ano kuraka ira matopesa paremareakosane, nómo makatiaka apura aiyáka, re soko, repo hemakapusuane metakarikia, ira matopesa maka punie. Ano finisa á, re soko fini kafo kepe peanie."

<sup>35</sup> Aporomanomo hauaka wo areamo hitaferaka rekeakosane hákasa hemakapukua rakiraka rekeno, keseke aporoane Kotiyaki yaiya rekeakosafapo. Arirakano aporomanomo metamo someraka, 'Yasupoko ano kuane soko siahoasireapo. Arirakano Yasumo some kotesa kakako ano kuane siahoasireapo.' Aiyaka kurane hemakapurafaraka rekeno, aporoane Kotiyaki yaiya rekeakosapo.

<sup>36</sup> Arirakano aporomanomo hauaka kara wo makata kemo suane mokoa sarimaraka reke, Kotiyaki yaiya rerane epo metakarikia rekeno, akura maiya amo makata yakapamo e ararehokosare? Makata metamo e ararehokosane kakenafapo.

<sup>37</sup> Yaiya rerane ropohoko makata yakapamo roponare? Yaiya rerane makata metamo roponafapo.

<sup>38</sup> Maiya omo arisiamo aporo hinamo watikiaka risike, aporomo ipi hinamo metakarikia, hinamo metayaki apura aiyáka, ano metakarikia puraka, nōmo someane soko metakarikia risikino, keseke Aporomanomo Táke anoane pariapera maiya amo, ano metakarisia aporo hinamoane, nōmo soko iane metakariakosapo. Nōmo Atamo faesayaki, hepene aporo kotesa susuyaki pariapera maiya amo, aporo hinamomo ano metakariasiakipoko, iane soko nōmo metakariakosapo," aiyaka Yasumo somesapo.

## 9

<sup>1</sup> Yasumo ipi aporo hakāsa puraki someraka, "Nōmo reaki kakaro somerakaripo. Re metakira yumo risiane kukusiraka risike aseane, Kotimo aporo hinamoane unihaeaka asekea reke ipi wakapuaka rakiraka rekeno aseakosapo," aiyaka Yasumo somesapo.

*Yasu kau hakuraka faesane oyapo.*

*Matiu 17:1-13; Ruki 9:28-36*

<sup>2</sup> Sere namasu faraka Yasumo Pita soko, Yamese soko, Yone soko, i karikia ūri teraya hisiapo. Hikia namina hakāsa risike aseane, Yasu kau hakuraka,

<sup>3</sup> ipi pasu ososane soko, namo kakaro pakaeraka faerakano asesapo. Hauaka wo sopomo pasu kususa pakaena asiafapo.

<sup>4</sup> Ipi namo kakaro faesa rekeno asesapo. Aseane wate fana risia porofete aporo Iraiyape Mosese tetā risike, tetapō Yasuyaki makata someraka risikino asesapo.

<sup>5</sup> Aseraka Pitamo Yasuaki someraka, "Tisao, isu o pesane kotesapo. Isiapo ape mano isia kiakosapo., Ape meta népoko, ape meta Mosesepoko, ape meta Iraíyapoko ayáka kiakosapo."

<sup>6</sup> Aýaka Pitamo Yasuaki somesapo. Ipu yakapa somehoasifasekeno i suane kakaro himu faraka namoraka risiapo.

<sup>7</sup> I risiane akomo iane karotapisiapo. Ako karotapisia arakaru aeyaka someraka, "Eane nōmo nī hokosapo. E nōmo himu tumurumo hemakapurakanapo. Epo someane kaikia hemakapukua risikianie." aýaka somerakano ipu kaisiapo.

<sup>8</sup> Kairaka ipu wate foaka aseane Yasu ipi hákasa yia iyaki reke, aporo tetá metane fasekeno asesapo.

<sup>9</sup> I ūri teraya aeyaka peraka risike, Yasumo iaki paroaka wakapuaka someraka, "Aporo manomo Tákeane anopo. Keseke ano kukusapo. Ano kusuane maturikia taehoasiraka, repo pipu makata asesane haru somehokopo."

<sup>10</sup> Airakano ipu makata asesane aporo hinamo metakiraki somesafapo. Ipu namina someraka, "Maturikia taehokosa kepoane yakapare?" aýaka ipu namina me rukua kára somesapo.

<sup>11</sup> Aporo hakása pura isiamo Yasuaki someraka, "Kotimo somemane tisa aporomo someraka, 'Kereso peasisraka Iraíya fana peakosapo,' aisa amo kepoane makata yakapare?"

<sup>12</sup> Airakano Yone he tapukumareramo Keresopoko ikia kara maroponane Yasumo hemakapukua someraka, "Iraíya fana peraka Keresopoko makata su makotehokosapo, aisane kakaro yasiapo. Keresoane hemakapusimo makata meta soko popasane oyapo. 'Aporomanomo Tákeane ipi himu nasimo aporo metakiramo eane mokoatikiraka mainamareraka patera tariakosapo,' aýaka popasa ane soko hemakapunie.

<sup>13</sup> Arirakano nōmo someana one kakaro somerakaripo. Iraíya peakosaposane kakaro perakasupo.\* E perakasuane ipu namina yia hemakapukua eane mokoatikisapo. Asiamo Kotimo sawia poparaka ayiakakosapo aisane kakaro yasiapo," aýaka Yasumo somesapo.

*Yatafumo hokosa ho masane Yasumo mafasane oyapo.*

*Matiu 17:14-21; Ruki 9:37-42*

<sup>14</sup> Aporo hakása pura isia Yasuyaki ūri teraya hisiane metakarikia peraka aseane, aporo hakása pura metakirayaki aporo hinamo yakai sarimaraka risikino asesapo. Ayíáka risike Kotimo somemane tisa aporo metakiramo, aporo hakása purayaki tafatafaraka somerakano asesapo.

<sup>15</sup> Aporo hinamo suamo Yasuane aseraka kára seseraka eane sapenako perakano asekeia,

<sup>16</sup> Yasumo iaki someraka, "Repo nōmo aporo pasimosaki makata yakapa me rukua somerakanare?"

<sup>17</sup> Airakano aporo hakása metamo someraka, "Tisao, nōmo ararehoasimo nōmo hokosa karikia pesapo. Yatafumo hokosa ane ho maraka epo makata somerafapo.

<sup>18</sup> Yatafumo ho masa maiya ámo hokosa ane hauaka atura rukumakasuraka, akai momotoro káráraka, akai kikitiraka, kiki wakapuraka korosakataesapo. Asiamo né peanafonosamo, nōmo aporo hakása puraki nōmo someraka, 'Yatafu pusiesie.' Airakano ipu pusiehoane yatafuane pusuaafapo."

<sup>19</sup> Airakano Yasumo iaki someraka, "Aporo hinamo maiya omo risiamo Kotiaki himu hakásaraka hemakapukua risikirifapo. Maiya suamo repo makata hasaka hemakapukua risikino, nōmo repoko maiya suamo yaiya wafororaka rakiraka rekeakosare? Ano reyaki maiya káramo rekeno yia repo anoaki himu hakásaraka hemakapukua risikirifapo. Ano rea wo hokosane karikia peae."

<sup>20</sup> Airakano hokosane Yasu rea karikia pesapo. Karikia perakano yatafumo Yasuane aseraka, hokosane yatafumo wate foaka mahamisisraka hauaka atura rukumakasusapo. Rukumakasusahoane, hokosane mokowewe puraka akai momotoro kamusakae kárasapo.

<sup>21</sup> Arirakano Yasumo hokosa wafayaki someraka, "Masinaka yatafumo hokosane ho masare?" Airakano hokosa wafayamo someraka, "Hokosa kiri yiamo asiapo.

<sup>22</sup> Maiya suamo nōmo hokosane yatafumo ira rufia soko makasunapo. Hea soko makasunapo. Kukusimo ainapo. Asiamo nōmo siahoasisekenone eto kamenakaraka nōmo arareracie."

<sup>23</sup> Airakano Yasumo someraka, "Marirakano siahoasireare airakanare? Aporomo anoaki himu hakásaraka rekeno, makata su nōmo rakiane siahoasireapo."

<sup>24</sup> Airakano hokosa wafayamo wate foaka someraka, "Nōmo neaki himu hakásaraka hemakapurakanapo. Himu hakásaraka hemakapurane wakasemapo. Wakasemasane káráhoasimo nōmo ano arareracie."

\* <sup>9:13:</sup> Kakaro perakasupo, aisa kepoane Yone he tapukumarera ayapo.

<sup>25</sup> Airakano Yasumo aseane, aporo hinamo yakai sarimahoko foaka perakano asekeea, yatafu watikisaki epo someraka, "Yatafu nōmo hokosane senaki matisane soko, me mahimetesane soko, né metakarikia pusie. Hokosane efera hunia ho mako paripeakopo."

<sup>26</sup> Airakano yatafumo kaikia sakepamo wáraka hokosane kára mahamisisiraka marekea, hokosane yatafumo ho masane metakarikia purakano, hokosane kuraka sikisapo. Hokosa kuraka sikirakano aporo hinamo suamo aseraka someraka, "Akure," aisapo.

<sup>27</sup> Airakano Yasumo hokosa hokonoa maka máfarakan, hokosa turikia pusuapo.

<sup>28</sup> Airakano Yasu apea yorokoa perakano, ipi aporo hakásá puramo someraka, "Isiapo yatafuane metakarikia pusiehoane punafonorakasane, mairakayiarakapo."

<sup>29</sup> Airakano Yasumo someraka, "Yatafu ayíáka risiane pusimo, Kotiaki kurikuriraka reke, yatafu pusierakano pukusapo. Makata metamo pusierakano pukusafapo," aíyaka Yasumo somesapo.

*Yape tetámo Yasumo someraka, "Aporomo ano kukuśimo rukusapo," aisane oyapo.*

*Matiu 17:22-23; Ruki 9:43-45*

<sup>30</sup> Hauaka ane ipu metakarikia, Kariri hauaka á pukua, hauaka ane marokeraka, i namina pusuane aporo suamo kaiyakohoamo, Yasu tau pusuapo.

<sup>31</sup> Ipi aporo hakásá puramo hemakapusimo, some kakako tau pusuapo. Yasumo some karaka, "Aporomanomo Tákeane anopo. Ano rusua kukuśimo aporomo ano parakehokosapo. Parakeraka ano waseremaka kukuśimo rukusapo. Ano rusua kusuane sere isiāmo maturikia taehokosapo."

<sup>32</sup> Airakano someane i himetesapo. Himeteraka karekekeaa namoraka risike ipu Yasuaki "Some kepoane yakapare?" aíyaka somesafapo.

*Aporo fanaraka reamo kepoane oyapo.*

*Matiu 18:1-5; Ruki 9:46-48*

<sup>33</sup> Yasu soko ipi aporo hakásá pura soko pukua, Kapaneame taonea pauraka, apea yorokoa iaki Yasumo someraka, "Re ikia kara peraka repo namina susu makata yakapa somerakayiare?"

<sup>34</sup> Airakano ipu me kauraka risiapo. Arirakano i ikia kara puraka risike ipu someraka, "Isu aporo fanane epare?" aíyaka somesasamo kaiyarako ipu Yasuaki makata somesafapo.

<sup>35</sup> Somehoanafonorakano, Yasu ipi kake aporo hakásá pura keno suane peaesapo. Perakano asekeea epo someraka, "Aporomo ano aporo kárapo, aíyaka otoa maka, makaporaraka hemakapuraka, 'Ano fanaraka rekeako seseripo,' aíyaka repo hemakapukupo. Repo namina makama kesekehoanie. Repo aporo supoko rakinie."

<sup>36</sup> Aíyaka someraka hokosa metane epo pasimaka i namina hikumisi nenemea reaesapo. Rekeno eane Yasumo hokonomo hokosane ketakamaka paua motokoa, i aporo keno suaki someraka,

<sup>37</sup> "Aporo metamo ano himu tumurumo hemakapusuasamo hokosa wakasema asiāne ararena ayíáka, ano soko ararerakanapo. Ano arareraka ano hákasa ararerakanafapo. Atamo ano pusiesane soko ararerakanapo," aisapo.

*Aporo metamo Yasu yano hokoa Kotimo makata wakapuaka rakira rakisiane oyapo.*

*Ruki 9:49-50*

<sup>38</sup> Yonemo Yasuaki someraka, "Tisao, isiapo aseane aporo metamo né yano hokoa, aporo meta yatafumo ho masane pusierakano pusuapo. Purakano asekeea isiapo aporoaki someraka, 'Ne Yasumo aporo hakásá purayaki paosafapo. Paohoanafonosasamo yatafu pusiehokopo.'

<sup>39</sup> Airakano Yasumo iaki someraka, "Repo aporoane matasoraka somehokopo. Aporomo Kotimo makata wakapuaka rakira rakiakosakipoko ano yano hokoa, ipi wate foaka ano hokomaka somehokosafapo.

<sup>40</sup> Asiamo aporomo ipi isuyaki weanafonoraka isu ararerakanapo.

<sup>41</sup> Nōmo some one kakaro somerakaripo. Aporo metamo someraka, 'Né Keresoa paosa aporopo. Asiamo nōmo ne he nasimo karakanapo.' Aisa aporoaki Kotimo makata ropo kakakosapo," aíyaka Yasumo somesapo.

*Mokopipina kepoane oyapo.*

*Matiu 18:6-9; Ruki 17:1-2*

<sup>42</sup> Yasumo ipi aporo hakásá puraki someraka, "Hokosamo e ipiane makárahoanafonona ayíáka, anoaki himu hakásaraka hemakapura aporomo watikiaka rakisimo, aporo metamo mokopipirakano, mokopipina aporoane Kotimo kára fanasihokosapo. Mokopipina aporoane, ipi mawia eke kára kita humarekea maka he tawara numua he nasimo makasuhoane siahoasireapo. Ane fanasihokosane wakasemapo. Kotimo fanasihokosane kárahokosapo.

<sup>43</sup> Arirakano nōmo hokonomo makata watikiaka rakiraka rekeno, nōmo ní himuane mawatikinapo. Mawatikinapaka, hokono takuane patekemaka mamakatehoanie. Hokono tetákara reke ira kopakapunafonona hauaka heao hauaka á makasuhokohoamo, hokono hakása takuane patekemaka mamakatehoanie. Hokono taku hakása reke yaiya rerane kepomarekea rakiraka reke siahoasireapo.

<sup>44</sup> [Arirakano heao hauaka á fifita kurafapo. Ira soko kopakapurafapo.]

<sup>45</sup> Arirakano nōmo korakemo watikiaka rakiako watikisa taku á puraka reke, nōmo ní himuane mawatikinapo. Mawatikinapaka, korake takuane patekemaka mamakatehoanie. Korake tetákara reke heao hauaka á makasuhokohoamo korake takuane patekemaka mamakatehoanie. Korake hakása reke yaiya rerane kepomarekea rakiraka reke siahoasireapo.

<sup>46</sup> [Arirakano heao hauaka á fifita kurafapo. Ira soko kopakapurafapo.]

<sup>47</sup> Arirakano nōmo himo makata watikisane aseraka reke, ní himuane mawatikinapo. Mawatikinapaka, hi takuane pokomaka mamakatehoanie. Hi tetákara reke heao hauaka á makasuhokohoamo, hi takuane pokomaka mamakateraka hi taku hakása reke Kotimo unihaeaka asekeea rera á paohoane siahoasireapo.

<sup>48</sup> Arirakano heao hauaka á fifitaraka reke kurafapo. Ira soko kopakapurafapo.

<sup>49</sup> Asiamo kifirimo makata makotena ayíáka, aporomo makata watikisa himura kayane ira paikimarekea faraka, himuane makotenapo.

<sup>50</sup> Arirakano kifiri waperapo. Asiane kifiri wapesane farakano efera hunia waperafapo. Wapehoanafonona ayíáka repo, ‘Aporo fanaraka reane epare?’ ayíáka tafatafana maiya amo aporo metane ararenafapo. Asiamo fanaraka rekeako tafatafahokopo. Aporo hinamo suaki hemakapukua tau auaraka risikianie,’ ayíáka Yasumo somesapo.

## 10

*Aporomo hinamo fimirerane Yasumo somesane oyapo.*

*Matiu 19:1-12; Ruki 16:18*

<sup>1</sup> Yasu ipi Kariri hauaka ane metakarikia pukua, he Yotane yaoraka taku ra, Yutía hauaka á reapo. Reakipoko aporo hinamo yakai Yasu rea perakan asekeea, Yasumo iaki some kasapo. Sere suamo epo some akara ayíáka, i perakan asekeea, epo ipi ayíáka some kasapo.

<sup>2</sup> Yasu reakipoko Ferese aporo peraka, Yasu kau aseakosakipoko epo hasaka somerakarahoamo, ipu eaki someraka, ‘Aporomo ipi hinamo fimoreane siahoasireare? Fimoreane somemanane mamosohoasireare?’

<sup>3</sup> Airakano Yasumo ipi someraka, ‘Mosesemo somemanemo yakapa someaka motosare?’

<sup>4</sup> Airakano ipu aporo hakása metamo someraka, ‘Fana Mosesemo someraka, ‘Hinamo arumasa fimoreako hinamoaki sawi poparaka kakanie,’ aííapo.’

<sup>5</sup> Airakano Yasumo someraka, ‘Repo Kotimo someane koaretaesasamo Mosesemo aporoaki someraka, ‘Hinamo fimoreane siahoasireapo,’ aííapo.

<sup>6</sup> Asiáne wate fana kepomaresa maiya amo, Kotimo aporo soko, hinamo soko, tetákara rakisiapo.

<sup>7</sup> Rakiraka Kotimo someraka, ‘Aporomo ipi kaíyia ipi wafaya metakarikia, hinamo arumaraka ipi hinamoyaki hakása paoraka,

<sup>8</sup> tati kau hakásaraka risikinapo.’ Tati kau hakásaraka risirasamo tetáraka risikinafapo. Hakásapo.

<sup>9</sup> Asiamo Kotimo hinamo aporo tati masarimasane, aporo metamo maparakuhoane siahoasifareapo.” Ayíáka Yasumo Ferese aporoaki somesapo.

<sup>10</sup> Someaka faraka Yasu apea pukua reakipoko, aporo hakása puramo Yasuaki someraka, ‘Someane kepoane yakapare?’

<sup>11</sup> Airakano Yasumo iaki someraka, ‘Aporomo hinamo arumasane ipi apiamo hisiraka, e fimorekea hinamo meta arumarakanano, aporo amo hinamo metane haki arumarakanapo.

<sup>12</sup> Arirakano hinamo aporo pusuanne ipi aporo hisiraka metakarikia, aporo meta purakanano, hinamo amo aporo metane haki purakanapo,” ayíáka Yasumo somesapo.

*Aporo hinamomo Yasu rea hokosa karikia pesane oyapo.*

*Matiu 19:13-15; Ruki 18:15-17*

<sup>13</sup> Yasu reakipoko hokosa karikia pesapo. Karikia pesane Yasumo hokonomo sakairaka makotehoasimo karikia pesapo. Karikia pesa aporo hinamoaki Yasumo ipi aporo hakása puramo himu mahisiraka iaki someraka, ‘Hokosa karikia peakopo.’

<sup>14</sup> Airakano Yasumo kairaka mahisiraka someraka, ‘Ano rea hokosa peane siahoasireapo. Perakan matasohokopo. Aporo hinamo e ipiane makáranafaraka, hokosa mano ayíáka risiane, Kotimo unihaeaka asekeea rekenapo.

<sup>15</sup> Hokosa manomo ipi wafaya kaiyiamo eane koteaka asekeea rekeasimo, himu hakásaraka hemakapura ayíáka, aporo hinamomo Kotiaki himu hakásaraka hemakapurakano, Kotimo iane asekeea rekenapo.”

<sup>16</sup> Aiyaka someaka marekea hokosane Yasumo fatuaka maka, i kaua ipi hokonomo sakairaka i koteaka risikiasimo, koteaka risirane iaki kasapo.

*“Makata kemo káraraka rea aporoane Koti unihaeaka rea paoraka waforonapo,” aisane oyapo.*

*Matiu 19:16-30; Ruki 18:18-30*

<sup>17</sup> Kimisi pukusa maiya amo, aporo hakásá meta foaka pekea Yasu hikumisi nenemea kakuna porókoaa kake someraka, “Tisa kotesao, ano Kotiyaki yaiya rekeakosakipoko nōmo makata yakapo rakiakosare?”

<sup>18</sup> Airakano Yasumo someraka, “Nōmo anoaki marirakano, ‘Tisa kotesao,’ airakanare? Kepoane hemakapunie. Koti ipi hákasa kotesapo. Aporo meta kotesa rekenafapo.

<sup>19</sup> Kotimo somemaneane nōmo hemaka apure. Somemane ane oyapo. ‘Aporo kukusimo rukupo. Hinamo hakimakopo. Makata meta hakimakopo. Aporo metaki kotafe topakamahokopo. Makata ropo sapeane hakimakopo. Ní ata soko, ní ama soko, koteaka hemakapukua makotehoanie.’ Aiyaka somemane motosane nōmo kaisiapo.” (*Kisim Bek 20:12-16*)

<sup>20</sup> Airakano aporoamo someraka, “Tisao, ano hokosa rea maiya amo, somemane ane kakimaka yaiya reapo.”

<sup>21</sup> Airakano Yasumo e aseraka, eaki himu tumurumo hemakapuraka someraka, “Nōmo makata hakásá meta siasafapo. Nōmo makata kemo su ropohoko pusie. Pukua makata kemoane roporaka marekea, mone mosane aporo makata forokoa risiaki kakanie. Kaka farakano amo, nōmo makata mahimunane hepene yapura tokenapo. Ní makata kemo kaka faraka, ano patera aseako peanie.”

<sup>22</sup> Airakano aporoamo kaikia ipi makata kemo kárasasamo, aporo metakiraki kakako hisiraka, ipi hikumisi yuyukuraka Yasu metakarikia pusuapo.

<sup>23</sup> Purakano asekeea, Yasu rekeako pariraka, ipi aporo hakásá puraki someraka, “Makata kemo káraraka rea aporoane, Koti unihaeaka rea paohokosane, namo kakaro waforonapo.”

<sup>24</sup> Airakano aporo hakásá puramo kaikia fofaraka risikino asekeea Yasumo efera hunia someraka, “Hameo, Kotimo ré unihaeaka asekeea rekeasimo paohokosane namo kakaro waforonapo.”

<sup>25</sup> Pasu irina nitoro kakarua saro kamo kárasasamo kokoro puane tapenapo. Aina ayíáka makata kemo kára mora aporoane Koti unihaeaka rea paohokosane namo kakaro waforonapo.”

<sup>26</sup> Airakano ipu kára fofaraka mahimeteraka eaki someraka, “Aporo makata kemo kárasane Kotimo unihaeaka asekeea rekeasimo aohokosane namo kakaro waforonapo, airakae. Asiamo Kotimo aporoane mafasiasimo aporo ere paohokosare?”

<sup>27</sup> Airakano Yasumo i asekeea someraka, “Aporoane Kotimo unihaeaka asekeea rekeasimo aporomo ipi yíamo mafasirafapo. Makata su rakiakosane Kotimo ipi hákasa hemakapukua rekenapo. Asiamo aporo hinamoane Kotimo mafasiasokane Koti ipi hákasa siasapo.”

<sup>28</sup> Airakano Pitamo someraka, “Isiapo menane su metakarikia né patera aseako pesapo.”

<sup>29</sup> Airakano Yasumo someraka, “Nōmo kakaro somerakaripo. Aporo hinamo suamo hakásá hakásaraka anoaki hemakapuraka, nōmo rakirane rakiakosakipoko, nōmo some kotesane some kakakosakipoko, ipi ape metakarikia, ipi mae metakarikia, papá metakarikia, apu metakarikia, ama metakarikia, ata metakarikia, hokosa metakarikia, hauaka metakarikia, ayíáka makata su metakarikia rea aporoamo

<sup>30</sup> hauaka wo makata kára mokoakosapo. Mokoakosane oyapo. Ape soko, hauaka soko mokoakosapo. Aporo hinamo metakirane nōmo ní mae, ní papá, ní apu, ní ama, ní hokosa ayíáka risikiakosapo. Arirakano aporo metakiramo ne mokoatikihoko ayiane, keseke né Kotiyaki yaiya rekeakosapo.

<sup>31</sup> Asiamo yumo aporo yakai fanaraka risiane kesekehokosapo. Aporo yakai yumo kesekeea risiane fanahokosapo.” Aiyaka Yasumo somesapo.

*Yape isiamo Yasumo someraka, “Aporomo ano kukusimo rukusapo,” aiyaka somesane oyapo.*

*Matiu 20:17-19; Ruki 18:31-34*

<sup>32</sup> Yasu Yarusaramé sitia fana hisiakipoko, ipi aporo hakásá pura kesekeea hinaka, himumo kára hemakapupe hisiapo. Arirakano aporo hinamo metakira kesekeea keke-marape hinaka, “Yarusaramé sitia pauna maiya amo, yakapa ayikanarakapo,” aiyaka kára hemakapukua hisiapo. Hisia maiya amo aporo keno suane Yasumo karikia, wakasema hikia kesekeea Yasu ipiaki makata ayikakosane iaki somesapo.

<sup>33</sup> Yasumo someraka, "Isu Yarusarame sitia hinakanapo. Yarusarame sitia aporo metakiramo Aporomanomo Táke anoane parakehokosapo. Parakerakano pirisiti aporo káramo soko, Kotimo somemane tisa aporomo soko, ano kukušimo ira paremaresie aihokosapo. Aiyaka ano kukušimo Yu aporohoanafonosamo ano ira paremareakosakipoko karikia pukusapo.

<sup>34</sup> Karikia purakano, Yu aporohoanafonosamo ano mokoatikiraka mahokoparihokosapo. Mahokopariraka anoaki torofaeraka, ano kaua rukua, ano rusua kukušapo. Rusua kurakano sere isiamo Kotimo ano maturikia taehokosapo," aiyaka Yasumo iaki somesapo.

*Sepetemo maeya tetá Yasumo hokono tumuru takua soko, hokono kasakai takua soko kakasimo somesane oyapo.*

*Matiu 20:28*

<sup>35</sup> Sepetemo hokosa Yamesepe Yone tetá Yasu rea peraka Yasuaki someraka, "Tisao, etapo hemakapusuane nómó ayiakasimoripo."

<sup>36</sup> Airakano Yasumo tetáki someraka, "Nómo tetopoko makata yakapa ayiakasimore?"

<sup>37</sup> Airakano tetapó someraka, "Né unihaeaka faesa area maiya amo, eto meta né hokono tumuru takua kayae, arirakano eto meta né hokono kasakai takua kayae aihoasimoripo."

<sup>38</sup> Airakano Yasumo someraka, "Tetápo somerakane kepoane tetápo hemakapurakarifapo. Nómo kapo he nená\* tetápo soko nasireare? Arirakano aporo hea tapukumarera ayíáka anoane umisamo karo tapiakosapo. Ano umisamo karotapira ayíáka teto soko umisamo karotapiane siahoasireare?" Aiyaka Yasu ipiane mokoatikiraka rusua kukušane somesapo.

<sup>39</sup> Airakano tetapó someraka, "Ao, eto siahokosapo." Airakano Yasumo tetáki someraka, "Nómo kapo he nená hakásá yia tetápo kakaro nakosapo. Ano hea tapukumarerakano, teto soko hea tapukumuriakosapo.

<sup>40</sup> Arirakano ano hokono tumuru takua kakakosane soko, hokono kasakai takua kakakosane soko, nómo kayae aihokosafapo. Nómo ní Atamo ipi hemakapusua aeyaka seá maroposane murikimasapo."

<sup>41</sup> Airakano aporo hakásá pura kaeyako sumo kairaka, Yamesepe Yone tetáki hisisapo.

<sup>42</sup> Hisirakano aporo hakásá pura suaki Yasumo peaesapo. Perakano asekea Yasumo iaki someraka, "Yu aporohoanafonosamo ipu namina aporo unihaemo aporo metakiraki kára masamasanapo. Aporo unihae e ipi kárarakaraka reasasamo aporoaki masamasaraka matewanapo.

<sup>43</sup> Aina ayíáka re ayíáka risikiakopo. Repo namina aporo metamo hemakapuraka, 'Ano aporo kárarakaraka rekeariripo.' Aiyaka hemakapuraka aporo wakasemamo arakira ayíáka, aporo supoko arareraka rakinie.

<sup>44</sup> Aporo metamo hemakapuraka, 'Ano aporo fanaraka rekeariripo.' Aiyaka hemakapura aporoamo aporo raipamo arakira ayíáka, aporo supoko rakinie.

<sup>45</sup> Aporomanoko tékehoko ano hauaka wo pesapo. Aporo raipamo arakira ayíáka, aporomo anopoko ayíáka rakismo, ano pesafapo. Aporomanomo namina watikisapoko i fanasihoko-hoamo nómo farimaka kukuko pesapo," aiyaka Yasumo somesapo.

*Aporo hi mesa Yasumo mafasane oyapo.*

*Matiu 20:29-34; Ruki 18:35-43*

<sup>46</sup> Yasu soko ipi aporo hakásá pura soko pekea, Yariko taoneane marokeraka purakano, ipi aporo hakásá pura soko, aporo hinamo yakai Yasuyaki hakásá puraka aseane, aporo hakásá meta Tímiasimo maeya ipi yano motosa Pataméase, ipi hi taku tetákara mesa, ikia kara fea mone kakasimo kakeno asesapo. Aiyaka kake Pataméasemo kaiyiáne,

<sup>47</sup> Nasare aporo Yasuane perakarakano kaikia, ipi sakepamo wáraka, "Yasuo, Tefetemo aporo irao, anoane kamenakarakaraka ararerasisie."

<sup>48</sup> Airakano aporo hinamo metakiramo eaki paroaka someraka, "Wáhokopo. Me fasie." Airakano Pataméasemo efera hunia sakepamo wáraka, "Tefetemo aporo irao, anoane kamenakarakaraka ararerasisie."

<sup>49</sup> Airakano Yasumo kairaka e pesane wasuaka rukua asekea reapo. Asekea reke Yasumo someraka, "Aporoane wo peae." Airakano ipu aporo hi mesaki someraka, "Ne wo peeraakae. Asiamo né karekeakopo. Ne takahisie."

<sup>50</sup> Airakano aporo hi mesamo ipi pasu horomaka foakayia takahikia, Yasu rea pesapo.

---

\* <sup>10:38:</sup> Yasumo kapo soko hea tapukumarerane soko takumeaka somesane ipi mokoatikiraka rusua kukušane somesapo. "Ano mokoatikirakano kukusa ayíáka teto soko kukušare?" Aiyaka tetáki somesapo.

<sup>51</sup> Perakano Yasumo eaki someraka, “Nómo sesehoasimo nōmo mayiakasimore?” Airakano aporo hi mesamo someraka, “Tisao, nōmo himo koteaka aseakoripo. Hiane makotehoanie.”

<sup>52</sup> Airakano Yasumo someraka, “Nómo anoaki himu hakásara hemaka apura yiamo, né hi mesane mafarakayapo. Né pusie.” Aihoane aporo hi mesane faraka ipi koteaka asesapo. Koteaka aseraka Yasuyaki hakásäa pusuapo.

## 11

*Yasu saro toki matia ripaka Yarusarame sitia hisiane oyapo.*

*Matiu 21:1-9; Ruki 19:28-40; Yone 12:12-19*

<sup>1</sup> Aporo hinamo yakai Yasuyaki hakásäa ikia kara hisiapo. Hikia Yarusarame sitiane makeraka pausapo. Yarusarame sitiane makeraka üri Orofe rekenapo. Üri Orofe makeraka Pefasi ape soko, Petene ape soko kisia á i pausapo. Pauraka Yasumo aporo hakásäa pura tetáki

<sup>2</sup> someraka, “Teto ape tameyia pusie. Pukua aseane ape fari yia saro toki mano humaresa ipi matia aporo meta ripakanafonosa kita humaresa rekeno aseakosapo. Aseraka kita fatarimaka ano rea karikia peanie.

<sup>3</sup> Arirakano aporo metamo tetoaki someraka, ‘Tetápo marirakanonare?’ Airakano tetápo someraka, ‘Unihaeemo saro tokiane karikia peaniesasamo, etapo karikia purakanapo. Epo saro tokiyaki makata rakikia faraka, karikia paripusierakano, saro tokiane karikia paripeakosapo,’ aiyaka somehoanie.” Aiyaka Yasumo somesapo.

<sup>4</sup> Aiyaka somerakanano aporo hakásäa pura tetápuka aseane saro toki mano ikia koro makeraka hauaka moroa ikia kara á kita humaresekeno asesapo. Asekeaa saro tokiane tetapö fatarimasapo.

<sup>5</sup> Fataramarakanano, aporo risiammo someraka, “Mainakano saro toki manoane fataramarakanare?”

<sup>6</sup> Airakano tetapö Yasumo somesane iaki somesapo. Somerakanano aporoamo someraka, “Ao, karikia pusie.”

<sup>7</sup> Airakano tetapö karikia pukua, Yasu rea saro toki manoane karikia pesapo. Karikia perakano aseraka, aporo yakaimo pasuane saro toki matia furumurikia marekea, Yasu á ripasapo.

<sup>8</sup> Ripaka perakano asekeaa, “Yasu ipi aporo hokopusuareapo,” aiyaka aporo hinamo yakai ipu suamo pasu ikia kara á ifunusapo. Arirakano aporo hinamo metakiramo makata kū hemoa popatesane, ikia kara á ifunusapo.

<sup>9</sup> Ifunusakipoko Yasu perakano aporo hinamo metakira fanaraka, i metakira kesekeraka ayíaka pesapo. Peraka ipu wárape peraka,

“Hosana.\* Isiapo né pasimarakananapo. Né pesane aporo káraro. Unihae Kotimo né pusiesamo epo né makotesapo. (Buk Song 118:26)

<sup>10</sup> Isiapo makasa kaua kekema Tefetemo unihaeaka asekeaa rea ayíaka, nōmo unihaeaka asekeaa rekeakosapo. Unihaeaka asekeaa rekeakosane Kotimo makoterakanapo. Asiamo Koti hepene apea reane isiapo kekererakanapo. Hosana.”

<sup>11</sup> Aiyaka ipu wárape hikia Yasu Yarusarame sitia hikia pauraka, Kotimo apeane aseako pusuapo. Pukua makata suane asekehaesapo. Maiya tuakeramo Yasumo Kotimo apeane metakarikia aporo hakásäa pura kenosuyaki Petene apea pusuapo.

*“Ira foke wate efera hunia peakosafapo,” aisaney oyapo.*

*Matiu 21:18-19*

<sup>12</sup> Ere hakásäa waka mituru fiarakano, Petene ape metakarikia hikia Yasu meamorakano

<sup>13</sup> aseane wakasema yamenoa ira foke namo ku susu rekeno asesapo. Aseraka ira foke kepoo pukua ira wate tumakosakipoko aseane, ira foke wate ikia heanafonoraka kū susu rekeno asesapo.

<sup>14</sup> Asekeaa Yasumo iraki someraka, “Efera hunia ne wate peakosafapo. Keseke aporomo wate nasimo peraka, ne wateane nakosafapo,” aiyaka somesapo. Aiyaka somesane ipi aporo hakásäa puramo kaisiapo.

*Kotimo apea aporomo makata roporaka risiane Yasumo pusiesane oyapo.*

*Matiu 21:12-13; Ruki 19:45-47; Yone 2:13-22*

<sup>15</sup> Yasu ipi aporo hakásäa purayaki Yarusarame sitia hikia pauraka, Kotimo apea Yasu yorokoa puraka, Yasumo aseane, aporo metakiramo makata roporaka risikino, asekeaa

\* <sup>11:9</sup>: Wate fana Yasu peasiraka Yu aporomo Hipuru meaka someraka hosana, aira amo kepoane, “Nómo isu masfesianie,” airapo. Asiamo Yasu pesa maiya amo some kepoane sanasiraka, kepo kawe ane someraka, “Isiapo ne makáráraka kekererakanapo,” aiyaka hosana airapo.

rukuhoeraka pusiesapo. Aporo metakiramo mone sanasiraka risikino, teporoane maparitaesapo. Aporo metakiramo mena nume asia roporakano, i sea toane soko maparitaesapo.

<sup>16</sup> Maparitaeraka Yasumo iaki someraka, "Kotimo apea makata mokoa perakano prarakano ayiakakopo.

<sup>17</sup> Arirakano Kotimo sawia fana porofete aporo Aesayamo popasane oyapo. Kotimo someraka, "Aporo hinamo hauaka sua risiamo someraka, "Isiapo Kotiaki some-hokosakipoko, Kotimo apea peraka kurikurihokosapo," airapo." Aira nine Kotimo ape one repo hakimora aporomo klinikia mapariane."

<sup>18</sup> Airakano pirisiti aporo káramo soko, Kotimo somemane tisa aporomo soko, ipu Yasumo someane kairaka Yasu kukušimo ruko hemakapusuapo. Yasumo some karane aporo suamo kaikia, "Kotehoareapo," airakano asekeia, pirisiti aporo káramo kakanakeraka risike, Yasu rukusapoko asiāne i namoraka karekesapo.

<sup>19</sup> Yao nenehoramo Yasu soko, ipi aporo hakāsa pura soko, Yarusarame sitiane metakarikia pusuapo.

*Himu hakásaraka kurikurinane Yasumo somesane oyapo.*

*Matiu 21:20-22*

<sup>20</sup> Mituru i poparihikia aseane ira foke fana asesane pikinu soko porasekeno asesapo.

<sup>21</sup> Asekeia Pitamo Yasumo somesane hemakapukua, Yasuaki someraka, "Tisao, asesie. Nōmo fana someraka ira fokeane efera hunia aporomanomo wate nakosafapo, airakasune porahoareapo. Nōmo asesie."

<sup>22</sup> Airakano Yasumo someraka, "Kotiaki himu hakásaraka hemakapunie.

<sup>23</sup> Nōmo reaki some one kakaro somerakaripo. Repo aporo hinamo metamo someraka, 'Uri né takahikia he tawara sokoperasie.' Aiyaka himu tetáraka hemakapurafaraka kakaro himu hakásaraka hemakapukua, ayisierakano ayiakakosapo. Aiyaka hemakapukua rekeno Kotimo ayiáka rakiakosapo.

<sup>24</sup> Asiamo repo kurikurina maiya amo, Kotiaki makata kairaka kakaro Kotimo anakanapo, aiyaka hemakapukua kurikurirakano, makatane kakaro ayiakakosapo.

<sup>25</sup> Kurikurina maiya amo, nōmo aporo metaki mahisiraka reane maferasie. Nōmo watikisane Kotimo mafahoasimo nōmo aporo metaki hisisane soko maferasie. Aiyaka kurikurirakano Kotimo nōmo watikisane mafahokosapo," aiyaka Yasumo somesapo.

<sup>26</sup> [Arirakano Yasumo some meta someraka, "Nōmo hisisane soko ropo mokoatikinan soko metakarianafonorakano, nōmo watikisane soko nōmo Ata hepene yapura reamo metakariakosafapo," aisapo.]

*"Yasumo arakirane epamo maresare?" aisane oyapo.*

*Matiu 21:23-27; Ruki 20:1-8*

<sup>27</sup> Yarusarame sitia Yasu ipi aporo hakāsa purayaki hunia poparihikia, Yasu Kotimo ape makeraka koraka reakipoko pirisiti aporo kára soko, Kotimo somemane tisa aporo soko, aporo sisima soko, i su pekeia

<sup>28</sup> Yasuaki someraka, "Nōmo arakirane epamo maresare? Nōmo ayiáka rakisimo epamo néaki ayiáka rakinie, aisare?"

<sup>29</sup> Airakano Yasumo iaki someraka, "Nōmo reaki makata hakāsa meta akai kairakanapo. Kaiyiane repo anoaki some pariperakano, kaikia anoaki rakiniesane nōmo reaki some-hokosapo.

<sup>30</sup> Yonemo aporo hinamo hea tapukumurianiesane Kotimo aisare? Aporomo aisare? Epamo aisare? Repo anoaki somesie."

<sup>31</sup> Airakano namina susu tafatafaraka someraka, "Isiapo Yasuaki yakapa somehoa-narakapo. Isiapo someraka, 'Kotimo aisapo,' aiyaka somerakanone, Yasumo isuaki someraka, 'Mairakano Yonemo someane kakipayasare?' aihokosapo.

<sup>32</sup> Arirakano isiapo someraka, 'Aporomo aisapo,' aiyaka somerakanone, aporo hinamo suamo isuaki mahisiraka sapehokosapo. Aporo hinamo suamo hemakapuraka, 'Yone ipi kakaro porofete aporopo. Ipi kakaro Kotimo some kara aporopo.' Aiyaka ipu hemakapu-susasamo iaki namorakanapo.

<sup>33</sup> Asiamo namina tafatafaraka Yasuaki someraka, "Yonemo aporo hinamo hea tapukumurianiesane epamo aisarakapo. Isu himeteripo." Airakano Yasumo someraka, "Repo anoaki some paripeanafonasamo, anoaki rakiniesa kepoane reaki somehokosafapo," aiyaka Yasumo iaki somesapo.

**12**

*Kotimo ipi hokosane aporomo mokoatikihokosapo aiyaka Yasumo ipi nine takumeaka somesane oyapo.*

*Matiu 21:33-46; Ruki 20:9-19*

<sup>1</sup> Yasumo takumeaka someraka, "Hemo wafayamo sako karepe hemo ane porokoa marekea, keseke rurusapo. Rururaka sako wate nenekeaneraka he pusimo, eke karoraka maua asia rakisiapo. Rakiraka aporomo hemoane koteaka asekeea rekeasimo, huturu ape kisiapo. Kikimarekea hemoane aporo metakiramo asekeea risikiasimo aporo metakira murikimaka murisiapo. Murikimaka faraka, hemo wafayamo aporoane soko, ipi hemoane soko metakarikia, hauaka meta á pusuapo.

<sup>2</sup> Pusuakipoko sako karepe wateane ikia ahera maiya amo, hemo asekeea risia aporomo soko karepe wateane tumusapo. Tumokoa parakuraka hemo wafayamo somesane kaikia taehoko asiáne, ipu koarellaera hemakapukua, hemo wafayapoko taesafapo. Arirakano hemo wafayamo ipi aporo raipaki someraka, 'Sako karepe wateane anopoko taesane nōmo mokoako pusie,' aisapo. Airakano aporo raipamo mokoako pusuapo.

<sup>3</sup> E pukua hemoa perakano, hemo asekeea risia aporomo e rukua, sako karepe wate soko kakanafonoraka nena pusiesapo.

<sup>4</sup> Arirakano efera hunia sako karepe wate mokoako hemo wafayamo aporo raipa metane pusiesapo. Pusiesane hemoa perakano, hemo asekeea risia aporomo e wamoia rukua e mokoatikiraka mainamaresapo.

<sup>5</sup> Rukua mokoatikiraka mainamaresane asekeea hemo wafayamo aporo raipa metaki sako karepe wate mokoako pusiesapo. Pusiesane hemoa perakano, hemo asekeea risia aporoamo e rusua kusuapo. Aporo raipa metakira soko yasiapo. Aporo raipa metakira rukua, arirakano aporo raipa metakira kakaro rusua kusuapo.

<sup>6</sup> Arirakano hemo wafayamo hemakapuraka, 'Aporo hakása meta rekenapo. E nōmo hokosapo. Eane nōmo kára himu tumurumo hemakapukua rekenapo. Eane nōmo hokosasamo ipu mokoatikihokosafapo.' Aiyaka hemakapukua ipi hokosaki someraka, 'Sako karepe wate mokoako pusie,' airakano hokosa ane ipi pusuapo.

<sup>7</sup> Pusuane hemoia perakano, hemo asekeea risia aporomo someraka, 'Hemo wafayamo hokosane apere. Arirakano keseke ipi wafayane kusuakipoko finihaoa e reke, hemo one epo asekeea rekeasireapo. Anapaka e rukusapo. Rusua kurakano hemo one isiapo isina makosapo. Asiamo isiapo isina wafayaraka asekeea risikiakosapo.'

<sup>8</sup> Aiyaka hokosa ane ipu waseremaka rusua kurakano, hemo ruru tapikia tama takua makasusapo.

<sup>9</sup> Asiamo keseke hemo wafaya aperamo hemo asekeea risia aporoane mayiakakosare? E pekeia epo hemo asekeea risia aporoane rusua kukusapo. Rusua kurakano aporo metaki ramo hemoane koteaka asekeea risikiasimo murikimakosapo." Aiyaka Yasumo somesapo.

<sup>10</sup> Arirakano Yasumo aporo hinamo suaki someraka, "Kotimo sawia some one popasane repo menosafare? Kotimo sawia popasane oyapo.

'Ape kira aporomo ira waripi mamakatesane efera hunia maka pekeia tipia mapo-hoareapo.

<sup>11</sup> Mapohoareane Kotimo ipi ayíáka rakireapo. Ayíáka rakisikino isiapo aseraka someraka, "Ane kotehoareapo," airapo." Aiyaka popahoareapo." (Buk Song 118:22-23)

<sup>12</sup> Aiyaka Yasumo somerakano, Fereze aporomo kaikia hemakapuraka, "Yasumo isuane hukurukua marekea takumeaka somerakae." Aiyaka hemakapukua, Yasu tipura makeasimo waseremakosakipoko asiáne, aporo hinamo ipu suamo iaki saperapaka, Yasuane metakarikia i pusuapo.

*Takese mone kakakosane Yasumo somesane oyapo.*

*Matiu 22:15-22; Ruki 20:20-26*

<sup>13</sup> Fereze aporomo soko, Heroteaki patera asesa aporomo soko, Yasu rea aporo metaki-rane pusiesapo. Yasumo hasaka somerakarihoamo, mahoperaka akai kaiyako pusiesapo.

<sup>14</sup> Pusierakano i pukua, Yasu rea pekeia someraka, "Tisao, nōmo someane namo kakaro somerakae. Aiyaka isiapo hemakapurakaripo. Arirakano aporomo néane mokoatikihokosane nōmo ní hemakapurafaraka nōmo kakaro somerapo. Aporo kárane sesehoasimo nōmo hokokarakaraka somerapao. Kotimo ainane nōmo kakaro some akare. Asiamo neaki isiapo akai kairakanapo. Isiapo Yu aporomo Rome aporo unihaeaki takese mone kayane siahoasireare? Kayane Kotimo somemanane mamosohoasireare? Mayiakasireare?

<sup>15</sup> Isiapo takese mone motoakosare? O metakariakosare?"

Airakano ipu himu tetáraka hemakapukua risike, ipu some yapake somesane Yasumo ipi aseraka iaki someraka, "Nōmo hasaka somerakano nōmo ní some yiamo kakinumo maká

arura ayíáka, ano níane rusimo repo aíyaka somerakae. Nómo hasaka somerakano repo ano tipura makeako somerakae. Asiamo mone haeane nōmo aseako maka peae."

<sup>16</sup> Airakano ipu mone hae maka pesapo. Maka perakano Yasumo asekea iaki someraka, "Aporo epa hikumisi mone haea rekerire? Epa yano motosa popahoareare?" Airakano ipu someraka, "Rome aporo unihae Sisa hikumisireapo. Ipi yano motosa popahoareapo."

<sup>17</sup> Airakano Yasumo someraka, "Rome aporo unihae menane ipiaki kakanie. Kotimo menane Koti ipiaki kakanie." Airakano ipu kairaka himu fasapo.

*Aporo kusua maturikia taehokosane Yasumo somesane oyapo.*

*Matiu 22:23-33; Ruki 20:27-40*

<sup>18</sup> Satusi aporo Yasu rea peraka ipu hemakapuraka, aporo kusuane maturikia taenafapo. Aiyáka hemakapukua ipu Yasuaki someraka,

<sup>19</sup> "Tisao, Mosesemo someaka popasane oyapo. 'Aporo metamo ipi mamaneamo hokosa hokono mareanafonoraka kurakano asekea, ipi mamaneamo hinamo yaroane arumarapo. Aporo kusua amo hokosa wainenaka sikiraka wainasimo hinamo yaroane ipi mamaneamo arumarapo.' Aiyáka Mosesemo someaka popasane isiapo menosapo. Asiamo isiapo neaki akai kairakanapo.

<sup>20</sup> Aporo yatipinusu risiane namina mamanea hakásapo. Mamanea fanamo hinamo arumasane hokosa hokono mareanafonoraka kurakano,

<sup>21</sup> mamanea kusuamo patera yiamo, hinamo yaroane arumasapo. Epo soko hokosa hokono mareanafonoraka e kusuapo. Kurakano epo patera yiamo hinamo yaroane arumasapo. Arumasane epo soko hokosa hokono mareanafonoraka kurakano,

<sup>22</sup> ayipe pukua, mamanea yatipinusuamo hinamo yaro hakásane arumape pukua, hokosa hokono maresafapo. Keseke hinamo manokonomosane kaina keseke e kusuapo.

<sup>23</sup> Kusua maturikia taeaná maiya amo, hinamo ane epamo hinamore? Hinamoane aporo yatipinusumo arumasapo."

<sup>24</sup> Airakano Yasumo someraka, "Kotimo someane porofete aporomo sawia popahoareapo. Popasane soko, Kotimo ipi wakapuané soko, repo himeteraka hasaka hemaka apure.

<sup>25</sup> Aporo kusua maturikia taerakano hepene aporo arisia ayíáka risikiakosapo. Ayíáka arisia maiya amo aporo kusua maturikia taesamo hinamo kusua maturikia taesane arumarafapo.

<sup>26</sup> Arirakano aporo kusua maturikia taena amo kepoane Mosesemo popasane oyapo. Ira fete kokosususakipoko arakaru aeyaka ira rufiraka rea maiya amo, Kotimo Moseseaki someraka, 'Eparahamemo Kotiane anopo. Aisakemo Kotiane soko anopo. Yakopemo Kotiane soko anopo.' Aiyáka somerakano Mosesemo popasane repo menoraka kepoane repo himeteane.

(Kisim Bek 3:6)

<sup>27</sup> Popasa amo kepoane oyapo. Koti ipiane aporo hitafe arisiamo Kotipo. Ipi aporo kukua kesamo Kotifapo." Aiyáka Yasumo somesa amo kepoane oyapo. Eparahamem soko, Aisake soko, Yakope soko kusua nine, i yaiya hitaferaka risikinapo. Asiamo Yasumo Satusi aporoaki someraka, "Satusi aporo repo fana somerakasane hasaka somerakae," aiyáka Yasumo somesapo.

*Kotimo somemane fanane oyapo.*

*Matiu 22:34-40; Ruki 10:25-28*

<sup>28</sup> Kotimo somemane tisa aporo hakásá meta pekea aseane, Satusi aporomo Yasuaki me rukua somesa maiya amo, ipu someane Yasumo hurutapirakano asekea, aporo pesa amo Yasuaki someraka, "Kotimo somemane meta mane fanare?"

<sup>29</sup> Airakano Yasumo someraka, "Isiraya aporo repo kaisie. Isiapo Unihae Koti ipi hákasa unihaeaka rekenapo.

<sup>30</sup> Asiamo repo Unihae Kotiaki himu tumurumo hemakapurunie. Repo homo soko eaki hemakapurunie. Repo himu hemakapuramo soko eaki hemakapurunie. Repo wakapumo soko eaki kataka mareanie.

<sup>31</sup> Arirakano Kotimo somemane metane oyapo. Nómo níane himu tumurumo hemaka apura ayíáka, aporo metane soko ayíáka himu tumurumo hemakapurunie. Ayíáka somemane tetá ane kakaro fanapo. Some meta fanafapo," aisapo. (Lo 6:4-5; Wok Pris 19:18)

<sup>32</sup> Airakano Kotimo somemane tisa aporomo someraka, "Tisao, nōmo somerakane kakarorakae. Koti ipi hákasa. Unihae Koti meta rekenafapo. Nómo airakane kakarorakae.

<sup>33</sup> Eaki himu tumurumo hemakapuramo soko, wakapuaka hemakapuramo soko, nōmo níane himu tumurumo hemaka apura ayíáka, nōmo aporo metane ayíáka himu tumurumo hemakapurunie. Airakane kakarorakae. Kotimo sesehoasimo somemane tetá ane keke-maraka rakirane kakaro fanapo. Kotiaki makata rukua paikia karáne kesekepo."

<sup>34</sup> Airakano epo koteaka hemakapukua somesakipoko, Yasumo eaki someraka, "Kotimo né unihaeaka asekeea rekeakosa maiyane makepo," aisapo. Airakano ipu Yasuaki makata kaiyakosapoko asiāne, ipu some ane hurutapirakano, efera hunia makata meta akai kaisafapo.

*"Keresomo kepoane repo mayiáka hemakapurakarire?" aiyaka Yasumo Kotimo somemane tisa aporoaki me ruraka, ipu somesane Yasumo hurutapisiane oyapo.*

*Matiu 22:41-46; Ruki 20:41-44*

<sup>35</sup> Aporomo hemakapusimo Kotimo ape makeraka taku meta á Yasumo someraka, "Kotimo somemane tisa aporomo someraka, 'Keresoane Tefetemo aporo ira wainepe pesa amo apororeapo,' airakasupo. Airakane marirakanore?

<sup>36</sup> Wate fana Ho Kotesamo Tefeteaki mahemakapurakarakano Tefetemo someraka, 'Nōmo Unihaeaki Unihae Kotimo someraka, "Ne ano hokono tumuru takua kayae. Hokono tumuru takua aporo hokopusua akaya aiyáka kayae. Kakeno nōmo yunuane nōmo rukumosakatapiakosapo," aisapo.' Aiyaka Kotimo somesane Tefetemo popahoareapo. (*Buk Song 110:1*)

<sup>37</sup> Asiamo Tefetemo Keresoaki someraka, 'Ne nōmo Unihaepo,' aisane marirakanoso aiseare? Arirakano makasa kauamo ipi hokosa wainepe pukusaki 'Unihaepo,' airafapo. Asiamo Tefetemo Keresoaki 'Unihaepo' aisasamo, Tefete takapeasiraka Keresoane wate fana yaiya reapo. Asiāne repo someraka, 'Tefetemo wainepe pesa á Kereso faserepeakosapo,' airakae. Airakane marirakanore?" Aiyaka Kotimo somemane tisa aporomo someane Yasumo hurutapikia somerakano, aporo hinamo suamo kaikia kakaro sesesapo.

*"Kotimo somemane tisa aporomo soko Ferese aporomo soko arakira aiyáka, repo soko aiyáka rakiakopo," aiyaka Yasumo somesane oyapo.*

*Matiu 23:1-36; Ruki 11:37-54; Ruki 20:45-47*

<sup>38</sup> Yasumo some kasa maiya amo some kasane oyapo. Epo someraka, "Kotimo somemane tisa aporomo arakira aiyáka, repo soko aiyáka rakiakopo. Ipu pasu horopokara osoraka pukua aporo hinamo sarimaraka risiakipoko i puraka, aporomo i hokono moraka i makáraraka someraka, 'Tisa karao, aihoasimo kára sesenapo.

<sup>39</sup> Arirakano Yu aporomo sarimana apea pukua, aporo hinamo su sarimaraka toakipoko, i hikumisi neneme sapea sea tokoako sesenapo. Hokono akera maiya amo aporomo i makáraraka, aporo unihae hokopusua káramo sea á tokoako sesenapo.

<sup>40</sup> Arirakano hinamo yaromo mone soko, makata kemo soko, iaki kakasimo hinamo yaroane manamorapo. Ipu hakimakosakipoko aiyáka manamorapo. Manamoraka yia aporomo i kotehoareapo, aihoasimo ipu kurikuriraka risike, some horopo some nokone pukua kurikurinapo. Asiasamo i suane fanasihokosane kakaro kárahokosapo." Aiyaka Kotimo somemane tisa aporomo ainane Yasumo somesapo.

*Hinamo yaromo Kotiaki makata kasane oyapo.*

*Ruki 21:1-4*

<sup>41</sup> Kotimo apea maua motosakipoko, taku ra Yasu kake aseane, aporo hinamomo mone mokoa pekea Kotiaki kakako maua kesapo. Makata kemo kára toa aporo hinamo ipu suamo mone kára kesapo.

<sup>42</sup> Arirakano hinamo yaroane makata forokoa kayasasamo ipi mone hae kusua tetá makesapo.

<sup>43</sup> Mone hae kusua tetá makerakano asekeea, Yasumo ipi aporo hakása purane peaesapo. Perakan asekeea Yasumo iaki someraka, "Aporo hinamo ipu suamo mone kesane, hinamo yaromo mone makesa amo marokesapo.

<sup>44</sup> Ipu mone kaka faraka mone metakira yia tokenapo. Arirakano hinamo yaroane ipi makata forokoa kayasasamo mone wakasema kayane su maka pekea kasapo. Mone meta ipi apea kakenafapo." Aiyaka Yasumo ipi aporo hakása puraki somesapo.

## 13

*"Kotimo ape ekeane kokoropepehokosapo." Aiyaka Yasumo somesane oyapo.*

*Matiu 24:1-2*

<sup>1</sup> Kotimo apeane Yasumo metakarikia pusua maiya amo, ipi aporo hakása pura hakásamo eaki someraka, "Tisao, Kotimo apeane asesie. Ekemo ape kisiane namo kakaro kotehoareapo. Asiamo apeane namo kakaro kotesapo."

<sup>2</sup> Airakano Yasumo eaki someraka, "Kotimo ape etapo aserane, eke ripape hikia, ape kisiane keseke kokoromokoteraka hakása hakásaraka tokoakosapo," aisapo.

*Makata umisa kekepo faserepeakosane Yasumo somesane oyapo.*

*Matiu 10:17-22; Matiu 24:3-14; Ruki 21:7-19*

<sup>3</sup> Yasu ūri Orofea hikia ūri kakafae aeyaka aseane, Kotimo ape rekeno asekea kake, Pita soko, Yamese soko, Yone soko, Enitu soko pekea, namina hakāsa risike Yasuaki ipu someraka,

<sup>4</sup> "Nōmo somerakane masinaka ayiakakosare? Kotimo ipi makata su ayiakakosane maiya mamo ayiakakosare? Isiapo hemakapusimo makata yakapamo isuaki tari-akosare?"

<sup>5</sup> Airakano Yasumo someraka, "Asekeanie. Keseke makata ayiákakosane oyapo. Aporo metakiramo reaki kotafe somerakano ipu someane kakimarapaka asekeanie.

<sup>6</sup> Aporo yakai peakosapo. Pekea ipu kotafe someraka, 'Ano Keresopo. Unihae makárasane anopo.' Aiyaka ipu ano yano hokoa kotafe somerakano, some ane aporo yakaimo kaki-makosapo. Asiamo repo asekeanie.

<sup>7</sup> Arirakano aporomo ape sumu metayaki werakanaporakano, repo kaiyakosapo. Ape sumu makea soko, ape sumu yamenoa soko werakanapo, aiyaka some tokomako pukua somerakano soko repo kaiyakosapo. Kaikia himu fahokopo. Aporomo weakosane fana faserepeakosapo. Arirakano Kotimo makata su ayiakakosane haru faserepeakosafapo.

<sup>8</sup> Aporo hauaka metamo aporo hauaka metayaki werakano, kamani metamo kamani metayaki werakano, ayiakakosapo. Hauaka kekepoa momani kára peakosapo. Arirakano hauaka kekepoa makata nakosa farakano aporo hinamo kára meamohokosapo. Hinamo ipi hokosa kaiyako aheramo kára mokoweraka mati soko, himu soko, kára tenapo. Tena kepoamarera ayiák momani kára aperamo soko, makata nakosa farakano soko, yunu aweramo soko, aiyák aporo hinamoaki makata umisane kepomareakosapo.

<sup>9</sup> Maiya amo re huruperapaka asekeanie. Re aporo metakiramo waseremokoa hukurura aporomo reane hukururaka, arirakano Yu aporomo sarimana apea aporo metakiramo reane ira famo rukusapo. Asiamo repo ano patera asesasamo, reane ape asekea risia aporoamo soko, aporo unihae soko, re hukurusimo aporo metakiramo re waseremokoao pusiehokosapo. Waseremokoa hukuarura sere amo, repo iaki anoane makáraraka somehokosapo.

<sup>10</sup> Fahokosa maiyane faserepeasiraka anoane hemakapusimo, some kotesane hauaka sua aporo hinamo suaki nōmo kakimara aporo hinamomo some kakakosapo.

<sup>11</sup> Arirakano reane waseremokoa hukuarura maiya amo, repo somehokosane karekeakopo. Hukuarura maiya yiamo somehokosane re himura Kotimo mahemakapurarakano, repo somehokosapo. Repo namina hemakapusuane somehokosafapo. Ho Kotesamo hemakapusuane repo somehokosapo.

<sup>12</sup> Arirakano aporomo ipi mamaneane, aporo metamo rusua kukusimo parakehokosapo. Arirakano wafayamo ipi hokosa aporo metamo rusua kukusimo parakehokosapo. Arirakano hokosamo ipi wafaya kaiyia tetāne aporo metamo rusua kukusimo parakehokosapo.

<sup>13</sup> Asiamo re ano patera asesasamo reane aporo hinamo suamo hisihokosapo. Asiamo reane Kotimo mafasiasimo re Kotiaki patera asesane metakarifafaraka, yaiya hemakapuka risike, rakipe pukua rosaka taehoanie," aiyaka Yasumo somesapo

#### *Makata kakaro watikisa faserepeakosane oyapo.*

*Matiu 24:15-28; Ruki 21:20-24*

<sup>14</sup> Yasumo iaki someraka, "Repo aseane Kotiane mawakasemahokosakipoko, Kotimo apea makata watikisa motorakano, repo makata ane asekea hemakapunie. Amo re Yutía hauaka risiane tekedarikia ūria hinie.

<sup>15</sup> Arirakano re aporo metakira ape kopo<sup>\*</sup> risiane re ape kakarua makata kemo mokoako pukupo.

<sup>16</sup> Arirakano re aporo metakira hemo tipia risiane, repo apea pasu mako pukupo.

<sup>17</sup> Maiya amo hinamo umisa soko, hokosa kiri kaiyia soko, tekedarikia hiane waforohokosapo.

<sup>18</sup> Tekedarikia hiakosa maiya amo yao kára aperamo tekedarikia hiane kakaro waforohokosapo. Yao kára apeta maiya amo, tekedarirapaka kurikurihoanie.

<sup>19</sup> Tekedarikia hikia arisia maiya amo, makata umisa faserepeakosane kárahokosapo. Kotimo hauaka kára one kepomaresa maiya amo soko, pipu yumo soko, makata umisa faserepeakosa ane fana asiafapo. Makata umisa faserepeakosane faraka keseke aiyáka umisa faserepeakosafapo.

<sup>20</sup> Makata umisa fasere apeta maiya amo, mokoatikiraka risira satiki aporomano suane kukua kekefa fahoafunupo. Kukua kekefa fanapaka Kotimo murikimasa aporo hinamoane hemakapuraka mokoatikhokosa maiya sapeane rukupateraka makinakehokosapo.

\* **13:15:** Apo kopoane ereke motosasamo ape kopoa aporo hikia torapo. Isiraya aporomo apeane asiapo.

<sup>21</sup> Arirakano aporo metamo reaki someraka, 'Repo suamo wó asesie. Aporo ane ipi Unihae kárapo. E Keresopo.' Airakano aporo metamo reaki someraka, 'Repo suamo aka asesie. Aporoane ipi Unihae kárapo. E Keresopo,' aiyaka ipu somerakano, someane repo kakimakopo.

<sup>22</sup> Asiamo aporo metakira, kotafe Kereso pariraka peakosapo. Arirakano aporo metakira, kotafe some kará porofete aporo pariraka peakosapo. Peraka aporo hinamo suamo iaki patera asekeasimo, ipu makata wakapuaka rakira kára meta rakiakosapo. Rakirane Kotimo wakapuanne iaki kasapo, aiyaka aporo hinamo suane fofaraka iaki hemakapusimo rakiakosapo. Kotimo murikimasa aporo hinamo ipu makata ainané, kau aseako kirimaraka rakiakosapo. Ipu hemakapuraka, 'Nōmo someane kairaka soko metao, kaiyanafonoraka soko metao, iaki murikimaka somehokosapo,' aiyaka ipu hemakapusaso.

<sup>23</sup> Asiamo makata ane faserepeasiraka, makata ayiakakosane nōmo reaki somerakanapo. Nōmo someraka one repo kakaro kakimakanie." aiyaka Yasumo aporo hakása puraki somesapo.

*Yasu paripeakosane oyapo.*

*Matiu 24:29-31; Ruki 21:25-28*

<sup>24</sup> Yasumo someraka, "Mokoatikhokosa maiya ane faraka amo patera, 'sere maiyamo soko ere maiyamo soko faehokosafapo.

<sup>25</sup> Ti makata hepene yapunaka hurupepehokosapo. Arirakano hepene yapura makata kára risiane mahohohokosapo." (*Aisaia 13:10; 34:4*)

<sup>26</sup> Maiya amo aporo hinamo ipu aseane Aporomanomo Táke anoane perakano aseakosapo. Ti pakae á wakapuyaki faesayaki ano peakosapo. Ano perakano aporo hinamo suamo aseakosapo.

<sup>27</sup> Ano apera maiya amo aporo hinamo nōmo murikimasane nōmo hepene aporo yakaimo pasimokoako pusiehokosapo. Pusierakano i peraka hauaka sua, patera takua risiane soko, ketaya takua risiane soko, ketaya takua risiane soko, hikumisi neneme takua risiane soko, hauaka sua nōmo aporo hinamo murikimosane hepene aporomo pasimokoa sarimahokosapo." Aiyaka Yasumo somesapo.

*Irafokeane Yasumo takumeaka somesane oyapo.*

*Matiu 24:32-36; Ruki 21:29-33*

<sup>28</sup> Yasumo someraka, "Ira foke amo takume kepoane hemakapunie. Ira foke ku paruraka yoarerakano asekea repo hemakapuraka, 'Kupa kakako makerakanapo,' aiyaka repo hemakapurapo.

<sup>29</sup> Hemakapura aiyáka repo aseane, makata umisa faserepeakosapo aisane fasereperakanó aseraka, nōmo makata su ayiakakosaposane makerakanapo, aiyaka repo hemakapusapo. Aporo ape kakarua yoroako ikia koro makeraka apera aiyáka makerakanapo, aiyaka repo hemakapunie.

<sup>30</sup> Nōmo reaki kakaro somerakaripo. Aporo hinamo maiya hakása yiamo hokono murisiane, i kukusiraka hitafe arisia yiamo, nōmo ayiakakosaposane fasereperakanó aseraka ipu someraka, 'Makata ayiakakosaposane ayana ayareapo,' aiyaka repo asekea hemakapusapo.

<sup>31</sup> Asiamo ti yapurane soko, hauaka one soko fahokosapo. Arirakano nōmo someane fahokosafapo. Nōmo someraka one kakaro ayiakakosapo," aiyaka Yasumo ipi somesapo.

*"Ano paripeakosa maiyane aporo metamo hemakapurafapo," aiyaka Yasumo takumeaka somesane oyapo.*

*Matiu 24:36-44; 25:13; Ruki 12:40; 21:36*

<sup>32</sup> Yasumo ipi someraka, "Ano peakosa sereane soko, maiya hi awane soko, aporo hinamomo hemakapurafapo. Hepene aporomo soko, Kotimo hokosa nōmo soko, hemakapurafapo. Atamo ipi hákasamo hemakapurapo.

<sup>33</sup> Asiasamo repo asekea risikianie. Ano pari peakosa maiyane repo hemakapuna-fononasamo asekea risikianie.

<sup>34</sup> Ano paripeakosa maiya amo ayiakakosane oyapo. Aporo kimisi pukusakipoko ipi apeané aporo raipamo asekea risikiasimo marerapo. Ipu makata rakirane soko epo marerapo. Ikia koro asekea rera aporoaki epo someraka, 'Koteaka asekea rekeanie,' airapo.

<sup>35</sup> Ape asekea rera aporo pariperakarihoamo asekea risikianie. Ipi maiya tuakeramo soko metao, ere titipiama soko metao, mena me horamo soko metao, mituru fiarakano soko metao, e perakarihoamo asekea risikianie.

<sup>36</sup> E wate foaka peraka aseane, re wakakesekeno asekohoamo re asekea risikianie.

<sup>37</sup> Aiyaka nōmo re aporo hakāsa puraki someana one aporo hinamo suaki somerakanapo. Someane oyapo. Re suane waráfaraka asekeea risikianie." Aiyaka Yasumo ipi somesapo.

## 14

*"Yasu rusua kukusimo waseremakosapo," aiyaka somesane oyapo.*

*Matiu 26:1-5; Ruki 22:1-2; Yone 11:45-53*

<sup>1</sup> Sere tetā faraka, sere metamo hokono keakosapo. Wate fana Iyipi hauaka metakarikia pusuakipoko, Ape Farimaresa\* Hemakapuko Hokono Keakosapo. Hokono keraka farawa pirianafonona nenapo. Maiya amo pirititi aporo kára soko, Kotimo somemane tisa aporo soko, ipu me rukua some maraka, "Yasuane rusua kukusimo eane maiyaka mahoperaka waseremakosare?"

<sup>2</sup> Yumo hokono akera maiya amo Yasu waseremayane siahoasifareapo. Asiamo aporo yakai sarimasasamo isuyaki werapaka, yumo e waseremakosafapo." Aiyaka pirititi aporo káramo soko, Kotimo somemane tisa aporomo soko, someaka masapo.

*Petene apea wera wape yamona Yasu wamoa hinamo metamo rekemaresane oyapo.*

*Matiu 26:6-13; Yone 12:1-8*

<sup>3</sup> Petene apea aporo meta yano motosa Saemone fana toropakesa reane fasapo. Asiamo Saemoneamo apea Yasu pukua, teboro makeraka sea kayakipoko, hinamo meta peraka eke kotesa petoro pariaka rakisiene maka pesapo. Petoro maka pesa á, wera namo kakaro wape yamonane kesa, mone káramo roponane kesapo. Kesane petoro tofene ropakataeraka Yasu wamoa rekemaresapo.

<sup>4</sup> Rekemarerakano aporo metakira risiame asekeea saperaka namina susu someraka, "Hinamoamo werane marirakano nenakamakayia rekemarekeea farakanare?"

<sup>5</sup> Wera ane mone káramo roporaka, keremisi hakásapoko makata rakira ropo ane asiapo. Wera ane aporo metaki roporaka mone kára mokoa aporo makata forosaki kakafunureapo." Aiyaka ipu hinamoaki someraka, "Nōmo aporo makata forosane ararerafare? Marirakano wera ane rekemarekeea farakanare?" aisapo.

<sup>6</sup> Airakano Yasumo someraka, "Hinamoamo ipi rakiako hemakapusuane marirakano repo makaiya marekeea somerakanare? Asiamo repo aihokopo. Hinamoamo ano wamoa wera rekeamarerane kakaro kotesapo.

<sup>7</sup> Asiamo aporo makata forosane maiya suamo reyaki hakāsa risikiakosapo. Asiāne ane maiya suamo reyaki hakāsa rekeakosafapo. Maiya metamo repo hemakapukua iane makotehoane siahoasireapo.

<sup>8</sup> Hinamoamo rakiiane siahoasisekeno ipi rakirakanapo. Ano kau ane kunikia motoakosakipoko, hinamoamo wera wape yamona ano kauane makoteraka rekemareakosane murikimaka rekemaresapo.

<sup>9</sup> Hao, kaisie. Nōmo reaki kakaro somerakaripo. Hauaka kara wo aporomo anoane hemakapusimo some karaka, hinamoamo wera rekemaresane soko, aporo hinamomo hemakapusimo ipu somehokosapo. Aiyaka somerakano hinamoane aporo hinamo yakaimo hemakapukusapo," aiyaka Yasumo somesapo.

*Yutasemo Yasu parakehokosapo, aisane oyapo.*

*Matiu 26:14-16; Ruki 22:3-6*

<sup>10</sup> Aporo hakāsa pura hakāsa meta yano motosa Yutase Isekeriopo. E pirititi aporo kára risia á Yasuane parakehokosakipoko somehoko pusuapo.

<sup>11</sup> Pukua somerakano ipu seseaka kaikia eaki someraka, "Isiapo neaki mone kakakosapo," aisapo. Airakano Yutasemo someraka, "Yasu mayíaka parakehoaepi," aiyaka hemakapukua Yasu parakehokosa ikia karane kosapo.

*Ape Farimaresa Hemakapuko Hokono Akeramo makata nakosakipoko Yasu ipi aporo hakāsa purayaki sarimasane oyapo.*

*Matiu 26:17-30; Ruki 22:7-14, 21-23; Yone 13:21-30*

<sup>12</sup> Arirakano hokono keraka Farawa Pirianafonona Nená kepomaresa maiya amo, saro sipi mano rusuapo.<sup>†</sup> Maiya amo aporo hakāsa puramo Yasuaki someraka, "Ape Farimaresa Hemakapuko Hokono Keraka makata nakosane isiapo ape ma sarimaraka taehokosare?"

\* **14:1:** Mosese rea maiya amo Iyipi hauaka á Mosesemo ipi Feroaki someraka, "Yu aporoane Fero nōmo tonotaehoana-fonorakano ane hokosa fana suane rusua kukusapo." Airakano Yu aporomo saro sipi rukua yapiane ape kau kinitia paisiapo. Paisikino asekeea, kura kará hepene aporomo apeane farimarekeea tapikia pusuapo. † **14:12:** Mosese rea maiya amo Iyipi hauaka metakarikia pusimo Yu aporo makasa kauane Kotimo mafasisiane merarunapaka keremisi suamo saro sipi rukua hokono kerapo.

<sup>13</sup> Airakano aporo hakāsa pura tetá pusimo Yasumo murikimaka someraka, “Teto ape sumua pusie. Pukua aseane aporo metamo he petoroa takamaka makatiraka perakano, tetápo e asekeea sapenakosapo. Sapenekea e purakano, eyaki hakāsa punie.

<sup>14</sup> Pukua e apea yorokoa purakano, apeane wafayaki someraka, ‘Tisamo someaka maresane oyapo. Ape Farimaresa Hemakapuko Hokono Keakosakipoko, nōmo aporo hakāsa purayaki sarimaraka, ape kakaru sape ma sarimaraka makata nakosare? Aporo kimisi pesa akipoko ape sape mayare?’

<sup>15</sup> Airakano epo tetoane karikia, ape huturua hikia ape rumu kára tariakosapo. Ape á sea soko, teporo soko, toane tariakosapo. Tarirakano ape á makata nakosa sarimaraka taehoanie.”

<sup>16</sup> Aiyaka Yasumo someaka marerakano, aporo hakāsa pura tetane pukua apea pauraka Yasumo ayiakakosaposane, ayiáka rakirakano tetapō asesapo. Ape Farimaresa Hemakapuko Hokono Keakosakipoko tetapō makata nakosa sarimaraka taesapo.

<sup>17</sup> Sarimaraka taerakano asekeea maiya tuakeramo, Yasu apea pekea, ipi aporo hakāsa pura keno suyaki hakāsa sarimaraka toapo.

<sup>18</sup> Ipu makata nenaka toa maiya amo, Yasumo someraka, “Nōmo reaki kakaro somerakaripo. Repo aporo hakāsa metamo anoyaki hakāsa toke makata anena yiamo, repo hakāsa metamo ano parakehokosapo,” aísapo.

<sup>19</sup> Airakano ipu mahisiraka namina hakāsa hakásaraka Yasuaki someraka, “Ne parakehokosane anore,” aiyaka namina yia fofarakaka somerape pusuapo.

<sup>20</sup> Somerape purakano Yasumo someraka, “Re aporo atoa yiamo ano parakehokosapo. Nōmo farawa maka he waira á kokoamarera yiamo, aporo metamo soko, anoyaki hakāsa tukurakano aporo ayapo. Epo ano parakehokosapo.

<sup>21</sup> Aporomano Tákehokosakipoko ano hauaka wo pesapo. Ano ayiakakosane Kotimo some kará porofete aporomo, Kotimo sawia poparakaka maresa, hakāsa nine kekemaraka ayiakakosapo. Aporomano Tákeane anopo. Ano parakena aporoane ipi fansihokosane kakaro itifiakosafapo. Aporoane e ipi hokono mareanafonosa satiki ane kotehoafunureapo,” aiyaka Yasumo somesapo.

*Aporo hakāsa puraki Yasumo farawa soko waene he soko kasane oyapo.*

*Matiu 26:26-30; Ruki 22:15-20; 1 Korini 11:23-25*

<sup>22</sup> Ipu makata nenaka atoa maiya amo, Yasumo farawa maka Kotiaki suseaka kurikurisapo. Kurikuriraka faraka farawa mosoraka aporo hakāsa puraki hakāsa hakásaraka karaka someraka, “Farawa one masie. One ano kaupo,” aísapo.

<sup>23</sup> Arirakano kapo he soko, maka Kotiaki suseaka kurikuriraka faraka, iaki karakano ipu suamo nesapo.

<sup>24</sup> Nenakan asekeea Yasumo iaki someraka, “Waene he one ano yapipo. Ano yapi pukusa amo aporo hinamo suamo himu watikisane mafahokosapo. Ano yapimo aporo hinamo suane mafasiakosakipoko Kotimo ipi kawe someaka marakanapo.

<sup>25</sup> Nōmo reaki kakaro somerakaripo. Waene he one nōmo efera hunia hauaka wo reyaki hakāsa nakosafapo. Keseke Koti unihaeaka rea hauaka á nōmo waene he one reyaki hakāsa toke nakosapo.”

<sup>26</sup> Aiyaka Yasumo somerakano, ipu Kotiaki kekereraka kesasapo. Kesarakaka faraka, apeane metakarikia üri Orofea hisiapo.

*Pitamo “Yasu nōmo aserafapo,” aihokosane Yasumo somesane oyapo.*

*Matiu 26:31-35; Ruki 22:31-34; Yone 13:36-38*

<sup>27</sup> Aporo hakāsa puraki Yasumo someraka, “Repo suamo anoane metakariakosapo. Metakariakosane Kotimo sawia popasane oyapo.

‘Saro sipi wafayane nōmo rurakano saro sipi suane teketariakosapo,’ aiyaka Kotimo sawia popasane kakaro yaiya ayiakakosapo. *(Sekaraia 13:7)*

<sup>28</sup> Ayiakakosa nine, keseke ano maturikia taerakano, Kariri hauaka á ano fana pusuakipoko, re keseke pekea isina hakāsa sarimahokosapo.”

<sup>29</sup> Airakano Pitamo Yasuaki someraka, “Ipu suamo neane metakarirakano, nōmo ne kakaro metakariakosafapo.”

<sup>30</sup> Airakano Yasumo Pitaki someraka, “Nōmo kakaro somerakaripo. Pipu ereamo kokoroko yape tetá mehoasiraka nōmo someraka, ‘Yasu nōmo aserafapo,’ aiyaka yape isiamo kotafe somehokosapo.”

<sup>31</sup> Airakano Pitamo paroaka someraka, “Wae, ano neyaki hakāsa rusua kuraka soko metao, nōmo ‘Yasuane aserafapo,’ aihokosafapo.” Airakano aporo hakāsa pura suamo Pitamo some hakāsa nine kekemaraka somesapo.

*Kesemane hauaka Yasumo kurikurisane oyapo.*  
*Matiu 26:36-46; Ruki 22:39-46*

<sup>32</sup> Yasu ipi aporo hakāsa purayaki Kesemane hauaka á puraka Yasumo iaki someraka, “Ano kurikuriraka area maiya amo re wo tokoanie.”

<sup>33</sup> Aíyaka Yasumo Pita soko, Yamese soko, Yone soko, karikia puraka, Yasu ipi kára himu nekea, mahisiraka sesenafaraka reapo.

<sup>34</sup> Aiyáka reke Yasumo iaki someraka, “Ano himu kára nekea mahisiraka reke, ano kükusireapo. Asiomo re wo toae. Re wakakopo,” áísapo.

<sup>35</sup> Aíyaka someaka marekea Yasu ipi wakasema pukua, uakapekeea hikumisimo hauaka nanireke kurikuriraka, eaki makata umisane mafahoasimo kurikurisapo.

<sup>36</sup> Kurikuriraka someraka, “Atao, nómó makata su rakiane sianapo. Asiomo nómó makata umisa anoaki makasane siasekenone makata umisane nómó metakarisie, aíyaka nómó hemakapurakaripo. Asiáne nómó hemakapusua aeyaka ayiakakopo. Nómó hemakapusua aeyaka ayiakanie.”

<sup>37</sup> Aíyaka Yasumo kurikuriraka faraka, aporo hakāsa pura isiane toakipoko peraka aseane, i wakakesekeno asesapo. Asekea i maturikia Pitaki someraka, “Saemoneo,<sup>‡</sup> ne maiya hi awa hakásamo asekea reefareapo.

<sup>38</sup> Reaki aporo metamo mokopipirakan, repo watikiaka rakipe purapaka, turikia pukua reke kurikurihoanie. Wakakopo. Repo himumo koteaka hemakapukua kurikurihoko sesesa nine, kaumo yoferaka wakakosapo,” áísapo.

<sup>39</sup> Aíyaka Yasu efera hunia wakasema pukua kurikuriraka, fana kurikurisa hakāsa yaiya kurikurisapo.

<sup>40</sup> Kurikuriraka faraka, aporo hakāsa pura toakipoko peraka aseane, i su wakakesekeno asesapo. Arirakan i waka keako hi kumikia nekenekeraka kakaro wakakesapo. Wakakesakipoko, epo iane maturikia taeraka somerakano, ipu Yasuaki some paripukusane kakaro kára mahimetesapo.

<sup>41</sup> Yape isiamo Yasu pukua pariperaka iaki someraka, “Re yaiya wakakesare? Wakakesane yaiya wakakeanie. Kurikurihokosa maiyane fasapo. Aporomanomo Táke anoane parakeraka aporo watikisamo ano waseremakosa maiyane pipu maiya yuyapo.

<sup>42</sup> Re su takahisie. Takahikia isu purakapo. Aporomo ano parakehokosane apere,” áisapo.

*Yasu aporomo waseremasane oyapo.*  
*Matiu 26:47-56; Ruki 22:47-53; Yone 18:2-12*

<sup>43</sup> Yasumo somesa maiya yiamo aporo hakāsa pura meta yano motosa Yutase peraka eyaki aporo yakai hakāsa pesapo. Aporo pesane aporo metakiramo poke mokoa pekea, aporo metakiramo ira rokopa mokoa pekea, arirakan aporo metakiramo ferepe mokoa pesapo. Aporo pesane pirisiti aporo káramo soko, Kotimo somemane tisa aporomo soko, Yu aporo sisimamo soko, iane pusierakano pesapo.

<sup>44</sup> Aporoane peasiraka parakena aporo Yutasemo fana someraka, “Aporo nómó makunurakan aporo ayapo. Eane waseremaka karikia punie.”

<sup>45</sup> Aíyaka marekea Yasu rea Yutase ereketae pekea someraka, “Tisao,” aíyaka epo Yasuane makanusapo.

<sup>46</sup> Makanurakan aporo suamo Yasuane waseremasapo.

<sup>47</sup> Waseremarakano ipi aporo hakāsa pura meta makeraka reamo epo ferepe teaka maka, pirisiti aporo fanamo aporo raipa senaki ferepemo rukusakaretapisiapo.

<sup>48</sup> Rukusakaretapirakan Yasumo iaki someraka, “Repo ferepe mokoa pekea, poke mokoa pekea, ano waseremako aperane ano hakimara aporore?”

<sup>49</sup> Maiya suamo Kotimo apea isina hakāsa risike nómó some karakano repo ano waseremarakasufapo. Asiáne Kotimo sawia poparaka ayiakakosaposane fasere apera oyareapo.”

<sup>50</sup> Airakan aporo hakāsa pura suamo Yasu metakarikia teketarisapo.

<sup>51</sup> Arirakan hokosa raua ipi pasu pakaesa osoraka, ipi Yasu fana pusuakipoko, e kesekea pusuapo. Pusuane aporo metakiramo e waseremarakano asekea

<sup>52</sup> hokosa raua<sup>§</sup> ipi pasu pakaesane metakarikia patera yase takaripusuapo.

*Pirisiti aporo Kaifase rea á Yasu karikia pusuane oyapo.*  
*Matiu 26:57-68; Ruki 22:54-71; Yone 18:13-24*

<sup>‡</sup> **14:37:** Saemone yano motosa kepoane konakamopo. Konakomoane atifomo mahohonapo. Pita yano motosa kepoane ekepo. Ekeane atifomo mahohorafapo. <sup>§</sup> **14:52:** Hokosa raua ane Maka ipipo, aíyaka aporo yakaimo hemakapusuapo.

<sup>53</sup> Aporomo Yasu karikia pukua pirisiti aporo káramo apea, karikia pukua aseane, apea pirisiti aporo fanane soko, Yu aporo sisima soko, Kotimo somemane tisa aporo soko, sarimaraka tokeno asesapo.

<sup>54</sup> Yasu karikia purakano, Pitamo wakasema yamenoa kekemarape pusuapo. Keke-marape puraka pirisiti aporo fanamo ape hauaka moroa pauraka, aporo terakaiyamosa toakipoko Pita soko kayapo. Ira paisiakipoko Pita ira haka kayapo.

<sup>55</sup> Kayakipoko pirisiti aporo káramo soko, Kotimo somemane tisa aporomo soko, Yu aporo sisimamo soko, ipu aporo metakiraki peaesapo. Aporomo Yasuaki hukurukua topakamaraka somehoko peaesapo. Ipu hemakapuraka, "Aporo metakiramo Yasu hukururakano Yasu fanasiraka rusua kukusapo," Aiyaka aporomo topakamaraka somehoko ipu kosapo. Asiáne ipu hukurukusane siahoasifareapo, aisapo.

<sup>56</sup> Aporo yakaimo topakamaraka somesa nine ipu some hakása somesa ayafapo. Aporo metakiramo some meta topakamaraka some, arirakano aporo metakiramo soko, some meta topakamaraka some ayíáka some kekepo somepe pusuapo.

<sup>57</sup> Somepe purakano aporo metakira takahikia kotafe hukurukua someraka,

<sup>58</sup> "Isiapo kaisiane oyapo. Epo someraka, 'Kotimo apeane aporomo hokonomo kisiane nōmo rakaritaeraka, sere isia faraka Kotimo ape metane nōmo kiakosapo. Ape kiakosane aporomo hokonomo kinafonoraka, nōmo hemakapukua kiakosapo,' aiyaka someraka-suane isiapo kaisiapo."

<sup>59</sup> Aiyaka somesa nine, ipu somesa hakása somesa ayafapo. Some kekepo kekepoaka somesapo.

<sup>60</sup> Someraka risina pirisiti aporo fana takahikia Yasuaki someraka, "Neaki makata hukuruarurane nōmo yakapa some paripukusare?"

<sup>61</sup> Airakano Yasumo ipi makata somesafapo. Somehoanafonoraka rekeno pirisiti aporo fanamo someraka, "Unihae máfaraka maresa Keresoane nére? Kotimo hokosane nere?"

<sup>62</sup> Airakano Yasumo someraka, "Nōmo airaka ane anopo. Nōmo aseane Aporomanomo Táke anoane Koti ipi wakapumo hokono tumuru takua ano kakeno repo aseakosapo. Hepene aeyaka ako faesayaki ano perakano repo aseakosapo," aisapo.

<sup>63</sup> Airakano pirisiti aporo fanamo kaikia saperaka ipi pasu ososane makoaraka someraka, "E hukuruko aporo meta peahokosafapo.

<sup>64</sup> Epo ipi yiama someraka Kotiane soko, eane soko, tati hakása yiylareapo, airakae. Airakane repo hemakapusuane yakapare? Isiapo Yasuane mayiakakosare?" airakano ipu someraka, "E Koti tati siasapo airakano e rusua kunkunie."

<sup>65</sup> Airakano aporo metakiramo Yasuane torofaeraka, arirakano aporo metakiramo Yasu hia pasumo taporaka e ruraka someraka, "Ne arurane epamo rurakarire? E yano hosie." Airakano pirisiti aporo káramo aporo terakaiyamosamo ipu hokonomo e ruraka risiapo.

*Pitamo someraka, "Yasuane nōmo aserafapo." aiyaka kotafe somesane oyapo.*

*Matiu 26:69-75; Ruki 22:56-62; Yone 18:15-18, 25-27*

<sup>66</sup> Yasu hukurusua maiya amo, hauaka moroa Pita kakeno pirisiti aporo fanamo hinamo raipa hakása meta peraka aseane,

<sup>67</sup> Pita ira paisia á ira haraka kakeno asekeia, hinamoamo someraka, "Nasare aporo Yasuyaki hakása purane nereapo."

<sup>68</sup> Airakano Pitamo waeraka someraka, "Nōmo somerakane ano himeteripo. Ano eyaki hakása purafapo." Aiyaka Pita takahikia pukua ikia koroa pusuapo.

<sup>69</sup> Pukua rekeno kokorokomo mesapo. Hinamo raipamo e aseraka, efera hunia aporo suamo kaiyisimo someraka, "Aporoane Yasuyaki hakása pusuapo."

<sup>70</sup> Airakano efera hunia Pitamo waesapo. Waeraka wakasema kaina, aporo makéraka risiromo Pitaki someraka, "Nōmo mehoane Kariri aporomo meane somerakae. Asiamo né Kariri aporopo. Ne Yasuyaki hakása purareapo."

<sup>71</sup> Airakano Pitamo ekeneaka aumaraka someraka, "Yasuane nōmo aserafapo. Nōmo kotafe somerakano soko Kotimo ipi ano fanasihokosapo."

<sup>72</sup> Aihoanine yape tetámo mena kokorokomo mesapo. Merakano kaikia Yasumo some kasane Pitamo ipi hemakapusuapo. Arirakano fana Yasumo someraka, "Mena kokoroko yape tetá mehoasisraka, nōmo yape isiromo 'Yasuane nōmo aserafapo,' aihokosapo," aisane Pitamo kára hemakapukua himu nekea hiripusapo.

## 15

*Pairate rea Yasu karikia pusuane oyapo.*

*Matiu 27:1-2, 11-14; Ruki 23:1-5; Yone 18:28-38*

<sup>1</sup> Mituru fiarakano pirisiti aporo kára soko, Yu aporo sisima soko, Kotimo somemane tisa aporo soko, i su Kanisoro aporoane sarimaraka Yasu rusua kukusane me rukua somesapo.

Someaka faraka Yasu sakomo taporaka mareke, Rome aporo ipi yano motosa Paireate rea Yasu karikia pusuapo.

<sup>2</sup> Pairatemo Yasuaki someraka, "Yu aporomo unihaeane nere?" Airakano Yasumo someraka, "Ao, nómó someraka ayapo."

<sup>3</sup> Airakano pirisiti aporo káramo Yasuane hokoréraka kotafe topakamaraka somesapo.

<sup>4</sup> Asiamo efera hunia Pairatemo Yasuaki someraka, "Ipu makata kára hukuarurane nómó kairakarie? Nómó some paripeakosare?"

<sup>5</sup> Airakano Yasumo makata somesafapo. Somehoanafonoraka me kaurakano asekea Pairatemo hemakapuraka, "Manakano me kaunaka rekenarakapo," aiyaka hemakapusuapo.

*"Yasu rusua kukunie," aisane oyapo.*

*Matiu 27:15-26; Ruki 23:17-25; Yone 18:39-40*

<sup>6-8</sup> Fana aporo metakiramo Rome kamaniyaki wesa maiya amo aporo metakirane rusua kusuapo. Aporo hakásá ipi yano motosa Parápasepo. Parápasemo aporo meta rusua kusuapo. Rusua kurakano asekea e tipura makesapo. Tipura reakipoko aporo yakaimo Pairateaki someraka, "Ape Farimaresa Hemakapuko Hokono Akera maiya amo tipura makesa aporo hakásá meta isiapo hemakapusua aeyaka tonotaerasie, airakano nómó tonotaenapo. Keremisi suamo anapo. Pipu ayiakakosakipoko aporo hakásá tonotaehoanie," aísapo.

<sup>9-10</sup> Airakano Pairatemo hemakapuraka, "Pirisiti aporo káramo Yasuaki kakanakeraka hemakapususamo, e hukurusimo karikia peke a risie." Aiyaka Pairatemo hemakapuraka epo iaki someraka, "Yu aporo unihaeane tonotaehokosare?"

<sup>11</sup> Airakano pirisiti aporo káramo aporo su sarimasaki hokokekeea someraka, "Parápase tonotaerasie, aísie." Airakano ipu suamo wáraka, "Parápase tonotaerasie," aiyaka ipu sakepamo wásapo.

<sup>12</sup> Airakano Pairatemo iaki someraka, "Repo Yu aporomo unihaeane mayiakaere?"

<sup>13</sup> Airakano ipu sakepamo wáraka, "E ira matopesa paremarekea rusua kukunie," aísapo.

<sup>14</sup> Airakano Pairatemo someraka, "Marirakano e rusua kukunierakanare? Epo watíkika makata yakapa rakisiare?" Airakano ipu efera hunia sakepamo wáraka, "E ira matopesa paremarekea rusua kukunie."

<sup>15</sup> Airakano aporo yakai ane masesehoasimo, Pairatemo ipu someane kekemaraka Parápase tonotaeraka, Yasuane matia sakomo rusie, aísapo. Rurakano asekea someraka, "Yasu ira matopesa paremareako karikia pusie," aísapo.

*Yasuane ame aporomo mainamaresane oyapo.*

*Matiu 27:27-31; Yone 19:2-3*

<sup>16</sup> Ame aporo peraka Yasuane kamanimo ape kára á karikia pusuapo. Karikia pukua ape kára á pauraka, ame aporo su sarimahoko peaesapo.

<sup>17</sup> Perakano asekea, ipu Yasuane pasu susa osoraka mareke, mainamareraka, sako keta risia hati pariraka rakiakosakipoko, kita apera ayíáka pekeea weroraka rakisiapo. Rakisiiane Yasu wamoakarotapisiapo.

<sup>18</sup> Ayíáka eane mahokopariraka unihaeapo, aiyaka hemakapukua eaki suruturaka someraka, "Yu aporomo unihaeo. Ne aporo káraro."

<sup>19</sup> Aiyaka Yasu wamoakarotapisiapo rukua, Yasu kaua torofaeraka, eane maunihaeraka sikiraka, pekeea kakuna porokoa kake, ipu Yasuaki kotafe kekeresapo.

<sup>20</sup> Ayíáka mainamarekea faraka, pasu susa kau rakisiiane horomaka, epo ipi pasuane osoraka marekeira matopesa paremareako karikia pusuapo.

*Yasu ira matopesa paremaresane oyapo.*

*Matiu 27:31-44; Ruki 23:26-43; Yone 19:17-27*

<sup>21</sup> Yasu ira matopesa paremareako karikia puraka aseane, ikia kara á aporo hakásá meta ipi yano motosa Saemone, Sairíni taone aeyaka Yarusarame sitia perakano asesapo. Arirakano Saemonemo hokosa tetá, meta Arekesáta, meta Rúfase, aiyaka yano motosapo. Asiamo ame aporomo Saemoneaki someraka, ira matopesane maka pusiesapo.

<sup>22</sup> Aiyaka ipu Yasu karikia pukua Kokóta hauaka á pausapo. Arirakano Kokóta hauakane namo meaka Uni Kiki hauakapo.

<sup>23</sup> Kokóta hauaka á pauraka risike Yasu kau kára tenapaka waene he munamuna asiayaki sarimaraka kekeroraka Yasumo nasimo kasapo. Karakano Yasumo nesafapo.

<sup>24</sup> Arirakano ame aporomo Yasuane ira paremaresapo. Paremarekea maporaka mareke, Yasumo pasuane parakuraka mokoakosakipoko ipu kase enana ayíáka enasapo.

<sup>25</sup> Mituru maiya hi naene korokomo ipu Yasuane ira matopesa paremaresapo.

<sup>26</sup> Paremarekeea Yasu uni kima yapura e ipi hukurusuane ira tumusakipoko poparaka úyaka popasapo. "Yu aporomo Unihaeane epo." Aiyaka poparaka paremarestapo.

<sup>27</sup> Arirakano hakimora aporo tetá Yasuyaki hakása ira tetá meta paremurisiapo. Paremuriraka meta Yasu hokono tumuru takua paremarekeea maporaka, meta Yasu hokono kasakai takua paremarekeea maporaka asiapo.

<sup>28</sup> [Wate fana Yasu peasiraka Kotimo sawia popasane oyapo. "Makata watikiaka rakira aporo akiyaki eane hakása ninesapo." Aiyaka Kotimo sawia popahoareapo. Popasa hakása nine faserepesa ayareapo. (Aisaia 53:12)]

<sup>29</sup> Arirakano Yasu ira paremeresa makeraka aporo metakira pukua, eaki mainamareraka siráraka unia rokoraka someraka, "Sirá, nómó fana someraka, 'Kotimo ape rakari-teraka, yape isia faraka efera hunia kikimakosapo,' airakasupo.

<sup>30</sup> Aisamaso ní yía arareracie. Ira matopesa paremeresa metakarikia o peae," áisapo.

<sup>31</sup> Aiyaka pirisiti aporomo soko, Kotimo somemane tisa aporomo soko, ipu naminá susu Yasuaki ayiáka mainamaresapo. Mainamareraka someraka, "Yasumo aporo metakirane araresapo. Araresa ayiáka e ipi nine ayiáka ararehoasifareapo.

<sup>32</sup> E ipi kakaro Keresomo rakirane rakira satiki, ane Isiraya aporo amo unihae ane e ipi satiki, e ira matopesa paremeresa metakarikia peafunureapo. Perakano aseraka epo ipi somesane kakaro somehoareapo aihoafunupo." Aiyaka ipu Yasu mainamareraka risiapo. Arirakano Yasuyaki hakása paremeresa aporoamo soko Yasuane mainamareraka somesapo.

*Yasu kusuane oyapo.*

*Matiu 27:45-56; Ruki 23:44-49; Yone 19:28-30*

<sup>33</sup> Hauaka sua sere tuaro (12) korokomo kepomarekeea eresapo. Ereraka reke maiya hi awa isia amo ereraka reapo.

<sup>34</sup> Nina samapu maiya hi isia fahoko makeanamo Yasumo Yu aporo meaka sakepamo wáraka, "Irae, irae, rama sapakatani." Aiyaka namo meaka someraka, "Nómó Kotio. Nómó Kotio. Nómó ano marirakano metakirakanare?" áisapo.

<sup>35</sup> Arirakano kaikia aporo metakira makeraka risiamo someraka, "Kaisie. Ipi Iraiyaki warakae."

<sup>36</sup> Airakano aporo hakása meta foaka pukua he watera ásia he kisa á kokomarekeea fofako turua tapomarekeea, Yasumo nasimo makama yapurasapo. Makama yapurarako epo someraka, "Harufapo. Porofete aporo Iraiyamo Yasuane fataritaehoko perakarihoamo, isu yu kau risikipo."

<sup>37</sup> Arirakano aseane Yasumo sakepamo wásá yiamo Yasu ipi himu kikiraka kakaro himu rumaka kusekeno asesapo.

<sup>38</sup> Arirakano Kotimo apea pasu waremaresane\* yapunaka koarape atura pusuapo. Koaraka taku haku, taku hakusapo.

<sup>39</sup> Arirakano ame aporo satini ipi Yasu hikumisi erekeea reke aseane Yasu kurakano asekea someraka, "Nómó kakaro somerakaripo. Aporoane kakaro Kotimo ipi hokosapo," aiyaka epo somesapo.

<sup>40</sup> Arirakano hauaka wakasema tame yia hinamo metakira soko asekea toapo. Asekea toa hinamo ane meta Makatara hinamo Mariapo. Arirakano meta Maria, Yamesepe Yosefe tetapó kályiapo. Arirakano meta hinamo Sarómepo.

<sup>41</sup> Arirakano fana Yasu Kariri hauaka pusua maiya ámo, hinamo isiane eyaki hakása pukua, eane makata nakosa paikia kasapo. Arirakano Yasu Yarusarame sitia pesa maiya amo, eyaki hakása pesa hinamo metakiramo soko, hemakapukua asekea toapo.

*Yasu kunikia motosane oyapo.*

*Matiu 27:57-61; Ruki 23:50-56; Yone 19:38-42*

<sup>42-43</sup> Arimatía aporo Yosefane ipi Ferese aporoyaki Kotimo somemane tisa aporo akiyaki hakása sarimarako makata rakisiapo. Makata rakiraka ipi yano motosane kárasapo. Arirakano Kotimo unihaeaka asekea rekeakosa maiya ane faserepeasimo Yosefe kau reapo. Epo hemakapuraka, "Pipu samapu maiya tuakeramo rau fenena maiyane kepomareakosapo. Kepomareakosasamo fenakosakipoko yumo makata su mokoa sarimarakanapo." Aiyaka hemakapukua ipi karekekeea namonafaraka Pairate rea pukua someraka, "Yasu kusuane kunikia motoako nómó maka puaere?"

<sup>44</sup> Arirakano Pairatemo ipi himumo hemakapuraka, "Yasu kakaro kusuare?" Aiyaka epo ame aporo satiniaki peaesapo. Perakano asekea Pairatemo eaki someraka, "Yasu kakaro kusuare?"

\* **15:38:** Kotimo ape tuane sape hakása aporomo asekohoamo yaporaka makikisiraka pasu waremaresapo. Pasu waremeresa ane koarape atura pusuapo.

<sup>45</sup> Airakano satinimo someraka, "Ao, kakaro kusuapo." Airakano kaikia Pairatemo Yosefeaki someraka, "Yasu kusuane nōmo maka puane siahoasireapo," aisapo.

<sup>46</sup> Airakano Yosefe pukua pasu pakae kotesa roporaka maka, Yasu ira paremaresane fatarimaka, maka pukua, pasu pakae kotesa roposa amo Yasu taporaka maka pukua, eke kunikia fana rasa á Yasu motosapo. Motokoa marekea, kunikia kakaru mapir-akosakipoko, eke kára tafeasa keperemarape pukua, kunikia kakarua mapirisiaipo.

<sup>47</sup> Mapirirakano Makatara hinamo Maria soko, Yosefemo kaíyia Maria soko, tetapō Yasuane kunikia motorakano asesapo.

## 16

*Yasu maturikia taesane oyapo.*

*Matiu 28:1-8; Ruki 24:1-12; Yone 20:1-10*

<sup>1</sup> Fenena maiya farakano Makatara hinamo Maria soko, Yamesemo kaíyia Mariane soko, Saróme soko, ipu Yasu kaua wera wape yamona rekemareako werane roposapo.

<sup>2</sup> Fenena maiyane faraka, sokō kawe kepoamarera maiya amo\* mituru fiaraka, maiya kawe ropaka aheramo hinamo isiane Yasu kunikia motosa á aseako pusuapo.

<sup>3</sup> Puraka risike, hinamo isia amo namina susu someraka, "Eke kunikia mapirisiane epamo isupoko kepere mafearaka ropakataehoanare?"

<sup>4</sup> Aíyaka hemakapupe pukua aseane, eke tafea kára ane kepere mafeasa yao takua hererekeno asesapo.

<sup>5</sup> Asekean hinamo isia ane kunikia kakarua yorokoa aseane, hepene aporo raua pasu pakaesa osoraka, honoko tumuru takua kakeno asekean hinamo isia ane fofasapo.

<sup>6</sup> Fofarakano epo iaki someraka, "Fofahokopo. Nasare aporo Yasu ira matopesa pare-marekea rusua kusuane, repo aseako apere. E maturikia taerakano turikia pusuapo. E wo warekenafapo. E kau motosa fasane aseako peae."

<sup>7</sup> Asiamo ipu aporo hakása puraki soko, Pitaki soko repo somehoko pusie. Yasu fana Kariri hauaka á pukua reakipoko re kesekeka peraka, Kariri hauaka á repo e aseakosapo. E kukturakano epo fana some kasa hakása nine ayiakakosapo."

<sup>8</sup> Aíyaka hepene aporo rauamo somerakano, hinamo isia amo kunikia ane metakarikia, foforaka puraka, hamisisiraka himu faraka pusuapo. Puraka risike namoraka aporo hinamo metakiraki makata meta somesafapo.

*Aporo hinamomo e asekeasimo Yasu pesane oyapo.*

*Matiu 28:9-10; Ruki 24:10-11; Yone 20:14-18*

<sup>9</sup> [Yatipinu sere amo Yasu turikia pukua aporo hinamo metakiramo e asekeasimo e pesapo. Makatara hinamo Maria fana yatafu yatipinusumo e ho masa, Yasumo yatafu pusierakano, yatafu pusuapo. Hinamo Maria amo e asekeasimo e rea Yasu faserepesapo.

<sup>10</sup> Fasereperakano hinamoamo e asesapo. Asekean pukua Yasumo aporo hakása pura i risiakipoko hinamoane pausapo. Pauraka ipu aseane ipu Yasupoko himu nekean kára hihiripurakano asesapo. Asekean, hinamoamo iaki someraka, "Yasu turikia pusikeno nōmo aserakayapo."

<sup>11</sup> Airakano ipu kaikia yia kakarorakae, aíyaka hemakapusuafapo.

<sup>12</sup> Arirakano aporo tetá Yarusarame siti metakarikia yaoa purakano, tetapō e asekeasimo Yasu ipu kau hakusa pesapo. Perakano tetapō e asesapo.

<sup>13</sup> Asekean, tetá Yarusarame sitia poparipuraka aporo hakása puraki Yasu asesane tetapō somesapo. Somerakano ipu kakimasafapo.

<sup>14</sup> Keseke aporo hakása pura kinusu teporoa tokeno, asekean ipu e asekeasimo Yasu i toa pesapo. Asiamo aporo hinamo metakiramo Yasu maturikia taesane asesapo aisane, ipu kakimakanafonosasamo Yasumo iaki someraka, "Re masiare? Repo kakimako hisinane manakanonare?" aisapo.

<sup>15</sup> Aíyaka Yasumo efera hunia iaki someraka, "Hauaka sua re pukua, aporo hinamo suaki ano hemakapusimo, some kotesane some kakanie.

<sup>16</sup> Some karakano aporo hinamo metakiramo kakimaka, i hea tapukumurirakano, i Kotiyaki yaiya risikiasimo, Kotimo i mafasikia pasimakosapo. Arirakano aporo hinamomo kakimakanafonarakano Kotimo iane fanasihokosapo.

<sup>17</sup> Arirakano kakimara aporo hinamoeki Kotimo wakapu kakakosane oyapo. Anoaki himu hakásaraka hemakapukua, nōmo yano motosane wakapusasamo, ano yano hokoa yatafu pusierakano pukusapo. Arirakano Kotimo wakapuyaki me meta, repo fana kaiyanafonona meane somehokosapo.

\* **16:2:** Yu aporomo sokō kepoamarera sereane isiapo yatipinupo, airapo.

<sup>18</sup> Arirakano Kotimo wakapu meta kakakosane oyapo. Heseke ane hokonomo merarumo masa nine, hesekemo nesa kukusafapo. Arirakano Kotimo wakapu meta kakakosane oyapo. Aporomo he hawai nenakano makata takamakosafapo. Arirakano Kotimo wakapu meta kakakosane oyapo. Kakimara aporo hinamomo hokonomo aporo hinamo makata tasane sakairakano, i makata tasane fahokosapo.” Aíyaka Kotimo wakapu kakakosaposane Yasumo iaki somesapo.

*Yasu hepene yapura hisiane oyapo.*

<sup>19</sup> Unihae Yasumo iaki makata someaka farakano, e hepene yapunaka Kotimo pasimasapo. Pasimasasamo e Kotimo hokono tumuru takua rekenapo.

<sup>20</sup> Arirakano aporo hakāsa purane pukua, Yasumo someane hauaka sua aporo hinamo suaki some kasapo. Ipu some karakano Unihae Yasumo iane araresapo. Ipu Kotimo wakapumo hemākapukua rakisimo, Unihae Yasumo iane arareraka wakapuanie iaki kasapo. Asiamo ipu wakapuaka rakirakano, aporo hinamo suamo asekea hemakapuraka, “Kotimo iaki wakapu kasasamo Kotimo someane ipu some akarane, kakaro somereapo,” aíyaka hemakapurapo.]

## Ruki

### Ruki sawi one mahemakapukusa someane oyapo.

Ruki Yasumo ipi aporo hakāsa pura rakisimo murikimasafapo. Rukiane Kiriki aporopo. E Yu aporofapo. Fana e mitikororaka rakiraka reapo. Rukimo Yasuane aserafapo. Asiāne ipi Yasuaki himu hakásaraka hemakapusuapo. Yu aporo hoanafonosamo Yasuaki himu hakásaraka hemakapusimo Rukimo kāra hemakapukua, ipi aporo tāke Tioforaseaki sawi one popasapo.

Yasuane Rukimo asekeanafonosa nine ipi wafororaka kokoa hemakapukua sawi one popasapo. Arirakano aporo hinamo metakiramo Yasuane himo soko asekea, arirakano makata epo ainane soko rakirakan asekea, ayíka risiakipoko, Ruki pekea aporoaki Yasumo makata rakirane epo akai kaikia koraka reapo. Ásiamo Rukimo popasa one kakaro someane popasapo.

Keseke maiya metamo Ruki ipi Poreyaki hakāsa kimisi pusuapo. Arirakano keseke tarira aporomo rakirane epo hemakapukua, ayíka epo sawi meta poparaka Tiaforaseaki makesapo.

### Ruki sawia some kepo parakuraka popasane oyapo.

1:1-4 Rukimo Tiaforaseaki some wakasema somesapo.

1:5-38 Yone soko, Yasu soko, takapeakosane hepene aporomo somesapo.

1:39-56 Irísapeteane Mariamo aseako hisiapo.

1:57-80 Yone he tapukumarerane takapesapo.

2:1-40 Yasu takapesapo.

2:41-52 Yasu hokosa raua rea someane popasapo.

3:1-22 Yone he tapukumareramo makata rakisipa.

3:23-38 Yasuane Yosefemo aporo ira á paoraka reapo.

4:1-13 Satanemo Yasuane kau aseako pesapo.

4:14-9:50 Yasu kariri hauaka reke makata rakiraka reapo.

9:51-19:27 Yasu Yarusarame sitia pukua reke makata rakiraka reamo takume some metakirane some kasapo.

19:28-23:56 Yasu ipi kulkusa maiya makeanamo makata metakira haku faserepesapo.  
Ásiamo Yasuane rusua kusuapo.

24:1-53 Yasu turikia pusuane aporo hinamo metakiramo asesapo.

### Rukimo Tiaforaseaki sawi poparaka makesane oyapo.

<sup>1</sup> Tiaforaseo, né aporo káraro. Nōmo neane hemakapuraka, sawi one poparaka mak'erakanapo. Isu arisia wo Kotimo makata ayiakakosaposane faserepesapo. Makata faserepesane<sup>\*</sup> aporo metakiramo asekea sawia popasapo.

<sup>2</sup> Makata faserepesane kepomaresa maiya amo aporo metakiramo asesapo. Makata asesane ipu kakama somesapo. Ásiamo aporo amo Kotimo someane some kasapo. Ipu some kasane isuaki soko some kasapo. Somerakano isiapo kaisiapo. Arirakano some hakása nine aporo metakiramo soko sawia popasapo.

<sup>3</sup> Ásiamo, Tiaforase, nōmo koteaka hemakapusimo some kepoane nōmo koteaka kokoa, makata faserepesane kepomaresa aeyaka, kekemarape pekea, pipu wo pauraka, nōmo kokoa asekea neaki ereketaeraka poparakanapo.

<sup>4</sup> Ásiamo aporo metakiramo neaki some karakano someane nōmo kaisiapo. Someane nōmo kaikia kakarorakae, ayíka hemakapusimo, nōmo néaki sawi one poparaka makerakanapo.

### Yone he tapukumarerane takapesane oyapo.

<sup>5</sup> Yutía hauaka Herote unihaeaka rea maiya amo, pirisiti aporo hakasa meta reane, ipi yano motosa Sekaráyapo. Arirakano pirisiti aporo suane parakuraka, aporo ira meta yano motoraka Apaisa ayíka yano motosapo. Ayíka pirisiti aporo ira yano motosa Apaisa á Sekaráyá ipi soko hakása paoraka reke, pirisiti aporomo rakirane rakiraka reapo. Arirakano epo hinamo arumasane Eronemo aporo ira hinamoane arumasapo. Épo hinamoane yano motosa Irísapetepo.

<sup>6</sup> Arirakano Kotimo hikumisia Sekaráyape Irísapete tetā koteaka ereketae risiapo. Koteaka ereketaeraka risike, Unihae Kotimo somemanane tetapō kakaro kekemasapo. Somemanane hakása meta soko tetapō metakarisafapo.

\* 1:1: Makata faserepesane Yasu hauaka wo pesa ayapo.

<sup>7</sup> Metakarianafonoraka risike yia, Irísapete manokonomoraka, epo hokosa hokono maresafapo. Hokosa hokono mareaanafonoraka risike teta tati sisimasapo.

<sup>8</sup> Arirakano maiya hakásá metamo, Apaisa aporo ira anaka pirisiti aporomo makata rakira maiya amo, Sekaráya ane murikimaka Kotimo asekeasimo kakama rakisiapo.

<sup>9</sup> Ayiáka rakiraka pirisiti aporo hakásá metamo makata wape yamonane paiyakosakipoko, pirisiti aporo su yano taesane poparaka taeraka hakásá meta masapo. Maka aseane, Sekaráya ipi yano motosane popasekeno asekeea e murikimasapo. Murikimarakano Sekaráyané Kotimo ape kakarua yorokoa hikia makata wape yamonane paisiapo.

<sup>10</sup> Pairaka rea maiya amo, Yu aporo hinamo yakai hauaka moroa risike kurikurisapo.

<sup>11</sup> Ipu kurikuriraka risikino Sekaráyamo makata wape yamona teporo asia maresa kima yapura makata pairaka reke aseane, hokono tumuru taku aeyaka, Unihae Kotimo hepene aporo pekea rekeno asesapo.

<sup>12</sup> Aseke himu faraka namosapo.

<sup>13</sup> Namorakano hepene aporomo someraka, "Sekaráyao, né namohokopo. Nómó kurikurisane Kotimo kaisiapo. Kaisiasamo nómó hinamomo aporo hokosa hokono mareasapo. Nómó aporo hokosa hokono marerakano, Yone yano motoanie."

<sup>14</sup> Hokosa aki nómó kára sesehokoso. Ipi taka apera maiya amo aporo hinamo metakiramo soko e asekeea kara sesehokoso.

<sup>15</sup> Ayíáka repo asekeea seserakano, Unihae Kotimo soko hokosa ane ipi yano motosa makárahokoso. Arirakano nómó hokosamo waene he soko, he watikisané soko neane siahoasifareapo. Ipi kaifiamo tua kaya maiya amo, Ho Kotesane e himua marerakano, Ho Kotesa eyaki yaiya káraraka rekeakoso.

<sup>16</sup> Arirakano Isiraya aporo hinamomo Unihae Koti metakarisiane efera hunia risikiako parihoasimo epo iane ararehokoso.

<sup>17</sup> Unihae peasiraka e fana peakoso. Pekea Ho Kotesamo wakapuamo Iraiyané araresa ayíáka, Ho Kotesamo wakapuamo eane soko ararehokoso. Ararerakano hokosa wafayamo ipi hokosaki hisiraka rekeno, tetápo koteaka hemakapusimo, epo maropohokoso. Arirakano ereketae aina aporo koteaka ereketaeraaka hemaka apura ayíáka Kotimo someane koaretaena aporomo ayíáka hemakapusimo, epo maropohokoso. Arirakano Unihae keseke peasimo, aporo hinamomo makata watikisané, epo fana maropohokoso." Aisapo.

<sup>18</sup> Aiyaka hepene aporomo somerakano Sekaráyamo hepene aporoaki someraka, "Nómó somerakane kakarore? Nómó mayíáka hemakapukusare? Ano soko nómó hinamo soko eto tetákara sisimapo."

<sup>19</sup> Arirakano hepene aporomo someraka, "Ano yano motosa Keiporopo. Ano Kotimo makata rakira hepene aporopo. Ano Koti makeraka reasasamo neaki some kotesa somehoko epo ano pusierakanano perakayiapo.

<sup>20</sup> Hao, nómó kaisie. Pipu nómó neaki some akara one keseke murikimasa sere hakasa yiamo ayíakakoso. Pipu nómó some akara one nómó kakimakanafonosakipoko né mé faraka rekeakoso. Ne mé faraka reke, nómó ní someraka, makata ayíakakoso, aisa maiya ane fasere aperamo, nómó efera hunia somehokoso." Aiyaka hepene aporomo somesapo.

<sup>21</sup> Somesa maiya amo aporo hinamo hauaka moroa risike, Sekaráya peasimo asekeea risiane, e peanafonorakano ipu hemakapuraka, "Marirakano Sekaráyané maiya káramo Kotimo apea rekenarakapo."

<sup>22</sup> Aiyaka ipu hemakapurakano, Sekaráya ape kakaru anaka yaoa pariperaka, ipi me fasasamo iaki makata somesafapo. Makata somehoanafonorakano ipu hemakapuraka, "Kotimo apea kituamo asera ayíáka asereapo." Aiyaka hemakapurakano asekeea, e me fasamo hokono susumo rakisiapo.

<sup>23</sup> Arirakano Kotimo apea ipi makata rakirane rakikia faraka ipi apea paripusuapo.

<sup>24</sup> Pukua, ipi apea wakasema nina, Irísapete umisapo. Umiraka kake ere maiya kakoreasumo ipi apea kayapo.

<sup>25</sup> Apea kake ipi someraka, "Kotimo ano araresapo. Arirakano aporo hinamo metakiramo anoaki someraka, 'E manokonomosapo.' Ipu anoaki airakano ano kakaro kara kaiyaraka kayane Kotimo ano arareraka mafasapo." Aiyaka Irísapetemo somesapo.

<sup>26</sup> "Yasu takapeakoso." Aiyaka hepene aporomo Mariaki somesane oyapo.

<sup>27</sup> Irísapete umiraka kake ere maiya nama amo hepene aporo meta yano motosa Keiporoaki Kotimo someraka, "Né Kariri hauaka Nasare apea pusie."

<sup>28</sup> Pukua, ape á Unihae Tefetemo aporo ira wainepe pesa a Yosefe faserepekea rekenapo. Yosefemo hinamo faisa Mariaki somehoko pusie." Aisapo.

<sup>28</sup> Airakano Maria akaya á hepene aporo pekea someraka, "Maria, neyaki Kotimo tau auaraka rerane kakenapo. Kotimo neane kára arareraka makotesasamo seseaka kakanie. Kotiane neyaki hakása rekenapo."

<sup>29</sup> Airakano Mariamo kaikia fofarakaka hemakapuraka, "Airakane kepoane yakaparakapo."

<sup>30</sup> Aiyaka hemakapurakano, hepene aporomo someraka, "Maria, né namohokopo. Kotimo neane arareraka makoterakanapo.

<sup>31</sup> Né arareraka makoteraka ne hokosa umihokosapo. Umiraka kaina aporo hokosa takapeakosapo. Hokosa takapeakosaposane, takaperakano e Yasu yano motoanie.

<sup>32</sup> Ipi yano motosane namo kakaro káraraka rekeakosapo. Yasuane Namoo Kakaro Koti Unihae Káramo hokosapo, aporo hinamo suamo aihokosapo. Aiyaka Yasumo ipi makasa kaua kekema Tefete unihaeaka rea ayiáka, e soko unihaeaka rekeasimo Unihae Kotimo e mareakosapo.

<sup>33</sup> Ayiáka marerakano Yakopemo aporo ira wainepe pesa á, e takapekeea unihaeaka yaiya rekeakosapo. Unihaeaka reane fahokosafapo."

<sup>34</sup> Airakano hepene aporoaki Mariamo someraka, "Ano aporoyaki punafonoraka kake yia, mayiáka ano umihokosare?"

<sup>35</sup> Airakano hepene aporomo eaki someraka, "Ho Kotesa né akaya á peakosapo. Peraka, Namoo Kakaro Koti Káramo wakapuamo ne karotapikia rekeakosapo. Karotapirakano nómoo aporo hokosa takapeakosapo. Takapekeea e Kotiyaki paoraka kotesa tuku a susu kikisiaka rekeakosapo. Ayiáka rekeno Kotimo someraka, 'Né, nómoo ní hokosapo,' aihokosapo.

<sup>36</sup> Arirakano makata one soko nómoo hemakapunie. Nómoo ní aeya, Iríspeteane kakaro sisimarakaa kayane, aporo hokosa takapeako umirakanapo. Fana manokonomoraka kayane, pipu yumo ere maiya namasumo umiraka kakenapo.

<sup>37</sup> Asiamo Kotimo ipi makata su siaraka rakirapo."

<sup>38</sup> Airakano Mariamo someraka, "Ano Kotimo makata rakira hinamopo. Nómoo anoaki ayiakakosaporakane kakaro ayiakanie." Airakano hepene aporomo e metakarikia hisiapo.

#### *Iríspete kayakipoko Mariamo aseako pusuane oyapo.*

<sup>39</sup> Maiya amo Maria takahikia Yutía hauaka á, ape ūria kisiakipoko á foaka hisiapo.

<sup>40</sup> Ayiáka hikia Sekaráyamo apea pauraka, ape tua yorokoa, Iríspeteaki someraka, "Ano né aseako perakayiapo."

<sup>41</sup> Airakano Iríspetemo kaikia, e hokosa umisa kake, himura mahohorakarakano kaisiapo. Arirakano Ho Kotesa Iríspete tua káraraka rekeno,

<sup>42</sup> Iríspetemo sakepamo wáraka someraka, "Hinamo suane Kotimo aseraka yia, néane namo kakaro kára arareraka makoterakanapo. Nómoo hokosa takapeakosane aporo hinamo suamo eane makararaka kekeréhokosapo.

<sup>43</sup> Ano hinamo wakasemapo. Ano sesehoasimo nómoo apea, nómoo Unihaemo ama ane pekea a akaye.

<sup>44</sup> Nómoo someraka, 'Ano né aseako perakayiapo.' Airakano kaikia, nómoo hokosa tura kake seseraka mahohorakae.

<sup>45</sup> Arirakano Kotimo makata ayiakakosaposane nómoo kakimaka kakarorakae aisapo. Nómoo aisasamo ne kara seseraka kakanie." Aiyaka Iríspetemo Mariaki somesapo.

#### *Mariamo Kotiaki kekeresane oyapo.*

<sup>46</sup> Mariamo someraka,

"Nómoo himumo hemakapuraka, 'Unihae ipi káraro,' aiyaka hemakapukua kakenapo.

<sup>47</sup> Kotimo ano mafasisiakipoko, nómoo homo kára seserakanapo.

<sup>48-49</sup> Epo makata rakira hinamo wakasema anoane, epo hemakapusuasamo, nómoo himumo hemakapuraka, 'Unihae ipi káraro,' aiyaka nómoo eaki seserakanapo. Unihae Koti Káramo anopoko makata kára rakisiapo. Kara rakisisamo aporo hinamo pipu arisia omo soko, keseke aporo hinamo wainepe pukusamo soko, ipu suamo anoane someraka, 'Hinamoane Kotimo makotesapo,' aihokosapo. Unihae Koti Kárane ipi yano motosa haku kikisiraka kotesa susupo.

<sup>50</sup> Maiya yumo soko, keseke soko, aporo hinamomo Kotiane makárarakano epo iane kamenakarakaa kara ararenapo.

<sup>51</sup> Kotimo ipi wakapuaka makata rakirapo. Arirakano rupiaka makapororaka koareaena aporoane tekterakia pusimo Kotimo wákapumo hoaenapo.

<sup>52</sup> Aporo unihaeaka risiane Kotimo mawakasemanapo. Aporo hokopunafonoraka risiane Kotimo makáranapo.

<sup>53</sup> Aporo hinamo makata forokoa risiaki, epo makata kotesa susuane siaraka karápo. Aporo hinamo makata kemo káraraka risiaki, makata kakanafonoraka nena hokino mitiki pusierapo.

<sup>54-55</sup> Arirakano Eparahameane soko epo hokosamo hokosa wainepe pusua suane soko Kotimo kamenakasapo. Kamenakasane Kotimo hemakapuraka isiapo makasa kaua kekemaki ayiakakosapo, aisasamo Isiraya aporo hinamo suane epo araresapo. Arirakano Isiraya aporo hinamomo epoko raiparaka rakirapo.”

Aiyaka Mariamo somesapo.

<sup>56</sup> Aiyaka someaka faraka, Mariane Irísapetemo apea kake, ere maiya isia farakano, ipi apea paripusuapo.

*Yone he tapukumarerane takapesane oyapo.*

<sup>57</sup> Arirakano keseke Irísapeteane ipi hokosa takapeakosakipoko hokosa kaiyako heraka kayapo. Kaina ipi aporo hokosa takapesapo.

<sup>58</sup> Hokosa takaperakano asekea, Irísapete ipi kara seseraka kayapo. Arirakano eane Kotimo kára kamenakarakara araresasamo, Irísapetemo ipi aporo iramo soko, ipi apiamo aporo iramo soko, ipi hinamo ape hakásá toamo soko, namina suamo kara sesesapo.

<sup>59</sup> Hokosa takapesa sereane menorape hikia yape karimo, hokosane kau hahaeraka paterakano, aporo sarimasamo someraka, “Ipi wafayamo yano motosa Sekaráyane yano motoakosapo.”

<sup>60</sup> Aiyaka yano motoakosapoko asiane ipi kałyiamo someraka, “Wae, Yone yano motorkanapo.”

<sup>61</sup> Arirakano aporoamo someraka, “Nómo ní aporo ira, Yone yakosa meta reafapo. Ipi wafayamo aporo irane soko, Yone yakosa meta reafapo.”

<sup>62</sup> Aiyaka ipi wafayaki hokino susumo rakikia kairaka, “Nómo ní hokosane, epa yano motoakosare?” Aiyaka aseane, Sekaráyana ipi senaki tiraka, mé soko fasasamo, hokino susuamo tarisiapo.

<sup>63</sup> Tariraka, “Penesoroyaki pepayaki makasie.” Aiyaka tarirakano asekea, penesoro pepayaki eaki kasapo. Kaka aseane, epo poparaka, “Epo yano motosane Yonepo.” Aiyaka poparakanano aporo suamo asekea fofasapo.

<sup>64</sup> Maiya yiamo Sekaráyana mé fasane efera hunia koteaka somesapo. Koteaka somerakano ipi Kotiaki kara kekeresapo.

<sup>65</sup> Kekeresa maiya yiamo aporo hinamo ape hakásá risiamo aseraka someraka, “Manakanarakapo. Makata hakuane,” aiyaka somesapo. Someraka, aporo metákí soko, aporo metákí soko, makata su asesane, somepe pukua Yutía aporo metakira úria risiaki soko, somepe pusuapo.

<sup>66</sup> Somerakano ipu kaikia, kára hemakapuruka fofarako someraka, “Manoamo keseke mayiakanarakapo.” Aiyaka ipu suamo hemakapuruka somesapo. Arirakano Unihae Kotimo wakapuanne manoakiyaki rekenareapo, aiyaka ipu hemakapusuapo.

*Kotimo Sekaráyaki some kasane oyapo.*

<sup>67</sup> Maiya amo Sekaráyaki ipi himua Ho Kotesa káraraka reke Sekaráyamo Kotimo someane someraka,

<sup>68</sup> “Isiapo Isiraya aporo hinamomo Koti Unihae Kárane nōmo makáraraka kekererakanapo. Isu tipura arisia ayiáka risiane, isu arareraka tonotaehoko e perakanapo.

<sup>69</sup> Arirakano Kotimo makata rakira aporoane Tefetepo. Tefetepo aporo ira amo wainepe pesa anaka, pipu yumo epo isuane farimaka rakiakosakipoko fasereperakanapo.

<sup>70</sup> Wate fana Kotimo porofete aporomo someraka,

<sup>71</sup> ‘Re yunu aporomo rukuhamo Kotimo mafaihokosapo. Aporomo reaki hisiraka mokoat-ikirakan Kotimo mafasiakosapo.’

<sup>72</sup> Aiyaka porofete aporomo somerakano, isiapo makasa kaua kekemane kotimo kamenakarakara araresapo.

<sup>73</sup> Wate fana isiapo makasa kaua kekema Eparahameaki Kotimo someaka masapo. Epo aumaraka someraka,

<sup>74</sup> ‘Nómo someaka masane kakaro ayiakakosapo. Eparahame, nōmo aporo ira wainakosane yunu aporomo rukua fahokoamo nōmo mafaihokosapo. Mafairaka nōmo aporo ira wainakosane namina namonane nōmo mafahokosapo. Namonane mafaraka repo anopoko rakisimo nōmo ararehokosapo.

<sup>75</sup> Maiya suamo ereketaeraka risike koteaka susu risikiasimo nōmo ararehokosapo.’ Aiyaka Kotimo Eparahameaki somesapo.

<sup>76</sup> Arirakano nōmo hokosa one, Koti Káramo ipi porofete apororaka rekeakosapo. Epo Unihaepoko epo ikia kára fana maroporape pukusapo.

77 Puraka isu Yu aporo hinamo suaki someraka, ‘Keseke aporo meta aperamo re mafasiakosapo. Mafasikia repo himu watikisane epo mafahokosapo.’ Aiyaka hokosa omo some kakakosapo.

78 Arirakan Kotimo isupoko kára hemakapukua kamenakarakanapo. Hepene yapunaka faesane isu risia wo peakosapo.

79 Aporo katoraka risiaki faesane kakakosapo. Arirakan aporo kukuko makeraka risiane, faesamo kokoa aseakosapo. Isu auaraka risikiasimo ikia kara kotesa á pusimo epo tariakosapo.”

Aiyaka Sekaráyamo some kasapo.

80 Arirakan Yoneane ipi sisimaraka hokosa raua reke koteaka hemakapukua reapo. Reke ipi hoane soko koteaka wakapuaka reapo. Isiraya aporo hinamoaki some kakako pusiraka, fana ipi ima yaoa reapo.

## 2

*Yasu takapesane oyapo.*

*Matiu 1:18-25*

<sup>1</sup> Maiya amo Rome aporo hinamo suamo kamani unihae kárane, epo ipi yano motosa Sisa Okásatasepo. Epo Yu aporo hinamo soko i suane, unihaeaka asekea reapo. Aporo hinamo su yano motosa popahokosakipoko epo someraka, “Re su namina apea punie.” Asapo.

<sup>2</sup> Aisa maiya amo aporo hinamo su yano motosa kamanimo popanane kepomaresapo. Maiya amo kamani aporo Kuiriniasemo Síria hauaka hákasané asekea reapo.

<sup>3</sup> Asekea rea maiya amo aporo su namina apea yano popahoasimo pusuapo.

<sup>4</sup> Asiamo Yosefe soko, Kariri hauaka, Nasare apeane metakarikia, Yutía hauaka á hisiapo. Petereheme taonea wate fana unihae Tefete takapesa ape á Yosefe hikia, Yosefe ipi Tefetemo aporo ira wainesasamo ipi aporo ira kayakipoko, Petereheme taonea hisiapo.

<sup>5</sup> Hinaka ipi hinamo faisa Maria umiraka kayane soko, yano motosa popahoasimo tati hakasa hisiapo.

<sup>6</sup> Hinaka Maria ipi hokosa takapeakosa maiya amo Petereheme taonea kayapo.

<sup>7</sup> Kimisi peraka wará apeane tapesekeno asekea tetá saro ponomakaumo apea toapo. Toakipoko ipi hokosa fanane aporo hokosa takapesapo. Takaperakano saro ponomakaumo asane nasimo kesea taesakipoko, hokosa pasumo taporaka kesea motosapo.

*Saro sipi wafayaki hepene aporomo some kasane oyapo.*

<sup>8</sup> Maiya amo Petereheme taoneane makeraka, ereamo, saro sipi wafayamo namina saro pipiane yaoa asekea risiapo.

<sup>9</sup> Namina ayiáka asekea risike, aseane, Kotimo hepene aporo i risia á peraka Kotimo faesane fasereperaka, kára faerakan asekea i namoraka risiapo.

<sup>10</sup> Namoraka risikino hepene aporomo someraka, “Re namohokopo. Repo sesehoasimo some kotesanes nōmo reaki some kakakosapo. Someane aporo hinamo suamo kairaka sesehoskoso.

<sup>11</sup> Pipu, Tefetemo taone, Petereheme taonea, aporo hokosa takapesa amo aporo hinamo re suane mafasiakosapo. Unihae Keresoane epo.

<sup>12</sup> Asiamo nōmo someraka one repo asekea hemakapuraka, kakarohoareapo, aihokosapo. Asiamo re puraka makata aseakosane nōmo somerakanapo. Makata aseakosane oyapo. Saro ponoakaumo apea asane nasimo taesakipoko á, hokosa pasumo taporaka motosa warekeno, repo aseakosapo.”

<sup>13</sup> Airakan hepene aporo yakai metakira soko pekea Kotiaki kekereraka kesasapo.

<sup>14</sup> Kesaraká,

“Koti ipi kárapo. Ipi hepene yapura rekenapo. Hauaka wo aporoane epo aseraka sesenapo. Aporoane auaraka risikiasimo epo makoterakanapo.”

<sup>15</sup> Aiyaka kesaraká faraka i metakarikia hepene yapura poparihihiapo. Poparihinakan saro sipi wafaya namina susu someraka “Makata suane Kotimo isuaki somerakasane isiapo aseako Petereheme taonea purakapo.”

<sup>16</sup> Aiyaka i fofaaka pukua Mariape Yosefe tetá kope pusuapo. Kope pukua tetá asesapo. Asiamo saro ponomakaumo apea asane taesakipoko, hokosa motosa warekeno asesapo.

<sup>17</sup> Aseraka Mariape Yosefe tetáki ipu someraka, “Hokosa one hepene aporomo isuaki somerakasapo.”

<sup>18</sup> Aiyaka somerakan aporo hinamo metakiramo kaikia fofasapo.

<sup>19</sup> Fofarakano Mariamo ipu somesane hemakapukua kayapo. Épo merarusafapo.

<sup>20</sup> Arirakan hokosane saro sipi wafaya amo asekea Kotiane makáraraká kesarape poparipusuapo. “Kotimo makata ayiakakosaposane kakaro yasiapo. Kakaro yasiane

isiapo asesapo. Makata asesane soko, makata kaisiane soko, seserakanapo." Aiyaka ipu kesarape poparipusuapo.

*Yasu yano motosane oyapo.*

<sup>21</sup> Sokō hakásá farakano, sere karimo kau hahaeraka patesa maiya amo, hokosane, Yasu yano motosapo. Maria umihoasiraka fana kaya maiya amo, hepene aporomo yano motoaniesane, yano motosapo.

*Kotimo apea Yasu maka hisiane oyapo.*

22-24 Mosesemo somemane karáka, "Aporo hokosa fana takapesane Kotimo menapo. Aiyaka hemakapuraka mena nume mano tetá soko metao, mena korofe tetá soko metao, Kotiaki kakako pirisiti aporomo eke kima paiyakosapo." Aiyaka Mosesemo some kasapo. Some kasane Yasumo ipi kaiyiape ipi karikinesa wafaya tetapō kakimaka, hokosane maka Yarusarame sitia hisiapo. Hokosa fanane Kotimo ipi menapo. Aiyaka hemakapuruka mena mano tetá paikia Kotiaki kasapo. (*Kisim Bek 13:2, 12, 15; Wok Pris 12:8*)

<sup>25-26</sup> Arirakano Yarusarame sitia aporo yano motosa Símione reapo. E ereketaeraka reke Kotimo someane kakimaka reapo. Isiraya aporoane Kotimo ararehokosapo aisane aseako, epo kau reke, Ho Kotesane eyaki hakasa reapo. Ho Kotesamo eaki someraka, "Né kukusiraka reke, mafasira aporo Keresoane Unihae Kotimo pusiehokosapo. Aisane nómō aseakosapo." Airakano Símionemo kakimaka reapo.

<sup>27</sup> E reakipoko Ho Kotesamo e himua someraka, "Kotimo apea né hisie." Airakano kaikia, Kotimo apea hikia pauraka aseane, Yosefepé Maria tetapō tati hokosane maka perakano asesapo. Kotimo somemane motosane rakiako hemakapuruka Kotimo apea maka perakano,

<sup>28</sup> hokosane Símionemo ketaka maka, Kotiaki susesapo.

<sup>29</sup> Epo Kotiaki suseaka someraka,

"Kotio, nómō anoaki some karakasuane mano ane oyapo. Yumo ano kuane siahoasireapo.

<sup>30</sup> Isu Isiraya aporo hinamo farimakosa aporoane pipu nómō himo aserakanapo.

<sup>31-32</sup> E ipi hákasa faesapo. Epo faesane soko, Koti neane soko, hokosa omo Yu aporo hoanafonosaki tariakosapo. Isu Yu aporoane makárahoasimo nómō hokosa pusiesapo. Makata one aporo suamo hemakapusimo nómō ayíáka arakire.

<sup>33</sup> Aiyaka somerakano Símionemo someane hokosa amo karikinesa wafayape\* kaiyia tetapō kairaka, "Kepoane yakaparakapo." Aiyaka hemakapusuapo.

<sup>34</sup> Aiyaka hemakapurakano Kotimo tetáne makotehoasimo Símionemo tetáki some kasapo. Some kaka faraka Mariaki Símionemo someraka, "Hokosa one Kotimo murikimasapo. Epo Kotiane aporo hinamoaki tariasimo e Kotimo pusiesapo. Pusiesane perakano aporo metakiramo eaki hisiraka mainamarekea mokoatikihokosapo. Asiamo e pesasamo Isiraya aporo hinamo metakirane Kotimo farimakosapo. Arirakano metakirane marutaehokosapo.

<sup>35</sup> Aporomo mainamarekea ipu namina hemakapuruka mahamekeea risiane mafeke-marakano epo aseakosapo. Ayíáka rakirakano, Maria, né, taremo karesa tena ayíáka, ipu mainamarekea mokoatikirakano, nómō aseraka, ne himu kára nekeia hemakapuruka hisiraka himu tehokosapo." Aiyaka Símionemo Mariaki somesapo.

<sup>36</sup> Arirakano Kotimo someane kaira porofete hinamo yano motosa Ana kayapo. Anamo ipi wafaya yano motosa Fanuopo. Ipi aporo ira yano motosa Ásapo. Fana e aporomo arumaka kake, keremisi yatipinusu faraka ipi apiane kusuapo.

<sup>37</sup> Kurakano e yaro kake keremisi aiti fo amo (84) e yaro kayapo. Ayíáka Ana ipi kake sisimarakia, Kotiane merarusafapo. Ereamo soko, máiyamo soko, epo Kotiaki kekerenapo. Arirakano maiya suamo epo makata nakosane sokoairaka kake, Kotiaki kurikurisapo.

<sup>38</sup> Arirakano Yarusarame aporo hinamomo someraka "Isu mafasiakosa aporo Kotimo pusiehokosapo." Aiyaka ipu hemakapuruka kau risiapo. Arirakano Mariape Yosefe tetapō Kotimo apea hokosane maka pesa maiya amo, hinamo Ana Kotimo apea pekea iane aseraka Kotiaki susesapo. Suseraka Anamo hokosa ane tariraka someraka, "Isu mafasiakosane hokosa oyapo." Aiyaka Anamo somesapo.

<sup>39</sup> Unihae Kotimo somemane kasane Mariape Yosefe tetapō kakimaka rakikia faraka, Yarusarame sitiane metakarikia Kariri hauaka poparipukua, tetapō tati ape Nasare apea poparipusuapo. Apea poparipukua risiapo.

<sup>40</sup> Apea risike Yasu ipi hokosa kara reapo. Ipi wakapuaka reke ipi koteaka hemakapurakano eane Kotimo makotesapo.

*Kotimo apea Yasu pusuane oyapo.*

\* <sup>2:33:</sup> Kotiane kakaro Yasumo Atapo. Arirakano hauaka wo Yosefane Yasumo ipi sama asiapo.

<sup>41</sup> Keremisi suamo Yarusarame sitia Ape Farimaresane Hemakapuko<sup>†</sup> Hokono Kerapo. Asiasamo Yasumo ipi kaťia soko, ipi karikinesa wafaya soko, tetā sarimahoko hirapo.

<sup>42</sup> Hikianasamo Yasu ipi keremisi kenosu rea maiya amo Yasu soko karikia hisiapo.

<sup>43</sup> Yasumo ipi kaťiape ipi karikinesa wafaya tetā hokono kekeia soraka apea popari-pusuapo. Poparipurakano Yasu ipi Yarusarame siti yia pariraka kayapo.

<sup>44</sup> Kayakipoko ipi kaťiape ipi karikinesa wafaya tetapō hemakapuraka, "E fana purakasiapo." Aiyaka hemakapukua tetā pusuapo. Pukua yao nenehoramo Yasuane wára ka kosapo. Kokoa fasekeno ipi aporo iraki soko, ipi aporo tákaki soko, kairaka, "Yasuane repo asesare?" Airakano aporo ipu someraka, "Isiapo eane asesafapo."

<sup>45</sup> Airakano ipi kaťiape ipi karikinesa wafaya tetā efera hunia Yarusarame sitia Yasuane kope poparihihiapo.

<sup>46</sup> Poparihihiapo yape tetā waka, yape isiamo Kotimo apea hikia aseane, Yu aporo tisa aporoyaki hakasa Yasuane kakeno asesapo. Aseane, tisa aporomo makata somerakano, Yasumo kairaka kakeno asesapo. Arirakano epo soko tisa aporoaki akai kairaka kayapo.

<sup>47</sup> Yasumo nenakamaka mokome somehoanafonoraka, koteaka somerakano, aporo su toamo kairaka fosasapo.

<sup>48</sup> Aiyaka somerakano asekeia, ipi kaťiape ipi karikinesa wafaya tetā fofasapo. Fofaraka ipi kaťihamo eaki someraka, "Mano neao, né wo marirakano parisare? Ní ata etapo ne koane fasekeno himu fasapo."

<sup>49</sup> Airakano epo someraka, "Marirakano mokome kope pusuare? Fana yia nōmo Atamo ape wo aseako peafokore? Nōmo Atamo ape wo aseako pesa satiki ano kakeno asekeafunupo."

<sup>50</sup> Airakano epo someane ipi karikinesa wafayape ipi kaťia tetapō, koteaka hemakapu-suafapo.

<sup>51</sup> Arirakano Yasu ipi kaťia ipi karikinesa wafayayaki hakasa Nasare apea popari-pusuapo. Tetapō someane Yasumo koaretaesafapo. Anakano makata su asesane ipi kaťihamo merarusafapo.

<sup>52</sup> Asiamo Yasuane káraraka ipi himumo hemakapusuane soko koteaka hemakapukua, ipi kauane soko koteaka káraraka, aiyáka rekeno, aporomo aseraka eaki kara sesesapo. Arirakano Kotimo soko eaki kara sesesapo.

### 3

*Yone he tapukumareramo some kasane oyapo.*

*Matiu 3:1-12; Maka 1:1-8; Yone 1:19-28*

<sup>1</sup> Unihae Sisa Taipiriasemo Rome aporo hinamo suane asekeia reke, e unihae káraraka reapo. E unihaeraeka reamo, Keremisi senaki suane (14) faraka, Keremisi pare amo (15) Yutia hauakane Potiase Pairatemo ipi unihae wakasemaraka asekeia reapo. Arirakano Kariri hauakane Herotemo ipi unihae wakasemaraka asekeia reapo. Arirakano Ituria hauakane soko, Tekonaitisi hauakane soko, Herotemo mamanea Firipimo unihae wakase-maraka asekeia reapo. Arirakano Apirini hauakane Riseniasemo unihae wakasemaraka asekeia reapo.

<sup>2</sup> Arirakano maiya amo Anasepe Kaiafase tetā pirisiti aporo fanaraka risiapo. Maiya amo Sekaráyamo maeya Yoneane, ima yaoa reke, Kotimo somerakano kaisiapo.

<sup>3</sup> Kaikia he Yotane fu hauaka a koraka reapo. Koraka reke epo some karáka, "Repo himu watikisane Kotimo mafahoasimo makata watikisane metakarikia, eaki risikiako parirasie. Risiako parirakano, nōmo re hea tapukumuriakosapo," aisapo.

<sup>4</sup> Aisane aihoasiraka wate fana porofete aporo Aesayamo sawia popasane oyapo. "Aporo meta yao kauanea rekeakosapo. Á reke epo sakepamo someraka, 'Unihae peakosane ikia kara makotehoanie. Ikia kara hahaesekeno maereketaehoanie.'

<sup>5</sup> Harusekeno suahoanie. Uri wakasema soko, ūri kára soko rekeno, pateketaehoanie. Hahaesekeno maereketaehoanie. Eke soko ira pilinu soko tokeno takikia mokoatehoanie.

<sup>6</sup> Aiyáka rakirakano reane Kotimo mafasiakosapo. Mafasirakano aporo hinamo suamo aseakosapo.' Aiyaka aporoamo some kakakosapo."

Aiyaka some kakakosa aporoane Aesayamo Kotimo sawia popasane Yone ipipo. (*Aisaia 40:3-5*)

<sup>7</sup> Yone reakipoko aseane, aporo yakai Yonemo i hea tapukumuriasimo perakano, asekeia, Yonemo iaki someraka, "Re su heseke ayireapo. Kotimo re suane saperaka fanasihokosapo. Kotimo fanasinapaka epamo reaki somerakano, re tekedarikia perakanare?"

<sup>†</sup> 2:41: Sawi fariakoa Ape Farimaresane Hemakapuko Hokono Kerane some kepoane á asekeanie.

<sup>8</sup> Arirakano ira kotesamo wate koteaka perapo. Ira wate koteaka apera ayíáka, repo himu watikisane metakarikia, risikiako parisane asekeasimo koteaka susu risikianie. Ayíáka hemakapukua risikiafunusa nine repo hemakapuraka, ‘Isu Eparahamemo aporo ira risiasamo Kotimo aporoane isupo. Asiamo isu siaraka risikinapo.’ Repo ayíáka hemakapukupo. Re Kotimo aporofapo. Eparahamemo ainane kotesapo. Repo ainane watikihoareapo. Asiamo Eparahamemo aporo ira parihoasimo, eke one Kotimo aporomo maparihoane, sia aporomo parihiokosapo.

<sup>9</sup> Asiamo aporomo ira tokohokosakipoko kapi máfaraka area ayíáka, maiya omo Kotimo fanasihokosane soko, ayíáka makeraka rekenapo. Ira wate koteaka peanafonona irane, tokoraka, mokoateraka iramo inakasimo ira paiyakosapo.”

<sup>10</sup> Aiyáka Yonemo somerakano aporo yakai sarimasamo someraka, “Isiapo yakapa rakiakosare?”

<sup>11</sup> Arirakano Yonemo someraka, “Repo aporo metamo pasu tetá toamo, pasu hakásá meta maka, aporo meta pasu fasane kakanie. Arirakano repo aporo metamo makata nakosa tokeno, parakuraka, aporo makata nakosa fasane kakanie.” Aisapo.

<sup>12</sup> Arirakano takese mora aporo hea tapukumuriasimo peraka someraka, “Tisao, isiapo yakapa rakiakosare?”

<sup>13</sup> Arirakano Yonemo someraka, “Takese mone mora yaiya mokoanie. Mone meta hakimakopo.” Aisapo.

<sup>14</sup> Arirakano aporo terakaiyamosamo someraka, “Isiapo yakapa rakiakosare?” Airakano Yonemo someraka, “Mone hakimokoako aporo rukupo. Mone hakimokoako kotafe topakamaraka hukurukupo. Makata rakisiapoko makata ropo karakáno, repo seseaka makanie. “Makata ropo one siahoasifareapo.” Aihokopo.”

<sup>15</sup> Aiyáka Yonemo somerakano, kaikia, aporo hinamomo hemakapuraka, “Mafasira aporo, Kereso peakosaposane apera ayare?” Aiyáka hemakapukua asekea toapo.

<sup>16</sup> Asekea toakipoko aporo hinamo suaki Yonemo someraka, “Re nōmó hea hákasa tapukumurirakanapo. Hea tapukumurisiakipoko aporo kára meta keske peakosapo. Aporoane aperamo epo re Ho Kotesa soko ira rufi soko<sup>\*</sup> muriakosapo. Arirakano aporo káramo tamaka ane aporo raipamo fisinapo. Fisina ayíáka ano wakasemasasamo epo tamaka ane nōmó fisihoane siahoasifareapo. E aporo kárasasamo nōmó epoko raiparaka rakiako ayiane soko, ano wakasemasasamo, nōmó rakiane siahoasifareapo. Ano eyaki siasafapo.

<sup>17</sup> Aporo kárane peraka, epo sipete asia foke maka peakosapo. Maka peraka hauaka moroa witi hae taesane fokemo fauhoeane witi namoane ereketae hurupeperakano ane mokoa apea taehokosapo. Witi kauane fofomo mokoa pukua takua hurupeperakano ane mokoa ira rufi kopakapunafonona a paiyakosapo.”

<sup>18</sup> Aiyáka Yonemo some kasá ayíáka, some meta soko some kaka, hunia soko some kaka, hunia soko some kaka, ayíáka Kotimo some kotesane epo aporo hinamoaki some kasapo. Ipu koteaka hemakapusimo some kasapo.

*Herotemo Yone hea tapukumarerane tipura makesane oyapo.*

<sup>19</sup> Arirakano Herotemo Kariri hauaka asekea rea maiya amo, ipi mamanea Firipimo asea, Herótiae ane, Herotemo haki arumaka reapo. Epo makata watikisa suane rakiakano, asekea, Yonemo saperaka someraka, “Ne watikirareapo. Ayiakakopo.”

<sup>20</sup> Arirakano Herotemo ipi fana watikiaka rakisia, yaiya efera hunia soko, watikiaka rakiraka, Yoneane tipura makesapo.

*Yasuane Yonemo hea tapukumaresane oyapo.*

*Matiu 3:13-17; Maka 1:9-11; Yone 1:29-34*

<sup>21</sup> Yone tipura makeasiraka rea maiya amo, aporo hinamo su Yonemo hea tapukumurisiapo. Aporo hinamo suane hea tapukumurikia faraka, Yasu soko hea tapukumaresapo. Hea tapukumarerakano Yasumo kurikuriraka reke, aseane, tiane kikisi akā kikisi rorakano asekea reakipoko,

<sup>22</sup> Ho Kotesa mena nume asia, Yasu rea pesapo. Perakano hepene aeyaka Kotimo someraka, “Né, nōmó ní hokosapo. Né nōmó himu tumurumo kára hemakapukua seserakanapo.” Aiyáka hepene aeyaka somesapo.

*Yasumo aporo irane oyapo*

*Matiu 1:1-17*

<sup>23</sup> Yasu reke Keremisi tuaneti naene su (29) faraka, Keremisi teti (30) amo makata rakirane kepomaresapo. Aporomo hemakapuraka Yasumo ipi atane Yosefepo. Aiyáka hemakapusuapo.

\* **3:16:** Ira rufiamo aporomanomo makata watikisane pailakosapo.

Yosefeane Hiraimo hokusapo.

24 Hiraiane Mátatemo hokusapo. Mátateane Rífaimo hokusapo. Rífaiane Méaokaimo hokusapo. Méaokaiane Yánaimo hokusapo. Yánaiane Yosefemo hokusapo.

25 Yosefeane Matataíasemo hokusapo. Matataíaseane Emosemo hokusapo. Emoseane Neamemo hokusapo. Neameane Esiraimo hokusapo. Esiraiane Nákaimo hokusapo.

26 Nákaiane Méatamo hokusapo. Méatane Matataíasemo hokusapo. Matataíaseane Sémenemo hokusapo. Sémenane Yósekemo hokusapo. Yósekeane Yótamo hokusapo.

27 Yótane Yóananemo hokusapo. Yóananeane Réسامو hokusapo. Réسامe Serápapeomo hokusapo. Serápapeoane Siátiomo hokusapo. Siátioane Néraimo hokusapo.

28 Néraiane Méaokaimo hokusapo. Méaokaiane Etaimo hokusapo. Etaiane Kosamemo hokusapo. Kosameane Eremétamemo hokusapo. Eremétameane Eamo hokusapo.

29 Eane Yosuamo hokusapo. Yosuane Eriésamo hokusapo. Eriésane Yórimemo hokusapo. Yórimeané Mátatemo hokusapo. Mátateane Rífaimo hokusapo.

30 Rífaiane Símonemo hokusapo. Símioneane Yutamo hokusapo. Yutane Yosefemo hokusapo. Yosefeane Yonamemo hokusapo. Yonameane Eraiyakimemo hokusapo.

31 Eraiyakimeane Méreamo hokusapo. Méreane Ménamo hokusapo. Ménane Mátatamo hokusapo. Mátatane Nétanemo hokusapo. Nétaneane Tefetemo hokusapo.

32 Tefeteane Yésemō hokusapo. Yéseane Opetemo hokusapo. Opeteane Póasemo hokusapo. Póaseane Saómonemo hokusapo. Saómoneane Násionemo hokusapo.

33 Násoneane Amínatapemo hokusapo. Amínatapeane Ataminímo hokusapo. Ataminiane Anaimo hokusapo. Anaiane Héseronemo hokusapo. Héseroneane Péresemo hokusapo. Péreseane Yutamo hokusapo.

34 Yutane Yakopemo hokusapo. Yakopeane Aisakemo hokusapo. Aisakeane Eparahamemo hokusapo. Eparahameane Teramo hokusapo. Terane Nahoremo hokusapo.

35 Nahoreane Serakemo hokusapo. Serakeane Riyumo hokusapo. Riyuane Perekemo hokusapo. Perekeane Ipamo hokusapo. Ipane Siramo hokusapo.

36 Sirane Kenanemo hokusapo. Kenaneane Afasatemo hokusapo. Afasateane Sememo hokusapo. Semeane Noamo hokusapo. Noane Remekemo hokusapo.

37 Remekeane Metuseramo hokusapo. Metuserane Inokemo hokusapo. Inokeane Yaretemo hokusapo. Yareteane Maharariomo hokusapo. Mahararioane Kenanemo hokusapo.

38 Kenaneane Inosimo hokusapo. Inosiane Setemo hokusapo. Seteane Atamemo hokusapo. Atameane Kotimo hokusapo.<sup>†</sup>

## 4

*Yasumo watikiaka rakísimo Satanemo mokopipisane oyapo.*

*Matiu 4:1-11; Maka 1:12-13*

1 Yasuane hea tapukumareka reakipoko, Ho Kotesane Yasu ipi himua káraraka komarukua reke, he Yótane ane metakarikia pariperakano, Ho Kotesamo e karikia pukua,

2 ima yaoa sere foti amo (40) karikia reapo. Rea maiya amo Satanemo Yasuane mokopipisapo. Arirakano sere foti amo Yasumo makata nesafapo. Nena himu raru reke sere fotiane (40) fahoane Yasuane namo kakaro kára meamosapo.

3 Meamoraka reakipoko Satanemo Yasu kau aseakosakipoko mokopipiraka someraka, Né Kotimo hokusasamo nómō eke akayane maka, ní nakosakipoko farawa maparisie."

4 Airakano Yasumo someraka, "Wae, Kotimo sawia popasane oyapo. 'Aporomano koteaka rekeako, farawa hákasa nenaka koteaka rerafapo.' Aiyaka Kotimo sawia popahoareapo." (Lo 8:3)

5 Aiyaka somerakano, Satanemo Yasuane üria karikia hisiapo. Hikia üri teraya risike, kamani kekepomo hauaka kekepoane unihaeaka asekea risia hauaka suane foakayia Yasuaki tarisiapo.

6 Tariraka someraka, "Hauaka suane soko hauaka á makata su namo kakaro kotesane soko, anoaki kasapo. Kasane nómō ní hemakapukua aporo metaki kakakosapo.

7 Asiasamo nómō anoaki kekererakano, makata ane su nómō néaki kakakosapo."

8 Airakano Yasumo someraka, "Wae, Kotimo sawia popasane oyapo. 'Nómō Unihaeane Kotipo. Koti ipiaki hákasa kekerehoanie. Epoko hákasa rakinie.' Aiyaka Kotimo sawia popahoareapo." (Lo 6:13-14)

9 Aiyaka Yasumo somerakano, Satanemo Yasuane Yarusarame sitia karikia hikia, Kotimo ape kopo yapura karikia hikia risike someraka, "Né Kotimo hokusasamo, ní yia hauaka atura hurupesie.

<sup>†</sup> 3:38: Atameane Kotimo ipi rakisiaamo Kotimo hokusapo, airapo.

<sup>10</sup> Huruperakano Kotimo hepene aporoaki someraka, 'E ararerasie,' airakano ipu né mafairaka rekeakosapo.

<sup>11</sup> Né korakea ekemo kareakohoamo hepene aporomo hokonomo né máfaraka maka rekeakosapo. Aiyaka Kotimo sawia popahoareapo." *(Buk Song 91:11-12)*

<sup>12</sup> Airakano Yasumo someraka, "Kotimo some meta Kotimo sawia popasane oyapo. 'Ní Unihae Kotiane kau aseakosakipoko ayiakakopo.' Aiyaka Kotimo sawia popahoareapo." *(Lo 6:16)*

<sup>13</sup> Aiyaka Yasumo somerakano, Satanemo Yasuaki mokopipisane metakarikia pusuapo. Pukua Satanemo hemakapuraka, "Maiya metamo nōmo e mokopipiraka aseakanapo." Aiyaka Satanemo hemakapukua pusuapo.

*Kariri hauaka á Yasumo makata rakira kepomaresane oyapo.*

*Matiu 4:12-17; Maka 1:14-15*

<sup>14</sup> Yasu ipi himua Ho Kotesane káraraka reke, Yasu Kariri hauaka á paripusuapo. Yasu Kariri hauaka pukua reke, Yasumo uyáka rakirakanaporakano kaikia, Kariri hauaka aeyaka aporo hinamo suamo kaisiapo.

<sup>15</sup> Airakano Yu aporomo sarimana ape yakaia Yasumo some karakano, aporo hinamo suamo kaikia eaki kekeresapo.

*Nasare taonea Yasumo some karakano aporomo kakipayasane oyapo.*

*Matiu 13:53-58; Maka 6:1-6*

<sup>16</sup> Nasare taonea Yasu ipi hokosa mano reane, ape á reke yia, ipi káraraka hokosa raua reapo. Arirakano Nasare taonea Yasu paripusuapo. Fenena maiya suamo, Yu aporomo sarimana apea Yasu pukuanasamo, Yasu Nasare taonea puraka, Yu aporomo sarimana apeá soko, e pusuapo. Pukua, Kotimo sawi menohoko takahiane,

<sup>17</sup> eaki porofete aporo Aesayamo sawi popasane eaki karakano epo maka, mafisiraka menosapo. Popasane úyaka menosapo.

<sup>18</sup> Yasumo menoraka,

"Unihae Kotimo ano murikimasasamo epo Ho Kotesane anoaki karakano ano himua rekenapo. Aporo makata forosaki some kotesane nōmo some kakasimo Kotimo ano murikimasapo. Arirakano aporo hinamo tipura kesa, 'Re tonotaehokosapo.' Aiyaka somehoko pusierakano ano pesapo. Aporo hinamo hi fausane faraka, efera hunia koteaka asekeasimo ano pusierakano pesapo. Aporo hinamo metakira yunu aporomo karikia pusuane pasimokoako pusierakano ano pesapo.

<sup>19</sup> 'Keremisi omo Kotimo aporo hinamoane makotehokosapo.' Aiyaka nōmo somehoko pusierakano ano pesapo." *(Aisaia 61:1-2)*

Aiyaka popasane Yasumo menosapo.

<sup>20</sup> Menoraka faraka sawiane takosapo. Takosane sawiane Yu aporomo sarimana apeane asekea rea aporoaki kaka marekea, e asekea kayapo. Kakeno aporo hinamo suamo Yasumo yakapa somerakarihoamo e aseraka risiapo.

<sup>21</sup> Aseraka risikino Yasumo i asekea someraka, "Sawiane nōmo menorakano repo kaikia arisiamo makata ayiakakosapo, aiyaka popasane, pipu yumo faserepeareapo."

<sup>22</sup> Airakano aporo hinamo ipu someraka "Ao, koterakae," aisapo. Ayiáka ipu namina himumo hemakapuraka, "Epo some akarane some kotesapo. Some kotesane maiyakanarakapo," aiyaka namina susu hemakapusuapo. Arirakano ipu someraka, "E Yosefemo hokosafae?"

<sup>23</sup> Airakano Yasumo iaki someraka, "Repo anoaki yapake someraka, 'Mitikoro, nōmo ní makata takamasane fana mafahoanie.' Aiyaka repo anoaki some meta someraka, 'Kapaname taonea nōmo makata rakisiapakano isiapo kairaka, nōmo ní ape wo soko aiyáka rakinie.' Aiyaka repo anoaki somehokosapo.

<sup>24</sup> Airakano nōmo reaki kakaro somerakaripo. Kotimo some kará porofete aporomo someane ipi ape sumu á aporo hinamo hakása risiimo kakimarafadapo.

<sup>25</sup> Hao, kaisie. Nōmo reaki kakaro somerakaripo. Some kepoane oyapo. Fana Iraiáya rea maiya amo, Yu hinamo yaro yakai toapo. Maiya amo keremisi isia faraka, keremisi kitafa amo, ere maiya namasu amo, kupa kára karaka hauaka sua makata nakosane fasapo.

<sup>26</sup> Makata nakosa farakano asekea, Iraiáye Yu aporomo hauaka á aporo hinamo ararehoko Kotimo pusiesafapo. Yu hinamo yaro yakai toane ararehoko pusiesafapo. Yu aporohoanafonosamo hauaka meta pusiesapo. Saetone hauaka á pukua, Sarefa apea hinamo yaro kayane ararehoko pusiesapo.

<sup>27</sup> Airakano fana porofete aporo Iraísa rea maiya amo, Isiraya hauaka á Yu aporo risiane aporo toropakesa yakai risiapo. Risiane i suane mafasafapo. Arirakano Yu aporo hoanafonosamo hauaka Siria aporo hakása meta, yano motosa Neamane, e toropakesa rekeno e hakása mafasapo."

<sup>28</sup> Aíyaka Yasumo somerakano aporo hinamo su Yu aporomo sarimana apea toamo kairaka, ipu kakaro kara sapesapo.

<sup>29</sup> Saperaka takahihiraka, Yasuane waseremaka karikia pukua, apeane metakarikia ūri faea hikia ūri teraya aeyaka, feseremosá á Yasu makasuhokosakipoko

<sup>30</sup> asiane, Yasumo ipi aseraka, ipi yia rea nine puraka fasapo.

*Yatafumo aporo ho masane Yasumo mafasane oyapo.*

*Maka 1:21-28*

<sup>31</sup> Yasu pukua Kariri hauaka Kapaneame taonea pausapo. Pauraka fenena maiya amo some kasapo.

<sup>32</sup> Some karakano aporo hinamomo kaikia himu faraka fofasapo. Epo wakapuaka some karakano kaikia "Someane enahoasifareapo." Aíyaka aporo hinamo suane fofasapo.

<sup>33</sup> Arirakano Yu aporomo sarimana apea aporo hakásá meta, yatafumo e ho masa reke, epo sakepamo wáraka someraka,

<sup>34</sup> "Ae, ae, Yasu né Nasare aporopo. Nómó isu mayiakakosare? Isu mokoatikihoko pesare? Né nómó aserapo. Né Kotimo pusiesane, né ipi hokosa namo kakaro kotesapo."

<sup>35</sup> Airakano Yasumo yatafuaki someraka, "Nómó mehokopo. Nómó aporo ho masane metakarikia né pusie." Airakano aporo hinamo risia arakaru tipia, yatafumo aporo ho masane hauaka atura makasuraka marekea aporoane kakaro mokoatikihoanafonoraka, aporo ho masane yatafumo metakarikia pusuapo.

<sup>36</sup> Purakano aporo hinamo su sarimaraka risiamo asekea, fofaraka namina susu someraka, "Someane marirakanarakapo. Aporo káramo somera ayíáka epo wakapuaka someraka, yatafu pusierakano, yatafumo kakimaka apure," aisapo.

<sup>37</sup> Ayíáka rakirakano asekea hauaka makea aporo hinamo risia suaki "Yasumo uyáka rakisiapo." Airakano aporo hinamo suamo kaisiapo.

*Aporo hinamo yakai makata tasa Yasumo mafasane oyapo.*

*Matiu 8:14-17; Maka 1:29-34*

<sup>38</sup> Yasu takahikia Yu aporomo sarimana apeane metakarikia pukua, Saemonemo apea yorosapo. Yoroane Saemonemo ipi aseamo kaiyia kau kára sisipuraka, makata takamarakano, e mafahoasimo ipu Yasuaki somesapo.

<sup>39</sup> Somerakano hinamo makata takamasa warea á Yasu pukua asekea, reke, e kau kara sisipusaki Yasumo wakapuaka someraka, "Kau sisipu, né metakarikia pusie." Airakano kau sisipuane fasapo. Faraka, wate foaka hinamo ane takahikia, ipoko makata nakosa paikia kasapo.

<sup>40</sup> Arirakano wakasema nina maiya tuakeramo, aporo hinamomo namina aporo hinamo táké metakirane makata tasa Yasu rea karikia pesapo. Karikia perakano i makata tasa suane Yasumo hokonomo sakaihoe su fasapo.

<sup>41</sup> Arirakano aporo hinamo yakai yatafumo i ho mosane, yatafumo iane metakarikia wárake puraka someraka, "Né Kotimo hokosapo." Airakano Yasumo iaki sakepamo someraka, "Repo mehokopo," aisapo. Ipu "Aporo hinamo suane mafasiasimo, Yasuane Kotimo murikimasapo. Asiamo e Keresopo." Aíyaka ipu hemakapusuasamo Yasumo iaki "Mehokopo," aisapo.

*Ape sumu kekepoa Yasumo some kakako pusuane oyapo.*

*Maka 1:35-38*

<sup>42</sup> Mituru fiarakan Kapaneame taoneane Yasumo metakarikia, kamaka nena yaoa aporo fasakipoko pusuapo. Pusuakipoko ipu Yasuane kokoa, aseraka someraka, "Isiapo apeane metakarikia pukupo."

<sup>43</sup> Airakano Yasumo someraka "Ano ape metakira á soko some kotesane some kakako pukusapo. Koti unihaeaka reane some kakako Kotimo ano pusiesapo."

<sup>44</sup> Aíyaka Yasu pukua Yutía hauaka koraka reke, ape sumu meta Yu aporomo sarimana apea some kaka, ape sumu meta á soko Yu aporomo sarimana apea some kaka, ayíáka some kape puraka reapo.

## 5

*Yasumo aporo hakásá pura murikimasane oyapo.*

*Matiu 4:18-22; Maka 1:16-20*

<sup>1</sup> He kekeia kaya, he Kenesarete<sup>\*</sup> fua Yasu rea maiya amo, aporo hinamo suamo Kotimo someane kaiyako pesapo. Kaiyako peraka aporo hinamo su sarimaraka, hauaka á taperakano, metakira kekefokeforaka, metakiramo hokonomo koaka taeraka pekea, kaikia risikino asesapo.

\* 5:1: He Kariri yano motosa metane He Kenesaretelo.

<sup>2</sup> Arirakano Yasumo aseane pokoa mora aporoamo ipu namina kasuane metakarikia, kasipuane kusuraka risike, kasu tetákara karíkimaresekene asesapo.

<sup>3</sup> Arirakano Yasuane Saemonemo kasua ripaka reapo. Ripaka reke Saemoneaki Yasumo someraka, "He fe wakasema makeraka rokoa pusie," aisapo. Aiyaka puraka Yasu kasu tua kake, aporo hinamo he fua risiaki some kasapo.

<sup>4</sup> Some kaka faraka, Saemoneaki Yasumo someraka, "He numu aeyaka rokoa pusie. Puraka risike pokoa mokoako repo kasipuane mokoa hea kokomurisie."

<sup>5</sup> Airakano Saemonemo someraka, "Tisao, pipu ereamo isiapo kasipuane mokoa hea kokomuriraka risike, yao fiasane pokoa mosafapo. Pipu ereamo isu fenesafapo. Pokoa mokoanafonosa nine nōmo ayisierakano isiapo kakimaka kasipuane mokoa hea kokomurirakanapo," aisapo.

<sup>6</sup> Aiyaka kasipuane hea kokomurikia, kihiane pokoa yakai kára hatirimaka pusuane su kasipuas kesapo. Keraka umiraka kasipu ane potakaheakorakano asekea,

<sup>7</sup> kasu meta ipu namina moremo kasuane tapukurekeno aseraka, hokono haesapo. Hokono haerakan, kasuane soko rokoa pekea, kasu tetákara pokoamo komarusuapo. Komaruraka umiraka, kasu hea kenepeahopopo.

<sup>8</sup> Arirakano kasu pokoamo komarusuane Saemone Pitamo aseraka, Yasu rea kakuna porokoa kake someraka, "Unihaeo, ano himu watikisapo. Né anoyaki hakāsa reke siahosifareapo."

<sup>9</sup> Aiyaka epo soko namina suamo pokoa sakepamo mosane aseraka kara fofasapo.

<sup>10</sup> Arirakano Sepetemo maeya Yamesepe Yone tēta Saemoneyaki hakāsa makata rakira aporopo. Tēta soko fofasapo. Arirakano Saemoneaki Yasumo someraka, "Ne namohokopo. Nōmo pokoa amora ayiáka, aporo hinamo ane ano patera asekeasimo nōmo ayiáka pasimokoakosapo," aisapo.

<sup>11</sup> Arirakano i kasu rokoa, he fea pukua kasu matapea kasuane karimarekeea, makata su yia metakarikia i Yasuyaki hakāsa pusuapo.

*Aporo toropakesa Yasumo mafasane oyapo.*

*Matiu 8:1-4; Maka 1:40-45*

<sup>12</sup> Arirakano maiya metamo Yasuane ape meta reakipoko, aporo toropakesa pekea, Yasu ipi yano motosane kárapo, aiyaka hemakapukua, kakuna porokoa kake someraka, "Unihaeo, nōmo ano mafahoko seseraka soko metao, ne seserire?"

<sup>13</sup> Airakano Yasumo ipi hokono raeraka sakairaka someraka, "Ano seseripo. Né makata takamasane farasie." Aihoanine aporo toropakesane wate foakayia fasapo.

<sup>14</sup> Farakano Yasumo someraka, "Aporo metakiraki somehokopo. Pirisiti aporo rea pukua, né kau toropakesa fasane, pirisiti aporoaki tarinie. Tarikia, Mosesemo some-manemo ayiáka kakaniesane yaiya kakanie. Né mafasasamo makata yaku ayiáka kakanie. Ne fasane aporo hinamo suamo asekea hemakapusimo nōmo ayiáka kakanie." Aiyaka Yasumo somesapo.

<sup>15</sup> Asiakipoko Yasumo makata rakisiane aporo metamo asekea, aporo metaki someaka, arirakano aporo metamo aporo metaki someaka, aiyaka hauaka sua somepe pusuapo. Somerakano kaikia hauaka su aeyaka Yasumo someane kaiyakosakipoko aporo hinamo yakai pesapo. Arirakano aporo hinamo yakai makata tasane soko mafahoasimo pesapo. Perakano iane Yasumo mafasapo.

<sup>16</sup> Mafaráka rea maiya amo, Yasu ipi haku ima yaoa pukua reke, Kotiaki kurikurihoko puraka rerapo.

*Aporo korosakataesane Yasumo mafasane oyapo.*

*Matiu 9:1-8; Maka 2:1-12*

<sup>17</sup> Maiya metamo Yasumo some karakano Ferese aporo soko, Kotimo somemane tisa aporo soko, Kariri hauaka ape su aeyaka soko, Yutia hauaka ape su aeyaka soko, Yarusarame siti aeyaka soko, ape sumu su aeyaka pekea toapo. Aporo makata tasane Yasumo mafahoasimo Kotimo ipi wakapuane Yasuyaki hakasa reapo.

<sup>18</sup> Arirakano aporo metakiramo aporo korosakataesane fefeneakua makekeea maka pekea, Yasu rea apea maka pesapo. Maka pekea ape kakarua maka pukua Yasu hikumisi nenemea motoako pukusakipoko

<sup>19</sup> aseane, aporo hinamo yakai sarimaraka ape tapesekeno metakarisiapo. Metakarikia, ape kopoa maka hisiapo. Maka hikia ape kopoane feteketaeraka, aporo fefeneakua makesane ape kakarua Yasu rea, tau yia hurutapisiapo.

<sup>20</sup> Arirakano aporo korosakataesane maka pesa aporo kitafasuamo, aporo korosakataesane Yasumo mafahoasimo, ipu Yasuaki himu hakásaraka hemakapusuapo. Ipu himu hakásaraka hemakapukua maka perakano, Yasumo asekea, aporo fefeneakua makesaki someraka, "Né himu watikisane nōmo mafarakanaapo."

<sup>21</sup> Airakano Fere se aporomo soko, Kotimo somemane tisa aporomo soko, namina susu someraka, "Aporo himu watikisane mafarakana apo, airakane Kotimo ipi airaka sikirakae. Epo Kotiane mawakasemarakane, e epare? Aporo himu watikisane aporomo mafanafapo. Kotimo ipi hakasa mafanapo."

<sup>22</sup> Airakano ipu hemakapusuane Yasumo aseraka someraka "Repo marirakano ano mahokoparirakanare?"

<sup>23</sup> Aporo himu watikisane mafanane kárate? Aporo makata takamasa mafanane wakase-mare? Meta mane kárate? Meta mane wakasemare? Wae, tetákara hakasa yinesapo.

<sup>24</sup> Hao, kaisie. Aporomanomo Tákeane anopo. Hauaka wo aporo himu watikisane nōmo mafahoasimo, Kotimo ano murikimaka maresapo. Maresasamo repo asekeasimo, aporo korosakataesaki nōmo takahisierakanapo." Aiyaka aporo korosakataesaki Yasumo someraka, "Ne takahisie. Takahikia nōmo ní asakapuan maweroraka maka, né ní apea pusie."

<sup>25</sup> Airakano i hikumisia aporoane wate foaka takahikia ipi asakapuan maweroraka maka, ipi apea paripusuapo. Ipi puraka, Kotiaki kekererape pusuapo.

<sup>26</sup> Purakano aporo hinamo sarimasamo aseraka fofasapo. Fofaraka someraka, "Pipu makata haku aserakaripo." Aiyaka Kotiaki kara kekereraka somesapo.

*Yasumo Rífaiaiki peaesane oyapo.*

*Matiu 9:9-13; Maka 2:13-17*

<sup>27</sup> Aporo korosakataesane mafaraka, Yasu pukua aseane, takese mora aporo yano motosa Rífaiaiki<sup>†</sup> takese mora oposea kakeno asesapo. Aseraka Yasumo Rífaiaiki someraka, "Né, ano patera aseako peae."

<sup>28</sup> Airakano Rífaiaike takahikia makata su metakarikia, Yasu patera asekeea tati hakasa pusuapo.

<sup>29</sup> Puraka Rífaimo someraka, "Yasu né, nōmo apea makata nako peae." Airakano aporo takese mora watikiaka risiane soko, aporo metakira himu watikiaka risiane soko, sarimaraka, Yasuyaki hakasa Rífaimo apea makata nako sarimaraka toapo.

<sup>30</sup> Toke makata nenakano, Fere se aporomo soko ipu Yasumo aporo hakasa puraki someraka, "Aporo takese mora<sup>‡</sup> aporo soko aporo himu watikisa aiyaki, marirakano re iyaki hakasa toke makata nenakanare?"

<sup>31</sup> Airakano Yasumo someraka "Aporo koteaka reane mitikromo mafahoko e rea purafapo. Aporo makata takamasane mitikromo mafahoko e rea purapo.

<sup>32</sup> Aporo himu watikiaka risiamo himu watikisane rukupateraka metakarisimo, nōmo mafahoko ano perakayiapo. Aporo kotesane nōmo mafahoko ano perakayiafapo." Aiyaka Yasumo somesapo.

*Kotimo asekeasimo aporo hinamo suamo makata nakosa sokoainane, Yasumo some-sane oyapo.*

*Matiu 9:14-17; Maka 2:18-22*

<sup>33</sup> Aporo metakiramo Yasuaki someraka, "Yone hea tapukumareramo ipi aporo hakasa puramo makata nakosane sokoairaka Kotiaki kurikurinapo. Efera hunia soko, efira hunia soko, Fere se aporoaki patera asesa aporoamo soko makata nakosane sokoainapo. Arirakano nōmo aporo hakasa puramo he soko, makata nakosane soko sokoairakarifapo. Airakane marirakanore?"

<sup>34</sup> Airakano Yasumo takumeaka someraka, "Isiapo Yu aporomo ainane oyapo. Aporomo hinamo arumarakano, aporo suamo hokono keraka, seseraka, makata nenapo. Nenaka aporo hinamo kawe apia iyaki hakasa rekeno, aporo hinamo suamo himu hisihoanafon-raka, iyaki hakasa seseraka risike, makata nakosane soko sokoainafapo.

<sup>35</sup> Arirakano aporo, hinamo kawe apia ane, aporo metakiramo waseremaka apura maiamo, i himu hisiraka ipu makata nakosane sokoaihokoso," aisapo.

<sup>36</sup> Asiamo makata kawe rakirane soko, makata paté fana rakirane soko, sarimahokoh-oamo Yasumo takume meta someraka, "Pasu paté koasakipoko, pasu kawe resakamaka paremarekea irinafapo. Pasu kaweanne koahoane siahoasifareapo. Pasu kawee resakamaka, pasu paté paremarekea irihoane, tati sianafapo. Tatí kekeponapo.

<sup>37</sup> Arirakano saro nanikose kau aporomo maka petoro irinapo. Iriraka waene he kawee metekesane, petoro paté takamanafapo. Petoro patea takamarakano waene he kawemo ponoponoraka, petoro patééne fauhokosapo. Fauraka petoro kakeraka fetefeteraka, waene heane sakuriakosapo. Sakuriraka waene he soko, petoro soko, tetákara yi fahokosapo.

<sup>†</sup> 5:27: Rífa aye yano motosa meta Matiupo.

<sup>‡</sup> 5:30: Takese mora aporoamo mone sapeane hakimosapo. Anakano asekeea aporomo iaki sesesafapo.

<sup>38</sup> Asiamo waene he kawe metekesane petoro kawea takamakanie.

<sup>39</sup> Aporomo someraka, ‘Waene he patéane kotehoareapo. § Ane seseripo,’ airapo.” Aíyaka Yasumo takumeaka somesapo.

## 6

*Fenena maiya kepoane Yasumo somesane oyapo.*

*Matiu 12:1-8; Maka 2:23-28*

<sup>1</sup> Fenena maiya hakása metamo witi hemoa Yasu pusuapo. Pukua witi haeane ipi aporo hakása puramo tukua hokonomo sosokeraka nesapo.

<sup>2</sup> Nenakano, Fere se aporomo asekeea someraka, “Fenena maiya yaposane marirakano repo mamosorakanare?”

<sup>3-4</sup> Airakano Yasumo someraka, “Wate fana, Tefete soko, ipi aporo hakása pura soko, kára meamorakano, Tefeteane ipi Kotimo apea yorokoa pukua, Kotipoko farawa taesane maka nesapo. Nekea ipi aporo hakása puraki soko nasimo kasapo. Kotiaki farawa kasá taesane aporo hinamo ipu suamo nakohoamo yaposapo. Arirakano pirisiti aporo ipu namina hákasamo nenane yaposafapo. Asiāne Tefete ipi pirisiti aporohoanafonosa yiamo nesapo.\* Aíyaka Kotimo sawia popahoareapo. Popasane repo menoraka, some kepoane hemakapurakarifapo.

<sup>5</sup> Fenena maiya amo makata aina marerane ano unihaeaka rekenapo. Aporomanomo Tákeane anopo.” Aíyaka Yasumo somesapo.

*Aporo hokono narisa Yasumo mafasane oyapo.*

*Matiu 12:9-14; Maka 3:1-6*

<sup>6</sup> Fenena maiya metamo Yasu Yu aporomo sarimana apea yorokoa some kasapo. Some kasa maiya amo, aporo hokono tumuru takuane narisa rekeno asesapo.

<sup>7</sup> Arirakano Kotimo somemane tisa aporo soko, Fere se aporo soko, ipu Yasumo fenena maiya amo aporo hokono narisa mafarakarihoamo asekeea risiapo. Fenena maiya amo Yasumo mafarakano asekeea, ipu Yasuaki hukurukusakipoko asekeea risiapo.

<sup>8</sup> Asekeea risikino, ipu hemakapusuane Yasumo aseraka, aporo hokono narasaki someraka, “Né, takahikia pekea tipi wo reae.” Airakano aporoane takahikia asekeea reapo.

<sup>9</sup> Asekeea rekeno, Yasumo Kotimo somemane tisa aporoaki soko, Fere se aporoaki soko someraka, “Fenena maiya amo koteaka rakirane soko metao, watikiaka rakirane soko metao, rakira meta mamo Kotimo somemane mamosorakanare? Aporo meta kurapaka ararenane soko metao, aporo meta rurane soko metao makata rakira meta mamo Kotimo somemane mamosorakanare?”

<sup>10</sup> Aíyaka i aporo suane Yasumo asekeea, aporo hokono narasaki someraka, “Ne hokono raerasie.” Airakano hokono raehoane, hokono narisane fasapo.

<sup>11</sup> Hokono narisane farakano asekeea, Fere se aporo soko, Kotimo somemane tisa aporo soko, ipu kára saperaka namina susu me rukua someraka, “Yasuane kuku simo isiapo rukusapo. E mayíáka isiapo runarakapo.” Aíyaka me rukua somesapo.

*Aporo hakása pura kenosu Yasumo murikimasane oyapo.*

*Matiu 10:1-4; Maka 3:13-19*

<sup>12</sup> Yasu üria kurikurihoko hisiapo. Hikia ere hakásamo e warafaraka, Kotiaki kurikuri-raka reke, yao fiasapo.

<sup>13</sup> Fiarakano aporo hakása pura murikimakosakipoko, peaerakano, i su pesapo. Aporo su pesane, epo aporo kenosu murikimaka, iaki yano motoraka tarira aporo yano motosapo.

<sup>14</sup> Tarira aporo murikimasane yano taesane oyapo. Saemone ipi yano motosa meta Pitapo. Arirakano meta Saemonemo ipi mamanea Enitupo, arirakano meta Yamesepo, arirakano meta Yonepo, arirakano meta Firipipo, arirakano meta Patóromiupo,

<sup>15</sup> arirakano meta Matiupo, arirakano meta Tomasepo, arirakano meta Afiasemo maeya Yamesepo, arirakano meta Rome kamanimo Yu aporo asekeea reane metakarisimo hemakapura aporo Saemonépo,

<sup>16</sup> arirakano meta Yamesemo maeya Yutasepo, arirakano meta Yasuane parakehokosa aporo Yutase Isekeriopo. I su Yasumo murikimasane ayapo.

*Aporo hinamo makata tasa suane Yasumo mafasane oyapo.*

*Matiu 4:24-25; Maka 3:7-12*

§ 5:39: Waene he patéane kára waperapo. Waene he kaweanie kakaro waperafapo. \* 6:3-4: “Tefetemo soko nesasamo, nōmo aporo hakása purane meamorakano makata nesane ipu hasakasafapo.” Aíyaka Yasumo somesapo.

<sup>17</sup> Yasuane aporo kenosuyaki ūri aeyaka pekea punua pausapo. Hauaka á eyaki aporo hinamo hakása pukua, kára sarimasapo. Arirakano Yutía hauaka su aeyaka aporo yakai pekea sarimara, Yarusarame siti aeyaka soko pekea sarimasapo. Arirakano ipu Yasumo someane soko kaiyako peraka yia, ipu aporo hinamo makata tasane soko mafahoasimo karikia pesapo.

<sup>18</sup> Aporo yatafumo ho mosane soko perakano Yasumo mafasapo.

<sup>19</sup> Yasumo wakapuamu aporo hinamo makata tasa suane mafarakano ipu namina suamo Yasuane sakaihoko pesapo.

*Kotimo makotenane oyapo.*

*Matiu 5:1-12*

<sup>20</sup> Yasumo ipu aporo hakása purane asekeea someraka, “Repo someraka, ‘Kotimo menane ano forokoa reasasamo, Kotimo hemakapusua ayíáka, nōmo hemakapukusakipoko seseripo.’ Aisa aporo hinamoane Kotimo unihaeaka asekeea rekenapo. Asekeea reke Kotimo reane makoterakano, re seseraka risikianie.

<sup>21</sup> Arirakano yumo re meamoraka risike, seseraka risikianie. Keseke repo siaraka makata nakosapo. Arirakano yumo re hihiripuraka risike seseraka risikianie. Keseke re kara seseraka takuhokosapo.

<sup>22</sup> Arirakano repo Aporomanomo Táke anoane patera asesasamo, reaki aporo metakiramo hisiraka re patera tarikia, re ekeneraka someraka, ‘Re aporo watikirareapo.’ Arirakano re seseraka risikianie.

<sup>23</sup> Kára seseraka hokono potepoteraka risikianie. Hepene yapura repo makata ropo kára tokenapo. Asiamo porofete aporoane ipu makasa kaua kekemamo mokoatikisa ayíáka, re soko ayíáka mokoatikihokosapo.

<sup>24</sup> Arirakano makata kemo kárasha aporo re asekeanie. Repo makata kemo su hauaka wo siaraka mosapo.

<sup>25</sup> Arirakano yumo repo makata nakosa kára nenaka re asekeanie. Keseke re meamohokosapo. Arirakano yumo re takuraka risikino re asekeanie. Keseke re hihiripuhokosapo.

<sup>26</sup> Arirakano reaki aporo suamo kekereraka somerakanre asekeanie. Fana namina makasa kaua kekemamo kotafe porofete aporoaki kekeresa ayíáka, ipu reaki soko ayíáka kekererakanre asekeanie.” Aiyaka Yasumo somesapo.

*Rukuroponane Yasumo somesane oyapo.*

*Matiu 5:38-48; 7:12*

<sup>27</sup> Yasumo someraka, “Repo kaikia risikino nōmo reaki somerakanapo. Aporo metamo ne mokoatikirakano, nōmo eaki himu tumurumo hemakapunie. Aporo metamo neaki hisirakano, nōmo eane makotehoanie.

<sup>28</sup> Aporo metamo neaki yakasa ho marerakano, aporoane nōmo makotena someane eaki some kakanie. Aporo metamo neaki some watikisa somerakanre, nōmo epoko farimaka kurikurihoanie.

<sup>29</sup> Aporo metamo ne akai parea rurakano, nōmo rukuroponafaraka, akai pare takua soko rusimo tarinie. Aporomo nōmo pasu osonane maka, nōmo pasu osona metane soko marakano, waehokopo.

<sup>30</sup> Aporomo neaki makasierakano, nōmo kakanie. Aporomo nōmo makata kemoane marakano eaki, ‘Nōmo makata kemoane nī fimakasie,’ aihokopo.

<sup>31</sup> Arirakano nōmo hemakapuraka, ‘Aporo metamo anoaki makoteraka ararehoasimo, ano seseripo,’ aiyaka nōmo hemakapurakanone, nōmo fana aporo aki nōmo makoteraka rakinie.

<sup>32</sup> Aporo metamo neaki himu tumurumo hemakapurakano, nōmo soko eaki ropo himu tumurumo hemakapukua someraka, ‘Kotimo ano makotehokosapo,’ aiyaka hemakapuane siahoasifareapo. Nōmo aina ayíáka aporo watikiaka reramo soko ainane hakása yiyapo. Arirakano aporo metamo aporo watikiaka rerane himu tumurumo hemakapurakano, epo soko neane ropo himu tumurumo hemakapurapu.

<sup>33</sup> Arirakano aporo metamo né makoterakano, nōmo soko e makotena akipoko, nōmo hemakapuraka, ‘Kotimo ano makotehokosapo.’ Aiyaka hemakapukupo. Asiamo nena aporomo soko hakása yineraka rakirapo.

<sup>34</sup> Nōmo aporo meta mone arareraka, nōmo takekeea hemakapuraka, ‘Aporo aki nōmo mone yáno karakanre, moneane epo anoaki parikakakosapo.’ Aiyaka hemakapukua eaki mone karaka, nōmo hemakapuraka, ‘Nōmo koteaka rakisisasamo Kotimo ano makotehokosapo.’ Aiyaka hemakapurakanone ane siahoasifareapo. Nena aporomo ayíáka hemakapurapu. Ipu hemakapuraka, makata kasáne ropo makosakipoko karápo. Repo makata arakiramo nena aporomo rakirane marokehoanie.

<sup>35</sup> Asiamo aporo metakiramo reane mokoatikirakano, aporoane repo himu tumurumo hemakapunie. Aporo metakirane makotehoanie. Aporo metakiraki makata yaku kakanie. Makata yaku kasane nōmo ní keseke makosakipoko hemakapukupo. Ayíaka koteaka risikino, Unihae Koti Káramo reane ipi hokosapo, aihokosapo. Aiyaka reane epo karikia nakosapo. Arirakano reaki makata ropo kára kakakosapo. Arirakano suse aihoaafonona aporoane soko Kotimo ararenapo. Arirakano makaripi aira aporoane soko, Kotimo makotenapo.

<sup>36</sup> Asiamo repo Ata Kotimo aporo hinamo su kamenakana ayíaka, repo soko aporo hinamo suane ayíaka kamenakahoanie." Ayíaka Yasumo somesapo.

*"Aporo meta hokomakopo." Aisane oyapo.*

*Matiu 7:1-5*

<sup>37</sup> Yasumo someraka, "Nōmo aporo metane hokomaka someraka, 'E watikiaka are. Ano koteaka rekenapo. E area ayíaka ano rekenafapo.' Aihokopo. Nōmo hokomaka some-hoanafonorakano, aporo metakiramo soko, Kotimo soko, neaki ayíaka hokomaka some-hokosafapo. Arirakano nōmo someraka, 'E fanasirasie.' Aihokopo. Aihoaanafonorakano neaki soko, 'Fanasisrasie.' Aihokosafapo. Arirakano aporo metamo ne mokoatikirakano eaki nōmo himumo mahisisane mafahoanie. Mafarakano Kotimo soko nōmo watikisane mafahokosapo.

<sup>38</sup> Nōmo makata karakano neaki soko makata kakákosapo. Karáka kára komarukua kakakosapo. Komarurakano pipiraka kapusuraka sakopepehōasimo kakakosapo. Nōmo makata akara ayíaka, neaki soko yaiya kakakosapo." Ayíaka Yasumo somesapo.

<sup>39</sup> Yasumo iaki takumeaka someraka "Aporo hi fausamo aporo meta hi fausa hokonoa maka karikia puane siahoasireare? Wae, tati tetákara kutua eteraka hurupepehokosapo.

<sup>40</sup> Tisa aporo ipi fanaraka rerapo. Ipi aporo hakāsa purane kesekenapo. Aporo hakāsa puraki kakaro koteaka tarikia sukururakano asekea, ipu makata su koteaka enomaka risike, tisa aporomo ipi hemakapukua area ayíaka, aporo hakāsa puramo soko ayíaka, hemakapukua risirapo.

<sup>41</sup> Arirakano nōmo ní maemo hia makata pepeno wakasema kayane aserapo. Aseraka yia nōmo ní hia makata pepeno kára kayane marirakano asekepayarakanare?

<sup>42</sup> Asekepayarako yia nōmo ní maeaki someraka, 'Maeo, né hia makata pepeno wakasema akayane, nōmo maka mamakatehokoripo.' Ayíaka nōmo somerakanone, né aporo himu tetáraka rekenapo. Fana nōmo ní hia makata pepeno wakasema akayane maka mamakatehokosakipoko, nōmo ní korakano siaraka kokoa aseakosapo." Ayíaka Yasumo somesapo.

*Yasumo takumeaka ira wate somesane oyapo.*

*Matiu 7:16-20; 12:33-35*

<sup>43</sup> Yasumo someraka, "Ira kotesamo wate watikisa perafapo. Ira watikisamo wate kotesa perafapo.

<sup>44</sup> Ira wate aseraka ira namo hemakapurapo. Sako utumua, foke wate pekerea tumarafapo. Sako keta risia sako karepe wate tumarafapo.

<sup>45</sup> Mahimuna makatane, himumo hemakapurapo. Aporo hinamo kotesamo himumo koteaka hemakapukua, akiimo soko koteaka somerapo. Koteaka hemakapukua koteaka rakirapo. Arirakano aporo hinamo watikisamo himumo watikiaka hemakapukua akiimo soko kekemaraka watikiaka somerapo. Watikiaka hemakapukua watikiaka rakirapo. Aporo hinamomo himumo makata hemakapusane akai aeyaka somerapo." Ayíaka Yasumo somesapo.

*Aporo tetámo ape tetá kisia Yasumo takumeaka somesane oyapo.*

*Matiu 7:21; 7:24-27*

<sup>46</sup> Yasumo someraka, "Repo anoaki, 'Unihaeo, Unihaeo,' airaka yia, nōmo makata rakiniesane rakianafononane marirakanonare?

<sup>47-48</sup> Arirakano aporomo ape kiakosakipoko hauaka parosa á ira kesa poroako hauaka raea kuturaka ira kesa porokoaa ape kisiapo. Ape kisiakipoko he huku puraka, ape koteaka kisiasamo rakarimaka pusuafapo. Rakarimaka punaafonosa ayíaka, aporo hinamo ano rea pekea, nōmo someane kakimaka rakira aporo hinamoane asiápo.

<sup>49</sup> Arirakano aporo metamo hauaka sakipu kima ape kiraka, hauaka wakasema kima susu raea, ira kesa porokoaa ape kisiiane, he huku puraka, ape hauaka sakipusa kisiasamo, wate foakayia rakarimaka pusuafapo. Rakarimaka puraka anusapo. Ape hauaka sakipua kisia hemo rakarimaka pusua ayíaka, nōmo some kakipayaraka rakianafonona aporo hinamoane asiápo." Ayíaka Yasumo somesapo.

*Yasumo aporo terakaiyamosa satinimo aporo raipa makata takamasa mafasane oyapo.*  
*Matiu 8:5-13*

<sup>1</sup> Aporo hinamo ipu suamo kaiyisimo, Yasumo some kaka faraka ipi Kapaneame taonea pusuapo.

<sup>2</sup> Kapaneame taonea Rome aporo terakaiyamosa satini reapo. Epo ipi aporo raipane kára hemakapukua sesenapo. Asiane epo aporo raipane makata takamasa kukuko makesapo. Kukuko makerakano satinimo kaiyiáne, "Yasumo aporo makata takamasa mafanapo." Airakano kaisiapo.

<sup>3</sup> Kairaka Yu aporo sisimaki someraka, "Yasumo nōmo aporo raipa makata takamasane mafahoasimo, Yasu pasimako pusie." Airakano aporo sisimane pukua

<sup>4</sup> Yasu rea pauraka kukunameaka someraka, "Rome aporo satiniane ipi aporo kotesapo. E nōmo ararehoane siahoasireapo.

<sup>5</sup> Epo isu Yu aporoane hemakapurapo. Epo isupoko Yu aporomo sarimana apeane epo máfaraka kisiapo. Asiamo nōmo e ararehoane siahoasireapo."

<sup>6</sup> Airakano Yasuane iyaki hakasa pusuapo. Pukua satinimo ape ane makeraka pesapo. Yasu perakano satinimo asekeea ipi aporo tákreaki someraka, "Né pukua Yasuaki somehoanie. Nōmo some akara one nōmo eaki uyáka some kakanie. 'Unihaeo, né peraka wafororareapo. Ano aporo wakasemapo. Né aporo kárasasamo iti siasafapo. Asiamo nōmo apea né peane siahoasifareapo.

<sup>7</sup> Ano wakasemasamo né rea ano pesafapo. Né yia reke, nōmo someraka ipi aporo makata takamasane farasie, aihoanie. Farasierakano nōmo aporo raipa makata takamasane fahokosapo.

<sup>8</sup> Arirakano ano asekeea rea aporoamo, anoaki makata rakisierakano nōmo rakirapo. Arirakano nōmo aporo asekeea reaki pusierakano e purapo. Peaerakano e perapo. Nōmo aporo raipaki makata rakisierakano epo rakirapo. Nōmo aira ayiáka, nōmo soko aporo makata takamasane farasierakano, e fahokosapo.' Aiyaka repo Yasuaki somehoanie."

<sup>9</sup> Airakano i pukua satinimo someaka maresane Yasuaki ipu somesapo. Somerakano Yasumo kaikia sesesapo. Seseraka eyaki aporo hinamo hakása pesaki someraka, "Yu aporo hoanafonosa aporo terakaiyamosa satinimo anoaki himu hakásaraka hemakapukua reareapo. Satinimo anoaki himu hakásaraka hemaka apura ayiáka, Isiraya hauaka Yu aporo metamo anoaki ayiáka himu hakásaraka hemakapurafareapo."

<sup>10</sup> Airakano satinimo ipi aporo tákemo Yasuane metakarikia, satinimo apea popariperaka aseane, aporo raipa makata takamasane fasokino asesapo.

*Hinamo yaromo hokosa kusua Yasumo maturikia taesane oyapo.*

<sup>11</sup> Sere metamo Yasu Naine taonea pusuapo. Epo ipi aporo hakása pura soko, aporo metakira soko, eyaki hakása pusuapo.

<sup>12</sup> Pukua ape ruru ikia koro makeraka aseane hokosa raua kusuane fefeneakua makekea kunkia motoakosakipoko maka perakano asesapo. Hokosa kusuane hinamo yaromo aporo hokosa hakása yiypao. Ape aeyaka hinamo yaroyaki aporo hinamo yakai perakano asesapo.

<sup>13</sup> Asekeea Yasumo hinamo yaroane kamenakaraka someraka, "Né hiripuhokopo."

<sup>14</sup> Aiyaka aporomo fefeneakua hokosa kusuane makekea ira paka pusuane fenekea risikino fefeneakua Yasumo sakairaka someraka, "Hokosa rauao, né turikia pukua takahisie."

<sup>15</sup> Airakano hokosa raua fefeneakua wareane, foakayia turikia pukua asekeea kayapo. Asekeea kake makata somesapo. Somerakano asekeea, hinamo yaroaki Yasumo someraka, "One nōmo ní hokosapo. Ní apea karikia pusie."

<sup>16</sup> Airakano aporo hinamo suamo aseraka himu fasapo. Himu faraka Kotiaki kekereraka someraka, "Porofete aporo kára isu arisia fasereapere. Kotimo ipi aporo hinamoane ararehoko apere." Aisapo.

<sup>17</sup> Arirakano Yutía aporo hinamomo soko, Yutía hauaka makeraka aporo risiamo soko, Yasumo aporo kusuane maturikia taesapakano kaisiapo.

*Yone hea tapukumareramo ipi aporo hakása pura Yasu rea pusierakano, pusuane oyapo.*  
*Matiu 11:2-19*

<sup>18</sup> Yasumo makata rakisiane, Yonemo ipi aporo hakása puramo Yoneaki somesapo. Somerakano kaikia, Yonemo ipi aporo hakása pura tetá peaerakano aporo tetá Yone rea pesapo.

<sup>19</sup> Perakano Yonemo someraka, "Teto pusie. Teto pukua, Unihae Yasuaki kaiyinie. Kairaka, 'Aporo meta Kotimo pusierakano peakosapo airakasuane nere? Aporo metare? Aporo meta perakarihoamo isu kau risikiaere?' Aiyaka tetápo Yasuaki kaiyinie."

<sup>20</sup> Airakano tetá Yasu rea pukua someraka, "Yone he tapukumareramo eto pusierakano perakayiapo. Etapo neaki makata kairakanapo. Asiamo Yonemo someraka, 'Aporo meta Kotimo pusierakano peakosapo airakasuane nere? Aporo metare? Aporo meta perakarihoamo isu kau risikiaere?' Aiyaka Yonemo somerakano etapo neaki kaiyako perakayiapo," aisapo.

<sup>21</sup> Airakano kaisia maiya amo, aporo hinamo makata tasa yakaiane Yasumo mafasapo. Aporo hinamo yatafumo ho masane Yasumo metakarikia pusiehoane, yatafu purakano aporo hinamo yatafumo ho mosane mafasapo. Aporo hinamo metakira hi fausamo, efera hunia makata koteaka asekeasimo, hi fausane Yasumo mafasapo.

<sup>22</sup> Mafaraka risike, Yonemo ipi aporo hakāsa puraki Yasumo someraka, "Re poparipuka, makata asesane soko, makata kaisiane soko, Yoneaki somehoanie. Aporo hinamo hi fausane, mafasa koteaka aserakanapo.\* Aporo hinamo korake matipusane, maraesia koteaka purakanapo. Aporo hinamo toropakesane, mafasa koteaka risikinapo. Aporo hinamo senaki tisane, mafasa koteaka kairakanapo. Aporo hinamo kusune, mafarearaka turikia tarikia risikinapo. Aporo hinamo makata forokoa risiaki soko, Kotimo some kaiyanafonosa aporo hinamoaki soko, Kotimo some kotesane nōmo some karakanapo.

<sup>23</sup> Asiamo aporo hinamomo anoaki himu hakásaraka hemakapurane metakirafaraka, yaiya hemakapuraka risikino, aporo hinamoane Kotimo makotenapo." Aiyaka aporo tetá pesaki Yasumo somesapo.

<sup>24</sup> Aiyaka Yasumo somerakano, Yonemo aporo tetá pusiesane tati apea poparipusuapo. Poparipurakano, Yasumo aporo hinamo su sarimasaki someraka, "Yonemo ima yaoa some karakano repo yakapa aseako pusuare? Fofako atifomo mahohoanane aseako pusuare? Wae. Fofako atifomo mahohoanane aseako pusuafapo.

<sup>25</sup> Repo yakapa aseako pusuare? Aporo kau rakisiene aseako pusuare? Wae. Aporo kau rakisiene makata su siaraka unihae amo apea rerapo. Aporo kau rakikia yaoa rerafapo.

<sup>26</sup> Repo yakapa aseako pusuare? Porofete aporo aseako pusuare? Ao. Repo porofete aporo kárane asesapo. Asesane wate fana Kotimo sawia porofete aporomo popasane Yonepo.

<sup>27</sup> Wate fana Kotimo sawia porofete aporo metamo popasane oyapo. Mafasira aporoaki Kotimo someraka, 'Né pusiraka aporo metamo fana some kakako nōmo pusiehokosapo. Aporoamo né ikia kara pukusane makotehokosapo.' Aiyaka Kotimo somerakano, porofete aporo popahoareapo. Aiyaka popahoareane Yoneane popasapo. (*Malakai 3:1*)

<sup>28</sup> Nōmo some kakasiraka aporo su wainepe pesa amo aporo metamo Yoneane marokesafapo. Arirakano ano peraka some karaka, 'Koti unihaeaka rekenapo.' Airakano aporo hinamomo Kotimo someane kakimaka anoa paoraka someraka, 'Ano wakasemapo,' aisa aporo hinamoamo Yoneane makamakesekenapo."

<sup>29</sup> Aiyaka Yasumo somerakano aporo hinamo suamo soko, aporo takese mora aporoamo soko Yasumo someane kakimasapo. Kakimaka someraka, "Someane kakarorakae. Kotimo hemakapusuane ereketaerareapo. Asiamo Yonemo isu hea tapukumuriane sia-hoasireapo."

<sup>30</sup> Airakano Yonemo aporo hinamo hea tapukumurisia maiya amo, Fereze aporomo soko, Kotimo somemanne tisa aporomo soko, ipu someraka, "Isu hea tapukumuriao hisiripo." Airakano Yonemo iane hea tapukumurisiafapo. Asiamo i hea tapukumuriana-fonosasamo ipu Kotimo someane koartaesapo.

<sup>31</sup> Arirakano Yasumo someraka, "Maiya omo aporo hinamo risiane nōmo mayíaka somehokosare? Nōmo takumeaka somerakanapo.

<sup>32</sup> Hokosamo hauaka moroa enaraka, namina yia hokosa metakiramo hokosa metakiraki someraka, 'Isiapo wiroko takiane, repo seseaka paoraka hakāsa kesarakarifapo. Isiapo hiripuhoane, repo soko paoraka hiripurakarifapo,' aisapo. Asiamo i risia ayíaka, re soko ayíaka risikinapo.

<sup>33</sup> Ayíaka risiamo kepoane oyapo. Yone hea tapukumarerane peraka, makata nakosa farawane soko, waene he soko, sokoairaka nesafapo. Nanafonorakano asekea, repo someraka, 'Yoneane yatafumo ho mayereapo,' aisapo. Aiyaka re Yonea paosafapo.

<sup>34</sup> Arirakano Aporomanomo Táke ano peraka, makata nakosa soko waene he soko nenapo. Nenakano asekea, repo someraka, 'Yasumo nako fitiraka sapekeamo nenareapo.

\* <sup>7:22:</sup> Yoneaki some kakasimo Yasumo porofete aporo Aesayamo someane somesapo. (Aisia 35:5, 6) Asiamo Yonemo hemakapuraka, "Kotimo aporo pusierakano pesane kakaro Yasureapo," aiyaka hemakapukusapo.

Waene he soko kára nena reapo. Arirakano aporo takese morane soko, aporo himu watikisane soko ipi tákereapo,<sup>35</sup> aíyaka someaka anoa paosafapo.

<sup>35</sup> Arirakano Kotimo hemakapusuane nōmo kekemaraka somesane, kakimara aporo hinamomo ipu hemakapuraka, ‘Kotimo hemakapusuane ereketaehoareapo,’ aíyaka ipu hemakapusapo.” Aíyaka Yasumo somesapo.

*Ferese aporo meta yano motosa Saemonemo apea Yasu pusuane oyapo.*

*Matiu 26:6-13; Maka 14:3-9*

<sup>36</sup> Ferese aporomo Yasuaki someraka, “Né nōmo apea makata nako peae,” airakano Yasu pusuapo. Pukua apea makata nakosakipoko asekeea kayapo.

<sup>37</sup> Arirakano ape sumu hakásá yia hinamo watikisa hakásá kayapo. Hinamoane ipi kake kaiyiane, Ferese aporomo apea Yasu pusuapakanó hinamoamo kaikia, he wape yamona petoroa takamaka, apea maka pesapo. Arirakano eke kotesane maka petoro rakisiakipoko, petoro á, he wape yamonane takamaka pesapo.

<sup>38</sup> Peraka Yasu kayakipoko patera aeyaka pekea hiripusapo. Hiripuraka, hiripu heane Yasu korakea raposapo. Hinamoamo ipi uni itimo Yasu korakea hesane hokeraka, Yasu korakea makanusapo. He wape yamona maka pesane, Yasu korakea resapo.

<sup>39</sup> Rerakano Yasuane peae, aisa Ferese aporoamo ipi hemakapuraka, “Yasuane porofete aporo satiki hinamoane watikiaka kakeno asekeafunureapo. Porofete aporo rakanafareapo.” Aíyaka ape wafayamo hemakapurakanó,

<sup>40</sup> Yasumo asekeea someraka, “Saemoneo, néaki nōmo makata somerakanapo.” Airakano Saemonemo someraka, “Ao, Tisa, nōmo somesie.”

<sup>41</sup> Airakano Yasumo takumeaka someraka, “Aporomo aporo tetáki mone fore kasapo. Aporo metaki mone wane harote kina asia (K100)<sup>†</sup> kasapo. Aporo metaki mone tene kina asia (K10) kasapo.

<sup>42</sup> Karakano, keseke tetapō someraka, ‘Moneane nōmo etoaki kasane fasokino, ropo kakakosafapo.’ Airakano aporo mone kasámo tetáki someraka, ‘Ao, metakarisie. Teto nōmo mone kasane ropo anoaki kakakopo. Nōmo mamerarurakanapo. Ane siareapo.’ Aíyaka aporo mone kasámo somesapo. Asiamo Saemoneo, makata ropo metakarisiasamo, epamo aporo mone kasane kára seseraka hemakapusare? Aporo mone kára masamo mone kasá wafayane kára seseraka hemakapusare? Mone wakasema masamo aporo mone kasá wafayane kára seseraka hemakapusare?”

<sup>43</sup> Aíyaka Yasumo somerakanó Saemonemo someraka, “Aporo mone kára masamo, mone kasá wafayane, kára seseraka hemakapusapo.” Airakano Yasumo someraka, “Ao, kakarorakae.”

<sup>44</sup> Aíyaka hinamoane Yasumo aseako kakopariraka Saemoneaki efera hunia someraka, “Hinamoane nōmo asesie. Ano nōmo apea peane, nōmo ano korake kususafapo.<sup>‡</sup> Hinamoamo ipi hiripu hemo ano korake kusuane. Kusuraka ipi uni itimo ano korake hokeane.

<sup>45</sup> Ano peane, nōmo ano makanusafapo. Hinamoamo hákasa ano korakea makanuraka akaye.

<sup>46</sup> Nōmo ano uni itia wera resafapo. Hinamoamo he wape yamonamo ano korakea arere.

<sup>47</sup> Asiamo hinamoane ipi kára watikiaka kakeno asekeea, makata watikisa kárane nōmo mafasapo. Mafasasamo anoaki kára hemaka apure. Arirakano aporo metamo makata watikisa wakasemasane mafarakano, anoaki wakasema hemakapurapo.”

<sup>48</sup> Aíyaka hinamoaki Yasumo someraka “Né himu watikisane nōmo mafasapo.”

<sup>49</sup> Airakano aporo metakira tepora toke namina susu someraka “Aporomano himu watikisa mafana aporoane epare?” Aisapo.

<sup>50</sup> Arirakano hinamoaki Yasumo someraka “Nōmo anoaki himu hakásaraka hemaka apura yiamo ne nōmo mafasirakayiapo. Ní koteaka kakako punie.” Aíyaka Yasumo somesapo.

## 8

*Hinamomo Yasu araresane oyapo.*

<sup>1</sup> Maiya wakasema farakano, Koti unihaeaka reane, Yasumo aporo hinamo metakiraki some kakako ape meta á pukua, arirakano aporo hinamo metakiraki soko, some kakako pusuapo. Pukua, ape meta á soko pukua, aiyáka some kape pusuapo. Yasumo ipi aporo hakásá pura kenosuane Yasuyaki hakásá pusuapo.

<sup>†</sup> 7:41: Yasu rea maiya amo namina siufa mone yano motosa tanariase amo makata roposapo. <sup>‡</sup> 7:44: Yu aporomo ainane oyapo. Aporo meta aporo ape wafayamo apea perakano, ape wafayamo e korake kusunapo. Asiamo Saemonemo Yasuane makotehoanafonosane Yasuane mawakasemasapo.

<sup>2</sup> Arirakano hinamo metakira soko Yasuyaki hakāsa pusuapo. Pusua hinamoane metakira makata tasane Yasumo mafasapo. Hinamo metakirane yatafumo ho masane soko Yasumo mafasapo. Arirakano hinamo i yano taesane oyapo. Makatara hinamo Maria ane, yatafu yatipinusumo ipi ho masane Yasumo mafasapo.

<sup>3</sup> Meta, Kūsamo ipi asea Yoánapo. Yoánamo ipi apiamo Herotemo apea makata rakisiapo. Arirakano hinamo meta Susánapo. Hinamoamo soko, hinamo metakiramo soko, Yasuane arareraka eaki mone kasapo. Yasuane soko karaka, ipi aporo hakāsa purane soko kasapo.

*Makata mano potesa Yasumo takumeaka somesane oyapo.*

*Matiu 13:1-9; Maka 4:1-9*

<sup>4</sup> Yasu rea á, taone aeyaka aporo hinamo yakai pekea sarimarakano asekeea Yasumo takumeaka someraka,

<sup>5</sup> “Aporomo makata mano poterape pusuapo. Poterape pusua maiya amo, makata mano metakira ikia kara á hurupepesapo. Hurupepesane aporomo finiraka finirakosapo. Metakira hurupepesane menamo nesapo.

<sup>6</sup> Arirakano makata mano metakira eke kima á hurupepesane, tanehekeea risiane, makata otoa he kesaka rekeanafonosamo, koteaka taneheanafonoraka kukua kesapo.

<sup>7</sup> Arirakano makata mano metakira keta risiakipoko arakarua hurupepesapo. Hurupepesane makata mano keta risia akiyaki hakāsa tanehesapo. Tanehenaka makata keta risiane popakeraka, makata manoane karotapiraka serekesapo.

<sup>8</sup> Arirakano makata mano metakira hauaka kotesakipoko hurupepesane tanehekeea, wate wane harote (100) ayíaka pesapo.” Aiyaka somesa maiya amo Yasumo someraka, “Re senaki risiamo kairaka, koteaka kaisie,” aísapo.

*Maiya suamo Yasumo takumeaka susu somesane oyapo.*

*Matiu 13:10-17; Maka 4:10-12*

<sup>9</sup> Yasumo aporo hakāsa puramo eaki someraka, “Takume kepoane yakapare?”

<sup>10</sup> Airakano Yasumo someraka, “Koti unihaeaka reane mahamesane, repo kaiyisimo some kepoane yumo nōmo reaki hufitaeraka somerakanapo. Arirakano aporo hinamo metakiraki some kepoane nōmo hufitaeraka somehoanafonoraka, takumeaka susu somerakanapo. Asiamo ipu himo aseraka asekeea yia, kepoane koteaka hemakapurafapo. Ipu senakimo kairaka kaikia yia, himumo koteaka hemakapurafapo. Asiamo nōmo iaki takumeaka susu somerakanapo.” Aiyaka Yasumo somesapo. (Aisaia 6:9)

*Makata mano potesa amo takume kepoane oyapo.*

*Matiu 13:18-23; Maka 4:13-20*

<sup>11</sup> Arirakano Yasumo ipi aporo hakāsa puraki someraka, “Takume kepoane oyapo. Makata mano asiane Kotimo some ayapo.

<sup>12</sup> Ikia kara á hurupepesa asiane oyapo. Kotimo someane aporomo kaikia hemakapuraka, ‘Kotimo isu mafasiasimosapo.’ Aiyaka hemakapukua, Kotimo someane kakaro kakimakohoamo Satane ipi pekea Kotimo someane hakimarapo.

<sup>13</sup> Arirakano eke kima á hurupepesa asiane, aporomo Kotimo someane seseraka kaikia, asiane pikinu koteaka punafonona ayíaka, ipu maiya wakasemamo kakimaka risina, keseke i kau aseako mokopipirakano asekeea, ipu Kotimo someane metakarirapo.

<sup>14</sup> Arirakano makata keta risia tanehesakipoko, arakarua makata mano hurupepesa asiane, aporomo Kotimo someane kaikia risikiyia, hauaka wo makata tomekesa hemakapuramo soko, hauaka wo makata kemo mokoako hemakapuramo soko, hauaka wo seseraka hemakapuramo soko, makata isia amo Kotimo someane karotapirapo. Karotapiraka, wate pesane koteaka sunafapo.

<sup>15</sup> Arirakano hauaka kotessa á hurupepesa asiane, aporomo Kotimo someane senakimo koteaka kaikia, himumo koteaka susu hemakapukua, kakaro kakimaka, himu hakásaraka hemakapuraka risikino, ira wate kara apera ayíaka pekea risikiosapo.” Aiyaka Yasumo somesapo.

*Yasumo nafa faena takumeaka somesane oyapo.*

*Matiu 5:15; Maka 4:21-25*

<sup>16</sup> Yasumo someraka, “Nafa pakimaka motokoa taramomo karotapirafapo. Nafa pakimaka ape wará pete petaua motorafapo. Aporo metakira ape á yorokoa peraka faeane asekeasimo, nafane pakimaka apea waremarerapo.

<sup>17</sup> Arirakano makata faremaresane keseke mafekemahokosapo. Arirakano makata mahamesane keseke makakamahokosapo.

<sup>18</sup> Asiamo someane maíyaka kaikia kakimarakanare? Ayíaka hemakapukua risikianie. Repo someane kaikia kakimarakanano, makata meta soko reaki somerakanano, repo sia

kakimakosapo. Arirakano someane repo kakimakanafonorakano, fana repo makata kaisiane soko meraruhokosapo," aisapo.

*Yasumo ipi katyia Maria soko, ipi mamanea soko, Yasuane aseako pesane oyapo.  
Matiu 12:46-50; Maka 3:31-35*

<sup>19</sup> Yasumo ipi katyia soko, ipi mamanea soko, Yasu aseako pesane, aporo hinamo yakai sarimaraka, ape tapesekeno ape kakarua Yasuane aseako pusufapao.

<sup>20</sup> Pusifasekeno aporo metamo Yasuaki someraka, "Nómo ní ama soko, ní mae soko né aseako pekeea, hauaka moro atura arisie."

<sup>21</sup> Airakano Yasumo aporo hinamo sarimasaki someraka, "Kotimo someane kakimaka rakira aporo hinamoane nōmo amapo, nōmo maepo." Aiyaka Yasumo somesapo.

*Atifoyaki he kupayaki kára pesane Yasumo mafasane oyapo.  
Matiu 8:23-27; Maka 4:35-41*

<sup>22</sup> Sere metamo Yasu soko, ipi aporo hakāsa pura soko, kasua ripaka Yasumo someraka, "He kekeka kaya taku ra kasu rokoa purakapo." Aiyaka kasu rokoa pukua

<sup>23</sup> he numua pauraka Yasu ipi wasápo. Wasakipoko, atifo kára peraka kasu tua he wakekeraka kasuane kenepesahopo.

<sup>24</sup> Kenepekorakano asekea, aporo hakāsa puramo Yasu maturikia someraka, "Unihaeo, Unihaeo, kasu keneperaka isu he nekea kukua keasireapo." Airakano Yasu turikia pukua atifoaki soko, he kupaki soko someraka, "Farasie," airakano atifo soko, he kupa soko, faraka he auasapo.

<sup>25</sup> Auarakano asekea, Yasumo iaki someraka, "Marirakano repo anoaki kakaro himu hakásaraka hemakapurakanafare?" Airakano i namoraka fofaraka, namina susu someraka, "Yasumo someane atifomo soko he kupamo soko kakimaka fáne," aisapo. Farakan asekea ipu someraka, "Aporoane eparakapo," aisapo.

*Yatafumo aporo ho masa Yasumo mafasane oyapo.  
Matiu 8:28-34; Maka 5:1-20*

<sup>26</sup> Kariri hauaka aeyaka he kekeka kaya á ipu kasu rokoa hikia, taku ra Kerasa hauaka á pausapo.

<sup>27-29</sup> Á pauraka, kasu yia kita hukumarekea, metakarikia hisiapo. Arirakano ape make tameyia aporo meta yatafumo ipi ho masane reapo. Arirakano Yasu hinaka reke aseane, apea yatafumo aporo ho masamo Yasu sapenako perakano asesapo. Aseane, aporoane maiya káramo pasu osohoanafonoraka reke, apea wakanafonoraka aporo kusua taena kunikia á waká reapo. Maiya káramo aporoane yatafumo ho maka, efera hunia soko ho maka, asiane aporoane aporo metakiramo asekea risike, senemo hokonoa taporaka, kokane asekeea soko taporaka, asiane ipi kara wakapuraka seneane mokorutusapo. Mokoruturaka nena yaoa yatafumo e karikia pusuaipo. Pusua yao aeyaka e perakano asekea, Yasumo yatafuaki someraka, "Aporo one nōmo metakarikia, né pusie." Airakano aporoamo Yasu asesa maiya yiamo aporoane himura yatafu rekerakano epo sakepamo wáraka, "Yasuo, né namo kakaro Unihae Kotimo hokosapo. Nōmo ano mayiakakosare? Nōmo anoaki kau terane kakakopo."

<sup>30</sup> Airakano Yasumo eaki someraka, "Ne yano motosa epare?" Airakano aporoane yatafu mukisamo e ho masasamo, yatafumo someraka, "Ano yano motosa Mukisapo.

<sup>31</sup> Hauaka watikisa kutu matoa isu pusiehokopo."

<sup>32</sup> Airakano aseane saro yakai ūri kakafaea risike makata nenaka risikino asekea someraka, "Nómo isu pusierakane saro tua isu risikiako pusiesie." Airakano Yasumo someraka, "Ao, ayisie." Aisapo.

<sup>33</sup> Airakano yatafumo aporo ho masane i metakarikia pukua, saro tua risiapo. Saro tua risikirakano, saro su ūri kakafaea aeyaka foforaka sosonoraka peraka, he fesere mosakipoko aeyaka eteraka he numua hurupeperaka he nekea kukua kesapo.

<sup>34</sup> Kukua kerakano asekea saro asekea risia aporoane tekatarikia pukua, aporo taonea risiaki soko, aporo ape kekepoo risiaki soko, makata su ipu asesane somesapo.

<sup>35</sup> Somerakano aporo hinamo suamo makata somesane aseako pesapo. Yasu rea i peraka aseane, yatafumo aporo ho masa mafasane Yasu korake makeraka tameyia kake, koteaka hemakapuruka, pasu osoraka kakeno asesapo. Aseraka yia i namosapo.

<sup>36</sup> Asiamo asekea aporo hinamo i poparipuraka, aporo hinamo metakiraki someraka, "Yatafumo aporo ho masane Yasumo uyáka mafasapo," aisapo.

<sup>37</sup> Aisane Kerasa hauaka risia aporo hinamo suamo kaikia ipu namo kakaro namoraka Yasuaki someraka "Isiapo hauakane metakarikia pusie." Airakano Yasu paripukusakipoko kasua ripasapo.

<sup>38</sup> Riparakano aporo ho masa mafasa amo someraka, "Ano néyaki hakāsa peakoripo." Airakano Yasumo someraka,

<sup>39</sup> "Wae, né ní apea paripusie. Kotimo né ararerakasane somehoanie." Airakano aporoane paripukua, ipi apea aporo hinamo suaki someraka, "Yasumo ano uyaka araresapo," aisapo.

*Hinamo hokosa kusua Yasumo maturikia taesane oyapo. Arirakano hinamo meta makata takamasamo Yasumo pasua sakaihoane mafasane oyapo.*

*Matiu 9:18-26; Maka 5:21-43*

<sup>40</sup> Yasu pariperakarikoamo aporo hinamo yakai sarimaraaka kau risiapo. Kau risi-akipoko Yasu pariperakano asekeea ipu sesésapo.

<sup>41-42</sup> Arirakano Yu aporomo sarimana ape asekeea rea aporo ipi yano motosa Yairasepo. Epo ipi hinamo hokosa hakāsa nine kayapo. Masira ane ipi kake keremisi kenosu faraka, ipi makata takamaraka kukuko makerakano asekeea, Yairasemo Yasuaki somehoko pesapo. Pekeea Yasu korake kekenoyia, kakuna porokoa kake someraka, "Nōmo apea né peae." Airakano Yasu Yairasemo apea pukusakipoko, puraka reke, aporo hinamo yakai sarimasakipoko, Yasu puraka taperaka kafukua pusuapo.

<sup>43</sup> Pusua maiya amo hinamo meta iyaki hakāsa pusuapo. Hinamo pusuane keremisi keno sumo wake apea makama yiarakaka makata takamasa kayapo. Kaya ane mitikoromo soko sia mafasafapo.

<sup>44</sup> Hinamoane Yasu patera aeyaka pekeea, Yasumo pasu kea sakaisapo. Sakaihoane wake ape makama yiarakaka kayane wate foakayia fasapo.

<sup>45</sup> Farakano Yasumo someraka, "Ano sakairakahoane epamo sakairakayiare?" Airakano ipu suamo someraka, "Wae, né isiapo sakairakayafapo." Airakano Pitamo someraka, "Aporo hinamo yakaisakipoko ne hisirimaka purakayapiro."

<sup>46</sup> Airakano Yasumo someraka, "Ano wakapuane purakarakano kaikia, aporo metamo ano sakairakahoapo."

<sup>47</sup> Airakano hinamoamo hemakapuraka, "Yasumo ipi makata su hemakapurapo. Nōmo mahameane siahoasifareapo." Aiyaka hemakapuraka ipi hamisisiraka, Yasu rea kakuna porokoa kake, aporo hinamo suamo kaiyisimo someraka, "Ano makata takamasane mafahoasimo, Yasumo pasua sakairakayapiro. Sakaihoane ano makata takamasane wate foakayia fasapo."

<sup>48</sup> Airakano Yasumo someraka, "Hinamo neo, nōmo anoaki himu hakasaraka hemaka apura yiamo, né makata takamasane mafarakayapiro. Né tau koteaka kakako pusie," aisapo.

<sup>49</sup> Aisa maiya amo Yu aporomo sarimana ape asekeea rea aporo Yairasemo ape aeyaka aporo meta pekeea eaki someraka, "Nōmo ní hinamo hokosane kusuapo. Asiasamo Tisaki efera hunia somehokopo."

<sup>50</sup> Airakano Yasumo kaikia Yairaseaki someraka, "Namohokopo. Anoaki himu hakasaraka hemakapuraka rekeanie. Nōmo ní hokosa makata takamasane nōmo mafahokoso," aiyaka Yasumo somesapo.

<sup>51-53</sup> Asiamo Yasu pukua apea pauraka aseane, hokosa kusuakipoko ipu kara hihirupuraka risikino asekeea, iaki Yasumo someraka, "Hihirupuhokopo. Hokosa ane kusuafapo. Ipi wasápo." Airakano ipu hokosa kakaro kusikeno asekeea, ipu Yasuaki hokomarekea keasapo. Kearakano asekeea, Yasumo iaki apea yorokoa peakopo, aisapo. Yasumo ipi aporo hakāsa pura Pita soko, Yone soko, Yamese soko, hokosa wafaya soko, kałyia soko, hakāsa karikia apea forosoraka ape tua pukua,

<sup>54</sup> hokosa kusuane hokonoa maka someraka, "Masira, ne turikia pusie," aisapo.

<sup>55</sup> Airakano ipi hoane ipi kaua paripekeea paoraka ipi turikia pusuapo. Turikia purakano asekeea, Yasumo someraka, "Hokosaki makata nakosa kasie," aisapo.

<sup>56</sup> Airakano hokosa amo ipi wafayape kałyia tetá kakaro kara fofasapo. Fofarakano Yasumo tetákia someraka, "Aporo hinamo suaki tetápo makata asesane somehokopo," aiyaka Yasumo somesapo.

## 9

*Yasumo ipi aporo hakāsa pura kenosumo makata rakiako pusiesane oyapo.*

*Matiu 10:7-11; Maka 6:6-13*

<sup>1</sup> Yasumo ipi aporo kenosumo ipu makata rakirane rakisimo, wakapu kakakosakipoko, iaki peaesapo. Perakano asekeea, ipu yatafumo aporo ho masane metakarikia pusiehoasimo iaki wakapu kasapo. Arirakano aporo makata tasane soko mafahoasimo iaki wakapu kasapo.

<sup>2</sup> Wakapu karakano i pukusakipoko, Yasumo iaki someraka, "Aporo hinamo suaki úyaka somehoanie. 'Kotimo aporo hinamo unihaeaka asekea rekenapo,' aihoanie. Arirakano aporo hinamo makata tasane soko mafahoanie."

<sup>3</sup> Aíyaka Yasumo iaki some meta someraka, "Re kimisi puraka makata mokoa pukupo. Tatia soko, ku soko, makata nakosa soko, mone soko, mokoa pukupo. Pasu tetá mokoa pukupo. Pasu hakása maka puane siahoasireapo.

<sup>4</sup> Re pukua taonea puraka, ape wafayamo reane pasimaka ipi apea karikia purakano apea yorokoaa, ape á waka risikanie. Waka risike, ape meta mokome wakako pukupo. Waka risia ape aeyaka, taone meta punie.

<sup>5</sup> Arirakano taone meta peane ape wafayamo re tereraka pasimakanafonorakano, taoneane repo metakarikia puraka, namina hisisane Kotimo asekea sesenafapo. Aíyaka ipu hemakapusimo, yapakeraka korakea kokotonomosane rerakatapikia marekea metakarikia punie." Aíyaka Yasumo somesapo.

<sup>6</sup> Arirakano i pukua, ape sumu kekepo sua pukua, Yasumo some kotesane some karaka, aporo hinamo makata tasane mafasapo. Ape sumu sua ayíáka rakipe pusuapo.

*Herotemo Yasuane himetesane oyapo.*

*Matiu 14:1-2; Maka 6:14-16*

<sup>7</sup> Arirakano Yasumo makata wakapuaka rakisiane, Herote Kariri hauaka asekea rea aporomo kaisiapo. Aporo metakiramo someraka, "Yone kusuane maturikia taesapo." Arirakano aporo metakiramo soko kaikia someraka, "Makata wakapuaka rakisiane, Yone kusuane maturikia taeraka epo wakapuaka rakirakanareapo." Airakano some ane Herotemo kaikia mahimeteraka reke, kepoane koteaka hemakapusuafapo.

<sup>8</sup> Arirakano makata wakapuaka rakisiane aporo metakiramo kaikia someraka, "Iraíya pariperakanareapo." Airakano kaikia aporo metakiramo kaikia someraka, "Wate fana porofete aporo kusuane hakása meta mafarearaka rekenareapo." Airakano Herotemo kaikia mahimeteraka

<sup>9</sup> epo someraka, "Yone mawiane nōmo patekemasie, airakano patekemasapo. Aporomo makata wakapuaka rakisiapakasuanne epare? Eane nōmo aseakoripo." Aíyaka Herotemo hemakapusuapo.

*Aporo fae taoseneaki (5,000) Yasumo farawa kasane oyapo.*

*Matiu 14:13-21; Maka 6:30-44; Yone 6:1-14*

<sup>10</sup> Yasumo ipi tarira aporo popariperaka, ipu makata rakisiane Yasuaki somesapo. Someaka farakano, aporo hinamo suane yia metakarikia, Yasumo ipi aporo hakása purane hakása karikia, Pesaita taonea pusuapo.

<sup>11</sup> I pusuapakano aporo hinamo metakira keseke kekemarape pusuapo. I pusuakipoko keseke kekemarape perakano Yasumo asekea peaesapo. Perakano asekea Yasu seseraka reke Kotimo aporo hinamo unihaeaka asekea reane, i suaki somesapo. Aíyaka someaka aporo hinamo metakira makata tasane soko Yasumo mafasapo.

<sup>12</sup> Samapu maiya tuakeramo, Yasuaki ipi aporo hakása puramo someraka, "Aporo hinamo yakai pesane pusie, aisie. Ape sumu fetea soko metao, ima yaoa ape manoa soko metao á pusie, aisie. Asiamo one yao kauanesasamo wo ape rekenafapo. Asiamo namina ape fetea waráka makata nakosa mokoako, namina ape wasá á pusie, aisie."

<sup>13</sup> Airakano Yasumo someraka, "Repo iaki makata nakosa kakanie." Airakano aporo hakása puramo someraka, "Isiapo makata nakosane farawa kakoreasu, pokoa tetá ayíáka tokenapo. Makata nakosa meta kakenafapo. Aporo suamo makata nakosane isiapo ropohoko pusimo nōmo hemakapurakarire?" Aisapo.

<sup>14</sup> Asiamo aporo ane aseane, fae taosene ane (5,000) risikino asekea, aporo hakása puraki Yasumo someraka, "Aporo fifiti (50) kikisiraka taku á toaesie. Aporo fifiti (50) meta kikisiraka taku á toaesie. Su ayíáka tokoasimo somesie."

<sup>15</sup> Airakano aporo hakása puramo aporo fifitiaki (50) someraka, "Re su toae." Airakano toapo.

<sup>16</sup> Su tokeno asekea, farawa kakoreasu pokoa tetá ane Yasumo maka reke, hepene yapura asekea, Kotiaki suseraka kurikuriraka, faraka, mosoraka, aporo hakása puraki karaka someraka, "Aporo suane takusie."

<sup>17</sup> Airakano ipu takusuapo. Takurakano, aporo hinamo suamo katu nekea, siarakano, farawa momo yia tokeno, mate kenosua kekea komarusuapo.

*"Yasu, ne Keresopo," aíyaka Pitamo somesane oyapo.*

*Matiu 16:13-19; Maka 8:27-30*

<sup>18</sup> Maiya metamo Yasu ipi haku reke, kurikurirakano, aporo hakása pura suane pesapo. Perakano Yasumo iaki someraka, "Aporo hinamo suamo anoane epapakasure?"

<sup>19</sup> Airakano aporo hakāsa puramo someraka, “Aporo metakiramo someraka, ‘Né, Yone he tapukumarererane turikia pureapo.’ Aíyaka somerakasupo. Arirakano aporo metakiramo someraka, ‘Né, Iraíyareapo,’ aíyaka somerakasupo. Arirakano aporo metakiramo someraka, ‘Né, porofete aporo fana kusua hakāsa meta mafarearaka paripereapo,’ airakasupo.”

<sup>20</sup> Airakano iaki Yasumo someraka, “Repo hemakapusuane, ano epapaka hemakapurkarire?” Airakano Pitamo someraka, “Kotimo Unihaeaka rekeasimo murikimasa aporo, Keresoane nereapo.”

<sup>21</sup> Airakano aporo hakāsa puraki Yasumo someraka, “Ano Keresoane, aporo metaki hufitaeraka somehokopo,” aisapo.

*Yape menomo Yasumo someraka, “Aporomo ano kukusimo rukusapo.” Aíyaka somesane oyapo.*

*Matiu 16:20-28; Maka 8:30-9:1*

<sup>22</sup> Yasumo ipi aporo hakāsa puraki someraka, “Aporomanomo Tákeane anopo. Keseke ano kau kára teraka himu nakosapo. Yu aporo sisimamo soko, pirisiti aporo káramo soko, Kotimo somemane tisa aporomo soko, anoane hisiraka anoaki patera tarikia ano kukusimo rukusapo. Rusuane, sere tetá farakano, sere isiamo ano maturikia taehokosapo.” Aíyaka Yasumo iaki some kasapo.

<sup>23</sup> Arirakano Yasumo aporo hinamo suaki someraka, “Repo ano patera asekone, ano kukusimo ira matopesa paremareakosane nōmo ní makatíraka apura ayíáka, repo soko maiya suamo repo namina hemakapusuane metakarikia, ira matopesa maka puraka ano finihaoa re soko fini kafo kepe punie.

<sup>24</sup> Asiamo aporo hinamo hakasa meta hauaka wo areamo hitaferaka rekeakosane hakasa hemakapukua rakiraka rekeno, eane Kotiyaki yaiya rekeakosafapo. Arirakano aporo hinamo hakāsa metamo someraka, ‘Yasupoko ano kuane soko siahoasireapo.’ Aíyaka kurane hemakapurafaraka rekeno, e ipiane Kotiyaki yaiya rekeakosapo.

<sup>25</sup> Arirakano aporo hinamo hakāsa meta, hauku kara wo makata kemo suane mokoa sarimiraka reke, Kotiyaki yaiya rerane epo metakarikia rekeno, eane akura maiya amo makata yakapamo e ararehokosare? Wae. Makata metamo e ararehokosane kakenafapo.

<sup>26</sup> Arirakano aporo hinamo hakāsa metamo ano metakarikia, arirakano nōmo someane soko metakarikia rekeno, Aporomanomo Táke ano ní pariapera maiya amo, eane soko nōmo metakariakosapo. Ano faesayaki, nōmo Atamo faesayaki, hepene aporo kotesa susuyaki pariapera maiya amo aporo hinamomo ano metakarirakano iane soko nōmo metakariakosapo.

<sup>27</sup> Nōmo reaki kakaro somerakaripo. Re metakira yumo risiane kukusiraka arisia amo, aporo hinamomo Kotiaki himu hakásaraka hemakapukua risiane Kotimo unihaeaka asekea rekeno, i aseakosapo.” Aíyaka Yasumo somesapo.

*Yasu kau hakuraka faesane oyapo.*

*Matiu 17:1-8; Maka 9:2-8*

<sup>28</sup> Sere karisu faraka, Yasumo kurikurihoko ūri terayia hinaka Pita soko, Yone soko, Yamese soko, i karikia ūria hikia kurikurisapo.

<sup>29</sup> Yasu kurikuriraka rekeno, ipu Yasu kaua aseane Yasu ipi hikumisiane hakuraka reke, arirakano ipi pasu ososane namo kakaro pakaesapo. Pakaesane aseraka i hi kakanosapo.

<sup>30</sup> Arirakano Mosesepé Iraíya tetá soko faesayaki wate foakayia faserepekea risike, tetapō Yasuaki somesapo.

<sup>31</sup> Yasumo Kotimo hemakapusuane su rakikia maraka, Yarusarame sitia kukusapo. Asiamo Yasumo hauaka one metakariakosane tetapō Yasuaki somesapo.

<sup>32</sup> Somerakano, Pita, Yamese, Yone, i su wakako nekeraka toane, kakaro wakakesapo. Wakakesane turikia tarikia aseane Yasu faesayaki rekeno asesapo. Aseane aporo tetá Yasuyaki hakāsa risikino asesapo.

<sup>33</sup> Aporo tetá ane Yasu metakarikia hiakorakano, Pitamo someraka, “Yasuo, isu isina o pesane kotesapo. Isiapo ape mano isia kiakosapo. Meta nepoko, meta Mosesepoko, meta Iraiýapoko, ayíáka kiakosapo.” Aíyaka Pitamo somesapo. Pitamo nenakamaka mokome somesapo. Koteaka hemakapukua somesafapo.

<sup>34</sup> Pitamo somesa maiya amo, ako peraka iane karotapisiapo. Akomo karotapirakano, Yasumo ipi aporo hakāsa purane namoraka himu fasapo.

<sup>35</sup> Himu farakano, ako karotapisia arakaru aeyaka memo someraka, “Eane nōmo ní hokosapo. Nōmo murikimaka pusiesane epo. Asiamo epo someane repo kakimakanie.”

<sup>36</sup> Aíyaka makata someaka faraka Yasu ipi haku yia rekeno asesapo. Asiamo makata asesa maiya amo, Yasumo ipi aporo hakāsa puramo mahamekeea somesafapo.

*Yatafumo hokosa ho masane Yasumo yatafuaki metakarikia pusiesane oyapo.*  
*Matiu 17:14-21; Maka 9:14-27*

<sup>37</sup> Mituru fiarakano aporo isia Yasuyaki ūriane metakarikia pusuapo. I peraka, aporo hinamo yakaimo Yasuane sapenako pesapo.

<sup>38</sup> Aporo hinamo yakai arakarua aporo hakasa metamo wáraka, "Tisao, nōmo ní aporo hokosa yatafumo ho masapo. Nōmo ní aporo hokosa meta rekenafapo. Hokosa hakasa nine yatafumo ho masapo.

<sup>39</sup> Yatafumo e ho marakano ipi wáraka wiriraka, mokoweraka, akai momotoroyaki, akai kamusakaeyaki, mokewekeea kara mokoatikiraka haru metakarirafapo.

<sup>40</sup> Asiamo nōmo ní aporo hakāsa puraki nōmo someraka, "Yatafuane ipi pusiese." Airakano ipu pusiehoane yatafuane pusuafapo. Yaiya rekenapo."

<sup>41</sup> Airakano aporo suaki Yasumo someraka, "Aporo hinamo maiya omo arisiamo Kotiaki himu hakásaraka hemakapukua risikirifapo. Maiya suamo repo hasaka hemakapukua risikino, nōmo repoko maiya suamo wafororaka rakiraka rekenapo. Nōmo hokosa wo karikia peae." Aisapo.

<sup>42</sup> Asiamo hokosane karikia perakano aseane, yatafumo ho maka hauaka atura rukumakasuraka wareke mokowerakano asesapo. Asekea yatafuaki Yasumo pusiesapo. Airakano yatafu metakarikia pusuapo. Purakano asekea, hokosa mafasane Yasumo máka ipi wafayaki kaka someraka, "Nōmo ní hokosapo. Ní masie."

<sup>43</sup> Airakano aporo suamo aseraka fofaraka someraka, "Koti ipi kárapo. Ipi wakapu kára rekenapo," aisapo.

*Yape tetámo Yasumo someraka, "Aporomo ano kukusimo rukusapo." Aisane oyapo.*  
*Matiu 17:22-23; Maka 9:30-32*

Airakano aporo hinamo su fofaraka risikino, aporo hakāsa puraki Yasumo someraka,

<sup>44</sup> "Nōmo some kakakoana one, repo meraruhokopo. Aporomanomo Tákeane anopo. Keseke ano rusua kukusimo aporomo ano parakehokosapo."

<sup>45</sup> Airakano ipu kaikia hemakapunafonorakano kepoane Kotimo tarisiafapo. Tarianafonorakano ipu himetesapo. Kepoane hemakapukusakipoko Yasuaki ipu kaiyakosane karekesapo.

*Aporo fanaraka reramo kepoane oyapo.*

*Matiu 18:1-5; Maka 9:33-37*

<sup>46</sup> Aporo hakāsa puramo namina yia tafatafaraka someraka, "Ano fanapo." Airakano metamo someraka, "Wae, ano fanapo." Aíyaka tafatafaraka somesapo.

<sup>47</sup> Aiyáka somerakano ipu hemakapusuane Yasumo asesapo. Asekea hokosa hakāsa meta eane makeraka rekeasimo, Yasumo ipi karikia pekeea someraka,

<sup>48</sup> "Aporomo ano hemakapukusakipoko hokosa ásiáne ararerakanone, anoane soko ararerakanapo. Ano arareraka maseserakanone, ano pusiesa Kotiane soko maseserakanapo. Asiamo aporo meta ipi kesekeea rekenone aporoane ipi fananapo," aisapo.

*Aporo metamo makata rakisiane oyapo.*

*Maka 9:38-40*

<sup>49</sup> Yonemo someraka, "Tisao, isiaipo aseane aporo metamo né yano hokoa aporo meta yatafumo ho masane pusierakano pusuapo. Purakano asekea, isiaipo someraka, 'Né Yasumo aporo hakāsa purayaki paosafapo. Paohoanafonosasamo yatafu pusiehokopo,' aisapo."

<sup>50</sup> Airakano Yasumo someraka, "Repo aihokopo. Aporo metamo isuyaki weanafonoraka isu ararerakanapo." Aisapo.

*"Yasu né peakopo," aisane oyapo.*

<sup>51</sup> Yasu hepene yapura hiako makeraka rea maiya amo, Yasumo wakapuaka hemakapuraka, "Ano Yarusarame sitia hinakapo." Aíyaka hemakapukua, hinaka aporo metakiraki Yasumo someraka,

<sup>52</sup> "Re fana hikia, Sameria hauaka á, taone meta hikia, ape wakako maropohoko hisie. Hikia ape maroposakipoko ano kesekeea peakosapo." Airakano i ape marepohoko Sameria hauaka á hisiapo.

<sup>53</sup> Hikia taonea paurakano, Sameria aporomo someraka, "Re Yarusarame sitia hiakos-apakae. Re á hiakosakipoko ape wo wayáne siahoasifareapo." Aíyaka Yu aporoane soko, Yarusarame sitiane soko Sameria aporomo hisisapo.

<sup>54</sup> Hisirakano asekea Yonepe Yamese tetápō someraka, "Unihaeo. Aporoane hepene aeyaka ira rufimo inaka kukusimo wáhoaere?"

<sup>55</sup> Airakano Yasu rekeako pariraka tetaki wakapuaka someraka, "Aíyaka somehokopo. Tetápō watikiaka hemaka apure."

<sup>56</sup> Aíyaka ipu taoneane metakarikia taone meta á hisiapo.

*"Yasu ne patera aseakosapo."* Aíyaka aporo metakiramo somesa nine himu tetáraka risiane oyapo.

*Matiu 8:19-22*

<sup>57</sup> Namina ikia kara hisia maiya amo, ikia otoa aporo metamo Yasuaki someraka, "Né taku ra purakano soko, taku ro purakano soko, sapeaka hinakano soko, ano neyaki hakása puraka rekeakosapo."

<sup>58</sup> Airakano aporoane ipi kau aseakosakipoko Yasumo someraka, "Yákasa ipi hauaka rapia warápo. Mena ipi usi huturua warápo. Ipu ape waráne risikinapo. Arirakano ano Aporomanomo Tákeane anopo. Nōmo ape wará soko uni katane soko rekenafapo." Aíyaka Yasumo somesapo.

<sup>59</sup> Aporo metaki Yasumo someraka, "Ano patera asesie." Airakano aporoamo someraka, "Ano haru peakosafapo. Nōmo ní ata kurakano, hauaka marekea keseke néyaki peakosapo."

<sup>60</sup> Aíyaka epo ipi hemakapusuane rakiakosakipoko, Yasumo someane kaisia fasikiraka metakarisiaipo. Asiamo Yasumo someraka, "Aporo ano patera asekeanafonosane, e aporo kusua asiapo. Asiamo aporo kusua asiasamo epo ipi aporo kusuane hauaka mareane siahoasireapo. Asiamo ne ano patera aseako hemakapuraka, né pukua, aporo hinamo suaki someraka, 'Kotimo ipi aporo hinamo suane unihaeaka asekeea rekenapo.' Aíyaka somehoko pusie," aisapo.

<sup>61</sup> Airakano aporo metamo Yasuaki someraka, "Yasuo, ano né patera aseakosapoko asiane, fana amaki soko, ataki soko, papáki soko, maeaki soko, i suaki ayapahoko apea pukusapo. Ayaparaka marekea keseke paripekeea néyaki hakása pukusapo."

<sup>62</sup> Airakano Yasumo someraka, "Aporomo irawaē maka kasu táriraka, rokoa puraka, maiya suamo patera takua pariaeane siahoasifareapo.\* Aporo patera pesa sapea paraserakanone ane, Kotimo unihaeaka asekeea rekeakosafapo," aíyaka Yasumo somesapo.

## 10

*Aporo sewenet tu (72) Yasumo murikimasane oyapo.*

<sup>1</sup> Yasumo aporo metakira sewenetí tumo (72) ipi someane some kape pusimo i murikimasapo. Murikimaka epo someraka, "Re fana pusie. Taone metakira soko, hauaka metakira soko, re tetá tetákara pusie. Arirakano re fana pusuakipoko ano keseke peakosapo.\*

<sup>2</sup> Hao, kaisie. Ira wate sú kárareapo. Asiane ira wate namo tuakosane aporo hukusireapo. Asiamo ira wate susane aporo raipamo tuako pusiehoasimo, hemo wafayaki kurikurihoanie.

<sup>3</sup> Repo makata rakiako pusie. Reane saro sipi auasa asiapo. Aporo watikisane saro wofe<sup>†</sup> irirasa asia risiakipoko, nōmo re saro sipi auasa asiane pusierakanapo.

<sup>4</sup> Asiamo re puraka, pausia mone makesane mokoa pukupo. Aku soko, tamaka soko, mokoa pukupo. Re ikia kara apuramo aporo meta sapenenaka e hokono mokoa maiya káramo yia risikiakopo. Nōmo makata rakirane himu hakásarako hemakapuruka rakinie.

<sup>5</sup> Arirakano re pukua apea pauraka fana úyaka somehoanie. 'Aporo ape wafaya né tau auaraka rekeasimo Kotimo né ararehokosapo.'

<sup>6</sup> Aíyaka somehoane aporo ane tau auaraka rekeanafonorakano asekeea, nōmo tau auaraka rerane aporo akiyaki rekeakosafapo. Metakarikia, ipi néyaki rekeako paripeakosapo.

<sup>7</sup> Arirakano ape hakása á waka reke aseane, aporo meromo néaki makata nakosa soko, he soko, karakano asekeea nanie. Makata rakira aporomo makata rakisiakipoko, ipi makata ropoane makata nakosa akara ayapo. Ape meta á soko, ape meta á soko, ayíáka mokome pukupo. Ape sumu meta á pukusakipoko né ní ape wasá aeyaka punie.

<sup>8</sup> Pukua taone meta á pauraka aseane, aporo ape wafayamo né pasimaka tereraka, makata nakosa karakano, makata ane nanie.

<sup>9</sup> Aporo makata tasa mafahoanie. Mafaraka someraka, 'Koti unihaeaka reane, reyaki makeraka rekenapo.' Aihohanie.

\* <sup>9:62:</sup> Yasumo some kepoane oyapo. Repo ano patera asekeea puraka yia makata fana metakarisiane yaiya hemakapuruka risike siahoasifareapo. Anoaki himu hakásarako hemakapuruka ano patera kekemarape puraka risikianie.

\* <sup>10:1:</sup> Aporo metakiramo Kiriki meane menoraka, hemakapuraka, Yasumo aporo sewenetí (70) hákasa murikimasapo.

† <sup>10:3:</sup> Saro wofeane yákasa asia popakepo. Saro wofeane isiapo hauaka wo risikinafapo. Saro wofemo makata kakayia hitafe soko amano soko rukua menapo.

<sup>10</sup> Arirakano né pukua, taone meta á pauhoane, aporo ape wafayamo né tereraka pasimakanafonorakano, né hauaka moroa pukua á reke someraka,

<sup>11</sup> 'Repo taone wo kokotonemosane ano korakea pararisiante rerakatapikia marerakanapo. Repo namina hisirakane Kotimo seserakanafapo. Aíyaka repo hemakapusimo kokotonomo rerakatapikia marerakanapo. Asiamo Koti unihaeaka reane nōmo reaki somehoko pesapo. Asiane repo koarentasasamo ano taone meta purakanapo.' Aihonanie.

<sup>12</sup> Hao, kaisie. Hukuarura maiya amo Sotome aporo hinamo iane hukurukusane wakasema kárahokosapo. Asiamo taone meta árepo some kayane aporo hinamomo kakipayaraka risikinone, taoneane hukurukusane namo kakaro kárahokosapo," aíyaka Yasumo somesapo.

*Yasumo wakapuaka rakisiane asesa aporomo namina himu watikisane metakarikia risikiako parihoanafonorakano i fanasihokosane oyapo.*

*Matiu 11:20-24*

<sup>13</sup> Arirakano Yasumo someraka, "Uao, enahoasifareapo. Korasini aporo hinamo reo, Pesaita aporo hinamo reo, repo taonea Kotimo wakapumo hemakapukua rakirane nōmo rakisiapo. Repo aserakayia repo makata watikisane metakarianafonorakano, reane kára fanasihokosapo. Arirakano Taia taonea soko, Saetone taonea soko, Yu aporo hoanafonosa taonea risiamo nōmo makata rakirakano ipu asesa satiki, makata watikisane wate fana metakarafunupo. Metakarikia ipu makata watikiaka rakisismo i kaiyaraka risike, kaua ororomo paikia pasu pitikini makafirikia arupekeea aiyáka tokoafunupo. Aiyáka toke ipu makata watikisane metakarikia risikiako parihoafunupo. Asiane ipu nōmo makata rakisiane aseafareapo.

<sup>14</sup> Asiamo hukuarura maiya amo Taia aporo hinamo soko, Saetone aporo hinamo soko, wakasema kára hukurukua fanasihokosapo. Arirakano repo aserakayia risikiako parihoanafonosakipoko, reane namo kakaro kára hukurukua fanasihokosapo.

<sup>15</sup> Kapaneame aporo hinamo reo, repo hemakapuraka, 'Isu hokopukua risikiakoripo.' Aiyaka hemakapukua, hepene yapurane máfana aiyáka repo namina yano motosa hákasa máfahoko hemaka apure. Asiamo keseke re fansiraka heao hauaka atura re mokoasuhokosapo," aíyaka Yasumo somesapo.

<sup>16</sup> Yasumo aporo seweneti tuaki (72) someraka, "Repo someane aporomo kairakano ane, nōmo someane kairakanapo. Reaki patera tarirakano, ane anoaki soko, patera tarirakanapo. Anoaki patera tarirakano, ano pusiesa aporoaki soko, patera tarirakanapo," aíyaka Yasumo somesapo.

*Aporo sewenetiitomo (72) makata rakikia faraka poparipesane oyapo.*

<sup>17</sup> Aporo seweneti tu (72) pusuane seseaka popariperaka someraka, "Unihaeo, né yano hokoa yatafu pusierakano pusuapo. Iisiapo someamo iane hurutapisiapo."

<sup>18</sup> Airakano Yasumo iaki someraka "Satane hauaka wo huruperaka yamakere piakaena aiyáka huruperakano nōmo asesapo.

<sup>19</sup> Hao, kaisie. Nōmo reaki wakapu kára kasapo. Asiamo hesekea repo finihoane rukunesa kukusafapo. Hanutanomo re rukunesa kupeakosafapo. Satanemo wareane repo hurutapiakosapo. Makata hakásá metamo soko re mokoatikihokosafapo.

<sup>20</sup> Repo yatafu pusierakano pusuane wakasema sesehoanie. Arirakano hepene yapura repo yanoane poparaka maresasamo re kakaro kára sesehoanie," aisapo.

*Yasumo ipi kurikurisane oyapo.*

*Matiu 11:25-27; 13:16-17*

<sup>21</sup> Maiya amo Ho Kotesamo Yasuane masesesapo. Maseserakano epo someraka, "Atao, hepene yapura soko, hauaka wo soko, nōmo unihaeaka aseke rekenapo. Asiamo aporomo makata su enomasaki‡ nōmo makata faremarestane mafekemaraka tarirafapo. Asiane nōmo ní hokosa asia aki hákasa nōmo ní makata namo faremarestane mafekemaraka tarirapo. Asiamo neaki suserakanapo. Atao, nōmo ní hemakapusua aporo aki tarirapo." Aíyaka Yasumo kurikurisapo.

<sup>22</sup> Arirakano Yasumo someraka, "Makata suamo kepoane nōmo Atamo anoaki tarisiapo. Nōmo hemakapusuan soko, nōmo ainane soko nōmo Atamo ipi hakásamo asekeha hemakapurapo. Arirakano nōmo Atamo hemakapusuan soko, epo ainane soko, nōmo ní hákasa asekeha hemakapurapo. Arirakano aporo hinamo metaki nōmo ní tariako hemakapuraka, tarirakano, epo Atamo ipi ainane soko, hemakapurane soko, asekeha hemakapususapo." Aisapo.

‡ **10:21:** Aporomo makata su enomaka hemakapusuan metakira Ferese aporopo. Metakira Satusi aporopo. Metakira Kotimo somemane tisa aporopo. Kotimo ipi hokosa asiane, Yasumo ipi aporo hakásá pura ayapo.

<sup>23</sup> Yasumo ipi aporo hakāsa puraki asekea someraka, “Repo namina himo asesasamo, reane seseaka risikianie.

<sup>24</sup> Repo makata asesane Kotimo some kará porofete aporo yakaimo soko, kamani aporo unihaemo soko, aseakoripo, aisa nine asesafapo. Repo kaisiane ipu kaiyakoripo, aisa nine kaisiafapo,” aiyaka Yasumo somesapo.

*Sameria aporomo koteaka rakisiane oyapo.*

<sup>25</sup> Maiya metamo Kotimo somemane kaira aporo Yasu rea peraka, Yasumo hasaka somehoasimo kau aseakosakipoko someraka, “Tisao, ano yaiya rekeakosakipoko makata yakapa rakiakosare?”

<sup>26</sup> Airakano Yasumo someraka, “Kotimo somemane popasane yakapa popasare? Nōmo yakapa menosare?”

<sup>27</sup> Airakano epo someraka, “Kotiane nōmo unihaepo. Unihaeaki nōmo himu tumurumo hemakapunie. Nōmo homo soko eaki hemakapunie. Nōmo wakapumo soko eaki kataka mareanie. Nōmo himu hemakapuramo soko eaki hemakapunie. Arirakano nōmo niane himu tumurumo hemaka apura ayiáka, nōmo ní aporo tākeane soko, ayiáka himu tumurumo hemakapunie.” Aiyaka popahoareapo.

(Lo 6:5; Wok Pris 19:18)

<sup>28</sup> Airakano Yasumo someraka, “Kakarorakae. Nōmo someraka ane kakimaka ayiáka rakirakanone ane, né yaiya rekeakosapo.”

<sup>29</sup> Airakano aporoamo ipi nine makáraraka sikiraka someraka, “Nōmo aporo tākeane epare?”

<sup>30</sup> Airakano Yasumo taku meaka someraka, “Aporo hakāsa meta Yarusarame sitiane metakarikia, Yariko taonea pukusakipoko, ikia kara á puane hakimora aporomo e rusuapo. Rukua motokoa pasu ososane horomaka, kukuko makerakano e metakarikia pusuapo.

<sup>31</sup> Pusuakipoko aporo rusuane kukurakano wareakipoko, pirisiti aporo ipi nenakamaka meraruamo peraka aseane, aporo rusuane ikia kara fē takua warekano, pirisiti aporoane ipi koaraka ikia kara fe taku aeyaka pusuapo.

<sup>32</sup> Pirisiti aporo pusuakipoko, Rífafi aporo meta, Kotimo apea raiparaka makata rakisia aporoane pekeaa aseane, aporo rusuane warekeno asekea, ipi asekepayaraka metakarikia koaraka, ikia kara fe taku aeyaka pusuapo.

<sup>33</sup> Arirakano Rífafi aporo pusuakipoko, Sameria<sup>§</sup> aporo kesekeaa peraka aseane aporo rusua warekeno epo asekea kamenakaraka,

<sup>34</sup> aporo rusuane warekeno asekea, wera waene heyaki munamuna asia sarimaraka, aporo rusuane kaua rekemarekea, pasumo taporaka, aporoane maka, epo ipi saro toki matia ripaka marekea ikia kara pusuapo. Pukua ikia kara tipia ape wará reakipoko ape a pukua, ape kakarua yorokoa pusuapo. Pukua aporo rusuane motokoa asekea wasápo.

<sup>35</sup> Mituru fiarakan Sameria aporoane ipi puraka, ape wafayaki siufa mone hae tetá karaka, someraka, ‘‘Ano purakanapo. Aporo rusuane nōmo asekea rekeanie. Asekea reke nōmo epoko makata roposa akipoko ano pariapera maiya amo nōmo ne makata ropo kakakosapo.’’ Aiyaka Sameria aporomo somesapo.”

<sup>36</sup> Aiyaka Yasumo takumeaka someaka faraka, somemane kaira aporoaki someraka, “Aporo rusua amo tākeane epare? Aporo isia pesane epo aporo tākeane epare?”

<sup>37</sup> Airakano aporoamo someraka, “E araresane ipi aporo tākeane ayapo.” Airakano Yasumo someraka, “Né puraka, aporo ayiáka tákeraaka rekeanie,” aisapo.

*Matape Maria tetapō apea Yasu makata nako pusuane oyapo.*

<sup>38</sup> Yasu ipi aporo hakāsa purayaki pukua, apea pauraka aseane, hinamo Matamo e tererakano asekea Matamo apea makata nako pusuapo.

<sup>39</sup> Pukua apea yorokoa, Matamo ipi apu Maria pekeaa, Yasumo someane kaiyakosakipoko Yasu kayakipoko e korake kekeno maresayia kayapo.

<sup>40</sup> Kakeno asekea, Matamo himu mahisiraka, ipi makata nakosa kára pairaka reke, makatane hákasa kára hemakapusuapo. Hemakapukua Yasu kayakipoko peraka someraka, “Unihaeo, nōmo ní haku makata nakosa pairakanapo. Nōmo ní hákasa rakirakano, nōmo hemakapurakarire? Nōmo apumo anō ararehoko pusiesie.”

<sup>41</sup> Airakano Yasumo someraka, “Matao, Matao, nōmo makata nakosa hákasa akipoko kára hemakapuraka himu mahisinane kárareapo.

<sup>42</sup> Anakan makata hakāsa meta, né forokoa akaye. Makata kotesane Mariamo hemaka apure. Makata kotesane etapo eaki matasohoane siahoasifareapo,” aiyaka Yasumo somesapo.

§ 10:33: Sameria aporomo Yu aporoane hisiraka kikisiraka risiapo.

## 11

*Kurikurinane Yasumo tarisiane oyapo.*

*Matiu 6:9-13; 7:7-11*

<sup>1</sup> Yasu hauaka meta reke ipi kurikuriraka reapo. Kurikuriraka farakano, ipi aporo hakāsa pura hakāsa metamo someraka, "Unihaeo. Isiapo koteaka kurikurihoko isuaki kurikurinane some kasie. Kurikurinane Yone he tapukumareramo ipi aporo hakāsa puraki some kasesupo. Asia ayiáka nōmo soko isuaki some kasie."

<sup>2</sup> Airakano Yasumo iaki someraka,  
"Repo kurikuriraka úyaka kurikurihoanie.

Atao, né yano motosa kakaro kára, haku kotesa susuane makama fanahosimoripo.

Aporo su himua ne unihaeaka rekeasimo hemakapurakaripo.

<sup>3</sup> Pipu makata nakosane siaraka nasimo kakanie. Ayiáka sere suamo nōmo karáka rekeanie.

<sup>4</sup> Aporo metamo isuaki mokoatikirakano, isiapo ropo mokoatikinane mafaraka mamerarukano asekea, isiapo watikisane soko nōmo mafaraka mameraruhoanie. Isu kau aseakosane peakohoamo nōmo isu asekea rekeanie.

Aiyaka kurikurihoanie." Aiyaka Yasumo iaki kurikurinane some kasapo.

<sup>5</sup> Asiamo ipi aporo hakāsa puraki Yasumo takumeaka someraka, "Ere tipiamo re hakāsa meta hikia, ní moremo apea someraka,

<sup>6</sup> "Moreo, nōmo apea aporo kimisi pesapo. Nōmo farawa fareapo. Asiamo nōmo farawa isia ano makasie."

<sup>7</sup> Airakano ape wafaya wareke someraka, 'Ikia koro mapirikia, roko motokoa, ano warekenapo. Nōmo hokosa soko, ano niyaki hakāsa wakakesapo. Wakakesasamo neaki makata kakako, ano turikia pukua takahisifareapo. Né ní metakarikia pusie.' Airakano efera hunia soko someraka, 'Ano makasie.' Aiyaka efera hunia soko, 'Ano makasie.' Aiyaka nōmo ní moreaki aufirakano makarápo.

<sup>8</sup> Titi moresakipoko epo makaráfapo. Aufirakano makarápo.

<sup>9</sup> Hao, koteaka kaisie. Makosakipoko ní akaimo kaiyinie. Kairakano Kotimo neaki makakosapo. Aseako koanie. Korakano kokoa aseraka makosapo. Ikia koro ropakamakasimo paroparohoanie. Paroparorakano ropakamakosapo.

<sup>10</sup> Asiamo makata mako akaimo kairakano makosapo. Makata aseako korakano kokoa aseakosapo. Nōmo ikia koroa paroparorakano ropakamakosapo.

<sup>11</sup> Repo aporomano hakasa metamo ní hokosamo someraka, 'Atao, ano pokoa makasie.' Airakano nōmo ní hokosaki yapakā kakakosare? Wae. Repo hokosaki yapakā kakakosafapo.

<sup>12</sup> Arirakano nōmo ní hokosamo someraka, 'Ano mena hae makasie.' Airakano hanutano kakakosare? Wae. Repo hokosaki hanutano kakakosafapo.

<sup>13</sup> Asiamo né himu watikisa yiamo nōmo ní hokosaki makata kotesa karápo. Makata kotesa akara ayiáka, nōmo Ata hepene yapura reamo soko makata kakakosane, kakaro kara marokeraka kakakosapo. Nōmo eaki Ho Kotesa makasie, airakano epo néaki Ho Kotesa kakakosapo," aiyaka Yasumo somesapo.

*"Yasupe Satane tati hakāsa yiyyareapo." Aiyaka aporo metakiramo somesane oyapo.*

*Matiu 12:22-37; Maka 3:20-30*

<sup>14</sup> Aporo yatafumo ho maraka me fasa amo koteaka somehoasimo, Yasumo yatafuaki metakarikia pusierakano pusuapo. Purakano asekea, aporo me fasamo koteaka somesapo. Somerakano aporo hinamo sarimasamo kairaka fofaraka someraka, "Siahoasifasa ane, epo ayiane. E aporo eparakapo," aisapo.

<sup>15</sup> Arirakano aporo metakiramo someraka, "Yatafumo unihae yano motosa Piaósiipuane Yasuyaki hakāsa rekenareapo. Reasasamo Piaósiipuamo wakapuamo yatafuaki apure," aisapo.

<sup>16</sup> Arirakano aporo metakiramo Yasumo rakirane kau aseakosakipoko Yasuaki mokopipiraka somesapo. Ipu someraka, "Kotimo murikimasane nésekenone, nōmo rakirane isiapo aseako nōmo rakikitakae. Kotimo hepene yapura makata ainane isiapo aseako nōmo rakikitakae," aisapo.

<sup>17</sup> Airakano ipu hemakapusuane Yasumo aseraka someraka, "Aporo namina ape sumu hakāsa risia, aporoamo namina yia parakuraka weraka, aporoane koaka tarikia, kekepo kekeporaka risike, ape kauanehokosapo. Arirakano aporo ira hakāsa namina yia parakuraka weraka arupukusapo.

<sup>18</sup> Aina ayiáka Satanemo yatafuaki ipi téke tati yia awera ayiáka weafunureapo. Satanemo ipi aporo tékeyaki parakuraka wera satiki i arupufunupo. Asiamo repo someraka, 'Piaósiipu anoyaki hakāsa reasasamo, epo ipi wakapuamo yatafuaki pusierakano pusuapo,' airakae.

<sup>19</sup> Asiamo reane kekemana aporomo yatafu pusiesane, epa iyaki paoraka reare? Epamo wakapumo yatafuaki pusiesare? Nōmo reaki somerakane, repo anoaki paripekeea someraka, ‘Kotimo wakapumo pusiesapo,’ aihokosapo. ‘Piaōsipumo wakapumo pusiesapo.’ Aiyaka repo some paripeakosafapo. Asiamo kepoane repo hemakapukusakipoko, repo namina kekemana aporomo ainane hemakapunie.

<sup>20</sup> Arirakano yatafu pusiehoasimo Kotimo wakapu aeyaka nōmo pusierakano yatafu i metakarikia pusuapo. Asiamo Kotimo wakapuanre repo asekeea hemakapuraka, ‘Isuane Kotimo unihaeaka asekeea rekeakosa maiya ane faserepesapo.’ Aiyaka hemakapunie.

<sup>21</sup> Arirakano aporo waremo ipi makata kemo ape kakarua taeraka, aporo metamo hakimakohoamo tare maka, ira rokopa pokeyaki maka, ikia koroa matasoraka asekeea rekeno, epo makata kemoane aporo metamo hakimaraafapo.

<sup>22</sup> Arirakano aporo meta namo kakaro ware yao aeyaka peraka, tati wekea, aporo yao aeyaka pesane ipi namo kakaro waresasamo, aporo ape wafayane marokenapo. Marokeraka aporo ape kakarua rea amo tare, ira rokopa, pokeyaki mahimuraka mokoa reane wasekemokoateraka apea forosoraka, makata kemo taesane soko morapo. Mokoa pukua ipi parakuraka morapo.

<sup>23</sup> Asiamo ano patera asekeanafonoraka risia aporo hinamo amo, anoaki yunuraka risikinapo. Arirakano anoa paosa aporo hinamo repo, aporo hinamo metakiramo anoaki himu hakásaraka hemakapusimo, repo pasimokoanafonorakanone, ane, aporo hinamo ane repo mapakataerakanapo.” Aiyaka Yasumo somesapo.

*Yatafu yaoa pusuane efera hunia pariperane oyapo.*

*Matiu 12:43-45*

<sup>24</sup> Yasumo someraka, “Yatafumo aporo ho masa metakarikia pukua, hauaka porasakipoko á koraka rerapo. Koraka reke e ape wakakosane soko, e fenekeea kakakosa soko, koane fasekeno ipi hemakapuraka, ‘Aporomanomo tura, ape ayiáka waka reane metakarikia pesasamo á rekeako paripurakapo,’ airapo.

<sup>25</sup> Ayiáka paripekeea aseane, aporomanomo tura ape ayiáka feaosa makata su makotesekeno aserapo.

<sup>26</sup> Asekeea, ipi yatafu táké yatipinusu pasimorapo. Yatafu yatipinusu pasimosa amo yatafu fana reamo watikiaka rakisiane marokeraka, ipu namo kakaro kára watikiaka rakirapo. Iane pasimokoa pekeaa aporoamo tura apea yorokoa arisia ayiáka, yorokoa risirapo. Yorokoa arisiama aporoane namo kakaro watikiaka rerapo. Fana yatafu hakásá rea maiya amo, aporoamo watikiaka rakisiane wakasemasapo. Arirakano yatafu kari suane pekeaa arisiama, aporoamo watikiaka rakirane, namo kakaro kárano,“aisapo.

<sup>27</sup> Arirakano aporo hinamo yakai sarimasa amo, hinamo hakásá metamo Yasuaki someraka, “Né ní amamo harepayaki kaina takaperakano, néaki hoko pi kasá hinamoane, Kotimo makoterakano, ipi seseraka kakenapo.”

<sup>28</sup> Arirakano Yasumo someraka, “Kotimo someane kakinara aporo hinamoane Kotimo makoterakano iane seseaka risirapo,” aiyaka Yasumo somesapo.

*“Kotimo wakapumo hemakapukua rakirane isuaki tarinie.” Aiyaka Ferese aporomo somesane oyapo.*

*Matiu 12:38-42; Maka 8:11-12*

<sup>29</sup> Aporo hinamo yakai pekeaa sarimarakano asekeea Yasumo someraka, “Maiya omo aporo hinamo watikiaka risiama someraka, ‘Kotimo ne pusierakano pesekenone ane, isiapo aseko Kotimo wakapumo hemakapukua rakirane nōmo rakikitakae.’ Airakae. Airakano nōmo rakiakosafapo. Makata hakásá meta nōmo tariakosapo. Repo hemakapuso, Yonaki asia ayiáka ano soko ayiakosapo.

<sup>30</sup> Kotimo Yona pusiesane, Ninefa aporo hinamomo hemakapusimo Kotimo Yonaki makata asiane Kotimo iaki tarisiapo. Tarisia ayiáka, Aporomanomo Táké anoane, maiya yumo aporo hinamo arisiaki nōmo tariakosapo.

<sup>31</sup> Arirakano Soromonemo koteaka hemakapukua somesane hinamo meta unihae Kuinimo kaiyako pesapo. Arirakano hinamo Kuiniane hauaka namo kakaro yameno aeyaka pesapo. Arirakano maiya yumo aporo hinamo ano makeraka risiama nōmo someane kakipayarakanapo. Asiasamo keseke Kotimo hukuarura maiya amo, aporo hinamo maiya yumo arisiame hinamo Kuini amo hukurukusapo. Arirakano Soromone ipi aporo kára rea nine, re risia titipi á ano reke Soromoneane marokeraka, ano namo kakaro káraraka rekenapo.

<sup>32</sup> Arirakano Yonamo Kotimo someane some karakano, Ninefa aporo hinamomo namina watikisane metakarikia risikiako parisapo. Namina risikiako parisa nine, aporo hinamo maiya yumo risiama makata watikisane metakarianafonoraka risikiako parisafapo. Asiasamo keseke Kotimo hukuarura maiya amo, Ninefa aporo hinamomo, aporo hinamo

maiya yumo risiaki hukurukusapo. Repo makata watikisane metakarianafonosakipoko ipu reane hukurukusapo. Arirakano Yona ane ipi Kotimo some kará aporopo. Asiane re risia titipi á, ano\* reke Yona ane marokeraka rekenapo," aiyaka Yasumo somesapo.

*Nafamo faenane takumeaka somesane oyapo.*

*Matiu 5:15; 6:22-23; Maka 4:21*

<sup>33</sup> Yasumo takumeaka someraka, "Aporomo nafa pakimaka hauaka rasa kutua motoraafapo. Arirakano taramomo karotapirafapo. Nafa pakimaka apea waremaresa faerakano, aporo hinamo metakira pekea apea yororaka aseane, nafamo faerakano aserapo.

<sup>34</sup> Né kaumō nafa asia ane né hipo. Nómō himo makata su koteaka asekeea takékea, ne kauane faeraka rekeakosapo. Asiane né hi meraka reke, né kauane soko katoraka rekeakosapo.

<sup>35</sup> Asiamo nómō faesane kopakapurapaka asekeanie.

<sup>36</sup> Né katoraka rekeanafonoraka, né faesa susu reke nafa faena ayíáka né kára faeraka rekeakosapo," aiyaka Yasumo somesapo.

*"Ferese aporomo arakira ayíáka repo ayíáka rakiakopo." Aisane oyapo.*

*Matiu 23:1-36; Maka 12:38-40*

<sup>37</sup> Some kasá maiya amo, Ferese aporo metamo Yasuaki someraka, "Nómō apea makata nako peae." Airakano Yasu pukua apea yorokoa teporo makeraka á kayapo.

<sup>38</sup> Á kake makata nakosakipoko ipi hokono kusuhoanafonorakano, Ferese aporomo aseraka fofaraka hemakapuraka, "Epo ane marirakanarakapo. Isiapo Ferese aporomo somemaneane epo ipi kekemarakarifapo."

<sup>39</sup> Aiyaka hemakapurakano Yasumo someraka, "Ferese aporo reo, repo kapo soko meraki soko kima takuane hákasa kusuna ayíáka, re soko ayíáka risikinapo. Repo kauane hákasa siaraka risikiaki ayiane re himua makata watikisa komarukua arisie. Repo aporo hinamo makata forosane asekepayaraka, namina yia makata kára mokoako hemakapukua risike, airakano aporo hinamoane mokoatikihoko hemaka apure.

<sup>40</sup> Re aporo masuosa ayireapo. Kotimo re kauane soko rakikia re himuane soko rakisipa. Asiamo Kotimo re himuane asekeea repo koteaka hemakapunafonoraka, aporomo re kau hákasa ane asekeasimo repo ayiane.

<sup>41</sup> Asiamo repo makata kemo kára tokenone, aporo hinamo makata forokoa risiane arareraka yaku kakanie. Ayíáka karakano re Ferese aporomo hemakapuraka, 'Isiapo mer-akiane kima takuane soko tu takuane soko kusurakanapo,' aiyaka repo hemakapukusapo.

<sup>42</sup> Asiamo Ferese aporo re asekeanie. Uao, enahoasifareapo. Repo hemo makata nena sereto asia kaeyakosu mosane, tokonasu namina moraka, kaeyako hákasané Kotiaki yaku karápo. Karaka yia, aporo hinamoaki koteaka takekea hemakapunie, aiyaka somemane motsane repo hemakapurafapo. Arirakano Kotiaki repo himu tumurumo hemakapunie, aiyaka somemane motsane repo hemakapurakarifapo. Asiamo makata kaeyako hákasané Kotiaki kakanie, aiyaka somemane motsane ayíáka kekemarakaka reke, somemane metakirane soko, kekemarakaka rakiraka risikianie. Somemane metakirane metakariakopo.

<sup>43</sup> Asiamo Ferese aporo re asekeanie. Uao, enahoasifareapo. Yu aporomo sarimana apea re pukua aporo hinamo su sarimaraka toakipoko, i hikumisi neneme sapea, sea a re tokoako sesenapo. Arirakano aporo hinamo makata ropona apea sarimaraka risiakipoko, re purakano aporomo re hokono mokoasimo repo sesenapo.

<sup>44</sup> Asiamo aiyaka rakira aporo re asekeanie. Uao, enahoasifareapo. Reane aporo kusua hauaka maresa asiapo. Aporo kusua hauaka maresakipoko, asane tanehekeia, hauaka maresane mosekeraka, nena hauaka parisakipoko aporo metamo asekeanafonosamo, meruaroamo peraka aporo kusua hauaka maresa kima, finiraka purapo," aisapo.

<sup>45</sup> Aiyaka Yasumo somerakano, Kotimo somemane tisa aporo hakásá metamo someraka, "Tisao, nómō somerakane nómō isu soko makaiyarakia hukurukua somerakae."

<sup>46</sup> Airakano Yasumo someraka, "Kotimo somemane tisa aporo re asekeanie. Uao, enahoasifareapo. Aporo metakiramo makata fato umisa asiane makatihoasimo, repo iaki makatiraka marerapo. Makatiraka marekeia repo iane wakasema soko ararenafapo.

<sup>47</sup> Asiamo aporo reo, uao, enahoasifareapo. Kotimo some kará porofete aporoane repo makasa kaua kekemamo rusua kusuapo. Rusua kurakano kunikia motsane repo makoteane.

<sup>48</sup> Asiamo repo makata arakiramo repo makasa kaua kekemamo rakisiane repo kekemarakaka arakire. Repo makasa kaua kekemamo rusua kususamo, repo seseraka kunikia motsane makoteraka arakire.

\* **11:32:** Asiamo nómō someane repo kakimarafaraka, repo anoaki Kotimo wakapumo rakira rakikitakae, airakae.

<sup>49</sup> Asiamo Kotimo koteaka hemakapukua sawia popasane oyapo. Kotimo someraka, 'Repo kaiyisimo nōmo porofete aporo soko, tarira aporo soko, pusiehokosapo. Perakan o asekeea, i metakirane repo rusua kukusapo. I metakirane repo mokoatikihokosapo,' aíyaka popahoareapo.

<sup>50</sup> Asiamo hauaka one kepomaresa maiya amo, porofete aporo rusua kurane kepo-marekea, rupe pekeka pipu maiya wo pauraka, aporo hinamo risiane Kotimo hukurukusapo. Hukuarura maiya amo ipu umisane makosapo.

<sup>51</sup> Fana Aepo rusua kusuapo. Rusua kusuakipoko, amo patera aporo metakira soko rusua kusuapo. Aiyipe pekeka kesekeea Sekaráya Kotimo apea rusua kusuapo. Eke karoraka tae-sane makama taku raraka, Kotipoko ape rumu kikisisane makama taku roraka, Sekaráya tipia reane e rusua kusuapo. Rusua kusuasamo, pipu maiya omo aporo hinamo risiane Kotimo hukurukusapo.

<sup>52</sup> Asiamo Kotimo somemane tisa aporo re asekeanie. Uao, enahoasifareapo. Aporo hinamomo makata koteaka kaikia hemakapusimo, ape ikia koro repo kimo ropaka-masafapo. Repo soko makata koteaka kaikia hemakapuko, ape kakarua yorosafapo. Aporo metakiramo soko makata kaiyako ape kakarua yoroako perakan, repo matasoso-apo." Aíyaka Yasumo apeane takumeaka somesapo.

<sup>53</sup> Aíyaka Yasumo someaka faraka Ferese aporomo apeane metakarikia purakano, Kotimo somemane tisa aporomo soko, Ferese aporomo soko ipu Yasuaki makata kotafe topakamaraka saperaka somesapo. Epo akaimo hasaka somerakarihoamo eaki some meta somerakano, some meta somerakano asiapo.

<sup>54</sup> Ipu Yasuane mahoperaka asekehaesapo. Makata kakayia kakinumo rusimo amarera ayíáka, ipu makata somehoramo kakinu amarera asiapo. Yasumo hasaka some pariper-akan, e hukurukusakipoko, epo makata somerane ipu kaikia asekehaesapo.

## 12

*"Ferese aporomo ainane makata pirira asiapo. Ipu himu tetáraka hemakapusuane repo mokoakopo." Aíyaka Yasumo somesane oyapo.*

*Matiu 16:5-6; Maka 8:14-15*

<sup>1</sup> Aporo hinamo taosene yakai sarimasakipoko hauaka taperaka, aporo hinamo kafukua puraka meta korakea meta korake takerupe pusuapo. Maiya amo Yasumo ipu aporo hakása puraki someraka, "Ferese aporomo ainane, makata pirira asiapo. Ipu himu tetáraka hemakapusuane repo mokoakohoamo asekeanie.

<sup>2</sup> Arirakano makata faremaresane mafekemahokosapo. Makata mahamesane makaka-maraka tariakosapo.

<sup>3</sup> Re katosa á risike repo somesane, keseke faesa á risike repo somerakano aporo suamo kaiyakosapo. Re namina hakása sarimaraka ape sapea risike, makata tau mahamekeea somesane yaiya mahamekeea rekeakosafapo. Keseke aporo suamo kaiyisimo, hufitaeraka sakepamo wáraka somehokosapo," aíyaka Yasumo somesapo.

*"Kotiaki namohoanie," aisane oyapo.*

*Matiu 10:28-31*

<sup>4</sup> Arirakano Yasumo some meta someraka, "Maeo, reaki nōmo kakaro somerakaripo. Aporomo né kau kukusimo rurakano aporoaki namohokopo. Aporoamo nōmo hoane rukusafapo.

<sup>5</sup> Asiamo né rusua kurakano né hoane heao hauaka á pusie, aihokosa Kotiaki namohoanie. Nōmo kakaro somerakaripo. Kotiaki namohoanie. Repo hemakapusimo nōmo reaki kakaro somerakaripo.

<sup>6</sup> Arirakano maketea mena muri asia aporomo roponapo. Roporaka mena muri asiane kakoreasu mone hae kusua tetámo (2 toe) roponapo. Mena muri asia hakása soko Kotimo merunafapo.

<sup>7</sup> Mena muri wakasemané Kotimo asekeea rerasasamo, re aporomanoane, Kotimo namo kakaro kára hemakapukua asekeea rekenapo. Asekeea reke re uni iti suane epo hakása hakásaka menoraka hemakapukua fasapo. Asiasamo re namohokopo," aisapo.

*Yasu patera asesa aporoane soko, Yasu patera asekeanafonosa aporoane soko Yasumo somesane oyapo.*

*Matiu 10:19-20, 32-33; 12:32*

<sup>8</sup> Arirakano Yasumo someraka, "Aporo suamo kaiyisimo aporo metamo someraka, 'Ano Yasu patera aserakanapo.' Aíyaka somerakano Kotimo hepene aporomo kaiyisimo, Aporomanomo Tákemo someraka, 'Ano patera asesa aporoane epo,' aihokosapo. Aporomanomo Tákeane anopo.

<sup>9</sup> Arirakano aporo suamo kaiyisimo, aporo metamo someraka, 'Ano Yasu patera aseako hisiripo. Nōmo Yasuane metakarirakanapo.' Aiyaka somerakano, aporoane Kotimo hepene aporomo kaiyisimo nōmo someraka, 'Aporoane ano patera asesafapo. Ano patera asekeanafonosasamo e nōmo metakarirakanapo,' aihokosapo.

<sup>10</sup> Arirakano Aporomanomo Tákeane anopo. Anoaki aporo hinamo metamo mawakase-marakano, epo watikiaka somesane Kotimo mafahoasireapo. Arirakano Ho Kotesamo wakapuanne, aporo hinamo metamo asekeea someraka, 'Ane Satanemo wakapureapo.' Aiyaka Ho Kotesane hokomaka mawakasemarakano, Kotimo epo makata watikisane mafahokosafapo.

<sup>11</sup> Arirakano re waseremaka Yu aporomo sarimana apea hukuruko karikia apura maiya amo, hukurura aporomo soko, aporo unihaemo soko, re hukururakano, repo hemakapuraka, 'Isiapo maiyaka meakataeraka somehoanarakapo. Maiyaka some paripunarakapo.' Aiyaka hemakapukupo.

<sup>12</sup> Asiamo hukuarura maiya yiamo, repo koteaka somehoasimo, Ho Kotesamo reaki some kakakosapo," aiyaka Yasumo somesapo.

*Aporomo makata kemo kára mosane Yasumo takumeaka somesane oyapo.*

<sup>13</sup> Aporo yakai sarimasakipoko aporo hakásá metamo Yasuaki someraka, "Tisao, nōmo ní ata kusuakipoko, nōmo maemo makata kemo parakuraka ano kakanie, aihoanie."

<sup>14</sup> Airakano Yasumo someraka, "Makata hukurukua maroponane nōmenafapo. Makata kemo parakunane nōmenafapo," aisapo.

<sup>15</sup> Aiyaka aporo suaki Yasumo someraka, "Repo someraka, 'Ano makasie. Makasie.' Aiyaka someraka kára sakepamo mokoaripi airapaka asekeanie. Asiamo makata kemo káramo ne hitaferaka rerane kakakosafapo," aisapo.

<sup>16</sup> Aiyaka Yasumo efera hunia yapakeaka someraka, "Aporomo makata kemo kára moraka reapo. Ipi hauaka á koáne mano kosapo. Kosane káraraka tanehekea namo nakosane kíkisekeno tusuapo.

<sup>17</sup> Turakano asekeea aporoamo hemakapuraka, 'Koáne nakosane kára tusuapo. Ari-rakano koáne tusuane ape wakasemasamo taehoane siahoasifareapo.

<sup>18</sup> Ape kísiane wakasemasekeno nōmo kotahokosapo. Kotaraka ape kára meta kiakosapo. Ape kára ane kíkimaka, koáne nako tusuane ape kawea taehokosapo. Nōmo makata kemo soko, su apea taehokosapo.

<sup>19</sup> Apea makata kemo taesakipoko, nōmo ní yiamo úyaka hemakapukusapo. Nōmo makata kemo sia taesapo. Keremisi kára farakano makata nakosa soko, makata kemo soko, fahokosafapo. Asiamo yumo ano fenekeea makata rakiakosafapo. Ano fenekeea reke, makata nakosa soko waene he soko nekea, aiyáka maiya suamo seseaka rekeakosapo. Aiyaka nōmo hemakapukusapo.'

<sup>20</sup> Aiyaka aporoamo hemakapurako eaki Kotimo someraka, 'Né masuasamo hemakapura ayireapo. Nōmo himu koteaka hemakapurane fareapo. Asiamo pipu ereamo ne kukusapo. Nōmo makata kemo umuraka taesáne epamo mokoakosare? Nōmo ní mokoa pukusafapo.' Aiyaka Kotimo somesapo."

<sup>21</sup> Aiyaka yapake some kepoane Yasumo someraka, "Aporo hinamomo namina makata kemoane hákasa kara hemakapukua, makata kemo kára sarimaraka, mahimuraka taer-akano, Kotimo asekeea someraka, 'Hepene yapura makata ainane hemakapunafon-rakano, né forokoa rekenapo. aihokosapo.' Aiyaka Yasumo somesapo.

*"Makata nakosane kára himu nekea hemakapukupo." Aisane oyapo.*

*Matiu 6:25-34*

<sup>22</sup> Yasumo ipi aporo hakásá puraki someraka, "Né hitaferaka rekeako, hauaka wo makata nakosa hákasa akipoko, kára himu nekea hemakapukupo. Patera yase risirapaka pasu osohokosane, kára himu nekea hemakapukupo.

<sup>23</sup> Hitaferaka areamo makata nena hákasa ayare? Kaua pasu osohokosa hákasa ayare? Wae, hákasa ayafapo. Kotimo néaki himuha kasasamo, makata nakosane soko néaki kakasifareare? Ao. Epo sia kakakosapo. Néaki kau kasasamo kaua pasu osohokosane soko néaki kakasifareare? Ao, sia kakakosapo.

<sup>24</sup> Mena ane asekeanie. Menamo ipi makata nakosane pororafapo. Ira wate susekeno menamo tukua mokoa pukua apea keseke nakosakipoko taenafapo. Taehoanafonosa nine menane Kotimo makata nakosa karápo. Menaki karásasamo, aporomanoe epo sia kakasifareare? Ao, aporomanoe ipi kára hemakapukua makata nakosane karápo.

<sup>25</sup> Arirakano aporomanomo ipi himumo hemakapuraka, 'Ano kukusane hisiripo.' Aiyaka himu nekea rekeno, e kukusa sere motosane marokehokosare? Wae, marokehokosafapo.

<sup>26</sup> Kukusa sere motosane marokehoanafonorakano yia, marirakano makata meta akipoko kara himu nekea risikinare?

<sup>27</sup> Repo sako wemeane hemakapunie. Sako wemeane taneheakosakipoko sako wememo namina yia makata rakirare? Wae, makata rakirafapo. Sako weme wate suhoasimo sako wememo pasu susane maka irinare? Wae, sako wememo ipi hemakapukua wateane sunapo. Arirakano wate fana Soromone aporo kára unihaeaka reke, ipi pasu kotesa ososapo. Soromonemo pasu ososana kotesa, asiane sako weme wateane namo kakaro kára kotesapo.

<sup>28</sup> Arirakano asane tanehekea arisiane, Kotimo makoteraka wate peasimo karápo. Karakanu asane pipu tanehekea arisiane, keseke maiya wakasemamo iramo paiyiane inaka fanapo. Inaka faraka kukua kesane maiya wakasemamo tanehekea risirapo. Maiya wakasemamo tanehekea risia nine Kotimo asekea rerapo. Kotimo asekea area ayiáka nómó pasuane osohokosane Kotimo ipi ayiáka asekea rekenapo. Kotimo ne asekea rekeno yia nómó akipoko himu kara nekea rekenone, ane, nómó Kotiaki himu hakásaraka hemakapurane wakasemareapo.

<sup>29</sup> Asiamo Kotimo reane asekea reasasamo uyaka hemakapukupo. Makata nakosa mane nakosare? He mane nakosare? Aiyaka himu nekea kára hemakapukupo.

<sup>30</sup> Arirakano nena aporo hinamo hauaka sua risiamo maiya suamo makata nakosane soko, pasuane soko, kára himu tumurumo hemakapurapo. Asiamo makata nakosane soko, pasu osohokosane soko, makata su re fasane, repo sia mokoasimo repo Ata Kotimo ipi hemakapukua rekenapo.

<sup>31</sup> Asiamo Kotimo re unihaeaka asekea rekeakosane, makama fanaraka hemakapunie. Aiyaka hemakapukua risikinone, makata nakosane soko, pasuane soko, siaraka mokoakosapo.

<sup>32</sup> Aporo hinamo reane saro sipi mano sarimasa asiapo. Re himu fahokopo. Kotimo re asekea rekeako epo kára seserakanapo,” aiyaka Yasumo somesapo.

*Hepene yapura mahimuna makata ane taehoasimo Yasumo somesane oyapo.*

*Matiu 6:19-21*

<sup>33</sup> Yasumo someraka, “Repo makata kemoane roporaka mone mosane aporo makata forosaki kakanie. Pausi kaweanie maka hepene yapura mahimuna makatane pausi tua keasimo ayiakanie. A mahimuna makata taesane paténafapo. Metamo hakimorafapo. Arirakano surisurimo soko nena fapo.

<sup>34</sup> Asiamo hauaka kara wo repo mahimuna makatane toasasamo, repo himu hemakapurane soko, hauaka wo kakenapo. Arirakano repo hepene yapura mahimuna makatane taesekeno, repo himu hemakapurane soko, hepene yapura kakenapo,” aiyaka Yasumo somesapo.

*“Asekea rea aporo perakarihoamo, aporo raipamo koteaka rakikia kau risikianie,” aisane oyapo.*

*Matiu 24:42-44*

<sup>35</sup> Arirakano Yasumo someraka, “Aporo raipamo rakikia maresa wafayamo hinamo fitu karáka hokono keakosakipoko pusuapo. Pusuane ereamo pariperapaka foaka ikia koro ropakamako ipi aporo raipamo pasu korake yatipinu atura faisa pusifasekeno, pasu kakuna fairakae kenare weraka, saro kau terakae hikia, arirakano nafa pakimaka asekea risirapo. Asekea risira ayiáka, re soko ayiáka asekea risikianie.

<sup>36</sup> Arirakano hokono keeka faraka, aporo raipamo ipi wafayane peraka ikia koroa paroparorakano, aporo raipamo ikia koro foakayia ropakamarapo. Foaka ropaka amara ayiáka, repo soko ayiáka ropakamako hemakapukua risikianie.

<sup>37</sup> Aporo raipamo ipi wafaya pariapera maiya amo aseane, aporo raipa wakanafonoraka turikia tarikia makata rakiraka risikino aserapo. Anakanu aporo raipa ane seseaka risikiakoso. Asiamo nómó reaki kakaro somerakaripo. Aporo raipamo ipi wafayamo aseane aporo raipa asekea risikino asekea someraka, ‘Re teporo makeraka toae. Re makata nakosa nómó ni kakakoso.’ Aiyaka ipi pasu kenare weraka saro kau terakae hikia ayiáka reke, iaki makata nakosa kakakoso.

<sup>38</sup> Anakanu ere titipiamo soko, mena me horamo soko, aporo raipamo wafaya pariperapaka, aporo raipane waráfaraka asekea risiakipoko, aporo raipamo wafayane pariperakano aporo raipamo sesehokosapo.

<sup>39</sup> Asiamo some one hemakapunie. Makata hakimora aporomo aporo metamo apea makata kemo hakimokoako perapo. Makata kemo hakimokoako peakosane maiya hi awane ape wafayamo hemakapusua satiki ipi turikipukua asekea rekeafunupo. Ipi apea aporo metamo makata hakimako perakano asekea ipi matasohafunupo.

<sup>40</sup> Asiamo re soko rereraka maroporaka asekea risikianie. Aporomanomo Tákeane anopo. Ano paripeakosa maiya hi awane soko repo hemakapunafonoraka, re meraruamo risiakipoko ano paripeakoso,” aisapo.

*Aporo raipa kotesa soko, aporo raipa watikisa soko, Yasumo takumeaka somesane oyapo.*

*Matiu 24:45-51*

<sup>41</sup> Airakano Pitamo Yasuaki someraka, "Unihaeo, takumeane isuaki hakasa somerakanare? Aporo suaki soko somerakanare?"

<sup>42</sup> Airakano Yasumo someraka, "Aporo raipa metamo ipi wafayaki himu hakásaraka hemakapukua reke, ipi wafayamo someane kaikia, koteaka hemakapukua rakira aporoaki nōmo somerakanapo."

<sup>43</sup> Aporo raipamo ipi wafaya fore hinaka, ipi aporo raipaki makata rakisimo kasane, rakiraka risiakipoko, ipi wafayane pariperakano, aporo raipa ane sesehokosapo.

<sup>44</sup> Asiamo aporo raipa kotesaki, ipi wafayamo someraka, 'Nōmo hauaka soko, ape soko, makata kemo suane, nōmo asekea rekeanie,' aihokosapo.

<sup>45</sup> Arirakano aporo raipa metamo hemakapuraka, 'Ano asekea rera aporo hisiane haru paripeakosafapo.' Aiyaka hemakapukua epo aporo raipa metakirane soko rukua, hinamo raipa metakirane soko rukua, arirakano makata nakosane hákasa nekea, he watikisa nekea, himu maparitaeraka aiyáka reke,

<sup>46</sup> e ipi asekea rea wafaya paripeakosa sereane soko, maiya hi awane soko, hemakapunafonoraka meraruamo reakipoko, e ipi asekea rea wafayane paripeakosapo. Pari apura maiya amo aporo raipaki saperaka e fansasiraka, koareaena aporo hinamo akiyaki rekeako pusie, aihokosapo.

<sup>47</sup> Arirakano aporo raipamo ipi wafayamo hemakapusuane aseraka tiki asesaneo, epo ipi hemakapusuane kekemaraka rakianafonoraka risikinone, aporo raipane hukurukua kára rukusapo.

<sup>48</sup> Arirakano aporo raipa metamo ipi wafayamo hemakapusua aiyáka hemakapunafonoraka watikiaka rakirakano, eane hukurukua rufunupo. Rufunusa nine e himeteraka watikiaka rakisiasamo wakasema rukusapo. Asiamo aporo raipa metamo makata kára rakisimo kasaki ipi siaraka koteaka rakisiarihoamo ipi wafayamo aseako peakosapo. Asiamo aporo yakaimo aporo hakásaki makata kara rakisimo karakano, keseke ipi kasane rakisiarihoamo epo ipi aseako peakosapo," aiyaka Yasumo somesapo.

*"Aporo fasikia risikiasimo ano pesapo." Aiyaka Yasumo somesane oyapo.*

*Matiu 10:34-36*

<sup>49</sup> Yasumo someraka, "Hauaka wo ira paiyakosakipoko ano pesapo. Ira rufihoasimo pairakano ane, kotehoasireapo.

<sup>50</sup> Arirakano ano kukusimo ira matopesa paremarerakano, kukusane Kotimo maresapo. Kukusa maiya ane haru faserepeanafonorakano ano himu nekea rekenapo.

<sup>51</sup> Arirakano repo hemakapuraka, 'Yasu pesasamo hauaka wo aporo su tákeraka tau auaraka risikiakosapo.' Aiyaka hemakapukupo. Ano wo pesasamo aporo hinamo repo namina yia fasikia risikiakosapo.

<sup>52</sup> Pipu kepomarekea pukua, keseke soko, ape hakásá á aporo hinamo kakoreasu risiane namina yia parakuraka, aporo hinamo isiromo aporo hinamo tetáki namina yia rukumarekea risikiakosapo. Aporo hinamo tetámo aporo hinamo isiaki namina yia rukumarekea risikiakosapo.

<sup>53</sup> Aina aiyáka aporo hokosamo ipi wafayaki rukumarekea, arirakano wafayamo ipi hokosaki rukumarekea risikiakosapo. Arirakano kaýiromo ipi farayaki rukumarekea, arirakano farayamo ipi kaýiaki rukumarekea risikiakosapo. Arirakano hinamomo ipi hokosamo aseaki rukumarekea, arirakano hinamomo ipi apiamo kaýiaki rukumarekea aiyáka risikiakosapo," aiyaka Yasumo somesapo.

*"Pipu sere omo makata aiyakokosane koteaka takekeha hemakapunie." Aisane oyapo.*

*Matiu 16:2-3*

<sup>54</sup> Yasumo aporo hinamo su sarimasaki someraka, "Maiya apura taku á repo ti yapura ti pakae aseraka, repo someraka, 'Ti pakaeane fahokoane farakano, ane yao peasireapo,' airapo. Aiyaka hemakapukua somesane yao perapo.

<sup>55</sup> Arirakano ketayia taku aeyaka atifo kára perakano repo someraka, 'Pipu yao peasi-fareapo.' Airakano kakaro yaiyao perafapo.

<sup>56</sup> Asiamo re aporo himu tetáraka hemakapusuane, repo hauaka wo makata ainane soko, ti yapura makata ainane soko, asekea hemakapurapo. Asiáne maiya omo makata ayiakakosane, repo aiyáka hemakapurakarifapo," aiyaka Yasumo somesapo.

*"Aporomo ne hukurakano nōmo maroporaka mafahoanie." Aisane oyapo.*

*Matiu 5:25-26*

<sup>57</sup> Arirakano Yasumo ipi some meta someraka, "Repo makata kotesane takekea hemaka-pufununine marirakanosare?"

<sup>58</sup> Anakano aporo metamo né hukuruko, hukurura some kepo kaira aporo rea karikia purakano, titi ikia kara puraka risike, sapesane titi maroporaka mafahoanie. Mafahoana-fonoranone, epo né hukuruko, hukurura some kepo kaira aporo rea karikia pukua, aporoamo ne kotoraka hukurukusapo. Yasemo né hukurukua aporo terakaiyamosayaki pusierakan aporo terakaiyamosamo né tipura makeakosapo.

<sup>59</sup> Né tipura makerakan haru tonotaehokosafapo. Nómō api kakanafonorakano haru tonotaehokosafapo. Api suane karakano né tonotaehokosapo," aiyaka Yasumo somesapo.

## 13

*"Makata watikisane rukupateraka metakarinie." Aisane oyapo.*

<sup>1</sup> Maiya metamo aporo metakira pekea Yasuaki someraka, "Kariri aporomo saro sipi rukua paikia Kotiaki yaku karaka risiakipoko kamani aporo unihae Pairatemo ipi aporo terakaiyamosaki someraka, 'Aporomo saro sipi rukua paikia Kotiaki yaku akarane rusua kukunie.' Airakano aporoane rusua kurakano ipu yapiane makata kakayia yapi akiyaki sarimarakua suasasapo." Aiyaka aporo metakiramo Yasuaki somesapo.

<sup>2</sup> Somerakan Yasumo iaki someraka, "Kariri aporoane namina himu watikisakipoko rusua kusuare? Arirakano Kariri aporo metakira himu kotesakipoko yia metakarisare?

<sup>3</sup> Wae, aporo hinamo su himu watikisa susupo. Repo soko makata watikisane metakari-anafonorakano i mokoatikisa aiyáka re soko aiyáka mokoatikihokosapo.

<sup>4</sup> Airakano Siroame huturu ape rakaripuraka aporo terayiasu (18) rusua kusuapo. Namina himu watikisakipoko rusua kusuare? Yarusarame aporo metakira himu kote-sakipoko metakarisare?

<sup>5</sup> Wae, aporo su himu watikisa susupo. Repo makata watikisane metakarianafon-rakano, i kusua aiyáka, re soko su aiyáka kukusapo," aisapo.

*Irafoke wate peanafonosane oyapo.*

<sup>6</sup> Yasumo iaki takumeaka someraka, "Hemo wafayamo sako karepe hemoia ira foke maposa reapo. Reane keseke hemo wafayamo ira foke wateane pesarihoamo tumako peane, ira foke wate peanafonosekeno asekeea ipi hemo asekeea rea

<sup>7</sup> aporo raipaki someraka, 'Ira fokeane tokorasie. Keremisi isia faraka nōmo aseako peane wate peafareapo. Asiasamo ira fokeane tokorasie. Hauaka kotesakipoko ira wate peanafononane hauaka kotesa a ira foke nena reke siaoasisfareapo.'

<sup>8</sup> Airakano hemo asekeea rea aporo raipamo someraka, 'Aporo fanao, harufapo. Keremisi hakásamo ira kepao hauaka mosoraka taeraka, asane soko taehokosapo.

<sup>9</sup> Asane taeraka asekeea nina ira wate peanafonorakano tokorasie, aihohanie. Ira wate perakano tokohokopo, aihohanie.' Aiyaka hemo asekeea rea aporo raipamo somesapo." Aiyaka Yasumo taku meaka somesapo.

*Hinamo arupekeea koraka rera Yasumo mafasane oyapo.*

<sup>10</sup> Fenena maiya metamo Yasu Yu aporomo sarimana apea pukua some kasapo. Some karaka reke aseane

<sup>11</sup> yatafumo hinamo meta ho masa keremisi terayiasumo (18) makata takamaka kayane asesapo. Ipi mati roporaka purafapo. Maiya suamo arupekeea susu koraka rerapo.

<sup>12</sup> Arirakano Yasumo someraka, "Hinamo neo, né nōmo mafarakanapo."

<sup>13</sup> Aiyaka hinamoane Yasumo sakaihoane foakayia ipi makata takamasane faraka matiane ropöraka takahisiapo. Takahikia hinamoamo Kotiaki kekeresapo.

<sup>14</sup> Arirakano fenena maiya amo hinamo makata takamasane Yasumo mafarakano asekeea, Yu aporomo sarimana ape asekeea rea aporomo saperaka aporo hinamo suaki someraka, "Makata rakira maiyane sere namasu ayapo. Sere namasuane makata rakira maiyasasamo, aporo hinamo re makata tasa mafahoasimo peanie. Fenena maiya amo aporo hinamo re makata tasane mafahoasimo peakopo." Aisapo.

<sup>15</sup> Airakano Yasumo someraka, "Re himu tetáraka hemaka apure. Repo saro ponoma kau soko metao, saro toki soko metao, apea kita hukumaresane fenena maiyamo, he nasimo, kita fitikimaka karikia purapo.

<sup>16</sup> Hinamoane Eparahamemo aporo irapo. Satanemo hinamo ane keremisi terayia sumo (18) asekeea reareapo. Pipu fenena maiyamo mafahoane siaoasisreapo."

<sup>17</sup> Airakano Yasuaki mahissisa aporomo kairaka mahimetesapo. Yasumo wakapuaka rakisiakipoko aporo hinamo suamo aseraka kára sesésapo.

*Ira máseta hae Yasumo takumeaka somesane oyapo.*

*Matiu 13:31-32; Maka 4:30-32*

<sup>18</sup> Yasumo someraka, "Unihae Kotimo aporo hinamo asekea reane yakapa asiare?

<sup>19</sup> Ira māseta hae wakasema ane aporomo maka ipi hemoa maposa asiapo. Maposane pauaka heke aseke kārakara ira parinapo. Ira pariraka rea ira eya á mena pekea menamo ape kirapo. Aina ayiáka Kotimo aporo hinamo unihaeaka asekea reane asiapo." Aíyaka Yasumo somesapo.

*Makata pirira Yasumo takumeaka somesane oyapo.*

*Matiu 13:33*

<sup>20</sup> Efera hunia Yasumo someraka, "Aporo hinamo Kotimo unihaeaka asekea reane yakapa asiare?"

<sup>21</sup> Kotimo unihaeaka asekea rea aporo hinamoane makata pirira asíapo. Farawa piaiyakosakipoko makata pirirane wakasema maka, farawa tarámo kesa yia, makata pirirane hakāsa sarimaraka kekerorakano, farawa suane piriraka káraniapo. Aina ayiáka aporo hinamo i suane Kotiaki risikiako parirane asíapo." Aíyaka Yasumo somesapo.

*Ikia koro makoropasane Yasumo takumeaka somesane oyapo.*

*Matiu 7:13-14, 21-23*

<sup>22</sup> Yarusarame sitia ahira maiya amo ape meta some kaka ape meta soko some kaka, ayiáka Yasumo some kape hisiapo.

<sup>23</sup> Hinakan aporo metamo someraka, "Unihaeo, aporo hinamo hukusi Kotimo mafasi-akosare? Aporo hinamo yakai Kotimo mafasiakosare?" Airakan Yasumo someraka,

<sup>24</sup> "Re ikia koro makoropasa á yorokoa pukusakipoko koteaka hemakapukua koraká rekeanie. Aporo metakira ikia koro makoropasa yorokoa pukusapoko asiāne, pusifasekeno poparipukusapo.

<sup>25</sup> Ape wafaya takahikia ikia koro mapirirakano repo ikia koroa paroparoraka someraka, 'Unihaeo, ikia koro ropakamasie.' Airakan ape wafayamo someraka, 'Re epare? Re nōmo aserafapo,' aihokosapo.

<sup>26</sup> Airakan repo someraka, 'Né isina hakāsa toke makata nenakasupo. Isiapo apea nōmo some karakasupo.'

<sup>27</sup> Airakan epo someraka, 'Repo ape mayare? Re nōmo aserafapo. Aporo hinamo watikisao, re ano metakarikia pusie.' Aíyaka ape wafayamo somehokosapo.

<sup>28</sup> Someahora maiya amo repo yao anaka aseane Eparahame, Aisake Yakope porofete aporo i suane Koti unihaeaka rea hauaka á hakāsa risikino asekea, re kára hihiripuhokosapo. Hihiripuraka akai kirisiraka kára himu nakosapo.

<sup>29</sup> Arirakan aporo maiya apera anaka soko, maiya apura anaka soko, ketaya anaka soko, ketaya taku anaka soko, su sarimahokosapo. Sarimaraka Koti unihaeaka rea hauaka á su teporo makeraka hakasa toke makata nakosapo.

<sup>30</sup> Asiamo yumo aporo hinamo metakira fanaraka risiane kesekehokosapo. I metakira kesekeha risiane fanahokosapo." Aíyaka Yasumo somesapo.

*Yarusarame sitia aporo hinamo risiane Yasumo himu tumurumo hemakapusuane oyapo.*

*Matiu 23:37-39*

<sup>31</sup> Maiya amo Fere se aporo pekea Yasuaki someraka, "Né Herotemo rukusapakae. Asiamo hauaka one metakarikia pusie."

<sup>32</sup> Airakan Yasumo someraka, "Kotafe somehaeraka wera aporoaki some one some kakanie. Pipu soko, rau soko, aporo ho yatafumo mosane soko, aporo makata tasane soko nōmo mafarakanaapo. Sere isiamo nōmo makata rakikia makosapo.

<sup>33</sup> Pipu soko, rau soko, rawai soko, nōmo makata rakirane rakikia mako ano Yarusarame sitia hiakosapo. Yarusarame sitia porofete aporoane rusua kurapo. Rusua kurane hauaka meta á kakenafapo. Asiamo ano Yarusarame sitia ipu namina rusua kukusimo ano hiakosapo.

<sup>34</sup> Yarusarame aporo hinamo reo, repo Kotimo some kará porofete aporoane rusua kusuapo. Kotimo pusiesa aporoane repo ekemo karesapo. Yarusarame aporo hinamo reo, mena kaiyiamo mena mano sarimaraka auāmo kafoko tapikia mafainapo. Aina ayiáka nōmo reane efera hunia soko, efera hunia soko, sarimaraka ayiakakosapoko asiane repo anoaki hisiane.

<sup>35</sup> Yarusarame aporo hinamo reo, repo apeane kauanehokosapo. Apea aporo hinamo waka risikiakosafapo. Nōmo reaki kakaro somerakaripo. Repo ano efera hunia aseakosafapo. Arirakan keseke ano peakosa maiya amo repo asekea someraka, 'Kotimo pusiesa aporo aperane, Kotimo makotehoasimoripo,' aihokosapo. Aíyaka somehora maiya amo anoane repo aseakosapo." Aíyaka Yasumo somesapo.

## 14

*Aporo makata takamasa Yasumo mafasane oyapo.*

<sup>1</sup> Fenena maiya metamo Ferese aporo káramo apea Yasu ipi makata nako pusuapo. Maiya suamo Yasuane Ferese aporomo maserapi asekehaesapo.

<sup>2</sup> Arirakano aporo meta hokono pirikia korake soko pirikia ayíaka makata takamasa apea wareapo.

<sup>3</sup> Ayíaka warekeno Kotimo somemané tisa aporoaki soko, Ferese aporoaki soko, Yasumo someraka, “Fenena maiya amo aporo makata takamasane mafarakanone, ane Kotimo somemanéne metakarirakanare?”

<sup>4</sup> Aihoa ipu makata somesafapo. Some paripeanafonorakano makata takamasane Yasumo mafasapo. Mafaraka marekea aporo makata takamasa mafasane Yasumo pusiesapo.

<sup>5</sup> Asiamo aporo suaki Yasumo someraka, “Fenena maiya amo nómó ní hokosa soko metao, saro ponomakau soko metao, he kafa hurupesane, nómó ní foaka marafare?”

<sup>6</sup> Airakano aporo suamo makata somerafaraka me kauraka asekea risiapo.

*Hokono akera á puraka Yasumo somesane oyapo.*

<sup>7</sup> Yasumo ipi aseane aporomo makata nakosakipoko teboro makeraka a tokeno asesapo. Arirakano aporo metakíra, “Ano yano káraro,” aíyaka hemakapukua namina aporo hokopusuamo sea a tokoakosakipoko wate foaka pukua tokeno Yasumo i asesapo. Asekea Yasumo takumeaka someraka,

<sup>8</sup> “Hinamo aruamara maiya amo, aporo meromo hokono keraka né peaerakano, puraka aporo hokopusuamo sea á né kakakopo.

<sup>9</sup> Aporo meta hokopusua peraka kakakosakipoko aporo meromo someraka, ‘Né takahikia aporo wakasemamo sea á kakako pusie.’ Airakano né takahinaka kaiyahokosapo.

<sup>10</sup> Arirakano aporo wakasemamo sea á né fana kayane aporo meromo someraka, ‘Hameo, né takahikia aporo hokopusuamo sea á kakako peae.’ Aíyaka né makárarakano aporo suamo asekosapo.

<sup>11</sup> Aporomo epo ipiane makárarakano keseke e mawakasemahokosapo. Arirakano aporomo epo ipiane mawakasemarakano keseke e makárahokosapo.” Aíyaka Yasumo somesapo.

<sup>12</sup> Arirakano aporo meroaki Yasumo someraka, “Hokono akera maiya amo ní more soko, ní mae soko, ní aporo táké soko, aporo makata kemo kárarakra reane soko, iane peaehokopo. Nómó peaerakano peaesakipoko ném soko ropo yaiya peaehokosapo.

<sup>13</sup> Arirakano hokono akera maiya amo aporo makata forosa soko, aporo hokono matipusa soko, aporo korake matipusa soko, aporo hi fausa soko, i suane nómó peaehoanie.

<sup>14</sup> Aporoane nómó peaerakano aporoamo soko ném ropo peaehokosafapo. Arirakano nómó aporo metakíra araresakipoko ném seseaka rekeanie. Keseke aporo hinamo ereketaesane maturikia taena maiya amo Kotimo némé makata ropo kára kakakosapo.” Aíyaka Yasumo somesapo.

*Hokono keakosane Yasumo takumeaka somesane oyapo.*

*Matiu 22:1-10*

<sup>15</sup> Aporo hakásá meta teboro makeraka kayamo, Yasumo somesane kaikia someraka, “Koti uníhaeaka reamo apea hokono keraka, aporo hinamo makata nekea tokoakosa aporo hinamoane yumo seseaka risikinapo.”

<sup>16</sup> Airakano Yasumo takumeaka someraka, “Aporo metamo hokono kára keakosakipoko aporo yakai peaniesapo.

<sup>17</sup> Hokono akera makata nakosane sarimasapo. Aporo su peasimo ipi aporo raipaki someraka, ‘Aporo su yumo peaehoanie,’ aisapo. Airakano aporo raipamo iane peaesapo.

<sup>18</sup> Peaerakano pesafapo. Aporo suamo peakosafapo, aíyaka meaka sekesapo. Aporo metamo aporo raipaki someraka, ‘Hauaka nómó kawe roposane aseako purakanapo. Ano peakosafapo.’

<sup>19</sup> Airakano aporo metamo someraka, ‘Saro ponomakau kaeyakosu (10) nómó kawe roposane aseako purakanapo. Ano peakosafapo.’

<sup>20</sup> Airakano aporo metamo someraka, ‘Ano hinamo kawe arumasasamo peakosafapo.’

<sup>21</sup> Airakano aporo raipane paripukua ipu makata somesane ipi wafayaki somesapo. Somerakano aporo ape meromo saperaka, aporo raipaki someraka, ‘Ikia kara fea ape mukisapo. A foaka pukua, aporo makata forosaki someraka, ‘Re peae,’ aíyaka aporo hokono matipusaki soko, aporo hi fausaki soko, aporo korake matipusaki soko, ‘Re su peae,’ aihoanie.’

<sup>22</sup> Airakano aporo raipamo iane pasimokoako pusuapo. Puane i su perakano aseke, aporo raipamo ipi wafayaki someraka, 'Aporo unihaeo, nōmo peanie, aisane nōmo i suaki somesapo. Somerakano i sú pesapo. I pesane ape tapesafapo.'

<sup>23</sup> Airakano aporo raipaki ipi wafayamo someraka, 'Ape one metakarikia, yaoa ikia kara metakira kára soko, metakira wakasema soko, á pukua aporomano peahoanie. Ape tapehoasimo aporo hinamo yakai peahoanie.

<sup>24</sup> Hao, kaisie. Nōmo kakaro somerakaripo. Hokono akera wo, aporo fana peahoane hisisane, nōmo metakariakosapo. Iane hakása makata nakosafapo,' aisapo." Aíyaka Yasumo takumeaka somesapo.

*Yasu patera aseakosane oyapo.*

*Matiu 10:37-38*

<sup>25</sup> Yasuyaki aporo hinamo yakai pusuapo.

<sup>26</sup> Puraka iaki Yasumo pariesekeia someraka, "Aporo hinamo metamo ano patera aseako ipi ata, ipi ama, ipi hinamo, ipi hokosa, ipi mae, ipi papá, ipi kau soko, makata suane mokoma kesekehoanafonona aporo hinamoane, ano patera asesa aporo hinamofapo.

<sup>27</sup> Aporo hinamo metamo ipi ira matopesa makatiraka maka punafonona aporo hinamoane ano patera asesa aporo hinamofapo.

<sup>28</sup> Arirakano aporomo huturu ape (tu sitor) kiakosakipoko fana ipi moneane menonapo. Ape kikimakosane mone siahoasirihamo mone menonapo.

<sup>29</sup> Arirakano mone menoanafonoraka ape takuma ira kesa hákasa porokoa kikifai tetá hákasan taeraka mone farakano huturu yapurane metakariakosapo.

<sup>30</sup> Metakarirakano aporo metakiramo aseraka hokomaka someraka, 'Ape kikimaya-fareapo,' aíyaka somehokosapo. Aíyaka somehokohoamo fana mone menoanie.

<sup>31</sup> Arirakano aporo unihae kini wakasemamo ipi aporo terakaiyamosa ame aporoane yakai tene taosenepo (10,000). Aporo unihae wakasema amo ipi aporo unihae kini kara aki yunuraka weakosakipoko pesapo. Arirakano aporo unihae kini karamo yunu aporomo aporo terakaiyamosa ame aporoane, kara yakai tuaneti taosenepo (20,000). Arirakano aporo unihae kini wakasemamo yunu weasiraka fana hemakapuraka, 'Isu weraka rukua koakataehoasireare? Rukua koakataehoanafonorakano isina weakosapo. Arirakano rukua koakataerakano isiapo metakariakosapo,' aisapo.

<sup>32</sup> Aíyaka ipi takeeka hemakapuraka, 'Wae, isu aporo hukusismo rukua koakataehoasireapo. Nōmo weakosapoko asiane metakarirakanapo.' Aíyaka hemakapukua ipi aporo raipaki someraka, 'Aporo unihae kini kara wo peahokoamo, né i arisia pusie. Weakosane metakariakosakipoko nōmo somehoko pusie. Puraka úyaka somehoanie. "Isu aporo hukusipo. Reane aporo karapo. Asiamo isina weane siahoasifareapo. Weakosane metakariakosakipoko isiapo re api kayaere?" Aíyaka iaki somehoanie.' Aíyaka unihae kini wakasemamo someaka maresapo.

<sup>33</sup> Asiamo hauaka wo makata kemo metakarianafonona aporo hinamoane ano patera asesa aporo hinamofapo. Aporo hinamo metamo ipi makata kemoane metakarirakano aporo hinamoane ano patera asesa aporo hinamopo." Aíyaka Yasumo somesapo.

*Kifiri watikisa asiane oyapo.*

*Matiu 5:13; Maka 9:50*

<sup>34</sup> Yasumo some meta someraka, "Kifiriane wapesa kotesapo. Kifiri wape farakano efera hunia wapehoasimo yakapa rakirare? Wae, wapehoasimo makata meta rakirafapo. Efera hunia wapehokosafapo. Asiamo kifiri wapesa fasane. Nena yaoa mamakatenapo.

<sup>35</sup> Arirakano makata mano koteaka taneheasimo hemo wafayamo kifiri wapesane hauaka kokomarerapo. Arirakano saro ponoma kafosa akiyaki kifiri yaki sarimaraka makata porosa hauaka á taenapo. Taerakano makata porosane koteaka taneherapo. Arirakano kifiri wapesane fasekeno makata rurafapo. Nena yaoa mamakatenapo. Asiamo re senaki risiamo koteaka kaiyinie." Aíyaka Yasumo somesapo.

## 15

*Saro sipi ipi haku rosaka pusuane oyapo.*

*Matiu 18:12-14*

<sup>1</sup> Maiya metamo takese mora aporo soko, aporo watikisa metakira soko, su Yasu rea pekea, epo someane kaiyako pesapo.

<sup>2</sup> Perakano asekeia Ferese aporomo soko, Kotimo somemané tisa aporomo soko, saperaka someraka, "Aporo watikisane Yasumo ipi tereraka pasimaka iyaki hakása toke makata anene," aisapo.

<sup>3</sup> Airakano Yasumo takumeaka someraka,

<sup>4</sup> “Re aporo hakása metamo saro sipi wane harote (100) risiane hakása meta yaoa rosaka purakano repo asekepayanare? Wae. Saro sipi naeneti naene (99) yia sarimarakaka risiane metakarikia, hakása rosaka pusuane kope purapo. Kokoa kokoa hisiraka aserapo.

<sup>5</sup> Aseraka seseraka ketakamaka makatiraka apea maka purapo.

<sup>6</sup> Apea maka pekea ipi aporo táke soko, ipi ape hakása risia aporoane soko peasimo wáraro. Wáraka perakano iaki someraka, ‘Saro sipi rosaka pusuane, nōmo kokoa masapo. Asia samo repo soko sesehoanie.’ airapo.

<sup>7</sup> Sesesa ayíáka aporo hakása metamo ipi makata watikisane hufitaeraka, makata watikisane metakarikia, koteaka rekeako pariraka rekeno, hepene aporomo soko Kotimo soko aseraka, namo kakaro kára sesenapo. Arirakano aporo naeneti naenemo (99) hemakapuraka, ‘Isiapo himu koteaka susu hemakapukua risiane, marirakano isu risiki-ako pariñokosare?’ Aiyaka hemakapurakan, koteaka risia aporoane hepene aporomo asekeea sesenapo.” Aiyaka Yasumo somesane Ferese aporomo hemakapusimo somesapo.

#### *Mone hae hasaka kosane oyapo.*

<sup>8</sup> Yasumo takume meta someraka, “Hinamo hakása metamo ipi suifa mone hae kaeyakosu\* toapo. Toane mone hae kaeyako hakása ane hurupesekeno asekepayanare? Wae. Ipi nafa paikia ape feaoraka, mone haeanne kokoa hisiraka,

<sup>9</sup> kokoa maraka, hinamoamo sesenapo. Seseraka ipi hinamo táke soko, ipi ape hakása toa hinamoamo soko, sarimahoasimo wáraka su sarimarakano someraka, ‘Nōmo mone hae hakása hurupesa hasaka kosane, nōmo ní kokoa masapo. Masekeno repo soko sesehoanie,’ airapo.

<sup>10</sup> Sesena ayíáka aporo hinamo hakása metamo makata watikisane hufitaeraka, watikisane metakarikia Kotiaki rekeako parirakan, Kotimo soko hepene aporomo soko aseraka sesenapo.” Aiyaka Yasumo somesapo.

#### *Hokosa ipi haku rosaka pusuane oyapo.*

<sup>11</sup> Yasumo takume meta someraka, “Aporo metamo aporo hokosa tetá risiapo.

<sup>12</sup> Hokosa kesekemo ipi wafayaki someraka, ‘Atao, né finihaoa eto risikiako nōmo makata kemoane parakurasie. Parakuraka ano kakakosane, ano níaki yumo kasie.’ Airakano ipi wafayamo makata kemoane parakuraka hokosa tetáki kasápo.

<sup>13</sup> Karakano wakasema nina hokosa kesekemo ipi makata mosane sarikekeaa maka pukua, ipi wafayamo hauakane metakarikia hauaka yamenoa pusuapo. Pukua hauaka á pauureka reapo. Hauaka á reke ipi makata watikiaka rakiraka reapo. Watikiaka rakiraka reke ipi moneane aporo hinamo metakiraki mokome karáka reapo.

<sup>14</sup> Mokome karáka reke ipi mone ane fasapo. Arirakano maiya amo hauaka á makata nakosane fasapo. Makata nakosane fasa maiya amo e kára meamosapo.

<sup>15</sup> Meamorakano e pukua hauaka mero aporoaki someraka, ‘Nepoko nōmo makata rakiae? Nepoko nōmo makata rakiakoripo.’ Airakano aporo hauaka meromo someraka, ‘Nōmo saroane nōmo asekeea rekeanie.’

<sup>16</sup> Airakano saroane epo asekeea reke saromo makata nakosane epo asekeea hemakapuraka, ‘Saromo makata nenáne ane nariripo.’ Aiyaka epo hemakapurakan aporo metamo eane makata nakosa kasafapo.

<sup>17</sup> Kakanafonorakano wakasema nina, ipi koteaka hemakapusuapo. Ipi hemakapuraka, nōmo atamo aporo raipamo makata sia nenakasupo. Pipu soko ipu makata siaraka nenakanapo. Ipu makata siaraka nenakao, ano hauaka wo reke namo kakaro kara meamoraka kukuripo.

<sup>18</sup> Asiamo ano takahikia atamo apea purakapo. Puraka ataki nōmo uyaka somehokosapo. ‘Atao, Kotiane nōmo mawakasemasapo. Ata ne soko nōmo mawakasemasapo.

<sup>19</sup> Nōmo yumo anoane, ‘Nōmo ní hokosapo.’ Aihokopo. Anoane ‘Nōmo aporo raipapo.’ Aihooanie.’

<sup>20</sup> Aiyaka ipi ataki somehoko hemakapukua takahikia ipi atamo apea paripusuapo. Paripukua yamenoa perakano ipi wafayamo aseraka, ‘Nōmo hokosa wate rosaka pusuane apere.’ Aiyaka kamenakaraka foaka pukua ipi hokosane fatuaka maka makanusapo.

<sup>21</sup> Makanurakano hokosamo someraka, ‘Atao, Kotiane nōmo mawakasemasapo. Né soko nōmo mawakasemasapo. Nōmo anoaki ‘Nōmo ní hokosapo,’ aihokopo.’

<sup>22</sup> Airakano wafayamo ipi aporo raipa wáraka someraka, ‘Pasu kotesa epo osohoasimo foaka maka peae. Tamaka osohoasimo maka peae. Kau rakisimo waya hokonoa hira maka peae.

<sup>23</sup> Saro ponomaikau mano kaniamosekeno e nasimo rukua paitinie. Pipu yumo isina e karikia seseaka makata paikinakosapo.

\* <sup>15:8:</sup> Yu aporomo hinamo aporo aseamo siufa mone hae kaeyakosu hatiraka wamo motorapo.

<sup>24</sup> Nōmo hokosa kurakanareapo, aisane pipu nōmo aserakaripo. Wate fana e rosaka pusuane pipu apere. Asiamo pipu nōmo nī hokosapoko saro ponomakau mano maka rusie. Hokosapoko makata pakinakosapo.' Airakano aporo raipamo saro ponomakau mano maka rukua paisiapo. Paikia nekea namina kesasapo.

<sup>25</sup> Kesasa maiya amo hokosa fanane hemoa rea peraka, ape makeraka kaiyiáne kesarakano kaisiapo.

<sup>26</sup> Kairaka ipi aporo raipaki someraka, 'Kesaraka sikirakae. Mairakarirakapo.'

<sup>27</sup> Airakano aporo raipamo someraka, 'Nōmo nī mae kesekeane kurafaraka ipi pariperakasapo. Asiasamo ni atamo seseraka saro ponomakau kaniamosa rukua, epoko makata paikinenaka kesaraka ayapo.'

<sup>28</sup> Airakano hokosa fanamo ipi kakaro kara saperaka, 'Apea ano pukusafapo,' aisapo. Airakano ipi ata pekea kukunameaka someraka, 'Apea ne peae.'

<sup>29</sup> Airakano hokosa fanamo someraka, 'Maiya suamo nepoko aporo raipamo arakira ayiáka, nōmo rakisiapo. Nōmo someane nōmo kakimasapo. Nōmo anoaki makata yakapa kasare? Nōmo ano makata kasafapo. Saro nanikose mano hakásá soko, nōmo aporo tākeane karikia paikinasimo karakasufapo.'

<sup>30</sup> Nōmo nī hokosa kesekemo hinamo hakimaraka reapakasupo. Nōmo makata kemoane ipi mokoa pusuapo. Mokoa pusuane ipi hinamo hakimaraka moneane hinamo kaka fasapakasupo. E pariperakano, epoko nōmo saro ponomakau mano kaniamosa rukua e karikia makata paikia anene.'

<sup>31</sup> Airakano ipi wafayamo someraka, 'Né anoyaki hakásá reapo. Nōmo makata kemoane su nōmenapo.

<sup>32</sup> Asiamo nōmo nī mae kesekeane kurakanareapo aisane pipu asesapo. Wate fana e rosaka pusuane pipu apere. Perakano seseaka makata paikinenakanapo.' Aiyaka wafayamo somesapo." Aiyaka Yasumo takumeaka somesapo.

## 16

*Aporo asekea reamo makata rakisiane oyapo.*

<sup>1</sup> Aporo hakásá puraki Yasumo takumeaka someraka, "Ape wafayamo makata kemo kárasekeno, aporo metamo ipi makata kemoane asekea rekeasimo murikimaka maresapo. Maresane aporo metamo aporo ape wafayaki hokoreraka someraka, 'Nōmo makata ropoane nōmo aporo asekea reamo koteaka asekea rekenafapo. Ipi mokome karaka makata ropoane farakanapo.'

<sup>2</sup> Airakano ape wafayamo aporo asekea reane peaesapo. Perakano eaki someraka, 'Nōmo makata koteaka rakisiapakare?' Nōmo makata ropoane nōmo mokome karakánapakae. Né makata rakisiane pipu metakarirakanapo. Né metakariasiraka nōmo makata rakisia ropo kará sawiane nōmo aseako pipu yia maka peae.'

<sup>3</sup> Airakano aporo asekea reamo hemakapuraka, 'Ano pipu metakarirakanapo. Keseke nōmo yakapa rakiakosare? Nōmo hauaka meta makata rakiako kaiyako ayiane ano sia wakapuhooasifareapo. Arirakano ape sua ano mone makasie, aiyaka kaiyako ayiane ano kaiyahoasireapo.

<sup>4</sup> Ano metakarirakano keseke aporomo ano ararehoasimo nōmo uyáka rakiakosapo.'

<sup>5</sup> Aiyaka hemakapuraka aporo suamo ape wafayaki makata ropo kakanafonosa nine makata ropo kakakosakipoko i su hakásá hakásaraka peaesapo. Aporo hakásá meta fana perakano, eaki kairaka, 'Nōmo makata yakapasu ape wafayaki kakafunure?'

<sup>6</sup> Airakano epo someraka, 'Orofe wera tarámó wane harote (100) suane kakafunupo.' Airakano aporo asekea reamo someraka, 'Nōmo wane harote (100) suane kakakosapoko asiāne, nōmo metakarikia sanasirakanapo. Asiamo nōmo wane harote ane kosoraka, fifiti ane (50) kakakosakipoko sawia poparasie.'

<sup>7</sup> Aiyaka aporo metaki aporo asekea reamo someraka, 'Nōmo ape wafayaki makata yakapa su kakafunure?' Airakano epo someraka, 'Witi hae pakia kesane wane harote suane (100) kakafunupo.' Airakano aporo asekea reamo someraka, 'Nōmo wane harote kakakosapoko asiāne, nōmo metakarikia sanasirakanapo. Asiamo nōmo wane harote (100) kosoraka áiti su (80) kakakosakipoko sawia poparasie.' Aiyaka aporo amo keseke e ararehoasimo aporo asekea reamo somesapo. Aiyáka fana makata ropo kára kakakos-aposane metakarikia, makata ropo wakasema kakakosapo, aiyaka popasapo.

<sup>8</sup> Asiasamo ape wafayamo aporo asekea reamo kotafe rakisiaporakano, eaki kekereraka sikiraka someraka, ‘Keseke aporomo né ararehoasimo ipu makata ropo anoaki kakafunusa nine nómo sape meta rükupatesasamo iane araresapo.’ Aíyaka ape wafayamo some-sapo.\*” Aíyaka Yasumo somesapo. Arirakano takume amo kepoane Yasumo someraka, “Nena aporo hinamomo someraka, ‘Keseke makata ropo kakasimo pipu népoko nómo yaku rakirakanapo.’ Aíyaka nena aporomo wate foaka hemakapukua rakirapo. Arirakano Kotimo ikia kara faesa á risia aporo hinamomo wate foaka ayíáka rakirafapo.” Aíyaka Yasumo somesapo.

<sup>9</sup> Aíyaka Yasumo efera hunia someraka, “Keseke hepene yapura ne hinaka Kotimo neaki someraka, ‘Nómo makata kemoane soko, moneane soko, koteaka asekea reapo.’ Aihoasimo hauaka wo makata kemoane soko moneane soko, koteaka asekea reke, moneamo aporo hinamoane ararehoanie. Koteaka ararerakanone, hauaka wo makatane fahoram, keseke hepene yapura ahiramo Kotimo someraka, ‘Nómo makata koteaka rakisiapo. Yumo né hepene ape wo peae,’ aihokosapo.

<sup>10</sup> Arirakano repo aporo hinamo metamo makata wakasemané koteaka asekea rekeno, ane makata kárane soko, koteaka asekea rekeakosapo. Arirakano makata wakasemané koteaka asekea rekeanafonorakano, ane makata kárane soko, koteaka asekea rekeakosafapo.

<sup>11</sup> Asiamo hauaka wo makata kemo soko, mone soko, koteaka asekea rekeanafonorakano, ane nómo Kotimo makata namo kakaro kotesane koteaka asekea rekeakosare? Wae, koteaka asekea rekeakosafapo.

<sup>12</sup> Arirakano aporo metamo menane nómo koteaka asekea rekeanafonorakano, ane né makata ropoane kakakosare? Wae, kakakosafapo.

<sup>13</sup> Arirakano wafaya tetápoko aporo raipa hakásamo rakiane siahoasifareapo. Wafaya tetápoko rakiraka metaki hisiraka rakiakosapo. Metaki seseraka rakiakosapo. Wafaya hakásamo makáráraka seseraka rakiraka, wafaya metaki hisiraka patera tariakosapo. Asiamo himu metamo Kotiaki hemakapukua, himu metamo yokotae moneaki hemakapukua, ayíáka himu tetáraka hemakapukua rakiane siahoasifareapo.” Aíyaka Yasumo somesapo.

*Yasumo makata metakira somesane oyapo.*

*Matiu 11:12-13; 5:31-32; Maka 10:11-12*

<sup>14</sup> Yasumo somesane Ferese aporomo kairaka, namina mone kára hemakapukua risike, Yasuanie asekea hokomaresapo.

<sup>15</sup> Hokomarerakano Yasumo someraka, “Aporo suamo reane aseraka, ‘Ferese aporoane aporo kotesapo.’ Aihoasimo repo kaumo aina ayíáka arakire. Asiáne repo watiki-aka hemakapukua rakisiane, himua mahamekeea risiane, Kotimo ipi aserapo. Asiamo aporo hinamomo hauaka wo makata aki makáráraka hemakapukua risiane, Kotimo makáráranafapo. Asiáne makata ane Kotimo aseraka, nenakamaka makata ayireapo, airapo.

<sup>16</sup> Yone he tapukumarerane peasiraka Mosesemo somemane soko porofete aporomo some popasane soko, aporo hinamo suamo kaisisupo. Asiamo somemane amo iane asekea reausupo. Asiáne Yone he tapukumarerane peraka, Koti unihaeaka reane epo some kasapo. Asiamo maiya omo Kotimo aporo hinamo asekea rea someane nómo some karakanapo. Aporo hinamo yakaimo Kotimo iane asekea rekeasimo, ipu namina seseraka kairakanapo. Aporo hinamo yakaiane Kotimo ape tua hiakosakipoko makata hufitaehoramo, ikia koroa wakapuaka arura ayíáka ruraka risikinapo.

<sup>17</sup> Hepene yapurane soko, hauaka one soko fahokosane makata wakasemapo. Arirakano Kotimo somemaneane fahokosafapo. Ane, makata káraro.

<sup>18</sup> Arirakano aporomo ipi asea fimarekea hinamo meta arumarakanano aporoamo hinamoane haki arumarakanano. Hinamo fimaresane aporo metamo arumarakanano hinamoane haki arumarakanano.” Aíyaka Yasumo somesapo.

*Rásarase reane oyapo.*

<sup>19</sup> Yasumo someraka, “Aporo hakásamo metamo ipi mone kára sarimaraka reapo. Ipi pasu mone káramo roponapo. Maiya suamo pasu kotesa susu osoraka, makata nakosa kotesa susu nenapo.

<sup>20</sup> Arirakano aporo meta yano motosa Rásarase makata forokoa reke, ipi kauane neketasi sususapo. Maiya suamo aporo kára reamo apea

<sup>21</sup> makata nenaka momoane teporo petaua atura hurupepesane Rásarasemo nakosakipoko mumiraka ikia koro makeraka asekea kayapo. Asekea kayane ipi kauane neketasisususane kásamo sarerakanos asesapo.

---

\* **16:8:** Aporo asekea reamo kotafe rakisiane ape wafayamo kekeresapo. Asiane makata kotafe rakirane Yasumo kekerenafapo. Yasumo takumeaka somesa ane aporomo enomakasimo somesapo.

<sup>22</sup> Asiamo wakasema nina keseke Rásarase ipi kurakano hepene aporomo e karikia, Eparahame kayakipoko karikia hisiapo. Hisiakipoko, keseke aporo kárane kusua hauaka maresapo.

<sup>23</sup> Maresane e Hétisi hauaka atura puraka kau teraka himu nekea reapo. Ayiáka reke yameno yapura aseane Eparahame kayakipoko Rásarase kakeno asekeea

<sup>24</sup> wáraka, 'Ata Eparahameo, Rásarasemo hokonomo he inusa sakairaka ano arua motoako e pusiesie. Hauaka wo ira rufia ano reke kára sisipuripo. Ano kau kára teripo. Rásarase ipi ano ararehoko pusiesie.'

<sup>25</sup> Airakano Eparahamemo someraka, 'Hokosao, ní hitaferaka rea maiya amo makata kotesa susu ní marakasupo. Ane, nómó meraruhokopo. Rásarase fana makata forokoa reane, yumo ipi seseaka rekenapo. Ne fana káraraka reane, yumo tésa hauaka á rekenapo.'

<sup>26</sup> Arirakano tipia hao kára kayasasamo né area isu peasifareapo. Né soko isu arisia wo peasifareapo.'

<sup>27</sup> Airakano aporo káramo someraka, 'Atao, nómó ní mae kakoreasu atamo apea risikinapo.'

<sup>28</sup> Ano area hauaka wo tésa hauakapo. Hauaka wo iane peakohoamo Rásarasemo somehoko pusiesie.'

<sup>29</sup> Airakano Eparahamemo someraka, 'Ne tésa rea hauaka á nómó mae pukohoamo Mosesemo soko, porofete aporomo soko, some kasane ipu kaikia kekemahoafunureapo.'

<sup>30</sup> Airakano aporo káramo someraka, 'Eparahameo, Mosesemo some kasane ipu kaki-marakarifapo. Ane siahoasifareapo. Arirakano aporo kusua turikia pusua amo iaki some karakanone, ane ipu kairaka makata watikisane metakarikia risikiako parihokosapo.'

<sup>31</sup> Airakano Eparahamemo someraka, 'Mosesemo some kasane soko, porofete aporomo some kasane soko, ipu kakipayarakar risiamo aporo kusua turikia puraka somerakano soko, ipu kakimakosafapo.' Aiyaka Eparahamemo somesapo." Aiyaka Yasumo takumeaka somesapo.<sup>†</sup>

## 17

*Makata watikiaka rakisiane oyapo.*

*Matiu 18:6-7, 21-22; Maka 9:42*

<sup>1</sup> Yasumo ipi aporo hakása puraki someraka, "Re hauaka wo makata rakisimo aporo metakiramo reaki hokokakakosapo. Repo watikiaka rakisimo reaki hokokakakosapo. Hokosasa aporoane Kotimo hukuarura maiya amo e hukurukusane itifiakosafapo."

<sup>2</sup> Aporoane eke káramo mawia kita hukumarekeea he tawara numua makasuanane wakasema fanasirakanapo. Asiane aporomano meta kawe ano patera asesane epo watikiaka rakisimo aporo metamo hokokarakano, hokokasá aporoane ipi kára fanasiraka rekeakosapo.

<sup>3</sup> Asiamo re asekeanie. Ní maemo né mokoatikirakano eane maroporaka someraka, 'Nómó makata watikiaka rakiakopo.' Airakano ipi makata watikisane metakarikia someraka, 'Nómó ne mokoatikisane nómó kakaro kara hasaka rakireapo.' Airakano epo watikisane nómó mafaraka mameraruhoanie.

<sup>4</sup> Pipu maiya hakása yiamo nómó ní maemo neane mokoatikisane epo neaki someraka, 'Neaki nómó hasaka hemakapukua rakireapo. Asiane nómó mameraruhoane sia-hoasireare?' Airakano nómó mafaraka mameraruhoanie. Maiya hakása yiamo yape yatipinusu ayiáka mokoatikiraka rakiraka nómó hasakasapo, airakano nómó mafaraka mameraruhoanie." Aiyaka Yasumo somesapo.

*Yasumo someane kakimakosane oyapo.*

<sup>5</sup> Yasumo tarira aporomo eaki someraka, "Isiapo Kotiaki himu hakásaraka hemakapurane nómó mawakapuraka makárahoanie."

<sup>6</sup> Airakano Yasumo someraka, "Ira máseta hae namo kakaro wakasemapo. Repo Kotiaki himu hakásaraka hemakapurane wakasema ayiria ayiáka risikinone, ane repo ira káraki someraka, 'Kepo pikinuyaku si fimaka, he tawara numua rekeako pusie.' Airakano iramo kairaka ipi fikia pukua, he tawara numua rekeako pukusapo." Aiyaka Yasumo somesapo.

*Aporo raipamo makata rakirane oyapo.*

<sup>†</sup> **16:31:** Some one menoraka kepoane úyaka hemakapunie. "Aporo kara reamo ipi makata kemo karasasamo ipi heao hauaka pusuapo," aiyaka hemakapurakanone hasaka hemakapurakanapo. Arirakano "Aporo forokoa reamo ipi makata kemo fasasamo ipi hauaka kotesa á hisiapo," aiyaka hemakapurakanone hasaka hemakapurakanapo. Hepen apea hiakosakipoko aporomo ipi makata kemoane Kotimo aserafapo. Aporomo ipi Kotiaki himu hakásaraka hemakapusuane Kotimo asekeea takekeea pasimarapo.

<sup>7</sup> Yasumo takumeaka someraka, "Repo aporo hakása metamo hauaka asekea rekenone, nómó aporo raipaki someraka, 'Nōmo hemoane nómó hauaka mosorako hinie. Arirakano nōmo saro sipi soko, nómó asekea rekeanie,' airapo. Arirakano maiya amo aporo raipamo hauaka mosorako, hemoa hikia samapu apea perakano nómó eaki someraka, 'Né makata nako peae,' aiyaka nómó somerare?

<sup>8</sup> Wae. Nómó aiyaka somerafapo. Nómó someraka, 'Fana nōmo makata nakosane nómó paikia, inasekeno ano akaya teporo wo maka peanie. Nōmo makata nakosa fana nekea farakano, né keseke makata nako punie.' Aiyaka nómó somerapo.

<sup>9</sup> Arirakano hauaka asekea rea aporomo ipi aporo raipaki, nómó makata rakiniesane, epo rakisekeno ane, ipi asekea rea aporomo eaki kekereraka susehokosare? Wae. Aporo raipaki rakiniesane kakimaka rakisia hákasa akipoko kekerenafapo.

<sup>10</sup> Arirakano aina ayiaka neaki ayiakaniesane nómó kakimaka rakikia maraka nómó someraka, 'Año aporo raipapo. Aporo raipamo makata rakira ayiáka nómó rakisiapo. Nómó kekerehoasimo nómó rakisiafapo.' Aiyaka somehoanie." Aiyaka Yasumo somesapo.

*Aporo toropakesa kaeyakosu Yasumo mafasane oyapo.*

<sup>11</sup> Yasu Yarusarame sitia pukusakipoko Kariri hauakane makama taku raraka, Sameria hauakane makama sape roraka, ikia tipia wareakipoko Yasu á pusuapo.

<sup>12</sup> Pukua apea perakano aporo toropakesa kaeyakosu e sapenako pekea, wakasema fasikia fe takua risike

<sup>13</sup> wáraka, "Unihae Yasuo, nómó isu kamenakaraka ararerasie."

<sup>14</sup> Airakano Yasumo asekea someraka, "Pirisiti aporomo re kau asekeasimo pusie." Airakano i ikia kara puane toropakesane fasapo.

<sup>15</sup> Arirakano aporo hakása metamo ipi kauane aseane toropakesane fasekeno, ipi serakera pariperaka Kotiaki sakepamo kekererape pesapo.

<sup>16</sup> Pekea Yasu rea kakuna porokoa kake susesapo. Arirakano aporoane ipi Sameria aporopo.

<sup>17</sup> Aporo hakása amo ipi suseaka perakano Yasumo someraka, "Aporo kaeyakosu nómó mafasapo. Kaeyakoane népo. Aporo tokona suane mayare?"

<sup>18</sup> Aporo hakása meta ipi hauaka haku meta reamo Kotiaki susehoko pekea are. Aporo tokona suamo Kotiaki susehoko perakarifapo."

<sup>19</sup> Aiyaka aporoaki Yasumo someraka, "Nómó anoaki himu hakásaraka hemaka apura yiamo, ne toropakesane mafarakayiapo. Né takahikia pusie." Aiyaka Yasumo eaki somesapo.

*Yasu ipi paripeakosa maiyane oyapo.*

*Matiu 24:23-28, 37-41*

<sup>20</sup> Yasuaki Ferese aporomo someraka, "Koti unihaeaka rekeakosane masinaka unihaeaka rekeakosare?" Airakano Yasumo iaki someraka, "Koti unihaeaka reane aporomo himo asekeasimo ayiáka unihaeaka rekenafapo.

<sup>21</sup> Arirakano aporo metamo someraka, 'Sape aka asesie. Koti unihaeaka rekenapo.' Airakano aporo metamo someraka, 'Sape ro asesie. Koti unihaeaka rekenapo.' Aiyaka somehoane siahosifareapo. Asiamo re arisia yia Koti ipi unihaeaka rekenapo," aisapo.

<sup>22</sup> Aiyaka aporo hakása puraki Yasumo someraka, 'Keseke repo someraka, 'Yape hakása Yasu Aporomanomo Tákeane isiapo aseakoripo.' Aiyaka repo somehokosapo. Repo aiyaka someraka tiki somerakao, asiane, repo ano aseakosafapo.

<sup>23</sup> Reaki aporo metakiramo someraka, 'Año Aporomanomo Tákeane pesapo. Repo sape ro asesie.' Airakano aporo metakiramo someraka, 'Año Aporomanomo Tákeane pesapo. Repo sape aka asesie.' Aiyaka somerakanone repo kakimakopo. Someane repo hemakapukua kekemahokopo.

<sup>24</sup> Asiamo ano Aporomanomo Tákeane pariaperamo repo someraka, 'Isiapo aserakari-fapo,' aiyaka somehokosafapo. Ano pariaperamo yamakere faena ayiáka ano paripeakosapo. Yamakereraka foaka ti yapura faena ayiáka ano paripeakosapo.

<sup>25</sup> Ano paripeasiraka pipu yumo aporo hinamo arisiamo nómó someane koarenteraaka ano kau mokoatikihokosapo.

<sup>26</sup> Aporomanomo Táke ano pariaperamo Noa rea maiya amo asia ayiáka ayiakakosapo.

<sup>27</sup> Noa rea maiya amo he peasiraka, aporo hinamomo makata nakosane hákasa hemakapukua, aporomo hinamo arumokoakosa hákasa hemakapukua ayiáka risiapo. Ayiáka risiakipoko Noa kasua ripasa maiya amo he peraka aporo hinamo suane he nekea kukua kekeea fasapo.

<sup>28</sup> Arirakano Rote rea maiya amo asia ayiáka ano pariaperamo ayiakakosapo. Rote rea maiya amo aporomo makata nekea, makata roporaka, makata porokoa, ape kikia, ayiáka rakiraka risiapo.

<sup>29</sup> Sotome taone ane Rotemo metakarisia maiya amo, hepene aeyaka ira rufiyaki ekeyaki yao asia sarimaraka peraka, aporo hinamo su rukua fasapo.

<sup>30</sup> Asia ayíáka, Aporomanomo Táke anoane fasere aperamo ayiakakosapo.

<sup>31</sup> Ano pariapera maiya amo aporo yaoa reane ipi makata kemo mako ape kakarua puane siahoasifareapo. Ano foakayia peakosasamo, aporo apea puane siahoasifareapo.

<sup>32</sup> Asiamo Rotemo hinamoaki asiane koteaka hemakapunie. Rotemo hinamomo pariasesa ayíáka repo soko anapaka asekeanie.

<sup>33</sup> Asiamo aporo hinamo hauaka wo arisiamo hitaferaka risikiakosa hákasane, aíyaka hemakapurakano, aporo hinamoane Kotiyaki yaiya risikiakosafapo. Arirakano aporo hinamomo anoaki hemakapuraka hauaka wo kau hitaferaka risikiakosane makama kesekeraka, aíyaka hemakapurakano, aporo hinamoane Kotiyaki yaiya risikiakosapo.

<sup>34</sup> Hao, kaisie. Ereamo apea aporo tetá hakása wakakesane, meta nōmo pasimaraka, meta yia metakariakosapo.

<sup>35</sup> Arirakano hinamo tetá hakása asipa araka risiane, meta nōmo pasimaraka, meta yia metakariakosapo.

<sup>36</sup> [Aporo tetá yaoa risiane meta nōmo pasimaraka meta yia metakariakosapo.]

<sup>37</sup> Airakano aporo hakása puramo Yasuaki someraka, "Unihaeo, ma ayiakakosare?" Airakano Yasumo someraka, "Makata kusua kayakipoko mena sakarekepo asia sari-manapo." Aíyaka Yasumo somesapo.

## 18

*Hukurura kepo kaira aporoane rea á, hinamo yaro pesa Yasumo takumeaka somesane oyapo.*

<sup>1</sup> Maiya suamo aporo hinamomo kurikurihoasimo, kurikurinane metakariakohoamo, Yasumo takumeaka somesane oyapo.

<sup>2</sup> "Ape meta hukurura kepo kaira aporo reke, epo Kotiane soko, ipi aporo tákéane soko koteaka hemakapurafapo.

<sup>3</sup> Arirakano ipi ape sumu á hinamo yaro hakása kayapo. Hinamo yaroane aporo metamo mokoatikirakano hinamo yaroane hukurura kepo kaira aporo rea á peraka, hinamoamo someraka, 'Aporo metamo ano mokoatikirakano, nōmo eane maroporaka, keseke ano ararehoanie.' Aíyaka maiya suamo maroporaka ararehoanie, aisapo.

<sup>4</sup> Airakano maiya káramo hukurura kepo kaira aporoamo kakipayasapo. Asiane keseke epo ipiyia hemakapukua someraka, 'Kotiane nōmo hemakapurafapo. Aporo tákéane soko nōmo hemakapurafapo.

<sup>5</sup> Asiamo hinamoamo anoaki maiya suamo someraka, "Maroporaka ararehoanie." Airakano nōmo maiya suamo kaikia hisiripo. Efera hunia perakano e nōmo arareraka maropohokosapo. Maropohoanafonorakan maiya suamo ano rea perakano epo someane nōmo kaikia hisiraka ano wafororipo.' Aíyaka hemakapukua hukurura kepo kaira aporomo somesapo." Aíyaka Yasumo takumeaka somesapo.

<sup>6</sup> Asiamo some kepoane hemakapusimo Yasumo efera hunia someraka, "Hukurura kepo kaira aporo watikiaka rea yiamo, hinamo yaroane epo arareraka eane mokoatikisane maroposapo.

<sup>7</sup> Hao, kaisie. Koti ipi koteaka susu rerasamo reane mokoatikisane epo maropohokosapo. Ereamo soko maiyamo soko Kotimo murikimasa aporo hinamomo eaki kurikurirakano, Kotimo kairaka maropohokosare? Epo haru maropohoanafonoraka keseke maropohokosare?

<sup>8</sup> Ao, iane mokoatikisane Kotimo ipi foaka maropohokosapo. Ano Aporomanomo Tákéane pariaperamo aporo hinamomo Kotiaki himu hakásaraka hemakapukua kurikuriraka risiarihoamo nōmo aseakosapo." Aíyaka Yasumo somesapo.

*Ferese aporo soko takese mora aporo soko tetapó kurikurisane Yasumo takumeaka somesane oyapo.*

<sup>9</sup> Aporomo ipiane hakása kekereraka sikiraka someraka "Ano kotesapo. Ano ereketaera-aka sia rekenapo." Aíyaka reke aporo metane makeferaka rerapo. Aporo ayíáka makáraraka risiaki Yasumo takumeaka someraka,

<sup>10</sup> "Aporo tetá Kotimo apea kurikurihoko hisiapo. Kurikurihoko hisiane, meta ipi Ferese aporopo. Metane ipi takese mora aporopo. Tetá Kotimo apea hikia

<sup>11</sup> Ferese aporo ipi haku fasikia reke epo yano motosa makáraraka e ipiyia kurikuriraka, 'Kotio, aporo metakiramo makaripi ayíáka risikino, kotafe horakano, arirakano makata hakimarakano anapo. I arisia ayíáka ano rekenafapo. Takese mora aporo e area ayíáka ano rekenafapo.

<sup>12</sup> Arirakano sokō hakásamo yape tetá né sesehoasimo makata nakosane nōmo sokoainapo. Nōmo mone soko parakuraka tokonasu nōmo ní maraka, kaeyako hakásá néaki karápo.' Aiyaka Kotiaki Fere se aporomo kurikurisapo.

<sup>13</sup> Arirakano takese mora aporo wakasema yamenoa reke, epo ipi yano motosa mawakasemaraka, wamo arupekeea reke kurikuriraka, 'Kotio, aporo watikisane anopo. Ano kamenakahaoanie.' Aiyaka takese mora aporomo kurikurisapo.

<sup>14</sup> Aiyaka kurikurisa aporo amo Kotiaki makata watikisane maroporaka marekea aiyaka kurikurisane, Kotimo kaikia makotesapo. Asiamo keseke aporoane ipi apea paripusuapo. Arirakano Fere se aporomo asiafapo. Aporomo epo ipiane makárarakano, keseke e mawakasemahokosapo. Arirakano aporomo epo ipiane makama kesekerakano, keseke e makárahokosapo.' Aiyaka Yasumo somesapo.

*Hokosa fete suane Yasumo makotesane oyapo.*

*Matiu 9:13-15; Maka 10:13-16*

<sup>15</sup> Hokosa feteane Yasumo sakairaka makotehoasimo Yasu rea karikia pesapo. Karikia perakan Yasumo aporo hakásá puramo someraka, "Hokosane karikia peákopo."

<sup>16</sup> Airakano Yasumo hokosaki peaeraka someraka, "Hokosa ano rea wo karikia peane siahoasireapo. Iane repo matasohoane siahoasifareapo. Asiamo aporo hinamo reane, hokosa fete asikenó Kotimo unihaeaka asekeea rerapo.

<sup>17</sup> Arirakano Koti unihaeaka area a hokosa apera ayiáka, peanie. Ayiáka peanafonorakano, Koti unihaeaka area a paohokosafapo. Nōmo reaki kakaro somerakaripo." Aiyaka Yasumo somesapo.

*Aporomo makata kemo kára morane oyapo.*

*Matiu 19:16-30; Maka 10:17-31*

<sup>18</sup> Yu aporo káramo Yasuaki someraka, "Tisa kotesao, ano Kotiyaki yaiya rekeakosakipoko, pipu nōmo yakapa rakiakosare?"

<sup>19</sup> Airakano Yasumo someraka, "Nōmo anoaki marirakano kotesapo, airakanare? Koti ipi hákasa kotesapo. Aporo meta kotesa rekenafapo.

<sup>20</sup> Kotimo somemanee nōmo hemakapurapo. Somemanee oyapo. Hinamo hakimakopo. Aporo kukusimo rukupo. Aporo metamo makata kemoane hakimakopo. Aporo metaki kotafe topakamaraka somehokopo. Ní ata soko, ní ama soko, koteaka hemakapukua makotehoanira. Aisane nōmo kaisiapo."

<sup>21</sup> Airakano aporo amo someraka, "Ao, ano hokosa rea maiya amo someane nōmo kakimaka reane, pipu yumo soko, yaiya kakimaka rekenapo."

<sup>22</sup> Airakano Yasumo someraka, "Né makata hakásá meta siasafapo. Nōmo makata kemo suroporaka, mone mosane aporo makata forokoa risiaki kakanie. Kaka farakanone, nōmo ní mahimuraka taena makata ane hepene yapura tokoakosapo. Ní makata kemo kaka faraka ano patera aseako peanie."

<sup>23</sup> Airakano aporo amo ipi kaikia ipi makata kemo kára toane metakariasisenko asekeea, ipi himu mahisiraka someane kakimasafapo.

<sup>24</sup> Kakimakanafonorakano Yasumo e asekeea someraka "Makata kemo kárarakaka rea aporo ane, Koti unihaeaka rea paohokosane, namo kakaro kára waforohokosapo."

<sup>25</sup> Saro kamo pasu irina nitoro kakaru asia, kokoropuan tapenapo. Aina ayiáka makata kemo kárarakaka rea aporoane Kotimo e unihaeaka rekeasimo e paohokosane namo kakaro wafororaka paohokosapo."

<sup>26</sup> Airakano aporomo soko, hinamomo soko, ipu kaikia someraka, "Aporo epa Kotimo asekeea rekeako pasimakosare?"

<sup>27</sup> Airakano Yasumo someraka, "Aporomo someraka 'Siahoasifareapo.' Aisa nine Kotimo ipi rakiante siahokosapo," aisapo.

<sup>28</sup> Arirakano Pitamo someraka, "Isu neyaki hakásá pukusakipoko, isiapo apeane metakariasiapo."

<sup>29</sup> Airakano Yasumo someraka, "Nōmo reaki kakaro somerakaripo. Aporo suamo hakásá hakásarakaka, Koti unihaeaka rea paohokosakipoko, ipi ape soko, ipi hinamomo soko, ipi mae soko, ipi ata soko, ipi ama soko, ipi hokosane soko, su metakarikia rekeno

<sup>30</sup> ipi hauaka wo areamo makata kára yasia meta mokoakosapo. Arirakano keseke Kotiyaki kakaro yaiya rekeakosapo." Aiyaka Yasumo somesapo.

*Yape isiamo Yasumo someraka, "Aporomo ano kukusimo rukusapo." Aiyaka somesane oyapo.*

*Matiu 20:17-19; Maka 10:32-34*

<sup>31</sup> Yasumo ipi aporo kenosu murikimasane karikia wakasema pukua risike someraka, "Hao, kaisie. Isu Yarusarame sitia hinakanapo. Ano Aporomanomo Tákeane porofete aporomo popasane kakaro ayiakakosapo.

<sup>32</sup> Anoane parakeraka karikia pukua Yu aporo hoanafonosaki kakakosapo. Karakanano namina ano mahokopariraka mokoatikiraka, ano kaua torofaeraka ayiakakosapo.

<sup>33</sup> Ayiáka marekea ano sakomo rukusapo. Ano rusua kukuasapo. Rusua kusuane yape isiamo ano turikia pukusapo."

<sup>34</sup> Aiyaka Yasumo somesane ipi aporo hakása puramo himetesapo. Some kepoane faremaresakipoko someane ipu himetesapo.

*Aporo hi mesa Yasumo mafasane oyapo.*

*Matiu 20:29-34; Maka 10:46-52*

<sup>35</sup> Yasu Yariko taone makeraka perakano aporo hi taku tetakara mesane aporo metakiramo e mone kakasimo ikia kara fea mumiraka kayapo.

<sup>36</sup> E kake kaiyiáne aporo yakai perakarakano kaikia someraka "Perakarakane epare?"

<sup>37</sup> Airakano ipu someraka "Nasare aporo Yasu apere."

<sup>38</sup> Airakano aporo hi mesamo wáraka, "Yasuo, né Tefetemo aporo irao, nómó ano kamenakarakaa arareracie."

<sup>39</sup> Airakano aporo fanaraka pesamo someraka, "Nómó Yasuane wahokopo, me fasie." Airakano aporo hi mesamo sakepamo wáraka "Tefetemo aporo irao, nómó ano kamenakarakaa arareracie."

<sup>40</sup> Airakano Yasumo kairaka wasuaka rukua asekea reapo. Asekea reke epo someraka, "Aporoane ano are wo karikia peae." Airakano e karikia pesapo. Karikia perakano Yasumo someraka,

<sup>41</sup> "Nómó sesehoasimo nómó ne mayiákasimore?" Airakano aporo amo ipi someraka, "Unihaeo, nómó himo makata koteaka aseakoripo," aisapo.

<sup>42</sup> Airakano Yasumo eaki someraka, "Nómó koteaka asesie. Nómó anoaki himu hakásaraka hemaka apura yiamo, né hi mesane mafarakayiapo."

<sup>43</sup> Yasumo ipi aihoane, aporo hi mesa amo ipi himo wate foaka koteaka aserakano, e Yasuyaki hakása puraka Kotiaki kekererape pusuapo. Kekererape purakano, aporo hi mesa mafasane aporo hinamo suamo aseraka Kotiaki kara kekeresapo.

## 19

*Sakiásemo Yasuane aseako pusuane oyapo.*

<sup>1</sup> Yasu ipi Yariko taonea pauraka koraka reapo.

<sup>2</sup> Arirakano taonea aporo hakása meta rea ipi yano motosa Sakiásepo. Sakiásemo ipi makata rakirane takese mora aporoane asekea reapo. Arirakano ipi makata kemo kara sakepamo toapo.

<sup>3</sup> Ásiáne Sakiáse ipi Yasu rea pukua Yasu aseako ayiane, aporo hinamo yakai sari-masakipoko mataisekeno epo Yasuane asesafapo. E aporo kinakesasamo, aporo hinamo metakirane hohoroposasamo Yasuane mataisakipoko epo asesafapo.

<sup>4</sup> Asekeanafonorakano Sakiáse ipi foaka pukua aporo yakai sarimasane marokeraka pukua, Yasu perakano aseakosakipoko ira foke asia reakipoko ira huturua hikia asekea kayapo.

<sup>5</sup> Sakiáse ipi ira huturua hikia asekea kakeno, Yasu pekea reke huturua asekea someraka, "Sakiáseo, né peae. Nómó apea ano pukusapo. Asiamo né foaka peae," aisapo.

<sup>6</sup> Airakano Sakiáse ira huturu yapura kayane, Yasumo peaerakano Sakiáse foakayia sonorakana peraka someraka, "Ao, nómó apea ne peae." Aiyaka epo Yasuaki seseraka tati hakása pusuapo.

<sup>7</sup> Arirakano Sakiásemo apea tati purakano, aporo hinamo su sarimasamo aseraka kakanakeraka someraka, "Aporo watikisamo apea Yasu kimisi apure," aisapo.

<sup>8</sup> Airakano Yasu ipi Sakiásemo apea pusuapo. Pukua apea yorokoa kakeno, Sakiáse ipi takahikia Yasuaki someraka, "Unihaeo, né kárapo. Hao, kaisie. Nómó makata kemo kára taesapo. Kára taesane parakuraka tetákara hakása yineraka metakirane aporo makata forosaki kakakosapo. Anakano fana aporo metakiramo makatane nómó hakimosakipoko, ropo kakakosapo. Aporo amo makatane hakása nómó hakimosakipoko, nómó makata ropo kitata susu ayiáka kakakosapo. Aporo suamo makata kemo nómó hakimosakipoko, nómó makata ropo kitata susuaka kakakosapo." Aiyaka Sakiásemo somesapo.

<sup>9</sup> Airakano Yasumo someraka, "Né ereketaeraka rekeako parisasamo, pipu ne kakaro Eparahamemo aporo ira rekenapo. Sakiáse nómó Kotiaki hemakapusuasámo, nómó ní hokosamo soko, nómó ní hinamomo soko, nómó ní apea aporo risiamo, ipu suamo Kotiaki hemakapusimo, pipu Kotimo re mafasiranakanapo.

<sup>10</sup> Arirakano Aporomanomo Tákeane anopo. Aporo hinamo himu watikisane nōmo kope pekea iane mafasiakosakipoko ano pesapo." Aiyaka Yasumo somesapo.

*Yasumo mone ane takumeaka somesane oyapo.*

*Matiu 25:14-30*

<sup>11</sup> Yasu Yarusarame siti makeraka reke epo aporo hinamoaki some karakano ipu kaisi- apo. Kaikia hemakapuraka, "Yarusarame sitia wate foaka Koti unihaeaka rekeakosane pipu makeane." Aiyaka hemakapurakano Yasumo takumeaka someraka,

<sup>12</sup> "Aporo kára metane unihaeaka mareasimo e hauaka yamenoa

<sup>13</sup> pukusakipoko reke, ipi aporo raipa kaeyako suaki peaeaka, perakano epo somer- aka, 'Reaki mone sawi tuaneti kina (K20) hakásara hakásaraka nōmo karakanapo. Ano pusuakipoko mone akara one, mone metakira soko ripaka mokoakosakipoko, pisinisi rakiniie.' Aiyaka e pusuapo.

<sup>14</sup> E purakano ípi aporo hakásara risiamo eaki hisiraka, aporo metakiraki someraka, 'E kekemarape pusie. Puraka úyaka somehoanie. "Isiapo hauaka wo ne unihaeaka areane hisiripo." Aiyaka somehoanie.' Airakano aporo pusiesane pukua, aporo káraki somesapo. Someaka faraka namina apea paripesapo. Paripesakipoko

<sup>15</sup> wakesema nina, aporo unihaeaka maresane ípi hauaka paripesapo. Pariperaka aporo raipa kaeyakosu mone kasaki peaesapo. I perakano aporo unihaeamo someraka, 'Mone nōmo reaki kasane repo pisinisi makata yakapa rakisiare? Pisinisi rakikia mone meta ripaka marekea mosare?

<sup>16</sup> Airakano aporo meta fana pekea someraka, 'Unihaeo, ano mone tuaneti kina (K20) kasapo. Amo pisinisi rakikia mone tuaneti kina (K20) kaeyakosuraka ayíáka sarimaraka, tu harote kina (K200) mosapo.'

<sup>17</sup> Airakano aporo unihaemo someraka, 'Ao, kotehoareapo. Nōmo koteaka rakireapo. Nōmo néaki wakasema kasane, nōmo himu hakásaraka rakisiakipoko ape sumu kaeyakosu nōmo asekeea rekeasimo nōmo né marerakanapo,' aisapo.

<sup>18</sup> Airakano aporo raipa metamo someraka, 'Unihaeo, nōmo anoaki mone tuaneti kina (K20) kasapo. Moneamo pisinisi rakikia mone tuaneti kina kakoreasuraka ayíáka sarimaraka, wane harote kina (K100) mosapo.'

<sup>19</sup> Airakano aporoaki, aporo unihaemo someraka, 'Taone kakoreasu nōmo asekeea rekeasimo, nōmo neaki marerakanapo,' aisapo.

<sup>20</sup> Airakano aporo raipa metamo someraka, 'Hao, kaisie. Nōmo mone tuaneti kina (K20) anoaki kasane oyapo. Nōmo pasumo taporaka faremaresapo.

<sup>21</sup> Né aporo waresasamo ano namoraka, moneane pasumo taporaka faremaresapo. Nōmo makata motoanafonosa nine, makata ane nōmo morapo. Nōmo hemoa makata nakosa poroanafonosa nine, makata nakosane nōmo morapo.'

<sup>22</sup> Airakano eaki aporo unihaemo someraka, 'Né aporo watikihoareapo. Nōmo anoaki someraka akipoko né hukurukusapo. Nōmo someraka, "Anoane aporo warepo," airakae. "Nōmo makata motoanafonosane nōmo morapo," airakae. "Nōmo hemoa makata nakosa poroanafonosane nōmo morapo," airakae.

<sup>23</sup> Asiamo nōmo pisinisi rakianafonohoareane mone ane pasepukua motoafunureapo. Asiamo moneane nōmo pasepukua motosa satiki mone metane ripaka marekea mokoafunureapo. Asiamo ano pariperaka mone su siaraka nōmo mokoafunureapo,' aisapo.

<sup>24</sup> Airakano aporo unihaemo aporo risiaiki someraka, 'Eaki mone tuaneti kina (K20) nōmo kasane repo maka, aporo raipa mone tu harote kina (K200) mosa aporoaki kakanie.'

<sup>25</sup> Airakano ipu someraka, 'Aporo raipa amo mone tu harote kina (K200) sia kakenapo. Ipi mone káraro. Mone meta mayane siahoasifareapo.'

<sup>26</sup> Airakano aporo unihaemo iaki someraka 'Wae, aporomo makata kakeno meta soko kakakosapo. Aporo metamo makata wakasemasekeno wakasemane fimakosapo.

<sup>27</sup> Airakano ano unihaeaka rekeakosaporakano aporo metakiramo hisisapo. Hisisa aporoamo anoyaki yunusapo. Asiamo hisisa aporoane ano rea karikia peae. Nōmo hikumisi neneme yia iane rusua kukunie.' Aiyaka aporo unihaemo somesapo." Aiyaka Yasumo takumeaka somesapo.

*Yarusarame sitia Yasu hisiane oyapo.*

*Matiu 21:1-11; Maka 11:1-11; Yone 12:12-19*

<sup>28</sup> Yasumo some kaka faraka Yarusarame sitia hiakosakipoko ípi fana hikia reapo.

<sup>29</sup> Aiyáka hinaka reke Péfasi apeane soko, Petene apeane soko, makeraka ūri Orofe kikiripoa pauraka ípi aporo hakásara pura tetáki

<sup>30</sup> Yasumo someraka "Teto ape tameyia pusie. Pukua aseane ape fariyia saro toki mano humaresa ípi matia aporo meta ripakanafonosa kita humaresa rekeno, asekosapo. Aseraka kita fatarimaka ano area wo karikia peanie.

<sup>31</sup> Airakano aporo metamo tetoaki someraka, ‘Saro toki kita humaresane marirakano fatarimarakanare?’ Airakano tetápo someraka, ‘Saro tokiane Unihae mo makata rakiakosakipoko karikia peanie aisasamo etapo karikia purakanapo.’ Aíyaka somehoanie,” aisapo.

<sup>32</sup> Arirakano tetá hinaka, Yasumo fana tetáki makata somesane tetapó yaiya asesapo.

<sup>33</sup> Asekea saro toki mano kita humaresane tetapó fatarimarakano, saro toki wafayamo someraka, ‘Marirakano fatarimarakanare?’

<sup>34</sup> Airakano tetapó someraka, “Unihae mo karikia peaniesasamo etapo karikia purakanapo,” aisapo.

<sup>35</sup> Asiamo saro toki manoane Yasu rea tetapó karikia pusuapo. Karikia puraka saro toki matia ipu pasu furumurikia, Yasu á ripaka maresapo.

<sup>36</sup> Arirakano Yasu saro tokia ripaka ikia kara hinakano, aporo hinamo ipu pasu mokoa pesane, ikia kara á ifunurape hisiapo.

<sup>37</sup> Arirakano Yarusarame siti makeraka ūri Orofe kakafaea perakano, aporo hinamo su Yasuyaki namina hakása sarimaraka peraka, Kotiaki suseaka kekeresapo. Ipu kekereraka someraka, “Epo Kotimo wakapuaka rakirane rakirakano, isiapo asesapo.

<sup>38</sup> Eane Unihae Kotimo hepene yapunaka pusierakano, Kotimo wakapuyaki apere. E yano motosa makama fanaraka reke Kotimo eane makotehoasimoripo. Kotimo isu mafasiakosane, hepene yapura risiamo soko, seseraka risikinapo. Kotiane isiapo makararakanapo.” Aíyaka hokono potepoteraka seseraka aporo hinamo suamo Kotiaki kekeresapo.

<sup>39</sup> Kekererakano, aporo hinamo su sarimasakipoko, Fereze aporo iyaki hakasa risiamo Yasuaki someraka, “Aporo hinamo néyaki hakása pesaki mehokopo, aisie.”

<sup>40</sup> Airakano Yasumo someraka, “Namina himumo sesesane mayiáka metakariakosare? Ipu kekerehoanafonosa satiki, ekemo kekerehoafunupo.” Aíyaka Yasumo somesapo.

### *Yarusarame sitiane Yasumo aseraka hiripusane oyapo.*

<sup>41</sup> Yarusarame sitiane makeraka pekea reke, Yasumo sitiane asekea kamenakaraka kára hemakapukua hiripusapo.

<sup>42</sup> Yasu hiripuraka reke someraka, “Yarusarame aporo hinamo reo, maiya yumo tau auaraka risikiakosakipoko, ikia kara kotesa kekemahokosane repo hemakapusua satiki, re koteaka risikiafunureapo. Asiamo maiya yumo makatane farareasasamo repo aseakosafapo.

<sup>43</sup> Keseke yunu aporo fasereperaka repo ape kaua kauraka hahaeraka topere motokoa, aporo su peraka reane rukua fahokosapo.

<sup>44</sup> Re soko, repo hokosa soko, ape kakarua risiane waseremokoa hauaka atura mokoa-suraka, rusua kukukeakosapo. Arirakano ape ekemo kisiane, ekeane kotahoane ape fahokosapo. Maiya yumo Kotimo re mafasiakosapoko asiane, repo kakimakanafonosasamo mafasiáksa maiyane fasapo.” Aíyaka Yasumo somesapo.

### *Kotimo apea Yasu yorosane oyapo.*

*Matiu 21:12-17; Maka 11:15-19; Yone 2:13-22*

<sup>45</sup> Kotimo apea Yasu ipi yorokoa aseane, aporomo makata roporaka risikino asekea, Yasumo i rukuhaoeraaka pusiesapo.

<sup>46</sup> Iaki Yasumo someraka, ‘Kotimo sawia popasane oyapo. ‘Nōmo apeane anoaki someaka wára kurikuri ape ayapo.’ Aíyaka Kotimo sawia popahoareapo. Asiane repo Kotimo ape one hakimora aporo risira kunikia asia maparihoareapo.” Aíyaka Yasumo somesapo. (Aisaia 56:7)

<sup>47</sup> Arirakano maiya suamo Kotimo apea Yasumo some kasapo. Anakano Pirisiti aporo káramo soko, Kotimo somemane tisa aporomo soko, aporo sisimamo soko, Yasu rusua kukusapoko

<sup>48</sup> asiane Yasumo someane aporo hinamo suamo kakaro kaikia risikino asekea ipu someraka, “Aporo hinamo kara risia wo, mayiáka Yasuane kukusimo rukusare?” Aisapo.

## 20

### *“Yasumo rakirane epamo maresare?” Aisane oyapo.*

*Matiu 21:23-27; Maka 11:27-33*

<sup>1</sup> Sere metamo Kotimo ape rurusa tua Yasu pekea, aporo hinamoaki epo some kotesane some kasapo. Some kasá maiya amo pirisiti aporo káramo soko, Kotimo somemane tisa aporomo soko, aporo sisimamo soko Yasu rea pekea

<sup>2</sup> eaki someraka, “Nōmo arakirane epamo maresare? Néaki epamo ayiáka rakinie, aisare?”

<sup>3</sup> Airakano Yasumo iaki someraka, "Nōmo soko reaki makata hakāsa meta akai kairakanapo.

<sup>4</sup> Yonemo aporo hinamo hea tapukumurianiesane Kotimo aisare? O aporomo aisare? Repo anoaki somesie."

<sup>5</sup> Airakano ipu namina susu me rukua someraka, "Isiapo Yasuaki yakapa somehoa-narakapo. Isiapo someraka, 'Kotimo aisapo,' aiyaka somerakanone, Yasumo isuaki someraka, 'Marirakano Yonemo someane kakipayasare?' aihokosapo.

<sup>6</sup> Airakano isiapo someraka, 'Aporomo aisapo,' aiyaka somerakanone aporo hinamo suamo isuaki mahisiraka sapehokosapo. Asiamo aporo hinamo suamo hemakapuraka, 'Yone ipi Kotimo some kará porofete aporopo.' Ipu aiyaka hemakapususamo isiapo 'Aporomo aisapo,' aiyaka somerakanone, isu ekemo kareakosapo."

<sup>7</sup> Aiyaka namina susu tafatafaraka ipu Yasuaki someraka, "Yoneaki hea tapukumurianiesane epamo aisarakapo. Isu himeteripo."

<sup>8</sup> Airakano Yasumo someraka, "Repo anoaki some paripeanafonasamo, anoaki makata rakiniesa kepoano soko, reaki somehokosafapo," aiyaka Yasumo somesapo.

*Sako karepe hemoane aporomo asekeea risia Yasumo takumeaka somesane oyapo.*

*Matiu 21:33-46; Maka 12:1-12*

<sup>9</sup> Yasumo aporo hinamoaki takumeaka someraka, "Hemo wafayamo sako karepe hemoa porokoa, aporo metakiramo asekeea risikiasimo murikimasapo. Murikimaka faraka hemo wafaya hauaka meta pusuapo. Pukua ipi wate foaka paripeakosafapo, aiyaka hemakapuka hauaka meta á pusuapo.

<sup>10</sup> Pusuakipoko sako karepe wate ikia ahera maiya amo, hemo asekeea risia aporomo sako karepe wateane tumosapo. Tumokoa parakuraka hemo wafayamo somesane kaikia taehoko asiane, ipu koretaeraka hemakapukua, hemo wafayapoko taesafapo. Arirakano hemo wafayamo ipi aporo raipaki someraka, 'Sako karepe wateane anopoko taesane nōmo mokoako pusie,' aisapo. Pusierakano e pusuapo. Pukua hemoa perakano hemo asekeea risia aporomo e rusuapo. Rukua e sako karepe wateane kakanafonoraka, nena paripusierakano e paripesapo.

<sup>11</sup> Pariperakano asekeea hemo wafayamo aporo raipa metaki pusiesapo. Arirakano aporo meta kesekeea pusiesane soko, hemo asekeea risia aporomo rukua mokoatikiraka, sako karepe wateane kakanafonoraka nena paripusierakano paripesapo.

<sup>12</sup> Pariperakano asekeea yape isiamo hemo wafayamo aporo raipa metane pusiesapo. Pusiesane hemo asekeea risia aporomo e rukumakasusapo.

<sup>13</sup> Arirakano asekeea hemo wafayamo someraka, 'Nōmo mayiakakosare? Nōmo ní hokosa himu tumurumo hemakapusuane pusiehokosapo. Nōmo hokosane namina mokoatikhokosafapo.' Aiyaka epo ipi hokosa pusiesapo.

<sup>14</sup> Pusierakano hokosa ane hemoa pesapo. Perakano hemo asekeea risia aporomo someraka, 'Hemo wafayamo hokosa apere. Keseke ipi wafayane kusuakipoko finihaoa e reke, hemo one epo asekeea rekeasireapo. Anapaka e isina rukusapo. Rusua kurakano hemo one isiapo isina makosapo.'

<sup>15</sup> Aiyaka hokosane ipu waseremaka ruru tapikia yao takua rukumakasuraka rusua kusuapo. Ipi hokosa rusua kurakano hemo wafayamo hemo asekeea risia aporoane mayiakakosare?

<sup>16</sup> E pekeaa hemo asekeea risia aporoane rusua kukusapo. Rusua kurakano aporo raipa metakiramo hemoane asekeea risikiasimo murikimakosapo." Aiyaka Yasumo somerakanano, aporo suamo kaikia someraka, "Uao, Epo enahoko somerakarifapo. Kakaro somerakae," aisapo.

<sup>17</sup> Arirakano Yasumo aporo hinamo i suane asekeea someraka, "Kotimo sawia popasane oyapo. 'Ape kira aporomo ira warupi mamakatesane maka pekeaa tipia maporareapo.' Aiyaka Kotimo sawia popahoareapo. (Buk Song 118:22)

Asiamo Kotimo sawia popasane kepoane repo hemakapurakarire?

<sup>18</sup> arirakano ira warupia aporo hinamo terafaka ruraka kakaro etehokosapo. Arirakano ira warupi maposane huruperaka rurakano kakaro rukutaihokosapo." Aiyaka Yasumo ipi yine ira warupi aiyáka takumeaka somesapo.

*"Isiapo takese mone kakakosare?" Aisane oyapo.*

*Matiu 22:15-22; Maka 12:13-17*

<sup>19</sup> Pirisiti aporo káramo soko, Kotimo somemane tisa aporomo soko someraka, "Yasumo isuane takumeaka somerakae. Asiamo yumo isiapo e waseremakoripo." Aisa nine e haru waseremasafapo. Aporo hinamo suamo iaki sapenapaka Yasu metakarisiaipo.

<sup>20</sup> Asiamo ipu Yasuane asekehaeraka aporo metakiraki maserapi pusiesapo. Pusiesane kotafe Yasu patera asesa aporo pariraka, Yasuaki maiya suamo kaikihaeraka, Yasumo

hasaka somerakarihoamo, yapake akai kaisiapo. Akai kaikia epo hasaka somerakano, e waseremaka kamani unihae rea karikia pukusakipoko kaihihaesapo.

<sup>21</sup> Kaikihaeraka Yasu rea aporo metakira maserapi pusuapo. Pukua ipu Yasuaki someraka, "Tisao, nōmo kakaro ereketaeraka somerapo. Aporo hinamo koteaka risikiasimo nōmo Kotimo someane some akare. Aporomo someane nōmo some karakarifapo. Aporo hokopusuane sesehoasimo nōmo some karakarifapo. Aporomo neaki mokoatikihokosane nōmo hemakapurafaraka nōmo kakaro some akare. Kotimo ainane nōmo kakaro some akare.

<sup>22</sup> Asiamo isiapo Yu aporomo Rome aporo unihaeaki takese mone kayane siahoasireare? Kayane Kotimo somemaneane mamosohoasireare? Mayiakasireare?"

<sup>23</sup> Airakano ipu yapake someane Yasumo kairaka someraka, "Mone hae maka peae.

<sup>24</sup> Mone haeā epa hikumisi rekerire? Epa yano motosane popahoareare?" Airakano mone hae maka pesane ipu aseraka someraka, "Rome aporo unihae Sisa hikumisireapo. Sisa ipu yano motosa popahoareapo."

<sup>25</sup> Airakano Yasumo someraka, "Rome aporo unihaeemo menane ipiaki kakanie. Arirakano Kotimo menane Koti ipiaki kakanie," aisapo.

<sup>26</sup> Yasumo hasaka somehoanafonorakano, maserapi pesa aporoane fofasapo. Ipu someraka, "Yapake somesane Yasumo hemaka apure. Aporo suamo kaiyisimo epo hasaka somerakarihoamo yapake kaisiapo. Asiane yapake someane epo hemakapuraka hasaka somesafapo." Aiyaka namina fofaraka makata meta Yasuaki somesafapo.

*Aporo kukua turikia pukusane, Satusi aporomo somesane oyapo.*

*Matiu 22:23-33; Maka 12:18-27*

<sup>27</sup> Satusi aporomo hemakapuraka, "Aporo kusuane maturikia taenafapo," aiyaka hemakapusuapo. Asiamo Yasu rea Satusi aporo i pekea someraka

<sup>28</sup> "Tisao, Mosesemo somemane popasane oyapo. Aporo metamo ipi mamaneamo hokosa hokono mareanafonoraka kurakano asekeea, hinamo yaroane aporo kusuamo ipi mamaneamo arumarapo. Aporo kusua amo hokosa wainenaka sikiraka wainasimo, hinamo yaroane, ipi mamaneamo arumarapo. Aiyaka somemaneane Mosesemo popahoareapo.

<sup>29</sup> Arirakano aporo ipi mamanea yatipinusu risiapo. Mamanea fanamo hinamo arumasane, hokosa hokono mareanafonoraka kurakano,

<sup>30</sup> mamanea kusuamo patera yiamo hinamo yaroane arumasapo. Epo soko hokosa hokono mareanafonoraka e kusuapo.

<sup>31</sup> Kurakano epo patera yiamo hinamo yaroane arumasapo. Epo soko hokosa hokono mareanafonoraka kusuapo. Ayipe pukua mamanea yatipinu suamo hinamo yaro hakāsane arumape pukua, hokosa hokono maresafapo.

<sup>32</sup> Keseke hinamo manokonomasane kusuapo.

<sup>33</sup> Kusua maturikia taeana maiya amo, hinamoane epamo hinamore? Eane aporo mamanea yatipinu suamo arumasapo."

<sup>34</sup> Airakano Yasumo someraka, "Hauaka wo aporomo hinamo arumarapo.

<sup>35</sup> Arirakano keseke kusua maturikia taeana maiya amo Kotimo someraka, 'Ne anoyaki hakāsa rekeako peae.' Airakano aporoane hepene yapura hinaka hinamo arumakosafapo.

<sup>36</sup> Namina hepene aporo arisia ayiāka risikiakosapo. Arirakano kurafapo. Aporo kusua maturikia taerakano i kakaro Kotimo hokosapo.

<sup>37</sup> Arirakano aporo kusua maturikia taena kepoane Mosesemo hemakapusuapo. Ira fete reakipoko arakarua ira rufisa nine, irane iramo inasafapo. Inakanafonorakano Mosesemo aseako puraka, Kotiaki someraka, 'Unihaeo, ne Eparahamemo Kotipo. Ne Aisakemo Kotipo. Ne Yakopemo Kotipo.'

<sup>38</sup> Aiyaka Mosesemo somesa amo kepoane oyapo. Aporo kusuane maturikia taehoanafonosane, ane, Mosesemo someraka, 'Ne Eparahame, Aisake, Yakope ipu Kotipo,' ai-hokosafapo. Asiamo Kotiane aporo hinamo hitafe risiamon Kotipo. Aporo hinamo kukua kesamo Kotifapo. Kotiaki hemakapukua reane eyaki yaiya rekeakosapo."

<sup>39</sup> Aiyaka Yasumo somerakano Kotimo somemane tisa aporomo someraka, "Tisao, nōmo someane kakkarakae."

<sup>40</sup> Aiyaka Yasuaki akai kaiyakosapoko asiāne ipu someane epo hurutapirakano asekeea, eaki efera hunia makata meta akai kaisiafapo.

*"Keresoane Tefetemo aporo ira amo wainakosapo." Aisane oyapo.*

*Matiu 22:41-46; Maka 12:35-37*

<sup>41</sup> Yasumo iaki someraka "Keresoane, Tefetemo aporo ira amo wainakosapo, airakane marirakanore?

<sup>42</sup> Same pukua Tefetemo popasane oyapo.

Nōmo Unihaeaki Unihae Kotimo someraka, 'Né ano hokino tumuru takua kayae. Hokino tumuru takua aporo hokopusua akaya ayiáka kaya.

<sup>43</sup> Kakeno nōmo yunuane nōmo rukumosaka tapiakosapo.' Aiyaka Kotimo somesane Tefetemo popahoareapo. (Buk Song 110:1)

<sup>44</sup> Asiamo Tefetemo Keresoaki someraka, 'Ne nōmo Unihaepo,' aisane marirakano aisare? Arirakano makasa kauamo ipi hokosa wainepe pukusaki 'Unihaepo,' airafapo. Asiamo Tefetemo Keresoaki 'Unihaepo' aisasamo, Tefete takapeasiraka Keresoane wate fana yaiya reapo. Asiáne repo someraka, 'Tefetemo wainepe pesa á Kereso faserepeakosapo,' airakae. Airakane marirakanore?"\* Aiyaka Yasumo somesapo.

"*Kotimo somemane tisa aporo arisia ayiáka risikiakopo.*" Aiyaka Yasumo somesane oyapo.

Matiu 23:1-36; Maka 12:38-40

<sup>45</sup> Aporo hinamo suamo kaiyisimo, Yasumo ipi aporo hakása puraki someraka,

<sup>46</sup> "Kotimo somemane tisa aporomo arakira ayiáka, repo soko ayiáka rakiakopo. Ipu pasu horopokara osoraka pukua, aporo hinamo sarimaraka risiakipoko á i pukua, aporomo i hokino maraka iane makáraraka someraka, 'Tisa kárao,' aihoasimo namina kára sese-napo. Arirakano Yu aporomo sarimana apea soko i pukua aporo hinamo su sarimaraka toakipoko, i kumisi nemene sapea sea tokoako sesenapo. Arirakano hokino akera maiya amo, aporomo i makárahoasimo aporo hokopusuamo sea tokoako sesenapo.

<sup>47</sup> Arirakano hinamo yaromo ape soko makata kemo soko Kotimo somemane tisa aporomo hakimorapo. Hakimoraka yia i kotehoareapo, aihoasimo ipu kurikuriraka risike some nokone pukua kurikurinapo. Asiasamo iane fanasihokosane kárahokosapo." Aiyaka Yasumo somesapo.

## 21

*Hinamo yaromo Kotiaki makata kasane oyapo.*

Maka 12:41-44

<sup>1</sup> Kotimo apea maua motosakipoko aporomo mone Kotipoko kakakosane maua á kesapo. Yasumo aseane makata kemo kára toa aporo hinamo ipu suamo mone kára kerakano asesapo.

<sup>2</sup> Arirakano hinamo yaro hakása meta makata forokoa kayasasamo, ipi mone hae kusua tetá makerakano asesapo.

<sup>3</sup> Makerakano asekeea Yasumo someraka, "Aporo hinamo suamo mone kesane, hinamo yaroamo mone makesamo kakaro marokesapo.

<sup>4</sup> Arirakano aporo hinamo suamo namina mone kára tokeno yia sapeane Kotiaki kasapo. Arirakano hinamo yaro ipi makata forokoa kayasasamo, mone wakasema kaya ane su maka pekeea kasapo. Epo ane su karaka, ipu moneane parakuraka sape metakira namina ape yia taesapo." Aiyaka Yasumo somesapo.

*Kotimo ape marakaritaehokosane oyapo.*

Matiu 24:1-2; Maka 13:1-2

<sup>5</sup> Maiya amo aporo metakiramo Kotimo apeane aseraka someraka, "Kotimo apeane namo kakaro kotesapo. Kotimo apeane eke káramo kisiapo. Arirakano aporomo makata yaku taeraka apeane kau rakikia makotesapo."

<sup>6</sup> Airakano Yasumo someraka, "Pipu repo aserane makata kotesane repo aserakanapo. Arirakano keseke maiya metamo, apeane eke ripaka kisiane, ekeane kokoro mokoteraka hakása hakásaraka tokoakosapo."

<sup>7</sup> Airakano ipu someraka, "Tisao, nōmo somerakane masinaka ayiakakosare? Ayiakakosane isiápo hemakapusímo makata yakapamo isuaki tariakosare?" Asapo.

*Makata umisa kekepo faserepeakosane oyapo.*

Matiu 24:3-14; Maka 13:3-13

<sup>8</sup> Arirakano Yasumo someraka, "Aporo metakiramo reaki kotafe somerakano, someane kakimarapaka asekearie. Aporo yakaimo ano yano hokoa peakosapo. Pekeea ipu kotafe someraka, 'Ano Keresopo. Ano unihae kara rekeasimo murikimasa aporoane anopo. Asiamo fahokosa maiyane makepo.' Airakano someane repo kakimakopo.

<sup>9</sup> Asiamo aporomo ape sumu metayaki werakanaporakano repo kairaka namohokopo. Arirakano aporomo kamani aporoaki hisiraka yunu weakosapo. Werakanaporakano

\* <sup>20:44:</sup> Kereso ipi wate fana Kotiyaki yaiya reapo. Asiamo Keresoane ipi Tefetemo unihaepo. Arirakano keseke ipi hauaka wo pesane Tefetemo aporo ira wainepe pesa á ipi takapesapo.

repo kairaka namohokopo. Makata ane fana peakosapo. Asiamo fahokosa maíya ane haru faserepeakosafapo." Aisapo.

<sup>10</sup> Aíyaka efera hunia Yasumo someraka, "Aporo hauaka meta á risiamo, aporo hauaka meta á risiaki yunu werakano, arirakano kamani metamo, kamani metayaki yunu werakano ayiakakosapo.

<sup>11</sup> Arirakano hauaka kekepoa momani kára peakosapo. Hauaka kekepoa makata nakosa faraka aporo hinamo kára meamohokoso. Hauaka kekepoa makata tasa kára ikia peakosapo. Arirakano ti yapura makata meta haku tarirakano aporo hinamomo asekea namohokoso.

<sup>12</sup> Arirakano makata ane suane faserepeasiraka re waseremokoa, rukua mokoatiki-hokoso. Waseremokoa Yu aporomo sarimana apea karikia pukua, hukurukua tipura keakosapo. Asiamo anoaki himu hakásaraka risiakipoko re waseremokoa, kamani aporo unihae rea á soko, arirakano hauaka asekea risia aporo risia á soko, re karikia pukua hukurukusapo.

<sup>13</sup> Reaki hukuarura maiya amo repo anoane makáraraka somehokoso.

<sup>14</sup> Re waseremarakano re himu fahokopo. 'Tsū hukururakano isiapo maíyaka somehoeare?' Aíyaka hemakapukopo.

<sup>15</sup> Asiamo repo koteaka hemakapukua somehoasimo, koteaka hemakapurane soko, koteaka somerane soko, nōmo reaki karakano repo koteaka somehokoso. Repo koteaka somerakan, hukurura kepo kaira aporomo reaki someraka, 'Nōmo paroaka somerakan, nōmo yakapa some paripeasifareapo,' aihokosapo.

<sup>16</sup> Arirakano reane hukurukusakipoko, ní amamo, ní atamo, ní maemo, ní aporo tákemo, ní moremo, re waseremokoasimo parakehokoso. Namina yia metamo metane rusua kukusapo.

<sup>17</sup> Re ano patera asesasamo reane aporo suamo hisihokoso.

<sup>18</sup> Asiamo repo uni iti hakása soko fipukusafapo.

<sup>19</sup> Arirakano repo anoaki himu hakásaraka yaiya hemakapuraka risikino fareanane repo makosapo." Aíyaka Yasumo somesapo.

*Yarusarame sitiane marakaritaeraka aporo su ruku marutaehokosane oyapo.*

*Matiu 24:15-21; Maka 13:14-19*

<sup>20</sup> Arirakano Yasumo some meta someraka, "Yunu aporo peraka Yarusarame siti kaua aporo kauraka hahaerakeraka toperemotoko, ape tipia marerakano, maiya amo repo asekea hemakapuraka, 'Maiya omo Yarusarame siti marakaritaeraka aporo su rukumarutae-hokoso,' aíyaka repo hemakapukusapo.

<sup>21</sup> Asiamo maiya amo re Yutía hauaka á risiane tekatarikia üria hinie. Arirakano re Yarusarame sitia risiane apeane metakarikia punie. Maiya amo re yaoa risiane Yarusarame sitia poparipeakopo.

<sup>22</sup> Asiamo makata ane fasereperakano repo asekea hemakapuraka, 'Kotimo sawia popasane oyapo. Kotimo maropohokosa maiya ane fasere peakosapo, aíyaka popasane kakaro faserepesapo,' aíyaka repo hemakapukusapo.

<sup>23</sup> Arirakano hinamo hokosa umisa soko, hinamo hokosa kiri kaíyia soko, tekatarikia puane waforohokoso. Asiamo hauaka wo aporo hinamo risiaki makata kára mokoat-ikihokosane soko, Kotimo kára sapenane soko faserepeakosapo.

<sup>24</sup> Arirakano yunu aporo metakíramo Yu aporo hinamoane ferepemo karekea rukutae-hokoso. Arirakano pekeia Yu aporo hinamo metakira waseremokoa hauaka kekepoa karikia pukusapo. Arirakano Yu aporo hoanafonosamo Yarusarame sitiane rakaritaeraka i mokome koraka risikiakoso. Koraka risina hisiraka keseke metakariakosa maiya ane paurakano Yu aporo hoanafonosamo Yarusarame sitiane metakarikia poparipukusapo." Aíyaka Yasumo somesapo.

*"Aporomanomo Tákeane anopo. Ano paripeakosane oyapo."* Aíyaka Yasumo somesane oyapo.

*Matiu 24:29-31; Maka 13:24-27*

<sup>25</sup> Yasumo someraka, "Ti yapura sere maiyane soko, ere maiyane soko, ti makata soko, hakuraka risikiakosane Kotimo tarirakano, aporo hinamo suamo aseakosapo. Arirakano he tawara kupa kára peraka urakan, aporo hinamomo kairaka fofaraka, arirakano aporo hinamo hauaka kekepoa risiamo soko, kairaka kára fofaraka himu fahokoso.

<sup>26</sup> Arirakano hauaka sua makata haku fasereperakano aporo hinamomo aseraka kára fofaraka namoraka hamisisiraka ku peakosapo. Arirakano Hepene yapura makata kára risiane soko mahohohokoso.

<sup>27</sup> Maiya amo aporo hinamo ipu aseane Aporomanomo Táke anoane pariperaka, ti pakaea wakapuyaki faesayaki perakano aseakosapo.

<sup>28</sup> Asiamo nōmo makata someraka one kepomarekea fasereperakano, ereketaeraka risike mapiraraka asekeea risikianie. Re mafasikia pasimokoakosa maiyane makerakanapo." Aiyaka Yasumo somesapo.

*Ira fokeane Yasumo takumeaka somesane oyapo.*  
*Matiu 24:32-35; Maka 13:28-31*

<sup>29</sup> Aporo hakāsa puraki Yasumo takumeaka someraka, "Ira foke soko ira suane asekeea hemakapunie.

<sup>30</sup> Ira kuane konokoarakano repo asekeea someraka, 'Kupa kakako makerakanapo.' Aiyaka repo somerapo.

<sup>31</sup> Repo ira ku konokoasa asera aiyáka, nōmo aiyakakosaposane kepomarekea fasereperakano, repo asekeea hemakapuraka, 'Kotimo unihaeaka rekeakosa maiyane makerakanapo.' Aiyaka hemakapunie.

<sup>32</sup> Hao, kaisie. Nōmo reaki kakaro somerakaripo. Aporo hinamo maiya hakāsa yiamo hokono murisiane i kukusiraka, nōmo makata aiyakakosaposane kepomarekea fasereperakano, ipu yaiya kakaro aseakosapo.

<sup>33</sup> Arirakano ti yapurane soko, hauaka one soko, keseke fahokosapo. Arirakano nōmo someane fahokosafapo." Aiyaka Yasumo somesapo.

*"Ano foaka perakarihoamo repo kau risikianie." Aiyaka Yasumo somesane oyapo.*

<sup>34</sup> Yasumo someraka, "Repo hasakanapaka asekeanie. Repo makata nako fitiraka, he watikisa nekea, hauaka wo makata aki kára hemakapukua, aiyáka risikiakopo. Watikiaka risikiakopo. Ano peakosa maiya amo ano foaka peakosapo.

<sup>35</sup> Asiamo makata kakayia kakinumo foaka arura aiyáka, hauaka sua aporo hinamo suane hukuarura maiya amo, foaka aiyakakosapo.

<sup>36</sup> Aiyakakosa maiya ane himetenapaka hemakapukua risikianie. Re kára wakakopo. Makata umisa perakano, wakapuaka risikiako kurikuriraka risikianie. Aporomanomo Tákeane anopo. Ano rea hikumisi nenemea re namonafaraka kaiyanafaraka mapiraraka risikiako maiya suamo kurikurihoanie." Aiyaka Yasumo somesapo.

<sup>37</sup> Maýamo Kotimo apea Yasumo some kaka, ereamo ūri Orofea hikia reapo.

<sup>38</sup> Mituru fiarakano Kotimo apea paripuraka aporo hinamo suamo Yasumo someane kaiyako perakano epo some kasapo. Aiyáka sere suamo kaiyako perakano Yasumo some kasapo.

## 22

*"Yasu kukusimo waseremakosapo." Aiyaka somesane oyapo.*

*Matiu 26:1-5; Maka 14:1-2; Yone 11:45-53*

<sup>1</sup> Ape Farimaresa Hemakapuko Hokono Keraka, Yu aporo hinamomo Farawa Piriana-fononane paikia nesapo. Hokono akera maiya ane makerakano

<sup>2</sup> pirisiti aporo káramo soko, Kotimo somemané tisa aporomo soko, ipu hemakapuraka, "Yasu mayiáka rusua kukusare?" Aiyaka ipu hemakapuraka, aporo hinamo su sarimasane aseraka i namoraka risiapo.

*Yutasemo Yasu parakehokosapo, aisane oyapo.*

*Matiu 26:14-16; Maka 14:10-11*

<sup>3</sup> Aporo hakāsa pura hakāsa meta yano motosa Yutase Isekeriopo. Yutase Isekerio ane Satanemo e ho marakano asekeea, e pukua

<sup>4</sup> pirisiti aporo kára soko, Kotimo ape asekeea risira Yu aporo terakaiyamosa satini soko, i risiakipoko epo someraka, "Yasu ane nōmo uyaka parakehokosapo."

<sup>5</sup> Airakano ipu kaikia seseraka someraka, "Parakehoasimo isiapo neaki mone kakakosapo."

<sup>6</sup> Airakano epo aosapo. Epo hemakapuraka, "Aporo hinamo su pukua fasakipoko Yasuane nōmo parakehokosapo." Aiyaka hemakapuraka parakehokosa ikia karane kosapo.

*Ape Farimaresa Hemakapuko Hokono Akeramo makata nakosakipoko Yasu ipu aporo hakāsa purayaki sarimasane oyapo.*

*Matiu 26:17-25; Maka 14:12-21; Yone 13:21-30*

<sup>7</sup> Farawa Pirianafonona paikia anena maiya amo Yu aporomo saro sipi mano rurapo.

<sup>8</sup> Maiya amo Yasumo Pitape Yone tetákí someraka, "Ape Farimaresa Hemakapuko Hokono Keraka, isiapo makata nakosane tetápó sarimaraka taehoanie."

<sup>9</sup> Airakano tetápó someraka, "Ape ma sarimaraka taehokosare?"

<sup>10</sup> Airakano Yasumo someraka, "Teto Yarusarame sitia pusie. Pukua aseane aporo metamo he petoroa takamaka makatiraka maka perakano tetápó sapenakosapo. E

sapenekea purakano tetápo kekemarape punie. Pukua e apea yorokoa purakano, teto soko apea yorokoa pukua, tetápo

<sup>11</sup> ape wafayaki someraka, 'Tisamo someaka maresane oyapo. Ape Farimaresa Hemakapuko Hokono Keakosakipoko nōmo aporo hakāsa purayaki sarimaraka, ape kakaru sape ma sarimaraka makata nakosare? Aporo kimisi pesa akipoko ape rumu mayare?'

<sup>12</sup> Airakano ape wafayaki, teto ape huturua karikia hikia, ape rumu kára tarikosapo. Apea sea soko, teporo soko, toane tarikosapo. Tarirakano ape á tetápo makata nakosa sarimaraka taehoanie,' aisapo.

<sup>13</sup> Asiamo Yasumo someaka marerakano tetá pukua, apea pauraka Yasumo ayiakakosapo aisane yaiya rakirakano asesapo. Aseraka hokono keakosakipoko makata nakosa sarimasapo.

<sup>14</sup> Sarimarakano keseke maiya tuakeramo Yasu soko ipi aporo hakāsa pura soko, ape á pekea, teporoa makeraka sea á sú sarimaraka toapo.

*Yasumo ipi aporo hakāsa puraki farawa soko waene he soko kasane oyapo.*

*Matiu 26:26-30; Maka 14:22-26; 1 Korini 11:23-25*

<sup>15</sup> Arirakano i makata nenaka toa maiya amo, Yasumo iaki someraka, "Ano kau teraka himu nakosane, nasiraka honoko keraka isina hakāsa toke makata nenaka seserakanapo.

<sup>16</sup> Ape Farimaresa Hemakapuko Hokono Keraka makata nakosane nōmo efera hunia hauaka wo honoko keakosafapo. Koti unihaeaka rea hauaka á honoko akera maiya amo, honoko kera kepoane repo kakaro hemakapukua nakosapo." Aisapo.

<sup>17</sup> Asiamo waene heane kapoa takamasane, Yasumo maka Kotiaki suseaka rumaraka aporoaki someraka, "Kapo he one masie. Maka repo fete feteaka nesie."

<sup>18</sup> Waene heane hauaka wo nōmo efera hunia nakosafapo. Koti unihaeaka reamo hauaka á nakosapo."

<sup>19</sup> Aiyaka Yasumo farawa maka Kotiaki suseraka faraka, farawa mosoraka aporo hakāsa puraki kaka someraka, "One ano kaupo. Repoko ano kau kakakosapo. Ano kukusane hemakapuko nesie." Aiyaka Yasumo somesapo.

<sup>20</sup> I toke makata nekea faraka, Yasumo kapoane maka reke someraka, "Aporomanoaki Kotimo some kawe someaka marakanapo. Someaka marane aporo hinamo suamo kaki-maka kekemahoanie. Asiamo Kotimo aporo hinamo suane arareraka mafasiakosakipoko, ano kuraka ano yapi pukusapo. Ano yapi purakano repo aseraka hemakapuraka, 'Kotimo someaka masane ayiáne,' aiyaka hemakapunie.

<sup>21</sup> Asiane ano parakehokosa aporoane anoyaki hakāsa teporoa kakenapo.

<sup>22</sup> Arirakano Aporomanomo Tákeane anopo. Ano ayiakakosane wate fana Kotimo someaka maresapo. Someaka maresasamo hakāsa yine ayiakakosapo. Uao. Ano parakeana aporoane enahoasifareapo."

<sup>23</sup> Airakano ipu namina susu someraka, "Isu hakāsa meta epamo eane parakehokosare?" Aiyaka namina susu me rukua somesapo.

*"Ano fanapo," aiyaka Yasumo ipi aporo hakāsa puramo tafatafasane oyapo.*

*Matiu 20:24-28; 19:28; Maka 10:41-45*

<sup>24</sup> Yasumo ipi aporo hakāsa puramo namina tafatafaraka someraka, "Isu aporo arisia one epa fanare?" Airakano aporo metamo someraka, "Ano fanapo." Airakano aporo metamo someraka, "Wae, né fanafapo. Ano fanapo," aiyaka tafatafasapo.

<sup>25</sup> Tafatafarakano, Yasumo iaki someraka, "Yu aporo hoanafonosa ipu namina aporo unihaeemo kára masamasarapo. Masamasarakano unihaeaki ipu someraka, 'Aporo hinamo ararenane éreapo,' airapo.

<sup>26</sup> Asiamo repo ayiáka masamasahokopo. Ne fanaraka unihaeureka reane hokosa raua pariraka rekeanie. Né káraraka reane aporo raipa pariraka rekeanie.

<sup>27</sup> Aporo fanane epare? E teporo makeraka kayane fanare? Airakano epo makata nakosa paikia mokoa pekea teporoa taesa aporoane fanare? Repo hemakapuraka, 'E teporoa makeraka kayane fanapo,' repo airapo. Asiane ano reyaki reke makata rakiraka rekenapo.

<sup>28</sup> Ano kau aseakosakipoko mokoatikirakano, repo ano metakarisiafapo. Anoyaki hakāsa yaiya risikinapo.

<sup>29</sup> Nōmo unihaeaka asekea rekeasimo, nōmo Atamo ano murikimasa ayiáka, re unihaeaka asekea risikiasimo, nōmo re murikimarakanapo.

<sup>30</sup> Murikimaka ano unihaeaka rea hauaka á nōmo reakí someraka, 'Makata nakosa soko, he soko, nasimo nōmo teporo makeraka toae. Isiraya aporo ira kenosu makata hukurura kepo kaira aporomo rakira ayiáka repo rakisimo aporo hokopusuamo sea toae.' Nōmo aihokosapo. Makata hukurura kepo kaira aporomo rakira ayiáka repo rakisimo pipu murikimarakanapo." Aiyaka Yasumo ipi aporo hakāsa pura keno suaki somesapo.

*"Yasu nōmo aserafapo." Aiyaka Pitamo somehokosane Yasumo somesane oyapo.  
Matiu 26:31-35; Maka 14:27-31; Yone 13:36-38*

<sup>31</sup> Yasumo someraka, "Saemoneo, Saemoneo, kaisie. Hemo wafayamo witi hae tu-mosane kau kikisiraka haku taeraka, namoane kikisiraka haku taena ayiáka Satanemo re kau aseakosakipoko epo ayiáka rakiakosapo.

<sup>32</sup> Asiane rakiakorakanepoko nōmo kurikurisapo. Anoaki soko, Kotiaki soko, nōmo yaiya himu hakásaraka hemakapusimo nōmo kurikurisapo. Nōmo ano metakarikia, efera hunia rekeako parihokosapo. Rekeako pariraka ní maemo amo koteaka hemakapusimo ararehoanie."

<sup>33</sup> Airakano Pitamo Yasuaki someraka "Né tipura purakano, ano soko neyaki hakāsa tipura pukusapo. Né kurakano, ano soko neyaki hakāsa kukusapo."

<sup>34</sup> Airakano Yasumo someraka, "Nōmo kakaro somerakaripo. Kokoroko mehoasiraka nōmo yape isiamo 'Yasu nōmo aserafapo,' aihokosapo." Aiyaka Yasumo somesapo.

*Makata umisa faserepeakosane Yasumo somesane oyapo.*

<sup>35</sup> Yasumo aporo hakāsa pura keno suaki someraka, "Fana nōmo reaki someraka, 'Pausi soko, ku soko, tamaka soko metakarikia pusie.' Airakano re pusua sereamo makata su siasare? Makata meta fesenosare?" Airakano ipu someraka, "Wae, makata su siasapo."

<sup>36</sup> Airakano Yasumo someraka, "Pipi yumo re puraka pausi kakeno maka punie. Ku soko maka punie. Poke fasenkeno pasu roporaka mone masamo poke ropohoanie."

<sup>37</sup> Asiamo Kotimo sawia anoane popasane kakaro ayiakakosapo. Aiyaka popasane oyapo. 'Aporo watikisa rusua kurakano ano iyaki hakāsa rusua kukusapo.' Aiyaka popasane pipu ayiakakosapo." (*Aisaia 53:12*)

<sup>38</sup> Airakano aporo hakāsa puramo someraka, "Unihaeo, asesie. Poke tetu kakenapo." Airakano Yasumo someraka "Siareapo," aisapo.

*Kesemane hauaka á Yasumo kurikurisane oyapo.*

*Matiu 26:36-46; Maka 14:32-42*

<sup>39</sup> Apeane Yasumo metakarikia, ūri Orofea hisiapo. Á ipi hikianasamo aporo hakāsa pura soko, e kekemarape hisiapo.

<sup>40</sup> Hikia hauaka á pauraka, Yasumo iaki someraka, "Re kau aseakosa makata umisa fasereperakanane, kekemaraka watikiaka rakipe purapaka kurikurihoanie," aisapo.

<sup>41</sup> Asiamo aporomo wakasema yamenoa eke makasuna ayiáka, Yasu wakasema yamenoa pukua, kakuna porokoa kake kurikuriraka,

<sup>42</sup> "Atao, nōmo anoaki makata umisa maresapo. Makata umisa metakariakosane siasekenone, nōmo metakarisie. Asiamo nōmo hemakapusuane ayiakakopo. Nōmo hemakapusuane ayiakanie."

<sup>43</sup> Aiyaka kurikuriraka rekeno, hepene aporo pekeea Yasuane wakapu kaka maresapo.

<sup>44</sup> Wakapu kaka marerakanano, Yasu ipi himu kára nekea kára kurikuriraka, ipi kaua kikipu apura ayiáka yapi pusuapo. Yapi pukua hauaka hurupesapo.

<sup>45</sup> Arirakano kurikuriraka faraka Yasu takahikia aporo hakāsa pura toakipoko peraka aseane, i himu nekea wakakesekeno asesapo.

<sup>46</sup> Asekeia i maturikia someraka, "Marirakano re waka kerakanare? Turikia tarikia re kau aseakosakipoko makata watikiaka rakirapaka kurikurisapo." Aiyaka Yasumo somesapo.

*Yasu waseremasane oyapo.*

*Matiu 26:47-56; Maka 14:43-50; Yone 18:3-11*

<sup>47</sup> Arirakano Yasumo somesa maiya yiamo aseane, Yasumo ipi aporo hakāsa pura aporo hakāsa meta yano motosa Yutasemo aporo yakai karikia, Yutase ipi fanaraka perakanoso. Pekeea Yasuane makanurakorakanano

<sup>48</sup> Yasumo someraka, "Yutaseo, nōmo ano parakehoko makanurakanare?"

<sup>49</sup> Airakano aporo hakāsa puramo makata fasere peakosane hemakapukua someraka, "Unihaeo, isiaapo ferepemo ruaere?"

<sup>50</sup> Aiyaka aporo hakāsa pura metamo ferepe teaka maka, pirisiti aporo fanamo ipi aporo raipa senaki tumuru takuane, ferepemo rukusakaretapisiapo.

<sup>51</sup> Rukusakaretapirakanano Yasumo someraka, "Ayiakakopo." Aiyaka Yasumo aporo raipane senaki sakairaka mafasapo.

<sup>52</sup> Mafaraka aseane pirisiti aporo kára soko, Kotimo apeane asekeia risia aporo terakaiyamosa soko, Yu aporo sisima soko e waseremako perakanoso asekeia Yasumo iaki someraka, "Repo ferepe mokoa, poke mokoa aperane, repo ano aporo hakimara-sekeno asekeia waseremako perakanare?"

<sup>53</sup> Sere káramo Kotimo apea ano reke somerakano repo ano waseremasafapo. Asiane yumo ere susuamo suaka taeraka reke, repo makata watikiaka rakiakosa maiyane fasere apera oyareapo." Aiyaka Yasumo somesapo.

*Pitamo someraka "Yasu ane nōmo aserafapo," aiyaka kotafe somesane oyapo.  
Matiu 26:57-58, 69-75; Maka 14:53-54, 66-72; Yone 18:12-18, 25-27*

<sup>54</sup> Aporo yakai pesamo Yasu waseremaka pirisiti aporo fanamo ipi apea karikia pusuapo. Karikia purakano Pita kesekeka kekemarape pusuapo.

<sup>55</sup> Kekemarape pukua pirisiti aporo fanamo apea pauraka hauaka moro tipia aporomo ira paikia haraka toakipóko Pita pekea iyaki hakasa kayapo.

<sup>56</sup> Ira paisia rufiraka faerakan aseane, Pita kakeno hinamo raipa metamo hi susuamo koteaka asekeea takekeia someraka, "Aporoane soko Yasuyaki hakāsa purapo."

<sup>57</sup> Airakano Pitamo someraka, "Wae, hinamo neo, Yasuane nōmo aserafapo."

<sup>58</sup> Airakano asekeea wakasema tuina, aporo metamo Pita asekeea someraka, "Yasumo aporo hakāsa pura meta nepo." Airakano Pitamo someraka, "Wae, anofapo. Eane nōmo aserafapo," aisapo.

<sup>59</sup> Aiyaka wakasema tuina wane awa farakano, aporo metamo Pita asekeea someraka, "Aporoane fana Yasuyaki hakāsa pusuapo. E Yasumo aporo hakāsa purareapo. Namo kakaripo. E Kariri aporopo."

<sup>60</sup> Airakano Pitamo someraka "Wae, ape neo, nōmo somerakane ano himeteripo." Aiyaka somehowa maiya yiamo, kokoroko mesapo.

<sup>61</sup> Kokoroko merakano, Unihae Yasumo pariaseraka Pitane hi susuamo asesapo. Aserakan, ipi somesane Pitamo hemakapusuapo. Hemakapuraka, "Pipu kokoroko mehoasiraka nōmo ano aserafapo, aihokosapo," aisane Pitamo hemakapusuapo.

<sup>62</sup> Ayíáka hemakapuraka Pita ipi takahikia pukua himu kára nekea kára hiripusapo.

*Yasuane mainamarekea rusuane oyapo.*

*Matiu 26:67-68; Maka 14:65*

<sup>63</sup> Arirakano Kotimo ape asekeea risia aporo terakaiyamosa metakiramo Yasu mainamarekea rusuapo.

<sup>64</sup> Rukua Yasu hia pasumo taporaka someraka, "Ne epamo rurakarire? Porofete aporomo makata asekeeanafonosane somerapo. Somera ayíáka, nōmo soko ayíáka somesie."

<sup>65</sup> Aiyaka Yasuaki some watikisa metakira soko someraka, e mokoatikisapo.

*Aporo sarimaraka risia a Yasu karikia pusuane oyapo.*

*Matiu 26:59-66; Maka 14:55-64; Yone 18:19-24*

<sup>66</sup> Mituru fiarakano Yu aporo sisima soko, pirisiti aporo kára soko, Kotimo somemane tisa aporo soko, namina sarimasa ape á Yasu karikia pusuapo.

<sup>67</sup> Karikia pukua ipu someraka, "Unihae máfaraka maresa Keresoane nere? Nōmo hufitaeraka somesie." Airakano Yasumo someraka, "Nōmo reaki somehokosapoko asiane, repo kakimakasifareapo.

<sup>68</sup> Nōmo reaki makata akai kairakanone, repo anoaki some sia paripeasifareapo.

<sup>69</sup> Pipu kepomarekea pukua, keseke Aporomanomo Táke anoane Koti Káramo hokono tumuru takua kakeno, repo aseakosapo."

<sup>70</sup> Airakano ipu someraka, "Kotimo hokosane nere?" Airakano epo someraka "Repo namina someraka ayapo."

<sup>71</sup> Airakano ipu someraka, "E hukuruko aporo meta peaehokosafapo. Epo ipi yiamo Koti mawakasemarako somerakano isiapo kairakaripo." Aisapo.

## 23

*Pairate rea Yasu karikia pusuane oyapo.*

*Matiu 27:1-2, 11-14; Maka 15:1-5; Yone 18:28-38*

<sup>1</sup> Aporo su sarimasane takahihiraka Pairate rea Yasuane karikia pusuapo.

<sup>2</sup> Karikia pukua Pairate rea pauraka Yasuane hukurukua someraka, "Isiapo Yu aporomo hasaka rakismo Yasumo kirimasapo. Epo isu kirimaraka some kasane oyapo. 'Kamani unihae Sisika takese mone kakakopo. Ano Unihaepo. Ano Keresopo.' Aiyaka epo somerakasupo."

<sup>3</sup> Airakano Pairatemo Yasuaki someraka "Yu aporomo unihaeane nere?" Airakano Yasumo someraka "Nōmo ní someraka ayapo."

<sup>4</sup> Airakano Pairatemo pirisiti aporo káraki soko, aporo hinamo yakai su sarimasa iaki soko someraka, "Aporoamo makata watikiaka rakisía nōmo hemakapurakarifapo."

<sup>5</sup> Airakano ipu wakapuaka someraka, "Yutía hauaka soko, Kariri hauaka soko, epo hauaka wo soko, aporo hinamo suamo Rome kamaniaki sapera ka weasimo kirimarakaraka somerakasupo. Epo someane aporo hinamo suamo kaikia, Rome kamaniaki mahisiraka rukumarekeea risiapo." Aiyaka kotafe topakamaraka Yasuane hukurusuapo.

*Herote rea Yasu karikia pusuane oyapo.*

<sup>6</sup> Aporo su sarimasamo someane Pairatemo kairaka someraka "Aporoane Kariri aporore?" Airakano ipu suamo aosapo.

<sup>7</sup> Aorakano Pairatemo someraka, "Kariri hauakane nōmo asekea rekenafapo. Herotemo asekea rekenapo. Herote rea karikia pusie." Airakano Herote Yarusarame sitia kimisi pekea reakipoko, Yasu karikia á pusuapo.

<sup>8</sup> Asiamo fana Yasu Kariri hauaka rea maiya amo, epo makata rakisiane Herotemo kairaka hemakapuraka, "Yasumo wakapumo hemakapukua rakirane asekakripo." Aiyaka Herotemo hemakapuraka reakipoko, e rea Yasu karikia perakano Yasuane Herotemo aseraka sesesapo.

<sup>9</sup> Arirakano Yasuaki Herotemo hunia kaikia, efera hunia soko kaikia, ayiane Yasumo makata meta somesafapo.

<sup>10</sup> Somehoanafonoraka me kauraka rekeno, pirisiti aporo kára soko Kotimo somemane tisa aporo soko i makeraka risiomo Yasuaki memo irirarakaka hukurusuapo.

<sup>11</sup> Hukururakan Herotemo soko ipi aporo terakaiyamosamo soko Yasuane mainamarera ka kearaka, Yasuane pasu kára kotesane osoraka marekeea someraka, "Pairate rea paripusie," aisapo.

<sup>12</sup> Aisa sereamo, Herotepe Pairate tati moresapo. Fana tati mahisiraka risiane sereamo, mahisiraka risiane faraka tati moresapo.

*"Yasu rusua kukunie," aisane oyapo.*

*Matiu 27:15-26; Maka 15:6-15; Yone 18:39-19:16*

<sup>13</sup> Pairatemo someraka, "Re aporo su peae. Pirisiti aporo soko aporo kára soko re su peae." Aiyaka aporo su Pairete kayakipoko pekea sarimarakano

<sup>14</sup> Pairatemo someraka, "Repo fana aporoane karikia pekea someraka, 'Isiapo watikiaka rakisiane epo tarirapo.' Aiyaka repo hukururakan nōmo eaki hunia soko, hunia soko, kaisiapo. Re risiakipoko re hikumisi yia Yasu pekea rekeno, nōmo eaki kaisiapo. Kaiyiáne repo somesa ayiáka, epo rakisiafapo. Aiyaka nōmo hemakapurakaripo.

<sup>15</sup> Herotemo soko someraka, 'E karikia paripusie.' Aisasamo Yasumo makata watikiaka rakisiane Herotemo asesafapo. Asiamo Yasuane rusua kuane siahoasifareapo. E rusua kukusapo airakane, epo makata meta watikiaka rakisiafapo.

<sup>16</sup> Asiamo sako patesamo e rukua farakano, e nōmo tonotaehokosapo."

<sup>17-19</sup> Aiyaka Pairatemo somerakano, aporo suamo someraka, "Wae, e kukusimo runie. Parápase tonotaehoanie," aisapo. Aihoasiraka fana aporo suamo weasimo Parápasesmo kirimasapo. Epo aporo meta rusua kusuapo. Rusua kurakano, Parápase tipura makesapo. Arirakano Ape Farimaresa Hemakapuko Hokono Akera maiya amo, aporo tipura kesane hakásá tonotaenapo. Ainasasamo Parápase tonotaehoasimo, aporo suamo Parápase yano hokoa wásapo.

<sup>20</sup> Yano hokoa warakano, Pairatemo Yasuane tonotaehokosakipoko hemakapukua, efera hunia aporo hinamo suaki somerakano,

<sup>21</sup> ipu suamo someraka, "Wae, Yasu ira matopesa paremarekeea rusua kukunie. Ira matopesa paremarekeea rusua kukunie," aisapo.

<sup>22</sup> Airakano efera hunia yape isiammo Pairatemo aporo hinamo suaki someraka, "Mari-rakan e rusua kukunie, airakanare? E rusua kukunie airakane, epo watikiaka rakisiafapo. E rusua kuane siahoasifareapo. E kamaka nena yia rurakano eane nōmo tonotaehokosapo," aisapo.

<sup>23</sup> Airakano aporo hinamo suamo sakepamo wakapuaka someraka, "E ira matopesa paremarekeea rusua kukunie. Metakariakopo." Aiyaka Pairatemo someane ipu rukutopakatapikia namina someane hákasa wakapusapo.

<sup>24</sup> Wakapurakano ipu namina hemakapusua ayiakasimo Pairatemo aporoaki someraka, "Yasu rusua kukunie."

<sup>25</sup> Parápasesmo aporo suamo weasimo kirimarakaraka, aporo meta rusua kurakano asekea, e tipura makesane tonotaerasie. Yasu karikia punie. Repo namina Yasu rusua kuku-niesasamo, nōmo aporo terakaiyamosaki Yasu rusua kukunie, airakanapo." Aiyaka Pairatemo somesapo.

*Yasu ira matopesa paremaresane oyapo.*

*Matiu 27:32-44; Maka 15:21-32; Yone 19:17-27*

<sup>26</sup> Rome aporo terakaiyamosamo Yasu karikia, ikia otoa puraka risiakipoko, aporo hauaka meta, Sairíni aporo yano motosa Saemone, yao aeyaka ikia otoa perakano asekeea, Yasumo ira matopesane epo maka pusimo makatiraka maresapo. Makatiraka marerakano Saemonemo ira matopesane makatiraka Yasu patera pusuapo.

<sup>27</sup> Saemone patera aporo hinamo yakai pusuapo. Puraka hinamo metakiramo Yasupoko hihiripurape pusuapo.

<sup>28</sup> Hihiripurape perakano, Yasu rekeako pariraka aseraka iaki someraka, "Yarusarame hinamo reo, anopoko hihiripuhokopo. Re naminapoko hihiripuhoanie. Repo hokosapoko hihiripuhoanie."

<sup>29</sup> Asiamo keseke mokoatikina maiya amo faserepeakosapo. Maiya amo hinamo hokosa kiri kaiyiane teketakarikia puko ayiane hokosa kirimo nekenekeraka sia teketakarikia pukusafapo. Maiya amo aporo hinamomo someraka, 'Hinamo manokonomosa seseaka tokenapo. Hinamo hokosa hokono mareanafonosane seseaka tokenapo. Namina sia teketarikia pukusapo,' aihokosapo.

<sup>30</sup> Sere amo watikihokosa maiya fasereperakano aporo hinamomo kakaro kára namoraka ūriaki someraka, 'Uri nómō isu mātairasie.' Aiyaka ūri feteaki soko someraka, 'Isu mokosekehoanie.' Aiyaka keseke mokoatikina maiya ane fasere aperamo repo aihokosapo.

*(Hosea 10:8)*

<sup>31</sup> Arirakano ira hitafe pateraka pairakano\* ira porasane mayiakakosare?" Aiyaka Yasumo somesapo.

<sup>32</sup> Someaka farakano aporo wera tetá Yasuyaki hakāsa ira matopesa paremareasimo karikia pusuapo.

<sup>33</sup> Karikia pukua hauaka yano motosa Uni Kiki hauaka á pauraka, Yasuane ira matopesa paremareasapo. Aporo tetáne soko ira matopesa paremarekea, meta Yasu hokono kasakai takua maporaka, meta Yasu hokono tumuru takua maposapo. Maporaka Yasuane tipia ira matopesa paremarekea maposapo.

<sup>34</sup> Maporakano Yasumo someraka, "Atao, pipu ipu makata arakira one ipu koteaka hemakapurakarifapo. Ipu himeteraka arakire." I himu watikiaka arakirane nómō mafahoanie." Aiyaka Yasumo somesapo. Arirakano Yasumo pasuane mokoakosakipoko ipu kase asia enasapo.

<sup>35</sup> Arirakano aporo hinamo suamo asekeea risiapo. Asekeea risike Yu aporo káramo hokomarekea someraka, "Epo aporo hinamo metakira araresapo. Kotimo e máfaraka Unihae Kereso murikimasa satiki, epo ipi yia ararehoafunureapo. Ira matopesa metakarikia o peafunureapo."

<sup>36</sup> Airakano aporo terakaiyamosamo e mainamareraka he kísa karakáno Yasumo ne-safapo.

<sup>37</sup> Nanafononakano namina someraka, "Ne Yu aporomo unihaeseenone ira matope-sane metakarikia o peae," aisapo.

<sup>38</sup> Arirakano Yasu unia kima yapura ira tumusakipoko poparaka paremareasapo. Poparaka paremareasane oyapo. "Yu aporomo unihaeane epo." Aiyaka poparaka pare-maresapo.

<sup>39</sup> Arirakano somemane koareaena aporo meta ira paremeresa amo Yasuaki mokoatikiraka someraka, "Unihae Kereso máfaraka maresane nere? Ne ni yia arareraka mafasisie. Eto soko nómō arareraka mafasisie," aisapo.

<sup>40</sup> Aisa aporoaki aporo meta ira paremeresa amo someraka, "Nómō Kotiaki namoraka hemakapurakarifapo. Yasu fanasina ayíáka eto soko fanasirakanapo.

<sup>41</sup> Eto kuane siareapo. Etapo fana watikiaka risiasamo ropo kuane siahosaireapo. Arirakano Yasumo makata watikiaka rakisiafapo. Epo watikiaka rakianafonosasamo e kuane siahosifareapo."

<sup>42</sup> Aiyaka epo Yasuaki someraka, "Yasuo, né unihaeaka rea maiya amo nómō ano hemakapunie."

<sup>43</sup> Airakano Yasumo someraka, "Ao, né anoyaki hakāsa pipu ape kotesa á rekeakosapo," aisapo.

*Yasu kusuane oyapo.*

*Matiu 27:45-56; Maka 15:33-41; Yone 19:28-30*

<sup>44</sup> Hauaka sua sere maiya tuaro korokomo (12) kepomarekea eresapo. Ereraka reane samapu maiya isiamo faesapo.

\* <sup>23:31:</sup> Takume kepoane oyapo. Koteaka rera aporo anoane mokoatikirakano, watikiaka risira aporoane maiyakakosare?

<sup>45</sup> Sere maiya faehoanafonorakano, Kotimo apea pasu waremaresane yapunaka koarape atura pusuapo. Koarape pukua taku haku, taku hakusapo.

<sup>46</sup> Arirakano Yasumo wáraka, "Atao, ano ho nómó masie," aíyaka ipi kusuapo.

<sup>47</sup> Kusua maiya amo aporo terakaiyamosa satinimo aseraka Kotiaki kekereraka someraka, "Aporo kusuane kakaro kotesapo. E aporo kárapo."

<sup>48-49</sup> Airakano Yasu patera asesa aporomo soko, Kariri hinamomo soko, wakasema yameno aeyaka risike asesapo. Yasu ira matopesa paremaresane aporo hinamo suamo asekeea faraka apea poparipuraka, aporo hinamo suamo namina káwa ruraka, "Isu mahisiripo. Isu himu nenakaripo." Aiyaka namina apea poparipuraka káwa rupe pusuapo.

*Yasu kunikia motosane oyapo.*

*Matiu 27:57-61; Maka 15:42-47; Yone 19:38-42*

<sup>50-51</sup> Yu aporomo taone hakásá meta yano motosa Arimatíapo. Arimatía aporo Yosefe ipi Fere se aporoyaki, Kotimo somemane tisa aporoyaki hakásá sarimarakaraka rakisiapo. Rakiraka e ereketaeraka koteaka susu reke,

<sup>52</sup> aporo metakiramo Yasu rusua kukusane me rurakano epo waesapo. Kakaro rusua kurakano soko, epo waesapo. Aporoane Kotimo unihaeaka asekeea rekeakosa maiya ane faserepeasimo, Yosefe kau reapo. Yosefeane Paireat rea pukua Pairateaki someraka, "Yasu kusuane kunikia motoako nómó maka puaere?"

<sup>53</sup> Airakano Pairatemo aosapo. Aorakano Yosefe pukua Yasu kusuane fatarimaka, pasu pakae kotesamo Yasuane taporaka, maka pukua kunikia fana rasa á Yasu motosapo. Kunikia á aporo meta fana kusuane motosafapo.

<sup>54</sup> Yasu kusua kunikia motosa maiya ane aporo hinamomo makata sarimana maiyamo<sup>†</sup> éane motosapo. Sarimana maiya faraka maiya tuakeramo fenena maiya kepomaresapo.

<sup>55</sup> Arirakano Kariri hinamo Yasuyaki hakásá pesamo, Yasu ira paramaresa kusuane, Yosefemo fatarimaka pukua kunikia motorakano, hinamo ipu soko aseko, Yosefeyaki hakásá pusuapo. Pukua Yasu kunikia motorakano asekeea

<sup>56</sup> namina apea poparipukua wera wape yamona soko, pauta asia soko, Yasu kaua payiyakosakipoko sarimasapo. Sarimarakaraka pukusakipoko asiane ereraka maiya fasapo. Asiamon fenena maiya paurakano makata rakiako asiane metakarikia fenesapo. Kotimo somemane motoraka fenena maiya amo fenanie, aisasamo i fenesapo.

## 24

*Yasu maturikia taesane oyapo.*

*Matiu 28:1-10; Maka 16:1-8; Yone 20:1-10*

<sup>1</sup> Yatipinumo\* mituru yao kawe fierakano, hinamomo Yasu kunikia motosane aseko puraka, pauta asia sarimasane mokoa pukua, kunikia pauraka

<sup>2</sup> aseane, eke tafea kunikia ikia koroa mapirisiane kepere mafeasekeno asekeea,

<sup>3</sup> kunikia kakarua yorokoa pukua aseane, Yasu kunikia motosane fasakeno asesapo.

<sup>4</sup> Fasekeno asekeea mahimeteraka asekeea risike, aseane aporo tetá pasu pakaesa ho piakaepiakaesa ososane fasereperakano asekeea,

<sup>5</sup> hinamo i namoraka arupepesapo. Arupeperaka risikino aporo tetapó someraka, "Aporo hitafe reane marirakan aporo kusua taena kunikia aseko perakanare?

<sup>6</sup> E o rekerifapo. E maturikia taerakano pusuapo. Fana e Kariri hauaka koraka rea maiya amo, e ipi kukua turikia pukusapo, aíyaka somesane hemakapunie.

<sup>7</sup> Asiamon epo somesane oyapo. Aporo watikasaki e karakáno, e ira matopesa paremareka kurakano, maka pukua kunikia motosane, sere tetámo wanina isiamon turikia pukusapo. Aisane hemakapunie."

<sup>8</sup> Aíyaka tetapó somerakanon hinamo ipu hemakapuaso.

<sup>9</sup> Aíyaka ipu hemakapuraka kunikia metakarikia poparipuraka, aporo tetá amo somesane, aporo kinu suaki soko, aporo metakiraki soko, somesapo.

<sup>10</sup> Arirakano hinamoane meta Makatara hinamo Mariapo. Arirakano meta Yoánapo. Arirakano meta Yamesemo kályia Mariapo. Ipu soko, hinamo metakiramo soko, aporo hakásá pura kinu suaki somesapo.

<sup>11</sup> Aíyaka somerakanon aporoamo hemakapuraka, "Some koaka murikia kotafe someraka." Aíyaka hemakapukua hinamo ipu someane kakimasafapo.

<sup>12</sup> Arirakano Pita takahikia kunikia aseko foaka pusuapo. Pukua kunikia kakarua weaka aseane, Yasu pasumo taporaka motosane pasu hakásá yia kake, Yasu fasekeno

<sup>†</sup> **23:54:** Ape Farimaresa Hemakapuko Hokono Keakosakipoko pipu makata sarimahokosapo. Aíyaka sereane sarimana maiyapo aisapo. \* **24:1:** Yasu turikia pusua maiya amo, sokó kepomareka menoraka, sere yatipinuanne sere kárapo, aíyaka Keresoa paosa aporomo hemakapuaso.

asesapo. Fasekeno asekeea Pita apea paripuraka, ikia otoa hemakapupe pusuapo. "Yasu masiarakapo," aíyaka hemakapupe pusuapo.

*Emease apea aporo tetá pusuane oyapo.*

*Maka 16:12-13*

<sup>13</sup> Sere hakásá yíamo aporo tetá Emease apea pusuapo. Arirakano apeane Yarusarame sitiane wakasema yamenopo.

<sup>14</sup> Yamenosakipoko tetá puraka, makata asesane tetapō tati susu somepe pusuapo.

<sup>15</sup> Somepe purakano asekeea, Yasu ikia otoa faserepekeea namina hakásá pusuapo.

<sup>16</sup> Puraka aporo tetá amo Yasuane himetesapo.

<sup>17</sup> Himeterakano Yasumo tetáki someraka, "Tetápo somepe apurane makata yakapa somerakanare?" Airakano aporo tetáne fenekeea risike hikumisi hiripuhoko ayiana ayíáka risiapo.

<sup>18</sup> Ayíáka risike aporo hakásá yano motosa Kiriopasemo someraka, "Maiya omo aporo hinamo yakai Yarusarame sitia kimisi pesapo. Asiamo nómo ní hákasamo makata asíane ní hemakapurakarifare?"

<sup>19</sup> Airakano Yasumo someraka, "Makata asíane yakapare?" Airakano aporoamo someraka, "Nasare aporo Yasuane asiapo. E porofete apororeapo. Aporo hinamo hikumisia soko, Kotimo hikumisia soko, epo wakapumo rakira rakikia some kaka, asiasamo e porofete apororeapo.

<sup>20</sup> Arirakano isiapo pirisiti aporo soko, isiapo aporo káramo soko, ipu e karikia pukua Rome kamani uniháemo e rusua kukunie, aíyaka mareasimo Rome kamaniaki e kasapo. Karakano ipu e ira matopesa paremarekeea maposapo.

<sup>21</sup> Arirakano isiapo hemakapusuane isu Yu aporo hinamoane epo tonotaehoafunureapo. Rome kamanimo isu asekeea risiane metakarikia isiapo isina kamani unihaeaka asekeea rekeasimo, máfaraka mareafunureapo. Asiane máfaraka maresafapo. Makata meta soko faserepesapo. E kusuane sere tetá faraka, pipu sere isiapo.

<sup>22</sup> Pipu isiapo hinamo metakiramo makata asesane isuaki somerakanano, isiapo kaikia himu fasapo. Mituru fiarakano i Yasu motosa kunikia aseako hisiapo.

<sup>23</sup> Hikia kunikia pauraka aseane, Yasu fasekeno asesapo. Asekeea poparipekeea ipu isuaki someraka, 'Kunikia á hepene aporo risikino ipu asesapo. Hepene aporomo someraka, "E hitaferaka rekenapo," airakasapakasupo.'

<sup>24</sup> Aíyaka hinamomo somerakanano, isiapo aporo metakiramo kunikia aseako pusuapo. Pukua aseane hinamo ipu aisa hakásá yine asesapo. Yasuane ipu asesafapo," aisapo.

<sup>25</sup> Aíyaka aporo tetámo somerakanano, Yasumo tetáki someraka, "Tetápo koteaka hemakapurafaraka mokome somerakae. Porofete aporomo somesane tetápo koteaka hemakapukua kakimaka somerakarifapo.

<sup>26</sup> Kereso kárahokosakipoko, aporomo e mokoatikirakano, e kau teraka himu nekea reke, makata su ayiakakosaposane ásiapo."

<sup>27</sup> Aíyaka Kotimo sawia popasa kepoane tetáki Yasumo some kasapo. E ipiane popasane some kasapo. Mosesimo kepomarekeea popasane, Yasumo tetáki somesapo. Mosesemoo popasa maíya amo, patera porofete aporo yakaimo popasane tetáki somesapo.

<sup>28</sup> Somepe pukua i Emease apea pauraka, Yasu ape meta pukusakipoko tetáne marokeraka puko ayiane

<sup>29</sup> tetapō someraka, "Né pukupo. Etoyaki hakásá peae. Yao ererakanapo," aisapo. Arirakano Yasu iyaki namina hakásá apea hikia, asekeea toapo.

<sup>30</sup> Namina hakásá toke makata nakosakipoko, Yasumo farawa maka Kotimo makotehoasimo kurikuriraka mamosoraka tetáki kasapo.

<sup>31</sup> Karakáno tetapō himo koteaka asekeea someraka, "Ne Yasureapo." Aíyaka hemakapuanine Yasuane ipi yía kaya nine fasapo.

<sup>32</sup> Farakano asekeea tetapō tati yía someraka, "Isu ikia otoa peraka Kotimo sawia popasane epo etoaki some karakasapo. Amo etapo hemakapuraka, 'Some ane namo kakaro kotehoareapo.' Aíyaka eaki himu hakásaraka hemakapuafapo. Katuyia mahimete-hoapo," aisapo.

<sup>33</sup> Arirakano tetá takahikia Yarusarame sitia poparihisia. Poparihikia apea yorokoa aseane aporo hakásá pura kinu suane soko, ipu aporo tákeyaki namina hakásá sarimaraka tokeno asesapo.

<sup>34</sup> Arirakano ipu aporo tetá pesaki someraka, "Isiapo unihaeane kakaro turikia pusuapo. E turikia pusuane Saemonemo asesapo."

<sup>35</sup> Airakano aporo tetá kawe pesamo soko someraka, "Eto ikia otoa puraka risiakipoko aseane Yasu peraka etoaki makata somerakasapo. Ikia otoa some karakano etapo eane koteaka hemakapusuafapo. Asiane apea isina hakásá makata nakosakipoko toke epo

farawa mosoraka etoaki karakano, amo etapo eane koteaka asekeha hemakapusuapo." Aiyaka aporo tetá amo somesapo.

*Aporo hakasa puramo asekeasimo Yasu pesane oyapo.*

*Matiu 28:16-20; Maka 16:14-18; Yone 20:19-23; Tarira Aporo 1:3*

<sup>36</sup> Aporo tetapō someana maiya yiamo Yasu faserepekea, iyaki hakasa reke someraka, "Koteaka auaraka risikianie."

<sup>37</sup> Airakano namina fofaraka namoraka someraka, "Yakasa horeapo."

<sup>38</sup> Airakano Yasumo someraka, "Marirakano re namorakanare? Marirakano himu tetáraka hemakapukua risikinare?"

<sup>39</sup> Ano hokono asesie. Ano korake asesie. Kakaro anopo. Kakaro anoreapo, aiyaka repo hemakapuko ano hokonoa sakairasie. Yakasa ho kiki rerafapo. Ano kiki rekeno repo aserakanapo. Yakasa ho kau rerafapo. Ano kau rekeno repo aserakanapo." Aisapo.

<sup>40</sup> Aisané hokono soko, korake soko, tarirakano ipu asesapo.

<sup>41</sup> Asekeha namina kakaro seseraka someraka, "Erakapo. E masiarakapo." Aiyaka ipu asesa nine Yasu kakaro reane ipu koteaka hemakapusuafapo. Asiasamo Yasumo someraka, "Makata nakosa tokenare?"

<sup>42</sup> Airakano ipu pokoa paisia inasane e karakano

<sup>43</sup> ipu asekeasimo Yasumo pokokane nesapo.

<sup>44</sup> Nekeha faraka Yasumo someraka, "Ano fana reyaki rea maiya amo, makata ayiakakosane fana nōmo reaki somesapo. Nōmo somesane kakaro yasiapo. Fana Mosesemo anoane ayiakakosapo, aiyaka popasane soko, anakano porofete aporomo anoane ayiakakosapo, aiyaka popasane soko, anakano Same púkuu popasane soko, anoane ayiakakosapone kawe asia ayareapo." Yasumo aisapo.

<sup>45</sup> I namina himeterakano ipu hemakapusimo Yasumo Kotimo sawia popasane iaki tarikia mahemakapusuapo. Asiamo Kotimo sawia popasane ipu hemakapusimo epo some karaka,

<sup>46</sup> "Kotimo sawia popasane oyapo. Keresoane kau teraka himu nekeha rusua kusuane, yape tetá faraka yape isiamo turikia pukusapo, aiyaka popasapo.

<sup>47</sup> Asiamo ano turikia pusuakipoko Keresoane yano hokoa some karakano, aporo hinamomo kaikia ipu makata watikisane metakarikia, eaki risikiako parirakano, namina makata watikisane Keresomo mafahokosapo. Keresomo makata watikisane mafahokosa someane hauaka sua aporo hinamo suaki some kakanie. Yarusarame sitia some kaka, Yarusarame siti aeyaka kepomarekea somepe pukua, hauaka sua aporo hinamo suaki some kakanie.

<sup>48</sup> Asiamo repo makata su asesane somehoanie.

<sup>49</sup> Nōmo Atamo makata kakakosaposane, nōmo reaki kaka mareakosapo. Hepene yapunaka wakapuanre himua peasimo Yarusarame siti yia re su kau tokanie." Aiyaka Yasumo somesapo.

*Yasu hepene yapura hisiane oyapo.*

*Maka 16:19-20; Tarira Aporo 1:9-11*

<sup>50</sup> Yasumo i karikia Yarusarame sitiane metakarikia, Petene ape makeraka hisiapo. Hikia risike, Yasumo ipi hokono tetákara máfaraka, iane makoteraka some kasapo.

<sup>51</sup> Makoteraka some kasá maiya amo, Yasumo iane metakarikia, Kotimo e hepene yapura karikia hisiapo.

<sup>52</sup> Yasu hinakano asekeha ipu eane kekereraka Yarusarame sitia seseraka poparihihiapo.

<sup>53</sup> Maiya suamo Kotimo apea hikia Kotiaki kekeresapo.

## Yone

### **Yone sawi one mahemakapukusa someane oyapo.**

Yasumo aporo hakāsa purane hakāsa metane Yonepo. Yonemo Yasumo makata someane kaikia, arirakano Yasumo makata rakisiante soko asesapo. Asiasamo aporo hinamomo Yasuaki himu hakásaraka hemakapusimo sawi one Yonemo popasapo.

Yonemo ipi yanoane faremareka, aporo hakāsa pura Yasumo himu tumurumo hemakapusimo aporoane Yone ipipo, aiyaka taku meaka popasapo.

Yasu turikia pukua hepene yapura hisiakipoko, keremisi 60 faraka Yonemo sawi one popasapo.

### **Yone sawia some kepo parakuraka popasane oyapo.**

1:1-18 Yasu hauaka wo peasiraka, fana e Kotiyaki hakāsa yaiya reapo.

1:19-51 Yone he tapukumareramo makata rakisiakipoko Yasumo ipi aporo hakāsa pura metakirane murikimasapo.

2:1-24 Yasumo namo heane waene he maparisapo.

3:1-36 Ereamo Nikitímasemo Yasuaki somehoko pesapo.

4:1-54 Yasumo Sameria hinamoaki somesapo.

5:1-47 Yarusarame sitia hokono kesakipoko Yasumo some kasapo.

6:1-71 Yasumo aporo fae taoseneaki (5000) farawa nasimo kasapo.

7:1-8:59 Yarusarame sitia hokono kesakipoko Yasumo efera hunia some kasapo.

9:1-41 Aporo hi mesane Yasumo mafasapo.

10:1-42 Saro sipi asekeea rera aporoane Yasupo.

11:1-57 Rásarase kusuane Yasumo maturikia taesapo.

12:1-11 Yasu kukusa maiyane makerakano Mariamo Yasu korakea makata wape yamonamo hokesapo.

12:12-50 Yasu saro tokia matia ripaka Yarusarame sitia perakano, aporo hinamomo eane makáarakano Yu aporo sisimamo Yasuaki hisiraka risiapo.

13:1-16:33 Yasu Yarusarame sitia hinaka ipi aporo hakāsa puraki some kasapo.

17:1-20 Yasumo ipi Ataki kurikurisapo.

18:1-19:42 Yasuane parakeraka hukurukua ira matopesa paremarekeia kusuapo.

20:1-31 Yasu turikia purakano Yarusarame sitia aporo hinamo metakiramo asesapo.

21:1-25 Yasu he Kariri fua pekeia ipi aporo hakāsa puraki tarisiapo.

*Yasu ipi yano motosa metane Somepo, aisane oyapo.*

<sup>1</sup> Makata su kepomaresa maiya amo, ipi yano motosa Someane\* wate yaiya reapo. Someane Kotiyaki hakāsa reapo. Someane ipi Kotipo.

<sup>2</sup> Makata su kepomaresa maiya amo e Kotiyaki hakāsa yaiya reapo.

<sup>3</sup> E aeyaka makata suane kepomaresapo. E metakirikia makata su kepomaresafapo. E aeyaka kepomaresapo.

<sup>4</sup> Yaiya reramo kepoane e ipipo. Yaiya reramo faesane aporomanoaki karápo.

<sup>5</sup> Faesa amo katosa arakaru tipia kára faeraka rekenapo. Katosamo faesane kopakataenafapo.

<sup>6-7</sup> Asiamo faesane somehoko aporo hakāsa meta Kotimo pusiesapo. Pusierakano pesane ipi yano motosa Yonepo. Aporo suamo kakimakasimo epo somehoko pesapo.

<sup>8</sup> Faesane éfapo. Faesane epo somehoko pesapo.

<sup>9</sup> Arirakano kakaro faesamo kepoane Yasu ipipo. Ipi hauaka wo aporo suane mafae hoko pesapo.

<sup>10</sup> Arirakano wate fana epo hauaka one soko aporomano ane soko rakisiapo. Epo ipi rakisia nine e hauaka kara wo pesa maiya amo aporo hinamomo eane himetesapo. Kotimo eane pusierakano, pesane aporo hinamomo hemakapusuafapo.

<sup>11</sup> Ipi aporo iramo apea perakano ipu eane teresafapo.

<sup>12</sup> Asiane aporo hinamo metakiramo eane tereraka epo ipi yano motosa paoraka eaki himu hakásaraka hemakapurakano iaki epo someraka, “Re Kotimo hokosapo,” aiyaka somesapo.

<sup>13</sup> Kotimo hokosapo, aisane aporomo hinamo arumaka hokosa hokono amarera ayafapo. Aporomo hinamo arumaka hokosa hokono maresa hokosane aporomo ipi

\* <sup>1:1</sup> Wate fana Yu aporoane namoraka risike Kotimo yano motosane hufitaeraka kakama somesafapo. Ipu takumeaka yano motoraka Someane aiyaka somesapo. Asiamo Yonemo sawi one poparakia Yasu ipi yano motosa metane Somepo, aiyaka poparakano Yu aporo suamo hemakapuraka Yasuane Koti hakāsa yiayapo.

hemakapusua ayapo. Kotimo hokosa risikiasimo Kotimo ipi hemakapukua someraka, “Neane nōmo nī hokosapo.” Aíyaka ipi hokosa risikiasimo murisiapo.

<sup>14</sup> Arirakano Somemo isiapo aporomanomo kauane maka, hauaka wo pekea isuyaki reapo. Epo isu hemakapuraka arareraka, kakaro someane some kasapo. Some akaramo Yasumo wakapu faesane isiapo asesapo. Ipi wakapu faesane ipi Kotimo hokosa hakása yinesasamo Kotimo wakapuan faesa ayapo.

<sup>15</sup> Arirakano Kotimo hokosa ane Yonemo somesapo. Yonemo paroaka someraka, “Aporo keseke peakosane e ipi namo kakaro fanapo. Ano takapeasiraka e fana yaiya reapo. Fana yaiya reasasamo e ipi namo kakaro kárupo. Ano wakasemapo,” aíyaka Yonemo somesakipoko aseane Yasu perakano asesapo.

<sup>16</sup> Yasumo isu su yaku kára araresapo. Efera hunia soko, efera hunia soko yaku arareraka rekeakosapo.

<sup>17</sup> Kotimo somemanane Mosesemo aporoaki some kasapo. Arirakano yaku ararenane soko, kakaro somerane soko, Yasu Keresomo isuaki kasapo.

<sup>18</sup> Aporomo Kotiane aserafapo. Asiāne ipi hokosa hakása yine tati hakása risiasamo, hokosa amo Kotimo ainane tariako pesapo.

*Yone he tapukumareramo somesane oyapo.*

*Matiu 3:1-12; Maka 1:1-8; Ruki 3:1-18*

<sup>19</sup> Yu aporo sisimamo pirisiti aporoaki soko, Rífafi aporoaki soko someraka, “Re Yarusarame siti metakarikia Yoneaki makata kaiyako punie.” Airakano i pukua Yone rea pekea someraka, “Ne epare? Kotimo pusiesa aporoane nere?”

<sup>20</sup> Airakano Yonemo mahamesafapo. Epo hufitaeraka someraka, “Ano Keresofapo. Aporo Unihaeaka rekeasimo murikimasa aporo keresoane anofapo.”

<sup>21</sup> Airakano ipu someraka, “Ne eparakapo. Ne Iraíyare?”<sup>†</sup> Airakano epo someraka, “Wae, ano Iraíyafapo.” Airakano ipu someraka, “Porofete aporo kárane nere?” Airakano epo someraka, “Anofapo,” aisapo.

<sup>22</sup> Airakano ipu someraka, “Ne epare? Isu pusiesa aporoaki isiapo somehokosakipoko nōmo somesie.”

<sup>23</sup> Airakano epo someraka, “Ima yaoa sakepamo somehokosa aporoane anopo. Unihae peakosane ikia kara hahaesekeno maereketaehoanie aihokosa aporoane anopo. Anoane Aesayamo popohaareapo,” aisapo. (*Aisia 40:3*)

<sup>24</sup> Airakano Ferese aporomo pusiesa aporoamo someraka

<sup>25</sup> “Keresoane soko, Iraíya ane soko, arirakano porofete aporo karane soke nefareapo. Asiamo marirkano nōmo aporo hinamohe hea tapukumurirakanare?”

<sup>26-27</sup> Airakano Yonemo someraka, “Re nōmo hea hákasa tapukumurirakanapo. Ano reakipoko aporo hakása meta peakosapo. E peakosane reyaki rekenapo. Ayíáka repo eane hemakapurakanafapo. E aporo kárásasamo aporo raipamo epo tamaka ane fisina ayíáka nōmo fisihoane siahoasifareapo. E aporo kárásasamo nōmo epoko raiparaka rakiako ayiane soko ano wakasemasasamo nōmo rakiane siahoasifareapo. Ano eyaki siasafapo.” Aíyaka Yonemo Petene apea somesapo.

<sup>28</sup> He Yotane taku ra Petene ape rekenapo. He Yotanea Yonemo aporo hinamo hea tapukumurisiapo.

*“Kotimo saro sipi mano apere,” aisane oyapo.*

<sup>29</sup> Ere hakása waka, mituru Yonemo aseane Yasu perakano aseraka someraka, “Kotimo saro sipi manoane apere. Aporomo himua makata watikisane epo mafahokosakipoko saro sipi arura ayíáka e rukusapo.

<sup>30</sup> Fana eane nōmo reaki somerakasu ayapo. Asiamo ano fana pesakipoko aporo meta kesekeea peakosaposane apera ayareapo. Asiamo aporoane ano hokono mareasiraka e ipi wate fana yaiya reapo. Asiamo aporoane ipi namo kakaro fanapo.

<sup>31</sup> Fana aporo meta Kotimo pusiehokosaposane nōmo kairaka epa peanarakapo, aíyaka hemakapukua ano himetesapo. Asiane Isiraya aporo hinamo repo eane hemakapusimo reane nōmo hea tapukumurirakanapo. Hea tapukuamuriramo eane atarira ayíáka tarikanapo,” aíyaka Yonemo somesapo.

<sup>32-33</sup> Aíyaka efera hunia Yonemo someraka, “Fana Kotimo anoaki hea tapukumuriako pusiesapo. Kotimo some kasa yiamo someraka, ‘Ho Kotesa pekea aporo hakása meta á karaporakano epo ipi yiamo Ho Kotesane aporo hinamo suaki muriakosapo.’ Aíyaka Kotimo somesakipoko aporoane fasere perakano fana e nōmo himetesapo. Himetesane Ho Kotesa mena nume asia ea karaporakano aseraka nōmo hemakapuraka, ‘Kotimo fana somesane ereapo,’ aíyaka nōmo hemakapusuapo.

<sup>†</sup> 1:21: Iraíyane wate fana porofete aporopo.

<sup>34</sup> Hemakapukua eane nōmo himo asekeea someraka, ‘Eane kakaro Kotimo hokosapo. Kotimo murikimasa aporoane ereapo,’ aiyaka nōmo someraka rekenapo.” Aiyaka Yonemo somesapo.

*Yasumo aporo hakāsa pura fana murikimasane oyapo.*

<sup>35</sup> Ere hakāsa waka, mituru Yone ipi aporo hakāsa pura tetāyaki risike, epo aseane

<sup>36</sup> Yasu purakano asekeea wāraka someraka, “Asesie. Kotimo saro sipi mano e apure.”

<sup>37</sup> Aiyaka wārakan Yonemo aporo hakāsa pura teta amo kaikia Yoneane metakarikia Yasuane kekemarape pusuapo.

<sup>38</sup> Kekemarape perakarakano Yasumo patera pariaseane tetā kekemarape perakano asekeea someraka, “Teto yakapa aseako perakanare?” Airakano tetapō someraka, “Tisao,‡ né ape ma warakānare?”

<sup>39</sup> Airakano Yasumo someraka, “Aseako peae.” Airakano tetā Yasuyaki hakāsa pukua epo ape warāne asesapo. Asesa sere yiamo Yasuyaki hakāsa risiapo. Yasuyaki hakāsa risia sere are samapu maiya kitafapo.

<sup>40</sup> Yonemo someane kakimaka Yasu kekemaraka pusua aporo tetāne meta yano motosa Enitupo. Enituane e Saemone Pitamo mamaneapo.

<sup>41</sup> Fana Enitu ipi mamane Saemone ane kope pusuapo. Pukua e kokoa asekeea someraka, “Aporo Kotimo pusiehokosapsane Kereso perakasapo. Isiapo asesapo. Keresoane Kotimo Unihae murikimaka maresa ayasesapo.”

<sup>42</sup> Aiyaka Enitumo Saemone ane karikia Yasu rea pesapo. Perakano Yasumo e asekeea someraka, “Né Yonemo hokosa Saemonereapo. Yumo nōmo neane yano motoraka Sifase yano motorakanapo,” aiyaka Yasumo somesapo. Arirakano Sifase yano motosane Kiriki meaka Pita yano motosapo. Namo meaka Eke, aiyaka yano motosapo.

*Firipipe Natanio tetāki Yasumo peaesane oyapo.*

<sup>43</sup> Ere hakāsa waka, mituru Yasu Kariri hauaka pusuapo. Pukua Firipi aseraka someraka, “Ano patera aseiesi,” aisapo.

<sup>44</sup> Arirakano Firipi ipi Pesaita taonea reapo. Enitu soko, Pita soko i Pesaita taonea hakāsa risiapo.

<sup>45</sup> Firipi pukua Natanio asekeea eaki someraka, “Mosesemo somemane sawia poparaka maresa aporoane isiapo asesapo. Porofete aporomo soko eane popasane isiapo asesapo. E Yosefemo hokosa Yasupo. Epo apeane Nasare apepo.”

<sup>46</sup> Airakano Nataniomomo someraka, “Nasare ape aeyaka aporo kotesa perafapo.” Arirakano Firipimo someraka, “Aseako peae,” aisapo.

<sup>47</sup> Aiyaka tetā pukua Natanio perakano Yasumo asekeea someraka, “Isiraya aporo kote-sane ereapo. Epo makata kotafe somerafapo.”

<sup>48</sup> Airakano Nataniomomo someraka, “Nōmo ano mayiáka hemakapukua asekeea somerakanare?” Airakano Yasumo someraka, “Firipimo néaki peaehoasiraka né ira foke kepoa kakeno nōmo né asesapo.”

<sup>49</sup> Airakano Nataniomomo someraka, “Tisao, Kotimo aporo hokosane nereapo. Né Isiraya aporomo unihæreapo.”

<sup>50</sup> Airakano Yasumo someraka, “Né ira foke kepoa kakeno nōmo asesapo. Asiasamo nōmo anoaki himu hakásaraka hemakapurakanapo. Asiane nōmo makata someana one wakasemapo. Keseke makata kára meta nōmo aseakosapo.”

<sup>51</sup> Aiyaka efera hunia Yasumo someraka, “Nōmo kakaro somerakaripo. Ti kikisi akaraka, kikisi roraka, Aporomanomo Táke ano unia kima yapura Kotimo hepene aporoane pekea parihinakano repo asekeakosapo,” aiyaka Yasumo somesapo.

## 2

*Kena taonea aporo metamo hinamo arumaraka hokono kesane oyapo.*

<sup>1</sup> Sere teta faraka, sere isiamo aporo metamo hinamo arumaraka hokono kesapo. Kariri hauaka á Kena taonea hokono kesapo. Hokono akera apea Yasumo ipi kaíyia pukua kayapo.

<sup>2</sup> Arirakano Yasu soko, ipi aporo hakāsa pura soko, iaki aporo meromo peaerakano i pukua á risiapo.

<sup>3</sup> Arirakano aporo hinamo su risiamo waene heane nekea farakano, Yasumo ipi kaíyiamo eaki someraka, “Waene heane ipu suamo nekea fahoareapo.”

<sup>4</sup> Airakano Yasumo ipi kaíyiaki someraka, “Amao, marirakano nōmo anoaki somerakanare? Nōmo maiyane\* harufapo.”

‡ 1:38: Namina meaka Rapae, airapo. Isiapo meaka Tisa, airapo. \* 2:4: Amo kepoane oyapo. Nōmo atamo ano pusiesamo aporo hinamo suaki tarikia rakiakosa maiya ane haru faserepesafapo.

<sup>5</sup> Airakano Yasumo ipi kalyiamo aporo meromo aporo raipaki someraka, "Yasumo reaki makata rakisimo somerakano, hakása yine kakimaka rakinie," aisapo.

<sup>6</sup> Airakano aseane petoro namasu tarámo kára asia toane asesapo. Arirakano Yu aporo sisimamo hemakapuraka, "Kotimo isuaki sesehoasimo isiaipo hokono kusunapo." Aíyaka hemakapusuasamo hokono kusuhoko eke petoroa he taka apea taesapo. Apea taesane tarámo kára asia petoro kárane taesa tokeno asesapo.

<sup>7</sup> Aseraka aporo meromo aporo raipaki, Yasumo someraka, "Petoro kárane komarusimo he taka kesie." Airakano ipu he taka kekeaa komarusuapo.

<sup>8</sup> Komarurakano asekea Yasumo aporo raipaki someraka, "Petoro kárá á he kesane, takamaka aporo hokono akera hokono meromo nasimo takamaka pusie."

<sup>9</sup> Airakano ipu takamaka pukua, aporo hokono meroaki karakáno epo nesapo. Namo heane waene he maparisane epo hemakapusuafapo. Arirakano aporo raipa he tasamo ipu hákasa hemakapusuapo. Aporo meroamo waene heane nenaka aporo hinamo kawe arumasa apiane peaesapo.

<sup>10</sup> Perakano epo someraka, "Isiapo ainane oyapo. Waene he namo kakaro kotesa wapesane fana aporo hinamo hokonoa pesaki karápo. Fana kasane ipu siaraka nenakano asekea, waene he wakasema wapesane kesekeea karápo. Arirakano nómó waene he wakasema wapesane fana akare. Kakaro wapesane kesekeea akare," aisapo.

<sup>11</sup> Arirakano aporomo hemakapusimo Yasumo Kotimo wakapumo hemakapukua rakira fanane oyapo. Namo heane waene he maparihoasimo rakisiapo. Kariri hauaka á Kena taonea epo rakisiapo. Epo wakapu kára ane aporo hinamo suamo asekeasimo epo wakapuaka rakisiapo. Rakirakano ipi aporo hakása puramo aseraka eaki himu hakásaraka hemakapukua risiapo.

<sup>12</sup> Arirakano hokono kekeaa soraka Yasu soko, Yasumo ipi kalyia soko, ipi mamanea soko, ipi aporo hakása pura soko, i su pukua Kapaneame taonea pukua sere hukusimo waka risiapo.

*Kotimo apea Yasu pusuane oyapo.*

*Matiu 21:12-13; Maka 11:15-17; Ruki 19:45-46*

<sup>13</sup> Ape Farimaresa Hemakapuko Hokono Akera maiya ane makerakano, Yasu Yarusarame sitia hisiapo.

<sup>14</sup> Hikia Kotimo ape ruru kakarua yorokoa aseane aporomo saro ponomakau soko, arirakano saro sipi soko, arirakano mena soko roporaka risikino asekea, aporo metakira teporoa toke mone sanasirakano asesapo.

<sup>15</sup> Asekea Yasumo sako kita toane maka, kita pekea, kita amo aporo soko, namina saro ponomakau soko, saro sipi<sup>†</sup> soko, Kotimo apea karikia pesane tekatarikia pusimo rukuhoaesapo. Rukuhoeraka aporomo mone sanasiraka toa amo teporoane maparitaeraka mone rukukoakataesapo.

<sup>16</sup> Rukukoakataeraka aporo mena roporaka risiaki Yasumo someraka, "Mena ane mokoa pusie. Nómó Atamo ape one makata ropona ape mapariraka ayilakakopo."

<sup>17</sup> Airakano kaikia epo ipi aporo hakása puramo Kotimo sawia popasane hemakapusuapo. Popasane oyapo. "Kotio, nómó apeane namo kakaro kotesa susuane nómó hemaka apuramo fanaraka hemakapurakanapo." Aíyaka popasane Yasumo ipi aporo hakása puramo hemakapusuapo. (Buk Song 69:9)

<sup>18</sup> Arirakano Yu aporo sisimamo Yasuaki someraka, "Né epa asiamo arirakayiare? Né fanaraka reane isiapo aseako tarinie. Kotimo wakapumo hemakapukua rakirane nómó rakinie."

<sup>19</sup> Airakano Yasumo someraka, "Kotimo ape one rakaritaeraka yape isia faraka efera hunia nómó kikimakosapo."

<sup>20</sup> Airakano ipu someraka, "Ape one kiraka risike keremisi foti sekese (46) faraka kikimasapo. Asiáne mayiáka yape isia yiámo nómó ape one kikimakosare?"

<sup>21</sup> Airakano Yasumo ipi homo apeane ipi kauane takumeaka ape kiakosane somesapo.

<sup>22</sup> Aíyaka somesane Yasu ipi kukua turikia pusua maiya amo somesa kepoane ipi aporo hakása puramo hemakapusuapo. Maiya amo Kotimo sawia popasane soko Yasumo somesane soko kikimasapo.

<sup>23</sup> Arirakano Ape Farimaresa Hemakapuko Hokono Akera maiya amo Yasu Yarusarame sitia reke, Kotimo wakapumo hemakapukua rakirane epo rakisiapo. Rakirakano aporo hinamo yakaimo aseraka eaki himu hakásaraka hemakapusuapo.

<sup>†</sup> 2:15: Aporo hinamomo saro ponomakau soko, saro sipi soko, mena soko, rukua paikia Kotiaki kakasimo roposapo.

<sup>24</sup> Arirakano aporomano himumo hemakapusuane<sup>‡</sup> Yasumo aseraka epo iaki himu hakásaraka hemakapusuafapo.

<sup>25</sup> Aporomo hemakapusuane aporo metamo Yasuaki someaka tarisiafapo. Yasumo ipi yiamo aporomo himuane asesapo.

### 3

*Nikitímasemo Yasu rea somehoko pusuane oyapo.*

<sup>1</sup> Yu aporo hakásá meta yano motosa Nikitímasepo. Ipi Yu aporo sisima unihaeaka reane ipi Ferese aporopo.

<sup>2</sup> Ereamo Yasu rea e pekea someraka, "Tisao, Koti néyaki hakásá reasasamo nómó Kotimo wakapumo hemakapukua rakirane rakirakanapo. Asiamo tisaraka rakisimo Kotimo pusiesane népo. Aiyaka nómó hemakapurakaripo."

<sup>3</sup> Airakano Yasumo someraka, "Nómó kakaro somerakaripo. Aporo efera hunia makaweraka rekeanafonorakano, aporoane Kotimo unihaeaka asekea rekeakosafapo."

<sup>4</sup> Airakano Nikitímasemo someraka, "Aporo sisimane mayíáka efera hunia makaweraka takapeakosare? Hokosa pariraka kaiyiamo tuanaka efera hunia takapeane siahoasiareapo."

<sup>5</sup> Airakano Yasumo someraka, "Ho Kotesamo aporoane hokono mareanafono, airakano hea tapukumareanafono asiane Kotimo unihaeaka asekea rea aporoakiyaki pao-hokosafapo.

<sup>6</sup> Aporo hinamomo hokosa hokono marerane kau, kiki, maíya, hokono marerane kaumo mena ayapo. Arirakano aporo hinamomo namina ho makawehoasimo, Ho Kotesamo mena ayapo.

<sup>7</sup> Nómó neaki someraka, 'Re makaweraka risikianie,' airakasane nómó kaikia fofahokopo.

<sup>8</sup> Arirakano atifo purakarakano senakimo hákasa kairapo. Himo aserafapo. Atifomo makata meta mahohorakano, himo aserapo. Atifo manaka perakanarakanapo. Pekea ma purakanarakanapo. Aira ayíáka aporo hinamomo himura Ho Kotesa rekerakano epo arakirane aporo metamo aserapo."

<sup>9</sup> Airakano Nikitímasemo someraka, "Nómó somerakane mayíáka ayiakakosare? Ano himeteripo."

<sup>10</sup> Airakano Yasumo someraka, "Nikitímase, Isiraya aporomo tisane nepo. Kotimo sawia popasamo kepoane nómó some karapo. Asiane nómó some kepoane nómó hemakapurakarifare?

<sup>11</sup> Hao, kaisie. Nómó neaki kakaro somerakanapo. Isiapo makata kakaro hemakapusua hákasané somerapo. Arirakano isiapo\* makata asesa hákasané somerapo. Somesa nine repo kakimarakarifapo.

<sup>12</sup> Hauaka wo makata rakirane nómó somerakano repo kakimrafapo. Arirakano hepene yapura makata rakirane nómó somerakano repo kakimakosare? Wae, kakimakosafapo.

<sup>13</sup> Asiamo hepene yapura makata rakirane aseako aporo meta hepene yapura hikia, hauaka wo somehoko pesafapo. Ano ní hákasa hepene aeyaka pekea, Aporomanomo Táke anoane hauaka wo somehoko pesapo.

<sup>14</sup> Arirakano fana ima yaoa Mosesemo rete asiamo heseke pariraka rakikia ira maporaka heseke paremeresa ayíáka, Aporomanomo Táke anoane ayíáka paremareakosapo.

<sup>15</sup> Ano paremarerakano aporo hinamomo anoaki himu hakásaraka hemakapukua risiane yaiya risikiakosapo." Aiyaka Yasumo somesapo.

<sup>16</sup> Asiamo hauaka wo aporo hinamomo su risiane Kotimo himu tumurumo hemakapusasamo ipi hokosa hakásá yine pusiesapo. Pusierakano ipi hokosa pesapo. Perakano aporo hinamomo eaki himu hakásaraka hemakapukua risiane eyaki yaiya risikiakosapo. Iane hurupukusafapo.

<sup>17</sup> Kotimo ipi hokosamo aporomano fanasihokosakipoko pusiesafapo. Aporomano mafasiakosakipoko pusiesafapo.

<sup>18</sup> Asiamo Kotimo hokosamo someane aporo hinamomo kakimarakano iane fanasi-hokosafapo. Arirakano Kotimo hokosamo someane kakimakanafonorakano, fanasi-hokosafano yaiya murikimaka maresapo. Asiamo Kotimo ipi hokosa hakásá yíamo somesane kakimakanafonosasamo fanasihokosane fana yaiya murikimaka maresapo.

<sup>‡</sup> 2:24: Aporomanomo himumo hemakapusuane oyapo. Wate foaka seseraka keseke metakariakosane Yasumo aseraka iaki himu hakásaraka hemakapusuafapo. \* 3:11: Isiapo ayíáka popasa amo kepoane oyapo. Koti soko, Yasu soko, Ho Kotesa soko, i suane ayapo.

19-20 Fanasihokosa kepoane oyapo. Faesa hauaka wo pesapo. Faesa pesane aporo hinamomo hisiraka namina watikiaka rakiako katosa yia risirapo. Aporo hinamomo namina watikiaka rakisiane aporo metamo aserapaka faesa á perafapo. Faesane kakaro hisiraka, faesa á risikiako perafapo.

21 Arirakano namo kakaro koteaka rakira aporo hinamoane faesa á risikiako perapo. Asiamo ipu Kotimo someane kairaka kekemarakaka rakiraka risirane aporo suamo asekeasimo i faesa á rakiraka risirapo.

*"Kotimo unihaeaka rekeasimo murikimasa aporoane Yasu reapo,"* aiyaka Yonemo someane oyapo.

22 Yasu ipu aporo hakása purayaki Yutía hauaka pusuapo. Á pukua risike ipu aporo hinamo hea tapukumurisiapo.

23 Arirakano Inone apeane Sarime taonea makeraka, he kára pekereakipoko aporo hinamo perakano iane Yonemo hea tapukumurisiapo.

24 Yonemo hea tapukuamurisia maiya amo e tipura haru makesafapo.

25 Arirakano Yu aporo hakása metamo Yonemo ipu aporo hakása pura metakiraki makata watikisa fahokosakipoko hea tapukumuriane taftafaraka somesapo.

26 Tafatrafaraka somerakano Yonemo aporo hakása pura suane Yone rea pekea someraka, "Tisao, he Yotane yaoraka ne rea takua aporo pesane hemakapurakarire? E<sup>†</sup> peakosa ikia karane maropohoko nōmo some karakasupo." Airakano Yonemo, "Ao. Eane nōmo hemakapurakaripo." Airakano ipu someraka, "Aporoamo aporo hinamo metakirane hea tapukumuriranapao. Asiamo aporo hinamo suamo né metakarikia e rea purakanapakae."

27 Airakano Yonemo someraka, "Kotimo karakano hakása yine aporomo marapo. Kotimo kakanafonorakano aporomo marafapo.

28 Fana nōmo someraka, 'Ano Keresafapo. Kereso peakosa ikia karane nōmo maropohokosakipoko ano fana pesapo.' Aiyaka nōmo somerakasuane repo kaisiapo.

29 Arirakano aporomo hinamo faisane aporo metamo arumarafapo. Hinamo faisane aporoamo ipu yiamo arumarapo. Hinamo arumakosa aporoamo somerakano ipi maemo kairaka sesenapo. Ipi mae sesena ayíáka ano kára seseraka rakiraka rekenapo.<sup>‡</sup>

30 Yasu ipu káraraka hokopukua rekeakosapo. Ano wakasemarakaka rekeakosapo." Aiyaka Yonemo somesapo.

31 Arirakano aporo hepene yapunaka pesane ipi namo kakaro fanaraka rekenapo. Arirakano hauaka wo takapesa aporoane ipi hauaka menapo. Ipi hauaka wo makata rakirane somerapo.

32 Asiamo e hepene yapunaka pesasamo hepene yapura makata asesane soko, makata kaisiane soko, epo somerapo. Someane aporo metakiramo kakimakanafonorakano yia, epo makata asesane soko kaisiane soko yaiya somerapo.

33 Arirakano aporo metakiramo epo somesane kakimaka risike someraka, "Ao, Kotimo someane kakarohoareapo," airapo.

34 Arirakano e Kotimo pusierakano pekea Kotimo someane some karakanapao. Ho Kotesa fete feteaka Kotimo eaki kasáfapo. Kára komarukua kasápo.

35 Ata Káramo ipi hokosa ane himu tumurumo hemakapukua reke, ipi hokosamo makata su asekeea rekeasimo murikimaka maresapo.

36 Asiamo Kotimo ipi hokosamo somesane aporo hinamomo kakimarakanano iane Kotiyaki yaiya risikikosapo. Kotimo hokosamo somesane koaretaerakanano iane Kotiyaki yaiya risíkiakosafapo. Aporo hinamomo kakipayasaki Kotimo yaiya saperaka rekeakosapo.

## 4

*Sameria hinamoaki Yasumo somesane oyapo.*

*Matiu 4:12; Maka 1:14; Ruki 4:14*

1-3 Aporo hinamoane Yasumo hea tapukumurisiafapo. Arirakano ipi aporo hakása puramo hea tapukumurisiapo. Aporo metakiramo asekeea someraka, "Yasu patera asesa aporo hinamo yakaíane Yasumo ípi aporo hakása puramo hea tapuku amurire. Asiamo Yasu patera asesa aporo hinamoane yakairaka kárarakanapao." Arirakano Yonemo hea tapukumurisia aporo hinamoane hukusipo. Yasumo aporo hinamo hea tapukumurisia amo Yonemo aporo hinamo hea tapukumurisiane marokeane." Aiyaka somerakano Ferese aporomo kaisiapo. Asiamo Yasumo hemakapuraka, "Nōmo makata rakirane aporomo

<sup>†</sup> 3:26: E peakosapo, aiyaka popasa amo kepoane Yasupo. <sup>‡</sup> 3:29: Yasumo some kakimara aporo hinamoane hinamo fisa asíapo. Hinamo apia asíane Yasupo. Hinamo apiamo mae asíane Yonepo.

somerakano Ferese aporomo kairakayiapo." Aíyaka hemakapuraka Yasu Yutía hauaka metakarikia Kariri hauaka efera paripukusakipoko

<sup>4-5</sup> pekeka Sameria\* hauaka tipia pauraka á reapo. Sameria hauaka tipia Saika taone á rekenapo. Saika taone makeraka hauaka ane Yakopemo ipi hokosa Yosefeaki wate fana tarisiapo.

<sup>6</sup> Yakopemo he keasimo hauaka rasa á Yasu pukua kayapo. Maiya tipiamo ipi korakemo finiraka pesasamo ipi sousekenaraka kayapo.

<sup>7-8</sup> Kayakipoko ipi aporo hakása puramo makata nakosa ropohoko taonea pusuapo. Pusuakipoko Yasu rea Sameria hinamo he takamako perakano Yasumo someraka, "Áno he takamakasie."

<sup>9</sup> Airakano Sameria hinamoamo hemakapuraka, "Yu aporo Sameria aporo tati hakása sarimanafapo. Yu aporomo Sameria aporoane arare, arirakano Sameria aporomo Yu aporo arare anafapo." Aíyaka hemakapukua hinamoamo someraka, "Marirakano nómō anoaki he takamakasie airakanare? Né Yu aporopo. Ano Sameria hinamopo. Marirakano nómō né ararerakasimo somerakanare?"

<sup>10</sup> Airakano Yasumo hinamoaki someraka, "Kotimo makata yaku karane soko, nómō hemakapukua, arirakano nómō anoake soko asekea, ereapo, aíyaka hemakapusua satiki, nómō anoaki aíyaka somehoafunufapo. Nómō neaki someraka, 'Áno he takamakasie,' airakano nómō ano asekea hemakapusua satiki nómō anoaki someraka, 'Áno he takamakasie,' aihoafunureapo. Airakano nómō né he fuakataena kakafunupo."

<sup>11</sup> Airakano hinamoamo someraka, "Hauaka rasa kutusasamo takamakosane nómō petoro fareapo. He fuafuana mayíáka takamakosare?"

<sup>12</sup> Isiapo makasa kaua kekema Yakopemo hauaka one rasapo. Wate fana epo soko ipi hokosamo soko ipi saro sipimo soko hauaka rasa he kesa hákasane nesapo. Yakope kurakano epo hauakane soko he rasane soko isiapo asekea risikinapo. Hauaka wafaya makasa kaua kekema Yakopeane aporo wakasemare? Nómō he haku fuakataena kakaro kotesa kakakosaporakane ne ní hákasane aporo fanarakanare? Yakopeane makamakesek-erakanare?"

<sup>13</sup> Airakano Yasumo someraka, "Hauaka rasa he kesane aporo hinamomo nesane efera hunia soko 'He nariripo,' aihokosapo.

<sup>14</sup> Nómō he takamáka karakano aporo hinamomo nenaka efera hunia, 'He nariripo,' aihokosafapo. Nómō he akarane he fuafuana ayíáka ne tua fuafuahokosapo. Asiamo né yaíya rekeakosapo."

<sup>15</sup> Airakano hinamoamo someraka, "Aporo fanao, he fuafuanane anoaki makasie. Makarakáno efera hunia, 'He nariripo,' aihokosafapo. Arirakano efera hunia nómō takamako peakosafapo."

<sup>16</sup> Airakano Yasumo someraka, "Ní makapinu pasimaka peanie."

<sup>17</sup> Airakano hinamoamo someraka, "Nómō aporo rekenafapo." Airakano Yasumo someraka, "Kakarorakae."

<sup>18</sup> Aporo kakorea sumo ne arumasapo. Asiane yumo ne aporoyaki kake, ne kakaro aporomo arumasafapo. Ne mokome aporoyaki purareapo."

<sup>19</sup> Airakano hinamoamo someraka, "Aporo fanao, nómō ainane nómō hemakapukua somesasamo né porofete apororeapo."

<sup>20</sup> Repo Yu aporomo someraka, 'Yarusarame sitia Kotiaki kekerenoanie.' Aíyaka repo somesa nine, isiapo makasa kaua kekema Sameria hauaka úria hikia a ipu Kotiaki kekeresapo."

<sup>21</sup> Airakano Yasumo someraka, "Keseke fasereapera sereamo Ata Káraki kekerenane Sameria hauaka úria soko, Yarusarame sitia soko tetá hákasa aeyaka hákasa kekerenosafapo. Hauaka su aeyaka kekereshokosapo.

<sup>22</sup> E kekeresane repo Sameria aporo hinamomo kakaro koteaka hemakapurakanafapo. Mafasira aporo hauaka wo takapeasimo Yu aporo irane Kotimo murikimarakan, Yu aporo ira aeyaka hauaka wo takapesapo. Yu aporo ira aeyaka takapesasamo e kekeresane isiapo Yu aporomo hemakapurakanafapo.

<sup>23</sup> Arirakano keseke soko yumo soko aporo hinamomo kaumo hemakapukua kekerenafaraka himumo Kotiaki kakaro koteaka hemakapukua kekereshokosapo. Aporo hinamomo hmo soko kekereshokosapo. Kakaro hemakapukua kekerena aporo hinamoane Kotimo sesenapo.

\* <sup>4:4-5:</sup> Yutía hauaka soko Kariri hauaka soko Yu aporomo hauakapo. Arirakano Sameria aporo hinamoane hapokase aporo hinamopo. Hapokasesane Yu aporomo Yu hinamohoanafonosa arumasapo. Yu aporohoanafonoso Yu hinamo arumasapo.

<sup>24</sup> Kotiane ipi hopo. Hosasamo e kekerena aporo hinamomo homo kekerenapo. Himumo soko kakaro koteaka hemakapukua kekerenapo.”

<sup>25</sup> Airakano hinamoamo someraka, “Kotimo unihaeaka rekeasimo murikimasa aporo Keresoane peakosapo. Aiyaka nōmo hemakapurakaripo. E peraka makata suane isuaki somehokosapo.”

<sup>26</sup> Airakano Yasumo someraka, “Nōmo somerakane, anopo. Nōmo someraka yiamo neaki somerakanapo.” Aisapo.

<sup>27</sup> Arirakano Yasumo aporo hakāsa pura popariperaka aseane Yasumo hinamoaki somerakano asekea, fofaraka makata meta somesafapo. “Marirakano hinamoaki somerakanare? Makata yakapa makasierakanare?” Aiyaka soko ipu somesafapo.

<sup>28</sup> Arirakano hinamoamo ipi petoroane metakarikia, apea foaka paripukua aporo hinamoaki someraka,

<sup>29</sup> “Nōmo fana kake makata su rakisiante aporoamo anoaki somerakasapo. Fana epo ano asekeanafonosa nine nōmo aina suane somerakasapo. E aseako peae. Keresoane erakapo.”

<sup>30</sup> Airakano aporo hinamomo namina ape metakarikia Yasu rea aseako pesapo. Ikia kara peraka arisiamo

<sup>31</sup> Yasumo aporo hakāsa puramo eaki someraka, “Tisao, makata nesie.”

<sup>32</sup> Airakano Yasumo someraka, “Nōmo makata nenane repo hemakapurakarifapo.”

<sup>33</sup> Airakano aporo hakāsa puramo namina yia someraka, “Aporo metamo makata nakosa maka pekea eaki karakasare?”

<sup>34</sup> Airakano Yasumo someraka, “Epo ano pusiesamo epo hemakapusuane nōmo keke- maraka, ipi makata rakirane nōmo rakikia marakano nōmo makata nena asiane ayapo.

<sup>35</sup> Arirakano repo someraka, ‘Ere maiya kitafasu faraka witi hae suskeno tumokoakoso-apo.’ Airakano nōmo someraka, Hemoane asesie. Witi hae tumokoasimo yumo surareapo.

<sup>36</sup> Witi hae tumora aporomo makata ropo yumo morakanapo. Witi hae tumora ayiáka aporo Yasuyaki yaiya risikiasimo pasimorakanapo. Witi hae potena<sup>†</sup> aporo soko, arirakano witi hae tumora aporo soko, tetā tatī sesehokosapo.

<sup>37</sup> Fana aporo metamo someraka, ‘Aporo metakiramo makata mano potenapo. Arirakano aporo metakiramo tumorapo.’ Aiyaka somesane kakaro somehoareapo.

<sup>38</sup> Arirakano aporo metakiramo makata mano poteraka asekea nina, makata mano potesane taneheheraka hemoa wate pesane repo tumokoako nōmo pusierakanapo. Aporo metakiramo wfatororaka rakisia nine wate pesane repo tumorakanapo.”

<sup>39</sup> Aiyaka Yasumo ipi aporo hakāsa puraki takumeaka someraka reakipoko hinamoamo ipi apea someraka, “Ano fana kake makata su rakisiante anoaki somerakasapo.” Aisasamo Sameria aporo hinamo yakaimo Yasuaki himu hakásaraka hemakapusuapo.

<sup>40</sup> Ipu namina ape metakarikia Yasu rea pekea someraka, “Ne isiapo apea waka rekeako peae.” Airakano Yasu ipu apea pukua iyaki yape tetā waka reapo.

<sup>41</sup> Waka reke epo some karakano aporo yakai metakiramo soko epo somesane kakimasapo.

<sup>42</sup> Kakimaraka hinamoaki ipu someraka, “Nōmo somesa hákasa kaikia eaki himu hakásaraka hemakapuraka asiafapo. Yasumo ipi soko somerakano kaikia isiapo eaki himu hakásaraka hemakapurakanapo. Epo aporo hinamo su mafasiako apere, aiyaka isiapo hemakapurakaripo,” aiyaka ipu somesapo.

#### *Kamania makata rakisia aporomo hokosa Yasumo mafasane oyapo.*

<sup>43</sup> Sere tetā faraka, aporo hinamo ipu ape Saika apeane Yasumo metakarikia Kariri hauaka á pusuapo.

<sup>44</sup> Pukua Yasumo iaki someraka, “Kotimo some kará porofete aporomo ipi ape sumu aporo hakāsa risia amo soko, ipi ape wará aporo hakāsa risia amo soko, eane makama fananafapo,” aisapo.

<sup>45</sup> Asia nine e Kariri hauaka perakano asekea Kariri aporomo e teresapo. Fana Ape Farimaresa Hemakapuko Hokono Akera maiya amo i namina Yarusarame sitia hikia aseane Yasumo makata su rakirakanapo. Asesasamo Yasuaki teresapo.

<sup>46</sup> Arirakano Kariri hauaka á Kena taonea Yasu paripusuapo. Fana Kena taonea epo namo heane waene he maparisapo. Arirakano Kena taonea kamania makata rakisia aporo Kapaneame taone aeyaka kimisi pesapo. Ipi apea ipi hokosa makata takamasa warekeno metakarikia Kena taonea kimisi pesapo.

<sup>†</sup> **4:36:** Witi hae potena ayiáka fana aporomo Kotimo someane some kasá ayapo. Witi hae tumora ayiáka aporomo Kotimo someane kesekeea some akarane aporo hinamomo kakimaka risikiako parirakano pasiamora ayapo.

<sup>47</sup> Kimisi pekea rea maiya amo kaiyiáne, Yasu Yutía hauakane metakarikia Kariri hauaka wo pesapakanó kaikia, e Yasu rea pekea someraka, “Nōmo aporo hokosa kára makata takamasa kukusipo. Hokosane mafahoko Kapaneame taonea peae.”

<sup>48</sup> Airakano Yasumo someraka, “Kotimo wakapumo hemakapukua rakira asekeanafonarakano repo anoaki himu hakásaraka hemakapukusafapo.”

<sup>49</sup> Airakano kamania makata rakisia aporoamo someraka, “Aporo fanao, nōmo hokosa kukukohoamo nōmo apea peae.”

<sup>50</sup> Airakano Yasumo someraka, “Né pusie. Nōmo hokosa koteaka rekenapo.” Airakano someane kamaní aporoamo kakimaka ipi apea pukua

<sup>51</sup> ikia kara peane, ipi aporo raipamo e sapenekea someraka, “Ní hokosa fasapo. Koteaka rekenapo.”

<sup>52</sup> Airakano kamania makata rakisia aporoamo someraka, “Fasane masinaka fasare?” Airakano ipu someraka, “Rau samapu wane korokomo ipi kau sisipusane fasapo.”

<sup>53</sup> Airakano hokosamo ipi atamo hemakapuraka, “Rau samapu wane korokomo Yasumo someraka, ‘Ní hokosa koteaka rekenapo.’ Aisa maiya amo kau sisipusane fahoareapo.” Aiyaka hemakapukua ipi soko ipi aseamo soko, ipi hokosamo soko, ipu namina suamo Yasuaki himu hakásaraka hemakapukua risiapo.

<sup>54</sup> Asiamo Yasu Yutía hauaka metakarikia Kariri hauaka paripesa maiya amo, hokosa mafasa ane Kotimo wakapumo hemakapukua rakira yape tetáne ayapo.

## 5

*He kafa he fea aporo hakásá meta makata takamasa Yasumo mafasane oyapo.*

<sup>1</sup> Wakasema nina Yu aporomo Kotiaki kekerehoko hokono kesapo. Hokono akera maiya amo Yasu Yarusaramé sitia hisiapo.

<sup>2</sup> Yarusaramé sitia ekemo rurusane ikia koro yakai otoro mosapo. Ikia koro hakásá metane yano motosa Saro Sipi Ikia Koropo. Arirakano ikia koroane makeraka he kafa kesapo. Yu aporomo Hipuru meaka he kafa ane yano motosa Petésata yano motosapo. He kafa he fea ape mano kakoreasu kisiakipoko á aporo yakai makata tasa warisiapo.

<sup>3</sup> Warisiane aporo metakira hi fausa soko, aporo metakira kakuna masa soko, aporo metakira korosakataesa soko i warisiike, hea makakayahoasimo warisiapo.

<sup>4</sup> [Warisike aseane Uniháemo hepene aporo pekea he kafa makakayarakano, aporo makata tasa warisiane hakásá meta fana pukua, he kakayarakano he tapuane ipi makata takamasane farakano anapo.]

<sup>5</sup> Airakipoko aporo hakásá meta keremisi teti aitimo (38) makata takamasa reke, ape manoa warekeno,

<sup>6</sup> Yasumo asekea hemakapuraka, “Aporoane maiya káramo makata takamasa wareareapo.” Aiyaka hemakapukua Yasumo aporoaki someraka, “Ne makata takamasane fahoasimo hemakapurakarire?”

<sup>7</sup> Airakano aporoamo someraka, “He kakaya ana maiya amo ano hea pukusakipoko asiane, aporo metamo ano hea maka pusufapo. Ano maka punafonorácano kakape puraka reakipoko, aporo meta fana pukua hea tapusesapo.”

<sup>8</sup> Airakano Yasumo someraka, “Ne takahisie. Ní asakapu maweroraka maka pusie.”

<sup>9</sup> Aiohanine aporoane wate faraka takahikia ipi asakapuane maweroraka maka pusuapo.

<sup>10</sup> Fenena maiya amo aporoamo asakapu maka purakano, Yu aporo sisima unihae suamo aporo makata takamasa mafasaki someraka, “Pipu fenena maiyapo. Fenena maiya amo asakapu maka pukupo. Aiyaka fana somemane motosusupo.”

<sup>11</sup> Airakano aporoamo someraka “Aporo ano mafasa amo someraka, ‘Ní asakapu maka pusie,’ airakasapo.”

<sup>12</sup> Airakano ipu someraka, “Asakapu maka pusiesane aporo epamo aiyaka somerakasare?”

<sup>13</sup> Airakano aporo hinamo yakai sarimasakipoko Yasu kokororaka pusuapo. Pusuakipoko aporo makata takamasa mafasamo someraka, “Aporoane eparakapo. Ano himeteripo. E pureapo,” aisapo.

<sup>14</sup> Aiyaka wakasema nina Yasu Kotimo apea koraka reke, epo aporo mafasane aseraka someraka, “Ní makata takamasane farareapo. Makata watikisa rakirane efera hunia rakiakopo. Makata takamasa káranapaka makata watikisane kakaro metakarinie.”

<sup>15</sup> Airakano aporoane pukua Yu aporo sisima suaki someraka, “Yasumo ano mafasapo.”

<sup>16</sup> Airakano ipu hemakapuraka fenena maiya amo Yasumo aporo makata tasane mafasapo. Aiyaka hemakapusuasamo ipu Yasuane mokoatikisapo. Yasumo fenena maiya amo rakisisasamo ipu Yasuane hukurusuapo.

<sup>17</sup> Ipu hukururakano Yasumo someraka, "Maiya suamo nōmo Atamo rakiraka rekenapo. Nōmo soko rakiraka rekenapo."

<sup>18</sup> Aiyaka somerakano Yu aporo sisima suamo, "Yasu rusua kukusapo," aiyaka hemakapusuapo. Fenena maiya yaposane Yasumo metakarikia, arirakano epo someraka, "Kotiane nōmo Atapo." Aiyaka Yasumo ipi yia máfaraka, ano Koti asiapo airakae. Airakasakipoko Yasuane rusua kukusapo, aiyaka Yu aporo sisima suamo hemakapusuapo.

*Yasumo someraka, "Ano Kotimo hokosapo," aisane oyapo.*

<sup>19</sup> Yu aporo sisima suamo Yasuaki hukururakano Yasumo iaki some paripuraka, "Nōmo reaki kakaro somerakaripo. Ano Kotimo hokosasamo, nōmo nī hemakapusua aeyaka rakirafapo. Nōmo Atamo rakirane asekeea hakásá yineraka rakirrapo. Nōmo Atamo rakira ayiáka, nōmo soko hakásá yineraka rakirakanapo.

<sup>20</sup> Atamo himu tumurumo anoane hemakapukua epo ipi makata rakira suane anoaki tarirakanapo. Tarisiane marokeraka makata kára meta tariakosapo. Tarirakano nōmo makata kárane rakiakosapo. Rakirakanrepo asekeea someraka, 'Uao, itifisiafapo,' aihokosapo.

<sup>21</sup> Arirakano Atamo aporo kusua maturikia taeraka yaiya rerane akara ayiáka, nōmo soko ayiáka yaiya rera kakakosapo. Nōmo nī hemakapusua aporo murikimasaki yaiya rerane kakakosapo.

<sup>22</sup> Arirakano Atamo aporo hinamoane fanasihoko hukururafapo. Epo ipi hokosa anoaki someraka, 'Aporo hinamo fanasihokosane nōmo hukurunie,' aisapo.

<sup>23</sup> Asisasamo aporomo Koti makáraana ayiáka Kotimo ipi hokosa makárahoasimo, 'Nōmo hukurunie,' aiyaka Kotimo ipi hokosane murikimaka maresapo. Aporomo Kotimo hokosane makárahoanafonorakano, hokosa pusiesa amo ipi Ata Kotiane soko makáranafapo.

<sup>24</sup> Hao, kaisie. Nōmo reaki kakaro somerakaripo. Nōmo somesane aporo hinamomo kakimaka, arirakano ano pusiesa aki himu hakásaraka hemakapukua risira aporo hinamoane yaiya risike fahokosafapo. Iane hukurukua fanasihokosafapo. Kura faraka farearaka rera takua risikiakosapo.

<sup>25</sup> Hao, kaisie. Nōmo kakaro somerakaripo. Aporo hinamomo Kotiaki himu hakásaraka hemakapunafonane kusua ayiáka risikinapo. Aporo hinamo kusua ayiáka risia amo nōmo meane kaikia kekemarakano, keseké maturikia taena maiya amo i yaiya risikiakosapo.

<sup>26</sup> Yaiya rera kepoane nōmo Atapo. Nōmo Atamo yaiya rerane ipi hokosa anoaki kasapo. Kasasamo yaiya rera kepoane ano sokopo.

<sup>27</sup> Aporomanomo Tákeane anopo. Asiasamo hukuarura maiya amo aporomanomoane parakuhoasimo Atamo ipi hokosa ano murikimaka maresapo.

<sup>28</sup> Fofahokopo. Keseke aporo hinamo su kusua hauaka murisia amo soko, nena yaoa kukua kesa amo soko, ipu suamo nōmo meane kaikia,

<sup>29</sup> hauaka murisiane metakarikia turikia tariakosapo. Aporo hinamo hitaferaka risia maiya amo koteaka risia aporo hinamoane turikia tarirakano iaki nōmo someraka, 'Anoyaki yaiya risie,' aihokosapo. Arirakano aporo hinamo hitaferaka risia maiya amo watikiaka rakiraka risia aporo hinamoane turikia tarirakano iaki nōmo someraka, 'Reane fanasinane nōmo motorakanapo,' aihokosapo.' Aiyaka Yasumo somesapo.

*"Yasu ipi Kotimo hokosapo." Aiyaka repo hemakapusimo tarisiane oyapo.*

<sup>30</sup> Arirakano Yasumo someraka, "Nōmo nī hemakapusuane nōmo kekemarakaka rakirafapo. Kotimo, 'Ayiáka hukurunie,' airakano nōmo ayiáka hukururapo. Epo ano pusiesamo epo hemakapusua ayiáka nōmo soko ayiáka hemakapukua rakirrapo. Nōmo hemakapusua ane makama kesekenapo. Asiasamo nōmo koteaka ereketaeraka hukurukua maroponapo.

<sup>31</sup> Nōmo nī ainane nōmo nī yiamo somehoane siahoasifareapo. Nōmo nī ainane nōmo nī hakásá somerakano repo kotaferakae, aihokosapo.

<sup>32</sup> Arirakano Koti ipi wakinisi meta reke, nōmo ainane somehokosapo. Nōmo ainane Kotimo somerakano epo kakaro somerapo, aiyaka nōmo hemakapurakanapo.

<sup>33</sup> Fana Yu aporo sisima répo aporo metakiraki someraka, 'Yonemo some kepoane kaiyako pusie.' Airakano Yone rea ipu kaiyako pusuapo. Pukua Yone rea perakano Yonemo anoane kakaro somesapo.

<sup>34</sup> Yonemo somesane nōmo kaiyisimo Yonemo somesafapo. Repo kaiyisimo Yonemo somesapo. Asiamo re mafasiakosakipoko nōmo reaki mahemakapukua somerakanapo.

<sup>35</sup> Arirakano nafa faena ayiáka, Yonemo maropohoko pekeea some kasámo, nafa faena ayiáka faesapo. Faesa á re maiya wakasemamo risike epo somesane seseaka kaisiapo.

<sup>36</sup> Arirakano nōmo makata ayianamo Yonemo somesane marokerakanapo. Asiamo nōmo atamo rakiniesane nōmo wakapuaka rakirakanrepo asekeea hemakapuraka, 'E

Kotimo pusiehoareapo.' Aiyaka repo hemakapusimo rakirakanapo. Arakiramo Kotimo ano pusiesane reaki tarirakanapo.

<sup>37</sup> Arirakanano soko nōmo ainane asekeea tarirakanapo. Epo ipi ano pusiesamo nōmo ainane somerakanapo. Somerakanano ipi meane repo kai'rakarifapo. Ipi hikumisiane repo aserakarifapo.

<sup>38</sup> Epo pusierakanano pesa aporoaki repo himu hakásaraka hemakapurakarifapo. Hemakapurafonoraka epo pusiesamo someane soko repo hemakapurakarifapo.

<sup>39</sup> Yaiya risikiakosakipoko repo Kotimo sawia popasane kokoa menoanane. Kotimo sawia popasa amo anoane tarikia somerakanapo.

<sup>40</sup> Somerakanano yia yaiya risikiakosakipoko ano rea re perakarifapo.

<sup>41-42</sup> Repo himuane nōmo aserakaripo. Aseane repo Kotiaki himu tumurumo hemakapurafonorakanano aserakaripo. Asiamo repo ano makáraraka soko metao, mawakase-maraka soko metao, ane nenakamaka makata asiapo.

<sup>43</sup> Arirakanano nōmo atamo hemakapusuanne nōmo kekemarakaka, ipi yano motosa aeyaka ano pesapo. Ano pesane repo patera atarire. Arirakanano aporo metamo epo ipi hemakapusua rupiaka rakipe peraka, epo ipi yano motosa máfarakanano eaki repo patera asere.

<sup>44</sup> Aporomo re asekeea someraka, 'Aporoane kotesapo,' aihoasimo repo namina yia kaumo arakire. Arirakanano Kotimo re aseraka, 'Aporoane kotesapo,' aihoasimo repo rakirafapo. Rakianafonorakanano Kotimo someane soko repo kakimakasifareapo. Koti ipi hakásapo. Koti meta rekenafapo.

<sup>45-47</sup> Repo someraka, 'Isiapo Mosesemo somemaneane kekemarakaka risikino Kotimo isu pasimokoakosapo.' Aiyaka hemakapurane kotafe hemakapurakanapo. Fana Mosesemo anoane popasapo.\* Popasane repo kakimasa satiki, nōmo someane soko kakimakafunureapo. Epo someane repo kakaro kakimakanafonosasamo nōmo someane soko kakimakosafapo. Epo someane kakimakanafonosakipoko epo re pasimokoa Kotiaki hukurukusapo. Nōmo re pasimokoa Ataki hukurukusafapo." Aiyaka Yasumo somesapo.

## 6

*Aporo fae taoseneaki (5,000) Yasumo farawa kasane oyapo.*

*Matiu 14:13-21; Maka 6:30-44; Ruki 9:10-17*

<sup>1-4</sup> Ape Farimaresa Hemakapuko Hokono Keakosa maiyane makerakanano, Yasu paripukua, he Kariri teraporaka taku ra rusuapo. He Kariri ane yano motosa meta he Taipiriasepo. Aporo hinamo makata tasane Yasumo mafarakano aporo hinamo yakaimo asesasamo Yasu patera kekemarape perakanano, Yasu üria hikia ipi aporo hakása purayaki toke

<sup>5</sup> aseane, aporo hinamo yakai perakanano asekeea Firipiaki Yasumo someraka, "Aporo hinamo suamo makata nakosane isiapo ma ropohokosare?"

<sup>6</sup> Aiyaka Firipiante kau aseakosakipoko Yasumo somesapo. Asiamo Yasumo ipi ayiakosane hemakapukua reke Firipiaki kaisiapo.

<sup>7</sup> Kairakanano Firipimo someraka, "Aporo hinamo yakaisakipoko ipu suamo feteaka nasimo mone tu harote kinamo (K200)\* ropohoasifareapo."

<sup>8</sup> Airakanano aporo hakása pura hakása meta Saemone Pitamo mamanea Enitumo someraka,

<sup>9</sup> "Aporo hokosa metamo farawa parosane kakoreasu, arirakanano pokoa tetá ayíáka atoae. Asiamo aporo yakaisakipoko sia nasifareapo."

<sup>10</sup> Airakanano Yasumo aporo hakása puraki someraka, "Aporo hinamo su toaesie." Airakanano asane sususakipoko a toapo. Aporo á toa susuane menosane fae taosene (5,000) ayíáka menosapo.†

<sup>11</sup> Arirakanano Yasumo farawa maka Kotiaki suseaka kurikuriraka rumaraka aporo toaki kasiesapo. Pokoa soko maka suseaka kurikuriraka rumaraka aporo toaki kasiesapo. Kasierakanano aporo hakása puramo kasapo. Karakanano aporo suamo siaraka nesapo.

<sup>12</sup> Siaraka nenakano aporo hakása puraki Yasumo someraka, "Farawa nekea siarakanano metakira yia tokeno mosie. Nenakamaka yaoa mokoatehokopo."

<sup>13</sup> Airakanano i pukua farawa yia tokeno mokoa, mate keno sua kekea komarukua taesapo.

\* 5:45-47: Kotimo sawia Mosesemo popasane oyapo. Stat, arirakanano Kisim Bek, arirakanano Wok Pris, arirakanano Namba, arirakanano Lo, sawi kakorea suane Mosesemo popasapo. \* 6:7: Isiraya aporomo mone hae yano motosa tanariasepo. Asiáne isiapo hemakapukusakipoko kina popasapo. † 6:10: Arirakanano hinamo soko, hokosa soko, metakira menohoanafonosa amo farawane soko, pokoane soko, sia nesapo.

<sup>14</sup> Arirakano farawa hukusi kakorea suane Yasumo makáraraka ayiáka, Kotimo wakapumo hemakapukua rakirane rakirakano aporomo asekea someraka, "Porofete aporo kára hauaka wo peakosaposane ereapo."

<sup>15</sup> Airakano Yasumo hemakapuraka, "Aporo suamo anoane maka Rome kamani aporoane marokeraka unihaeaka asekea rekeasimo mareakosakipoko hemaka apure." Aiyaka Yasumo hemakapukua ipu ayiakohoamo ipi haku üria hisiapo.

*Yasu he kima finirape pusuaney ojapo.*

*Matiu 14:22-33; Maka 6:45-52*

<sup>16</sup> Samapu maiya tuakeramo aporo hakása pura he Kariria pukua,

<sup>17</sup> kasu ripaka Kapaneame taone taku ra poparipukusakipoko, kasu rokua puraka risiapo. Kasu rokua puraka risikiyia yao eresapo. Ereamo Yasu peanafonorakano kasu rokua puraka risiapo.

<sup>18</sup> Rokua puraka risike atifo he kupayaki kára pesapo.

<sup>19</sup> Perakano he numu tipia rokua puraka risike aseane kasu erekeraka Yasu he kima finirape perakano asekea, i kara namoraka himu fasapo.

<sup>20</sup> Himu farakano Yasumo someraka, "Anopo. Namohokopo."

<sup>21</sup> Airakano ipu someraka, "Ao, kasua ripasie." Airakano Yasu kasua parorakano aseane kasuane he fe taku ra foakayia paurakano asesapo.

*"Yasu masiarakapo." Aiyaka kosane oyapo.*

<sup>22</sup> Mituru fiarakano aporo hinamo yia popariraka risiamo hemakapuraka, "Kasu hakása humaresa Yasumo aporo hakása pura ripaka pusuapo, Yasu iyaki hakása ripaka pusuafapo. Yasu masiarakapo." Aiyaka hemakapukua

<sup>23</sup> aseane kasu metakira Taipiriase taone aeyaka pekea karimaresane asesapo. Arirakano Unihae Yasumo farawa soko, pokoa soko, Kotiaki suseaka someaka, makata siaraka nesa hauaka ane makeraka kasu metakirane karimarerakano asesapo.

<sup>24</sup> Arirakano ipu Yasu soko Yasumo aporo hakása purane soko koane fasakeno asekea, kasu karimaresa á i ripaka, ipu Yasu kope Kapaneame taone taku ra rokua pusuapo.

*"Yaiya rekeakosa makata nenane anopo." Aiyaka Yasumo takumeaka somesane oyapo.*

<sup>25</sup> Arirakano aporoamo kasu rokua pukua taku ra pauraka ipu Yasuane kokoa aseraka someraka, "Tisao, ne masinaka pesare?"

<sup>26</sup> Airakano Yasumo someraka, "Nómo kakaro somerakaripo. Repo farawa siaraka nesakipoko repo ano kope apere. Nómo Kotimo wakapumo hemakapukua rakirane rakirakano repo asekea hemakapukua kope perakayiafareapo.

<sup>27</sup> Hauaka wo makata nenane torehokosapo. Makata akipoko rakiakopo. Re yaiya rera makata nena makosakipoko rakinie. Makata nenane nómo reaki kakákoripo. Aporo manomo Tákeane anopo. Yaiya rera makata nenane reaki kakákoripo. Kakasimo nómo Ata Koti ipi yiamo ano murikimaka maresapo."

<sup>28</sup> Airakano ipu someraka, "Kotimo makata rakirane isiapo yakapa rakaere? Kotimo makata yakapa sesenare?"

<sup>29</sup> Airakano Yasumo someraka, "Kotimo makata rakira sesenane oyapo. Kotimo e pusierakano pesa aporoaki himu hakásaraka hemakapukua risikianie."

<sup>30</sup> Airakano ipu someraka, "Isiapo neaki himu hakásaraka risikiako, nómo Kotimo wakapumo hemakapukua rakirane nómo rakikitakae. Isiapo neaki hemakapusimo nómo makata yakapa wakapuaka rakiakosare?"

<sup>31</sup> Wate fana ima yaoa makata nakosa hurupeperakano isiapo makasa kamumamo nesapo. Kotimo sawia poparaka, 'Hepene yapunaka epo makata nakosa kasapo.' Aiyaka popasane isiapo menosapo. Mosesemo<sup>‡</sup> makata rakisia ayiáka nómo rakiasireare?" (*Kisim Bek 16:4; Buk Song 78:24*)

<sup>32</sup> Airakano Yasumo someraka, "Nómo kakaro somerakaripo. Hepene yapunaka makata nená kasáne Mosesemo kasafapo. Arirakano yumo hepene yapunaka kakaro makata nenane<sup>§</sup> nómo Atamo karápo.

<sup>33</sup> Asiamo Kotimo kakaro makata nena karáne e hepene yapunaka perakano hauaka wo aporo hinamo suaki yaiya rerane karápo."

<sup>34</sup> Airakano ipu someraka, "Aporo fanao, makata nenane isuaki yaiya karáka rekeanie."

<sup>35</sup> Airakano Yasumo someraka, "Kakaro yaiya rekeakosa makata nenane anopo. Anoaki himu hakásaraka hemakapukua risike, hunia 'meamoripo,' aihokosafapo. Nómo someane kakimaka risike, 'he nariripo,' aihokosafapo.

<sup>‡</sup> 6:31: Aporoamo Moseseme makárasapo. § 6:32: Yasumo ipiyine takumeaka makata nenane somesapo.

<sup>36</sup> Repo ano aseraka, aseke ayiáka repo anoaki himu hakásaraka hemakapurakarifapo. Hemakapunafonorakano nōmo reaki someraka ayapo.

<sup>37</sup> Aporo hinamo nōmo Atamo anoaki karakano, i ano rea peakosapo. Perakano iaki nōmo peakopo aihokosafapo.

<sup>38</sup> Nōmo nī hemakapusua rakiako pesafapo. Nōmo Atamo ano pusiesamo hemakapusue nōmo rakiako pesapo.

<sup>39</sup> Nōmo Atamo ano pusiesapo. Epo hemakapusuane oyapo. Aporo hinamo epo anoaki kasáne, hakás soko hasaka koakohoamo, suane nōmo metakariakosafapo. Fa ana sere amo iane nōmo maturikia taehoasimo, aiyaka Kotimo hemakapukua someaka maresapo.

<sup>40</sup> Asiamo nōmo Atamo hemakapusuane oyapo. Aporo hinamo metakiramo Kotimo hokosa anoane aseraka someraka, 'E Kotimo hokosapo,' aiyaka someraka, ipu Kotimo hokosa anoaki himu hakásaraka hemakapukua risikino, yaiya rerane mokoakosapo. Asiamo fa ana sere amo iane nōmo maturikia taehokosapo." Aiyaka Yasumo somesapo.

<sup>41</sup> Aiyaka somerakano Yu aporo sisima suamo kaikia mahisisapo. Arirakano Yasumo someraka, "Hepene yapunaka pesa makata nenane anopo," aisane ipu kaikia mahisisapo. Mahisiraka someraka,

<sup>42</sup> "Aporo ane Yasupo. Ipi Yosefemo hokosapo. Ipi wafaya ipi kałyia isiapo aserapo. Mayiáka hepene yapunaka pesaporakanare?"

<sup>43</sup> Airakano Yasumo someraka, "Repo namina susu hisiraka somehokopo.

<sup>44</sup> Aporomo hemakapuraka, 'Nōmo Yasuaki himu hakásaraka hemakapukua rekeakosapo,' aiyaka hemakapura ane nōmo Atamo eaki karakáno, aporoamo ano patera aseakosapo. Patera aserakano fa ana sere amo aporoane nōmo maturikia taehokosapo. Arirakano aporomo anoaki himu hakásaraka hemakpurane nōmo Atamo aporoaki kakanafonarakano aporoamo ano patera aseakosafapo.

<sup>45</sup> Arirakano porofete aporo suamo poparaka, 'Aporo suamo enomakasimo Kotimo tarirapo,' aiyaka popahoareapo. Asiamo Atamo someane aporo hinamomo kakimaka, anoaki risikiako pariraka, anoaki himu hakásaraka hemakapukua risikiakosapo. (Aisaia 54:13)

<sup>46</sup> Arirakano Kotimo hauaka aeyaka pesa aporo hákasamo Ata ane asesapo. Aporo metamo Ata ane asesafapo.

<sup>47</sup> Nōmo kakaro somerakaripo. Kakimara aporo hinamoane Kotiyaki yaiya risikiakosapo.

<sup>48</sup> Yaiya rera makata nenane anopo.

<sup>49</sup> Wate fana ima yaoa makata nenane repo makasa kaua kekemamo nenaka, wakasema risina, keseke kukua kesapo.

<sup>50</sup> Hepene yapunaka makata néná pesane repo maka nenakano yaiya risikiakosapo.

<sup>51</sup> Yaiya rera makata néná hepene yapunaka pesane anopo. Makata nena ane aporo hinamomo nenakano yaiya risikiakosapo. Aporo hinamo su yaiya risikiasimo makata néná kakakosane ano kaupo."

<sup>52</sup> Airakano Yu aporo sisima suamo kairaka saperaka tafatafaraka someraka, "Isiapo nasimo epo kau isuaki mayiáka kakakosare?"

<sup>53</sup> Airakano Yasumo iaki someraka, "Nōmo reaki kakaro somerakaripo. Ano Apromo manomo Táke reke, ano kau ano yapi repo nanafonorakano yaiya rerane re tua kepomaresafapo.

<sup>54</sup> Ano kau, ano yapi, aporomo nenaka, yaiya rerane re tua kepo amarera ayapo. Fa ana sere amo nōmo re maturikia taerakano yaiya risikiakosapo.

<sup>55</sup> Makata nena kepoane ano kaupo. He nena kepoane ano yapipo.

<sup>56</sup> Ano kau soko, ano yapi soko nenakano, né ano tua rekenapo. Ano soko né tua rekenapo.

<sup>57</sup> Atamo ano pusierakano pekea, epo wakapua nōmo kataka marekea rekenapo. Asiamo repo soko anoane nenakano nōmo wakapua repo kataka marekea risikinapo.

<sup>58</sup> Kakaro makata néná hepene yapunaka pesane anopo. Aporo hinamomo nenakano Kotiyaki yaiya risikiakosapo. Arirakano makata néná isiapo makasa kaua kekemamo nesane hakás yiyafapo. Makata ane ipu nekea risina kusuapo. Asiane hepene yapunaka pesa makata néná ane nenakano Kotiyaki yaiya risikiakosapo."

<sup>59</sup> Aiyaka Kapaneame Yu aporomo sarimana apea Yasumo somesapo.

*Yaiya rekeasimo Yasumo somesane oyapo.*

<sup>60</sup> Arirakano Yasumo somerakano ipi patera asesa aporo metakiramo kaikia someraka, "Someane umihoareapo. Mayiáka kakimakosare?"

<sup>61</sup> Aiyaka ipu himumo hemakapusuane Yasumo aseke ayiáka someraka, "Marirakano re hisiraka risikinare?"

<sup>62</sup> Ano Aporomanomo Tákeane pekea nina, fana rea hauaka á parihinakano repo asekea yakapa hemakapukusare?

<sup>63</sup> Arirakano Kotiyaki yaiya risikiakosane Ho Kotesamo karápo. Aporomo kaumo wakapuamo karáfapo. Nōmo someraka one Ho Kotesamo wakapuane soko, yaiya risikiakosamo wakapuane soko someraka ayapo.

<sup>64</sup> Aíyaka somerakanaro repo metakiramo kairaka kaisianeo, kakimarakarifapo." Aíyaka Yasumo somesapo. Arirakano kepomaresa maiya amo Yasumo aporo su asekea hemakapura, "Kakimakanafonosa aporoane ayapo. Ano parakehokosa aporoane ayapo." Aíyaka hemakapusuapo.

<sup>65</sup> Efera hunia Yasumo someraka, "Anoaki himu hakásaraka hemakapukua rekeakosapo, aíyaka hemakapurane Kotimo kakanafonorakano aporoamo anoaki himu hakásaraka hemakapukua rekeakosafapo. Aíyaka nōmo someraka ayapo."

<sup>66</sup> Aíyaka Yasumo somerakanaro eyaki aporo hakásä pura yakaimo e metakarikia pusuapo.

<sup>67</sup> Metakarikia purakano Yasumo ipí aporo hakásä pura keno suaki someraka, "Repo soko ano metakariakosare?"

<sup>68</sup> Airakano Saemone Pitamo someraka, "Unihaeo, meta epayaki isu pukusare? Yaiya rera kepoane nōmo some akare.

<sup>69</sup> Some karakano isiapo kakimarakanapo. Né Kotimo hokosa murikimaka pusiesapo. Makata watikisane kikisiraka kotesa susu rerane nepo. Aíyaka isiapo hemakapurakaripo."

<sup>70</sup> Airakano Yasumo someraka, "Re aporo kenosu ane nōmo murikimasapo. Kenoane S atanemapo irapo."

<sup>71</sup> Aíyaka Isekerio aporo Saemonemo hokosa Yutaseane Yasumo somesapo. Aporo hakásä pura kenoane Yutasepo. Yasu ipiane parakehokosane somesapo.

## 7

*Yasumo ipi mamaneamo somesane oyapo.*

<sup>1</sup> Yasu Karíri hauaka koraka nina Yutía hauaka aeyaka Yu aporo sisima risiamon someraka, "Yasu rusua kukusapo," aisapakano Yasu Yutía hauaka á hisiafapo.

<sup>2</sup> Wate fana Ape Fete\* Kikia Risia maiyane Yu aporo hinamomo Hemakapuko Hokono Kesapo. Hokono keako makeanamo

<sup>3</sup> Yasumo ipi mamaneamo eaki someraka, "Né patera asesa aporo hinamo Yutía hauaka risiamon nōmo wakapuaka rakirane asekeasimo, hauaka one metakarikia Yutía hauaka a hinie.

<sup>4</sup> Aporomo hokopukua rekeakosakipoko ipi makata rakirane faremarekeea rakirafapo. Aporo hinamo suamo asekeasimo mafekemaraka rakirapo. Asiamo nōmo wakapuaka rakirane aporo hinamo suamo asekea neaki himu hakásaraka hemakapusimo rakinie."

<sup>5</sup> Aíyaka ipi mamaneamo Yasuaki himu hakásaraka hemakapunafonoraka aíyaka mahokopariraka somesapo.

<sup>6</sup> Aíyaka somerakanaro Yasumo someraka, "Aporo hinamo suamo asekeasimo makata rakiakosa maiya ane pipu oyafapo. Maiya suamo repo rakiane siahosireapo.

<sup>7</sup> Yumo soko keseke soko repo rakirane aporomo aseraka hisihokosafapo. Anoaki hakasa hisirakanapo. Nōmo kakama someraka, 'Repo watikiaka rakirakanapo.' Airakano aporomo anoaki mahisirakanapo.

<sup>8</sup> Re namina hokono keako hisie. Yumo ano hiakosafapo. Pipu repo maiyapo. Nōmo maiyano harufapo."

<sup>9</sup> Aíyaka e Kariri hauaka yia parisapo.

*Ape Fete Kisiane Hemakapuko Hokono Akera maiya amo Yasu pesane oyapo.*

<sup>10</sup> Yasumo ipi mamanea fana Yarusarame sitia hisiakipoko, Yasu wakasema asekea nina, keseke aporo hinamo suamo aserapaka e tau kesekeea papaterarape hisiapo.

<sup>11</sup> Arirakano Yarusarame sitia Yu aporo sisima metakiramo someraka, "Yasu masiare?" aíyaka hokono kesa apea kope pusuapo.

<sup>12</sup> Arirakano aporo metakira sarimaraka namina susu tau someraka, "Yasu ipi aporo kotesareapo." Airakano aporo metakiramo someraka, "Wae, epo aporo hinamo ikia kara hasaka pusimo karikia tarirakanapo." Aíyaka aporo yakaimo tau me rusuapo.

<sup>13</sup> Me rukua tau meakamaka somesane Yu aporo sisimamo kaikia hukururapaka ipu sakepamo hufitaeaka somesafapo.

<sup>14</sup> Arirakano hokono keraka risikiyia fahoko makerakano Yasuane Kotimo apea pukua some kasapo.

\* <sup>7:2</sup> Mosesemo Isiraya aporo hinamo karikia pukua Iyipi hauaka metakarikia ima yaoa koraka risia maiya amo ipu yaoa ape fete kisia risiane Hemakapuko Hokono Kesapo. Hokono keraka sere kari sumo hokono kerapo.

<sup>15</sup> Some karakano Yu aporo sisimamo fofaraka someraka, "Sawi menonane epo mayíáka enomasarakapo. Eane isiaipo somemane tisa aporo káramo sukurusafapo."

<sup>16</sup> Airakano Yasumo someraka, "Kotimo ano pusiesamo anoaki some kasane nōmo reaki some karakanapo. Nōmo ni hemakapusuane some karakanafapo.

<sup>17</sup> Nōmo ni hemakapusua hákasane nōmo some karakano soko metao, Kotimo hemakapusuane nōmo some karakano soko metao, mayíáka repo hemakapukusare? Kotimo hemakapusuane kekemaraka rakiako hemakapura aporoamo nōmo somesane takekea kepo hemakapukusapo.

<sup>18</sup> Arirakano aporomo ipiane makárahokosakipoko ipi hemakapusuane some karápo. Arirakano ano pusiesa aporoane makárahoko hemakapuraka nōmo kakaro koteaka some karápo. Ano niane makáraraka some karáfapo. Kotafe some karáfapo.

<sup>19</sup> Arirakano Mosesemo somemaneane reaki some kasa nine repo kekemaraka hemakapusuane rakirafapo. Marirakano repo ano rusua kukuko hemakapurakanare?"

<sup>20</sup> Airakano aporo suamo someraka, "Ne masuarareapo. Epamo neaki rusua kukusapakasare?"

<sup>21</sup> Airakano Yasumo someraka, "Fenena maiya hakása metamo nōmo hemakapukua wakapuaka rakirakano repo someraka, 'Epo marirakanare? Fenena maiya yaposane epo koareaerakanapo,' airakasupo.

<sup>22</sup> Asiane repo namina makasa kaua kekemamo aporo hokosa takaperakano, hokosa takapesa hokono ane menorape hikia karimo aporo hokosa kau hahaeraka patehoanie, aiyáka repo namina makasa kaua kekemamo somemane motosapo. Ipu somesane Mosesemo soko ayiakanesapo. Asiamo fenena maiya yiamo sere karia paurakano aporo hokosa kauane hahaeraka patenapo.

<sup>23</sup> Asiamo Mosesemo somemaneane koareaenapaka fenena maiyamo soko, repo aporo hokosa kauane hahaeraka patenapo. Mosesemo ásia ayiáka fenena maiyamo nōmo aporo makata takamasa mafasane marirakano repo saperakanare?

<sup>24</sup> Wakasema asekeea foaka hukuruane siahoasifareapo. Kepoane koteaka hemakapunie. Kepo kakaro hernakapukua ereketae takekea hukuruane siahoasireapo." Aiyáka Yasumo somesapo.

*"Yasuane unihaeaka rekeasimo kotimo murikimasa aporoane ere?" aisane oyapo.*

<sup>25</sup> Yarusarame aporo metakiramo Yasuane aseraka someraka "Aporo rusua kukusaposane ere?"

<sup>26</sup> Aporo suamo kaiyisimo hauaka kakamasakipoko á epo some akare. Epo someane aporo metamo hurutapirakanafapo. Epo someane hurutapirafaraka Kotimo unihaeaka rekeasimo murikimasa aporo Keresoane erakapo," aiyáka ipu hemakapukua somesapo.

<sup>27</sup> Arirakano "Kereso fasereperakano ipi faserepesa kepoane isiaipo hemakapukusafapo. Asiane Yasu ipi takapesa apeane isiaipo asesapo. Asesasamo e Keresofapo." Aiyáka Yarusarame aporo metakiramo somesapo.

<sup>28</sup> Airakano Kotimo apea Yasumo sakepamo someraka, "Repo ano kakaro aserapo. Ano takapesa apeane soko repo aserapo. Repo asesa nine nōmo kakaro kepoane repo himeteraka hemakapurakanafapo. Arirakano ano ni hemakapusua aeyaka kekemaraka pesafapo. Metamo ano pusierakano ano pesapo. Eane repo himeteraka,

<sup>29</sup> arirakano nōmo eane hemakapurapo. Epo ano pusierakano e aeyaka ano pesapo."

<sup>30</sup> Airakano Yasuane ipu waseremakosapoko asiane, waseremakosa maiyane haruhoanafonosekeno e waseremasafapo.

<sup>31</sup> Arirakano aporo hinamo yakaimo Yasumo someane kakimaka someraka, "Yasumo wakapu rakirane namo kakaro kara kotesapo. Yasumo makata rakisiane aporo meta fasere aperamo rakikia marokehoasifapo. Asiasamo Yasuane Kotimo unihaeaka rekeasimo murikimasa aporoane, e kereso reapo," aisapo.

*Sikiriti aporoaki Yasuane waseremako pusiesane oyapo.*

<sup>32</sup> Arirakano aporo yakaimo someane kaikia koaka purakano Fereze aporomo kaikia, ipu soko, pirisiti aporo káramo soko, Kotimo apea sikiriti aporo asekeea risiaki someraka, "Repo Yasu waseremako pusie." Airakano Yasu rea sikiriti aporo pusuapo.

<sup>33</sup> Perakano Yasumo someraka, "Maiya wakasema metamo ano reyaki rekeakosapo. Wakasema nina epo ano pusiesamo hauaka yia ano parihiakosapo.

<sup>34</sup> Hisiakipoko repo ano koane fasekeno aseakosapo. Ano hiakosa hauaka á re soko hiakosane siahoasifareapo."

<sup>35</sup> Airakano Yu aporo sisima suamo Yasumo someane himeteraka namina susu someraka, "Isiaipo eane asekosafapo, airakane e ma hiakosarakapo. Yu aporo hoanafonoso amo apea hiakosarakapo. Á hinaka Yu aporo metakira risiaki soko, Yu aporo hoanafonosa risiaki soko, somehoko hiakosarakanareapo.

<sup>36</sup> Epo someraka, ‘Ano koane aseakosafapo. Ano hiakosa hauaka á re hiane siahoasi-fareapo,’ airakane, some kepo ane mairakarirakapo.” Aiyaka Yu aporo sisima suamo somesapo.

*He fuakataena Yasumo kakakosaposane oyapo.*

<sup>37</sup> Hokono akera maiya amo sere kesekeane sere kárapo. Sereamo Yasu takahikia sakepamo someraka, “He narirakano ano rea he nako peae. Kakimara aporo reo, re ano rea pekea he nesie.

<sup>38</sup> Arirakano Kotimo sawia popasane oyapo. He kafa fuafuana ayíáka anoaki himu hakásaraka hemakapura aporo ane himua yaiya rera heane komarukua sakopeperaka rekeakosapo.” Aiyaka popasane Yasumo takumeaka somesapo.

<sup>39</sup> Asiamo Yasumo somesamo kepoane oyapo. Aporomo Yasuaki himu hakásaraka hemakapukua risikino Ho Kotesa i himua komarukua muriakosapo. Arirakano Yasumo somesa maiya amo Kotimo faesa hauaka yapura Yasu hiasiraka reke, Ho Kotesa hauaka wo haru pesafapo.

*Aporomo kekepo hemakapusuane oyapo.*

<sup>40</sup> Yasumo someane aporo yakai sarimasamo kaikia someraka “Aporoane kakaro porofete apororeapo.”

<sup>41</sup> Airakano aporo metakiramo someraka, “Keresoane epo.” Airakano aporo metakiramo someraka, “Kariri hauaka aeyaka Kereso perafapo.

<sup>42</sup> Arirakano Kotimo sawia popasane oyapo. Tefetemo aporo iramo Kereso takapeakosapo. ‘Tefetemo ipi ape sumu Petereheme taonea takapeakosapo.’ Aiyaka popahoareapo.”

<sup>43</sup> Aiyaka somerakano aporo sarimasamo kekepo hemakapusuapo.

<sup>44</sup> Ipu metakiramo, “E tipura makeanie,” aisapo. Aisane kakaro tipura makesafapo.

*Pirisiti aporomo Yasuaki himu hakásaraka hemakunafonosane oyapo.*

<sup>45</sup> Arirakano Kotimo ape asekea risira sikiriti aporomo Yasuane metakarikia pariperakan, pirisiti aporo káramo soko, Ferese aporomo soko, ipu someraka, “Yasu karikia peanafonosane mainakano asiare?”

<sup>46</sup> Airakano sikiriti aporomo someraka, “Epo somera ayíáka aporo metamo fana somesafapo. Epo somera ayíáka fana somerakano isiaipo kaisiafapo.”

<sup>47</sup> Airakano Ferese aporomo someraka, “Yasumo re mahoperaka epo kotafe somerakan, repo soko kakimarakanare?

<sup>48</sup> Isiaipo ísina suamo Yu aporo sisimamo soko, Ferese aporomo soko suamo epo somerakasane kakipayarakanapo. Isiaipo hakása metamo soko kakimarakanafapo.

<sup>49</sup> Aporo hinamo yakai sarimasamo Mosesemo somemaneane koteaka hemakapurakarifapo. Hemakunafonorakano iane fanasina hauaka pukusapo.”

<sup>50</sup> Airakano Ferese aporo namina yia Nikitímase ipi fana Yasuaki somesa epo Ferese aporo suaki someraka,

<sup>51</sup> “Isiaipo somemane motsakipoko, somemane ane aporomo koretaeraka watikiaka rakisiaporakano ipiaki fana kairapo. Kaikia kakaro yasikino asekea, fanasinane marerapo. Aporoaki kaiyasilaka, fanasinane marerafapo.”

<sup>52</sup> Airakano ipu someraka, “Né soko Kariri aporore? Kotimo sawi koteaka menoohanie. Porofete aporoane Kariri hauaka aeyaka perafapo. E porofete apororakanafareapo.” Aiyaka ipu hemakapukua somesapo.

<sup>53</sup> Aiyaka someaka marekea aporo su namina apea pusuapo.

## 8

*Hinamo aporo metayaki mokome purakano asekea Yasu rea Ferese aporomo karikia pesane oyapo.*

<sup>1</sup> [Aporo namina apea purakano Yasu ipi haku üri Orofea hisiaipo.

<sup>2</sup> Mituru fiarakano Kotimo apea Yasu paripukua, aporo yakai e rea sarimarakan e kake some kasapo.

<sup>3</sup> Some karaka reakipoko, hinamo aporo asea aporo metayaki mokome purakano aporo metakiramo asekea, hinamoane karikia pekea, Kotimo somemane tisa aporomo soko, Ferese aporomo soko e karikia Yasu rea pesapo. Pekea aporo su sarimaraka risiakipoko aporo suamo asekeasimo hinamoaki someraka, “Aporo su hikumisia né á reae,” aiyaka hukurusuapo.

<sup>4</sup> Hukurukua ipu Yasuaki someraka, “Tisao, hinamoane aporo metayaki mokome purakano aporo metakiramo asesapo.

<sup>5</sup> Fana Mosesemo somemane motsane oyapo. Hinamo aporo metayaki mokome purakanone, hinamoane ekemo karesimo makasuhoanie. Aiyaka Mosesemo somemane

motosapo. Somemané motosasamo nómó mayiáka hemakapurakanare?" Aiyaka ipu Yasuaki somesapo.

<sup>6</sup> Aiyaka somehoane Yasumo hasaka somerakarihoamo, ipu Yasu kau aseako aiyaka mahoperaka eane hukurukusakipoko somesapo. Aiyaka somerakano Yasu arupekea titiwaruraka kake, hokonomo hauaka poparaka kayapo.

<sup>7</sup> Kakeno ipu namina efera hunia kaikia, efera hunia kaikia airakano Yasu arupekea kaina takahikia someraka, "Repo aporo hakásá metamo makata watikiaka rakianafonan-amo, ekeane maka nómó ní fana kareanie."

<sup>8</sup> Aiyaka Yasu efera hunia arupekea titiwaruraka kake hauaka poparaka kayapo.

<sup>9</sup> Poparaka kayakipoko aporo sisima fana pusuakipoko, aporo hakásá hakásaraka pukua faseneno, hinamoane hakásá yia rekeno Yasumo asesapo.

<sup>10</sup> Yasu arupekea kaina takahikia hinamoaki someraka, "Hinamo neo, aporo su masiare? Aporo hakásá metamo né hukuruko yia rekenare?"

<sup>11</sup> Airakano hinamoamo someraka, "Wae, su pukua fahoareapo." Airakano Yasumo someraka, "Nómó soko ne hukurukusafapo. Né pusie. Puraka keseke efera hunia watikiaka rakiraka kakakopo," aiyaka Yasumo somesapo.]

*"Aporo hinamo suamo faesamo kepoane anopo," aiyaka Yasumo somesane oyapo.*

<sup>12</sup> Aporo hinamo sarimarakano Yasumo efera hunia someraka, "Hauaka wo aporo hinamo risiámo faesamo kepoane anopo. Aporo hinamomo ano patera asekea risiane i katosa pukusafapo. Yaiya rera faesa pukusapo."

<sup>13</sup> Airakano Fere se apromo someraka, "Nómó ní airaka yiamó nómó ní yine somerakaripo. Nómó ní airaka yiamó isuaki somehoane siahoasifareapo."

<sup>14</sup> Airakano Yasumo someraka, "Nómó ní somerakane kakaro somerakaripo. Ano pesa hauakane soko ano hiakosa hauakane soko nómó ní hakásá hemakapurakanapo. Asiane repo hemakapuraka, 'E pesane mayiáka pesarakapo. Ehakosane mayiáka hiakosarakapo.' Aiyaka repo himeteraka hemaka apure.

<sup>15</sup> Apromo ipi hemakapusua hukuarura ayiáka repo hukururakanapo. Asiane Yumo nómó reane hukururakanafapo.

<sup>16</sup> Arirakano nómó hukururakanone koteaka hukurukua maroponapo. Hukurukua maroponane nómó ní hemakapusua aeyaka hukurukua maroponafapo. Atamo ano pusiesa amo hemakapusuane nómó kekemaraka hukurukua maroponapo.

<sup>17</sup> Arirakano repo somemané sawia poparaka, 'Wikini si aporo tetámo makata asesa hakásá yineraka somerakano, kakarorakae airapo.' Aiyaka popahoareapo.

<sup>18</sup> Arirakano nómó ní somerakane soko, nómó Atamo ano pusiesamo epo anoane somerakane soko, etapo wikini si tetámo hakásá yineraka somerakayapo."

<sup>19</sup> Airakano ipu someraka, "Ní Ata mayare?" Airakano Yasumo someraka, "Ano soko nómó Ata soko repo himeteane. Repo ano hemakapusua satiki, nómó Atane soko repo hemakapufunureapo."

<sup>20</sup> Aiyaka Yasumo Kotimo apea some kasápo. Arirakano ape rumua mone kera maua taesa ane makeraka Yasu reke some kasapo. Arirakano ipu Yasuaki saperakano yia e kukusa maiya fasere peanafonosasamo e hukurukua waseremasafapo.

*"Ano hiakosa hauaka á re hiane siahoasifareapo," aiyaka kakimakanafonosa aporoaki Yasumo some kasane oyapo.*

<sup>21</sup> Yasumo efera hunia someraka, "Nómó reane metakarikia hiakosapo. Ano hisiakipoko repo ano kokoa aseakosafapo. Re watikiaka yaiya rakiraka risina kukua keakosapo. Ano hiakosa hauaka á re hiane siahoasifareapo."

<sup>22</sup> Airakano Yu aporo sisimamo someraka, "Epo someraka, 'Ano hiakosa hauaka á re hiane siahoasifareapo,' airakae. Airakane kepoane yakaparakapo. Ipi yia makukusarakapo."

<sup>23</sup> Airakano Yasumo someraka, "Re hauaka wo risikinapo. Ano yapunaka pesapo. Re kakaro hauaka aporopo. Hauaka one kakaro nómó hauakafapo.

<sup>24</sup> Nómó fana somesane efera hunia somerakanapo. Re watikiaka yaiya rakiraka risina kukua keakosapo. Ano ni yaiya rerapo.\* Asiamo some one repo kakimakanafonarakanone re yaiya watikiaka rakiraka risina kukua keakosapo."

<sup>25</sup> Airakano ipu someraka, "Né epare?" Airakano Yasumo someraka, "Nómó fana reki some kasa yine, anopo.

\* **8:24:** Kotimo Moseseaki someraka, "Ano ni yaiya rerapo," aisapo. (Kisim Bek 3:14). Asiamo Yasumo hakásá yineraka somerakano aporo suamo hemakapuraka Yasumo Kotiane mawakasemasapo. Yasumo airakano ipu sapesapo.

<sup>26</sup> Repo makata ainane nōmo reaki some kakakosane kára kakenapo. Reaki hukurukusane kára rekenapo. Nōmo Atamo ano pusiesamo ipi kakaro somerapo. Epo someane nōmo kakimaka aporo hinamo suaki somerakanapo."

<sup>27</sup> Aiyaka ipi Ata Kotiane Yasumo somerakanano ipu kairaka himetesapo.

<sup>28</sup> Himeterakano Yasumo someraka, "Aporomanomo Tákeane anopo. Ano ira matopesa paremarekeea máfaraka mapoana maiya amo amo ni yaiya rerapo, aiyaka repo hemakapukusapo. Maiya amo repo someraka, 'Epo ipi hemakapusuane rakiafareapo. Ipi Atamo somerakanano someane somehoareapo.' Aiyaka repo somehokosapo.

<sup>29</sup> Arirakanano epo ano pusiesamo ano metakarirafapo. E anoyaki rekenapo. E sese-hoasimo nōmo rākirakanano epo ano metakarirafapo."

<sup>30</sup> Airakanano aporo hinamo yakaimo Yasumo someane kakimaka eaki himu hakásaraka hemakapusuapo.

*Yasumo someraka, "Re tonotaehokosapo," aisane oyapo.*

<sup>31</sup> Arirakanano Yasumo someane Yu aporo hinamomo kakimarakano iaki Yasumo someraka, "Nōmo someane kakimaka risikino, re kakaro ano patera asesa aporo hinamoane risikinapo.

<sup>32</sup> Kakaro someane repo kakimarakano kakaro someamo re tonotaehokosapo."

<sup>33</sup> Airakanano ipu someraka, "Isu tonotaehokosapo, airakane kepoane yakaparakapo. Eparahamemo aporo ira wainepe pesane isupo. Aporo metakiramo isu roporakanano isu tipura arakira ayíáka isiaipo aporo metakirapoko raiparaka rakisiafapo. Isu raiparaka rakisimo aporo metamo ropohoanafonosasamo epo isu tonotaehokosapo, aisane mayíáka tonotaehokosare?"

<sup>34</sup> Airakanano Yasumo someraka, "Nōmo kakaro somerakaripo. Aporomo watikiaka rakira amo wafayane makata watikisa ayapo. Makata watikisa amo someraka, ayikanie, airakanano aporomo kakimaka raiparaka rakirapo.

<sup>35</sup> Arirakanano atamo ipi hokosane metakarirafapo. Aporo metaki hokosane roponafapo. Asiane aporo raipa roposa wafayamo ipi hemakapuraka aporo raipane metakarikia aporo metaki roponapo.

<sup>36</sup> Arirakanano makata watikisamo reane tipura kesaka risiane, Kotimo hokosamo re tonotaerakanano, re kakaro tonotaesa risikiakosapo.

<sup>37</sup> Re Eparahamemo aporo ira wainepe pesane nōmo hemakapurakaripo. Eparahamemo aporo ira wainepe pesa yiamo ano rusua kukuko hemaka apure. Nōmo someane repo kakimakanafonosasamo ano rusua kukuko hemaka apure.

<sup>38</sup> Asiamo nōmo Atamo anoaki makata tarisiane nōmo ní reaki somerakanapo. Someane repo kakipayarakanano, repo namina atamo somesane kakimarakananapo."

<sup>39</sup> Airakanano ipu someraka, "Isiaipo atamo wainepe pesa Eparahamepo." Airakanano Yasumo someraka, "Re Eparahamemo hokosa wainesa satiki Eparahamemo rakisia ayíáka repo rakiafunureapo.

<sup>40</sup> Rakiafunusa nine repo ano rusua kukuko hemaka apure. Kotimo kakaro someane nōmo kaikia reaki some kasapo. Some karakanano repo ano rukusakipoko hemaka apure. Ayíáka Eparahamemo hemakapusuafapo.

<sup>41</sup> Asiamo repo namina atamo hemakapusuane repo arakire." Airakanano ipu someraka, "Ikia oto hokosane isufapo. Isiaipo Ata hákasa Koti ipipo."

<sup>42</sup> Airakanano Yasumo someraka, "Repo Koti Ata hemakapusua satiki repo himu tumuruano hemakapufunureapo. Koti rea hauaka aeyaka ano pesapo. Ano ní hemakapusua aeyaka ano pesafapo. Kotimo ano pusierakanano pesapo.

<sup>43</sup> Nōmo someane kaikia hemakapunafononane marirakanonare? Nōmo someane repo kakimako hisiraka risiasamo, nōmo someane repo kaikia hemakapurakarifapo.

<sup>44</sup> Repo atane Satanepo. Repo atamo hemakapusuane repo seseaka kekemaraka rakiranapo. Aporo rusua kukusimo kepomaresane epo kepomaresapo. Arirakanano kakaro somerane epo rukupateraka metakarisiasamo epo kotafe somerane hákasa hemakapupapo. Kakaro someane hakása soko Satane ipia kakenafapo. Kotafe someane susu e himua komarukua rekenapo. E himu aeyaka kotafe someane susu some karaka rerapo. Kotafe someane kepoane Satanepo.

<sup>45</sup> Nōmo ní someane kakaro susu somerapo. Kakaro susu somerakanano repo kaki-marakarifapo.

<sup>46</sup> Nōmo watikiaka hemakapukua rakirano repo asesare? Wae. Repo asesafapo. Nōmo kakaro somerakanano yia marirakanano repo kakipayaraka risikinare?

<sup>47</sup> Kotimo someane ipi hokosamo kairapo. Re Kotimo hokosaahoanafonosasamo Kotimo someane repo kaiyako hisiane," aisapo.

*"Eparahame hokono mareasiraka ano yaiya reapo," aiyaka Yasumo somesane oyapo.*

<sup>48</sup> Airakano Yu aporo sisimamo someraka, “Né Sameria aporopo.<sup>†</sup> Yatafumo né ho masapo. Isiapo kakaro somerakaripo.”

<sup>49</sup> Airakano Yasumo someraka, “Yatafumo ano ho masafapo. Aíyaka repo somerakane repo kakaro somerakarifapo. Nōmo Atane nōmo makama fanaraka makárarakanapo. Arirakano repo ano makama kesekeraka mawakasemarakanapo.

<sup>50</sup> Arirakano nōmo ni yia yano motosa makáraraka somehoko hemakapurakarifapo. Kotimo ano yano motosane makárahokoso. Ano makárahokosane Kotimo makárahokoso. Epo aporo hinamo suane takekepa parakuhokoso.

<sup>51</sup> Arirakano nōmo reaki kakaro somerakanapo. Nōmo someane aporo hinamomo kakimarakano ane, i kakaro kukusafapo. Iane yaiya risikiakoso.

<sup>52</sup> Airakano Yu aporo sisimamo someraka, “Yatafumo né hoane kakaro mayereapo. Asiamo né masuaraka himu mahimeteraka somerakae. Eparahame kusuapo. Porofete aporo soko kusuapo. Asiāne nōmo someraka, ‘Nōmo someane kakimara aporo hinamoane kukusafapo. Yaiya risikiakoso.’

<sup>53</sup> Aisa nine Eparahame kusuane nōmo hurutapiranakanare? Né aporo unihae kárare? Porofete aporo soko kusuapo. Né epapaka hemakapurakanare?”

<sup>54</sup> Airakano Yasumo someraka, “Ano n̄l yia makáraraka somesa satiki nenakamaka rupiaka somehoafunureapo. Asiane nōmo Atamo ano makáraraka marerakanapo. Nōmo Ataki repo Kotipo airapo. Nōmo Atane repo Koti hakásá yiyo. Koti hakásá yiamo ano makárarakanapo.

<sup>55</sup> Eane repo kakaro koteaka hemakapusufapo. Eane nōmo kakaro hemakapurakanapo. Asiamo nōmo e asekeanafonoraka nōmo somesa satiki nōmo kotafe somehoafunupo. Repo kotafe somera ayiáka nōmo somerafapo. Nōmo eane hemakapuraka epo someane nōmo kakaro kaikia kekemarapo.

<sup>56</sup> Arirakano ano hauaka wo peakosane repo makasa kaua kekema Eparahamemo hemakapusuapo. Ano peakosane hemakapukua seseraka reapo.”

<sup>57</sup> Airakano Yu aporo sisimamo Yasuaki someraka, “Eparahameane nōmo asesare? Né keremisi fifiti (50) ayiáka né reefapo. Né sisimafapo. Nōmo mayiáka Eparahame asesare?”

<sup>58</sup> Airakano Yasumo someraka, “Nōmo kakaro somerakaripo. Eparahame hokono mareasiraka ano yaiya reapo.”

<sup>59</sup> Airakano Yu aporo sisimamo Yasuane kareakosakipoko eke morakano asekea Yasu fararererape pukua Kotimo apeane metakarikia pusuapo.

## 9

*Aporo hi mesa Yasumo mafasane oyapo.*

<sup>1</sup> Yasu ikia kara puraka aseane aporo meta hi mesa rekeno asesapo. Aporoane ipi kaiyiamo takapesa maiya amo hi mesapo.

<sup>2</sup> Aporo hi mesane asekea aporo hakásá puramo Yasuaki someraka, “Tisao, aporo hi mesane epamo watikiaka rakisiakipoko e fanasiraka hi mesare? Epo ipi watikiaka rakisiakipoko e fanasisare? Ipi kaiyiape wafaya tetapō watikiaka rakisiakipoko e fanasisare? Epamo watikiaka rakisiakipoko e fanasisare?”

<sup>3</sup> Airakano Yasumo someraka, “Epo ipi watikiaka rakisiakipoko e fanasiraka hi mesafapo. Ipi wafayape kaiyiape tetapō watikiaka rakisiakipoko e fanasiraka hi mesafapo. Kotimo wakapuamo e hi mafarakano aporo suamo asekeasimo e takapesa maiya amo hi mesapo.

<sup>4</sup> Arirakano erehosairakaya maiya faena yiamo nōmo makata rakirakanapo. Kotimo ano pusiesasamo epo makata rakirane isiapo rakiane siahoasireapo. Ereamo nōmo soko repo soko makata rakiakosafapo. Erehoko makerakanapo.

<sup>5</sup> Ano hauaka wo areamo aporo hinamo hauaka wo risiama faenane anopo.”

<sup>6</sup> Aíyaka Yasumo someaka ororoa torofaeraka, hokonomo sosokeraka maka, aporo hi mesane hia paisiapo.

<sup>7</sup> Ororomo paikia marekea Yasumo eaki someraka, “Ne pukua he Siroame kafa á ne hikumisiane kusuhoko pusie.” Airakano he Siroameane namo meaka he rakemása aíyaka yano motosapo. He kafa á aporoane pukua, hikumisi kusuhoe himo koteaka asesapo.

<sup>8</sup> Aserakano aporo ipi tákemo soko, fana mone kakasimo kakeno asesa aporoamo soko someraka, “Aporo fana mone kakasimo kakesuane ere?”

<sup>9</sup> Airakano aporo metakiramo someraka, “Ao, aporo ayapo.” Airakano aporo metakiramo someraka, “Érakanafareapo. Aporo meta e hikumisi yaisia rekenapo. Aporo

<sup>†</sup> **8:48:** Yasuane Sameria aporo reapo, aíyaka hokomaresamo kepoane oyapo. Sameria aporoane Yu aporoyaki yunuraka risiapo.

ayarakanareapo." Airakano aporo hi mesa fasamo someraka, "Ao, mone kakasimo kakesuane anopo."

<sup>10</sup> Airakano ipu someraka, "Mayiáka né hi fasare?"

<sup>11</sup> Airakano epo someraka, "Aporo meta ipi yano motosa Yasumo ororoa torofaeraka, ano hia paikia someraka, 'Né pukua he Siroame kafa kusuhoko pusie.' Airakano ano pukua he kafa kusuhoane koteaka asesapo."

<sup>12</sup> Airakano ipu someraka, "Yasu ma rekenare?" Airakano aporoamo someraka, "Ano himeteripo. E ma pusuarakapo," aisapo.

<sup>13-14</sup> Arirakano fenena maiya amo aporo hi mesane Yasumo mafasapo. Mafarakano ipu e karikia Ferese aporo risia á karikia pusuapo.

<sup>15</sup> Ferese aporo risia á karikia perakano, Ferese aporomo aporo hi mesa mafasaki someraka, "Né hi mesane mayiáka fasare?" Airakano epo someraka, "Aporo metamo ororo maka ano hia paisiane hemo kusuhoane fasapo. Faraka koteaka aserakanapo."

<sup>16</sup> Airakano Ferese aporo metakiramo someraka, "Fenena maiya amo epo makata rakiasasamo e Kotimo pusierakano pesa aporo ayafareapo." Airakano aporo metakiramo someraka, "Epo wakapuaka rakirane nena aporo watikiaka rea aporomo ayiáka wakapuaka rakirafapo." Aiyaka namina himumo kekepo hemakapurukua tafatafasapo.

<sup>17</sup> Tafatafaraka aporo hi mesa mafasaki Ferese aporomo efera hunia someraka, "Né hi mafasa aporoane nōmo epapaka hemakapurakanare?" Airakano aporo hi mesa mafasaki someraka, "E porofete apororeapo."

<sup>18</sup> Airakano Yu aporo sisimamo someraka, "Aporoane ipi kaíyiamo takapesa maiya amo e hi mesarakapo. Kakaro hi mesa mafasarakapo." Aiyaka hemakapuraka ipi kaíyiape wfaya tetá peaesapo.

<sup>19</sup> Peaerakano pesapo. Perakano Yu aporo sisima amo someraka, "Aporoane tetápō titi hokosare? Hi mesa takapesare? Yumo koteaka aserane mayiáka koteaka aserakanare?"

<sup>20</sup> Airakano ipi kaíyiape wfaya tetápō someraka, "Eane etapo hokosapo. Takapesa maiya amo e hi mesapo.

<sup>21</sup> Yumo koteaka aserane mayiáka aserakanarakapo. E hi mafasane aporo eparakapo. Eaki kaíyinie. E ipi aporo rauasasamo ipi yiamo hemakapurakanarakayiapo. Epo somehoane siahosireapo." Aiyaka tetápō somesapo.

<sup>22</sup> Tetápō Yu aporo sisima ane namoraka risiasamo aiyaka somesapo. Tetápō somehoasiraka fana Yu aporo sisimamo someraka, "Aporo metamo someraka, 'Yasu ipi Keresopo,' airakanone aporoaki Yu aporomo sarimana apea peakopo, aihokosapo." Aiyaka Yu aporo sisimamo somesapo.

<sup>23</sup> Aiyaka somesasamo ipi kaíyiape wfaya tetápō hemakapuraka, "Etoaki peakopo, aihosireapo." Aiyaka hemakapuraka tetápō someraka, "Aporo hi mesa mafasane aporo rauasasamo e ipiaki kaiyinie," aisapo.

<sup>24</sup> Arirakano efera hunia Yu aporo sisimamo aporo hi mesa mafasaki peaesapo. Peaerakano pesapo. Perakano ipu someraka, "Kotimo kaiyisimo nōmo kakaro aumaraka somehoanie. Koti makama fanahoanie. Yasumo himu watikiaka reane isiapo hemakapurakaripo."

<sup>25</sup> Airakano aporoamo someraka, "E himuane nōmo aserifikapo. E himuane kotesarakapo. E himuane watikisarakapo. Ane nōmo hemakapurakanafapo. Asiāne nōmo makata hakása hemakapusue oyapo. Ano fana hi mesa reane, yumo nōmo koteaka aserakanapo. Ane nōmo hemakapurakanapo."

<sup>26</sup> Airakano ipu someraka, "Epo mayiáka né hi mafasare?"

<sup>27</sup> Airakano epo someraka, "Nōmo reaki pipu somerakasafare? Somerakasane repo kaimarakarifapo. Marirakano efera hunia anoaki kairakanare? Repo eane patera asekeaa risikiakosakipoko somerakanare?"

<sup>28</sup> Airakano ipu saperaka eaki mainamarekea someraka "Aporoane patera asesa aporoane nepo. Isu Moseeseaki somesapo, aiyaka isiapo hemakapurakaripo. Aporo ane maeyaka pesarakapo, aiyaka isiapo hemakapurakaripo."

<sup>29</sup> Kotimo Moseeseaki somesapo, aiyaka isiapo hemakapurakaripo. Aporo ane maeyaka pesarakapo, aiyaka isiapo hemakapurakaripo.

<sup>30</sup> Airakano aporo hi mesa mafasaki someraka, "Repo mairakare? Re yaiya himeterire? Repo someraka, 'Aporoane maeyaka pesarakapo,' aiyaka repo somerakasa, aporoamo ano hi mafasapo.

<sup>31</sup> Aporo himu watikiaka hemakapurukua reamo Kotiaki wárakano Kotimo kairafapo. Kotiaki kekereraka Kotimo hemakapusua rakirane rakiraka reamo wárakano, Kotimo kairapo. Ane isiapo hemakapurakanapo.

<sup>32</sup> Wate fana hauaka kara one kepomaresa maiya amo soko, aporo wainepe pesa makasa kamuma risia maiya amo soko, makasa kaua risia maiya amo soko, ata rea maiya

amo soko, aporo ipi kafyiamo taka apera maiyamo hi mesa takapesane aporo metamo mafasapakano isiaipo kairafapo. Fana ayíáka mafasafapo.

<sup>33</sup> Kotimo makata rakirane rakiako pusiehoanafonosa satiki, aporoamo ayíáka mafahoa-funufapo.\*

<sup>34</sup> Airakano ipu someraka, “Ní atane soko ní amane soko himu watikiaka reke, né soko himu watikiaka takapesapo. Né kotesapaka isuaki some karakáñare? Isiaipo nōmo someane kaiyakosafapo. Yu aporomo sarimana ape one metakarikia pusie.” Airakano e pusuapo.

<sup>35</sup> Pusuakipoko aporo hi mesa mafasaki hukurukua pusiesane Yasumo kaikia, aporoane kokoa aseraka someraka, “Aporomanomo Tákeaki nōmo himu hakásaraka hemakapu-rakanare?”

<sup>36</sup> Airakano aporoamo someraka, “Ape neo, eaki himu hakásaraka hemakapuko anoaki tarikia somesie. Eane epare?”

<sup>37</sup> Airakano Yasumo someraka, “Nōmo yumo aserakasane anopo. Nōmo néaki somerakanapo.”

<sup>38</sup> Airakano aporoamo someraka, “Unihaeo, nōmo neaki himu hakásaraka hemakapu-rakanapo.” Aiyaka epo kekereaka somerakano

<sup>39</sup> Yasumo someraka, “Aporo hinamo Kotiaki himu hakásaraka risiane soko, aporo hinamo Kotiaki himu hakásaraka risikianafonosane soko, parakuuhoko ano hauaka wo pesapo. Aporo metamo someraka, ‘Nōmo makata su aserafapo,’ aisa aporoane hi faeraka rekeakosapo. Arirakano aporo metakiramo someraka, ‘Ano siapo. Nōmo himo makata su aserapo,’ aisa aporoane hi katoraka rekeakosapo.”

<sup>40</sup> Airakano Ferese aporo makeraka risiamo kaikia someraka, “Isu hi mesa risikino nōmo asekea somerakanare?”

<sup>41</sup> Airakano Yasumo someraka, “Repo someraka, ‘Isu hi mesa risikinapo,’ aiyaka hufitaesa satiki, re himu watikisane nōmo mafahoafunureapo. Asiāne repo hufitaerakarifapo. Repo someraka, ‘Isiaipo makata su hemakapukua, arirakano makata su asekea siaraka risikinapo.’ Aiyaka somerakane re himu watikisane yaiya risikinapo.” Aiyaka Yasumo somesapo.

## 10

*Saro pipi keasimo rurusane takumeaka somesane oyapo.*

<sup>1</sup> Yasumo aporo hinamoaki efera hunia someraka, “Nōmo reaki kakaro somerakaripo. Saro pipi rurusa aporo ikia koro aeyaka peanafonorka, ruru tipi aeyaka tapikia perakano aporoamo saro pipiane mokoatikiraka hakimako perapo.

<sup>2</sup> Aporo ipi ikia koro aeyaka perakano saro pipi asekea rera aporo ayapo.

<sup>3</sup> Saro pipi asekea rera aporoane ruru kakarua peasimo, ikia koro asekea rea aporomo ikia koroane ropakamarapo. Ropakamarakano saro pipi asekea rera aporomo saro pipi yano taesane yano hokoa wáhoane, saro pipi su perakano namina asekea rera aporomo karikia yaoa purapo.

<sup>4</sup> Asekea rera aporo fanaraka purakano, epo meane ipu kaikia kekemarape purapo.

<sup>5</sup> Saro pipi asekea rekeanafononane, ipu kekemarape purafapo. Me kaiyiáne me meta kairakarakano teketarirapo.”

<sup>6</sup> Aiyaka Yasumo takumeaka somerakano, ipu some kepoane himetesapo.

*Yasumo someraka, “Saro pipi asekea rera aporoane anopo,” aisane oyapo.*

<sup>7</sup> Aihoane i himeterakano efera hunia Yasumo someraka, “Nōmo reaki kakaro somerakaripo. Saro pipi keasimo rurusa ikia koro asiane anopo.

<sup>8</sup> Fana aporo pesane hakimora aporopo. Ipu kotafe wárakano, ipu meane saro pipimo kaiyiáne, kumuku kairakarakano, kekemarape pusuafapo.

<sup>9</sup> Ikia koro asiane anopo. Saro pipi ikia koroa yorokoa pesa susuane nōmo asekea rekenapo. I ikia koroa yorokoa pesa susuane makata metamo mokoatikinapaka nōmo mafairaka asekea rekenapo. Ikia koro aeyaka pekea yaoa asane kotesa nako purapo. Aina ayíáka anoaki paosa aporo hinamoane nōmo asekea reke mafasiakosapo.

<sup>10</sup> Asiamo hakimara aporomo makata hakimoka rukua mokoatikiraka ayíakako perapo. Arirakano aporo hinamo Kotiyaki koteaka risikiasimo ano pesapo. Yumo i su hauaka wo arisiamo Kotimo iane makoterakano hemakapukua, makata su siaraka risike, seseraka ayíáka koteaka risikiasimo ano pesapo.

<sup>11</sup> Saro pipi asekea rera aporo kotesane anopo. ‘Saro pipi koteaka risikiasimo asekea rera aporoane kuane siahosireapo,’ aiyaka saro pipi asekea rera aporo kotesamo hemakapu-rapo.

\* 9:33: Asiamo aporo hi mesa mafasamo someamo kepoane, Kotimo pusiesa aporoane pesa ayareapo.

<sup>12</sup> Arirakano aporo metamo saro pipi asekeea reke mone makosakipoko raiparaka rakirapo. Aporo amo saro pipiane kakaro epo ipi menahoanafonosasamo epo aseane, saro wofe<sup>\*</sup> perakano asekeea saro pipiane metakarikia takaripurapo. Takaripurakano saro wofemo saro pipi metakirane rukunenakano, metakirane yaoa teketarikia rosaka tarirapo.

<sup>13</sup> Asiamo aporomo mone hákasa hemakapukua raiparaka rakiraka saro pipiane ipime-haonaanafonosasamo koteaka hemakapukua asekeea rerafapo.

<sup>14-15</sup> Arirakano saro pipi asekeea rera aporo kotesane anopo. Nōmo Atamo anoaki hemakapukua, nōmo Ataki hemakapukua area ayíáka, nōmo saro pipiane hemakapukua, saro pipimo anoaki hemakapukua ayíáka risirapo. Nōmo saro pipipoko ano kuane sia-hoasireapo.

<sup>16</sup> Arirakano saro pipi metakira ruru wo keanafonosane soko nōmenapo. Iane soko nōmo karikia peakosapo. Saro pipi nena yaoa risiamo soko, nōmo someane kakimarakano, karikia peakosapo. Yaoa risiane soko, ruru kakarua risiane soko, rurua hakása kekeea su sarimarakaa risikiakosapo. Asiamo asekeea rera aporoane ano hákaspaso.

<sup>17</sup> Ano turikia pukusakipoko kukusapo. Ayiakakosasamo Atamo anoane himu tumurumo hemakapurakanapo.

<sup>18</sup> Aporomo hemakapusua aeyaka ano rusua kukusafapo. Nōmo ahoanafonrakanone ane ano rusua kukusifareapo. Nōmo ní hemakapusuane aosasamo ano rusua kukusireapo. Aporomo ano rusua kukusimo nōmo ní hemakapusua aeyaka ano kauane kakosapo. Ano kukua eféra hunia turikia apuramo wakapuaka turikia pukusapo. Ayíáka nōmo Atamo hemakapukua maresapo.” Ayíáka Yasumo somesapo.

<sup>19</sup> Ayíáka Yasumo somerakano Yu aporo sisimamo kaikia himumo kekepo hemakapukua tafatafasapo.

<sup>20</sup> Tafatafaraka aporo metakiramo someraka, “Yatafumo e ho masasamo epo airakae. E masuarakanareapo. Marirakano epo someane repo kairakanare?”

<sup>21</sup> Airakano aporo metakiramo someraka, “Yatafumo aporomano ho masamo aíyaka somerafapo. Aporo hi mesane yatafumo mafanafapo,” aisapo.

*Yasumo some kayane Yu aporo sisimamo kakipayasane oyapo.*

<sup>22</sup> Wate fana Kotimo Ape Kikimasane Kotiaki Suseraka Hemakapuko Hokono Keakosa maiya ane makesapo. Hokono keakosakipoko yaki ikia aperamo Yu aporo Hinamo Yarusarame sitia sarimasapo.

<sup>23</sup> Kotimo apea Yasu pukua ape taru yano motosa Soromone ape tarua koraka reakipoko

<sup>24</sup> Yu aporo sisima sarimarakaa ipu Yasuaki someraka, “Isiapo neane aseraka himu tetáraka risikinapo. Masinaka isuaki kakama somehokosare? Ne Keresopo airakane nōmo isuaki kakama hufitaeraka somehoanie.”

<sup>25</sup> Airakano Yasumo someraka, “Fana nōmo reaki somerakasuamo repo kakimarakas-ufapo. Atamo yanoane máfaraka ipi wakapumo hemakapukua rakira amo anoane reaki tarirakanapo. Tarirakano yia repo koteaka hemakapurakarifapo.

<sup>26</sup> Asiane reane nōmo saro pipiranafareapo. Repo nōmo someane kakimarakarifapo.

<sup>27-28</sup> Arirakano nōmo someane nōmo saro pipimo kakimaka kekemarape perakano, nōmo iane hemakapuraka kakaro yaiya risirane karápo. Karakano i hasaka koakosafapo. Iane aporo metamo wasekemaka hakimakosafapo. Saro pipiane nōmo Atamo anoaki kasapo.

<sup>29</sup> Ata ipi kakaro kárapo. Aporo metamo e hurutapirafapo. Saro pipiane ipi asekeea rekenapo. Ipi asekeea rerasamo aporo metamo hakimakosafapo.

<sup>30</sup> Ata eto iti hakása yiypapo.”

<sup>31</sup> Airakano kaikia Yu aporo sisimamo ekemo kareako mosapo.

<sup>32</sup> Morakano Yasumo someraka, “Repo asekeasimo Atamo anoaki rakiniesane makata kára nōmo rakisiapo. Nōmo makata yakapa hasaka rakirakano repo ekemo ano kareakonare?”

<sup>33</sup> Airakano Yu aporo sisimamo someraka, “Nōmo koteaka rakirakano isiapo ne ekemo kareafunufapo. Asiáne nōmo someraka, ‘Koti eto iti hakása yiypapo,’ airakasa akipoko ne ekemo kareakosapo. Nōmo someraka, ‘Ano Kotipo,’ airakae. Asiáne né kakaro aporomanopo.”

<sup>34-35</sup> Airakano Yasumo someraka, “Kotimo sawia popasane kakaro yasiane popa-hoareapo. Popasa ane metakariakopo. Fana popasane oyapo. Kotimo ipi some kaira aporoaki someraka, ‘Kotio,’ aisane popasapo.<sup>†</sup> (*Buk Song 82:6*)

\* <sup>10:12:</sup> Saro wofe yákasa kára asiapo. Saro wofemo aporomano soko, makata kakayia soko hitafe rukunenapo.

† <sup>10:34-35:</sup> Kotimo ipi some kaira aporo unihaeaka risiasamo Kotimo iaki Kotio, aisapo.

<sup>36</sup> Kotimo aisa yiamo ano murikimaka pusierakano ano hauaka wo pesapo. Pekea someraka, 'Ano Kotimo hokosapo.' Airakano repo someraka, 'Epo Kotiane mawakase-marakae.' Aíyaka repo somerakane mairakare?

<sup>37</sup> Atamo makata rakirane nōmo rakianafonosa tiki nōmo someane repo kakipayahoane siahoasireapo.

<sup>38</sup> Atamo makata wakapuaka rakirane nōmo rakirakano, makata rakirane asekeea repo himu hakásaraka hemakapunie. Anoaki himu hakásaraka hemakapunafonoraka, nōmo rakirane asekeea himu hakásaraka hemakapunie. Ano Atayaki hakāsa reke, arirakano Atane anoyaki hakāsa reke, aiyáka rekeno repo asekeea hemakapukusapo."

<sup>39</sup> Airakano ipu e tipura makeako wasere makorakano Yasu ipi rea nine fasakeno asesapo.

<sup>40</sup> Arirakano Yasu pukua, he Yotane yaoraka taku ra pukua, Yonemo aporo hea tapuku-murisia hauaka á pukua reapo.

<sup>41</sup> Rekeno aporo hinamo yakai peraka namina susu someraka, "Isiapo asekeasimo Kotimo wakapumo hemakapukua rakirane Yonemo rakisiafapo. Asiāne Yasumo ainane Yonemo somesane namo kakarohoareapo."

<sup>42</sup> Aíyaka aporo hinamo yakaimo Yasumo someane kakimasapo.

## 11

### *Rásarase kusuane oyapo.*

<sup>1</sup> Aporo hakásá meta ipi yano motosa Rásarase, Petene apea reapo. Ape hakásá yia Maria soko ipi yapaya Mata soko tetá toapo. Rásarase ipi makata takamasa wareapo.

<sup>2</sup> Arirakano fana Mariamo makata wape yamonane Yasumo korakea rekemarekea, ipi uni itimo hokesapo. Hinamoamo ipi ifia Rásaraseane makata takamasapo.

<sup>3</sup> Takamarakano Mariape Mata tetapō aporo metaki someaka mareraka, "Nómo Uni-hae Yasuaki somehoko pusie. Nómo úyaka somehoanie. Unihaeo, nōmo ní aporo táké Rásaraseane makata takamasa warekenapo, aihoanie." Airakano aporoane pukua tetapō someaka maresane Yasuaki somesapo.

<sup>4</sup> Somerakano Yasumo kaikia someraka, "E kukusapoko makata takamasafapo. Aporo hinamomo Kotiaki hemakapukua kekerehoasimo makata takamasapo. Aporomanomo Tákeane anopo. Anoaki soko hemakapukua kekerehoasimo e makata takamasapo," aisapo.

<sup>5</sup> Arirakano Yasumo Mata soko, ipi yapaya maria soko Rásarase soko, i suaki himu tumurumo hemakapuraka,

<sup>6</sup> Rásarase makata takamasapakano yia, Yasu ipi rea hauaka á yape tetá wasápo. Epo aseko pusufapo.

<sup>7</sup> Yape tetá waka yape isiamo Yasumo someraka, "Yutía hauaka á isu paripukusapo."

<sup>8</sup> Airakano ipi aporo hakásá puramo someraka, "Tisao, kawe né kukusimo Yutía hauaka á Yu aporo sisimamo ekemo kareakorakasu yia, né efera hunia kreasimo paripurakanare?"

<sup>9</sup> Airakano Yasu ipi kukusa maiyane haru faserepeanafonorakano ipu hemakapusimo Yasumo someraka, "Sere hakásá tuaro (12) awa faenapo. Maíyamo faesakipoko himo asekeea puraka terafaka ruraka etenafapo.

<sup>10</sup> Ereamo puraka katosakipoko terafaka ruraka etenapo.

<sup>11</sup> Isiapo aporo táké Rásaraseane ipi wasápo. Wasáne nōmo maturikia taehoko pukusapo."

<sup>12</sup> Aíyaka takumeaka somerakano, ipi aporo hakásá puramo himeteaka risike someraka, "Unihaeo, e makata takamasa warekerakane fahokosapo."

<sup>13</sup> Aíyaka Rásarase nena makata takamasa warekenapakasiki hemakapukua, Rásarase ipi kakaro kusuane Yasumo takumeaka somerakano, ipu himetesapo.

<sup>14</sup> Himeteraka risikino aseraka Yasumo hufitaeraaka someraka, "Rásarase kusuapo.

<sup>15</sup> E makata takamaka warea ano pusufapo. E kusua kunikia motosapakano aseko pukusapo. Sereamo nōmo makata rakirakano, repo anoaki himu hakásaraka hemakapusapo."

<sup>16</sup> Airakano Tomase ipi yano motosa meta Titimase\*, epo aporo hakásá pura metakiraki someraka, "Eyaki isu su pukusapo. Eyaki isu kukuko pukusapo," aisapo.

*"Yaiya rekeasimo maturikia taena aporoane anopo." Aíyaka Yasumo somesane oyapo.*

<sup>17-19</sup> Yasu ipi aporo hakásá purayaki Petene apea perakano aporo metakiramo someraka, "Rásarase kusuá kunikia motosane pipu kitafapo," aisapo. Airakano kaikia aseane Petene apea Matape Maria tetapō ipi ifia Rásarasepoko himu nekea torapaka mapirahoasimo, Yu

\* **11:16:** Titimase airakane namo meaka yano horaka Hokosa Tetasa aíyaka somerakaripo.

aporor hinamo yakaimo ararehoko pekea risikino asesapo. Petene apeane Yarusarame siti aeyaka makesakipoko aporo soko, hinamo soko, yakai pesapo.

<sup>20</sup> Arirakano Yasu apererakano Matamo e sapenako puraka, Maria ape yia kakeno, Mata pukua Yasuaki someraka,

<sup>21</sup> “Unihaeo, né wo reasatiki nōmo papāne kukufunufapo. Asiamo e kusuapo.

<sup>22</sup> Asiane yumo nōmo Kotiaki wáraka ayikanierakano epo ayiáka rakiakosapo, aíyaka nōmo hemakapurakaripo.”

<sup>23</sup> Airakano Yasumo someraka, “Ní papā maturikia taehokosapo.”

<sup>24</sup> Airakano Matamo someraka, “Fa ana maiya amo aporo hinamo su maturikia taerakano e soko maturikia taehokosapo, aíyaka nōmo hemakapurakaripo.”

<sup>25</sup> Airakano Yasumo someraka, “Yaiya rekeasimo maturikia taena aporoane anopo. Aporomo anoaki himu hakásaraka rekeno, aporoane kuraka tiki kusuaneo, asiáne turikia pukua yaiya rekeakosapo.

<sup>26</sup> Anoyaki yaiya reke anoaki himu hakásaraka hemakapukua rea aporoane kakaro kukuasafapo. Someane nōmo kakimarakanare?”

<sup>27</sup> Airakano Matamo someraka, “Ao, Unihaeo, nōmo kakimarakanapo. Kotimo hokosa nereapo. Arirakano Kotimo ne unihaeaka rekeasimo murikimasa aporo Keresoane nereapo, aíyaka nōmo hemakapurakaripo,” aisapo.

#### *Yasumo Rásaraseane hamakapuraka hiripusane oyapo.*

<sup>28</sup> Matamo someaka faraka ipi apea paripuraka aporo hinamo suamo kaiyakohoamo Matamo Mariaki tau someraka, “Tisa pesa rekesapo. Né aseako wárakasapo.”

<sup>29</sup> Airakano Mariamo kaikia foaka takahikia puane

<sup>30</sup> Yasu apea perafaraka, fana Matamo Yasu sapenekea asesa yia Yasu rekeno aseako pusuapo.

<sup>31</sup> Purakano Yu aporo hinamomo Mariane mapirahoasimo arareraka toamo aseane Maria foaka takahikia purakano asesapo. Asekeha hemakapuraka, “Maria kunikia hiripuhoko apure,” aíyaka ipu hemakapukua kekemarape pusuapo.

<sup>32</sup> Arirakano Yasu rea Maria pekea kakuna porokoa kake someraka, “Unihaeo, né wo reasatiki nōmo papā kukufunufapo.”

<sup>33</sup> Airakano Yasumo aseane Mariamo hiripurakano Yasumo aseane Yu aporo hinamo kekemaraka pesamo soko hiripurakano asekeha, Yasumo himu kára nekeha someraka,

<sup>34</sup> “Rásarase kusuane kunikia ma motosare?” Airakano ipu someraka, “Unihaeo, aseako peae.”

<sup>35</sup> Airakano Yasumo hiripusapo.

<sup>36</sup> Hiripurakano Yu aporo sisima metakiramo asekeha someraka, “Epo aporo tákane kára hemakapuraka hiripuane.”

<sup>37</sup> Airakano Yu aporo sisima metakiramo someraka, “Aporo hi mesa mafasasamo Rásarase soko kukukohoamo mafahoafunureapo,” aisapo.

#### *Rásaraseane Yasumo maturikia taesane oyapo.*

<sup>38</sup> Yasu himu kára nekeha kunikia pukua aseane kunikia kakarua ekemo mapirisikino asekeha

<sup>39</sup> someraka, “Ekemo mapirisiane kotomaka kepere mafeearsie.” Airakano aporo kusuamo ipi ifia Matamo someraka, “Unihaeo, kunikia motosane pipu kitafapo. Pipu toreraka ikiki yamohokosapo.”

<sup>40</sup> Airakano Yasumo someraka, “Nōmo néaki fana someraka, ‘Nōmo someane kaki-marakanano Kotimo wakapu faesa aseakosapo.’ Aíyaka nōmo somesapo.”

<sup>41</sup> Airakano ekemo mapirisiane kotomafeearakano asekeha Yasumo yapura asekeha someraka, “Atao, nōmo néaki wásane nōmo kakimarakano néaki suserakanapo.”

<sup>42</sup> Maiya suamo nōmo someane nōmo kakimarakano nōmo hemakapurakaripo. Aporo hinamopoko ano pusiesane népo. Aíyaka ipu hemakapusimo nōmo néaki wárakanapo.”

<sup>43</sup> Aíyaka kurikuriraka faraka sakepamo someraka, “Rásarase né wo peae.”

<sup>44</sup> Airakano aporo kusuane pekea, pasumo hokono soko korake soko wamo soko taporaka perakano Yasumo someraka, “E pusimo pasuane fisisie,” aisapo.

#### *“Yasurusua kukusapo,” aisane oyapo.*

*Matiu 26:1-5; Maka 14:1-2; Ruki 22:1-2*

<sup>45</sup> Arirakano Yu aporo sisima metakiramo Maria ararehoko pesamo Yasumo Rásarase kusu maturikia taerakano aseraka, ipu Yasuaki himu hakásaraka hemakapusuapo.

<sup>46</sup> Arirakano Yu aporo sisima metakira Fereze aporo risia pukua, Yasumo rakisiante somesapo.

<sup>47</sup> Somerakano Ferese aporo soko, pirisiti aporo soko, namina sarimaraka someraka, "Yasuane isiaipo mayiakakosare? Epo kakaro wakapuaka rakirakanapo. Isiaipo eane matasohoko mayiáka rakiakosare?"

<sup>48</sup> Epo someane rukupatehoanafonorakano, aporo suamo epo someane kakimakosapo. Kakimarakano Rome kamani aporomo Kotimo apeane rakaritaehokosapo. Rakaritaeraka isu Yu aporo hinamo su rusua kukusapo."

<sup>49</sup> Airakano aporo meta ipi yano motosa Kaiafasapo. Keremisi amo Kaiafase pirisiti aporo fanaraka reapo. Kaiafasemo someraka, "Re himeteraka arisie."

<sup>50</sup> Aporo hinamo su kukua keane siahoasifareapo. Aporo hinamo supoko aporo hakása kuane siahoasireapo."

<sup>51</sup> Aiyaka somesane Kaiafasemo ipi hemakapusua anaka somesafapo. Keremisi amo e pirisiti aporo fanaraka reasamo Kotimo makata keseke ayiakakosane tarirakanano some-sapo. Keseke ayiakakosane Yasu ipi Yu aporo hinamo supoko farimaka kukusane some-sapo.

<sup>52</sup> Yu aporo hinamo hákasapoko kukusane somesafapo. Aporo hinamo metakira soko Kotiaki himu hakásaraka risiane kekepo rosaka tarisia ane sarimahoasimo e kukusapo, asapo.

<sup>53</sup> Aisa sereamo Ferese aporope pirisiti aporo namina Yasu rusua kukusakipoko hemakapukua ikia kosapo.

<sup>54</sup> Asiamo Yu aporo hinamo risiakipoko Yasu kakamaraka koraka reafapo. Yao kauane makeraka Eferaime taonea pukua wakareapo. Apea ipi aporo hakása purayaki waka risiapo.

<sup>55</sup> Yu aporomo Ape Farimaresa Hemakapuko Hokono Keakosa maiyane makerakano Yu aporo hinamo yakai namina himu watikisa mafahoasimo namina hauaka metakarikia Yarusarame sitia hisiapo.

<sup>56-57</sup> Hikia Kotimo apea yororakano pirisiti aporo káramo soko Ferese aporomo soko someraka, "Repo Yasu aseraka isuaki somehoanie." Aiyaka ipu Yasu tipura makeako somerakano aporo suamo Yasu aseako kokoa namina susu me rukua someraka, "Hokono akera wo Yasu peanarakapo. Repo metakiramo mayiáka hemakapurakanare?" Aiyaka namina susu me rukua somesapo.

## 12

*Petene apea makata wape yamona Yasu korakea rekemaresane oyapo.*

*Matiu 26:6-13; Maka 14:3-9*

<sup>1</sup> Ape Farimaresa Hemakapuko Hokono Keakosakipoko sere namasu rekeasimo Yasu Petene apea pusuapo. Pukua Rásarase kusuane Yasumo maturikia taesa reamo apea Yasu pusuapo.

<sup>2</sup> Pukua Rásarasemo apea Yasu perakano, Yasupoko makata nakosa paisiapo. Paikia Rásarasepe Yasu tetá aporo metakirayaki teporo makeraka tokeno, Matamo makata nakosa paikia kasapo.

<sup>3</sup> Arirakano Mariamo petoroa makata wape yamona yano motosa nate kesane maka pekeja, Yasu korakea makata wape yamonane mone káramo roposane rekemarekea, Mariamo ipi uni itimo hokesapo. Hokerakano aporo suamo makata wape yamonane yamosapo.

<sup>4</sup> Yamorakano Yasumo aporo hakása pura hakása meta Yutase Isekerio epo keseke Yasuane parakehokosa aporoamo someraka,

<sup>5</sup> "Mone siufa tiri harotemo (300) makata wape yamona petoroa kesane roporaka aporo makata forosaki kakafokore."

<sup>6</sup> Aisane aporo makata forosaki kakaro kakakosapoko hemakapukua somesafapo. Yutaseane ipi hakimora aporo reasamo somesapo. Arirakano aporo hakása pura suamo moneane sarimaraka pausia kekeja, Yutasemo asekeja reapo. Asekeja reke mone metakira epo tau hakimosapo.

<sup>7</sup> Arirakano Yasumo Yutaseaki someraka, "Hinamoamo ipi rakiako hemakapusuane rakirie. Makata wape yamonane ano kukusa kauane makotehoko rekeamarare. Ano kukusane hemakapukua murikimaka rekeamarare.

<sup>8</sup> Maiya suamo aporo makata forosane reyaki hakása yia risikiakosapo. Arirakano maiya suamo ano reyaki hakása rekeakosafapo." Aiyaka Yasumo somesapo.

*"Rásarase rusua kukusapo," aisane oyapo.*

<sup>9</sup> Yasu Petene apea rekenapakano aporo hinamo yakaimo kairaka aseako pusuapo. Ipu Yasuane soko, Rásarase kusuana maturikia taesane soko, aseako pusuapo.

<sup>10</sup> Purakano pirisiti aporomo someraka, “Rásarase soko rusua kukusapo.” Aíyaka hemakapukua risiapo.

<sup>11</sup> Rásarase maturikia taesakipoko, Yu aporo sisima yakaimo pirisiti aporomo someane metakarikia, Yasuaki patera aserakano, pirisiti apóromo saperaka Rásaraseane rusua kukusapo, aisapo.

*Yasu Yarusarame sitia pusuane oyapo.*

*Matiu 21:1-11; Maka 11:1-11; Ruki 19:28-40*

<sup>12</sup> Ere hakása waka Yarusarame sitia hokono keakosakipoko aporo yakai sarimasa amo Yasu apererakano kaikia

<sup>13</sup> namina hiriki pateke mokoa e aseako pukua, e perakano asekeea, sakepamo wáraka, “Isiapo Kotiaki kekererakanapo. Unihae Kotimo ne pusiesamo epo né yano motosane makárárakanapo. Yu aporomo Unihae kárane népo.”

<sup>14</sup> Airakano Yasu saro tokia ripaka pusuapo. Wate fana Kotimo sawia poparaka,

<sup>15</sup> “Saeone apea<sup>\*</sup> risia aporo hinamo re namohokopo. Repo Unihaeane saro toki matia ripaka peakosapo.” Aiyaka wate fana popasane apera ayareapo. (*Sekaraia 9:9*)

<sup>16</sup> Yasu saro toki matia ripaka pesa maiya amo aporo hakása puramo fana Kotimo sawia popasa amo kepoane hemakapusuafapo. Asiáne Yasu hepene yapura hisiakipoko ipu hemakapuraka, “Fana Kotimo sawia poparaka aporo Unihae ayiáka peakosapo, aisane Yasu perakasu ayareapo.” Aiyaka Yasu hepene yapura hisiakipoko keseke ipu hemakapusuapo.

<sup>17</sup> Arirakano Yasu Yarusarame sitia apererakano aporo hinamo yakaimo aseako pusuapo. Yasumo Rásarase kusuane maturíkia taerakano, aporomo soko hinamomo soko ipu metakiramo asesamo pekea somerakano, aporo hinamo metakiramo kaikia Yasu apererakano aseako pusuapo.

<sup>18</sup> Kotimo wakapuaka rakirane rakisiapakano Yasuane aseako pusuapo.

<sup>19</sup> Purakano Ferese aporomo asekeea namina susu someraka, “Isiapo someane aporo hinamo suamo metakarikia, Yasumo someane kakimaka e patera asere. Yasumo isiapo hemakapusuane marakoane.” Aiyaka Ferese aporomo namina susu somesapo.

*Kiriki aporomo Yasu aseako pesane oyapo.*

<sup>20</sup> Hokono keasiraka risia maiya amo Kiriki aporo metakira Yarusarame sitia Kotiaki kekerehoko hisiapo.

<sup>21</sup> Hikia Firipiaki somesapo. Firipimo ipi ape sumuane Pesaita taonepo. Ipi hauakane Kariri hauakapo. Firipiaki ipu someraka, “Isiapo Yasu aseako pukuripo.”

<sup>22</sup> Airakano Firipi pukua Énituaki someaka, tati hakása pukua Yasuaki somesapo.

<sup>23</sup> Somerakano Yasumo someraka, “Aporomanomo Tákeane anopo. Kotimo nōmo yanoane makáráraka mareasimo ano kukusa maiyane maiya yuyapo.

<sup>24</sup> Nōmo kakaro somerakaripo. Makata mano kokomaresane, kauane hauaka toreraka, namo pauaka herapo. Pauaka hekeea amo wate sakepamo perapo. Kokomaresane kau torehoanafonoraka namo pauaka herafapo.

<sup>25</sup> Makata mano aina ayiáka re soko ayiakakakosapo. Hauaka wo aporomo ipi kaum rakirane mahimuraka rekeno, ipi namo kakaro yaiya rekeakosane metakarirakanapo. Hauaka wo kaum rakirane metakarikia, patera tarirakano, ipi namo kakaro yaiya rekeakosapo.

<sup>26</sup> Aporo hinamo hakása metamo nōmo arakira ayiáka rakiako hemakapurakanone ane, anoaki patera asekeea kekemahoanie. Asiamo ano rea nōmo makata rakira aporo hinamo ane anoyaki hakása risikiakosapo. Nōmo makata rakira aporo hinamo ane Kotimo makárahokosapo.” Aiyaka Yasumo somesapo.

*Yasumo someraka, “Ano kukusapo,” aisane oyapo.*

<sup>27</sup> Yasumo someraka, “Ano kukusane hemakapukua himu nenakaripo. Ataki maýaka somehoanarakapo. Atao, maiya yumo ano kurapaka ararehoanie, aíyaka somehosafapo. Kukusakipoko ano hauaka wo pesapo.

<sup>28</sup> Atao, aporomo né kekerahoasimo né yano motosa máfahoanie.” Airakano hepene aeyaka Kotimo someraka, “Aporomo ano kekerahoasimo nōmo yano motosa fana máfasapo. Efera hunia soko nōmo yano motosa máfahokosapo.”

<sup>29</sup> Aíyaka hepene aeyaka somerakano aporo hinamo su sarimaraka risiamon kairaka, “Kikirakae,” airakano ipu metakiramo someraka, “Wae, hepene aporomo eaki makata somerakae.”

\* **12:15:** Yarusarame sitiane ūri Saeonea kisiapo. Asiasamo Yarusarame sitiane yano meta, Saeone ape, airapo.

<sup>30</sup> Airakano Yasumo someraka, “Nōmo kaiyisimo hepene aeyaka somerakarifapo. Repo kaiyisimo somerakae.

<sup>31</sup> Hauaka wo aporo hinamomo makata watikiaka rakisiakipoko Kotimo hukurukusapo. Arirakano hauaka wo Satane unihaeaka reane epo wakapuanne rukumosaka tapiakosapo. Asiamo Kotimo ayiakakosane pipu maiya yumo kepo marerakanapo.

<sup>32</sup> Arirakano ira matopesa paremarekea máfaraka mapoana maiya amo aporo hinamo suamo anoaki himu hakásaraka hemakapusimo nōmo kirimahokosapo.”

<sup>33</sup> Aiyaka e aporomo ira matopesa paremarekano kukusane Yasumo somesapo.

<sup>34</sup> Aiyaka somerakano aporo sarimasamo someraka, “Kotimo sawia popasane oyapo. ‘Kotimo unihaeaka rekeasimo murikimasa aporo Keresoane yaiya rekeakosapo.’ Aiyaka popasa nine nōmo someraka, ‘Aporomanomo Tákeane ira matopesa paremareakosapo.’ Airakane marirakano aiyaka somerakanare? Aporomanomo Tákeane epare?”

<sup>35</sup> Airakano Yasumo someraka, “Faesane reyaki maiya wakasema rekeakosapo. Faesa reyaki area sereamo koteaka punie. Katorakano koteaka purafapo. Katosa amo ikia kara pukusane mahimeteraka risirapo.

<sup>36</sup> Ano faesa rekeno faesa aki<sup>†</sup> himu hakásaraka hemakapukua risikinone, re su faeraka risikiakosapo.” Aiyaka Yasumo some kaka faraka, e tau pukua ipu aseakohoamo farareapo.

*Yasumo some kayane Yu aporo sisimamo kakipayasane oyapo.*

<sup>37</sup> Yasumo ipi wakapumo hemakapukua rakirakano yia, ipu himo asekeea asekepayasapo. Asekepayaraka eaki himu hakásaraka hemakapusuafapo.

<sup>38</sup> Aesayamo someraka ayiakakosaposane kakaro yanakano yia ipu asekepayasapo. Fana Aesayamo someraka, “Unihaeo, nōmo someane isiapo some kasane ipu kakimasafapo. Unihae, nōmo wakapumo hemakapukua rakirane isuaki tarisiane ipu asekepayasapo.” (*Aisia 53:1*)

<sup>39</sup> Aiyaka Aesayamo someraka kakipayana kepoane hemakapusimo some meta some kasapo. Some metane oyapo.

<sup>40</sup> “Asekepayasa aporo hinamomo himo aseakohoamo hiane Kotimo makatosapo. Himumo hemakapukohoamo himu mahimetena. Fana Kotimo some kakipayaraka ipu keseke someraka, ‘Kotimo isiapo makata watikisane mafahoasimosapo.’ Aiyaka hemakapukua risikiako parinapaka i himuane Kotimo mahimetesapo. I hiane makatosapo.” (*Aisia 6:10*)

<sup>41</sup> Aiyaka Aesayamo somesapo. Fana Yasu peasiraka Yasumo faesane Aesayamo asekeea aiyaka somesapo. Yasumo someane aporo hinamomo kakipayahokosane Aesayamo some-sapo.

<sup>42</sup> Arirakano aporo hinamo metakiramo soko, Yu aporo fanaraka risia aporo metakiramo soko Yasumo someane kakimasapo. Kakimarakan Fere aporomo kairaka iaki hukururapaka i namoraka risiapo. Fere aporomo iaki someraka, “Yu aporomo sarimana apea peakopo,” airapaka Yasuaki risikiako parisane aporo suaki hufitaeraka somesafapo.

<sup>43</sup> Aporo metakiramo “Ne kotesafapo,” airapaka hufitaeraka somesafapo. Aporo metakiramo “Ne kotesapo,” aihoasimo aporomo someane makama fanasapo. Kotimo “Né kotesapo,” aihoasimo someane makama fanasafapo.

*Yasumo somesane oyapo.*

<sup>44</sup> Aporo hinamo suamo kaiyisimo Yasumo sakepamo someraka, “Aporo hinamomo anoaki himu hakásaraka hemakapukua risikinone, Kotimo ano pusiesa aporoaki soko himu hakásaraka hemakapukua risikinapo.

<sup>45</sup> Repo ano aseraka ano pusiesa Kotiane soko repo aserakanapo.

<sup>46</sup> Hauaka wo ano faeraka pesapo. Faeraka perakano aporomo nōmo someane kamaraka katosane metakarikia faeraka risikiakosapo.

<sup>47</sup> Aporo hinamo suane mafasiako ano pesapo. Aporo hinamoane hukuruko ano pesafapo. Arirakano aporo hinamomo nōmo someane kaikia kakipayarakano, aporo hinamoane nōmo parakuraka hukurukusafapo.

<sup>48</sup> Aporo hinamomo anoaki patera tarikia, nōmo someane kakipayasa, some yiamo iane hukurukusapo. Pipu nōmo somesane ipu kakipayasakipoko hukuarura maiya amo somesa ane fasreperaka somesa amo iane hukurukusapo.

<sup>49</sup> Nōmo someane nōmo nī hemakapusua aeyaka somerakanafapo. Atamo ano pusiesamo someaka maresane nōmo somerakanapo.

<sup>50</sup> Someane aporo hinamomo kakimarakan i yaiya risikiakosapo, aiyáka nōmo hemakapurakiripo. Asiamo Atamo anoaki someaka maresane nōmo reaki some karakanapo.” Aiyaka Yasumo somesapo.

<sup>†</sup> **12:36:** Faesane kepoane Yasu ipipo.

## 13

*Yasumo ipi aporo hakāsa purane korake kususane oyapo.*

<sup>1</sup> Ape Farimaresa Hemakapuko Hokono Keakosa maiya ane raupo, aiyaka Yasumo hemakapuraka, "Hauaka one metakarikia Ata rea hauaka yapura hiakosa maiya ane makerakanapo." Aiyaka hemakapukua, ipi aporo hakāsa purane himu tumurumo hemakapusuapo. Ipi himu tumurumo hemakapusuane tipia metakarisafapo.

<sup>2</sup> Ereamo Yasu ipi aporo hakāsa purayaki makata nekea toapo. Makata nekea tokoasiraka Satane pekeea Isekerio aporo Saemonēmo hokosa Yutase himua someraka, "Nōmo Yasu parakehoanie," aiyaka Yutaseaki somesapo. Somesakipoko keseke namina hakāsa toke makata nesapo.

<sup>3</sup> Makata nekea toakipoko Yasumo hemakapuraka, "Atamo wakapu suane anoaki karakano ano siaraka rekenapo. Ano Koti rea aeyaka pesapo. Koti rea yia parihiakosapo."

<sup>4</sup> Aiyaka hemakapukua ipi takahikia pasu kima ososane horomaka, tawero maka otoa sotakamaka,

<sup>5</sup> tisia he takamaka pukua aporo hakāsa purane korake kusuraka, tawero otoa sotakamasane fatarimaka hokesapo. Aporo raipamo korake kusuraka hokena ayiáka, Yasumo kusuraka hokesapo.

<sup>6</sup> Saemone Pita rea perakano Saemone Pitamo someraka, "Unihaeo, ano korake kusuhokosare?\*"

<sup>7</sup> Airakano Yasumo someraka, "Korake kusuana kepoane repo yumo himeteane. Keseke hemakapukusapo."

<sup>8</sup> Airakano Pitamo someraka, "Yumo soko keseke tipiamo soko, ano korake nōmo kusuhokosafapo." Airakano Yasumo someraka, "Né korake kusuhoanafonorakanone né anoyaki hakāsa rekeakosafapo."

<sup>9</sup> Airakano Saemone Pitamo someraka, "Unihaeo, Korake hákasa kusuhokopo. Korake kusuraka, hokono soko, wamo soko, su kusuhohanie."

<sup>10</sup> Airakano Yasumo someraka, "He tapuraka kau pikirisane fasokino, efera hunia kau susu he tapurafapo. Korake hákasa kusunapo. Re su pikirisane faraka, aporo hakāsa meta pikirisa yaiya are."

<sup>11</sup> Aiyaka somesane Yasu ipi parakehokosa aporoane hemakapukua somesapo.

<sup>12</sup> Korake kusuraka faraka Yasumo ipi pasu kima ososha horomaka motosane, efera hunia osorava teporo makeraka kake someraka, "Nōmo re korake kusurakasane kepoane repo hemakapurakanare?

<sup>13</sup> Repo anoaki, 'Tisao, Unihaeo,' airakasuane anopo. Repo kakaro airapo.

<sup>14</sup> Repo tisane soko, repo unihaeane soko, anopo. Asiane ano aporo raipa pariraka re korakeane kususapo. Asiamo repo soko namina yia meta korakeane kusuhohanie.

<sup>15</sup> Nōmo ainane reaki tarirakayiapo. Asiamo nōmo repoko raiparaka rakirakasa ayiaka, repo soko aporo hinamo metakirapoko raiparaka rakinie.

<sup>16</sup> Asiamo nōmo kakaro somerakaripo. Aporo raipamo ipi wafayane marokenafapo. Arirakano somehoko pusierakano pesa aporoamo ipi pusiesa aporoane marokenafapo.

<sup>17</sup> Yumo kakaro somesane repo hemaka apure. Hemakapukua ayiáka rakirakano re seseaka risikiakosapo.

<sup>18</sup> Re suane nōmo somerakanafapo. Yasumo i suaki somerakano yia, Yutasemo Yasumo someane kakimasafapo. Re su nōmo pasimosane repo hemakapusuane nōmo hemakapurakanapo. Asiane fana Kotimo sawia popasane kakaro ayiakakosapo. Aiyaka Kotimo sawia popasane oyapo. 'Anoyaki hakāsa toke makata nesa aporoamo himu meta fasereperaka anoaki hisiraka yunuraka reapo.' Aiyaka fana popasane pipu yanakanapo. (Buk Song 41:9)

<sup>19</sup> Keseke ayiakakosane pipu nōmo reaki somerakanapo. Áyiana maiya amo repo asekeha hemakapuraka, 'E kakaro Keresopo. E yaiya rerapo.' Aiyaka hemakapusimo keseke ayiakakosane pipu nōmo reaki somerakanapo.

<sup>20</sup> Nōmo kakaro somerakaripo. Nōmo someane some kakako pusiesa aporoane peraka some karakano, aporo metamo kakimaka, nōmo someane soko kakimarakanapo. Ari-rakano ano pusiesa Kotiamo someane soko kakimarakanapo." Aiyaka Yasumo somesapo.

*Yasumo someraka, "Ano parakehokosapo." Aisane oyapo.*

*Matiu 26:20-25; Maka 14:17-21; Ruki 22:21-23*

<sup>21</sup> Yasu ipi aporo hakāsa purayaki toakipoko ipi himu nekea kake someraka, "Nōmo kakaro somerakaripo. Repo hakāsa metamo ano parakehokosapo."

---

\* <sup>13:6:</sup> Amo kepoane oyapo. Pitamo hemakapuraka, "Yasumo anopoko raiparaka rakiraka ano korake kusuhohanie siahoasifareapo," aiyaka hemakapusuapo.

<sup>22</sup> Airakano aporo hakāsa pura toamo namina susu asekeia someraka, "Eparakapo."

<sup>23</sup> Aiyaka himeteaka tokeno, aporo hakāsa pura hakāsa metaki Yasumo himu tumurumo hemakapusane Yasu makeraka kayapo.

<sup>24</sup> Kakeno Saemone Pitamo hi pipiraka, "Nōmo Yasuaki kaisie. Aporoane epare? Aiyaka kaisie."

<sup>25</sup> Aiyaka hi pipirakan, Yasumo hemakapusua aporo hakāsane tati hakāsa karoraka toke, wamohae hákasa uaka hikia Yasu senakia someraka, "Unihaeo, aporo hakāsa nōmo somerakasane epare?"

<sup>26</sup> Airakano Yasumo someraka, "Nōmo farawa maka he waira kokomarekea karakano, aporo ayapo." Aiyaka epo farawa maka he waira kokomarekea, Isekerio aporo Saemonemo hokosa Yutaseaki kasapo.

<sup>27</sup> Karakano farawane Yutasemo masapo. Masa maiya amo Satane pekea epo himuane maparitaesapo. Maparitaerakano Yasumo someraka, "Nōmo rakiakosane foaka rakinie."

<sup>28</sup> Airakano aporo hakāsa pura Yasuyaki hakāsa toamo someane kaikia himetesapo. Ipu metakiramo himeteraka hemakapuraka,

<sup>29</sup> "Yutasemo mone pausi asekeia reasamo, Yasumo eaki hokono keakosakipoko makata nakosa ropohoko pusierakae." Aiyaka hemakapusuapo. Arirakano ipu metakiramo himeteaka hemakapuraka, "Aporo makata forosaki mone kakako pusierakae." Aiyaka i himeteraka toapo.

<sup>30</sup> Himeteraka hemakapurakan, farawane Yutase maka foaka takahikia, ere yiamo yaoa pusuapo.

### *Yasumo somemane kaweane oyapo.*

<sup>31</sup> Yutase pusuakipoko Yasumo someraka, "Aporomanomo Tákeane anopo. Nōmo wakapuane repo asekeasimo yumo nōmo reakti tariakosapo. Ano aeyaka Kotimo wakapuane soko reakti tariakosapo.

<sup>32</sup> Asiamo Kotimo wakapuane tarirakano nōmo wakapuane soko Kotimo tariakosapo. Yumo tariakosa maiya ane makerakanapo.

<sup>33</sup> Hokosa reo, maiya suamo reyaki ano rekeakosafapo. Wakasema nina keseke repo ano kope pukusapo. Ano hinakano re anoyaki hakāsa hiane siahoasifareapo. Some one fana nōmo Yu aporo sisimaki somesapo. Somesa hakāsa yine nōmo reakti somerakanapo.

<sup>34</sup> Asiamo somemane kawe haku nōmo reakti some karakanapo. Re namina susu himu tumurumo hemakapukua risikianie. Nōmo re himu tumurumo hemakapukua area aiyáka repo namina yia aiyáka himu tumurumo hemakapukua risikianie.

<sup>35</sup> Aiyáka hemakapukua risikino aporo metakiramo asekeia someraka, 'I Yasu patera asesa aporo ayareapo,' aiyaka somehokosapo." Aiyaka Yasumo somesapo.

"*Pitamo someraka, 'Yasuane nōmo aserafapo,' aiyaka kotafe somehokosapo.*" Aiyaka Yasumo somesane oyapo.

*Matiu 26:31-35; Maka 14:27-31; Ruki 22:31-34*

<sup>36</sup> Saemone Pitamo someraka, "Unihaeo, né ma hiakosare?" Airakano Yasumo someraka, "Ano hiakosa á yumo né kekemarape hiane siahoasifareapo. Keseke né hiakosapo."

<sup>37</sup> Airakano Pitamo someraka, "Marirakano ano yumo kekemarape hiakosafaporaikanare? Nōmo né hemakapuraka népoko ano kukuko hisirakanafapo."

<sup>38</sup> Airakano Yasumo someraka, "Né anopoko kakaro kukusare? Hao, kaisie. Nōmo neaki kakaro somerakaripo. Kokoroko mehoasiraka nōmo 'Yasuane nōmo aserafapo.' Aiyaka nōmo yape isiamo kotafe somehokosapo." Aiyaka Yasumo somesapo.

## 14

### *"Ata rea hauaka hiakosa ikia karane anopo," aiyaka Yasumo somesane oyapo.*

<sup>1</sup> Yasumo ipi aporo hakāsa puraki someraka, "Repo kara hemakapukua himu fahokopo. Kotiaki himu hakásaraka hemakapukua risikianie. Anoaki soko himu hakásaraka hemakapukua risikianie.

<sup>2</sup> Nōmo atamo apea, ape rumu yakai risikinapo. Ape rumu yakai risikianafonosa satiki nōmo reakti aiyaka somehoafunufapo. Re hepene yapura hinaka risikiakosa apeane ano fana hinaka repoko maropohoko hiakosapo.

<sup>3</sup> Ano hikia repoko ape maroporaka, siaraka marekeia keseke ano rea hauaka isina hakāsa risikiakosakipoko re pasimokoako ano paripeakosapo.

<sup>4</sup> Asiamo ano rea hauaka hiakosa ikia karane repo hemakapurapo."

<sup>5</sup> Airakano Tomasemo someraka, "Unihaeo, né rekeakosa hauakane isu himeteripo. Ikia kara soko, isu himeteripo."

<sup>6</sup> Airakano Yasumo someraka, "Ikia karane anopo. Kakaro somerane anopo. Yaiya rera kepoane soko anopo. Re Ata rea hauaka hiakosane ano koaraka hiakosafapo. Anoaki himu hakásaraka risiane hiakosapo.

<sup>7</sup> Repo ano aseraka nōmo Ata soko aserakanapo. Pipu yumo Ata repo asekea hemakapurakanapo."

<sup>8</sup> Airakano Firipimo someraka, "Unihaeo, Atane isuaki tarisie. Tarirakano isiapo aseraka someraka efera hunia tarisie aihokosafapo."

<sup>9</sup> Airakano Yasumo someraka, "Maiya káramo ano reyaki reapo. Asiane Firipio, nōmo ano hemakapurakarifare? Repo ano aseraka nōmo Ata soko aserakanapo. Mayiakako Ata tarisie, airakanare?

<sup>10</sup> Ano Atayaki rekenapo. Atane anoyaki rekenapo. Iti sarimaraka hakásá yineraka risikinapo. Firipio, makata ane nōmo hemakapurakarifare?" Áiyaka ipi aporo hakásá pura susuaki Yasumo someraka, "Reaki makata some akara one nōmo ní hemakapusua aeyaka reaki some karakananafapo. Ata anoyaki reke epo wakapuaka rakirane tarirakano nōmo rakirakanapo.

<sup>11</sup> Nōmo Ataki kataka marekea, Atamo anoaki kataka marekea, ayíáka iti hakásá yineraka risikinapo. Nōmo someraka one kakimakanie. Repo kakimakanafonorakano ane, nōmo wakapuaka arakirane repo himo asekea, anoaki himu hakásaraka hemakapunie. Hemakapukua nōmo someane soko kakimakanie.

<sup>12</sup> Nōmo kakaro somerakaripo. Aporo hinamomo nōmo someane kakimaka himu hakásaraka risike, nōmo arakira ayíáka aporo hinamoamo ayíáka rakiakosapo. Ano Ata rea yapura hinaka, Ho Kotesa pusierakano, Ho Kotesa hauaka wo peraka, Ho Kotesamo reaki wakapu karakano, repo nōmo makata rakirane marokeraka repo makata kára rakiakosapo.

<sup>13</sup> Repo anoaki himu hakásaraka risike ano yano motosa mafanahoko hemakapukua kurikuriraka makata ayikanie, airakano, nōmo ayiakakosapo. Atamo wakapu kárane aporo suamo asekeasimo repo ayikanie airakano, ipi hokosa nōmo ayiakakosapo.

<sup>14</sup> Repo anoaki himu hakásaraka risike ano yano motosa mafanahoko hemakapuraka makata su ayikanie, airakano makata suane nōmo ayiakakosapo.

#### *Ho Kotesa peakosaposane oyapo.*

<sup>15</sup> Repo anoaki himu tumurumo hemakapukua risikinone nōmo somemaneane soko repo kaikia kekemaraka risikiakosapo.

<sup>16</sup> Kekemaraka risikino nōmo Ataki someraka, re ararehoko Ho Kotesa pusiehoanie, aihokosapo. Airakano Ho Kotesamo re ararehoko Atamo pusiehokosapo. Pusierakano peakosapo. Peraka Ho Kotesa reyaki yaiya rekeakosapo. Ho Kotesane Kakaro Somera Hoane epo.

<sup>17</sup> Ho Kotesane nena aporo hinamomo, 'Isuyaki hakásá reae,' airafapo. Epo ainane ipu aserafapo. Arirakano eane ipu hemakapurafapo. Arirakano repo Ho Kotesane hemakapurapo. Yumo Ho Kotesa reyaki rekenapo. Keseke re himua hakásá hakásaraka Ho Kotesane rekeakosapo.

<sup>18</sup> Arirakano réane karaiya hokosa ayíáka risikiasimo nōmo re metakariakosafapo. Ano paripeakosapo.

<sup>19</sup> Arirakano maiya wakasema nina kakimakanafonona aporo hinamoamo ano efera hunia aseakosafapo. Arirakano repo anoane aseakosapo. Ano yaiya rekeakosasamo, re soko yaiya risikiakosapo.

<sup>20</sup> Maiya amo ano Atayaki reke, arirakano re anoyaki reke, arirakano ano reyaki reke, ayíáka isina su hakásá risike repo hemakapukusapo.

<sup>21</sup> Nōmo somemane kaikia kekemara aporo hinamoamo anoaki himu tumurumo hemakapurapo. Anoaki himu tumurumo hemakapusua aporo hinamoane nōmo Atamo himu tumurumo hemakapukusapo. Aporo hinamoaki, nōmo soko himu tumurumo hemakapukusapo. Ipu ano kakaro koteaka hemakapusimo nōmo ainane iaki tariakosapo," aisapo.

<sup>22</sup> Airakano Yutasemo Yasuaki makata somesapo. Arirakano Isekerio aporo Yutase Yasu parakesa ayafapo. Epo ipi yako Yutase metamo someraka, "Unihaeo, nōmo ainane isuaki hakásaraka tarikia, nena aporo hinamoaki tariakosafapo, airakane mairakare?"

<sup>23</sup> Airakano Yasumo someraka, "Aporo hinamomo anoaki himu tumurumo hemakapurakanano nōmo someane soko aporo hinamoamo kaikia kekemahokosapo. Kakimara aporo hinamoaki nōmo Atamo soko himu tumurumo hemakapukusapo. Aporo hinamo akiyaki Ata eto risikiakosapo.

<sup>24</sup> Arirakano aporo hinamomo anoaki himu tumurumo hemakapunafonorakano, aporo hinamoamo nōmo someane kakimakosafapo. Nōmo some karakano repo kaisiane nōmo

nī hemakapusuane reaki some kasafapo. Atamo ano pusiesamo epo hemakapusuane nōmo reaki some kasapo.

<sup>25</sup> Yumo ano reyaki areamo some karakanapo.

<sup>26</sup> Keseke Atamo ano yano motosa mafanaraka re ararehoko Ho Kotesa pusiehokosapo. Pusierakano re himua Ho Kotesa peakosapo. Peraka repo makata su enomaka hemakapusimo epo some kakakosapo. Nōmo somerakano repo kaisiane efera hunia hemakapusimo repo himura Ho Kotesamo mahemakapukusapo.

<sup>27</sup> Arirakano nōmo tau auaraka rerane reaki karakanapo. Hauaka wo aporomo tau auaraka rerane reaki ayiáka karafapo. Nōmo auaraka rerane reaki karakano re himu faraka namoraka risikiakopo.

<sup>28</sup> Nōmo fana someraka, 'Nōmo reane metakarikia ano hikia, keseke re arisia pari peakosapo.' Aisane repo kaisiapo. Repo himu tumurumo anoaki hemakapuraka, nōmo Ata rea hiakosaposane kaikia seseaka hemakapunie. Atane namo kakaro fanaraka reke, Ata patera ano rekenapo. E rea ano hiakosapo aisane repo kaikia seseaka hemakapunie.

<sup>29</sup> Ano hiasiraka area omo reaki somerakanapo. Nōmo someane repo kakimakasimo keseke ayiakosane, yumo nōmo reaki somerakanapo. Ano hinakano repo aseraka nōmo someane kakimakosapo.

<sup>30</sup> Arirakano reaki somehokosa maiyane fahoko makerakanapo. Hauaka omo unihae Satane peako makeraka rekenapo. Satanemo ipi wakapumo ano hurutapirafapo. Epo anoaki ayiakanierakano nōmo kakimarafapo.

<sup>31</sup> Atamo ayiakanierakano nōmo kakimarapo. Ataki nōmo himu tumurumo hemakapurapo. Nōmo Ataki himu tumurumo hemakapukua reane aporo hinamo suamo hemakapusimo, nōmo Atamo ayiakanierakano nōmo kakimarapo. Arirakano yumo nōmo someane yiypao. Re su takahisie. Isu purakapo." Ayiaka Yasumo somesapo.

## 15

*Yasumo someraka, "Kakaro sako karepe kepo asiane anopo," aisane oyapo.*

<sup>1</sup> Yasumo someraka, "Kakaro sako karepe" \* kepo asiane anopo. Sako karepe hemo wafayane nōmo Atapo.

<sup>2</sup> Anoa eyamo kataka marekea reke wate peanafonosane, hemo wafayamo eya ane popateraka mokoatenapo. Arirakano eyamo kataka marekea reke wate pesane efera hunia peasimo eyane horoposane hako kepo tipia popatenapo. Popateraka kepo aeyaka efera hunia susuniraka wate yakai koteaka perapo.

<sup>3</sup> Asiamo repo nōmo someane kakimasasamo repo makata watikisane nōmo someamo popateraka mokoatesapo.

<sup>4</sup> Re anoyaki reke, ano soko, reyaki reke, ayiáka isina hakāsa sarimaraka risikiakosapo. Sako karepe eya foanepekeha hauaka kake ipi hemakapukua wate perafapo. Sako karepe eyamo kepoa kataka marekea rekeno wate perapo. Wate pekeha area ayiáka repo anoaki himu hakásaraka kataka marekea risike koteaka rakipe puraka risikiakosapo.

<sup>5</sup> Sako karepe kepo asiane anopo. Sako karepe eya asiane repo. Repo anoaki kataka marekea risikino, nōmo kepo aeyaka sisipuaney aya pukua, wate pekeha arisia ayiáka re ayiáka risikiakosapo. Anoaki kataka marekea risikianafonoraka, wate peanafonoraka arisia ayiáka re ayiáka risikiakosapo.

<sup>6</sup> Anoaki kataka marekea risikianafonosa aporo hinamoane sako karepe eya pateke mokoatesa asiapo. Pateke mokoatesane yoferaka poranapo. Porasa mokoatesane su sarimaraka faturaka ira paikimarerapo.

<sup>7</sup> Repo anoaki himu hakásaraka hemakapukua risike, nōmo someane repo kakimaka hemakapukua kekemarakaka rakipe puraka, repo anoaki ayiakanierakano nōmo ayiakakosapo.

<sup>8</sup> Arirakano wate apera ayiáka nōmo some kakimara aporo hinamoane namo kakaro koteaka risikiakosapo. Ayiaka risikino aporo hinamo metakiramo asekea nōmo Atane makarohokosapo.

<sup>9</sup> Atamo anoaki himu tumurumo hemakapukua area ayiáka, nōmo soko reane ayiáka himu tumurumo hemakapukua rekenapo. Nōmo himu tumurumo hemakapusuane repo metakariakopo. Yaiya maka risikianie.

<sup>10</sup> Atamo someane nōmo kakimarakano Atamo ano yaiya himu tumurumo hemakapukua rekenapo. Hemakapukua area ayiáka, nōmo somerane soko repo kakimarakano, re soko, nōmo yaiya himu tumurumo hemakapukua rekeakosapo.

\* **15:1:** Sako yano motosa sako karepepo. Karepe wate perakano aporomo tumokoa metekeraka waene he rakirapo.

<sup>11</sup> Nōmo sesenane reyaki risikiasimo nōmo reaki somerakanapo. Nōmo someane kakimaraka repo kára seseraka mapiraraka siaraka mokoasimo hemakapurakaripo.

<sup>12</sup> Nōmo somerané oyapo. Nōmo re himu tumurumo hemaka apura ayiáka, repo namina yia ayiáka himu tumurumo hemakapunie.

<sup>13</sup> Aporomo ipi aporo táképoko farimaka kurane ane, himu tumurumo hemakapusuane namo kakaro fánapo.

<sup>14</sup> Nōmo somemane repo kaikia kekemarakano reane nōmo táképo.

<sup>15</sup> Yumo reaki nōmo aporo raipapo, airakanafapo. Asiamo aporo raipaki wafayamo ipi hemakapusuane somerafapo. Arirakano Atamo anoaki somesane makata su reaki nōmo somerakanapo. Aporo tákéki somera ayiáka nōmo reaki somerakanapo.

<sup>16</sup> Repo ano murikimaka pasimasaafapo. Nōmo reane murikimaka pasimosapo. Asiamo sako wate pekea arisia ayiáka re ayikasimo nōmo reane pasimokoa murikimaka makata rakiako pusiesapo. Wate yaiya peraka risikiasimo murikimaka makata rakiako pusiesapo. Pusierakano repo ano yano motosa mafanaraka hemakapukua risike, Ataki ayiakanier-akanó epo ayiakakosapo.

<sup>17</sup> Arirakano nōmo reaki somemane akara oyapo. Repo namina yia metamo metane himu tumurumo hemakapukua, arirakano metamo metane himu tumurumo hemakapukua ayiáka risikianie.” Aiyaka Yasumo somesapo.

*“Aporomo reaki hisihokosapo,” aisane oyapo.*

<sup>18</sup> Arirakano Yasumo someraka, “Aporomo reaki hisirakanone, anoaki fana hisisane, repo hemakapunie.

<sup>19</sup> Re nena aporoyaki paosa satiki ipu reaki himu tumurumo hemakapufunupo. Arirakano nōmo re pasimokoa murikimasasamo re nena aporoyaki paosafapo. Re iyaki re hakasa yinehoanafonosasamo ipu reaki hisihokosapo.

<sup>20</sup> Fana nōmo reaki somesane meraruholoko. Somesane oyapo. ‘Aporo raipamo ipi wafayane marokenafapo.’ Aiyaka fana nōmo somesapo. Asiamo nena aporomo ano mokoatikira ayiáka, re soko mokoatikihokosapo. Arirakano nōmo someane ipu kakimarakano, repo someane soko kakimakosapo.

<sup>21</sup> Repo ano patera asesasamo ipu re mokoatikihokosapo. Kotimo ano pusiesane namina hemakapurakanafapo.

<sup>22</sup> Ano hauaka wo peraka makata watikiaka rakirane kakama somesapo. Somesasamo ipu makata watikiaka rakisiane hufitaeraka metakariafunupo. Asiāne nōmo someane ipu kaikia, makata watikiaka rakisiane metakarirafaraka, yaiya asekepayarakano, ipu makata watikisa amo iane hukurukusapo. Aporo hinamomo makata watikiaka rakisiane metakarisimo, nōmo somehoko peanafonosa satiki ipu makata watikisane meraruamo yaiya rakiafunupo.

<sup>23</sup> Arirakano anoaki hisisa aporo hinamomo nōmo Ataki soko hisirakanapo.

<sup>24</sup> Nōmo wakapuaka rakisia ayiáka, fana aporo hakása metamo ayiáka wakapuaka rakisiaafapo. Nōmo wakapuaka rakianafonosa satiki aporo hinamomo metakiramo hemakapuraka, ‘Wakapuaka rakirane isiapo asesafapo,’ aihofunupo. Asiāne nōmo wakapuaka rakisiane ipu asekepayarakano, ipu makata watikiaka rakisiane metakarisiafapo. Metakarianafonosasamo ipu makata watikisa amo iane hukurukusapo. Nōmo wakapuaka rakisiane aporo hinamomo asesapo. Asekeea yia anoaki soko, Ataki soko, hisiraka risikinapo.

<sup>25</sup> Arirakano fana Kotimo sawia popasane oyapo. ‘Ipu namina anoaki nenakamakayia hisihokosapo.’ Aiyaka fana poparaka

(Buk Song 35:19; 69:4)

ayiakakosaposane yumo yainakananapo.

<sup>26</sup> Arirakano Ho Kotesa re ararehoko peakosane Ata rea aeyaka peakosapo. Kakaro someane aporo hinamomo hemakapusimo some kaka, arirakano taríkia, ayiakako peakosapo. Ano Ata rea yapura hinaka Ho Kotesamo re ararehoasimo nōmo Ataki someraka, Ho Kotesa pusiehoanie, aihokosapo. Airakano Atamo pusiehokosapo. Pusierakano peakosapo. Peraka anoane kakaro taríkia some kakakosapo.

<sup>27</sup> Arirakano hauaka wo koraka reke nōmo makata kepomarekea rakisia maiya amo re anoyaki hakása risiapo. Maiya suamo isina hakása risirasamo ano asesane repo aporo hinamomo metakiraki some kakanie.” Aiyaka Yasumo ipi aporo hakása puraki somesapo.

## 16

<sup>1</sup> Yasumo ipi aporo hakása puraki someraka, “Repo anoaki himu hakásaraka hemakapusuane metakarirapaka, keseke ayiakakosane yumo nōmo reaki some akara oyapo.

<sup>2</sup> Keseke ano patera asekeanafonosa aporoamo reaki someraka, 'Yu aporomo sarimana apea Kotiaki kekeruhoko peakopo,' aihokosapo. Ipu re kukuismo rukusapo. Rukua someraka, 'Isiapo Kotimo rakirane rakiraka reane rurakanapo,' aiyaka somehokosapo.

<sup>3</sup> Aporoamo Kotiane soko anoane soko hemakapunafonasamo reane mokoatikihokosapo.

<sup>4</sup> Mokoatikihokosane nōmo yumo someraka one keseke re mokoatikiana maiya amo nōmo somesane repo hemakapukusapo. Hemakapukua risikiasimo keseke aiyakakosane yumo nōmo reaki somerakanapo." Aiyaka Yasumo somesapo.

*"Ho Kotesa peakosapo," aisane oyapo.*

<sup>5</sup> Yasumo someraka, "Fana isina hakāsa risikisuamo some one nōmo reaki somesafapo. Asiamo Kotimo ano pusiesa amo hauaka hiakosakipoko yumo nōmo reaki somerakanapo. Somerakanano repo anoaki someraka, 'Ne ma hiakosare?' airakarifapo.

<sup>6</sup> Nōmo somerakanano repo kairaka kára hemakapukua himu nekea atoae.

<sup>7</sup> Asiamo nōmo kakaro somerakaripo. Re makotehokosakipoko ano hinakanapo. Ano hianafonorakanone, Ho Kotesamo re ararehoko peakosafapo. Ano hinaka Ho Kotesaki pusierakanano Ho Kotesamo re ararehoko peakosapo.

<sup>8</sup> Peraka aporo hinamo su hauaka wo risiaki hakāsa hakásaraka someraka, 'Nōmo watikiaka rakisiane ayapo. Arirakano makata ereketae aina susuane ayapo. Arirakano aporo hinamomo watikiaka rakisiane Kotimo hukurukusapo.' Aiyaka Ho Kotesamo tarikia somehokosapo. Arirakano aporo hinamomo hasaka hemakapusuane Ho Kotesamo tarikakosapo.

<sup>9</sup> 'Asiamo aporo hinamomo anoaki himu hakásaraka hemakapukua risikianafonorakanano ane makata watikisamo kepoane ayapo.' Aiyaka makata watikisamo kepoane Ho Kotesamo tarikia somehokosapo.

<sup>10</sup> Arirakano kakaro ereketae somera aporoane anoreapo, aiyaka hemakapusimo Ho Kotesamo reaki tariakosapo. Asiamo ano makáraraka marerakanano, Ata rea ano hinakano repo ano aseakosafapo. Asekeanafonona maiya amo ereketae somera aporoane ano reapo, aiyaka repo hemakapukusapo. Hemakapusimo Ho Kotesamo tarikia somehokosapo.

<sup>11</sup> Arirakano hukurukusa amo kepoane Ho Kotesamo reaki tariakosapo. Ano hauaka wo pesasamo hauaka wo unihae Sataneane Kotimo rukumosakatapisiapo. Rukumosakatapisiapo Ho Kotesamo reaki tarikia somehokosapo.

<sup>12</sup> Arirakano makata metakira soko nōmo somehokosapoko asiane some kárasasamo repo hemakapusifareapo.

<sup>13</sup> Arirakano Ho Kotesa aperamo kakaro some kepoane repo hemakapusimo epo kakaro some susuane reaki some kakakosapo. Epo hemakapusua aeyaka somehokosafapo. Nōmo someane soko Atamo someane soko epo kaisiane reaki somehokosapo. Keseke aiyakakosane soko somehokosapo.

<sup>14</sup> Epo ano makárakosapo. Nōmo ainane epo reaki somehokosapo.

<sup>15</sup> Atamo menane nōmenapo. Asiamo nōmo ainane repo hemakapusimo Ho Kotesamo reaki somehokosapo." Aiyaka Yasumo somesapo.

*Himu nekea risirané metakarikia himu seseraka risikiakosane oyapo.*

<sup>16</sup> Yasumo ipi aporo hakāsa puraki someraka, "Wakasema risina repo ano aseakosafapo. Arirakano wakasema risina repo anoane efera hunia aseakosapo."

<sup>17</sup> Airakano aporo hakāsa puramo namina susu someraka, "Yasumo ipi someraka, 'Wakasema risina repo ano aseakosafapo. Wakasema risina repo ano efera hunia aseakosafapo.' Aiyaka Yasumo some meta someraka, 'Ata rea ano hiakosasamo repo ano aseakosafapo.' airakane kepoane yakaparakapo.

<sup>18</sup> Yasumo someraka, 'Wakasema risina,' aiyaka somerakane kepoane yakaparakapo. Isu himeteripo."

<sup>19</sup> Airakano Yasumo someraka, "Wakasema risina repo anoane aseakosafapo. Arirakano wakasema risina repo anoane efera hunia aseakosafapo, aiyaka nōmo somehoane repo namina susu me arure.

<sup>20</sup> Nōmo reaki kakaro somerakaripo. Ano rusua kurakano hauaka wo anoaki hisiraka risia aporo hinamomo kára sesehokosapo. Asiáne repo anopoko hemakapuraka hihiripuhokosapo. Repo hihiripusane faraka sesehokosapo.

<sup>21</sup> Arirakano hokosa takapekosakipoko hinamo kau teraka karápo. Takapekeea hokosa maka kake, kau tesane soko, kau nenakasane soko, faraka, meraruraka, seseraka karápo. Aporo hokosa takapesasamo seseraka karápo.

<sup>22</sup> Aina ayíáka yumo re soko himu nekea risikinapo. Wakasema risina ano maturikia taeraka re aseako perakano, re seseraka risikiakosapo. Repo sesenane yaiya risikiakosapo. Aporo metamo re mokoatikianamo soko, makata umisa fasere aperamo soko, repo sesenane yaiya risikiakosapo.

<sup>23-24</sup> Ano turikia pukua hepene yapura ahira maiya amo repo anoaki kaiyakosafapo. Ataki kaikia kurikurihokosapo. Repo ano yano motosane makama fanaraka hemakapukua Ataki ayikanerakanepo ayiakakosapo. Fana soko yumo soko ano yano motosane makama fanaraka hemakapukua repo Ataki ayikaniesafapo. Kára seseraka mapiraraka risikiakosakipoko Ataki ayikanerakanepo ayiakakosapo. Nōmo reaki kakaro somerakaripo.” Aíyaka Yasumo somesapo.

### *Satanemo wakapuane Yasumo rukumosakatapisiane oyapo.*

<sup>25</sup> Yasumo ipi aporo hakása puraki someraka, “Fana nōmo reaki takumeaka somesapo. Asiamo keseke Atane nōmo kakama hufitaeraka somehokosa maiyane makerakanapo.

<sup>26</sup> Maiya amo repoko nōmo Ataki kaiyakosafapo. Repo ano yano motosa makama fanaraka hemakapukua risike, repo namina yiamo Ataki kaiyakosapo.

<sup>27</sup> Ano Koti aeyaka pesane repo kakimaka, arirakano repo anoaki himu tumurumo hemakapukua asiasamo Kotimo reane himu tumurumo hemakapukua rekenapo.

<sup>28</sup> Ata rea aeyaka ano hauaka wo pesapo. Pekea wakasema nina hauaka one metakarikia Ata rea yapura parihiakosapo.”

<sup>29</sup> Airakano aporo hakása puramo someraka, “Nōmo takumeaka somesane metakarikia, yumo isuaki kakama hufitaeraka somerakae.

<sup>30</sup> Makata suane nōmo hemaka apure. Isiapo neaki kaiyakosane, kaiyasilraka nōmo ní hemakapukua somerapo. Asiamo né kakaro Kotimo pusiesapo, aíyaka isiapo hemakapukuarakipo.”

<sup>31</sup> Airakano Yasumo someraka, “Repo anoaki kakaro himu hakásaraka hemakapukua risikinare?”

<sup>32</sup> Maiya wakasemamo risina, repo ano metakarikia repo namina ape kekepoa teketarikia pukusapo. Teketarikia purakano ano ni haku rekeakosapoko asiane Ata anoyaki rekeakosapo.

<sup>33</sup> Repo anoaki himu hakásaraka risike namonane faraka, mapiraraka risikiasimo, keseke ayiakakosane nōmo somerakanapo. Hauaka wo aporomo re mokoatikihokosapo. Mokoatikirakano yía, namonafaraka paroaka risikianie. Hauaka wo anoaki yunuraka risia aporo hinamoane nōmo wakapumo rukumosakatapisapo.” Aíyaka Yasumo somesapo.

## 17

### *Yasumo ipi aporo hakása purapoko kurikurisane oyapo.*

<sup>1</sup> Yasumo ipi aporo hakása puraki someaka faraka, hepene yapura asekea kurikuriraka, “Atao, nōmo fana ayiakakosaposane maiya omo ainakanapo. Nōmo né makárahoasimo nōmo ní hokosa anoane makáraraka mareanie.”

<sup>2</sup> Aporo hinamo suane nōmo unihaeaka asekea rekeasimo nōmo ano maresapo. Asiamo aporo hinamo nōmo murikimaka anoaki kasane nōmo iane asekea reke, yaiya risirane iaki kasapo.

<sup>3</sup> Asiamo yaiya risirane kepoane oyapo. Atao, kakaro Koti hákasane népo. Arirakano Yasu Kereso hauaka wo pusiesane anopo. Anoaki soko néaki soko himu hakásaraka hemakapukua risia aporo hinamoane etoyaki hakása yaiya risikiakosapo.

<sup>4</sup> Nōmo anoaki ayíáka rakinesane nōmo rakikia masapo. Rakikia masasamo né kararaka reane aporo hinamomo hemakapusimo nōmo tarisiapo.

<sup>5</sup> Atao, hauaka one kepomareasiraka ano neyaki kararaka faesa reapo. Kararaka faesa rea ayíáka efera hunia soko, ayíáka kararaka faesa rekeako nōmo anoaki kakanie.

<sup>6</sup> Hauaka wo aporo su risiane nōmo asekea, metakira nōmo murikimaka pasimokoa anoaki kasapo. Asiamo nōmo anoaki kasá aporoane nōmo ní ainane hemakapusimo, nōmo tarisiapo. Aporo ane fana nōmo aporo risiapo. Asiamo nōmo aporoane anoaki kasapo. Kasá aporoamo nōmo someane kakaro kakimaka rakisiapo.

<sup>7</sup> Arirakano nōmo wakapuaka arakirane kepoane né aeyaka pesasamo ipu hemakapukaranapo.

<sup>8</sup> Nōmo someaka maresane nōmo iaki some kasapo. Some karakano ipu kakimasapo. Ano néyaki fana reane soko, nōmo ano pusiesane soko, ipu kakimaka hemakapurakanapo.

<sup>9</sup> Iane nōmo ararehoasimo nōmo kurikurirakanapo. Arirakano neaki hisisa aporo akipoko nōmo kurikurirakanafapo. Nōmo aporo pasimokoa anoaki kasáne nōmo ní menasasamo ipoko nōmo kurikurirakanapo.

<sup>10</sup> Nómomenane etapo iti menapo. Arirakano nómomenane soko etapo iti menapo. Ano patera asesa aporomo nómō yano motosane makararaka tarirakanapo.

<sup>11</sup> I hauaka wo risikiakosapo. Arirakano ano hauaka one metakarikia, né rea peakosapo. Ata Kotesao, nómō anoaki kasá aporoamo néaki himu hakásaraka hemakapukua risiki-asimo, nómō iane asekea rekeanie. Etapo iti himu hakásaraka hemaka apura ayíáka, ipu solo ayíáka himu hakásaraka hemakapukua risikiasimo ararehoanie.

<sup>12</sup> Ano iyaki rea maiya amo iane nómō mafairaka asekea reapo. Ipu nómō ainane hemakapusimo nómō iane asekea reapo. Asekea rekeno iane paripusuafapo. Asiāne aporo hakás meta ipi hemakapusua aeyaka paripusuapo. Nómō sawia poparaka ayíakakosapo, aisane kakaro hakás yine fasereperaka ayiane.

<sup>13</sup> Asiamo ano né rea peakosapo. Ano seseraka area ayíáka iane soko kára seseraka risikiasimo nómō néaki kurikurirakanapo. Ano hauaka wo area yumo nómō ipoko kurikurirakanapo.

<sup>14</sup> Nómō someane nómō iaki some karakano ipu kakimasapo. Ipu kakimaraka hauaka wo makata rakira hemakapusuane metakasisasamo, nena aporomo iaki hisirakanapo. Arirakano hauaka wo makata rakira nómō hemakapunafonona ayíáka ipu soko hemakapurakanafapo. Asiamo iaki nena aporomo hisiraka risikinapo.

<sup>15</sup> I hauaka one metakarismo nómō pasimokoanie, aíyaka nómō kurikurirakanafapo. Hauaka wo Satanemo i asekea rekeakohoamo nómō mafairaka asekea rekeanie, aíyaka nómō kurikurirakanapo.

<sup>16</sup> Hauaka wo makata rakira nómō hemakapunafonona ayíáka ipu soko ayíáka hemakapurakanafapo.

<sup>17</sup> Nómō someane kakaro somepō. Kakaro someane kakimaka risikiasimo nómō iane ararehoanie. Kakaro some á hakasa risikiasimo ararehoanie.

<sup>18</sup> Aporo hinamo hauaka wo risiaki some kakako nómō ano pusiesa ayíáka, ipu soko aporo hinamoaki some kakako nómō iane pusierakanapo.

<sup>19</sup> Ipu namina ainane neaki kakasimo, nómō ní ainane néaki karakanapo. Asiamo ipu nómō kakaro someane kakimaka risikiasimo, nómō ní hemakapusua aeyaka ano rusua kukusapo.

<sup>20</sup> Asiamo ipoko hakás nómō kurikurirakanafapo. Ipu some karakano aporo hinamomo kakimaka, anoaki himu hakásaraka risikiakosa aporo hinamo akipoko soko nómō kurikurirakanapo.

<sup>21</sup> Arirakano ipu namina metamo metaki hemakapukua, metamo metaki hemakapukua ayíáka himu hakásaraka risikiasimo ararehoanie. Atao, néane anoyaki reke, arirakano anoane néyaki reke, ayíáka eto iti himu hakás yineraka arisia ayíáka, ipu etoaki himu hakásaraka kataka marekea ayíáka risikiasimo ararehoanie. Asiamo kakimara aporo hinamomo himu hakásaraka hemakapukua risikino, kakimakanafonosa aporo hinamomo asekea hemakapuraka, 'Kotimo Yasuaki hauaka wo pusiehoareapo.' Aíyaka ipi hemakapurukusapo.

<sup>22</sup> Nómō wakapu ainane anoaki kasane, nómō some kakimara aporo hinamoaki wakapu aina hakás yine kasapo. Iti hakasa yineraka arisia ayíáka ipu soko namina hakasa yineraka ayíáka risikiasimo nómō wakapu ainane iaki kasapo.

<sup>23</sup> Né anoyaki reke, ano iyaki reke, ayíáka isina himu hakásaraka risikinapo. Himu hakásaraka risiane kakimakanafonosa aporo hinamomo asekea someraka, 'Kotimo Yasuane hemaka apura ayíáka, kakimara aporo hinamoane soko, Kotimo hemakapurakanapo. Asiamo Kotimo Yasu hauaka wo pusiesapo, aisane kakarohoareapo,' aíyaka ipu hemakapusimo himu hakásaraka hemakapurane kakimara aporo hinamoaki kakanie.

<sup>24</sup> Atao, nómō anoaki aporo hinamo kasane anoyaki hakás risikiasimoripo. Hauaka one kepo mareasiraka nómō anoaki himu tumurumo hemakapusuapo. Hemakapuraka nómō wakapu faesa kotesane anoaki kasapo. Wakapu faesa kotesa anoaki kasane ipu asekeasimo anoyaki hakás risikiasimoripo.

<sup>25</sup> Atao, Ereketae aina kepoane népo. Asiamo nómō some hisisa aporo hinamomo néane hemakapurakanafapo. Néane nómō hemakapurakanapo. Nómō ano pusiesane nómō aporo hakás puramo hemaka apure.

<sup>26</sup> Néane ipu hemakapusimo nómō iaki tarisiapo. Tarisiane yaiya tariraka rekeakosapo. Asiamo nómō anoaki himu tumurumo hemaka apura ayíáka, himu tumurumo hemakapurane i himua mahemakapunie. Arirakano ano soko iyaki hakás rekeakosapo." Aíyaka Yasumo kurikurisapo.

**18**

*Yasu parakesane oyapo.*

*Matiu 26:47-56; Maka 14:43-50; Ruki 22:47-53*

<sup>1</sup> Yasumo kurikuriraka faraka Yasu takahikia apeane metakarikia, ipi aporo hakāsa purayaki pukua, he wakasema yano motosa he Kitorone yaoraka hikia, ira orofe hemoa hikia toapo.

<sup>2</sup> Asiamo Yasu ipi aporo hakāsa purayaki hemoa tokoako hikianasamo, hemoa efera hunia tokoakosakipoko hisiapo. Arirakano hemoane Yasu parakehokosa aporo Yutasemo aserapo.

<sup>3</sup> Aserasamo hemoa Rome kamani ame aporo soko, arirakano Kotimo apea sikiriti aporo asekeea risiane soko Yutasemo karikia hisiapo. Arirakano fana pirisiti aporo Fere se aporo ipu sikiriti aporoaki someraka, "Re Yutaseyaki paoraka hisie." Airakano iane Yutasemo karikia, Yasu parakehokosakipoko hemoa hikia, ipu ira rokopa soko, kapi soko, sari soko, wera makatane mokoa, nafa paikia, arirakano sapa paikia ayiāka hisiapo.

<sup>4</sup> Hikia perakano, Yasumo aseraka eaki makata ayiakakosane epo ipi hemakapusuapo. Yasumo ipi aporo hakāsa purayaki hakāsa toane, iane yia metakarikia, aporomo e wasere-mako pesa saapea pusuapo. Puraka Yutasemo aporo karikia pesaki Yasumo someraka, "Repo epa kope perakanare?" aisapo.

<sup>5</sup> Airakano e parakehokosa aporo Yutaseane iyaki hakāsa yia rekeno, ipu suamo someraka, "Nasare aporo Yasuane isiapo kope perakanapo." Airakano Yasumo someraka, "Anopo."

<sup>6</sup> Airakano i suane fofaraka wakasema fimiti pukua, hauaka atura hurupeperaka warisiapo.

<sup>7</sup> Warisikino Yasumo efera hunia someraka, "Repo epa kope perakanare?" Airakano ipu someraka, "Nasare aporo Yasuane isiapo kope perakanapo."

<sup>8</sup> Airakano Yasumo someraka, "Reaki nōmo somerakasa ayapo. Repo ano kope peraka, nōmo aporo hakāsa purane pusimo metakarisie. Purakano matasohokopo," aisapo.

<sup>9</sup> Airakano fana ipi Kotiaki someraka, "Aporoane nōmo anoaki kasane, hakāsa meta hasaka kosafapo." Aiyaka Kotiaki somesasamo waseremako pesa aporoaki Yasumo someraka, "Aporo hakāsa meta repo rukupo. Metakarisie," aisapo.

<sup>10</sup> Airakano Saemone Pitamo ipi ferepemo pirisiti aporo fanamo aporo raipa senaki tumuru takuane rukusakare tapisiapo. Aporo raipa amo yano motosane Maokase, ipi senaki rukusakare tapisiapo.

<sup>11</sup> Rukusakare tapirakano Yasumo Pitaki someraka, "Ferepeane nōmo ferepe makera pausi terakae hisia á rusakamaresie. Atamo ano kukusane maresasamo himu nekea, kau teraka kukusapo. Kukusane metakariakosafapo." Aisapo.

*Anase rea Yasu karikia pusuane oyapo.*

<sup>12</sup> Arirakano ame aporo soko, satini soko, sikiriti aporo soko, ipu Yasuane hokono tetákara taporaka waseremaka,

<sup>13</sup> Anasemo apea karikia pusuapo.\* Anasemo ipi farayane Kaifasemo arumasapo. Keremisi amo Kaifase ipi pirisiti aporo fanaraka reapo.

<sup>14</sup> Arirakano fana Kaifasemo Yu aporoaki someraka, "Aporo hinamo supoko aporo hakāsa kuane siahoasireapo." Aiyaka Kaifasemo somesapo.

*"Yasumo aporo hakāsa purane nere?" Airakano Pitamo waesane oyapo.*

*Matiu 26:69-70; Maka 14:66-68; Ruki 22:55-57*

<sup>15</sup> Yasu fana karikia purakano, Saemone Pita soko, aporo hakāsa pura meta soko, kesekeea kekemarape pusuapo. Pukua pirisiti aporo fanamo apea pauraka, aporo hakāsa pura tetá pesa amo aporo hakāsa metamo pirisiti aporo fanane aserapo. Aserasamo ape ruru ikia koro aeyaka yorokoa pukua, Yasuyaki hakāsa ape hauaka moroa pukua risiapo.

<sup>16</sup> Pita kumuku pekeea, ikia koro yao takua rekeno, aporo hakāsa pura meta fana pusuane ikia koroa paripesapo. Paripekea ruru ikia koro asekeea rea hinamoaki someraka, "Pita peasimo ikia koro ropaka mayane siahoasireare?" Airakano hinamoamo aoaka, ikia koroane ropaka masapo. Ropakamaka Pita perakano

<sup>17</sup> hinamoamo eaki someraka, "Yasumo aporo hakāsa pura metane nere?" Airakano Pitamo kotafe someraka, "Anofapo," aisapo.

<sup>18</sup> Arirakano sikiriti aporo soko, pirisiti aporo raipa soko inurakano ira kau asia paikia rufirakano, hokono ira tarikia asekeea risiakipoko, Pita soko ira hakakosakipoko pekeea, iyaki hakāsa risiapo.

\* <sup>18:13</sup>: Anaseane pirisiti aporo fanaraka rea nine Rome kamani aporomo Anaseane metakarikia sanasiraka, Kaifase pirisiti aporo fanaraka rekeasimo maresapo.

*Pirisiti aporo fanamo Yasuaki somesane oyapo.*  
*Matiu 26:59-66; Maka 14:55-64; Ruki 22:66-71*

<sup>19</sup> Pitane aporo metakirayaki sarimarakara ira haraka risiakipoko, pirisiti aporo fanamo Yasuaki someraka, “Nómo ní aporo hakása pura epare? Aporomo hemakapusimo nómo yakapa somesare?” Aiyaka Yasuaki kairakano

<sup>20</sup> Yasumo someraka, “Aporo suamo kaiyisimo nōmo kakama somesapo. Yu aporomo sarimana apea soko, Kotimo apea soko, á Yu aporo pekea sarimarakano some kasapo. Tau mahamekeea somesafapo.

<sup>21</sup> Marirakano nōmo anoaki kairakanare? Nōmo some kasane kaisia aporoaki kaiyinie. Nōmo somesane ipu kaikia hemakapukua risikinapo. Iaki kaiyinie.”

<sup>22</sup> Airakano sikiriti aporo hakása metamo Yasu rusuapo. Ruraka someraka, “Nōmo pirisiti aporo fanaki aiyaka somehokopo.”

<sup>23</sup> Airakano Yasumo someraka, “Nōmo watikiaka somerakanó nōmo kaisiane aporo suamo kaiyisimo somesie. Nōmo kakaro somerakanó yia marirakano nōmo ano ru-rakanare?” aisapo.

<sup>24</sup> Arirakano Yasu ipi hokonoa taposane yaiya rekeasimo yia, Anasemo sikiriti aporoaki someraka, “Aporoane pirisiti aporo fana Kaiafasemo hukurusimo karikia pusie.” Aiyaka Anasemo somesapo.

*Pitamo efera hunia waesane oyapo.*  
*Matiu 26:71-75; Maka 14:69-72; Ruki 22:58-62*

<sup>25</sup> Anasemo aiyaka somesa maiya yiamo Pita ira haraka rekeno aporo metakiramo eaki someraka, “Aporoamo aporo hakása pura pasimasane nére?” Airakano Pitamo kotafe someraka, “Anofapo,” aisapo.

<sup>26</sup> Airakano pirisiti aporo fanamo aporo raipa ipi senaki Pitamo rukusakare tapisiamo ipi tákemo someraka, “Ne ira orofe hemoa aporoakiyaki kakeno nōmo asesane nere?”

<sup>27</sup> Airakano Pitamo waesapo. Waeħoanine mena kokorokomo mesapo.

*Paireate rea Yasu karikia pusuane oyapo.*  
*Matiu 27:1-2, 11-14; Maka 15:1-5; Ruki 23:1-5*

<sup>28</sup> Mituru fiarakano yia, Kaiafasemo apeane ipu metakarikia kamani aporo fanaraka reamo apea Yasuane karikia pusuapo. Karikia pukua aporoane Yu aporohoanafonosasamo, ipi apea Yu aporō yorosafapo. Ape Farimaresa Hemakapuko Hokono Keakosakipoko Yu aporomo hemakapuraka, “Yu aporohoanafonosayaki ape hakása sari-maraka toke, keseke hokono akera maiya amo makata neane siaħoasifareapo.” Aiyaka hemakapuraka kamani aporomo apea yorosafapo.

<sup>29</sup> Yu aporo yorokoa peanafonorakano Paireate takahikia ipi apeane metakarikia aseako pusuapo. Pukua iaki someraka, “Aporoaki repo makata hukuarurane, makata yakapapoko hukururakanare?”

<sup>30</sup> Airakano ipu someraka, “Epo watikiaka rakianafonosa satiki né rea karikia peafunufapo.”

<sup>31</sup> Airakano Pairatemo someraka, “Repo namina somemane kakenapo. Asiamo repo namina yia eane hukurunie.” Airakano Yu aporomo someraka, “Re Rome kamanimo someraka, ‘Aporo rusua kukusane repo Yu aporomo menafapo. Isu Rome aporomo menapo.’ Aiyaka repo somesasamo repo eane ira paremareasimo karikia perakanapo.” Aiyaka Yu aporomo somesapo.

<sup>32</sup> Ipu someħoasiraka fana Yasumo someraka, “Keseke ano ira matopesa paremarerakanou rusua kukusapo.” Aisane yumo kakaro yanakanapo.

<sup>33</sup> Airakano Paireate ipi apea paripuraka Yasuaki peaesapo. E perakano Pairatemo someraka, “Yu aporomo unihaeane nere?”

<sup>34</sup> Airakano Yasumo someraka, “Nómo ní hemakapusua aeyaka, ‘Né unihaeere?’ aiyaka kairakanare? Aporo metamo néaki somerakanó nōmo anoaki kairakanare?”

<sup>35</sup> Airakano Pairatemo someraka, “Ano Yu aporfapo. Nōmo ní fanasiħoasimo nōmo ní aporo ira Yu aporomo soko, pirisiti aporo káramo soko, né karikia pesapo. Nōmo watikiaka rakisiane, makata yakapa watikiaka rakisiare?”

<sup>36</sup> Airakano Yasumo someraka, “Hauaka wo aporoane nōmo unihaeaka asekea reke-nafapo. Hauaka aporo ane nōmo asekea unihaeaka rea satiki anō waseremakohoamo, nōmo aporo hakása puramo Yu aporo sisimayaki weafunupo. Weakosapoko asiane hauaka wo anō unihaeaka rekeanafonosamo wesafapo.”

<sup>37</sup> Airakano Pairatemo someraka, “Unihaeane tiki nerakanareapo.” Airakano Yasumo someraka, “Ano unihaeane nōmo someraka ayapo. Nōmo somerakane anoane somerakae. Kakaro some kakako anō hauaka wo pesapo. Kakaro some takua risia aporo hinamoamo nōmo someane kakimarakananop.”

<sup>38</sup> Airakano Pairatemo someraka, “Kakaro someane yakapare?” aisapo.

*Yasuaki kotafe topakamaraka hukurusuane oyapo.*

*Matiu 27:15-31; Maka 15:6-20; Ruki 23:13-25*

Pairatemo ipi apeane metakarikia pukua, Yu aporo sisimaki someraka, “E fanasihokos-apoko asiane epo watikiaka rakisiafapo.

<sup>39</sup> Ape Farimaresa Hemakapuko Hokono Akera maiya suamo aporo tipura kesa hakásá meta nōmo tonotaenapo. Tonotaenasamo nōmo tonotaehokosapo. Yumo repo Yu aporomo unihaeane tonotaehoare?”

<sup>40</sup> Airakano ipu sakepamo wáraka, “Wae. E tonotaehokopo. Parápase hákasa tonetaehoanie,” aisapo. Arirakano makata hakimokoakosakipoko aporo meta rurane Parápasepo.

## 19

<sup>1</sup> Pairatemo Yasu karikia ipi apea pukua, ame aporoaki rusierakano sakomo rusuapo.

<sup>2</sup> Airakano unihae káramo hati kotesa karotapirapo. Asiamo Rome ame aporomo Yasuane mainamareraka sako keta risia weroweroraka hahaeraka unihae káramo hati murikimaka rakisiante Yasu wamoa karotapikia maresapo. Arirakano unihaeemo pasu susu kotesane Yasu osoraka marekea

<sup>3</sup> mainamareraka someraka, “Yu aporomo unihaeane népo. Neane isiapo makararakanapo.” Aiyaka someaka eane ipu hokonomo rusuapo.

<sup>4</sup> Rurakano Pairatemo ipi apeane metakarikia, aporo sarimasaki someraka, “Repo asekeasimo efera hunia nōmo Yasuane karikia perakanapo. Eane fanasihokosapoko asiane epo watikiaka rakiafareapo.”

<sup>5</sup> Aihoane Yasu sako keta risiamo wamoa karotapikia marekea, unihaeemo pasu susa osoraka marekea, aiyáka Pairatemo apeane metakarikia yao takua perakano, Pairatemo someraka, “E aperane asesie. Kára aiyáka mayiakako asiare?”

<sup>6</sup> Airakano pirisiti aporo káramo soko, sikiriti aporomo soko Yasu aseraka sakepamo wáraka, “Eane ira matopesa paremarekea maporasie. Eane ira matopesa paremarekea maporasie.” Airakano Pairatemo someraka, “Repo namina eane karikia pusie. Karikia pukua repo namina eane ira matopesa paremarekea maporasie. Epo watikiaka rakisiante nōmo hemakapurakarifapo.”

<sup>7</sup> Airakano Yu aporo sisimamo someraka, “Isiapo somemane motoraka, ‘Koti mawakase-maraka somera aporoane rusua kukunie.’ Aiyaka somemane motosasamo Yasumo someraka, ‘Ano Kotimo hokosapo,’ aisakipoko eane rusua kukunie.”

<sup>8</sup> Aiyaka somerakano Pairatemo kairaka, kára namoraka reapo. Yasumo ipi someraka, “Ano Kotimo hokosapo,” aisapakano Pairate namoraka reapo.

<sup>9</sup> Namoraka reke Yasu karikia ipi apea paripukua Yasuaki someraka, “Né hauaka maeyaka pesare?” Airakano Yasumo makata somerafaraka me kausapo.

<sup>10</sup> Me kaurakano Pairatemo someraka, “Nómo anoaki makata somerakarifapo. Mari-rakanonare? Ne rusua kukusane soko né tonotaehokosane soko nōmo aiyakakosapo. Ane nōmo maroponapo. Nómo hemakapurakarifare?”

<sup>11</sup> Airakano Yasumo someraka, “Nómo ayakakosane nōmo ni hemakapusua aeyaka aiyakakosapo. Kotimo aorakano nōmo aiyakakosapo. Nómo ano hukurukua fanasihosimo aporomo ano karikia pesane ipu watikisane kakaro kárapo.”

<sup>12</sup> Airakano Pairatemo kaikia, Yasuue tonotaehoko hemakapusuapo. Tonotaehokosapo airakano, Yu aporo suamo wáraka, “Wae. Tonotaerakano Rome kamani unihae Sisamo né tákéhokosafapo. Aporoamo someraka, ‘Ano unihaeaka rekenapo.’ Aisa aporoane Sisayaki yunuraka rekenapo. Asiamo aporoane nōmo farimarakano Sisamo néaki yunuhokosapo.”

<sup>13</sup> Airakano Pairatemo kaikia Yasu karikia ipi apeane metakarikia, fanasihokosakipoko hukurura aporomo sea kayapo. Hukurura aporomo sea kaya ane, Yu aporo meaka yano motoraka Kapata yano motosapo. Namo meaka semenesepo, aiyaka yano motosapo.

<sup>14</sup> Arirakano Ape Farimaresa Hemakapuko Hokono Keakosane rau aiyakakosasamo pipu aporo hinamo suamo makata su maroponapo. Asiamo maropoana maiya amo maiya tuaro (12) koroko paurakano Pairatemo Yu aporoaki someraka, “Repo unihaeane épó.”

<sup>15</sup> Airakano ipu sakepamo wáraka, “E rusie. E rusie. Rukua ira matopesa paremaresie.” Airakano Pairatemo someraka, “Repo unihaeane ira matopesa paremaresie, aiyaka nōmo somehoasimore?” Airakano pirisiti aporo káramo someraka, “Isiapo unihae kárane kamani unihae Sisa ipi hákasapo.”

<sup>16</sup> Airakano Pairatemo someraka, “Yasu ira matopesa paremareako karikia pusie.” Airakano ipu Yasu karikia pusuapo.

*Yasu ira matopesa paremaresane oyapo.*

*Matiu 27:32-44; Maka 15:21-32; Ruki 23:26-43*

<sup>17</sup> Yasu karikia puraka ira matopesane Yasumo ipi maka pusuapo. Pukua uni kiki hauaka á pauraka risiapo. Hauaka ane Hipuru meaka yano motosa Kokóta hauakapo.

<sup>18</sup> Hauaka á Yasu ira matopesa paremarekeea maposapo. Maporaka aporomano rura aporo tetáne soko ira paremarekeea, meta Yasu hokono tumuru takua maposapo. Meta Yasu hokono kasakai takua maposapo. Maporaka Yasuane tipia maposapo.

<sup>19</sup> Maporaka marekeea Pairatemo makata popasapo. Popasane oyapo. "Yasuane Nasare aporopo. Yu aporomo unihaeane épo." Aíyaka Pairatemo popasane ipi ame aporomo maka, Yasu unia kima yapura paremaresapo.

<sup>20</sup> Yasu ira paremarekeea maposane Yarusarame siti makeraka maposapo. Yarusarame siti makeraka paremaresamo aporo hinamo yakaimo aseako peraka, popasane menosapo. Popasane Hipuru meaka soko, Rome aporo meaka soko, Kiriki aporo meaka soko me isiane su popasapo.

<sup>21</sup> Popasane Yu aporo pirisiti aporo káramo menoraka Pairateaki someraka, "Yu aporomo unihaeane épo, aíyaka popahokopo. Úyaka popahoanie. 'Ipi yiamo someraka, "Yu aporomo unihaeane anopo," aíyaka somerakasuane épo.' Aíyaka popahoanie."

<sup>22</sup> Airakano Pairatemo someraka, "Nōmo popasane siapo. Kosohokosafapo," aisapo.

<sup>23</sup> Yasu ira matopesa paremaresa yia rekeno, ame aporomo Yasumo pasuane mokoa parakuraka i kitafasuaki kasapo. Yasumo pasu horopokarane yaiya weroraka rakisia irihoanafonosa pasuane makosakipoko

<sup>24</sup> ame aporomo someraka, "Pasuane koahoane siahoasifareapo. Asiamo pasuane aporo hakásamo mako, isiapo kaseraka enana ayíáka makata fete mokoasuraka napane asekea enahokosapo," aisapo. Arirakano fana Kotimo sawia poparaka ayiakakosaposane aina ayapo. "Fana popasane oyapo. "Nōmo pasuane mokoako aporomo parakuhokosapo. Arirakano nōmo pasu kara meta aporomo mako kaseraka enana ayíáka enahokosapo." Aíyaka popasane kakaro aina ayapo.

(Buk Song 22:18)

<sup>25</sup> Arirakano Yasu ira matopesa maposane makeraka ipi kałyia soko, ipi aeya soko, Koropasemo hinamo Mariane soko, Makatara hinamo Mariane soko, i su pekeaa asekea risiapo.

<sup>26</sup> Asekea risikino Yasumo ipi kałyia soko, ipi aporo hakásá pura hakásá metane Yasumo himu tumurumo hemakapukua rea aporoane soko aseraka ipi amaki Yasumo someraka, "Hinamo neo, nōmo ní hokosa hemaka apura ayíáka, aporoane nōmo hemakapunie."

<sup>27</sup> Aíyaka ipi aporo hakásá puraki Yasumo someraka, "Nōmo ní ama asekea area ayíáka, nōmo amane nōmo asekea rekeanie." Aíyaka Yasu kusua maiyamo aporo hakásá puramo Yasumo kałyiane ipi apea karikia pukua asekea reapo.

### *Yasu kusuane oyapo.*

*Matiu 27:45-56; Maka 15:33-41; Ruki 23:44-49*

<sup>28</sup> Arirakano Yasumo makata rakirane fasapo, aiyaka hemakapusuasamo Yasumo ipi someraka, "Ano he nariripo." Aíyaka Kotimo sawia popasa yine aina ayapo.

<sup>29</sup> Asiamo merakia waene he kisa takamasane he wateria asia waene hea kokomarekeea, ira turua taporomarekeea Yasumo akai kiria motosapo.

<sup>30</sup> Motorakano Yasumo sareraka someraka, "Yiyapo." Aíyaka Yasu ipi kukuko makehoramо wamo arupekeea hemakapuraka, "Ano ho puane siahoasireapo." Aíyaka hemakarapukua kusuapo.

### *Yasu ketaya takua ferepemo karesane oyapo.*

<sup>31</sup> Yu aporo sisimamo Pairateaki someraka, "Ira matopesa paremurisiane fatari mokoakosakipoko aporoane korake rukumosorasiehoanie.\* Arirakano Ape Farimaresa Hemakapuko Hokono Keakosakipoko pipu makata nakosa sarimarakapano. Asiamo rau fenena maiyamo aporo ira matopesa paremurisiane yia risiane siahoasifareapo." Aíyaka aporoamo hemakapuraka Pairateaki somesapo.

<sup>32</sup> Aíyaka somerakano Pairatemo someraka, "Aporoane foaka kukusimo korakeane rukumosorasie," aisapo. Airakano ame aporo pukua aporo takua paremaresane korake rukumosoraka, arirakano takua paremaresane soko korake rukumosoraka,

<sup>33</sup> arirakano Yasuane korake rukumosorako aseane Yasu kakaro kusikeno asekea, ipi korakeane rukumososafapo.

<sup>34</sup> Ame aporo hakásá metamo ferepemo Yasu ketaya karesapo. Kareane yapi soko he soko pusuapo.

<sup>35</sup> Purakano aporomo asesapo. Asesa aporoamo sawi one popasapo. Epo asesasamo kakaro someaka popasapo. Repo kakimakasimo epo popasapo.

\* 19:31: Foaka kukusimo korake rukumososapo.

36-37 Arirakano fana Kotimo sawia popasane oyapo. “E kiki suane hakása meta soko rukumosohokosafapo.” Aiyaka popasapo. (Buk Song 34:20)

Arirakano makata meta soko poparaka, “E ketaya karesane aporomo aseakosapo.” Aiyaka ayiakakosapo, aiyaka popasane yasiapo. (Sekaraia 12:10)

*Yasu kunikia motosane oyapo.*

*Matiu 27:57-61; Maka 15:42-47; Ruki 23:50-56*

38 Arirakano Arimatía aporo yano motosa Yosefemo Yasu kukusiraka rea maiya amo, e Yasu patera asesapo. Yu aporomo aserapaka namoraka tau Yasu patera asesapo. Yosefe pukua Pairateaki someraka, “Yasu kusuane kunikia nōmo motoaere?” Airakano Paireatemo aosoapo. Aorakan Yosefe pukua Yasu kusuane fatarimaka pusuapo.

39 Arirakano Nikitímase fana ereamo Yasu aseako pusuane Yosefeyaki pukua, pauta wape yamona, meta yano motosa mua, meta yano motosa arose, tetapō mokoa pusuapo. Pauta sakepamo mokoa pusuapo.

40 Aporo tetá amo Yasu kusuane maka, pauta wape yamosane kaua soaeraka, pasumo taporaka, Yu aporomo aporo kusua kunikia motoakosakipoko tapona ayiáka taposapo.

41 Arirakano ira matopesa maposane makeraka orofe hemo reapo. Hemo á kunikia reapo. Kunikia á fana aporo kusua motosafapo.

42 Yu aporomo yape fenena maiya makeraka taki awara maiyamo, kunikia makeraka reakipoko Yasu kusuane motosapo.

## 20

*Yasu kusua kunikia motosane fasekeno asesane oyapo.*

*Matiu 28:1-8; Maka 16:1-8; Ruki 24:1-12*

<sup>1</sup> Yatipinumo<sup>\*</sup> mituru fiahoko makehoramo Makatara hinamo Mariane pukua, Yasu kunikia motosa aseako pusuapo. Pukua aseane, eke tafeamo kunikia mapirisiane ropakataesekeno asesapo.

<sup>2</sup> Aseane Yasu fasekeno aseraka foaka parihikia, Saemone Pitape Yasumo ipi aporo hakása pura hakása metane Yasumo himu tumurumo hemakapusua<sup>†</sup> aporoane soko, Mariamo tetáki someraka, “Unihae kusua kunikia motosane, aporo metakiramo maka pusesapo. Ma maka pusuarakapo.”

<sup>3</sup> Airakano tetá kunikia aseako foaka pukua,

<sup>4</sup> aporo hakása pura metamo Pitane marokeraka fana foaka pukua kunikia pausapo.

<sup>5</sup> Kunikia yao takua aeyaka reke, weaka aseane, Yasu kusua pasumo taposane pasu hakása yia wareke, Yasu fasekeno asesapo.

<sup>6</sup> Arirakano Pita kesekeia foaka pesa nine kunikia kakarua aseako forosoraka pusuapo.

<sup>7</sup> Forosoraka pukua aseane pasumo e taposane yia wareke, arirakano pasu metamo wamoa taposane soko yia warekeno asesapo.

<sup>8</sup> Arirakano aporo hakása pura meta fana pesane soko kunikia forosoraka pukua, pa- suane aseraka ipi hemakapuraka, “Yasu kakaro turikia pureapo,” ayiáka hemakapusuapo.

<sup>9</sup> Arirakano Kotimo sawia poparaka, “E kusuane turikia pukusapo.” Aisane fana tetapō koteaka hemakapusuafapo. Asekeasiraka hemakapusuafapo.

<sup>10</sup> Yasu kunikia motosane fasekeno tetá apea poparihisiaipo.

*Makatara hinamo Mariamo Yasu asesane oyapo.*

*Matiu 28:9-10; Maka 16:9-11*

<sup>11</sup> Kunikia yao takua Maria hiripuraka reke weaka aseane,

<sup>12</sup> hepene aporo tetá pasu pakae ososa Yasu kusua motosa á, meta korake sapea, arirakano meta wamo sapea ayiáka tokeno asesapo.

<sup>13</sup> Aserakano tetapō someraka, “Hinamo neo, marirakano hiripurakanare?” Airakano Mariamo someraka, “Unihae kunikia motosane ipu maka pusesapo. Ma maka pusuarakapo.”

<sup>14</sup> Aiyaka someaka faraka, ipi patera pariaseane Yasu rekeno asesapo. Aseraka, “Ya- sureapo,” aiyaka hemakapusuafapo.

<sup>15</sup> Asekea hemakapunafonorakano Yasumo someraka, “Marirakano hiripurakanare? Epa kope perakanare?” Airakano hinamoamo hemakapuraka, “Hemo wafayareapo,” aiyaka hemakapuraka someraka, “Nōmo e maka pukua ma motosare? Maka pukua moto- sane anoaki somesie. Nōmo e mako pukusakipoko anoaki tarisie.”

\* <sup>20:1</sup>: Isiapo yatipinu sereane Yu aporomo menopo aiyaka somerapo. † <sup>20:2</sup>: Aporo hakása pura hakása meta Yasumo himu tumurumo hemakapusua aporoane Yonepo.

<sup>16</sup> Airakano Yasumo someraka, "Maria." Airakano Yasumo meane hinamoamo kairaka rekeako pariraka aseane Yasu rekeno asesapo. Aseraka, "Tisao," aisapo. Aiyaka somerakan Yu aporomo Hipuru meaka Raponai airapo.

<sup>17</sup> Airakano Yasumo someraka, "Ano kaua sakiraka maka rekeakopo. Ata rea hauaka ano hianafonosasamo, nōmo ano maka rekeakopo. Nōmo aporo hakāsa pura, nōmo nī mae asiaki úyaka somehoanie. 'Ata rea ano parihiaikosapo. Nōmo Atane soko repo Atane soko hakāsa yiypao. Nōmo Kotiane soko repo Kotiane soko hakāsa yiypao. E rea ano parihiaikosapo.' Aiyaka iaki somehoanie."

<sup>18</sup> Airakano Maria parihikia aporo hakāsa puraki someraka, "Yasuane nōmo asesapo." Aiyaka Yasumo someaka maresane soko iaki some kasapo.

*Aporo hakāsa puramo Yasu asesane oyapo.*

*Matiu 28:16-20; Maka 16:14-18; Ruki 24:36-49*

<sup>19</sup> Sere hakāsa niné yatipinumo ereamo, Yasumo ipi aporo hakāsa puramo Yu aporo sisima perapaka namoraka ikia koro mapirikia toapo. Toakipoko ape á Yasu pekea iaki someraka, "Mapiraraka risikianie."

<sup>20</sup> Aiyaka ipi hokono tetá ikokosa umuruane tarikia, arirakano ipi ketaya karesa umuruane tarirakano ipi aporo hakāsa puramo aseraka Unihaereapo, aiyaka hemakapukua sesesapo.

<sup>21</sup> Seserakano Yasumo efera hunia someraka, "Seseraka auaraka risikianie. Atamo ano pusiesa aiyáka, nōmo reane pusie airakanapo."

<sup>22</sup> Aiyaka Yasumo himu haraka i toakipoko akai fofoane makama asapo. Makama araka Yasumo someraka, "Ho Kotesane re himua rekeasimo masie.

<sup>23</sup> Aporomo watikiaka rakisia himu ra kayane hufitaerakano watikisane repo someraka, 'Watikisane farakanapo.' Airakano watikisane kakaro fanapo. Repo someraka, 'Watikisane fasafapo.' Airakano watikisane fanafapo." Aiyaka Yasumo someaka faraka Yasu ipi yia reanine fasekeno asesapo.

*Tomasemo Yasu asesane oyapo.*

<sup>24</sup> Aporo hakāsa pura keno suane meta Tomase, ipi yano motosa meta Titimase, e iyaki hakāsa tokoanafonosasamo Yasuane asesafapo.

<sup>25</sup> I toakipoko Tomase perakano ipu someraka, "Yasuane isiapo asesapo." Airakano Tomasemo someraka, "Someane nōmo kakimakosafapo. Yasu hokono umuruane nōmo sakairaka ipi, ketaya umuruane sakairaka, nōmo himu hakásaraka hemakapusapo," asapo.

<sup>26</sup> Arirakano soko hakāsa faraka, sere karimo i efera hunia sarimaraka apea toapo. Maiya amo Tomase soko iyaki hakāsa toapo. Ikia koro mapirikia toakipoko Yasu pekea iaki someraka, "Seseraka auaraka risikianie."

<sup>27</sup> Aiyaka Yasumo Tomaseaki someraka, "Nōmo ano hokono asesie. Hokono umuruane sakairasie. Ketaya umuruane sakairasie. Himu tetáraka hemakapusune metakarikia, himu hakásaraka hemakapukua rekeanie."

<sup>28</sup> Airakano Tomasemo someraka, "Nōmo Unihaeo. Nōmo Kotio."

<sup>29</sup> Airakano Yasumo someraka, "Nōmo ano asesasamo himu hakásaraka hemakapukua rekenapo. Arirakano aporo hinamo metakiramo ano asekeanafonosa aporo hinamoamo anoaki himu hakásaraka hemakapukua risike, i kakaro seseraka risikiakosapo." Aiyaka Yasumo somesapo.

*Sawi one popasa kepoane oyapo.*

<sup>30</sup> Maiya metamo aporo hakāsa puramo asekeasimo Yasumo makata wakapuaka rakira metakirane soko rakisiapo. Rakirakano aporo hakāsa puramo asesapo. Makata rakisia metakirane sawi wo popasafapo.

<sup>31</sup> Arirakano Kotimo unihaeaka rekeasimo murikimasa aporoane épo. Yasu ipiane Keresopo. E Kotimo hokosapo. Aiyaka repo kakimakasimo sawi one popasapo. "Yasu ipi Keresopo. Ipi Kotimo hokosapo." Aiyaka repo hemakapukua kakimaka, Yasu yano motosane makama fanaraka hemakapurakano re yaiya risikiakosapo.

## 21

*Aporo hakāsa puramo efera hunia asekeasimo Yasu he Taipiriase fua pesane oyapo.*

<sup>1</sup> Aporo hakāsa puramo efera hunia asekeasimo Yasu he Taipiriase\* fua pesane oyapo.

\* **21:1:** He Taipiriase airakane he Kaririaki aiyaka airakaripo.

<sup>2</sup> Saemone Pita soko, Tomase ipi yano motosa meta Titimaseane soko, Natanio ipi Kariri hauaka Kena taone aeyaka pesane soko, Sepetemo hokosa tetâne soko, Yasumo aporo hakâsa pura tetâ metane soko, i su he fua risiapo.

<sup>3</sup> Risike Saemone Pitamo iaki someraka, "Pokoa mokoako purakapo." Airakano ipu someraka, "Neyaki isu perakanapo," aisapo. Aiyaka i kasua ripaka, roko hikia he numua kasipu makasuraka, kiraka mayane kasipua pokoa kesafapo. Ere hakâsa yiamo airaka risike, pokoa hakâsa soko masafapo.

<sup>4-5</sup> Mituru fiarakano maiya kawe aperamo, Yasu he fua pekea reke someraka, "Hameo, pokoa kasipua kesare?" Airakano ipu Yasureapo, aiyaka hemakapunafonoraka ipu someraka, "Wae, kesafapo."

<sup>6</sup> Airakano Yasumo someraka, "Hokono tumuru takua kasipu makasuhoane pokoa keakosapo." Airakano ipu hokono tumuru taku aeyaka kasipuan makasuraka, kihiane pokoa kâra kesamo umirakano kihoadisepapo.

<sup>7</sup> Kihoadisepapo aporo hakâsa pura hakâsa meta Yasumo himu tumurumo hemakapusua aporoamo Pitaki someraka, "Isiapo Unihaereapo." Airakano Saemone Pitamo pasu horomasane maka, osoraka hea makasuraka he tapukua pusuapo.

<sup>8</sup> Purakano aporo hakâsa pura metakiramo kasipu kiraka mokoa risike, kasu roko he fe makesakipoko wane harote mita (100) roko pusuapo.

<sup>9</sup> Rokoa pukua he fea karimarekea, kita humarekea, kasu yia metakarikia peraka aseane Yasumo ira paikia rufirakano pokoa paikia, farawayaki taesekeno asesapo.

<sup>10</sup> Aserakano Yasumo someraka, "Pokoa kasipua kawe kesane metakira mokoa peae."

<sup>11</sup> Airakano Saemone Pita paripukua, kasipuan waseremaka he fea kirape hisiapo. Kasipua pokoa popake kesane menoraka wane harote fifiti tiri (153) ayiâka kesekeno menosapo. Pokoa kâra kesa nine kasipu potakahesafapo.

<sup>12</sup> Arirakano Yasumo someraka, "Makata nako peae." Airakano ipu "Ne epare?" aisafapo. "Unihaereapo," aiyaka hemakapusuapo.

<sup>13</sup> Hemakapurakano Yasumo farawa taesane mokoa, pokoyaki kasapo.

<sup>14</sup> Kasâ sereamo Yasuane ipi aporo hakâsa puramo asekeasimo, yape tetâ fana tarisi-akipoko, yape isiane sereamo tarisia ayapo.

#### *Yasumo Pitaki somesane oyapo.*

<sup>15</sup> Makata nekeea farakano Yasumo Saemone Pitaki someraka, "Yonemo hokosa Saemoneo. Nômo pokoa morane himu tumurumo hemakapurakanapo. Anoaki nômo himu tumurumo fanaraka hemakapurakanare?" Airakano Pitamo someraka, "Unihaeo, nômo né himu tumurumo hemakapusuane nômo nî hemaka apure." Airakano Yasumo someraka, "Nômo saro sipi manoane nômo makata nakosa kakanie."

<sup>16</sup> Aiyaka efera hunia yape tetâmo Yasumo someraka, "Yonemo hokosa Saemoneo. Nômo ano himu tumurumo hemakapurakanare?" Airakano Pitamo someraka, "Unihaeo, ao, nômo né himu tumurumo hemakapusuane nômo nî hemaka apure." Airakano Yasumo someraka, "Nômo saro sipi mane makata nakosa kakanie."

<sup>17</sup> Aiyaka efera hunia yape isiamo Yasumo someraka, "Yonemo hokosa Saemoneo, nômo ano himu tumurumo hemakapurakanare?" Aiyaka Yasumo yape isiamo somerakano asekeea Pita ipi sesenafaraka someraka, "Unihaeo. Makata su nômo hemakapurapo. Nômo né himu tumurumo hemakapusuane nômo nî hemaka apure." Airakano Yasumo someraka, "Nômo saro sipi mane makata nakosa kakanie."

<sup>18</sup> Nômo kakaro somerakaripo. Né hokosa raua rea maiya amo, pasu kenare weraka terakae hikia, ni hemakapusua aeyaka pusuapo. Arirakano né sisimana maiya amo né hokono máfarakano aporo metamo neane taporaka, kiraka maka pukusapo. Kiraka maka purakano né hisihokosapo."

<sup>19</sup> Aiyaka Yasumo takumeaka some kasapo. Pita ipi ira matopesa paremarerakano kukusane takumeaka some kasapo. Pita ira matopesa paremarekeia kurakano, aporo hinamomo asekeea Kotiane makarahokosapo. Asiamo Yasumo Pitaki someraka, "Ano patera asesie," aisapo.

#### *Aporo hakâsa pura hakâsa metane Yasumo somesane oyapo.*

<sup>20</sup> Pitamo patera pariaseane aporo hakâsa pura Yasumo himu tumurumo hemakapusua aporoane kekemarape perakano asesapo. Yasu kukusiraka ipu makata nenaka toa maiya amo, aporo hakâsa pura meta uaka hikia Yasuaki someraka, "Unihaeo, epamo né parakeehokosare?" Aiyaka somesa aporoane Pitamo asesapo.

<sup>21</sup> Asekeea Pitamo Yasuaki someraka, "Unihaeo, aporoane mayiakakosare?"

<sup>22</sup> Airakano Yasumo someraka, "E ayiakakosane nômo somehoane siahoasifareapo. Ano hikia pariaperamo ipi yia rekeno soko metao, ipi rekeanafonorakano soko metao, nômenafapo. Né ano patera asesie." Aiyaka Yasumo somesapo.

<sup>23</sup> Aíyaka somerakano aporo hakása pura metamo metaki some, arirakano metamo metaki some, arirakano metamo metaki some aíyaka namina yia somepe pukua tipia Yasumo somesane metakarikia, "Aporoane kukusafapo." Aíyaka some koaka marekea namina somepe pusuapo. Asiāne Yasumo someraka, "E kukusafapo," aisafapo. "Ano pariapera maiya amo aporoane yia reke soko metao, rekeanafonoraka soko metao, nóménafapo," aíyaka Yasumo somesapo.

*Sawi one popasa kepoane oyapo.*

<sup>24</sup> Yasumo somesane ano Yonemo kaisiapo. Arirakano Yasumo rakisiiane soko nōmo aseraka sawi one popasapo. Popasane isiaipo menoraka hemakapuraka, "Makata su popasane kakarohoareapo," aíyaka isiaipo hemakapurakanapo.

<sup>25</sup> Arirakano Yasumo makata metakira soko rakisiapo. Makata su epo rakisiiane aporomo popasafapo. Yasumo makata rakisiiane hakása hakásaraka popasatiki sawi muki-hoafunupo. Mukiraka hauaka wo sawi taesane siahoafunufapo.

## **Tarira Aporomo Makata Rakisiane Oyapo.**

### **Tarira Aporomo Makata Rakisia sawi one mahemakapukusa someane oyapo.**

Yasu hauaka wo reke makata rakisiane, Rukimo fana Tiaforaseaki sawi meta poparaka makesapo. Amo patera keseke a soko, sawi meta one Rukimo Tiaforaseaki poparaka makesapo.

Yasu hepene yapura hisiakipoko, Kotimo ipi Ho Kotesane Keresoa paosa aporo hinamo ararehoasimo, hauaka wo pusiesapo. Ho Kotesa peraka, Kotimo wakapuane kakimara aporo hinamoaki kasapo. Arirakano Yasu hauaka wo reke aporo metakira Yasuyaki hakasa pusuapo. Yasu hisiakipoko ipu Yasuane some kape pusuapo. Some kape purakano iane tarira aporopo, aiyaka somesapo.

Ho Kotesamo iaki Kotimo wakapuane karakano ipu makata kara wakapuaka rakisiapo. Aporo hinamo makata tasane ipu mafasapo. Mafaraka Yasu kusua maturikia taesane some karakano, aporo hinamo yakaimo kakimaraka, ipu makata watikisane metakarikia Yasu Keresoa paosapo. Yu aporoane soko, Yu aporo hoanafonosane soko, aporo hinamo yakai Keresoa paosapo. Asiasamo Yu aporo Keresoa paohoanafonosa aporomo Keresoa paosa aporo hinamoane haka mokoatikisapo. Mokoatikirakan Keresoa paosa aporo hinamo hauaka kekepoa teketerakia pusuapo. Teketerakia puraka, ipu Yasumo someane hauaka kekepoa soko somesapo. Tarira aporo soko, hauaka kekepoa pukua Yasuane some kasapo. Pore kimisi puraka, Yasuane some karakano taone metakira a sese apeane kepo maresapo.

#### **Tarira Aporomo Makata Rakisia sawia some kepo parakuraka popasane oyapo.**

1:1-26 Yasu hepene yapura hinakano, Ho Kotesa peakosaposane perakarihoamo, kaki-mara aporo hinamomo kau toapo.

2:1-47 Ho Kotesa pesa maiya amo, Pitamo some karakano, aporo hinamo yakaiane Yasuaki risikiako parisapo.

3:1-6:7 Yarusarame sitia tarira aporomo makata kara wakapuaka rakirakan, Keresoaki yunuraka risia aporoamo ian e mokoatikisapo.

6:8-7:60 Keresoaki yunuraka risia aporoamo Sitifene waseremaka, eane ekemo kare-sapo.

8:1-40 Sameria hauaka á tarira aporomo Yasumo makata rakirane rakisiapo.

9:1-31 Soreane Yasuaki rekeako parisapo.

9:32-12:25 Pitamo Yasumo makata rakirane rakisiapo. Yu aporo hoanafonosaki Pitamo some karakano i risikiako parisapo.

13:1-14:28 Porepe Pánapase tetu kimisi pusuapo.

15:1-35 Yu aporo hoanafonosane Keresoa paosasamo, Yarusarame sitia, sése aporo aseke a risia aporomo somemaneane maroposapo.

15:36-18:22 Porepe Saerase tetu efere hunia kimisi pusuapo.

18:23-21:16 Pore efere hunia kimisi pusuapo.

21:17-23:35 Yarusarame sitia Pore waseremaka Sisaria taonea karikia pusuapo.

24:1-26:32 Sisaria taonea Pore tipura makesa rekeno, ipu eane hukurusuapo.

27:1-28:15 Pore Rome sitia puraka kasu sipia ripaka pusuapo.

28:16-31 Rome sitia Poreane ipi apea tipura reke, aporo hinamo yakaiai Yasumo someane some kasapo.

#### *Rukimo Tiaforaseaki sawi poparaka makesane oyapo.*

<sup>1</sup> Fana Tiaforase néaki nōmo sawi meta popasapo. Popasane Yasu hauaka wo reke ipi makata rakiraka reane soko, some karaka reane soko, keseke e rusua kusuane Kotimo maturikia taeraka hepene yapunaka pasimarakano hisiane soko, makata su nōmo neaki poparaka makesapo.

<sup>2</sup> Arirakano Yasuane hepene yapura Kotimo pasimakasiraka Yasu hauaka wo rea maiya amo tarira aporoaki someaka maresapo. Someaka maresane ipu makata rakiakosane Ho Kotesamo someaka marerakan tarira aporoaki somesapo. Arirakano tarira aporoane\* fana Yasumo aporo hakasa pura murikimasa ayapo.

<sup>3</sup> Arirakano Yasu kusuane Kotimo maturikia taerakan turikia pukua sere foti amo (40) tarira aporomo e asekesimo e pekea pukua efera hunia soko pekea pukua aiyáka

\* <sup>1:2:</sup> Tarira aporoane Pisini meaka yano motosa Aposopo, airapo. Yasu hisiakipoko tarira aporomo makata rakisiane Rukimo Tarira Aporo sawia popasapo.

yape yakai iaki e kakaro maturikia taesane tariako pesapo. Ipu hemakapuraka, "Yasu maturikia taesane turikia pukua rekenarakapo." Aiyaka hemakapurapaka i risiakipoko tariako peraka, Kotimo unihaeaka asekea reane iaki somesapo.

<sup>4</sup> Iyaki hakasa sarimaraka rea maiya amo epo someraka, "Yarusarame sitiane metakarikia pukupo. Atamo makata kakakosapsane mokoako Yarusarame siti yia kau tokoanie. Makata kakakosapsane nōmo reaki somesapo.

<sup>5</sup> Yonemo ré hea hákasa tapukumurisiapo. Arirakano maiya wakasema risina Ho Kotesa re himua murikasapo." Aiyaka Yasumo somesapo.

#### *Yasu hepene yapura hisiane oyapo.*

<sup>6</sup> Tarira aporo suane sarimaraka risike ipu Yasuaki someraka, "Unihaeo, fana isiapo isina Yu aporomo unihaeaka asekea risia ayiáka, maiya yumo Isiraya hauaka ane isiapo isina unihaeaka asekea risikiasimo nōmo mareakosare?"<sup>†</sup>

<sup>7</sup> Airakano Yasumo iaki someraka, "Ayiakakosa maiyane nōmo Atamo hákasa hemakapukua marerapo. Marerane repo hemakapurafapo. Ayiakakosa maiya ane repomenafapo.

<sup>8</sup> Arirakano Ho Kotesane re himua murirakano maiya amo epo wakapuane repo mokoakosapo. Epo wakapuane repo mokoa risike, anoane repo some kakakosapo. Nōmo some kasane soko, repo some kakakosapo. Yarusarame sitia soko, Yutía hauaka á soko, Sameria hauaka á soko, hauaka sua repo ano asesane some kape pukusapo."

<sup>9</sup> Aiyaka someaka farakano, ipu aseane Yasu hepene yapura hinakano asesapo. Asekea risiakipoko Yasuane akomo matairaka maka hinakano asekea fasisiapo.

<sup>10</sup> Yasu hinakano aporomo ti yapura asekea risiakipoko, hepene aporo tetá pasu pakaesa osoraka wate foaka pekeá

<sup>11</sup> iaki someraka, "Kariri aporo reo, repo marirakano ti yapura asekea risikinare? Yasuane Kotimo pasimarakano hinakasa ayiáka, keseke soko yaiya paripeakosapo. E hinakano repo aserakasa ayiáka Yasu efera hunia paripeakosapo," aiyaka hepene aporomo somesapo.

#### *Yutase finihaoa rekeasimo aporo meta murikimasane oyapo.*

<sup>12</sup> Tarira aporo i ūri Orofeane metakarikia Yarusarame sitia poparipusuapo. Arirakano Yarusarame siti aeyaka ūri Orofe ane make tamiyiyapo.

<sup>13</sup> Arirakano i Yarusarame sitia pauraka huturu apea i risira á hisiapo. Aporo apea poparipusua susuane yano taesane oyapo. Pita soko, Yone soko, Yameise soko, Enitu soko, Firipi soko, Tomase soko, Patóromiu soko, Matiu soko, Afiasemo maeya Yameise soko, kamaniaki patera asesa aporo Saemone soko, Yamesemo maeya Yutase soko, i su á sarimaraka toapo.

<sup>14</sup> Namina su sarimaraka himu hakásaraka hemakapukua Kotiaki kurikurisapo. Ipu kurikuriraka toa a hinamo metakira soko, Yasumo kaýia Maria soko, Yasumo mamanea soko, iyaki hakása sarimaraka toke kurikurisapo.

<sup>15</sup> Maiya amo Keresoa paosa aporo hinamo sarimasane wane harote tuaneti su (120) sarimasapo. Sarimarakan Pita takahikia iaki someraka

<sup>16</sup> "Maeo, Yutasemo Yasu parakehokosane, wate fana Ho Kotesamo Tefeteaki some karakano, Tefetemo popahoareapo. Kakaro ayiakakosapo aiyaka popasane faserepesa ayareapo. Yutasemo aporo metakira pasimokoa e fanaraka pukua, Yasu parakeraka, ipu Yasu waseremasapo.

<sup>17</sup> Arirakano fana isiapo Yasumo makata rakirane rakisimo, Yasumo isu soko muriki-maka, Yutase soko murikimasapo.

<sup>18</sup> Murikimasa nine Yutasemo mone maraka Yasuane parakesapo. Wakasema nina, é kuraka hauaka harepa ikia huruperaka fako fausapo. Faurakano asekea, hauaka á Yutasemo ipi mone mosa amo hauaka ane roposapo.

<sup>19</sup> Fako fausaporakan Yarusarame aporo suamo kaikia, hauaka roposane Yu aporo meaka yano motoraka Akeramapo. Namo meaka yano motoraka Yapi Pusua hauakapo.

<sup>20</sup> Asiamo wate fana Kotimo sawia Tefetemo popasane oyapo. 'Aporomo ipi apeane kauanehokosapo. Ipi apea aporo metakira risikiakosafapo,' aiyaka popahoareapo. (*Buk Song 69:25*)

Maiya metamo Tefetemo poparaka, 'Ipi rakirane aporo metamo rakiakosapo,' aiyaka popasane Yutasemo ayiakakosane Tefetemo popahoareapo. (*Buk Song 109:8*)

<sup>21</sup> Aiyaka popasasamo aporo metamo isuyaki hakása rakisimo isiapo murikimakosapo. Aporo murikimakosane oyapo. Yasu isuyaki koraka rea maiya amo, aporo meta isuyaki hakása pusuane e murikimakosapo.

<sup>†</sup> **1:6:** Yasu rea maiya amo Rome kamani aporomo Isiraya hauaka ane unihaeaka asekea risiapo.

<sup>22</sup> Arirakano Yonemo kepo marekea aporo hinamo hea tapukumurisia maiya amo, nina, Yasu kusua maturikia taerakano, turikia pukua hepene yapura hinakano, asesa aporo isuyaki hakāsa pusua aporoane isiaipo murikimakosapo. Yasu kusuane maturikia taerakano turikia pusuane asesa aporoamo isina hakāsa somehokosakipoko muriki-makosapo."

<sup>23</sup> Aiyaka Pitamo somerakano aporo tetá nenakamaka murikimaraka, meta yano motosa Yosefe Pásapase, ipi aporo ira yano motosane Yásatase eane murikimaka, arirakano aporo meta yano motosa Matiase ipu murikimasapo.

<sup>24</sup> Murikimaka faraka ipu kurikuriraka, "Unihaeo, aporo tetá one isiaipo nenakamaka murikimasapo. Murikimarakan tetapō himuane nōmo aserapo. Aporo tetá yano motosa popasane, hakāsa meta nōmo murikimaka isuaki tarinie.

<sup>25</sup> Yutasemo tarira aporomo rakirane metakarikia, watikiaka rakisiakipoko watikisamo ropo mara hauaka á pusuapo. Tarira aporomo rakirane epo metakarisiane, aporo metamo rakisimo nōmo murikimaka isuaki tarinie," aisapo.

<sup>26</sup> Arirakano aporo Kotimo murikimasane asekeea hemakapuko, aporo tetá yano motosane poparaka petoro kakarua makekeea, mahohoraka sawi hakāsa huruperakano aseane, Matiase yano motosa huruperakano aseraka Matiaseane ipu pasimasapo. Tarira aporoane kinusu risiakipoko kenoane Matiase paoraka sarimarka, tarira aporoane keno su risiapo.

## 2

### *Ho Kotesa hauaka wo pesane oyapo.*

<sup>1</sup> Yasu hisiakipoko Penekose hokono kesapo. Hokono akeramo kakisara aporo su ape hakāsa sarimarka toapo.

<sup>2</sup> Toakipoko wate foaka ti yapunaka makata kára urakano kaikia toakipoko, atifo kára apeta ayiáka peraka, i toa ape kakarua pesapo.

<sup>3</sup> Perakano ipu namina yia aseane, ira rufi asia i namina su wamoan hakāsa hakásaraka kataka risikino asesapo.

<sup>4</sup> Aseane, Ho Kotesa pekea i namina su himua káraraka komarukua risike, Ho Kotesamo i himua me meta somerakarakan ipu me kekepo kekepoaka somesapo.

<sup>5</sup> Arirakano Yu aporo metakiramo Kotiaki kekerehoko hemakapusua aporoane, hauaka su anaka kimisi pekea Yarusarame sitia risiapo.

<sup>6</sup> Risike kaiyiáne makata kára uaka perakarakan, aporo yakaimo aseako peraka kaiyiáne, aporo sarimasamo me kekepo somerakano ipu kaikia someraka, "Mairakari-rakapo." Aiyaka hauaka su anaka aporo pesamo kaiyiáne aporo sarimasamo ipu me kekepoane somerakano kaisiapo.

<sup>7</sup> Kaikia fofaraka aporo kimisi pesamo someraka, "Ane mairakarirakapo. Aporoamo me kekepo somerakane iane Kariri aporosamo Kariri meaka somehoafunureapo.

<sup>8</sup> Isiapo me kekepoane ipu somerakano kairakaripo. Mairakariakapo.

<sup>9</sup> Isu aporo sarimasane Patía hauaka aeyaka soko, Mítia hauaka aeyaka soko, Írame hauaka aeyaka soko, Mesopotémea hauaka aeyaka soko, Yutía hauaka aeyaka soko, Kapatósia hauaka aeyaka soko, Pónetase hauaka aeyaka soko, Ésea hauaka aeyaka soko,

<sup>10</sup> Firísia hauaka aeyaka soko, Pamefíria hauaka aeyaka soko, Iyipi hauaka aeyaka soko, Sairíni taone makeraka Rípia hauaka aeyaka soko, Róme siti aeyaka soko, Yarusarame siti wo kimisi pesapo.

<sup>11</sup> Isu aporo kimisi pesane metakira Yu aporo soko, metakira Yu aporohoanafonosamo Yu aporo sisimamo somemane kakimasane soko, isu metakira Kirítia hauaka aeyaka soko, Arépea hauaka aeyaka soko, isu hauaka su aeyaka, isiapo isina hauakane metakarikia pekea, Yarusarame siti wo risikinapo. Asiane isiapo me kekepoaka ipu somerakae. Kotimo wakapumo hemakapusua rakiraka, isiapo me kekepoaka somerane ipu kaiyanafononane, ipu me kekepo kekepoaka somerakae."

<sup>12</sup> Arirakano aporo suamo himu faraka mahimeteraka ipu namina yiamo someraka, "Makata hauake mairakarirakapo."

<sup>13</sup> Arirakano aporo metakiramo mainamareraka someraka, "Ipu namina waene he kawe metekesane nareapo. Nesasamo himu maparitaeraka me kekepoaka somerakae." Aisapo.

### *Pitamo some kasane oyapo.*

<sup>14</sup> Pita soko tarira aporo kinu suane soko takahikia aporo yakai pesaki paroaka someraka, "Yu aporo soko, arirakano Yarusarame sitia kimisi pekea risia aporo repo soko, nōmo some one kaisie.

<sup>15</sup> Repo someraka, 'Aporoamo waene he kawe metekesane nekea himu maparitaeraareapo,' airakae. Ane repo hasaka hemakapukua somerakae. Yumo mituru maiya tokonamo aporo himu maparitaenafapo. Aporo reo, some one kaisie.

<sup>16</sup> Pipu mituru repo kairakasane wate fana porofete aporo Yoremo popasane pipu fasere apera oyareapo. Yoremo popasane oyapo.

<sup>17</sup> Kotimo someraka, 'Maiya fahoko makeanamo nōmo uyáka rakiakosapo. Aporo suaki nōmo Ho Kotesa muriakosapo. Murirakano repo aporo hokosamo soko, hinamo hokosamo soko, porofete aporomo some akara ayíáka, nōmo someane kaikia, ayíáka some kakakosapo. Repo hokosa rauamo soko, aporo sisimamo soko, kituamo asera ayíáka aseakosapo.

<sup>18</sup> Arirakano maiya amo nōmo aporo raipaki soko, arirakano hinamo raipaki soko, Ho Kotesa muriakosapo. Murirakano porofete aporomo some akara ayíáka, ipu nōmo someane kaikia, ayíáka some kakakosapo.

<sup>19</sup> Arirakano aporomo asekefa fofahoasimo, ti yapura makata wakapu kára nōmo rakiakosapo. Hauaka wo soko aporomo asekeasimo nōmo makata wakapu meta soko rakiakosapo. Yapi soko, ira rufi soko, ira musu kára soko, nōmo muriakosapo.

<sup>20</sup> Arirakano Unihae Yasu paripeakosakipoko, fana sere maiya ane katorakosapo. Ere maiyamo faeane yapi asia susu faehokosapo. Fahoko makeana maiya amo ayiakakosapo. Unihae pariapera maiya amo epo wakapuan soko, faesane soko repo aseakosapo.

<sup>21</sup> Asiamo aporo metamo Unihaeaki ararehoasimo kurikurirakano aporoane Unihaeamo mafasiakosapo.' Aiyaka Kotimo somerakano Yoremo popahoareapo. (*Joel 2:28-32*)

<sup>22</sup> Arirakano Isiraya aporo repo suamo kaisie. Nasare aporo Yasuane nōmo somerakanapo. Repo hemakapusimo e hauaka wo Kotimo pusiesapo. Kotimo wakapumo hemakapukua rakirane aporomo aseraka, 'Kotimo rakira ayareapo,' aihoasimo Yasu pekeea rakisiapo. Re risiakipoko epo pekeea rakirakano, repo asesasamo repo hemakapurakanapo.

<sup>23</sup> Arirakano wate fana Yasuane ayiakakosane Kotimo ipi hemakapukua reapo. Hemakapukuareasamo Yasuane reaki karakano repo e rusua kusuapo. Aporo watikisamo e ira matopesa paremarerakano repo soko aosapo. Repo aosasamo repo namina yiamo eane rusua kusuapo.

<sup>24</sup> Rusua kurakano Yasuane Kotimo maturikia taesapo. Kura namonane Kotimo mafaraka Yasuane maturikia taesapo. Yasu kakaro kuane siahoasifasekeno Kotimo Yasuane maturikia taesapo.

<sup>25</sup> Arirakano Yasuane Tefetemo popasane oyapo. Tefetemo someraka, 'Nōmo hemakapuraka maiya suamo Unihae Kotiane anoyaki rekenapo. Eane ano makerakareasamo ano namorakanafapo.'

<sup>26</sup> Asiamo nōmo himumo seseraka mapiraraka somerakanapo. Ano amano hitafe reane Kotimo ano asekefa rekeakosapo. Aiyaka nōmo hemakapurakaripo.

<sup>27</sup> Ano akura maiya amo ano hoane hétisi hauaka yaiya rerapaka, Koti nōmo ano ararehokosapo. Asiamo nōmo murikimasa aporo kotesane kurakano, kauane torehoko-hoamo, nōmo asekefa rekeakosapo. Aiyaka nōmo hemakapurakaripo.

<sup>28</sup> Arirakano yaiya rekeakosa ikia karane nōmo anoaki tarisiapo. Né anoyakireasamo kára sesenane nōmo anoaki kakakosapo. Aiyaka nōmo hemakapurakaripo.' Aiyaka Tefetemo someaka popahoareapo. (*Buk Song 16:8-11*)

<sup>29</sup> Maeo, nōmo yapakeaka somerakanafapo. Isiapo makasa kaua kekema Tefeteane wate fana kusua hauaka mareako rasane isiapo asesapo. Asesasamo Tefetemo aporo meta someaka popasane isiapo hemakapurakanapo. Ipiane popasafapo.

<sup>30</sup> Arirakano Tefeteane ipi porofete aporopo. Kotimo keseke ayiakakosaposane Tefetemo kaikia hemakapusuapo. Kotimo aumaraka someaka mareraka, 'Tefeteo, né unihaeaka area ayíáka, nōmo aporo ira wainepe pukua aporo metane soko, ayíáka unihaeaka rekeakosapo.'

<sup>31</sup> Airakano Kotimo ayiakakosaposane Tefetemo kakimaka hemakapusuapo. Kakimaka hemakapukua Keresoane maturikia taeckosane Tefetemo someraka, 'Akura maiya amo ano ho hétisi hauaka yaiya rerapaka, Koti nōmo ano ararehokosapo. Ararerakano ano kau torehokosafapo.' Aiyaka Tefetemo somehoareapo. (*Buk Song 16:10*)

<sup>32</sup> Asiamo Yasu kusuane Kotimo maturikia taerakano Yasu turikia pusuapo. Turikia purakano isiapo suamo asesapo.

<sup>33</sup> Arirakano Kotimo Yasuane makáraraka marekea Koti ipi rea hokono tumuru takua Yasu rekeno, Ata Kotimo someraka Ho Kotesa kakakosaposane eaki kasapo. Karakano epo masapo. Pipu repo makata aserane soko, makata akairane soko, Ho Kotesane epo masane, isuaki yaku akare.

<sup>34</sup> Arirakano Tefete hepene yapura hianafonosa yiamo Tefetemo popasane oyapo. Nōmo Unihaeaki, Unihae Kotimo someraka, 'Né ano hokono tumuru takua kayae.

<sup>35</sup> Kakeno nōmo yunuane nōmo rukumosakatapiakosapo.' Aiyaka Kotimo somerakano Tefetemo popahoareapo. (*Buk Song 110:1*)

<sup>36</sup> Arirakano Isiraya aporo repo suamo himumo hemakapunie. Yasuane repo ira matopesa paremarestane, e Kotimo unihaeaka rekeasimo murikimasa aporoane ayapo. E Keresopo."

<sup>37</sup> Aiyaka Pitamo somerakano aporo suamo kairaka himu faraka, Pitaki soko, tarira aporoaki soko, ipu someraka, "Maeo, isiaipo yakapa rakiakosare?"

<sup>38</sup> Airakano Pitamo someraka, "Repo suamo himu watikisane rukupateraka metakarinie. Metakarikia Yasu Keresomo yano motosane wakapusasamo, repo himu watikisane mafahoasimo e yano hokoa, epo wakapumo siahoasireapo, aiyaka hemakapurakano hea tapukumurianie. Hea tapukumurirakano, Kotimo repo himu watikisane mafahokosapo. Mafrakaka Ho Kotesa reaki yaku kakakosapo.

<sup>39</sup> Ho Kotesa kakakosaposane Kotimo kakaro somesapo. Reaki soko, repo hokosaki soko, aporo hauaka yamenoa risiaki soko, aporo hinamo su Kotimo pasimosaki soko, Kotimo kakakosaposane kakaro somesapo."

<sup>40</sup> Aiyaka Pitamo some meta soko wakapuaka someraka, "Aporo hinamo maiya yumo risiane watikiaka rakiraka risikinapo. Watikiaka rakiraka risia nine, repo watikisane metakarikia Yasuaki risikiako parihoanie."

<sup>41</sup> Arirakano aporo yakaimo epo someane kakimasapo. Kakimarakano hea tapukumurisiapo. Maiya amo aporo hinamo yakai tiri taosene ane (3,000), Yasuaki patera asesa aporo hinamo akiyaki paosapo.

<sup>42</sup> Paoraka tarira aporomo some kasane ipu kakimaka, arirakano maiya suamo sari-maraka, kikinarako himu hakásaraka hemakapukua, arirakano makata nenaka toke hemakapuraka, "Yasu isupoko farimaka kusuapo." Aiyaka hemakapukua makata nenaka toke, Kotiaki kurikuriraka aiyáka risiapo.

### *Keresoa paosa aporo hinamo risiane oyapo.*

<sup>43</sup> Kotimo wakapumo hemakapukua rakirane, tarira aporomo rakisiapo. Ayíáka raki-rakanaporo suamo asekea fofasapo.

<sup>44</sup> Arirakano kakimara aporo hinamo susuane sarimaraka toapo. Aporo hakásamo makata kemoane namina sumenapo, aiyaka hemakapukua suamo ásiapo.

<sup>45</sup> Ipu makata kemo roporaka mone mokoa parakuraka, metakiramo mone fasakeno arareraka kasapo. Metakiramo mone wakasemasekeno suamo arareraka kasapo.

<sup>46</sup> Maiya suamo i sarimaraka, Kotimo apea hikia poparipukua, namina apea sarimaraka, himu hakásaraka hemakapukua toke seseraka makata nesapo.

<sup>47</sup> Kotiaki kekereraka risikino aporo suamo iyaki hakása seseraka risiapo. Arirakano maiya suamo aporo hinamo metakirane Unihae Kotimo mafasikia pasimorakano, i Keresoa paosa aporo hinamoyaki paoraka risiapo.

## 3

### *Aporo korake matipusa mafasane oyapo.*

<sup>1</sup> Samapu maiya isiamo Yu aporomo kurikurihoko Kotimo apea hirapo. Arirakano Pitape Yone tetá hikia,

<sup>2</sup> ikia koro yano motosa Kotesa á pauraka aseane, aporo korake matipusa kakeno asesapo. Arirakano aporo korake matipusane hokosa kiri kaiyamo takaperakayia, korake matipusa pusifasekeno karápo. Arirakano maiya suamo aporo metakiramo e maka pekea motorakano, mone mokoako ikia koroa asekea karápo. Aporo Kotimo apea hiraki mone makarakarihoamo kau karápo.

<sup>3</sup> Aiyáka kayakipoko Pitape Yone tetá hinakano, aporoamo asekea someraka, "Anoaki mone makasie."

<sup>4</sup> Arirakano tetapō e asekea Pitamo someraka, "Nōmo eto asesie."

<sup>5</sup> Arirakano aporo korake matipusamo mone mako hemakapukua tetá asekea kayapo.

<sup>6</sup> Asekea kakeno Pitamo someraka, "Nōmo mone kakenafapo. Makata meta nōmenane neaki kakakosapo. Nasare aporo Yasu Keresomo yano motosane wakapusasamo Yasumo yano motosa aeyaka, né takahikia pusie."

<sup>7</sup> Aiyaka Pitamo e hokono tumurua maka máfarakano, wate foaka korake hi soko, korake kiki soko, wakapuaka reke, aporoane takahikia finirape pusuapo.

<sup>8</sup> Pukua tetáyaki hakása Kotimo apea yorokoa, kurusu kurusurape hikia Kotiaki kekeresapo.

<sup>9</sup> Kekererape hinakano, aporo suamo e asekeia

<sup>10</sup> someraka, "Aporo Kotimo ape ikia koro yano motosa Kotesa á mone mokoako kaya aporoane apora ayareapo." Aiyaka aporo suamo aporo korake matipusa fasane aseraka fofasapo.

*Kotimo apea Pitamo some kasane oyapo.*

<sup>11</sup> Aporo korake matipusa fasane Pitape Yone tetá makeraka reapo. Arirakano aporo suamo aseraka foaka pekea, Kotimo apea ape taru hakásá yano motosa Soromonemo ape á i peraka aseraka fofasapo.

<sup>12</sup> Fofarakano i pesane Pitamo aseraka someraka, "Isiraya aporo reo, marirakano repo fofaraka isuane asekeia hi pokoherheraka risikinare? Eto koteaka risiasamo aporo korake matipusaki takahisiesare? Wae. Aporoane etapo wakapumo mafasare? Wae."

<sup>13</sup> Eparahamemo soko, Aisakemo soko, Yakopemo soko, isiaipo makasa kaua kekemamo soko, ipu suamo Koti amo ipi aporo raipa Yasumo yano motosane makárasapo. Makárarakano Yasuane hukurukusakipoko Pairate rea repo e karikia pusuapo. Karikia pukua Yasu hukurukua, Yasuane ipi koteaka reasasamo Pairatemo tonotaehoko hemakapusuapo. Asiáne repo waeraka,

<sup>14</sup> Yasu ipi koteaka susu reke watikisa kikisiaka reane repo tonotaehoko Yasuane hisiraka someraka, 'Yasuane tonotaehokopo. Aporomano rura aporo Parápase ane tonotaehoanie.'

<sup>15</sup> Aiyaka someraka, Yaiya Reramo Kepo Yasuane repo ira matopesa paremarekea rusua kusuapo. Kurakano e Kotimo maturikia taesapo. Maturikia taerakano, turikia pusuane etapo asesapo.

<sup>16</sup> Yasumo yano motosane wakapusasamo, etapo Yasuaki himu hakásaraka hemakapurakano, Yasumo yano motosa wakapu aeyaka aporoane mafásapo. Mafása aporoane re arisia e koteaka purakanapo. Etapo Yasuaki himu hakásaraka hemakapura amo aporoane mafásane repo aserakanapo.

<sup>17</sup> Maeo, nōmo hemakapuraka, 'Repo soko, repo aporo unihaeaka risiamo soko, himeteraka Yasu rusua kuriapo,' aiyaka nōmo hemakapurakanapo.

<sup>18</sup> Arirakano Kotimo fana somesane yumo kakaro ayiana ayareapo. Wate fana Kotimo somerakanano porofete aporo suamo kaikia someraka, 'Kotimo ipi Mafasira Aporo Kereso murikimasane aporomo mokoatikirakano, Kereso kau teraka himu nakosapo.' Aisane yaiya faserepesa ayareapo.

<sup>19</sup> Asiamo repo himu watikisane Kotimo mafahoasimo, repo watikisane rukupateraka metakarikia, Kotiaki risikiako parihoanie.

<sup>20</sup> Arirakano maiya sisipuraka risiane fofo peraka auara ayíáka, Koti ipi yiámo re himu sesena kakasimo Kotiaki risikiako parihoanie. Mafasira aporo Kotimo murikimasane Yasu ipipo.\* Yasuane re arisia Kotimo paripusie aihoasimo, re Kotiaki risikiako parihoanie.

<sup>21</sup> Arirakano Yasu hepene yapura nina makata su makaweraka mareakosakipoko, Kotimo e paripusiehokosapo. Aiyaka someaka maresane wate fana Kotimo somerakanano, ipi porofete aporo koteaka risia aporoamo kaikia aporo hinamo suaki some kasapo.

<sup>22</sup> Fana Mosesemo someraka,  
'Unihae Kotimo ano porofete aporohoasimo murikimasa ayíáka, repo Yu aporomo soko namina yia meta porofete aporohoasimo murikimakosapo. Murikimarakano epo some karakano kaiyinie.'

<sup>23</sup> Kaiyianafonoraka kakipayana aporo hinamoane kikisiraka marutaehokosapo. Kakipayana aporo hinamoane Kotimo some kakimara aporo hinamoyaki hakásá sarimaraka risikiakosafapo.' *(Lo 18:15-19)*

<sup>24</sup> Aiyaka Mosesemo somerakanano, porofete aporo su Sámio soko, e patera porofete aporo metakira soko, Kotimo somerakanano ipu kaikia, pipu yumo yumi ayianane wate fana ipu somesapo.

<sup>25</sup> Kotimo ayiakakosaposane some karakano porofete aporo repo makasa kaua kekemamo kaikia, somesa ane reaki some kasapo. Arirakano repo makasa kaua kekemaki Kotimo someaka masane reaki soko, someaka masapo. Arirakano Eparahameaki Kotimo someaka maraka, 'Aporo hinamo hauaka sua risiaki, nōmo aporo ira wainepe pukusa aeyaka† nōmo makotehokosapo.' Aiyaka Kotimo somehoareapo. *(Stat 22:18)*

\* <sup>3:20:</sup> Yasumo ipi namo kakaro yano motosane Yasupo. Anakanano Kereso yano motosa kepoane Mafasira Aporopo, aiyaka someraka yano motosapo. Kiriki aporo meaka ipu Kereso airapo, anakano Yu aporo meaka ipu Mesaia airapo.

† <sup>3:25:</sup> Eparahamemo aporo ira aeyaka Yasuane takapesapo. Asiamo Yasumo makata rakisia aeyaka, aporo hinamo suane Kotimo makotehokosapo.

<sup>26</sup> Arirakano repo suamo makata watikisane metakarisimo, re Yu aporoane fana makotehoko, ipi aporo raipa Yasuane Kotimo murikimaka re arisia pusiesapo,” aiyaka Pitamo somesapo.

## 4

*Pitape Yone tetā hukurusuane oyapo.*

<sup>1</sup> Kotimo apea Pitape Yone tetapō aporo hinamoaki some kasakipoko pirisiti aporo soko, aporo terakaiyamosa satinimo Kotimo ape asekea reane soko, Satusi aporo soko i su peraka, Pitape Yone tetāki sapesapo.

<sup>2</sup> Saperakan aporo hinamo suaki Pitape Yone tetapō someraka, “Yasu kusua maturikia taesapo.” Aisasamo aporo hinamoane soko, keseke maturikia taehokosapo. Aiyaka somesakipoko ipu tetāki sapesapo.

<sup>3</sup> Saperaka tetāne waseremokoa tipura kesapo. Tipura kekeea ererakano hukurusuafapo. Asiamo tetā tipura ape yia wakakesapo.

<sup>4</sup> Arirakano tetā tipura keasiraka tetapō some karakano, aporo hinamo yakaimo kaki masapo. Tetapō someane kakimasa, aporo hinamo suane menoraka fae taosenepo (5,000).

<sup>5</sup> Asiamo mituru fiarakano Pitape Yone tetā tipura kesane hukurukusakipoko, Yu aporo unihae soko, Yu aporo sisima soko, Kotimo somemane tisa aporo soko, Yarusarame sitia sarimasapo.

<sup>6</sup> Sarimaraka pirisiti aporo fana Anaseane soko, Kaiafase soko, Yone soko,\* Arekesáta soko, Anasemo aporo ira metakira soko, i sú sarimasapo.

<sup>7</sup> Sarimaraka risike Pitape Yone tetāne peaesapo. Perakano ipu tetāki someraka, “Teto pekea tipi wo risie.” Áirakano tetā pekea tipia risikino ipu hukurusuapo. Hukururaka someraka, “Tetapo aporo makata tasa mafásane yakapamo wakapumo mafásare? Tetapo epamo yano motosane yano hokoa mafásare?”

<sup>8</sup> Airakano Pita himua Ho Kotesa komarukua rekerakano Pitamo someraka, “Aporo unihaeaka asekea risiao, Yu aporo sisima reo, repo kaisie.

<sup>9</sup> Aporo korake matipusa mafásane etapo araresasamo repo etoaki pipu hukuarurare? E mayiaka mafásare? Aiyaka hukururakano

<sup>10</sup> repo soko kaikia arirakano Isiraya aporo hinamo soko kaikia hemakapusimo nōmo somerakanapo. Aporo korake matipusane Nasare aporo Yasu Keresomo wakapumo siahoasireapo, aiyaka etapo hemakapukua risike, e yano hokoa mafásapo. Yasu Kereso ipiane repo ira paremarekeea rusua kusuapo. Rusua kurakano Kotimo maturikia taesapo.

<sup>11</sup> Maturikia taesa aporoane, wate fana Kotimo sawia poparak,  
‘Ira warupiane repo ape kira aporomo mamakatesane, efera maka pekea, tipia mapo hoareapo,’ aiyaka popahoareapo.

(Buk Song 118:22)

<sup>12</sup> Arirakano hauaka sua aporo hinamo himu watikisane aporo metamo mafahoane siahoasifareapo. Aporo hinamo himu watikisa mafanane, Yasumo ipi wakapu hákasamo mafahoasireapo. Aiyaka Kotimo maresapo.” Aiyaka Pitamo somesapo.

<sup>13</sup> Arirakano Pitape Yone tetapō namonafaraka mapiraraka somerakano, hukurura aporomo kaikia fofaraka someraka, “Tetā kára sukurusafapo. Tetapō mayiáka mapiraraka somerakanarakapo. Tetā Yasuyaki hakasa pususamo mapiraraka somerakae.” Aiyaka namina hemakapusuapo.

<sup>14</sup> Arirakano aporo mafasane tetāyaki rekeno, ipu aseraka me kauraka makata somera faraka asekea toapo. “Aporoane mafasafapo,” aihoane siahoasifareapo.

<sup>15</sup> Aiyaka hemakapukua toke ipu someraka, “Isiapo somehokosakipoko, teto ape one fore metakarikia pusie.” Aiyaka tetā metakarikia purakano, namina susu toke me rusuapo.

<sup>16</sup> Me rukua ipu someraka, “Tetāne isiapo mayiakakosare? Tetapō makata wakapu rakira kára rakisiáne Yarusarame sitia aporo suamo aserakasupo. Asesasamo isiapo someraka, ‘Aporoane mafasafapo,’ aihoane siahoasifareapo.

<sup>17</sup> Mafasane aporo metakiramo kaiyahoamo, tetapō Yasu yano hokoa, efera hunia somehokohoamo yaporakanapo.”

<sup>18</sup> Aiyaka me rukua faraka marekea, tetā peaesapo. Perakano tetāki ipu someraka, “Maiya suamo Yasu yano hoakoamo yapo motorakanapo. Yasuane repo some kakako hoamo yumo yaporakanapo. Efera hunia somehokohoamo yumo yaporakanapo.”

<sup>19</sup> Airakano tetapō someraka, “Kotimo sesehoasimo ipi someane kakimayane siahoasireare? Ipi some metakarikia repo someane kakimayane siahoasireare? Repo takekeea hemakapusie. Kotimo someane metakariane siahoasifareapo.

\* <sup>4:6</sup>: Yone ane, Anasemo aporo irapo. Yasumo aporo hakasa pura Yone ayafapo.

<sup>20</sup> Yasumo makata rakirakanō etapo asesane soko, makata somerakanō etapo kaisiane soko, yaiya somehokosapo. Metakariakosafapo."

<sup>21</sup> Airakanō tetāki efera hunia ipu paroaka someraka, "Yasuane some kakakopo. Yasu yano hoakopo. Yasu yano hoakosane isiaipo yaporakanapo." Aiyaka fanasihoane sia-hoasifasekeno tetāne tonotaesapo. "Tetapō wakapuaka rakisiakipoko, aporo hinamo suamo aseraka Kotiaki kekererakanō fanasihoasifareapo." Aiyaka ipu hemakapukua tetā tonotaesapo.

<sup>22</sup> Arirakanō aporo korake matipusa mafasane, ipu aporo sisimapo. Ipi keremisi foti su (40) faraka ayiáka ipi rekeno mafasapo.

*Keresoa paosa aporo hinamomo kurikurisane oyapo.*

<sup>23</sup> Pitape Yone tetā tonotaerakanō, tetā pukua kakimara aporo hinamo risiakipoko á pusuapo. Á puraka pirsiti aporo fanamo soko, Yu aporo sisimamo soko, ipu someaka motosane tetapō iaki somesapo.

<sup>24</sup> Somerakanō aporo tákemo kairaka himu hakásaraka risike Kotiaki kurikuriraka, "Unihae Kotio, né kakaro kárapo. Ti yapurane soko, hauaka one soko, he tawarane soko, nómō rakisiapo. Ti yapura makata arisiane soko, hauaka wo makata arisiane soko, he tawara makata arisiane soko, makata su nómō rakisiapo.

<sup>25</sup> Nómō someane isiaipo makasa kaua kekema Tefeteaki Ho Kotesamo somerakarakano, Tefete nómō aporo raipamo kaikia nómō someane popasane oyapo.

'Yu aporo hoanafonosamo marirakanō sape sare? Yu aporomo Kotimo Mafasira Aporoane mokoatikihokosapo, aisane marirakanō aisare?

<sup>26</sup> Hauaka su aeyaka unihae metakira pekea, Unihae Kotiane ipu hisiraka, Kotimo Mafasira Aporoane soko hisiraka, tetāki weakosakipoko sarimasapo.' *(Buk Song 2:1-2)*

<sup>27</sup> Aiyaka Tefetemo popasane kakaro yasiapo. Ape wo Herotemo soko, Potiase Pairatemo soko, Yu aporo hoanafonosamo soko, Yu aporomo soko, suamo nómō murikimasa aporo Yasuane ipu hisiraka, rusua kukusakipoko sarimasapo. Nómō aporo raipa Yasumo ipi ainane kotesa susupo.

<sup>28</sup> Arirakanō ipu Yasuane rusua kukusakipoko sarimasane, wate fana nómō ní hemakapukua someaka maresa nine yasiapo.

<sup>29</sup> Asiamo Unihaeo, yumo isu mokoatikihokosaposane nómō kairakanapo. Isu nómō aporo raipapo. Nómō someane isiaipo namonafaraka mapiraraka somehoasimo, nómō isu ararerasicie.

<sup>30</sup> Aporo makata tasane mafahoasimo nómō ararehoanie. Nómō ní aporo raipa kakaro kotesane Yasu ipipo. Epo wakapuaki isiaipo himu hakásaraka hemakapukua risike, e yano hokoa, Kotio, nómō wakapumo hemakapukua rakirane isiaipo rakisimo ararehoanie. Aporo suamo asekeasimo ararehoanie."

<sup>31</sup> Aiyaka kurikuriraka faraka i toakipoko apeane mahohoraka Ho Kotesane i sú himua komarukua risiapo. Komarukua risikirakanō Kotimo someane ipu suamo namonafaraka mapiraraka somé kasapo.

*Keresoa paosa aporo hinamomo himu hakásaraka hemakapukua risirane oyapo.*

<sup>32</sup> Kakimara aporo hinamo suamo himu hakásaraka hemakapukua risiapo. Himu hakásaraka risike ipu someraka, "Makata kemoane nómō ní mena hákasafapo. Isina suamo menapo." Aiyaka ipu makata kemo namina menane, namina sumenapo.

<sup>33</sup> Aiyaka someraka risike, Yasu kusua maturikia taerakanō turikia pusua asesane, tarira aporomo wakapuaka some kasapo. Some karaka i suane Kotimo hemakapukua arareraka makoterakanō,

<sup>34</sup> namina suane aporo meta makata forokoa reafapo. Ipu makata su siaraka risiapo. Arirakanō aporo metakiramo ipu hauaka roporaka, arirakanō aporo metakiramo ipu ape roporaka,

<sup>35</sup> ayiáka mone mosane tarira aporomo aporo makata forokoa risiaki kakasimo, mone mokoa pekea taesapo. Taerakanō moneane parakuraka metamo pasu fasokino, pasu ropohoasimo moneane kasapo. Metamo makata nakosa fasokino, epo makata nakosa ropohoasimo mone kasapo.

<sup>36</sup> Arirakanō aporo meta yano motosa Yosefe ipi Rífai aporo ira reapo. Yosefeane Saéparase hauaka aeyaka perakanō, tarira aporomo e yano meta Pánapase yano motosapo. Namo meaka Pánapaseane Mawakapu Somera Aporo ayiáka yano motosapo.

<sup>37</sup> Pánapasemo ipi hauaka roporaka, mone mosane tarira aporomo parakuhoasimo kasapo.

## 5

*Ananásepe Safára tetapō hauaka roposane oyapo.*

<sup>1</sup> Aporo meta yano motosa Ananásemō ipi asea yano motosa Safárapo. Ananásemō ipi hauakane aporo metaki roporaka

<sup>2</sup> mone mosane parakusapo. Parakuraka ipi aseamo soko aserakano sape meta ipi tau faremarekeea motosapo. Sape meta tarira aporoaki kasapo.

<sup>3</sup> Karakano Pitamo aseraka someraka, "Ananáseo, Satanemo né himu maparitaerakano, nómō eaki aoanane marirakanonare? Satanemo néaki hokokerakano, hauaka roporaka mone mosane tau faremarekeea motoreapo. Motokoa yia marirakanano aíyaka somerakanare? Nómō Ho Kotesaki kotafe someahore."

<sup>4</sup> Hauaka ropohoa siraka hauakane nómō nímenapo. Hauaka roporaka mone mosane soko nómō nímenapo. Mone anoaki maka pesane nómō hemakapuraka, 'Mone ane su yi yareapo,' aíyaka hemakapusimo maka perakayiare? Marirakanano nómō aíyaka hemakapusuare? Nómō aporoaki hákasa kotafe hokoa somerakanare? Wae, Kotiaki soko kotafe hokoa someahore."

<sup>5</sup> Aíyaka somehoanine Ananásemō kaikia hauaka huruperaka kusuapo. Kusuane aporo metakiramo kairaka namoraka risiapo.

<sup>6</sup> Arirakano hokosa raua metakira pekea, aporo kusuane taporaka fefeneakua makekeea, maka hikia hauaka maresapo.

<sup>7</sup> Maiya hi awa isia faraka, Ananásemō ipi asea peraka, ipi apia kusuaposane kaisiafapo.

<sup>8</sup> Arirakano Safáraki Pitamo someraka, "Hauaka roposane mone su maka pesa yi yareapo?" Airakano hinamo amo someraka, "Ao, mone maka pesane su yi yapo."

<sup>9</sup> Airakano Pitamo someraka, "Tetápo titi mone parakuraka himu hakásaraka hemakapuraka, 'Mone tau faremarekeea motosane, mahamekeea kotafe somehokosapo. Kotafe somerakanano Unihaemo Ho Kotesamo aserakanafapo.' Aíyaka hemakapukua marirakanano tetápo aíyaka kotafe somesare? Aporomo ní makapinu kusuane hauaka marekeea popariapere. Ikia koro makeraka né mako apere."

<sup>10</sup> Aíyaka Pitamo somehoanine, hinamoane wate foaka huruperaka kusuapo. Kurakano hokosa rauamo aseraka, fefeneakua makekeea maka hikia, ipi apia hauaka maresa taku yia, hinamoane soko yia maresapo.

<sup>11</sup> Marerakano Keresoa paosa aporo hinamomo soko aporo hinamo metakiramo soko suamo kaikia kára fofasapo.

*Tarira aporomo makata wakapu rakira kára rakisiane oyapo.*

<sup>12</sup> Aporo hinamo su risiakipoko ipu asekeasimo tarira aporomo makata wakapu rakira kára rakisiano. Rakirakano Kotimo apea ape taru hakásá meta yano motoraka Soromonemō apea kakimara aporo hinamo su sarimasapo.

<sup>13</sup> Sarimarakanano nena aporo namoraka iyaki hakásá sarimasa fapo. Sarimahoanafonraka ipu someraka, "Kakimara aporo hinamoane koteaka risikinapo," aisapo.

<sup>14</sup> Airakano maiya amo aporo hinamo yakaimo Unihae Yasuaki himu hakásaraka hemakapukua, kakimara aporo hinamo akiyaki paosapo. Paosa maiya amo i namo kakaro yakaisapo.

<sup>15</sup> Arirakano aporo hinamo makata tasane, aporo metakiramo mokoa pekea, ikia kara taeraka, metakira asakapu ifunuraka taeraka, metakira fefeneakua kekeea taesapo. Taehoane Pita puraka ipi homo sakairaka mafahoasimo makeraka taesapo.

<sup>16</sup> Arirakano Yarusarame siti makeraka hauaka metakira risia aeyaka aporo hinamo makata tasa soko yatafumo aporo hinamo ho mosane soko mokoa perakano su mafásapo.

*Tarira aporo tipura kesane hepene aporomo tonotaesane oyapo.*

<sup>17</sup> Arirakano pirisiti aporo fanamo soko, ipi aporo téke Satusi aporomo soko ipu suamo tarira aporoaki kakanakesapo.

<sup>18</sup> Kakanakeraka tarira aporoane waseremokoa tipura kesapo.

<sup>19</sup> Tipura kesa risiakipoko, ereamo Unihaemo hepene aporo pekea, tipura ikia koro mapirisiane ropakamaka, tarira aporoane pasimokoa iaki someraka,

<sup>20</sup> "Re Kotimo apea punie. Pukua aporo makaweraka risira some kepoane aporo hinamo suaki some kakanarie," aisapo.

<sup>21</sup> Airakano tarira aporomo kakimaka, mituru fiarakano Kotimo apea yorokoa some kasapo. Arirakano pirisiti aporo fana soko, ipi aporo téke soko sarimaraka, tarira aporo hukurukusakipoko Yu aporo sisimaki soko, pirisiti aporo káraki soko, Kotimo somemane tisa aporoaki soko someraka, "Sarimahoko peae," aisapo. Aíyaka i perakano asekeea su sarimaraka risike, ipu aporo terakaiyamosaki someraka, "Tarira aporo tipura apea risiane pasimokoako pusie."

<sup>22</sup> Airakano aporo terakaiyamosa tipura apea pukua aseane, tarira aporo fasokino poparipesapo.

<sup>23</sup> Popariperaka ipu someraka, "Isiapo tipura apea aseane, ikia koro mapirikia róko motokoa, aporo terakaiyamosamo aseke a risikisapo. Ikia koro mapirisia nine ropakamaka ape kakarua yorokoa aseane aporo fasokino asesapo."

<sup>24</sup> Airakano Kotimo ape aseke a rea aporo terakaiyamosa satinimo soko, pirisiti aporo fanamo soko kaikia someraka, "I mayáka tonopusuarakapo. Makata meta fasere pea-narakapo," aiyaka i mahimeteraka risiapo.

<sup>25</sup> Mahimeteraka risikino aporo meta pekea someraka, "Tarira aporo tipura kesane Kotimo apea risike aporo suaki some karakanapo."

<sup>26</sup> Airakano satini soko, aporo terakaiyamosayaki Kotimo apea hákasa puraka, tarira aporoane pasimokoako pusuapo. Pukua Kotimo apea pauraka tarira aporoane wasere mokoakosapoko asiane, aporo metakiramo iane ekemo karerapaka namoraka, ipu tarira aporoane sakepamo waseremosafapo. Tau auaraka pasimosapo.

<sup>27</sup> Pasimokoa aporomo hukuruko sarimaraka risiakipoko karikia perakano, pirisiti aporo fanamo tarira aporoaki hukururaka someraka,

<sup>28</sup> "Aporo suaki Yasuane repo somerapaka isiapo yapo motosapo. Yapo motosa nine repo kakipayaraka, Yarusarame sitia aporo hinamo suaki Yasuane some karakanapo. Yasu rusua kusuane isiapo rusua kusuapo, aiyaka repo isu hokomaka somerakanapakae."

<sup>29</sup> Airakano tarira aporo Pitape tarira aporo ipu someraka, "Kotimo someaka maresane fanapo. Aporomo someaka maresane kesekepo. Kotimo someane fanasasamo isiapo kakimaka some kakakosapo.

<sup>30</sup> Arirakano Yasuane repo ira paremarekea rusua kusuane Kotimo maturikia taesapo. Kotiane isiapo makasa kaua kekemamo Kotipo.

<sup>31</sup> Yasu ipi fanaraka reke, ipi Mafasira Aporo reakipoko, Kotimo ipi hokono tumuru takua Yasu makáraraka rekeasimo maresapo. Aporo himu watikisane mafahoasimo Yasuane Kotimo maresapo. Isiraya aporomo himu watikisane metakarirakano, Yasumo mafahoasimo e murikimasapo.

<sup>32</sup> Murikimasane isiapo aseke a somerakanapo. Arirakano Ho Kotesamo soko tarirakanapo. Aporo hinamomo Kotimo someane kakimasaki Ho Kotesa Kotimo yaku karápo," aiyaka Pitamo somesapo.

<sup>33</sup> Somerakano aporo sarimaraka risiamo kairaka kára saperaka, tarira aporoane rusua kukusimo hemakapusuapo.

<sup>34</sup> Arirakano aporo sarimasane meta yano motosa Kamério, ipi Ferese aporo reane, Kotimo somemane tisa aporomo rakirane epo rakiraka reapo. Ayíaka rekeno e aporo suamo seseaka hemakapusuapo. Arirakano Kamério takahikia someraka, "Tarira aporo fore yaoa risikiako pusiehoanie." Arirakano i ape metakarikia pusuapo.

<sup>35</sup> Purakano Kamériomo someraka, "Isiraya aporo repo suamo kaisie. Tarira aporoaki foakayia fanasinane mareakopo.

<sup>36</sup> Asiamo fana aporo meta yano motosa Tiutasemo someraka, 'Ano aporo kárapo,' aiyaka somerakanano aporo yakai fo harote suane (400) eyaki paosapo. Aporo metamo Tiutaseane rusua kurakano, eyaki paosa aporoane tekterikia pusuapo. Tekterikia purakano, Tiutasemo rakirane nenakamakayia rakisiasamo ipu metakarisapo.

<sup>37</sup> Tiutase kusuakipoko, patera á Kariri aporo meta yano motosa Yutase reapo. Kamanimo aporo su yano taesane yano wáraka popana maiya amo, Yutaseamo soko, epo ipi yano motosa makáraraka somerakanano aporo metakira eyaki paosapo. Paorakano Yutaseane soko aporo metamo rusua kusuapo. Rusua kurakano eyaki paosa aporoane tekterikia pusuapo.

<sup>38</sup> Asiasamo yumo tarira aporoane rusua kukukopo. Metakarisie. I Kotimo ararehoana-fonorakanone, ipu rakirane fahokosapo.

<sup>39</sup> Arirakano ipu rakirane Kotimo ararerakanone, iane repo hurutapiakosafapo. Repo Kotiaki yunuraka risirapaka asekeanie."

<sup>40</sup> Airakano Kamériomo someane ipu kairaka, tarira aporoane peaesapo. Perakano tarira aporoane ira faimo ruraka paroaka someraka, "Yasu yano hoakopo. Yasuane some kakakopo," aiyaka tarira aporoane tonotaesapo.

<sup>41</sup> Tonotaerakano tarira aporomo hemakapuraka, "Yasuaki patera asesakipoko ipu isuane mawakasemaraka rusuapo. Yasupoko ruane siahosireapo," aiyaka hemakapukua sesesapo.

<sup>42</sup> Maiya suamo Kotimo apea soko, ipu namina apea soko, Yasuane some kasapo. Ipu some karaka, "Yasuane ipi Mafasira Aporopo. Ipiane aporo unihaeaka rekeasimo makáraraka maresasamo ipi Keresopo," aiyaka some kasapo.

## 6

*Aporo yatipinusumo aporo hinamo metakira ararehoasimo murikimosane oyapo.*

<sup>1</sup> Wakasema risina Yasuaki patera asesa aporo hinamo yakaisekeno Yu aporo toke metakiramo Hipuru\* meaka somerapo. Arirakano metakiramo Kiriki meaka somerapo. Kiriki meaka somera aporomo Hipuru meaka somera aporoaki me uraka somesapo. Me uraka someraka, "Maiya suamo makata nakosa parakuraka, isu Kiriki meaka somera hinamo yaroaki makata nakosa wakasema akare. Iaki siaraka karakarifapo," aiyaka Kiriki meaka somera aporoamo sapesapo.

<sup>2</sup> Saperakano tarira aporomo Yasuaki patera asesa aporo hinamoane maropohoko peaesapo. Peaeraka perakano asekeia, iaki tarira aporomo someraka, "Makata nakosane isiaipo parakuhoko Kotimo someane some akarane metakariane siahoasifareapo.

<sup>3</sup> Asiamo makata nakosa parakuhoasimo aporo yatipinusu koteaka risikinapasusue murikimokoanie. Aporo i himua Ho Kotesa komarukua risike, ipu himumo koteaka takekea hemakapukua risikino, aporoane murikimokoanie. Murikimokoa, aporoamo makata nakosane parakurasiehokosapo. Ipu makata nakosane parakuanamo

<sup>4</sup> maiya suamo isiaipo kurikuriraka, arirakano Kotimo someane some kaka ayiakakoso."

<sup>5</sup> Airakano tarira aporomo someane aporo hinamo suamo seseaka aoraka, aporo yatipinusu murikimosapo. Aporo murikimosane hakasa meta yano motosa Sitifene. Sitifenemo kakaro Kotiaki himu hakasaraka hemakapukua reke, e himua Ho Kotesane komarukua reapo. Aiyaka Sitifene soko, Firipi soko, Pokorase soko, Naekena soko, Taemone soko, Pamenase soko, Nikorase soko, i su murikimosapo. Nikorase ipi Anitioke taone aeyaka pesane e Yu aporofapo. Asiāne epo Yu aporomo somemananee kakimasapo.

<sup>6</sup> Aporo murikimosane tarira aporo risia karikia perakano, i Kotimo ararehoasimo, tarira aporomo i hokonomo sakairaka kurikurisapo.

<sup>7</sup> Arirakano maiya amo Kotimo someane some karaka, maiya suamo aiyaka some kasapo. Some karakano aporo hinamo metakiramo kakimaka Yarusarame sitia Yasuaki patera asesa aporo hinamo yakai káraraka risiaipo. Arirakano pirisiti aporo káraraka yakaimo Yasuaki himu hakasaraka hemakapukua epo someane kakimasapo.

*Sitifene waseremasane oyapo.*

<sup>8</sup> Sitifene Kotimo yaku ararerakano epo wakapuaka rakisiapo. Aporomo hemakapusimo epo Kotimo wakapumo hemakapukua rakirane rakisiapo.

<sup>9</sup> Rakirakan aporo metakiramo eaki hisisapo. Yu aporo Sairini taone aeyaka soko, Aresati taone aeyaka soko, i pekeia Yu aporomo sarimana ape yano motosa Firimane sarimana apea i sarimasapo. Sarimaraku ipu Yu aporo Sirisia hauaka aeyaka pesamo soko, Esea hauaka aeyaka pesamo soko, ipu suamo Sitifeneaki tafatafasapo.

<sup>10</sup> Tafatafarakano, Ho Kotesamo Sitifene ararerakano, Sitifenemo makata kepo su hemakapukua somerakano, ipu kaikia fofaraka, Sitifenemo someane rukutopakatapiasi-fareapo.

<sup>11</sup> Asiasamo i pukua aporo metakira tau murikimokoa someraka, "Repo úyaka somehoanie. Moseseane soko, Kotiane soko, Sitifenemo hokomarakano isiaipo kaisiapo. Aiyaka somehoanie."

<sup>12</sup> Airakano tau murikimosa aporoamo aiyaka kotafe someraka aporo kirimasapo. Kirimarakan kotafe someane aporomo kakimaka, ipu Sitifeneaki sapesapo. Saperaka Yu aporo sisimamo soko, Kotimo somemanane tisa aporomo soko, saperaka ipu suamo Sitifene waseremaka hukuruko pirisiti aporo kára soko, Yu aporo sisima soko, Kotimo somemanane tisa aporo soko, i sarimarakia risiakipoko karikia pusuapo.

<sup>13</sup> Karikia pukua Sitifene hukururaka, aporomo kotafe somehoasimo murikimosa aporoamo kotafe someraka, "Maiya suamo Sitifenemo Kotimo apeane hokomaka, Mosesemo somemanane motosane mawakasemarakasupo.

<sup>14</sup> Nasare aporo Yasumo Kotimo apeane marutaehekosapo, airakasupo. Kotimo someemanane isuaki Mosesemo kasane, Yasumo metakarikia somemanane meta kakakosapo airakasupo." Aiyaka ipu kotafe topakamaraka somesapo.

<sup>15</sup> Arirakano aporo sarimarakia risiromo aseane, Sitifenemo hikumisiane hakuraka, hepene aporomo hikumisi aseraka sikiraka asesapo.

## 7

*Sitifenemo some kasane oyapo.*

<sup>1</sup> Pirisiti aporo fanamo Sitifeneaki kairaka, "Ne hukurusuane yasiare?"

\* <sup>6:1</sup>: Yu aporo hinamomo Hipuru meane somerapo.

<sup>2</sup> Airakano Sitifememo someraka, "Maeo, aporo sisimao, kaisie. Isiapo makasa kaua kekema Eparahameane Harane taonea pusiraka, Mesopotémea hauaka rea maiya amo, Koti faesa peraka eaki someraka,

<sup>3</sup> 'Nómo ní hauakane metakarikia, nómo ní aporo irane metakarikia, hauaka meta nōmo néaki tarirakan hauaka a né punie.' *(Stat 12:1)*

<sup>4</sup> Airakano Eparahamemo kakimaka, Kaotia hauakane metakarikia, Harane taonea pukua, a reakipoko ipi wafaya kusuapo. Kusuakipoko hauaka one Kotimo eaki tarirakan hauaka wo e pesapo. Arirakano hauaka wo isu arisiane Kotimo Eparahameaki tarisiapo.

<sup>5</sup> Arirakano e pesa maiya amo, e rekeakosa hauaka ane Kotimo eaki kasafapo. Hauaka wakasema soko eaki kasafapo. Asiāne Eparahamemo hokosa hokono mareasiraka rea maiya amo, Kotimo someaka motoraka, 'Hauaka one nepoko nōmo murikimarakanapo. Keseke nōmo aporo iraki nōmo kakakosapo.'

<sup>6</sup> Aiyaka Kotimo some meta someraka, 'Nómo aporo ira hauaka meta hauka pukua risike, a wainepe pukua risikiakosapo. Risike keremisi fo harote (400) amo hauaka wafayamo iaki someraka, "Isiapo aporo raipane repo," airakano hauaka wafayapoko ipu raiparaka rakiakosapo. Rakiraka risike, hauaka wafayamo i mokoatikirakan soko, yaiya raiparaka rakiakosapo.

<sup>7</sup> Rakiraka risikino, keseke hauaka wafayane nōmo fanasinane motoakosapo. Motorakan nōmo aporo irane hauaka a risiane metakarikia, hauaka wo peraka, anoaki hemakapuka kekerelhokosapo.' *(Stat 15:13-14)*

<sup>8</sup> Aiyaka Kotimo someaka masane aporomo hemakapusimo Kotimo Eparahameaki someraka, 'Aporo kau hahaerauk patehoanie.' Airakano Eparahamemo aporo kau hahaerauk patesapo. Asiamo ipi maeya Aisake hokono mareraka, yape karimo e kau hahaerauk patesapo. Arirakano keseke Aisakemo hokosa Yakopeane hokono maresapo. Arirakano keseke Yakopemo hokosa kenosu hokono murisiapo.

<sup>9</sup> Arirakano isiapo makasa kaua kekemamo ipu mamanea Yosefeaki kakanakeraka saipesapo. Saperaka Yosefeane Iyipi aporoaki roposapo. Roporakan Yosefe Iyipi hauaka reke raiparaka rakiapiro. Rakiraka reane Kotimo e metakarisafapo.

<sup>10</sup> Iyipi aporomo e mokoatikirakan Kotimo e arareraka mafasisiapo. Mafasirakan unihae Fero rea Yosefeane pukua, unihae Feroaki koteaka hemakapuka some kasapo. Koteaka some karakan unihae Feromo seseraka eane makárasapo. Asiamo Iyipi hauaka ane asekeea rekeasimo Yosefeane maresapo. Arirakano ipi ape soko, ipi makata kemo soko Yosefemo asekeea rekeasimo eane maresapo. Asiamo unihae Feromo Yosefeaki someraka, 'Makata suane nōmo asekeea rekeanee,' aiyaka epo Yosefeane makárarak murikimasapo.

<sup>11</sup> Arirakano kupa kára karáka, Iyipi hauaka soko, Kenane hauaka soko makata nakosane fesenospo. Fesenoraka aporo hinam su meamorakano, isiapo makasa kaua kekemamo soko, makata nakosa fasekeno kosafapo.

<sup>12</sup> Yakopemo kaiyiáne, Iyipi hauaka á makata nakosa tokenapakan kaisiapo. Asiamo Yakopemo ipi hokosa isiapo makasa kaua kekemamo makata nakosane mokoako Iyipi hauaka pusiesapo. Airakano mafana yia i pusua yiamo, ipu makata nakosane roposapo.

<sup>13</sup> Arirakano isiapo makasa kaua kekema yape tetá Iyipi hauaka pusua maiya amo, Yosefe hikunisi asekeanafonoraka himeterakan, Yosefemo ipi mamaneaki ipiane mafekemarakka someraka, 'Repo maeane anopo,' aisapo. Asiamo Yosefemo ipi mamanea soko, ipi wafaya soko, riskinapakan, unihae Feromo kaisiapo.

<sup>14</sup> Arirakano Yosefemo ipi wafaya Yakopeaki someaka mareraka, 'Atao, né peanie. Nōmo ní mae soko, ipu hokosa hinamoyaki su Iyipi hauaka wo peanie.' Aiyaka Yosefemo ipi mamaneaki someaka maresapo. Yosefemo mamanea pukua, ipi wafaya Yakopeaki somehoane epo aorakano, Isú Iyipi hauaka pusua. I pusua susuane aporo soko, hinamo soko, menoraka sewenetii fae (75) ayiáka pusua.

<sup>15</sup> Pukua Iyipi hauaka á Yakope reane kusuapo. Asiamo isiapo makasa kaua kekema soko, Iyipi hauaka pukua risiane kusuapo.

<sup>16</sup> Kusuane keseke i kiki mokoa pukua, Eparahamemo kunikia fana roposa á taesapo. Arirakano wate fana Sekeme taonea Hamomo aporo iramo hauaka á kunikiane Eparahamemo roposapo. Roposa á i kikiiane mokoa pukua á taesapo.

<sup>17</sup> Arirakano wate fana Eparahameaki Kotimo someaka maraka, 'Hauaka one nōmo aporo iraki nōmo kakakosapo.' Aisane hauaka kakako makeana maiya amo, Eparahamemo aporo ira Iyipi hauaka risiane kára wainesapo.

<sup>18</sup> Wainekeea risikino, keseke Iyipi hauaka unihae Fero metane fasere pekeea unihaeaka reapo. Yosefeane fana kusuakipoko, e fasere pekeea reasasamo epo Yosefeane asesafapo.

<sup>19</sup> Asekeanafonoraka reke, isiapo aporo irane unihae Feromo hisiraka mokoatikisapo. Mokoatikisa maiya amo epo someraka, 'Hokosa kiriane kukusimo hea mokoasuhoanie,' aisapo.

<sup>20</sup> Arirakano maiya amo Moseseane takapesa, hokosa apapusekeno Kotimo asekeea sesesapo. Ere maiya isiamo Moseseane ipi wafayamo apea ipi kałyiamo faremarekeea asekeea kayapo.

<sup>21</sup> Asekeea kaina ere maiya isia faraka, hokosa hea makasuhokosane karekerakarakan, faremareako hemakapukua, akua makekeea he fea motosapo. Motosane Unihae Feromo farayamo e asekeea, ketaka maka ipi hokosa pariaka karikia nesapo.

<sup>22</sup> Karikia nekea, Iyipi aporomo ainane Moseseane tarikia sukurusapo. Sukurakano Moseseeme enomaka koteaka hemakapukua rakiraka reapo. Aporo umihaemo rakira ayiáka epo rakisiapo. Aporo unihaeemo somera ayiáka epo somesapo.

<sup>23</sup> Arirakano Mosese keremisi foti su amo (40) reke hemakapuraka, 'Isiraya aporoane nōmo nī aporo irasamo aseako purakapo.'

<sup>24</sup> Aiyaka hemakapukua, e puraka aseane aporo tetá werakano asesapo. Meta Iyipi aporomo Isiraya aporoane mokoatikiraka werakano, Isiraya aporoane Mosesemo patera aseraka, Iyipi aporoane rusua kusuapo.

<sup>25</sup> Rusua kurakano, Mosesemo hemakapuraka, 'Isiraya aporoane makokorotaehoasimo Kotimo ano murikimasapo. Murikimasane Isiraya aporomo hemakapusapo.' Aiyaka hemakapusua nine Isiraya aporo hinamoane makokorotaehoasimo, Kotimo e muriki-masane ipu hemakapusuaafapo.

<sup>26</sup> Hemakapunafonorakano yape tetá Mosese efera hunia paripuraka aseane Isiraya aporo tati yia werakano, Mosesemo kisiraka someraka, 'Weane siahoasifareapo. Metakarisie. Teto aporo ira hakásapo. Titi marirkano werakanare?'

<sup>27</sup> Airakano fana wesa aporoamo Moseseaki mokopipiraka someraka, 'Né metakarikia pusie. Né epamo unihaeaka rekeasimo murikimasare? Nōmo makata maropohoasimo né epamo murikimasare?

<sup>28</sup> Asiamo nōmo rau Iyipi aporo rusua kusua ayiáka, ano soko, nōmo rusua kukusare?'

<sup>29</sup> Airakano Mosesemo kaikia Iyipi hauaka metakarikia pukua, Mitiane hauaka á takari-pusuapo. Takaripukua Mitiane hauaka á reke hinamo arumaka, aporo hokosa tetá hokono murisiapo.

<sup>30</sup> Hokono murikia reke keremisi foti su (40) faraka, Mosese ima yaoa pukua, ūri Sainae makeraka aseane ira rufirakano asesapo. Ira nena rufiraka, ira namo inakanafonorakano aseane, hepene aporo ira rufia rekeno,

<sup>31</sup> Mosesemo aseraka fofaraka, pukua makeraka aseako pesapo.

<sup>32</sup> Perakano Unihae Kotimo someraka, 'Nōmo makasa kaua kekemamo Kotiane anopo. Eparahamemo soko, Aisakemo soko, Yakopemo soko, ipu suamo Kotiane anopo.' Airakano Moses kakaro himu faraka hamisisiraka reke, asekosapoko asiame metakarisiapo.

<sup>33</sup> Metakarirakano Moseseaki Kotimo someraka, 'Ano rea hauaka one enonoraka kiki-sisa hakupo. Asiamo nōmo tamaka ane fisiraka horomaka motosie.'

<sup>34</sup> Isiraya aporoane Iyipi aporomo mokoatikirakan nōmo asesapo. Aporo suamo anoaki sakepamo wárakano nōmo kaisiapo. Arirakano Isiraya aporo makokorotaeraka ararehoko ano perakayiapo. Ano peraka nōmo né Iyipi hauaka paripusie, airakanapo. Aiyaka Kotimo someaka maresapo.

<sup>35</sup> Arirakano Moseseane Isiraya aporomo asekepayaraka someraka, 'Né epamo unihaeaka rekeasimo murikimasare? Nōmo makata maropohoasimo isiapo néane murikimasapo,' aisapo. Asiame aporomo aiyaka somesa nine, Kotimo Mosese ipi nine murikimasapo. Epo aporo makokorotaeraka unihaeaka rekeakosane Kotimo e murikimasapo. Asiamo hepene aporo ira rufi arakarua rea amo Kotimo Moseseane murikimarakano eaki some kasapo.

<sup>36</sup> Some karakano Isiraya aporomo Iyipi hauaka ane metakarismo Kotimo wakapumo hemakapukua rakirane Mosesemo ipi yia wakapuaka rakisiapo. Iyipi hauaka soko, he Retea soko, a ipu asekeea Kotiane hemakapusimo wakapuaka rakiraka i karikia Iyipi hauaka ane metakarikia pusuapo. Metakarikia pukua nena yaoa keremisi foti su amo (40) risike, Kotimo wakapumo hemakapukua rakirane rakisiapo.

<sup>37</sup> Arirakano Mosese ipi yiamo Isiraya aporoaki someraka, 'Nōmo Kotimo someane kaikia, aporo hinamo suaki some kakasimo ano murikimaka pusiesa ayiáka, repo namina yia hakásá metamo porofete apororaka some kakasimo Kotimo murikimaka pusiehokos-apo.' (Lo 18:15)

<sup>38</sup> Aisa aporoane nena yaoa Isiraya aporoyaki hakásá risiapo. Isiapo makasa kaua kekemayaki hakásá reke ipi ūri Sainae yapura hikia hepene aporomo some karakano kaikia some kasapo. Some kasane isiapo soko kaiyisimo some kasapo.

<sup>39</sup> Some karakano isiapo makasa kaua kekemamo Mosesemo someane koaretaeraka, Mosesem fanaraka reane hisiraka, eaki patera tarikia someraka, 'Iyipi hauaka á isu poparipukuripo.'

<sup>40</sup> Aiyaka namina Eroneaki someraka, 'Mosesem úria hisiane paripeanarakapo. Mosesem Iyipi hauaka aeyaka isu karikia pesane kurakanareapo. Isu himeteripo. Isiapo makata meta kekerehoko kotafe kota pariraka rakikia maresie. Makatane rakirakan, isiapo makama fanaraka hemakapukua makataki kekerehokosapo.' (*Kisim Bek 32:1, 23*)

<sup>41</sup> Aiyaka saro ponomakau mano pariaka hokonomo murikimaka rakisiapo. Ipu namina makata rakisiiane asekeea someraka, 'Isiapo kárane ayapo.' Aiyaka saro sipi rukua paikia karáka hokono kesapo. Hokono keraka ipu hokonomo makata rakisiaki hemakapukua kekeresapo.

<sup>42</sup> Kekererakan Kotimo patera tarikia, ipu ti makataki kekereaka kurikurirakan asekeea Kotimo i metakarisiapo. Arirakan wate fana porofete aporomo Kotimo sawia popasane oyapo.

Kotimo someraka, 'Isiraya aporo reo. Re ima yaoa keremisi fotisu amo (40) risike, saro sipi rukua, saro ponomakau rukua paikia, anoaki hemakapukua kasare? Wae. Anoaki hemakapukua kasafapo.

<sup>43</sup> Re ima yaoa koraka risike anoaki kekerehoko farae ape kisia ane repo hemakapuraka, "Farae ape one isiapo unihae Mórokemo apepo." Aiyaka hemakapuraka Mórokeane makáráraka kekeresapo. Ti makata yano motosa Refane repo makáráraka kekeresapo. Ano metakarikia repo hokonomo kotafe kota pariraka rakisia makataki kekeresapo. Asiasamo repo hauakane metakarikia, hauaka meta Pápirone hauaka marokeraka hauaka meta á re risikiasimo nōmo fanasiraka pusiehokosapo.' Aiyaka Kotimo somerakan porofete aporomo kaikia popahoareapo. (*Amos 5:25-27*)

<sup>44</sup> Arirakan isiapo makasa kaua kekema ane ima yaoa risike, Koti iyaki rekeakosakipoko farae ape kisiapo. Ane Kotimo Mosesekai tarirakan ayíáka kisiapo.

<sup>45</sup> Farae ape kisiiane Kenane hauaka maka pusuapo. Kenane aporoane rukukoakataehoasimo Kotimo Isiraya aporoane araresapo. Ararerakan isiapo makasa kaua kekema ane Yosuamo karikia pukua, Kenane aporoyak wekea rukukoakataeraka, hauaka one masapo. Maka Kotimo farae ape soko maka pekeea hauaka wo kisiapo. Wate fana maka pekeea kisiiane Tefete rea maiya amo soko, farae apeeane yaiya reapo.

<sup>46</sup> Kotimo Tefeteaki seserakan, Tefetemo someraka, 'Yakopemo Kotio, isiapo neaki kekerehoko ape meta kotesane kiaera?' Airakan Kotimo waesapo.

<sup>47</sup> Waerakan asekeea risina, keseke Tefetemo maeya Soromonemo Kotipoko ape kisiapo.

<sup>48</sup> Arirakan Koti ipi namo kakaro kárasasamo aporomo ape kisia á e rerafapo. Porofete aporomo Kotimo sawia popasane oyapo.

<sup>49</sup> Kotimo someraka,  
'Ano unihaeaka reke, ti yapura ano kakenapo. Ano korakeane hauaka atura motorapo. Anopoko ape mayíáka kiakosare? Ano ma fenakosare?

<sup>50</sup> Makata su one nōmo rakisiapo.' Aiyaka Kotimo somerakan porofete aporomo kaikia popahoareapo. (*Aisaia 66:1-2*)

<sup>51</sup> Asiamo repo Kotimo hemakapusuane metakarikia repo namina hemakapusuane arakire. Repo Kotiaki hemakapurakarifapo. Kotimo someane repo kakipayaraka arisie. Ho Kotesamo someane repo makasa kaua kekemamo koaretaesa ayíáka, repo soko maiya suamo koaretaeraka arisie.

<sup>52</sup> Porofete aporo suane repo makasa kaua kekemamo mokoatikirakasupo. Wate fana porofete aporo metakiramo someraka, 'Mafasira Aporo peakosapo. Epo ainane namo kakaro ereketae susupo.' Aiyaka some kasa porofete aporoane repo makasa kaua kekemamo rusua kusuapo. Mafasira Aporo pesane repo parakeraka rusua kurakasupo.

<sup>53</sup> Kotimo somémaneane reaki hepene aporomo some karakano yia, repo koaretaeraka arisie,' aiyaka Sitifenemo somesapo.

*Sitifene ekemo karesa kusuane oyapo.*

<sup>54</sup> Sitifenemo somerakan, aporo suamo kairaka kára sapespapo.

<sup>55</sup> Saperakan Sitifene himua Ho Kotesa komarukua rekerakan, Sitifene hepene yapura aseane Koti faesa reke, Koti hokono tumuru takua Yasu rekeno asesapo.

<sup>56</sup> Sitifene aseraka someraka, "Kaisie. Tiane kikisi aka hikia kikisi ro pukua asiapo. Asiakipoko nōmo aseane, Aporomanomo Tákeane Koti hokono tumuru takua rekeno aserakaripo."

<sup>57</sup> Airakan aporo suamo saperaka kearakia, Sitifene someane kairapaka hokonomo senakia mapirisiasiapo. Aporo su yia pukua Sitifene waseremaka, ape yao takua maka pukua, ekemo karesapo.

<sup>58</sup> Sitifene kareako aporomo ipu namina pasu ososane hororaka taeraka e karesapo. Hokosa raua yano motosa Sore reakipoko, ipu pasuane hororaka Soremo asekea rekeasimo átaesapo.

<sup>59</sup> Taeraka Sitifeneane karerakano Sitifene kurekuriraka, "Unihae Yasuo, ano ho masis."

<sup>60</sup> Aiyaka kakuna porokoa kake sakepamo wáraka, "Unihaeo, aporomo ano ekemo karesakipoko, nómó iaki ropo watikisane kakakopo," aihoanine Sitifene kusuapo.

## 8

<sup>1</sup> Sitifene rusua kusuane Soremo aseraka sira ayiakarie, aisapo.

*Yasu Keresoa paosa aporoane Soremo mokoatikisane oyapo.*

Sitifene rusua kusua sereamo kepo mareka, Yarusarame sitia aporo yakaimo Yasu Keresoa paosa aporo hinamoane kára mokoatikisapo. Mokoatikirakano Keresoa paosa aporo hinamo teketarikia pusuapo. Teketarikia pukua metakira Yutia hauaka pukua, metakira Sameria hauaka pukua asiapo. Iane purakano tarira aporoane Yarusarame sitiya risiapo.

<sup>2</sup> Arirakano Kotiaki hemakapusua aporomo Sitifene kusuane hihiripuyaki maka pukua hauaka maresapo.

<sup>3</sup> Arirakano Yasu Keresoa paosa aporoaki Soremo kára hisiraka, i Yasu Kerosoa paosane metakarisimo kára mokoatikisapo. Mokoatikiraka reke ape meta yorokoa, ape meta yorokoa, ayiáka apea yorokoa kakimara aporo soko kakimara hinamo soko waseremokoa tipura kesapo.

*Sameria taonea Yasuane hemakapusimo some kasane oyapo.*

<sup>4</sup> Kakimara aporo hinamo teketarikia i hauaka meta pukua, arirakano metakira soko hauaka meta pukua, aporo hinamo metakiraki Yasuane some kasapo.

<sup>5</sup> Arirakano Firipi Sameria hauaka pukua, Sameria taonea aporo hinamo suaki someraka, "Yasuane ipi aporo unihaeaka rekeasimo máfaraka maresasamo ipiane Keresopo."

<sup>6</sup> Airakano someane aporo suamo kaikia, himu hakásaraka hemakapukua kairaka Firipimo Kotimo wakapumo hemakapukua rakirane rakirakano, aporo suamo asesapo.

<sup>7</sup> Aseane yatafumo aporo hinamo ho mosaki Firipimo pusiesapo. Pusierakano aporo hinamo yakai yatafumo ho mosane metakarikia, sakepamo wárape pusuapo. Arirakano aporo yakai kórosakataesa warisiane Firipimo mafásapo. Aporo yakai korake matipusa soko Firipimo mafásapo.

<sup>8</sup> Ayiáka aporo hinamo yakai mafárankano, Sameria aporo hinamomo aseraka himumo sesesapo.

<sup>9</sup> Arirakano aporo meta yano motosa Saemone Sameria taonea reamo ipi makata kamuraka rakirakano, Sameria aporo hinamomo asekea fofarakano ipi someraka, "Ano aporo kárapo."

<sup>10</sup> Airakano Sameria aporo suamo epo someane kakaro kakimasapo. Kaikia aporo unihaeemo soko, aporo unihaeoanafonosamo soko, aporo suamo kaisiapo. Kaikia namina someraka, "Kotimo ipi wakapuanne Saemoneaki karakano, Saemonemo wakapuanne kakaro kárareapo."

<sup>11</sup> Aiyaka hasaka hemakapukua, ipi wate fana makata kamuna yaiya, makata kamurakanaporo suamo asekea fofarakano epo someane kakimasapo.

<sup>12</sup> Arirakano Firipi Sameria taonea reke someraka, "Koti unihaeaka rerapo. Ipi hokosa Yasu Keresomo isu mafasiako pesapo." Aiyaka Yasuane hemakapusimo some kotesa kasane, ipu kakimarakano, aporo soko, hinamo soko, i su hea tapuku murisiapo.

<sup>13</sup> Firipimo someane Saemonemo soko kakimarakano, e hea tapuku maresapo. Hea tapuku marerakano, Firipiyaki hakásapusuapo. Puraka aporomo hemakapusimo Kotimo wakapumo hemakapukua rakirane Firipimo wakapuaka rakirakano, Saemonemo asekea fofasapo.

<sup>14</sup> Asiamo Sameria aporo hinamomo Kotimo someane kakimasapakan tarira aporo Yarusarame sitia risiamo kaisiapo. Kairaka ipu Sameria taonea Pitape Yone tetapō aseako pusiesapo.

<sup>15</sup> Pusierakano Pitape Yone tetá Sameria taonea pekea, Ho Kotesane Sameria aporo hinamo i himua muriasimo kurikurisapo.

<sup>16</sup> Fana i hea tapuku murisia maya amo, ipu Unihae Yasu yano motosane hakásapu勘akanaporo, Ho Kotesa i himua murisiafapo.

<sup>17</sup> Murianafonorakano Pitape Yone tetapō iane hokonomo sakaihoane Ho Kotesane ipu mosapo.

<sup>18</sup> Arirakano tarira aporomo hokonomo sakaihoane Ho Kotesane morakano Saemonemo aseraka, mone maka pekea tetáki someraka,

<sup>19</sup> "Wakapuane anoaki makasie. Nōmo aporo meta wamoa sakairakano aporoamo Ho Kotesane makasimoripo. Tetápo wakapuane anoaki makasie."

<sup>20</sup> Airakano Pitamo someraka, "Kotimo yaku arareraka karáne monemo roponafapo. Nōmo roporako hemakapusuakipoko, nōmo ní moneane soko, né níane soko, tetakara nine fahokosapo.

<sup>21</sup> Nōmo hemakapusuane Kotimo aseraka siahoasifareaporakano, etoyaki hakāsa rakiane siahoasifareapo.

<sup>22</sup> Nōmo watikiaka hemakapusuane rukupatehoanie. Watikiaka hemakapusuane Kotimo mafahoasimo hufitaeraka kurikurihoanie.

<sup>23</sup> Etapo wakapuaka rakisiakipoko nōmo mahisiraka kakanakeraka are. Ayiáka watikiaka hemakapura amo né ní yia mokoatikirakanapo."

<sup>24</sup> Airakano Saemonemo someraka, "Nōmo someane anoaki ayiakakohoamo, nōmo anopoko Unihae Kotiaki kurikurihoanie," aiyaka Saemonemo somesapo.

<sup>25</sup> Arirakano Unihae Kotimo someane Pitape Yone tetapō some karaka, Kotimo tetā araresane tetapō aporo hinamo suaki some kape hisiapo. Sameria hauaka aeyaka Yarusarame sitia poparihinaka, ikia tipia ape metakira risiakipoko Kotimo someane some kape hisiapo. Some kape hikia Yarusarame sitia pausapo.

#### *Firipimo Itiopia aporoaki some kasane oyapo.*

<sup>26</sup> Arirakano Kotimo hepene aporomo Firipiaki someraka, "Né takahisie. Takahikia Yarusarame sitiane metakarikia, maiya apera ketaya taku aeyaka, Késa taonea puko ikia kara á punie. Arirakano ikia kara ane haōsapo."

<sup>27</sup> Airakano Firipi takahikia pusuapo. Pukua aseane Itiopia aporo ipi hinamo arumakanafonosane\* ipi Yarusarame sitia Kotiaki kekerehoko hisiapo. A hikia nina, ipi hauaka paripurakano Firipimo asesapo. Arirakano Itiopia hauaka á hinamo hakásamo unihaeaka asekeea kayapo. Hinamoane yano motosa Kuini Kanetesepo. Kuini Kanetesepo Itiopia aporoamo makata rakirane Kuini Kanetesemo moneane epo asekeea reapo. Ipi Yarusarame sitia hikia Kotiaki kekereraka

<sup>28</sup> ipi apea paripuraka saro hosemo wakone wakasema maka purakano, Itiopia aporo wakone ripaka kakarua kake, sawi menoraka kayapo. Sawiane wate fana porofete aporo Aesayamo popasane menosapo.

<sup>29</sup> Ayiáka menoraka kakeno, Firipiaki Ho Kotesamo someraka, "Wakone perakano sapenako hisie."

<sup>30</sup> Airakano Firipi foaka hikia wakone sapenesapo. Aporo wakone kakarua kake porofete aporo Aesayamo sawi popasane menorakano, Firipimo kaikia someraka, "Sawi menosane koteaka hemakapurakarire?"

<sup>31</sup> Airakano Itiopia aporoamo someraka, "Mayiáka hemakapusimore? Metamo anoaki kepo somehoanafonorakano, nōmo mayiáka hemakapukusare? Né anoyaki wakone o ripakako peae," airakano Firipi wakonea ripasapo.

<sup>32</sup> Airakano Aesayamo sawi popasane Itiopia aporomo menosane oyapo.

"Saro sipi ruko karikia apura ayiáka, e soko ruko karikia pusuapo. Aporomo saro sipi mano iti morakano, saro sipimo mehoanafonona ayiáka epo soko somesafapo.

<sup>33</sup> Eane makeferakano aporo metamo, 'E aporo koteaka reasasamo e ayiakakopo,' aisafapo. Aporo metamo e patera asesafapo. E ipi aporo tákemo watikiaka hemakapukua e rusua kusuapo." Aiyaka Aesayamo popasane Itiopia aporomo wakonea kake menosapo. (*Aisaia 53:7-8*)

<sup>34</sup> Epo sawi menosane hemakapuko Firipiaki Itiopia aporoamo someraka, "Aesayamo popasane aporo epane popasare? Aesayamo ipiane popasare? Aporo metane popasare?"

<sup>35</sup> Airakano Firipimo someraka, "Aesayamo popasane Yasu Keresoane popasapo." Aiyaka Aesayamo popasa kepoane Firipimo somesapo. Someraka Itiopia aporoamo Yasuane hemakapusimo some kotesane some kasapo.

<sup>36</sup> Some karakano, wakone ikia kara hikia hea pausapo. Pauraka Itiopia aporoamo someraka, "Heane asesie. Ano hea tapukumareane siahoasireare?"

<sup>37</sup> [Airakano Firipimo someraka, "Nōmo Yasuaki kakaro himu hakásaraka hemakapurakanone, hea tapukumareane siahoasireapo." Airakano epo, "Ao, Kotimo hokusane Yasu Keresopo, aiyaka nōmo hemakapurakanapo.]

<sup>38</sup> Wakone yia rekeanie." Airakano Firipipe Itiopia aporo tetā hea pukua, Firipimo Itiopia aporoane hea tapukumaresapo.

\* **8:27:** Aporo raipa roporaka makata rakisimo ipu saro tafakae amara ayiáka, Itiopia aporoane ayiáka marapo.

<sup>39</sup> Hea tapukumarekea faraka, tetā he metakarikia ikia kara paripusua maiya amo, Ho Kotesamo Firipi tau karikia purakano, Firipiane Itiopia aporoamo efera hunia asesafapo. Itiopia aporoane wakonea ripaka seseaka pusuapo.

<sup>40</sup> Purakano Firipiane Ho Kotesamo maka purakano, Firipiane meraruraka pukua, Asotose taonea pausapo. Pauraka Asotose taone aeyaka ikia kara pukua taone meta Kotimo someane some kaka, yaiya taone meta soko, Kotimo some kotesane some kaka, ayiáka some kape pusuapo. Some kape pukua Sisaría taonea pausapo.

## 9

*Sore Yasuaki rekeako parisane oyapo.*

<sup>1</sup> Maiya amo Unihae Yasuaki patera asesa aporo hinamoane Soremo hisiraka someraka, "Re rusua kukusapo," aisapo. Asiamo pirisiti aporo fana reakipoko

<sup>2</sup> Sore pukua eaki someraka, "Tamásakase taonea Yu aporomo sarimana ape asekeea risia aporoaki sawi poparaka, úyaka popahoanie. Unihae Yasumo kakinara aporo hinamoane reyaki risikinone, Sore kimisi aperamo epo iane tipura keako Yarusarame sitia karikia peane siahoasireapo. Aiyaka poparaka sawiane anoaki makanie." Airakano pirisiti aporomo sawi popasane Soremo maka Tamásakase taonea pusuapo.

<sup>3</sup> Pukua Tamásakase taone makerakano, wate foaka hepene aeyaka Sore reakipoko kára faesapo.

<sup>4</sup> Kára faeraka Sore hauaka huruperakano, metamo someraka, "Soreo, Soreo, mari-rakano nómō ano mokoatikirakanare?"

<sup>5</sup> Airakano Soremo someraka, "Unihaeo, né epare?" Airakano epo someraka, "Ano Yasupo. Nómō ano mokoatikirakanapo.

<sup>6</sup> Né takahikia Tamásakase taonea punie. Ape a nómō makata ayiakakosane aporo metamo néaki somehokosapo."

<sup>7</sup> Airakano aporo Soreyaki hakása pusuane pekea risike kaiyiane, memo hákasa somerakanano kairaka, aporomano aseako koane, aporomano kau asesafapo. Asekeanafonarakano i fofaraka, me faraka asekeea risiapo.

<sup>8</sup> Asekeea risikino, Sore takahikia hi fakarikia makata asesafapo. Asekeanafonorakano Sore hokonoa aporo metamo maka Tamásakase taonea karikia pusuapo.

<sup>9</sup> Karikia pukua apea reke, sere isiamo ipi himo asesafapo. Makata nakosa soko, he soko nenafaraka, sokoairaka reapo.

<sup>10</sup> Ayiáka rekeno Tamásakase taonea Yasuaki patera asesa aporo meta Ananáse reapo. Ananásemō kituamo asekeea epo kaiyiáne Unihae Yasumo someraka, "Ananáseo." Airakano Ananásemō someraka, "Wō, Unihaeo, ano wó rekenapo."

<sup>11</sup> Airakano Unihaemo someraka, "Né takahisie. Takahikia ikia kára yano motosa Ereketae a pusie. Yutasemo apea, Tasase taone aporo yano motosa Sore, aseako pusie. Arirakano Soremo kurikuriraka reke,

<sup>12</sup> ipi kituamo aseane, aporo yano motosa Ananáse pekea, Sore ipi himo koteaka asekeasimo aporoamo hokonomo eane sakairakanano asesapo."

<sup>13</sup> Aiyaka Unihaemo somerakanano, Ananásemō someraka, "Unihaeo. Yarusarame sitia Kotimo aporo hinamoane Soremo mokoatikisapakae. Mokoatikisane aporo yakaimo anoaki somerakasupo.

<sup>14</sup> Ape wo soko e pekea, néaki kurikurina aporo hinamoane tipura keako pesapakasupo. Soremo i tipura keasimo pirisiti aporo fanamo ayiakanie, aisapakasupo."

<sup>15</sup> Airakano Unihaemo someraka, "Né pusie. Soremo anopoko rakiasimo e nómō murikimasapo. Epo nómō someane Yu aporohoanafonosaki soko, kamani aporo unihaeaki soko, Yu aporoaki soko, i suaki somehoasimo e nómō murikimasapo.

<sup>16</sup> Murikimarakano asekeea, Soremo ano patera asesakipoko aporo metakiramo e mokoatikirakanano, anopoko e himu nakosapo. Himu nenakano nómō tariakosapo." Aiyaka kituamo Unihaemo somerakanano Ananásemō kaisiapo.

<sup>17</sup> Kaikia e pukua, apea pauraka, ape kakarua yorokoa, Soreane Ananásemō hokonomo sakairaka someraka, "Sore, maeo, Unihae Yasumo ano né rea wo pusierakasapo. Né ikia kara pesa maiya amo epo né asesasamo, epo ano né rea wo pusierakasapo. Nómō himo koteaka asekeea, arirakano Ho Kotesane soko né himua komarukua rekeasimo, epo ano pusierakano ano apera oyapo."

<sup>18</sup> Aihooanine wate foakayia Sore hi katosa anaka nenepo asia hurupepehoane, Soremo himo koteaka asesapo. Aseraka takahisapiro. Takahikia rekeno aporo metamo e hea tapukumarekea

<sup>19</sup> e makata nakosa karakano, e makata neane kau yofesane faraka, wakapuaka koteaka reapo.

*Tamásakase taonea Soremo some kasane oyapo.*

<sup>20</sup> Arirakano Soreane Yu aporomo sarimana apea puraka, Yasuane some karaka, "Yasuane Kotimo hokusapo."

<sup>21</sup> Aiyaka some karakano, aporo suamo kairaka fofaraka someraka, "Yarusarame sitia Yasuaki kurikurina aporo hinamoane mokoatikisa aporoane ayare? Ao, ayareapo. E wo pekeea Yasuaki kurikurina aporo hinamoane taporaka pirisiti aporomo hukurusimo karikia pukusarihoapo," aisapo.

<sup>22</sup> Arirakano Soremo Kotimo someane wakapuaka someraka, ipi someane ipu kakaroripo, aihaoasimo someraka, "Mafasira Aporoane Yasu ipipo." Aiyaka paroaka somerakano, Yu aporo Tamásakase taonea risiamo kairaka himu faraka, eaki some paripurafaraka, me kauraka toapo.

<sup>23</sup> Arirakano wakasema risina Yu aporoane\* sarimaraka, me rukua someraka, "Sore kukuusimo rukusapo."

<sup>24</sup> Aiyaka someraka sere maíyamo soko, ere maíyamo soko, Soreane rukusakipoko e perakarihoamo, aporo metakiramo ruru ikia koroa asekea risiapo. Asekea risikino Kereso aporo metamo Soreaki someraka, "Né rusua kukusapakae."

<sup>25</sup> Airakano ereamo Sore rukuhoamo ipi tákemo e karikia pukua, ekemo rurusakipoko Soreane fefeneaku asia makekea ruru tapikia yao takua tau metafirirakano metafiri-rakanoraka ayiáka hauaka motosapo.

*Yarusarame sitia Sore pesane oyapo.*

<sup>26</sup> Sore Yarusarame sitia pekeea epo hemakapuraka, "Yasuaki patera asesa aporoyaki ano hakása rekeakosapo." Aiyaka hemakapurakano Yasuaki patera asesa aporo Yarusarame sitia risiamo, Soreane Yasuaki rekeako parisane kaikia, ipu kakimasafapo. Soreane asekea i namosapo.

<sup>27</sup> Namoraka risiane, Pánapase pekeea Sore arareraka, tarira aporoyaki hakása rekeasimo Sore pasimasapo. Pánapasemo someraka, "Sore ikia kara pusua maiya amo, Unihae Yasuane epo asesapo. Asekea Yasumo someane epo kakimasapo. Yasumo eaki makata somerakano, Sore Tamásakase taonea pukua, Yasumo someane epo mapiraraka some kasapo."

<sup>28</sup> Airakano Soreane tarira aporoyaki hakása reapo. Reke Yarusarame sitia Yasuane mapiraraka some kaka korakareapo.

<sup>29</sup> Yu aporomo Kiriki meaka somesane iyaki Soremo me rusuapo. Me rurakano ipu Sore kukuusimo ruko sesesapo.

<sup>30</sup> Rukusaporakano Keresoa paosa aporo maemo kairaka, Sore pasimaka Sisaría taonea karikia puraka someraka, "Sore, né pusie. Ní ape sumu Tasase taonea pusie," aisapo.

<sup>31</sup> Arirakano maiya amo Yutía hauaka a soko, Kariri hauaka a soko, Sameria hauaka a soko, Yasu Keresoa paosa aporo hinamoane aporo metakiramo mokoatikisafapo. Mokoatikihonafonorakano i tau risike Kotiane makárarakaka hemakapuraka, Kotimo someane kakimarakaka Ho Kotesamo ararerakano aporo meta soko Yasuaki rekeako pariraka, aporo meta soko Yasuaki rekeako pariraka, aporo meta soko Yasuaki rekeako pariraka, ayiáka aporo yakai risikiako parisapo. Risikiako parirakano kakimara aporo akiyaki namina hakása sarimasapo.

*Pita Rita taonea reane oyapo.*

<sup>32</sup> Arirakano Pita hauaka sua koraka rekeako pusuapo. Puraka Rita taonea Kotiaki hemakapura aporo hinamoane aseako pusuapo.

<sup>33</sup> Pukua Pitamo aseane, aporo yano motosa Iniase wareke, keremisi kari sumo (8) koraka korosakataesa, asakapua warekeno asesapo.

<sup>34</sup> Warekeno Pitamo asekea someraka, "Iniaseo, né Yasu Keresomo mafarkanapano. Takahisie. Ní asakapuane maweroraka maka, takahisie." Airakano Iniase wate foaka takahisapiro.

<sup>35</sup> Takahinakanro Rita aporo hinamomo soko, Serone aporo hinamomo soko, suamo Iniaseane aseraka, i Unihae Yasuaki risikiako parisapo.

*Yopa taonea Pitamo makata rakisiane oyapo.*

<sup>36</sup> Arirakano Yopa taonea hinamo yano motosa Tapita kake, ipi Yasuaki patera asesapo. Hinamoane Kiriki meaka Tókase yano motosapo. Maiya suamo Tókasemo metakiraki kamenakarakaka, iane makoteraka, arirakano metakira makata forokoa risiane araresapo.

<sup>37</sup> Maiya amo ipi makata takamaraka kusuapo. Kurakano hauaka mareako ipi kusua kau narisane kusuraka, huturu apea maka hikia kirimaresapo.

\* 9:23: Yu aporoane Keresoa paosa aporofapo.

<sup>38</sup> Arirakano Rita taoneane Yopa taone make tameiyiyapo. Yopa taonea Yasuaki patera asesa aporomo kaiyiáne, Rita taonea Pita rekenaporakano kaikia, e pasimako aporo tetá pusiesapo. Pukua Rita taonea pauraka tetapó Pitaki someraka, “Né yumo Yopa taonea foaka peae.”

<sup>39</sup> Airakano Pita wate foaka takahikia tetayaki hakása pusuapo. Pukua Yopa taonea pauraka, huturu apea karikia hisiapo. Hikia Pita reakipoko, hinamo yaro peraka hihirupraka someraka, “Anopoko pasu one Tókasemo irisapo.” Aiyaka suamo Tókase hemakapukua, Tókasemo pasu irisane mokoa pesane Pitaki tarisiapo.

<sup>40</sup> Arirakano Pitamo i pusiesapo. I purakano Pita kakuna porokoa kake kurikurisapo. Kurikuriraka faraka, hinamo kusuane aseraka eaki someraka, “Tapita, né turikia pukua takahisie.” Airakano ipi hi fakarikia Pita asekeea kayapo.

<sup>41</sup> Kakeno ipi hokonoa Pitamo maka máfahoane, turikia pukua takahikia rekeno, hinamo yaroaki soko, Kotimo aporo hinamo metakiraki soko peaesapo. I perakano Pitamo i suaki someraka, “Tókase turikia pukua area oyapo,” aiyaka iaki tarikia somesapo.

<sup>42</sup> Arirakano Yopa taonea aporo hinamo yakaimo kairaka Unihae Yasuaki himu hakásaraka hemakapukua risikiako parisapo.

<sup>43</sup> Arirakano ere káramo Pita Yopa taone yia pariraka, Saemonemo apea waka reapo. Arirakano Saemone amo saro ponomakau kauane taoraka rakirakano, eyaki Pita hakása waka reapo.

## 10

### *Koniniasemo apea Pita pusuane oyapo.*

<sup>1</sup> Yu aporo hoanafonosa aporo meta yana motosa Koniniase\* ipi Rome kamanimo amea paoraka rakisiapo. Rakikia reke, kopromoto rakirane rakiako murikimarakano aporo parakuraka kopromoto aporo wane harote (100) unihaeaka asekeea rea, aiyáka ipi asekeea reapo. Ipi aporo parakusane Itari hauaka anakaa peakea, i su Sisaría taonea risiapo.

<sup>2</sup> Koniniasemo Kotiaki hemakapukua, ipi ape hakása risiromo soko, Kotiaki hemakapukua kekeresapo. Asiamo Yu aporo makata forosane Koniniasemo arareraka, mone karákia reke, maiya suamo Kotiaki kurikurisapo.

<sup>3</sup> Ayíka reke, sere metamo samapu maiya isiammo ipi kituamo asera ayíka asesapo. Aseane, hepene aporo peraka someraka, “Koniniaseo.”

<sup>4</sup> Airakano Koniniasemo aseraka, himu faraka hi pokohheraka someraka, “Unihaeo, yakapare?” Airakano hepene aporomo someraka, “Nómo kurikurianane Kotimo kairakanapo. Kaikia, nómo Yu aporoaki mone akarane soko, epo aseraka neane hemakapukuanapo.

<sup>5</sup> Arirakano Saemone Pita, Yopa taonea rekeno, aporo metakiramo e pasimako pusiehoanie.

<sup>6</sup> Ipi yako Saemone akiyaki waka rekenapo. Saemone amo saro ponomakau kau taoraka rakirapo. Rakirane asekeea he tawara fu makeraka apea waka rekenapo.”

<sup>7</sup> Aiyaka someaka marekeaa, hepene aporo hinakanoo, Koniniasemo aporo raipa tetá soko, ame aporo hakása soko, i isiane peaesapo. Peaerakano ame aporo pesa amo ipi Kotiane hemakapukua, ipi Koniniase soko araresapo.

<sup>8</sup> Arirakano aporo isiane peae aka perakano, hepene aporomo somesane Koniniasemo iaki somesapo. Epo someraka, “Re Yopa taonea pukua, Pita pasimaka peanie,” aisapo.

<sup>9</sup> Airakano aporo isiane takahikia pukua, waka mituru fiarakano pukua, Yopa taonea pauhoko makeanamo maiya hi titipiromo Pitamo kurikurihoko, ape kopoa hisiapo.

<sup>10</sup> Hikia Pitamo kurikuriraka reke, meamoraka makata narisapo. Narirakano asekeea, metakiramo Pitapoko makata paikia kawe sarimarakano, Pitamo kituamo sere asera ayíka

<sup>11</sup> ti kakapurakano aseane, pasu kára ke aeyaka tau metafirirakano metafirirakanoraka Pita rea motorakano asesapo. Motorakano aseane,

<sup>12</sup> pasu kakarua makata kakayia soko, kuyare soko, mena soko, makata su kesekeno asesapo.

<sup>13</sup> Asekeea reke kaiyiáne memo someraka, “Pitao, né takahisie. Takahikia makata kesane nómo rukua nesie.”

<sup>14</sup> Airakano Pitamo someraka, “Unihaeo, wae. Makata kesane fana Kotimo some manemo yaposapo. Makata yaposane nómo nakosafapo.”

<sup>15</sup> Airakano eféra hunia someraka, “Makata yaposane Kotimo mafásapo. Asiamo nómo neane siahoasireapo, Kotimo airakano nómo yapohoane siahoasifareapo.”

\* **10:1:** Koniniase ipi Yu aporo hoanafonosa nine Kotiaki himu hakásaraka hemakapusuapo.

<sup>16</sup> Aíyaka yape isiamo somesapo. Yape isiamo someaka faraka, pasuyaki makata kesa akiyaki, hepene yapura maka parihisiapo.

<sup>17</sup> Maka parihinakano Pitamo hemakapuraka, "Kepoane marirakanarakapo." Aíyaka Pita himeteraka reakipoko, Koniniasemo aporo isia pusiesane Yopa taonea peraka, Sae-monemo apeane kope pesapo. Kope pekea ikia koro anaka

<sup>18</sup> wáraka, "Saemone Pita, ape wo waka rekerire?"

<sup>19</sup> Aihora yiamo Pitamo makata asesa amo kepoane hemakapukusapoko asiane himeteraka rekeno, Ho Kotesamo someraka, "Kaisie. Aporo isia metakiramo né kope apere.

<sup>20</sup> Né takahisie. Né takahikia hauaka atura takapesie. Aporo isia akiyaki puko karekeakopo. Aporo pesane nōmo pusiesapo." Aíyaka Ho Kotesamo somerakano,

<sup>21</sup> Pita takahikia, hauaka atura takapekeea pauraka reke aporo isiaki someraka, "Re mayiakako pesare? Repo aporo kope pesane anopo."

<sup>22</sup> Airakano aporoamo someraka, "Koporo Koniniasemo isu pusierakasapo. Koniniase ipi aporo kotesapo. Ipi Kotiaki himu hakásaraka hemakapukua rekenapo. Yu aporomo namina susu someraka, 'Koniniase ipi aporo kotesapo,' airapo. Arirakano Koniniaseaki Kotimo hepene aporomo someraka, 'Pitamo someane kaiyako, ní apea Pita peasimo pasimaka peaniehoapo,' aisapo." Aíyaka Koniniasemo pusiesa aporoamo somerakano,

<sup>23</sup> Pitamo kaikia iaki someraka, "Re anoyaki hakasa wakako peae." Airakano i pekea, namina ere hakásamo waka, mituru fiarakano poparipukusakipoko Yopa taonea Keresoa paosa aporo mae metakira soko, Pita soko, Koniniasemo pusierakano pesa aporo akiyaki hakasa pusuapo.

<sup>24</sup> Pukua i ikia tipia waka, mituru takahikia pukua, Sisaría taonea pausapo. Aporo Pita pasimako pusuane perakarihoamo, Koniniase kau kake ipi táké soko, ipi more soko, su sarimarakaa eyaki hakasa toapo.

<sup>25</sup> Toakipoko Pita perakano Koniniasemo hemakapuraka, "Pita ipi aporo kárapo," Aíyaka hemakapuraka, Pita asekeea Koniniase seseraka peraka, hauaka moroa uakapekeea kakuna porokoa, hikumisimo hauaka atura nanireapo.

<sup>26</sup> Arirakano Pitamo aseraka maka máfaraka someraka, "Takahisie. Né aporo ayíáka ano soko aporopo."

<sup>27</sup> Aíyaka Koniniaseaki Pitamo somepe pukua, apea yorokoa peraka, aseane aporo yakai sarimasekeno asesapo.

<sup>28</sup> Aseraka Pitamo iaki someraka, "Fana repo kaisiane Yu aporohoanafonosamo apea Yu aporo purane yaposapo. Yu aporomo Yu aporohoanafonosa ane morenafapo. Asiamo Kotimo anoaki kawe yumo someraka, 'Aporo metayaki sarimahoko hisihokopo. Aporo metane "Aporoane watikirareapo," aíyaka hemakapukopo.'

<sup>29</sup> Aíyaka Kotimo anoaki somesakipoko repo ano peaesapo. Peearakano nōmo wae-safapo. Aoaka ano pesapo. Ano pasimako pesane marirakano pasimako pesare?"

<sup>30</sup> Airakano Koniniasemo Pitaki someraka, "Námai ano samapu maiya isiamo apea kake kurikurihoane, aporo meta haku pasu faesa ososane ano rea perakasupo.

<sup>31</sup> Pekea aporoamo anoaki someraka, 'Koniniaseo, nōmo kurikurianane Kotimo kaisiapo. Nōmo aporo ararehoko mone akarane Kotimo asesapo. Né Kotimo hemakapurakanapo.'

<sup>32</sup> Yopa taonea Saemone Pita rekeno, aporo metakiramo e pasimako pusiehoanie. Saemone ipi yakoyaki he lawara fu makeraka waka rekenapo. Arirakano Yopa taonea ipi yako Saemonemo saro ponoma kauane taoraka rakirapo.'

<sup>33</sup> Aíyaka hepene aporomo anoaki somerakano, né foaka pasimako aporo isiane pusiesapo. Né aoraka perakano, Unihaemo someane somehoaniesane isiapo kaiyako sarimasapo. Sarimarakanoo Kotimo isu asekeea rekenapo," aíyaka Koniniasemo somesapo.

### *Pitamo some kasane oyapo.*

<sup>34</sup> Arirakano Pitamo someraka, "Nōmo kawe yumo hemakapusuane oyapo. One namo kakaroripo. Kotimo aporo su hakasa yineraka hemakapurapo. Yu aporo soko, Yu aporohoanafonosa soko, suane Kotimo hakasa yineraka hemakapurapo.

<sup>35</sup> Hauaka sua aporo suamo Kotiaki hemakapurakanoo, Kotimo aseraka siaraka arakire alhoasimo koteaka rakirakanoo, aporoane Kotimo aseraka sesenapo.

<sup>36</sup> Kotimo ipi someane Yu aporoaki some kasapo. Yu aporo auaraka risikiasimo, Yasu Keresomo some kotesane some kakako pesapo. Yu aporoaki some kakako pesaposane kakaroripo. Asiane Yu aporo soko, Yu aporohoanafonosa soko, aporo suamo unihaeane Yasu ipipo.

<sup>37</sup> Arirakano someane Yutía hauaka faserepesane repo kaisiapo. Kaisiane oyapo. Fana Yone he tapukumareramo someraka, 'Repo watikisane rukupateraka metakarikia Kotiaki risikiako parirakanoo nōmo re hea tapukumuriakosapo.' Aíyaka Yonemo some karakanoo,

Kariri hauaka a Yasu pekea reke, makata kepomarekea some karáka, Yutía hauaka sua Yasumo Kotimo someane some kasapo.

<sup>38</sup> Nasare aporo Yasuaki Kotimo Ho Kotesa e himua marekea wakapu soko eaki kasapo. Yasu koraka reke Kotiane eyaki hakása reasasamo, epo makata koteaka rakiraka, Satanemo aporo raipa yatafumo aporo ho mosane metakarikia pusierakano i pusuapo. Purakano aporoane fasapo. Aiyaka makata suane repo kaisiapo.

<sup>39</sup> Arirakano Yu aporomo hauaka á soko, Yarusarame sitia soko, Yasumo makata rakisiane isiapo asesane somerakanapo. Yu aporomo Yasuane ira matopesa paremarekea rusua kusuapo.

<sup>40</sup> Rusua kusua nine yape isiamo Kotimo maturikia taerakano e turikia pusuapo. Turikia pusuane isiapo asesapo.

<sup>41</sup> Asiáne Yu aporo suamo asesafapo. Asesane somehoasimo Kotimo isu muriki-marakan, isiapo hakása asesapo. Isiapo Yasu turikia pusuane asekea, eyaki hakasa toke makata nesapo.

<sup>42</sup> Arirakano Yasumo isuaki someraka, ‘Aporo hinamo suaki Kotimo someane some kakanie. Aporo hitafe risiane soko, aporo kusuane soko, nōmo takekeea parakuhoasimo Kotimo ano murikimasapo. Aporo suaki someane some kakanie.’ Aiyaka Yasumo isuaki somesapo.

<sup>43</sup> Arirakano wate fana porofete aporomo someraka, “Aporo hinamo suamo Yasuaki himu hakásaraka risikino, i himu watikisane Yasumo mafahokosapo. Yasumo wakapumo rakiarie siahoasireapo, aiyaka hemakapukua e yano horakano i himu watikisane mafahokosapo.” Aiyaka porofete aporomo somehoareapo.” Aiyaka Pitamo Koniniasemo apea some kasapo.

*Yu aporohoanafonosa himua Ho Kotesa pesane oyapo.*

<sup>44</sup> Pitamo someahora yiamo, kaisia aporo hinamoane i himua Ho Kotesa pesapo.

<sup>45</sup> Yu aporomo Yasumo someane kakimaka risiane Yopa taone aeyaka Pitayaki hakása pesamo aseane, Yu aporohoanafonosane sarimaraka risiaki Ho Kotesa yaku karakano aseraka, i Yu aporoane fofasapo.

<sup>46</sup> Ipu kaiyiane, Yu aporohoanafonosamo me kekepo kaiyánafonosane, Ho Kotesamo i Yu aporohoanafonosaki karakano, ipu someraka Kotiaki seseraka kekererakano Yu aporomo kaisiapo. Asiamo Pitamo someraka,

<sup>47</sup> “Isu Yu aporo himua Ho Kotesa perakasu aiyáka, i himua soko, Ho Kotesa aiyáka apere. Aporo wo risiane hea tapukumurirakano, aporo metamo waehoane siahoasifareapo.

<sup>48</sup> Aporomo Yasu Keresomo wakapuaki himu hakásaraka hemakapukua, e yano horakano i hea tapukumurianie.” Airakano ipu Pitaki someraka, “Né ere hukusi isuyaki waka rekeanie.” Aiyaka aporo suamo somesapo.

## 11

*Yarusarame sitia Yasu Keresoa paosa aporoaki Pitamo some kasane oyapo.*

<sup>1</sup> Yu aporohoanafonosamo Kotimo someane kakimasaapkano, Yutía hauaka sua tarira aporomo soko, Yasu Keresoa paosa aporo maemo soko, kaisiapo.

<sup>2</sup> Kairakano Yu aporo metakiramo hemakapuraka, “Yu aporohoanafonosamo Yasu patera aseako seserakano, isiapo Yu aporomo ainane kekemarakaka kau hahaeraka pate-hoafunureapo.” Aiyaka aporoamo hemakapuraka, Pita Yarusarame sitia perakano, Pitaki kurukruka someraka,

<sup>3</sup> “Marirakano nōmo Yu aporohoanafonosamo apea pukua, iyaki hakása toke makata nesare? Aporoane i kau hahaeraka patesafapo. Marirakano iyaki hakása toke makata nesare?”

<sup>4</sup> Airakano eaki Kotimo makata su tarisiane ipu hemakapusimo Pitamo someraka,

<sup>5</sup> “Ano Yopa taonea reke, kurikuriraka rea maiya amo, nōmo kituamo sere asera aiyáka asesapo. Aseane pasu kára asia hepene yapunaka ano rea perakasupo. Pasu ke aeyaka tau metafirirakano metafirirakanoraka ano rea motorakano,

<sup>6</sup> nōmo aseane pasu kakaruá makata kakayia, yasaro ásia soko, kuyare soko, mena soko, makata su kesekeno asesapo.

<sup>7</sup> Asekea nōmo kaiyiane memo someraka, ‘Pitao, né takahisie. Takahikia makata kesane rukua nesie.’

<sup>8</sup> Aiyaka somerakano, nōmo some parihinaka, ‘Unihaeo, wae, makata kesane wate fana Kotimo somemanemo motoraka yaposapo. Asiasamo makata yaposane nōmo nenañapo.’

<sup>9</sup> Airakano yape tetá memo someraka, ‘Makata yaposane Kotimo mafásapo. Neane siahoasireaporakano yia, nōmo yapohoane siahoasifareapo.’

<sup>10</sup> Aiyaka yape isiamo someaka farakano pasuyaki makata kesa akiyaki hepene yapura maka parihinakasupo.

<sup>11</sup> Arirakano maiya amo, ano apea kayakipoko aporo isia pesapo. I Sisaría taone anaka pekea, ano pasimako Koniniasesmo aporo isiane pusierakano pesapo.

<sup>12</sup> Perakano anoaki Ho Kotesamo someraka, ‘Né aporo isia akiyaki yumo hakasa pusie. I Yu aporo hoanafonosa kikisiaka risia yia ne puko karekeakopo.’ Aiyaka Ho Kotesamo somerakasupo. Arirakano Yasu Keresoa paosa aporo namasu repo aserane, anoyaki hakasa pukua Koniniasesmo apea yorosapo.

<sup>13</sup> Isu yororakano Koniniasesmo someraka, ‘Nōmo aseane nōmo apea hepene aporo pekea someraka, “Saemone Pita Yopa taonea waka reane aporo metakiramo e pasimako pusiehoanie.

<sup>14</sup> Pukua e pasimarakano, e pekea, epo some karakano, nōmo soko nōmo ní ape hakasa aporo hinamo risiamo soko, someane kakimarakano, Kotimo mafasikia ararehokosapo.” Aiyaka hepene aporomo somesapo.’

<sup>15</sup> Aiyaka Koniniasesmo somerakano, nōmo iaki someahora yiamo, Ho Kotesa i himua pesapo. Fana isu himua Ho Kotesa perakuso ayiáka, i himua soko, Ho Kotesa ayiáka pesapo.

<sup>16</sup> Arirakano Yasumo fana somerakasuane nōmo hemakapusuapo. Hemakapusuane oyapo. Yasumo someraka, ‘Yonemo hea hakasa tapukumurisiapo. Nōmo Ho Kotesa re himua muriakosapo.’ Aiyaka Yasumo fana somerakasuane nōmo hemakapukua reapo.

<sup>17</sup> Isiapo Unihae Yasu Keresoaki himu hakásaraka hemakapukua risikino, Kotimo Ho Kotesa yaku kasapo. Isuaki yaku kasa ayiáka, iaki soko yaku kasasamo nōmo Kotiaki, ‘Kakakopo,’ aihoane siahoasifareapo.” Aiyaka Pitamo somerakano

<sup>18</sup> aporo suamo kairaka hukurusuane metakarisiapo. Ipu Kotiaki kekereaka someraka, “Isu soko, i Yu aporo hoanafonosane soko, neyaki yaiya risikiasimo himu watikisane nōmo mafasapo,” aisapo.

*Kotimo some kakimara aporo Anitioke taonea risiane oyapo.*

<sup>19</sup> Sitífene rusua kusuakipoko, aporo metakiramo Yasuaki patera asesa aporo hinamoane mokoatikisapo. Mokoatikirakan metakira yamenoa teketarisapo. Teketarikia, metakira Finisia hauaka pukua, metakira Saéparase hauaka pukua, metakira Anitioke taonea puusapo. I pukua Yu aporoaki hakasa Yasuane some kasapo.

<sup>20</sup> Arirakano Yu aporo kakimara aporo metakira Saéparase hauaka aeyaka soko, Sairíni hauaka aeyaka soko, i Anitioke taonea puusapo. Pukua Yu aporo hoanafonosane Anitioke taonea risiaki ipu Unihae Yasuane some kasapo.

<sup>21</sup> Some kayane unihae mo wakapumo i ararerakano, aporo yakaimo ipu someane kakimaka Unihae Yasuaki risikiako parisapo.

<sup>22</sup> Arirakano Yarusarame sitia Yasu Keresoa paosa aporomo kaikia Pánapaseaki someraka, ‘Né Anitioke taonea pusie.’

<sup>23</sup> Airakano Pánapase Anitioke taonea puraka, aseane Yasu patera asesa aporo hinamoane Kotimo hemakapukua ararerakano asekeea someraka, ‘Nōmo himumo kára seseripo,’ aiyaka Pánapasemo iaki someraka, ‘Repo Unihae Yasuaki himu hakásaraka yaiya hemakapukua risikianie. Unihaeaki hemakapusuane hemakapukua rosakataehoko hemakapunie,’ aisapo.

<sup>24</sup> Arirakano Pánapaseane aporo kotesapo. Ipi himua Ho Kotesa komarukua reke, Kotiaki himu hakásaraka hemakapukua reapo. Epo some karakano, aporo hinamo yakaimo kakimaka, fana Unihae Yasu Keresoa paosa aporo risia akiyaki paosapo.

<sup>25</sup> Arirakano Pánapase Anitioke taoneane metakarikia, Tasase taonea Sore pasimako kopee puusapo.

<sup>26</sup> Pukua Sore pasimaka, Anitioke taonea paripesapo. Keremisi hakásamo tatí hakasa reke, Yasu Keresoa paosa aporo hinamoyaki sarimaraka, Kotimo someane aporo hinamo yakaiaki some kasapo. Arirakano Anitioke taonea Yasuaki patera asesa aporoane mafana yia someraka, ‘I Keresoa yano motosa paosa aporopo,’ aiyaka somesapo.

<sup>27</sup> Maiya amo Yarusarame sitia anaka Anitioke taonea porofete aporo metakira pesapo.

<sup>28</sup> Peraka porofete aporo hakasa meta yano motosa Ákapaseki Ho Kotesamo somerakano, Ákapasemo someraka, ‘Makata nakosa hauaka sua fahokosapo.’ Aiyaka Ákapasemo somesa, hakasa nine fasere peraka, Korótiae unihaeaka rea maiya amo, makata nakosane fasapo.

<sup>29</sup> Arirakano Yutía hauaka makata nakosa fasekeno, Anitioke taonea Yasuaki patera asesa aporomo someraka, ‘Isiapo Keresoa paosa aporo mae Yutía hauaka risiane ararehokosapo.’ Aiyaka aporo metakiramo mone wakasema kayamo wakasema kasapo. Arirakano aporo metakiramo mone kára kayamo kára kasapo. Makata nakosa ropo-hoasimo mone kasapo.

<sup>30</sup> Kaka marekea, Sorepe Pánapase tetāki ipu someraka, “Tetápo moneane mokoa pukua, Yutía hauaka Keresoa paosa aporo asekea risia aporoaki kakanie.” Airakano tetapō mokoa pusuapo.

## 12

*Yasu Keresoa paosa aporo hinamo mokoatikisane oyapo.*

<sup>1</sup> Herote\* ipi kamani unihaeaka reke, epo Yasu Keresoa paosa aporo metakira kára mokoatikisapo.

<sup>2</sup> Mokoatikiraka Yonemo mamanea Yameseane kukusimo, “Ferepemo paterasie,” aíyaka Herotemo someaka maresapo. Someaka marerakano, e rusua kusuapo.

<sup>3</sup> Rusua kusuane Yu aporo metakiramo sesérakanō† asekea, Herotemo someraka, “Pitane soko waseremasie.” Airakano Pita waseremaka tipura makesapo. Tipura makesa maiya amo, Yu aporomo Farawa Pirianafonona Nako hokono kesapo.

<sup>4</sup> Hokono kesa ane faraka, Ape Farimaresane Hemakapuko Hokono Kesapo. Hokono akera maiya amo, Pita tipura makesane, aporo terakaiyamosa kitafasu kitafasuaka asekea risiapo. Herotemo hemakapuraka, “Hokono kekeia soraka, aporo suamo asekeasimo Pita hukurukusapo.” Aíyaka hemakapukua, Pita tipura makekeia reapo.

<sup>5</sup> Tipura makekeia reakipoko, Keresoa paosa aporo hinamomo Kotiaki namo kakaro himu hakásaraka hemakapukua, Pitapoko farimaka kurikurisapo.

*Pita tipura makesa hepene aporomo tonotaesane oyapo.*

<sup>6</sup> Herotemo hemakapuraka, “Rau Pita hukurukusapo,” aíyaka hemakapurakano, ereamo Pita wasakipoko aporo terakaiyamosa meta takua waka meta takua waka Pita tipia wasapo. Pita hokono tumuru takua sene karamo kita humarekea, sene sapemo aporo terakaiyamosa hokonoa kita humarekea, sene kára metamo Pita hokono kasakai takua kita humarekea, sene sapemo aporo terakaiyamosa meta hokonoa kita humarekea, aíyáka wakakesapo. Arirakano aporo terakaiyamosa metakiramo ikia koroa mafairaka asekea risiakipoko,

<sup>7</sup> ereamo wate foaka Unihae Kotimo hepene aporo peraka, tipura ape kakarua faesapo. Faesakipoko hepene aporomo Pita wataroa mahohoraka someraka, “Pita né turisie. Turikia foaka takahisie.” Aíyaka hepene aporomo somehoanine, Pita hokonoa sene káramo kita humaresane hemakapukua hororaka horopepesapo.

<sup>8</sup> Horopeperakano hepene aporomo someraka, “Ní terakae hisie. Ní tamaka osorasie.” Airakano Pitamo terakae hikia, tamaka soko ososapo. Osorakano hepene aporomo someraka, “Ní inu pasu osoraka anoyaki peae.”

<sup>9</sup> Airakano Pita takahikia, hepene aporoane kekemasapo. “Hepene aporomo ano tonotaerakanapo,” aíyaka hemakapusuafapo. Kituamo arirakarahoamo kekemasapo.

<sup>10</sup> Kekemarako aporo tipura ikia koro mafairaka asekea risia fanane marokeraka, amo tipia aporo metakira mafairaka asekea risiane soko marokeraka, ape hauaka moroa pukusakipoko tetā peane rurua aenemo ikia koro mapirisiane hemakapukua ropakapurakan, tetā hauaka moroa pauraka ikia kara pusuapo. Ikia kara puraka, hepene aporomo wate foaka Pita metakarikia hisiapo.

<sup>11</sup> Hinakano Pitamo hemakapuraka, “Kituamo arirakarifapo. Namo kakaro sere ayiane, ano kakaro tonotaerakayireapo. Kotimo ipi hepene aporomo ano tonotaehoasimo epo pusiehoareapo. Pusierakanō peakea Herotemo ano rukohoamo tonotaesapo. Ano mokoatikihokosane Yu aporomo aseakohoamo tonotaesapo.” Aíyaka Pitamo hemakapusuapo.

<sup>12</sup> Aíyaka hemakapukua, hinamo Mariamo apea e pusuapo. Mariane Yone Makamo kaíyiapo. Mariamo apea aporo yakai sarimaraka Pitapoko kurikuriraka toapo.

<sup>13</sup> Kurikuriraka toakipoko ikia koroa Pitamo paroparorakano, hinamo raipa Rotamo kaikia aseako pesapo.

<sup>14</sup> Peakea Pitamo méane Rotamo kairaka, ikia koro ropakamakosapoko asiane, kára seseraka aporo kurikuriraka toaki somehoko, foaka ape kakarua pukua someraka, “Aporo reo, Pita ikia koroa rekerakae.”

<sup>15</sup> Airakano aporo suamo Rotaki someraka, “Né masuarakae.” Airakano Rotamo someraka, “Wae, kakaroripo.” Airakano aporomo someraka, “Ane hepene aporo Pita asekea rea aporo amo méane kairakayiapo.”

<sup>16</sup> Airakano Pitamo efera hunia yaiya paroparorakano, aporomo ikia koroane ropakamaka, Pita aseraka fofasapo.

\* <sup>12:1:</sup> Yasu takapesa maiya amo Kini Herote ipi unihaeaka reapo. E kuraka, epo hokosamo hokosa epo ipi yako Herote meta faserepesapo. † <sup>12:3:</sup> Yameseane rurakano Yu aporo metakira sesérakanō risiane Yasu Keresoa paosa aporofapo.

<sup>17</sup> Fofaraka risikino me fahoasimo Pitamo hokono rukurakoraka someraka, "Año tipura makesane tonotaehoasimo Unihae Kotimo ano araresapo. Yameseaki‡ soko, Yasu Keresoa paosa aporo mae metakiraki soko, nōmo some one somehoanie." Aíyaka someaka marekeia, apeane Pitamo metakarikia taonea meta pusuapo.

<sup>18</sup> Mituru fiarakano, aporo terakaiyamosamo aseane Pita pusekeno asekeia, fofaraka mahimeteraka someraka, "Pita mayare? Pita manaka tonopusuarakapo," aíyaka fofasapo.

<sup>19</sup> Arirakano Herotemo someraka, "Pita waseremako kope pusie." Airakano Herotemo aporo terakaiyamosamo kope pukua, Pita asekeanafonorakano aporo terakaiyamosaki Herotemo saperaka hukurukua someraka, "Aporo terakaiyamosane rusie." Airakano i rusua kusuapo. Rusua kukua kerakano, Herote Yutia hauakane metakarikia, Sisaria taonea pusuapo.

### *Herote kusuane oyapo.*

<sup>20</sup> Arirakano Taia aporoaki soko, Saetone aporoaki soko, Herotemo sapesapo. Arirakano ipu makata nakosane Herotemo hauaka a morapo. Asiasamo Herotemo iaki someraka, "Nōmo hauaka a repo makata nakosane mokoakosafapo." Aihokohoamo ipu Heroteaki somehoko pesapo. Pekea ipu Herotemo ape asekeia rea aporo Parásatasemo i patera asekeia ararehoasimo tau auaraka somesapo. Someraka Parásatasemo Heroteaki some páteraka someraka, "Nōmo sapesane metakarinie. Aporoamo tákeraka risikiakosapo." Airakano Herotemo someraka, "Nōmo iaki somehokusakipoko sere meta murikimakosapo," aisapo.

<sup>21</sup> Murikimasa maiya amo, Herotemo ipu unihaeamo pasu kotesa osoraka, kau rakikia, unihaeamo sea á kake, aporoaki makata kára some kasapo.

<sup>22</sup> Some karakano ipu suamo someraka, "Herotemo méane aporomanomo méfapo. Méane kotimo mépo."

<sup>23</sup> Airakano Herotemo iaki someraka, "Repo hasaka somerakae," aisafapo. Herotemo kakaro Kotiane makárahoanafonosasamo, wate foaka Kotimo hepene aporomo e rusuapo. Ruane Heroteane fakoa makata takamara sofe risiapo. Sofeane risike Herote kusuapo.

<sup>24</sup> Arirakano Kotimo someane aporo metakiramo kaikia somepe pusuapo. Somepe purakano aporo yakaimo someane kakimasapo.

<sup>25</sup> Arirakano Pánapasepe Sore tetapō Yarusarame sitia makata nakosa ropohoasimo mone kaka, Yarusarame sitiane metakarikia, Yone Makane pasimaka karikia pukua, Anitioke taonea poparipusuapo.

## 13

### *Pánapasepe Sore tetā murikimaka pusiesane oyapo.*

<sup>1</sup> Anitioke taonea Yasu Keresoa paosa aporo metakira porofete aporopo. Metakira tisa aporopo. Arirakano i yano taesane oyapo. Pánapasepe soko, arirakano meta Símiōne ipu yano motosa meta Naisa soko, arirakano meta Rúsiase ipu Sairíni taone aeyaka pesane soko, arirakano meta Manéyane ipu kamani unihae Herote tetā hokosa risia maiya amo tati ape hakása risiane soko, arirakano meta Sore soko, ipu namina su yiamo Kotimo someane hemakapuraka aporo metakiraki some kasapo.

<sup>2</sup> Maiya hakása metamo, ipu Kotipoko makata nakosa sokoairaka, eaki kekereraka kurikurirakano Ho Kotesamo iaki someraka, "Pánapasepe Sore tetapō nōmo makata rakinie aisane, tetapō rakisimo, kikisiraka murikimakanie."

<sup>3</sup> Airakano ipu makata nakosa sokoairaka kurikuriraka, tetā wamoia hokonomo sakairaka Kotimo makata rakirane tetākai rakiako pusiesapo.

### *Saéparase he tonoa Pánapasepe Sore tetā pusuane oyapo.*

<sup>4</sup> Arirakano Pánapasepe Sore tetāki Ho Kotesamo pusierakano pusuapo. Pukua Serusia taonea kasu sipia ripaka, Saéparase he tonoa pusuapo.

<sup>5</sup> Pukua, Saéparase he tonoa pauraka, Saramisi taonea pukua, Yu aporomo sarimana apea pukua, a Kotimo someane some kasapo. Arirakano Yone Makamo tetā ararehoasimo tetapō e soko karikia pusuapo.

<sup>6</sup> Karikia pukua Saramisi taone ane metakarikia, he tono sapea pukua Páfose taonea pausapo. Pauraka taonea Yu aporo yano motosa Payasu asesapo. Payasu asesane e Yu aporopo. Yu aporoane kotafe porofete aporopo. Aíyaka kotafe hokoa makata kamusapo.

<sup>7</sup> Arirakano ipu Saéparase aporo kamani unihae yano motosa Sésease Póraseaki tákeraka reapo. Arirakano Sésease Pórasemo himumo koteaka hemakapuraka, someane kaikia, kepoane wate foaka hemakapurapo. Ipi Kotimo someane kaiyako, Pánapasepe Sore tetāki pearakano,

‡ 12:17: Yameseane Yasumo ipi mamaneapo. Ipi yako Yonemo mamaneane, Herotemo rusua kusuapo.

<sup>8</sup> tetā pukua, eaki some kasapo. Arirakano Payasu yano motosa meta Kiriki meaka Eremase yano motosapo. Yano motosa kepoane makata kamuna aporopo. Aporoamo ipi Soremo someane metakarisimo waeraka, kamani unihaemo Yasuaki himu hakásaraka hemakapukohoamo paritaeraka some kasapo.

<sup>9</sup> Arirakano Sore ipi yano motosa meta Porepo. Pore ipi himua Ho Kotesa komarukua rekerakano, aporo makata kamunaki hi pokohéheraka aseraka

<sup>10</sup> someraka, "Nómo Satane patera asekeea, epo ipi rakirane nómo arakire. Koteaka ereketae rerane nómo hemakapurakarifapo. Hemakapunafonoraka, ereketae rakira makata aki nómo yunuraka are. Watikiaka rakirane soko, kotafe somerane soko, né himua komarukua are. Aporoane Unihae Kotimo ikia kara fasikia hasaka pusimo, nómo kirimaraka watikiaka arakire. Maiya suamo nómo yaiya watikiaka rakiraka rekeakosare?"

<sup>11</sup> Arirakano pipu Unihae Kotimo hokonomo né rurakano, né hi katohokosapo. Pipu sere faenane nómo asekafasapo. Asekeanafonoraka wakasema nina asekeakosapo." Aihoanine makata kamuna aporo reane, eresa ako apera ayiáka pekea, e karotapisiapo. Karotapirakano metamo e hokonoa maka karikia pusimo, epo hokono susuamo sesakai sesakairape pusupo.

<sup>12</sup> Arirakano Payasu hi mapirisiane unihae Sésease Pórásemo aseraka, Kotimo someane kakimaka, Unihae Yasuane Soremo some karakan kaikia fofasapo.

*Pisitia hauaka pukua Anitioke taonea pausane oyapo.*

<sup>13</sup> Arirakano Páfose taonea anakta Pore aporo metakirayaki kasu sipia ripaka pukua, Pamefíria hauaka pauraka Paka taonea pesapo. Peraka a Yone Makamo i metakarikia Yarusarame sitia paripusuapo.

<sup>14</sup> Paripurakano i Paka taoneane metakarikia, Pisitia hauaka pukua, Anitioke\* taonea pausapo. Pauraka fenena maiyamo Yu aporomo sarimana apea pukua toapo.

<sup>15</sup> Arirakano Kotimo someman Mosesemo popasane Yu aporomo sarimana ape asekeea risia aporomo menoaka faraka, porofete aporomo sawia popasane menoaka faraka, ipu aporo metaki someraka, "Pore soko aporo eyaki pesane soko, iaki kaiyako pusie. Pukua úyaka somehoanie. Maeo, repo isu ararehokosa someane hemakapurakarakanone isuaki somehoanie." Airakano aporoamo pukua iaki somerakano,

<sup>16</sup> Pore takahikia hokono rukurakoraka someraka, "Isiraya aporo repo kaisie. Yu aporo hoanafonosamo Kotiaki hemakapura aporo repo soko kaisie."

<sup>17</sup> Isu wainepe pesa kepoane Isiraya aporo Kotimo murikimasapo. Murikimaka Isiraya aporo Iyipi hauaka risia maiya amo kára wainenakano Kotimo iane makárasapo. Isiraya aporoane Iyipi hauaka metakarikia pusimo, Kotimo wakapumo hemakapukua rakiramo iane pasimosapo.

<sup>18</sup> Pasimokoa keremisi foti amo (40) ipu watikiaka rakikia nena ima yaoa koraka risikino asekeea Kotimo i metakariakosane hisiraka asekeea reapo.

<sup>19</sup> Arirakano aporo me kekepo yatipinu sumo Kenane hauaka asekeea risiane, Kotimo rukutaesapo. Rukutaeraka marekea, Kenane hauakane Isiraya aporoaki karaka someraka, 'Hauaka ane repo hauakapo,' ayiáka iaki kasapo. Keremisi fo harote fifiti (450) amo Kenane hauakane Isiraya aporomo asekeea risikiasimo Kotimo murikimasapo.

<sup>20</sup> Murikimasa maiya ane farakano, maropona aporomo asekeea risikiasimo Kotimo murikimasapo.

<sup>21</sup> Wakasema risina Sámio ipi porofete aporo rea maiya amo, Isiraya aporomo Kotiaki someraka, 'Aporo hakásia isu unihaeaka asekeea rekeasimo murikimaka mareanie.' Airakano Pénesamenemo aporo ira, aporo Kisimo maeya yano motosa Soreane, ipi unihaeaka rekeasimo Kotimo maresapo. Arirakano keremisi foti amo (40) Sore unihaeaka reapo.

<sup>22</sup> Arirakano Soreane Kotimo metakarikia, Tefete unihaeaka asekeea rekeasimo maresapo. Tefeteane Kotimo someraka, 'Yésemo maeya Tefeteane nómo seseripo. Epo nómo hemakapusua susuane hákasa hemakapukua rakiakosapo,' aisapo.

<sup>23</sup> Arirakano Tefetemo aporo ira wainepe pesa a Yasu takapesapo. Yasumo Isiraya aporo mafasiasimo eane Kotimo maresapo. Fana Kotimo someaka mareraka ayiakakosapo aisane kakaro faserepesa ayareapo.

<sup>24</sup> Arirakano Yasumo some kaka koraka rekeasiraka Isiraya aporoaki Yonemo some karaka, 'Repo himu watikisané rukupateraka metakirakano, nómo re hea tapukumuriakosapo,' aisapo.

<sup>25</sup> Arirakano Yonemo makata rakisiane fahoko makeanamo Yonemo ipi someraka, 'Repo hemakapusuane ano epare? Aporo kára unihae peakosaporakano repo aseako risiane

\* <sup>13:14:</sup> Taone teta yano motosane Anitioke taonepo. Meta, Pisitia hauaka á kisiapo. Meta, Siria hauaka á kisiapo.

anofapo. E kesekeea peakosapo. E ipi aporo kárasasamo epo tamakane nōmo fisihoane siahoasifareapo,' aíyaka Yonemo somesapo.

<sup>26</sup> Maeo, Eparahamemo aporo irao, repo kaisie. Yu aporohoanafonosamo Kotiaki hemakapura aporo repo soko kaisie. Isu ikia kara hasaka purapaka Yasumo mafasiako pesapo. Isu suane mafasiako e pesapo.

<sup>27</sup> Arirakano Yarusarame aporomo soko, namina aporo unihaemo soko, Mafasira Aporo pesane ipu asesa nine ipu hemakapusufapo. Hemakapunafonoraka fenena maiya suamo porofete aporomo Mafasira Aporo popasa ane ipu menoraka, menosa nine someamo kepoane ipu kára himetesapo. Arirakano fana porofete aporomo someraka, 'Mafasira Aporo pesane rukusakipoko aporo suamo aoraka seserakano e rukusapo.' Aiyaka ipu namina, 'Aporoane rusua kukunie,' aihokosapo. Arirakano porofete aporomo ayiakakosaposane faserepesa ayareapo.

<sup>28</sup> Yasu ipi koteaka reasasamo ipi kukusimo hukurukusane ikia kara kakanafonosa nine ipu Paireateki someraka, 'Yasu rusua kukunie,' aisapo.

<sup>29</sup> Arirakano wate fana Yasuane ayiakakosapo aíyaka popasane, hakása yine fasereperaka, Yasu ira paremarekeka, rusua kurakano, fatarimaka maka pukua, kunikia motosapo.

<sup>30</sup> Yasu kusua kunikia motosane Kotimo maturikia taesapo.

<sup>31</sup> Maturikia taerakano, turikia pukua yape yakaimo eane aporo metakiramo asesapo. Yasu kukusiraka rea maiya amo aporo metakira Kariri hauaka anaka Yasuyaki hakása Yarusarame sitia pesa aporoamo Yasu kukua turikia purakano ipu eane asesapo. Ipu Yasu asesa aporoamo Yu aporoaki yumo some karakanapo.

<sup>32</sup> Arirakano ape wo etapo o some kotesa somehoko perakayiapo. Someane oyapo. Fana isiapo makasa kaua kekemaki Kotimo someaka mareraka, 'Keseke nōmo ayiáka rakiakosapo.'

<sup>33</sup> Aisane yumo makasa kaua kekemamo hokosa wainepe pesa ane isupoko Kotimo someaka maresane pipu faserepesa ayareapo. Ayiáka isu risia maiya omo Yasu kusuae Kotimo maturikia taesapo. Kotimo sawia Same sawia napa tu (2) popasane oyapo. Kotimo someraka, 'Né nōmo hokosapo. Pipu nōmo ní Atane<sup>†</sup> anopo.' Aiyaka Kotimo somerakano popahoareapo. *(Buk Song 2:7)*

<sup>34</sup> Yasu kusua maturikia taesane efera hunia kukua kau toreraka siahoasifasekeno Kotimo someraka, 'Tefeteaki nōmo makoteraka ayiakakosaposane néaki kakakosapo. Nōmo some one kakaroripo,' aisapo. *(Aisaia 55:3)*

<sup>35</sup> Aisa kepoane Same sawia some meta Tefetemo popasane oyapo. Kotimo someraka, 'Nōmo aporo raipa kotesa susu rea aporoane kuraka kau torehokohoamo nōmo asekeea rekeakosapo.' Airakano Tefetemo kaikia popahoareapo. *(Buk Song 16:10)*

<sup>36</sup> Popasane Tefetemo e ipiane popasafapo. Kotimo hemakapusane Tefetemo himu hakásaraka hemakapukua rakiraka, e rea maiya amo aporo hinamo hakása risiaki some kasapo. Some kaka e hitafe rea maiya ane faraka e kusuapo. Kurakano e kusuane maka pukua, ipi makasa kaua kekema hauaka murisia a maresane ipi kau toresapo.

<sup>37</sup> Arirakano Kotimo maturikia taesa aporoane ipi kau toresafapo.

<sup>38</sup> Asiasamo, maeo. Repo himu watikisane Yasumo mafarakano asekeea etapo reaki somerakanapo. Somerakano repo hemakapunie.

<sup>39</sup> Aporomo Yasuaki himu hakásaraka reke, Yasumo someane kakimarakanano, aporoamo himu watikisane Kotimo mafanapo. Mafaraka watikisane metakarisimo makokorotaenapo. Arirakano Mosesemo somemanemo repo himu watikisane mafanafapo.

<sup>40-41</sup> Arirakano Kotimo somesane porofete aporomo kaikia someraka, 'Mainamareraka somera aporo re asekeanie. Re maiyiakakosare? Aiyaka hemakapukua nōmo rakirane repo hemakapunafonorakanone, ane re kukusapo. Re arisia maiya amo nōmo rakirakanapo. Arakiramo kepoane aporo metamo reaki somerakano yia repo kakimakosafapo.'

Aiyaka porofete aporomo popasa ayiáka repo ayiakakohoamo asekeanie." *(Habakuk 1:5)*

<sup>42</sup> Aiyaka someaka faraka Porepe Pánapse tetā Yu aporomo sarimana apeane metakarikia, takahikia purakano aporomo someraka, "Soko meta fenena maiya amo Kotimo someane some kakako peanie."

<sup>43</sup> Airakano tetā pusuapo. Purakano Yu aporo soko, Yu aporomo someman Yu aporohoanafonosamo kakimasa aporoane soko, tetāyaki hakása pusuapo. Puraka risike tetapō someraka, "Kotimo re yaku araresasamo yaiya hemakapukua risikianie. Kotiane metakariakopo," aisapo.

<sup>†</sup> **13:33:** Same sawia napa tu popasamo kepoane oyapo. Fana Koti Yasumo ata rea nine pipu ipi seséraka ipi rakirane rakisimo Yasuane maresapo.

<sup>44</sup> Soko meta fenena maiya amo, Anitioke taonea aporo hinamo suamo Kotimo someane kaiyako sarimasapo.

<sup>45</sup> Sarimarakano Yu aporomo aseane, aporo hinamo yakaimo tetapō some kaiyako sarimasekeno asekea namina himumo kakanakeraka sapesapo. Saperaka Poremo ásiapo aiyaka somerakano, ipu ásiafapo aiyaka Poreaki tafaraka, some parikaraka e mainamare-sapo.

<sup>46</sup> Arirakano Porepe Pánapase tetapō Kotimo someane mapiraraka paroaka someraka, "Kotimo someane re Yu aporoaki etapo fana some kasapo. Some kasane repo koarellaera hisiraka Kotiyaki yaiya risikiakosane hisirakano soko repo namina menapo. Asiasamo re metakarikia, Yu aporo hoanafonosaki Kotimo someane etapo some kakakosapo.

<sup>47</sup> Fana Kotimo someraka, "Yu aporo hoanafonosane Kotimo ikia kara pusimo nōmo mafae hokosapo. Aporo su hauaka sua risiane nōmo farimakasimo nōmo maresapo."

Aiyaka Kotimo somerakano etapo kakimaka Yu aporo hoanafonosaki some kakako pukusapo." (*Aisaia 49:6*)

<sup>48</sup> Aiyaka tetapō somerakano, Yu aporo hoanafonosamo kaikia seseraka, Unihae Kotimo someane kaisiasamo kekeresapo. Aporo Kotiyaki yaiya risikiásimo Kotimo murikimasapo. Murikimasa aporo hinamomo Yasu hemakapusimo tetapō some kasane ipu kakimasapo.

<sup>49</sup> Arirakano hauaka á Kotimo someane sape ro some kaka, sape aka some kaka, aiyáka hauaka sua pukua some kape pusuapo.

<sup>50</sup> Arirakano Kotiaki kekerena hinamo fanaraka toamo soko, aporo fanaraka risiamo soko, suamo Poreaki sapehoasimo Yu aporomo hokoreraka somesapo. Porepe Pánapase tetā mokoatikiraka someraka, "Teto isiapo hauaka wo risikiakopo. Metakarikia pusie."

<sup>51</sup> Airakano namina watikisane Kotimo hisirakano namina hemakapusimo, tetapō korakea kokotonomo pararisiane tarotaroraka rerakatapisiapo. Kokotonomo rerakat-apikia marekea, Anitioke taoneane metakarikia, hauaka meta pukua, Aikoniamē taonea pusuapo.

<sup>52</sup> Arirakano Anitioke taonea Yasuaki patera asesa aporo hinamo himua Ho Kotesa komarukua risikino kára seseaka risiapo.

## 14

*Aikoniamē taonea Porepe Pánapase tetā risiane oyapo.*

<sup>1</sup> Aikoniamē taonea Porepe Pánapase tetā Yu aporomo sarimana apea yorokoa tetapō some kasapo. Tetapō Yasuane some karakano aporo yakaimo someane kakimasapo. Kakimasa aporoane metakira Yu aporomo soko, metakira Yu aporo hoanafonosamo soko, kakimasapo.

<sup>2</sup> Arirakano Yu aporo metakiramo tetapō someane kakipayasapo. Asiamo Keresoa paosa aporoaki Yu aporo hoanafonosamo sapehoasimo, Yasumo someane kakipayasa aporoamo hokoreraka somesapo.

<sup>3</sup> Arirakano Aikoniamē taonea, Pánapasepe Pore tetā maiya kára waka risike, Unihae Yasuane wakapuaka some kasapo. Tetapō mapiraraka someraka, "Yasumo isu yaku ararenapo." Aiyaka someane kakaroripo aihoasimo, Kotimo tetā ararerakano, tetapō Kotimo wakapumo hemakapukua rakirane rakisiapo. Rakirakano aporo suamo aseraka fosafapo.

<sup>4</sup> Fofaraka Aikoniamē taonea aporo risiamo kekepo kekepoaka hemakapusuapo. I parakuraka, metakiramo Yu aporoaki<sup>\*</sup> patera aseako hemakapusuapo. Arirakano metakiramo tarira aporoaki patera aseako hemakapusuapo.

<sup>5</sup> Arirakano Yu aporo hoanafonosamo soko, Yu aporomo soko, ipu aporo fanaraka risiamo soko, Porepe Pánapase tetāne waseremaka, ekemo

<sup>6</sup> kareakosaporakano tetapō kaikia, Rikonia hauaka teketarikia pusuapo. Teketarikia pukua Rikonia hauaka risike, Risitara taonea soko, Tepe taonea soko, hauaka make tameyia soko, koraka risike

<sup>7</sup> aporo hinamomo Yasuane hemakapusimo some kotesane some kasapo.

*Risitara taonea Porepe Pánapase tetā risiane oyapo.*

<sup>8</sup> Risitara taonea aporo korake watikisa kake, aporoane ipi kałyiamo takapesa maiya amo, korake watikisamaso fininafapo.

---

\* <sup>14:4:</sup> Yu aporo amo Yasumo someane kakipayasa aporopo.

<sup>9</sup> Poremo some karakano, aporo korake watikisamo kaisiapo. Kairakano Poremo aporoane koteaka asekea hemakapuraka, "Aporoamo korake watikisane Kotimo mafahosimo himu hakásaraka hemakapukua are."

<sup>10</sup> Aíyaka hemakapuraka Poremo eaki sakepamo someraka, "Ne takahisie." Airakano aporoane wate foaka takahisiapo. Takahikia epo korakemo koteaka finisapo.

<sup>11</sup> Finirakano aporo suamo aseraka namina Rikionia meaka someraka, "Kotiane yapeaka aporomano parika isu arisia wo peareapo."

<sup>12</sup> Aíyaka Pánapaseaki ipu kotafe koti meta yano motosa Siusi<sup>†</sup> yano yakosapo. Pore fanaraka some karaka reasamo, eane Hémisi yano motosapo.

<sup>13</sup> Arirakano Aikoniamē taonea ruru tapikia, fe takua Siusipoko ape kisia á, Siusimo pirititi aporo reapo. Pirisiti aporoamo soko, aporo yakai sarimasamo soko, saro ponomaikau ape ruru ikia koroa karikia pekea, ira farafara soko mokoa pekea, Porepe Pánapase tetáki yaku kakosakipoko karikia pesapo. Karikia peraka ipu someraka, "Saro ponomaikau one rukua kakakosapo," aisapo.

<sup>14</sup> Aisapakan Pánapasepe Pore tetapō kaikia, aporoamo hasaka hemakapurakanō asekea, tetapō mahisiraka pasu ososane horomokoa mokokoaraka<sup>‡</sup>, aporo yakai sari-maraka risiakipoko foaka pukua sakepamo wáraka,

<sup>15</sup> "Aporo reo. Repo mainakanare? Eto soko aporo reapo. Eto soko re soko isina kau hakásia yiyapo. Repo nenakamaka makata makárasane metakarikia, kakaro Kotiaki risikiako parihoasimo, epo some kotesane etapo some kakako perakayiapo. Arirakano ti soko, ti yapura makata arisiane soko, hauaka soko, hauaka wo makata arisiane soko, he tawara soko, he tawara makata arisiane soko, makata suane Kotimo ipi rakisiapo. Koti Kakaro Yaiya Rera amo rakisiapo.

<sup>16</sup> Fana aporo su hauaka sua risiamo ipu hemakapusuane rakirakano, Kotimo i mata-sosafapo.

<sup>17</sup> Ayiáka epo ipi makata ainane aporo suamo asekea hemakapusimo tariraka, epo re makoteraka, yao peasimo rakikia marekeea, makata nakosa koteaka taneheasimo rakikia marekeea, reaki makata nakosa soko kaka, seséna soko kasapo."

<sup>18</sup> Airakano aporo suamo Porepe Pánapase tetapō saro ponomaikau ruko kára sesésapo.<sup>§</sup> Sesésane tetapō kakaro waerakano yia, aporo suamo kára seséraka saro ponomaikau rusuahopo.

<sup>19</sup> Arirakano Yu aporo Pisitia hauaka Anitioke taonea aeyaka pesa aporoamo soko arirakano Aikoniamē taone aeyaka pesa aporoamo soko, i sarimaraka, Risitara aporomo Porepe Pánapase tetáki sapehoasimo kirimasapo. Kirimaraka some karakano, Risitara aporoamo i patera asekea, Poreane ekemo karesapo. Kareke motokoa Pore kusuarohoamо yaoa kikirimaka pusuapo.

<sup>20</sup> Arirakano Pore wareakipoko Yasu Keresoa paosa aporo su sarimasapo. Sarimarakanō Pore turikia pukua takahikia, Risitara taonea paripusuapo. Paripukua waka mituru flarakan Pánapaseyaki Tepe taonea pusuapo.

*Yasuaki patera asesa aporo hinamoane tetapō araresane oyapo.*

<sup>21</sup> Tepe taonea risike Porepe Pánapase tetapō Kotimo some kotesane some karakano, aporo yakaimo kakimasapo. Kakimarakano Tepe taone metakarikia Anitioke taonea poparipuraka, Risitara taoneane marokeraka Aikoniamē taoneane soko marokeraka, Anitioke taonea poparipusuapo.

<sup>22</sup> Poparipuraka, Yasuaki patera asesa aporo ararehoko someraka, "Kotiaki himu hakásaraka paroaka hemakapukua risikianie. Kotiane metakariakopo. Koti unihaeaka rea pauhokosakipoko arisia maiya amo makata umisa kekepo kára faserepepehokosapo. Faserepeperakano Kotiaki himu hakásaraka paroaka hemakapukua risikianie," aíyaka tetapō somesapo.

<sup>23</sup> Yasu Keresoa paosa aporo hinamoane asekea risikiasimo, tetapō aporo metakira murikimosapo. Murikimosa aporoane Yasu Keresoa paosa aporo hinamo asekea risiki-akosa aporoane ayapo, aíyaka murikimosapo. Fana Kotiaki himu hakásaraka risikino asekea aporoane murikimosapo. Murikimokoa makata nakosa sokoairaka iane Kotimo ararehoasimo kurikurisapo.

*Siria hauaka Anitioke taonea tetá poparipusuane oyapo.*

<sup>†</sup> **14:12:** Kiriki aporomo kotafe koti yatafu asiame makárasaka kekeresapo. Meta, yano motosa Siusi, arirakano meta, yano motosa Hémisipo. <sup>‡</sup> **14:14:** Ipu Yu aporomo ainane oyapo. Aporo metamo kakaro Kotiane mawakasemarakano Yu aporomo namina pasu ososane horomokoa mokokoanapo. <sup>§</sup> **14:18:** Risitara aporomo ipu kotafe koti yatafu asiaki masesehokosakipoko Porepe Pánapase tetapō saro ponomaikau ruko hemakapusuapo. Asiame Poremo waeraka, ipu aíyaka rakiane namo kakaro Kotiane mawakasemahoasireapo, aíyaka hemakapuraka epo waesapo.

<sup>24</sup> Keseke Porepe Pánapase tetā Pisitia hauaka koraka risina Pamefíria hauaka á pesapo.

<sup>25</sup> Pekea Paka taonea some kotesane some kaka faraka Ataria taonea pusuapo.

<sup>26</sup> Ataria apea kasu sipia ripaka, Anitioke taonea poparipusuapo. Fana Anitioke taonea tetapō Kotimo rakirane rakisimo murikimasapo. Murikimarakano some kape pukua Anitioke taonea yia poparipesapo.

<sup>27</sup> Popariperaka, Yasu Keresoa paosa aporoaki sarimahoko peaerakano, i pekea sarimasapo. Sarimarakano tetapō someraka, "Kotimo eto araresapo. Yu aporohoanafonosamo Yasuaki himu hakásaraka hemakapusimo, Kotimo ikiā koro ropakataena ayiáka, i himuane ropakataeraka maereketaesapo." Aiyaka Kotimo tetā ararerakano tetapō makata su rakisiane tetapō some kasapo.

<sup>28</sup> Maiya káramo tetā Anitioke taonea Yasuaki patera asesa aporoyaki hakāsa risiapo.

## 15

*Yarusarame sitia aporo yakai sarimasane oyapo.*

<sup>1</sup> Yutía hauaka aeyaka Yu aporo metakira pekea, Anitioke taonea pauraka risike, Yu aporohoanafonosa Keresoa paosa aporoaki ipu someraka, "Repo Mosesemo some maneane kakimakanie. Some maneane kakimaka kau hahaeraka patehoanie. Kau hahaeraka patehoanafonorakano Kotimo re mafasiakosafapo."

<sup>2</sup> Airakano some kasa aporoaki Porepe Pánapase tetapō kára tafatafasapo. Tafatafarakanano Anitioke aporomo someraka, "Kau hahaeraka patena kepoane mawaroako Pore né soko, Pánapase né soko, Anitioke aporo metakira soko, re su Yarusarame sitia hisie. Yarusarame sitia tarira aporoaki soko, Keresoa paosa aporo asekeea risia aporoaki soko kaiyako hisie." Aiyaka Anitioke taonea Keresoa paosa aporo risiamo iane hisiesapo.

<sup>3</sup> Hisierakano i namina Yarusarame sitia hiakosakipókó Finísia hauakane soko, Sameria hauakane soko, marokeraka pukua, aporoaki ipu someraka, "Yu aporohoanafonosamo namina makata watikiaka rakisiane metakarikia, yumo Kotiaki risikiako parisapo." Aisane ipu kaikia kára sesesapo.

<sup>4</sup> Arirakano i pesane hikia Yarusarame sitia pausapo. Pauraka Yarusarame sitia Keresoa paosa aporomo tereraka i karikia seserakano, tarira aporomo soko, iane tereraka karikia sesesapo. Arirakano Keresoa paosa aporo asekeea risia aporoamo soko, iaki seseraka tererakano asekeea Porepe Pánapase tetapō iaki makata somesapo. Kotimo some kape pusua maiya amo, Kotiane tetayaki rekeno tetapō makata su rakisiane iaki somesapo.

<sup>5</sup> Arirakano kakimara aporo metakira Ferese aporo risiane takahikia someraka, "Kotiaki hemakupura Yu aporohoanafonosane kau hahaeraka paterasie, aihoanie. Mosesemo some mane motosane kakimaka rakisie aihoanie."

<sup>6</sup> Airakano someane mawaroako tarira aporomo soko, Keresoa paosa aporo hinamoane asekeea risia aporoamo soko, sarimarakano.

<sup>7</sup> kára me rukua risina Pita takahikia someraka, "Maeo, wate fana Yu aporohoanafonosamo Yasuane hemakapusimo some kotesane some kakasimo Kotimo isu isina yia ano murikimasapo. Some ane ipu kaikia kakimakasimo somehoko pusie, aiyaka Kotimo ano murikimasapo.

<sup>8</sup> Arirakano aporo hinamo su himua Kotimo aserapo. Yu aporohoanafonosane Yasu Keresoa paorakano i himuane soko Kotimo aseraka, 'Siareapo,' aiyaka i himua Ho Kotesa murisiaipo. Isu Yu aporoane Ho Kotesa murisia ayiáka, i Yu aporohoanafonosane soko Ho Kotesa murisiaipo.

<sup>9</sup> Isuaki soko, iaki soko, Kotimo kekepo hemakapusuafapo. Yu aporohoanafonosamo Yasuaki himu hakásaraka hemakapusuasamo, Kotimo i himu watikisane mafasapo.

<sup>10</sup> Mafasasamo marirakano repo Koti kau aseako rakirakanare? Marirakano Yu aporohoanafonosa Keresoa paoraka risiaki Mosesemo some mane motosane rakinie, airakanare? Makata fato umisa maka punafonona ayiáka Mosesemo some maneane isiapo makasa kaua kekemamo rakifareapo. Isiapo soko rakiasifareapo.

<sup>11</sup> Kaisie. Isiapo hemakapurane oyapo. Unihae Yasumo isu yaku arareraka mafasirapo. Isu Yu aporoane mafasira ayiáka, i Yu aporohoanafonosane soko, ayiáka mafasirapo." Aiyaka Pitamo somesapo.

<sup>12</sup> Aiyaka somehoro yiamo aporo suamo kairaka me kausapo. Me kauraka risikino Pánapasepe Pore tetapō someraka, "Yu aporohoanafonosamo Kotiaki hemakapusimo, Kotiane etoyaki rekeno, Kotimo wakapumo hemakupua rakirane rakisapo." Aiyaka tetapō makata su rakisiane somesapo.

<sup>13</sup> Someaka farakano Yamesemo<sup>\*</sup> someraka, "Maeo, repo kaisie.

\* <sup>15:13:</sup> Yameseano ipi Yasumo mamanea ayapo. Yarusarame sitia Keresoa paosa aporo hinamoane Yameseo amo asekeea reapo.

<sup>14</sup> Saemonemo isuaki someraka, "Yu aporohoanafonoso Koti patera asekeea, Koti ipiane hemakapusimo i metakirane murikimosapo." Aiyaka Saemonemo isuaki some akare.

<sup>15</sup> Arirakano porofete aporomo fana somesane soko, Saemonemo yumo someraka ane soko, hakása yiyyareapo. Porofete aporomo somesane oyapo.

<sup>16</sup> 'Unihae someraka, "Keseke ano paripeakosapo. Paripekeea Tefetemo ape rakari-pusuan efera hunia nōmo kiakosapo. Kirakano yaiya rekeakosapo.

<sup>17</sup> Ape kawe kisiane aporo suamo soko, Yu aporohoanafonosa nōmo murikimosa aporoamo soko, suamo ano hemakapuraka, ano aseako sesehokosapo. Keseke ayi-akakosane nōmo wate fana maresapo."

<sup>18</sup> Aiyaka wate fana Unihae Kotimo somerakano porofete aporomo kaikia, sawia poparaka motoreapo.' *(Amos 9:11-12)*

<sup>19</sup> Aisasamo nōmo hemakapusuane oyapo. Yu aporohoanafonosane Kotiaki risikiako parirakano, iaki makata umisa mareane siahoasifareapo.

<sup>20</sup> Asiāne isiapo iaki some wakaseme meta úyaka popahokosapo. 'Kotafe koti aporomo hokonomo rakisia makata aki ipu someraka, "Isiapo unihae kárane oyapo." Airakano kotafe koti ipu hokonomo makata rakisiaki makata kakayia kasane nakopo. Arirakano meta, hinamo hakimakopo. Arirakano meta, makata kakayia mawia kita humaresa kusuane nakopo. Arirakano meta, makata yapi nakopo.' Aiyaka popahokosapo.

<sup>21</sup> Arirakano fenena maiya suamo Yu aporomo sarimana apea Mosesemo somemaneane aporomo kaiyisimo menonapo. Wate fana soko yumo soko maiya suamo somemaneane ape sua menoraka some karápo.' Aiyaka Yamesemo somesapo.

*Yu aporohoanafonosa Keresoa paosa aporoaki Yamesemo sawi poparaka makesane oyapo.*

<sup>22</sup> Yamesemo someaka farakano tarira aporomo soko, Keresoa paosa aporo asekeea risia aporoamo soko, Keresoa paosa aporo hinamomo soko, ipu suamo someraka, "Pore Pánapase tetapō Anitiroke aporoaki somehoko pusiehokosapo. Arirakano Keresoa paosa aporo metakira soko tetáyaki pusimo murikimaka pusiehokosapo." Aiyaka someaka maka Yutase ipi yano motosa meta Pásapasepe Saerase tetā murikimasapo. Keresoa paosa aporo maeane kotesaporakano asekeea tetāne murikimasapo. Murikimasa aporoamo sawi maka pusimo sawiane úyaka popasapo.

<sup>23</sup> "Re Yu aporohoanafonosa Anitiroke taonea risiaki soko, Siria hauaka risiaki soko, Sirisia hauaka risiaki soko, re suaki sawi one poparaka makerakanapo. Isu Keresoa paosa aporo asekeea risiamo soko, tarira aporomo soko, isiapo Keresoa paosa aporo maeane repo. Isiapo reaki sawi poparaka makerakanapo.

<sup>24</sup> Aporo metakiraki isiapo some kakako pusie, aihoanafonosa nine, isu oyaka aporo metakira pukua, re risiakipoko some karakano, repo mahisisapakae.

<sup>25</sup> Mahisisane isiapo kairaka, isu su sarimarako, aporo metakira murikimaka, aporoane Pánapasepe Pore tetáyaki repo apea somehoko pusierakanapo. Tetāne isiapo kára hemakapurakanapo.

<sup>26</sup> Tetapō isiapo Unihae Yasu Keresopoko rakiraka kusuahopo.

<sup>27</sup> Asiamo aporo tetā murikimasane yano taesane oyapo. Meta Yutase, meta Saerase tetā murikimasapo. Isiapo sawi popasane soko, tetapō hakása yineraka somehoasimo pusierakanapo.

<sup>28</sup> Ho Kotesamo hemakapusuane isiapo soko hakása yineraka hemakapurakanapo. Ho Kotesamo soko, isiapo soko, repo kakimakasimo makata umisa marerakanafapo. Asiane isiapo some metakira reaki someaka marerakano repo kakimaka rakinie. Repo kakimaka rakiakosane oyapo.

<sup>29</sup> Kotafe koti, aporomanomo hokonomo rakisiaki someraka, 'Isiapo unihae kárane oyapo.' Aiyaka someraka kotafe kotiaki makata kakayia kasane repo nakopo. Arirakano meta, makata yapi nakopo. Arirakano meta, makata kakayia mawia kita humaresa kusuane nakopo. Arirakano meta, hinamo hakimakopo. Asiamo makata watikisane repo rakianafonorakanone, ane kotehokosapo. Asiamo isiapo some yiyyapo. Re ayapa.' Aiyaka sawia popasapo.

<sup>30</sup> Poparaka faraka aporo murikimasaki kaka pusierakanano, i pukua Anitiroke taonea pauraka, Keresoa paosa aporoaki sarimarasie, aisapo. Aporoane sarimarakano, sawi popasane iaki kasapo.

<sup>31</sup> Karakano, sawiane ipu menoraka, aporo suamo kaikia sesesapo.

<sup>32</sup> Arirakano Yutasepe Saerase tetāne porofete aporopo. Tetā maiya káramo Keresoa paosa aporo maeyaki risike, namina Yasupoko mapiraraka himu paroaka risikiasimo, some kotesane some kasapo.

<sup>33</sup> Some karáka risina, tetáki Keresoa paosa aporo mae sarimaraka risiamo tetáki ayapasapo. Ayaparaka Yarusarame sitia tetá hisiesa aporo risiakipoko a poparihiasimo ayapasapo.

<sup>34</sup> [Asiane Saeraseane Anitiroke taonea yia parisapo.]

<sup>35</sup> Arirakano Anitiroke taonea Porepe Pánapase tetá á risike tetapō soko, aporo metaki-ramo soko, ipu Unihae Kotimo someane aporo suamo enomakasimo some kasapo.

*Porepe Pánapase tetá ikia kara kekepo pusuane oyapo.*

<sup>36</sup> Maiya wakasema faraka Poremo Pánapaseki someraka, "Fana Unihae Kotimo someane some karakasu taone yia efera hunia eto poparipuko nōmo hemakapurakaripo. Keresoa paosa aporo maeeen mayiáka risikirihao aseako poparipurakapo."

<sup>37</sup> Airakano Pánapasemo someraka, "Yone Maka soko karikia pukusapo."

<sup>38</sup> Airakano Poremo someraka, "Wae, e karikia pukusafapo. Fana Pamefirie hauaka epo eto metakarisiapo. Kotimo someane some kakako kimisi pusuane, epo rakikia masafapo." Aíyaka Poremo somerakano,

<sup>39</sup> tati kára tafatafasapo. Tati tafatafaraka marekea, meta ikia kara takua pukua, meta ikia kara takua pukua asiapo. Pánapasemo Maka karikia, kasu sipia ripaka Saéparase he tonoa pusuapo.

<sup>40</sup> Arirakano Poremo Saerase pasimarako, tetáne Kotimo ararehoasimo Keresoa paosa aporo maemo kurikurirakano tetá pukua,

<sup>41</sup> Siria hauaka a soko, Sirisia hauaka a soko, pusuapo. Hauaka á Yasu Keresoa paosa aporo hinamomo Kotiaki kára hemakapusimo some kotesane some kasapo.

## 16

*Porepe Saerase tetayaki Timoti pusuane oyapo.*

<sup>1</sup> Tepe taonea soko, Risitara taonea soko Pore pesapo. Perakano Risitara taonea Yasuaki patera asesa aporo hakása meta yano motosa Timoti reapo. Ipi kaiyia Yu hinamopo. Hinamoamo Yasuaki himu hakásaraka hemakapukua kayapo. Arirakano ipi wafaya Kiriki aporo.

<sup>2</sup> Risitara taonea soko, Aikoniamē taonea soko, Keresoa paosa aporo mae risiamo someraka, "Timotiane aporo kotesapo."

<sup>3</sup> Airakano Poremo someraka, "Timotiane anoyaki hakása peanie," aisapo. Aíyaka Timotiane Poreyaki hakása perakano, Poremo Timotiane kau hahaeraka patesapo. Yu aporomo kaiyiáne Timotimo wafayane Kiriki aporoporakano ipu kaisiapo. Kaisiasamo ipu mahisihokohoamo Poremo Timotiane kau hahaeraka patesapo.\*

<sup>4</sup> Arirakano i taone meta soko, taone meta soko, aiyáka some kape pusuapo. Aiyáka some kape puraka, tarira aporomo soko, Keresoa paosa aporo asekeea risia aporo amo soko, ipu Yarusarame sitia somemane motosane kakimara aporomo kakimakasimo some kape pusuapo. Some kape puraka ipu someraka, "Yarusarame sitia somemane motosane kakimakanie."

<sup>5</sup> Aíyaka some karakano, Keresoa paosa aporo hinamomo Yasuaki himu hakásaraka hemakapusuané káraraka hemakapusuapo. Maiya suamo aporo hinamomo Yasuaki risiki-ako parirakano, Keresoa paosa aporo hinamo fana risia akiyaki paoraka namo kakaro kárarasapo.

*Toróase taonea Poremo kitusane oyapo.*

<sup>6</sup> Pore soko aporo metakira soko Firisia hauaka pukua, Karesia hauaka hisiapo. Hinakano Ho Kotesamo someraka, "Esea hauaka makata somehoko pukopo."

<sup>7</sup> Airakano i pukua Misia hauaka faria paauraka risike, ipu hemakapuraka, "Isu Pitinia hauaka purakapo." Aíyaka hemakapusuané Yasumo Homo waerakano

<sup>8</sup> ipu Misia hauakane metakarikia pukua Toróase taonea pesapo.

<sup>9</sup> Peraka, ereamo Poremo kituamo aseane, Masetónia aporo reke wáraka someraka, "Masetónia hauaka isu ararehoko peanie," airakano Poremo kaisiapo.

<sup>10</sup> Kituaka farakano isiapo<sup>†</sup> hemakapuraka, "Masetónia aporoaki Kotimo some kotesane some kakako pusie, aíyaka Kotimo kituamo tarireapo." Aíyaka hemakapuraka Masetónia hauaka puko isiapo makata sarikesapo.

*Hinamo hakása yano motosa Ritia Yasuaki kakako parisane oyapo.*

\* **16:3:** Yu aporomo Yu aporo hoanafonosa akiyaki sarimanafapo. Timotimo some karakano, Yu aporomo kakipaya-hokohoamo Poremo Timoti kau hahaeraka patesapo. Kau hahaeraka patesasamo Timoti ipi Yu aporo parisapo.

† **16:10:** Ruki soko iyaki hakása pusuapo.

<sup>11</sup> Isu Toróase taone metakarikia, kasu sipia ripaka, isu ereketae pukua, Samoterese he tonoa pukua, mituru Niaporisi apea pausapo.

<sup>12</sup> Niaporisi apea pauraka, anaka hauaka ikia pukua Firipai taonea pausapo. Masetónia hauaka ape fanane Firipai taone ayapo. Firipai taoneane Rome kamanimo asekea reapo. Arirakano sere yakaimo Firipai taonea isu risike,

<sup>13</sup> fenena maiya amo ape metakarikia ape make tameyia he fea isu pusuapo. Asiamo isiaipo hemakapuraka, "Aporo metakiramo kurikurihoko he fea perapo." Aiyaka hemakapuraka puraka aseane, hinamo metakira sarimara tokeno á iaki isiaipo some kasapo.

<sup>14</sup> Some karakano, hinamo meta yano motosa Ritiamo kaisiapo. Ipi Taiataíra taone hinamopo. Ipi makata rakirane pasu susa rakikia roponapo. Ipi Kotiaki kekerenapo. Arirakano Poremo some kasane Ritiamo kakimakasimo, Unihae Kotimo Ritia ararerakano, Ritiamo koteaka kakimasapo.

<sup>15</sup> Kakimarakano Ritia hea tapukumaresapo. Hea tapukumarerakano metakira Ritiyaki ape hakása toane soko, hea tapukumurisapiro. Hea tapukumurirakano Ritiamo someraka, "Repo hemakapuraka, 'Ritia ipi kakaro Keresoa paosa hinamopo. Unihae Kotiaki himu hakásaraka kakenapo.' Aiyaka hemakapuraka, nōmo apea peanie." Airakano ipi apea isu pusuapo.

*Firipai taonea Pore tipura makesane oyapo.*

<sup>16</sup> Arirakano aporo metakiramo kurikurihoko sarimana hauaka a isu puraka, hinamo meta perakano isuyaki sapenesapo. Hinamoane wafesa kake, keseke makata ayiakakosane epo aseraka somesapo. Aseraka somehoasimo, aporomo aporo metakiraki mone kára kasapo. Mone kasane hinamoaki kasafapo. Aporo metakiramo hinamoane roposa wafaya iaki mone kasapo. Aporomo e roposa wafaya akipoko hinamoamo makata rakirapo.

<sup>17</sup> Arirakano hinamoamo Pore soko, isu soko, kekemaraka wáraka, "Aporoane Kotíkáramo makata rakira aporopo. Aporo re su Kotimo mafasiakosane ipu some kakakosapo."

<sup>18</sup> Aiyaka sere yakaimo hinamoamo wáraka kekemasapo. Wáraka kekemarakano, Poremo himu mahisiraka saperaka pariaseraka wafeaki someraka, "Yasu Keresomo yano motosane yano hokoa, wafe né hinamoane metakarikia pusie," airakano wafeane wate foaka metakarikia pusuapo.

<sup>19</sup> Purakano hinamoane faraka koteaka kayapo. Kakeno ipi roposa wafayamo aseraka hemakapuraka, "Wafe pusuakipoko mayiáka isiaipo makata ropo mokoakosare?" Aiyaka hemakapuraka ipu Porepe Saerase tetá waseremokoa, kamani aporo risia hauaka moroa aporo sarimasa á, karikia pusuapo.

<sup>20</sup> Karikia pukua, Rome kamani maropona aporo risia a pauraka, hukururaka someraka, "Aporoane Yu aporopo. Isiapo ape wo auanane ipu mokoatikirakanapo.

<sup>21</sup> Ipu isuaki, 'Makata uyáka rakinie,' aiyaka somerakano, isiaipo Rome aporomo ipu ainane kakimayane siahoasifareapo."

<sup>22</sup> Airakano aporo suamo hinamo roposa wafayane patera asekea, tetáne hukururakano, maropona aporomo Porepe Saerase tetá pasu ososane horomokoa someraka, "Ira faimo rusie."

<sup>23</sup> Aiyaka aporomo sakepamo rurakano maropona aporomo tetáne tipura kesapo. Tipura kekea, aporo tipura asekea reaki ipu someraka, "Tetáne tonopukohoamo ikia koro suane róko motokoa asekea risikianie."

<sup>24</sup> Airakano aporo tipura asekea reamo kairaka, tipura ape kakarua tetane kakaro kesapo. Kekea tetá purapaka tetakara iramo korakea tanemaka taposapo.

<sup>25</sup> Arirakano ere tipiamo, Porepe Saerase tetapó kurikuriraka Kotiaki kekereraka kesarakano, aporo metakira tipura kesamo kaikia toapo.

<sup>26</sup> Arirakano foakayia momani kára peraka, tipura ape ira porosa mahohosapo. Monamino ape mahohorakano, ikia koroane hemakapuruka ropakapusuapo. Aporo su tipura kesane korakea soko hokonoa soko senemo taposane hemakapuruka potakahehesapo.

<sup>27</sup> Arirakano aporo tipura asekea reamo turikia puraka aseane ikia koro ropakapusenko asesapo. Asekea ipi hemakapuraka, "Aporo tipura kesane tonopureapo," aiyaka hemakapuraka ipi yia kareako ferepe masapo.

<sup>28</sup> Ferepe marakano Poremo sakepamo wáraka, "Ní yia kareakopo. Isu su yia risikinapo."

<sup>29</sup> Airakano aporo tipura asekea reamo wáraka, "Nafa maka peae," aiyaka wárakan, nafa maka foaka pukua, Porepe Saerase tetá risia pukua, namoraka hamisisiraka kakuna porokoa kayapo.

<sup>30</sup> Kaina takahikia, Porepe Saerase tetá karikia tipura ape metakarikia wakasema pukua someraka, "Kotimo ano mafasiasimo nōmo yakapa rakiakosare?"

<sup>31</sup> Airakano tetapō someraka, "Unihae Yasuaki himu hakásaraka hemakapukua rekeanie. Himu hakásaraka rekeno, Kotimo né mafasiakosapo. Ní hinamo soko, ní hokosa soko, ní apea aporo metakira hakása risiane soko, su mafasiakosapo."

<sup>32</sup> Aiyaka eaki soko, ipi apea aporo metakira hakása risiaki soko, tetapō Unihae Yasumo someane some kasapo.

<sup>33</sup> Some karakano, ere hakása yiamo tetā matia rusuane, aporo tipura asekea reamo hokeraka kususapo. Aporo tipura asekea reane soko, ipi hinamo soko, ipi hokosa soko, i suane hea tapukumurirakano,

<sup>34</sup> ipu Kotiaki himu hakásaraka risike himumo sesesapo. Porepe Saerase tetā ipi apea karikia pukua tetákia makata nakosa kasapo.

<sup>35</sup> Arirakano mituru aporo terakaiyamosaki maropona aporomo someraka, "Né tipura apea pusie. Pukua aporo tetá tipura kesane tonotaerasie, aihoanie." Airakano aporo terakaiyamosa pukua, aporo tipura asekea reaki maropona aporoamo someaka maresane somesapo.

<sup>36</sup> Somerakano, Poreaki aporo tipura asekea reamo someraka, "Teto maropona aporomo tonotaerasie, airakasapo. Aisasamo teto metakarikia puane siahoasireapo. Teto auaraka pusie."

<sup>37</sup> Airakano Poremo someraka, "Etapo makata watikiaka rakisafapo. Rakianafonosa nine, repo etapo someane kairafaraka, eto wate foaka rurakasupo. Aporo suamo asekeasimo maropona aporomo eto rusierakasupo. Rukua eto tipura kerakasupo. Asiáne eto Rome aporopo. Repo Rome aporoaki ayiáka ayiakafunufareapo. Yumo eto tau tonotaerakanaporakae. Wae. Eto pukusafapo. Maropona aporomo ipu namina eto tonotaehoko peaniehoeanie."

<sup>38</sup> Airakano aporo terakaiyamosamo paripuraka, Poremo somesane maropona aporoaki some kasapo. Some karakano, maropona aporomo kaiyiáne, aporo tetá tipura kesane Rome aporoporakano kairaka, i namina namosapo.

<sup>39</sup> Ayiáka i tipura apea pukua pauraka, auaraka someraka, "Isiapo teto hasaka rukua tipura kesapo," aiyaka tetá karikia, tipura ape metakarikia pukua someraka, "Firipai taone one metakarikia pusie."

<sup>40</sup> Airakano tetá tipura apeane metakarikia, Ritiamo apea puraka, á Keresoa paosa aporo maeane aseraka someraka, "Kotiane hemakapuraka paroaka risikianie." Aiyaka Porepe Saerase tetapō Firipai taoneane metakarikia pusuapo.

## 17

### Tesaronaeka taonea Pore pusuane oyapo.

<sup>1</sup> Poreane aporo metakirayaki hakása puraka, Amifiporisi taoneane soko marokeraka pukua, Aporonia taoneane soko marokeraka pukua, Tesaronaeka taonea pausapo. Tesaronaeka taonea Yu aporomo sarimana ape kisia rekeno,

<sup>2</sup> á Pore pusuapo. Sarimana apea e pukuanasamu pusuapo. Pukua fenena maiya amo, Kotimo sawi menoraka Yu aporoaki some kasapo. Fenena maiya yape isiamon pukua some karaka,

<sup>3</sup> Kotimo some popasane some kepoane Poremo iaki someraka, "Wate fana Kotimo someraka, 'Aporomanoane Keresomo mafasiakosapo. Mafasikia ipi himu nekea kurrakano, nōmo maturikia taehokosapo.' Aiyaka Kotimo ayiakakosapo aisane yasiapo. Yasuane nōmo somerakane, ipi aporo unihaeaka rekeasimo makáraraka maresasamo, ipi Keresopo."

<sup>4</sup> Airakano Tesaronaeka aporo metakiramo some ane kakimaka, Porepe Saerase tetáyaki paosapo. Arirakano Kiriki aporo yakai Kotiaki kekerena aporomo soko some ane kakimaka, tetáyaki paosapo. Arirakano hinamo yakai fanaraka toamo soko some ane kakimaka paosapo.

<sup>5</sup> Paosasamo Yu aporo kakimakanafonosa aporoamo iaki kakanakesapo. Arirakano kakanakesa aporoamo Porepe Saerase tetáne mokoatikihoko hemakapusuapo. Asiamo aporo metakira kau hisiraka risike, watikiaka risia aporoane ipu weasimo kirimaspao. Kirimarakaa aporoane su karikia sarimarakaa, aporo suamo saperaka weasimo karikia taripe pukua, Porepe Saerase tetá waseremokoakosakipoko Yásonemo apea kope pesapo.

<sup>6</sup> Peraka aseane, Porepe Saerase tetá faseneko asekea, ipu Yásone soko, Keresoa paosa aporo mae metakira soko, i waseremosapo. Waseremokoa, kamani aporomo apea karikia pukua sakepamo someraka, "Hauaka sua aporo watikiaka risikiasimo Porepe Saerase tetapō hasaka some karakasupakae. Kawe yumo soko, ape wo, yaiya hasaka somehoko perakasupo.

<sup>7</sup> Perakano, Yásonemo tetáne karikia pukua, ipi apea waka risiapo. Yásone soko, Pore soko, Saerase soko, Keresoa paosa aporo suamo soko, kamani unihae Sisamo someraneane ipu koaretaeraka someraka, ‘Isiapo isina unihae kakaro kárane meta rekenapo. Ipi yano motosane Yasupo, airakasupo.’”

<sup>8</sup> Airakano ape aporo suamo soko, kamani aporomo soko, kairaka mokome takahikia sapesapo.

<sup>9</sup> Arirakano Yásoneaki soko, Keresoa paosa aporo iaki soko, kamani aporomo someraka, “Mone kakanie. Mone karakanone, re metakariakosapo.” Aiyaka mone karakano, iane metakarisiapo.

*Perea taonea Porepe Saerase tetapō rakisiane oyapo.*

<sup>10</sup> Ereamo Porepe Saerase tetáki Keresoa paosa aporo suamo someraka, “Teto Perea taonea foaka pusie.” Airakano tetá pukua, Perea taonea pauraka, Yu aporomo sarimana apea pusuapo.

<sup>11</sup> Sarimana apea yorokoa, Kotimo someane some kasapo. Arirakano Perea aporoane Tesaronaeka aporo risira aiyáka í risiafapo. Perea aporoamo Poremo someane seseaka kaisiapo. Kaikia sere suamo Poremo someane kakaro somerakarihoamo, ipu Kotimo sawia kokoa menosapo. Menoraka Kotimo sawia popasane soko, Poremo some kasane soko, hakása yiýare, aiyáka hemakapukua, Kotimo sawia kokoa menosapo.

<sup>12</sup> Arirakano aporo yakaimo Poremo someane kakimasapo. Metakira Kiriki hinamo fanaraka toamo soko, metakira Kiriki aporo yakaimo soko, some ane kakimasapo.

<sup>13</sup> Arirakano Yu aporo Tesaronaeka taonea risiamo kaiyáne Perea taonea, Poremo Kotimo someane some kasaporakano kaisiapo. Kaikia i Perea taonea peraka Perea aporo suamo Poreaki sapehoasimo, ipu Perea aporoaki kirimarakaraka Poreane hokoresapo.

<sup>14</sup> Hokorerakano Keresoa paosa aporo metakiramo Poreaki someraka, “Né, yumo he tawara fea pusie.” Airakano aporo metakira Pore karikia pusuakipoko, Saerasepe Timoti tetá Perea taonea parisapo.

<sup>15</sup> Parirakano aporo metakira Poreyaki Atenese taonea pusuapo. Pore Atenese taonea reke, aporo metakira karikia pesaki epo someraka, “Re Perea taonea poparipuraka, Saerasepe Timoti tetá Perea taone metakarikia, anoyaki hakása risikiakosakipoko, wate foaka Atenese taone wo pusiehoanie.” Airakano aporomo Pore karikia pesane Perea taonea poparipuraka, Saerasepe Timoti tetáki Poremo someaka maresane somesapo.

*Atenese taonea Pore reane oyapo.*

<sup>16</sup> Atenese taonea Saerasepe Timoti tetá peasimo Pore kau kayapo. Kau kake aseane, aporomo kotafe kotiane hokonomo rakisia makatane mukisekeno asesapo. Aporoamo namina hokonomo rakisia makataki kekerenapo. Arirakano Poremo asekea, ipi himu nekea kára mahisisapo.

<sup>17</sup> Asiamo Yu aporomo sarimana apea Pore pukua, Yu aporomo soko, Kiriki aporomo soko, ipu kakaro Kotiaki kekerena aporoaki Poremo Yasuane some kasapo. Arirakano maiya suamo hauaka moroa e peraka aseane, aporo meraruamo perakano aporo iaki soko Yasuane some kasapo.

<sup>18</sup> Arirakano Epikúriane\* paosa tisa aporoane soko, Sitoíkia paosa tisa aporoane soko, ipu Poremo some karakano kaikia someraka, “Epo some koaka marekea somerakae.” Airakano Yasu kusua maturikia taesane Poremo somesasamo ipu metakiramo someraka, “Hauaka meta a aporomo Kotiaki kekererane† epo somerakae,” aisapo.

<sup>19</sup> Arirakano Areopakase apea aporomo me rükua sarimaraka risiakipoko Pore karikia pusuapo. Karikia pukua ipu Poreaki someraka, “Nómo someane some kawereapo. Isiapo kaiyako somerasié.

<sup>20</sup> Someane hakureapo. Isiapo kumuku kairakaripo. Some kepoane isiapo kaiyako somesie.” Aisapo.

<sup>21</sup> Arirakano maiya suamo Atenese aporomo soko aporo kimisi pesamo soko makata kaweanie kaikia somehoko seseaka sarimaraka me rusuapo.

<sup>22</sup> Arirakano Areopakase apea‡ aporo sarimaraka risiakipoko, Pore iyaki hakása hiku-misi nenemea reke someraka, “Atenese aporo reo. Repo kotafe kotiaki kekereraka hemakapurakano nōmo asesapo.

<sup>23</sup> Repo taonea ikia kara ano koraka reke aseane, makata meta isiapo kárane oyapo, aihokosakipoko aporomo hokonomo rakisiane repo kekererakano, nōmo asesapo. Aseane

\* <sup>17:18:</sup> Atenese taonea aporo tetamo hauaka wo makata kára enomasa risiapo. Meta yano motosa Epikúriane, airakano meta yano motosa Sitoíkipo. Asiamo tetapō Atenese aporoaki tetapō hemakapusuane sukurusapo. † <sup>17:18:</sup> Atenese aporomo kakaro Kotiaki kekeresafapo. Ipu kotafe koti yatafu asiaki kekeresapo. ‡ <sup>17:22:</sup> Areopakase apeane Kiriki aporomo sarimana apepo.

eke kima makata meta makárasa aki makata yaku paikia kakako, eke kima rakisiáne nōmo asesapo. Eke kima hakásá meta aporo metamo poparaka, 'Isiapo unihae kárane meta rekenapakano kaiyanafonosasamo, eke kima one rakisiapo.' Aíyaka popasane nōmo asesapo. Makata kaiyanafonosa repo kekeresa kepoane, nōmo reaki somerakanapo.

<sup>24</sup> Ti yapurane soko, hauaka kára one soko, makata su arisiane soko, Kotimo rakikia ipi unihaeaka asekea rekenapo. Aporomo ape kisia a ipi rekenafapo.

<sup>25</sup> Epo makata su aporoaki kaka, hitafe rerane soko, himuhane soko, makatane su, epo aporoaki karápo. Kaka, ipi fesenoraka rekeanafonosasamo aporomanomo hokonomo rakikia eaki karáfapo.

<sup>26</sup> Arirakano wate fana Kotimo aporo hakásá rakisiapo. Rakisia aporo hakásá amo wainepe pukua, hauaka parakuraka, hauaka meta aporo metakira pukua, hauaka meta aporo metakira pukua, aiyáka hauaka sua pusuapo. Aiyáka pusimo Kotimo maresapo. Namina hauaka risikiasimo hauakane Kotimo enonoraka maresapo. Namina risikiakosa maiya ane soko Kotimo maresapo.

<sup>27</sup> Aiyáka maresane, aporomo eane kokoa, e ipiane hemakapusimo maresapo. Asiasamo Kotiane isu makeraka rekenapo.

<sup>28</sup> Arirakano repo aporo sawi popanamo poparaka, 'E aeyaka hitafe risirane soko koraka torane soko isuaki karakano isu hitafe risike makata rakirapo.' Aíyaka poparaka, repo aporo sawi popana metamo someraka, 'Ipi hokosane isupo,' aiyaka somesapo.

<sup>29</sup> Arirakano isu Kotimo hokosasamo isiapo hokonomo koti pariaka rakirafapo. Korótomo soko metao siufamo soko metao ekemo soko metao koti pariaka rakisia makataki hemakapurane hasaka hemakapurakanapo. Aporomo hokonomo murikimaka rakisiáne koti aiyáka rekenafapo.

<sup>30</sup> Arirakano fana aporomo himeteraka risia maiyane Kotimo asekepayasapo. Yumo aporo suaki Kotimo someraka, 'Makata watikisa metakarikia rukupateraka, anoaki risiki-ako parihoanie.'

<sup>31</sup> Aiyáka keseke aporo hinamo hauaka sua risiane Kotimo parakuhokosapo. Parakuhokosa maiya ane Kotimo maresapo. Aporo hinamo ereketaeraka parakuhoasimo aporo hakásá meta Kotimo murikimasapo. Aporo hinamo suamo kakaroripo aihoasimo, Kotimo murikimasa aporoane kusua maturikia taesapo."

<sup>32</sup> Aiyáka Poremo somerakano, Atenese aporomo kaiyiáne aporo kusua maturikia tae-sapakano kaikia, aporo metakiramo mainamaresapo. Arirakano aporo metakiramo someraka, "Some ane isiapo efera hunia kaiyako seserakanapo."

<sup>33</sup> Arirakano i sarimasane Poremo metakarikia pusuapo.

<sup>34</sup> Purakano aporo metakira Pore patera asekea Yasuaki risikiako parisapo. Arirakano Areopakase apea aporo sarimasa a aporo meta yano motosa Tainásiasemo soko, arirakano meta, hinamo yano motosa Tamárisimo soko, arirakano aporo metakiramo soko, someane kakimaka Yasuaki risikiako parisapo.

## 18

### *Korini taonea Poremo makata rakisiáne oyapo.*

<sup>1</sup> Wakasema nina Poremo Atenese taoneane metakarikia, Korini taonea pusuapo.

<sup>2</sup> Korini taonea Yu aporo yano motosa Akuwírane Poremo asesapo. Akuwíra ipi takapesa hauaka, Pónetase hauakane metakarikia, Itari hauaka pusuapo. Puraka kamani unihae Korótiasemo someraka, "Yu aporo su Rome sitia risiane metakarikia pusie." Airakano Akuwíra soko ipi asea Pirisíra soko Itari\* hauaka metakarikia, Korini taonea pesapo. Arirakano Pore Korini taonea pekea tetá aseako pusuapo.

<sup>3</sup> Tetapó makata rakirane farae ape irinapo. Arirakano Poremo soko makata rakirane farae ape iriraka rakirasamo, tetáyaki hakásá rakiraka, tetapó apea e waka reapo.

<sup>4</sup> Arirakano fenena maiya suamo Yu aporomo sarimana apea Pore pukua, Yu aporomo soko, Kiriki aporomo soko, ipu namina Yasuane hemakapusimo Poremo some kasapo.

<sup>5</sup> Some karaka risiakipoko, Saerasepe Timoti tetá Masetónia hauaka anaká perakano soko, maiya suamo Poremo himu hakásaraka reke, Kotimo someane hákasa some kasapo. Some karaka Yu aporoaki someraka, "Yasu ipi aporo unihaeaka rekeasimo Kotimo makárarak maresasamo, ipi yano motosa Keresopo."

<sup>6</sup> Aiyáka Poremo somehoane, Yu aporomo waeraka, Poreane mahokoparirakano Poremo mahisiraka i metakariakosane, tariako, epo pasu kokotonomo marereraka someraka, "Re Yasuaki risikiako parihoanafonorakano repo namina menapo. Asiamo re hasakarakano repo namina yiamo aiyakakosapo. Kepoane anofapo. Asiamo yumo Yu aporohoanafonosaki Kotimo someane nōmo some kákakosapo."

\* **18:2:** Rome siti Itari hauaka á kisiaipo.

<sup>7</sup> Aíyaka someaka iane metakarikia, Yu aporo hoanafonosane Títiae Yásatasemo Kotiaki kekereraka rekeno ipi apea pusuapo. Ipi apeane Yu aporomo sarimana ape kisiakipoko ape kaua makeraka yia reapo.

<sup>8</sup> Arirakano Yu aporomo sarimana ape asekeea rea aporo yano motosa Kirísipase ipi Unihae Kotimo someane kakimaka, Unihae Yasuaki rekeako parisapo. Ipi asea soko, ipi hokosa soko, ipi apea hakasa risiane soko, i suane Yasuaki risikiako parisapo. Arirakano Korini aporo metakiramo soko some ane kaikia kakimarakano, i hea tapukumurisiapo.

<sup>9</sup> Arirakano ereamo Poremo kitusapo. Kituamo eaki Unihae Kotimo someraka, "Namo-hokopo. Nōmo someane mapiraraka some kakanie. Metakariakopo.

<sup>10</sup> Ano neyaki rekenapo. Ne aporo metamo mokoatikihokosafapo. Ape wo aporo hinamo yakaimo ano patera asekeea risikinapo."

<sup>11</sup> Airakano Pore turikia pukua reke, keremisi hakása faraka, keremisi metane ere maiya namasu amo Korini taonea reke, Kotimo someane aporo hinamoaki some kasapo.

<sup>12</sup> Arirakano keseke Akaíá<sup>†</sup> hauaka á kamani aporo Kario unihaeaka asekeea reapo. Kario unihaeaka asekeea rea maiya amo, Yu aporo sarimaraka Pore waseremaka, hukurura apea karikia pusuapo.

<sup>13</sup> Karikia pukua Karioaki ipu someraka, "Isiapo somemanane aporo amo rukupateraka metakarikia, Kotiaki kekerehoasimo some haku paroaka some karakanapo."

<sup>14</sup> Airakano Poremo somehokosapoko asiane Kariomo Yu aporoaki someraka, "Yu aporo reo. Aporo amo watikiaka rakirane soko metao, wekea aporo rurane soko metao, repo asekeea anoaki somerakano nōmo kaiyiáfunureapo.

<sup>15</sup> Kaiyiáfunusa nine repo some haku karakasané, yano motosa nōmo kaiyiánafonosasamo repo somemanane nōmo mawaroakosafapo. Repo namina mawaroako pusie."

<sup>16</sup> Aíyaka wakapuaka pusierakano

<sup>17</sup> aporo su pukua hauaka moroa, Yu aporomo sarimana ape asekeea rea aporo Sosotene se waseremasapo. Waseremaka, eane hukurura apeane makeraka rusuapo. Rurakan Kariomo asekepayasapo.

#### *Anitioke taonea Pore paripusuane oyapo.*

<sup>18</sup> Korini taonea Keresoa paosa aporo maeyaki Pore wakasema reapo. Nina Pore-anne pukusakipoko iaki ayapasapo. Ayaparaka i metakarikia Pirisírape Akuwíra tetá Poreyaki hakása pukua, Siria hauaka pukusakipoko, kasu sipia ripaka pusuapo. Pukua Senekiria taonea pauraka, Poremo Kotiaki kekereraka makata someaka maraka ipi uni iti enomosapo. Enomokoa efera hunia i kasu sipia ripaka pusuapo.

<sup>19</sup> Pukua Efesase taonea pauraka, taonea Pirisírape Akuwíra tetáne taone yia metakarisi-apo. Metakarikia Yu aporomo sarimana apea hikia Yu aporomo kakimakasimo kára somesapo.

<sup>20</sup> Somerakano, Yu aporo amo someraka, "Isuyaki maiya káramo rekeanie." Airakano Poremo someraka, "Wae.

<sup>21</sup> Keseke Kotimo aorakanano ano paripeakosapo." Aíyaka ayaparaka, Efesase taoneane metakarikia kasu sipia ripasapo.

<sup>22</sup> Ripaka pukua Sisaria taonea fosapo. Fokoa aeyaka Yarusarame sitia hikia Yasu Keresoa paosa aporo hinamoaki some kasapo. Some kaka faraka, Yarusarame sitiane metakarikia Anitioke taonea pusuapo.

<sup>23</sup> Pukua wakasema nina taoneane metakarikia, Karesia hauaka a soko Firísia hauaka a soko hikia, Yasuaki patera asesa aporo hinamoaki someraka, "Yasu Keresoaki himu hakásaraka hemakapukua eaki himu paroaka risikianie." Aíyaka Poremo somesapo.

#### *Efesase taonea Apórose reane oyapo.*

<sup>24</sup> Yu aporo meta yano motosa Apórose ipi taone Aresátia taoneane metakarikia, Efesase taonea pesapo. Arirakano Apórosemo Kotímo sawiane menoraka, koteaka hemakapukua mapiraraka some kasapo.

<sup>25</sup> Arirakano Unihae Yasumo ikia karane aporo metamo e tarikia sukurarakano, epo enomaka, Yasuane aporo suamo hemakapusimo seseaka some kasapo. Yasuane hasaka some kasafapo. Asiáne hea tapukumarera ane ipi Yonemo hea tapukumaresane hákasa kaikia hemakapusuapo.

<sup>26</sup> Arirakano Yu aporomo sarimana apea Apórosemo mapiraraka some kasapo. Some karakano, Pirisírape Akuwíra tetapō kaikia, e karikia tetapō apea pukua, Unihae Kotimo some kaiyiánafonosane eaki some kasapo.

<sup>27</sup> Arirakano Akaíá hauaka Apórose puko seserakano Efesase taonea Yasuaki patera asesa aporo mae risiamo aoraka pusiesapo. Aíyaka Akaíá hauaka Keresoa paosa aporo risiaki ipu

<sup>†</sup> 18:12: Akaíá hauaka á Kiriki aporo risiapo.

sawi poparaka, "Apóroseane repo apea karikia pukua e ararehoanie." Aíyaka Apóroseane ararehoasimo popasapo. Sawi popasane Apórosemo maka, Akáia hauaka pusuapo. Pukua e á reke Kotimo eane yaku araresasamo, aporo hinamo metakiramo Yasumo someane kakimasapo. Kakimara aporo hinamoane Apórosemo araresapo.

<sup>28</sup> Asiamo Yu aporoyaki Apórosemo me rukua iaki someraka, ipu hasaka hemakapusuane maroporakano, ipu Apóroseaki some paripesafapo. Asiamo Kotimo sawia popasa kepoane tarikia someraka, "Mafasira aporo Kotimo murikimasane ipi Yasupo," aíyaka Apórosemo some kasapo.

## 19

*Efesase taonea Pore reane oyapo.*

<sup>1</sup> Korini taonea Apórose rea maiya amo, Pore hauaka ikia pukua Efesase taonea pausapo. Pauraka, taonea Yasuaki patera asesa aporo hinamo risiane epo asesapo.

<sup>2</sup> Aseraka, iaki Poremo akai kairaka, "Re Yasuaki risikiako parisa maiya amo, re himua Ho Kotesa pesare?" Airakano ipu someraka, "Wae. Ho Kotesane isiapo himeteraka kaisiapro."

<sup>3</sup> Airakano Poremo efera hunia akai kairaka, "Re hea tapukumurisia maiya amo, repo some yakapa kakimasare?" Airakano ipu someraka, "Yonemo someane isiapo kamarakano, isu hea tapukumurisiapro."

<sup>4</sup> Airakano Poremo someraka, "Yonemo Isiraya aporoaki somesane oyapo. Repo himu watikisa metakirikia rukupatehoanie. Ano patera aporo hakása meta yano motosa Yasu pekaposapo. Yasuaki himu hakásaraka hemakapukua risikianie."

<sup>5</sup> Aíyaka Yonemo somesane Poremo iaki some karakano, ipu kaikia Unihae Yasumo yano motosane yano horakano, i hea tapukumurisiapro.

<sup>6</sup> Hea tapukumurirakano, iane Poremo hokonomo sakaihoane, i himua Ho Kotesa pesapo. Ho Kotesa pesa maiya amo, ipu me kekepo kaiyánafonoraka risiane, me kekepoane somesapo. Arirakano iaki Kotimo some meta soko somerakano, ipu kaikia somesapo.

<sup>7</sup> Arirakano aporoane namina kenosu risiapro.

<sup>8</sup> Arirakano ere maiya isiamo Yu aporomo sarimana apea Pore pukua iaki some karaka, "Koti uyáka unihaeaka rekenapo." Aíyaka Poremo mapirarakaka iaki some kasapo.

<sup>9</sup> Some karakano, aporo metakiramo koarenteraaka paroaka someraka, "Someane isiapo kakimakosafapo. Unihae Yasumo ikia karane watikirareapo." Aíyaka aporo suamo kaiyisimo ipu kakama somerakano, Yu aporomo sarimana apeane Pore metakirikia pukua, Yasuaki patera asesa aporo hinamo karikia puraka, maiya suamo Tiránasemo apea some kaka me rusuapo.

<sup>10</sup> Keremisi tetámo Poremo some karaka reapo. Asiamo Esea hauaka Yu aporo soko, Kiriki aporo soko, aporo su risiaki Unihae Yasumo someane Poremo some karakano, ipu suamo kaisiapro.

*Sífamo hokosamo rakisiarie oyapo.*

<sup>11</sup> Arirakano Kotimo wakapumo hemakapukua rakira kárane Pore hokono aeyaka Kotimo rakisiapo.

<sup>12</sup> Arirakano pasu hakesopo soko, pasu tawero soko, Poremo sakaisane aporo metakiramo mokoa pukua, aporo makata tasane warisiakipoko pasu mokoa puraka, aporo makata tasane mafásapo. Yatafumo aporo ho mosane soko metakirikia pusuapo.

<sup>13</sup> Arirakano Yu aporo metakirikia ape meta pukua, ape a yatafumo aporo ho morakano, yatafu pusimo hokoaseraka makata kamuraka rakipe pusuapo. Rakipe puraka, Yu aporomo Yasuaki himu hakásaraka hemakapunafonoraka, ipu hemakapuraka, "Nena murikimaka Unihae Yasu yano hokoaserakapo. Yasu yano hoane aporoane mafahoanarakapo." Aíyaka ipu hemakapukua yatafuaki someraka, "Yasuane Poremo some karakano asekeea, isiapo Yasu yano horakanapo. Yasu yano hoko yaatafu né metakirikia pusie," aisapo.

<sup>14</sup> Arirakano Yu aporo pirisiti aporo fanane meta yano motosa Sífapo. Ipi aporo hokosa yatipinuso ayáka Yasu yano motosane nenakamaka yano hoko, yatafuaki someraka, "Né metakirikia pusie."

<sup>15</sup> Arirakano yatafumo someraka, "Yasu nōmo hemakapurakaripo. Pore soko nōmo hemakapurakaripo. Arirakano re aporo epare? Re nōmo mahimeteripo."

<sup>16</sup> Arirakano aporo yatipinu suane aporo yatafumo ho masamo rukumokoasuraka, ipu pasuane horomosapo. Horomorakano i apeane metakirikia patera yase tekedarikia pusuapo. Arirakano i kauane pipirukuraka tekedarikia pusuapo.

<sup>17</sup> Teketarienia pusuaporakano Efesase taonea Yu aporomo soko, Kiriki aporomo soko, ipu suamo kaisiaipo. Ipu suamo kairaka, namoraka, Yasumo yano motosa kakaro kárapo, aiyaka hemakapusuapo.

<sup>18</sup> Arirakano Yasumo kakimara aporo hinamo yakai peraka aporo suamo kaiyisimo makata watikiaka rakisiene hufitaesapo.\*

<sup>19</sup> Arirakano sawia ira hamu rura popasane soko, kamuna popasane soko, aporo metakiramo mokoa pekea aporo suamo asekeasimo, ira paisiaipo. Arirakano sawi popasa paisiane mone káramo roposapo, asiáne mokoa pekea ira paisiaipo. Siufa mone hae fifti taosenemo (50,000) sawi roposane ira paisiaipo.

<sup>20</sup> Asiasamo Unihae Kotimo someane wakapu kárareapo. Maiya suamo Kotimo someane some karakano, someane wakapusekeno aporo yakaimo kakimasapo.

*Efesase aporomo wesane oyapo.*

<sup>21</sup> Makatane fasakipoko keseke Ho Kotesamo Poreaki mahemakapurakano Poremo hemakapuraka, "Ano kimisi pukusapo. Aiyaka ano Masetónia hauaka pukua, Masetónia hauakane marokeraka, Akaí hauaka pukua, ane soko marokeraka, Yarusarame sitia hikia, á wakasema nina Rome sitia hiakosapo." Aiyaka hemakapukua

<sup>22</sup> Timotipe Erásatase tetapō e ararerakano, tetáki epo someraka, "Teto fana Masetónia hauaka pusie," aiyaka Esea hauaka á fore pariraka yia wakasema waka reapo.

<sup>23</sup> Maiya amo aporo yakaimo Unihae Yasumo someane kakimaka kekemasakipoko, aporo metakiramo saperaka hokoreraka wesahopo.<sup>†</sup>

<sup>24</sup> Arirakano aporo meta yano motosa Timítirasemo pisinisi uyáka rakisiapo. Epo siufa maka kurakaya hinamo Átemesemo ape murikimaka ape fete rakisiapo.<sup>‡</sup> Makata rakisiene epo roporaka, mone kára mosapo. Ipi aporo raipamo soko mone kára mosapo.

<sup>25</sup> Asiamo ipi aporo raipaki Timítirasemo peaesapo. Arirakano aporo metakiramo pisinisi hakása rakira aporoaki peaesapo. Isu pekea sarimarakanano, Timítirasemo someraka, "Isiapo pisinisi rakisia aeyaka mone kára morapo.

<sup>26</sup> Arirakano yumo Poremo someraka, 'Makata meta unihae pariaka hokonomo murikimaka rakisiene kakaro kotifapo.' Aisane aporo yakaimo epo someane kakimarakanapo. Efesase taonea aeyaka soko, Esea hauaka aeyaka soko, aporo suamo epo someane kakimarakanapo. Kakimasapakano repo kairakanapo. Ipu Kotiaki kekererakano repo aserakanapo.

<sup>27</sup> Asiamo aporo hinamomo isiapo ape fete rakisiene ropohoko hisirakanone, isiapo pisinisiene huruperaka fahoanaminapo. Arirakano Esea aporo hinamomo soko, hauaka sua aporo hinamo risiamo soko, Átemeseaki kekererane metakirirakano, Átemesepoko ape kára kisiane nenakamakayia kiraka aiyakakosapo. Atemeseane namo kakaro kárasane mawakasemahoanaminapo."

<sup>28</sup> Aiyaka Timítirasemo somerakanano, aporo suamo kairaka saperaka wáraka, "Efesase aporomo unihaeane Átemese ipipo."

<sup>29</sup> Airakano aporo metakiramo sape meaka kirimaraka, ape aporo suamo weakosakipoko risiapo. Hauaka moroa aporo su foaka sarimaraka, aporo tetá Masetónia hauaka anaka Poreyaki hakása pesane waseremosapo. Aporo tetá waseremosane yano motosa meta Kaíase, arirakano meta Arisítákase tetáne waseremokoa hauaka moroa pusuapo.

<sup>30</sup> Waseremokoa purakano Poremo someraka, "I sarimasa hauaka moro tipia ano pukuripo." Arirakano Yasuaki patera asesa aporomo waesapo.

<sup>31</sup> Arirakano kamani aporomo soko waesapo. Kamani aporomo Pore tati moresasamo eane hemakapukua, Pore rea aporo meta pusiesapo. Pusierakano aporoane Pore rea peraka, kamani aporomo someaka maresane Poreaki wakapuaka someraka, "Né rusua kukoamo hauaka moroa pukupo," aisanpo.

<sup>32</sup> Arirakano hauaka moroa aporo suamo me hakapiraka risiapo. Aporo metakiramo makata haku someaka wáraka, arirakano aporo metakiramo makata haku meta someaka wásapo. Aiyáka wárakan aporo metakiramo someraka, "Manakano isu wo pesare? Manakano me hakapirakanare? Makata kepo yakapapoko isu sarimasare?" Aiyaka aporo yakaimo mahimeteraka somesapo.

\* **19:18:** Ira hamu rurane soko, kamunane soko, ho pairane soko, makata aiyáka rakirane su hufitaesapo. † **19:23:** Efesase taonea kurakaya hinamopoko ape kára kikia, apea kurakaya hinamo yano motosa Átemeseaki kekeresapo. ‡ **19:24:** Ape fete rakisiene aporo hinamomo roporaka namina apea taeraka Átemeseaki kekeresapo.

<sup>33</sup> Arirakano Yu aporomo aporo meta Arekesátaki someraka, “Né fanaraka pusie.” Airakano Arekesátá fanaraka pusuapo. Pukua aporo suamo me fahoasimo Arekesátamo ipi hokono rukurakoraka,

<sup>34</sup> Yu aporo patera asekeia somehoko seserakano aporo sarimasamo aseane, Arekesátane Yu aporo reasamo, namina e asekepayaraka efera hunia ipu suamo sakepamo wáraka, “Efesase aporomo unihaeane Átemese ipipo.” Aíyaka maiya hi awa tetámo wáraka someraka risiapo.

<sup>35</sup> Wáraka risikino Efesase taone kanisoro kusikusi aporomo i mauasapo. Namina me farakano ipi someraka, “Efesase aporo reo. Átemesemo apeane Efesase aporomo kikia asekeia risikinapo. Ti yapunkuna eke yaposa hurupesane repo asekeia risikinapo. Asekeia risiane aporo suamo makatane kairapo.

<sup>36</sup> Ekeane isiapo kakaro yaiya asekeia risiane, aporo hakásá metamo someraka, ‘Isiapo asekeia risirafapo.’ aihoasifareapo. Asiamo re tau risike wate foaka sapeaka weakopo.

<sup>37</sup> Asiamo aporo waseremokoa karikia pesa amo ipu Átemesemo apeane soko mokoatik-isafapo. Arirakano Átemeseaki soko tetápó hokomasafapo.

<sup>38</sup> Arirakano Timítirasemo soko, ipi písini aporo metakiramo soko, aporo metaki saperaka, hukurukusa maiya murikimasamo maropona aporo rea á karikia pufunureapo. Pukua hukurukusakipoko murikimasa maiya amo hukurufunureapo.

<sup>39</sup> Repo sapesane kepo meta yia kakenone, hukurura kepo kaira aporo metakira sari-masakipoko mawaroako punie.

<sup>40</sup> Pipu isu su sarimaraka saperaka sakepamo wáraka weakorakasakipoko kamanimo isu hukurunaminapo. Hukururakano isiapo maiyaka somehoanarakapo. Isiapo isina yiamo sapeaka weakosa nine tafahoane siahoasifareapo.

<sup>41</sup> Yumo re koakatarikia pusie.” Airakano i sú koakatarikia pusuapo.

## 20

### *Pore Kiriki hauaka pusuane oyapo.*

<sup>1</sup> Arirakano aporo sarimasane koakatarikia pusuakipoko, Poremo Yasuaki patera asesa aporoaki peaesapo. Perakano Poremo iaki someraka, “Re, Yasuaki paroaka hemakapukua risikianie. Ano Masetónia hauaka purakanapo. Re, ayapa.” Aíyaka marekea, i metakarikia, e Masetónia hauaka pusuapo.

<sup>2</sup> Hauaka á pukua, some karaka, “Yasuaki hemakapukua paroaka risikianie.” Aíyaka i mapirahoasimo, some kape pusuapo. Pukua, Kiriki hauaka pauraka, ere maiya isiamo á reapo.

<sup>3</sup> Nina, Siria hauaka pukusakipoko, epo kaiyiáne, “Yu aporomo ne rukusakipoko someaka masapo.” Airakano kaikia, Siria hauaka pukusane metakarikia, Masetónia hauaka á paripusuapo.

<sup>4</sup> Arirakano Pereia aporo Pírasemo maeya Sópata soko, Tesaronaeka aporo tetá, Arisítakase soko, Sekánatase soko, Tepe aporo Kaíase soko, Timoti soko, arirakano Esea hauaka aeyaka aporo tetá, Tíkikase soko, Torófimase soko, i Poreyaki hakásá pusuapo.

<sup>5</sup> Arirakano i fana pukua, Toróase taonea isu peasimo, kau toapo.

<sup>6</sup> Kau tokeno, isu Firipai taonea toakipoko, Farawa Pirianafonona Hokono Kekea faraka, soraka, Firipai taoneane metakarikia pukua, kasu sipia ripaka puraka risike, yape kako-reasu kasu sipia waka, Toróase taonea pausapo. Pauraka, namina fana pusuakipoko, isu kesekeia pukua pausapo. Pauraka isu isina sokó hakásamo risiapo.

### *Toróase taonea Poremo some kasane oyapo.*

<sup>7</sup> Yatipinumo ereamo, huturu apea, isu Kereso asipa nako sarimasapo. Sarimaraka, rauaka Pore hiakosakipoko, pipuaka Poremo kára someraka kake yia, ere tipisapo.

<sup>8</sup> Ape huturuwa isu sarimaraka toa, nafa yakai paikia taeraka, Poremo someraka kayapo.

<sup>9</sup> Someraka kakeno, hokosa raua meta, Yútikaseane, ape winitoa kayapo. Kayane Poremo some haru rumakanafonorakano, Yútikaseane wakako nekeraka kaina, kakaro wasápo. Wasáne ape winito huturu anaka, hauaka atura hurupesapo. Huruperakano, aporo metamo e maka aseraka someraka, “E kureapo.”

<sup>10</sup> Airakano, Pore huturu apea reane metakarikia, inima sosonoraka peraka, aseane hokosa raua hurupesa warekeno asekeia, arupekeia ketakamaka someraka, “Repo himu fahokopo. E kusuanne yumo hitafeane.”

<sup>11</sup> Aíyaka Pore huturu apea hikia, Kereso asipa maka nekea faraka, aporo metakirayaki someraka, tuina, mituru fiarakano i metakarikia e pusuapo.

<sup>12</sup> Arirakano hokosa raua hurupesa kusua, Poremo maturikia taesane, metakiramo aseraka seseraka, ipi apea karikia pusuapo.

*Toróase taoneane Poremo metakarikia, Mairítase taonea pusuane oyapo.*

<sup>13</sup> Arirakano isu Toróase taoneane metakarikia, kasu sipia ripaka, Ásose taonea pusuapo. Asiane Poremo ipi hemakapusua anaka Toróase taoneane metakarikia, hauaka ikia korakemo pukua Ásose taonea isu sapenesapo.

<sup>14</sup> Isu sapenekeia kasu sipia ripasapo. Riparaka isu pukua, Mitiríni taonea pukua pausapo.

<sup>15</sup> Mitiríni taoneane metakarikia, kasu yia waka, mituru fiarakano pukua, Kaíose he tono makea pukua, pauraka, waka, mituru fiarakano pukua, Sémoste he tono pauraka, á soko waka, mituru fiarakano, pukua, Mairítase taonea pausapo.

<sup>16</sup> Arirakano Poremo hemakapuraka, "Esea hauaka maiya káramo warapaka, kasu sipimo Efesase taoneane metakarikia koaraka pukusapo. Pukua, maiya siasekeno Yarusarame sitia Penekose Hokono Keakosakipoko foaka hiakosapo," aiyaka hemakapusuapo.

*Efesase taonea, Keresoa paosa aporo asekeia risia aporoaki, Poremo ayapasane oyapo.*

<sup>17</sup> Mairítase taonea Pore reke, aporo metaki someraka, "Né Efesase taonea pukua, Keresoa paosa aporo asekeia risia aporoane, ano rea, pusiehoanie." Aiyaka marekeia i perakano,

<sup>18</sup> Poremo iaki someraka, "Fana ano Esea hauaka peraka, nōmo kepomarekea rakiraka, maiya káramo reyaki rekeno, nōmo ainane repo asesapo.

<sup>19</sup> Aseraka yia, maiya káramo Yu aporomo nōmo someane rukumosakatapiakosakipoko, ipu tau someaka maka, meauraka, ano mokoatikisapo. Mokoatikirakano yia, makata umisa fasereperakanano, Unihae Yasumo rakirane nōmo rakiraka, ano ní makama fanaraka ayiáka nōmo rakisafapo.

<sup>20</sup> Makata kotesamo re ararehoasimo nōmo some kasapo. Makata kotesane meta nōmo mahamesafapo. Yu aporomo sarimana apea aporo suamo kaiyisimo, nōmo kakama some kasapo. Repo apea soko nōmo some kape pusuapo. Nōmo makata asiane repo hemakapurakanapo.

<sup>21</sup> Yu aporoaki soko, Yu aporohoanafonosa Kiriki aporoaki soko, nōmo some kasane oyapo. 'Re himu watikisa metakarikia, Kotiaki risikiako parihoanie. Unihae Yasu Keresoaki himu hakásaraka hemakapukua risikianie.' Aiyaka nōmo reakti somesapo.

<sup>22</sup> Ho Kotesamo anoaki somerakano, nōmo kakimaka, ano yumo Yarusarame sitia hiakosapo. Yarusarame sitia hinaka, anoaki makata ayiakakosane ano himeteripo.

<sup>23</sup> Himeterakano yia, taone sua ano puane, Ho Kotesamo anoaki someraka, 'Neaki makata watikisa faserepeakosapo. Aporomo né tipura makeakosapo. Arirakano né mokoatikihokosapo.' Aiyaka Ho Kotesamo anoaki somerapo.

<sup>24</sup> Airakano yia, ano ní hitaferaka rekeakosane hákasa makama fanaraka hemakapurakarifapo. Ano kokusireapo, aiyaka nōmo hemakapurakarifapo. Unihae Yasumo anoaki uyáka rakinie, aisane rakikia rosakataehoko hemakapurakaripo. Epo anoaki, 'Kotimo yaku ararena some kotesane some kakanie.' Airakano some kotesane hákasa somehoko hemakapurakaripo.

<sup>25</sup> Re suaki nōmo someraka, 'Koti unihaeaka rekenapo.' Aiyaka somerakano repo kairakanapo. Akaira aporo repo efera hunia ano híkumisi aseakosafapo.

<sup>26</sup> Pipu reakti nōmo hokomareako somerakanafapo. Kakaro somerakanapo. Repo aporo hakásá metamo Kotimo someane kakimakanafonorakano nōmenafapo. Namina yáamo ayiakakosapo.

<sup>27</sup> Kotimo someaka maresa suane repo kakimakasimo, nōmo reakti mapiraraka some kasapo. Someane mahamesafapo.

<sup>28</sup> Namina yáamo koteaka asekeia risikianie. Repo Kereso aporo hinamoane asekeia risikianie. Repo asekeia risikiasimo, Ho Kotesamo re murikimokoa murisiapo. Arirakano Kotimo hokosa Yasumo, Keresoa paosa aporo hinamopoko farimaka kusuapo. Farimaka kusuakipoko, saro sipi wafayamo ipi saro sipi asekeia area ayiáka, Yasu Keresoa paosa aporoane repo ayiáka asekeia risikianie.

<sup>29</sup> Saro wofemo\* saro sipi rukua nako apera ayiáka, ano pusuakipoko aporo metakira re arisia peraka, reane mokoatikihokosapo. Aporoamo reane koteaka hemakapukusafapo.

<sup>30</sup> Arirakano re namina yia, aporo metakiramo ipu namina yano motosane mafanahoko, Keresoa paosa aporo hinamomo iaki patera asekeasimo, kotafe some kakakosapo.

<sup>31</sup> Ayiakakosasamo, kotafe someane repo kakimarapaka asekeanie. Keremisi isiamo, ano reyaki reke, ereamo soko, sere soko, reakti hakásá hakásaraka some kasapo. Repo

\* 20:29: Saro wofeme yákasa ásiápo.

Yasuaki himu hakásaraka hemakapurane makárahoasimo, reaki nōmo hiripuyaki some kasapo.

<sup>32</sup> Arirakano ano pusuakipoko, Kotimo re asekea rekeasimo, nōmo kurikurirakanapo. Kotimo yaku ararena some amo, re mapiraraka paroaka risikiasimo ararenapo. Aporo makata watikisa kikisiraka, koteaka susu rakira aporo akiyaki, re paoraka risikiasimo, Kotimo yaku ararena someamo sia asekea rekeakosapo. Asiamo Kotimo yaku ararena someamo re ararehoasimoripo.

<sup>33</sup> Arirakano repo moneane soko, pasuane soko, nōmo aseraka, ano makaripi, aiyaka hemakapusuafapo.

<sup>34</sup> Nōmo nī makata rakikia, mone mokoa siaraka reapo. Anoyaki aporo pesane soko, siaraka risikiasimo, nōmo hokonomo rakisiapo. Rakirakano repo asesapo.

<sup>35</sup> Arirakano aporo makata forosane ararehoko, maiya suamo makata rakira ane nōmo rakisiapo. Repo aiyáka arareraka rakisimo, nōmo reaki tariraka, nōmo rakirakasu ayapo. Unihae Yasumo someraka, ‘Makata mokoakosane, maiya suamo hemakapukua risikiakopo. Makata kakakosane, hemakapukua risikianie. Aiyaka risikinone, namo kakaro seseaka risikiakosapo.’ Aiyaka Yasumo somesane hemakapunie.’

<sup>36</sup> Aiyaka Poremo some kaka faraka, iyaki kakuna porokoa kake kurikurisapo.

<sup>37</sup> Kurikuriraka farakano, aporo suamo hihiripuyaki mokonuraka ayapasapo.

<sup>38</sup> Ipu namina hemakapuanne Poremo someraka, “Efera hunia repo ano hikumisi asekosafapo.” Airakano ipu kamenakaraka himu nesapo. Aiyáka marekea kasu sipi humaresa á Pore ripakasimo karikia pusuapo.

## 21

*Yarusarame sitia hiakosakipoko kasu sipia ripasane oyapo.*

<sup>1</sup> Efesase taonea Keresoa paosa aporo asekea risia aporoaki isiapo ayapasapo. Aiyaka isu kasu sipia ripaka pusuapo. Puraka he numu tipi aeyaka teraporaka pusuapo. Pukua Kóse he tonoa pesapo. A waka, mituru pukua, Róse he tonoa pesapo. A waka, mituru pukua, Patára taonea pesapo.

<sup>2</sup> A waka, mituru Finísia hauaka pukusakipoko, kasu sipi meta ripaka pusuapo.

<sup>3</sup> Pukua, Saéparase he tono aseraka, fe taku aeyaka koaraka pukua, Siria hauaka pekea, Taia taonea kasu hukumaresapo. Hukumareane Taia taonea makata fato kasua ripasane, he fea aporo raipamo fokotaerakanoo, isu kasu metakarikia pusuapo.

<sup>4</sup> Pukua Yasuaki patera asesa aporo Taia taonea risiane, isiapo kokoa aseraka, sokō hakásamo iyaki risiapo. Risiane Ho Kotesamo iaki somerakanoo, ipu Poreaki someraka, “Né rusua kukohoamo, Yarusarame sitia hiakopo,” aisapo.

<sup>5</sup> Aiyáka sokō hakásá farakano, isu kasu matapea poparipukua, isuyaki, Yasuaki patera asesa aporo soko, namina hinamo soko, namina hokosa soko, su namina apeane metakarikia, isina hakásá pekea, kasu matapea kakuna porokoa toke, Kotiaki kurikurisapo. Kurikuriraka faraka rumaraka ayaparaka,

<sup>6</sup> namina apea poparipurakanoo, isu kasu sipia ripaka,

<sup>7</sup> Taia taoneane metakarikia pukua, Toremése taonea pausapo. Pauraka kasu sipi ane metakarikia, Toremése taonea Keresoa paosa aporo maeane isiapo aseraka, ere hakásamo iyaki hakásá wasápo.

<sup>8</sup> Waka mituru Toremése taoneane metakarikia, pukua Sisaria taonea pausapo. Taone a Kotimo some kape pura aporo Firipimo apea pukua waka risiapo. Fana Yarusarame sitia aporo yatipinusumo makata nakosa parukuhoasimo murikimosane, meta Firipi ipipo.

<sup>9</sup> Ipi faraya kitafasu aporomo arumokoanafonosa toapo. Hinamoane porofete hinamopo. Kotimo ipi someane i himua mahemakapurakanoo ipu kaikia, aporo hinamoaki some karápo.

<sup>10</sup> Arirakano sere yakaimo isu risiakipoko, Yutía hauaka anaka porofete aporo yano motosa Ákapase perakasupo.

<sup>11</sup> Isu risiakipoko Ákapase pekea, Poremo saro kau terakaeanne tumaka, Pore korakea soko, hokonoa soko, saro kau terakaemo taporaka someraka, “Ho Kotesamo someane oyapo. Poreane ipi saro kau terakaemo nōmo taposa aiyáka, Yu aporomo aiyáka, Poreane taporakosapo. Taporaka Yu aporohoanafonosa e tipura makeasimo, Yu aporomo karikia pukusapo.” Aiyaka Ho Kotesamo somerakanoo Ákapase somesapo.

<sup>12</sup> Aiyaka somerakanoo, isiapo soko kaikia, Sisaria aporomo soko kaikia, Poreaki paroaka someraka, “Yarusarame sitia ne hiakopo.”

<sup>13</sup> Airakano Poremo someraka, “Re marirakano hihiripurakanare? Ano himu nasimo marirakano hihiripurakanare? Unihae Yasupoko ano tipura makeane siahoasireapo. Eane hemakapukua, epoko kuane soko, siahoasireapo.”

<sup>14</sup> Aíyaka isiaipo paroaka somehoane, Poremo ipi hiakosa hákasané hemakapuraka, parihokosa himuane hemakapusuafapo. Hemakapunafonarakano asekeea, isiaipo someraka, "Uniháemo hemakapusu ayiakakosane siahosireapo." Aíyaka isiaipo makata meta somasafapo.

<sup>15</sup> Wakasema risina, makata kemo sarikekea mokoa, Yarusarame sitia hisiaipo.

<sup>16</sup> Sisaria taone anaka, Yasuaki patera asesa aporo metakiramo isu karikia hinaka, Yarusarame sitia Saéparase aporo yano motosa Nésonemo, ipi apea waka risikiakosakipoko isu karikia hisiaipo. Arirakanó ape wafaya Nésone amo, wate fana Yasumo someane kakimasapo.

*Yameseane Poremo asesane oyapo.*

<sup>17</sup> Arirakanó isu Yarusarame sitia perakano Keresoa paosa aporo maemo isu aseraka tereraka, isina hokino mokoa sesesapo.

<sup>18</sup> Seserakanó, isu isina hakása waka, mituru, Pore soko, isu soko, Yameseane aseako pusuapo. Pukua Keresoa paosa aporo asekeea risia aporoane, Yameseyaki risikino asekeea,

<sup>19</sup> i sú Poremo hokino mokoa, Poremo iaki makata somesapo. Epo makata rakira suane iaki some kasapo. Yu aporo hoanafonosaki some karaka, epo some aeyaka Kotimo wakapuaka rakisiane Poremo some kasapo. Aíyaka somerakanó

<sup>20</sup> ipu suamo kaikia Kotiaki kekeresapo. Ipu Poreaki someraka, "Hameo, hauaka wo Yu aporo yakaimo Yasuaki risikiako parisapo. Ipu Mosesemo somemaneane kakaro metakarianafonarka kekemarakanapo.

<sup>21</sup> Ipu kaiyiáne, Yu aporo hoanafonosamo hauaka á, Yu aporo pukua risia aporoamo, Mosesemo somemaneane rukupatehoasimo, nómó some kasaporakano ipu kaisiaipo. Arirakanó aporo hokosa kau haaeraka patenane metakarisimo, nómó some kasaporakano ipu kaisiaipo. Yu aporomo ainane metakarisimo, nómó some kasaporakano ipu kaisiaipo.

<sup>22</sup> Yu aporoamo neaki saperaka risiasamo isiaipo mayiakakosare? Yumo né Yarusarame siti wo pesane ipu kaiyakosapo.

<sup>23</sup> Asiamo isiaipo some one nómó kaikia, nómó Yu aporomo ainane uyáka rakinie. Yu aporo kitafasu wo risikinapo. Ipu Kotiyaki someaka makasimo Mosesemo somemane kasane kakimaka, i uni iti enomokoakosapo.

<sup>24</sup> Né, iyaki hakása Kotimo apea pukua, Kotiaki makata yaku kakanie. Asiamo i uni iti enomokoasimo ipoko pirisiti aporoaki makata ropoane nómó kakanie. Karakanó Yu aporomo aseraka hemakapuraka, 'Mosesemo somemaneane Poremo metakarisiafapo. Metakarisiaipo aisane kotafe hoareapo.' Aíyaka ipu namina hemakapurukusapo.

<sup>25</sup> Arirakanó Yu aporo hoanafonosamo Yasuaki risikiako parisane iaki isiaipo sawi poparaka makesane oyapo. 'Kotafe koti aporomo hokonomo rakisiaki ipu someraka, "Isiaipo unihae kárane oyapo." Aíyaka someraka makata aki makata kakayia kasane repo nakopo. Arirakanó meta, makata kakayia yapi soko nakopo. Arirakanó meta, makata kakayia mawia kita humaresa kusuane nakopo. Arirakanó meta, hinamo hakimakopo.' Aíyaka iaki sawi poparaka isiaipo makesapo." Aíyaka Keresoa paosa aporo asekeea risia aporomo Poreaki somesapo.

<sup>26</sup> Arirakanó ere hakásamo waka, aporo kitafasuane Poremo karikia, i namina hakása pukua, Kotiaki makata yaku kakasimo pusuapo. Pukua Kotimo apea yorokoa pirisiti aporoaki epo someraka, "Sere yatipinusu murikimaraka, serea paurakano, ano iyaki pekea, Kotiaki makata yaku kakakosapo. Kaka faraka Yu aporomo aina ayiáka rakikia makosapo," aíyaka Poremo somesapo.

*Kotimo apea Pore waseremasane oyapo.*

<sup>27</sup> Sokó hakása fahoko makeanamo, Yu aporo Esea hauaka anaka pesamo, Kotimo ape ruru kakarua yorokoa á Pore ipu asesapo. Asekeea Poreane ipu waseremaraka aporo suamo eaki sapehoasimo ipu topakamaraka someraka,

<sup>28</sup> "Isiraya aporo reo, repo ararehoko peae. Aporo omo hauaka sua Yu aporo mawakase-maraka mahokopariraka some karápo. Arirakanó Mosesemo somemaneane aporo suamo metakarisimo epo some karápo. Arirakanó Kotimo ape wo aporo suamo mawakasemahoaismo epo some karápo. Arirakanó Yu aporo hoanafonosane Kotimo ape ruru kakarua yororane yaposapo. Asiáne epo kawe yumo Kotimo ape wo Kiriki aporo karikia ayorora amo epo Kotimo apeane mokoatikiranapano," aisapo.

<sup>29</sup> Arirakanó fana Yu aporo Esea hauaka anaka pesamo aseane, Efesase aporo meta, Yu aporo hoanafonosane yano motosa Torófimaseane Poreyaki hakása Yarusarame siti hauaka moroa koraka risikino ipu asesapo. Aseraka ipu hemakapuraka, "Kotimo apea Torófimase Poremo karikia perakarihoapo," Aíyaka ipu hemakapuraka Poreaki sapesapo.

<sup>30</sup> Aporo suamo saperaka iriraraka risiasamo, aporo su sarimaraka Pore waseremaka, Kotimo ape anaka kikirimaka pusuapo. Kikirimaka pukua, Kotimo ape ikia koroane aporo metamo mapirisiasiapo.

<sup>31</sup> Mapirirakano asekeea Pore kokusimo hauaka moroa Yu aporomo rusuapo. Ru-rakano Rome ame aporo satini rea aporo meta pukua, ame aporo satiniaki someraka, "Yarusarame sitia aporo suamo sakaremoko wekeea haeraka risikinapo."

<sup>32</sup> Airakano ame aporo satini foaka pukua, ame aporo metakira soko, ame aporo koporo metakira soko, eyaki hakasa aporo weraka risia á foaka pusuapo. I perakano, Yu aporomo aseraka, Pore ruraka risiane metakarisiasiapo.

<sup>33</sup> Metakirakano Pore tipura makeakosakipoko ame aporo satinimo someraka, "Aporoane sene tetámo tapohoanie. Aporoane yano motosa epare? Epo masiare?"

<sup>34</sup> Airakano aporo metakiramo makata meta someraka wárakano, aporo metakiramo makata meta someaka wárakano, ayíáka suamo kekepo kekepoaka wásapo. Aporo suamo kekepoaka wárakano ame aporo satinimo someraka, "Nómo kaiyisifareapo." Aiyaka epo someraka, "Ame aporomo apea, aporoane karikia pusie." Airakano Pore karikia pukua,

<sup>35</sup> inima pauraka, aporo suamo saperaka weakarakano Poreane aporomo rukuhoamo, ame aporomo hokonomo rakaremaka pusuapo.

<sup>36</sup> Púrakano, aporo suamo kekemaraka sakepamo wáraka, "Pore rusua kunkunie."

<sup>37</sup> Airakano ame aporoamo Poreane karikia pukua, ipu ape makerakano, ame aporo satiniaki Poremo Kiriki meaka someraka, "Néaki nōmo makata somehoare?" Airakano ame aporo satinimo someraka, "Nómo Kiriki me somerare?"

<sup>38</sup> Nōmo hemakapusuane, né Iyipi aporopo, aiyáka hemakapurakaripo. Wakasema fana Iyipi aporoamo aporo yakai fo taosene (4,000) kirimarakana, karikia pukua, namina weako terakaia mokoa, tare mokoa, poke mokoa, ima yaoa pusuapo. Né aporo ayare? O, ne aporo ayafare?"

<sup>39</sup> Airakano Poremo someraka, "Wae. Ano Yu aporopo. Nōmo ní taoneane Tasasepo. Sirisia hauaka á taone kárane Tasase ayapo. Taoneane nōmo taonepo. Aporo suaki nōmo somehoare?"

<sup>40</sup> Aiyaka ame aporo satinimo aorakano, Pore inima reke, aporo suamo mé fahoasimo Poremo ipi hokono rukurakoraka, suamo mé farakano asekeea Poremo Hipuru\* meaka somesapo.

## 22

### *Poremo kakaro tafaraka somesane oyapo.*

<sup>1</sup> Airakano Poremo ipi kakaro tafaraka someraka, "Maeo, aporo sisima, repo nōmo some one kaisie. Nōmo watikiaka rakisiafapo."

<sup>2</sup> Aiyaka Poremo Hipuru meaka somerakano, aporo suamo kaikia, mé faraka tau risiapo. Tau risokino, epo someraka,

<sup>3</sup> "Ano Yu aporopo. Ano takapesane Sirisia hauaka, Tasase taonea takapesapo. Takapekea ano káraraka, ano Yarusarame siti wo sukuruhoko pekea, nōmo tisa Kamériomo ano sukurusakan, nōmo enomasapo. Nōmo makasa kaua kekemamo somerane kepoane, epo ano sukurusakan nōmo enomasapo. Pipu maiya omo, repo Kotiaki patera asera aiyáka, nōmo soko fana Kotiaki aiyáka patera asesapo.\*"

<sup>4</sup> Fana, Yasuaki patera asesa aporo hinamoane nōmo mokoatikisapo. Mokoatikiraka metakira rusua kusuapo. Metakira waseremokoao tipura kesapo.

<sup>5</sup> Airakano reaki nōmo some one somerakanone, pirisiti aporo fanamo soko, Yu aporo sisima suamo soko, 'Kakarorakae,' aihokosapo. Ipu Tamásakase taonea Yu aporo risiaki sawi poparaka, anoaki karakano, Tamásakase taonea, Keresoa paosa aporo hinamoane waseremokoao, ano pusuapo. Pukua, Yarusarame sitia fanasihokosakipoko, senemo taporaka kita humurikia karikia hiakosakipoko, ano Tamásakase taonea pusuapo," aiyaka Poremo somesapo.

### *Pore Yasuaki rekeako parisane oyapo.*

*Tarira Aporo 9:1-19; 26:12-18*

<sup>6</sup> Poremo someraka, "Ano Tamásakase taonea pukua sere maiya tipiamo, Tamásakase taone makeraka pauhoane, wate foaka hepene anaka ano rea makata kára faerakano,

<sup>7</sup> ano hauaka huruperaka yia, nōmo kaiyiáne mémo anoaki someraka, 'Soreo, Soreo, marirakano nōmo ano mokoatikirakanare?'

\* <sup>21:40:</sup> Yu aporomo Hipuru meaka somerapo. \* <sup>22:3:</sup> Poreane Yasuaki rekeako parihoasiraka, epo Kotiane hákasa makárasapo. Yasuane hemakapusuafapo.

<sup>8</sup> Airakano nōmo someraka, ‘Unihaeo, né epare?’ Airakano epo someraka, ‘Nasare aporo Yasuane anopo. Nōmo anoaki mokoatikirakanapo.’

<sup>9</sup> Airakano aporo anoyaki hakāsa pesamo faerakano hákasa asesapo. Mémo somerakano ipu koteaka kaisiafapo.

<sup>10</sup> Arirakano nōmo someraka, ‘Unihaeo, nōmo yakapa rakiakosare?’ Airakano Unihaemo anoaki someraka, ‘Né takahisie. Takahikia, Tamásakase taonea pusie. Taone a nōmo makata rakismo aporo metamo néaki somehokosapo.’

<sup>11</sup> Airakano faesa kárane nōmo asesamo ano hi kakanoraka asesafapo. Asekeanafonrakano, aporo anoyaki hakāsa pesamo ano hokonoa maka, Tamásakase taonea karikia pusuapo.

<sup>12</sup> Arirakano Tamásakase taonea, aporo hakása meta yano motosa Ananáse reapo. Isiapo Yu aporomo somemane epo kakimaka, Yu aporo suamo e aporo kotesaporakano,

<sup>13</sup> ano rea e pekea someraka, ‘Mae Soreo, efera hunia asesie.’ Aihohanine, ano hi faeraka Ananáseane koteaka asesapo.

<sup>14</sup> Aserakano epo anoaki someraka, ‘Isiapo makasa kaua kekemamo Koti amo epo hemakapusuane nōmo enomaka kakimakasimo, epo né murikimasapo. Ipi ereketae susu hemakapura aporo Yasuane nōmo asekeasimo epo né murikimasapo. Epo ipi méane kaiyisimo Kotimo né murikimasapo.

<sup>15</sup> Né murikimasamo aporo hinamo suaki nōmo Yasuane asesane soko, kaisiane soko, somehokosapo.

<sup>16</sup> Yumo né kau rekeakopo. Takahisie. Takahikia, aporo metamo né hea tapukumareakosapo. Hea tapukumarerakano, nōmo Yasumo wakapuaki himu hakásaraka hemakapunie. Himu hakásaraka hemakapukua kurikurirakano, nōmo himu watikisane epo mafahokosapo.’ Aiyaka Ananásemo somesane yasiapo,’ aiyaka Poremo somesapo.

*Yu aporohoanafonosaki Poremo some kakako pusiesane oyapo.*

<sup>17</sup> Poremo someraka, ‘Ano Yarusarame sitia parihisia maiya amo, Kotimo apea yorokoa, kurikuriraka reke, aseane kituamo asera aiyaka Unihae Yasu rekeno asesapo.

<sup>18</sup> Aseane epo anoaki someraka, ‘Né Yarusarame sitiane metakarikia foaka pusie. Asiamo nōmo anoane aporoaki some karakano aporoamo kakimakosafapo.’

<sup>19</sup> Airakano nōmo someraka, ‘Unihaeo, fana Yu aporomo sarimana ape sua ano pukua, Keresoa paosa aporo hinamoane, tipura kekeia rukua mokoatikisapo.

<sup>20</sup> Arirakano Sitífene rea maiya amo néane some karakano, aporo metakiramo e rusua kusuapo. Rusua kurakano nōmo “Ao, rusie,” aisapo. Aiyaka marekea reke, Sitífene rusua aporoamo pasu hororaka taesane, nōmo asekeia reapo. Aiyaka reane, Yarusarame aporomo kaikia hemakapukua risikinapo.’

<sup>21</sup> Airakano Unihae Yasumo anoaki someraka, ‘Né pusie. Yamenoa, Yu aporohoanafonosaki soko, nōmo someane some kakako pusie.’ Aiyaka Yasumo anoaki somesapo.”

<sup>22</sup> Aiyaka Poremo tafaraka somerakano, aporoamo kaiyiáne, Yu aporohoanafonosaki somehoko pusiesapo, airakano kaikia, aporo suamo sakepamo wáraka, “Poreane aporo watikisapo. E rusua kukunie. E rekeane siahoasifareapo.”

<sup>23</sup> Aiyaka ipu sakepamo wáraka, saperaka, namina pasu horomokoa mokoateraka, airirakano kokotonomo soko fauraka su koakamayapuraspao.

<sup>24</sup> Koakamayapurarakano, Rome aporo ame satinimo someraka, “Ame aporomo apea Poreane karikia pusie. Yu aporomo manakano Pore hisiraka, sakepamo wárakanare? Aporoamo ipi watikisane hufitaehoasimo, e sakomo rusie.”

<sup>25</sup> Airakano Pore matia ruko eane taporakano, Poremo ame aporo koporoaki someraka, “Ano Rome aporopo. Arirakano kamani aporomo someaka marerakano, Rome aporo watikiaka rekenone, hukurura aporomo takekeia someaka motoakosapo. Rome aporoane nenakamaka rurafapo. Asiamo anoane fanasioanie, aiyaka somehoane siahoasireare? Repo apo sakomo ruane siahoasireare?”

<sup>26</sup> Airakano ame aporo koporomo kaikia pukua, ame aporo satiniaki someraka, “Mari rakanore? Aporoane ipi Rome aporopo. Rome aporosasamo e ruane siahoasifareapo.”

<sup>27</sup> Airakano ame aporo satiniane Pore rea pekea someraka, ‘Né Rome aporore?’ Aihohanine Poremo aorakano kaikia

<sup>28</sup> ipi someraka, “Rome aporo paoraka rekeakosakipoko, Rome kamaniaki nōmo mone kára kasapo.” Airakano Poremo someraka, “Ano kakaro Rome aporopo. Takapesa maiya amo, ano Rome aporo takapesapo.”

<sup>29</sup> Airakano Poremo watikisane hufitaehoasimo aporomo sako mokoa ruko pesane, wate foaka finiti pukua metakarisiapo. Ame aporo satinimo hemakapuraka, “Pore ipi Rome aporosasamo, Rome aporo nōmo senemo tapohoane siahoasifareapo,” aiyaka ame aporo satinimo hemakapukua fofasapo.

*Yu aporo sarimaraka risiakipoko Pore karikia pusuane oyapo.*

<sup>30</sup> Waka mituru, Yu aporomo Poreaki hukurukusa kepoane ame aporo satinimo hemakapukusakipoko, pirisiti aporo káraki soko, Yu aporo sisimaki soko, Kotimo somemane tisa aporoaki soko, "Sarimahoanie," aisapo. Ame aporo satinimo someraka, "Aporoane sememo taposane fisihioanie." Airakano fisiraka, aporo su sarimaraka risiakipoko, Poreane karikia pusuapo. Karikia pekea, satinimo Poreaki someraka, "Ne ipu hikumisi neneme titipia reae," aiyaka ame satinimo somesapo.

## 23

*Aporo su sarimasakipoko Poremo tafaraka somesane oyapo.*

<sup>1</sup> Arirakano aporo sarimasa suane Poremo aseraka someraka, "Maeo, fana soko, yumo soko, maiya suamo Kotimo ano himua aserakano, nōmo himumo ano siapo, aiyaka hemakapurakarakanō nōmo kairapo."

<sup>2</sup> Airakano pirisiti aporo fanaraka rea, Ananásemo aseane, Pore makeraka aporo metakira risiaki someraka, "Aporoane akaia rusie."

<sup>3</sup> Airakano Poremo someraka, "Ne Kotimo rukusapo. Ira watikisa aporomo aseako-hoamo, pene pakaesamo paikia, makata watikisane sekenapo. Sekena aiyáka, ne himu watikisane aporomo aseakohoamo nōmo sekesapo. Kotimo somemane kekemaraka nōmo ano maroporaka ararehoafunusa nine, nōmo ano rusierakane, Kotimo somemaneane nōmo mamosorakanapo."

<sup>4</sup> Airakano aporo metakira risiamon someraka, "Pirisiti aporo fanaki aiyáka hia somehoane siahoasifareapo."

<sup>5</sup> Airakano Poremo someraka, "Maeo, e pirisiti aporo fanaraka reane, nōmo hemakapusuafapo. Arirakano Kotimo sawia popasane oyapo. 'Yu aporo unihaeaki watikiaka somehokopo.' Aiyaka popasasamo aporoane pirisiti aporo fanaraka reane nōmo hemakapusa satiki, aiyaka somehoafunufapo." *(Kisim Bek 22:28)*

<sup>6</sup> Aiyaka Poremo aseane, Ferese aporo metakira soko, Satusi aporo metakira soko, sarimaraka risikino asesapo. Asekeia someraka, "Maeo, ano Ferese aporopo. Nōmo ata soko Ferese aporopo. Nōmo hemakapusuane, aporo kusua keseke Kotimo maturikia taehokosapo. Aiyaka hemakapurasarepo ano hukuarure."

<sup>7</sup> Airakano Ferese aporomo Satusi aporoyaki namina tafatatasapo. Ferese aporomo haku hemakapukua, arirakano Satusi aporomo haku hemakapukua, aiyáka ipu himumo hemakapusuane kekeporaka hemakapusuapo.

<sup>8</sup> Arirakano Satusi aporomo hemakapuraka, "Aporo kusua keseke maturikia taehokosafapo. Arirakano Hepene aporo hakásá soko rekenafapo. Arirakano ho soko rekenafapo," aiyaka Satusi aporomo hemakapusuapo. Arirakano Ferese aporomo hemakapuraka, "Aporo kusua keseke maturikia taehokosapo. Arirakano Hepene aporo soko risikinapo. Arirakano ho soko risikinapo," aiyaka hemakapusuapo.

<sup>9</sup> Arirakano ipu kekepo hemakapukua, aporo suamo sakepamo wáraka sapesapo. Saperaka risina, metakira Ferese aporo Kotimo somemane tisa aporo takahikia tafatatasara someraka, "Aporoane watikiáka rakisiafapo. Hepene aporomo soko metao, homo soko metao, eaki some karakasiapo. Epo somehoane siahoasireapo."

<sup>10</sup> Airakano aporo suamo saperaka wesapo. Werakano ame aporo satinimo ipi ame aporoaki someraka, "Ipu Pore rukua kikirapaka repo apea e karikia pusie." Airakano Poreane ipu apea karikia pusuapo.

<sup>11</sup> Karikia pukua namina apea pauraka reakipoko, ereamo Unihae Yasuane Pore rea peraka Poreaki someraka, "Poreo, ne mapiraraka rekeanie. Namohokopo. Anoane Yarusarame sitia nōmo some kasá aiyáka, Rome sitia soko nōmo some kakakosapo," aisapo.

*"Pore rusua kukusapo."* Aiyaka aporomo somesane oyapo.

<sup>12-13</sup> Mituru fiarakano Yu aporo foti (40) su sarimaraka risiakipoko, aporo metakira iaki paoraka sarimaraka someraka, "Pore isiapo rusua kukusapo. Pore rusua kukusiraka, makata nenáne soko he soko sokoiraka risikiakosapo. Isiapo makata nenáne su nakosafapo. Poreane rusua kurakano isiapo makata nakosapo. Isiapo kakaro somerakanapa."

<sup>14</sup> Aiyaka aporoane pekea pirisiti aporo káraki soko, Yu aporo sisima soko, i risia pekea someraka, "Poreane isiapo rusua kukusapo. Pore rusua kukusiraka makata nakosane isiapo sokoihokosapo. Isiapo kakaro somerakaripo. Someane metakariakosafapo.

<sup>15</sup> Asiamo Pore rukusakipoko repo suamo aporo meta murikimaka, ame aporo satini rea pusiehoanie. Pukua epo ame aporo satiniaki someraka, 'Pirisiti aporo káramo soko, Yu aporo sisimamo soko, Kotimo somemane tisa aporomo soko, i su arisia, Poreane karikia

punie. Efera hunia Poremo some kepoane ipu koteaka kaiyakosakipoko karikia punie.' Aíyaka kotafe somehoanie. Airakano isu fararisiakipoko Pore hauaka ikia perakano, isiapo e rusua kukusapo," aisapo.

<sup>16</sup> Arirakano Pore rukusapo aisane, Poremo ipi makai hokosamo kairaka, ame aporomo apea pukua Poreaki somesapo.

<sup>17</sup> Somerakano ame aporo koporoaki Poremo someraka, "Hokosa rauamo satiniaki somehoasimo nómō karikia pusie."

<sup>18</sup> Aíyaka somerakano ame aporo satini rea, hokosa rauane ame aporo koporomo karikia pukua, ame aporo satiniaki epo someraka, "Hokosa raua omo neaki makata somehoasimo Pore tipura reamo karikia pusiesapo." Aíyaka ame aporo koporomo somerakano,

<sup>19</sup> hokosa rauane ame aporo satinimo tau haku karikia pukua, epo hákasa kaiyisimo someraka, "Añoaki yakapa somehokosare?"

<sup>20</sup> Airakano hokosa rauamo someraka, "Yu aporomo efera hunia Poremo some kepoane koteaka kaiyakosapo, airakasapo. Pirisiti aporo káramo soko, Yu aporo sisimamo soko, Kotimo somemane tisa aporomo soko, ipu kanisoromo apea Pore karikia peanie, aíyaka rau neaki somehokosapo, airakasapo.

<sup>21</sup> Ipu someane nómō kakimakopo. Apea Pore karikia purakano Yu aporo foti (40) su tau fararisiamo Pore rukusapo. Ipu Pore rukusakipoko makata nenáne sokoairakanapo, airakasapo. Yumo Pore ruko tokenapo. Nómō karikia perakarihoamo ipu asekea tokenapo."

<sup>22</sup> Airakano hokosa rauaki ame aporo satinimo someraka, "Yumo ne pusie. Nómō anoaki makata somesane mahameanie. Aporo metaki somehokopo," aíyaka satinimo somesapo.

#### *Kamani unihae Fírikisi rea Pore karikia pusiesane oyapo.*

<sup>23</sup> Ame aporo koporo tetáki ame aporo satinimo peaaeka perakano tetáki epo someraka, "Ere titipiama Sisaria taonea Fírikisi unihaeaka rea a Pore karikia punie. Karikia pusimo makata su sarimahoanie. Ame aporo metakira tu harote (200) su sarimaraka, arirakano ame aporo metakira tu harote (200) suamo ira rokopa mokoa pusimo sarimaraka, ame aporo metakira seweneti (70) su saro hosea ripaka pusimo sarimahoanie.

<sup>24</sup> Saro hosea Pore ripakasimo sarimaraka puraka kamani unihae Fírikisimo apea koteaka asekea karikia punie."

<sup>25</sup> Aíyaka someraka, sawi Fírikisimo menohoasimo ame aporo satinimo sawi poparaka makesapo. Sawi popasane oyapo.

<sup>26</sup> "Fírikisi, né Sisaria taonea unihaeaka rea, neaki nómō sawi poparaka makerakanapo. Ano Korótiasi Rísiásemo néaki poparaka makerakanapo. Né koteaka rekenare?

<sup>27</sup> Poreane Yu aporomo waseremaka rusua kusuahopo. Rurakano nómō kaiyiáne Pore Rome aporosasamo, nómō ame aporo sarimaraka, e ararehoko pusuapo.

<sup>28</sup> Arirakano Poreaki mahisinane kepoane kaiyakosakipoko, nómō Pore karikia pukua, pirisiti aporo kára soko, Yu aporo sisima soko, Kotimo somemane tisa aporo soko, sarimaraka risiakipoko a karikia pusuapo.

<sup>29</sup> Pukua Poreaki mahisina kepoane oyapo. Namina Pore hukururaka rusua kukunie, aíyaka someaka motoane siahoasifareapo. Tipura makeanie, aíyaka someaka motoane siahoasifareapo. Yu aporomo somemane mamososapakanpo ipu hukurusuapo.

<sup>30</sup> Arirakano Yu aporo metakiramo Pore rusua kukuko, tau fararisikinapakanpo, ne rea Pore foaka karikia pusiesapo. Nómō Poreaki kaiyisimo mahisina aporoane soko neaki somehoko pusiesapo. Ayapa." Aíyaka ame aporo satinimo popasapo.

<sup>31</sup> Poparaka faraka sawi ane ame aporoaki karakano, ereamo ame aporomo Poreane karikia pukua, Atipátarisi taonea pausapo.

<sup>32</sup> Mituru fiarakano ame aporo metakira hauaka ikia pusuane, Atipátarisi taoneane metakarikia, i namina apea poparishiapo. Arirakano ame aporo metakira saro hosea ripaka pusuane, Poreyaki hakása pusuapo.

<sup>33</sup> Pukua Sisaria taonea i pauraka, kamani unihae aporo area Pore karikia puraka, kamani unihae aporoaki sawi poparaka makesane kasapo.

<sup>34</sup> Karakano, sawi popasane kamani unihae aporoamo menoraka Poreaki someraka, "Nómō ní hauakane mayare?" Airakano Poremo someraka, "Sirisia hauakapo."

<sup>35</sup> Airakano kamani unihae aporoamo someraka, "Né aporomo hukuruko perakano, nómō someane nómō kaiyakosapo." Aíyaka ame aporoaki kamani unihae aporoamo someraka, "Kamanimo ape Herotemo asekea rea apea Pore karikia pukua, tipura makeraka nómō asekea rekeanie," aisapo.

<sup>1</sup> Arirakano ere fiane kakoreasu faraka pirisiti aporo fanaraka reane Ananáse soko, Yu aporo sisima soko, Sisaria taonea pusuapo. Pukua aporo hakása meta yano motosa Tetárase i patera asekeea, ipoko arareraka somehoko pusuapo. Pukua kamani unihae Fírikisi rea pekea Poreane hokoresapo.

<sup>2</sup> Hokoreraka marekea Pore peaeaka, e perakano Tetárasemo Poreane hokoreraka someraka, "Fírikisio. Né kárapo. Né unihaeaka reakipoko, isu auaraka risikiasimo, nómó isu araresapo. Isu koteaka risikiasimo, nómó isu arareraka nómó somemane metakira motosapo.

<sup>3</sup> Motosasamo maiya suamo isiaipo neaki suserakanapo.

<sup>4</sup> Arirakano isiaipo maiya káramo neaki someraka nómó hisihokohoamo, isiaipo some kára kakakosafapo. Nómó kaiyisimo some wakasema kakakosapo.

<sup>5</sup> Maiya suamo aporoane watikiaka reke, aporo metakiramo mahisihooasimo, epo kirimaraka someraka rekenapo. Hauaka sua Yu aporomo weasimo epo kirimaraka somerapo. Nasare aporo Yasuaki patera asesa aporo risiane Pore ipiane fanapo.

<sup>6</sup> Arirakano Kotimo ape yaposane epo mamosohokosapoko asiane isiaipo e waseremasapo. [Waseremaka Yu aporomo somemaneane isiaipo kekemarakaka Poreane hukurukusapoko asiane,

<sup>7</sup> ame aporo satini Rísiase tipia pekea, Pore waseremakohoamo isiaipo hokonomo maka reane isuaki wekea aiyáka waseremasapo.

<sup>8</sup> Waseremaka isuaki ame aporo satini Rísiasemo someraka, 'Repo Poreaki mahisiraka hukurukusane kamani unihae Fírikisimo kaiyisimo somehoko pusie,' aisapo.] Arirakano Poremo someane yumo nómó eaki kaiyinie. Kairaka isiaipo somesane soko, epo ipi somehokosane soko hakása yinerakano, nómó isuaki, 'Repo kakaro somehoareapo,' ai-hokosapo."

<sup>9</sup> Aiyáka Tetárasemo somerakano Yu aporo metakiramo someraka, "Ao. Someane kakarakae," aisapo.

#### *Fírikisimo hukururakano Poremo ipi hemakapusuane some kasane oyapo.*

<sup>10</sup> Kamani unihae Fírikisimo Poreaki someraka, "Nómó ní hemakapusuane some kasie." Airakano Poremo someraka, "Keremisi yakaimo, hauaka wo nómó Yu aporo suane koteaka maroporaka reke, nómó watikiaka rakianafonosakipoko, nómó néaki somehoko seserakanapo.

<sup>11</sup> Ere fia yape kenosu (12) faraka, Yarusarame sitia Kotiaki kekererekoko, ano hisiapo. Hisiane, nómó aporo metaki kairakano, aporoamo someraka, 'Ao, kakaro yaiya hisiapo,' aihokosapo.

<sup>12</sup> Asiane Kotimo apea soko, Yu aporomo sarimana apea soko, hauaka moroa soko, nómó aporo metaki kirimaraka somerakano, ipu ano asesafapo.

<sup>13</sup> Ipu asekeanafonosasamo ipu anoane topakamaraka somerakanapo. Kotafe someraka, yumo ipu anoane topakamaraka somesane, nómó kakaroripo, aihoasimo somerakanapo. Ano asesa aporoane hakása soko, ape wo rekenafapo.

<sup>14</sup> Nómó hemakapusua hákasane nómó kaiyisimo someane oyapo. Yasumo ipi ikia kara hákasa á, ano kekemarakaka purakanapo. Yasumo someane nómó kekemarakaka rakirakano asekeea, ipu someraka, 'Yasumo someane kakimaka rakira aporo akiyaki isina hakása ninesafapo,' aisapo. Arirakano Yasumo tarisia aeyaka nómó enomaka, isiaipo makasa kaua kekemamo Kotiaki nómó kekererakanapo. Mosesemo somemane motosane nómó kakimaka, porofete aporomo popasane soko, nómó kakimaka rekenapo.

<sup>15</sup> Kakimaka reke nómó hemakapuan, aporo hinamo kusuane Kotimo maturikia taehokosapo. Koteaka risiane soko, watikiaka risiane soko, suane Kotimo maturikia taehokosapo. Maturikia taehokosane ipu soko kakimasapo.

<sup>16</sup> Asiamo Kotimo soko, aporomo soko ano aserakanano, maiya suamo nómó himumo ano siapo, aiyáka hemakapurakarakano, kaiyakosakipoko ano koteaka rekenapo.

<sup>17</sup> Keremisi yakaimo Yarusarame sitia ano hisiafapo. Kawe yumo, Yarusarame sitia, Yu aporo fesenosaki mone kakako mokoa ano hisiapo. Arirakano Yarusarame sitia Kotiaki makata yaku kakako maka hinaka eaki nómó susesapo.

<sup>18</sup> Kotiaki makata yaku kakakosakipoko, nómó Mosesemo somemaneane kekemarakaka makata rakisiapo. Rakikia, Kotimo apea yoroako ano siaraka reapo. Arirakano ano Kotimo apea rekeno, Yu aporo metakira Esea hauaka aeyaka pesamo soko ano asesapo. Ipu aseane, ano aporo yakaiyaki rekeanafonoraka, aporo metayaki weako sape mehoafonoraka, aiyáka ano siaraka rekeno ipu asesapo.

<sup>19</sup> Ano asesa aporoamo anoaki makata hukurukusa rekenone, neaki somehoko pea-funusa nine, i pesafapo.

<sup>20</sup> Peanafonorakano aporo arisia omo namina apea sarimarakা, ano hukurusua maiya amo nōmo yakapa watikiaka rakisiapakanо ipu kaisiare? Ipu makata kaisia satiki neaki somehoafunupo.

<sup>21</sup> Asiāne nōmo some hakāsa meta nōmo somehoane namina hisisapo. Namina sari-maraka ano hukurusua maiya amo ano takahikia someraka, ‘Aporo kusuane keseke Kotimo maturikia taehokosapo.’ Aiyaka somesasamo, ano hukuarure.” Aiyaka Poremo somesapo.

<sup>22</sup> Poremo somerakano, Yasu Keresoa paosa aporomo rakirane Fírikisimo kaisiapo. Kaikia haru hukuruanafonoraka epo someraka, “Fore yia motorakanapo. Keseke ame aporo satini Rísiase perakano, efera hunia nōmo kaiyakosapo.”

<sup>23</sup> Aiyaka ame aporo koporoaki epo someraka, “Pore tipura makesane asekea rekeanie. Tipura makesane ipi wakasema koraka reke siahoasireapo. Ipi aporo tákemo e makata nakosa soko kayane siahoasireapo,” aiyaka Fírikisimo somesapo.

#### *Fírikisipe Túrusira tetāki Poremo some kasane oyapo.*

<sup>24</sup> Kamani unihae Fírikisiane ipi Rome aporopo, asiane ipi asea ane Yu hinamopo. Arirakano ere fiane sere hukusi faraka, Fírikisi ipi asea Túrusira tetā peraka Poreaki peaesapo. Peaerakano Poreane pekeia someraka, “Yasu Keresoaki himu hakásaraka hemakapukua risikianie.” Aiyaka Poremo some karakano tetapō kaisiapo.

<sup>25</sup> Tetapō kaiyisimo Poremo efera hunia úyaka somesapo. “Ereketaeraka rekeanie. Arirakano kaumo watikiaka hemakapukua rakirane rukupateraka metakarinie. Arirakano keseke Kotimo aporo kotesane parakuraka kikisiraka hakua murikia, arirakano aporo watikisane parakuraka kikisiraka hakua murikia, aiyáka parakuraka takekeia kikisihokosapo.” Airakano Fírikisimo namoraka someraka, “Yumo né pusie. Asiamo keseke maiya metamo neaki efera hunia somehoko peaniehokosapo.”

<sup>26</sup> Aiyaka Fírikisimo hemakapukua, “Pore tipura makesane tonotaehoasimo, epo anoaki mone kakakosapo.” Aiyaka hemakapukua, maiya yakaímo Poreaki somehoko peaesapo.

<sup>27</sup> Arirakano keremisi tetā faraka Fírikisi hauaka meta pusuapo. Pusiraka reke, Yu aporomo seséhoasimo Pore tipura makesane tonotaesafapo. Tonotaenafaraka metakarikia purakano, Pósiase Fésétase kamani unihaeaka asekea rekeako pesapo.

## 25

*“Rome aporo unihae Sisamo nōmo someane kaiyisimo e rea ano puko seseripo,” aiyaka Poremo somesane oyapo.*

<sup>1</sup> Fésétase Sisaría taonea pekea, ere fiane isia Sisaría taonea waka, mituru metakarikia, Yarusarame sitia hisiapo.

<sup>2</sup> Hinakano pirisiti aporo fanamo soko, Yu aporo fanaraka risiamо soko, Fésétaseaki Poreane hokoresapo.

<sup>3</sup> Hokoreraka ipu someraka, “Isu seséhoasimo Yarusarame sitia Pore pasimaka peae-hoanie.” Aiyaka ipu tau hemakapuraka, “Pore perakano isu ikia kara fararisiamо e waseremaka rusua kukusapo.”

<sup>4</sup> Aiyaka hemakapusua nine, Fésétasemo someraka, “Sisaría taonea Pore tipura makesane yia rekenapo. Maiya hi makerakano ano Sisaría taonea paripukusapo.

<sup>5</sup> Paripurakano re aporo fanaraka risiane anoyaki hakāsa puraka, Poremo watikiaka rakirakanone, e hukurunie.”

<sup>6</sup> Aiyaka Fésétasemo someraka Yarusarame siti yia reke, ere fiane karisu soko metao, kaeyakosu soko metao faraka, Sisaría taonea e paripusuapo. Paripukua, ere hakásamo waka, mituru fiarakanо, hukurura apea pukua kake, “Pore karikia peae,” aisapo.

<sup>7</sup> Aiyaka Pore karikia perakano, Yarusarame siti aeyaka Yu aporo pekea, Poreyaki hakāsa risike, ipu Fésétaseaki Poreane namo kakaro mokoatikiaka hokoresapo. Hokoresane, kaisia aporo wikenisiane rekeanafonosamo aporo metamo kakaroripo, aisafapo.

<sup>8</sup> Aihoanafonorakano Poremo tafaraka someraka, “Yu aporomo somemaneane nōmo mokoatikisafapo. Arirakano Kotimo apeane soko, nōmo mokoatikisafapo. Arirakano Rome aporo kamani unihaeane soko, nōmo mokoatikiraka somesafapo.”

<sup>9</sup> Airakano Yu aporo maseséraka Fésétasemo Poreaki someraka, “Né pasimaka Yarusarame sitia hikia ipu hokoresane, nōmo takekeia maropohoane siahoasireare?”

<sup>10</sup> Airakano Poremo someraka, “Ano wo reakipoko Rome kamani aporomo takekeia maropohoane siahoasireapo. Asiamo Yu aporoane nōmo mokoatikisafapo. Mokoatiki-hoanafonosane nōmo kaisiapo.

<sup>11</sup> Arirakano nōmo watikiaka rakirakanо ipu ano rusua kukunie, aihoane siahoasireapo. Rusua kukunie, airakanone nōmo metakarinie, aihokosafapo. Asiāne nōmo watikiaka rakisiafapo. Yu aporomo ano kotafe yia hokorehoane siahoasifareapo. Yu aporo

risiakipoko ano karikia pukupo. Rome kamani unihae Sisamo maropohoasimo eaki somehoko ano seseripo."

<sup>12</sup> Airakano Fésetasemo aporo metakiraki someraka, "Poremo Sisaki somehoko hiane siahoasireare?" Airakano ipu someraka, "Ao, siahoasireapo." Airakano Fésetasemo Poreaki someraka, "Rome aporo unihae Sisaki nōmo somehoko seserire? Ne seseripo airakano, e rea né karikia hiakosapo," aisapo.

*Unihae Kini Akarípa soko ipi papā Pénisi soko Sisaria taonea pesane oyapo.*

<sup>13</sup> Wakasema nina unihae Kini Akarípa soko, Pénisi soko, Fésetase aseako Sisaria taonea pesapo.

<sup>14</sup> Ere fia yakai faraka, Poreane unihae Kini Akarípaki Fésetasemo someraka, "Fírikisi unihaeaka reamo Pore tipura makesapo. Makesane ano pesa sereamo tipura makesa yaiya rekesapo.

<sup>15</sup> Ano Yarusarame sitia hinakano, pirisiti aporo fanaraka risiamo soko, Yu aporo sisimamo soko, Poreane hokoreraka anoaki someraka, 'E fanasihoko someaka motoanie,' aisapo.

<sup>16</sup> Airakano nōmo someraka, 'Mokome fanasihokosafapo. Asiamo Rome kamanimo aporo meta fanasihoko mokome someaka motorafapo. Makata hukurura aporoamo, aporo makata hukuruko pesaki, hikumisia some kaka hukururapo. Arirakano aporo makata hukuruko pesamo, epo ipi makata ásiane some karápo. Some karakano some kepoane Rome kamanimo kaikia takekeka someaka motorapo.'

<sup>17</sup> Aiyaka iaki someraka Sisaria taonea ano pariperaka, i soko taone wo perakano, ere hakásamo isina waka, mituru Poremo someane kaiyakosakipoko nōmo, 'E karikia peae,' aisapo.

<sup>18</sup> Karikia perakano nōmo hemakapuraka, 'Kamanimo yaposane Poremo rukupateraka rakisisamo, ipu eane hukurukusapo,' aiyaka nōmo hemakapusuapo. Asiāne ipu ayiáka hukurusuafapo.

<sup>19</sup> Asiāne hukurusua kepoane oyapo. Yu aporomo makata kurikurinane soko, aporo hakásamo meta kusua, yano motosa Yasuane soko, tafatafasapo. Tafatafarakano Poremo someraka, 'Yasu kusuane maturikia taesane yumo rekenapo.' Airakano ipu someraka, 'Wae, Yasuane maturikia taesafapo.' Aiyaka tafatafasapo.

<sup>20</sup> Tafatafarakano kepoane nōmo himetesasamo maropohoane siahoasifareapo. Asiamo Poreaki nōmo someraka, 'Yarusarame sitia né maropohoasimo hiakosare?'<sup>21</sup>

<sup>21</sup> Airakano Poremo someraka, 'Wae, Rome kamani aporo unihae Sisamo maropohoasimo, e rea ano hiakosapo.' Airakano Poreane Sisa rea hiakosakipoko yumo kau asekea rekeno, e tipura apea yu reae, aisapo." Aiyaka Fésetasemo somesapo.

<sup>22</sup> Airakano Fésetaseaki Akarípamo someraka, "Poremo someane nōmo kaiyakoripo." Airakano Fésetasemo someraka, "Rau e karikia perakano nōmo kaiyakosapo."

<sup>23</sup> Airakano, waka mituru Akarípape Pénisi tetā kau rakikia, aporomo makata somera apea pesapo. Peraka tetáyaki ame aporo satini soko, ape aporo fanaraka risiane soko, hakásá pesapo. Perakano Fésetasemo someraka, "Pore karikia peae," aisapo.

<sup>24</sup> Aiyaka karikia perakano Fésetasemo someraka, "Akarípao. Né aporo unihae káraro. Nōmo soko, aporo su pesa amo soko, aporo one asesie. Eane Yu aporo suamo Sisaria taonea risiamo soko, Yarusarame sitia risiamo soko, nōmo maropohoasimo ipu suamo eane topakamarakanapo. Topakamaraka ipu sakepamo wáraka, 'Poreane rusua kukunie,' aisapo.

<sup>25</sup> Asiāne epo kára watikiaka rakianafonosasamo e rusua kuane siahoasifareapo. Epo someraka, 'Rome aporo unihae Sisamo nōmo someane kaikia ano maropohoasimo seseripo. Airakasuakipoko karikia hiniehokosapo.'

<sup>26</sup> Aiyaka Rome aporo unihaeaki Poreane sawi poparaka maiyaka popahoanarakapo. Akarípao, nōmo ano ararehoanie. Poremo someane kaikia, nōmo popahoasimo kepoane anoaki somehoanie.

<sup>27</sup> Aporo tipura makesane Rome aporo unihae rea pusierakano pukua, unihaeaki hukurusua kepoane popahoanafonorakano, siahoasifareapo," aiyaka Fésetasemo somesapo.

## 26

*Poremo Akarípaki some kasane oyapo.*

<sup>1</sup> Akarípamo Poreaki someraka, "Ipu né hokoresasamo nōmo ní hemakapukua somesimo." Airakano Poremo ipiane somehokosakipoko aporo suamo kaiyisimo hokono máfaraka someraka,

<sup>2</sup> "Kini Akarípa, né unihaeapo. Yu aporomo ano hokoresane, pipu nōmo kaiyisimo nōmo néaki seséraka somerakanapo.

<sup>3</sup> Yu aporomo ainane soko, somerane soko, nōmo kaisiasamo néaki somehoko ano seséranapano. Asiasamo nōmo someane nōmo koteaka kaisie.

<sup>4</sup> Ano hokosa nina, sisimarakaka rekesuamo, nōmo makata rakisiane Yu aporomo asesapo. Maiya suamo nōmo ní aporo iramo hauaka á soko, Yarusarame sitia soko, ano reane Yu aporomo asesapo.

<sup>5</sup> Maiya suamo ano Fere se aporo reapo. Asiamo Fere se aporomo somemane nōmo enomaka, namo kakaro umisane nōmo kekemasapo. Yu aporoaki nōmo someraka, 'Poremo somerakane kakarore?' Airakano ipu someraka, 'Ao, Poremo Fere se aporomo somemane kakaro kakimaka rakisiapo,' aihokosapo.

<sup>6</sup> Arirakano wate fana isiaipo makasa kaua kekemaki Kotimo ayiakakosaposane, nōmo kakimarakano, ipu ano hukururakanapo.

<sup>7</sup> Asiamo Kotimo ayiakakosaposane, isiaipo aporo ira keno sumo kakimarakaka, ereamo soko, sere soko, maiya suamo Kotiaki kekerenapo. Kekereraka Kotimo ayiakakosaposane nōmo kakimasakipoko, Yu aporomo ano hokorerakanapo. Unihaeo, hukurura kepoane oyapo.

<sup>8</sup> Kotimo someraka, 'Aporo kusua maturikia taehokosapo.' Aisane aporo metakiramo someraka, 'Aporo kusua Kotimo maturikia taehokosafapo.' Aihorane mainakano airakanare?

<sup>9</sup> Arirakano nōmo fana Nasare aporo Yasumo yano motosane nōmo mawakasemaspao. Mawakasemaraka, ipu kakimara aporo hinamoane nōmo mokoatikisapo. Mokoatikisa maiya amo nōmo hemakapuraka, 'Nōmo koteaka rakiranapano,' aiyaka nōmo hemakapusuapo.

<sup>10</sup> Nōmo ayiáka hemakapuraka, Yarusarame sitia Keresoa paosa aporo hinamoane mokoatikisapo. Pirisiti aporo káramo ayikanierakano kaikia, Kotimo aporo hinamo yakai nōmo mokoa tipura kesapo. Tipura kesane, 'Rusua kukunie,' aiyaka someaka motorakano, nōmo soko, 'Ao, rusua kukunie,' aisapo.

<sup>11</sup> Aiyaka efera hunia soko, efera hunia soko, Yu aporomo sarimana ape metakira ano pukua, Yasu Keresoa paosa aporomo Yasu yano motosa mawakasemahoasimo, iane nōmo mokoatikisapo. Iaki nōmo kakaro kára saperaka, hauaka meta yamenoa soko, taone metakira soko, iane mokoatikihoko ano pusuapo." Aiyaka Poremo somesapo.

*Poremo someraka, "Ano Yasuaki rekeako parisapo," aisane oyapo.*

<sup>12</sup> Poremo efera hunia someraka, "Tamásakase taonea Keresoa paosa aporo hinamoane mokoatikihoko ano pusuapo. Pukusakipoko pirisiti aporomo anoaki someraka, 'Keresoa paosa aporo hinamoane mokoatikihoanie.' Aiyaka ano pusierakano, Tamásakase taonea ano pusuapo.

<sup>13</sup> Kini Akarípao, ano ikia kara tipia puraka reakipoko, maiya hi titipiāmo, hepene aeyaka fae kára faerakano nōmo asesapo. Sere maiyamo faenane wakasemapo. Fae asesane namo kakaro káraro. Ano soko, aporo anoyaki hakása pusuane soko, isu ikia kara puraka risiakipoko fae kára fasereperakano,

<sup>14</sup> isu hurupepesapo. Hurupeperaka hauaka warisike, nōmo kaiyiáne Hipuru meaka someraka, 'Soreo, Soreo, marirakano nōmo ano mokoatikirakanare?' Saro ponomakau korakemo taposoraka ira fenesamo karerakano ipi yia terapo. Aina ayiáka nōmo ano mokoatikinane, nōmo ní yia mokoatikirakanapo.'

<sup>15</sup> Airakano nōmo someraka, 'Unihaeo, né epare?' Airakano Unihaemo someraka, 'Ano Yasupo. Nōmo ano mokoatikirakanapo.'

<sup>16</sup> Yumo né takahisie. Né nōmo aporo raipa murikimako, neaki nōmo faesane tari-rakanapo. Nōmo neaki atarira one pipu nōmo asekea, aporo metakiraki somehoanie. Keseke nōmo tariakosane soko, aporo metakiraki somehoanie.

<sup>17</sup> Yu aporomo soko, Yu aporo hoanafonosamo soko, suamo né hisirakano né nōmo mafasiakosapo. Yu aporo hoanafonosaki nōmo someane some kakako punie.

<sup>18</sup> Puraka Yu aporo hoanafonosane hi katoraka risiane metakarikia faeraka risikiasimo somehoanie. I hi katoraka risiane, hi fakariasmō somehoanie. Satanemo Yu aporo hoanafonosane asekea reane metakarikia, Kotimo asekea rekeasimo some kakanie. Yu aporo hoanafonosane anoaki himu hakásaraka hemakapukua risikino, i himu watikisane nōmo mafahokosapo. Mafaraka i Keresoa paorakano Kotimo aporo hinamo murikimosa aiyaki hakása risikiakosapo,' aiyaka Yasumo somesapo.

<sup>19</sup> Asiamo unihae Kini Akarípao, hepene aeyaka Yasumo faesane nōmo asekea, epo someane nōmo kakipayasafapo.

<sup>20</sup> Arirakano fana Tamásakase taonea aporo risiaki soko, Yarusarame sitia aporo risiaki soko, Yutia hauaka sua aporo risiaki soko, Yu aporo hoanafonosaki soko, nōmo some

karka, 'Re himu watikisane rukupateraka metakarinie. Kotiaki risikiako parihoanie. Kotiaki risikiako parisane, aporo suamo asekeasimo koteaka rakikia risikanie.'

<sup>21</sup> Aíyaka nōmo Yu aporohoanafonosaki some kasasamo, Yu aporomo anoaki hisiraka, Kotimō apea ano waseremaka rusua kusuhop.

<sup>22</sup> Ipu ano rusua kukuko asiāne, maiya suamo Kotimo ano ararerakano, pipu aporo unihaeaki soko, aporo unihaeahoanafonosaki soko, nōmo some karakanap. Porofete aporomo ayiakakosapo aisane soko, Mosesemo ayiakakosapo aisane soko, someane su nōmo some akara one hakasa yiypa.

<sup>23</sup> Ipu ayiakakosapo aisane oyapo. Kereso ipi himu nekea kurakano, Kotimo e maturikia taehokosapo. E fana maturikia taeraka epo Yu aporoaki soko, Yu aporohoanafonosaki soko, faeraka risikiakosane somehokosapo. Aíyaka porofete aporomo somesane faserepesa ayareapo."

<sup>24</sup> Aíyaka Poremo kakaro taferaka somerakano, Fésetaseo sakepamo someraka, "Poreo, nōmo makata kára kaisiasamo, né himu maparitaerareapo."

<sup>25</sup> Airakano Poremo someraka, "Fésetaseo, ano himu maparitaesafapo. Nōmo kakaro somerakanap.

<sup>26</sup> Unihae Kini Akarípao, makata some kepoane nōmo hemakapurakano, néaki nōmo mapiraraka somerakanap. Nōmo faremarekea rakirafaraka, mafekemaraka ereketae rakirakarakano nōmo kaisiapo.

<sup>27</sup> Unihae Kini Akarípao, nōmo hemakapusuane, nōmo porofete aporomo someane kakimayereapo. Kakaro somerakarire?"

<sup>28</sup> Airakano Akarípao Poreki someraka, "Maiya wakasemamo ano Keresoaki rekeako parihoasimo nōmo anoaki some akare."

<sup>29</sup> Airakano Poremo someraka, "Maiya wakasemamo soko metao, maiya káramo soko metao, ane nōmo hemakapurakarifapo. Né soko, pipu aporo su pekea, nōmo some kairakasa aporoane soko, re su ano area ayiáka, re Keresoa paoraka risikiasimo nōmo hemakapurakaripo. Ayiáka risikiasimo, Kotiaki nōmo kurikuriranap. Asiāne ano tipura area ayiáka, re soko tipura kekeaa risikiasimo nōmo hemakapurakarifapo."

<sup>30</sup> Airakano unihae Kini Akarípao soko, Sisaría aporo unihae Fésetase soko, Pénisi soko, i su sarimasane takahihiraka pusuapo.

<sup>31</sup> Puraka namina susu someraka, "Aporoamo watikiaka rakisiafapo. Asiamo rusua kuane siahoasifareapo. Tipura makeane soko siahoasifareapo," aíyapa.

<sup>32</sup> Arirakano Fésetaseaki Akarípamo someraka, "Poremo someraka, 'Ipu hokoresane Rome aporo unihae Sisamo maropohoasimo ano Rome sitia hiakoripo, aíyapa.' Aíyaka Sisamo maropohoasimo epo somehoanafonorakanone, Pore tonotaehoane siahoasireapo," aíyaka Akarípamo somesapo.

## 27

### *Rome sitia Pore hisiane oyapo.*

<sup>1</sup> Akarípape Fésetase tetapo someraka, "Rome aporo unihae Sisaki Poremo somehoasimo Itari hauaka á hisehokosapo." Aíyaka Itari hauaka Rome sitia hiasim Pore soko, aporo metakira tipura kesane soko, ame aporo koporo yano motosa Yúriaseaki tetapō someraka, "Iane nōmo asekea rekeanie." Airakano iane Yúriasesmo asekea reapo. Arirakano makata rakiako ame aporo wane harote (100) ane, koporo Yúriasesmo asekea reapo. Asekea reke epo Rome aporo unihae Sisapoko rakisiapi.

<sup>2</sup> Arirakano kasu sipi hakásá Ataramítiae taone aeyaka peraka, Esea hauaka pukusapo, airakano isu kasu sipia ripaka pusuapo. Pusua amo Pore soko, ano Ruki soko, arirakano Masetónia hauaka aeyaka, Tesaroneka taone aporo Arisítakase soko, isu su pusuapo.

<sup>3</sup> Pukua ere hakásá waka, mituru fiarakano pukua, Saetone taonea pausapo. Saetone taonea Yúriasesmo Poreki makoteraka someraka, "Ní aporo tákē aseako sesérakanone, aseako pusie. Ní aporo tákēmo né arareraka makata kakasimo, ní aporo tákēane aseako pusie."

<sup>4</sup> Airakano Pore pukua paripekea, efera hunia kasu sipia ripaka pusuapo. Puraka risiakipoko, atifo kára peraka, kasu unihaea rurakano asekea, Saéparase hé tonoamo mataihooasimo, he tono taku aeyaka pusuapo.

<sup>5</sup> Pukua Sirisia hauakane soko marokeraka pukua, Pamefíria hauakane soko marokeraka pukua, Risía hauaka pauraka, Maera taonea kasu matapea kasu sipiane karimaresapo.

<sup>6</sup> Karimarekea, kasuane yia metakarikia, isu ima fokoa hikia risike, ame aporo koporomo hi susuamo kokoa aseane, kasu sipi meta Aresátia taone aeyaka pekea, Itari hauaka á hiakosakipoko perakano, epo someraka, "Kasu sipi á ripasie." Airakano isu kasu sipi á ripasapo.

<sup>7</sup> Ripaka puraka risike yia, ere fiane yakai fasapo. Sereamo atifo soko he kupayaki kára pesapo. Peraka kasu unihaea tasoakaruraka masekeame pusuapo. Kasu sipi wafayane wafororaka masekeame pusuapo. Pukua Naétase taone kasu matapea kasuane karimareakosapoko asiane, atifomo kasu unihaea ruraka tasoakarurakano, Kiríti he tono taku aeyaka pusuapo. Puraka Saómóni hauaka asekea marokeraka,

<sup>8</sup> he fe makeaka waforoaka pukua, Kasu Matape Kotesa á pauraka, kasu karimaresapo. Raséa taone makeraka Kasu Matape Kotesa á kasu karimaresapo.

<sup>9</sup> Taone á ere fia yakaimo isu waka risiapo. Arirakano Yu aporomo hokono kesa\* sereene fasapo. Fasasamo yao kaserakawi peakosa maiya ane makeraka, yao kaserakawi perapaka, kasu puane siahoasifareapo.

<sup>10</sup> Asiamo Poremo paroaka someraka, "Repo kaisie. Nōmo hemakapusuane, yumo isu puane siahoasifareapo. Isu purakanone, isu su hea koaka pukusapo. Makata fato soko, kasu sipi soko, isu aporo ripasane soko mokoatikihoasireapo."

<sup>11</sup> Airakano ame aporo koporomo Poremo someane kakipayasapo. Kakipayaraka kasu sipi maropona aporomo someane soko, kasu sipi wafayamo someane soko, epo kakimasapo.

<sup>12</sup> Asiamo tetapó someraka, "Kasu matape wo, karimareane siahoasifareapo. He kupa soko, atifo soko, kára peakosasamo kasu matape wo karimareane siahoasifareapo. Isiapo kasu matape wo metakarikia, Kiríti he tono Fínikisi taone kasu matapea karimareako purakapo. Atifo kára peakosa ere maiya amo Fínikisi taone kasu matapea karimarerakanone mataihokosapo. Matairaka atifo kára aperamo mokoatikihokosafapo." Aiyaka tetapó somesapo.

#### *Atifo kára pesane oyapo.*

<sup>13</sup> Arirakano atifo wakasema kasu keno sape aeyaka perakano, ipu hemakapuraka, "Isu puane siahoasireapo." Aiyaka hemakapukua rete kára umisa eke asia, hea makasusane fitikimaka, kasua motokoa, Kiríti he tono fe makeraka pusuapo.

<sup>14</sup> Maiya wakasemamo puraka risiakipoko, atifomo he tonoane tapikitaeraka pesapo. Peraka kasu unia

<sup>15</sup> atifomo ruraka, kasu tasoaka ruraka kasu purafaraka, atifomo kasuane maka puraka, kasu ereketae pusuafapo.

<sup>16</sup> Ereketae purafaraka, Kóta he tono makeraka, he tonoamo matairakano kasu wakasema meta kita humaresane, kasu sipi kakarua motoakosakipoko ayiane parosapo. Parorakano asekea, wakapuaka kikirimaka kasu sipi kakarua motosapo.

<sup>17</sup> Motoraka kasu sipi he kupamo rukua aronapaka, sakomo kasu sipiane otoa taposapo. Taporaka marekea, asekea toakipoko ipu hemakapuraka, Afrikia hauaka he fea atifomo maka purakarihoamo, he fea kasu sipimo he tu atura hauakakipoko, kasu petauamo hauaka atura sakairapaka, pasu farae fatarimasapo. Fatarimayane atifomo kasu sipiane nenakamaka maka pusuapo.

<sup>18</sup> Puraka risikiyia ererakano, waka mituru fiarakano, atifo yao kaserakáwi he kupa soko, yaiya peraka rekeno, makata fato ripasane kepomarekeea mokoatesapo.

<sup>19</sup> Mokoateraka ere fiane yape tetá faraka, yape isiamo kasu sipia makata toane, ipu hokonomo mokoa, he tawara mokoatesapo.

<sup>20</sup> Mokoateraka ere fia yape yakaimo, yao kaserakáwi atifo kára soko peraka, sere maiya soko, ti makata soko, matairakano, aporo suamo someraka, "Isu kukuksireapo." Aiyaka hemakapukua, "Metamo isu mafasiakosapo." Aiyaka hemakapusuane metakarisapiro.

<sup>21</sup> Ayíáka ere fia yape yakaimo, aporo suamo namoraka, makata nakosa sokoairakano, Poremo someraka, "Nōmo someane repo kakimakafunureapo. Repo manakan Kiríti he tonoane metakarikia koaraka pusuare? Metakarikia koaraka punafonosa, makata fatoane soko, makata kemo soko, su yaiya tokoafunupo.

<sup>22</sup> Asiamo yumo paroaka risikianie. Isu aporomanoane hakása soko meta kukusafapo. Kasu hákasa kenepeakosapo.

<sup>23</sup> Kotiaki nōmo kekereraka, Kotimo rakirane nōmo rakirapo. Arirakano pipu ereamo Kotimo hepene aporo ano rea pusiesapo.

<sup>24</sup> Pusierakano pekea, anoaki epo someraka, 'Poreo, namohokopo. Rome aporo unihae Sisa rea né hiakosapo. Asiamo Kotimo ararerakano, kasu sipia né soko, aporo su hakása ripasane soko, kukusafapo.'

<sup>25</sup> Aiyaka hepene aporomo somesasamo, re mapiraraka risikianie. Kotiaki nōmo himu hakásaraka hemakapukua rekenapo. Kotimo ayiakakosapo aisane, kakaro ayiakakosapo.

\* 27:9: Yu aporomo hokono kesa one, yano motosa Makata Nakosa Sokoaihoanie, aisapo.

<sup>26</sup> Arirakano atifomo kasu maka pukua, he tono meta kasu kikirimape pukusapo,” aiyaka Poremo somesapo.

<sup>27</sup> Arirakano ere fia fotini (14) amo, he tawara yano motosa Metiteréniane á kasu sipiane atifomo maka pukua, ere titipiamo kasu maropona aporomo hemakapuraka, “He fe makerakanapo.” Aiyaka hemakapuraka,

<sup>28</sup> he numua murikimakosakipoko he tu makerihoamo rura asíamo murikimako sako hea makasusapo. Makasuraka he tu atura murikimasane rura asía napa menoraka fotipo (40). Wakaseme pukua efera hunia murikimayane tetipo (30). Tetiane aseke hemakapuraka, “He seraraka wakasemaraka hauaka makerakanapo,” aiyaka hemakapusuapo.

<sup>29</sup> Aiyaka hemakapuraka, he fe makeraka, kasumo ekea rurapaka, kasu keno aeyaka eke asia rete umisane, kitafasu kitamo hukumurisiane hea mokoasusapo. Mokoasuraka i namoraka kau toke someraka, “Yao wate foaka fiasarie,” aisapo.

<sup>30</sup> Airakano kasu maropona aporomo hemakapuraka, “Kasu sipi yia metakarikia, isu hákasa pukusapo.” Aiyaka hemakapuraka, kasu wakasemane kasu sipi kára kakarua motosane, he tawara atura tau metafirirakano metafirirakanoraka kakeno namina ripakakosakipoko kotafe someraka, “Kasu unia aeyaka rete kára umisa eke asia sakomo kita hukumurikia hea motoakosapo,” aiyaka kotafe somesapo.

<sup>31</sup> Kotafe somesane, Poremo asekeea, ame aporo koporoaki soko, ame aporo metakarikia soko someraka, “Kasu maropona aporoamo kasu sipia yaiya risikianafonoraka, kasu wakasema meta ripaka purakanone, re su hea koaka pukua he nakosapo.”

<sup>32</sup> Airakano kasu sipi maropona aporoamo kasu sipi metakarikia, kasu wakasema a ripapaka, kasu wakasema ane sakomo kita hukumaresane ame aporomo pateketaesapo. Pateketaerakan he tawaramo kasu wakasema ane maka pusuapo.

<sup>33</sup> Fiahokarakano aporo suaki Poremo wakapuaka someraka, “Sokō tetámo repo makata nakosa sokoairaka, namoraka risikisuane,

<sup>34</sup> yumo makata nakosane nesie. Makata neane re wakapuhokosapo. Re aporo hakása meta kukusafapo. Re su yaiya siaraka risikiakosapo.”

<sup>35</sup> Aiyaka aporo suamo asekeea risikino, Poremo farawa maka, Kotiaki suseraka farawa mosoraka nesapo.

<sup>36</sup> Nenakano ipu suamo asekeea, himu mapiraraka hemakapuraka, ipu soko makata nesapo.

<sup>37</sup> Arirakano kasu sipia aporo ripasane menoraka, tu harote sewenetí sekese (276) ane, kasu sipia ripasapo.

<sup>38</sup> Ripasa aporo suamo makata siaraka nekea, kasu ofohoasimo kasu kakarua witi faturaka taesane hea mokoasusapo.

### *Kasu sipi arosane oyapo.*

<sup>39</sup> Yao fiana maiya amo, he fu takunane kasu maropona aporoamo aseraka e himetasapo. He kekehisiakipoko hauaka sakipu kotesa aseraka, á kasu hiakosakipoko, hemakapusuapo.

<sup>40</sup> Ayíáka rete kára umisa eke asia suane kita hukumurisiane popateraka, hea mokoasuraka metakarsiapo. Kasu maropohoko ira wae sakomo hukumurisiane sakoane popateraka, pasu farae fatarimasane efera hunia hukumareke, atifomo maka pusimo hukumaresapo.

<sup>41</sup> Hukumareke puraka, kasu unia he fea ekeakipoko kasu tu famo aturamo kikirimape pusuapo. Kasu unia ekeakake, kasu keno sapea he kupamo ruraka arosapo.

<sup>42</sup> Arorakano aporo tipura kesane he tapukua he fea rokoa tekedarikia purapaka, ame aporomo rusua kukusimo hemakapusuapo.

<sup>43</sup> Rusua kukusimo hemakapusua nine, ame aporo koporomo Poreane farimaraka hemakapuraka, “Poreane rusua kukukopo,” aisapo. Aiyaka ame aporo koporomo someraka, “He tapura aporo, re fana hea mokoasuraka he tapunie.

<sup>44</sup> Amo patera aporo metakira he tapuanafonona aporo re kasu arosa soko metao, ira soko metao mokoa, hea mokoasuraka, tapuku a risike he fea rokoa hinie.” Airakano isu su he tapukua he fea fosapo.

### *He tono yano motosa Mótá á Pore reane oyapo.*

<sup>1</sup> He tono fea isu fosane yano motosa Mótapo.

<sup>2</sup> Mótá hauaka á aporo risiamó isu seséraka araresapo. Isu yao rukua inuraka pekea risikino, ipu isu arareraka ira paikia marekea, isu hakásimo peaesapo.

<sup>3</sup> Peaerakano pesapo. Perakano Poremo ira pora eya faturaka maka pekea paisiapo. Paiyiane ira rufimo inakako makesapo. Inakako makerakano asekeea toakipoko heseke ira fatusa arakaru aeyaka pekea, Pore hokonoa rukunesapo.

<sup>4</sup> Rukunenakano, Móta aporoamo asekeea namina susu someraka, "Aporoamo aporo meta kakaro rusua kurakanareapo. Epo watikiaka rakisiasamo, e he nekea kuku-funureapo. Kukunafonorakano, hesekeku anenane kukusapo. E hitaferaka rekeakohoamo e makurakanapo."

<sup>5</sup> Airakano Poremo honko materaterahoane, heseke ira rufia huruperaka, iramo inasapo. Iramo inasakipoko, Pore koteaka siaraka reapo.

<sup>6</sup> Koteaka sia rekeno, Móta aporo suamo hemakapuraka, "Aporoane kau piriraka soko metao, foaka kuraka soko metao, ayiakakosapo." Aiyaka hemakapukua tuina, maiya káramo aseane, Pore koteaka rekeno asekeea, ipu himu meta hemakapukua someraka, "Poreane aporo haku meta reapo." Aiyaka hemakapukua Poreane makáráraka somesapo.

<sup>7</sup> Arirakano aporo su sarimarako, Pápiriasemo hauaka makeaka risiapo. Arirakano he tonoa aporo suamo unihaeane Pápiriase ipipo. Epo isuaki wakako peae, airakano isu pukua, ere fia isiamoisu waka risiapo. Waka risikino epo isu asekeea reapo.

<sup>8</sup> Pápiriasemo ipi wafaya makata takamaraka, kau sisipuraka, himuhano pukua warekeno, e warea Pore pukua, Kotiaki kurikuriraka, e kaua sakaihoane makata takamasane fasapo.

<sup>9</sup> Asiamoisu aporo su makata tasa, he tonoa warisiane, Pore rea perakano, i suane mafasapo.

<sup>10</sup> Mafarakanipu ipu isuaki makata yaku kára kasapo. Wakasema risina, keseke kasu sipia ripaka pukusaporakano, makata karasamo siahoanafonorakano, ipu makata sarikekeia kasu sipia taesapo.

*Móta apeane metakarikia, Rome sitia Pore hisiane oyapo.*

<sup>11</sup> Móta he tonoa kasu sipi meta, fana Aresátia taone aeyaka pekea, karimaresusupo. Arirakano atifo yao kaserakáwiyaki peasiraka kasu mataihosimo, kasu matapea karimaresusupo. Arirakano kasu sipi unihaeana aporo hokosa tetá murikimaka rakikia maresesupo. Arirakano ere maiya isia farakano, isu kasu sipia ripaka pusuapo.

<sup>12</sup> Isu pukua Saerakúsitaonea pauraka, ere fia isiamoisu waka risiapo.

<sup>13</sup> Waka risina, Saerakúsitaoneane metakarikia pukua, Ríkiame taonea pauraka, waka kekeea, mituru atifo kasu keno sape aeyaka peraka, kasu maka puraka reke yia, ere hakásafaraka, Putiúrae taonea pausapo.

<sup>14</sup> Pauraka Keresoa paosa aporo mae Putiúrae taonea risiamoisu, isu aseraka someraka, "Isuyaki sokó hakásamo waka risikianie." Airakano iyaki hakásawaka risina, sokó hakásafaraka marekea, Putiúrae taoneane metakarikia, hauaka ikia aeyaka Rome sitia hisiapo.

<sup>15</sup> Hikia Rome sitia pauhoane, Keresoa paosa aporo mae Rome sitia risiane, isu peaki i peaki isina hakásawaka sapenesapo. Sapenekeia i aporo metakira, Apíase makete hauaka á perakano, isina sapenesapo. Sapenekeia marekea, i aporo metakira Ape Isia kisia á perakano isina sapenesapo. Sapanenakano, Poremo asekeea Kotiaki himu hakásaraka hemakapukua reke suseraka mapiraraka reapo.

*Rome sitia Pore reane oyapo.*

<sup>16</sup> Rome sitia tipura apea Pore wasáfapo. Kamani aporomo eaki someraka, "Né ape hakua rekeane siahoasireapo. Né takaripurapaka ame aporomo né asekeea rekeakosapo." Arirakano Pore yia reapo.

<sup>17</sup> Ayiáka reke, ere fiante yape isia faraka, Yu aporo fanaraka Rome sitia risiane sarima-hoasimo Poremo peaesapo. Perakano Poremo someraka, "Maeo, isiapo aporo ira Yu aporoane nōmo mokoatikisafapo. Mokoatikihoaanafonorakano yia, Yarusarame sitia Yu aporomo ano waseremaka, Rome aporomo tipura makeasimo karikia pusuapo.

<sup>18</sup> Karikia pukua, ano hukurusuane Rome aporomo kaikia, anoaki someraka, 'Nómo watikiaka rakianafonosamo, rusua kuane siahoasifareapo. Tonotaehoane siahoasireapo.'

<sup>19</sup> Airakano Yu aporomo waeraka, tonotaehokopo, aisapo. Airakano Yu aporoamo ano nenakamakayia rurapaka nōmo someraka, 'Yu aporomo hokoresane Rome kamani unihae Sisamo maropohoasimo, Rome sitia ano hiako seseripo.' Aisa nine nōmo iaki mahisirakanafapo.

<sup>20</sup> Ano tipura makesa kepoane nōmo reaki somehokoripo. Kotimo someraka, Mafasira Aporoane peakosapo, aisane Isiraya aporomo hemakapukua kau risikinapo. Arirakano Mafasira Aporo pesane nōmo aiyaka somesa akipoko, ipu ano senemo taporaka aiyáka rukua karoraka tipura makesapo."

<sup>21</sup> Aiyaka Poremo somerakano, Yu aporo Rome sitia sarimaraka risiamo someraka, "Yutía hauaka aeyaka aporo metakiramo né tipura makesane, sawi poparaka makesafapo. Arirakano Yu aporo Rome siti wo peraka neane hokoreraka pesafapo.

<sup>22</sup> Arirakano hauaka sua aporo metakiramo someraka, 'Keresoa paosa aporo akiyaki isina hakásá ninesafapo.' Aiyaka Keresoa paosa aporoane hókomasapakae. Hókomasaparakano kaikia kepo hemakapukusakipoko, né Keresoa paoraka reasasamo kepoane isuaki somehoanie.

<sup>23</sup> Asiamo isiaipo kaiyako peakosakipoko, yumo sere murikimarakanaapo. Sere murikimasa á paurakano, isu peakosapo." Aiyaka ipu somesapo. Arirakano wakasema risina, sere murikimasa á paurakano, Pore rea aporo yakai pesapo. Perakano mituru some kepomarekea someraka toke yia, ereamo someaka fasapo. Poremo someraka, "Aporo hinamomo Kotiaki himu hakásaraka hemakapurakan, epo reane unihaeaka asekeea rekenapo." Aiyaka Yasuane ipu hernakapusimo epo someraka, "Fana Yasuane Mosesemo soko, porofete aporomo soko some kasapo. Some karakano, Yasuane Kotimo sawia popasapo. Asiamo Mafasira Aporo peakosapo, aiyaka popasane Yasu ipipo."

<sup>24</sup> Aiyaka Poremo somerakano aporo metakiramo kakimasapo. Arirakano aporo metakiramo kakipayarakano, Poremo iaki someraka,

<sup>25</sup> "Ho Kotesamo porofete aporo Aesayaki somerakano, epo isiaipo makasa kaua keke-maki some kasane kakaro hoareapo. Ho Kotesamo Aesayaki someraka,

<sup>26</sup> 'Ne pukua Yu aporo hinamooki úyaka somehoanie. "Repo kairaka kaiyakosapo. Kaisia nine kepoane repo koteaka hemakapukusafapo. Repo aseraka aseakosapo. Ásesa nine kepoane repo koteaka hemakapukusafapo," aiyaka somehoanie.

<sup>27</sup> Asiamo aporo hinamo ane himu mahimeteraka risikinapo. Ipu himo asekeea, himumo hemakapuraka hikumisiapo. Ipu senakimo kaisiane kaiyako hisiraka, senaki tisapo. Ipu himumo hemakapuko hisiraka, koteaka hemakapurakanafapo. Ipu himu watikisane nōmo mafahoasimo i anoaki risikiako parirakanafapo.' Aiyaka Ho Kotesamo Aesayaki somerakano popahoareapo. *(Aisaia 6:9-10)*

<sup>28</sup> Arirakano makata meta soko nōmo reaki someana one, repo hemakapunie. Kotimo arareraka mafasirane Yu aporo hoanafonosamo kaiyisimo, nōmo iaki some kasapo. Some karakano Kotimo someane ipu kakimakosapo."

<sup>29</sup> [Aiyaka Poremo some kaka farakano, Yu aporo puraka, namina susu tafatafarape pusuapo.]

<sup>30</sup> Arirakano keremisi tetámo, Pore ipi ape hakua waka rekeakosakipoko, ape wafayaki mone kasapo. Mone kaka apea e reakipoko, aporo suamo e aseako pesapo. Perakano Poremo i asekeea, seséraka, iane peaesapo. I perakano, iyaki hakásá toke makata somesapo.

<sup>31</sup> Poremo iaki someraka, "Aporo hinamomo Kotiaki himu hakásaraka hemakapurakanone Kotimo unihaeaka asekeea rekenapo." Aiyaka Poremo some kasapo. Arirakano some meta Poremo someraka, "Mafasira Aporo, Keresoane, Yasu ipipo. Yasu Keresoane isiaipo unihaeapo." Aiyaka mapiraraka some karakano epo someane aporo metamo ruku-patesafapo.

## Rome

### **Rome sawi one mahemakapukusa someane oyapo.**

Yasu hepene yapura keremisi tuaneti sewene su (27) faraka Poremo sawi one popasapo. Sawi one Poremo popasa maiya amo Pore Korini taonea reapo. Kotipoko raiparaka rakira hinamo Fipimo sawi one maka, Rome sitia Keresoa paosa aporo hinamo risiaki makesapo.

Pore Sepéne hauaka pukusakipoko hemakapuraka, Rome sitia pekea, Rome siti aeyaka Sepéne hauaka á pukusapo. Rome sitia Yu aporo soko Yu aporo hoanafonosane soko Keresoa paoraka risiapo. Rome sitia Pore pusiraka, aporo metakiramo Yasuane some kasá aeyaka aporo hinamo metakirane Yasuaki risikiako pariraka Keresoa paosapo. Asiamo Rome sése apea aporo hinamomo Yasuaki himu hakásaraka hemakapusuane kakaro ereketae hemakapusimo Poremo tariako hemakapusuapo.

Arirakano Poremo Sepéne hauaka á puko hemakapusua nine e pusuafapo. Asiáne Pore Yarusarame sitia hisiapo. Hisiane Rome ame aporomo e tipura makesapo. Tipura reane Rome sitia karikia hisiapo. Asiamo Pore Rome siti tipura apea makesa reakipoko, aporo hinamo metakira e area perakano, Yasumo someane some kasapo.

### **Rome sawia some kepo parakuraka popasane oyapo.**

1:1-15 Poremo sawi one kepomarekeea popasapo.

1:16-17 Aporomo Kotiaki himu hakásaraka hemakapurakano Kotimo ipi ereketae ainane karápo.

1:18-3:20 Aporo hinamomo watikiaka rakirasamo Kotimo fanasinane motorapo.

3:21-4:25 Aporomo Yasu Keresoaki himu hakásaraka hemakapurakano, Kotimo yaku arareraka mafasirapo. Somemanemo aporoane mafasirafapo.

5:1-7:25 Makata kotesane soko makata watikisane soko popasapo.

8:1-39 Ho Kotesamo isu ararenapo. Arirakano Kotimo isuaki himu tumurumo hemakapurapo.

9:1-11:36 Maiya yumo Yu aporomo Yasu Keresoane kekemahoanafonosa nine, keseke Kotimo ararerakan i risikiako pariraka Yasu Keresoane kekemahokosapo.

12:1-15:13 Keresoa paosa aporoane koteaka risike someane kakimakasimo popasapo.

15:14-16:27 Poremo some meta someaka ayapasane sawi wo popasapo.

### *Aporo hinamo Rome sitia risiaki Poremo sawi poparaka makesane oyapo.*

<sup>1</sup> Rome aporo hinamo reaki ano Poremo sawi one poparaka makerakanapo. Yasu Keresomo makata rakira aporo ane anopo. Yasumo ano tarira aporo hoasimo murikimarakasupo. Kotimo some kotesane nōmo aporo hinamoaki some kakimasimo Yasumo ano pusierakasupo.

<sup>2</sup> Arirakano, "Some kotesa kepo ane nōmo aporo hinamoaki some kakakosapo," aiyaka wate fana Kotimo somehoareapo. Kotimo ipi ayiakakosapo aisane porofete aporomo Kotimo sawia popahoareapo. Popasane kakaro yasiapo.

<sup>3</sup> Kotimo some kotesa amo kepoane ipi Hokosa pesa ayapo. Unihae Tefetemo aporo ira wainepesá á, Kotimo Hokosane aporomano kau aiyáka takapereapo.

<sup>4</sup> Takapekeea hauaka wo Kotimo Hokosamo namo kakaro kotesa susu hemakapukua reareapo. Koteaka susureasamo Kotimo ipi Hokosa unihaeaka rekeasimo ipi Hokosane mawakapuhoreapo. Ipi Hokosa kusuane Kotimo maturikia taerakan, ipi Hokosa unihaeaka rekeasimo Kotimo ipi marereapo. Kotimo Hokosane epare? Ipi Hokosane Yasu Keresopo. Yasu Keresoane isiapo unihaeapo.

<sup>5</sup> Yasu Keresomo anoaki somesa maiya ámo Kotimo ano murikimarakasupo. Yasu Keresomo tarira aporomo rakirane rakisimo Kotimo ano arareraka murikimarakasupo. Murikimasasamo nōmo Yasupoko some karakanapo. Yu aporo hoanafonosamo Yasuaki himu hakásaraka hemakapukua Yasumo ainane kekemahoasimo nōmo some karakanapo.

<sup>6</sup> Arirakano re Rome sitia aporo hinamo arisia ane, re su Yu aporo fapo. Yu aporo hoanafonosa nine Yasu Kereso patera asekeasimo Kotimo re peaerakasupo.

<sup>7</sup> Re suane Kotimo himu tumurumo hemakapusuasamo, epo reane peaerakasupo. Repo suamo makata watikisane kikisiraka koteaka susu rakiraka risikiasimo peaerakasupo. Asiamo Ata Kotipe Unihae Yasu Kereso tetapō re suane kamenakaraka, reaki tau auaraka risirane kakimasimo, nōmo kurikurirakanapo. Aiyaka nōmo re Rome aporo hinamo suaki nōmo sawi one poparaka makerakanapo.

### *Rome sitia Poremo aporo hinamo aseako pukuripo, aisane oyapo.*

<sup>8</sup> Nōmo some fanane oyapo. Hauaka sua aporo hinamo suamo someraka, "Rome aporo hinamomo Yasuaki kakaro himu hakásaraka hemakapukua risikinapo." Airakano kaikia,

nōmo Kotiaki suserakanapo. Isupoko farimaka titipia rea aporo Yasu Keresoaki soko, nōmo suserakanapo.

<sup>9</sup> Arirakano Kotimo aseane, nōmo himumo Kotiaki kekerena aeyaka ipi Hokosane aporo hinamomo hemakapusimo nōmo some kape purakano aserakanapo. Nōmo kurikuriana maiya suamo, nōmo repoko hemakapukua kurikurirakano Kotimo ipi kairakanapo.

<sup>10</sup> Kairakanō nōmo kurikurisane oyapo. “Kotio, Rome sitia aporo hinamo ane nōmo aseako pukuripo. Aiyaka pukusakipoko maiya kāramo hemakapuraka reasasamo yumo puaere? Nōmo aoraka, ane ano pukusa ikia kārane anoaki tarinie.” Aiyaka maiya suamo nōmo Kotiaki kurikurirakanapo.

<sup>11</sup> Nōmo re aseako kāra selerakanapo. Ho Kotesamo wakapuane repo mokoasimo, nōmo re ararehokoripo. Asiamo repo Kotiaki himu hakásaraka hemakapurane kakaro káraraka risikiasimo, nōmo hemakapurakaripo.

<sup>12</sup> Aiyaka hemakapuraka ano apeta maiya amo, repo Kotiaki himu hakásaraka hemakapusua amo anoane arare, arirakano nōmo Kotiaki himu hakásaraka hemakapusua amo reane soko arare, aiyáka isu isina hakása yia arareraka risike, isu isina yia mawakapuhokoripo.

<sup>13</sup> Kereso maeo, repo hemakapusimo nōmo some one somerakanapo. Efera hunia soko, efera hunia soko, re arisia á ano peakosakipoko asiáne ano matasosapo. Arirakano ira kotesamo wate sakepamo apeta aiyáka, aporo hinamo Yasu Keresoaki paoraka himu hakásaraka hemakapusuane kárahoasimo, nōmo reaki tariakoripo. Hauaka meta Yu aporo hoanafonosaki tarisia aiyáka, reaki soko tariakoripo.

<sup>14</sup> Kotimo ano kára araresasamo, nōmo epoko rakiako kára hemakapurakaripo. Kára hemakapuraka Kiriki mé kaira aporoaki soko, Kiriki mé kaiyíánafonona aporoaki soko, makata su hemakapura aporoaki soko, makata su hemakapunafonona aporoaki soko, ipu suamo Yasu hemakapusimo some kotesane nōmo i suaki some kakakoripo.

<sup>15</sup> Asiamo aporo hinamo re su Rome sitia risia amo Yasuane hemakapusimo some kotesane nōmo reaki some kakako peako hemakapurakaripo.

*Yasu Keresoaki himu hakásaraka hemakapura aporoaki Kotimo someraka, “Nōmo ereketae ainane néaki karakanapo,” aisane oyapo.*

<sup>16</sup> Yasu hemakapusimo some kotesane nōmo some kakako ano karekerafaraka mapirarakanaapo. Kotimo wakapuane some kotesa ayapo. Some kotesane Yasu hemakapusimo some kotesa ayapo. Some kotesane aporo hinamomo kakimarakan, iane Kotimo mafasirapo. Watikiaka rakirakano asekea Kotimo mafasikia ipi ereketae ainane iaki karapo. Aiyaka some kotesane fana Yu aporo aki some kasesupo. Amo patera á Yu aporo hoanafonosaki some karakanapo.

<sup>17</sup> Some kotesa akarane oyapo. Aporo hinamoane Kotimo ipi hikumisia ereketae risikialkosa ikia kara ane isiapo some karakanapo. Wate fana soko, yumo soko aporo hinamo ereketaeraka risikiakosakipoko Kotiaki himu hakásaraka hemakapunie, aisapo. Aiyáka hemakapurakanone Kotimo ipi ereketae ainane iaki karapo. Some hakása yine wate fana porofete aporomo Kotimo sawia popahoareapo. Popasane oyapo. “Ereketaeraka risira aporo hinamomo Kotiaki himu hakásaraka hemakapukua rakipe purapo.” Aiyaka Kotimo sawia popahoareapo. (*Habakuk 2:4*)

*Aporo hinamo suamo Kotiaki patera tarisiane oyapo.*

<sup>18</sup> Mayiáka rakirakano Kotimo aporo hinamo ereketaeraka risikiasimo maropohokosare? Aporo hinamo metakiramo Kotiaki patera tarikia, arirakano aporo hinamo metakiramo aporo hinamo metakiraki mokoatikiraka, aiyáka arakiramo, Kotimo ipi aina tarisiane aporo hinamomo hisiraka kakaro someane hemakapukuhoamo matasonapo. Matasona aporo hinamoaki Koti ipi hepene yapura reamo asekea, i suaki hisiraka saperaka rerapo. Saperaka reke, ipi fanasinane aporo hinamo suaki kakama faserepereapo. Faserepesane makakamáhoareapo.

<sup>19</sup> Asiáne aporo hinamomo Kotiane hemakapusimo Kotimo ipi ainane kakama tarireapo. Kakama tarisia nine, aporo hinamomo asekea hemakapufunureapo.

<sup>20</sup> Hemakapufunusa nine marirakanosare? Aporo hinamomo himo Kotiane asekeanafonosa nine, Kotimo hauaka soko, ti soko rakisiane aporo hinamo suamo aserapo. Makata rakisiane aserakaya Kotimo ainane hemakapufunureapo. Kotimo ipi makata rakira aeyaka, ipi aina tarisiane oyapo. Koti ipi yaiya wakapuaka rerapo. Arirakano Koti ipi kakaro rekenapo. Aiyáka makata tetáne tarirakano, aporo hinamo suamo hemakapufunureapo. Hemakapufunusa nine ipu Kotiane someraka, “Kotiane nōmo asekeanafonosasamo Kotimo ainane nōmo hemakapurakarifapo,” aiyaka meaka taehoane siahoasi-fareapo.

<sup>21</sup> Aporomanomo Kotimo ainane hemakapurakayia Kotiaki someraka, "Né Koti kárapo. Néaki suserakanapo." Aiyaka kekerehoafunusa nineo kekerehoafareapo. Ipu himumo koteaka hemakapurane maparitaeraka masuaraka hemaka apura ayíáka, hemakapureapo. Koteaka hemakapunafonoraka i himuane katoraka risiareapo.

<sup>22</sup> Katosa á risike ipu someraka, "Isiapo makata su hemakapukua siaraka risikinapó." Aiyaka namina hemakapurane makáraraka rupiaka someraka risike, namina kára hasakaraka risiareapo.

<sup>23</sup> Kakaro kára hasakaraka risike, ipu Yaiya Rera Koti faesaki patera tarikia, yatafu yakasa hoaki kekereraka risiareapo. Aiyaka kekerehokosakipoko amano ayíáka murikimaka hokonomo rakikia, arirakano meta, mena ayíáka murikimaka rakikia, arirakano meta, saro pononakau ayíáka murikimaka rakikia, arirakano meta, kuyare ayíáka murikimaka rakikia, ayíáka ipu hokonomo murikimaka rakisia makataki kekereraka risiareapo.\*

<sup>24</sup> Ayíáka ipu namina hokonomo makata rakisiante kekererakan asekea, Kotimo iane metakarireapo. Namina himumo watikiaka hemakapusua amo iane kirimaraka kaíyasa makatane rakiraka risike, namina kakaro watikiaka rakiraka risiareapo. Arirakano namina kaumo hemakapusuane kekemaraka himo asekea himumo makariraka hemakapurane kekemahoareapo. Asiasamo Kotimo iane metakarireapo.

<sup>25</sup> Metakarirakan aporo hinamomo Kotimo ipi aina tarisiane<sup>†</sup> patera tarikia risiareapo. Patera tarikia risike, Kotimo iaki tarianafonosa makata aki patera asereapo. Makata su rakisia wafaya Kotiane kekerehoanafonoraka metakarikia Kotimo makata rakisiaki ipu kekerehoareapo. Asiammo Koti ipiaki hákasa kekerehoafunureapo. Yumo soko keseke soko, yaiya e ipi hákasaki kekerehoafunureapo. Kakaroripo.

<sup>26</sup> Aporo hinamomo Kotiane kekerehoanafonorakan Kotimo iane metakarireapo. Metakarirakan aporomo namina kaumo hemakapukua kaíyasa makatane rakiako seseraka risiareapo. Arirakano hinamomo namina aporoane metakarikia hinamo hokosa takéyaki purareapo.

<sup>27</sup> Arirakano aporomo namina hinamo hisiraka, aporo hokosa takéyaki purareapo. Asiammo aporo takeyaki purane himu topakapurareapo. Aporo metamo aporo metaki kau kaíyasa makatane rakiraka risiareapo. Asiakipoko makata ropo watikisane Kotimo iaki karakano, i himu neeka kau teraka risiareapo.

<sup>28</sup> Arirakano ipu Kotiane hemakapuko hisiraka metakarirakan asekea, Kotimo soko iane metakarireapo. Metakarirakan Kotiaki ipu himumo hemakapunafonosasamo makata watikisane susu hemakapukua kekemaraka rakireapo.

<sup>29</sup> Makata watikisa himua komarukua risiane uyáka komarukua risiareapo. Makata kepo namoane aserafaraka asiaminapo, aiyaka somerane soko ipu topakamaraka somerareapo. Arirakano metane makata ane ayiakakopo, aisanne ipu rakireapo. Arirakano metane aporo metamo makata kemo kárane ano makaripi aiyaka hemakapukua risiareapo. Arirakano metane makata umisa kárane aporo metamo aporo metaki maiya suamo karáreapo. Arirakano metane, e area ayíáka amo soko ayíáka rekearipi aiyaka hemakapureapo. Arirakano metane, aporo metamo metane kukusimo hemakapukua rurareapo. Arirakano metane aporo metayaki werareapo. Arirakano metane, aporo hinamo metaki kotafe somerareapo. Arirakano metane, aporo hinamo metaki hokorerareapo. Arirakano metane, aporo hinamo metane hokomaka somerareapo.

<sup>30</sup> Arirakano metane, aporo hinamo metaki kotafe topakamaraka somerareapo. Arirakano metane, Kotiaki hisirareapo. Arirakano metane aporo, fanaraka risiane hurutapiako somerareapo. Arirakano metane, namina yia makáraraka somerareapo. Arirakano metane, ipu namina yano motosa rupiaka somerareapo. Arirakano metane, makata watikisane kepomarekea rakiako hemakapurareapo. Arirakano metane ipi wafaya kaíyia tetapo someane koareaerareapo.

<sup>31</sup> Arirakano metane, "Nómo watikiaka rakisiakipoko nómo Kotiaki makata yakapa somehokosare?" Aiyaka hemakapurane metakarikia watikiaka rakiraka risiareapo. Arirakano metane, kotafe hokoa rukua somerareapo. Arirakano metane, aporo iraki namina yia himu tumurumo hemakapurafareapo. Arirakano metane, aporo mae metaki kamenakanafareapo. Aiyáka hemakapukua aporo hinamomo watikiaka rakiraka risiareapo.

<sup>32</sup> Asiasamo Kotimo somemanemo someraka, "Aporomo watikiaka rakisiakipoko rusua kukuusapo." Aiyaka somemanemotose ipu hinamo suamo hemakapureapo. Hemakapusua nine koareaenareapo. Koareaeraka yaiya watikiaka rakiraka risiareapo. Ipu

\* <sup>1:23:</sup> Fana namo aporomo yakasa ho murikimarakau rakirapo. Kau rakikia kesanapo. † <sup>1:25:</sup> Kotimo ipi aina tarisiane oyapo. (1) E kakaro rekenapo. (2) Epo makata suane rakisiapo. (3) Maiya suamo ipi kakaro yaiya wakapuaka therapo. Rome 1:18-20 á meno hoanie.

watikiaka rakisia ayiáka, aporo metakiramo soko hakása nineraka watikiaka rakirakano asekea ipu someraka, "Ane siareapo," airapo.

## 2

*Aporo hinamomo watikiaka rakirakano Kotimo ereketaeraka takekeea hukurukua parakuhokosane oyapo.*

<sup>1</sup> Watikiaka rakira aporoaki Kotimo ipi saperaka fanasinapo. Fanasinane ereketae fanasinapo. Asiamo fānasinane nōmo asekea someraka, "Sira! Ipi watikiaka rakisia amo ropoane ayapo," airapo. Aira aporo neaki nōmo someraka, "Nōmo aporo metane hukuarura maiya amo, né ní yia hukururaka sikirakanapo. Nōmo ní somesa maiya amo, aporoamo watikiaka arakira ayiáka, nōmo soko Koti patera tarikia hakása yine watikiaka rakirapo," airapo.

<sup>2</sup> Ayiáka watikiaka rakira aporo hinamo suamo watikiaka hemakapukua rakisiene, Kotimo ipi takekeea hukururapo. Takekeea hukuarura maiya ámo, ipi kepo suane hemakapukua hukurukusakipoko, ereketae susu takekeea hukurukua parakunapo. Kotimo ipi ainane isiapo suamo hemakapurapo.

<sup>3</sup> Aiyáka hemakapururasamo koteaka takekeea hemakapunie. Aporo metamo watikiaka rakirakano, nōmo asekea hemakapuraka, "E watikiaka are. Eane Kotimo ipi fanasirakano siapo," airapo. Aiyáka hemakapuraka reke yia, nōmo soko hakása yineraka watikiaka rakiraka rerapo. Hakása yineraka watikiaka rakiraka rekeno, Kotimo asekeapayahokosare? Wae, epo néane hukurukusane metakariakosafapo.

<sup>4</sup> Asiāne Kotimo reane makoteraka asekea reke, re peasimo ipi kau reke, reane epo foaka fanasinafapo. Foaka fanasihoanafonorakano, "Kotimo fanasihokosane kakaro metakarirakanare?" aiyáka hemakapurupo. Repo Kotiaki himu hakásaraka hemakapukua risikiako parihoasimo, Kotimo re makotehokosakipoko ipi kau reke, wate foaka fanasirakanafapo.

<sup>5</sup> Koti ipi kau rekeno yia, repo eaki himu hisiraka koaretaeraka risikinapo. Keseke Kotimo kára sapehoasimo, repo makata watikisane taeraka umuraka risikinapo. Aporo hinamomo makata watikisane taeraka umusa akipoko, Kotimo re hukuarura maiya amo, ipi sapenane reaki kakakosapo.

<sup>6</sup> Kotimo hukuarura maiya amo, aporo hinamo suamo asekeasimo, epo ereketaeraka takekeea parakuraka fanasihokosapo. Fanasina maiya amo aporo hinamomo namina rakisiene Kotimo asekea, kakaro ereketaeraka parakuraka, makata ropo kakakosapo. Aporo hinamomo makata koteaka rakisiaki, makata ropo kotesa kakakosapo. Arirakano aporo hinamomo makata watikiaka rakisiaki, makata ropo watikisa kakakosapo. (*Buk Song 62:12; Sindaun 24:12*)

<sup>7</sup> Aporo hinamomo maiya suamo namina koteaka susu rakiraka risike, faesa a risikiako seseaka hemakapukua, arirakano Kotimo sesehoasimo rakiako hemakapukua, arirakano Kotiyaki yaiya risikiako seseaka hemakapukua, ayiáka risira aporo hinamoaki Kotimo yaiya rerane kakakosapo.

<sup>8</sup> Arirakano aporo hinamomo i namina makárarakaa, Kotiane mawakasemaraka, Kotimo kakaro someane koaretaeraka ayiáka, watikiaka risia aporo hinamoaki Kotimo kára mahisiraka ropo kakaro watikisane kakakosapo.

<sup>9</sup> Asiamo aporomo watikiaka rakisiakipoko makata umisa kakaro kára karakano, aporoane himu kára nakosapo. Yu aporomo watikiaka rakisiakipoko, iaki makata umisa kakaro kárane soko, himu nenane soko, Kotimo iaki kakakosapo. Yu aporohoanafonosamo soko watikiaka rakisiakipoko iaki makata umisa kára soko, himu kára nenane soko, Kotimo kakakosapo.

<sup>10</sup> Asiāne aporo hinamo suamo koteaka rakirakano asekea, Kotimo né kotesapo ai-hokosane soko, faesa á hokopukua risikiakosane soko, auaraka risikiakosane soko, Kotimo iaki kakakosapo. Yu aporo koteaka risiaki soko, Yu aporohoanafonosa koteaka risiaki soko, i suaki makata ropo hakása yineraka kakakosapo.

<sup>11</sup> Arirakano Kotimo aporo ira metaki himu pukua, arirakano aporo ira metaki himu punafonoraka ipi ainafapo.

<sup>12</sup> Kotimo somemanee Moseseaki kasane Yu aporohoanafonosamo kaisiafapo. Kaiyanafonosa nine, ipu himumo makata kotesane soko, makata watikisane soko takekeea hemakapurapo. Takekeea hemakapurakayia, watikiaka rakirakano, ipu takekeea hemakapura aeyaka Kotimo kekemaraka iane hukurukua fanasihokosapo. Arirakano Kotimo somemanee kaisia aporoamo soko, ipu himumo makata kotesane soko, makata watikisane soko, takekeea hemakapurapo. Takekeea hemakapurakayia watikiaka rakirakano, Kotimo ipi somemanee somesa aeyaka kekemaraka iane hukurukua fanasihokosapo.

<sup>13</sup> Asiamo Kotimo somemaneane aporomo senakimo hákasa kairakano, Kotimo “Né ereketaerareapo,” aíhokosafapo. Arirakano Kotimo somemaneane aporomo kakaro kaki-maka rakiraka rekeno, Kotimo “Ne ereketaerareapo,” aíhokosapo.

<sup>14</sup> Arirakano Yu aporo hoanafonoso Kotimo somemaneane kaisiafapo. Ipu Kotimo somemaneane kaiyanafonosa nine, Yu aporo hoanafonosa metakiramo himumo koteaka takekea hemakapukua rakiraka risiapo. Ayiáka risike ipu somemane meta kotesane motosapo. Ipu somemane meta kotesa motosane kekemaraka rakiane Kotimo somemane akiyaki hakásá yinesapo.

<sup>15-16</sup> Asiamo Kotimo somemane kaiyanafonosa nine, Kotimo somemaneane i himua Kotimo akara ayiáka, himua tarikia mahemakapurapo. Mahemakapurakanpo ipu himua makata kotesa susu tarisia hakásá yine kekemaraka, Kotimo somemaneane rakireapo. Arirakano himura makata watikisa fasereperakano kekemaraka rakisiakipoko, himu kotesa fasereperaka, “Makata watikisane rakiafunufasanine rakireapo,” airapo. Arirakano meta, himura makata watikisa fasereperakano kekemaraka rakisiakipoko, himu watikisamo himu koteaka hemakapusuane marakonapo. Asiamo hukuarura maiya amo ayiakakosane oyapo. Aporomo himura hokokaraka, “Makatane watikihoareapo. Ane rakiakopo.” Aiyaka himura mahemakapurarakano yia kakipayaraka mahamekeea rakisiakipoko, keseke hukuarura maiya amo Yasu Keresomo mafekehakosapo. Mafeke-maraka Kotimo hukurukua parakuhakosapo. Asiamo Kotimo someane nōmo some akara maiya amo, Yasumo aporomano ararenane soko, aporomano hukururane soko, some tetáne nōmo aporo hinamoaki some karapo.

*Yu aporo Kotimo somemaneane kakipayasane oyapo.*

<sup>17</sup> Yu aporo repo someraka, “Isu Yu aporoane Kotimo murikimasapo. Kotimo ipi somemaneane isuaki kasápo. Koti isuyaki hakásá rekenapo.

<sup>18</sup> Kotimo somemane amo epo hemakapusuane isuaki tarirapo. Tarirakanpo isiapo makata ereketaesane hemakapuraka,

<sup>19</sup> aporo hi katosane isiapo karikia taripe puane siahoasireapo. Aporo hi katosa risiamo asekeasimo faesane isupo.

<sup>20</sup> Kotimo somemaneane isu Yu aporomo kakimasasamo, makata su hemakapura kepoane soko, kakaro some suane soko, isiapo hemakapurakanapo. Isiapo hemakapusuasamo aporo hasaka hemakapusuaki maroporaka tarirapo. Hokosa kirimo mahime-teana ayiáka, aporo metakiramo ayiáka mahimeteraka risiane, isiapo maroporaka tarirapo.” Aiyaka re Yu aporomo someraka risikinapo.

<sup>21</sup> Someraka risike, repo aporo metakiraki tariraka yia, repo namina yia soko taria-funureapo. Repo someraka, “Makata hakimokoakopo.” Aiyaka someraka yia, repo namina soko hakimorapakae.

<sup>22</sup> Repo someraka, “Hinamo hakimakopo.” Aiyaka someraka yia, repo namina soko hinamo hakimorapakae. Repo someraka, “Yatafu yakasa hoaki kekerehokopo,” aiyaka someraka yia, repo soko yatafumo apea pukua yatafupoko makata taesane repo hakimorapakae.

<sup>23</sup> Repo someraka, “Kotimo somemaneane isu Yu aporoaki kasapo.” Aiyaka repo namina yia makáraaka rupiaka somesa nine, Kotimo somemaneane repo tapikia rakirapo. Repo ayiáka rakiraka Kotiane mawakasemanapakae.

<sup>24</sup> Ainasamo Kotimo sawia porofete aporomo poparaka, “Re Yu aporomo watikiaka rakisisasamo, Yu aporo hoanafonoso Kotimo yano motosane mokoatikiranone ane, kepoane re Yu aporopo.” Aiyaka porofete aporomo popasane yumo kakaro yairaka risikinapo. (*Aisaia 52:5; Esekiel 36:22*)

*Kau hahaeraka patena amo kepoane oyapo.*

<sup>25</sup> Re Yu aporomo anoaki someraka, “Isu Yu aporoane Kotiaki paosa aporopo. Yu aporo hoanafonosane isiapo marokerakanapo. Kotimo Eparahameaki someraka, ‘Aporo hokosa kau hahaeraka’\* patehoanie,’ aisasamo isiapo ayiáka kekemaraka patenapo.” Arirakano nōmo reaki úyaka somerakanapo. Kotimo somemaneane kakaro kekemaraka kau hahaeraka patenane kotesapo. Asiáne Kotimo somemaneane kekemahoanafonora-ka repo kau hahaeraka patenane nenakamakayia patenapo. Kotimo somemane kekemahoanafonoranone ane, re aporo kau hahaeraka patehoanafonosa aporo ayireapo.

<sup>26</sup> Asiamo Yu aporo hoanafonoso kau hahaeraka patehoanafonosa nine Kotimo some-manemo ipi himura hokokarakanpo kekemasasamo ipi kau hahaeraka patesa aporo asiápo.

\* **2:25:** Kau hahaeraka patena kepo ane uyáka patenapo. Kau hahaeraka patesekeno ane, Yu aporo irareapo, airapo. Kotimo someane ipu some kakasimo Kotimo murikimayereapo.

<sup>27</sup> Arirakano Kotimo somemanane popasane re Yu aporoyaki kakenapo. Repo namina kau hahaeraka patesa nine Kotimo somemanane tapikia rakirapo. Asiāne Yu aporo hoanafonosane kau hahaeraka patenafapo. Kau hahaeraka patehoanafonosa yiamo Kotimo ereketae aina tarisiane ipu kekemarakaka rakisiasamo, re Yu aporoane ipu marokenapo. Marokerakano asekeea aporo suamo hemakapuraka, "Re Yu aporoane Kotimo fanasihoane siahosireapo," airapo.

<sup>28</sup> Arirakano aporomo someraka, "Ano Yu aporopo." Aira aporoane kau hákasa ha-haeraka patesa ásia reke, ipi Kotiaki hemakapurafaraka rekeno, aporoane kakaro Yu aporofapo.

<sup>29</sup> Asiāne aporomo ipi himu watikisane metakarikia Kotiaki hemakapukua rekeno, aporoane kakaro Yu aporopo. Asiamo aporoane Kotiaki paosa aporopo. Aporo Kotiaki paohoasimo Ho Kotesamo tarirapo. Arirakano aporo Kotiaki paohoasimo somemanemo tarirafapo. Asiamo Kotiaki himu hakásaraka hemakapukua rea aporoane kakaro Yu aporopo. Aporoane Kotimo makáranapo. Aporomanomo aporoane makáranafapo.

### 3

*Kotimo ayiakakosaposane kakaro ayiakakosapo, aisa amo kepoane oyapo.*

<sup>1</sup> Yu aporomo someraka, "Somemanemo isu Yu aporoane mafasianafonorakano isuane maiyakakosare? Isu Yu aporo ira wainepe pesane nenakamaka makatare? Isu Kotimo aporo ira murikimasasamo, aporo kau hahaeraka patenane nenakamaka makatare?" Aíyaka somerakanaro,

<sup>2</sup> nōmo re Yu aporoaki some paripurakanapo. Aporo reo, Kotimo ipi makata kotesa susuane Yu aporoaki kayereapo. Fana Kotimo ipi someane Yu aporoaki some kasane, aporo hinamo suaki some kakasimo, Yu aporoaki some kayereapo.

<sup>3</sup> Kotimo ipi someane Yu aporoaki some karakano Yu aporo metakiramo kakimasafapo. Kakimakanafonosasamo Kotimo ipi ayiakakosaposane metakariakosare?

<sup>4</sup> Wae. Metakariakosafapo. Kotimo makata ayiakakosaposane kakaro yanapo. Aporomanomo kotafe somerapo. Kotimo ayiáka somerafapo. Arirakano Kotimo sawia popasane oyapo.

"Kotio, hukuarura maiya ámo aporo hinamoaki nōmo kakaro ereketae susu somerapo. Kakaro ereketae susu somerasamo aporomo néaki hukururaka néane hurutapiakosafapo. Hurutapianafonorakano nōmo kakaro ereketae susu someramo ipu someane marokenapo," aíyaka popahoareapo.

(Buk Song 51:4)

<sup>5</sup> Wate fana isu Yu aporoaki Kotimo someraka, "Nōmo somemanane kekemarakaka rakinie. Repo ayiáka rakianafonorakano nōmo hukurukua fanasihokosapo," aihoreapo. Aisa nine isu Yu aporomo Kotimo somemanane koaretaesapo. Koaretaerakano Kotimo ipi fanasihokosapo aíyaka somesane fanasinapo. Isiapo makata watikiaka rakirakano, makata ropo watikisane Kotimo karápo. Asiamo aporo metakiramo aseraka someraka, "Kotimo ereketae rakirakanapo," aíyaka someanamo Kotimo yano motosane makáranapo. Arirakano Yu aporomo someraka, "Isiapo makata rakisia aeyaka Kotimo yano motosane makáranakanapo. Asiasamo Kotimo isu Yu aporoane fanasihoane siahosifareapo." Ai-hoane siahosireare? Wae, siahosifareapo. Aíyaka me rukua somenane, aporo namina hemakapusua aeyaka nenakamaka me rukua somerapo.

<sup>6</sup> Aíyaka repo somehokopo. Kotimo hasaka watikiaka rakirafapo. Kotimo hasaka watikiaka rakira satiki, aporo hinamo su hauaka wo risiane ereketaeraka takekeea parakuhoanufunafapo. Asiāne aporo hinamo su hauaka wo risiane, keseke Kotimo ereketaeraka takekeea parakuuhokosapo.

<sup>7</sup> Arirakano aporomo namina hemakapusua aeyaka me rukua some meta somerane oyapo. Aporomo someraka, "Nōmo kotafe somerakanaro, Kotimo kakaro someane repo kakama kaiyakosapo. Asiamo Kotimo yano motosane repo makáranapo. Nōmo kotafe somesa aeyaka Kotimo yano motosana makárasasamo, Kotimo ano fanasihoane siahosifareapo." Aíyaka somehohane siahosifareapo. Nena aporomo aíyaka somerapo.

<sup>8</sup> Arirakano aporomo namina hemakapusua aeyaka someraka, "Nōmo watikiaka rakirakano Kotimo mafahokosapo. Mafanasamo Kotimo ipi koteaka rakirakanapo. Asiamo Kotimo ipi koteaka rakirane kárahoasimo nōmo efera hunia soko watikiaka rakiakosapo." Aíyaka aporo metakiramo somerakanapo. Ipu metakiramo anoane topakamaraka someraka, "Poremo ayiakanie, aíyaka some kasapo." Aisa aporoamo kotafe somesasamo ipu ropo watikisane mokoakosapo.

*"Aporo suamo ereketae hemakapukua risikinafapo," aisane oyapo.*

<sup>9</sup> Isu Yu aporoane maiyakakosare? Isu Yu aporomo Yu aporohoanafonosane marokenare? Koti hikumisia isu Yu aporoane fanare? Wae, fanafapo. Fana nōmo somesane oyapo. Yu aporomo soko Yu aporohoanafonosamo soko isia po suamo watikiaka rakirapo. Makata watikisa wakapuamo isu kirimaraka watikiaka rakiraka risia po.

<sup>10</sup> Arirakan Kotimo sawia poparaka,  
“Ereketae rakira aporo hinamo hakāsa meta soko rekenafapo. Kakaroripo.  
<sup>11</sup> Enomaka hemakapusua aporo hakāsa meta soko rekenafapo. Kotiane kokoa asera aporoane hakāsa meta soko rekenafapo.  
<sup>12</sup> Aporo hinamomo suamo Kotiaki patera tarirapo. Asiamo Kotimo ipi ainane kekemaraka rakira aporo hinamo hakāsa meta soko rekenafapo. Aporo hinamo koteaka ararena aporo hinamo hakāsa meta soko rekenafapo. Kakaroripo. (*Buk Song 14:1-3; Buk Song 53:1-3; Saveman 7:20*)

<sup>13</sup> Aporo hinamomo akaimo somehoramo, aporo hinamo metakirane mokoatikinapo. Aporomano hauaka raea maresa iikikisa asiapo. Asiamo ipu arumo kotafe someraka tauraka somerapo. (*Buk Song 5:9*)

Hesekemo akaimo aporomano rukunesa watikiana ayiáka, aporomano akaimo makata somerane watikisa asiapo. (*Buk Song 140:3*)

<sup>14</sup> Akaia makata watikisane komarukua risike, ekene me somerane soko, mahisiraka somerane soko, yakasa ho marekea somerane soko i akaia komarukua risikinapo. (*Buk Song 10:7*)

<sup>15</sup> Ipu aporo metane rusua kukusakipoko foaka ruko purapo.

<sup>16</sup> Ipu aporo metamo menane mokoatikianamo, aporoaki ipu makata umisane karapo. (*Sindaun 1:16*)

<sup>17</sup> Arirakan aporo hinamo metakirayaki auaraka risirane i mahimeteraka risirapo. (*Aisaia 59:7-8*)

<sup>18</sup> Ipu Kotiaki namohoanafonoraka Kotiane makáranafapo. Aporomano suane ayiáka risikinapo.” Aiyaka Kotimo sawia popahoareapo. (*Buk Song 36:1*)

<sup>19</sup> Kaisie. Kotimo ipi somemaneane Moseseki some kasane, Mosesemo Yu aporoaki some kasapo. Asiamo somemaneane Yu aporomo kekemahoasimo, somemaneamo iane asekeea rekenapo. Asiamo somemane suane Yu aporomo koteaka kaikia kekemasa nine, ipu hasaka rakirapo. Airaka ipu somemane suane kekemanafapo. Asiamo i hukuarura maya amo, ipu Kotimo hikumisia sia somehoasifasekeno, Kotimo iane fanasihokosapo. Aiyakakosa ayiáka, aporo hinamo hauaka sua risiane, Kotimo hikumisia ereketae risikianafonarakano, Kotimo iane soko fanasihokosapo.

<sup>20</sup> Arirakan Kotimo somemanemo makata watikisane soko, makata kotesane soko, makakamára ka tarirapo. Tarisia nine aporo hinamomo watikiaka rakirakan somemanemo mafanafapo. Mafahoanafononasamo aporo hinamoane Kotimo hikumisia ereketaera-ka risirafapo.

*Kotimo ipi ereketae ainane kará kepoane oyapo.*

<sup>21</sup> Kotimo ipi ereketae ainane aporomanaoaki kakakosaposane wate fana Mosesemo soko, porofete aporomo soko, popahoareapo. Kotimo ipi ereketae ainane aporomanaoaki kakasimo aporomo somemane kekemarakano, somemaneamo aporomanoane ararenafapo. Koti hikumisia aporomano ereketaeraka risikiasimo, kepo meta aeyaka ipi ereketae ainane karápo.

<sup>22</sup> Asiamo Kotimo ipi ereketae ainane kará kepoane oyapo. Aporo hinamomo Yasu Keresoaki himu hakásaraka hemakapukua risikino, Kotimo ipi ereketae ainane iaki karápo. Yasuaki himu hakásaraka hemakapusua aporo hinamo i suaki karápo. Yu aporoaki soko, Yu aporohoanafonosaki soko, ipu suamo Yasuaki himu hakásaraka hemakapurakano, Kotimo ipi ereketae ainane i suaki karápo. Kotimo aporo metakiraki kaka, metakirane metakirikia anafapo.

<sup>23</sup> Aporo hinamo suamo watikiaka rakirapo. Asiasamo Kotiane namo kakaro faesa koteaka reasasamo, epo faesa kotesane aporo hinamo su fesonoraka risikinapo.

<sup>24</sup> Fesonoraka watikiaka risikino asekeea, Kotimo iane kamenakaraka yaku araresapo. Aporo hinamomo watikiaka rakisiapoko apí akara ayiáka, Yasu kukusimo Kotimo Yasu Keresoane hauaka wó pusiesapo. Asiamo Yasumo aporo hinamopoko farimaka kusuasamo, Kotimo hukurukua fanasihokosane mafásapo. Aporo hinamomo watikiapoko Kotimo sapesane mafahoko, makata ropo ane Yasu kusua ayapo. Asiamo Yasu kuraka, aporo hinamomo watikiaka rakisia akipoko apíhoko ipi yapiane hauaka wo pusuapo. Akipoko aporo hinamomo Yasuaki himu hakásaraka hemakapurakano, iaki Kotimo ipi ereketae ainane karápo.

<sup>25</sup> Yasumo apí akara ayiáka, ipi kukusimo Kotimo e pusiesapo. Arirakano Kotimo ipi ereketae ainane wate fana reane, yumo soko, yaiya ereketaeraka reane, aporo hinamoaki tarisiapo. Wate fana aporo hinamomo watikiaka rakirakano Kotimo foaka fanasihoa-fareapo.

<sup>26</sup> Wate fana aporo hinamomo watikiaka rakisiane Kotimo asesa nine, ipi kau reareapo. Yasu peasiraka aporo hinamo risiane soko, yumo arisiane soko, i supoko farimaka Yasumo apí akara ayiáka e kurakano, Koti ipi kau reareapo. Yumo soko aporo hinamomo watikiaka rakirakano, Kotimo foaka fanasihoafunusa nine, ipi ereketae aina ikia karane aporo hinamoaki tarirapo. Ereketae ainane Koti ipipo. Yasuaki himu hakásaraka hemakapura aporo hinamoane Kotimo ipi ereketae ainane karápo.

<sup>27</sup> Kotimo ipi ereketae ainane karásamo aporo hinamomo ipu namina makata koteaka hemakapukua rakisiane rupiaka makárahoane siahoasireare? Wae, repo namina yia rupiaka somehoane siahoasifareapo. Kotimo somemanane ane kakimaka kekemana aporo hinamoaki Kotimo ipi ereketae ainane karáfapo. Yasu Kereso ipiaki himu hakásaraka hemakapura aporo hinamoaki Kotimo ipi ereketae ainane karápo. Ereketae hemakapura kepoane Yasu ipisasamo repo namina yia rupiaka somehokosane kakenafapo. Asiamo Yasu Keresoane makáraraka somehoanie.

<sup>28</sup> Asiamo aporo hinamomo Yasuaki himu hakásaraka hemakapurakano, Kotimo ipi ereketae ainane iaki karápo. Arirakano aporo hinamomo Kotimo somemanane kakimaka kekemarakano Kotimo ipi ereketae ainane iaki karáfapo. Ane isiapo hemakapurakaripo.

<sup>29</sup> Arirakano Yu aporomo someraka, "Kotiane Yu aporomo Koti hákasapo" Áiyaka somer-akan some ane somehopoko. Yu aporomo Kotiane soko, Yu aporohoanafonosamo Kotiane soko, Koti ipi hakásaya iyiyapo.

<sup>30</sup> Koti ipi hakásasamo ipi ikia kara hakásaya ayapo. Kotimo ipi ereketae aina ikia kara hakásapo. Kau hahaeraka patesa aporomo Yasuaki himu hakásaraka hemakapurakano, iaki Kotimo ipi ereketae ainane karápo. Arirakano kau hahaeraka patehoanafonosa aporomo soko, Yasuaki himu hakásaraka hemakapurakano, iaki soko, Kotimo ipi ereketae ainane karápo.

<sup>31</sup> Asiamo Yasuaki himu hakásaraka hemakapura aporo hinamo aki Kotimo ipi ereketae ainane karásamo Kotimo somemanane ane isiapo rukupatesare? Wae, isiapo rukupatesafapo. Rukupatesapo, áiyaka hemakapukupo. Asiamo Yasuaki himu hakásaraka hemakapura aporo hinamoaki Kotimo ipi wakapuane karápo. Wakapuane karakano, aporo hinamoamo himumo hemakapukua Kotimo somemanane ane koteaka kekemanaapo.

## 4

### *Eparahameaki Kotimo ipi ereketae ainane kasane oyapo.*

<sup>1</sup> Asiamo isu Yu aporomo makasa kaua kekema Eparahameane masiare?

<sup>2</sup> Eparahamemo makata koteaka rakisia nine, Kotimo ipi ereketae ainane eaki kasafapo. Kasa satiki Eparahamemo ipiane makáraharaka somehoafunureapo. Asiamo aporomo koteaka rakiraka tiki rakirakao, asiane epo Kotiaki himu hakásaraka hemakapunafonarakan, ane Kotimo eaki, "ne ereketaerareapo," airafapo.

<sup>3</sup> Arirakano Eparahameane Kotimo sawia popasane oyapo. Eparahamemo Kotiaki himu hakásaraka hemakapukua, kataka marekea reasasamo, Kotimo ipi ereketae ainane Eparahameaki karakano, Koti ipi hikumisia Eparahameane sia reareapo, áiyaka Kotimo sawia popahoareapo. (*Stat 15:6*)

<sup>4</sup> Arirakano aporomo makata rakisia akipoko makata ropo maraka, "yaku marakanapo," áiyaka hemakapurafapo. "Makata rakisia akipoko makata ropo marakanapo," áiyaka hemakapurapo.

<sup>5</sup> Asiáne Kotimo ipi ereketae ainane aporomo makata rakisia akipoko makata ropo karáfapo. Aporomo ipi himu watikisane mafahoko someraka, "Nómo makata rakira amo nómo himu watikisane mafánafapo. Aporo hinamomo himumo watikiaka hemakapusua mafánane, Kotimo ipi mafánapo. Arirakano ereketae aina karáne Kotimo ipi karápo." Áiyaka aporo hinamomo hemakapukua, Kotiaki himu hakásaraka hemakapusuasamo, Kotimo ipi ereketae ainane iaki karápo.

<sup>6</sup> Arirakano Unihae Tefetemo somesa hakásaya yine popahoareapo. Arirakano aporomo makata rakisiane Kotimo asekeea someraka, "Ne aporo ereketaerareapo," airafapo. Aporomo ipi himumo Kotiaki hemakapurakano, Kotimo asekeea someraka, "Ne aporo ereketaerareapo," airapo. Arirakano aporoane seseraka rerapo.

<sup>7</sup> Arirakano Tefetemo popasane oyapo.

"Aporomo makata watikiaka hemakapukua rakisiane Kotimo mafasasamo, aporoane Kotimo makotenapo. Aporomo makata watikisane Kotimo kososasamo Kotimo makotenapo.

<sup>8</sup> Epo makata watikisane Kotimo mafasasamo, makata watikisa akipoko efera hunia Kotimo hukurukusafapo. Makata watikisa mafarakano, mafasa aporoane kára seseraka rekeakosapo.” Aiyaka Tefetemo popahoareapo.

(Buk Song 32:1-2)

<sup>9</sup> Kotimo aporo makotesane aporo epa Tefetemo popahoareare? Aporo kau hahaeraka patesa hákasane Tefetemo popahoareare? Wae, aporo kau hahaeraka patesane soko, aporo kau hahaeraka patehoanafonosane soko, aporo suane epo popahoareapo. Arirakano Eparahameane hemakapunie. Kotimo sawia popasane koteaka hemakapunie. “Eparahameo Kotiaki himu hakásaraka hemakapukua rekeno, Kotimo Eparahameaki someraka, ‘Nómo anoaki himu hakásaraka hemakapusuasamo, né ereketaeraka rekenapo,’ aihoreapo.” Aiyaka Kotimo sawia popasane isiapo menorakanapo.

<sup>10</sup> Asiamo masinaka Kotimo Eparahameaki someraka, “Né ereketaeraka rekenapo,” aisare? Eparahameane kau hahaeraka patehoasiraka soko metao, eane kau hahaeraka pateraka reakipoko soko metao, aisare? Eparahameane kau hahaeraka patehoasiraka Kotimo eaki someraka, “Né aporo ereketaerareapo. Né siaraka rekenapo,” aihoreapo.

<sup>11</sup> Eparahame kau hahaeraka patehoanafonosa yiamo, Kotiaki himu hakásaraka hemakapukua rekeno, Kotimo eaki someraka, “Né ereketaeraka rekenapo,” aihoreapo. Asiane aporo suamo hemakapusimo Kotimo Eparahameaki someraka, “Nómo anoaki himu hakásaraka hemakapusuasamo, ‘Né Kotimo aporopō,’ aihokosakipoko nōmo ne murikimarakano, ne kau hahaeraka patehoanie,” aihoreapo. Arirakano aporo suane kau hahaeraka patehoanafonosamo Kotiaki himu hakásaraka hemakapukua risikino Kotimo someraka, “Re ereketaeraka risikinapo.” Airapo. Arirakano aporoamo Eparahameane hemakapuraka, “Eparahameane isiapo makasa kauapo,” airapo.

<sup>12</sup> Arirakano aporomo Kotiaki himu hakásaraka hemakapukua risike, kau hahaeraka patesamo soko, Eparahameane hemakapuraka, “Eparahameane isiapo makasa kauapo,” airapo. I kau hahaeraka patesasamo airafapo. Ipu Kotiaki himu hakásaraka hemakapusuasamo, “Eparahameane isiapo makasa kauapo,” airapo. Arirakano Eparahame kau hahaeraka patehoasiraka rea maiya amo, Kotiaki himu hakásaraka hemakapusua ayíáka, ipu soko Kotiaki ayíáka himu hakásaraka hemakapukua risirapo.

*Aporo hinamo suamo Kotiaki himu hakásaraka hemakapusuane Kotimo makotehokosapo, aisane oyapo.*

<sup>13</sup> Nōmo Eparahameane some meta one somerakanapo. Wate fana Eparahamemo Kotiaki himu hakásaraka hemakapukua rekeno, Kotimo someraka, “Ne ereketaeraka rekenapo,” aihoreapo. Eparahamemo Kotiaki himu hakásaraka hemakapukua reasasamo Kotimo someraka, “Néaki soko, nōmo ní aporo ira wainepe pukusaki soko, hauaka su one nōmo reaki kakakosapo,” aihoreapo. Aiyaka Kotimo makoteraka ayiakakosaposane Kotimo someaka motoareapo. Eparahamemo Kotimo somemane kekemasasamo, Kotimo makoteraka ayiakakosaposane someaka motoafareapo. Eparahamemo Kotiaki himu hakásaraka hemakapusuasamo Kotimo makoteraka ayiakakosaposane someaka motoareapo.

<sup>14</sup> Kotimo someraka, “Nōmo somemane kakimaka kekemana aporoaki, nōmo hauaka su one kakakosapo,” aisa satiki, Kotiaki himu hakásaraka hemakapurane nenakamaka maka makatareapo. Arirakano Kotimo makata ayiakakosapo aisane soko nenakamaka makatareapo, aihofunureapo. Asiáne aporomo Kotiaki himu hakásaraka hemakapurakan, Kotimo makoteraka ayiakakosapo, aihoreapo.

<sup>15</sup> Asiamo Kotimo somemane aporomo kakimaka kekemahoko hemakapusua nine, somemane hakása meta tapirakan, ane makata ropo kakakosaposane Kotimo metakarikia ipi saperaka fanasihokoso. Asiamo Kotimo somemane kakimara aporomo kakaro koteaka kekemahoanafonarakano, somemane hakása soko metao, rukupaterakan Kotimo ipi sapenapo. Kotimo ipi somemane motoanafonosa satiki ane, aporomo Kotimo somemane tapirakanapo, aihofunufapo.

<sup>16</sup> Arirakano Kotimo Eparahameaki makoteraka ayiakakosaposane Kotimo ipi somemane koarentea aporoaki karafapo. E ipiaki himu hakásaraka hemakapura aporoaki karapo. Kotimo ipi hemakapusua aeyaka yaku karápo. Ayíáka yaku kasane Kotimo makoteraka ayiakakosaposane Eparahamemo hokosa wainepe pesane suaki kakakosapo, aihoreapo. Eparahamemo Kotiaki himu hakásaraka hemakapusua ayíáka, isu Yu aporohoanafonosamo soko, ayíáka himu hakásaraka hemakapurakan, Kotimo ayiakakosaposane ayiakakosapo. Arirakano Kotimo ipi somemane kasa aporoane Yu aporomo Kotiaki himu hakásaraka hemakapurakan, Kotimo iaki ayiakakosaposane ayiakakosapo. Asiamo isiapo suamo makasa kauane Eparahameo.

<sup>17</sup> Aisa hakása yine Kotimo sawia popasane oyapo. Kotimo Eparahameaki someraka, “Nómo aporo irane kára me kekepoaka wainepe pukusapo. Wainepe apura amo ipu suamo

makasa kaua kekemane népo. Néane nōmo murikimasapo.” aiyaka Kotimo somerakano popahoareapo  
*(Stat 17:5)*

Asiamo Eparahamemo Kotiaki himu hakásaraka hemakapusua aiyáka, aporomo soko aiyáka hemakapurakano, Kotimo hikumisia aporoane Eparahamemo aporo ira wainepe pesa aporo ayapo. Eparahamemo himu hakásaraka hemakapusua, Koti amo ainane oyapo. Aporo kusuane epo maturikia taenapo. Arirakano makata namo faserepeanafonosane epo sia masafasereperapo.

<sup>18</sup> Arirakano Eparahame ipi sisimarakra reasamo hemakapuraka, “Nōmo hokosa hokono mareane siahoasifareapo.” Aiyaka Eparahamemo hemakapufunusa nine, ipi aiyáka hemakapufareapo. Arirakano Eparahamemo hemakapuraka, “Kotimo aiyakacosaposane kakaro aiyákasimoripo” aiyaka ipi hemakapukua, Kotimo eaki some kasane kaki-maka reareapo. Kakimaka reasasamo aporo yakaimo makasa kaua kekernane epo. Fana Kotimo aiyakacosaposane hakásá yineraka yasiapo. Kotimo aiyakacosaposane Eparahameaki someraka, “Nōmo aporo ira wainakosane ti makata kára arisia aiyáka, nōmo aporo iramo aiyáka wainakosapo.” aihoareapo.  
*(Stat 15:5)*

<sup>19</sup> Aisa maiyá amo Eparahamemo Kotiaki wakapuaka himu hakásaraka hemakapukua reareapo. Eparahame kakaro sisimasakipoko Kotimo eaki someraka, “Nōmo hokosa hokono mareakosapo.” Airakano Eparahamemo kakaro kakimasapo. Kakimaka Eparahamemo hemakapuraka, “Ano kakaro sisimarakra keremisi wane harote (100) makeraka, kau kusua aiyáka rekenapo. Nōmo hinamo Sara soko, manokonomoraka kake, sisimasasamo hokosa hokono mareasifareapo.” Aiyaka hemakapukua rea nine, ipi yaiya Kotiaki himu hakásaraka hemakapukua reareapo. Tipiá metakarianafonoraka, yaiya Kotiaki paroaka hemakapukua reareapo.

<sup>20</sup> Kotimo kakaro aiyákakosapo aisasamo Eparahamemo hemakapuraka, “Aiyakacosafapo. Aiyakanarakapo.” Aiyaka himu tetaraka hemakapukua reefareapo. Kakaro himu hakásaraka hemakapukua rererape pereapo. Epo Kotiaki himu hakásaraka hemakapura aeyaka Eparahameane wakapuraka reke, Kotiaki kekeresapo.

<sup>21</sup> Arirakano Kotimo ipi aiyakacosaposane, Kotimo ipi wakapumo kakaro aiyakacosapo, aiyaka Eparahamemo ipi himetenafaraka kakaro hemakpureapo.

<sup>22</sup> Asiasamo, “Eparahamemo Kotiaki himu hakásaraka hemakapurakano, eaki Kotimo ipi ereketae ainane kasapo,” aiyaka Kotimo sawia popahoareapo.  
*(Stat 15:6)*

<sup>23</sup> Popasa ane Eparahamemo Kotiaki himu hakásaraka hemakapurakano, Kotimo ereketae ainane eaki kasane, Eparahameane hákasa popahoafareapo.

<sup>24</sup> Popasa amo kepoane Kotimo isu soko ararehokoso, aiyaka isiaipo hemakapusimo popahoareapo. Isiaipo Unihae ane Yasu Keresopo. Yasu Kereso kusuane Kotimo maturikia taesapo. Maturikia taesa Kotiaki isiaipo himu hakásaraka hemakapukua risikino, Kotimo asekeea isuaki soko, ipi ereketae ainane karapo.

<sup>25</sup> Isiaipo makata watikiaka rakisiakipoko apiana aiyáka, Yasumo isupoko farimaka ira matópesa á kusuapo. Kotimo ipi ereketae ainane isuaki kakasimo Yasu kusuapo. Kurakano Kotimo eane maturikia taesapo.

## 5

### *Kotiyaki ereketaeraka risirane oyapo.*

<sup>1</sup> Asiamo isiaipo Kotiaki himu hakásaraka hemakapukua risisasamo, Kotimo ipi ereketae aina kotesane isuaki karapo. Karakano isu Kotiyaki, kikinaraka risike, Kotiane soko isuyaki kikinaraka rekenapo. Kotimo isu hukurukusapoko asiáne, isiaipo Unihae Yasu Keresomo isu mafasirakano, isu su Kotiyaki tau auaraka risikiasireapo.

<sup>2</sup> Yasu Keresoane isupoko farimaka kusuapo. Kusuasamo Kotimo yaku ararenane isuaki kakasimo ikia koroane Yasumo ropakamasapo. Asiamo isiaipo Yasuaki himu hakásaraka hemakapukua, Kotimo yaku ararena ikia kara á isu puraka risikinapo. Puraka risikino, keseke Koti ipi wakapuraka rea á, isu soko eyaki hakásá wakapuraka risikiakosapo. Aiyáka risikiakosasamo, isu seseraka hemakapukua risikinapo.

<sup>3</sup> Arirakano makata meta soko isiaipo hemakapuraka seseraka risikinapo. Isu kau aseakosakipoko makata umisane fasere perakano isu seseraka risikinapo. Asiamo isiaipo makata hemakapurane oyapo. Isu kau aseakosakipoko mokoatikina maiyane fasereperakano, “Kotiane metakarirakanare? O Kotiane metakarirakanafare?” aiyaka isu kau aseako perapo. Perakano Kotiaki yaiya himu hakásaraka hemakapusuan rakikia rosakataehokoso. Paripukusane hákasa hemakapurafaraka wakapuaka hemakapukua risikiakosapo.

<sup>4</sup> Wakapuaka hemakapukua risikino, Kotimo isuaki seseraka hemakapukusapo. Seseraka hemakapurakano, isu eyaki hakása wakapu kára faesa á risikiakosapo, aíyaka hemakapurakaripo.

<sup>5</sup> Aíyaka hemakapusuasamo isu kaíyahokosafapo. Kotimo isuaki ipi Ho Kotesa yaku kasane, isiaipo himua hakása hakásaraka risikinapo. Asiamo Kotimo isuaki himu tumurumo hemakapurane Ho Kotesamo mahemakapurakarakano kairapo.

<sup>6</sup> Kotimo isuaki himu tumurumo hemakapusuane kakaro kára hemakapureapo. Isiaipo isina yia makata watikisa mafahokosane siahoasifareapo. Siahoasifasekeno asekeea aporo hinamomo makata watikisane mafahoko, Keresomo farimaka apiana ayíáka e kusuapo. Kotimo murikimasa sere a paurakano e kusuapo.

<sup>7</sup> Arirakan koteaka ereketae rera aporopolo, hauaka aporo metamo eane arareraka farimaka kurafapo. Arirakan namo kakaro aporo kotesapoko, eane ararehoko isu meta kukunarakapo.

<sup>8</sup> Asiáne isu yaiya watikiaka rakiraka risikino asekeea, Yasumo isupoko farimaka kusuapo. Farimaka kusuasamo Kotimo ipi himu tumurumo hemakapurane isuaki tarisíapo.

<sup>9</sup> Asiamo isiaipo makata watikisane mafahoko Yasu kusuapo. Yasu kusuane isiaipo watikisa akipoko ipi yapimo apiana ayíáka e kusuapo. Kusuasamo Koti hikumisia isu ereketae risikinapo. Arirakan fanasihokosa maiya amo Kotimo isuaki sapehokosakipoko asiane, Yasumo ipi yapi pusuasamo isuane epo mafasiakosapo. Asiamo Yasumo yapimo isu kára ararenapo.

<sup>10</sup> Fana isiaipo Kotiaki yunuraka risia sereamo, Kotimo hokosa Yasumo isupoko farimaka kusuapo. Kusuasamo isiaipo Kotiaki tákeraka risikinapo. Kotiaki tákeraka risikino, Kotiyaki yaiya rera hauaka á risikiasimo, Yasumo isu pasimokoa hiakosapo. Yasu ipi turikia pukua hitaferaka reasasamo, epo isu ararehokosapo. Ane isiaipo hemakapurakanapo.

<sup>11</sup> Asiamo isu Kotiaki kataka marekea risiasamo isu seseraka risikinapo. Arirakan isiaipo Unihaeane Yasu Kereso ipipo. Ipi isupoko farimaka apiana ayíáka, ipi kukua turikia pusuasamo, isu Kotiyaki hakása tákeraka risikinapo.

#### *Atamemo watikiaka rakisiakipoko Yasumo mafahoko pesane oyapo.*

<sup>12</sup> Atamemo makata rakisiarie soko, Keresomo makata rakisiarie soko, tetakara takekea kepoane uyáka hemakapusireapo. Wate fana aporo hakása Atamemo Kotimo someane koaretaeraka watikiaka rakisisamo, makata watikisane hauaka wo faserepareapo. Faserepekeea kakeno, makata watikisa aeyaka aporo hinamo kurapo. Aporo hinamo su Atame aeyaka wainepe pesane kurapo. Asiamo hauaka wo aporo hinamomo watikiaka rakirasamo, aporo hinamo su kurapo.

<sup>13</sup> Arirakan Kotimo somemane motoasiraka, hauaka wo aporo hinamomo watikiaka rakisiapo. Watikiaka rakisia nine, somemane motoanafonosasamo makata watikiaka rakirakan iane hukurusuafapo.

<sup>14</sup> Hukurunafonosa nine aporo hinamo suane kusuapo. Atamemo wainepe pukua Mosesea pauhokosakipoko, wainepe pusua maiya amo, aporo hinamo su kusuapo. Kura wakapumo aporo hinamo su hurutapisiapo. Atamemo Kotimo somemane koaretaesasamo and kusuapo. E kusua ayíáka, somemane motoasiraka somemane koaretaehoanafonosa aporo hinamoane soko kusuapo. Atamemo makata ásia ámo aporomano suane suaka taesapo. Arirakan Yasumo epo makata ásia ámo soko, aporomano suane suaka taesapo.

<sup>15</sup> Asiáne Atame soko, Yasu Kereso soko, tetáne hakureapo. Teta hakuane oyapo. Kotimo somemane motosane Atamemo koaretaesasamo, aporo hinamo su Kotimo ikia kara aye metakarikia koaraka purapo. Asiáne Yasu Keresomo Kotimo someane kakimasasamo, aporo hinamo su Kotimo ikia kára á poparipeasimo epo tarisiapo. Kotimo ipi isu kára kamenakaraka yaku arareraka tarisiapo. Aporo hakásamo Kotimo somemane motosane koaretaesasamo, aporomano su kupe pereapo. Asiáne Kotimo kára kamenakaraka, aporo hinamo suane yaku araresapo. Arareraka Kotimo ipi hokosa hakása Keresoane pusiesapo. Pusiesa amo aporo hinamo suane epo kakaro kára yaku araresapo.

<sup>16</sup> Arirakan Atamemo watikiaka rakireapo. Watikiaka rakisia amo ikia kara watikisane ropakamayereapo. Asiane Yasu Keresomo Atamemo ásia ayíáka ásiafapo. Yasu Keresomo koteaka rakisisamo aporomano su ararerakan, Kotimo yaku ararena ikia kara kotesane ropakamayereapo. Asiamo aporo hakása Atamemo yape hakása watikiaka rakirakan, Kotimo aporo hinamo suaki hukurukua someraka, "Repo makata watikiaka rakisiakipoko, reane nōmo fanasihokosapo," aihoreapo. Arirakan aporo hinamomo yape yakai kára watikiaka rakisiarie, Yasumo yaku ararena amo mafasapo. Asiamo makata watikiaka

rakisiane mafasa aporo hinamoaki Kotimo someraka, "Reaki nōmo ereketae ainane karakanapo," airapo.

<sup>17</sup> Arirakano aporo hakása Atamemo, yape hakása Kotimo someane koaretaeraka watikiaka rakisiasamo, aporomano su kureapo. Asiamo kura wakapuamo aporomano su asekea rekenapo. Arirakano aporo hakása Yasumo, Kotimo someane kakimaka apíana ayíáka e ipiane kureapo. Kusuasamo kakimara aporo hinamoane yaiya rera wakapuamo asekea rekenapo. Kotimo kára yaku ararenane soko, Kotimo ereketae ainane soko, makata tetáne aporo hinamomo marakano, Koti yaiya reramo hauaka á hikia, Kotiyaki hakása yaiya risikiakosapo.

*Atamemo soko Keresomo soko tetapō makata haku ásiane oyapo.*

<sup>18</sup> Aporo hakása Atamemo makata hakása watikiaka rakisiakipoko, Kotimo aporo hinamo suaki fanasina motosane kura motoreapo. Arirakano aporo hakása Yasu Keresomo makata hakása meta ereketaeraka rakisiakipoko, Kotimo aporo hinamo fanasina motoakosane metakariraka, aporo hinamoaki yaiya rerane kaka ereketae rerane soko kayereapo.

<sup>19</sup> Arirakano aporo hakása Atamemo Kotimo someane koaretaesakipoko, aporo hinamo suaki watikiaka rakira aporo hinamopo, aihoareapo. Arirakano aporo hakása Yasumo Kotimo someane kakimasakipoko, Yasumo someane kakimasa aporo hinamoaki Kotimo someraka, "Reane ereketae risira aporo hinamopo," airapo.

<sup>20</sup> Arirakano Kotimo somemaneane motoasiraka aporo hinamomo makata watikisa rakiraka risiareapo. Watikiaka rakiraka risikino asekea, Kotimo ipi somemaneane motoreapo. Asiamo makata watikisane ayareapo, aiyaka kakaro hemakapuraka makata watikiaka rakisiane aporo hinamomo asekea takekeea hemakapusireapo. Arirakano aporo hinamomo makata watikiaka rakirane káraraka faserepekea rakiraka risiareapo. Rakiraka risikino asekea, Kotimo yaku ararenane aporo hinamo suaki káraraka faserepeareapo.

<sup>21</sup> Arirakano makata watikisamo unihaeaka asekea rea maiya amo aporo hinamo kukua kesapo. Arirakano isu yaiya risikiasimo, Kotimo yaku ararenamo isuane unihaeaka asekea rekenapo. Unihae Yasu Kereso aeyaka isuaki ereketae ainane karápo. Asiamo isu Kotiyaki yaiya risikiakosapo.

## 6

*Makata watikisa suane metakarikia rukupatehoanie. Aisa amo kepoane oyapo.*

*Karesia 2:19-20; Rome 12:1; Ruki 9:23-24*

<sup>1</sup> Aporomanomo hemakapuraka, "Nōmo fana watikiaka rakisiane Kotimo mafasasamo, efera hunia soko watikiaka rakirakano, Kotimo mafahokosapo. Kotimo ano yaku arareraka mafahokosasamo nōmo efera hunia soko watikiaka rakiante sihoasireapo." Aiyaka hemakapuanie siahoasireare?

<sup>2</sup> Wae, siahoasifareapo. Aporomano akura ayíáka, Keresoa paosa maiya amo isiapo makata watikiaka rakirane makusuapo. Asiamo aporo kusuamo makata watikiaka rakirafapo. Aina ayíáka isiapo makata watikisane kusuasamo mayíáka efera hunia hitaferaka watikiaka rakiakosare?

<sup>3</sup> Re Yasu Keresoaki kataka marekea risikino, hea tapukumurisiapo. Hea tapukumurisia maiya amo, Yasuyaki hakása akura ayíáka kusuapo. Ane repo hemakapurakanapo.

<sup>4</sup> Yasu kusua hauaka maresa ayíáka isu soko hea tapukumurisia maiya amo ásiapo. Ata Kotimo wakapu faesa aeyaka Yasu kusuane maturikia taerakan kawe hitaferaka area ayíáka isu soko asiapo.

<sup>5</sup> Asiamo isu kakimara aporo hinamomo Yasuaki kataka marekea risikino, Yasu kusua ayíáka, isu soko eyaki hakása kusuasiapo. Arirakano Yasu maturikia taerakan kaweraka reasasamo, isu soko maturikia taerakan kawerakan risikinapo.

<sup>6</sup> Aporo hinamomo himumo watikiaka hemakapukua kaumo rakirane rukupatehoasimo Yasu ira matopesa paremaresapo. Asia ayíáka isiapo soko himumo watikiaka hemakapurane ira matopesa paremaresapo. Paremaresasamo makata watikisa amo wakapuanie rukupateraka makusuasamo, makata watikisa amo isu unihaeaka asekea rekenafapo. Ane isiapo hemakapurakanapo.

<sup>7</sup> Asiamo kakimara aporo hinamo Yasuyaki kusua amo makata watikisamo isu unihaeaka asekea rerapaka isu tonotaesapo. Tonotaesasamo isu kakama ereketae risikinapo. Makata watikisamo wakapuanie makusuapo.

<sup>8</sup> Isu Yasuyaki hakása akura ayíáka kusuane, Yasu maturikia taesa ayíáka isu soko eyaki hakása maturikia taesa risikinapo. Maturikia taesasamo isu kawerakan risikinapo.

<sup>9</sup> Yasu Kereso kusua maturikia taesane efera hunia kukusafapo. Kura wakapumo Yasuane hurutapikia unihaeaka asekeea rekenafapo. Makata ainane isiapo hemakapurakanapo.

<sup>10</sup> Yasu ipi yape hakasa kusua amo makata watikisamo wakapuane rukua mosaka tapisiapo. Rukua mosaka tapikia, ipi farearaka reke Kotiyaki hakasa rekenapo.

<sup>11</sup> Asia ayiaka repo soko, makata watikiaka rakiako hemakapurane akura ayiaka kusuapo. Kusuasamo repo Kotipoko makata rakiako risikinapo. Re Yasuaki kataka marekeea risike, Kotiyaki hakasa risikinapo. Aiyaka hemakapunie.

<sup>12</sup> Arirakano makata watikisamo repo kauane unihaeaka asekeea rekeakohoamo makata watikisane metakarikia kikisiraka risikianie. Arirakano repo kauane hauaka wo wakasema risina kkusupo. Asiamo kaumo watikiaka hemakapusua amo reaki hokokarakano, some ane repo kakimakopo.

<sup>13</sup> Repo korake, hokono, kau suamo makata watikisa á paoraka rakiakopo. Kotiaki hakasa paoraka rakinie. Repo kauane akura ayiaka kusuane maturikia taesasamo, maturikia taesa kauane Kotiaki kaka Kotipoko hakasa ereketae susu rakinie.

<sup>14</sup> Asiamo Kotimo yaku ararenamo reane asekeea rekenapo. Kotimo somemanemo reane asekeea rekenafapo. Asiasamo makata watikisamo reane asekeea rekenafapo. Makata watikisamo ayiakanie, aiyaka somerakano, repo kaiyakopo.

*Ereketaeraka risikiakosakipoko raiparaka rakirane oyapo.*

<sup>15</sup> Kotimo somemanemo isu asekeea rekeanafonosasamo Kotimo yaku ararenamo isu asekeea rekenapo. Asiamo isiapo watikiaka rakiiane siahoasireare? Wae, siahoasifareapo.

<sup>16</sup> Some one kakaro somepo. Nomo ni hemakapusuane metakarikia, aporo metamo someane kekemaraka rakirakanone, aporo aporo raipane nepo. Aina ayiaka makata watikisa kekemaraka rakirakanone, makata watikisamo aporo raipane nepo. Arirakano makata ereketae susuane nomo kekemaraka rakiraka rekenone ane, ereketae reramo aporo raipane nepo. Aporo raipa hakasamo aporo pose tetapoko raiparaka rakirafapo. Nomo makata watikisane kekemaraka rakirakano, ne kkusupo. Ne Kotiyaki yaiya rekeakosafapo. Asiáne Kotimo someane kakimaka kekemaraka rakirakano, ne ereketaera-aka rekeasimo Kotimo ararehokosapo.

<sup>17</sup> Fana repo makata watikisapoko raiparaka rakiraka, aporo metamo Kotimo someane some karakano, repo makata watikisane metakarikia Kotimo someane kakimaka, himu hakásaraka hemakapukua kekemasapo. Asiasamo yumo nomo Kotiaki suserakanapo.

<sup>18</sup> Arirakano makata watikisakipoko repo raiparaka rakirakano, makata watikisamo reane asekeea reke, tipura kesa arisia ayiaka risiapo. Ayiaka risiane Yasumo tonotaesapo. Tonotaerakano Kotimo ipi ereketae ainane repo kekemaraka raiparaka rakirakanapo. Asiasamo yumo nomo Kotiaki suserakanapo.

<sup>19</sup> Fana repo kaumo hemakapusuane kekemasasamo, Kotimo ainane hemakapusuafapo. Repo koteaka hemakapusimo hauaka wo makata ane nomo takumeaka somerakanapo. Hauaka wo aporomo raiparaka makata rakirane soko, aporo metamo poseraka asekeea rerane soko, nomo takumeaka somerakanapo. Someamo kepoane oyapo. Fana repo kaumo hemakapusuane kekemaraka rakiakosakipoko, repo namina kau soko, hokono soko, korake soko suane makata watikisaki karakano, makata watikisa amo reane poseraka asekeea reapo. Asekeea rekeno repo makata kaýasa rakiafunufasa nine repo rakisiapo. Asiáne yumo repo koteaka rakiakosakipoko repo namina kau soko, hokono soko, korake soko, suane Kotiaki kakanie. Karakano Kotimo ereketae aina amo reane poseraka asekeea rekeakosapo. Asekeea rekeno re koteaka susu risikosapo.

<sup>20</sup> Arirakano makata watikisamo reane poseraka asekeea rea maiya amo, repo ereketaera-aka rakiako hemakapusuafapo.

<sup>21</sup> Repo makata watikisa rakisia maiya amo makata watikisamo re makotesare? Wae, makotesafapo. Repo fana watikiaka rakisiane yumo hemakapuraka re kaýaraka hikumisi mafairaka risiapo. Kaiýasa makatane rakisia maiya amo, re Heao ikia kara á puraka risiapo.

<sup>22</sup> Asiane yumo re uyáka risikinapo. Fana kaumo hemakapusuamo re poseraka unihaeaka asekeea reane Kotimo reane mafasisiapo. Mafasisasamo repo Kotipoko raiparaka rakiraka risikinapo. Asiamo Kotimo reane makoteraka re koteaka ereketaera-aka risiki-asimo, Kotimo reane arareraka rekeakosapo. Kotimo reane ararerakano reane Kotiyaki hakasa risina, keseke soko Kotiyaki yaiya risikiakosapo.

<sup>23</sup> Arirakano makata watikisa amo ipi aporo raipaki makata ropo karapo. Makata ropo ane Heao hauaka ayapo. Asiane Kotimo ipi aporo raipaki yaiya rerane yaku karapo.

Unihae Yasu Keresoaki isiaipo kataka marekea risikino, Yasu Kereso aeyaka Kotimo yaiya rerane isuaki karápo.

## 7

*Yasuaki kataka marekea risiakipoko eyaki hakāsa akura ayíáka kaumo hemakapusuane kusuapo. Aisa amo kepoane oyapo.*

<sup>1</sup> Maeo, re kakimara aporo hinamomo hemakapusimo some meta reaki nōmo someraka oyapo. Aporo mano hitafe areamo somemanemo e asekeea nina akuramo somemanemo e asekeea rekeakosafapo. Ane repo somemane hemakapura aporomo hemakapurakanapo.

<sup>2</sup> Aina ayíáka somemaneane uyáka motosapo. "Hinamo aporo aseamo ipi apia hitafe rekeno, ipi apiayaki hakāsa kakanie. Ipi apia hitafe rekeno yia, aporo metayaki mokome pukupo." Aiyaka somemane motosapo. Arirakano hinamo ipi apiane kurakano, ipi apiamo ape yia kakanie, aiyaka somemane motosafapo.

<sup>3</sup> Arirakano hinamomo ipi apia rekeno yia aporo metayaki purakano, hinamoane aporo rea pura hinamopo airapo. Asiamo ipi apia kusuakipoko hinamo yaroane aporo metamo arumarakano hinamoane aporo rea pura hinamopo, airafapo.

<sup>4</sup> Maeo. Re Yasu Keresoaki kataka marekea risikinapo. Risike somemane kekemaraka rakisiane Yasua paosa sereamo akura ayíáka kusuapo. Kusuasamo hinamo ipi apia kurakano aporo meta apura ayíáka re Yasuyaki hakāsa paoraka purakanapo. Maturikia taesa aporoane Kereso ipipo. Eyaki re hakāsa purakanapo. Puraka Kotipoko hakasa koteaka susu rakiako purakanapo.

<sup>5</sup> Isu Yasuaki risikiako parihoasiraka, kaumo hemakapusuane kekemasapo. Kotimo ipi somemanemo someraka, aiyakakopo, aisa ane kaumo hemakapusua amo rakiako seseraka, ayíáka rakiapiro. Rakiraka isu Heao ikia kara á puraka risiapo.

<sup>6</sup> Somemanemo isu tipura akera ayíáka kesapo. Tipura kesa kusua asíane yumo tonetaesapo. Tonotaeraka Kotimo somemanemo isu poseraka asekeea rekenafapo. Asiamo somemane popasane isiaipo kekemaraka Kotipoko ayíáka rakirakanafapo. Arirakano Ho Kotesamo isu himua mahemakapurakanano isiaipo kekemaraka Kotipoko ayíáka rakiakanapo.

*Somemanemo makata watikisa tarirane oyapo.*

<sup>7</sup> Isiaipo someraka, "Somemaneane watikirareapo." Aiyaka somehoane siahoasireare? Wae. Siahoasifareapo. Somemaneane watikisafapo. Somemane motoanafonosa tiki nōmo makata watikisane hemakapufunufapo. Asiamo somemanemo someraka, "Aporo metamo makatane aseraka ano makaripi aiyaka hemakapukupo," aiyaka somemanemo somesapo. Somerakano kaisiasamo metamo makatane ano makaripi aiyaka hemakapurakanapo. Somehoanafonosa satiki ane hemakapufunufapo. (*Kisim Bek 20:17; Lo 5:21*)

<sup>8</sup> Somemane motosakipoko makata watikisa amo watikiaka rakira ikia kara ane ropakamaka ano kirimasapo. Kirimaraka, aporo metamo menane ano makaripi, aiyaka hemakapusuane makárasapo. Makárasasamo ano ni yia mokoatikisapo.

<sup>9</sup> Fana somemanemo aiyakakoposane nōmo hemakapunafonoraka reapo. Hemakapunafonoraka rea sereamo, "Kotimo hikumisia ano siareapo," aiyaka nōmo hemakapusuapo. Hemakapusua nine keseke somemane motoraka, "Aporo metamo makatane ano makaripi aiyaka hemakapukupo." Aisane kaikia aporo metamo makatane mako hemakapusuane káraraka takahisiapo. Takahinakano asekeea Kotimo somemane koaretaeraka rerane rekeako hemakapusuapo. Hemakapuraka Kotimo hikumisia ano rekeane siahoasifareapo, aiyaka hemakapusuapo.

<sup>10</sup> Arirakano Kotimo somemanemo yaiya rera ikia kara tariafunusa nine, kura ikia karane tarisiapo.

<sup>11</sup> Somemanemo someraka, "Watikiaka rakiakopo." Aisa nine makata watikisamo ano mahoperaka kirimarakanano nōmo kekemaraka rakiapiro. Kekemaraka rakisiasamo ano akura ayíáka kusuapo.

<sup>12</sup> Asiamo somemaneane Kotimo somepo. Ayiakaniesane soko, aiyakakoposane soko, hakása hakásaraka ipi ainapo. Aporo metaki aiyakaniesane soko aiyakakoposane soko ereketake susupo. Somemaneane kotesa susupo.

<sup>13</sup> Asiamo Kotimo somemane kotesa susuamo ano rusua kusuare? Wae. Nōmo aiyaka somerakanafapo. Somemanemo ano rusua kusuafapo. Makata watikisamo ano kirimaraka rusua kusuapo. Rusua kurakano makata watikisamo kepoane kakaro watikisapo aiyaka kakama tarirapo. Somemane kotesamo makata watikisa tariane nōmo watikiaka rakirakano asekeea ano rusua akura ayíáka rusua kusuapo. Asiamo somemanemo makata watikisa kepoane namo kakaro watikisapo, aiyaka hemakapusimo somemanemo tarirapo.

*Makata tetamo kirimananeyo oyapo.*

<sup>14</sup> Asiamo makata one kakaroripo. Kotimo somemanemo Kotimo hemakapusuane isuaki kakama tarirapo. Asiāne anoane aporomanopo. Aporomanomo kaumohemaka apura ayiāka, kaumohemana hemakapurapo. Nōmo kaumohemakiakahemakapusuanekekemarakaraiaparaka rakirapo.

<sup>15</sup> Makata watikiaka raiparaka rakirane mainakanohemakapusuane rakirakanararakapo. Aneano himeteripo. Nōmo koteaka rakiako seseraka hemakapuko ayiane koteaka rakirafapo. Arirakanonōmowatikiaka rakiako hisiraka hemakapusuane watikiaka rakirapo. Ayiananemainakanararakapo.

<sup>16</sup> Nōmowatikiaka rakiako hisiraka hemakapusuane watikiaka rakirapo. Amokepoaneyakapare? Kotimo somemanemo ayikaniesane soko, ayiakakoposanesoko, nōmokakimakaaorakanapo. Arirakan Kotimosomemanene kotehoareapo, aiyakanōmohemakapurakanapo.

<sup>17</sup> Nōmohemakapuraka, "Nōmowatikiaka rakiakosafapo." aiyakahemakapusuane nine watikiaka rakirapo. Nōmonīhemakapusuane rakirafapo. Makata watikisaneano himureke, nōmohemakapurane kirimarakano nōmowatikiaka rakirapo.

<sup>18</sup> Asiamoano nīrerane asekeahemakapurakaano himuamakata reane kotesafapo. Anonī kaumohemakapukuarakiraamo nōmoinainemakotesafapo. Makotehoanafonosamono nōmokoteaka rakiako seseaka hemakapusuane nine koteaka rakiawakapuanekakenafapo.

<sup>19</sup> Arirakanokoteaka rakiako seseraka hemakapuko ayiane koteaka rakirafapo. Arirakanowatikiaka rakiako hisiraka hemakapusuane watikiaka rakipepurapo.

<sup>20</sup> Asiamo nōmohimumomakata rakiako hemakapunafonosanenōmorrakirakanone anekakaronōmōnīrakirakanafapo. Makata watikisaneano himurareasamoiyiāmorrakirakanapo.

<sup>21</sup> Asiamo nōmowatikiakasomeseraka rakiako ayiane, makata watikisamo foakayakirimanapo.

<sup>22</sup> Asiane nōmohimu tumurumo Kotimosomemanene hemakapurakanapo.

<sup>23</sup> Himumokotimosomemanene hemakapukuarakiayoiane, kauasomemanemeta soko anoyaki hakāsareasamoto, tati kakanakerakarekenapo. Himumoiyiākakoposane, kaumohemakapusuame marokeraka, kaumohemakapusuane fanārakapi rakirapo. Asiamo kaumohemaneaano tipura amakeraayiākamakesapo.

<sup>24</sup> Anonīyia kālyia. Ano aporo watikisapo. Kaumohemakapusuameano kirimarakakuraikia karaāpurapaka, epamoano mafasiakosare?

<sup>25</sup> Unihae Yasu Keresomoisu mafasiasamono nōmokotikisuserakanapo. Arirakanomakata tetāmoano kirimanapo. Nōmohimumohemakapuraka, "Kotimosomemanekakimakosapo." Aiyakahemakapuko ayiane kaumohemakapuraka, "Watikikakarakisie," airakanowatikiakarakirapo.

## 8

*Isiapo makata watikisane Yasu Keresomo mafaraka, isuaki Ho Kotesakasane oyapo.*

<sup>1</sup> Isiapo Yasu Keresoaki katakamarekearisiasamo, isiapo watikisakipoko Kotimohukuruksafanashikosane someaka motosakakenafapo.

<sup>2</sup> Isiapo watikiakarakisiasamoisu kuraikia karaāpusuapo. Asiane Ho Kotesamowakapuamoisu makokorotaesapo. Isiapo Yasuaki katakamarekearisikinoikia kara kawetakua Ho Kotesamoisupasimorakanapo. Ho Kotesamoisiapo himuraunihaeakasekearekeno, kaumohemakapusuameisuunihaeakasekearekenafapo.

<sup>3</sup> Isiapo kaumohemakapusuanekekemasasamosomemanefanamotosamo makata watikisamowakapuane mafasafapo. Mafahoanafonosanine makata watikisamowakapuane Kotimomafasapo. Mafahoko ipihokosahakāsaninehauakawopusiesapo. Pusierakano ipihokosane aporomanomo kauanemaka, hauakawōpekeareapo. Aporomanomo kauanemaka reanin, kaumohemakapusuane epokekemasafapo. E kakarokoteaka susureane, isiapo kaumohemakiakarakirane epomasapo. Yasumoisupokoapiakaraayiākakusuapo. Kusuasamoisiapo watikiakarakisakipokoisu fanashikosane Kotimo Yasuaki kasapo.

<sup>4</sup> Isu fanashikosane Yasumomainakanomasare? Kotimosomemanaeaeyaka makataayiakakoposanesoko, makataayikaniesanesoko, isiapoereketaekkekemahoanafonorakanisuane fanashikosapo. Fanasinanesisuakikakakosapokosiāne, Yasuaki kasasamoisuane tonotaesapo. Tonotaesasamoisiapo kaumohemakapusuane metakarikia Ho Kotesamohemakapusuane kakimakarisike Kotimosomemanekakarokoteakahemakapukuarakirapo.

<sup>5</sup> Arirakano kaumo hemakapusuane kekemaraka rakiraka rekeno, himumo soko kaumo hemakapusua hakása nine hemakapuraka rerapo. Asiáne Ho Kotesamo ayikaniesane kekemaraka rakiraka rekeno, himumo soko Ho Kotesamo hemakapurane hakasa nine hemakapuraka rerapo.

<sup>6</sup> Asiamo kaumo hemakapusua hákasane hemakapukua rekeno ane, akuramo Kotiyaki yaiya rekeakosafapo. Asiáne Ho Kotesamo ayikaniesane hákasa hemakapukua rekeno ane, Yumo koteaka rekeno, keseke soko Kotiyaki koteaka yaiya rekeakosapo.

<sup>7</sup> Kaumo hemakapusuane hákasa kekemaraka rakiraka rekeno, Kotiaki yunuraka rekenapo. Kaumo hemakapusuane hákasa hemakapukua rakiraka rekeno, Kotimo somemanekakimakasifareapo. Kotimo somemaneanekemahoko hemakapukua asiáne kekemahoksanewakapú faraka kakimakasifareapo.

<sup>8</sup> Asiamo kaumo hemakapusuane hákasa hemakapukua kekemaraka rakira aporo amo Kotiane masesehoasifareapo.

<sup>9</sup> Arirakano re himua Kotimo Ho Kotesane kakaro reke, Ho Kotesamo re himua mahemakapurakarakanorepo kaikia kekemanapo. Kaumo hemakapusuane repo kekemanaafapo. Arirakano Ho Kotesa Keresomo pusiesane re himua rekeanafonorakano, ane re Keresomenafapo.

<sup>10</sup> Arirakano Ho Kotesa Keresomo pusiesane re himua rea nine, repo kauane kukusapo. Aporo hinamo suamo watikiaka rakisiasamo isu kauane kukusapo. Asiáne Kotimo isiapo ainane maereketaeraka makotesasamo e ipi yaiya rerane isiapo himua risikinapo.

<sup>11</sup> Yasu kusua maturikia taesane Koti ipipo. Ipi Ho Kotesane re himua risiasasamo Yasu maturikia taesa Koti amo repo kau kusuanesoko maturikia taehokosapo. Ipi Ho Kotesa repon himua risikino asekeea, Kotimo maturikia taehokosapo.

<sup>12</sup> Asiamo maeo, Ho Kotesa re himurareasasamo kaumo hemakapusua amo re asekeea rekenafapo. Asiamo kaumo hemakapusuane kekemaraka rakíane siahoasifareapo.

<sup>13</sup> Repo kaumo hemakapusuane kekemaraka rakiraka risikino Kotimo reane fanasihokosapo. Arirakano Ho Kotesamo reane ararerakano, makata watikisanerusa kusua ayiáka, rukupateraka metakarikia, re Kotiyaki yaiya risikiakosapo.

<sup>14</sup> Ho Kotesamo aporo hinamoaki ayikaniesane kekemaraka rakirakano, ane Kotimo aporo hinamoane ayapo.

<sup>15</sup> Fana repo Kotiane hemakapuraka, "Kotimo isufanasihokosapo," aiyáka hemakapukuanamorakarisiapo. Asiáne yumo Ho Kotesane repo himua risikiasimo Kotimo pusiesapo. Re manamohoasimo Ho Kotesa repo himua maresare? Wae, re karikianasimo maresapo. Marekeao epo karikia nesasamo isiapo Kotiaki "Atao" airapo.

<sup>16</sup> Airasamo isiapo himumo hemakapuraka, "Ano kakaro Kotimo hokosapo," airakano Ho Kotesamo soko hakása yineraka someraka, "Né Kotimo hokosapo," airapo. Aiyaka tetá tati hakása siasapo.

<sup>17</sup> Asiamo isuane Kotimo hokosasamo, ipi hokosapoko makata kotesa taesane isuaki kakakosapo. Kotimo Yasuaki kasa ayiáka, isuaki soko kakakosapo. Asiáne fana Yasumomakata umisa masa ayiáka, isiapo soko ayiáka makata umisa makosapo. Yasumomakata umisa masasamo Kotimo e makárasa ayiáka isiapo soko makata umisane marakano, Kotimo isuane makárahokosapo.

#### *Keseke hepene yapura koteaka risikiakosane oyapo.*

<sup>18</sup> Sere omo makata umisa masa kára nine, namo kakaro kárafapo. Keseke Kotimo isu makotehokosane namo kakaro kárapo. Asiamo Kotimo isu makotehokosane yumo asekeanafonosane, keseke aseakosapo. Aiyaka nōmo hemakapurakaripo.

<sup>19</sup> Kotimo ipi hokosa makotehokosamaia ane fasereperakarivo Kotimo ipi rakisia makata amo suamo Kotimo ayiásimoripo, aiyaka kau risikinapo.

<sup>20</sup> Kotimo ipi makata su rakisia maiya amo siaraka rakisiapo. Aiyáka rakisia nine makata watikisanerupa tipia faserepesapo. Fasereperakano Kotimo fanasinane motosapo. Kotimo makata rakisia amo hemakapusua aeyaka ásiafapo. Kotimo ipi hemakapusua aeyaka ásiapo. Makata suane makawehoko ayikanie aiyaka kau risikiasimo Kotimo murikimasapo.

<sup>21</sup> Yumo makata suane kukua torenane, keseke Kotimo makotehokosapo. Makoteana maiya amo ipi makata rakisiake kukua torehokosafapo. Ipiaki paosa aporo hinamoane kurane faraka, Kotiyaki faesa takua yaiya risikiakosapo. Yaiya risikino Kotimo iane makotehokosapo. Makata su Kotimo rakisiake soko Kotimo makotehokosapo.

<sup>22</sup> Hinamo hokosa takaperapmaiya amo hinamo mokoweraka púane ayiáka, Kotimo rakisia makata amo pürakanapo. Makata watikisa faserepesa maiya anaka kepomarekeapesa amo, Kotimo rakisia makata suamo püraka mokoweraka risikinapo.

<sup>23</sup> Arirakano isu Kereso aporo hinamoane soko yaiya mokowekea pūraka risikinapo. Arirakano Kotimo ipia paosa aporo hinamoaki makata kakakosaposane, fana kasane ipi Ho Kotesa ayapo. Ipi Ho Kotesa isuaki karakano aporo hinamo suamo hikumisia Kotimo isuane ipi hokosapo, aihoasimo pūana ayiáka pūraka kau risikinapo. Isuaki kau kaweane haku akara maiya amo isuane ipi hokosapo, aihoasapo.

<sup>24</sup> Arirakano watikiaka rakira takua Kotimo isu mafasisiasamo isuane Kotimo makata su ayiakakosaposane ayiakasimo isu kau risikinapo. Makata ayiakakosaposane faserepeasimosapo, ayiáka kau nina fasereperakan, aseraka efera hunia kau risikiakosafapo.

<sup>25</sup> Makata faserepeasimosapo ayiáka kau nina faserepeanafonorakan soko himu hakasaraka hemakapusuane metakarirafaraka yaiya hemakapukua risike kau risikiakosapo.

<sup>26</sup> Kau risike raki pe pusimo Ho Kotesamo isu ararenapo. Isu kau aseakosakipoko makata umisa karakano Kotimo ipi ikia kara á isu puraka wakapuraka purakanafapo. Wakapuraka punafonorakan Ho Kotesa isuyaki hakása paoraka reke, isiapo makata tomekesanepo ararenapo. Mokoatikiana maiya amo soko, kau aseakosa sere amo soko, isu Kotimo ikia kara á pukusane wakapuhoanafononasamo Ho Kotesamo isu ararenapo. Asiamo isiapo mayiaka kurikurihoanarakapo, airakano Ho Kotesamo isuane farimaka, isiapo makata umisamo kepoane hemakapukua ipi meaka Kotiaki somerapo.

<sup>27</sup> Kotimo hemakapusua aeyaka Ho Kotesamo asekeea kurikurinapo. Kakimara aporo hinamoane Ho Kotesamo arareraka farimaka kurikurinapo. Arirakano aporo hinamomo himumo hemakapusuane asera Koti amo Ho Kotesamo hemakapusuane soko epo aserapo.

<sup>28</sup> Kotimo ararena metane soko isiapo kakaro hemakapurakanapo. Kotiaki himu tumurumo hemakapura aporo hinamo akipoko susu makata umisa soko, makata kotesa soko, makata su fasereperane Kotimo ipi maroporaka makotenapo. Wate fana Kotimo ipi keseke makata faserepeakosane hemakapukua fasapo. Ipi hemakapusua ikia kara á ikekemahoasimo aporo hinamoane murikimosapo.

<sup>29</sup> Ipiaki himu hakásaraka hemakapukusa aporo hinamoane Kotimo ipi wate fana murikimoyareapo. Ipi Hokosa Yasumo aina ayiáka iane soko ayiáka risikiasimo Kotimo hemakapukua, iane wate fana murikimoyareapo. Ayiáka murikimosa aporomo mae fanane Kotimo ipi Hokosa ayapo. Kotimo Hokosa amo mae kesekeane murikimosa aporo ayapo.

<sup>30</sup> Arirakano wate fana murikimosa aporo hinamo ane Kotimo pasimoreapo. Pasimosa aporo hinamoaki Kotimo ipi ereketae ainane kayereapo. Ereketae aina kasa aporo hinamoaki yaiya rerane kakakosapo. Yaiya rerane karaka, ipi faesa hauaka á i Yasuyaki hakása risike, makata su asekeea risikiakosapo.

#### *Isuaki Kotimo himu tumurumo hemakapurane oyapo.*

<sup>31</sup> Asiamo Kotimo ásiarie soko, Kotimo ariraka areane soko, isiapo maíyaka somehosare? Kotiane isu arisia takua rekeno, epamo isuyaki yunu wekeea hurutapiakosare? Wae, metamo isuane hurutapiakosafapo.

<sup>32</sup> Kotimo ipi hokosa isuaki kakakosane karekesafapo. Karekerafaraka isu suane ararehoasimo ipi hokosa pusiesapo. Asiamo makata metakira soko isuaki kakakosane metakariakosare? Wae, metakariakosafapo.

<sup>33</sup> Arirakano Kotimo murikimoka pasimosa aporo hinamoane aporo metamo hukurukusare? Wae, hukurukusafapo. Kotimo ipi pasimosa aporo hinamomo makata watikiaka rakisiane Kotimo mafáraka iaki ipi ereketae ainane kasapo. Kasasamo iane aporo metamo hukurukusafapo.

<sup>34</sup> Arirakano epamo Kotimo pasimosa aporoaki fanashihoko someaka motoakosare? Yasu Keresomo ayiakakosare? Wae, Yasu Kereso isupoko farimaka apiana ayiáka ipi kusuapo. Ipi kusuane Kotimo maturikia taesapo. Maturikia taeraka pipu yumo Yasu Kotimo hokono tumuru takua hepene yapura areane Kotimo maresapo. Kotimo isuane ararehoasimo Yasumo isupoko farimaka kurikuriraka rekenapo.

<sup>35</sup> Asiamo Yasu Keresomo isuaki himu tumurumo hemakapusuane makata metamo tipia matasohokosafapo. Makata umisa faserepeke, arirakano meta himu nena faserepeke, arirakano meta isiapo Kotimo somemanekekemasapoko isu mokoatikina faserepeke, arirakano meta makata nakosa faraka memoraka risike, arirakano meta pasu faraka risike, arirakano meta aporomo "Néaki weakosapo." aira maiyane faserepeke, arirakano meta aporomo isu rusua kukua, ayiáka makata suamo Yasu Keresomo isuaki himu tumuru hemakapusuane matasohokosafapo.

<sup>36</sup> Makata su ayiáka faserepeakosane Kotimo sawia popahoareapo.

Tefetemo Kotiaki someraka, "Kotio, isu nōmo aporo hinamosasamo maiya suamo néaki hisisa aporomo isuaki someraka, 'Reane rusua kukusapo.' Aíyaka saro sipi ruko murikiamara ayiáka isu soko ayiáka ruko murikimarakanapo." Aíyaka Kotimo sawia popahoareapo.

(Buk Song 44:22)

<sup>37</sup> Arirakanó Kotimo isuaki himu tumurumo hemakapusuane makata watikisa fasereaperamo matasohokosafapo. Yasu Keresomo isuaki himu tumurumo hemakapuraka, isupoko farimaka kusuapo. Kusuasamo epo ipi isu kára araresapo. Araresasamo yumo soko isu ararerakano makata watikisa fasereperakano isiaipo marokehokosapo.

<sup>38</sup> Asiamo some one kakaro somepo. Yasumo isuaki himu tumurumo hemakapusuane makata hakásá metamo matasohokosafapo. Isu akura maiya amo soko, isu hitafe arisia maiya amo soko, makata umisa fasere apera maiya amo soko, makata amo Yasumo isuaki himu tumurumo hemakapusuane matasonafapo. Arirakanó hepene aporomo soko, yatafumo unihae amo soko, yumo makata ainamo soko, keseke makata ayiakakosamo soko, mokoatikina makata wakapumo soko,

<sup>39</sup> ti yapura makata risiamo soko, hauka wo makata risiamo soko, Kotimo rakisia makata amo soko, makata amo suamo Kotimo ipi himu tumurumo isuaki hemakapusuane matasohokosafapo. Unihae Yasu Keresomo isu ararehoko pusiesa amo isuaki Kotimo ipi himu tumurumo hemakapusuane tarisiapo.

## 9

*Yu aporo hinamomo Yasuaki himu hakásaraka hemakapunafonorakano Poremo kára hemakapusuane oyapo.*

<sup>1-2</sup> Ano Keresoa paosa aporosasamo nōmo reaki kakaro somerakanapo. Kotafe hoko-mareako somerakanafapo. Nōmo someane oyapo. Nōmo aporo ira Isiraya aporomo Yasuaki patera tarisiapo. Asiasamo Isiraya<sup>\*</sup> aporopoko maiya suamo nōmo kára hemakapuraka himu nekea rekenapo. Aíyaka nōmo somesane ano himura Ho Kotesamo soko hakasa yine kakarorakae aíyaka somerakanapo.

<sup>3</sup> Isiraya aporoane nōmo aporo ira hakasapo. Isiapo suamo me hakásá somerapo. Iane nōmo ní aporo táképo. Arirakanó ipu Yasuaki patera tarisiasamo iane Kotimo fanashihokosapo. Iane Kotimo fanasinapaka, i fanashihokosane Kotimo anoak kakarie, aíyaka hemakapurakanapo. I fanasinane metakariraka, ano Yasuaki paosane Yasumo ano metakarirakanó, ane fanasina amo ropoane, nōmo amara ayapo. Ayikasimo nōmo hemakapurakaripo.

<sup>4</sup> Isiraya aporoane Kotimo kára araresapo. Isiraya aporoane Kotimo ipi hokosa pariraka risikiasimo iane pasimoyereapo. Arirakanó Koti ipi iyaki hakásá reke, ipu hemakapusimo Koti ipi ti pakae faesa ira rufi ásiáne iyaki hakásá reareapo. Arirakanó Kotiane Isiraya aporoyaki reke, someaka mayereapo. Someaka maraka iaki Kotimo ipi somemane karaka, üri Sainaé á Moseseaki Kotimo ipi somemane kayereapo. Arirakanó Isiraya aporomo Kotiane koteaka kekerehoasimo Kotimo iane ararehoareapo. Aíyáka iane makotehokosakipoko Kotimo someaka mayereapo.

<sup>5</sup> Arirakanó isiaipo makasa kaua kekema Eparahame soko, Aisake soko, Yakope<sup>†</sup> soko, ipu wainepe pesane Isiraya aporo ayapo. Ipu aporo ira aeyaka Yasu Keresoane isu aporo hinamomo kauane maka takapesapo. Asiáne Yasuane kakaro Kotipo. Asiamo makata suamo unihaeane Yasu ipipo. Yumo soko keseke soko aporo hinamo suamo Yasu yano motosane makama fanaraka kekereraka risikiasimoripo. Kakaroripo.

"Kotimo nena somesafapo," aisane oyapo.

<sup>6</sup> Isiraya aporoaki Kotimo ayiakakosaposane nena somesare? Ayiakakosaposane metakarisare? Wae. Metakarisafapo. Isiraya aporo ira wainepe pesa yine suamo kakaro Isiraya aporomo aina ayiáka anakanafapo.

<sup>7</sup> Arirakanó Eparahamemo aporo ira wainepe pesapo, aihorane Eparahamemo ipi kaumo hemakapusua anaka hokosa hokono murisia amo wainepe pesa aporoane airakanafapo. Asiane Kotimo Eparahameaki someraka, "Aisake aeyaka aporo ira wainepe pukusane nōmo ní aporo irane ayapo," aihoreapo. (Stat 21:12)

<sup>8</sup> Aisa amo kepoane oyapo. Kaumo hokosa hokono murisia suane kakaro Kotimo hokosafapo. Kotimo ayiakakosaposane kakimasa aporoane kakaro Kotimo hokosapo.

<sup>9</sup> Asiamo Kotimo ayiakakosapo aisane epo someraka, "Sere meta nōmo murikimasa maiya a paúrakano, ano eféra hunia pariaperamo Saramo aporo hokosa hokono mareakosapo," aíyaka somehoareapo. (Stat 18:10, 14)

\* 9:1-2: Isiraya aporoane Yu aporo hakásá yiyapo. † 9:5: Yakope ipi yano motosa metane Isiraya airapo. (Stat 32:28; 35:10)

<sup>10</sup> Kotimo some meta soko repo hemakapusimo Kotimo ayiakakosaposane ayiana ayareapo. Aisane oyapo. Aisakemo ipi asea Repekeamo hokosa tetasa umiraka kayapo.

<sup>11</sup> Umiraka kakeno hokosa tetasa mano Isope Yakope tetā takapeasiraka umiraka kaya maiya amo, hokosa hakásane Kotimo ipi fana murikimayereapo. Eparahamemo aporo ira wainepe pusimo Kotimo ipi hemakapusua aeyaka hokosa hakásane murikimayereapo.

<sup>12</sup> Hokosa tetasa takapeasiraka hokosa amo makata kotesane soko makata watikisane soko rakiasiraka, Kotimo ipi hemakapusuan kekemaraka rakisimo hokosa hakásane aye Kotimo murikimayereapo. Murikimaka hokosa takapeasiraka hokosa tetamo kafyia Repekeaki Kotimo someraka, "Hokosa fana taka aperamo ipi mamanea kesekepoko rakiakosapo," aiyaka Kotimo Repekeaki somehoareapo. *(Stat 25:23)*

<sup>13</sup> Somesa hakásane yine porofete aporo metamo popasane oyapo. Kotimo someraka, "Yakopeane nōmo makotehoko hemakapurua rea yine kekemaraka murikimaranapao. Isomo Yu aporo ira wainepe pusimo nōmo hemakapurakanafapo. Eane nōmo muriki-marakanafapo." Aiyaka someraka porofete aporomo popahoareapo. *(Malakai 1:2-3)*

<sup>14</sup> Asiasamo isiapo Yu aporo metakiramo someraka, "Hokosa hakásane murikimaka makotesasamo Kotimo siaraka hemakapuafareapo," aiyaka somehokopo.

<sup>15</sup> Yu aporomo Kotiane patera tarikia saro ponomakau kekererakano, Kotimo iaki saperaka fanasihokoamo Mosesemo ipoko farimaka Kotiaki kurikurihoareapo. Kurikuri-rakano Kotimo Moseseaki someraka,

"Aporo metane nōmo kamenakahoko hemakapuraka ane, nōmo kamenakahokosapo. Arirakano aporo metane nōmo makotehoko hemakapuraka ane, nōmo makotehokosapo." Aiyaka Kotimo somehoareapo. *(Kisim Bek 33:19)*

<sup>16</sup> Asiamo aporomo ipi makata su hemakapurua faraka, makata su rakira akipoko Kotimo murikimaraafapo. Asiāne Kotimo ipi hemakapusua aeyaka aporomanu ane kamenakaraka makotenapo.

<sup>17</sup> Aporoane Kotimo ipi hemakapurua reasamo murikimasa makata one soko hemakapunie. Fana Kotimo Iyipi aporo unihae Feroaki somehoko Mosese pusiesapo. Pusierakano ipi pukua Iyipi aporo unihae Feroaki Mosesemo someraka, "Kotimo néaki somehoasimo some kasane oyapo. Né unihaeaka rekeasimo nōmo né marekea maresapo. Nōmo someane nōmo koaretaerakano, nōmo fanasinane kakakosakipoko nōmo wakapuané néaki kakama tariakosapo. Tarirakano hauaka sua aporo hinamo suamo, Koti hákasa anopo, aiyaka ipu hemakapurkusapo. Asiasamo nōmo né unihaeaka rekeasimo murikimaka maresapo." Aiyaka Kotimo sawia popahoareapo. *(Kisim Bek 9:16)*

<sup>18</sup> Asiamo Kotimo ipi rakiako hemakapusua aeyaka rakirapo. Kotimo ipi hemakapusua aeyaka aporo metane kamenakaraka makotenapo. Arirakano Kotimo ipi hemakapusua aeyaka aporo metane himu makunututu mareaiko hemakapuraka, himuane makunututuraka marerapo.

*Aporo metaki Kotimo saperaka aporo metane arareraka aiyáka Kotimo hemakapurane oyapo.*

<sup>19</sup> Kotimo ipi hemakapusua aeyaka aporoaki maresasamo epo aporoaki hukuarurane marirakano hukururakanare?

<sup>20</sup> Aiyaka repo somerakanone reane aporomanosasamo Kotiaki some irirarakaka somehoane siahoasifareapo. Aporomanomo epo ipiane makáraraka Kotiaki sapehoane siahoasifareapo. Asiamo nōmo neaki takumeaka somerakanapao. Akú pésa hinamoaki akúmu someraka, "Nōmo ano marirakano aiyáka pesare?" Aiyaka akúmu hinamoaki somerare? Wae, akúmu ipi aiyaka hinamoaki somerafapo. *(Aisaia 29:19; 45:9)*

<sup>21</sup> Arirakano hinamo akú peramo ipi hemakapusua aeyaka akú perapo. Hinamomo akú peako hemakapuraka sekeapo maka, aéya akú soko, waru akú soko, aiyáka akú kekepoaka perapo. Aiyáka hinamomo ipi hemakapusua aeyaka akú perapo.

<sup>22</sup> Arirakano hinamomo ipi hemakapusua aeyaka akú apéra aiyáka, Kotimo Isiraya aporo hinamoaki ipi hemakapurua murikimasa aeyaka rakiakosapo. Rakiakosane aiyáka hemakapuruka fasapo. Isiraya aporo hinamo metakiramo watikiaka rakirakano, Kotimo saperaka kára mokoatikihokosapoko asiāne, ipi fore asekepayaraka kau rekenapo. Ipu watikiaka rakiakipoko Kotimo sapehoafunusa nine ipi kau rekenapo. Kaureasamo eaki repo meuraka somehoane siahoasifareapo.

<sup>23</sup> Kau reke aporo hinamo metakirane soko Kotimo kamenakarakanapao. Kamenakaraka aporo hinamoaki Kotimo yaku ararenane soko ipi faesa kárane soko tariako hemakapusuapo. Asiamo i metakirane eyaki faesa hauaka á risikiakosane fana murikimaka maroposapo.

<sup>24</sup> Asiamo Kotimo aporo ira murikimasane isupo. Yu aporoane soko, Yu aporo hoanafonosane soko isu suane epo ipi murikimaka maroposapo.

<sup>25</sup> Arirakano Kotimo somesane porofete aporo Hoseamo kaikia popasane oyapo. Kotimo someraka, "Aporo metakira nōmo aporo hoanafonosaki, 'Re nōmo aporo irapo,' aihokosapo. Aporo metakira nōmo himu tumurumo hemakapunafonosaki, 'Re nōmo himu tumurumo hemakapurakanapo,' aihokosapo." Aiyaka Kotimo somerakano Hoseamo popahoareapo. (Hosea 2:23)

<sup>26</sup> Arirakano Yu aporo hoanafonosane Hoseamo some meta soko popasane oyapo. "Fana Yu aporo hoanafonosa risira hauaka á Kotimo someraka, 'Re nōmo aporo irafapo,' aisa nine hauaka á Kotimo someraka, 'Ano Kotipo. Ano yaiya rerapo. Re nōmo aporo irapo.' Aiyaka yaiya rera Koti amo somesapo." Aiyaka somerakano Hoseamo kaikia popahoareapo. (Hosea 1:10)

<sup>27</sup> Asíane Isiraya aporo hinamoane Aesayamo me paroaka someraka, "He tawara hauaka sakipu mukisa ayíáka, Isiraya aporo re ayíáka mukisapo. Aporo mukisa nine, Kotimo fanasiraka faraka, aporo hukusi metakira Kotimo mafasiakosapo." <sup>28</sup> Aporo hinamo risia hauaka á Kotimo fanasihokosaposane, fanasiana maiya amo Kotimo foaka fanasihokosapo. Epo kau rekeakosafapo." Aiyaka Aesayamo Kotimo sawia popahoareapo. (Aisaia 10:22-23)

<sup>29</sup> Aesayamo some meta soko popasane oyapo. "Koti namo kakaro unihae káramo isu Yu aporo hinamo hukusi mafasianafonosa satiki, Sotome aporope Komora aporo i marutaesa ayíáka, isu soko marutaehoafunureapo." (Aisaia 1:9) Aiyaka Aesayamo popahoareapo.

*Isiraya aporomo Yasuaki himu hakásaraka hemakapunafononane oyapo.*

<sup>30</sup> Yu aporo hoanafonosamo Kotimo ereketae ainane mokoakosakipoko wafororaka rakianafonosa nine, Kotimo ereketae ainane mosapo. Asiamo Yu aporo hoanafonosa amo Yasuaki himu hakásaraka risiasamo Kotimo iane ereketaeraka risikiasimo maroporaka marerapo.

<sup>31</sup> Ásiane Yu aporomo Kotimo ereketae aina ayíáka risikiako Kotimo somemané kekemaraka rakiraka tiki rakisia nine, kakaro su siaraka rakisiafapo.

<sup>32</sup> Marirakano ásiare? Ipu Kotiaki himu hakásaraka hemakapurafaraka, somemanéne kekemaraka, ipu honokomo makata rakisiaki himu hakásaraka hemakapukua rakiraka risiapo. Arirakano yapake somesane oyapo. Aporo hinamo ikia kara hasaka purapaka iramo matasonapo. Ira matasosa á aporo hinamoane terafaka ruraka etenapo. Eteana ayíáka Yu aporo hinamoane ayíáka etesapo. Ipu watikisapoko Kotimo sapenane fahoasimo, Yasumo ipi apiana ayíáka e kusuane, Yu aporomo asekepayarakia iane eteana ayíáka etesapo. Asiamo Koti hikumisia i ereketae siaraka risiafapo.

<sup>33</sup> Ásiane wate fana Kotimo sawia Aesayamo úyaka popahoareapo. Kotimo someraka, "Kaisie, Saeone apea ape kiakosakipoko ira warupi<sup>‡</sup> maka motoakosapo. Ira warupi motosa á aporo metakira terafaka ruraka etehokosapo. Asiáne ira warupiane kotesasamo aporo metakiramo maka ape kiakosapo. Ira warupi kotesaki himu hakásaraka hemakapura aporo hinamoane kaíyahokosafapo." Aiyaka Kotimo somesane Aesayamo popahoareapo. (Aisaia 8:14; 28:16)

## 10

*Kotimo hemakapusuane Yu aporomo hemakapunafonoraka himeteraka risiane oyapo.*

<sup>1</sup> Maeo, nōmo aporo ira Yu aporoane somerakanapo. Nōmo iaki himu tumurumo hemakapuraka, Kotimo ipu watikiaka rakirane mafasikia Yasuaki kataka marekea risikiasimo nōmo kurikurirakanapo.

<sup>2</sup> Ásiane i fasikia risikinapo. Nōmo iane aseraka kakaro somerakanapo. Ipu Koti masesehoasimo wafororaka rakirakanapo. Ásiane Kotimo hemakapusuane ipu koteaka hemakapunafonoraka himeteraka Kotimo rakirane siaraka rakirakanafapo.

<sup>3</sup> Asiamo aporo ereketaeraka risikiasimo ereketae risirane Kotimo karápo. Kakakosa ikia kara á ipu kekemasafapo. I namina ereketae risikiakosakipoko ipu namina hemakapusuane kekemasapo. Kekemaraka risike ipu namina hemakapusuane makáraraka Kotimo ereketae aina ikia karane patera tarisiapo.

<sup>‡</sup> 9:33: Saeone apea yano motosa metane Yarusarame apepo. Yu aporomo ekemo ape kirapo. Namo aporomo iramo ape kirasamo, ira popasapo. Ira warupi ásiáne Yasu ipipo.

<sup>4</sup> Asiamo Kotimo ikia kárane oyapo. Aporo ereketae risikiasimo somemanemo ikia karane tarisiapo. Arirakano Yasu pesakipoko aporo ereketaeraaka risira kepoane Yasu ipipo. Yasuaki himu hakásaraka hemakapura aporoaki Kotimo ipi ereketae ainane karápo.\*

<sup>5</sup> Somemaneane aporomo kakimaka rakirakan asekeia Kotimo someraka, "Né aporo ereketaereapo," aihoasimo Mosesemo popasane oyapo. "Kotimo somemane ayiakanesane aporomanomo kakimaka rakiraka risia, yaiya kakimaka rakiraka risikianie," aiyaka Mosesemo popahoareapo. (Wok Pris 18:5)

<sup>6</sup> Arirakano aporomo Yasu Keresoaki himu hakásaraka hemakapukua rekeno aporoaki Kotimo someraka, "Ne ereketae rekenapo." Airakano aporoamo ipi someraka, "Yasu Kereso hauaka wo peasimo epamo hepene yapura pasimako hiakosare?" Aiyaka somehoane siahoasifareapo. Yasumo isuane makotehoko fana pesa ayapo.

<sup>7</sup> Airakano some meta soko aporomo someraka, "Yasu kusuanne maturikia taehoasimo aporo epamo aporo kusua hauaka aseako pukusare?" Aiyaka somehoane siahoasifareapo. Yasuaki himu hakásaraka hemakapura aporomo aiyaka somerafapo. Yasumo ereketae aina ikia kara tarisimo Yasuane Kotimo fana maturikia taesa ayapo.

<sup>8</sup> Arirakano aporomo Yasu Keresoaki himu hakásaraka hemakapukua rekeno aporoaki Kotimo someraka, "Né ereketae rekenapo." Airakano aporoamo ipi someraka, "Kotimo someane nōmo kaisiasamo ano mahimeteraka rekenafapo. Himumo hemakapukua akaimo somerakanapo." Aiyaka somehoane siahoasireapo. (Lo 30:12-14)

Asiamo isiapo Yasumo someane some karakano repo kakimaka Yasuaki himu hakásaraka hemakapurakanapo.

<sup>9</sup> Asiamo aporo hinamo suamo kaiyisimo nōmo someraka, "Unihaeane Yasu ipipo," aiyaka somerakano, nōmo himu hakásaraka hemakapuraka, "Kotimo maturikia taesane Yasu ipipo." Aiyaka himu hakásaraka hemakapurakano, néane Kotimo mafasiakosapo. Watikiaka rakira takua Kotimo né mafasiakosapo.

<sup>10</sup> Aporomo ipi himumo Yasu Keresoaki hemakapusuane Kotimo aseraka someraka, "Aporo ereketae rekenapo." Aiyaka Kotimo ipi ereketaenane aporoaki karápo. Arirakano aporoamo himumo hemakapukua akaimo someraka, "Yasu Keresoaki nōmo himu hakásaraka hemakapukua rekenapo." Airakano aporoane Kotimo mafasirapo.

<sup>11</sup> Arirakano Kotimo sawia popasane oyapo. "Yasuaki himu hakásaraka hemakapura aporo hinamoane kaiyahokosafapo. Koti ipi hikumisia siaraka rekeasimo Kotimo ararehokosapo." Aiyaka porofete aporo Aesayamo popahoareapo. (Aisaia 28:16)

<sup>12</sup> Asiamo Yu aporo soko, Yu aporo hoanafonosa soko i supoko Kotimo ereketae aina ikia karane hakásapo. Aporo metaki makata meta some arirakano aporo metaki makata meta some anafapo. Asiamo aporo suane hakasa yineraka Yasu Keresomo unihaeaka asekeia rekenapo. Asiamo aporo suane unihaeaka asekeia rerane Yasu ipipo. Aporo hinamomo Unihae Yasu Keresoaki kurikuriraka risikinone i suaki Yasumo yaku ararenane kakakosapo.

<sup>13</sup> Ararena ane Kotimo sawia popasane oyapo. "Unihaeaki aporo hinamomo kurikuriraka, 'Unihaeo, nōmo watikiaka rakira amo, ano nī yia mokoatikirakanapo. Watikiaka hemakapura takua rakiraka reane, Koti nōmo ano mafasikia pasimaka néyaki mapaoasies,' Airakano Unihae Kotimo né pasimaka, e rea taku á mapaohokosapo." Aiyaka Kotimo sawia popahoareapo. (Joel 2:32)

<sup>14</sup> Arirakano aporo metamo Yu aporo ane farimako anoaki someraka, "Aporomano mafasiako Yasu kusuane Yu aporomo himu hakásaraka hemakapura fapo. Hemakapuna-fonoraka risike, Yasumo i ararehoasimo mayiaka kurikurihokosare? Yasuaki himu hakásaraka hemakapukusakipoko asiane ipu Yasuane kaisiafapo. Kaiyafunusa nine aporo metamo iaki some kasafapo.

<sup>15</sup> Some kakakosakipoko asiane Kotimo 'somehoko pusie' aihoafareapo. Asiamo Yu aporomo Yasuaki himu hakásaraka hemakapunafonona kepoane i naminafapo." Aiyaka repo somerakano nōmo some paripusuane oyapo. Kotimo ereketae aina ikia kara somehokusakipoko Kotimo aporo metakiramo somehoko kakaro pusiesapo. Pusierakano Kotimo someane ipu some kape pusuapo. Kotimo sawia porofete aporo Aesayamo some poparaka, "Kotimo isu araresane hemakapusimo some kotesane some kara aporoane namo kakaro kotesapo." Aiyaka Aesayamo popahoareapo. (Aisaia 52:7)

*Yu aporomo Kotimo some kotesane kakimakanafonosane oyapo.*

<sup>16</sup> Yasu hemakapusimo some kotesane some karakano, Yu aporo metakiramo kaisia nine ipu kakimasafapo. Kakimakanafonosane Aesayamo fana poparaka, "Unihaeo, nōmo

\* **10:4:** Pirisiti aporomo rakisimo somemane motosane Yasumo marakosapo.

someane isiapo some kasapo. Some karakano ipu kaisia nine kakimasafapo," aíyaka popahoareapo. (Aisaia 53:1)

<sup>17</sup> Asiamo aporo hinamomo Yasuane hemakapusimo aporo metakiramo some karakano ipu kaiyakoso. Kaikia Yasuaki himu hakásaraka hemakapukusapo.

<sup>18</sup> Asiane Yasu hemakapusimo some kotesane Yu aporomo kaisiare? Ao, kaisiapo. Arirakan Tefetemo some hakása yine poparaka,

"Hauaka suá Kotimo someane some kakasimo aporo pusiesapo. Pukua, aporo hinamo sua risiaki some karakano ipu kaisiapo," aíyaka Kotimo sawia popahoareapo. (Buk Song 19:4)

<sup>19</sup> Arirakan nōmo efera hunia reaki makata kairakanapo. Kotimo someane Yu aporo hinamomo hemakapusuare? Ao hemakapusuapo. Asiamo fana Mosesemo someraka.

Isiraya aporoaki Kotimo someraka, "Yu aporo hoanafonosa hauaka kekepoa risiane nōmo ararerakano, repo aseraka kakanakehokoso. Repo hemakapuraka, 'Ipu Kotiane hemakapurakanafapo,' aíyaka repo hemakapusua nine nōmo iane ararerakano repo aseraka sapehokoso." Aíyaka Mosesemo popahoareapo. (Lo 32:21)

<sup>20</sup> Asiamo Yu aporo hoanafonosane Kotimo somerakano Aesayamo popasane oyapo. Kotimo Yu aporo hoanafonosaki someraka, "Repo ano aseakosakipoko koanafonosa nine, repo ano hemakapusapo. 'Kotimo ainane yakapare?' aíyaka repo anoaki kaiyanafonarakano yía, nōmo reaki tarisiapo," aíyaka popahoareapo. (Aisaia 65:1)

<sup>21</sup> Asiane Isiraya aporoaki Kotimo someraka, "Wafayamo ipi hokosa peasimo hokono haena ayiáka, re anoaki risikiako parihoasimo nōmo reaki hokono haesapo. Maiya suamo reaki peaesapo. Peaesa nine repo hisiraka asekepayaraka patera tarisiapo." Aíyaka Kotimo Yu aporo hinamo ane somerakano Aesayamo popahoareapo. (Aisaia 65:2)

## 11

*Kotimo Isiraya aporo hinamo araresane oyapo.*

<sup>1</sup> Nōmo reaki efera hunia makata kairakanapo. Kotimo Isiraya aporo murikimasane metakarisare? Wae, metakarisafapo. Ano Pore ane Isiraya aporopo. Anoane Kotimo metakarisafapo. Eparahameane nōmo makasa kaua kekemapo. Nōmo aporo irane Pénasemene aporo irapo.

<sup>2</sup> Wate fana Koti ipiaki paosa aporo risikiasimo Kotimo Isiraya aporoane murikimayereapo. Murikimaka iane Kotimo metakarisafapo. Arirakan Kotimo sawia popasane repo hemakapurakanapo. Popasane oyapo. Wate fana Isiraya aporomo watikiaka rakisisasamo porofete aporo Iraíyamo Kotiaki meuraka somehoareapo.

<sup>3</sup> Iraíyamo someraka, "Unihae Kotio, eke kima yapura néaki makata paikia kara ekeane Isiraya aporomo marakaritaesapo. Nōmo some kara porofete aporoane ipu rusua fasapo. Rukua faraka ano hakása rekenapo. Anakano ipu ano soko rukusakipoko ipu hemakapurakanapo." (1 King 19:10, 14)

<sup>4</sup> Airakan Kotimo Iraíyaki someraka, "Aporo ano patera asesane né hakasafapo. Isiraya aporo metakira sewene taosene suane (7,000) ano patera asesa aporopo. Ipu ano hemakapuraka, kotafe koti yano motosa Peaoane makáraraka kekeresafapo." Aíyaka Kotimo Iraíyaki somesane Kotimo sawia popahoareapo. (1 King 19:18)

<sup>5</sup> Fana asia ayiáka maiya yumo soko isu Yu aporo hukusi metakiramo Kotiaki hemakapuruka risikinapo. Kotimo ipi yaku ararena amo i pasimosapo.

<sup>6</sup> Aporo pasimosane Kotimo ipi aporo hinamoane hemakapuraka kamenakarakaka pasimosapo. Kamenakarakaka pasimosasamo aporo hinamomo namina makata rakisia akipoko Kotimo pasimosafapo. Aporo hinamomo makata koteaka rakirakanoso asekeea pasimoso satiki ane, Kotimo ipi hemakapukua yaku ararerakanapo, aihoafunufapo.

<sup>7</sup> Asiamo Isiraya aporo ane nōmo úyaka somerakanapo. Kotimo someraka, "Isiraya aporo ereketaeraka risikinapo," aihoasimo ipu rakirakanoso risia nine Kotimo aisafapo. Asiane Eparahamemo Kotiaki himu hakásaraka hemaka apura ayiáka, aporo hukusimo ayiáka hemakapurakanoso, aporo hukusi ereketaeraka risikiasimo Kotimo maroposapo. Asiane Isiraya aporo hukusi metakira maropohoanafonosa aporoane ereketaeraka risikinako, Kotimo makotesapo, aíyaka hemakapunafonorakanoso, Kotimo ipu himu hemakapusuan makunututu marereapo.

<sup>8</sup> Arirakan Kotimo sawia popasane oyapo.

"Isiraya aporomo himumo hemakapurane Kotimo mahimeteraka maresasamo, aporoane wasá kusua arisia ayiáka risiapo. Yaiya risina ipu hí ane soko makumikia, arirakan ipu senaki ane soko tiraka yaiya risikinapo. Asiamo ipu takekea hemakapunafonoraka

risikinapo. Fana soko pipu maiya yumo soko ayíáka risikinapo.” Aiyaka Kotimo sawia popahoareapo. (Aisaia 29:10; Lo 29:4)

<sup>9</sup> Arirakano Yu aporoane ayikasimo Kotimo sawia Tefetemo popasane oyapo.

“Isiraya aporomo Koti neaki hemakapunafonoraka, hokono akeramo namina yia fanasi-hokosane nómó tarisimoripo. Iane saro rurú rasakipoko huruperaka, saro rurú kakarua ira porosamo akarera ayíáka, nómó somemanem iane metakira makukua fahoasimoripo. 10 I hílane katosa ayíáka, Koti nómó somemanane hemakapukua, somemaneamo kepoane hemakapurafraka mahimeteraka mareanie. Koti nómó i fanasiraka, makata umisa kára asia mati yapura motosa, mati tipuru heke aputa ayíáka, aporoane ayíáka pusimoripo,” aisiapo. Aiyaka Tefetemo hemakapusuane Kotimo sawia popahoareapo. (Buk Song 69:22-23)

*Yu aporohoanafonosane Kotimo pasimosane oyapo.*

<sup>11</sup> Arirakano reaki nómó takume meta somerakanapo. Isiraya aporo kakaro eteraka yaiya warisikiakosare? Wae, aiyaka hemakapukupo. Iane eteraka warisina efera hunia turikia tariakosapo. Asiane maiya wakasemamo Kotimo ereketaeraka risira ikia karane Yu aporomo waeraka, aiyaka patera tarikia metakarisap. Patera tarikia metakarirakano, Yu aporo hoanafonosaki somehoko Kotimo ipi some kara aporoane pusiesapo. Pusierakano i pukua Kotimo hemakapusua someane some karakan, Yu aporo hoanafonosa yakaimo kakimasapo. Kakimarakan, Kotimo i ereketaeraka risikiasimo arareraka makotesapo. Makoterakan Yu aporomo aseraka, “Isu soko ayíakako seseripo,” alhoasimo Yu aporo hoanafonosane Kotimo makotesapo.

<sup>12</sup> Arirakano Kotimo ereketaeraka risira ikia karane Yu aporomo patera tarirakanano aseke, Kotimo hauaka wo aporo hinamo metakirane makotesapo. Yu aporomo Koti ipi hikumisia siaraka risikianafonoraka huruperakano, Yu aporo hoanafonosane Koti ipi hikumisia siaraka ereketaeraka risirane iaki kasapo. Asiasamo keseke Koti hikumisia Isiraya aporo hinamoane ereketaeraka risikiasimo Kotimo iane pasimokoakosapo. Pasimokoa Yu aporoane Kotiaki risikiako pariraka arisia maiya amo iane soko Yu aporo hoanafonosane soko Kotimo namo kakaro makotehokosapo.

*Yu aporo hoanafonosa Kotimo mafasisciane oyapo.*

<sup>13</sup> Re Yu aporo hoanafonosa Rome sitia risiaki nómó somerakanapo. Yasumo tarisia ayíáka nómó tarisimo Kotimo ano tarira aporo murikimasapo. Murikimarakano Yu aporo hoanafonosamo Yasuane hemakapusimo someane nómó some karakanapo. Re Yu aporo hoanafonosapoko rakiraka ano kára seseraka rakirakanapo.

<sup>14</sup> Kára seseraka rakirakan Yu aporomo kaikia someraka, “Yu aporo hoanafonosane Kotimo makoterakan, isu soko makotehoasimo hemakapurakaripo,” alhoasimo Yu aporo hoanafonosapoko Kotimo rakirane nómó makáraraka somerakanapo. Somerakan Yu aporomo kára hemakapuraka, Yasuaki himu hakásaraka hemakapurakano Kotimo i mafasikia pasimokoasimo ano seseropo.

<sup>15</sup> Yu aporoane Kotimo makikisiraka risia maiya amo aporo hinamo hauaka sua risiane Kotiaki paohoko peasimo Kotimo araresapo. Asiakipoko keseke Kotimo Yu aporoane mafasikia iane pasimokoa iaki someraka, “Re siareapo,” aihokosapo. Aihora maiya amo aporo kusua maturikia taesa arisia ayíáka, Yu aporoane ayíáka risikiakosapo.

<sup>16</sup> Arirakano nómó reaki takumeaka somerakanapo. Farawa paikia parakuraka wakasema Kotiaki karakan, wakaseman Kotimenapo. Farawa wakasema Kotimenasamo farawa kárane soko Kotimenapo. Arirakano takume meta somesane soko oyapo. Ira pikinu Kotiaki karakan ira eya ane soko ipimenapo.\*

<sup>17</sup> Arirakano takume metane oyapo. Hemoa ira orofe eya á wate fasenkeno pateketaeraka, ira orafe meta yaoa reane patekemaka hemoa ira orofe rea a taponapo. Taporakan hemo ira orofe pikinu aeyaka ira piamo yao ira orofeane makotenapo.<sup>†</sup>

<sup>18</sup> Asiamo re Yu aporo hoanafonosamo hemakapuraka, “Yu aporoane isiapo marokerakanapo,” aiyaka hemakapukupo. Ira eya aeyaka ira pikinuane mawakapunafapo. Ira pikinu aeyaka ira eyane mawakapunapo. Aina ayíáka Yu aporo aeyaka, re Yu aporo hoanafonosane makotesapo. Re Yu aporo hoanafonosa aeyaka makotena faserepesafapo.

<sup>19</sup> Asiane re Yu aporo hoanafonosamo someraka, “Nena yaoa ira orofe eya ane, hemoa rea ira orofea taporomarekea tapohoasimo, hemoa ira orofe eya metakira pateketaesapo. Pateketaeana ayíáka isu Kotiaki kataka marekea risikiakosakipoko Yu aporomo

\* **11:16:** Takume kepoane oyapo. Yu aporomo makasa kauane Kotimenapo. Kotimenasamo makasa kauamo hokosa wainepesane soko Kotimenapo. † **11:17:** Yu aporoane hemoa ira orofe reamo eya asiapo. Yu aporo hoanafonosane yaoa rea ira orofe eya asiapo.

Kotiaki himu hakásaraka hemakapunafonoraka risiane fasikia risikianie, aíyaka Kotimo somesapo."

<sup>20</sup> Aíyaka re Yu aporo hoanafonosamo kakaro somerakanapo. Wate fasekeno hemo wafayamo ira orofe eya pateketaena aiyáka, Isiraya aporo pateketaesapo. Ipu Kotimo hemakapusua aeyaka ereketaeraka risira ikia karane himu hakásaraka hemakapunafonorakano, Kotimo iane fore makamafeasapo. Asiane re Yu aporo hoanafonosamo Kotimo hemakapusua aeyaka ereketaena ikia karane himu hakásaraka hemakapukua kekemarakano, reane Kotimo pasimosapo. Pasimorakano repo namina yia makárara rupiaka hemakapukupo. Asiamo reane Kotimo pateketaenapaka asekeanie.

<sup>21</sup> Yu aporoane kakaro hemo ira orofe eya ásiáne Kotimo pateketaesamo, re kakaro hemo ira orofe eyahoanafonosa ásiáne soko pateketaehokosapo. Repo Kotiaki himu hakásaraka hemakapunafonorakano, epo reane pateketaehokosapo.

<sup>22</sup> Asiamo Kotimo ipi aporo hinamoaki kamenakanane soko, mahisinane soko, repo hemakapunie. Yu aporoane terafaka ruraka etesane Kotimo hisisapo. Kotimo ereketaena ikia karane kekemahoanafonoraka i eterakano, Kotimo iaki fanasinane kasapo. Ari-rakano re Yu aporo hoanafonosamo Kotiaki himu hakásaraka hemakapukua yaiya risikino, epo reaki kamenakahokosapo. Repo eaki himu hakásaraka hemakapunafonorakano, epo reane soko kamenakaraka hemakapuskafapo. Kotimo ira eya pateketaeana aiyáka, reane soko aiyáka pateketaehokosapo.

<sup>23</sup> Yu aporoane eféra hunia Kotiaki risikiako parirakanone, kakaro hemo ira orofe eya pateketaesa, eféra hunia maka, namo kakaro orofea taporomarekea tapohokosapo. Taporomarekea tapohokosane Kotimo ipi wakapuamo siahoasireapo. Taporomarekea tapohokosa aiyáka, Kotiaki himu hakásaraka hemakapura Yu aporo hinamoane Kotimo pasimokoakosapo. Pasimorakano iaki ipi ereketae ainane kakakosapo.

<sup>24</sup> Yaoa rea ira orofe eya pateke maka hemo ira orofea taporomarekea taporakano, kakaro hemo ira orofe eya parihokosapo. Asiamo hemo ira orofe eya pateketaesane Kotimo maka, hemo ira orofea taporomarekea taporakano, namo kakaro hemo ira orofe taneherapo. Aina aiyáka Yu aporo hoanafonosane yaoa ira orofe eya ásiáne pasimokoa, arirakano Yu aporoane hemo ira orofe eya aiyáka risiane soko pasimokoa i suane Koti ipia hakasa mapao hokosapo.

#### *Yu aporoane Kotimo mafasiakosane oyapo.*

<sup>25</sup> Maeo, fana Kotimo ipi hemakapusuan Yu aporoaki aiyákakosane somehoanafonosa nine, yumo isu ipi some kara aporoaki mafekemarakana somesapo. Somesane re Yu aporo hoanafonosamo hemakapusimo, nōmo reaki somerakanapo. Nōmo someraka one repo namina makárara hakásaraka hemakapuraka, "Kotimo Yu aporoaki makotenane rukupateraka, isu Yu aporo hoanafonosa hákasane makoterakanapo," aiyáka hemakapurapaka, Kotimo Yu aporoaki aiyákakosane nōmo reaki somerakanapo. Kotimo aiyákakosane oyapo. Kotimo Yu aporoane unihaeaka asekeea rekeasimo Kotimo Yasu Keresoane pusiesapo. Pusiesane perakano Yu aporomo maiya wakasemamo eaki himu hakásaraka hemakapurakanafapo. Arirakano Yasu hemakapusimo some kotesane hauaka sua aporo hinamo suaki some kaka farakano, Yu aporomo soko Yasuaki himu hakásaraka hemakapukusapo. Himu hakásaraka hemakapurakano,

<sup>26</sup> Yu aporo hinamoane Kotimo makamafea nine eféra hunia pasimokoakosapo. Some hakása yine wate fana Kotimo sawia porofete aporo Aesayamo poparaka, Kotimo someraka,

"Yarusarame siti aeyaka Yu aporoane Makokorotaena Aporoane peakosapo. Yakopemo aporo ira wainepe pesa aporo amo Kotimo ikia kara kekemahoanafonosane Makokorotaena Aporoamo makokorotaehokosapo.

<sup>27</sup> Ipu watikiaka rakisiane nōmo mafahokosapo. Mafahokosa ikia kara kaweane some karakanapo." Aiyáka iyaki Kotimo some kawe someaka mayereapo. Aiyáka Aesayamo wate fana popahoareapo. (Aisaia 59:20-21; 27:9)

Asiamo re Yu aporo hoanafonosamo Yu aporoaki koteaka hemakapunie.

<sup>28</sup> Aporo hinamomo Yasu hemakapusimo some kasane Yu aporomo patera tarirakano, iaki Kotimo yunuraka rekenapo. Arirakano re Yu aporo hoanafonosaki Kotimo makoteraka ararerakanapo. Asiane Yu aporomo Kotimo someane some kakako murikimasasamo, iaki Kotimo ipi himu tumurumo hemakapukua rekenapo. Asiamo Yu aporomo makasa kauane Eparahame soko, Aisake soko, Yakope soko, ipu aporo ira wainepe pesa aeyaka Kotimo ipi makotenane aporo hinamo suaki kakakosapo, aisakipoko Kotimo Yu aporoane himu tumurumo hemakapukua rekenapo.

<sup>29</sup> Asiamo Kotimo ipi hemakapusuane rukupateraka metakarirafapo. Metakarianafonora-  
ka Kotimo ipi rakirane rakisimo aporo murikimasane metakarirafapo. Ipi rakirane  
rakisimo ararenane soko fimarafapo.

<sup>30</sup> Re Yu aporohoanafonosamo fana Kotimo someane koaretaesa nine, yumo Kotimo  
re kamenakaraka ararerakanapo. Yu aporomo Kotimo someane koaretaerakano, epo ipi  
someane reaki some karakanapo.

<sup>31</sup> Arirakano Yu aporomo yumo Kotimo someane koaretaesa nine, Kotimo iane soko ka-  
menakaraka ararehokosapo. Re Yu aporohoanafonosane kamenakaraka araresa ayíáka,  
Yu aporoane soko ayíáka kamenakaraka ararehokosapo.

<sup>32</sup> Asiamo aporo suamo, Yu aporomo soko, Yu aporohoanafonosamo soko suamo Ko-  
timu somemanane koaretaesapo. Koaretaesasamo Kotimo iane hukurukua fanasihoko  
hemakapusu nine, iane kamenakaraka ararehoko hemakapurakanapo.

### *Kotiaki kekerenane oyapo.*

<sup>33</sup> “Yao watikisapo. Itifisiafapo,” ayíáka Kotiaki hemakapunie. Kotimo isu kára ararenane  
kotesa susupo. Kotimo isuaki ayikaniesane kotesa susupo. Kotimo hemakapusuane  
kotesa susupo. He tawara numu kárahoarea ayíáka, ipi kotesane kára asiapo. Kárasasamo  
Kotimo ipi hemakapukua takekeea someramo kepoane aporomanomo hemakapurafapo.  
Kotimo ipi hemakapukua aina kepoane aporomanomo hemakapurafapo.

<sup>34</sup> Arirakano Kotimo sawia popasane oyapo.  
Kotimo hemakapusuane aporomanomo hemakapurafapo. Kotiaki ayikanie aíyaka aporo-  
manomo somerafapo.

<sup>35</sup> Kotimo isuaki makata kakasimo aporomanomo Kotiaki makata ropo fana kaka mare-  
safapo. Aíyaka Kotimo sawia popahoareapo. *(Aisaia 40:13; Jeremaia 23:18; Jop  
41:11)*

<sup>36</sup> Popasane kakaro somesapo. Kotimo makata suane rakisiapo. Makata rakisiane ipi  
hemakapusua aeyaka risikiasimo wafayamo asekea rera ayíáka ipi makata suane asekea  
rekenapo. Asekea reke keseke ayiakakosane soko ipi hemakapusua aeyaka ayiakakosapo.  
Asiaasamo maiya suamo isiapo Kotimo yano motosane yaiya makáraraka kekererakanapo.  
Ayiakasimoripo.

## 12

### *“Kotiane masesehoko risikianie,” aisane oyapo.*

<sup>1</sup> Keresoa paosa aporo maeo, aporo hinamomo watikiaka rakisiane Kotimo mafasisi-  
asamo Koti ipiane masesehoko uyáka risikianie. Kotimo né kára kamenakasasamo, nómó  
ní kauane soko, nómó ni himu hemakapurane soko, eaki yaku kakanie. Maiya suamo  
hauaka wo area maiya amo né níane eaki kakanie. Né níane epo ipi menapo aihoasimo  
hemakapukua risikianie. E sesehoasimo risikianie. Ayíáka risikinone, ane eaki kakaro  
koteaka kekerenapo.

<sup>2</sup> Arirakano hauaka wo Koti kekemahoanafonona aporomo hemakapusuane kekemahoko.  
Nómó hemakapusuane Ho Kotesamo makawehoasimo ayikanie aihoanie. Nómó  
hemakapusua makawerakano, ne areane soko makawehokosapo. Makaweraka reke,  
Kotimo néaki ayíáka rakiniesane kaikia rakiakosapo. Kotimo neaki ayíáka rakinie aisane,  
ereketae kotesa susupo. Ayíáka rakiniesane rakirakano, Kotimo sesehokosapo.

<sup>3</sup> Arirakano Kotimo ano hemakapukua, epoko makata rakira rakinie aisane, nómó  
kakimaka rakiraka, reaki hakásá hakásaraka some karakanapo. Some karane oyapo.  
Nómó ni yano motosane makárahoko rakirane rakiakopo. Nómó ni wakapumo Kotipoko  
rakiakopo. Kotimo makata rakira kára kekeposane, repo rakisimo Kotimo ipi wakapu  
kekepoane reaki karapo.

<sup>4</sup> Aporomano kau hakásá yia ipi senaki soko, akai soko, hokono soko, korake soko,  
ayíáka kekepo kekeporaka risikinapo. Kekepo arisia amo kau hakásá ane ararehoko, kaua  
rea makata amo rakirane soko kekeponapo. Senakimo makata meta rakikia, arirakano  
akaimo makata meta rakikia, arirakano hokonomo makata meta rakikia, arirakano  
korakemo makata meta rakikia, ayíáka rakirapo.

<sup>5</sup> Aina ayíáka isu Keresoa paosa aporo hinamu su hakásá risiane, Keresoa paosa maiya  
amo, isu su kau hakásá asiápo. Isu su Keresoa paosane isina yia metamo meta arare,  
metamo meta arare, ayiakasimo, isu su sarimaraka, kau hakásá asiápo.

<sup>6</sup> Kotimo ipi rakira kekepo rakisimo wakapu kekepoane soko, hemakapura kekepoane  
soko, isuaki hakásá hakásaraka kekeporaka karápo. Kotimo ipi makata rakira isiapo  
rakisimo ayíáka yaku karápo. Kotimo neaki somerakano, nómó kaikia, Kotimo somesane  
aporomo hinamu metakiraki kakaro ereketae some kakanie. Asiaamo porofete aporomo

wakapuane Kotimo neaki karakanone, Kotiaki himu hakásaraka hemakapurua some kakanie.

<sup>7</sup> Arirakano Kereso aporo hinamo metakirane ararena wakapuane Kotimo néaki karakanone, nómó Kereso aporo hinamoane kakaro koteaka ararehoanie. Arirakano Kotimo some kepoane nómó hemakapusuasamo aporo hinamo metakiramo enomakasimo tisamo tarira wakapuane Kotimo néaki karakanone, aporo hinamo metakirane tisaraka tarinie.

<sup>8</sup> Arirakano aporo hinamo metakiraki ararena someane Kotimo neaki karakanone, nómó aporo hinamo metakirane arareraka makotehosimo ararena someane some kakanie. Arirakano aporo hinamo metakira makata forokoa risiane, arareraka makata kemo parakuraka kará wakapuane Kotimo néaki karakanone, nómó kára kakanie. Arirakano aporo hinamo ane soko, makata rakirane soko, poseraka asekeea rera wakapuane Kotimo néaki karakanone, nómó koteaka asekeea rekeanie. Arirakano aporo hinamomo makata umisa masaki kamenakaraka ararena wakapuane Kotimo néaki karakanone, aporo hinamomo makata umisa masaki nómó himu seseaka kamenakaraka ararehoanie. Ayíáka rakira wakapuane Kotimo kekepo kasane repo kekemaraka rakinie.

*Kereso aporo hoanafonosaki himu tumurumo hemakapurane oyapo.*

<sup>9</sup> Repo aporo hinamo metakiraki himu tumurumo hemakapurua, kakaro himu hakásaraka hemakapunie. Himu tetaraka hemakapukupo. Uyáka hemakapunie. Makata watikisane kakaro hisiraka patera tarikia risikianie. Arirakano makata kotesane seseraka hemakapurua risikianie.

<sup>10</sup> Arirakano aporomo ipi maeane himu tumurumo hemaka apura ayíáka, nómó soko Keresoa paosa aporo hinamo suane ayíáka himu tumurumo hemakapunie. Arirakano ní maemo yano motosane makáraraka epo someane kaiyinie.

<sup>11</sup> Arirakano Unihae Kotipoko rakiraka hisinafaraka, wakapuaka seseraka susu rakinie. Arirakano Ho Kotesa re himua rekerakana kairaka seseaka rakinie.

<sup>12</sup> Arirakano Unihae Kotimo keseke né makoteraka ayíakakosaposane hemaka apura maiyamo seseraka hemakapurua kau risikianie. Arirakano makata umisa maraka meuhokopo. Arirakano Kotiaki kurikurina maiya amo hemakapuraka, "Nómó kurikurisa makata ane Kotimo ayíakakosapo," ayíáka hemakapurua kurikuriraka risikianie.

<sup>13</sup> Arirakano Keresoa paosa aporo hinamomo makata nakosa soko pasu soko faseleno, nómó nimenane iaki kakanie. Arirakano Kereso aporo kimisi perakano, nómó tereraka pasimokoa makimisihoanie.

<sup>14</sup> Arirakano aporomo néaki makata umisa karakano, eane Kotimo arareraka makotehosimo nómó farimaka kurikurihoanie. Asiane eféra hunia nómó néaki someraka, eane Kotimo makotehosimo kurikurihoanie. Eaki yakasa ho marehokopo. Arirakano Kotimo eane mokoatikihoasimo kurikurihokopo.

<sup>15</sup> Arirakano makata kotesa fasere aperamo aporo meta seseraka rekeno, ne soko eyaki seseraka rekeanie. Arirakano makata umisa fasere aperamo aporo meta hiripuraka rekenone, ane nómó eane kamenakaraka epoko hiripuhoanie.

<sup>16</sup> Arirakano né níane makotena ayíáka, aporo hinamo metane soko ayíáka hakásá yinera ka iane soko hemakapunie. Asiamo né ní yia makáraraka unihaeaka rekeakosakipoko hemakapukupo. Sere suamo makata rakirane aporo wakasemaraka risia akiyaki soko hakásá rakinie. Arirakano nómó ní yano motosane makáraraka someraka, "Nómó ní hakásá koteaka hemakapurapo," ayíáka hemakapuruko.

<sup>17</sup> Arirakano aporo metamo reakti mokoatikirakano, repo ropo mokoatikihokopo. Asiamo nómó hemakapuraka, "Maiya suamo nómó kakaro susu somehokosapo. Koteaka rakirane rakiakosapo," ayíáka hemakapunie. Ayíáka hemakapurua rakirakano, aporo metamo asekeea someraka, "Eane koteaka rekenapo," aihoasimo koteaka rakiraka rekeanie.

<sup>18</sup> Repo suamo aporo hinamo suaki tau auaraka risikianie. Auaraka risike aporo metamo néaki iriraraka rekeno aseraka, nómó mauahoane siahoasisekeno nómó mauahoanie.

<sup>19</sup> Kereso aporo maeo, aporo metamo re mokoatikirakano, repo ropo mokoatikihokopo. Arirakano Kotimo sawia popasane oyapo. Kotimo someraka, "Watikiaka rakirakano ropo watikisa karáne, nómó karápo. Nómó ní yiamo makata ropo watikisane iaki kakakosapo." Ayíáka Kotimo somerakano popahoareapo. *(Lo 32:35)*

Asiamo repo hemakapuraka, "Isiapo ropo mokoatikihokosafapo. Kotimo saperaka iane fanashikosane motoakosapo." Ayíáka hemakapurua kau risikianie.

<sup>20</sup> Arirakano re uyáka risikianie. Kotimo sawia popasane oyapo.

"Aporo meta titi himumo saperaka risiane e meamorakano, nómó eane makata nakosa kakanie. E he narirakano soko, nómó eane he nasimo kakanie. Ayíáka karakano epo ipi hasakasane himumo hemakapuraka, ipi yia kaíyahokosapo. Ipi himumo ayíáka

hemakapurakano Kotimo eane makotehoasimo nōmo ararerakanapo.” Aiyaka Kotimo sawia popahoareapo. (Sindaun 25:21-22)

<sup>21</sup> Aporomo néane mokoatikirakano, nōmo eane ropo mokoatikirakano, ane nōmo ropo mokoatikhoko hemakapura amo néane unihaeaka asekea rekenapo. Anapaka nōmo ropo mokotikhoko hemakapukua rakiakopo. Makata watikisamo reane asekea reane, asekea reke siaoasifareapo. Arirakano aporomo ne mokoatikirakano, nōmo eane ropo makoterakano, nōmo eane makoteaka rakiako hemakapura amo néane unihaeaka asekea rekenapo. Asiamo makata koteaka susu rakikia risike makata watikisane makama kesekehoanie.

## 13

*“Aporo unihaeaka asekea risiromo somemané motosane kakimakanie,” aisane oyapo.*

<sup>1</sup> Repo kamani aporomo soko, ape asekea risia aporomo soko, ipu someane repo suamo kakimaka risikanie. Aporomanoane aporo metakiramo unihaeaka asekea risikiasimo Kotimo ipi hemakapusua aeyaka murikimosapo. Kotimo murikimosa aporomo aporo metakirane asekea risikinapo.

<sup>2</sup> Arirakano unihaeaka asekea risira aporoane Kotimo murikimosa aporoamo someane, repo koaretaeraka waerakano, Kotimo ipi hemakapusuane repo koaretaerakanapo. Asiamo koaretaena aporo hinamoane namina koaretaesa aeyaka fanasinane mokoakosapo.

<sup>3</sup> Arirakano koteaka risira aporo hinamomo kamani asekea rera aporoaki namonafapo. Arirakano watikiaka risira aporo hinamomo kamani asekea rera aporoaki namonapo. Iane fanasinapaka namonapo. Asiamo asekea rera aporoaki namohoanafonoraka risikialko hemakapuraka, ane koteaka rakiraka risikanie. Repo koteaka rakiraka risikino kamani asekea rera aporoamo reaki “Kotehoareapo,” aihokosapo.

<sup>4</sup> Re koteaka risikiasimo kamani aporomo réane ararehoasimo Kotimo murikimasapo. Asiane repo watikiaka rakiraka risike re namohoanie. Kamani aporomo painate ane ne-nakamaka mokoa risikinafapo. Watikiaka rakira aporoane rukua maropohokosakipoko mokoa risikinapo. Kamani asekea risira aporoane Kotimo murikimosapo. Murikimosaasimo i Kotipoko makata rakira aporopo. Watikiaka rakira aporoane Kotimo fanasihoanie airakano, kamani asekea risira aporoamo fanasihokosapo.

<sup>5</sup> Asiamo kamani aporomo someane kakimakanie. Re fanasinapaka fofaraka kaki-mayane siaoasifareapo. Repo himumo koteaka hemakapukua kakimayane sia-hoasireapo.

<sup>6</sup> Kamani aporomo aporo hinamo suane koteaka risikiasimo ipu Kotipoko rakirakanapo. Asiasamo repo koteaka rakirane himumo takeeka hemakapukua takese mone taehoanie.

<sup>7</sup> Asiamo kamanimo somemanemo takese mone kekepo kekepo taerasierakano, takese moneane taehoanie. Takese metane nōmo makata rakisiiane makata ropo amora maiya amo takese mone taerasie airakano taehoanie. Arirakano takese metane pisinisi raki-akosakipoko takese taerasie, airakano takese ane soko taehoanie. Asekea risira aporomo someane kakimaka eane makotehoanie. Unihaeaka risia aporomo yano motosane makáraraka hemakapunie.

*Aporo hinamo metakiraki himu tumurumo hemakapurane oyapo.*

<sup>8</sup> Repo aporo metamo makatane mosane, foaka makata yāno kakanie. Mokoa yakuuhokopo. Asiane yaku hakásá meta ayiákaniesane oyapo. Nōmo himu tumurumo sere suamo aporo hinamoaki hemakapukua risikianie. Aporo metaki himu tumurumo hemakapurakanone, Kotimo somemanemo ayiakaniesane repo kakaro kakimaka keke-marakano.

<sup>9</sup> Asiamo Kotimo ipi somemaneane Moseseki kasane hemakapunie. “Hinamo haki-makopo. Arirakano aporo kukusimo rukupo. Arirakano aporo metamo menane haki-makopo. Arirakano aporo metamo makata kemoane ano makaripi, aiyaka himumo hemakapukopo.” Aiyaka somemaneane soko, somemané meta soko Kotimo motosapo. Somemané suane namo kakaro sarimaraka kepo hakásapo. Kepo hakásane oyapo. Né níane himu tumurumo hemaka apura ayiáka, aporo hinamo metane soko ayiáka himu tumurumo hemakapunie. (Kisim Bek 20:13-17; Lo 5:17-21)

<sup>10</sup> Asiamo nōmo aporo metaki himu tumurumo hemakapurakanone, aporo hinamo metamo neane mokoatikhokosafapo. Nōmo aporo metaki himu tumurumo hemakapurakanone, Kotimo ayiakaniesane, nōmo namo kakaro koteaka kekemarakano. (Wok Pris 19:18)

*“Yasu paripeakosasamo koteaka risikianie,” aisane oyapo.*

<sup>11</sup> Hauaka wo isu maiya wakasemamo risikiakosasamo, aporo hinamoaki himu tumurumo hemakapunie. Fana isu Yasu Keresoa paosa maiya amo, Yasumo isu pasimokoakosa

maiyané maiya kárapo, aíyaka repo hemakapusuapo. Asiane yumo Yasu paripeakosa maiya ane makerakanapo. Asiamo aporo wasa turíkia pukua wakapuraka arisia ayíáka, re ayíáka turíkia wakapuraka risikianie.

<sup>12</sup> Asiamo yao eresane faraka mituru fiana ayíáka, watikiaka rakira maiya ane faraka Yasu paripekea makata su makotehokosa maiya ane, makerakanapo. Makesasamo koteaka hemakapukua risikianie. Fana katosa takua risikisu maiya amo watikiaka rakisiapo. Watikiaka rakisiene metakarinie. Arirakano aporo meta tati yunu awera ayíáka, kaumo hemakapukua watikiaka rakira akiyi isiaipo yunu werakanapo.

<sup>13</sup> Asiamo aporo hinamo isuane sere maiyamo faerakano apura ayíáka, Yasumo ikia kara á koteaka puko rakiraka risikianie. Rakisiene aporo metakiramo aserakano, kaýanapanaka koteaka rakiraka risikianie. He watikisa nakopo. He watikisa nekea, masuaraka koaretaeraka koraka risira ayíáka risikiakopo. Arirakano hinamo hakimakopo. Aporo metayaki mokome pukopo. Kaumo hemakapukua makata káiyasane rakiakopo. Arirakano me rukua tafatafahokopo. Aporo metamo menane, ano makaripi, aihokopo.

<sup>14</sup> Yunu wera pasu osona ayíáka, Unihae Yasu Keresoane ayíáka osohoanie. Isiaipo Unihae Yasu Keresoaki kataka marekea risiasamo ipi hemakapusua anaka kekemaraka koteaka rakiniie. Kaumo watikiaka rakirane seseraka kekemahoko hemakapurane metakarinie.

## 14

*"Ní maeane hokomaka somehokopo," aisane oyapo.*

<sup>1</sup> Kereso aporo hinamo metakiramo Yasumo aina kepoane koteaka hemakapurafapo. Aporo metamo Yasuaki himu hakásaraka hemakapusuane kakaro wakapuaka hemakapunafonona aporoane perakano asekeea repo someraka, "Isuyaki hakasa sarimaraka kurikurihoko peae." Aíyaka aseane e perakano asekeea repo eaki tafatafaraka somehokopo.

<sup>2</sup> Arirakano Kereso aporo metakiramo hemakapuraka, "Makata kakayiane isiaipo nena. Makata kakayia neane siareapo," aíyaka hemakapurapo. Arirakano Kereso aporo metakiramo hemakapuraka, "Makata kakayia suane isiaipo nenafapo.\* Makata kakayia neane siahoasifareapo," aíyaka hemakapukua, hemo makata hákasane ipu nenapo.

<sup>3</sup> Arirakano makata kakayia nená aporoamo, makata kakayia nanafonona aporoane makefehokopo. Arirakano makata kakayia nanafonona aporomo, makata kakayia nená aporoaki someraka, "Ne watikirareapo," aihokopo. Makata kakayia nená aporoane Kotimo pasimosapo.

<sup>4</sup> Arirakano aporo metamo aporo raipane nómó maropohoane siahoasifareapo. Aporo raipamo koteaka rakirakano soko, hasaka rakirakano soko, e asekeea rea wafayamo ipi maroponapo. Aina ayíáka Unihae Yasumo ipi hákasamo isu asekeea reasasamo, epo isuaki, re siareapo, aíyaka soko, re siafareapo, aíyaka soko, epo ipi yiamo somehokosapo. Aíyaka somerane nómó ní menafapo. Aporo raipane koteaka rekeasimo Unihae Kotimo e mawakapuhokosapo. Mawakapurakanepo koteaka rakiraka rekeakosapo.

<sup>5</sup> Arirakano Keresoa paosa mae namina yia aporo metamo hemakapuraka, "Sere metakira yaposapo. Sere metakira yaposafapo." Arirakano aporo metamo hemakapuraka, "Sere su hakasa yinesapo. Sere meta yaposafapo." Aíyaka kekepoaka hemakapurakanapo. Kekepoaka hemakapurane siapo. Asiamo repo himumo hemakapurarakano kaikia kekemahoanie.

<sup>6</sup> Keresoa paosa aporo metamo someraka, "Koti kekerehokosa sere one kárapo," aíyaka hemakapukua somerakano, Kotiane makamafanahoko somerakanapo. Arirakano makata su nena aporomo Unihaeane hemakapukua makárahokosakipoko Kotiaki suseraka makata su nenapo. Arirakano makata kakayia sokoainaperomo Unihaeane hemakapukua makárahokosakipoko Kotiaki suseraka makata nakosa sokoainapo.

<sup>7</sup> Hauaka wo ne hitafe areamo né ní haku rekenafapo. Asiamo né níane makamafanaraka maseseraka aíyaka hemakapukupo. Né hitaferaka areane soko kukusane soko nómó ní asekeea rekenafapo.

<sup>8</sup> Asiamo hauaka wo re hitafe arisia maiya amo Unihae yano motosane makárahoanie. Akura maiya amo soko, Unihae yano motosane makárahoasimo hemakapunie. Arirakano isu hitafe arisiane soko, isu akurane soko, Unihae Kotimo ipi hákasae hemakapukua murikimarapo. Asiamo ipi yano motosane makárahoanie.

<sup>9</sup> Arirakano Yasu Keresoane isiaipo watikisapoko farimaka kusuane maturikia taesapo. Maturikia taesasamo epo aporo hitafe risiane soko, aporo kusuane soko aporo hinamo suane ipi unihaeaka asekeea rekenapo.

---

\* <sup>14:2:</sup> Makata kakayia kotiaki kaka marekea maketea aporomo roponapo. Makata kakayia kotiaki kasasamo aporo metakiramo roponafapo. Some ane 1 Korini 8 á meno hoanie.

<sup>10</sup> Asiamo repo namina yia maemo ainane asekeea hokomaka someraka, "Ne watiki rareapo." Aiyaka marirakano nōmo hokomaka somerakanare? Repo metakiramo anapo. Ainane siahoasifareapo. Kotimo ipi hukuarura maiya amo e reakipoko isu su sarimahokosapo. Keseke Kotimo huku arura maiaya amo e reakipoko isu su sarimaraka risikiakosapo. Risikino Kotimo ipi isu suane takekea hukurukusapo.

<sup>11</sup> Hukurukusane Kotimo sawia popasane oyapo.

"Anoane kakaro Unihae Kotipo. Nōmo someane kakaro somerakanapo. Ano reakipoko aporo hinamo su sarimarako, kakuna porokoa toke, anoane makārarako hufitaeraka someraka, 'Kotimo makata su asekeea reasasamo isu hukurukusane soko Kotimo ipi ayiakakosapo.' Aiyaka aporomo somehokosapo." Aiyaka Kotimo somesane porofete aporomo popahoareapo. (Aisaia 45:23)

<sup>12</sup> Asiamo keseke Kotimo isu hukuaruramo, isiaipo isina yia hakāsa hakāsaraka isiaipo suamo makata ásia suane Kotiaki somehokosapo.

*Keresoa paosa aporomo ní maeane ararehoanie, aisane oyapo.*

<sup>13</sup> Repo aporo metaki hokomaka watikiaka somerane metakarinie. Repo úyaka hemakapunie. Ni maeane Keresomo ikia kara kekemaraka pusane, etehoasimo makata matasona ayiáka, nōmo kirimaraka makata meta rakiakopo.

<sup>14</sup> Nōmo Unihae Yasuaki kataka marekea reasasamo epo anoaki tarirakano nōmo úyaka hemakapurakanapo. "Makata nakosa suane kotesapo," aiyaka nōmo hemakapurakanapo. Asiāne aporo metamo hemakapuraka, "Makata nakosa metane watikisapo," aiyaka hemakapukua nenakano, ipi yia mawatikirakanapo.

<sup>15</sup> Arirakano nōmo makata nakosane nenaka rekeno Keresoa paosa aporo mae metamo aseraka someraka, "Epo makata nanafonanone anene." Airakanone nōmo ní Keresoa paosa aporo maemo hemakapusuanne mokoatikirakanapo. Mokotikinapaka epoko nōmo makata nakosane sokoaihoanie. Epo aiyaka somerakanone e terafaka ruraka etesa kakenapo. Akipoko makata nakosane sokoaihoanie. Nōmo sokoaihoanafonorakanone nōmo ní maeane himu tumurumo hemakapurakanafapo. Asiamo ní maepoko Yasumo farimaka kusuaupo. Farimaka kusuaupo nōmo ní maeane mokoatikihoe siahoasifareapo.

<sup>16</sup> Asiamo nōmo makata rakirane hemakapukua, "Ayiáka rakiane siahoasireapo." Aiyaka hemakapusua nine ní Keresoa paosa aporo maemo someraka, "Ayiáka rakiane siahoasifareapo." Aihokohoamo nōmo ayiáka rakiakopo.

<sup>17</sup> Arirakano Kotimo aporo hinamo asekeea rerane makata nená ayafapo. Makata fanane oyapo. Repo ereketae hemakapurane soko, auaraka risirane soko, arirakano seseraka risirane Ho Kotesamo karapo. Ayiáka risia aporo hinamoane Kotimo unihaeaka asekeea rerapo.

<sup>18</sup> Ayiáka Keresoaki hemakapukua rakira aporo hinamoaki Kotimo sesenapo. Arirakano aporo metakiramo asekeea someraka, "Aporo hinamoane koteaka ereketaeraka risikinapo," airapo.

<sup>19</sup> Asiasamo Keresoa paosa aporo hinamomo himu hakāsaraka hemakapusimo isiaipo makata ereketae aina susuane kekemahokosapo. Isu isina suane mawakapuhokosakipoko ereketae aina susuane kekemahokosapo.

<sup>20</sup> Arirakano ní Kereso aporo maemo someraka, "Nōmo makata ane neane siahoasifareapo," airakano nōmo yaiya nenakano Kotimo mafasiako rakirane matasorakanapo. Asiamo makata nená akipoko Kotimo rakirane matasohokopo. Arirakano Koti ipi hukumisia makata nená suane neane siahoasireapo. Asiane nōmo makata anenamo aporo meta eterakanone ane, nōmo makata ainane watikisapo.

<sup>21</sup> Asiamo nōmo makata kakayia soko, waene he soko nenakanone, nōmo Keresoa paosa aporo maemo aseraka terafaka ruraka eterakano, nōmo makata nenáne sokoaihoanie. Nōmo makata meta soko rakirakanone, Keresoa paosa aporo ní maemo asekeea, e etehoane siahoasifareapo. Etenapaka nōmo ayiáka rakiakopo.

<sup>22</sup> Arirakano tau auaraka risira metane oyapo. Nōmo ní hemakapusua aeyaka hemakapuraka, "Makata nenáne soko, makata rakirane soko siareapo," aiyaka hemakapurane Koti tetápo titi menapo. Nōmo hemakapusuanne Kotimo aserapo. Asiamo Kotimo neaki somehokosapo. Aporo metaki tafatafahokopo. Makata nená soko makata rakira soko takekea hemakapukua, "Siareapo," aiyaka hemakapukua rakinie. Ayiáka makata rakira maiya amo himumo tau hemakapukua someraka, "Watikirareapo," aiyaka somehoanafonorakanó né seseraka rekeakosapo.

<sup>23</sup> Arirakano nōmo makata nakosa himu tetáraha hemakapukua nenakanone watikiaka rakiraka ayiakakosapo. Nōmo hemakapuraka, "Makata one rakiane watikihoasireapo." Aisa nine nōmo rakirakanone nōmo watikiaka rakiraka ayiakakosapo. Nōmo makata

rakiakosapoko Kotiaki himu hakásaraka hemakapunafonosamo watikiaka rakiraka ayiakakosapo. Himu tetaraka hemakapukua rakirakanano, ane nōmo watikiaka rakirakanapo.

## 15

*"Aporo metane ararehoko hemakapukua rakinie," aisane oyapo.*

<sup>1</sup> Tau auaraka risikiakosakipoko some one soko hemakapunie. Yasuaki wakasemaraka hemakapusua aporoane isu Yasuaki káraraka hemakapusua aporoamo ararehoanie. Isiapo isina hemakapusuane rakiane siahoasifareapo. Isu isinane hákasa maseseraka raki-ako hemakapurane risikiakopo.

<sup>2</sup> Asiamo isiapo suamo hakásaraka Kereso mae papá metane masesehoko arareraka rakinie. Ipu Kotimo ainane koteaka kekemaraka hemakapusimo iane arareraka rakinie. Ayiáka rakirakanano ipu Yasuaki himu hakásaraka hemakapusuane wakapuaka risikiakosapo.

<sup>3</sup> Arirakanano Yasumo e ipiane ararehoko hemakapukua rakisiafapo. Epo ipi ainane Kotimo sawia porofete aporomo úyaka popahoareapo. "Kotio, aporomo néaki hokomaka somehoko asiane, anoaki hokomaka somesapo," aiyaka popahoareapo. (*Buk Song 69:9*)

<sup>4</sup> Wate fana Kotimo sawia popasane Kotimo ainane isiapo hemakapusimo popasapo. Asiamo Kotimo ainane hemakapusimo popahoareapo. Arirakanano Kotimo some popasane isiapo menoraka, isiapo Kotiaki himu hakásaraka hemakapusuane paroaka risike, Kotimo ipi makoteraka ayiakakosapo aisane faserepeasimo, isu kau risikinapo.

<sup>5</sup> Ayiáka risikiásimo nōmo repoko úyaka kurikurirakanapo. Repo suamo Yasu Kereso kekemahoasímo Kotimo reane ararehoasimoripo. Asiamo re Kereso kekemaraka risike re namina yia himu hakásaraka risikiásimo hemakapurakaripo. Isiapo himu hakásaraka hemakapurane Kotimo mawakapunapo. Arirakanano isiapo isina yiamo makoteraka tau auaraka risikiásimo Kotimo rakirapo.

<sup>6</sup> Repo suamo akai hakásamo someraka, "Kotio, néane isiapo kekererakanapo. Isiapo Unihae Yasu Keresomo Ata kárane népo." Aiyaka repo Kotiaki kekererohoasimo nōmo reane farimaka kurikurirakanapo.

*Yu aporoane soko Yu aporohoanafonosane soko Yasu Keresomo araresane oyapo.*

<sup>7</sup> Yasu Keresomo re makotesa ayiáka repo soko Keresoa paosa aporo su ayiáka makotehoanie. Makoteraka risikino Kotimo yano motosane makárahokosapo.

<sup>8</sup> Yu aporomo makasa kaua kekemaki Kotimo makata ayiakakosapo aiyaka somesapo. Somesane Yu aporomo kakaroahoareapo, aihoasimo, Yasu Kereso hauaka wo pesapo. Pekea reke Yu aporoane arareraka rakiako pesapo.

<sup>9</sup> Arirakanano Keresomo Yu aporoane araresa yiamo Yu aporohoanafonosane soko araresapo. Arirakanano Yu aporohoanafonosane soko Kotimo kamenakahoareapo. Ipi kamenakarakano, Kereso pekea Yu aporohoanafonosane araresapo. Araresasamo yumo Yu aporohoanafonosamo soko Kotiane kekererakanapo. Kekerena ane Kotimo ipi sawia wate fana porofete aporomo Keresomo somehokosane aiyaka popahoareapo.

"Kotio, nōmo Yu aporohoanafonosane kamenakasasamo ano Yu aporoyak rea maiya amo, néaki kekererakanapo. Aporo hinamomo nōmo yano motosane kekererohoasimo nōmo néaki kesaranakanapo." Aiyaka Keresomo Kotiaki somehokosane porofete aporomo popahoareapo. (*2 Samuel 22:50; Buk Song 18:49*)

<sup>10</sup> Arirakanano Kotimo sawia popasane some meta one soko popahoareapo. Mosesemo poparaka,

"Yu aporohoanafonosa reo, Kotimo aporo murikimasa Yu aporo akiyaki sarimaraka sesehoanie," aiyaka popahoareapo. (*Lo 32:43*)

<sup>11</sup> Arirakanano some meta popasane oyapo.

"Yu aporohoanafonosa reo, repo Unihae Kotiane kekererohoanie. Aporo hinamomo suamo hauaka sua Kotiaki someraka, 'Nōmo yano motosane kárapo,' aihekakosapo." Aiyaka Kotimo sawia popahoareapo. (*Buk Song 117:1*)

<sup>12</sup> Arirakanano Yasu hauaka wo peakosaposane some meta Aesayamo popasane oyapo.

"Tefetemo wafaya Yésemo wainepe pusua aporo ira amo aporo hokosa<sup>\*</sup> meta takapeakosapo. Epo Yu aporohoanafonosane unihaeaka asekeea rekeasimo Kotimo mareakosapo. Ayiáka marerakanano Kotimo aporo hinamomo suane makotehoko ayiakakosaposane Yu aporohoanafonosamo kau risikinapo." Aiyaka Aesayamo popahoareapo. (*Aisaia 11:10*)

<sup>13</sup> Arirakanano repoko nōmo úyaka kurikurirakanapo. Isuaki makata kotesa Kotimo kakakosaposane, isiapo mokoakosakipoko kau risikinapo. Asiamo repo Kotiaki himu hakásaraka

\* **15:12:** Tefetemo wafaya Yésemo wainepe pusua aporo iramo aporo hokosa meta takapeakosapo aisane Yasupo.

hemakapukua risikino, Kotimo reaki himu sesenane soko, himu auanane soko re himua komarusimo nōmo kurikurirakanapo. Asiamo Ho Kotesamo wakupuamo repo Kotiaki himu hakásaraka hemakapusuane makárahoasimoripo.

*Poremo sawi popasa one wakapuaka popasapo, aisane oyapo.*

<sup>14</sup> Maeo, repo koteaka ainane rakikia, arirakano koteaka ainane hemakapukua, ayiaka risikinapo, aiyaka nōmo hemakapurakanapo. Asiamo repo Keresoa paosa aporo mae papáki makata koteaka hemakapukua ainane some kakane siahoasireapo.

<sup>15</sup> Kotimo ano hemakapukua ararerakanano nōmo reaki sawi popana one some metakira wakasema parosapo. Kotimo someane repo merarunapaka nōmo reaki poparakanapo.

<sup>16</sup> Ano Yasu Keresomo aporo raipa ayiáka rekeasimo Kotimo ano murikimasapo. Yu aporo hoanafonosane ararehoko Yasu Keresomo aporo raipa rakisimo Kotimo ano murikimaka rakinie, aisasamo nōmo rakirakanapo. Aporo hinamomo Kotiaki koteaka kekeréhoasimo pirisiti aporomo iane ararena ayiáka, nōmo soko re Yu aporo hoanafonosamo Keresomo ainane hemakapusimo ararerakanapo. Arirakano aporomo Kotiaki saro sipi karakano pirisiti aporomo maka, Kotimo asekeasimo eke kima taeraka arakira ayiáka, Yu aporo hoanafonosamo Kotiaki himu hakásaraka hemakapusimo, nōmo rakirakanapo. Himu hakásaraka hemakapura aporo hinamoane Kotimo asekeasimo, nōmo akara ayiáka, Kotiaki makata yaku karakano Kotimo sesenapo. Seseraka makata yakuane amara ayiáka, himu hakásaraka hemakapura aporo hinamoane epo pasimorapo. Pasimokoa ipu himua Ho Kotesa rekeasimo murirapo.

<sup>17</sup> Kotimo makata rakirane nōmo Yasu Keresoyaki hakasa rakirakanapo. Eyaki hakasa rakiraka Koteaka rakiraka reke ano sererakanapo.

<sup>18</sup> Kotimo makata rakirane Yasu Kereso aeyaka nōmo makata rakisiane nōmo kakama somerakanapo. Epo ano pusiesamo Yu aporo hoanafonosamo Kotimo someane kaki-masapo. Nōmo some kasane ipu kaikia, arirakano nōmo makata rakisiane ipu asekea, asiasamo Kotimo someane ipu kakimasapo.

<sup>19</sup> Arirakano ipu asesane oyapo. Kotimo ipi hemakapukua wakapuaka rakirane aporo hinamomo asekea fofahoasimo nōmo rakisiapo. Ho Kotesamo ano mawakapurakanano Kotipoko nōmo rakisiapo. Kotimo ano pusiesasamo ano Yarusarame siti aeyaka keporeeka, taone sua pukua Iririkame hauaka á pauraka, aine marokeraka pusuafapo. Yasu hemakapusimo some kotesane some kape pukua yumo some kaka fasapo.

<sup>20</sup> Arirakano Kotimo makata rakirane rakiako, nōmo himumo uyáka seseraka hemakapurapo. Aporo hinamomo Yasu Keresoane kaiyánafonosa hauaka á nōmo some kakako seserakanapo. Arirakano aporo metamo ira kesa fana porosakipoko nōmo ape namo kiakosane hisinapo. Aina ayiáka aporo metamo Kereso hemakapusimo someane some kaka rakisiakipoko kesekeia nōmo some kakako puko hisiripo.

<sup>21</sup> Asiamo aporomo Kereso hemakapunafonona hauaka á nōmo some kakako purapo. Arirakano porofete aporo Aesayamo popasane oyapo.

"Aporo hinamoaki Eane<sup>†</sup> some kakako aporo meta punafonosa nine, keseke ipu kaikia hemakapusapo. Fana Kotimo someane kaiyánafonosa nine, keseke ipu kaikia hemakapusapo." Aiyaka Aesayamo popahoareapo. *(Aisaia 52:15)*

*Rome sitia Keresoa paosa aporo hinamo risiane Poremo aseako pukusakipoko hemakapukua somesane oyapo.*

<sup>22</sup> Ano makata rakiraka reke, re aseako peakosapoko asiane, maiya suamo makata rakiramo matasorakanano reane aseako pesafapo.

<sup>23</sup> Peanafonosa nine yumo hauaka wo Yasu hemakapusimo some kotesane, nōmo aporo hinamoaki some kasane ipu kaisiapo. Keremisi yakaimo nōmo re aseako peako hemakapurakareasamo yumo re aseako peakosapo.

<sup>24</sup> Ano Sepéne hauaka á puko, re arisia pekeia, aeyaka Sepéne hauaka á pukusapo. Puko apera maiya amo, reyaki wakasema rekeako hemakapurakanapo. Maiya amo reane aseraka kára seshokosapo. Ano Sepéne hauaka apuramo repo ano ararehoasimoripo.

<sup>25</sup> Asiane yumo re arisia ano peasiraka, ano Yarusarame sitia fana pukusapo. Puraka Keresoa paosa aporo hinamopoko mone taesane iaki kakako pukusapo.

<sup>26</sup> Arirakano Yarusarame sitia Keresoa paosa aporo hinamoane makata forokoa risikinapo. Forokoa risiasamo Masetónia hauaka aeyaka Keresoa paosa aporo hinamomo soko, Akaia hauaka aeyaka Keresoa paosa aporo hinamomo soko mone taesapo.

<sup>†</sup> 15:21: Eane Yasupo.

<sup>27</sup> Mone taesane ipu hemakapukua seseraka taesapo. Asiamo Yasu hemakapusimo some kotesane Yu aporo aeyaka some karaka, Koti menane Yu aporo hoanafonosaki araresapo. Asiamo Yu aporo hoanafonosamo Yu aporoane kaumo menane<sup>‡</sup> arareraka kakafunupo.

<sup>28</sup> Ipu mone ane nōmo mokoa Yarusarame sitia pukua mone yaku kasane Keresoa paosa aporo hinamoaki kaka faraka ano Sepéne hauaka pukusapo. Pukusakipoko ano re arisia peakosapo. Pekeea aeyaka Sepéne hauaka a pukusapo.

<sup>29</sup> Ano apera maiya amo Yasumo makotenane anoyaki káraraka reasasamo, nōmo reane makotehokosapo.

<sup>30</sup> Maeo, Unihae Yasu Keresomo isiapo suamo Kotipoko rakisimo ararenapo. Isu himua Ho Kotesane reassamo isiapo isina yia himu tumurumo hemakapurakanapo. Asiamo repo ano ararehoasimo nōmo reaki makata meta somerakanapo. Anoaki makata umisa fasereperakano Kotimo ano ararehoasimo anopoko farimaka kurikurihoanie.

<sup>31</sup> Kurikuriraka ano Yutia hauaka apuramo, Kotimo someane patera tarira aporomo ano waseremaka rurapaka, Kotimo ano ararehoasimo kurikurihoanie. Arirakano Yarusarame sitia Yu aporo hoanafonosamo mone ane Yu aporomo seseraka mokoasimo kurikurihoanie.

<sup>32</sup> Kotimo anoaki repo sitia pusierakano ano seseraka peakosapo. Ano apera maiya amo repo anoane mawakapu, arirakano nōmo reane mawakapu, ayíáka isu isina masesehokoripo.

<sup>33</sup> Himu auanamo kepoane Koti ipipo. Kotimo re ararerakano re himu auaraka risiki-asimo hemakapurakaripo. Kotimo anakanapo. Aiyáka hemakapukua nōmo kurikuri-rakanapo. Kakaroripo.

## 16

*Rome sitia Keresoa paosa aporo hinamo risiaki Poremo hemakapusuane oyapo.*

<sup>1</sup> Isiapo Keresoa paosa papá Fipi, re arisia perakano, repo eane makotehoanie. Senekiria taonea Yasu Keresopoko Fipimo rakirapo. Fipimo Yasu Keresoa paosa aporo hinamoane arareraka rakirapo.

<sup>2</sup> Rakirasamo repo Unihae Yasu Keresoaki hemakapukua, Kotimo aporoaki seseraka pasiamara ayíáka, repo Fipiane soko re arisia perakano, repo pasimakanie. Fipimo makata meta faseneko repo e arareraka kakanie. Ano soko aporo hinamo yakai metakirane soko Fipimo araresasamo repo eane ararehoanie.

<sup>3</sup> Arirakano Pirisíra nōmo ní aporo Akuwíra teto anoyaki hakása risike, Yasu Keresomo makata rakirane isiapo rakisiapo. Asiamo nōmo tetoeane hemakapurakanapo.

<sup>4</sup> Tetápo ano ararerakano, tetoane rusua kusuhahopo. Akipoko nōmo tetoaki suserakanapo. Yu aporo hoanafonosa Keresoa paosa aporo hinamo suamo soko tetoaki suserakanapo.

<sup>5</sup> Tetápo apea<sup>\*</sup> Yasu Keresoa paosa aporo hinamomo Kotiaki kurikurihoko sarimaraka risiane soko nōmo hemakapurakanapo.

Epinitase né soko iti kakaro táképo. Né nōmo kára hemakapurakanapo. Esea hauaka á fana Yasuaki rekeako parisa aporoane népo. Amo patera aporo hinamo metakirane soko Yasuaki risikiako parisapo.

<sup>6</sup> Maria nōmo Rome sitia Keresoa paosa aporo hinamopoko makata kára wafororaka rakisiapo. Asiamo né nōmo hemakapurakanapo.

<sup>7</sup> Atonaékasepe Yunia teto soko nōmo kára hemakapurakanapo. Teto soko ano soko isu Yu aporopo. Yasu Keresomo makata rakirane isiapo rakisisamo isu hakása tipura kesapo. Ano Keresoa paohoasiraka této fana Keresoa paorakasupo. Tarira aporomo someraka, "Tetoane aporo kotesapo," airapo.

<sup>8</sup> Amepétase etapo Unihae Yasuaki himu hakásaraka hemakapukua risiasamo né nōmo táképo. Tákesasamo né nōmo hemakapurakanapo.

<sup>9</sup> Epánease nōmo isuyaki hakása Unihae Yasumo rakirane nōmo rakirakasupo. Néane nōmo hemakapurakanapo. Arirakano Setékese né soko nōmo tákésesamo, neane soko nōmo hemakapurakanapo.

<sup>10</sup> Apérese, nōmo Keresoaki himu hakásaraka hemakapusuasamo, aporo metakiramo néane mokoatikisa nine, nōmo Keresoaki yaiya himu hakásaraka rekenapakae. Reasasamo Kereso kakaro kekemana aporoane népo. Néane nōmo hemakapurakanapo.

Arirakano Arisítúpurasemo apea aporo hinamo hokosa su risiane nōmo hemakapurakanapo.

<sup>11</sup> Arirakano Herotiaón eto Yu aporo hakása yiyyasamo né nōmo hemakapurakanapo.

<sup>‡</sup> 15:27: Kaumo menane moneane somesapo.      \* 16:5: Tetapó apea aporo hinamoane sese apea sarimana ayíáka sarimanapo.

Arirakano Keresoa paosa aporo mae Nasísasemo apea aporo hinamo risiane soko nōmo hemakapurakanapo.

<sup>12</sup> Arirakano Taraeféna Taraefósa tetápo Unihae Kotimo makata rakirane wakapuaka rakirasamo teto soko nōmo hemakapurakanapo.

Pésese nōmo Unihae Yasumo makata rakirane, wakapuaka rakirasamo né nōmo Keresoa paosa papápō. Néane soko nōmo hemakapurakanapo.

<sup>13</sup> Rúfase nōmo Unihae Yasumo makata rakirane rakisimo, Unihae Kotimo neane muriki-marakasupo. Né soko nōmo ní ama ane soko nōmo hemakapurakanapo. Nōmo ní ama ane nōmo ama asiapo.

<sup>14</sup> Asinikirítase soko, Ferékone soko, Hémisi soko, Patarópase soko, Hémase soko, reyaki Keresoa paosa mae papá hakása sarimaraka Kotiaki kekereraka risiane soko, re sú nōmo hemakapurakanapo.

<sup>15</sup> Firókase soko, ipi asea Yúria soko, Nériase soko, Neriasemo ipi papá soko, Orímpase soko, repo apea aporo hinamo su sarimaraka Kotiaki kekereraka risiane soko nōmo hemakapurakanapo.

<sup>16</sup> Repo namina yia seseraka hokono mokoanie.

Arirakano Yasu Keresoa paosa aporo hinamo suamo hauaka wo kekepo kekepoaka risiamō reane hemakapurakanapo.

*"Kotafe hora aporomo some kasane kakimakopo." aisane oyapo.*

<sup>17</sup> Maeo, nōmo some one koteaka kakimaka hemakapunie. Kotimo someane reaki some karakano repo kakimasapo. Kakimarakano asekea matasohokosakipoko, kotafe hora aporomo reaki tafatafaraka Kotimo kakaro someane metakarikia, ipu namina kotafe someane some karaka reane kirimarakapano. Ipu kotafe some kasasamo aporo hinamo metakiramo Keresoane metakariasiapo. Kotafe some akaramo Kereso aporo hinamo metakirane parakuraka kekepo risikinapo. Asiamo kotafe hora aporoane re fasikia risikianie.

<sup>18</sup> Kotafe hora aporoamo Unihae Keresomo rakirane namo kakaro rakirakanafapo. Ipu namina kauane maseseraka rakirapo. Makata aina kotesane takekea hemakapunafonona aporomo hasaka hemakapukua ipu someane kekemahoasimo ipu kirimarakaka hokokekea, kukanameaka kotafe somerapo. Keresomo menane kekemarakaka rakiakohoamo ipu kotafe somerapo.

<sup>19</sup> Asiane Kotimo someane repo kakimasane aporo metakiramo hauaka su aeyaka kaisiapo. Kaisiasamo reaki nōmo seserakanapo. Yumo repo Kotimo someane kakimasa nine maiya suamo repo makata koteaka rakiakosa kepoane takekea hemakapusimoripo. Makata watikisane hemakapurafaraka meraruhoasimoripo.

<sup>20</sup> Kotafe hora aporomo someane makikisiraka fasikia risiasamo, Satanemo re kirimana wakapuane Kotimo mahurutapiakosapo. Sataneane repo korakemo finiraka matekeameana ayíáka, Kotimo Satane ane mahurutapiakosapo. Re Kereso aporo hinamo sarimaraka hakása risikiasimo Kotimo re ararehokosapo. Asiamo himu auaraka reramo kepoane Koti ipipo. Unihae Yasumo yaku ararenamo reane ararehoasimo nōmo kurikurakanapo.

*"Aporo metakira Poreyaki hakása risia amo Rome sitia aporo risiane hemakapurakanapo," aisane oyapo.*

<sup>21</sup> Timotimo Yasu Keresopoko anoyaki hakása rakiraka, epo reane hemakapurakanapo, airakae. Rúsiae soko, Yásone soko, Sósepata soko, ipu suamo reane hemakapurakanapo airakae. Isu suane Yu aporopo.

<sup>22</sup> Sawi one anopoko Téteasemo poparakanapo. Epo Unihae Yasuane hemakapukua reke, epo reane soko hemakapurakanapo, airakae.

<sup>23</sup> Kaíasemo soko re hemakapurakanapo airakae. Kaíasemo ano arareraka pasimarakano, epo apea ano rekenapo. Epo apea Yasu Keresoa paosa aporo hinamo kurikurihoko sarimarakanapo. Arirakano Erásatasemo taone wo takese mone taesane asekea rekenapo. Epo soko reane hemakapurakanapo, airakae. Arirakano Keresoa paosa aporo isiapo mae Kótasemo soko re hemakapurakanapo airakae.

<sup>24</sup> Isiapo Unihae Yasu Keresomo re su himua ararehoasimo hemakapurakaripo. Kakaroripo.

*Kotimo yano motosa makáranane oyapo.*

<sup>25</sup> Fana maiya suamo Kotimo ayíakakosaposane mahamesapo. Yumo repo asekea hemakapusimo kakama tarisiapo. Kakama tarisiane Yasu Keresopo. Yasu Keresoane nōmo some karakano repo kakimaka kakaro wakapuaka hemakapusimo Kotimo ararehokosapo. Ararehokosasamo Kotiaki kekererakanapo.

<sup>26</sup> Mahamesa nine yumo isuaki epo rakira aporoaki kakama somesapo. Kakama somerakano aporo hinamo suamo someane hemakapusimo isiaipo arareraka some karakanapo. Wate fana porofete aporomo Kotimo sawia popasane isiaipo some karakanapo. Ipu Yasu Keresoane ayiakakosaposane some karakanapo. Koti ipi yaiya rekenapo. Epo ipi someane isiaipo some kakako isu pusiesapo. Yu aporohoanafonosamo kakimaka, Yasuaki himu hakásaraka hemakapusimo, some kakako pusiesapo.

<sup>27</sup> Pusie airane Koti ipi hákasapo. Makata su hemakapura kepoane soko Koti ipi hákasapo. Asiamo isu ararehoasimo epo Yasuane hauaka wo pusiesapo. Asiasamo Koti ipi yano motosane makáraraka kekererakanapo. Yumo soko keseke soko kekereraka risikiakosapo. Kakaroripo.

## 1 Korini

### 1 Korini sawi one mahemakapukusa someane oyapo.

Pore kimisi puraka, Korini taonea aporo hinamomo Yasuane hemakapusimo some kasapo. Aporo hinamo yakaimo Yasumo someane kakimarakano, Pore keremisi hakásakipoko, keremisi tetá ane hafo paoraka, iyaki some kakako parisapo.

Korini taonea Yu aporo soko, Kiriki aporo soko, aporo makata kemo kara toane soko, aporo makata kemo forokoa risiane soko, i sú risiapo. Korini taonea aporo yakaimo kotafe kotafe parisane ipu makararaka kekeresapo. Pore Korini taone metakarisia maiya amo, Apórosepe Akuwíra tetapo Keresoa paosa aporo hinamo asekeea risiapo.

Keresoa paosa aporo metakiramo makata aina watikisane rakisiapakano iane maropo-hoasimo sawi one popasapo. Arirakano Korini aporomo Poreaki makata akai kairakano, Poremo sawi wo some paripusuapo.

### 1 Korini sawia some kepo parakuraka popasane oyapo.

1:1-9 Poremo sawi one kepomarekea popasapo.

1:10-4:21 Keresoa paosa aporomo kekepo kekepoaka tafatafaraka risikino, Poremo paroaka somesapo.

5:1-6:20 Keresoa paosa aporomo hauaka omo makata hemakapusuane kekemaraka rakisisasamo, Poremo paoraka somesapo.

7:1-40 Aporomo hinamo arumakosane soko hinamo aporo pukusane soko, Poremo somesapo.

8:1-11:1 Himu tetáraka hemakapukua risikiakopo. Yasu Keresoaki himi hakásaraka hemakapunie, aisapo.

11:2-14:40 Isu Keresoa paosa aporo hinamoane Keresomo kau asiapo. Asiasamo himu hakásaraka hemakapukua ararehoanie, aisapo.

15:1-58 Kereso kusua maturikia taesasamo isu soko kurakano, maturikia taehokosapo, aisapo.

16:1-24 Poremo some metakira someraka faraka ayapasapo.

*Korini sése apea Keresoa paosa aporo hinamoaki Poremo sawi fana poparaka makesane oyapo.*

<sup>1</sup> Kotimo ipi hemakapukua Yasu Keresomo tarira aporo rekeasimo ano Poreane murikimasapo. Ano soko murikimaka Keresoa paosa aporo isiapo mae Sosotenese soko, anoyaki hakása reke, nōmo sawi one poparaka makerakanapo.

<sup>2</sup> Keresoa paosa aporo hinamo Korini sése apea risia reaki nōmo sawi one poparaka makerakanapo. Re Yasu Keresoaki kataka marekea risikino, makata watikisane Kotimo re makikisiraka marekeaa, re Kotimo aporo ira risikiasimo murikimasa aporo reaki poparakanapo. Hauaka sua Keresoa risikiako parisa aporo hinamo suamo, isiapo Unihae Yasu Keresoaki kurikurina aporo hinamo ea paoraka arisia ayiáka risikiasimo pasimosapo. Unihaeane isiapo soko, ipu soko, isina suamo Unihae Yasu ipi hakásapo.

<sup>3</sup> Isiapo Ata Kotipe Unihae Yaü Kereso tetapō yaku ararenane soko, auaraka risirane soko, reaki kakasimo kurikuriranapano.

*Yasu Keresomo yaku ararenane oyapo.*

<sup>4</sup> Kotimo Yasu Kereso aeyaka rakumarekea re araresakipoko maiya suamo nōmo Kotiaki suserakanapo.

<sup>5</sup> Repo Keresoaki kataka marekea risikino, Kotimo reane makoteraka, makata su siaraka maresapo. Siaraka maresasamo, repo himumo Kotimo some kepoane hemakapurakanapo. Arirakano Kotimo someane soko wakapuaka some karakanapo.

<sup>6</sup> Keresoane nōmo reaki kára somerakanano, repo himumo kakaroripo, aiyaka wakapuaka hemakapukua risikinapo.

<sup>7</sup> Yasu kakama pariperakarihoamo re kau arisia maiya amo, Ho Kotesamo wakapu yaku ararena suane reaki kasapo.

<sup>8</sup> Unihae Yasu Kereso pariapera maiya amo, Kotimo re asekeea someraka, "Re siaraka koteaka risikinapo," aihokosapo. Arirakano hauaka one fa ana maiya amo, repo himu hakásaraka yaiya paroaka hemakapuraka risikiasimo, Kotimo re yaiya arareraka rekeakosapo.

<sup>9</sup> Arareraka rekeakosakipoko Kotimo re peaesapo. Perakano asekeea, ipi hokosa Yasu Keresoaki himu hakásaraka kataka marekea risikiasimo, Kotimo peaeaka pasimosapo. Kotimo ipi makata su kakaro ainatasamo kakaro ayiakosapo.

*Keresoa paosa aporomo kakanakeraka fasikia risirane oyapo.*

<sup>10</sup> Keresoa paosa aporo maeo, nōmo some one repo kaiyisimoripo. Isiapo Unihae Yasu Keresoane ipi yano motosa kárasasamo uyáka risikianie. Sapeaka fasikia risiane mafahoanie. Repo suamo himu hakásaraka hemakapukua risike, himumo hemakapurane soko, makata rakirane soko, himu hakásaraka hemakapunie.

<sup>11</sup> Keresoa paosa aporo maeo, repo namina kára tafatafaraka risikinapo. Aíyaka Korowimo ape aeyaka aporo metakira risiane ano rea pekea, anoaki hufitaeraka somerakasupo.

<sup>12</sup> Repo úyaka somerakanapakae. Repo namina yia aporo metakiramo someraka, "Año Pore patera aserakanapo." Airakano aporo metakiramo someraka, "Año Apórose patera aserakanapo." Airakano aporo metakiramo someraka, "Año Pita patera aserakanapo." Airakano aporo metakiramo someraka, "Año Kereso patera aserakanapo," aisapakae.

<sup>13</sup> Aisapakano nōmo kairaka reaki someraka, "Manakano Keresoane parakurakanare? Ayiane siahoasifareapo. Ira matopesa kusuane ano Pore repoko kusuare? Wae, ano repoko kusuafapo. Re ano Poremo yano motosa yano hokoa hea tapukumurisiare? Wae, ásiafapo."

<sup>14-15</sup> Arirakano nōmo Kirísipasipe Kaíase tetá hákasa hea tapukumurikia, amo patera a aporo metakira nōmo hea tapukumurisiafapo. Repo metakiramo someraka, "Año Pore yano motosa yano hokoa hea tapukumaresapo." Aíyaka somerapaka re suane nōmo hea tapukumurianafonosamo ano seleripo.

<sup>16</sup> Asiāne nōmo meraruraka aihoreapo. Aporo hakásá meta soko, nōmo hea tapuku-maresapo. Ipi yano motosa Setéfanasepo. E soko, epo apea aporo hinamo hakásá risiane soko, nōmo hea tapukumurisiafapo. Aporo metakira nōmo hea tapukumurisiare? Wae, metakirane nōmo hea tapukumurisia hemakapurakarifapo.

<sup>17</sup> Asiamo aporo hea tapukumuriasimo Keresomo ano pusiesafapo. Ipi some kotesa some kakasimo ano pusiesapo. Hauaka wo makata rakira enomasa someane some kasafapo. "Yasu kusuapo." Aisa kepoane mawakasemanapaka, some akaramo aporomo hemakapusuane nōmo some kasafapo.

<sup>18</sup> "Yasu ipi isupoko farimaka ira matopesa paremarerakano kusuapo." Aisane kaki-makanafonosa aporomo someraka, "Someane some watikireapo." Aíyaka somerakanone i mafasira ikia kara a purakanafapo. Arirakano Kotimo mafasisia aporomo someraka, "Someane Kotimo wakapu ayapo." Aíyaka ipu somerapo.

<sup>19</sup> Arirakano wate fana Kotimo sawia popasane oyapo. Kotimo someraka, "Aporomo makata su enomaka hemakapusuane nōmo mawakasemahokosapo. Aporomo hauaka wo makata su enomaka hemakapusuane nōmo mafahokosapo." Aíyaka Kotimo somerakano popahoareapo. (*Aisaia 29:14*)

<sup>20</sup> Aíyaka popasasamo hauaka wo makatane enomasa aporo iane Kotimo hikumisia fanäre? Wae, i fanáfapo. Yu aporomo somemane tisa aporo iane fanäre? Wae, iane soko fanáfapo. Maiya omo me rukua kirimaraka someana aporo iane fanäre? Wae, iane soko fanáfapo. Asiāne Kotimo someraka, "Hauaka wo makata su enomaka hemakapukua makata some ainane nenakamaka makatapo," airapo.

<sup>21</sup> Aíyaka Kotimo someraka, "Aporomo ipi hauaka wo makatane enomaka hemakapura amo anoane hemakapusifareapo." Aíyaka Kotimo ipi kepo su hemakapuraso ayíáka maresapo. Ipiáne someaka maresane isiapo some karakanapo. Some karakanapo aporo metakiramo kaikia someraka, "Someane masuasa aporomo somepo," airapo. Arirakano yia some kasane aporo metakiramo kakimarapo. Kakimasa aporo hinamoane Kotimo mafasirapo. Aíyaka Kotimo maresapo.

<sup>22</sup> Arirakano Yu aporomo someraka, "Kotimo wakapumo hemakapukua rakirane repo rakirakano asekeea, repo some kasane soko isiapo kakimakosapo." Aíyaka Yu aporomo somerapo. Arirakano Yu aporohoanafonosamo someraka, "Aporomo hauaka wo makata enomaka hemakapusuane some karakanone, isiapo kekemaraka kakimakosapo." Aíyaka Yu aporohoanafonosamo somerapo.

<sup>23</sup> Somerakano yia isiapo some karaka, "Kereso isupoko farimaka ira matopesa paremarerakano kusuapo." Aisa kepoane Yu aporomo sapera Koti mawakasemarakae, aíyaka hemakapuraka someane kakimakasifareapo. Arirakano some kasane Yu aporohoanafonosamo kaikia someraka, "Someane nena some watikisareapo," airapo.

<sup>24</sup> Arirakano yia, Yu aporo soko, Yu aporohoanafonosa soko, su Kotimo murikimasa aporomo hemakapuraka, "Kereso ane some kasane kakaroripo. Kotimo wakapuanie Keresoyaki rekenapo. Kotimo makata kepo su hemakapurane Keresoyaki rekenapo," airapo.

<sup>25</sup> Arirakano Kotimo isuaki mafasira ikia karane tarirakanapo. Tarirakano aporo hinamo metakiramo asekeea someraka, "Nenakamaka ikia karapo." Aisa nine ipu namina

hemakapusuane Kotimo hemakapusua amo hurutapirapo. Asiamo ipu someraka, "Kotimo rakirane nenakamaka makata ayireapo." Aiyaka somesa nine, ipu rakira wakapuane Kotimo rakira amo marokenapo. Kotimo rakirane namo kakaro wakapureapo.

<sup>26</sup> Keresoa paosa aporo maeo, re fana Kotimo pasimokoasiraka risia maiya amo repo makata rakisiane hemakapunie. Asiāne repo aporo yakaimo makata kára enomaka risiafapo. Re namina yia aporo yakai unihaeaka risiafapo. Re metakira aporo hokopukua risiafapo.

<sup>27</sup> Arirakano hauaka wo makatane hemakapurafaraka rea aporo soko, aporo wakapu fasa aporo soko, Kotimo murikimokoa pasimosapo. Pasimosane makata su enomasa aporoane soko, aporo wakapuaka risiane soko, Kotimo pasimosafapo. Marirakano Kotimo ayiáka rakisiare? Aporo hauaka wo makatane enomaka hokopukua risiane makaíyahoasimo Kotimo ásiapo.

<sup>28</sup> Arirakano aporomanomo someraka, "E aporo wakasemasasamo yano motosa kak-enafapo. E makama kesekesapo." Airakano aporo makama kesekesane Kotimo pasimosapo. Pasimoraka aporo hokopukua risiane hurutapiako aporo fanahoanafonosane murikimaka pasimosapo. Pasimosane hauaka wo makata hemakapusuane nenakamaka makata ásiapo. Aiyaka tariraka Kotimo iane makama kesekesapo.

<sup>29</sup> Asiamo Kotimo ipi hemakapukua aporo hinamoane pasimosasamo, aporomano namina yano motosane makárahoane siahoasifareapo.

<sup>30</sup> Yasu Keresoaki kataka marekea risikiasimo, Kotimo re pasimosapo. Pasimosasamo eaki kataka marekea risikino, isiaipo makata kepo su hemakapusimo tarirane Kereso ipipo. Isu ereketaeraka risikiasimo tarirane soko, Kereso ipipo. Isiaipo watikisane kikisiraka metakarikia koteaka susu risikiasimo tarirane soko, Kereso ipipo. Isiaipo watikisane mafahoasimo, Yasumo yapimo roporaka ikia kara kotesa maresane Kereso ipipo.

<sup>31</sup> Kereso ipisasamo,

"Repo aporo metane makáraraka somehoairaka, né níane makáraraka somehoane siahoasi-fareapo. Unihae Yasu Keresoane makáraraka somehoanie." Aiyaka Kotimo sawia poparaka taesane hemakapunie.

(Jeremaiá 9:24)

## 2

*"Yasu ira matopesa paremarea kusuapo." Aiyaka some kasane oyapo.*

<sup>1</sup> Keresoa paosa aporo maeo, Yasu Keresomo rakirane Kotimo kakaro anoaki somerakano, nōmo reaki somehoko pesapo. Somehoko pesa maiya amo aporo káramo some akara ayiáka, reaki nōmo some kasafapo. Aporomo ipi hemakapusua enomaka some akara ayiáka, nōmo reaki some kasafapo.

<sup>2</sup> Arirakano ano reyaki hakása rekesu maiya amo nōmo hemakapuraka, "Yasu Keresoane hákasa nōmo some kakakosapo. Epo isu farimaka ira matopesa paremarerakanano kusuane hákasa, nōmo some kakakosapo." Aiyaka nōmo hemakapukua reaki some kasapo. Makata meta nōmo tipia hemakapukua reaki some kasafapo.

<sup>3</sup> Some kasa maiya amo, ano wakapu faraka fofaraka hamisisiraka reke some kasapo.

<sup>4</sup> Some karaka aporomo ipi hemakapusua enomaka kirimaraka some akara ayiáka, nōmo reaki Yasuane ayiáka some kasafapo. Some akarane kakaro somerakae, alhoasimo Ho Kotesamo wakapuaka rakirane nōmo rakisiapo. Rakiraka reke some kasapo.

<sup>5</sup> Ayiáka some karakano, repo Kotimo wakapuane asesasamo Kotiaki repo himu hakásaraka hemakapurakanapo. Aporo káramo namina hemakapusua enomaka somesane kaisiasamo, Kotiaki himu hakásaraka hemakapurakanafapo.

*Kotimo makata kepo su hemakapurane oyapo.*

<sup>6</sup> Isiaipo tarira aporomo Kotimo makata kepo hemakapusua kotesane hemakapuraka, Keresoa paosa aporo paroaka risiaki some karakanapo. Some akarane hauaka wo makata hemakapura some ayafapo. Hauaka wo aporo unihae soko, i fahokosapo.

<sup>7</sup> Arirakano kepo su hemakapura some akarane Kotimo kakaro aina farareane some karakanapo. Some akarane fana Kotimo mahamekeia, aporoaki hufitaeaka somesafapo. Hufitaeaka somehoanafonosa nine, hauaka one kepomareasiraka, isu Kotiyaki faeraka risikiasimo, Kotimo Yasuane murikimasapo.

<sup>8</sup> Yasu murikimasane, hauaka wo aporo unihae suamo hemakapusuafapo. Hemakapusua satiki Unihae faesane ira matopesa paremareafunufapo.

<sup>9</sup> Arirakano Kotimo sawia popasane oyapo.

"Aporomo asekeanafonosa makatane soko, kaiyanafonosa makatane soko, aporomanomo hemakapunafonosa makatane soko, makata suane Kotiaki seseraka hemakapura aporoakipoko Kotimo maresapo." Aíyaka Kotimo sawia popahoareapo. (Aisaia 64:4)

<sup>10</sup> Kotimo sawia popasane Kotimo Ho Kotesamo isu tarira aporoaki tarikia somesapo. Arirakan Ho Kotesamo makata su hemakapurapo. Kotimo hemakapusua kepoane soko hemakapurapo.

<sup>11</sup> Arirakan aporomo aporo metamo hemakapusuan aserafapo. Aporomo epo ipi hemakapusua hákasane epo ipi homo aserapo. Aina ayíáka Kotimo hemakapusuan aporomo aserafapo. Kotimo ipi hemakapusuan ipi Ho Kotesamo hákasa aserapo.

<sup>12</sup> Hauaka omo hoane Kotimo isuaki kasafapo. Ho Kotesa Koti ipi aeyaka isuaki kasapo. Kotimo wakapu yaku ararena su, isuaki kasane hemakapusimo Ho Kotesa kasapo.

<sup>13</sup> Asiamo isiapo some akaramo aporomo ipi hemakapusua enomasane some akara ayíáka some karakanafapo. Ho Kotesamo isuaki some akara ayíáka, isiapo soko reaki ayíáka some karakanapo. Ho Kotesa rea aporoaki, homo menane some karakanapo.

<sup>14</sup> Arirakan aporo himua Ho Kotesa risikanafonoso, Ho Kotesamo ararenane soko, someane soko hisiraka kakimarafapo. Kakimakanafonoraka someraka, "Ho Kotesamo ararenane soko, someane soko, nenakamaka makatapo." Aíyaka Ho Kotesamo ainane hemakapurafapo. Arirakan aporo himua Ho Kotesa risia aporoamo hákasa Ho Kotesamo ainane hemakapurapo.

<sup>15</sup> Aporo himua Ho Kotesa risiamo aseraka, "Ikia kara ane kotesapo. Ikia kara ane watikisapo." Aíyaka takekea hemakapurapo. Asiāne Ho Kotesa rea aporomo makata su takekea asekeia hemakapurane, nena aporo metamo asekeia hemakapurafapo.

<sup>16</sup> Asiamo Kotimo sawia popasane oyapo.  
"Unihae Kotimo hemakapusuan epamo aserare? Aporo hinamo suamo aserafapo. Kepoane Kotimo enomakasimo epamo tarirare? Eaki aporomanomo tarirafapo." Aíyaka Kotimo sawia popahoareapo. (Aisaia 40:13)  
Asiāne Keresomo hemaka apura ayíáka isiapo hemakapurakanapo.

### 3

#### *Kotimo aporo raipane oyapo.*

<sup>1</sup> Keresoa paosa aporo maeo, fana ano reyaki rea maiya amo, aporo himua Ho Kotesa komarukua risia aporoaki, some kára kakafunu nine, ayíáka reaki some kasafapo. Repo hokosa kirimo hemakapura ayíáka hemaka apure. Hauaka wo aporo himua Ho Kotesa risikanafonosa arisia ayíáka risikino asekeia, reaki some kasapo.

<sup>2</sup> Hokosa kíri hoko akara ayíáka, reaki some wakasema kasapo. Re kárahoanafonosekeno, makata kakayia maíyasa akara ayíáka, reaki some kasafapo. Asiamo Kotimo kepo hemakapuka somera some kepoane repo hemakapusifareapo. Yumo soko repo hemakapusifareapo.

<sup>3</sup> Re nena aporo arisia ayíáka, yaiya risikinapo. Repo namina yia kakanakeraka, namina yia tafatafaraka risikinapo. Nena aporo arisia ayíáka re risikinapo.

<sup>4</sup> Re ayíáka risike repo metakiramo someraka, "Ano Pore patera aserakanapo." Airakan metakiramo someraka, "Ano Apórose patera aserakanapo." Aíyaka someraka arisiane nena aporomo tafatafaraka ayíáka repo namina yia ayíáka tafatafaraka risikinapo.

<sup>5</sup> Apóroseane ipi epare? Poreane ipi epare? Eto Kotimo aporo raipapo. Repo Kotimo some kakimakasimo etapo some karaka risiapo. Unihae Kotimo Apóroseaki ayíáka rakiniesane epo rakisiapo. Anoaki ayíáka rakiniesane nōmo rakisiapo. Kotimo etoaki makata rakira kekepo karakan etapo rakisiapo.

<sup>6</sup> Arirakan hemoa makata mano aporora ayíáka etapo rakiraka risiapo. Makata mano nōmo porosapo. Pororakan Apórosemō heane takarera reapo. Makata mano koteaka terahoasimo Kotimo matanehekeia maresapo.

<sup>7</sup> Makata mano porora aporoane soko, he takarera aporoane soko, teta wakasemapo. Arirakan makata mano matanehera Kotiane ipi namo kakaro káraro.

<sup>8</sup> Makata mano porora aporoane soko he takarera aporoane soko tati makata rakira hakásia yinesapo. Asiamo makata mano porora aporoamo soko, ipi makata rakisia akipoko, makata ropoane makosapo. Arirakan he takarera aporoamo soko, ipi makata rakisia akipoko makata ropo makosapo. Ayíáka hakásia hakásaraka makata rakisia akipoko makata ropo makosapo.

<sup>9</sup> Asiane Koti ipiane namo kakaro káraro. Kotimo etoane murikimasasamo, etapo Kotiyaki hakásia makata rakiranap. Kotimo hemo asíane répo. Hemo wafayane Kotipo. Taku me meta soko, Kotimo ape asíane répo.

<sup>10</sup> Kotimo ano ararerakano nōmo aporo ape kiramo ape akira ayíáka nōmo kisiapo. Kiraka ape takuma ira kesa koteaka aporora ayíáka reaki nōmo fana some kasapo. Ira kesa porosakipoko a aporo metakiramo ape namo akira ayíáka, ano pusuakipoko aporo metakiramo reaki some karakanapo. Ape kira aporomo koteaka kiane siahoasireapo. Mokome kiane siahoasifareapo. Asiamo ape kira aporo suamo ape koteaka kiakosakipoko asekea hemakapukua kinie.

<sup>11</sup> Ira kesa asiane Yasu Kereso ipi hakásapo. Ira kesa meta rekenafapo. Ira kesa meta mapohokopo.

<sup>12</sup> Ira kesa a ape namo kiraka aporo metakiramo ape paroaka kirapo. Asiamo ipu koróto soko meta, siufa soko meta, eke kotesa soko meta makata kakaro parosane mokoa ape kirapo. Arirakano aporo metakiramo ape paroaka kirafapo. Asiamo ipu makata haparesa mokoa, asane soko meta, yasoso soko meta, foaka fahokosa makatane mokoa ape kirapo.

<sup>13</sup> Arirakano ape paroaka kisiane soko metao, watikiaka kisiane soko metao, hukurukua parakuna mayia amo, Keresomo tariakosapo. Maiya amo ira rufi faserepeke makata rakisiane su inakakosapo. Inarakano aseane makata koteaka paroaka rakisiane yaiya rekeno aseakosapo. Watikiaka rakisiane iramo inakakorakano aseakosapo.

<sup>14</sup> Arirakano ira rufimo inasane iramo kakaro inakakohoanafonoraka ira rufi arakaru yia ape rekeno apeane kisia aporoamo makata ropo makosapo.

<sup>15</sup> Arirakano iramo inakakorakano, apeane kisia aporoamo makata ropo makosane metakariakosapo. Epo makata ropoane metakariraka e aporomanoane pasimakosapo. Ape kisia aporoane mafasiakosakipoko ira rufi arakaru aeyaka amara ayíáka, Kotimo e maka, mafasiakosapo.

<sup>16</sup> Arirakano Kotimo ape ane repo. Kotimo Ho Kotesane re su himua risikinapo. Makatane meraruhopo.

<sup>17</sup> Kotimo ape kotesa susu rekeasimo makata watikisane kikisiraka risirapo. Kotimo apeane aporomo mokoatikirakano, mokoatikina aporoane Kotimo fanasiraka marutae-hokosapo. Asiamo Koti rea apeane repo.

<sup>18</sup> Asiamo repo hasaka hemakapurapaka asekeanie. Repo metakiramo hemakapukua someraka, "Hauaka wo makata suane nōmo enomaka hemakapurapo." Aiyaka hemakapura aporoane Koti hikumisia ipi aporo kárafapo. Asiáne aporo metakiramo hauaka wo makata rakira enomasane makama kesekeraka risikinone, Koti hikumisia aporo ane hokopukua risikiakosapo. Aiyaka risikino nena aporomo asekea someraka, aporoane himu mahimeterareapo, aihokosapo.

<sup>19</sup> Arirakano hauaka wo aporomo someraka, "Hauaka wo makata enomasa hemakapusuane kárapo." Airakano Kotimo someraka, "Hauaka wo makata enomasa hemakapusuane nenakamaka makata ayireapo," airakanapo. Arirakano Kotimo sawia Yopamo popasane oyapo.

"Aporomo hauaka wo makata rakira enomasane kakinu asiapo. Makata rakisia amo kakinumo arura ayíáka, ipi nine keseke rukusapo. Aiyaka rukusane Kotimo maresapo." Aiyaka popahoareapo. *(Jop 5:13)*

<sup>20</sup> Kotimo sawia, Same púkuā makata meta soko popasane oyapo. Enomasa aporomo hemakapusuane Unihaeemo asekea someraka, "Nenakamaka makata ayireapo," aiyaka popahoareapo. *(Buk Song 94:11)*

<sup>21</sup> Popasane hemakapurakua, hauaka aporomo makata ainane makáraraka rupiaka some-hokopo. Makata suane repoko Kotimo rakisiaipo.

<sup>22</sup> Ano Pore soko, Apórose soko, Pita soko, isiapo re ararehoasimo Kotimo isu murikimasapo. Hauaka wo makata ane soko, Kotimo reaki kasapo. Koteaka risikiasimo hitafe rerane soko, Kotimo kasapo. Ipi hauaka hiakosakipoko kurane soko kasapo. Yumo ainane soko, keseke ayiakakosane soko, makata suane re koteaka risikiasimo Kotimo maresapo.

<sup>23</sup> Asiamo some one hemakapunie. Reane Keresomo menapo. Arirakano Keresoane Kotimo menapo.

## 4

### *Keresomo aporo raipane oyapo.*

<sup>1</sup> Repo isu hemakapuraka, "Keresomo aporo raipane ipo. Kotimo makata kakaro aina farareane some kakasimo murikimasa aporoane ipo." Aiyaka isuane hemakapunie.

<sup>2</sup> Murikimasa aporoamo ipi rakinie aisa aporo akipoko himu hakásaraka hemakapukua rakiraka risikino, ane kotehokosapo.

<sup>3</sup> Repo soko aporo metakiramo soko anoaki hukurukua someraka, "Poremo ipi siaraka rakirakanare? Ipi Kotiaki himu hakásaraka hemakapukua rakirakanarakapo." Aiyaka

aporor metakiramo ano hukururakano nōmo kakipayarakanapo. Nōmo siaraka rakirakire? Siahoanafonoraka rakirakire? Aiyaka nōmo ni yia somehoane siahoasi-fareapo.

<sup>4</sup> Arirakan nōmo himumo hemakapuraka, "Makata watikisane nōmo nī himua rekenafapo," aiyaka nōmo hemakapurakanapo. Hemakapusua nine nōmo himua makata watikisane yia reke soko metao, rekeanafonoraka soko metao, Unihae ipi hákasamo aser-apo. Epo nōmo makata rakisiane asekeea, nōmo himuane soko asekeea anoaki someraka, "Nōmo koteaka rakisiapo. O, nōmo watikiaka rakisiapo." Aiyaka epo ipi yiamo anoane keseke hukurukusapo.

<sup>5</sup> Asiamo Yasu paripeasiraka repo nōmo rakisiane aseraka, "Epo watikiaka arakire." Aiyaka repo wate foaka anoane hukurukupo. Unihae pariperaka isiapo himua makata katosa farareane epo mafekemaraka tariakosapo. Apromo hemakapusuane epo hufitaeraka somehokosapo. Maiya amo aporo suaki hakasa hakasaraka somehokosapo. Someana maiya amo Kotimo makata rakira kára rakisia aporoaki Kotimo kára kekere-hokosapo. Wakasema rakisia aporoaki wakasema kekerehokosapo.

<sup>6</sup> Keresoa paosa aporo maeo, Apórose etapo rakirane, nōmo reaki somerakanapo. Repo etoaki úyaka hemakapunie. Kotimo ainane koteaka ereketae hemakapusimo poparakanapo. Kotimo some kepo ipi sawia popasane kakimakanie. Kakimáká risike repo hakásá meta tapikia rakiakopo. Asiamo repo namina yia rupiaka makáraraka risike, aporo metane makáraraka, arirakan aporo metane makama kesekeraka, ayiane siahoasi-fareapo.

<sup>7</sup> Aporo metakirane mawakasemaraka, aporo metakirane makáraraka, ayíáka someraka arisiane, epamo reaki ayiakanieaka somesare? Metamo reaki ayiakaniesafapo. Repo makata kotesa susu mosane Kotimo reaki yaku kasapo. Kotimo reaki kasane repo mokoa risike yia, namina yano motosane máfaraka someraka arisiane marirakanonare?

<sup>8</sup> Repo hemakapukua someraka, "Kotimo makata su kasasamo isu siaraka risikinapo. Re tarira aporoane isiapo metakarikia isu isina unihaeaka risikinapo." Aiyaka repo somerakanapakae. Aiyaka somesane nōmo kaikia hemakapuraka, "Re namina unihaeaka risia satiki, ano soko reyaki hakásá unihaeaka rekeafunupo." Aiyaka hemakapurakanapo.

<sup>9</sup> Reane namina unihaeaka risikinone, Kotimo isu tarira aporoane makama keseke-hoasireapo. Asiamo nōmo reaki taku meane somerakanapo. Aporo su fanaraka pusuakipoko isu tarira aporoane kesekeea perakanapo. Apromo, aporo meta rusua kukusimo murikiamara ayíáka, murikimasane isupo. Hepene aporomo soko, hauaka aporomo soko, ipu suamo asekeasimo isu kakama yia rusua kukusapo.

<sup>10</sup> Arirakan isiapo Keresoane some karakan aporo suamo kaikia isuaki someraka, "Re masuahoreapo." Aiyaka repo somerakanapakae. Repo namina yia aseraka someraka, "Keresoa paosa aporoane isupo. Kára hemakapura aporoane isupo." Aiyaka repo somerakanapakae. Apromo isuaki someraka, "Re roraraka risikinapo." Aiyaka repo somerakanapakae. Repo namina yia someraka, "Isu wakapuaka risikinapo." Aiyaka repo somerakanapakae. Isuaki aporomo mahisiraka risikinapakae. Arirakan re aporomo makárarakanapakae.

<sup>11</sup> Fana soko, yumo soko, isu meamoraka risike, he nariraka risike, pasu paté osoraka risike, isu rurakano risike, isu ape fasekeno hauaka meta koraka risike,

<sup>12</sup> makata nakosakipoko hokonomo wafororaka rakirakanapo. Apromo isuaki yakasa ho marerakan soko, Kotimo iane ararehoasimo isiapo someraka, "Re makotehokoripo," airapo. Isu Kereso patera asekeea risiasamo isu rurakano soko, isiapo rukua roponafapo.

<sup>13</sup> Apromo isuaki mainamarerakan soko, isiapo iaki auaraka somerapo. Ipu isuaki someraka, "Reane hauaka wo makata pepeno ayireapo. Arirakan hauaka wo he torofae ayireapo." Aiyaka isuaki mayapakeraka somerakanapo. Fana soko, yumo soko, yaiya someraka risikinapo.

*Poremo someraka, "Nōmo ainane kekemahoanie." Aisane oyapo.*

<sup>14</sup> Re kaiyahoasimo nōmo reaki poparakanafapo. Repo koteaka kaikia hemakapukua risikiasimo poparakanapo. Re nōmo hokosa asiapo. Nōmo re kára hemakapurakanapo.

<sup>15</sup> Repo Keresomo ikia karane hemakapusimo, aporo yakaimo reaki tisaraka some kakako pesapo. Aporo yakaimo tisaraka some kakako pesa nine, re Keresoa paosa aporomo ato asíane hakásapo. Hakásane anopo. Keresomo some kotesa nōmo fana some kakako pesapo. Pekea some karakan repo kakimasapo. Akipoko anoane repo ata asíapo.

<sup>16</sup> Asiamo ano area ayíáka, re soko ayíáka risikianie.

<sup>17</sup> Ayíáka risikiasimo, Timotiane nōmo re arisia pusiesapo. E Keresoaki rekeako pari-hoasimo, nōmo eaki some kasapo. Some kasasamo e nōmo hokosa asiápo. Eane nōmo kára hemakapurakanapo. Epo Keresomo rakirane koteaka rakirapo. Arirakan e peraka

nōmo Keresomo ainane kekemaraka reane, epo reaki mahemakupukusapo. Keresomo ipi aina ikia kara a, nōmo kekemaraka reane, nōmo kurikuri ape sua some karakanapo. Some hakasa yine epo soko reaki some kakakosapo.

<sup>18</sup> Repo metakiramo someraka, "Pore peakosafapo." Aiyaka repo namina yia rupiaka makáráraka risikinapakae.

<sup>19</sup> Asiāne ano wakasema nina peakosapo. Unihae Kotimo aorakanone ano peakosapo. Ano apera maiya amo, rupiraka risia aporoamo somesane, nōmo kairaka, kaikia ayiáka ipu makata rakisiane nōmo aseakosapo.

<sup>20</sup> Asiamo Kotimo ipi unihaeaka asekeea rea aporoamo makata somera hákasa ayafapo. Ipi kakaro wakapuaka rerapo.

<sup>21</sup> Ano apera maiya amo re maropohoko ira firisi maka apera ayiáka, maka peakonahoaere? Reaki himu tumurumo hemakapukua himu auaraka apera ayiáka peakonahoaere? Repo hemakapusuane maiyakasireare? Ano auaraka peasimo hemakapuraka namina yia fana maropohoanie.

## 5

*"Hinamo hakimakopo." Aisane oyapo.*

<sup>1</sup> Repo metakiramo hinamo hakimasapakae. Aporo hakasa metamo ipi atamo hinamo hakimaraka rekenapakae. Ayiáka hakimarane Keresoa paohoanafonosa aporomo soko anafapo.

<sup>2</sup> Repo namina yia aporo hakasa metamo ipi atamo hinamoane hakimaka yia, re namina yano motosa makaráraka arisiane marirakanonare? Re kaíyarako fofarako risikiafunureapo. Hakimara aporoane reyaki hakasa rekeakohoamo mafasikia pusiehoafunureapo.

<sup>3</sup> Asiāne ano reyaki hakasa rekenafapo. Ano amano kauane reyaki hakasa rekeanafonoraka, nōmo himu hemakapurane maiya suamo reyaki hakasa rekenapo. Ano reyaki hakasa area ayiáka reke nōmo someraka, "Hakimora aporoane watikirareapo," airakaripo.

<sup>4</sup> Asiamo Yasumo yano motosa makárahoko sarimana maiya amo, nōmo himumo hemakapurane reyaki hakasa reke, Unihae Yasu soko, reyaki hakasa rekenapo. Reasasamo ipi wakapuanre reyaki rekeno hakimara aporoane

<sup>5</sup> Sataneaki kakanie. Karakano aporoamo watikiaka rakira kau watikisane Satanemo mokoatikihokosapo. Mokoatikisane Unihae Yasu pariapera maiya amo, aporoamo hoane Kotimo pasimakosapo.

<sup>6</sup> Arirakano repo namina yano motosane makáráraka someraka risike siahoasifareapo. Arirakano makata pirira wakasemamo farawa suane makáranapo. Aina ayiáka aporo hakásamo watikisa amo re suane mokoatikihokosapo. Anapaka aporo watikisane reyaki hakasa kikinahokopo.\*

<sup>7</sup> Arirakano Yu aporomo Ape Farimaresa Hemakapuko hokono keako ipu apea makata pirira rekeakohoamo, ipu kokoa mamakatenapo. Mamakateraka ipu farawa makata pirira fasokino farawa kawe hitafe kotesa pairapo. Aina ayiáka re su koteaka risikiasimo, aporo watikisane reyaki hakasa kikinahokopo. E makama yaoahoanie. Arirakano Ape Farimaresa Hemakapuko hokono kesa maiya amo, Yu aporomo saro sipi mano rusuapo. Asia ayiáka isiapo watikisane mafahokosakipoko, Yasu isupoko farimaka kusuapo. Kusuasamo isu kawe koteaka risikiasireapo.

<sup>8</sup> Arirakano Yu aporomo Ape Farimaresa Hemakapuko hokono keakosakipoko, makata pirira mamakatesapo. Asia ayiáka isiapo soko saperaka, makata watikisa rakirane mamakatehoanie. Aporo mokoatikiraka hemakapurane soko, mamakatehoanie. Asiamo isiapo aporo metaki himumo koteaka hemakapukua, arirakano kakaro somerane susu someaka ayiáka risikianie.

<sup>9</sup> Fana nōmo reaki sawi meta poparaka, "Hinamo hakimara aporoyaki re sarima-hokopo," ayiáka popasapo.

<sup>10</sup> Popasa kepoane Keresoa paoraka risike yia hakimarane popasapo. Aporo akiyaki sarimahokopo. Asiāne Keresoa paohoanafonosa aporoamo hinamo hakimarane sarima-hokopo, ayiáka nōmo popasafapo. Keresoa paohoanafonosa aporomo hinamo hakimarane soko, makata makaripi ayiáka hemakapura aporoane soko, makata hakimakosakipoko makata kotafe somera aporoane soko, yakasa hoaki kekerena aporoane soko, aporo

\* **5:6:** Makata pirirane Pisini meaka yano motosa yis airapo. Yisimo ainane oyapo. Yisimo makata torenapo. Toreraka makáranapo. Hinamomo farawa paikinako yisi wakasema farawayaki kekeroraka motokoa asekeea kaina, yisimo rakiraka reke farawa suane makáranapo. Arirakano yisimo makata torenasamo Kotimo sawia taku meaka makata watikisane yisipo, airapo.

akiyaki sarimahokopo, aisafapo. Asiamo nena aporo hauaka sua risikinapo. I fasikia re ma risikiakosare? Hauaka wo iyaki hakāsa risikiarie.

<sup>11</sup> Asiāne repo koteaka hemakapusimo nōmo reaki úyaka poparakanapo. Repo Keresoa paosa aporo maemo hinamo hakimaraka risikino, eyaki hakāsa risikiakopo. Arirakano re Keresoa paosa aporo mae metakiramo makata makaripi aiyaka hemakapurane soko, yakasa hoaki kekerenane soko, aporo meta mainamarerane soko, he watikisa nekea masuanane soko, arirakano makata kemo hakimorane soko, suane Keresoa paosa aporo metakiramo aiyáka rakirakano, aporo akiyaki re sarimahokopo. Iyaki hakasa toke makata nakopo.

12-13 Keresoa paohoanafonosa aporo hukururane isiaipo menafapo. Iane Kotimo hukurukusapo. Keresoa paosa aporo isuyaki hakāsa sarimana aporo ane isiaipo hukuruane siahoasireapo. Arirakano Kotimo sawia popasane oyapo. "Aporo watikisa reyaki hakasa sarimarakaka risikino pusiehoanie." Aiyaka Kotimo sawia popahoareapo. (Lo 13:5; 17:7; 22:21, 24)

## 6

*Keresoa paosa aporomo tafatafarakan maroponane oyapo.*

<sup>1</sup> Repo namina yia Keresoa paosa aporo mae metamo Keresoa paosa aporo mae metayaki tafatafaraka, hukurura kepo kaira aporo Keresoa paohoanafonosa aporomo maropohasimo puane siahoasifareapo. Keresoa paosa aporomo maropohosimo punie.

<sup>2</sup> Some one hemakapunie. Hauaka wo aporo suamo watikiaka rakisiane keseke Keresoa paosa aporomo iane Keresoyaki maropohokosapo. Maropohokosane repo hemakapurakanafare? Keseke makata karane repo maropohokosasamo, yumo makata fete ane maropohoaanafonoraka asekepayahoane siahoasifareapo.

<sup>3</sup> Keseke hepene aporo menane soko isiaipo maropohokosapo. Maropohokosasamo yumo hauaka wo soko makata feteane isiaipo maropohoaane siahoasireapo.

<sup>4</sup> Re Keresoa paosa aporomo tafatafarakan, nena aporomo maropohosimo purakanapakae. Ane manakang asiare?

<sup>5</sup> Asiasamo re kaiyahoafunureapo. Repo namina yia tafatafasa maropohokosa ane Keresoa paosa aporo hakāsa meta koteaka hemakapura rekenafare? Rekenone, epo re maropohasimo punie.

<sup>6</sup> Asiane repo metakiramo ipi Keresoa paosa aporo mae hukuruko purakano, Keresoa paohoanafonosa makata hukurura aporoyaki maroporakanapakae. Aiyáka rakiane siahoasifareapo.

<sup>7</sup> Arirakano repo makata hukururane ikia kara kotesafapo. Re namina yiamo makata watikisane hemakapuraka hukuarura amo re Keresomo ainane hurupereapo. Arirakano aporo metamo né mokoatikirakano soko, nōmo ní menane hakimarakan soko, metakari-afunureapo. Marirakano hukururakanare?

<sup>8</sup> Asiāne repo yiamo Keresoa paosa aporo maeane mokoatikiraka, epo makata ropoane soko, repo mokoyakurakanapakae. Epo menane repo haki morakanapakae. Aiyáka rakiane siahoasifareapo.

<sup>9</sup> Aiyáka watikiaka rakira aporoane Kotimo unihaeaka asekeea rerafapo. Some ane repo hemakapurakanapo. Aporomo hinamo hakimako puraka, arirakano hinamomo aporo mokotokoraka, arirakano aporo sisimamo hinamo hokosa fetakapeane paremurukia aina aporo hinamoane Kotimo unihaeaka asekeea rerafapo. Yakasa hoaki kekerena aporoane soko, aporo hokosa fete aporo takéyaki purane soko,

<sup>10</sup> makata kemo hakimarane soko, makatane ano makaripi aiyaka hemakapurane soko, he watikisa nekea masuanane soko, mainamarerane soko, faremarekeea tau yapakeaka hakimarane soko, aiyáka rakira aporo hinamoane Kotimo unihaeaka asekeea rerafapo. I Kotiyaki yaiya risikiakosafapo.

<sup>11</sup> Fana repo metakiramo aiyáka watikiaka rakirakano asekeea, watikisane Kotimo kososapo. Watikisane makikisiraka maresapo. Unihae Yasu Keresope Ho Kotesa tetapō, re arareraka repo watikisane hukurukusapo asiane rukupatesapo. Rukupatesasamo Kotimo someraka, "Reane aporo ereketaesapo," aisapo.

*"Re kauane Kotimo kau ayireapo." Aisane oyapo.*

<sup>12</sup> Aporo metakiramo someraka, "Nōmo ní hemakapusuane kekemarakaka rakiane siahoasireapo," airakanapo. Airakan yia nōmo someraka, "Makata sumo ano makotefoasifareapo. Makata su nōmo rakirakano makata amo ano makotefoasifareapo. Arirakano makata ane hakāsa metamo soko, ano asekeea rekeane siahoasifareapo," aiyaka nōmo hemakapurakaripo.

<sup>13</sup> Makata nenapoko katukunuane rakikia maresapo. Katukunupoko makata nenane rakikia maresapo. Asiāne makata nenane soko, katukunuane soko, tetāne Kotimo mafahokosapo. Arirakano hinamo hakimakasimo aporomanomo kauane Kotimo rakikia maresafapo. Unihae Koti ipipoko kauane rakikia maresapo. Aporomano tua Unihae Koti ipi rekeakosakipoko, aporomanomo kauane rakikia maresapo.

<sup>14</sup> Unihae Yasu kusuane Kotimo maturikia taesapo. Maturikia taesa Kotiamo isu aporomanoane soko kusuane, epo maturikia taehokosapo.

<sup>15</sup> Keresomo ipi hokono ipi korake ipi kau asiāne isupo. Isu Keresomo ipi kau asiāpo. Ipu kauane hinamo aporo metayaki mokome pura hinamo akiyaki paohoane siahoasireare? Wae, siahoasifareapo.

<sup>16</sup> Kotimo sawia popasane oyapo. "Aporo hinamoyaki purane tati kau hakāsareapo," aiyaka popahoareapo. (*Stat 2:24*)

Arirakano aporo rea pura hinamoane aporo meta tati hakāsa paoraka purakano, ane tati kau hakāsarakanapo.

<sup>17</sup> Arirakano Unihae Keresoaki kataka marekea rea aporoane Kereso tati ho hakāsa yineraka risikinapo.

<sup>18</sup> Ho hakasa yineraka risiasamo hinamo meta hakimaka paohokopo. Aporomo makata meta watikiaka rakiraka, epo ipi kauane mokoatikinafapo. Hinamo hakimarakano ipi kauane mokoatikinapo.

<sup>19</sup> Repo kauane Ho Kotesamo apepo. Ho Kotesa Kotimo kasane re tua risikinapo. Risiasamo reane Koti menapo. Repo namina yia asekea risikinafapo.

<sup>20</sup> Repoko Kotimo makata ropo kāra kasapo. Kasasamo repo kaumō epoko rakinie. Koti ipi faeraka reane makāraraka rakipe punie.

## 7

*Keresoa paosa aporo Korini taonea risiamō Poreaki makata kairaka, "Aporomo hinamo arumakanafonane kotehoareare? Hinamo aporo punafononane kotehoareare?" Aiyaka kairaka sawi popasane oyapo.*

<sup>1</sup> Repo anoaki makata kairaka sawi makesesuane, nōmo asekea reaki sawi poparakanapo. Aporomo hinamo arumakanafonorka rekenone, ane kotesapo.

<sup>2</sup> Asiāne aporomo hinamo hakimorane kārarakapanakae. Anapaka, aina kotesane oyapo. Aporomo soko ipi hinamo kekepo arumayane siahoasireapo. Hinamo soko ipi aporo kekepo puane siahoasireapo.

<sup>3-4</sup> Hinamomo ipi kauane ipi asekea reke siahoasifareapo. Ane ipi apiamo asekea rekenapo. Apiamo ipi aseaki, "Iti hakāsa yao purakapo," aihoane ipi aseamo takērarakā hisihoane siahoasifareapo. Arirakano aporomo soko ipi kauane asekea rekeane siahoasifareapo. Ane ipi aseamo asekea rekenapo. Aseamo ipi apiaki, "Yao purakapo," aihoane apiamo takērarakā hisihoane siahoasifareapo.

<sup>5</sup> Titi arumaka risike takērarakā hisihokopo. Sere metamo titi himu hakāsaraka hemakapuraka, "Sere omo Kotiaki kurikuriraka risikiakosapo. Yumo maiya wakasemamo hakasa yao purane metakarirakanapo. Yaao karikia pukusafapo." Aiyaka titi himu hakāsaraka hemakapuraka aiyakanie. Sereamo Kotiaki kurikuriraka faraka, efera hunia titi hakāsa yao punie. Satanemo né mokopipiraka hinamo metayaki pukohoamo ní hinamo titi yao hakasa punie. Titi mokokekepohokopo.

<sup>6</sup> Asiāne nōmo hemakapuraka repo hinamo arumarane soko siapo. Nōmo yaporakanafapo. Asiāne arumakananie, aiyaka nōmo somerakanafapo. Nōmo someana one re arareraka somerakanapo.

<sup>7</sup> Nōmo hinamo arumakanafonorka area aiyāka aporo su aiyāka risikiasimo hemakapurakaripo. Arirakano Kotimo makata yaku kekepo kekepoaka ararenapo. Aporo metaki makata meta arareraka, arirakano aporo metaki makata meta arareraka, aiyāka kekepo kekepoaka ararenapo.

*Korini aporomo Poreaki makata kairaka, "Hinamo arumakanafonosa aporomo hinamo arumarane kotehoareare? Hinamo yaro efera hunia aporo purane kotehoareare?" Aiyaka Poreaki kaisiane oyapo.*

<sup>8</sup> Hinamo arumakanafonosa aporoaki soko, hinamo yaroaki soko, nōmo someraka, "Hinamo yaro efera hunia aporo punafonorka, arirakano aporomo hinamo arumakanafonorka, ano area aiyāka re risike kotehoasireapo.

<sup>9</sup> Asiāne sere suamo aporomo ipi hemakapusuane hinamo puraka rekeno, amo hinamo arumayane siahoasireapo. Himumo hemakapusuane iramo īnara aiyāka inaraka rekeno, ane hinamo arumakanie. Arirakano hinamo otoatoa ane soko, aporo puko hemakapurakarakanapo aporo puane siahoasireapo." Aiyaka nōmo somerakanapo.

*Korini aporomo Poreaki kairaka, "Kereso aporomo ipi aseane fimareane siahoasireare? Kereso hinamomo ipi apiane fimarekea puane siahoasireare?" Aiyaka kaisiane oyapo.*

<sup>10</sup> Aporo hinamo apiaki soko, hinamo aporo aseaki soko, nōmo somerakanapo. Ane nōmo nī hemakapusua somerakanafapo. Ünihae Kotimo someaka maresane nōmo reaki somerakanapo. Asiamo someaka maresane oyapo. "Hinamomo ipi apia metakariakopo.

<sup>11</sup> Hinamomo ipi apiane fimarekea metakarikia purakano, hinamoane aporo meta pukupo. Ipi haku tipia nenakamaka kakanie. Hinamoane ipi haku kakako hisirakano, ipi apia fana fimaresa tati sapesan maroporaka mafaraka ipi apiamo ape yia paripeanie. Arirakanapo aporomo ipi hinamo arumasane fimarekea pusiehoane siahoasifareapo." Aiyaka Unihae Kotimo someaka maresapo.

*Korini aporomo Poreaki kairaka, "Nena aporo hinamo tati arumaka risina, keseke tati meta Keresoa paoraka, metane Keresoa paohoanafonorakano, ane fimareane siahoasireare?" Aiyaka kaisiane oyapo.*

<sup>12</sup> Makata one Unihaeemo somehoanafonosa nine anoaki tarisiane nōmo nī hemakapusua re arareraka somerakanapo. Aporo Keresoa yororaka ipi aseane Keresoa yoroanafonoraka hinamoamo ipi apiaki hemakapukua kakeno yia ipi apiamo hinamoane fimareane siahoasifareapo.

<sup>13</sup> Arirakanapo aporo Keresoa yororaka, ipi apiane Keresoa yoroanafonorakano, ipi apiamo ipi aseaki hemakapukua rekeno yia, hinamoamo ipi apiane metakariane siahoasifareapo.

<sup>14</sup> Arirakanapo aporo Keresoa paohoanafonorakano, epo aseane Keresoa paoraka kake, epo Kotiaki himu hakāsa hemakapusua aeyaka, aporo ane soko Kotimo ararerakanapo. Arirakanapo aporo Keresoa paohoanafonorakano, epo apiane Keresoa paoraka reke, epo Kotiaki himu hakāsa hemakapusua aeyaka, hinamo ane soko Kotimo ararerakanapo. Ararehoanafonosa satiki tetapō tati hokosa hokono murisiane, Keresoa paohoanafonosa aporo hinamomo hokosa ayiáka risikiafunupo. Asiane tetapō hokosane soko, Kotimo asekea rekenapo.

<sup>15</sup> Arirakanapo Keresoa paohoanafonosa aporomo, ipi asea Keresoa paosa ane hisiraka fimarerakanapo, hinamo né, metakarikia puane siahoasireapo. Arirakanapo Keresoa paohoanafonosa hinamomo ipi apia Keresoa paosane hisiraka metakirirakano, aporo nōmo waehokopo. Keresoa paohoanafonosa aporomo hinamoane fimareane siahoasireapo. Re Keresoa paosa aporo hinamo tau risikiasimo Kotimo ré murikimaka pasimosapo. Asiamo re fimarerakanapo waehokopo.

<sup>16</sup> Re Keresoa paosa hinamomo nī aporoane ararerakanapo, ipi Keresoaki rekeako pariraka soko metao, himeteripo. Re Keresoa paosa aporomo nī hinamoane ararerakanapo, ipi Keresoa paoraka soko metao himeteripo.

*"Kotimo re pasimosa maiya amo re risia ayiáka risikianie." aisane oyapo.*

<sup>17</sup> Aporo reo, ano kimisi koraka areamo, some one taone sua, Kereso aporo hinamoaki some kape purapo. Repo makata su ayianane Kotimo maresapo. Maresasamo Kotimo re pasimosa maiya amo risia ayiáka, yaiya risikianie.

<sup>18</sup> Arirakanapo Kotimo pasimokoasiraka risia maiya amo, Yu aporomo ipi kau hahaeraka patesapo. Yasuaki risikiako pariana maiya amo ipi kau hahaeraka patesa umuruane mokosekehoane siahoasifareapo. Arirakanapo Yu aporohoanafonosamo ipi kau hahaeraka patehoanafonosane Keresoaki risikiako pariana maiya amo kau hahaeraka patehoane siahoasifareapo.

<sup>19</sup> Asiamo aporo kau hahaeraka patesane soko, kau hahaeraka patehoanafonosane soko, makatane yumo nenakamaka makata asiapo. Kotimo somemane kakiamarane kakaro makata namo ane ayapo.

<sup>20</sup> Asiamo Kotimo re pasimosa maiya amo, re risia ayiáka risikianie.

<sup>21</sup> Pasimosa maiya amo aporo metamo re roposa wafaya akipoko repo raiparaka rakisiare? Ayiáka rakirane mahisiraka rakiakopo. Ayiáka rakiakosapoko asiane, re roposa wafayamo someraka, "Re tonotaerakanapo metakarikia puane siahoasireapo." Airakanapo raiparaka rakisiare metakarikia puane siahoasireapo.

<sup>22</sup> Tonotaehoanafonoraka re roposasamo yaiya rakiraka risikianie. Kotimo re pasimosa maiya amo re Kotimo tonotaesa aporo parisapo. Arirakanapo aporo metamo re ropohoanafonorakanapo, re Kotimo roporaka pasimosapo. Asiamo re Kotimo aporo raipa pariraka risikianie.

<sup>23</sup> Kotimo repoko makata ropo kasasamo, repo aporo metamo hemakapusuane keke-maraka rakiakopo. Aporo metamo reane aporo raipa pariraka sikiraka asekea reke siahoasifareapo. Repo Keresopoko rakirakanapo.

<sup>24</sup> Keresoa paosa aporo maeo, Kotiaki himu hakásaraka hemakapukua risikianie. Re peaeaaka pasimosa maiya amo risia ayiáka yaiya risikianie.

*Korini aporomo Poreaki kairaka, "Hinamo aporo punafonoraka yaiya toke kotehoasireare? Aporomo hinamo arumakanafonoraka yaiya risike kotehoasireare?" Aíyaka kaisiane oyapo.*

<sup>25</sup> Hinamo aporo punafonosane repo anoaki kaisiane someaka poparakanapo. Makatane Unihae Yasumo someaka maresafapo. Someaka mareanafonosa nine, anoaki tarisianie nōmo reaki some karakanapo. Kotimo ano araresane nōmo kakaro ereketae somerakano, repo kaiyiane siahoasireapo.

<sup>26</sup> Yumo hauaka wo makata watikisa kára fasere apera maiya amo, fana risia ayiáka, yumo soko yaiya risikianie. Ayiáka risike kotehokosapo.

<sup>27</sup> Hinamo arumakaa reke hinamo arumasane fimareakopo. Arirakano aporomo hinamo arumakanafonoraka reke hinamo faihokopo.

<sup>28</sup> Hinamo arumayane soko siahoasireapo. Hinamo aporo puane soko siahoasireapo. Ane makata watikisafapo. Asiane hinamo titi arumaka arisia maiya amo hauaka wo makata rakiramo teto kau aseakosapo. Anapaka hemakapurakaripo.

<sup>29</sup> Keresoa paosa aporo maeo, kepoane oyapo. Hauaka one fahokosa maiyane makerakanapo. Aporo hinamo apia repo aporo hinamo arumakanafonosamo Kotipoko arakira ayiáka rakinie.

<sup>30</sup> Re hiripuraka risike yaiya hiripuraka risikiakopo. Makata akipoko repo hiripurakano makatane keseke fahokosapo. Hiripuhoanafonoraka arisia ayiáka risikianie. Arirakano re seseraka risike sesehokopo. Makata akipoko seseraka risikino makatane keseke fahokosapo. Arirakano repo makata kára roporako hemakapukua risikiakopo. Re forokoa arisia ayiáka risikianie. Makata roposane keseke fahokosapo.

<sup>31</sup> Arirakano repo hauaka wo makata rakirane rakiraka risike makárahokopo. Hauaka wo makata one keseke faraka makata meta faserepeakosapo. Hauaka wo makata rakira himu tumurumo hemakapunafonona aporo arisia ayiáka, risikianie.

<sup>32</sup> Hauaka wo makata ákipoko kara himu nekea hemakapukua risikino, ano hisiripo. Arirakano Kotimo sesehoasimo aporo hinamo arumakanafonosamo Kotipoko kára rakkira rekeako hemakapurapo.

<sup>33</sup> Arirakano aporo hinamo apiamo ipi aseamo sesehoasimo hauaka wo makata rakirane kára hemakapurapo.

<sup>34</sup> Himu takumo hinamoaki hemakapukua, himu takumo Kotiaki hemakapukua, ayiáka rerapo. Hinamo yaromo soko, hinamo aporo punafonosamo soko, Kotipoko rakirane kára hemakapurapo. Hauaka wo makata rakirane fasikia ipi kau soko, ipi ho soko, ipi hemakapurane soko, Kotiaki paoraka rakiako hemakapurapo. Arirakano hinamo aporo aseamo ipi apiamo sesehoasimo hauaka wo makata rakirane kára hemakapurapo.

<sup>35</sup> Arirakano makata yaporaka mareakosakipoko reaki some karakanafapo. Nōmo re ararehoko some karakanapo. Re kakaro koteaka risike Kotipoko himu hakásaraka hemakapukua rakisimo nōmo some karakanapo.

*Korini aporomo Poreaki kairaka, "Hinamo faisane arumayane kotehoasireare?" Aíyaka kaisiane oyapo.*

<sup>36</sup> Aporomo hinamo fairaka nina himumo hinamo arumako hemakapurakarakan arumayane siahoasireapo. Hinamo arumarane watikisafapo.

<sup>37</sup> Arirakano aporo metamo ipi yiamo hemakapuraka, "Hinamo arumakosafapo." Aíyaka ipi yiamo hemakapukua hinamo arumakanafonoraka rekeno soko siahoasireapo.

<sup>38</sup> Hinamo faisane arumayane siahoasireapo. Asiáne hinamo arumakanafononan e namo kakaro kotesapo.

*Hinamo yaro kakakosane oyapo.*

<sup>39</sup> Hinamo ipi apia rekeno tati kakaro hakása yinenapo. Ipi apia metakarikia aporo metayaki puane siahoasifareapo. Ipi apia kurakano amo aporo meta ipi hemakupukua seseraka puane siahoasireapo. Siaraka siahoasinineo asiane Keresoa paosa aporo puane siahoasireapo.

<sup>40</sup> Arirakano nōmo hemakapuraka ipi hinamo yaro yia kake ipi kakaro seseraka kakakosapo. Aíyaka nōmo hemakapurakanapo. Ho Kotesa ano himua reasamo anoaki tarirakano nōmo reaki some karakanapo.

<sup>1</sup> Yatafuaki soko, yakasa hoaki soko, makata nakosa<sup>\*</sup> kasane nōmo reaki poparakanapo. Arirakano fana some meta one nōmo somerakanapo. Isiapo makata kára hemakapurapo. Arirakano aporomo makata kára hemakapurane takahinaka i namina makaporonapo. I namina makáranane, ikia kara kotesafapo. Asiāne ikia kara namo kakaro kotesane, aporo metamo aporo metaki himu tumurumo hemaka apura ayapo. Aporo metaki himu tumurumo hemakapuraka amo isu su mawakapuraka, aporo metakirane ararenapo.

<sup>2</sup> Aporo metamo hemakapuraka, "Nōmo makata su hemakapukua faraka rekenapo." Aiyaka hemakapura amo ipi yia makáraraka sikiraka, ane sia hemakapurakanafapo. Ane hasaka hemakapurakanapo.

<sup>3</sup> Arirakano aporomo himu tumurumo Kotiaki hemakapurakano, Kotimo asekea someraka, "Aporoane nōmo aporopo." Aiyaka Kotimo somerapo.

<sup>4</sup> Arirakano repo anoaki kaisiane nōmo reaki somerakanapo. Yatafuaki soko, yakasa hoaki soko, makata nakosa kasane repo neane siahoasireare? Isiapo Keresoa paosa aporomo hemakapusuane yatafuane ipi namo kakaro fanáfapo. Yakasa ho soko kakaro fanáfapo. Hauaka wo iane namo kakaro Kotifapo. Arirakano iane kekerahoane siahoasi-fareapo. Koti yakai risikinafapo. Koti hakásá rekenapo.

<sup>5</sup> Arirakano hauaka wo makata risiane soko, hepene yapura makata risiane soko, Keresoa paohoanafonosa aporomo asekea someraka, "Makatane koti parisapo. Makatane unihae kára parisapo." Aiyaka ipu hasaka someraka, kakaro Kotiane metakarikia, makata metaki kekereraka risikinapo.

<sup>6</sup> Asiāne isiapo hemakapuraka, "Koti hakásá rekenapo. Isiapo Atane epo. E aeyaka makata su fasere pesapo. Isiapo epoko rakiraka risikiásimo epo isu rakisapiro. Unihae hakásane Yasu Keresopo. Kotimo makata su rakiakosakipoko Yasu aeyaka kepomarekeea rakisiapo. Asiasamo Yaiya rerane Yasu aeyaka isiapo maka yaiya risikiakosapo."

<sup>7</sup> Aiyaka isiapo hemakapurakano yia, Keresoa paosa aporo metakiramo aiyaka hemakapurakanafapo. Fana ipu maiya suamo yatafuaki soko, yakasa hoaki soko, kekereraka hemakapusuasamo, yaiya hemakapukua risikinapo. Risike aseane, makata nakosa yatafuaki soko, yakasa hoaki soko, kasane asekea hemakapuraka, "Makata nakosa ane neane siahoanarakapo. Nenakano isu himu mokoatikiraka soko metao mayikanarakapo." Aiyaka hemakapurakayia nenakanone, i himuane tomekemarekeea yaiya risikiakosapo.

<sup>8</sup> Asiāne isu Koti hikumisia koteaka risikiakosane, makata anenamo soko metao, makata nanafononamo soko metao, makata amo ikia kara kotesane tarikosafapo.

<sup>9</sup> Makata nenane yaposa kakenafapo. Asiamo re asekeanie. Nōmo Yasuaki kára hemakapukua reke, arirakano aporo metamo Yasuaki kataka marekeea paroaka hemakapurafaraka reke, epo né aseane, nōmo yatafuaki makata kakayia kasane nenakano asekea hemakapuraka, "Keresoa paosa aporo yiamo makata ane arakire." Aiyaka ipi hemakapura amo hasaka rakirane kirimanapaka, repo makata nenane koteaka asekea nanie.

<sup>10</sup> Nōmo hemakapuraka, "Makata nena yaposa kakenafapo." Aiyaka hemakapukua yatafuaki makata kakayia kasane nekea reakipoko, aporo meta Yasuaki paroaka kataka marekeea rekeanafonosa aporoane pekea asekea hemakapuraka, "Nōmo soko makata kakayia ane nakosapo."

<sup>11</sup> Aiyaka hemakapukua nenakano, e karekekeea kaíyaraka rekeakosapo. Aporoamo makata kakayia yatafuaki kasane hemakapuraka, ipi fofaraka kaíyaraka rekeakosapo. Eane karekekeea kaíyaraka rekeno, kepoane népo. Arirakano Keresoane ní maepoko soko farimaka kusuapo. Asiane nōmo ayiana amo ní maeane mokoatikirakanapo.

<sup>12</sup> Yasuaki paroaka hemakapunafonosa aporoane ní Keresoa paosa aporo maepo. Nōmo ní maeane mokoatikirakanapo, nōmo Keresoane mokoatikirakanapo.

<sup>13</sup> Arirakano nōmo makata kakayia yatafuaki kasane nenakano, nōmo ní Kereso maeane fofaraka karekekeea kaíyaraka rekeno, ane, nōmo makata kakayia efera hunia nakosafapo. Arirakano nōmo ayianamo nōmo Kereso mae ano patera pesane mokoatikinapaka, makata kakayiane nōmo efera hunia nakosafapo.

## 9

*Aporo metakiramo Poreane mawakasemarakana somerakanaro Poremo iaki some pari-hisiane oyapo.*

<sup>1</sup> Aporo metakiramo ano mawakasemarakana pake. Asiane nōmo ní hemakapusuane soko, rakiante siahoasireapo. Makata metamo ano matasosafapo. Yasumo ipi tarira

\* <sup>8:1</sup>: Pore rea maiya amo nena aporo hinamo uyáka risiapo. Ipu makata kakayia yatafupoko murisiapo. Murisiane rusua taku ane yatafuaki kasapo. Taku metane yia taesa tokeno mokoa pukua maketea roposapo. Arirakano makata kakayiane Kereso aporo metakiramo makata nakosakipoko ropohoko hisisapo. Asiane Kereso aporo metakiramo yaiya roponapo.

aporoane anofare? Isiapo Unihae Yasuane nōmo asesafare? Nōmo Unihae Yasuane some karakano repo kaikia eaki risikiako parisafare? Ao, ásiapo.

<sup>2</sup> Arirakano aporo metakiramo someraka, "Pore ipi tarira aporofapo. E Yasumo muriki masa aporofapo." Aíyaka ipu somerakano, repo ayiáka somehoane siahosifareapo. Nōmo some karakano repo kaikia, kakimaka Yasuaki risikiako parisasamo, ane kepoane ano tarira aporo reapo.

<sup>3</sup> Aporo metakiramo anoaki "Né tarira aporofapo." Airakano nōmo some one parihi-nakanapo.

<sup>4</sup> Nōmo tarira aporomo rakirane rakirasamo nōmo aporo metakiraki someraka, "Makata nakosa soko, he soko makasie." Aihoa siahosireapo. Arirakano Yasuane nōmo some kaka rakirasamo repo anoaki makata nakosane kakafunupo.

<sup>5</sup> Tarira aporo metakiramo soko, Unihae Yasumo ipi mamaneamo soko, Pitamo soko, ipu namina hinamoane karikia apura ayiáka, nōmo soko, hinamo kaya satiki karikia puane siahofunupo. Isu suaki repo makata nakosa kakafunupo.

<sup>6</sup> Asiane Pánapase etapo hakasa makata nakosakipoko hokonomo rakiane siahosireare? Wae, siahosifareapo.

<sup>7</sup> Asiamo ame aporo arisia ayiáka eto risikiafunureapo. Aporo amea paosa amo ipi makata nakosakipoko makata ropo karáfapo. Aina ayiáka aporomo hemoa sako porokoa, sako karepe wateane tumaka nenapo. Ipi maposa wafayatasamo tumaka nenapo. Aina ayiáka saro ponomakau asekeea rea aporoamo ipi saro ponomakau hoko piane nenapo. Ipi wafayatasamo nenapo.

<sup>8</sup> Arirakano hauka wo makata ainane nōmo reaki somerakanapo. Asiamo Yu aporomo somemane Mosesemo popasane soko, hakásá yinesapo.

<sup>9</sup> Asiamo fana Mosesemo somemane popasane oyapo. "Witi hae kau haketarisimo saro ponomakaumo finirape apuramo, saro ponomakaumo witi haeanne nasimo akaia tapohokopo. Ipi rakirasamo ipi neane siahosireapo." Aíyaka popasane kepoane namo kakaro ponomakau ane, Kotimo somesafapo. *(Lo 25:4)*

<sup>10</sup> Kepoane isu Kotimo makata rakira aporoane yapakeaka somesapo. Somesane isiapo hemakapusimo Mosesemo popasapo. Asiamo hemo morō mora aporoamo soko, witi hae tura aporoamo soko, tati makata rakiraka risike, makata nakosane keseke makosapo, aíyaka hemakapurapo.

<sup>11</sup> Aina ayiáka etapo witi hae potena ayiáka, Kotimo someane etapo reaki some kasapo. Etapo reaki some kasasamo aporomo witi hae anena ayiáka, repo makata nakosa etoaki karakano, etapo mokoa neane siahosifareare? Ao, siahosireapo.

<sup>12</sup> Eto pusuakipoko aporo metakira pekea reaki some karakano, aporoaki repo makata nakosa karakano ipu mosapo. Asia ayiáka, etapo soko, mokoafunusa nine metakarisiapo. Metakarikia hemakapuraka, "Yasu Keresomo some kotesane repo kaiyako hisihokohoamo makata ropo mokoakosane metakirakanapo. Yasumo some kotesane etapo matason-apaka etapo iti yia makata umisa maka rakirakanapo." Aíyaka etapo hemakapurakanapo.

<sup>13</sup> Arirakano Kotimo ipi apea pirisiti aporomo makata rakiraka risike Kotimo apea makata nakosa taesane ipu namina mokoa nenapo. Pirisiti aporomo saro ponomakau rukua, eke kima paikia, Kotiaki kaka, ipu soko eke kima paisiane parakuraka nenapo. Ipu makata nenane namina makata rakisiakipoko, makata ropo amora ayiáka morapo. Ane repo hemakapurakanafare?

<sup>14</sup> Pirisiti aporomo makata nakosa amora ayiáka, Kotimo some kará aporoamo Kotimo someane some karásasamo, makata ropo makasireapo. Some kará aporomo makata nakosa mokoasimo, Kotimo some kaisia aporoamo makata ropo kayane siahosireapo. Aíyaka Unihae Yasumo maresapo.

<sup>15</sup> Aíyaka maresa nine nōmo makata ropo makasierakanafapo. Arirakano nōmo makata ropo mayane siahofunune metakarisiapo. Asiāne nōmo sawi popana one makata ropo kakanie, aíyaka poparakanafapo. Repo makata ropo nōmo morafapo. Aíyaka somehoko seseripo. Aihoko sesenane repo rukupatéhokopo. Rukupatenapaka ano kukuko seserakanapo.

<sup>16</sup> Kotimo anoaki someraka, "Yasuane some kakanie." Aíyaka someaka marerakano, nōmo ipi someane some karakanapo. Some kakanafonoraka nōmo koaretaesa satiki ane ano kaiyahoafunupo. Yasuane nōmo some kasasamo ano ní rupiaka makáraraka somehoane siahosifareapo.

<sup>17</sup> Nōmo ní hemakapuruka Kotimo some kasá satiki, makata ropo makafunupo. Asiāne makata rakirane rakinie aíyaka Kotimo someaka maresasamo nōmo rakirakanapo.

<sup>18</sup> Asiamo nōmo makata ropoane yakapare? Nōmo makata ropo asiane Kotimo some yaku akara ayapo. Nōmo makata ropo mayane siahosinine metakarikia Yasumo some kotesane nōmo seseaka yaku some akarane nōmo makata ropo ayapo.

*Aporo hinamo su Yasuaki risikiako parihoasimo Poremo koteaka rakisiane oyapo.*

<sup>19</sup> Repo makata ropoane nōmo makanafonosasamo, ano aporo hakāsa metamo aporo raipafapopo. Aporo su Yasuaki risikiako parihoasimo, aporo supoko ano aporo raipa pariraka reke rakirakanapo.

<sup>20</sup> Yu aporoyaki ano reke rakisia maiya amo, i Yasuaki risikiako parihoasimo, Yu aporomo aina ayiáka, ano soko ayiáka reapo. Mosesemo somemaneane nōmo makama fananafapo. Asiāne Yu aporomo Mosesemo somemaneane makama fanaraka, i Yasuaki risikiako parihiokosakipoko, ipu Mosesemo somemane makama fanaraka risia ayiáka, ano soko ayiáka reapo.

<sup>21</sup> Asiamo Mosesemo somemane motosane nōmo koaretaenafapo. Arirakano Yasu Keresomo somemaneane soko, nōmo kakimaka reapo. Kakimaka reke, Yu aporo hoana-fonosayaki ano reke rakisia maiya amo, ipu Mosesemo somemane kakimakanafonoraka yia, i Yasuaki risikiako parihiokosakipoko, i risia ayiáka, ano soko ayiáka reapo.

<sup>22</sup> Aporomo Keresoaki wakapuaka hemakapuna fono aporoane ararehoko, i risia ayiáka, ano soko, ayiáka reapo. Aporo suamo aina ayiáka, ano soko, ayiáka reapo. I metakira Yasuaki risikiako parihoasimo ano ayiáka reapo.

<sup>23</sup> Yasumo ano makotehoasimo ipi some kotesane aporoaki some kakakosakipoko yaiya koraka reke some karakanapo.

*Kereso aporo hinamo wakapuaka risikiasimo Poremo takumeaka somesane oyapo.*

<sup>24</sup> Aporo foaka purane hemakapunie. Aporo yakai foforaka pukua fanahokosakipoko asiane, aporo hakāsamo marokeraka, ipi hákasa makata ropo marapo. Makata ropo amara ayiáka, repo soko, Kotimo makata ropo mokoakosakipoko, wakapuaka rakiraka risikianie.

<sup>25</sup> Hauaka wo aporomo hemakapuraka, "Marokehokosakipoko, ano mokome rekeakosafapo. Kau mawakapuhokosakipoko ereketaeraka rekeakosapo." Aiyaka ipi hemakapurapo. Hauaka wo makata ropo fahokosane\* makosakipoko ipi yia kaumo hemakapusuane metakarikia kakaro ereketaeraka rerapo. Aina ayiáka isu Keresoa paosa aporomo soko, makata ropo yaiya rekeakosane mokoakosakipoko, kakaro wakapuaka ereketaeraka risikiasireapo.

<sup>26</sup> Asiamo ano soko, Kotipoko rakiraka makata ropo yaiya rekeakosane mako, Yasu rea kepoa naohokosakipoko ereketaeraka purakanapo. Ereketaeraka apura ayiáka Kotipoko ereketaeraka rakirakanapo. Nena enaraka weako ana maiya amo marokehoko aporoaki hokonomo ereketaeraka kaua rurapo. Mokome rukuhaenafapo. Mokome rukuhaehoana-fono ayiáka Kotipoko nōmo mokome rakirakanafapo.

<sup>27</sup> Ano yamenoa foaka puraka roranapaka kaumo hemakapusuane kairafaraka rekenapo. Aporo metakiraki Kotimo some kotesa nōmo some kasapo. Some kasa nine keseke Kotimo anoaki, "Né siahoasifareapo." Airapaka pipu nōmo kaumo hemakapusuane kairafaraka kauane himumo hemakapusua a kekemarakapano.

## 10

*"Wate fana Yu aporomo Kotiane kau aseako rakisia ayiáka repo ayiakakopo." Aisane oyapo.*

<sup>1</sup> Keresoa paosa aporo maeo. Wate fana isiapo makasa kaua kekemamo ásiane repo meraruhokopo. Asiamo fana isiapo makasa kaua kekemamo Moseseko kekemarape pusuapo. I puraka ti pakae Kotimo yapura maresane asekea, ti pakaeane purakano ipu kekemarape pusuapo. Puraka i su he Reteane yaohoane hémo nesafapo.

<sup>2</sup> Arirakano ti pakaea soko, he Retea soko, aporo hea tapuku amurira ayiáka, i tapuku-muriraka sikisapo. Arirakano i hea tapuku amurira ayiáka i suane Mosesea paosapo.

<sup>3</sup> Makata nakosa Ho Kotesamo kasane ipu suamo nesapo. Heane soko Ho Kotesamo kasane ipu nesapo.

<sup>4</sup> Arirakano i puraka eke ane asesapo. Eke anaka he pesapo. Arirakano Keresoane yapake eke somesapo. Asiamo i purakano Kereso iyaki hakāsa pusuapo.

<sup>5</sup> Arirakano Kotimo iane efera hunia soko, efera hunia soko, araresa nine, ipu epo someane koaretaeraka Kotiane masesesafapo. Kotiane masesehoanafonorakano, Kotimo iane fanasiraka aporo nena ima yao kauanea kukua kesapo.

<sup>6</sup> Ipu makata watikisa yaposane metakarianafona ane isiapo hemakapusimo popasapo. Makata watikisane ipu fana seseaka rakisia ayiáka isiapo soko anapaka popasapo.

<sup>7</sup> Ipu yatafuaki soko yakasa hoaki soko kekerena ayiáka repo kekerehokopo. Ipu saro ponoma kau mano murikimaka rakikia kekereraka hokono kesapo. Arirakano ipu Kotimo

\* <sup>9:25:</sup> Aporo foaka pukua fana kepoa naosaki makata ropo karápo. Makata ropo karáne uni hatipo. Uni hatiane ira ku kotesa hatiraka karotapirapo. Ira kuane hauaka menasamo torehokosapo.

someane koaretaesakipoko, Kotimo sawia popasane oyapo. "Maiya amo ipu hokono keraka sarimaraka toke makata paisiane nekea waene he soko nesapo. Nekea faraka takahihiraka kesasapo." Aiyaka Kotimo sawia popahoareapo. (*Kisim Bek 32:6*)

<sup>8</sup> Arirakano ipu hinamo hakimasa ayiáka repo ayiakakopo. Hinamo hakimasakipoko Kotimo fanasirakano i yape hakásamo aporo tuaneti tiri taosene (23,000) kusuapo.

<sup>9</sup> Arirakano isu Kotimo metakarirakarihoamo isiapo Kotiane kau aseako rakiante siahoasifareapo. Isiapo makasa kaua kekemamo ásia ayiáka, repo ayiakakopo. Asiamo ipu Koti kau aseako rakirakan, iane hesekekemo nesa kukua kesapo.

<sup>10</sup> Maiya suamo ipu someraka, "Kotimo makata rakisiane su siahoasifareapo." Aiyaka ipu meuraka Kotiane mawakasemaraka somesa ayiáka repo soko, ayiáka meuraka Kotiane mawakasemaraka somehokopo. Asiamo i mahisiraka risiakipoko su Makura Hoane Kotimo pusierakano peraka i makukua kekea fasapo.

<sup>11</sup> Ikusua ayiáka isu soko, ayiáka kurapaka Kotimo sawia popasapo. Makata su iaki fasere pesane, isiapo hemakapusimo, Kotimo sawia popasapo. Arirakano fahokosa maiyane makeanamo isu koteaka risikiasimo popasapo.

<sup>12</sup> Aporo metamo someraka, "Año siaraka rekenapo." Aiyaka someraka tiki somerakao, ayiáka né terafaka ruraka etenapaka asekeanie.

<sup>13</sup> Kau aseako makata fasere aperane reaki makata haku fasere perakanafapo. Aporo suaki fasere apera ayiáka, reaki soko ayiáka fasere perakanapo. Repo Kotiaki himu hakásaraka hemakapukua risikino, re kau aseako makata fasere aperamo reane hurutapiakosafapo. Re hurutapirapaka Kotimo re mawakapurakan, wakapuaka risike re hurupeakosafapo. Kau aseako makata fasere aperane metakarisimo, Kotimo ikia kara maroporaka tariakosapo.

"*Yakasa ho soko, yatafu soko, makárahokopo,*" aisane oyapo.

<sup>14</sup> Hameo. Yatafuaki soko, yakasa hoaki soko, makárahokopo. Yatafuaki soko, yakasa hoaki soko, kekeranane metakarinie.

<sup>15</sup> Re aporo koteaka hemakapura risikinapo. Nōmo someane repo takekeha hemakapunie.

<sup>16</sup> Arirakano Kereso asipa anena maiya amo, kapo he kotesane maka, Kotimo yaku ararenane kakasimo kurikuriraka rumaraka, kapo heane maka nenakano, Keresomo yapia isu paorakanapo. Asipa farawa feteraka mosoraka nenakano, Keresomo kaua isu paorakanapo.

<sup>17</sup> Asipa oro hakásá asíane isupo. Asipa oro hakásane ruturaka feteraka nenakano, isu su Kereso ipia hakásá paorakanapo. Asipa oro hakásane isiapo aporo hinamo yakaimo nenakanone, isu aporo kau hakásá asiapo.

<sup>18</sup> Yu aporomo rakirane hemakapunie. Ipu saro ponomakau rukua eke kima paikia Kotiaki kasane ipu nenapo. Nenaka Kotiaki paonapo.

<sup>19</sup> Asiamo someamo kepoane yakapare? Yakasa hoane soko yatafuanne soko kakaro kotifapo. Kakaro fanafapo. Aporomo iaki makata nakosa karakanone iyaki paorakanapo.

<sup>20</sup> Aporomo yatafu yakasa hoaki makata nakosa akarane kakaro Kotiaki karakanafapo. Satanemo aporo raipaki karakanapo. Re Satanemo aporo raipa a paohokohoamo nōmo reaki somerakanapo.

<sup>21</sup> Asiamo Unihae Yasumo kapo heane soko, yatafumo kapo heane soko, tetakara neane siahoasifareapo. Unihae Yasumo teporoa Kereso asipa nenane soko, arirakano makata nakosa yatafuaki kasane soko, tetakara neane siahoasifareapo.

<sup>22</sup> Unihae Yasumo kakanakeraka sapehoasimo isiapo ayiáka rakiante siahoasifareapo. E ipi namo kakaro wakapuaka rekenapo. Ipi wakapuane isiapo wakapuamo hurutapi-asireare? Wae, hurutapiakosafapo.

<sup>23</sup> Arirakano repo metakiramo someraka, "Isiapo isina hemakapusuane kekemahoane siahoasireapo. Makata metamo isu matasosa kakenafapo." Arirakano nōmo soko hemakapuraka, "Someane kakaroripo. Ásiane makata suamo isu ararehokosane kakerifapo," aihokosapo.

<sup>24</sup> Asiamo isu isinane hakasa hemakapukua somehokopo. Aporo metakirane soko hemakapukua somehoanie.

<sup>25</sup> Arirakano maketea makata roporaka neane siahoasireapo. Ropohoasiraka fana kairaka, "Makatane yatafuaki soko, yakasa hoaki soko kasare?" Aiyaka kaiyakopo.

<sup>26</sup> Asiamo Kotimo sawia popasane oyapo. "Hauaka one soko, hauaka wo makata arisiane soko, su Unihae Kotimo ipi menapo." Aiyaka popahoareapo. (*Buk Song 24:1*)

<sup>27</sup> Arirakano Keresoa paohoanafonosa aporomo reaki makata nako peaerakano re pukua epo makata nakosa karakanano nanie. Nasiraka kairaka, "Makata nakosa one yatafuaki kasare?" Aiyaka repo hemakapukua kaiyakopo.

28-29 Kaiyanafonorakano aporo metamo reaki someraka, "Makata nakosa one yatafu yakasa hoaki kasapo." Airakano repo nakopo. Epo reaki someraka, "Re watikiaka arisie." Aihokohoamo makatane nakopo. Nanafonoraka re kaíyahokosafapo. Arirakano eane soko kaíyahokohoamo nakopo. Arirakano aporo metamo someraka, "Aporo meta kaíyahokohoamo nōmo makata nenane yaporaka mareane siahoasifareapo. Nōmo makata nenane su neane siahoasireapo.

<sup>30</sup> Nōmo makata nakosapoko Kotiaki suserakano, makata susesakipoko aporo metamo yaporaka mareane siahoasifareapo." Aiyaka hemakapukupo.

<sup>31</sup> Repo makata nenane nenaka soko, he nenaka soko, makata rakiraka soko, makata suane Kotimo yano motosa makárahoko ayiakanie.

<sup>32</sup> Yu aporo soko, Yu aporohoanafonosa soko, Keresoa paosa aporo soko, i kaíyarako fofahoasimo ayiakakopo.

<sup>33</sup> Arirakano aporomo asekea sesehoasimo ano Poremo rakirakanapo. Ano reke, nōmo nī menane hákasa hemakapukua rekenafapo. Aporo metakirane nōmo hemakapukua arareraka, ipu watikisane Kotimo mafasiasimo nōmo hemakapukua rekenapo.

## 11

<sup>1</sup> Keresomo aina ayiáka, nōmo ayiáka rakirakanapo. Asiamo ano area ayiáka, re soko ayiáka risikanie.

*Korini taone sése apea aporomo ketaua kerane soko, hinamomo pasu makafirirane soko somesane oyapo.*

<sup>2</sup> Repo anoaki hemakapukua, nōmo someane soko repo kakimaka, asiasamo nōmo kára seserakanapo.

<sup>3</sup> Asiane repo hemakapusimo nōmo some one some karakanapo. Hinamo aporo aseamo ipi unihaeane ipi apiapo.\* Ipi apiamo unihaeane Keresopo. Keresomo ipi unihaeane Kotipo.

<sup>4</sup> Asiamo aporomo Koti kekerehoko sarimaraka toakipoko, á aporo metamo takahikia kurikuri anamo soko metao, Kotimo somerakano kaikia aporo suaki some akaramo soko metao, ipi wamoane hati karotapikia reke some karakanano, aporoamo ipi unihae Yasuane mawakasemarakanapo.

<sup>5</sup> Arirakano aporo su sarimaraka toakipoko, hinamo aporo asea takahikia kurikuri anamo soko metao, Kotimo somerakano kaikia some akaramo soko metao, pasu makafirianafonoraka<sup>†</sup> pasu rawi motokoa ipi takahikia reke some karakanano, ipi apia unihae manoane makaiyaranakanapo. Ipi pasu makafirianafonoraka kekeno ane, hinamo uni iti enemosane, e aporo metamo aserakano kaíyana ayiáka, hinamoane soko ayiáka kaíyarako kakakosapo.

<sup>6</sup> Hinamo pasu makafirianafonoraka reke, uni itiane soko enomokoa fahoanie. Uni iti enomokoa faraka reke kaíyana ayiáka kaíyanapaka pasu makafirinie.

<sup>7</sup> Arirakano kurikuri apea aporomo wamoaa ketaua soko uni hati soko karotapiakopo. Asiamo Koti unihaeaka area ayiáka Kotimo aporo unihaeaka rekeasimo maresapo. Aporo hinamo suamo aporo kotesane aseraka ipu Koti yano motosane makáranapo. Arirakano hinamo kotesane aseraka ipi apiane yano motosane makáranapo.

<sup>8</sup> Arirakano Kotimo hinamo kamapeane maka aporo rakisiafapo. Aporo kamapeane maka hinamo rakisiapo.

<sup>9</sup> Arirakano hinamopoko aporoane Kotimo rakisiafapo. Aporopoko hinamoane rakisiapo.

<sup>10</sup> Rakisiasamo hinamomo hemakapuraka, "Nōmo unihaeane nōmo aporo pusua apayo." Aiyaka hemakapuraka Kotiaki kekerehoko sarimana maiya amo pasu makafirrapo. Hepene aporomo soko aseraka seshokosapo.

<sup>11</sup> Arirakano Keresoa paosa hinamo ipi haku kakenafapo. Arirakano Keresoa paosa aporo soko ipi haku rekenafapo.

<sup>12</sup> Fana aporo kamapeane Kotimo maka hinamo rakisiapo. Asiane yumo hinamo aeyaka aporo hokosa takaperapo. Makata aiyananie su Kotimo hákasa rakisiapo.

<sup>13</sup> Arirakano repo takekea hemakapuraka. Aporo soko hinamo soko su sarimasakipoko hinamo pasu makafirianafonoraka Kotiaki kurikurihoane siahoasireare? Ane kotesare?

<sup>14</sup> Isiapo ainane oyapo. Aporo uni iti hohoroponafapo. Uni iti hohoroporaka reke, "Watikirareapo," aiyaka somerapo.

\* **11:3:** Hinamo aporo aseamo pasu makafirikia, hikumisi soko pasu yahanasamo mataisekeno, ane hinamo aporo asea reapo, aiyaka hemakapuraka. † **11:5:** Aporo mokotokona hinamomo pasu makafirifrapo. Asiamo hinamoane kaíyahoasimo aporo hinamo metakiramo e uni itiane enomorap.

<sup>15</sup> Asiane hinamo uni iti hohoroposa kake, "Kotehoareapo," airapo. Hinamomo ipi pasu makafirira ayíáka ipi uni itimo matiane mokosekenapo. Uni iti hohoroposane Kotimo hinamoaki kasapo.

<sup>16</sup> Asiamo pasu makafirira ayíáka makafirirane, tafatatafahoane siahoasifareapo. Tafatatafana aporo hinamoaki isiapo tarira aporomo someraka, "Hinamo repo pasu makafirinie." Aiyaka isiapo some meta kakenafapo. Pasu makafiriakopo, aisane soko kakenafapo. Kurikuri ape metakira á soko, Keresoa paosa aporo hinamomo some meta kakenafapo. Some hakása yiayapo.

*Kereso asipa nenane oyapo.*

<sup>17</sup> Yumo nōmo reaki sawi popana one re ereketae risikinapo, aiyaka poparakanafapo. Repo Kotiaki kurikurihoko sarimana maiya amo namina yia makoterakanafapo. Repo namina yia mokoatikiranapo.

<sup>18</sup> Repo Kotiaki wahoko arisiamo namina yia himu hakásaraka hemakapurafaraka fasikia risikinapakae. Aisane nōmo kaikia hemakapuraka, "Someane metakira kakararakae," aiyaka hemakapurakaripo.

<sup>19</sup> Arirakano aporo parakuraka fasikia risiane soko, metakira koteaka risirane soko, metakira watikiaka risirane soko, repo namina asekea takekeha hemakapukusapo.

<sup>20</sup> Asiamo yumo Kereso asipa nenane nōmo somerakanapo. Sarimana maiya amo repo makata nenenan kakaro Kereso asipa nenakanafapo. Repo namina yiamo makata nenenan nenenanapo.<sup>‡</sup>

<sup>21</sup> Makata anena maiya amo re meamorakano, aporo hinamomo makata nakosane namina yiamo wate foaka mokoa, mokokakanoraka nenenapo. Aporo metakiraki kakanafonorakano i meamoraka risirapo. Arirakano aporo metakiramo waene he kára nekea masuaraka risirapo.

<sup>22</sup> Makata nena soko, waene he soko, ayíáka nakosakipoko repo namina aapea nanie. Repo Kotiaki patera asesa aporoane makeferaka aporo makata forokoa risiane makata nakosa kakanafonorakano i kaiyara risikinapo. Akipoko nōmo reaki, "Kotehoareapo," aihoasireare? Wae. "Re koteaka risikinie," airakanafapo.

*Kereso asipa nenane oyapo.*

*Matiu 26:26-29; Maka 14:22-25; Ruki 22:14-20*

<sup>23</sup> Unihae Yasumo anoaki somerakanano, nōmo reaki some kasane oyapo. Yutasemo Unihae Yasuane parakesa ere hakása yiamo Yasumo farawa maka

<sup>24</sup> Kotiaki suseraka mosoraka maka reke someraka, "One ano kauane oyapo. Repoko ano kauane karakanapo. Farawane nенака ano hemakapunie. Ano hemakapukusakipoko keseke soko, ayíáka nенака risikinie."

<sup>25</sup> Aiyaka ipu makata nekea farakano, farawa masa ayíáka, Yasumo kapo maka reke someraka, "Kotimo aporoyaki kawe someaka marakanapo. Someaka masane Kotimo someane aporomanomo somea mapaoaraka sarimaraka some masane metakarirapaka nōmo yapimo rukutirakanapo. Kapo heane anena maiya amo ano hemakapunie." Aiyaka Yasumo somesapo.

<sup>26</sup> Asiamo Unihae Yasu paripeasiraka kau arisiamo, Kereso asipa anenamo hemakapuraka, "Unihae isupoko farimaka kusuapo." Aiyaka hemakapukua nakosapo.

<sup>27</sup> Asiamo Kereso asipa farawane soko, kapo heane soko, repo mokome nenenano, Unihae Yasumo kauane soko, yapiane soko, mokoatikiranakanapo.

<sup>28</sup> Anapaka, nasiraka yia aporo hinamo repo namina suamo himua makata watikisa rerapaka kokoa hemakapunie. Né himu siarakano nanie.

<sup>29</sup> Arirakano aporo metamo Unihae Yasu kusua kepoane hemakapunafonorka ayíáka Kereso asipa soko, kapo he soko, mokome nenenano e ipi yiamo fanasihoasimo rakanapo.

<sup>30</sup> Repo metakiramo makata watikisa himua kereakano yia Kereso asipa ane nenenapo. Asiasamo re metakira makata taraka, arirakano metakira roraraka, arirakano metakira kukua kekeha ásiapo.

<sup>31</sup> Arirakano Kereso asipa nasiraka himura makata watikisane kokoa hufitaerakano ane hasakahokosafapo.

<sup>32</sup> Asiane makata watikisa yia rekeno, Kotimo isu maropohokosapo. Keseke isu hauaka one fa ana maiyamo, isu nena aporoyaki Satanemo hauaka á pusie, aihokohoamo, yumo Unihae Yasumo isu maroporakanapo.

<sup>‡ 11:20:</sup> Korini sése aapea Kereso aporo hinamo sarimaraka makata nesapo. Nekea faraka Kereso asipa nesapo. Arirakano metakiramo Kotiane hemakapunafonorka sakepamo nesasamo Poremo iane hukurusuapo.

<sup>33</sup> Hameo. Kereso asipa anena maiya amo su sarimaraka su yiamo nakosakipoko asekea tokoanie. Aporo hinamo metamo wate fana foakaya nakopo.

<sup>34</sup> Aporo hinamo meta meamoraka makata narirakano ipi apea nanie, aihoanie. Re sarimaraka toakipoko Kotimo maropohoane siahoasifareapo. Arirakano makata meta hasakasane ano re arisia peraka, nōmo re maropohokosapo.

## 12

*Ho Kotesamo wakapumo ararenane oyapo.*

<sup>1</sup> Hameo. Ho Kotesamo wakapumo ararenane repo himeteraka risirapaka nōmo maroporaka poparakanapo.

<sup>2</sup> Re Yasuaki risikiako parihoasiraka, makata meta kekerehoko hemaka apuramo, yakasa ho soko, yatafu soko, kekerehoko kirimasapo.

<sup>3</sup> Asiamo some one repo hemakapusimo reaki nōmo somerakanapo. Ho Kotesa rea aporomo "Yasuaki yakasa ho marerakanapo." Aiyaka somerafapo. Arirakano Ho Kotesa rea aporomo "Yasuane ipi Unihaepo," aiyaka somerapo. Ho Kotesa rekeanafonosa aporomo "Yasu ipi Unihaepo," aiyaka somerafapo.

<sup>4</sup> Arirakano Ho Kotesamo wakapumo yaku ararenane kekeporeapo. Kekeposa nine kepoane Ho Kotesa ipi hakasapo.

<sup>5</sup> Unihae Yasupoko isiaipo makata rakirane kekeporeapo. Kekeposa nine Unihae hakasa Yasupoko rakirakanapo.

<sup>6</sup> Kotimo rakira kekepoane isiaipo rakirakanapo. Rakirane Koti ipi hakasamo isu ararerakano, isiaipo rakirakanapo.

<sup>7</sup> Keresoa paosa aporo hinamo suane isiaipo makoteraka ararehoasimo, Ho Kotesamo ipi wakapumo yaku ararenane, isuaki hakāsa hakásaraka karakanapo.

<sup>8</sup> Ho Kotesamo makata karáne oyapo. Keresoa paosa aporo hinamo metakiraki makata kepo kotesa aporo hinamo suaki some kakasimo tarirapo. Arirakano makata metane, Kotimo hemakapura ayiáka, Keresoa paosa aporo hinamo metakiraki ayiáka hemakapusimo kepoane tarirapo. Tarirakano aporo hinamo suaki ipu some kakasimo Ho Kotesamo mawakapunapo.

<sup>9</sup> Arirakano Keresoa paosa aporo hinamo metakiramo Kotiaki himu hakásaraka kara hemakapurane, Ho Kotesamo iaki karápo. Karakano, ipu Kotiaki wárakano, Kotimo kaki-maka, makata ipu wásane karápo. Aiyaka hemakapusimo Ho Kotesamo iane ararenapo. Arirakano aporo hinamo metakiraki, aporomano makata tasa mafana wakapuane, Ho Kotesamo karápo.

<sup>10</sup> Arirakano aporo hinamo metakiramo Kotimo wakapumo hemakapukua rakirane rakisimo Ho Kotesamo iaki karápo. Arirakano aporo hinamo metakiramo Kotimo somerakanano kaikia, aporo hinamo metakiraki some kakasimo, Ho Kotesamo iaki mahemakapurapo. Arirakano aporo hinamo metakiraki Ho Kotesamo menane soko, yatafu yakasa homo menane soko, takekea hemakapurane, Ho Kotesamo tarirapo. Arirakano aporo hinamo metakiramo me meta soko, me kekepo meta soko, fana kaiyanafonosane some-hoasimo, meane Ho Kotesamo mahemakapurapo. Arirakano aporo hinamo metakiramo me meta kaisia, kepoane ipi meaka paritaeraka, aporo hinamo suaki some kakasimo, me kepoane Ho Kotesamo mahemakapurapo.

<sup>11</sup> Asiamo makata ararena suane, Ho Kotesamo ipi hákasamo karápo. Ipi hemakapukua aporo hinamo metaki makata ararena meta kaka, arirakano aporo hinamo metaki makata ararena meta kaka, aporo hinamo metaki makata ararena meta kaka anapo.

*"Kau hakāsa nine meta korake, meta hokono, ayiáka kekepoane sarimaraka kau hakásareapo." Aisane oyapo.*

<sup>12</sup> Arirakano korake soko, hokono soko, kekeporaka kau hakāsa area ayiáka, Kereso ane ipi ásiaipo. Isu su kekeposane, e ipi hakásaki sarimarakanapo.

<sup>13</sup> Isu suane Ho Kotesa hakásamo suaraka risikinapo. Isu metakira Yu aporopo. Isu metakira Yu aporofapo. Isu metakira aporo raipa roposoa ayapo. Isu metakira aporo raipa ropohoanafonosa ayapo. Isiaipo suamo he anena ayiáka, Ho Kotesa hakásane maka risikinapo.

<sup>14</sup> Isu aporomano kau hakásaraka, kaua makata risiane hakásafapo.\*

<sup>15</sup> Asiamo korakemo someraka, "Ano hokonohoanafonosasamo aporomano kaua rekeako hisiripo." Aiyaka somerakanone, korakeane ipi haku rekeakosare? Wae. Kau hakásia yia rekenapo.

\* **12:14:** Su korake hakásaka risikinafapo. Su hokono hakasa risikinafapo.

<sup>16</sup> Arirakano senakimo someraka, "Ano hihoaanafonosasamo aporomano kaua rekeako hisiripo." Aiyaka somerakano, senakiane ipi haku rekenare? Wae. Kau hakása yia rekenapo.

<sup>17</sup> Aporomano kaua hí susu risike, makata someane mayiáka kaiyakosare? Aporomano kaua senaki susu risike, mayiáka makata yamohokosare?

<sup>18</sup> Senaki susu risikiasimo Kotimo isu rakisiafapo. Ipi hemakapukua aporomano kaua hokono soko marekea, korake soko marekea, senaki soko marekea, hi soko marekea, ayiáka murisiapo.

<sup>19</sup> Aporomano kaua senaki susu risia satiki kau rekeafunufapo.

<sup>20</sup> Aporomano kaua makata risike kekepo risikinapo. Asiáne aporomano kauane hakásapo.

<sup>21</sup> Arirakano himo hokonoaki someraka, "Né metakarikia nōmo ní haku rakiakosapo." Aiyaka somehoane siahoasifareapo. Arirakano wamomo korakeaki someraka, "Né metakarikia nōmo ní hakása rakiraka reke kotehoasireapo." Aiyaka somehoane siahoasi-fareapo.

<sup>22</sup> Isu kaua makata metane isiaipo hemakapuraka, "Makatane nenakamaka makatapo." Aiyaka makatane isiaipo kára hemakapurafapo. Kára hemakapunafonosa nine makatane rekeanafonosa isu kau koteaka rekeafunufapo.

<sup>23</sup> Isu kau makoteraka kau rakirapo. Arirakano kaua makata kaíyasane pasu osonapo.

<sup>24</sup> Arirakano kaíyaoanafonosane pasu osonafapo. Pasu osonafaraka soko metao, kau rakirafaraka soko metao, aporo hinamo suamo aseane siahoasireapo. Arirakano hokono soko, korake soko, kiri soko, fako soko, suane Kotimo sarimaraka kau hakása á sarimaraka marekea, makata metakira yano motosa kárahoanafonosane, Kotimo makárarakaka marekea, kau hakása á sarimaraka maresapo.

<sup>25</sup> Aporomano kaua, Kotimo makata meta kekepo risikiasimo rakisiafapo. Kaua makata su arisiamo metamo meta arare, arirakano metamo meta arare, ayikasímo maresapo.

<sup>26</sup> Asiamo korake soko metao, hokono soko metao, ane hakása nenakarakano kau suane terapo. Hakása meta yano motosa makárarakano, suane seseaka risikinapo.

<sup>27</sup> Asiamo Keresomo kau asiáne repo. Re kaua makata kekepo kekepo risiane sarimaraka, ipi kau hakasapo.

<sup>28</sup> Keresoa paosa aporomo rakira kekepoane rakisimo, Kotimo uyáka murikimasapo. Fana tarira aporo marekea, amo patera Kotimo somerakano kaira aporo marekea, amo patera tisa aporo marekea, amo patera Kotimo wakapumo hemakapukua rakira rakisimo aporo marekea, amo patera aporo makata takamasa mafana aporo marekea, amo patera aporo meta ararena aporo marekea, amo patera unihaeaka asekeia rekeasimo aporo marekea, amo patera me meta kaiyanafononane kaikia somehoasimo aporo marekea, ayiáka murikimasapo.

<sup>29</sup> Ayiáka murikimasane aporo su tarira aporofapo. Su Kotimo somerakano kaira aporofapo. Su tisa aporofapo. Su Kotimo wakapumo hemakapukua rakira aporofapo.

<sup>30</sup> Su aporo makata takamasa mafana aporofapo. Su me kaiyanafonona somera aporofapo. Su me kaiyanafonona kaikia kepoane ipi meaka paritaeraka some kará aporofapo. Asiamo aporo suamo kekeporaka rakisimo Kotimo murikimasapo.

<sup>31</sup> Ho Kotesamo wakapumo yaku ararena karáne kakasimo repo himu tumurumo hemakapunie. Asiáne ikia kara kakaro fanáne nōmo reaki some ana oyapo. Ikia kara omo ikia kara metane marokenapo.

## 13

*Ikia kara fanane oyapo.*

<sup>1</sup> Aporomo me kekepo yakaiane soko, hepene aporomo meane soko, nōmo kaikia someraka tiki somerakao, asiáne nōmo himu tumurumo aporo metane hemakapuna-fonorakano ane, akai susuamo somerakanapo. Aiyananane roko wakayia murianafonoraka nena takiane me ana ayiáka, nōmo nena akai susuamo somerakanapo. Ira kakarua ruane nena mehora ayiáka nōmo nena akai susuamo somerakanapo.

<sup>2</sup> Arirakano Kotimo some karakano nōmo kaikia aporo metaki some kaka, arirakano Kotimo makata kakaro aina farareane hemakapukua, arirakano makata mahamesane asekeia hemakapukua, arirakano Kotiaki himu hakásarakaka hemakapuraka, ūriaki hisier-akano, ūriane hinakano asekeia, arirakano nōmo makata su enomaka ayiáka rakiraka tiki rakirakao, asiáne aporo metaki himu punafonoraka areakipoko ano nenakamaka aporo asíapo.

<sup>3</sup> Nōmo makata kemo su aporo makata forosaki kakakosane soko, aporo metamo ano rusua kurakano ano kauane iramo inakasimo kakakosane\* soko, nōmo karaka tiki karakao, asiāne nōmo aporo meta himu tumurumo hemakapunafonorakano ane, makata kemo su kasane soko, kau kasane soko, nenakamakayia kayereapo. Ayíáka kasekenone ane, ano yano motosane makárahokosafapo.

<sup>4</sup> Isiapo himu tumurumo aporo metane hemakapukua risirane oyapo. Aporo metamo isuaki mokoatikirakano tapare sapehoanofonoraka tau auaraka risirapo. Aporo metane kamenakarakar aarenapo. Kakanakeraka hemakapurafapo. Ano ní yano motosa makárahokosakipoko nōmo ní menane rupiaka somerafapo.

<sup>5</sup> Makapororaka, "Ano hokopukua rekenapo." Airafapo. Aporo meta kaiyahoasimo rakirafapo. "Nōmo ni menane hakasa siapo." Aiyaka hemakapurafapo. Aporo metamo weako nanaerakano soko, kaikia nanaeane hisiraka kakipayanapo. Aporo metamo anoaki mokoatikirakano soko, nōmo ropo mokoatikhoko hemakapurafapo. Mokoatikisane himumo hemakapukua rerafapo.

<sup>6</sup> Aporo metamo watikiaka rakirakano asekea sesenafapo. Aporomo makata koteaka rakikia kakaro somerakano ipi kaikia sesenapo.

<sup>7</sup> Aporomo ipi yia umisane maraka aporo metaki topakamarafapo. Eaki mokoatikirakano soko, ipi himu tumurumo hemaka pusuane metakarirafapo. Arirakano aporo metaki himu hakásaraka hemakapukua rerapo. Arirakano watikiaka rakirakano asekea hemakapuraka, "Keseke koteaka rekeakosapo," aiyaka hemakapurapo. Arirakano makata umisa su fasere aperamo soko, himu tumurumo hemakapurane yaiya wakapuaka hemakapukua rerapo.

<sup>8</sup> Aporo metane himu tumurumo hemakapurane fahokosafapo. Arirakano Kotimo ipi ayiakakosaposane somerakano kaikia aporo metaki some akarane soko fahokosapo. Arirakano me kaiyianafonona somerane soko fahokosapo. Makata kepo fararea Ho Kotesamo makata hemakapura karáne soko fahokosapo.

<sup>9</sup> Yumo kakaro ainane isiapo wakasema hemakapurapo. Kakaro su hemakapurafapo. Kotimo somerakano wakasema kairapo. Wakasema kaisiane aporo metaki some karápo.

<sup>10</sup> Asiāne keseke makata su siaraka hemakapukusa maiyane fasere peakosapo. Fasere perakano makata wakasema hemakapusuane faraka kára hemakapukusapo. Hauaka one fa ana maiya amo, makata kepo suane asekea kepo suane hemakapukua ayiakakosapo.

<sup>11</sup> Asiāmo ano hokosa rea maiya amo, hokosamo somera ayíáka nōmo somesapo. Hokosamo asera ayíáka nōmo asesapo. Hokosamo hemakapura ayíáka nōmo hemakapusuapo. Asiāne ano aporo sisimarakia rea maiya amo, hokosamo rakira ayíáka rakisiane yumo metakarisiyo.

<sup>12</sup> Hea hiho asera ayíáka aseane akósa aserapo. Aina ayíáka yumo isiapo akósa asera ayíáka aserakanapo. Keseke kakaro kakamaraka asekea hemakapukusapo. Nōmenane Kotimo su asekea hemakapurapo. Asekea hemakapura ayíáka keseke nōmo makata su hemakapukusapo.

<sup>13</sup> Makata yaiya rekeakosane oyapo. Kotiaki himu hakásaraka hemakapurane yaiya rekeakosapo. Makata kotesane makosakipoko kau risirane soko yaiya risikiakosapo. Aporo metane himu tumurumo hemakapurane soko yaiya rekeakosapo. Makata isiane fahokosafapo. Kakaro fanane aporo metaki himu tumurumo hemakapura ayapo.

## 14

*Ho kotesa wakapumo yaku ararena some metane oyapo.*

<sup>1</sup> Repo namina yia aporo metamo aporo metaki hemakapukua, metamo metaki hemakapukua, ayíáka himu tumurumo hemakapura ane kekemahoanie. Ho Kotesamo wakapumo yaku ararenane mokoako hemakapunie. Ayíáka hemakapuraka, "Kotimo somerakano someane nōmo kaikia reaki some kakako seresipo." Aiyaka nōmo hemakapurakanapo.

<sup>2</sup> Aporomo me kaiyianafononane kaikia someraka, someamo kepoane somehoanafonrakanone, aporomanomo kaikia hemakapukusafapo. Asiāmo me kaiyianafonona somera aporoamo, aporomanomo kaiyisimo somerakanafapo. Epo Kotiaki hákasa somerakanapo. Kotimo makata kakaro aina farareane Ho Kotesamo eaki mahemakapurakarakanapo, epo me meta kaiyianafononane somerapo.

<sup>3</sup> Arirakano Kotimo ainane somerakano, porofete aporomo kaira ayíáka, aporomo kaikia epo ipi meaka somerapo. Asiāmo ipi meaka somerakano, aporo suamo kaiyisimo somerakanapo. Aporomo kaikia hemakapurakanone ane, someamo iane ararakanapo. Arirakano ipu Kotipoko yaiya rakiraka risikiasimo, Kotimo somerakano kaira

\* <sup>13:3:</sup> Maiya amo Keresoaki yunuraka risia aporomo, Keresoa paosa aporoane, mokoatikiraka ira pairapo.

aporomo someamo iane mawakapunapo. Arirakano ipu himu nekea risiane epo someamo mawakapunapo.

<sup>4</sup> Arirakano Kotimo somerakano kaikia somera aporoamo, Keresoa paosa aporo hinamo suane ararenapo. Ipu suamo Kotiane hemakapusimo ararenapo. Asiāne me meta kaiyanafonona somera aporoamo, ipi hákasamo Kotiane hemakapusakipoko ipi yia ararenapo.

<sup>5</sup> Arirakano repo suamo me kaiyanafonona Ho Kotesamo akarane somehoasimo ano seseraka tiki seserakao, asiāne Kotimo somerakano kaira aporomo ipi meaka somehoasimo, nōmo kakaro kára hemakapurakipo. Kotimo somerakano kaira aporomo ipi meaka some akara aporoamo ipi namo kakaro fanāpo. Arirakano Ho Kotesamo me meta karakano, me kaiyanafonona somera aporo aне ipi kesekepo. Me kaiyanafonona somera aporomo someraka, some kepoane somehoanafonorakano, Keresoa paosa aporo hinamomo hemakapusafapo. Asiāne metamo kepoane somerakano, Keresoa paosa aporo hinamomo hemakapususapo.

<sup>6</sup> Asiamo Keresoa paosa aporo maeo. Re arisia ano peraka reaki me kaiyanafonona susu somerakanone, repo makata kaweane enomakasimo nōmo arareraka tariraka ayiakakosafapo. Me kaiyanafononane somerakanone ane, Kotiane hemakapusimo nōmo re arareraka ayiakakosafapo. Asiāne Kotimo someane anoaki somerakano, nōmo isipapo isina meaka some karakanone ane, re nōmo arareraka ayiakakosapo. Kotimo hemakapusua anoaki tarisiane nōmo reaki some karakanone ane, re nōmo arareraka ayiakakosapo.

<sup>7</sup> Arirakano someane kepoane repo hemakapusimo reaki nōmo yapake somerakanapo. Aporomo kíta soko metao, wiroko soko metao, mokome rurakano, repo koteaka kaiyianafonoraka, kesane maiyaka koteaka kesahokosare?

<sup>8</sup> Arirakano weako pukusakipoko aporo sarimahoasimo aporomo pikoro maka rurapo. Mokome rurakarakanaporo weako pukusakipoko sarimahokasafapo. Kakaro rurarkariakapo, aiyaka hemakapususapo.

<sup>9</sup> Aina ayiáka aporomo me kaiyanafonona somerakano, aporo metamo kepoane somehoanafonorakano, maiyaka someamo kepoane repo hemakapususare? Someamo kepoane hemakapunafonorakanone, someane nenakamaka hurupeakosapo.

<sup>10</sup> Arirakano hauaka sua me kekepo yakai risikinapo. Me suane kepoane su hakásara some kepo risikinapo. Asiamo aporo suamo namina meaka namina hemakapusimo somehoane siahoasireapo.

<sup>11</sup> Arirakano aporo metamo ipi me haku somerakano, nōmo kaikia hemakapunafonoraka reke, eyaki tákēnafapo. Epo soko anoyaki tákēnafapo.

<sup>12</sup> Aina ayiáka aporomo me kaiyanafonona somerakanone, repo some kepoane hemakapunafonorakano maiyakakosare? Someamo re makotehokosafapo. Ho Kotesamo ararena wakapuanepo mokoako seseraka ainakanapo. Seseraka Keresoa paosa aporo hinamo suane ararehokosakipoko ararena ane mokoako Kotiaki kurikurihoanie.

<sup>13</sup> Asiamo me meta kaiyanafonona somera aporomo someamo kepoane hemakapusakipoko, Ho Kotesamo wakapuanepo mako kurikurihoanie.

<sup>14</sup> Arirakano me kaiyanafonona me metamo kurikuriraka nōmo homo kurikurinapo. Aiyaka kurikurisa nine ane himumo hemakapurafapo.

<sup>15</sup> Nōmo maiyaka kurikurihokosare? Nōmo homo soko kurikuriraka, himumo soko hemakapukua kurikurihokosapo. Homo soko kesaraka himumo soko hemakapukua kesahokosapo.

<sup>16</sup> Arirakano kurikuri apea re su sarimaraka risikino, me kaiyanafonona somera aporoamo someraka Kotiaki suseaka kurikurirakan, someamo kepoane repo hemakapunafonorakano risike, maiyaka repo aohokosare? Someamo kepoane hemakapuna-fonosasamo, epo kurikurianaki himu hakásara hemakapusafapo.

<sup>17</sup> Asiamo aporo metaki Ho Kotesamo wakapu karakano, aporoamo me kaiyanafonona someraka kurikuriraka tiki kotesapo. Asiāne repo hemakapunafonorakano kurikuri-anamo reane ararenafapo.

<sup>18</sup> Ho Kotesamo ano ararerakan, nōmo me kaiyanafonona some yakai somerapo. Repo soko ayiáka somera nine reane nōmo marokesapo. Asiasamo nōmo Kotiaki suserakanapo.

<sup>19</sup> Sarimana maiya amo me kaiyanafononane nōmo some waseremaka pukua somehoane siahoasifareapo. Asiāne aporo hinamomo kaikia hemakapusimo ipu meaka some kinake somehoane siahoasireapo. Aiyaka someanamo me kaiyanafonona someane marokenapo.

<sup>20</sup> Arirakano Keresoa paosa aporo maeo. Nōmo some one kairaka hokosa wakasema popakemo sesēraka koaretaena ayiáka koaretaehokopo. Hokosa kirimo metaki mokoat-ikihoanafonona ayiáka, repo soko metaki mokoatikihoanafonoraka tau risikianie. Ayiáka risike aporo sisimamo hemakapura ayiáka hemakapunie.

<sup>21</sup> Arirakano Yu aporomo ainane maropohoasimo i arisia a aporo me metamo somehoko Kotimo pusiesapo. Asiamo Kotimo sawia popasane oyapo. Unihae Kotimo someraka, "Yu aporoaki nōmo somehokosakipoko aporo me meta somera aporo nōmo pusiehokosapo. Pusierakan i pukua, nōmo someane ipu some kakakosapo. Some karakan yia, Yu aporomo yaiya kakipayahokosapo." Aiyaka Kotimo somesapo. Somesane Kotimo ipi sawia porofete aporomo popahoareapo. *(Aisaia 28:11-12)*

<sup>22</sup> Arirakano kakimakanafonona aporoaki me kaiyianafononane somerapo. Ipu Kotiane hemakapusimo somerapo. Asiāne kakimara aporoaki me kaiyianafononane somerafapo. Kakimara aporopoko Kotimo somerakano kaira aporomo namina yia meaka somerapo. Kakimara aporomo Kotiane koteaka kára hemakapusimo namina someane some karápo.

<sup>23</sup> Arirakano re Keresoa paosa aporo hinamoaki Ho Kotesamo arareraka, me kaiyianafononane me kekepoaka somerakano, aporo kumuku peraka soko, kakimakanafonona aporo peraka soko, ipu kaikia reaki someraka, "Aporo hinamoane masuarareapo," ai-hokosapo.

<sup>24</sup> Arirakano Kotimo somerakano kaira aporomo someane ipi meaka some karakano, aporo kumuku pesa aporomo soko, kakimakanafonona aporo pesa amo soko kaikia, "Ano himu watikirareapo. Kotimo ano takekee hukurukusapo," aihokosapo.

<sup>25</sup> Aiyaka hemakapukua ipi tau hemakapurane hufitaehokosapo. Hufitaeraka arupekea Kotiaki kekereraka someraka, "Koti reyaki rekenapo," aihokosapo.

*"Kotiaki kekerehoko sarimana maiya amo mokome rakiakopo," aisane oyapo.*

<sup>26</sup> Arirakano Keresoa paosa aporo maeo, nōmo some kepoane yakapare? Kotiaki kekerehoko sarimana maiya amo re aporo metamo kesa kepomareanie. Repo metamo aporo suamo enomakasimo Kotimo someane some kakanie. Repo metamo kaiyiane Kotimo some karakano kaikia aporo suaki someane repo namina meaka some kakanie. Repo metamo Ho Kotesamo wakapu karakan me kaiyianafonona kaikia somehoanie. Repo metamo me kaiyianafonona kaikia someamo kepoane repo namina meaka some kakanie. Ayiáka repo namina Keresoa paosa aporo hinamo suane mawakapuraka Kotiaki kekerehoko sarimanamo koteaka sarimahaoanie.

<sup>27</sup> Arirakano repo aporo metakiramo me kaiyianafonona somerakano, someamo kepoane aporo metamo repo namina meaka some kakanie. Me kaiyianafononane repo aporo tetámo soko metao, aporo isiamso soko metao, hakásara hakásaraka somehoanie. Aporo kitafasu, kakoreasu ayiáka me kaiyianafononane aporo yakaimo somehokopo. Aporo isiamso somehoane siahoasireapo.

<sup>28</sup> Asiāne me kaiyianafonona someamo some kepoane some kará aporo rekeanafonosekeno, repo metamo me kaiyianafononane tau himumo Kotiaki somehoanie. Tau ní yia somehoarie. Aporo suamo kaiyisimo somehokopo.

<sup>29</sup> Arirakano Kotimo somerakano kaira aporo tetámo soko metao, aporo isiamso soko metao, some kaisiane hakásara hakásaraka aporo suaki some kayane siahoasireapo. Some karakano repo aporo suamo takekee hemakapunie.

<sup>30</sup> Arirakano aporo meta takahikia some karaka reakipoko, Kotimo someane aporo meta kayamo kairaka, epo somehoko takahinakano, fana takahikia someraka rea aporo né, kakanie.

<sup>31</sup> Aporo suamo makata kawe hemakapusimo Kotimo somerakano kaira aporo repo hakásara hakásaraka somehoanie. Ayianamo aporo suane seseraka wakapuaka risikiakosapo.

<sup>32</sup> Arirakano Kotimo somerakano kaira aporoamo hemakapuraka, "Kotimo someane some kakakosapoko asiāne, nōmo fore asekeea rekeakosapo." Aiyaka keseke someraka soko metao, foaka someraka soko metao, aporoamo ipi menapo.

<sup>33</sup> Asiamo mokome su yiamo somerakano asekeea Kotimo sesenafapo. Aporomo himu hakásaraka hemakapukua tau somerakano asekeea Kotimo sesenafapo.

<sup>34</sup> Arirakano ape sumu sua Keresoa paosa aporo hinamo su sarimana maiya amo, hinamo repo fanaraka takahikia somehokopo. Repo somehoane siahoasifareapo. Re fanahoanafonosasamo tau tokoanie. Aiyaka Yu aporomo somemane motosane yaiya kakenapo.

<sup>35</sup> Hinamo repo some kepo himeterakano, ní apea ní apiaki kaiyinie. Kurikuri apea aporo hinamo su sarimasakipoko hinamo takahikia sakepamo iriraraka makata kaiyiane siahoasifareapo. Ayiane kaíyahoasireapo.

<sup>36</sup> Korini aporo hinamo repo marirakano mokome sarimarakanare? Kotimo someane re aeyaka pesare? Kotimo someane repo hákasa kakimasare? Wae. Asiafapo.

<sup>37</sup> Arirakano aporomo hemakapuraka, "Kotimo somerakano kaira aporoane anopo. Ho Kotesamo wakapuanne anoaki yaku kasápo." Aíyaka hemakapura aporoamo nōmo sawi popana one asekeia someraka, "Poremo Kotimo someaka maresane popahoareapo," aihokosapo.

<sup>38</sup> Nōmo popasa one aporomo kakipayarakanone ane, aporoamo someane repo kaki-makopo.

<sup>39</sup> Asiamo hameo, Kotimo somerakano repo kaikia, someane some kakako Kotiaki kurikurihoanie. Asiane me kaiyianafonona ane, Ho Kotesamo some karakano, aporomo kaikia somehokosane repo yapohokopo.

<sup>40</sup> Arirakano Kotiaki kekerehoko sarimana maiya amo, mokome someaka sarima-hokopo. Koteaka maroporaka sarimahoanie.

## 15

*Yasu kusua maturikia taesane oyapo.*

<sup>1</sup> Keresoa paosa aporo maeo. Yasuane nōmo reaki fana some kasane, yumo soko, efera hunia hemakapusimo somerakanapo. Fana some kasane repo kakimosapo. Pipu soko yaiya kakimokoa risikinapo.

<sup>2</sup> Asiamo Yasuane nōmo some kasane repo yaiya kakimokoa hemakapukua risikino, Kotimo re mafasiraka rekeakosapo. Asiāne someane repo kaumo hemakapurakanone, ane re ikia kara hasaka pukusapo.

<sup>3</sup> Arirakano Kotimo anoaki some fana kasane some hakása yine nōmo reaki soko some kasapo. Some kasane oyapo. Isiapo watikisapoko Yasu kusuapo. Yasu kukusiraka Kotimo sawia poparaka, Yasuane kukusapo, aiyaka popasane yasiapo.

<sup>4</sup> Arirakano Yasu kusua kunikia motosane yape isiamo Kotimo e maturikia taesapo. Maturikia taerakano e turikia pusuapo. Wate fana Kotimo sawia poparaka, Yasuane turikia pukusapo, aiyaka popasane yasiapo.

<sup>5</sup> Asiamo Yasu turikia pusuane, fana Pita rea, e perakano Pitamo, eane asesapo. Arirakano aporo hakása pura kinusu risia á e perakano ipu soko eane asesapo.

<sup>6</sup> Arirakano eaki patera asesa aporo fae harote (500) soko, aporo metakira soko i risiakipoko, Yasu perakano ipu soko asesapo. Asesa aporo 500 ane metakira, kárane yumo sawi one nōmo popana maiya omo yia risikinapo. Metakira hukusi kusuapo.

<sup>7</sup> Arirakano Yamese rea soko Yasu perakano, epo soko eane asesapo. Arirakano tarira aporo su risia soko Yasu perakano, ipu soko eane asesapo.

<sup>8</sup> Arirakano keseke, ano rea soko tariako e perakano, nōmo soko eane asesapo. Tarira aporo kinu sumo fana Yasuyaki hauaka wo hakása koraka rea maiya amo, ipu Yasuaki risikiako parisapo. Hokosa takapera maiyane faraka, keseke takapera ayiáka ano Yasuaki keseke rekeako parisapo.

<sup>9</sup> Arirakano tarira aporo makama kesekesane anopo. Tarira aporo hoasimo Keresomo ano murikimakosa nine, nōmo fana Keresoa paosa aporoane mokoatikisapo. Asiasamo ano kaíyarakanapo.

<sup>10</sup> Asiāne Kotimo ano yaku ararerakano, ano koteaka reke tarira aporo rekenapo. Kotimo ano yaku araresasamo ano nenakamaka rekenafapo. Nōmo kára wafororaka rakiraka rekenapo. Tarira aporo metakiramo wakapuaka rakiraka tiki rakirakao, asiāne nōmo namo kakaro kára wakapuaka rakirakanapo. Asiāne nōmo ní wakapumo ayiáka rakirakanafapo. Kotimo wakapumo ano ararerakano nōmo ayiáka rakirakanapo.

<sup>11</sup> Asiamo ipu rakisiane soko metao, nōmo rakisiane soko metao, makatane fanafapo. Isiapo suamo reaki Yasuane some karakano, someane repo kakimarakano, someane fanapo.

*Isu maturikia taehokosaposane oyapo.*

<sup>12</sup> Isiapo Yasuane some akarane oyapo. "Yasu kusuane Kotimo maturikia taesapo." Arirakano repo metakiramo someraka, "Aporo kusuane maturikia taehokosafapo." Aiyaka somerakane marirakanore?

<sup>13</sup> "Aporo kusuane maturikia taehokosafapo," aiyaka kakaro somesa satiki, Kotimo Yasu soko maturikia taehoafunufapo.

<sup>14</sup> Asiāne Yasu maturikia taehoanafonosa satiki, isiapo nenakamakayia some kakafunupo. Nena some kasa satiki, repo nenakamakayia kakimakafunupo.

<sup>15</sup> Asiāne isiapo someraka, "Keresoane Kotimo maturikia taesapo," aisapo. Arirakano Kereso kusua maturikia taehoanafonosa satiki, isiapo Kotiane kotafe some kakafunupo.

Asiāne Kereso maturikia taehoanafonosa satiki, aporo su kusua maturikia taehoafunufapo.

<sup>16</sup> Asiāne aporo kusua maturikia taehoanafonosa satiki, Keresoane soko maturikia taehoafunufapo.

<sup>17</sup> Arirakano Kereso maturikia taehoanafonosa satiki, re yaiya himu watikiaka risikiafunupo. Asiamo repo nenakamakayia Yasu Keresoaki himu hakásaraka hemakapukua risikiafunupo.

<sup>18</sup> Arirakano Keresoa patera asesa aporo yumo kusuane, kura ikia kara pufunupo.

<sup>19</sup> Hauaka wo hákasa isu Keresoyaki risina, akura maiya amo yaiya Keresoyaki risikianafonorakano, isu kára kaiyahokosapo.

<sup>20</sup> Arirakano kakaro someane oyapo. Kereso kusuane Kotimo kakaro maturikia taesapo. Aporo kusua fana maturikia taesane Keresopo. Arirakano ira wate fana pekea rea ayíáka, Kereso ipi kusuane fana maturikia taesapo.

<sup>21-22</sup> Atamemo makata watikiaka rakisiasamo, ipi kusuapo. Aporo su Atamemo wainepe pesamo, Atameane ipi kusamo ayíáka, aporo su kurapo. Arirakano Keresomo koteaka rakisiasamo, e Kotimo maturikia taesapo. Asiamo Keresoaki kataka marekea risia aporoane, Kereso maturikia taesa ayíáka, maturikia taehokosapo. Asiamo aporo hakás meta Atameane fana kususamo, isu soko kukusapo. Arirakano aporo hakás meta Yasuane kusua maturikia taeraka yaiyareasamo, isu soko maturikia taeraka yaiya risikiakosapo.

<sup>23</sup> Yaiya risikiasimo murikimasa maiya á paurakano maturikia taehokosapo. Fana Kereso maturikia taesapo. Maturikia taesane e keseka pariapera maiya amo, eaki katak marekea risia aporo hinamoane maturikia taehokosapo.

<sup>24</sup> Sereamo hauaka wo fahokosa maiyane fasere peakosapo. Maiya amo Keresoaki yunuraka risia aporo unihaeane soko, aporoamo wakapuane soko, ipu somemané motosane soko, suane Keresomo marokeraka rukua mosaka tapiakosapo. Rukua mosaka tapikia, Ata Koti ipi hákasa unihaeaka rekeasimo, Kereso ipiaki kataka marekea risia aporo hinamoane Kotiaaki kakakosapo.

<sup>25</sup> Asiamo Kereso ipi unihaeaka reke yunu suane epo korakemo finiraka marakoraka rekeakosakipoko ipi unihaeaka rekenapo.

<sup>26</sup> Yunu suane marakoraka rukua mosaka tapikia yunu kesekeane rukua mosaka tapiakosane kura ayapo. Kurane Keresomo rukua mosaka tapiakosapo.

<sup>27</sup> Arirakano Kotimo sawia popasane oyapo. Kotimo someraka, "Makata su Keresomo ipi rukua mosaka tapiakosapo. Ipi makata su unihaeaka asekea rekeakosapo," aíyaka Kotimo maresapo. Kotimo maresasamo Yasumo Kotiane marokehokosafapo. (*Buk Song 8:6*)

<sup>28</sup> Asiamo Keresomo ipi yunu suane marokeraka makata su unihaeaka asekea area maiya amo, epo Kotiaaki someraka, "Atao, ano soko nōmo asekea rekeanie," aihokosapo. Airakano Kotimo Keresoane soko, makata suane soko, epo ipi hákasa kakaro unihaeaka asekea rekeakosapo.

<sup>29</sup> Arirakano hauaka wo aporo kusuapoko re aporo metakira hitafe risiane hea tapukumurirkasupo. Yasu kusua maturikia taesane nōmo kotafe some kasa satiki ane, aporo hea tapukumurirkasupo. Asiāne aporo kusua maturikia taehoanafonosa ane, ipoko aporo hitafe risia marirkano hea tapukumuriranare?

<sup>30</sup> Isu tarira aporomo Keresopoko rakiraka risikino, aporo metakiramo isu mokoatikirakanapo. Aíyaka Keresoaki kataka marekea rakiraka risikino, ipu isu mokoatikirakanare?

<sup>31</sup> Hameo, maiya suamo nōmo someraka, "Pipu ano rusua kukusare?" Aíyaka nōmo kakaro somerakanapo. Repo Unihae Yasu Keresoaki kataka marekea rakiraka risikino asekea ano seserakanapo. Aíyaka nōmo kakaro somerakanapo.

<sup>32</sup> Asiamo Kotimo aporo kusua maturikia taehokosapo. Aíyaka Kotimo some kasane nōmo some kasapo. Efesase taonea someane nōmo some karakano, Efesase aporoamo ano makotesafapo. Efesase taonea ano rea maiya amo aporo irirasamo ano mokoatikirakanapo. Kotimo aporo kusua maturikia taehoanafonosa satiki, yunu aporomo ano mokoatikirakanapo. Arirakano aporo metakiramo someraka, "Aporo hinamo kusuane maturikia taehokosafapo. Isu maiya wakasema risina kukua fahokosapo. Asiasamo pipu yia isiaipo kaumo hemakapusuané kekemarakaka makata nakosane soko, he watikisane soko, hemakapukua nakosapo," airapo. (*Aisaia 22:13*)

<sup>33</sup> Asiamo repo hasaka hemakapukupo. Pipu yia hasaka hemakapurapaka mahoperaka somerane kakimakopo. Koteaka rea aporoane ipi aporo tákane watikiaka reasamo eane kirimarakaka, tati hakás watikiaka risikiakosapo.

<sup>34</sup> Anapaka hasaka hemakapusuane metakarikia, koteaka ereketaeraka hemakapukua risikianie. Makata watikisane metakarinie. Repo metakiramo Kotiane kakaro hemakapurakanafapo. Asiamo re kaíyahoasimo nōmo someaka poparakanapo.

*Kau maturikia taehokosane oyapo.*

<sup>35</sup> Repo aporo metakiramo someraka, "Aporo kusuane mayíka maturikia taehokosare? Maturikia taerakano kau masia maka hitafehokosare?"

<sup>36</sup> Aíyaka himeteaka somehokopo. Repo makata mano hae hauaka kokomaresane, hae kauane fana toreraka, namo pauaka herapo.

<sup>37</sup> Hauaka kokomarerane hae hákasa kokomarerapo. Makata hae hauaka kokomaresa yine pauaka herafapo. Makata hae kokomaresane witi hae soko metao, makata hae meta soko metao, ane toreraka oto kuyaki pauaka herapo.

<sup>38</sup> Asiamo witi haeaki witi oto kuane, Kotimo ipí hemakapukua karápo. Witi haeaki witi ipí oto kuane karápo. Sinima haeaki sinima ipí oto kuane karápo. Ayíáka makata hae sua ipí ku oto ayíáka kekepo kekepoaka karápo.

<sup>39</sup> Arirakano makata hitafe arisiane su kauane kekepopo. Aporomano kau haku, saro kau haku, mena kau haku, pokoa kau haku, ayíáka makata su kauane kekepopo.

<sup>40</sup> Arirakano ti yapura makata faenane metakira haku kekepo risikinapo. Hauaka wo soko makata metakira haku risikinapo. Makata kotesane ti yapura makata kotesane hakupo. Hauaka wo makata kotesane hakupo.

<sup>41</sup> Sere maiyamo ipí faenane hakupo. Ere maiyamo ipí faenane hakupo. Ti makatamo ipí faenane soko hakupo. Ti makata hakásá yine faenane kekepo kekepoaka risikinapo.

<sup>42</sup> Asia ayíáka aporo kusua maturikia taehokosa kauane asiapo. Kusua hauaka amarerane kau torenapo. Maturikia taena kauane kakaro torenafapo.

<sup>43</sup> Asiamo aporo kau kusua hauaka amarerane yano motosa kára kakenafapo. Arirakano maturikia taena kauane yano motosa kára kakenapo. Kusua hauaka amarerane kau wakapu fasapo. Arirakano maturikia taehokosa kauane wakapu rekenapo.

<sup>44</sup> Asiamo aporo kusua hauaka amarerane hauaka omo menapo. Maturikia taehokosa kauane homo menapo. Hauaka omo himuha hitafe rera kauane hakureapo. Homo hitafe rera kauane hakureapo.

<sup>45</sup> Arirakano Kotimo sawia popasane oyapo. "Aporo fana rea Atameaki Kotimo himuha karakano e hitaferaka reapo," aiyaka popahoareapo. Arirakano Yasu apororaka pekea\* e kusuane maturikia taerakano, hitaferaka yaiya rerane aporoaki epo kasapo. (Stat 2:7)

<sup>46</sup> Arirakano aporo hauaka wo hitafe rekeasimo, hauaka omo kauane Kotimo fana aporoaki kasapo. Arirakano keseke Hepene yapura yaiya rekeasimo, ho menane kakakosapo.

<sup>47</sup> Aporo fana Atameane Kotimo ororo maka rakisiapo. Rakisiasamo e hauaka aporopo. Arirakano aporo keseke pesane hepene yapunaka pesapo.

<sup>48</sup> Asiamo aporo fana rea ayíáka, isu hauaka aporomano su ayíáka risikinapo. Arirakano aporo hepene yapura hiakosane hepene yapunaka pesa aporo rea ayíáka risikiakosapo.

<sup>49</sup> Asiamo isu aporomano hauaka maka rakisia aporoane hakásá yine aseraka sikiraka risikinapo. Ayíáka keseke isu hepene yapunaka pesa aporo hakásá yine aseraka sikiraka risikiakosapo.

<sup>50</sup> Hameo, kepoane oyapo. Hauaka omo kauane soko, yapiane soko Koti unihaea rea hauaka á paohokosafapo. Hauaka wo kau torenane yaiya rera akiyaki paohokosafapo.

<sup>51</sup> Kaisie. Fana mahamesane yumo nōmo somerakanapo. Isu su kukusafapo. Kukunafonosa nine isu su kauuu sanasiraka hakuhokosapo.

<sup>52</sup> Kotimo pikoro rurakarakano aseane hi kopeanayiamo kauane foakaya hakusekeno aseakosapo. Pikoro rurakarakano, aporo kusuane hitafe yaiya risikiásimo maturikia taehokosapo. Arirakano aporo hitafe hauaka wo risiane soko, kauane hakurakano aseakosapo.

<sup>53</sup> Torena kauane metakarikia, torehoanafonona kau kotesane mokoakosapo. Kau kusuane metakarikia hitafe yaiya rekeakosa kauane mokoakosapo.

<sup>54</sup> Torena kauane mamarakateraka, torehoanafonona kau kotesa amora maiya amo, Kotimo sawia popasane ayiakakosapo. Aiyaka popasane oyapo. "Kurane mafaraka kakaro rukua mosaka tapisiapo.

<sup>55</sup> Asiamo kura wakapuane Kotimo mafasasamo ma rekenare? Kura namonane Kotimo mafasasamo ma rekenare? Rekenafapo." Aiyaka Kotimo sawia popahoareapo. (Aisaia 25:8; Hosea 13:14)

\* 15:45: Yasuaki Kotimo hitafe rerane kasasamo, Yasuane Atame meta, airapo.

<sup>56</sup> Isiapo watikiaka rakisiakipoko kura namona ayapo. Kotimo somemané motosasamo isiapo makata watikisane mafekemanapo.

<sup>57</sup> Asiamo kurane Unihae Yasu Keresomo mafasasamo makata watikisane soko, kurane soko, isiapo rukua mosaka tapirapo. Akipoko isiapo Kotiaki suserakanapo.

<sup>58</sup> Hameo, namoraka wasuaka rukupo. Keresoa paoraka himu hakásaraka risikianie. Maiya suamo Unihae Kotipoko kára rakinie. Keseke re kusua maturikia taehokosasamo, yumo repo makata arakirane, Kotimo aseraka, makatane nenakamaka makatapo, ai-hokosafapo.

## 16

*Keresoa paosa aporo ararehokosakipoko mone taenane oyapo.*

<sup>1</sup> Keresoa paosa aporo ararehokosakipoko mone taenane repo anoaki kaisiane, nōmo reaki some paripurakanapo. Keresoa paosa aporo hinamo Karesia taonea risiaki nōmo someraka, "Yarusarame sitia Keresoa paosa aporo hinamoane arareraka mone kakako taehoanie." Aiyaka nōmo iaki somesane repo kaikia, repo soko ayiáka taehoanie.

<sup>2</sup> Yatipinumo maiya suamo repo namina suamo hakasa hakasaraka mone taehoanie. Soko suamo makata rakisiakipoko mone wakasema maraka, mone wakasema taehoanie. Mone kára moraka, mone kára taehoanie. Taerakano mone su taesane sarimarakaka keanie. Ano apera maiya amo, mone sarimarakaka keane siahoasifareapo. Ano peasiraka yumo keanie.

<sup>3</sup> Arirakano mone taesane Yarusarame sitia mokoa pusimo, aporo kotesane repo murikimokoanie. Asiamo ano peraka aporo repo murikimosamo mone mokoa pusimo, nōmo iaki sawi poparaka kakakosapo. Sawiane poparaka úyaka popahokosapo. "Korini aporoane kotesasamo ipu Yarusarame aporo re ararehoko apura ayapo. Asiamo iane perakan, repo arareraka pasimokoanie." Aiyaka nōmo Yarusarame aporoaki popahokosapo.

<sup>4</sup> Asiamo ano soko purakanone ane, i soko anoyaki hakásä pukusapo.

*"Nōmo ayiakosapo." Aiyaka Poremo somesane oyapo.*

<sup>5</sup> Ano Masetónia hauaka pukua, Masetónia hauaka aeyaka repo taonea peakosapo. Peraka Masetónia hauaka kakaro rekeakosafapo.

<sup>6</sup> Asiáne repo taonea maiya wakasemamo reke soko metao, yaki hakásamo reke soko metao ayiáka rekeanarakapo. Ano himeteripo. A nina ano hauaka meta pukusaporakan, koteaka pukusakipoko, repo an ararehoane siahoasireapo.

<sup>7</sup> Ano pekea foaka paripukusane maiya wakasemamo re aseako hisiripo. Unihae Kotimo aorakan, maiya káramo ano reyaki rekeakosapo.

<sup>8</sup> Arirakano Penekose hokono keakosakipoko ano Efesase taone yia rekeakosapo.

<sup>9</sup> Kotimo some kakasimo ikia koro asiáne Kotimo ropakamasapo. Asiamo nōmo epoko some karakan, aporo yakaimo kairakanapo. Arirakano aporo yakai metakiramo Kotimo someane hisiraka ipi rakirane matasorakanapo.

<sup>10</sup> Arirakano Korini aporo repo taonea Timotiane perakan, repo eane pasimaka makotehoanie. Asiamo Unihae Kotipoko nōmo arakira ayiáka, epo soko ayiáka raki-rakanapo.

<sup>11</sup> Repo eane asekeea makefekopó.\* E ano area kimisi aperamo koteaka peasimo repo eane ararehoanie. Ararerakan, e seseraka peraka Keresoa aporo mae metakirayaki perakarihoamo ano kau rekenapo.

<sup>12</sup> Isiapo Keresoa paosa aporo mae Apóroseaki nōmo someraka, "Keresoa paosa aporo mae metakirayaki, Korini taonea aporo aseako kimisi punie." Aisa nine e repo apea yumo pukusane seserakanafapo. Keseke peariraka hemakapuraka e peakosaposapo.

*Poremo ayapa aisane oyapo.*

<sup>13</sup> Makata watikisa fasereperapaka wakakoraka risikiakopo. Kotiaki yaiya himu hakásaraka hemakapurua rakiraka risikianie. Epoko paroaka wakapuaka risikianie.

<sup>14</sup> Repo rakiraka aporo metane himu tumurumo hemakapurua rakinie.

<sup>15</sup> Hameo, Setéfanase ipi asea soko, ipi hokosa soko, Akaá hauaka á i suane fanaraka Yasuaki risikiako parisapo. Yumo Keresoa paosa aporo hinamo metakirane ararehoko ipu rakiraka risikinapo.

<sup>16</sup> Asiamo hameo, nōmo reaki paroaka somerakanapo. Setéfanasemo makata rakira ayiáka eyaki hakásä makata rakira aporomo soko, ayiáka rakirasamo ipu someane soko kaiyinie. Arirakano i suane ararehoanie.

\* **16:11:** Timotiane aporo sisima rekeanafononasamo, aporo sisima metakiramo eane makeferaka asekepayasapo.

<sup>17</sup> Setéfanase soko, Fotunétase soko, Akaíkase soko i kimisi perakano asekea ano seseripo. Reyaki hakása rekeanafonoraka aporo isiane pekea ano ararerakano asekea seseripo.

<sup>18</sup> Ipu re masesena ayiáka, ano soko maseserakanapo. Asiamo iane, "Aporo kotesapo," aihoanie.

<sup>19</sup> Arirakano Keresoa paosa aporo Esea hauaka á risiamo re hemakapurakanapakae. Akuwíra soko, ipi asea Pírisíra soko, ipu apea Keresoa paosa aporo sarimasamo soko, ipu suamo reane hemakapurakanapakae. Reane Unihae Keresoa paosasamo ipu hemakapurakanapakae.

<sup>20</sup> Keresoa paosa aporo mae hauaka wo risiamo soko, re hemakapurakanapakae. Repo soko, Keresoa paosa aporo maeane kára hemakapukua, namina yia hokono mokoanie.

<sup>21</sup> Nōmo hokonomo sawi wakasema one poparaka, "Nōmo re hemakapurakaripo," aiyaka ano Poremo poparakanapo.<sup>†</sup>

<sup>22</sup> Arirakano repo metakiramo Unihae Kotiaki himumo hemakapunafonorakano, aporoane Kotiyaki yaiya rekeakosafapo. Arirakano Unihae Yasu paripeakosane nōmo hemakapuraka, "Yasu ne foaka peanie," aiyaka hemakapurakaripo.

<sup>23</sup> Unihae Yasumo re yaku ararehoasimo nōmo hemakapurakaripo.

<sup>24</sup> Re soko, ano soko, Yasu Keresoaki patera asekea risiasamo, nōmo himu tumurumo re kára hemakapukua rekenapo.

---

<sup>†</sup> **16:21:** Sawi one popasa suane Poremo ipi hokonomo popasafapo. Epo someane aporo metamo kaikia popasapo. Arirakano sawi poparaka fahoramo, sawi fari atura wakasema popasane Poremo ipi hokonomo popasapo.

## 2 Korini

### 2 Korini sawi one mahemakapukusa someane oyapo.

Yasu hepene yapura hisiakipoko keremisi tuaneti fae su (25) faraka, Poremo Keresoa paosa aporo hinamo Korini taonea risiaki sawi fana popasapo. Ipu makata watikiaka rakisiane Poremo maropohoko hemakapusuasamo sawi ane popasapo.

Wakesema nina, iane maiyaka risikinarakapo, aiyaka Poremo hemakapuraka, Taetasemo aseako pusiesapo. Taetase pukua Poreane Masetónia hauaka á reakipoko, Taetase paripesapo. Taetase peraka Poreaki someraka, "Korini aporomo namina makata watikisane maroposapo. Asiāne aporo metakiramo Poremo someane koarentera, kotafe tarira aporomo someane kaikia kekemaraka risikinapo," aisapo.

Asiāmo Kotimo Poreane tarira apororaka rakisimo murikimasane Poremo ipi paroaka somesapo. Korini aporo hinamomo Yasuane hemakapusimo Poremo fanaraka some kasapo. "Kotafe tarira aporomo someane repo kakimakopo," aiyaka Poremo somesapo.

Arirakan Poremo some meta soko sawi wo popasapo. Yutía hauaka á Keresoa paosa aporo hinamo makata forokoa risiaki repo mone sarimaraka kakanie, aiyaka Poremo sawia popasapo.

### 2 Korini sawia some kepo parakuraka popasane oyapo.

1:1-11 Poremo Korini aporo hinamoaki sawi one kepomarekeea poparaka Kotiaki sus-esapo.

1:12-2:4 Poremo someane ereketae susu somerapo.

2:5-11 Watikiaka rakisia aporoane repo fanasisasamo pasimakanie.

2:12-17 Ano peakosaposane makata fasere perakano ano pesafapo.

3:1-4:16 Kotimo fana someaka masane Kotimo kawe someaka masamo marokesapo.

5:1-10 Isu hepene yapura hinaka kau kawe kotesa mokoakosapo.

5:11-6:10 Poremo makata rakirane aporo hinamomo Kotiaki hemakapusimo some karapo.

6:11-7:4 Aporomo ipi hokosaki somera ayiáka Poremo iaki ayiáka somerapo.

7:5-16 Poremo Taetase aseraka sesesapo.

8:1-9:15 Kotiane hemakapurua risike makata forokoa risia aporoane arareraka mone kakanie, aisapo.

10:1-13:10 Kotafe tarira aporoane Poremo marokesapo.

13:11-14 Poremo ayapasapo.

*Keresoa paosa aporo hinamo Korini taonea risiaki Poremo sawi meta keseke poparaka makesane oyapo.*

<sup>1</sup> Kotimo hemakapusua aeyaka ano Pore Yasu Keresomo tarira aporo rekeasimo murikimasane anopo. Nōmo soko, isiapo Keresoa paosa aporo mae Timotimo soko, etapo reane hemakapurakanapo. Re Yasu Keresoa paosa aporo hinamo Korini taonea risiane soko, Kotimo aporo hinamo Akaia hauaka á risiane soko, re suaki nōmo sawi one poparaka makerakanapo.

<sup>2</sup> Isiapo Ata Kotipe Unihae Yasu Kereso tetapō reaki yaku ararenane soko, auaraka risirané soko, yaiya kakasimo hemakapurakaripo.

#### *Kotiaki Poremo susesane oyapo.*

<sup>3</sup> Isiapo Unihae Yasu Keresomo ipi Atane Koti ipipo. Kamenakaraka hemakapura kepoane soko Koti ipipo. Isu kára himu nekea umíraka risikino, isu mapirahoasimo kamenakaraka some kará kepoane soko Koti ipipo. Asiāmo isiapo Kotiaki kekerehoanie.

<sup>4</sup> Makata umisa isu kaua fasereperakano isu himu kára nakohoamo Kotimo isuwan kamenakaraka arareraka mawakapuraka rekenapo. Asiasamo aporo meta kaua makata umisa fasereperakano, isiapo aseraka kamenakaraka ararehoane siahoasireapo. Asiāmo Kotimo isu kamenakaraka araresa ayiáka, aporo metane soko, isiapo ayiáka kamenakaraka ararenapo.

<sup>5</sup> Yasu Kereso kára kau teraka himu nesa ayiáka, isu soko kára kau teraka himu nekea risirapo. Isiapo Yasuane kekemarakano aporomo isu mokoatikinapo. Asiasamo Yasu Keresomo isu kára kamenakaraka ararenapo.

<sup>6</sup> Arirakan aporomo isu mokoatikirakano, mokoatikina umisane isiapo mokoa risikinapo. Re arareraka arirakan Kotimo re mafasikia ayiakasimo umisane isiapo mokoa risikinapo. Mokoa risikino Kotimo isu ararenapo. Ararerakan repo asekea úyaka hemakapunie. "Tarira aporoane mokoatikirakano Kotimo i ararena ayiáka, aporomo

isu soko hakása nineraka mokoatikirakano, Kotimo isu soko ararehokosapo." Aiyaka hemakapukua himu mahisinane metakarikia himu mapiraraka hemakapukua risikianie.

<sup>7</sup> Asiamo isu kau teraka himu nekea risikino, Yasu Keresomo isu kamenakaraka ararena ayíáka, re soko kau teraka himu nekea risikino, epo re soko kamenakaraka ararehokosapo. Asiamo repo Kotiaki yaiya hemakapuraka risikiasimo hemakapurakaripo. Hemakapurane isiapo metakarirakanafapo.

<sup>8</sup> Keresoa paosa aporo maeo, Esea hauaka á aporo metakiramo isu kára mokoatikisane re himeteroa risirapaka, repo kaiyisimo sawi one poparakanapo. Arirakano mokoatikisane itifisiafapo. Kára mokoatikisapo. Kára mokoatikisasamo isiapo maiyane keposahopo.

<sup>9</sup> Isiapo isina hemakapuraka, "Maiya omo isiapo maiyane farakanapo," aiyaka isiapo hemakapusuapo. Aiyaka hemakapuraka mokoatikina umisane marirakano faserepesare? "Isiapo isina wakapuane siahoasifareapo. Kotimo ipi wakapu hákasamo siahoasireapo. Kotimo aporo kusua maturikia taenasasamo ipi wakapu hákasane siareapo." Alhoasimo makata umisa kára faserepesapo.

<sup>10</sup> Isu mokoatikisa kukufunusa nine Kotimo isu kára arareraka mafasisiapo. Mafasirakanano isiapo hemakapuraka, "Efera hunia soko Kotimo isu arareraka mafasiakosapo," aiyaka hemakapurakanapo.

<sup>11</sup> Arirakano repo isupoko farimaka Kotiaki kurikuriana amo Kotimo isu ararerakanapo. Kotimo ararehoasimo hemakapukua, repo soko aporo hinamo metakiramo kurikurakanano, Kotimo kaikia isu makoterakanapo. Makoterakano aporo hinamo yakaimo asekeia Kotiaki kára susehokosapo.

*Poremo someraka, "Ano peakosapo," aisa nine parisane kepoane oyapo.*

<sup>12</sup> Nōmo some one reakti kakaro somerakaripo.\* Ano Keresoa paohoanafonosa aporoyaki reane soko, re Keresoa paosa aporoyaki ano reane soko, maiya suamo ano koteaka reapo. Asiamo nena aporomo hemakapusuane nōmo kekemasafapo. Kotimo wakapumo ano yaku arareraka, makata aina kotesa soko ereketaenane soko, anoaki kasapo. Asiamo Koti hikumisia ano reyaki kakaro koteaka reapo. Koteaka reke nōmo himumo hemakapuraka, "Ne siaraka rekenapo." Aiyaka hemakapurakarakan koteaka reane repo kaiyisimo nōmo mahamerakanafapo.

<sup>13-14</sup> Sawi one repo menoraka hemakapusimo nōmo reakti hufitaeraka poparakanapo. Mahamekeea poparakanafapo. Yumo nōmo hemakapusuane repo wakasema hemakapukua, keseke repo koteaka suane hemakapusimo nōmo hemakapurakaripo. Nōmo hemakapuraka Unihae Yasu pariapera maiya amo nōmo reakti sesehokosa ayíáka repo anoaki ayíáka sesehoasimo hemakapurakaripo.

<sup>15</sup> Repo anoaki seseraka hemakapukusane nōmo hemakapukua someraka, "Re makotehoko yape tetá repo taonea ano peakosapo.

<sup>16</sup> Aiyaka Masetónia hauaka á pukusakipoko repo taonea ano pekea, wakasema nina aeyaka metakarikia, Masetónia hauaka á pukua wakasema nina, pariapera maiya amo, repo taonea efera hunia pekea, wakasema rekeakosapo. Nina Yutía hauaka pukusakipoko repo ano ararehoasimo maiya wakasema rekeakosapo." Aiyaka nōmo hemakapukua somesapo.

<sup>17</sup> Aiyaka somesane peanafonorakano, repo metakiramo someraka, "Poremo himu tetá hemakapurapo," aisapakae. Asiamo repo hemakapusuane, ano ní makotehoko peako ayireare? Repo hemakapusuane, nōmo kotafe horapo, aiyaka hemakapurakanare? Arirakano repo hemakapusuane, maiya metamo nōmo aoraka, maiya metamo nōmo waeraka, airare? Wae, nōmo airafapo.

<sup>18</sup> Arirakano Kotimo ipi makata ayiakakosaposane kakaro ainapo. Aina ayíáka nōmo soko kakaro somerapo. Nōmo aorane himu tetáraka hemakapukua aorafapo. Nōmo aorane waehoko aorafapo.

<sup>19</sup> Nōmo soko, Saerasemo soko, Timotimo soko, isiapo Kotimo hokosa Yasu Keresoane reakti fana some kasapo. Arirakano Yasumo some tetáraka somerafapo. Epo aoraka, waehoko aorafapo. Kotimo somerakano Yasumo aorapo.

<sup>20</sup> Asiamo Kotimo ayiakakosapoaka someaka motosane kepoane Yasu ipipo. Ipsasamo isiapo Yasuaki kataka marekea risike Kotiaki kekerena maiya amo kakaroripo, airapo.

<sup>21</sup> Isiapo soko, repo soko, Keresoaki himu hakásaraka hemakapukua paroaka risikiasimo, Kotimo isuaki paroaka risirane kasapo. Isiapo rakirane soko, epo isuaki rakinie, aiyaka maresapo.

\* **1:12:** Pore peakosapo aisane peanafonorakano Korini aporomo Pore hukururaka someraka, "Kotafe somera aporoane nepo." Airakano Pore parisa kepoane iaki somesapo.

<sup>22</sup> Isu suane epo ipi menapo, aiyaka isiaipo hemakapusimo saro senaki patena aiyáka isuane epo ipi máka motoraka, Ho Kotesa isu himua maresa ayapo. Kotimo aiyakakos-aposane isiaipo kakarorakae aiyaka hemakapusimo, Ho Kotesa fana maresa ayapo.

<sup>23</sup> Arirakano Kotimo ano himu aserasamo epo kaiyisimo nōmo kakaro somerakanapo. Repo makata aina watikisane nōmo maropohokosakipoko ano Korini taonea peako asiāne repo mahisinapaka ano pesafapo.

<sup>24</sup> Asiāne repo Kotiāki himu hakásaraka hemakapurane paroaka risikinapo. Asiamo isiaipo reane mawakasemarako somerakanafapo. Re seseaka risikiasimo isiaipo ararehoko hemakapuraka somerakanapo.

## 2

<sup>1</sup> Fana ano pesa maiya amo, repo makata watikisane nōmo maroporakanre kára kaíyaso. Asiamo nōmo re ararehoko peako asiāne, re efera hunia mahisinapaka repo taonea ano pesafapo.

<sup>2</sup> Asiāne ano pekeia re maroporakanone repo anoaki mahisihokosapo. Mahisirakano epamo ano masesehokosare? Re mahisiraka risike repo ano masesehokosafapo.

<sup>3</sup> Repo ano masesehoafunusa nine, asiāne repo taonea ano peraka aseane re watiki-aka risikino asekea, ano himu mahisihoa funureapo. Anapaka repo makata watikisane maropohoasimo, nōmo reaki sawi poparaka makesapo. Ano seseraka rekeno, re soko seseraka risikiakosapo. Aiyaka nōmo hemakapurakaripo.

<sup>4</sup> Arirakano fana ano himu nekea hiripuyaki nōmo reaki sawi poparaka makesapo. Re himu mahisihoa simo nōmo reaki sawi poparaka makesafapo. Poremo isuaki himu tumurumo hemakpureapo, aihoasimo nōmo reaki sawi poparaka makesapo.

*"Watikiaka rakisia aporoane fanasisane metakarinie," aisane oyapo.*

<sup>5</sup> Aporo hakásá metamo reaki makata umisa karakano asekea ano mahisirakanapo. Mahisinane ano hakasa mahisirakanafapo. Re soko mahisirakanapakae. Asiāne nōmo someane kára somehokosafapo.

<sup>6</sup> Asiamo makata umisa kasá aporoane repo suamo e fanasisane sia fanasisapo.

<sup>7</sup> Asiamo pipu yumo fanasisane metakarikia eaki someraka, "Makata watikiaka rakisiāne fanasisasamo pipu yumo mahisise fasapo," aihoanie. Epo kára himu nekea hemakapurane káranapaka e ararehoanie.

<sup>8</sup> Asiamo repo e hokono maka eaki someraka, "Isiapo né kára himu tumurumo hemakapurakanapo." Aihoanie.

<sup>9</sup> Fana nōmo reaki sawi poparaka makesane, nōmo some suane repo kakimarakari-hoamo aseako poparaka makesapo.

<sup>10</sup> Aporo metamo reaki watikiaka rakirakano asekea repo hisisane metakarikia watikisane mamerarurakano, nōmo soko epo watikisane mamerarurakanapo. Re seseraka risikiasimo Kereso hikumisi nenemea mamerarurakanapo. Aporomo watikiaka rakiraka tiki rakirakao, watikiaka rakisia nine nōmo mamerarurakanapo.

<sup>11</sup> Isu yaiya hisiraka risikiasimo Satanemo hkokakahoamo, aporo watikisane maroporaka mafarkanapapo. Satanemo ipi makata aina watikisane isiaipo asekea hemakapuraseamo, epo isu asekea reke mokoatikinapaka, aporo watikisane maroporaka mafarkanapapo. Arirakano Satanemo ipi hemakapukua rakirane isiaipo himeterafaraka etenapaka isiaipo isina ainane hemakapukua asekea risikinapo.

*Toróase taonea Pore pusuaney oyapo.*

<sup>12</sup> Toróase taonea ano pusua maiya amo, aporomo Keresoane hemakapusimo some kotesane nōmo some kakako pusuapo. Pukua ano Toróase taonea pauraka aseane, ikia koro mapirisia ropaka amara aiyáka some kotesane some kakasimo ikia koro Kotimo ropakamarakanoso asesapo.

<sup>13</sup> Asiāne nōmo Kereso paosa aporo mae Taetase ane nōmo kope pukua, e asekeanafonorakano nōmo someraka, "E masiarakapo." Aiyaka kára hemakapuraka kope pukua Toróase aporo suaki ayaparaka i metakarikia, Masetónia hauaka á pusuapo.

*Kotimo Poreane maseserakanre Poremo Kotiāki kekeresane oyapo\**

<sup>14</sup> Isiapo suamo Kotiāki himu hakásaraka hemakapukua risiasamo isiaipo Kotiāki suserakanapo. Isu Keresoaki katak marekea risia aporoane Kotimo karikia purakanapo. Karikia puraka Kotimo Sataneane hurutapikia marokeraka wawaeraka apura aiyáka, isu karikia purakanapo. Asiamo aporo hinamomo Keresoane hemakapusimo isiaipo Yasu Keresoane some kape purakanapo. Asiamo Yasu Keresomo someane isiaipo some akarane makata wape yamona asiapo.

\* <sup>2:13:</sup> 14-17 Kotimo Poreane masesesha kepoane 2 Korini 7:5-7 á menohoanie.

<sup>15</sup> Asiamo aporomo makata wape yamona Kotimo yamohoasimo paikia akará ayíáka, Keresomo wape yamonane isupo. Wape yamona ayíáka isiaipo Keresomo someane some karakanapo. Some karakano aporo metakiramo someane kakimarapo. Arirakano aporo metakiramo koretaenapo.

<sup>16</sup> Koretaena aporomo isiaipo some kasane, ipu kaikia someraka, "Some ane makata kusua ikiki yamona ayíáka ikiki yamoripo." Aiyaka hemakapusua aporoane kakaro kukusapo. Arirakano kakimara aporomo isiaipo some kasane ipu kaikia someraka, "Someane isiaipo kairaka, makata wape yamona ayíáka wape yamoripo." Aiyaka hemakapusua aporoane kakaro yaiya risikiakosapo. Arirakano someane some kakakosane epamo siaraka some karáre?<sup>†</sup>

<sup>17</sup> Arirakano aporo metakiramo mone mokoakosakipoko Kotimo someane some karaka, pisinisi arakira ayíáka some kape purapo. Ipu arakira ayíáka, isiaipo mone mokoakosakipoko Kotimo someane ayíáka some karakanafapo. Kotimo isu murikimaka some kakako pusierakano, Koti hikumisia isiaipo Keresoaki himu hakásaraka hemakapukua ayíáka, kakaro koteaka ereketae some karápo.

### 3

*Kotimo kawe someaka masane isiaipo kekemarakaka Kotipoko rakiraka risiane oyapo.*

<sup>1</sup> Isiaipo isina yano motosane makárahokosakipoko, isiaipo reaki sawi poparakanafapo. Isiaipo reane hokokerakanafapo. Arirakano Keresoa paosa aporo metakiramo ipu namina yano motosa makárasane sawia popasa maka peraka reaki someraka, "Isiaipo someane kaiyinie." Aiyaka reaki sawiane tarikia, anakano repo ipu someane kaikia seserakan asekeea, i apura maiya amo ipu reaki someraka, "Isiaipo koteaka rakisiapo. Aiyaka repo sawia poparaka isuaki makanie." Aiyaka aporoamo sawi popasane maka taripe purapo. Asiamo ipu arakira ayíáka isiaipo ayíáka rakirafapo. Isiaipo isina yano motosa makárahokosakipoko sawi aporo metamo popasane reaki tariako maka perafapo.

<sup>2</sup> Isiaipo Yasuane some kasasamo, re Yasu Keresoaki risikiako parisapo. Asiasamo isiaipo makata rakirane aporo suamo hemakapusimo re Keresoa paosane asekeasimoripo. Asiamo isiaipo sawi popana ayíáka popasane re Keresoa paosa ayapo. Asiamo isiaipo sawi popasane maka purafapo. Asiamo isiaipo hokonomo sawi popasane maka perafaraka, isiaipo himu hemakapurane reyaki reke, reane isiaipo sawia popana ayíáka popasapo.

<sup>3</sup> Isiaipo makata rakisia aeyaka repo Yasu Keresoane kekemarakakanapo. Asiasamo Keresomo sawi popasa ásiáne repo. Sawi ane Yasu Keresomo ekea popasafapo.\* Aporo hinamo himua popana ayíáka yaiya rera Kotiamo Ho Kotesa re himua murisia ayapo.

<sup>4</sup> Asiamo isiaipo some amo kepoane oyapo. Kotimo isu murikimasasamo isiaipo rakirapo. Isiaipo Yasu Keresoaki kataka marekea risike, Kotiaki himu hakásaraka hemakapukua risike, isu mapirarako risike somerakanapo.

<sup>5</sup> Isiaipo koteaka rakiako, isiaipo isina hemakapusua aeyaka isiaipo wakapumo siahosi-fareapo. Isiaipo siaraka rakisimo Kotimo wakapuanne isuaki karápo. Karakano isiaipo koteaka rakirakanapo.

<sup>6</sup> Kotimo ipi kawe someaka masane isiaipo some kakasimo epo isu murikimokoa murireapo. Ipi hemakapusua kawe someaka masane, fana somemané motokoa popasa ayíáka popasafapo. Kawe yumo Kotimo Ho Kotesane isu himua marekea, Ho Kotesamo ipi yiamo isuaki somerapo. Arirakano fana Kotimo somemané popasane aporomo kekemahoanafonorakanapó, aporoane kukusapo, aiyaka somemané fana motoreapo. Arirakano Ho Kotesamo aporo mafareahoko ararenapo.

<sup>7</sup> Arirakano fana somemané motosane Kotimo ekea poparaka Moseseki kayereapo. Kasa maiya amo, maiya wakasemamo Moseseki hikumisia faesane reasasamo Isiraya aporomo aseraka, hi kakanoraka asekeasifareapo, aisapo. Arirakano somemané Moseseki kasa maiya amo Mosesemmo hikumisia faesane wakasema farape pukua, keseke faesane kakaro fasapo. Somemané motosa suane aporomo kekemahoanafonorakanone, aporo ane kukusapo, aiyaka popasapo. Ásiáne somemanéne kasá maiya amo Kotimo faesayaki kasápo.

<sup>8</sup> Arirakano Kotimo Ho Kotesa kasá maiya amo Kotimo wakapu soko faesa namo kakaro kára kasapo. Somemanemo wakapuanne soko, faesane soko, wakasemapo. Arirakano Ho Kotesamo wakapuanne soko, faesane soko, namo kakaro kárapo. Somemané ane Ho Kotesamo marokesapo.

† 2:16: Poremo iaki makata akai kaisiane, epo some pari kasane, repo hemakapusakipoko 2 Korini 3:5 á menohoanie.

\* 3:3: Kotimo fana someaka masa Moseseki kasane ekea popasapo.

<sup>9</sup> Asiamo Kotimo fana someaka masa maiya amo aporoaki someraka, "Ní watikisapoko fanasihoko motoakosapo." Aiyaka Kotimo Moseseki somesa maiya amo faesayaki kasápo. Arirakano keseke Kotimo kawe someaka masa maiya amo aporoaki someraka, "Né maereketaerakanapo." Aiyaka Kotimo Ho Kotesa kasá maiya amo namo kakaro faesayaki kasápo.

<sup>10</sup> Kawe namo kakaro faesamo sesakereraka, fana faesane makokōrakanapo.

<sup>11</sup> Fana maiya wakasemamo fana someaka masamo faesa sesakereraka reane, keseke kokōrakanō keseke kawe someaka masamo kawe faesamo fahoanafonoraka namo kakaro faeraka sesakererakanapo.

<sup>12</sup> Kotimo isuaki kawe someaka masamo faesane fahoanafononasamo isu mapiraraka risikinapo.

<sup>13</sup> Arirakano mapiraraka arisia ayiáka, Moseseki mapiraraka reafapo. Moseseki hikumisi faesa fahokorakanō aporo hinamomo aseakohoamo, Mosesemo pasu yahanasa maka e hikumisia karotapisiaipo.

<sup>14</sup> Arirakano fana Isiraya aporomo Mosesemo somemané kaisia nine, ipu koteaka hemakapusuafapo. Koteaka hemakapunafonoraka ipu himu hemakapurane pasumo karotapisia ásiapo. Fana soko yumo soko, Kotimo fana someaka maraka sawia popasane ipu menoraka hemakapurakanafapo. Arirakano pasumo karotapisiane sakaremakasimo, aporo hinamomo Yasu Keresoaki himumo katakā marekea risikino, pasu yahanasamo karotapisia ayiáka himua karotapikia risiane Keresomo ipi sakaremasapo.

<sup>15</sup> Yasu Keresomo sakaremakasopoko asiane ipu Kotiaki himu hakásaraka hemakapunafonoraka Mosesemo somemané popasane aporomo pipu yia menosane merarunapo. Pasumo karotapisia ayiáka i himua karotapisiasamo ipu himumo sawi popasa kepoane hemakapurafapo.

<sup>16</sup> Ásiáne Keresoaki aporo hinamo metakira Unihae Keresoaki risikiako parirakano, pasu sakareamara ayiáka ipu himura karotapikia risiane sakaremarapo.

<sup>17</sup> Aporo hinamomo Unihaeaki risikiako parirakano, Ho Kotesamo i himua pasumo ayiáka karotapisiane sakaremakatenapo. Asiamo aporo hinamoane somemanemo tipura kesa asia risiane, Ho Kotesamo iane makokorotaesapo. Makokorotaerakanō aporoane seseraka risikiakosapo.

<sup>18</sup> Arirakano Unihaemo ipi faesamo isu ruraka isu ho piakae piakaerakanapo. E ipi area ayiáka risikiasimo ipi faesane isuaki karakanapo. Fana wakasema faeraka risiane, keseke kára faehoasimo Unihaemo rakirakanapo. Unihaemo ipi Ho Kotesamo rakiraka rekenapo.

## 4

*Kotimo some kotesa faesa ásiáne isiaipo some kakasimo, Kotimo isu murikimasane oyapo.*

<sup>1</sup> Kotimo isuaki yaku arareraka, epo ipi someane some kakasimo, isu murikimasapo. Asiasamo isiaipo Kotimo makata rakirane yaiya rakiraka risike isu himu fahokosafapo.

<sup>2</sup> Kotimo isuaki makata rakiniesane, makata kaíyasa rakirane soko, makata mahamekea rakirane soko, isiaipo metakarisiapo. Asiamo metakarisiane tau mahoperaka arakira ayiáka isiaipo rakirakanafapo. Kotimo someane isiaipo some karaka, sanasiraka kotafe hokoa some karakanafapo. Asiamo Koti hikumisia ipi someane isiaipo kakaro hufitaeraka some karakanapo. Some karakano aporo suamo kaikia, someane kakaroripo, aiyaka hemakapusimo, isiaipo kakaro some karakanapo.

<sup>3</sup> Aiyaka some karakano, aporo hinamo metakiramo kairaka someraka, "Someamo kepoane isu himeteripo." Aira aporo hinamoane Heao hauaka á pukusapo.

<sup>4</sup> Aiyaka somera aporo hinamoamo Kotimo someane kakimaraafapo. Kakimakanafonona aporo hinamoane, Satanemo i himua makatosapo. Makatosasamo ipu himumo Kotimo some kotesane kakaro hemakapurafapo. Yasu Keresoane Koti tati hakás yinesapo. Tetapó tati faesa kotesanes isiaipo some karakano, ipu hemakapukohoamo, himu hemakapurane hauaka omo unihae Satanemo makatosapo. Makatosasamo, Kotimo faesane ipu hemakapurafapo. Kotimo some kotesane soko ipu hemakapurafapo.

<sup>5</sup> Arirakano isiaipo isina yano motosane makáraraka some karáfapo. "Yasu Kereso ipi unihaeaka rekenapo," aiyaka isiaipo some karapo. Some karák aporo raipamo arakira ayiáka isiaipo repoko rakirakanapo. Isiaipo Yasu Keresoaki hemakapukua reaki some karakanapo.

<sup>6</sup> Arirakano hauaka one kepomaresa maiya amo Kotimo someraka, "Katosane faerasie." Aisa Kotiamo isu himua mafaesapo. Asiamo isiaipo hemakapuané, isiaipo Yasu Kereso asekeea Kotimo faesane soko, wakapuané soko aserapo.

*Poreane kára mokoatikisa nine Kotimo araresane oyapo.*

<sup>7</sup> Isiapo makata mahimunane akúa kerapo.\* Akú ane keseke potakahekewa watikihokosapo. Aina ayíáka Kotimo ipi Ho Kotesamo makata aina kotesane isu himua kesapo. Arirakano isu aporomano kauane keseke toreraka fahokosapo. Asiamo Kotimo hemakapuraka, aporo hinamo suamo asekea hemakapusimo Kotimo wakapuane soko, faesane soko, isu hauaka aporoaki karakanapo. Isiapo arakirane, isiapo ísina wakapu anaka rakirakanafapo. Kotimo wakapu anaka rakirakanapo.

<sup>8</sup> Kotimo wakapuane isuaki karakanano, aporo metakiramo isuaki yunuraka risike isuane mokoatikinapo. Asiáne Kotimo isu ararerakano ipu isu mahurutapisiafapo. Arirakano maiya metakiramo isuane kára hemakapukua mahimeteraka risiapo. Asiáne Kotimo isu ararerakano isu hurupesafapo.

<sup>9</sup> Arirakano aporo metakiramo isu ruko kekemaraka mokoatikirakano yia, Kotimo isu metakarisiafapo. Arirakano aporo metakiramo isu rusua hauaka warisiane kusuafapo. Asiáne Kotimo isu ararerakano, isu takahikia pusuapo.

<sup>10</sup> Asiamo Yasu makusua ayíáka, maiya suamo isu makukusakipoko aporo metakiramo isu mokoatikirakanapo. Yasu maturikia taerakano turikia pukua reasasamo, ipi wakapu-raka rerane isuaki karakanano, isu soko wakapuaka risikinapo.

<sup>11</sup> Maiya suamo isiapo Yasupoko rakirakanano, asekea aporo metakiramo isu rusuapo. Rusua kusuahopo. Rusua kusuahonine isu fore risira kaua Yasumo wakapuane reasasamo, repo asekeasimo isu yaiya arisia yuyapo.

<sup>12</sup> Asiamo isiapo Yasuane some karakanano, aporo metakiramo isu rusua kukusakipoko asiane kusuafapo. Asiáne isiapo some kasáne repo kaikia Yasuaki himu hakásaraka yaiya risikiakosapo.

<sup>13</sup> Arirakano Kotimo sawia popasane oyapo. "Nómo Kotimo someane kakimasasamo some karakanapo." Aíyaka popasa aporoamo Kotiaki himu hakásaraka hemaka apura ayíáka isiapo soko Kotiaki himu hakásaraka risike, ipi some kakimasasamo some karakanapo. (*Buk Song 116:10*)

<sup>14</sup> Isiapo hemakapuraka, "Unihae Yasuane Kotimo maturikia taesapo. Asiamo Koti amo isu soko Yasuaki kataka maresa aporo hinamoane, maturikia taehokosapo. Maturikia taerakano isu soko, re soko, Koti hikumisi nenemea risikiasimo pasimokoakosapo." Aíyaka hemakapurakanapo.

<sup>15</sup> Arirakano isiapo makata arakirane soko repoko rakirakanapo. Asiamo isiapo makata rakisiakipoko isu mokoatikinane soko, repoko isu mokoatikirakanapo. Mokoatikirakano yia repoko yaiya rakiraka risikinapo. Kotimo aporo hinamo yakai ararehoasimo, aporo hinamo yakaíaki isiapo some karakanapo. Some karakanano, aporo hinamo yakai Kotiaki risikiako pariraka ipu Kotimo ararenane hemakapuraka eaki suserakanapo. Suserakanano aporo hinamo metakiramo Kotiaki risikiako pariraka eaki susenane kárahokosapo. Kárasakipoko Kotimo yano motosa makárarakanapo.

*Kotiaki himu hakásaraka rerane oyapo.*

<sup>16</sup> Asiamo isiapo Koti makama fanahokosakipoko, isiapo makata rakirane hisiraka metakariranafapo. Isu kau háksa sisimarakanaapo. Asiamo maiya suamo isu himu soko, ho soko, Kotimo makawerañca marerakanapo.

<sup>17</sup> Arirakano yumo maiya wakasemamo isu mokoatikisane wakasemareapo. Akipoko keseke Kotimo isuaki fahoanafona faesa kára kakakosapo. Namo kakaro faesane makosakipoko, mokoatikina makatane isiapo hemakapurakanafapo. Makata ane, faesa amo marokehokosapo.

<sup>18</sup> Asiamo makata himo aserane kára hemakapurakanafapo. Makata asekeanafonona makata akipoko kára hemakapurakanapo. Makata himo aserane maiya wakasema nina keseke fahokosapo. Asiáne makata himo asekeanafononane yaiya rekeakosapo. Yaiya rekeakosa makata akipoko isiapo kára hemakapurakanapo.

## 5

*Isu kurakano hepene apea Kotimo isuaki kau kotesa kakakosane oyapo.*

<sup>1</sup> Isu hauaka wo arisiane farae apea arisia ayíáka risikinapo. Homo apeane isu kau apao. Arirakano farae ape rakaritaeana ayíáka isu kau kukusa ayapo. Isu kau kurakano isiapo hoane yaiya risikiakosakipoko, Kotimo hepene yapura ape asiane kau hitafe haku mako hiakosa ayapo. Asiamo apeane namo kakaro aperfapo. Ape asiane kau haku yaiya risikiakosa kau ayapo. Asiamo kauane fahokosafapo.

---

\* <sup>4:7</sup>: Paeporo Pukua á hauakamo orotipi rakisia popasane, isiapo hauakamo orotipi rakianafononasamo, isiapo akú popasapo.

<sup>2</sup> Arirakano isiaipo someraka, "Isu hauaka one metakarikia, hepene yapura hiakoripo. Hepene yapura kau kawe haku mokoako hiakoripo." Aiyaka hemakapuraka kára seserakanapo. Asiamo isu hauaka wo risike kau nenakarane hisiraka, hauaka wo metakarikia, hepene yapura kau haku yaiya risira ane Kotimo kakakosane seserakanapo.

<sup>3</sup> Arirakano isiaipo pasu osona ayíáka hepene yapura kau haku yaiya risira kauane mokoa osohokosapo. Arirakano aporomo pasu horotaeraka patera yase arisia ayíáka, isiaipo hoane ayíáka risikiakohoamo pasu osona ayíáka, isu kau hitafe haku moko osohokosapo. Isu kauyaki hoyaki hakása sarimaraka risikiakosapo.

<sup>4</sup> Hauaka wo farae ape asiane isu aporomano kau ayapo. Kau one arisia maiya amo makata umisa maka puraka, umirakano kanahiraka maka apura ayíáka, isu ayíáka puraka risikinapo. Arirakano isiaipo pasu ososane horomorakanone isu patera yase risirapo. Isiaipo ayíáka rakiane siahoasifareapo. Asiáne pasu kaweane kima yapura osoraka pasu paté fana ososane horomarapo. Aina ayíáka isiaipo kau kawe haku yaiya risira kauane osoraka, hauaka omo kau patéane horotapiakosapo. Asiamo maiya suamo isu kau haku kotesayaki yaiya risikiakosapo.

<sup>5</sup> Asiamo yaiya risira kauane mokoakosakipoko isu meraruamo risikiakohoamo Kotimo isuaki tarirakanapo. Tariraka Kotimo isuaki someraka, "Keseke yaiya risira kauane nōmo reaki kakakosapo." Aiyaka fana Ho Kotesane kasapo.\*

<sup>6</sup> Kotimo Ho Kotesa kasasamo maiya suamo isu paroaka risikinapo. Isu kau one arisia maiya amo, Kotimo apea Unihae Yasuyaki hakasa risikinafapo, aiyaka hemakapurakanapo.

<sup>7</sup> Asiamo isiaipo Unihae Yasuane asekeanafonoraka yia isiaipo Kotiaki himu hakásaraka hemakapukua rakiraka risikinapo.

<sup>8</sup> Asiamo keseke Kotimo isu makotehokosapo. Aisasamo isu paroaka risikinapo. Asiane isu kukua kau one metakarikia, hauaka one metakarikia, Unihaemo apea hiako seserakanapo. Asiamo maiya suamo Unihaeyaki risikiakomo namo kakaro seserakanapo.

<sup>9</sup> Asiamo isu hauaka wo arisiamo soko metao, hepene yapura hikia arisiamo soko metao, maiya suamo Kotimo sesehoasimo hemakapurakaripo.

<sup>10</sup> Asiamo keseke aporo hinamo su Keresomo takeeka parakuana maiya amo, e rea isu su pukua sarimahokosapo. Sarimaraka isiaipo hauaka wo risike makata rakisiakipoko, makata ropo siaraka mokoakosapo. Makata watikiaka rakisiakipoko, ropo watikisane mokoakosapo. Arirakano Koteaka rakisiakipoko, ropo kotesane mokoakosapo.

*Isiaipo Kotiaki yunuraka risiane Yasu Kereso kusua aeyaka Kotimo isu tákесes oyapo.*

<sup>11</sup> Unihae Kotiane karasasamo isiaipo eane namoraka hemakapukua rakirapo. Asiamo aporo metakirane Kotiaki risikiakomo parihoasimo isiaipo paroaka wakapuaka some karakanapo. Arirakano isiaipo aina kotesane Kotimo aserakanapo. Asiamo repo soko, isiaipo aina kotesane asekeasimo hemakapurakaripo.

<sup>12</sup> Asiamo isiaipo isina yano motosane makama mafaraka somerakanafapo. Isiaipo reane kirimarakanafapo. Isiaipo ainane repo koteaka hemakapusimo isiaipo sawi one poparakanaapo. Arirakano aporo metakiramo namina rupiaka some karaka, Kotimo sesehoasimo rakirafapo. Asiane ipu aina amo, Kotimo sesehoasimo rakirafapo. Ipu namina hemakapusue some karapo. Asiamo aporoamo isu hokomaka somerakanano repo isiaipo rakira ainane hemakapuraka iaki somehokosapo.

<sup>13</sup> Aporoamo isuane hokomaka someraka, "I masuaraka risikinapo," aisapakae. Asiamo isu masuaraka risike yia, isiaipo Kotipoko himu hakásaraka rakirakanapo. Arirakano isiaipo repoko farimaka arakirané isu masuaraka rakirakanafapo. Asiamo isiaipo makata arakiramo kepoane oyapo.

<sup>14</sup> Yasu Keresomo isuaki namo kakaro himu tumurumo hemakapurapo. Keresomo himu tumurumo hemakapurane isiaipo himua komarukua risiasamo, isiaipo ayíáka rakirakanapo. Arirakano aporo hinamo supoko Yasu Kereso ipi hákasa farimaka kusuapo. Aporo hinamo supoko e kusuasamo, aporo hinamo su e kusua ayíáka, kusuapo.

<sup>15</sup> Aporo hinamo supoko e kusuane, aporo hinamomo ipu namina mena akipoko rakisimo, e kusuafapo. E kusua maturikia taerakanó turikia pusuane, e ipipoko ipu rakisimo, e kusuapo.

<sup>16</sup> Arirakano fana aporo kau kima isiaipo aseraka hauaka omo hemakapusua aeyaka isiaipo someraka, "Aporo metane kotesapo. Aporo metane watikisapo." Aiyaka hemakapusua nine, yumo isiaipo metakarisiaipo. Fana isiaipo Keresoane kau kima aseraka hauaka wo hemakapusua aeyaka eane hemakapusuaipo. Asiáne yumo Keresoane ayíáka hemakapurakanafapo.

\* <sup>5:5</sup> Hinamo fairaka fana sekete soko karáka someraka, "Hinamo fitu keseke kakakosapo." Aiyaka somera ayíáka Kotimo Ho Kotesane isuaki fana kasapo.

<sup>17</sup> Asiamo aporo hinamomo Yasu Keresoaki rekeako pariraka, Keresoaki kataka marekea risia aporo hinamoane, Kotimo makawenapo. Namina fana aina watikisane metakarikia, yumo kawe kotesa risikinapo.

<sup>18</sup> Fana isiapo Kotiaki yunuraka risiapo. Asiāne Yasu Kereso kusua aeyaka Kotimo isu mafasikia, isu tākeraka risikiasimo maresapo. Arirakano Kotimo isuaki someraka, "Aporo hinamo metakiramo anoaki tākeraka risikiasimo repo somehoko pusie." Aiyaka Kotimo isuaki someaka maresapo.

<sup>19</sup> Someaka marerakano isiapo someraka, "Aporo hinamo suamo Kotiaki yunuraka risiane, Yasu Kereso kusua aeyaka mafarakano, tākeraka risikiasimo, Kereso Koti tetapō rakisiapo. Asiamo aporo hinamomo watikisane Kotimo efera hunia hemakapukusafapo." Aiyaka aporo hinamomo Kotiaki tākeraka risikiasimo isiapo some karakanapo. Some kakasimo Kotimo isu murikimasapo.

<sup>20</sup> Murikimarakano isiapo Keresopoko some kape purakanapo. Asiamo isiapo some akara aeyaka Kotimo aporo hinamoaki some karakanapo. Asiamo isiapo some karaka, "Kereso repoko kusuasamo, repo Kotiaki yunuraka risiane metakarikia, Kotimo mafasirane hemakapukua Kotiaki tākeraka risikianie." Aiyaka isiapo some karakanapo.

<sup>21</sup> Arirakano Kereso ipi ereketae susu reke, watikiaka rakisiafapo. Epo watikiaka rakianafonosa nine, isiapo watikisane epo maka, e watikisa pariraka, isupoko kusuapo. Isiapo Keresoaki kataka marekea risike, isu ereketae risikiasimo, Yasuane watikisa pariraka kukusimo Kotimo maresapo. Koti ereketae susu area ayiāka, isu ereketae risikiasimo epo hemakapukua maresapo.

## 6

*"Kotimo hemakapukua yaku ararenane repo metakariakopo," aisane oyapo.*

<sup>1</sup> Isiapo Kotiyaki hakāsa rakiraka risike, reaki paroaka somerakanapo. Kotimo re hemakapukua yaku ararenane, repo mosane hemakapuraka, "Makata ane nenakamaka makatareapo," aiyaka hemakapukupo.

<sup>2</sup> Fana Kotimo somerakano porofete aporomo kaikia popasane oyapo. "Nōmo re yaku ararehokosa ikia karane ropakataesapo. Repo anoaki mafasisiesa maiya hakāsa yiāmo nōmo re mafasisiapo. Asiamo nōmo reane ararehoasimo, repo anoaki wāsa maiya amo nōmo kaisiapo," aiyaka popahoareapo. (Aisaia 49:8) Asiamo isuane Kotimo yaku ararehokosa ikia kara ropakataesane yaiya kakenapo. Mafasiakosapo aiyaka fana popasane, pipu yumo soko yaiya kakenapo.

*Kotimo makata rakirane Poremo rakisiaSAMO aporomo eane mokoatikisane oyapo.*

<sup>3</sup> Repo isuaki someraka, "Repo watikiraka rakirakanapo," aihokohoamo, isiapo repoko rakiraka, ikia kara makata matasosakipoko terafaka arura ayiāka, terafaka rusimo, mata-soraka arakira ayiāka, isiapo mokome some kaka rakirakanafapo.

<sup>4</sup> Isu Kotimo aporo raipapo, aiyaka repo asekeea hemakapusimo, isuaki aporo metakiramo mokopipirakan, isiapo Kotiane metakirakanafapo. Isu Kotiyaki wakapuraka risikinapo. Wakapuraka risike isu mokoatikirakan soko,

<sup>5</sup> rurakano soko, tipura kerakano soko, isuaki sapehoasimo kirimarakano soko, mawaforo marerakano soko, yaiya mekéraka risike, Kotipoko wakapuraka rakirakanapo. Rakiraka risike, waforosasamo ereamo wakanafonoraka, arirakano makata soko nanafonoraka himuraru ayiāka risike yia, isiapo Kotiane metakirakanafapo.

<sup>6</sup> Arirakano isiapo ereketae hemakapukua risike, arirakano makata kepo koteaka hemakapukua risike, arirakano aporo metakiramo isu mokoatikirakan soko, isiapo sapehoanafonoraka risike, arirakano aporo hinamo metakira arareraka makoteraka risike, isu Kotimo aporo raipane isusasamo aporo metakiramo isuane asekeasimo, isiapo ayiāka koteaka susu rakiraka risikinapo. Asiamo Ho Kotesa isu himua risikirakan, aporo hinamo suane isiapo himu tumurumo hemakapurakanapo.

<sup>7</sup> Kotimo kakaro someane isiapo some karāka risike, Kotimo wakapu amo isu arar-erakan, isu koteaka risikinapo. Ereketae susu rerane asi tare asiapo. Hokono tumurumo maka, hokono kasakaimo soko maka area ayiāka, ereketae susu rerane maka rekenapo.

<sup>8</sup> Arirakano aporo metakiramo isu makárarak, arirakano aporo metakiramo isu mawakasemarakano. Arirakano aporo metakiramo isuaki someraka, "Re aporo kote-sapo," airapo. Arirakano aporo metakiramo isuane hokomaka somerapo. Arirakano aporo metakiramo isuaki someraka, "Repo kotafe somerakae," airapo. Aisa nine isiapo namo kakaro susu somerapo. Aporo metakiramo isu mokoatikirakan yia, isiapo Kotimo kakaro someane metakirafaraka yaiya some karakanapo.

<sup>9</sup> Arirakano aporo metakiramo isu asera nine isu aseraka makefenapo. Arirakano aporo metakiramo isu rusua kusuahonine, isu kusuafapo. Arirakano isu rurakano soko isu kusuafapo.

<sup>10</sup> Arirakano aporo metakiramo isu mahisihoasimo rakirakano yia, isu seseraka risikinapo. Arirakano isu makata kemo faraka risike yia, mahimuraka yaiya rekeakosa makata kemoane aporoaki isiaipo karápo. Arirakano isu makata kemo forokoa risike yia makata suane isiaipo menapo.

<sup>11</sup> Korini aporo hinamo reo, isiaipo reaki hufitaeraka somerakanapo. Isiaipo re himu tumurumo hemakapukua re ararehoko hemakapurakanapo.

<sup>12</sup> Isiaipo re ararehoko hemakapurane metakarirakanafapo. Asiane repo isuaki hemakapurane matasorareapo. Asiamo isina yia himu hakásara hemakapurakanafapo.

<sup>13</sup> Isiaipo soko reane ararehoko hemakapura yaiya, repo soko isuaki ararehoko hemakapunie. Aíyaka aporomo ipi hokosaki some akara ayíáka, nōmo reaki ayíáka some karakanapo.

*"Keresoa paohoanafonosa aporo hinamoyaki hakasa sarimaraka rakiakopo," aisane oyapo.*

<sup>14</sup> Keresoa paosa aporo hinamoyaki, nena aporo hinamoyaki, hakasa sarimaraka rakipe pukupo.\* Arirakano makata kotesayaki makata watikisayaki sarimanafapo. Kepo hakásafapo. Arirakano faesayaki katosayaki sarimaraka hakasa risirafapo.

<sup>15</sup> Arirakano Keresope Satane tati sarimaraka hakasa tákeraka risirafapo. Asiamo Keresoa paosa aporomo Keresoa paohoanafonosa aporo tati makata hemakapurane hakasa ninesafapo.

<sup>16</sup> Arirakano Kotimo apeane soko yatafu yakasa ho menane soko, tati hakasa ninesafapo. Yaiya rera Kotimo apeane isu supo. Arirakano Kotimo somesane oyapo. "Re suane nōmo aporo hinamopo. Asiamo repo Kotiane anopo. Ano reyaki hakasa rekeakosapo." Aíyaka Kotimo somerakano popahoareapo. (*Wok Pris 26:12; Jeremaiia 32:38; Esekiel 37:27*)

<sup>17</sup> Arirakano maiya metamo Unihae Kotimo someraka,  
"Nena aporomo hemaka apura ayíáka repo hemakapukohoamo re fasikia risikianie.  
Fasikia risike ipu aina watikisane kekemahoanafonorakano, nōmo re pasimokoa karikia  
nakosapo." (*Aisaia 52:11; Esekiel 20:41*)

<sup>18</sup> Karikia nenaka nōmo reaki someraka, "Repo atane anopo nōmo aporo hokosane soko  
nōmo hinamo hokosane soko repo," aihokosapo. Aíyaka Unihae Koti káramo somerakano  
popahoareapo. (*2 Samuel 7:14; 7:8*)

## 7

<sup>1</sup> Hameo, repo ata anosasamo Kotimo ayiakkosapo aisane aporo hinamo fana risiaki soko, isuaki soko somesapo. Asiamo isu kau mawatikinane soko, isu ho mokoatikinane soko isiaipo metakarinie, airakaripo. Kotiaki namoraka risike makata watikisane kikisiraka koteaka susu rakiraka risikianie, airakaripo.

*Poremo sesesane oyapo.*

<sup>2</sup> Repo namina aporo téakeane hemaka apura ayíáka, isuane soko ayíáka hemakapunie. Isiaipo reane mokoatikisafapo. Repo watikiaka rakisimo isiaipo reaki hokkasafapo. Repo makata meta isiaipo hakimasafapo.

<sup>3</sup> Nōmo sawi one poparaka nōmo reaki hukurukua someraka, "Re aporo watikirareapo," airakanafapo. Fana nōmo reaki someraka, "Re nōmo kára hemakapurakanapo." Aisane yaiya hemakapurakanapo. Ano akura maiya amo soko, nōmo re yaiya hemakapukusapo. Ano hitafe area maiya amo soko, reane hemakapurakanapo.

<sup>4</sup> Nōmo reaki himu hakásara hemakapurakanapo. Asiamo reane nōmo aporo metakiraki kekereraka somerakanapo. Makata umisa fasereperakanano isiaipo reane hemakapukua sesenane komarukua risikinapo.

<sup>5</sup> Fana Masetónia hauaka á isu pukua risia maiya amo, isu fenesafapo. Ape sumu á aporo watikiaka risia aporo yaki pekea isuaki sapemeraka mokoatikisapo. Mokoatirkakano asekea isiaipo hemakapuraka, "Mayiakanarakapo," aíyaka isu himu faraka risiapo.

<sup>6</sup> Asiamo aporo himu faraka risiane mapirahoasimo Kotimo kamenakaraka ararena ayíáka isuaki soko kamenakaraka araresapo. Kotimo araresa aeyaka Taetase isu risia perakanano asekea kára sesesapo.

<sup>7</sup> Taetase perakanano isu seseraka, arirakano epo some kasane soko, isiaipo kairaka kára sesesapo. Epo isuaki some kasane oyapo. Repo e masesesapo, airakasupo. Arirakano repo

\* **6:14:** Aporo tetámo makata ira paka puraka meta horopo meta kitake asia tati ira paka purafapo. Makata rakiakosakipoko aporo tetá tati siasa rakirapo. Aina ayíáka aporo tetá Keresoa paosa tati rakiane siahoasireapo.

ano aseako seserakanapo, airakasupakae. Arirakano repo makata watikiaka rakisiane hisiraka metakarikia, arirakano ano patera aseako hemakapurakanapo, airakasupakae. Arirakano nōmo kaikia kára sesesapo.

<sup>8</sup> Fana re maropohoasimo nōmo reaki sawi poparaka makesapo. Poparaka makesane repo menoraka mahisisaporakano, nōmo kairaka fana sawi katuaka poparaka makeapo, aiyaka nōmo hemakapusuapo. Aiyaka wakasema nina, keseke efera hunia kaiyiáne, repo makata watikisane metakarikia Kotiaki himu hakásaraka hemakapukua risikinaporakano kairaka, ano seseripo. Katuaka poparaka makeapo aiyaka hemakapusuane, yumo aiyaka hemakapurakanafapo.

<sup>9</sup> Re mahisiraka risikinaporakano nōmo kairaka, ano soko seseraka reafapo. Asiāne yumo ano seserakanapo. Nōmo sawi poparaka makesane repo aseraka mahisiraka kaíyarakaka hemakapusuapo. Mahisiraka kaíyarakaka hemakapurane Kotimo kaka, epo re yaku ararerakano, repo makata watikisane hufitaeraka metakarikia, efera hunia Kotiaki hemakapukua risikinaporakano nōmo kaikia kára seserakanapo. Asiamo repo watikiaka rakisiane maropohoasimo, nōmo sawi poparaka makesamo reane mokoatikisafapo.

<sup>10</sup> Arirakano aporomo watikiaka rakirakano, kaíyarakaka hemakapurane ipu himua Kotimo mahemakapurapo. Asiamo aporoamo ipu hufitaeraka makata watikisane metakarikia, Kotiaki rekeako parirakano, Kotimo eane mafasiakosapo. Asiamo aporo metamo e maroposasamo epo mahisinafapo. Arirakano nena aporomo watikiaka rakirakano kaíyarakaka, hufitaeraka makata watikisane metakarianafonoraka aporoamo hauaka omo hemakapusuane kekemaraka rekeno, aporoane akuramo, Kotiyaki yaiya rekeakosafapo.

<sup>11</sup> Kotimo re ararerakano repo hemakapuraka katuaka rakiapo, aiyaka hemakapukua makata watikisane metakarisipa. Metakarikia re kakaro koteaka risikiakosakipoko hemakapukua risikinapo. Aporo metamo re asekea hokorehokohamo repo watikisane foaka metakarireapo. Repo makata watikisane asekea mahisiraka risiapo. Arirakano repo makata watikisane kárahokohamo namoraka risiapo. Asiamo repo isuaki tákéhoko hemakapukua risiapo. Repo ano hikumisi aseako hemakapukua, repo watikisane nōmo asekea maropohokosapo, aiyaka repo hemakapurakayiapo. Asiamo aporoamo makata watikiaka rakisiane repo maroporaka fanasisapo. Aporoane repo fanasisasamo makata watikisa amo kepoane fasapo. Asiamo makata watikisa ane repo maroporaka fasane kotehoareapo.

<sup>12</sup> Nōmo reaki sawi popasa amo kepoane oyapo. Kotimo reane himu tumurumo hemakapusuasamo makata aina watikisamo reane mokoatikirakano Kotimo mahisisapo. Asiamo makata watikisane metakarikia, makata aina kotesane kekemaraka rakismo, Kotimo hemakapurakanapo. Arirakano Koti hikumisia nōmo someane repo kaikia hemakapuraka risikiasimo, nōmo sawi ane popasapo. Asiamo aporo repo namina yia aporo yako meta mokoatikisapakano, eane maropohoasimo nōmo sawi ane popasapo.

<sup>13</sup> Arirakano nōmo sawi popasane repo kekemaraka, repo isuaki yaiya hemakapukua risikinapo, aiyaka nōmo hemakapurakanapo. Asiamo isu seseraka risikinapo. Arirakano Taetase repo apea pesamo repo watikisane metakirakano asekea, Taetase isu risia wo pekea, e himu nesane faraka perakan asekea isu soko kára seserakanapo.

<sup>14</sup> Fana nōmo Taetaseaki reane kekereraka somesapo. Repo e masesesakipoko nōmo reane kekereraka ano kaiyarakanafapo. Ano reyaki rea maiya amo nōmo reaki someraka, "Re aporo kotesapo." Aiyaka re nōmo kekeresane nōmo kakaro somesapo.

<sup>15</sup> Arirakano yumo epo reaki kára seseraka hemakapurakanaporakae. Fana re fofaraka risike, e pasimaka epo some kasane kekemarakano, epo reaki kára seseraka hemakapurakanaporakae.

<sup>16</sup> Asiamo nōmo hemakapuraka, "Repo Kotimo some kakimasane yaiya kakimaka risikiakosapo," aiyaka nōmo hemakapurakanapo. Hemakapukua kára seseraka rekenapo.

## 8

*Keresoa paosa aporo hinamo ararehoko mone taenane oyapo.*

<sup>1</sup> Maeo, nōmo some meta one soko, reaki some karakanapo. Keresoa paosa aporo Masetónia hauaka wo risiane Kotimo hemakapuraka ararerakano, ipu rakisiane yumo nōmo reaki poparakapanapo.

<sup>2</sup> Arirakano makata umisa iaki kára fasereperakan, aporo metakiramo iane mokoatikirakano yia, ipu Kotiane metakarisafapo. Metakarianafonoraka i makata forokoa risike yia, ipu himumo kakaro seseraka hemakapusua aeyaka, aporo hinamo metakirane arareraka mone kára karakasupo.

<sup>3</sup> Mone kára kaka ipu mone kakakosapoko taesane soko karáka yia ipu namina mena taesane soko kima ripaka kára karakasupo. Namina hemakapukua ayíáka karakasupo. Ipu kasane nōmo asekeea kakaro somerakaripo.

<sup>4</sup> Arirakano ipu someraka, "Yutía hauaka á Kotimo aporo hinamo makata forokoa risiasamo isiapo iane ararehoko seseripo. Keresoa paosa aporo hinamo sése ape metakira á risiamó iane ararena ayíáka, isiapo soko ayíáka ararehoko seseripo. Asiamo isiapo mone sarimaraká Yutía aporo hinamoaki kakasimo néaki kakakosapo. Néaki karakanó nōmo someraka, 'Nōmo mokoakosafapo,' aihokopo." Aiyáka ipu anoaki aofiraka somerakasupo. Ipu arareraka mone kakako kakaro seserakanapo, airakasupo.

<sup>5</sup> Airakano isiapo hemakapuraka, "Ipu mone kakakosapo." Aiyáka hemakapusua nine ipu mone hákasa kasafapo. Mone kakasiraka risia maiya amo ipu someraka, "Isu isinane Unihae Kotiaki karakanapo." Aiyáka efera hunia ipu someraka, "Kotimo someaka maresane Poremo isuaki somerakano isiapo rakiakosapo." Aiyáka ipu kára seseraka somerakano kaikia, ipu kasá ayíáka repo soko ayíáka kakasimo nōmo hemakapurakaripo.

<sup>6</sup> Asiamo repo taonea nōmo Taetaseane efera hunia pusierakanapo. Asiamo fana Taetase reyaki rea maiya amo, Yutía hauaka Keresoa paosa aporo hinamoane ararehokosakipoko, fana moneane epo kepomarekea sarimasapo. Sarimasakipoko repo mone yaku kakakosane kaka fahoasimo repo taonea epo sarimahoasimo nōmo pusierakanapo.

<sup>7</sup> Repo makata kára rakiraka risikinapo. Repo Kotiaki himu hakásaraka hemakapurakanapo. Arirakano Kotimo someane soko repo some karakanapo. Arirakano Kotimo some kepo suane repo hemakapurakanapo. Arirakano aporo metane repo ararehoko seserakanapo. Arirakano isuane soko repo kára hemakapurakanapo. Repo ayíáka koteaka rakirasamo repo mone akaramo kára kakasireapo.

<sup>8</sup> Repo kakanie, aiyáka nōmo somerakanafapo. Asíáne aporo metakiramo seseraka mone kasapo, airakanapo. Aiyáka repo aporo metakiraki himu tumurumo hemakapurane nōmo asekeasimo, repo soko seseraka mone kakasimoripo.

<sup>9</sup> Arirakano Unihae Yasu Keresomo isuane kára hemakapukua yaku ararenane repo hemakapunie. Makata su ipi mena nine makata suane ipi mahimurafaraka ipi isupoko hauaka wo peraka makata forokoa koraka reapo. E makata forokoa reke araresa aeyaka isu koteaka seseraka hemakapurua risikinapo.

<sup>10</sup> Arirakano nōmo hemakapusuane oyapo. Fana Keremisi hakásá fasamo repo kepomarekea mone sarimaraká risiane, yumo kaka fahoanie. Aporomo fana mone kakakosane someraka, "Isiapo aporo hinamo metakira ararehokosakipoko mone kakakosapo." Aiyáka repo fana hemakapurua kasapo.

<sup>11</sup> Aiyáka kasane, yaiya karáka risikianie. Tipia metakariakopo. Mone metakira taesa tokenone, moneane mokoa kakanie. Repo namina kakako hemakapusuane kaka fahoanie.

<sup>12</sup> Repo mone suane Kotimo aserapo. Mone tokeno asekeea parakuraka sape meta Kotiaki seseraka karakanó, Kotimo asekeea sesehokosapo. Arirakano metamo namo kakaro mone fasamo kakanafonorakanó Kotimo sapehokosafapo.

<sup>13-14</sup> Arirakano repo hemakapuraka, 'Poremo aporo metakiraki someraka, 'Yutía aporoane ararehoanie.' Aiyáka somehoanafonoraka isuaki hákasa maiya suamo epo someraka, 'Repo mone kakanie.' Airakane mairakariakopo." Aiyáka repo hemakapurukupo. Reaki nōmo maumi marerakanafapo. Yumo repo mone kára tokeno asekeea airakaripo. Tokeno, asekeea aporo makata forokoa risiane repo ararehoafunupo. Ararerakanó, keseke re soko makata forokoa arisia maiya amo, ipu soko re ararehokosapo. Arirakano repo i ararerakanó, ipu soko re ararehokosapo. Aiyáka repo namina yia ararerakanó, re su siaraka risikiakosapo.

<sup>15</sup> Arirakano aporo metakiramo aporo metakiraki araresane Kotimo sawia popasane oyapo.

"Makata nakosa kára mosa aporomo aporo metane arareraka karaka, kina taesafapo. Arirakano makata nakosa wakasema mosa aporoane soko meamosafapo," aiyáka popahoareapo.  
*(Kisim Bek 16:18)*

*Korini taonea Taetasepe aporo meta tetu Poremo pusiesane oyapo.*

<sup>16</sup> Nōmo re ararehoko hemaka apura ayíáka Taetasemo reane ayíáka ararehoko hemakapurakanapo. Hemakapurane Kotimo Taetaseaki karakanó nōmo Kotiaki suserakanapo.

<sup>17</sup> Arirakano nōmo Taetaseaki someraka, "Nōmo Korini aporo hinamoane ararehoko pusie." Airakano epo someraka, "Ao. Ano pukusapo. Nōmo ní hemakapusuane soko i ararehoko seseripo. Ano seseraka pukusapo."

<sup>18</sup> Aíyaka epo seseraka somerakano, eyaki Keresoa paosa aporo mae hakása meta soko pusierakanapo. Arirakano aporo pusienamo Keresoa paosa aporoaki Yasuane hemakapusimo some kotesane some karakano, aporo suamo kairaka someraka, "Epo someane koteaka somerakae," aíyaka Keresoa paosa aporo suamo somesapakae.

<sup>19</sup> Somesa aporo hakasa yine e isuyaki pukua aporo metakiraki ararehoko mone sarimahokosakipoko Keresoa paosa aporomo soko e murikimasapo. Murikimarakanano aporo makata forosaki ararehoko mone mokoa sarimarakakanapo. Sarimarakano aporo forosaki karakano aporo metakiramo aseraka Kotiane kekererakanapo.

<sup>20</sup> Arirakano aporo metakiramo someraka, "Mone kára sarimasane ipu hasaka parakuraka kasapo. Wakasema sapeane ipu hakimosapo." Aíyaka ipu isuane hokorehokohoamo, moneane koteaka asekea risikiasimo, aporo metakira isuyaki hakása purakanapo.

<sup>21</sup> Unihae Kotimo soko, aporo suamo soko, aseraka someraka, "Ipu mone siaraka asekea risikinapo." Aihosimo yumo isiaipo koteaka asekea risikinapo.

<sup>22</sup> Asiamo isiaipo kakaro koteaka asekea risikiakosakipoko repo apea Keresoa paosa aporo mae hakása meta soko nōmo pusierakanapo. Eaki nōmo someraka, "Nōmo rakiako puane siahoasireare?" Aihoe maiya suamo epo someraka, "Ao rakiakosapo." Aíyaka epo seserakano nōmo asesapo. Yumo soko epo hemakapuraka, "Korini aporomo Keresoa paosa aporo Yutía hauaka risiaki mone kakakosapo." Aíyaka epo himu hakásaraka hemakapukua, repo sése apea e seséraka purakanapo, airakae.

<sup>23</sup> Arirakano nōmo repoko arareraka arakira ayiáka, Taetasemo soko, repoko arareraka anoyaki hakása rakirakanapo. Arirakano Keresoa paosa aporo mae tetá eyaki hakása pukusane, Keresoa paosa aporo hinamomo murikimasapo. Murikimarakanano ipu rakiraka risike Keresomo yano motosa makárahokosapo.

<sup>24</sup> Aporo mone mokoako aperamo, repo himu tumurumo hemakapurane asekeasimo mone sarimarakana kakanie. Karakano ipu someraka, "Poremo Korini aporoane koteaka risikinapo, aisane kakarohoareapo," aihokosapo. Aíyaka Keresoa paosa aporo hinamomo sese ape metakira risiamo soko aihokosapo.

## 9

*Keresoa paosa aporo hinamo Yutía hauaka makata forokoa risiane arareraka makata yaku kakanie, aisane oyapo.*

<sup>1</sup> Yutía hauaka Keresoa paosa aporo hinamo risiane, repo arareraka mone kakakosamamo, nōmo reaki nena poparakanapo.

<sup>2</sup> Repo kakaro seseraka kakasireapo, aíyaka nōmo hemakapurakaripo. Asiamo ano Masetónia hauaka á apuramo, Masetónia aporoaki nōmo someraka, "Korini aporomo mone kakakosapo. Akaia\* hauaka Keresoa paosa aporo risiamon keremisi hakása fasamo ipu kakakosapo, aisapo." Aíyaka nōmo repo yano motosane kekereraka somehokosapo. Somehoane repo kakakosakipoko sesésane ipu kairaka, aporo yakai metakiramo soko someraka, "Isiaipo mone kakakosapo," airakasupo.

<sup>3</sup> Airakano nōmo re kekereraka somesane kotafe horakanareapo. Airapaka, Keresoa paosa aporo mae Taetase iane, repo hauaka á nōmo pusierakanapo. Nōmo iaki someraka, "Korini aporomo moneane sarimasapo." Airakano repo mone sarimasane ipu aseako pusierakanapo.

<sup>4</sup> Keseke Masetónia aporo anoyaki, re risia á peraka aseane repo mone sarimahoanafonosekeno aseraka, ano kaíyahoasireapo. Arirakano fana nōmo hemakapuraka, "Ipu mone kakakosapo," aíyaka aporo metakiraki re yano motosa makáraraka somesasamo repo mone sarimahoanafonosekeno asekea ano kaíyahoasireapo. Ano kaíyarakana re soko kaíyahokosapo.

<sup>5</sup> Anapaka nōmo Keresoa paosa aporo maeaki someraka, "Re fana pusie. Ano ke-sekeea peakoso," airakanapo. Asiamo repo mone kakakosaposane sarimahoasimo iane fana nōmo pusierakanapo. Repo namina hemakapukua seseraka yaku kayane soko siahoasireapo. Ano peraka nōmo reaki kakanie, airakano repo kayane siahoasifareapo.

<sup>6</sup> Arirakano mone yaku karámo kepoane oyapo. Aporomo makata mano hukusi poterakano, wateane soko hukusi tumorapo. Arirakano aporomo makata mano yakai poterakano wateane soko yakai tumorapo.

<sup>7</sup> Aina ayiáka repo mone kakakosane repo namina fana hakása hakásaraka hemakapunie. Repo namina hemakapusua nine kekemarakana kakanie. Aporomo ipi hemakapuraka, "Nōmo mone kára kakakosapo." Aíyaka hemakapukua mone kára kayane soko siahoasireapo. Arirakano aporo metamo hemakapuraka, "Nōmo mone wakasema kakakosapo." Aíyaka hemakapukua mone wakasema kayane soko siahoasireapo. Aporo metamo

\* **9:2:** Korini taoneane Akaia hauaka a kisiapo.

ipi moneane aporo metamo kakanierakano, karáka himumo mahisiraka kayane siahoasi-fareapo. Aporomo ipi seseraka karakano Kotimo eaki seseraka hemakapurapo.

<sup>8</sup> Kotimo reaki makata kotesa kára kakakosane Kotimo ipi siaraka rekenapo. Ipi hemakapukua ararenane enonosa kakenafapo. Asiamo ararenane epo reaki karakano, repo kakaro siaraka mokoa risikinapo. Kotimo ararenane siaraka mokoa risikino, re namina himuane soko, kauane soko makotehoasimo, Kotimo siaraka arareraka rekenapo. Arirakano makata rakira kotesa rakisimo Kotimo siaraka arareraka rekenapo.

<sup>9</sup> Arirakano makata kára kará aporoane Kotimo sawia popasane oyapo.

“Aporomo makata mano potena ayiáka, aporo kotesamo aporo makata forosaki makata kára karápo. Asiamo aporo kotesamo makata rakira kotesane fahokosafapo.” Aiyaka popahoareapo. (Buk Song 112:9)

<sup>10</sup> Asiamo makata mano potehoasimo karáne soko Kotimo karápo. Makata nakosa nasimo karáne soko Kotimo karápo. Makata su akaramo kepoane Koti ipi hákasapo. Aina ayiáka repo aporo metakiraki makata kakasimo Kotimo reaki kakakosapo. Makata mano tane-hekea wate apera ayiáka, repo koteaka rakirane Kotimo makárahokosapo.

<sup>11</sup> Repo makata kára kakasimo Kotimo reaki makata kára kakakosapo. Karakano repo mone karáne isiapo mokoa aporo makata forosaki kakakosapo. Karakano repo i araresakipoko ipu Kotiaki kára susehokosapo.

<sup>12</sup> Asiamo repo makata akara aeyaka Kotimo aporo hinamo makata forosaki repo ararehokosapo. Repo makata karakano aporo yakaimo Kotiaki susehokosapo. Susehoane Kotimo yano motosane makárahokosapo.

<sup>13</sup> Repo makata karakano Keresoa paosa aporo mae metakiramo soko aseakosapo. Aseane repo iaki soko, aporo metakiraki soko, makata kára yaku karakano asekeea ipu someraka, “Mone kasá aporomo Unihae Kotiane seseraka hemaka apure. Arirakano Yasu Keresoane hemakapusimo some kasane ipu kakimaka arakire.” Aiyaka repo moneane iaki kasasamo ipu Kotiane makáraraka susehokosapo.

<sup>14</sup> Susehoane Kotimo re kára hemakapukua araresasamo, ipu reaki kára seseraka hemakapukua, Kotimo re efera hunia soko ararehoasimo kurikurihokosapo.

<sup>15</sup> Arirakano Kotimo isuaki makata yaku kasá akipoko isiapo Kotiaki suserakanapo. Kotimo ipi hokosa Yasu Kereso isu ararehoko pusiesa, akipoko soko isiapo kára suserakanapo.

## 10

*Aporo metakiramo Poreaki topaka maraka somerakanano Poremo someraka, “Kotimo ano murikimarakano nōmo Kotipoko ereketae rakirakanapo,” aisane oyapo.*

<sup>1</sup> Repo hemakapusimo ano Poremo reaki somerakanapo. Yasu Keresomo aporoaki hemakapukua tau auaraka somesa ayiáka, nōmo soko re hemakapukua, repo kaiyisimo tau auaraka somerakanapo. Asiamo aporo metakiramo anoane topaka maraka someraka, “Isu hikumisia Poremo someana maiya amo epo tau somerapo. Arirakano e yamenoa reke isuaki me paroaka poparaka makerapo,” aiyaka somerakanapakae.

<sup>2</sup> Arirakano aporo metakiramo someraka, “Poremo hauaka wo makata rakirane kára hemakapukua rakirakanapo,” airakanapakae. Aiyaka somera aporoaki hikumisia nōmo me paroaka somehokosapo. Ano apera maiya amo nōmo reaki paroaka somerapaka, repo watikiaka somesane metakarinie.

<sup>3</sup> Isu hauaka wo risike, Kotiaki yununa aporo akiyaki isiapo werakanapo. Asiāne isiapo awerane hauaka aporomo awera ayiáka werakanafapo. Satanemo menaki isiapo werakanapo.

<sup>4</sup> Arirakano hauaka wo aporomo weraka, poke ira rokopa menane hokonomo rakikia mokoa aporyaki werapo. Asiane hauaka omo menane isiapo mokoa werakanafapo. Arirakano Kotimo someana mawakasemana aporoane Kotiaki yununa aporo ayapo. Isiapo Kotiaki yununa aporo akiyaki werakanapo. Weraka isiapo Kotimo wakapuamo werakanapo. Asiamo isiapo Kotimo wakapuane mokoa aweramo Kotiaki yununa aporoane hurutapiakosapo.

<sup>5</sup> Aporomo Kotiane kakaro hemakapukuhamo aporo metakiramo namina yia makáraraka kotafe tafraka somerapo. Asiamo ipu kotafe someane isiapo marutaenapo. Kotiaki yununa aporoane ikia hasaka purapo. Asiamo iane pasimokoakosakipoko Kotimo wakapuamo isiapo werakanapo. Asiamo isiapo Kotimo kakaro someane some karakanapo. Some karakanano ipu kaikia risikiako pariraka Yasu Keresomo hemakapusuan kekemahokosapo.

<sup>6</sup> Asiamo isiapo some kasane repo metakiramo kaikia kekemarakano yia, metakiramo kaikia koaretaerakanano aporoane isiapo maroporaka fanasihokosapo.

<sup>7</sup> Arirakano aporo metakiramo someraka, "Poreane tarira aporohoasimo Kotimo murikimasafapo." Airakano repo kairaka some ane koteaka takekeea hemakapurakanafapo. Repo kepo hemakapunafonoraka makata kima susu aserakanapo. Arirakano aporo metamo someraka, "Yasu Keresomo makata rakisimo murikimasane anopo. Refapo." Airakanone e soko Keresoa paoraka makata arakira ayíáka, isu soko Keresoa paoraka makata rakirapo. Aiyáka hemakapunie. Meraruhokopo.

<sup>8</sup> Repo Kotiaki himu hakásaraka hemakapurane makárahoasimo, Kotimo ano murikmasapo. Ano murikimasasamo, ano nlane kekereraka sikiraka somerakanapo. Aiyáka somerakane, ano nlyia karekerakanafapo. Arirakano aporomo ape kikia mako arakira ayíáka, re ararehoasimo Unihae Kotimo ano murikimasapo. Aporomo ape marakaritaena ayíáka, reane marutaehoasimo ano murikimasafapo.

<sup>9</sup> Asiamo nōmo reaki sawi popanamo re namohoasimo popanafapo.

<sup>10</sup> Asiamo aporo metakiramo someraka, "Poremo sawi popanamo paroaka someaka popanapo. Asiane e peraka epo aporo hikumisi aseramo epo paroaka somerafapo." Aiyáka kotafe somesapakae.

<sup>11</sup> Arirakano re yamenoa risiaki nōmo sawi popasane soko, ano pekea reyaki hakása risike, reaki some karane soko, hakása yinesapo. Nōmo sawia haku poparaka arirakano nōmo akaimo haku some ainafapo. Asiasamo ano hokomara aporoaki somehoanie.

<sup>12</sup> Aporo metakiramo ipu namina yano motosa makama fanaraka somerakano, isiaipo ayíáka somerafapo. Aporo akiyaki isina hakása ninesafapo. Aporoamo hauaka wo makata hemakapusune kekemarakaa úyaka somerapo. Namina yia aporo hakása metamo someraka, "Ano fanapo." Airakano yaiya aporo hakása metamo soko someraka, "Ano fanapo." Airakano yaiya aporo hakása metamo soko someraka, "Ano fanapo." Aiyáka namina tafatafaraka kakanakeraka someraka risirapo. Aporoamo hasaka hemakapukua risike tafatafaraka kakanakeraka somerapo. Aiyáka someramo siaraka risikiakosa kepoane hemakapunafonoraka risike aiyáka mokome somerapo.

<sup>13</sup> Arirakano Kotimo isuaki makata rakiniesane isiaipo rakisiapo. Asiamo Kotimo isuaki someraka, "Hauaka á pusie, ape á pusie," aisa á isu pusuapo. Asiamo Kotimo isuaki makata rakisimo murikimasane isiaipo kekemarakaa rakisiapo. Kotimo somesane isiaipo marokesafapo. Asiamo isiaipo makata rakianafonosane isiaipo isina makáraraka reaki somehokosafapo. Asiane repo taonea makata rakisimo Kotimo isu pusierakano isu pesapo. Pekea isiaipo namo kakaro koteaka rakisiapo.

<sup>14</sup> Arirakano Kotimo ano tarira apororaka rakisimo murikimaka, repo taonea pusierakano ano pesapo. Asiamo repo Yasu Keresoane hemakapusimo ano fana pekea reaki some kotesa some karaka reapo. Asiamo re nōmo sia maropohokosapo. Arirakano aporomo someraka, "Nōmo Korini aporoane sia maropohokosafapo," aiyáka somerakanano ipu someane kotafe somerakanapo.

<sup>15</sup> Arirakano isiaipo makata rakisiane ipu kotafe someraka, "Isiaipo rakisiapo," aiyáka somerakanano reane mahimetesapo. Asiamo aporo metamo rakisiane isiaipo aseraka kotafe someraka, "Isiaipo rakisiapo," aiyáka isiaipo somerafapo. Kotimo rakiniesane isiaipo rakisiapo, aiyáka kekereraka somerakanapo. Repo Kotiaki himu hakásaraka hemakapurane kárahoasimo isiaipo hemakapurakaripo. Arirakano repo aorakano isiaipo reyaki kára rakiako hemakapurakaripo.

<sup>16</sup> Kára rakikia maka, hauaka meta á pukua aporo metakiraki some kakako pukusapo. Asiamo isu fana pukua some karakano, aporo metamo someane some kakanafonosa kawé kaiyakosapo. Asiamo aporo metamo some kakanafonosasamo, isiaipo fanaraka some kasasamo metamo isuaki kakanakeraka somehokosafapo.

<sup>17</sup> Arirakano Kotimo sawia popasane oyapo. "Repo namina yia makata rakisiane kekereshokopo. Kotimo makata rakisiane kekereshoanie," aiyáka popahoareapo. (*Jeremaia 9:24*)

<sup>18</sup> Arirakano aporomo ipu yia makáraraka kekererakano, ane siahoasifareapo. Arirakano Kotimo aporoane makáraraka kekererakano, ane siahoasireapo.

## 11

*Poremo makata rakira akipe kotafe tarira aporomo makata rakira tati hakása nine-safapo, aisane oyapo.*

<sup>1</sup> Repo anoaki someraka, "Ne himu rekenafareapo," aisapakae. Asiamo ano himu rekeanafonosa yiamo, nōmo reaki somerakanapo. Somerakanano repo kaisie.

<sup>2</sup> Kotimo reane kara hemakapusasamo aporo metamo someane repo kekemarakano, Koti himu kára nakosapo. Aina ayíáka ano soko himu nenakanapo. Keresomo re hinamo ayíáka arumakasimo, reane epo faisasamo nōmo re asekea rekenapo. Hinamomo aporo

hakásá apura ayiáka, re Kereso hákasa pusimo, reane nōmo asekea rekenapo. Asekea reke re ikia hinamonapaka nōmo asekea rekenapo.

<sup>3</sup> Arirakano kuyaremo mahoperaka kotafe somesane Ifimo kakimasapo. Asia ayiáka aporo metamo some meta kotafe somerakano repo Yasu Keresoaki himu hakásaraka hemakapurane mahimeteraka, aporo metamo kotafe somerakano, someane repo kaki-makasireapo. Anapaka nōmo reane hemakapukua himu farakanapo.

<sup>4</sup> Asiamo ano himu fána amo kepoane oyapo. Re himu tetaraka risike, sere metamo aporo metamo somerakano á kekemaraka, sere metamo aporo metamo somerakano á kekemaraka anapo. Fanā isiapo reaki Yasuane some karakano isiapo someane repo kaki-masapo. Arirakano aporo meta peraka Yasuane some haku some karakano, aporoamo kotafe someane repo kakimakasireapo. Arirakano fanā Ho Kotesane repo masapo. Kotafe someane repo kekemarakano ho meta watikisane repo makasireapo. Arirakano fanā Keresoane repo hemakapusimo some kotesane isiapo some karakano, repo kakimasapo. Asiāne kepo meta hemakapusimo, aporo metamo some meta some karakano, repo yaiya kakimakasireapo. Repo takekea hemakapunafonoraka some metane seseraka kakimarakanaapaka.

<sup>5</sup> Arirakano some meta some kará aporoaki repo someraka, "Reane tarira apororeapo." Aiyaka iane makama fanaraka, ano makama kesekeraka somehoane siahoasifareapo. Ano mayireare? I fanaraka ano kesekefapo.

<sup>6</sup> Asiamo nōmo akaimo fofoáka somerafapo. Nōmo masekeame somerapo. Asiāne some kepo suane nōmo hemakapurakanapo. Hemakapuraka repo suamo kaiyisimo makata kepo suane nōmo reaki some kasapo.

<sup>7</sup> Arirakano Kotimo someane nōmo reaki some kasa akipoko, nōmo makata ropo masafapo. Makata ropo makosane metakarikia, re makotehoko aporo raipamo arakira ayiáka, ano ni makama kesekeraka yaku rakisiapo. Nōmo yaku rakisia amo reane makotesapo. Asiamo repo anoaki someraka, "Ne watikirareapo," aihokopo.

<sup>8</sup> Re yaku ararehoko, Keresoa paosa aporo hauaka metakira risiamonu mone karakano, nōmo mosapo. Repo ano kakafunusa nine, repo ano kakanafonorakano, asekea aporo metakiramo ano karakasupo. Repoko nōmo rakiraka reke ipu menane nōmo yaku mosapo.

<sup>9</sup> Asiamo ano reyaki rea maiya amo nōmo mone fasokino reaki someraka, "Ano makata nakosa kakanie," aiasafapo. Repo hisihokohoamo Masetónia hauaka aeyaka aporo metakira pekea, ano mone karakano, nōmo mokoa makata nakosa roposapo. Repo anoaki mahisinapaka reaki nōmo makata umisa maresafapo. Repo mahisinapaka, "Repo ano makasie," aiasafapo. Fana nōmo reaki makasie aihoaafonosasamo, keseke soko, nōmo reaki makasie aihokosafapo.

<sup>10</sup> Yasu Keresomo ipi kakaro somera ayiáka, nōmo soko kakaro somerakanapo. Nōmo reaki someraka, "Makasie," aihoaafonosakipoko ano ni seseraka somerakanapo. Arirakano Akaia hauaka á aporo risiamonu anoaki someraka, "Nōmo kotaferipo," aihokosafapo.

<sup>11</sup> Asiamo nōmo maíyaka somerakarire? Nōmo reane hemakapunafonoraka somerakarire? Wae, nōmo re kakaro seseraka hemakapuraka somerakaripo. Asiamo nōmo some kepoane Kotimo asekea hemakapurakanapo.

<sup>12</sup> Yumo repo mone nōmo mokoanafonona ayiáka, keseke soko nōmo mokoakosafapo. Arirakano kotafe tarira aporomo someraka, "Poremo rakira ayiáka, isiapo soko hákasa yineraka rakirakanapo." Aiyaka namina yia kekereraka somerapaka, repo moneane nōmo mokoakosafapo. Nōmo makata ropo mokoanafononasamo, ipu makata ropo mora akiyaki isina hákasa yinesafapo.

<sup>13</sup> Re arisia aporo metakira peraka someraka, "Isu tarira aporopo," aisa aporoane namo kakaro tarira aporofapo. Iane kotafe tarira aporopo. Repo iane aseraka, namo kakaro Keresomo tarira apororeapo, aihoasimo ipu re mahoperaka kotafe rakirakanapo.

<sup>14</sup> Arirakano aporoamo kotafe rakirakanano ano fofarakanafapo. Satane ipi kau kima hákasané kotafe hepene aporo faesa pariraka rekeno aporomo aseraka someraka, "E hepene aporopo," airapo.

<sup>15</sup> Satane kotafe hepene aporo pariraka area ayiáka, eaki patera asesa aporoane soko, kotafe aporo ereketaesa pariraka risokino, aporo hinamomo kotafe aporo ereketaesa parisane aseraka someraka, "Aporoane ereketaehoareapo," airapo. Kotafe aporo ereketaesa parisasamo keseke ipu namina makata rakisia yinaka makata ropo mokoakosapo.

#### *Aporomo Pore mokoatikisane oyapo.*

<sup>16</sup> Fana nōmo reaki makata somesane efera hunia somerakanapo. Repo anoaki someraka, "Ne himu rekenafareapo," aisapakae. Aisa aporo repo, nōmo someane kaisie. Ano himu rekenapo. Arirakano kotafe tarira aporomo namina yia kekereraka somesapo.

Asiamo yumo nōmo soko, ano nīane kekereraka somerakanapo. Asiamo nōmo someane repo kairaka, Pore himu rekenafareapo, airakano, nōmo kāra hemakapukusafapo.

<sup>17</sup> Unihae Kotimo anoaki someraka, "Nōmo nī kekereraka somehoanie," aisafapo. Ai-hoanafonosa nine ano nī yia kekereraka aporo himu rekeanafonosamo someana ayiáka nōmo somerakanapo.

<sup>18</sup> Aporo metakiramo hauaka wo makata hemakapusua kekemaraka ipu namina makata rakira makárana ayiáka, nōmo soko ano nīane makáraraka kekereraka somerakanapo.

<sup>19</sup> Repo makata kāra enomaka hemakapurakayia, aporo himu hemakapura fasa kotafe tarira aporoane repo seseaka karikia risikinapo.

<sup>20</sup> Karikia hakāsa risikino, ipu reane aporo raipa mapariraka isupoko rakinie, airapo. Ayiáka repo makata nakosa soko, moneane soko, ipu morakanapakae. Ipu mahoperaka risike, matewaraka risike, re mawakasemaraka hikumisia fawaka rurakano yia repo i seseraka pasimokoa karikia hakāsa risikinapakae.

<sup>21</sup> Ipu aina ayiáka isiapo ásiafapo. Isiapo re runafonoraka metakirirakasuane, isu re asekea namoraka airakasure? Wae. Isu namosafapo. Isiapo re runafonorakano aporomo aseraka someraka, "Pore ipi rorasapo," airakanapakae. Ano nī kekereraka someraka aporo himu rekeanafonosamo somera ayiáka nōmo somerakanapo. Asiāne ipu namina kekereraka somesa ayiáka, nōmo soko, nī kekereraka somerakanapo.

<sup>22</sup> Kotafe tarira aporomo ipu Hipuru meaka somerare? Ao, ipu Hipuru meaka somerasekeno, ane nōmo soko Hipuru meaka somerapo. Aporoane Isiraya aporore? Ao, i Isiraya aporsekeno, ane ano soko Isiraya aporopo. Aporoane Eparahamemo aporo irare? Ao, i Eparahamemo aporo irasekeno, ane ano soko Eparahamemo aporo irapo.

<sup>23</sup> Aporoane Keresomo aporo raipare? Keresomo aporo raipa fanaraka reane anopo. Ano nī kekereraka somenane aporo himu hemakapura fasamo somera ayiáka nōmo somerakanapo. Ipu rakisiene nōmo marokeraka nōmo namo kakaro kāra rakisiapo. Arirakano yape yakai ano tipura makekeea, arirakano yape yakai ano rukua mokoatikiraka kusuahopo.

<sup>24</sup> Arirakano Yu aporomo ano rusuane teti naene (39) ayiáka menoraka, yape kakoreasumо ayiáka saro kau terakaemo ano rusuapo.

<sup>25</sup> Arirakano yape isiamо Rome kamani aporomo ira faimo ano rusuapo. Arirakano yape hakásamo ekemo ano karesapo. Arirakano yape isiamо kasu sipia ano ripasane arosapo. Yape hakásamo kasu sipi arorakano ere hakāsa, sere hakāsa, ayiáka ano ira arosane maka, he tawara kima tapukureapo.

<sup>26</sup> Arirakano ano kimisi apura maiya amo makata kāramo ano mokoatikinapo. He kāra kukturupiraka perakano asekea, arirakano maiya metakiramo aporomo nōmo makata kemoane hakimokoakosakipoko ipu ano rukusakipoko risikino asesapo. Arirakano nōmo nī aporo ira Yu aporo yiamo soko, ano rukusakipoko risikino asesapo. Arirakano Yu aporohoanafonosamo soko, ano mokoatikihokosakipoko risikino asesapo. Arirakano kotafe Keresoa paosa aporo maemo soko, ano mokoatikihokosakipoko risikino asesapo. Arirakano maiya metakiramo ano mokoatikirakano ape sumu metakira á soko, yaoa soko, he tawara soko, ano kusuahopo.

<sup>27</sup> Asiamo nōmo arakiramo wafororaka rakirapo. Ereamo wakanafonorakano soko, meamorakano soko, he narirakano soko, nōmo yaiya rakiraka reapo. Maiya metamo makata nakosane soko faraka kusuahopo. Arirakano ano pasu siahoanafonosasamo kāra inuraka reapo.

<sup>28</sup> Ayiáka reke maiya suamo Keresoa paosa aporo hinamoane nōmo asekea reapo. Asekea reke nōmo hemakapuraka, "I siaraka risikinarakapo. I hasakaraka risikinarakapo." Ayiáka kāra hemakapukua rekenapo.

<sup>29</sup> Arirakano aporo metamo Keresoaki himu hakásaraka hemakapusuane paroaka rekeanafonorakano aseraka, aporoane nōmo kāra hemakapurakanapo. Arirakano Keresoa paosa aporo metamo watikiaka rakisimo aporo metamo kirimarakanaro aseraka, nōmo kāra mahisíraka hemakapurakanapo. Nōmo kāra rakikia, kāra hemakapukua, ayiáka ano rekenapo.

<sup>30</sup> Ano nīane makáraraka somehoko hisirakanapo. Nōmo nī yano motosane makárahoafunufapo. Asiāne aporo metakiramo namina yano motosane makárarakano, nōmo soko nī yano motosane makárarakano. Asiamo anoaki makata fasere perakano nōmo nī wakapumo siahoasifasekeno asekea somerakanapo.

<sup>31</sup> Kotiane ipi Unihae Yasumo Ata ane, maiya suamo isiapo kekererakanapo. Kotimo kairakano nōmo kotafe somerakanafapo.

<sup>32</sup> Arirakano Tamásakase taonea ano rea maiya amo, tipura makeasimo Aretase unihaeaka rea maiya amo, taoneane kamani aporo asekeea reamo aporo terakaiyamosaki someraka, "Ape ruru ikia koroa Pore purakarihoamo Pore waseremako asekeea risikianie."

<sup>33</sup> Airakano ipu asekeea risiapo. Asekeea risikino yia ano fefeneaku asiakipoko makekeea ruru winito anaka metafirimarakano metafirimarakana hauaka atura motorakano ano takaripusuapo.

## 12

*Kotafe tarira aporomo someane Poremo hurutapiasimo Kotimo Poreaki makata tarirakan Poremo somesane oyapo.*

<sup>1</sup> Kotimo ano murikimasane repo hemakapusimo ano niane kekereraka somehokosapo. Kekereraka someanamo ano ní makárahokosafapo. Nōmo kekereraka someanane nenakamaka somerakanapo. Asiamo nōmo kituamo Únihae Kotimo anoaki makata tarirakan, nōmo asesane reaki somerakanapo.

<sup>2</sup> Keremisi senakis (14) faraka, Keresoa paosa anoane hepene yapura Koti ipi rea hauaka á<sup>\*</sup> Kotimo ano pasimaka hisiapo. Ano pasimarakano hisiane nōmo hemakapurakanapo. Ano ho hákasa hinaka soko metao, kauyaki hoyaki hakása hinaka soko metao, nōmo hemakapurakanafapo. Kotimo ipi hákasa hemakapurakanapo.

<sup>3</sup> Arirakano anoane hepene yapura hisia amo, hepeneane yano motosa Párataese<sup>†</sup> á pasimarakano hisiane, ho hákasa hinaka soko metao, kauyaki hoyaki hakása hinaka soko metao, nōmo hemakapurakanafapo. Kotimo ipi hákasa hemakapurakanapo.

<sup>4</sup> Ano hepene yapura pasimarakano hikia reke, hepene yapura makata kaikia ano peraka, hauaka wo nōmo murikimaka somehoasifapo. Hepene yapura namo kakaro haku kakenapo. Hauaka ukiyaki hepene yapura akiyaki murikimaka somehoasi kakenafapo.

<sup>5</sup> Anoane hepene yapura pasimarakano hisiane nōmo somehokosapoko asiane nōmo ano niane makáraraka somehokosafapo. Arirakano ano hauaka wo reke anoaki makata fasereperakano nōmo ní wakapu amo siahoasifasekeno makata ane repo kaiyisimo somerakanapo.

<sup>6</sup> Nōmo ní yia kekereraka somesa satiki, aporo himu rekeeanafonosamo somera aiyáka somehoafunufapo. Asiane nōmo somerakanano ane kakaro somehokosapo. Nōmo kakaro someraka nōmo ano niane kekereraka somehokosapoko asiane, aporomo anoaki someraka, "Né aporo káraro." Airapaka nōmo ano niane kekereraka somehokosafapo. Nōmo makata rakisiane soko aporomo asekeea, arirakano nōmo some kasane soko aporomo kaikia, asiamo nōmo ainane soko, nōmo rakirane soko ipu asekeea anoane hemakapukusapo. Asiamo ano niane makáraraka somehokosafapo.

<sup>7</sup> Arirakano Kotimo anoaki makata kára tarirakan nōmo asesapo. Nōmo asesasamo ano ní yia makáraraka rekeafunureapo. Asiāne ano ní makáraraka rekeakoahoamo ano kaua keta ásia<sup>‡</sup> Kotimo kasá amo karesapo. Keta ásiane Satanemo aporo raipamo ano akareraka aiyáka ketamo ano karerakan tesapo.

<sup>8</sup> Ano teraka reke yape isiamo nōmo Kotiaki wáraka, "Keta asiamo ano akarerane metakarinie."

<sup>9</sup> Airakano Kotimo anoaki someraka, "Nōmo neane hemakapukua yaku ararehokosa ane siapo. Asiamo né roraraka rekeno, nōmo wakapu amo né mawakapuhokosapo." Airakano ano roraraka reke yia, hisiraka rekenafapo. Ano rorasa nine seseraka rekenapo. Asiamo Keresomo wakapu anoyaki rekerakano kaikia, ano seseraka rekenapo.

<sup>10</sup> Ano roraraka reke yia nōmo Keresopoko rakiraka reke, aporo metakiramo anoaki mainamarerakan soko, makata amo ano ayakare, aiyáka mekeraka yaiya rakiraka rekenapo. Arirakano ano mokoatikirakan soko, Keresopoko nōmo yaiya rakiraka reke ano kusuhopopo. Asiāne nōmo someraka, "Siapo," airakanapo. Asiamo ano roraraka rekeno, Keresomo ano ararenapo. Ararerakanano wakapuaka rekenapo.

*Poremo Korini aporo hinamoane kára hemakapusuane oyapo.*

<sup>11</sup> Fana repo ano kekerehoafunusa nine repo ano kekeresafapo. Repo ano kekerehoafonorakan nōmo aporo himu rekeeanafonosamo somehora aiyáka nōmo somerakanapo. Repo ano aporo wakasemaporakan yia, kotafe tarira aporoane repo makama fanasa amo ano marokesafapo.

\* <sup>12:2:</sup> Hepene yapurane isiane Koti ipi rea ayapo, aisapakae. † <sup>12:3:</sup> Hepene hauaka ane yano motosa Párataese, aiyáka somerane hauaka ane kotesapo. ‡ <sup>12:7:</sup> Keta somesane isiapo kepoane hemakapurakanafapo. Asiāne isiapo hemakapuraka keta ane makata takamara ayareapo.

<sup>12</sup> Tarira aporomo arakira ayíáka, nōmo makata rakirane Kotimo wakapuyaki raki-rakano repo aserakasupo. Tarira aporomo arakira ayíáka nōmo rakisiante oyapo. Kotimo ipi hemakapukua wakapu rakirane nōmo rakirakano aporomo aseraka someraka, "Kotimo rakirane ayareapo," aihoasimo nōmo rakisiapo. Tarira aporomo rakirane repo asekeasimo nōmo maiya káramo rakisiapo. Asiamo nōmo tarira apororaka rakisimo Kotimo ano murikimasane repo aserakasupo.

<sup>13</sup> Arirakano repo anoaki someraka, "Keresoa paosa aporo hinamo sése ape metakira á risiane nōmo makama fanaraka, isu makama kesekesapo." Aisaporakane nōmo re mayíáka makama kesekesare? Nōmo iane araresa ayíáka, re soko ayíáka araresapo. Asiane repo moneane ano arareraka ano kasafapo. Repo moneane nōmo mokoanafonosane nōmo hasaka rakisiare? Repo saperaka hasaka hemakapusuane metakarinie.

<sup>14</sup> Yumo yape isiamo repo apea ano peakosakipoko makata kemo sarikesapo. Ano peraka repo moneane nōmo makasie, aihokosafapo. Repo moneane nōmo makosapoko hemakapurakarifapo. Repo anoaki himu auaraka hemakapukua risikiasimo nōmo hemakapurakaripo. Arirakano hokosamo ipi atape ipi ama tetápoko makata nakosa soko, pasu soko, karáfapo. Ipi atamo ipi hokosaki karápo. Aina ayíáka re nōmo hokosa asiasamo nōmo reane ararehoko hemakapurakanapo.

<sup>15</sup> Repo atane anosasamo nōmo makata su reaki kakakosapo. Re nōmo arareraka makotehoko nōmo wakapumo repoko rakiakosapo. Nōmo re kára seseraka hemakapusuasamo, repo ano wakasema hemakapukusare?

<sup>16</sup> Repo moneane nōmo mosafapo. Aíyaka nōmo somesane repo kaikia kakarorakae, aisapo. Aisa nine repo isuaki someraka, "Poremo kotafe hokoa, ísiapo aserapaka, mahoperaka tau hakimasapo."

<sup>17</sup> Airakano nōmo reaki someraka, "Masinaka nōmo hakimosare? Nōmo pusiesa aporoane pekeia ipu kotafe hokoa makata hakimosare? Anoaki makata yakapa kasare?"

<sup>18</sup> Nōmo Taetase soko, Keresoa paosa aporo mae meta soko, repo sése apea pusiesapo. Pusierakano Taetase repo sése apea peraka, tetápō makata meta hakimasafapo. Taetasemo hemakapura apura ayíáka, nōmo soko, ayíáka hemakapurapo. Epo arakira ayíáka, nōmo soko, ayíáka rakirapo," airakaripo.

<sup>19</sup> Arirakano repo hemakapuraka, "Ísiapo Pore patera asekeasimo Poremo ipi yiamo makáraraka tafáraka somerakae." Aíyaka repo hemakapurakanare? Repo aíyaka hemakapukupo. Hameo, Kotimo kairakano ísiapo Yasu Keresoaki kataka marekea risike reane ararehokosakipoko somesapo.

<sup>20</sup> Ano peraka re koteaka risikino aseakaripo. Asiane re koteaka risike soko metao, watikiaka risike soko metao, mayíáka risikino asekeanarakapo. Arirakano keseke ano peraka re aseramo, nōmo reaki mahisiraka soko metao, reaki seseraka soko metao, ano himeteripo. Arirakano repo anoaki mahisiraka soko metao, seseraka soko metao, ano himeteripo. Ano aperamo nōmo aseane repo tafatafanane soko, kakanakenane soko, tapare sapenane soko, repo namina mena himu tumurumo hemakapurane soko, aporo meta mainamarerane soko, aporo metaki some koakamarekea somerane soko, re namina makáraraka koaretaenane soko, hasakaraka mokome rakirane soko, repo yaiya rakiraka risikino nōmo asekeanarakapo. Asiamo repo ayíáka rakiraka risikinone ane metakarinie.

<sup>21</sup> Ano aperamo aseane aporo metakiramo hinamo hakimorane soko, maiya suamo hinamo hakimokoako hemakapurane soko, repo yaiya rakiraka risike watikisane hufitaeraka rukupatehoanafonosekeno aseraka, repoko nōmo hiripuhokosapo. Repo asekeasimo repo watikisane Kotimo anoaki tarirakano, ano kaíyahokosapo. Ano apera maiya amo ayíakanarakapo.

## 13

*"Repo makata watikiaka rakisiante maropohoanafonosekeno, ano aperamo re maropo-hokosapo," aíyaka Poremo somesane oyapo.*

<sup>1</sup> Fana yape tetá repo sése apea ano pesapo. Yumo soko, yape isiamo ano peakosakipoko, nōmo makata kemo sarikesapo. Arirakano Kotimo sawia popasane oyapo. "Hukuarura maiya amo aporoaki fanasihokosane motoakosakipoko, aporo tetámo asesa soko metao, aporo isiamo asesa soko metao, makata asesane hakásá nineraka somehoanie." Asesa aporomo hakásá nineraka somehoanafonarakano fanasihokosane metakarinie." Aíyaka popahoareapo. (Lo 17:6)

<sup>2</sup> Fana ano yape tetá pesa maiya amo aporo watikiaka risiaki nōmo someraka, "Re watikiaka risikiakopo," aíyaka nōmo somesapo. Yape tetá pesa maiya amo ayíakakopo, aisa ayíáka, yumo soko ano yamenoa reke, nōmo efera hunia somerakanapo. Nōmo someraka, "Ano apera maiya amo pekeia aseane, aporo fana watikiaka risiane yaiya watikiaka

risikino aseraka soko metao, aporo metakiramo kawe makata watikiaka rakiraka risikino aseraka soko metao, repo ayiáka rakiraka risikino re nōmo kamenakahokosafapo. Kamenakahoaanafonoraka fanasihokosane soko metakariakosafapo. Kakaro fanasihokosapo.

<sup>3</sup> Repo someraka, "Keresomo né aeyaka some karáka tiki some karakao, ane isiapo mayiáka hemakapukusare?" Aiyaka repo somerakane mairakare? Repo makata watikiaka rakirakan maropohokosakipoko Keresomo asekepayanafapo. Asiame repo makata watikisane mafahokosakipoko, repo himua Keresomo wakapuaka rakirapo.

<sup>4</sup> Arirakano fana Keresomo kauane wakapuhoanafonoraka, ira matopesa paremarerakano e kusuapo. E kusuane Kotimo wakapuane karakano, wakapu ane maka yaiya rekenapo. E wakapuhoanafonoraka rea ayiáka, isu soko wakapuhoanafonoraka risikinapo. Asiáne Kotimo wakapuane Yasuaki karakano, wakapu ane epo maka area ayiáka, isiapo soko Kotimo wakapuane maka, wakapuaka risike re maropohokosapo.

<sup>5</sup> Arirakano re namina hakása hakásaraka himua fana koanie. Kokoa someraka, "Ano Kotiaki kakaro himu hakásaraka rekenare? O, Kotiaki himu hakásaraka rekenafare?" Aiyaka repo namina himua kokoa hemakapunie. Repo namina hakása hakásaraka someraka, "Yasu Kereso ano himua rekenapo," aiyaka somehoasimo nōmo hemakapurakaripo. Repo Yasuaki himu hakásaraka hemakapunafonosekenone, e re himua rekenafapo. Rekeanafonorakanone, re siaraka risikinafapo.

<sup>6</sup> Asiame repo anoane someraka, "Poremo Yasuaki himu hakásaraka hemakapukua rekenapo. Asiame e siaraka rekenapo." Aiyaka repo somehoasimo nōmo hemakapurakaripo.

<sup>7</sup> Arirakano repo watikiaka rakiakohoamo isiapo repoko farimaka kurikurirakanapo. Repo watikiaka rakiianafonorakan aporo metakiramo asekeia isuane makáraraka someraka, "Pore ipu koteaka rakisiapo," aihoasimo repoko kurikurirakanafapo. Aporomo isuane makáraraka soko metao, makárahoanafonoraka soko metao, isiapo repoko farimaka Kotiaki kurikurirakanapo. Re ereketae koteaka risikiasimo isiapo hemakapurakaripo. Asiame isiapo repoko farimaka kurikurianane kepo akipoko kurikurirakanapo.

<sup>8</sup> Arirakano re ereketae koteaka risike Kotimo kakaro someane kekemarkanone, isiapo reane maropohokosafapo. Kakaro someane isiapo rakikia rosaka taehokosakipoko rakiikanapo.

<sup>9</sup> Arirakano aporo metakiramo ano hokomaka someraka, "Poreane wakapuaka rekenafapo." Airakano yia ano wakapuaka rekenapo. Re namina Keresosane paroaka risikino, ano seseraka rekenapo. Asiame nōmo re maropohokosane kepo makipoko maropohokosare? Nōmo re maropohoasifareapo. Asiame re namo kakaro koteaka risikiasimo nōmo re farimaka kurikurirakanapo.

<sup>10</sup> Arirakano Unihae Kotimo ipi makata rakirane rakisimo, ano murikimasapo. Murimaka epo wakapuane anoaki kasapo. Asiame Kotimo wakapuamo nōmo reane ararehoko hemakapurakaripo. Kotimo wakapuamo nōmo reane maroporaka fanasihoko hemakapurakifapo. Asiame pipu yumo ano yameno aeyaka reke, nōmo reaki sawi poparakanapo. Ano apera maiya amo, re nōmo kára fanasinapaka, fana reaki sawi poparaka makerakanapo. Asiáne repo makata watikisane maropohoanafonosekeno, nōmo wakapuyaki re maroporaka fanasihokosapo.

#### *Poremo ayapasane oyapo.*

<sup>11</sup> Keresoa paosa aporo maeo, nōmo some yiyo. Reaki nōmo ayaparakanapo. Repo namina Keresosane koteaka risikiako makata watikisamo reane kirimanapaka koteaka wakapuaka asekeia risikianie. Nōmo someane kakimaka risikianie. Re namina yia himu hakásaraka risikianie. Arirakano aporo metaki tau auaraka risikianie. Arirakano aporo meta himu tumurumo hemakapuramo kepoane soko, auaraka risiramo kepoane soko, Koti ipipo. Ipi reyaki rekeasimo nōmo hemakapurakaripo.

<sup>12</sup> Keresoa paosa mae papa repo namina yia hokono mokoanie.

<sup>13</sup> Keresoa paosa aporo hinamo suamo reaki hemakapurakaripo airapakae.

<sup>14</sup> Unihae Yasu Keresomo re su yaku ararenane soko, arirakano Kotimo re suaki seseraka hemakapurane soko, arirakano Ho Kotesane soko re su himua risikiasimo nōmo hemakapurakaripo.

## Karesia

### **Karesia sawi one mahemakapukusa someane oyapo.**

Sawi one Keresoa paosa aporo hinamo Karesia hauaka á risiaki Poremo poparaka makesapo. Fana Karesia hauaka á Pore kimisi puraka, aporo hinamomo Yasuane hemakapusimo some kasapo. Karesia hauaka á ape sumu metakira Anitioke taonea soko, Aikoniame apea soko, Risitara apea soko, Tepe apea soko Yasuane Poremo some kasapo.

Karesia aporo ane Yu aporohoanafonoraka risia nine Yasuaki himu hakásaraka hemakapukua Keresoa paosapo.

Poremo someraka, "Keresoa paohoasimo, Yasu Keresoaki himu hakásaraka hemakapukua risikianie," aisapo. Asiamo Karesia aporoane Yu aporohoanafonosa nine Keresoa paohoareapo. Keseke Pore pusuakipoko Yu aporo metakira pekea someraka, "Re Keresoa paosa aporomo Mosesemo somemanane ane kekemarakaka, kau hahaeraka patehoaniesane, kekemahoanie." Aíyaka kotafe some akaramo Poremo somesane mawakasemasapo. Asiakipoko Poremo saperaka, aporoamo kotafe some karakano kaisiane, maropohoasimo Poremo sawi one poparaka makesapo.

### **Karesia sawia some kepo parakuraka popasane oyapo.**

1:1-5 Sawi poparaka kepo marekea popasane oyapo.

1:6-2:21 Poreane Tarira aporohoasimo Kotimo murikimasapo. Aporomo kotafe some karakano, kotafe some akarane kakimaka kekemahokopo.

3:1-4:31 Kotiyaki yaiya risikiakosakipoko Yasu Keresoaki himu hakásaraka hemakapunie. Kaumo hemakapukua rakira somemanane ane kekemahoane siahoasifareapo.

5:1-6:10 Kaumo hemakapura akipe Ho Kotesamo hemakapura tati kakanakeraka yunuraka risikinapo.

6:11-18 Poremo aíyaka someaka faraka ayapasapo.

*Keresoa paosa aporo hinamo Karesia hauaka á risiaki Poremo sawi poparaka makesane oyapo.*

<sup>1-2</sup> Yasu Keresoa paosa aporo hinamo re su Karesia hauaka á ape sumu sua risiaki ano Poremo sawi one poparaka makerakanapo. Arirakano Yasu Keresoane some kakasimo Kotimo ano tarira apororaka rakiraka rekeasimo murikimasapo. Kotimo ano murikimasane repo hemakapusimo nōmo somerakanapo. Epo makata rakirane rakisimo aporo metamo soko metao, aporo yakaimo soko metao ano murikimasafapo. Yasu Keresope ipi Ata Koti tetapō ano murikimaka tarira apororaka rakirane nōmo rakisimo ano murikimasapo. Arirakano ano murikimasa Koti amo Yasu kusuane maturikia taesapo. Arirakano nōmo soko, Keresoa paosa aporo mae anoyaki hakása risiamo soko, isiapo suamo reane hemakapurakanapo.

<sup>3</sup> Arirakano isiapo Ata Kotimo soko, isiapo Unihae Yasu Keresomo soko, re hemakapukua arareraka, re auaraka risikiasimo isiapo hemakapurakaripo.

<sup>4</sup> Isiapo Ata Kotimo hemakapusuane Yasumo kekemarakaka rakisiapo. Kekemarakaka rakiraka, isiapo makata watikisane mafahokosakipoko Yasu isupoko farimaka kusuapo. Arirakano maiya yumo hauaka wo makata watikisamo isu kirimaraka mokoatikihoko-hoamo isu mafasiakosakipoko Yasuane kusuapo.

<sup>5</sup> Atamo repoko wakapuaka rakisisamo isiapo maiya suamo Ataki kekereraka risikiakoripo. Kakaroripo.

*Yasuane hemakapuraka Keresoa paohoasimo some kotesa hakása yine kayane oyapo.*

<sup>6</sup> Keresomo re kamenakaraka ararena aeyaka Kotimo re murikimaka peaesapo. Murikimaka peaes nine Keresoa paosane repo foakayia metakarieapo. Asiamo repo metakarisikino ano fofaripo. Repo Yasuane hemakapusakipoko some metane repo kekemahoareapo.

<sup>7</sup> Asiane Yasuane hemakapusakipoko some kotesa hakása yine kakenapo. Some kotesa meta haku kakenafapo. Kakanafonosa nine repo some meta kakimakasimo aporo metakiramo kakaro some kotesane sanasiraka some meta haku some karaka, réane ipu kirimarakanapo. Kirimaraka repo Yasuaki hemakapusuane ipu mokoatikirakanapo.

<sup>8</sup> Fana some kotesa nōmo reaki some karakasuane, kakaro someane some kasapo. Asiane isiapo tarira aporoane hakása metamo soko metao, hepene aporomo soko metao, keseke, some kotesa sanasiraka, some meta haku some karakanone, aporoane Heao hauaka á Kotimo fanasihoko motoakosapo.

<sup>9</sup> Fana isiapo reaki some one some karakasuane, efera hunia soko, some one reaki paroaka some karakananapo. Yasu Keresoyaki hakása yia risikiasimo some kotesa repo

kakimasakipoko some meta haku aporo metamo reaki some karakanone, aporoane Heao hauaka á Kotimo fanasihoko motoakosapo.

<sup>10</sup> Aporomo anoaki sesehoasimo nōmo some karakanare? Wae. Kotimo anoaki sesehoasimo nōmo some karakanapo. Aporomo ano aseraka sesehoasimo nōmo ayiáka some karakanafapo. Aporomo anoaki sesehoasimo rakisia satiki, ane, ano Keresomo aporo raipa rekeafunufapo. Asiane ano Keresomo aporo raipapo.

#### *Ano tarira aporo rekeasimo murikimasane oyapo.*

<sup>11</sup> Maeo, kaisie. Some one nōmo kakaro somerakanapo. Yasuane hemakapusimo some kotesa nōmo reaki some karakasuane aporomo somefapo. Kotimo somepō.

<sup>12</sup> Some kotesa ane aporo metamo anoaki somesa ayafapo. Aporo metamo kaisiamo anoaki somesafapo. Yasu Kereso ipi hakásamo anoaki tarirakano asekea, nōmo reaki some karakanapo.

<sup>13</sup> Arirakano wate fana Yu aporo sisimamo somemaneane nōmo kekemasa maiya amo, nōmo ainane repo kaisiapo. Aporo hinamo Keresoa paoraka risiane maiya suamo nōmo mokoatikiraka reapo.

<sup>14</sup> Yu aporo sisimamo somemaneane nōmo kakimaka, kakaro kára kakimaka kekesapaso. Kekemaraka aporo metakira isina hakásamo hokono murisiante, nōmo makama kesekeasapo.

<sup>15</sup> Arirakano ano hokono mareasiraka, ano keseke Yasuaki rekeako parihokosane Kotimo fana hemakapukua reasusupo. Hemakapukua reasasamo epo anoane kamenakaraka arareraka, epo makata rakirane rakisimo ano murikimasapo.

<sup>16</sup> Kotimo ipi hemakapukua murikimaka, re Yu aporo hoanafonosaki nōmo Yasuane some kakasimo, ipi hokosa Yasuane anoaki tarisiapo. Tarisiante aporo metaki nōmo kaikia haésfapo.

<sup>17</sup> Yarusarame sitia tarira aporo fana murikimasa iaki soko nōmo kaiyako hisiafapo. Arirakano fana ano Arépea\* hauaka á pukua, nina, Arépea hauaka aeyaka, keseke Tamásakase taonea pariperaka, ereketaeraka paripesapo.

<sup>18</sup> Keremisi isia faraka, ano Yarusarame sitia Pita aseko hinaka, sokō tetámo eyaki hakásamo waka reapo.

<sup>19</sup> Waka reke, tarira aporo metakirane nōmo asesafapo. Unihae Yasumo ipi mamanea Yameseane hakásamo nōmo asesapo.

<sup>20</sup> Nōmo sawi popana one kakaro poparakanapo. Kotimo ano aserakano nōmo kotafe poparakanafapo.

<sup>21</sup> Arirakano Yarusarame sitiane metakarikia Siria hauaka á soko, Sirisia hauaka á soko, nōmo some kakako pusuapo.

<sup>22</sup> Nōmo some kakako pusua maiya amo, Yutía hauaka á ape metakira Keresoa paosa aporo hinamo sarimasa amo ano hikumisi asesafapo.

<sup>23</sup> Asekeanafonosa nine aporo metakiramo anoane somerakano ipu kaisiapo. Kaisiane metakiramo someraka, “Isu mokoatikirakasu aporoane, yumo Keresoa paoraka rekenapakae. Keresomo someane marutaehokosakipoko rakirakasu aporoamo, yumo Keresomo someane some karakanapakae.” Airakano Keresoa paosa aporo hinamo Yutía hauaka á risiamo kaisiapo.

<sup>24</sup> Asiamo ano Yasuaki rekeako parisapakano ipu kaikia Kotiaki kekeresapo.

## 2

#### *Yarusarame sitia Pore hisiane oyapo.*

<sup>1</sup> Keremisi senakis (14) faraka, Pánapase eto efera hunia Yarusarame sitia hinaka, Taetase soko etapo karikia hisiapo.

<sup>2</sup> Hisiane Kotimo anoaki, “Ne hinie,” aiasasamo ano hisiapo. Kotimo anoaki hinierakano, fana sésea aporo fanaraka asekea risia aporo akiyaki hakásamo nōmo somesapo. Ipu someraka, “Poremo hasaka some karakanareapo,” airapaka iaki nōmo kakama somesapo. Yu aporo hoanafonosamo Yasuane hemakapusimo some kotesane, nōmo some karáne iaki somesapo.

<sup>3</sup> Arirakano Taetase anoyaki pesane, ipi Kiriki\* aporo rea nine ipu asekea, aporo metakiramo hemakapuraka, “Taetase kau hahaeraka patehoafunupo.” Aiyaka aporo metakiramo hemakpusua nine, sese aporo fanaraka risiamo nōmo someane patera asekea kekemasapo. Asiamo ipu hemakapusuane rukupateraka, Taetase kau hahaeraka patehokosane metakarisiapo.

\* <sup>1:17:</sup> Arépea hauaka á amano risikianafonoraka yao kauanesapo. \* <sup>2:3:</sup> Kiriki aporoane Yu aporofapo. Yu aporo hoanafonosamo namina kau hahaeraka patenafapo.

<sup>4</sup> Arirakano aporo metakiramo Yu aporomo somemane paroaka kekemasa aporoamo, tau maserapi pekea, isuyaki hakāsa sarimasapo. Sarimaraka, aporoamo someraka, "Isu kakaro Keresoa paosa aporopo," aíyaka ipu kotafe someraka isuyaki hakāsa sarimasapo. Sarimaraka hemakapuraka, "Marirakano kakaro Keresoa paosa aporomo Yu aporomo somemaneane kekemarakanafare?" aíyaka hemakapusuapo. Arirakano isu tipura makesa asekea area aiyáka, Yu aporomo somemanemo isuane aiyáka asekea risiapo. Asiane Yasu Keresomo isu tonotaesapo. Tonotaesa nine kotafe Keresoa paosa aporomo isu efera hunia tipura makeasimo aina aiyáka asiapo.

<sup>5</sup> Arirakano re Yu aporoohoanafonosamo Yasuane hemakapusakipoko some kotesa amo namo kepoane yaiya kairaka risikiasimo nōmo asekea reapo. Asekea reasasamo ipu someraka, "Kau hahaeraka patehoanie," aisa nine nōmo kakimaka aosafapo. Ipu someane isiapo wakasema soko kekemasafapo.

<sup>6</sup> Asiamo Yarusarame sitia aporo sarimasane, sése aporo fanaraka risiane nōmo reki somerakanapo. Repo metakiramo hemakapuraka, "Aporoane aporo fanaraka risikinapo," aíyaka hemakapuraka yia, iane aporo fanaraka risiane soko metao, aporo wakasemaraka risiane soko metao, nōmo hemakapuraka, "Ane nenakamaka makatareapo," aíyaka hemakapurakano Kotimo soko hakāsa yine hemakapurapo. Arirakano aporo fanaraka risiane Kotimo hikumisia nenakamaka makata asiapo. Yasuane hemakapusimo some kotesa nōmo some kasane Yarusarame sitia aporo sarimasamo kaisiapo. Kairakano sese aporo fanaraka risiamo, nōmo someane ipu hemakapuraka, "Someane siareapo," aisasamo nōmo some akiyaki ipu some meta paoraka some kasafapo.

<sup>7</sup> Arirakano tarira aporomo hemakapuraka, "Yu aporomo Yasuane hemakapusimo, some kotesane some kakasimo Kotimo Pitane murikimasapo. Murikimasa aiyáka Yu aporoohoanafonosamo Yasuane hemakapusimo, some kotesane some kakasimo Kotimo Poreane murikimasapo." Aíyaka tarira aporomo hemakapusuapo.

<sup>8</sup> Asiamo Pitamo Yu aporoaki tarikia rakisimo Kotimo Pitane murikimasapo. Arirakano nōmo Yu aporoohoanafonosaki tarikia rakisimo Koti hakāsa yiamo anoane soko murikimasapo.

<sup>9</sup> Asiamo tarira aporo fanaraka risiane, Yamese, Pita, Yone, ipu aseane, nōmo rakisimo Kotimo ano hemakapukua arareraka murikimasekeno asekea, ipu ano soko, Pánapase soko eto hokono mosapo. Isina makata hakāsa rakirasamo isina hokono mosapo. Hokono mokoa, ipu someraka, "Isiapo Yu aporoaki some karakano, tetápo Yu aporoohoanafonosaki some kakanie.

<sup>10</sup> Some karaka yia, Yu aporo Keresoa paosa aporo makata forokoa risiane ararehoanie." Arirakano nōmo soko hakāsa yine hemakapuraka aosapo.

*Anitioke taonea Pitamo hasaka rakisekeno Poremo eane maroporaka somesane oyapo.*

<sup>11</sup> Keseke Anitioke taonea Pita pesa maiya amo epo hasaka rakisiasamo, ipi hikumisia nōmo someraka, "Nōmo hasaka arakire," asiapo.

<sup>12</sup> Aisa amo kepoane oyapo. Fana Pitamo Yu aporoohoanafonosayaki hakāsa toke, makata nesapo. Makata hakāsa nesa nine, Yamesemo aporo táké perakano asekea, Yu aporoohoanafonosayaki Pitamo hakāsa toke makata nesane metakariapo. Metakariika iane fasikia reapo. Aporo pesamo Yu aporomo somemaneane kekemarakana, "Kau hahaeraka patehoanie," aisa aporoamo aserapaka, Pitane fasikia Yu aporoyaki reapo. Aporoamo someraka, "Yu aporo Yu aporoohoanafonosayaki hakāsa tokoakopo." Aisasamo Pita ipi himu tetáraha hemakapukua fasikia reapo.

<sup>13</sup> Yu aporo metakiramo soko himumo namoraka risiamo, Pitane aseraka, ipi ainane kekemarakana, Yu aporoohoanafonosane makeferaka fasikia risiapo. Pánapasemo soko ipu ainane asekea, ipi soko Yu aporoohoanafonosane makeferaka fasikia reapo.

<sup>14</sup> Fasikia risike ipu Yasuane hemakapusimo some kotesamo kakaro kepoane kekemahoanafonarakano asekea, nōmo Pitaki kakama aporo suamo kaiyisimo nōmo someraka, "Né Yu aporo nine, nōmo Koti hemakapunafonosa aporomo aina aiyáka nōmo ayiane. Asiamo Yu aporomo ainane Yu aporoohoanafonosamo murikimakasimo nōmo tariane siahoasifareapo." Aíyaka Pitane nōmo maroporaka somesapo.

*Some kotesamo kakaro kepoane oyapo.*

<sup>15</sup> Isu hokono murisia maiya amo isu Yu aporo hokono murisiapo. Yu aporoaki Kotimo ipi somemaneane some kakasimo Kotimo ísuane murikimasapo. Murikimarakano, Yu aporomo uyaka hemakapusuapo. Yu aporomo somemaneane Yu aporoohoanafonosamo kekemahoanafonarakana, ipu watikiaka rakiraka risikinapo, aíyaka isiapo Yu aporomo hemakapurapo.

<sup>16</sup> Isu Yu aporo yiamo Yu aporomo somemane kekemarakana rakiraka risikino isuaki Kotimo someraka, "Re aporo ereketaesapo. Re siareapo," airafapo. Asiane aporomo

Yasu Keresoaki himu hakásaraka hemakapukua risikino aporoaki Kotimo someraka, "Re siareapo. Re aporo ereketaesapo," airapo. Isu Yu aporomo soko, re Yu aporo hoanafonosamo soko, isina suamo Yasu Kereso hákasaki himu hakásaraka hemakapureapo. Yasu Keresoaki himu hakásaraka hemakapura aporoaki Kotimo someraka, "Re siareapo. Re aporo ereketaesapo," airapo. Yu aporomo somemanane hákasa aporomo kekemasasamo Kotimo someraka, "Re siareapo. Re aporo ereketaesapo," airafapo. Somemanane hákasa kekemarakira rakira aporoaki Kotimo someraka, "Re siareapo. Re aporo ereketaesapo," aiyaka someraka kakenafapo.

<sup>17</sup> Arirakano isu Yu aporo Keresoa paoraka risiamo Yasu Keresoaki himu hakásaraka hemakapuraka, Yu aporomo somemanane kekemanane metakariasiapo. Asiamo Yu aporo metakira Keresoa paohoanafonosamo isuane aseraka someraka, "Re Yu aporomo somemanane kekemahaanafonosamo, re Yu aporo hoanafonosa asiapo. Re aporo watikisapo." Airakano isuane Yasu Keresomo mawatikisare? Wae, aiyaka somehokopo. Someane aporo masusasamo somera aiyáka somerakae.

<sup>18</sup> Arirakano ano Yu aporo reamo Yasuaki himu hakásaraka hemakapuraka, Yu aporomo somemanane kekemasane nōmo metakariasiapo. Metakarisiane efera hunia Yu aporomo somemanane kekemarakanone, ano aporo watikihoareapo, aihokosapo. Nōmo some one kepoane yakapare? Somemanane suane aporo hakásá metamo epo ipi wakapuamo kekemahaone siahoasifareapo. Epo somemanane meta koareaeraka fasikia kekemahokosapo. Nōmo soko nōmo wakapuamo Kotimo somemanane kekemarakira, somemanane metane koareaeraka fasikia rekeakosapo. Arirakano somemanemo someraka, "Aporomo somemanane metane koareaeraka, e watikihi reke, eane makukusapo," aiyaka somesapo.

<sup>19</sup> Arirakano nōmo Kotimo somemanane kekemarakira somemanane koareaerakanano, somemanane amo hukururaka ano kusua asiapo. Asiane Yasumo ano farimaka kusuapo. Yasu Kereso ira matopesa paremarerakanano kusua aiyáka ano eyaki hakasa kusuapo.

<sup>20</sup> Asiamo yumo somemanameamo ano hukurunafonosasamo ano tonotaesa asiapo. Arirakano Yasu Kereso kusua maturikia taesa aiyáka, ano aiyáka maturikia taesasamo, hitaferaka rerane nōmo masapo. Keresoane ano tua reasasamo ipi rerane nōmo maka rekenapo. Ano ní rerane maka rekenafapo. Kusuane maturikia taesasamo ano ní rera aiyáka rekenafapo. Ano kau hitaferaka reke, Kotimo hokosa Yasu Keresoaki nōmo himu hakásaraka hemakapukua rekenapo. Kotimo hokosamo anoane himu tumurumo hemakapuraka ipi kau hitaferaka rerane anopoko farimaka api kasápo.

<sup>21</sup> Kotimo ano kamenakarakira araresane nōmo metakirirakanafapo. Aporomo Kotimo somemanane kekemarakano, Kotimo somemanameamo isu maereketaesa satiki, Yasu ne-nakamakayia kukufunureapo. Asiane somemanemo isu maereketaehoanafonosasamo, Yasumo isu maereketaehoko kureapo.

### 3

#### *Koti hikumisia re ereketaeraka risike ainane kepoane oyapo.*

<sup>1</sup> Aporomo metakiramo reaki kotafe somerakanano repo some ane kakimasapo. Kakimaraka repo koteaka hemakapurane takekeea hemakapura fareapo. Marirakano kotafe some ane kakimasare? Yasu ira matopesa paremarekeea rusua kusuane nōmo reaki someaka fasapo. Somerakanano repo suamo kaisiapo. Kotafe someane epamu reaki hokokarakasare?

<sup>2</sup> Makata meta nōmo reaki kairakanapo. Kotimo somemanane repo kekemarakira rakisi-akipoko, Kotimo reaki Ho Kotesa kasáre? Wae, akipoko kasáfapo. Yasuane hemakapusimo some kotesa karakasuane repo kakimasakipoko, Kotimo reaki Ho Kotesa kasáre? Ao, akipoko kasápo.

<sup>3</sup> Fana some kotesane repo kepomarekeea kaisia maiya amo, Ho Kotesamo araresane repo maka rakiraka risiapo. Yumo rakikia makoana maiya amo Ho Kotesamo makata araresane repo metakarikia kaumo hemakapusua kekemarakira rakiraka risikiakosare? Asiamo yumo repo mariraka toke hasakaraka hemakapurakanare?

<sup>4</sup> Ho Kotesamo reaki makata tarisiane repo metakirirakanare? Makata tarisiane nenakamaka makata tarisiapaka hemakapurakanare? Repo hemakapusuanne hasakaraka hemakapuraka.

<sup>5</sup> Kotimo reaki Ho Kotesa kaka, reyaki reke epo wakapumo hemakapukua rakirane rakisiapo. Repo Kotimo somemanane kakimasakipoko asiare? Wae, akipoko asiafapo. Yasuaki himu hakásaraka hemakapukua risiakipoko asiare? Ao, akipoko asiapo.

<sup>6</sup> Kepoane hemakapukusakipoko Eparahameane hemakapunie. Arirakano Kotimo sawia popasane hemakapunie. Eparahamemo Kotiaki himu hakásaraka hemakapukua

reasasamo Kotimo Eparahameaki someraka, "Nómo anoaki himu hakásaraka hemakapusuasamo, né aporo ereketaesapo. Né siareapo," aisane Kotimo sawia popahoareapo. (*Stat 15:6*)

<sup>7</sup> Asiamo Kotimo sawia popasa aeyaka repo úyaka hemakapunie. Kotiaki himu hakásaraka hemakapura aporoane kakaro Eparahamemo aporo ira ayapo.

<sup>8</sup> Arirakano wate fana Yu aporohoanafonosane Kotimo makotehokosane, Kotimo sawia kakama matarikia popahoareapo. Asiamo Yu aporohoanafonosamo Kotiaki himu hakásaraka hemakapukua risikino, iaki Kotimo someraka, "Re siareapo. Re ereketaesapo," airapo. Aihokosane Kotimo sawia popasane oyapo. Eparahameaki Kotimo someraka, "Eparahameeo, né aeyaka aporomano hauaka sua risiane nōmo makotehokosapo." Aisapo. Aisane Kotimo sawia popahoareapo. (*Stat 12:3; 18:18; 22:18*)

<sup>9</sup> Arirakano Eparahamemo Kotiaki himu hakásaraka hemakapukua rekeno, Eparahameane Kotimo makotesa ayíáka aporomo Kotiaki himu hakásaraka hemakapukua risikino aporoane Kotimo makotenapo.

<sup>10</sup> Arirakano Kotimo somemaneane Kotimo sawia popasane kakama someraka, "Somemaneane aporomo kekemarakana rakiraka, somemane hakásá meta mamosoraka koaretaerakanone, Kotimo fanasinane motoakosapo," ayíáka Kotimo sawia popasapo. Aporomo hemakapuraka, "Nómo Kotimo somemane kekemarakana rakiraka, Koti hikumisia ano siaraka rekeakosapo." Ayíáka hemakapurakanone, Kotimo fanasinane motoakosapo. Asiamo Kotimo somemane suane aporomo kekemahoanafonorakano, Kotimo iane fanasina motoakosapo. (*Lo 27:26*)

<sup>11</sup> Asiamo Kotimo somemaneane aporomo kekemarakano, aporoaki Kotimo someraka, "Né siareapo. Né ereketaesapo," ayíáka Kotimo somerafapo. Asiáne aporomo Kotiaki himu hakásaraka hemakapukua rekeno, aporoaki Kotimo someraka, "Né aporo ereketaesapo. Né siareapo," airapo. Airakano aporoane farearaka yaiya rekeakosapo. Asiamo Kotimo sawia popasane soko hakásá yiýareapo. (*Habakuk 2:4*)

<sup>12</sup> Arirakano makata one hemakapunie. Somemaneane hakureapo. Arirakano Kotiaki himu hakásaraka hemakapurane soko hakureapo. Asiamo Kotimo sawia popasane oyapo. "Kotimo somemane suane kekemarakano yaiya rerane makosapo." Aisa nine aporomo Kotimo somemane suane siaraka kekemahoanafonorakano, yaiya rerane makasimo somemanemo aporoane ararenafapo. Asiane yaiya rerane makasimo Yasuaki himu hakásaraka hemaka apuramo aporoane ararenapo. (*Wok Pris 18:5*)

<sup>13</sup> Kotimo somemane suane isiapo kekemahoanafonosamo somemaneamo isuane fanasihoko motoakosapo. Isuane fanasihoko motoakosane metakarisimo, Yasumo isupoko farimaka, api akara ayíáka Yasumo ipi kauane rukua kasá ayareapo. Kasáne isupoko e háksa fanasiraka kusuapo. Arirakano Kotimo sawia popasane oyapo. "Ira matopesa paremarera aporoane Kotimo kakaro fanasihokosapo." Ayíáka popahoareapo. (*Lo 21:23*)

<sup>14</sup> Asiamo Kotimo Eparahameaki someaka motosane, Eparahamemo aporo ira wainepe pesane makotehokosa ayíáka, Yasu aeyaka Yu aporohoanafonosamo aporo irane soko, Kotimo makotehokosapo. Kotimo Ho Kotesa kakakosaposane, isiapo Yasuaki himu hakásaraka hemakapusuasamo Ho Kotesane makosapo.

"*Kotimo Eparahameaki ayiakakosaposane, Kotimo somemanemo matasosafapo,*" aisane oyapo.

<sup>15</sup> Maeo, repo ainane nōmo somerakanapo. Aporo ipi kukusiraka hitafe reke, ipi hokosamo epo makata kemoane mokoasimo, epo someaka motorapo. Someaka motosane sawia poparaka motorapo. Poparaka motosane kakaro yainapo. Ayiakakosaposane fisirafapo. Some popasa akiyaki aporomo hemakapusuane meta popanafapo. Somesa háksa yíne popanapo.

<sup>16</sup> Asiamo Eparahameaki soko, ipi hokosa wainepe pesaki soko, Kotimo makoteraka ayiakakosaposane someaka motosapo. Eparahamemo hokosa wainepe pesa suaki Kotimo makoteraka ayiakakosaposane someaka motosafapo. Wae, ipi hokosa wainepe pesa hakásá yíne makoteraka ayiakakosaposane someaka motosapo. Aisane epo ipi hokosa wainepe pesa hakásá yíne Keresoane aisapo.

<sup>17</sup> Arirakano nōmo someraka one kepoane oyapo. Kotimo someaka motoraka ayiakakosaposane maiya suamo yainaka rerapo. Yainaka reke keremisi fo harote teti (430) faraka, amo ipi somemaneane Moseseaki Kotimo kasapo. Somemane kasá amo fana Kotimo ayiakakosaposane rukumosakatapisafapo. Fana Kotimo ayiakakosaposane kakaro yasiapo.

<sup>18</sup> Asiamo Kotimo ayiakakosaposane makosakipoko aporomo Kotimo somemane suane kekemarakanone, ane Kotimo ayiakakosaposane makosafapo. Kotimo Eparahameaki

someraka, "Né makoteraka ayiakakosapo." Aisane Eparahamemo kakimasasamo eaki kasapo.

<sup>19</sup> Kotimo ayiakakosaposane siarakano yia, marirakano Kotimo somemaneane motosare? Aporomo makata watikiaka rakirapo. Asiamo aporomanomo makata watikiaka rakirane hemakapusimo Kotimo somemaneane motosapo. Kotimo Eparahameaki someraka, "Nómo wainepe pesane hokosa hakásane nōmo makotehokosapo." Aisane Yasu faserepeasiraka Kotimo ipi somemaneane aporo hinamoane asekea reapo. Kotimo somemaneane epo hepene aporoaki karakano, ipu Moses tipia rea aki karakano, Mosesemo Yu aporo hinamoaki some kasápo.

<sup>20</sup> Arirakano Yu aporo hinamomo Kotimo somemaneane kaiyisimo Kotimo aporo tipia rea aki kasápo. Asiane Kotimo Eparahameaki ayiakakosapo aíyaka someaka motoraka, Koti ipi hákasa yíamo somesapo. Tipia aporo meta aki some kasáfapo.

<sup>21</sup> Somemanemo Kotimo ayiakakosaposane rukumosakatapisiare? Wae, rukumosakatapisafapo. Somemanemo aporomanoane mafareahokosa satiki, somemaneamo isu maereketahoafunureapo. Asiane somemanemo isu mafareahoasifasekeno yaiya rerane karáfapo.

<sup>22</sup> Arirakano Kotimo sawia popasane some one kakenapo. Hauaka wo aporo suane makata watikisamo asekea rekenapo. Aíyaka Kotimo sawia popasane kakaro popasapo. Aporo suamo watikisa ainane metakariane siahoasifasekeno, Kotimo makotenane kakakosaposane makasifareapo. Asiane Yasu Keresoaki himu hakásaraka hemakapura aporoaki Kotimo makotenane kakakosaposane karápo. Kakimara aporoaki kakakosaposane karápo.

<sup>23</sup> Fana Yasuaki himu hakásaraka hemakapura someane faserepesafapo. Aporomo hemakapusuafapo. Some one faserepeasiraka somemaneamo isu tipura akera ayíaka keke asekea reapo. Asekea rekeno isu kau risina Yasuaki himu hakásaraka hemakapura someane faserepeasimo asekea risiapo.

<sup>24</sup> Asiamo Kereso peasiraka isu karikia nesa wafaya asiane Kotimo somemane ayapo. Somemanemo isu wafayaraka asekea reke isiapo makata watikisane tarisiapo. Arirakano Kereso perakano eaki himu hakásaraka hemakapusuakipoko Kotimo someraka, "Re siareapo. Re aporo ereketaerareapo," airapo.

<sup>25</sup> Arirakano Yasuaki himu hakásaraka hemakapukusa maiyane faserepesapo. Faserepasamo yumo somemanemo isu wafayaraka asekea rekenafapo.

<sup>26</sup> Arirakano isiapo aporo suamo Yasu Keresoaki himu hakásaraka hemakapukua risike Keresoa paosapo. Asiamo isuane Kotimo ipi hokosapo.

<sup>27</sup> Asiamo re Keresoa paoraka, Yasu Keresoaki kataka marekea risiane, hea tapukumurirakano re pasu osona ayíaka Keresoane ososapo.

<sup>28</sup> Re namina su hakása yineraka risikinapo. Reane Kotimo someraka, "Né Yu aporopo. Né Kiriki aporopo. Né aporo raipa roposapo. Né aporo raipa roposafapo. Né aporopo. Né hinamopo." Aíyaka Kotimo hemakapurafapo. Re namina su Keresoa paoraka hakása yineraka risikinapo.

<sup>29</sup> Arirakano re Yu aporo hoanafonosane Keresoa paoraka risiasamo re soko suane, Eparahamemo hokosa pariraka risikinapo. Eparahameaki Kotimo makotehokosapo, aíyaka someaka motosane, reaki soko, Kotimo makotenane kakakosapo.

## 4

### *Isu Kotimo hokosa pariraka risiane oyapo.*

<sup>1</sup> Yu aporomo ainane nōmo somerakanapo. Aporomo ipi maeya rekenapo. Ipi maeyane epo ipi hokosasamo, ipi wafayamo makata suane asekea rerafapo. Hauaka soko, makata kemo soko, asekea rekeafunusa nine, ipi hokosasamo ipi asekea rekeane siahoasifareapo. Asiamo hokosa amo ipi asekea rea aporoamo someane kakimaka rakirapo. Hokosa ane nena aporo raipa asiapo.

<sup>2</sup> E hokosa rea maiya amo, aporo asekea rea amo e asekea nina, keseke sisimarka, ipi wafayamo murikimasa maiya á paurakano, hauakane soko, makata kemoane soko, hokosa amo ipi yíamo asekea rerapo.

<sup>3</sup> Aina ayíaka isu Yu aporoane soko asiapo.\* Yu aporomo somemaneamo isu asekea reapo. Isu nena aporo raipa arisia ayíaka somemaneane kekemaraka rakisiapo.

<sup>4</sup> Arirakano Kotimo murikimasa maiya amo Kotimo ipi hokosa pusiesapo. Pusiesane hinamo sakoramo hokosa hokono maresapo. Hauaka wo e rea maiya amo Kotimo Moseseki somemane kasá amo e asekea reapo.

---

\* **4:3:** Sawi meta á 4:3 úyaka popasapo. Fana hauaka wo makata amo soko yatafumo soko rakiniesane isiapo rakisiapo.

<sup>5</sup> Somemane kekemasa aporo hinamoane mafasiakosakipoko Yasumo ipi kauane rukua kasapo. Isu Kotimo ipi hokosa mapariraka karikia nasimo Yasumo ipi kauane rukua kasapo.

<sup>6</sup> Isuane mayiáka ipi hokosapo, aiyaka hemakapususare? Asiamo Kotimo ipi Ho Kotesane, ipi hokosa Yasuyaki reane, isu himua risikiasimo Kotimo pusiesapo. Pusierakanoperaka, isu arareraka, isiaipo Kotiaki someraka, "Atao, Atao," airapo.

<sup>7</sup> Kotimo Ho Kotesa isuaki kasasamo isu aporo raipafapo. Isu kakaro Kotimo ipi hokosapo. Isu Kotimo ipi hokosasekeno, Kotimo ipi hokosaki ayiakakosaposane isuaki soko kakakosapo.

*Poremo Karesia aporoane kára hemakapusuane oyapo.*

<sup>8</sup> Fana Kotiane repo hemakapusuafapo. Hemakapusiraka yatafu yakasa hopoko repo raiparaka rakisiapo. Iane namo kakaro Kotifapo.

<sup>9</sup> Yumo Kotiane repo hemakapurakanapo. Hemakapurakanano Kotimo soko reane hemakapurakanapo. Asiane marirakanano efera hunia poparitarikia yatafu yakasa ho menane rakiako hemakapurakanare? Ipu reaki makata kotesa karáfapo. Kakanafonarakano yia, marirakanano repo ipoko raiparaka rakirakanare?

<sup>10</sup> Maiya yumo re Yu aporomo ainane kekemarakapanapo. Sere metane soko, ere maiya metane soko, yaki metane soko, keremisi metane soko, hokono maka menoraka, makáraraka risikinapo.

<sup>11</sup> Makáraraka risikino, nōmo repoko makata rakirakasuane nenakamaka yia rakireapo. Asiamo ano fofaripo. Reane nōmo kara hemakapurakanapo.

<sup>12</sup> Keresoa paosa aporo maeo, ano pesa maiya amo Yu aporomo somemaneane nōmo kekemasafapo. Re arisia aiyáka ano aiyáka reapo. Yu aporomo somemaneamo ano asekeea reafapo. Arirakanano Yu aporo metakiramo somemaneane repo kekemahoasimo reane kirimarakapanapo. Asiamo ano area aiyáka re aiyáka risikianie. Nōmo reaki paroaka somerakanapo. Nōmo ní ainane repo murikimakanie. Fana repo ano makeferaka risiafapo.

<sup>13</sup> Yasumo someane kepomarekea nōmo some kasa maiya amo, ano makata takamaka reapo.

<sup>14</sup> Ano makata takamaka rekeno, repo ano asekeea reke waforosapo. Wafororakanoya, repo ano asekepayarakaka makeferakasufapo. Ano ararerakasupo. Hepene aporomo ararehokosa aiyáka, repo ano ararerakasupo. Yasu Keresomo ararehokosa aiyáka, repo ano ararerakasupo.

<sup>15</sup> Ano makata takamaka reane aseraka, repo ano kamenakarakasupo. Kamenakarakasomeraka, "Isiaipo hi pokomaka né karása satiki, né arareraka kakafunureapo." Aiyaka repo ano kára kamenakarakasupo. Asiane yumo repo anoaki hemakapusuane sanasihoareapo. Repo ano arareraka seserakasuane yaiya risikinafapo.

<sup>16</sup> Yumo nōmo reaki kakaro someane some karakano repo anoaki hisiranakare?

<sup>17</sup> Aporo metakiramo re kirimarakapanakae. Ipu reaki someraka, "Reane isiaipo ararehokoso," aiyaka ipu somesane kakaro somesafapo. Repo ano metakarikia, iane patera asekeasimo ipu re kirimarakapanakae.

<sup>18</sup> Arirakanano aporoamo reaki someraka, "Reane isiaipo ararehokoso," aiyaka someraka, reane kakaro makoteraka ararerakanone, ane kotehoasireapo. Ano reyaki rekeno soko metao, ano reyaki rekeanafonorakano soko metao, ipu reaki kakaro somerakano, ane kotehohosapo.

<sup>19</sup> Reo, reane nōmo hokosa asiapo. Reane Keresoa paohoasimo hinamo hokosa takaperaka kau tena aiyáka, nōmo reane kara hemakapuraka himu nekea himu tesapo. Asiane yumo efera hunia nōmo reane kara hemakapuraka himu teraka rekenapo. Hímu nekea teraka reke aseane Keresomo ainane repo murikimaka paroaka risikino asekeea, himu nekea teraka rerane fahokosapo.

<sup>20</sup> Yumo ano reyaki hakása rekeanafonosasamo, nōmo re mayiáka maroporaka ararehoanarakapo. Aiyaka nōmo re kára hemakapurakanapo. Asiamo re aseako peraka, reaki kakaro someane tau auaraka some karaka, aiyáka reane ararehokosakipoko nōmo hemakapurakaripo.

*Hákape Sara tetā Poremo yapake somesane oyapo.*

<sup>21</sup> Kaisie. Kotimo Moseseaki somemane kasane repo makamafanaraka hemakapuko seserire? Seserakanone somemane popasa aeyaka reane ereketaeraka hemakapusimo nōmo reaki tarirakanapo.

<sup>22</sup> Eparahamemo hinamo tetámo<sup>†</sup> aporo hokosa tetá hokono murisiapo. Hinamo meta yano motosa Hákapo. Raiparaka kake, hokosa meta hokono maresapo. Arirakano hinamo meta yano motosa Sarapo. Eane Eparahamemo namo kakaro arumasa kake, hokosa meta hokono maresapo.

<sup>23</sup> Eparahame hinamo raipa Hákayaki hakásä waraka, epo aporo hokosa yano motosa Isimaero hokono maresapo. Isimaeroane kaumo hokosapo. Arirakano Eparahamemo ipi namo kakaro hinamo arumasa Sarayaki hakásä rea maiya amo, Sara aane manokonomosasamo umisafapo. Asiáne kesekeia Kotimo wakapuane karakan, aseane hokosa umirakano asesapo. Aporo hokosa ane yano motosa Aisakeane hokono maresapo. Asiamo Kotimo ayiakakosaposane Aisakeane hokono maresapo.

<sup>24</sup> Hinamo tetá takumeaka someane oyapo. Yape tetámo Kotimo aporoyaki someaka masane hinamo tetá asiapo. Kotimo Moseseyaki someaka masane takumeane hinamo raipa Hákä ipi asiapo. Uri Sainae terayia Kotimo someaka masapo. Asiáne somemanane aporomo kekemarakanone, aporoane somemanem aporo raipa asiapo.

<sup>25</sup> Uri Sainae Arépea hauaka á rekenapo. Uri Sainae aye Háka yano horaka sikiraka yano horapo. Arirakano hauaka wo Yarusarame sitiane Háka yano horaka sikiraka somerapo. Hauaka wo Yarusarame sitia Mosesem somemanane aporo hinamomo kekemarakana, ipu raiparaka risikinapo. Hákamo hokosa raiparaka arisia ayiáka, aporoane somemanem asekeia reane ayiáka, raiparaka risikinapo.

<sup>26</sup> Arirakano Kotimo someaka masa metane<sup>‡</sup> takumeaka Eparahamemo namo kakaro hinamo Sara asiapo. Asiamo Yarusarame siti hepene yapura reane takumeaka someraka Sara asiapo. Aporo raiparaka arisia ayiáka, hepene yapura aporomo raiparaka risikinapo. Somemanem isu asekeia rekeanafonoraka isu tonotaesa arisia ayiáka isu risikinapo. Asiamo Sara isiapo ama asiapo.

<sup>27</sup> Asiamo hinamo Sara aye Kotimo sawia popasane oyapo. "Hinamo manokonomosa, né sesehokosapo. Né hokosa takapeanafonoraka kau tehoanafonoraka, nómó seseraka kesahokosapo. Hinamo ne haku kake hokosa hokono mareanafonosa nine, keseke nómó hokosa amo hokosa kára wainakosapo. Aporo hinamomo hokosa hokono murisiene, nómó hokosamo marokehokosapo." Aiyaka popahoareapo. (*Aisaia 54:1*)

<sup>28</sup> Asiamo Keresoa paosa aporo maeo, Kotimo ayiakakosapo, aisasamo Eparahamemo Aisake hokono maresapo. Asia ayiáka Kotimo ayiakakosapo aisane, repo kakimarakano, Kotimo ipi hokosa pariraka risikinapo.

<sup>29</sup> Fana Aisakeane Isimaeromo mokoatikisapo. Asiamo Ho Kotesamo Sara aki wakapu karakan hokosa hokono maresa aye, hokosa meta kaumo hokono maresa amo mokoatikisapo. Mokoatikisa ayiáka yumo soko hakásä yine rakirakanapo. Kotimo Ho Kotesa kasá aporo aye, aporomo kaumo hemakapukua rakira somemanane kekemana aporoamo mokoatikirakanapo.

<sup>30</sup> Arirakano Kotimo sawia popasane oyapo. "Hinamo raipa roposane ipi hokosayaki pusiehoanie. Hinamo raipamo hokosa amo Eparahamemo makata kotesane makosafapo. Arirakano hinamo Eparahamemo namo kakaro arumasa kayamo ipi hokosa amo Eparahamemo makata kotesane makosapo." Aiyaka popahoareapo. (*Stat 21:10*)

<sup>31</sup> Arirakano isuane hinamo raipamo hokosa asiafapo. Isu hinamo Eparahamemo namo kakaro arumasa kayamo hokosa asiapo. Somemanem isuane asekeia rekenafapo.

## 5

*Somemanem isu tipura ayiáka kesane Yasu Keresomo isu tonotaesane oyapo.*

<sup>1</sup> Yu aporomo somemanem isu asekeia reke, isu tipura ayiáka kesa asiane Yasu Keresomo isu tonotaesapo. Asiasamo mapirarako paroaka risikianie. Efera hunia aporomo reaki someraka, "Yu aporomo somemanane kekemahoanie," aisane repo kekemarakanone somemanem re tipura akera ayiáka keakosasamu, repo waehoanie.

<sup>2</sup> Kaisie. Ano Poremo reaki somerakanapo. Re ereketaeraka siaraka risikiako kau haeraera paterakanone, Yasu Kereso kusuane nenakamaka makata maparirakanapo. Asiamo repoko Yasu Keresomo makata rakisia amo re arareraka makotehokosafapo.

<sup>†</sup> 4:22: Wate fana Eparahame rea maiya amo aporomo hinamo tetá arumarane yaposafapo. Arirakano aporomo hinamo tetá arumarane Kotimo sawia 1 Timoti 3:2 soko Taetase 1:6 meno hoanie. <sup>‡</sup> 4:26: Kotimo Eparahame hokosa wainepe pesa hakásä yamo Yasuaki someaka masapo. Aporomo Yasuaki himu hakásaraka hemakapusua risiane raiparaka risikinafapo.

<sup>3</sup> Repo hemakapusimo nōmo efera hunia paroaka somerakanapo. Repo somemane kekemaraka kau hahaeraka paterakanone, somemane suane kekemaraka rakinie. Some-mane hakásá meta metakariane siahoasifareapo.

<sup>4</sup> Arirakano repo someraka, "Koti hikumisia isu ereketae risikiasimo Kotimo some-maneane kekemarakapanapo," aiýaka somerakanone, re Yasuaki fasikia risikinapo. Some-manre me makotehokosfapo. Yasumo ipi yaku ararenane repo metakarisiapo.

<sup>5</sup> Arirakano isiapo Yasuaki himu hakásaraka hemakapukua risikino, Ho Kotesamo isu ararerakan, keseke Kotimo someraka, "Re siareapo. Re aporo ereketaerareapo," ai-hoasimo isu seseraka kau risikinapo.

<sup>6</sup> Arirakano aporo ipi Keresoa paoraka reke, ipi kau hahaeraka patesane soko metao, ipi kau hahaeraka patehoanafonosane soko metao, tetáne nenakamaka makata ayireapo. Arirakano aporomo Keresoaki himu hakásaraka hemakapusua aeyaka, Kotiaki soko, aporo hinamoaki soko, himu tumurumo hemakapukua rerane namo kakaro makata kotesane ayareapo.

<sup>7</sup> Fana Keresomo someane repo kakimasa maiya amo, repo koteaka rakiraka risiapo. Asiane kakaro someane kakimakohoamo aporo epamo matasorakanare?

<sup>8</sup> Kotimo matasonafapo. Kotimo ipi hokosa risikiasimo Kotimo reane peaesapo.

<sup>9</sup> Arirakano isiapo someraka, "Makata pirira wakasemamo farawa suane pirikia makáránapo," airapo.\*

<sup>10</sup> Nōmo hemakapusuane oyapo. Unihae Keresomo re ararerakan, nōmo someane repo kekemaraka, aporo metamo someane repo kekemahokosfapo. Aíyaka nōmo hemakapurakanapo. Re kirimahoko some kará aporoane yano motosane nōmo kairafapo. Epo watikiaka rakisiakipoko ropo watikisane makosapo.

<sup>11</sup> Keresoa paosa aporo maeo, aporo metakiramo someraka, "Poremo úyaka somerapakae. Kotimo aporoaki someraka, 'Né siareapo. Né aporo ereketaerareapo,' aihoasimo kau hahaeraka patehoanie." Aíyaka ipu somera ayíáka nōmo somesa satiki, aporo metakiramo ano mokoatikihoafunufapo. Nōmo someraka, "Kau hahaeraka patehoanie," aiýaka nōmo somesa satiki, Yasu isupoko ira matopesa paremarekea rusua kusuane nenakamayia kureapo, aihoafunupo.

<sup>12</sup> Asiamo aporomo someraka, "Kau hahaeraka patehoanie." Aisa aporoamo repo himumo hemakapurane mahimetesamo, ipu namina kau su kaiyasane patehoane siahoasireapo.

<sup>13</sup> Maeo, somemanemo re tipura kesa arisia ayíáka risikiakohoamo, reane Kotimo pasimosapo. Pasimosa aporo oforaka risike repo hemakapuraka, "Isu oforaka risike kaumo hemakapusuane kekemaraka rakiane siahoasireapo," aiýaka hemakapukupo. Arirakano uyaka hemakapunie. Repo aporo tékeane namina himu tumurumo hemakapukua ararehoko hemakapunie.

<sup>14</sup> Asiamo somemane hakásá metamo somemane suane karotapisane oyapo. "Nómo ní himu tumurumo hemaka apura ayíáka, ní aporo tékeane soko ayíáka himu tumurumo hemakapunie." Aíyaka somemane motosapo. Somemanemo suamo kepoane ayapo. (*Wok Pris 19:18*)

<sup>15</sup> Arirakano repo namina yia himu tumurumo hemakapunafonraka, saperaka hokomaka someraka, ayíáka risirapaka asekeanie. Arirakano kásamo weako kakararaka mere kirisiraka arisia ayíáka, re namina yia ayíáka risikinone, ane asekeanie. Ayíáka risikinone re namina yia fasikia kikisiraka risikiakosapo. Anapaka asekeanie.

*"Ho Kotesamo hemakapusuane hakureapo. Arirakano kaumo hemakapusuane hakureapo."* Aíyaka Poremo somesane oyapo.

<sup>16</sup> Maeo, re ararehokosakipoko nōmo somerakanuane oyapo. Ho Kotesamo re himua somerakan kaikia, koteaka susu rakiraka risikianie. Koteaka susu rakiraka risikino kaumo hemakapusuane kaikia rakiakosfapo.

<sup>17</sup> Ho Kotesamo hemakapusua amo kaumo hemakapusuane hurutapiako hemakapukua, arirakano kaumo hemakapusua amo Ho Kotesamo hemakapusuane hurutapiako hemakapukua ayíáka tati kakanakeraka risikinapo. Asiamo repo koteaka rakiako hemakapuko asiante maiya suamo koteaka rakirafapo.

<sup>18</sup> Ho Kotesamo someane repo kekemarakakanone, ane Mosesemo somemanemo re unihaeaka asekeea rekenafapo.<sup>†</sup>

\* **5:9:** Makata pirira (yis) wakasemamo farawa su pirira ayíáka aporo hukusimo hasaka someane repo kakimayane, keseke repo suamo hasaka someane kakimaka risikiakosapo. † **5:18:** Ho Kotesamo some akipe Kotimo somemane kaeyakosu Moseseaki kasa, tati kakanakeraka risikinafapo.

<sup>19</sup> Arirakano kaumo rakirane isiapo hemakapurapo. Kaumo rakirane oyapo. Hinamo hakimarane soko, arirakano hinamomo aporo metayaki mokome enanane soko, arirakano aporomo hinamo asekeha hemakapukua hokomaka somerane soko,

<sup>20</sup> arirakano yatafu yakasa hoaki kekereraka rerane soko, arirakano aporo meta ira hamirurane soko, arirakano aporo metaki werane soko, arirakano aporo metaki himumo hisiraka somerane soko, arirakano aporo metaki kakanakeraka rakirane soko, arirakano saperane soko, arirakano metane aporomo ipi yia makáraraka aporo metane mawakasemaraka rerane soko, arirakano aporo metaki tafatafaraka somerane soko, arirakano aporo metaki hisiraka fasikia risirane soko,

<sup>21</sup> arirakano aporo meta aseraka, "E area ayíáka ano soko ayíáka rekearipi," aíyaka hemakapurane soko, arirakano aporomo he watikisa nekea himu maparitaeraka rerane soko, arirakano aporo yakai sarimaraka he watikisa nenaka koteaka hemakapura faraka, mokome enaraka koraka risirane soko, arirakano makata metakira hakása yasia rakiraka risikino, makata suane kaumo rakira oyapo. Kaumo rakira aporoane Koti unihaeaka reamo hauaka hiakosafapo.

<sup>22</sup> Asiane ira kotesamo wate kotesa apera ayíáka, Ho Kotesamo hemakapusua aeyaka makata kotesa susu rakiraka rerapo. Ho Kotesamo né ararerakané uyaka rekeakosapo. Aporo metaki himu tumurumo hemakapukua reke, arirakano himu seseraka reke, arirakano aporo metamo néaki mokoatikirakanó nomo saperaka someane foakayia paripurafaraka reke, arirakano aporo metane kamenakaraka arareraka reke, arirakano aporo metane makoteraka reke, arirakano aporo metaki kakaro somesane kakaro kekemaraka rakiraka reke,

<sup>23</sup> arirakano makapororaka rekeanafonraka tau auaraka reke, arirakano kaumo hemakapusuane metakarikia, keseke kaumo hemakapurane kirimarakano né ní yiamo waeraka reke, arirakano makata suane aporomo rakiraka rekenone, Ho Kotesamo hemakapusuane kekemaraka rakiraka rekeakosapo. Ayíáka rakiraka rekenone, ane somemanemo né hukurukusafapo.

<sup>24</sup> Asiamo namo kakaro Keresoa paosa aporomo ipi kaumo hemakapurane soko, watikiaka rakirane soko, ira matopesa paremarerakané makusuapo.

<sup>25</sup> Asiamo Ho Kotesamo fareanane kasásamo Ho Kotesamo makata ainane kekemaraka rakinie.

<sup>26</sup> Isiapo isina yano motosane makárahoane siahoasifareapo. Metaki topaka maraka somehoane siahoasifareapo. Metamo menane makaripi aíyaka hemakapuané siahoasi-fareapo.

## 6

### *Aporo meta ararenane oyapo.*

<sup>1</sup> Hameo, repo namina yia Keresoa paosa aporo hakása metamo watikiaka rakirakané asekeha, repo namina yia aporo metakira re himua Ho Kotesane komarukua risike, watikiaka rakira aporoane, repo kamenakaraka hemakapukua, tau auaraka eane maropohoanie. Maroporaka asekeanie. Repo watikiaka rakisimo Satanemo kirimarakana kau aseakosane meraruhokopo. Asiamo re naminane makáraraka risike ayíáka maropohokopo.

<sup>2</sup> Repo namina yia metamo makata umisa kakeno, e arare, arirakano metamo e arare, ayíakanie. Ayíáka arareraka risikino, repo Yasumo somemanane kakaro kekemaraka rakiraka ayíakakosapo.

<sup>3</sup> Aporo metamo e ipiane makáraraka someraka, "Ano ní yano motosa káraro." Aíyaka somerakanone, aporoamo ipi yano motosane kakaro kárahoanafonosasamo epo ipi yiamo kotafe someane kekemaraka ayíakakosapo.

<sup>4</sup> Arirakano aporomo ipi makata rakirane asekeha ipi hemakapuraka, "Makata rakirane kotesa soko metao, watikisa soko metao," Aíyaka hemakapukusakipoko epo ipi himu yiamo takekeha hemakapuané siahoasireapo. Aporomo ayíáka takekeha hemakapuraka, epo ipi makata asiane kotesekeno aseraka, ipi sesehokosapo. Arirakano aporo metamo makata rakirane nómomo aseraka takekeha hemakapuraka, "Epo makata rakirane, nómomo makata rakirano marokesapo," aíyaka hemakapuraka aporoane mawakasemaraka, nómomo níane makáraraka somerapo. Aíyaka hemakapukua takekeha somehoane siahoasifareapo.

<sup>5</sup> Asiamo aporo suamo namina makata rakira umisane, kekepo hakása hakásaraka makata umisane mokoa rakiraka risikinapo.

<sup>6</sup> Arirakano repo Kotimo someane koteaka enomakasimo, aporo metamo tisaraka tarirakané, aporoane repo arareraka, repo makata nenane soko metao, repo makata kotesane soko metao, repo moneane soko metao, parakuraka eaki yaku kakanie.

<sup>7</sup> Repo hasaka hemakapurane kekemahokopo. Aporomo hemakapuraka, “Nōmo makata kotafe rakirakanone, Kotimo aseakosafapo.” Aíyaka hemakapura aporoamo ipi yiamo kotafe rakirakanapo. Kotafe rakirane Kotimo aserapo. Aporomo makata mano poterakano, makata potesa hakásá yine taneherapo. Tanehekea wate aperamo, wate hakásá yine pesane tumorapo.

<sup>8</sup> Asiamo takume some kepoane oyapo. Ira watikisamo wate watikisa apera ayíáka, aporomo kaumo hemakapuka watikiaka rakirakanone, ropo watikisane makosapo. Arirakano aporomo Ho Kotesamo hemakapusuane kekemaraka rakirakano, aporoane Ho Kotesamo mafareahokosapo. Mafarearakano e Kotiyaki yaiya rekeakosapo.

<sup>9</sup> Asiamo isina makata koteaka rakiakosane kau hisiraka risikiakopo. Arirakano koteaka rakiakosane kau hisihoanafonoraka koteaka rakikia naorakanone, parakuna maiya amo makata kotesane isiaipo mokoakosapo. Ira wate kotesa surakano tuamora ayíáka, keseke parakuna maiya amo isiaipo ayíáka makata ropo kotesa mokoakosapo.

<sup>10</sup> Asiamo aporo hinamo makotehokosa ikia kara kakenone, makotehoanie. Arirakano Keresoa paosa aporo hinamoane soko, namo kakaro wakapuaka rakiraka iane makotehoanie.

*Poremo ipi hokonomo sawi wakasema popasane oyapo.*

<sup>11</sup> Sawi wakasema one nōmo ní hokono sikitimo poparakanapo. Popana one popakeraka poparakanapo. Some one nōmo reaki popasane repo asekeha hemakapunie.

<sup>12</sup> Arirakano reaki aporo metakiramo paroaka someraka, “Kau hahaeraka patehoanie.” Aíyaka somesa amo kepoane oyapo. Aporo metakiramo kotafe some karakanapo. Yu aporo metakiramo hikumisia, ipu namina yano motosa makárahokosakipoko hemakapuka some rakoraka some karaka risikiakosapo. Namina Yu aporo metakirane namoraka risikinapo. Namoraka risike namina hemakapuraka, “Isupoko Yasu ira matopesa paremarekeha kureapo. Asiamo aporo hinamoane Kotimo mafasiasimo Yasuaki himu hakásaraka hemakapuarne siahoasireapo.” Aíyaka somerakanone, ane Yu aporo metakiramo iane mokoatikhokosapo. Mokoatikhokohoamo ipu Yu aporohoanafonosa Keresoa paosa aporoaki kau hahaeraka patehoanie, airapo.

<sup>13</sup> Arirakano aporomo someraka, “Kau hahaeraka patehoanie,” aira aporoamo namina Kotimo somemané suane kekemaraka risikianafonosa nine reaki, “Kau hahaeraka patehoanie,” airapo. Airane repo kekemarakano asekeha someraka, “Isiaipo somesane ipu kakimasapo.” Aíyaka i namina yia makáraraka hemakapurakanapo.

<sup>14</sup> Arirakano nōmo ní makata metane makáraraka somerakanafapo. Asiane Yasu Kereso yano motosane hákasa makáraraka somerakanapo. Asiamo Yasu Kereso anopoko farimaka ira matopesa paremarerakano kureapo. Akipoko Yasu Keresoane nōmo makáraraka somerakanapo. Hauaka wo kaumo hemakapusua makata suane aporomo makáraraka somerakano, nōmo hemakapuraka makatane nenakamaka makatareapo. Yasu Kereso ira matopesa kususamo, nōmo kaumo hemakapusuane rukupateraka metakariasiapo, aíyaka nōmo hemakapurakanapo.

<sup>15</sup> Arirakano aporo kau hahaeraka patenane nenakamaka makatapo. Arirakano aporo kau hahaeraka patehoanafononane soko nenakamaka makatapo. Kotimo hikumisia makata tetáne nenakamaka makata ayireapo. Arirakano Kotimo hikumisia aporomanomo ainane makaweraka rakiane kotehoasireapo.

<sup>16</sup> Some one nōmo some kasane kakimaka kekemana aporo hinamoane auaraka risiki-asimo nōmo kurikurirakanapo. Iane Kotimo kamenakahaoasimo nōmo kurikurirakanapo. Iane Kotimo kakaro murikimasapo. Kotimo Yu aporoane murikimasa ayíáka Yu aporo-hoanafonosane soko Kotimo ayíáka murikimasapo.

<sup>17</sup> Some fahokosakipoko some wakasema meta one somerakanapo. Aporomo anoaki makata umisa meta<sup>\*</sup> kayáne siahoasifareapo. Ano Yasumo aporo raipa rekeno, aporomo ano rusuane umurusapo. Umurusane repo aseraka hemakapuraka, “Poreane Yasumo aporo raipareapo.” Aíyaka hemakapunie.

<sup>18</sup> Maeo, isiaipo Unihae Yasu Keresomo reane hemakapuka repo ainane makotehoasimo nōmo kurikurirakanapo. Kakaroripo.

---

\* <sup>6:17:</sup> Makata umisa metane oyapo. Aporomo someraka, “Pore tarira aporofapo,” aisasamo Poremo someraka, “Aíyaka somehoane siahoasifareapo,” aisapo.

## Efesase

### **Efesase sawi one mahemakapukusa someane oyapo.**

Yasu hepene yapura hisiakipoko keremisi 32 faraka, Pore Rome apea tipura makesa reke, sawi one popasapo. Poremo Keresoa paosa aporo hinamo Efesase apea risiaki sawi one poparaka makesapo. Keresoa paosa aporo hinamo i su ape sumu kekepoo risiamo namina kekepo menorape pusimo poparaka makesapo.

Efesase aporoane Yu aporoohoanafonorka i risiapi. Isu soko Yu aporoohoanafonorka risike sawi omo isu soko ararehokosapo. Efesase sawia Poremo someraka isu Keresoa paosa aporo hinamo suane Keresomo kau asiapo. Kaumo unihaeane Kereso ipipo.

### **Efesase sawia some kepo parakuraka popasane oyapo.**

1:1-2 Sawi popana one Poremo kepomarekea popasapo.

1:3-3:21 Kotimo isu suane hemakapusamo, Yu aporoane soko Yu aporoohoanafonosane soko i suane masarimasapo. Masarimarakaa isu su aporo ira hakasa pariraka risike Keresomo kau asiapo.

4:1-6:9 Fana isu katosa á risiane pipu yumo Keresoaki paosasamo faesa á risikinapo.

6:10-20 Sataneyaki yunu weakosakipoko Keresomo yunu wera makata ane mokoa risikianie, aisapo.

6:21-24 Poremo ayapasapo.

### *Efesase aporo hinamoaki Poremo sawi poparaka makesane oyapo.*

<sup>1</sup> Kotimo ipi hemakapusua aeyaka Yasu Keresomo tarira aporoohoasimo ano murikimasapo. Ano Porepo. Re Kotimo aporo hinamo Efesase apea risiaki nömo sawi one poparaka makerakanapo. Repo Yasu Keresoaki himu hakasaraka hemakapukua risikino asekea, nömo reaki sawi one poparaka makerakanapo.

<sup>2</sup> Isiapo Kotipe Unihae Yasu Kereso tetapö makoteraka ararenane soko auaraka risirané soko reaki kakasimo nömo hemakapurakaripo.

### *Yasu Keresomo isu makotesane oyapo.*

<sup>3</sup> Isiapo Unihae Yasu Keresomo ipi Ata Kotiaki kekerehoanie. Isiapo Keresoaki kataka marekea risikino, Kereso aeyaka hepene yapura makata kotesa susuane Kotimo isuaki kasapo. Makata kotesa kasá amo isiapo hoane mawakapuraka risikiasimo kasapo.

<sup>4</sup> Hauaka one Kotimo kepomarekea rakiasiraka, Keresomo ipi makata rakira aeyaka isiapo Keresoa paoraka risikiasimo Kotimo isu murikimasesupo. Isiapo makata watikisane kikisiraka Kotimo hikumisia koteaka susu risikiasimo epo isu murikimasesupo.

<sup>5</sup> Epo isuane himu tumurumo hemakapukua, Yasu Keresomo isu mafasiakosasamo, isu ipi hokosa ayíáka karikia nakosakipoko epo isu murikimasesupo. Wate fana ipi hemakapusua aeyaka murikimasesupo.

<sup>6</sup> Asiamo Kotimo isu yaku araresasamo isiapo eaki hemakapukua kekererakanapo. Kotimo ipi hokosa Yasu Keresoaki himu tumurumo hemakapusesupo. Asiamo epo ipi hokosamo makata rakira aeyaka isuane yaku araresapo.

<sup>7-8</sup> Isu tipura risia asiane Kotimo hokosa ipi yapi pusua amo makata ropo akara ayíáka isu tonotaesapo. Tonotaeraka isiapo makata watikisane mafasapo. Kotimo isuane himu tumurumo hemakapuraka araresane kakaro kárapo. Makata su hemakapurane soko, kepo su hemakapurane soko Koti ipipo. Epo ipi isu hemakapuraka makata kára araresapo.

### *Keresoane ipi fanapo," aisane oyapo.*

<sup>9</sup> Kotimo ipi hemakapusua mahamesane yumo hufitaeraka makakamaraka somerakanapo. Wate fana isupoko Keresomo ayíakacosapo aíyaka Kotimo hemakapukua maresane, yumo aporo hinamomo kaiyisimo hufitaeraka makakamaraka somerakanapo.

<sup>10</sup> Asiamo Kotimo hemakapusue oyapo. Makata su siaraka ayipe pusimo Kotimo maroporaka, arirakano fa ana maiya amo makata su sarimarakaa Keresomo unihaeaka asekea rekeakosapo. Hepene yapura makata risiane soko hauaka wo makata risiane soko Keresomo ipi hakasa unihaeaka asekea rekeakosapo.

<sup>11</sup> Isiapo Keresoaki kataka marekea risikino Kotimo isuane aseraka someraka, "Reane nömo ní menapo," airapo. Aíyaka wate fana Kotimo hemakapukua maresane, yumo ayiana oyareapo.

<sup>12</sup> Ipi hemakapusua aeyaka makata su maroporakanapo. Isiapo Yu aporo hinamomo Keresoaki fana himu hakasaraka hemakapukua risiapo. Asiamo Kotimo wakapuanne soko faesane soko isiapo hemakapukua Kotiaki kekerehoasimo Kotimo isu murikimasapo.

<sup>13</sup> Arirakano kakaro someane repo soko kaisiapo. Kairaka Keresomo mafasiakosapo aisa some kotesane repo kakimaka Keresoaki himu hakasaraka hemakapukua risikiako

parisapo. Keresoaki re Yu aporo hoanafonosamo soko, himu hakásaraka hemakapuprakarakano kaiyakosakipoko Kotimo reaki Ho Kotesa kasapo. Fana kakakosaposane yumo kakaro kasapo.

<sup>14</sup> Ho Kotesane isuaki kasasamo isiaipo hemakapusuane makata kotesa susuane Kotimo ipi aporo hinamoaki kakakosaposane, kakaro yaiya kakakosapo. Aíyaka hemakapukua, Kotimo isu mafasisiasamo yaiya risirane mokoakosakipoko isu kau risikinapo. Isu Kotiyaki yaiya risike koteaka susu risikiakosapo. Asiasamo isiaipo Kotiaki kekerakanapo.

*Poremo kurikurisane oyapo.*

<sup>15</sup> Repo Unihae Yasuaki himu hakásaraka hemakapukua risike Kotimo aporo hinamo suaki himu tumurumo hemakapukua risikinapakae.

<sup>16</sup> Risikinapakanō kaikia, nōmo repoko farimaka maiya suamo Kotiaki suseaka kurikurirakanapo. Asiamo nōmo úyaka kurikurirakanapo.

<sup>17</sup> Isiaipo Unihae Yasu Keresomo ipi Kotiane, isiaipo Ata Kara ipi faesa yaiya reaki nōmo kurikurirakanapo. Kotimo ipi aina suane repo koteaka hemakapusimo Ho Kotesamo reaki tarikia, koteaka takekeea hemakapurane kakasimoripo, aíyaka nōmo kurikurirakanapo.

<sup>18</sup> Repo himumo koteaka hemakapusimo nōmo kurikurirakanapo. Himumo koteaka hemakapukua risike, Kotimo ipi aporo hinamo suane makoteraka aiyakakosapo, aíyaka someaka masane repo hemakapusapo. Aiyakakosapo aíyaka someaka masane fasere-peasimo isu kau risikinapo. Aiyakakosapo aíyaka someaka masane namo kakaro kotesapo. Repo himumo koteaka hemakapukua risike, Kotimo makata kotesa aiyakakosapo aisane repo hemakapukua risikiasimo nōmo kurikurirakanapo.

<sup>19</sup> Repo himumo koteaka hemakapukua risike aseane Kotimo wakapumo isu kakimara aporo hinamoane ararerakano asekea repo hemakapusapo. Kotimo wakapuanne namo kakaro kára yaiya rekenapo.

<sup>20</sup> Kotimo wakapumo isu ararena wakapu hakásá amo Kereso kusuane maturikia taesapo. Maturikia taeraka hepene yapura Kotimo hokono tumuru takua rekeasimo maresapo.

<sup>21</sup> Asiamo hepene yapura Kereso ipi unihaeaka asekea rekenapo. Arirakano hepene aporo risiane soko, aporo fanaraka risiane soko, kamani aporo su risiane soko, somemane wakapuanne soko, suane Keresomo wakapumo hurutapikia marokesapo. Yumo aporo fanaraka arisiane soko, keseke aporo fanaraka risikiakosane soko, Keresomo ipi hakásamo unihaeaka asekea rekenapo.

<sup>22</sup> Makata suane hurutapikia Keresomo korakemo finiraka marakoraka rekeasimo Kotimo e maresapo. Arirakano hauaka wo Keresoa paosa aporo hinamo suane Keresomo ipi hákasamo unihaeaka asekea rekeasimo Kotimo e maresapo.

<sup>23</sup> Isiaipo unihaeane Kereso ipipo. Ipi kau asiane isu Keresoa paosa aporo hinamo ayapo. Arirakano isuane eyaki risike, arirakano Keresoane soko isuyaki reke, aiyáka isina hakásá sarimaraka risike, siaraka wakapuraka risikiakosapo.

## 2

*Re kusua asiane mafareasane oyapo.*

<sup>1</sup> Fana re koaretaeraka watikiaka rakiraka risike kusua arisia aiyáka risiaipo.

<sup>2</sup> Fana repo hauaka omo menane kekemasapo. Arirakano yakasa homo unihae Satanemo makata rakirane soko repo kekemarakā rakiraka risiaipo. Yumo soko Satanemo makata rakirane Kotimo some koaretaena aporo hinamomo yaiya rakiraka risikinapo.

<sup>3</sup> Yumo koaretaena aporo arisia aiyáka fana isu su aiyáka risiaipo. Himo asekea makata nakosa soko pasu soko hinamo soko makatane himu pukua kaumō hemakapusuane rakirakoripo aíyaka hemakapusuapo. Kaumo hemakapusuane rakiraka risike watikiaka rakira aporo hinamo su Kotimo fanasihoko motora aiyáka isu soko fanasihoko motoafunureapo.

<sup>4</sup> Asiane Kotimo isu fanasihoko motoafunusa nine isuaki Kotimo himu tumurumo hemakapusuasamo isu kára kamenakasapo.

<sup>5</sup> Isu koaretaeraka risike kusua arisia aiyáka risiane Kotimo isu Keresoyaki risikiasimo mafareasapo. Mafarearaka isuane ipi hemakapukua arareraka isu mafasisiapo.

<sup>6</sup> Yasu soko isu soko epo maturikia taesapo. Isu Yasu Keresoyaki hepene yapura risikiasimo isu mafareasapo.

<sup>7</sup> Kotimo isuane himu tumurumo hemakapusuasamo isu makoteraka araresapo. Makata araresane isiaipo soko, aporo hinamo keseke risikiakosamo soko hemakapusimo Yasu Kereso aeyaka Kotimo isu mafasisiapo.

<sup>8</sup> Asiamo Kotimo isu makoteraka yaku ararenasamo isu mafasisiapo. Repo namina yia mafasisifareapo. Mafasirane Keresoaki himu hakásaraka hemakapukua risikino Kotimo yaku mafasisiapo. Repo makata koteaka rakisiakipoko Kotimo mafasisiapro.

<sup>9</sup> Epo reane mafasisiakipoko repo namina yano motosane makáraraka rupiaka some-hokopo. Repo namina yia mafasisiapro. Kotimo ipi hákasamo reane mafasisiapo.

<sup>10</sup> Kotimo isu rakisiapo. Isu Keresoyaki hakásä risike isiapo koteaka rakiraka risikiasimo Kotimo isu rakisiapo. Isiapo makata rakirane epo fana maresapo. Maresane koteaka rakisimo Kotimo isu rakisiapo.

*Isu su Keresoaki paosasamo aporo ira hakásä parisane oyapo.*

<sup>11</sup> Re takapesa maiya amo Yu aporo ira takapesafapo. Reane Yu aporomo somer-aka, "Aporoane kau haahaera patehoanafonona aporopo. Aporoane Kotimo muriki-masafapo. Arirakano isu kau haahaera patena aporopo. Isuane Kotimo murikimasapo," aisapo. Asiamo re Yu aporo hoanafonosa takapesane repo hemakapurakanapo.

<sup>12</sup> Fana repo Keresoaki hemakapusuafapo. Kotimo Yu aporo murikimasa nine, re Yu aporo hoanafonosa murikimasafapo. Reane aporo hakupo. Re Yu aporoyaki yunuraka risiapo. Kotimo someaka masane reaki some kasafapo. Epo aporomano makoteraka ayiakakosaposane re Yu aporo hoanafonosaki some kasafapo. Re hauaka wo risiromo Kotiaki hemakapusuafapo. Kotiyaki yaiya risikiakosane hemakapunafonoraka Kotimo makata ayiakakosaposane kau risiapro.

<sup>13</sup> Fana repo Kotiaki fasikia fesenoraka risiapo. Ayíáka risiane yumo Yasu ipi aporomano supoko kusuasamo, repo Yasuaki himu hakásaraka hemakapukua kataka marekea risike, Kotiaki makeraka risikinapo.

<sup>14</sup> Fana Yu aporoyaki Yu aporo hoanafonosayaki namina himumo mahisiraka risike, yunuraka kikisiraka enonoraka risiane, Yasu kusua maiya amo masarimasapo. Enonosane metakarikia su aporo ira hakásaraka risikiasimo murikimasapo. Aporomano su auaraka risira kepoane Yasu ipipo.

<sup>15</sup> Fana enonoraka Yu aporo háksaki Kotimo ipi somemane kaka, Yu aporo hoanafonosaki Kotimo ipi somemane kasafapo. Asiane Yasu peraka somemanemo enonoraka kakanakeraka risia makatane Yasumo ipi maka ipi kau kusuasamo somemanemo enonoraka risiane soko mafasapo. Yasu ipi tipia rekeno Yu aporomo soko Yu aporo hoanafonosamo soko eaki himu hakásaraka hemakapukua risikinapo. Ayíáka auaraka risike aporo ira hakásä pariraka risikinapo.

<sup>16</sup> Aporo ira tetápoko farimaka Yasu ira matopesa paremarerakano kusuasamo aporo ira tetáne masarimasapo. Sarimaraka risikino aporo ira tetáki Kotimo tákeraka rekenapo. Yasu kusuasamo namina himumo mahisiraka yunuraka kikisiraka risiane Yasumo mafasapo.

<sup>17</sup> Yasu peraka aporo suaki maeaka himu hakásaraka hemakapukua risikiasimo some kotesane somehoko pesapo. Re Yu aporo hoanafonosane Kotiaki yamenoraka risikino asekeea reaki somehoko e pesapo. Arirakano Yu aporoane Kotiaki makeraka risikino asekeea iaki soko somehoko pesapo.

<sup>18</sup> Keresomo isu su araresamo, isu su Yu aporo soko Yu aporo hoanafonosa soko Ho Kotesa hakásä nine kasapo. Isiapo Kotiaki ereketaeraka somehoasimo Ho Kotesane hakásä ninesasamo tipia reke tariraka rekenapo.

<sup>19</sup> Asiamo yumo re Yu aporo hoanafonosa aporo ira hakufapo. Re aporo kimisi pesa arisia ayíáka risikinapro. Kotimo aporo ira murikimasayaki re paoraka risikinapo. Asiasamo Kotimo aporo irane repo.

<sup>20</sup> Arirakano isu su Kotimo aporo irane Kotimo ape kisia asiapo. Asiamo tarira aporoane soko porofete aporoane soko ape takuma ira kesa asiapo. Yasu ipiane ira kesa warupi asiapo.

<sup>21</sup> Ape patakuni\* ape kamape ape kia asipa ku su sarimaraka warupia akaya ayíáka isu su sarimaraka Yasu ipiaki hemakapukua risikinapo. Ape kisiane Kotimo ipi ape kotesa susupo.

<sup>22</sup> Re Kotiaki kataka marekea risikino, Keresoa paosa aporo metakira akiyaki re soko ape akira ayíáka kiraka rekenapo. Amano ape kakarua area ayíáka Koti reyaki hakasa rekenapo. Ipi Ho Kotesa reyaki hakasa reasasamo ipi soko reyaki hakásä rekenapo.

### 3

*Yu aporo hoanafonosapoko Poremo some kaka rakiraka reane oyapo.*

---

\* <sup>2:21:</sup> Patakuni fasiakohoamo ira warupi paroaka rera ayíáka Yasu ipi ayíáka paroaka rekenapo. Asiasamo patakuni ira kesa karoamarera ayíáka isiapo ipiaki himu hakásaraka hemakapukua risikinapo.

<sup>1</sup> Re Yu aporohoanafonosaki Kotimo someane nōmo some karakasu akipoko Yasu Keresomo aporo raipa ano Poreane tipura makesapo.

<sup>2</sup> Nōmo reaki some kakasimo Kotimo hemakapukua ararenane anoaki kasapo. Makata ane repo kaikia hemakapurakanapo.

<sup>3</sup> Kotimo ipi hemakapukua Yu aporohoanafonosa mafasiakosakipoko mahamesane anoaki mafekemaraka tarisiapo.

<sup>4</sup> Arirakano Kotimo anoaki hufitaeraka somerakano nōmo kairaka, Yasumo makata rakisia kepoane nōmo hemakapurakanapo. Nōmo hemakapusuane wakasema meta reki popasapo. Popasane repo menoraka, Yasumo makata rakisia kepoane repo soko hemakapusuapo.

<sup>5</sup> Wate fana Kotimo ipi hemakapusuane aporoaki hufitaeraka somesafapo. Asiamo maiya amo Kotimo ipi hemakapusuane mahamesapo. Asiane yumo ipi Ho Kotesamo tarikia hufitaeraka somerakanapo. Kotimo tarira aporope porofete aporo ipu isuaki makata mahamesane yumo Ho Kotesamo tarikia hufitaeraka somerakanapo.

<sup>6</sup> Asiamo Kotimo ipi hemakapusuane mahamesane oyapo. Kotimo Yu aporoaki makata kakakaposane, Yu aporohoanafonosaki soko kakakoso. Aporo ira hakásahoasimo Yu aporo akyaki Yu aporohoanafonosane soko pasimorakanapo. Kotimo makoteraka ayiakakosaposane Yu aporoaki some kasa hakasa nine, Yu aporohoanafonosaki soko some karakanapo. Yasuane aporo supoko pesasamo, eane hemakapusimo some kotesane Yu aporohoanafonosamo kakimasapo. Kákimarakanano asekeia Kotimo ipi hemakapukua rekenapo.

<sup>7</sup> Arirakano Kotimo ano hemakapuraka yaku arareraka Yasu hemakapusimo some kote-sane nōmo some kakasimo Kotimo ano murikimarakasupo. Kotimo makata rakiniesane nōmo rakisimo Kotimo ipi wakapuanne anoaki karakasupo.

<sup>8</sup> Kotimo some kákimaraka aporo hinamo suane fanapo. Ano Poreane kesekepo. Ano fanaraka rekeanafonosa nine Kotimo ano hemakapuraka arareraka murikimasapo. Yu aporohoanafonosamo Yasuane hemakapusimo some kotesane nōmo iaki some kakasimo Kotimo ano murikimasapo. Keresomo makata kotesa susuane enonosa kakenafapo. Ane some kakasimo Kotimo ano murikimasapo.

<sup>9</sup> Kotimo ipi makata su rakisiapo. Rakisia maiya amo Kotimo ipi hemakapukua makata koteaka rakiakosane mahamesapo. Mahamepe pekea, pipu yumo Kotimo ipi hemakapusuane nōmo some kakasimo ano murikimasapo.

<sup>10</sup> Asiamo Kotimo hemakapusuane nōmo some karakano, Keresoa paosa aporo hinamomo hemakapurakanapo. Arirakano ira kepo hakásaraka, ira eya kekepohorea ayiáka Kotimo ipi hemakapusuane ayireapo. Asiamo Kotimo hemakapusua kekeposane Keresoa paosa aporomo some kakakoso. Ipu some karakano hepene yapura hepene aporomo soko, aporo fanaraka risiamo soko, ipu suamo kaikia hemakapusuapo.

<sup>11</sup> Wate fana makata su kepomareasiraka, Yu aporo soko Yu aporohoanafonosane soko Kotiaki paoraka aporo ira hakásahoasimo, isiapo Unihae Yasu Kereso kusua aeyaka makata ane Kotimo ipi asiápo.

<sup>12</sup> Asiamo isiapo Yasuaki himu hakásaraka hemakapukua risiasamo Koti rea makeraka peakosane namonafapo. Kotiaki somehokosane karekekeia somerafapo. Mapiraraka risike somerapo.

<sup>13</sup> Asiamo repoko nōmo rakiane aporo metakiramo ano mokoatikirakanano re himu faraka risikiakopo. Nōmo reane ararenasamo re mapiraraka risikiasimo nōmo hemakapurakanipo. Aiyaka hemakapusimo nōmo reaki somerakanapo.

#### *Poremo kurikurisane oyapo.*

<sup>14</sup> Kotimo ayiakakoso aiyaka hemakapukua somesane nōmo kaikia seseraka Koti Ataki suseraka kakuna porokoaa kake Ataki kurikurirakanapo.

<sup>15</sup> Hepene yapura soko hauaka wo soko kakimara aporo ira suane Kotimo ipi pasimaka yano motorakano, isiapo suamo Kotiaki, Atao, airapo.

<sup>16</sup> Koti ipi namo kakaro kárasasamo ipi Ho Kotesamo repo himu hemakapurane mawakapuhoasimo aiyaka nōmo kurikurirakanapo.

<sup>17</sup> Repo eaki himu hakásaraka hemakapukua risikino Keresoane repo himua rekeasimo nōmo kurikurirakanapo. Repo namina yia himu tumurumo hemakapukua ainane ira pikinu paroaka apura aiyáka himu tumurumo hemakapukua paroaka risikiasimo nōmo kurikurirakanapo.

<sup>18</sup> Asiamo sape aka soko, sape ro soko, taku ra soko, taku wo soko, yapura soko, atura soko, aiyáka Keresomo ipi aporo hinamo suaki himu tumurumo hemakapurane enonosa rekenafapo. Asiamo re Efesase aporo hinamo suamo soko, Kotimo aporo hinamo hauaka

wo risia suamo soko, Keresomo himu tumurumo hemakapurane hemakapusimo nōmo kurikurirakanapo.

<sup>19</sup> Keresomo himu tumurumo hemakapusuane namo kakaro kárasasamo isiaapo aíyaka hemakapusifareapo. Asiáne Keresomo himu tumurumo hemakapusuane repo asekea hemakapusimo nömo kurikurirakanapo. Asiamo Keresomo himu tumurumo hemakapusuane reaki fasereperakano Kotimo kóteaka ainane reaki komarukusapo.

<sup>20</sup> Kotimo wakapuane isiapo himura reamo makata rakirapo. Isiapo Kotiaki makata kaikia kurikurirakano, ipi wakapuamo makata kára rakirapo. Isiapo hemakapusifasa nine epo sia rakisireapo. Ayiaka rakirakano Kotiaki kekererakanapo.

<sup>21</sup> Asiamo Yasu Keresomo makata rakisia aeyaka Keresoa paosa aporo hinamo suamo Kotiane soko, Keresoane soko makárraraka hemakapukua kekemarakaa risikinapo. Yumo soko keseke soko Koti káraro, aiyaka Yasu Keresoa paosa aporo hinamomo yaiya keker-eraka risikiakosapo. Ayiáka rakipe pusimo nōmo kurikurirakanapo.

4

*Keresoa paosa aporo hinamo suane Keresomo ipi kau asiapo, aisane oyapo.*

<sup>1</sup> Nōmo Kotipoko rakiane aporomo ano tipura makesapo. Tipura makesane reke reaki somerakanapo. Kotimo re pasimosa maiya amo epo someraka, "Koteaka hemakapukua rakiraka risikianie." Aisa hakása nine repo kekemaraka risikianie.

<sup>2</sup> Maiya suamo re hakásá hakásaraka né níane makama fanarakা risikiakopo. Aporo hinamo suaki tau auaraka hemakapukua risikianie. Metamo néaki mahisirane yaiya mahisiraka rekeno, nómo eaki sapehoanafonoraka himu tumurumo hemakapukua rekeanie.

<sup>3</sup> Re namina yia saperaka fasikia risikiakohoamo Ho Kotesamo re su himu hakásaraka risikiasimo ararerakanapo. Himu hakásaraka hemakapuramo isu suane isina hakása kikinarako risikinapo. Maiya suamo yaiya ayíáka risikiakosakipoko paroaka wakapuaka rakiraka risikianie.

<sup>4</sup> Aporomano ipi hokono ipi korake suane oto hakásá yia area ayíáka, kakimara aporo hinamo su sarimaraka Keresomo ipi kau asiapo. Arirakano Ho Kotesa soko hakásapo. Arirakano keseke isu su Kotiyaki yaiyi risikiakosa someane soko hakásapo. Asiamo Kotimo ayiakakosaposane arirakarihoamo isu su kau risikinapo.

<sup>5</sup> Arirakano Unihaeaane soko hakásapo. Arirakano Yasuaki himu hakásaraka hemakapurane soko hakásapo. Arirakano hea tapukumarerane soko hakásapo.

<sup>6</sup> Arirakan Koti soko hakásapo. Asiamo isiapo aporo hinamo suamo Atane ipipo. Ipi hakásapo unihaeaka rekenapo. Ipi hakásapo reyaki tipia rerapo. Ipi hakásapo re himua rerapo.

<sup>7</sup> Kotimo ipi yaku ararerane isu suaki kasapo. Kasane Keresomo parakuraka isuaki hakásaraaka kasapo.

<sup>8</sup> Arirakan Kotimo sawia popasane oyapo. “E yapura hisia maiya amo yunu wekea marokono aporo ayíaka\* hisiapo. Hinaka aporo hinamoaki makata yaku kekepo kasapo.” Ayíaka somesane Yasuane popahoareapo. (Buk Song 68:18)

<sup>9</sup> E yapura hisiapo, aisa amo kepoane oyapo. Kereso fana hauaka wo pesapo. Pekea nina keseke hemene yanura narihiisiano.

<sup>10</sup> E pesane soko, hisiane soko, Kereso ipi hakásapo. Arirakan ti yapurane marokeraka, namo kakaro hepene yapura hisiapo. Hisia amo makata suane hurutapikia epo ipi kakaro marokesapo. Asiamo hepene soko, hauaka one soko, makata su koteaka risikiasimo epo ipi asekea rekeakosakipoko hisiapo.

<sup>11</sup> Arirakano epo makata rakirane, epo some kakimara aporo hinamomo rakisimo iaki wakapu ararenane yaku kasapo. Kasasamo aporo metakira tarira aporo hoasimo murikimasapo. Aporo metakira porofete aporo hoasimo murikimasapo. Aporo metakira Yasuaki risiakio pariraka some kape pura aporo hoasimo murikimasapo. Aporo metakira paseto aporo hoasimo murikimasapo. Aporo metakira tisa aporo hoasimo murikimasapo.

12 Kakimara aporo hinamo suamo Kotimo makata rakirane siaraka rakisimo Yasumo wakapu ararenane yaku kasapo. Karakano Kotimo aporo hinamomo makata kekepo rakirane yia su sarimarakarakan makata rakira suane mawakapuhokosapo. Asiamo Keresoa paosa aporo hinamoane Kereso ipi kaua sarimarakaraka risike i suane mawakapuhokosapo.

<sup>13</sup> Mawakapuraka Yasu Keresoaki hemakapurane isiaapo suamo himu hakásaraka hemakapusua hakása nineraka risikiakosapo. Kotimo hokosamo ainane isiaapo suamo

\* 4:8: Yasu kusua maturikia taesa maiya amo Sataneane kakaro hurutapikia marokesapo.

himu hakásaraka hemakapukusapo. Asiamo himumo hemaka apuramo isuane rora-hokosafapo. Sisimaraka hemaka apura ayíáka wakapuraka risikiakosapo. Kereso menane sisimaraka risike Keresomo ainane isiapo himua komarukua risikino, Kereso menane kakaro sisimaraka risikiakosapo.

<sup>14</sup> Sisimaraka arisiamo hokosa arisia ayíáka risikiakosafapo. He kupamo kasu makepari-akepariana ayíáka isu ayíáka risikiakosafapo. Aporomo kotafe someane kekemarape sape ro purakano sape aka hinakanayiakakosafapo. Arirakano hasaka rakisimo aporo metakiramo isuaki mahoperaka kirimaraka somerakan, isiapo kakimakosafapo.

<sup>15</sup> Arirakano kakaro some hákasane isiapo kakimaka somehokosapo. Aporo metamo metaki himu pukua, metamo metaki himu pukua, ayíáka himu tumurumo hemakapusuane kararaka rakipe pukusapo. Ayíáka risikino Keresomo ainane káraraka risikiakosapo. Kereso ipiane unihaepo. Ipi kaua isu su sarimaraka risikinapo.

<sup>16</sup> Keresoaki isiapo kataka marekea risike isu hakásaraka risikinapo. Kiki kataka arisia ayíáka isiapo suamo Unihae Yasuaki kataka marekea risikinapo. Kataka marekea risike makata rakirane kekepo hakásara hakásaraka epo soko ipi rakirane rakikia, metamo soko epo ipi rakirane rakikia, ayíáka kekepo hakásara hakásaraka rakiraka risikinapo. Ayíáka rakiraka risikino, isu suane Keresoa sarimaraka risiasamo isu isina mawakapuraka kárahokosapo. Isiapo aporo hinamo suaki himu tumurumo hemakapukua risikinone ane, isu su Keresomo kaua hakásara risiane isu mawakapuhokosapo.

*Isu Keresoaki kaweraka risiane oyapo.*

<sup>17</sup> Nómo some one reaki paroaka somerakanapo. Unihae Yasumo yano motosa aeyaka nómo reaki somerakanapo. Keresoa paohoanafonosa aporo hinamo arisia ayíáka re risikiakopo. Namina mokome hemakapukua arisia ayíáka hemakapukua risikiakopo.

<sup>18</sup> Nena aporomo hemakapurane katosa ane hemakapurakanapo. Ipu Kotimo someane kaiyako hisiraka kakaro himeteraka koarentera rakiyakira risikinapo. Ayíáka risiasamo Kotimo ainane fasikia risikinapo.

<sup>19</sup> Arirakano ipu makata kotesa soko, makata watikisa soko takekeha hemakapurane fasapo. Hinamo hakimarané himu matumururaka himu pukua ayíáka makata watikisa susu rakiako seseraka risikinapo. Ayíáka ipu kaumo hemakapusua ane kekemaraka mapirarakaraka rakiyakira risike kaiyanafapo.

<sup>20</sup> Re ayíáka risikiasimo Keresomo reaki some kasafapo.

<sup>21</sup> Keresomo some kasane repo kaisiapo. Kakaro someane Yasumo reaki some karakano repo kakimasapo.

<sup>22</sup> Asiasamo pasu paté horomaka mamakatena ayíáka, fana risia maiya amo repo makata watikisa ainane metakarikia mamakatehoanie. Fana makata watikisa aina amo re himuane maseseraka ayíáka rakiyakira risiamore re himuane mokoatikisapo.

<sup>23</sup> Yumo himumo hemakapurane kakaro makawehoanie.

<sup>24</sup> Pasu kawe osona ayíáka makata aina kaweano osohoanie. Makata kaweano Kotimo ipi aina aeyaka kepomaresapo. Makata aina kaweano oyapo. Ereketaera rakiyakira risike makata watikisa kikisiraka koteaka susu risikino, kakaro koteaka susu risikiakosapo.

<sup>25</sup> Asiamo yaiya kotafe hoakopo. Isu su Keresomo aporo ira hakasasamo ní maeaki kakaro hokoo somehoanie.

<sup>26</sup> Nómo saperaka reke sape marekea somehokopo. Pipu yia mituru sapesane saperaka reke maiya tukeakohoamo sapesane mafahoanie.

<sup>27</sup> Né himua Satanemo korakemo porokoa finihokosane hasaka koasimo, saperaka arirakano kotafe someraka ayíáka watikiaka rakirane mafahoanie.

<sup>28</sup> Hakimora aporo reo, fana repo makata nakosa soko pasu soko hakimosane yumo hakimokoakopo. Repo makata nakosa soko pasu soko mokoakoso koteaka rakinie. Rakikia makata moraka aporo makata forosan arareraka kakakosakipoko rakinie.

<sup>29</sup> Some watikisane akaimo somehokopo. Makotekoko ararenane someane somehoanie. Aporo paripuko hemakapuraka risiane mawakapuhoko arareraka somehoanie. Aporo himu nekeia umiraka risiane mawakapura someane somehoanie. Maiya suamo ararenane someane somehoanie.

<sup>30</sup> Kotimo Ho Kotesamo hisihoasimo rakiyakopo. Hisihoasimo somehokopo. Keseke Kotimo ipiyaki hakásara yaiya risikiasimo isu pasimokoakosapo. Pasimokoakosane hemakapusimo Ho Kotesa isuaki kasapo. Ho Kotesane karaka, isu murikimasapo, aíyaka isiapo hemakapusireapo.

<sup>31</sup> Himu mahisinane soko, saperane soko tapare saperane soko metakarinie. Metaki kotafe makata topakamaraka somerane soko, me irirarako somerane soko mainamarekea somerane soko metakarinie. Né mokoatikirakano nómo ropo mokoatikinane soko metakarinie.

<sup>32</sup> Arirakano aporo metane repo kamenakaraka ararehoanie. Repo eane arareraka makotehoanie. Kotimo soko Keresomo soko repo watikisane mafáraka merarusapo. Mafáraka meraruna ayíáka repo soko aporo metamo néane mokoatikirakano nómó ropo mokoatikinafaraka mameraruhoanie.

## 5

*"Faesa á risikianie." Aisane oyapo.*

<sup>1</sup> Reane Kotimo hokosapo. Asiasamo reane Kotimo himu tumurumo hemakapurakanapo. Reane epo ipi hokosasamo e area ayíáka risikianie.

<sup>2</sup> Repo aporo hinamo metane himu tumurumo hemakapurakano repo Yasu Keresoane kekemarakanapo. Keresomo isu himu tumurumo hemakapuraka isupoko farimaka kusuapo. Fana makata watikisapoko apihoko saro sipi rukua pairakano sisápe yamoane yapura hirapo. Hinakano Kotimo sesesapo. Arirakano isiapo watikisapoko apiana ayíáka apihoko Yasumo farimaka kurakano Kotimo sesesapo.

<sup>3</sup> Arirakano re Kotimo hokosasamo hinamo hakimako hemakapurane soko, himo asekea himu purane soko, metamo menane ano makaripi ayíáka himu topakapurane soko, makata anane su metakarinie. Makata ane kakaro faraka rekeno, aporo hinamo metamo neaki topakamaraka somehokosafapo. Kotimo aporo hinamomo makata watikisane kikisiraka koteaka susu risikianie.

<sup>4</sup> Hinamo hokomarekeia somerane soko, ekene meaka somerane soko, makata watikisa hokomarekeia somerane soko somehokopo. Some ane repo somehoane siahoasifareapo. Arirakano repo Kotiaki suseaka somerane somehoanie.

<sup>5</sup> Arirakano hinamo hakimara aporoane soko, hinamo hokomaka somera aporoane soko, makatane ano makaripi ayíáka himu tumurumo hemakapukua rera aporoane soko, aporo asiane su Koti rea hauaka á hiakosafapo. Apromo hinamo soko metao, makata metane soko metao mako himu tumurumo hemakapukua reke, Kotiaki himu tumurumo hemakapurakanafapo. Kotiane hemakapunafonoraka makata metane makáraraka rekeno, aporoamo makata ane Koti pariraka kekereraka makárarakanapo. Aporo ayíáka reane namo kakaro Koti rea hauaka á hiakosafapo.

<sup>6</sup> Asiamo repo namina makata ainane koteaka asekea hemakapukua risikianie. Repo watikiaka rakisimo apromo mokome me rukua kotafe somerakano, someane kaiyakopo. Kotafe someane apromo kaikia Kotimo someane koaretaeraka watikiaka rakira, aporoaki Kotimo saperane kakakosapo.

<sup>7</sup> Kotimo someane koaretaeraka kotafe somera aporoane kekemahokopo. Aporoaki himu hakásaraka hemakapukua risikiakopo.

<sup>8</sup> Fana re katosa á risiapo. Asiáne yumo Unihae Kotiaki risikiako pariraka, reane faesa á risikinapo. Asiamo Kotimo aporo hinamoane faesa a risira ayíáka re soko ayíáka maiya suamo faesa á yaiya risikianie.

<sup>9</sup> Kakama faesa á risike ira wate sakepamo perapo. Aina ayíáka isu faesa á risike kakaro koteaka risikiakosapo. Ereketaeraka risike kakaro somerane susu repo somehokosapo.

<sup>10</sup> Arirakano repo Kotiane sesehoasimo makata kotesa ainane hemakapukua rakinie.

<sup>11</sup> Hemo sunumo karotapiraka makata koteaka parunafapo. Aina ayíáka aporo hinamo katosa á risike ipu rakirane watikiaka rakirapo. Asiamo iyaki sarimaraka hakása risikiakopo. Ipu watikiaka rakisiane aporo hinamo suamo kaiyisimo repo makakamaraka somehoanie.

<sup>12</sup> Arirakano aporo hinamo metakira katosa á risike makata kaíyasa watikiaka rakisiane isiapo akaimo somerakano kaíyarako hisihokosapo.

<sup>13</sup> Aporo hinamo katosa á risike watikiaka rakisiane repo makakamaraka somerakano, ipu watikiaka rakisiane kakaro hemakapukusapo.

<sup>14</sup> Asiamo aporo amo watikiaka rakisiane metakarikia, faesa á risikiako poparipeakosapo. Asiamo fana aporo metamo someraka, "Aporo kusua asiane turisie. Aporo wakakesane turisie. Ayíáka turikia purakano Keresomo faesane reaki kakakosapo," ayíáka somesapo.

<sup>15</sup> Repo namina makata ainane koteaka asekea hemakapukua risikianie. Aporo makata kotesa takekea hemakapunafonoraka arisia ayíáka risikiakopo. Aporo koteaka takekea hemakapukua arisia ayíáka risikianie.

<sup>16</sup> Maiya omo aporo hinamo metakira watikiaka risikinapo. Watikiaka arisiamo ikia koro mapirira ayíáka mapirikia risiapo. Asiane maiya omo Kotimo ikia koroane ropakamaka Yasuane hemakapusimo, repo epo ainane rakikia, epo someane soko repo some kakanie.

<sup>17</sup> Kotimo hemakapusuane repo meraruraka himetehokopo. Ipi hemakapusuane soko, ipi makata rakirane soko, repo rakisimo maresane soko repo koteaka kokoa takekeia hemakapukua risikianie.

<sup>18</sup> He watikisa nenaka masuaraka arisia ayíáka risikiakopo. He watikisamo himu faremarekea kakaro watikiaka mokome koraka risirapo. Arirakan Ho Kotesa re himua komarukua risikiasimo rakinie.

<sup>19</sup> Repo namina yia some kakakosakipoko, Kotimo ipi someane Same pukua (Buk Song) á popasa aeyaka somehoanie. Arirakan kurikuri keraka kesarane kesahoanie. Arirakan repo kesa metakira Ho Kotesamo reaki hokokarakano kesahoanie. Himumo hemakapukua Unihae Kotiaki yaiya kekereraka kesanane kesahoanie.

<sup>20</sup> Maiya suamo makata supoko Ata Kotiaki susehoanie. Unihae Yasu Keresomo yano motosane hemakapukua Kotiaki susehoanie.

*Aporo ipi hinamo tati risikiakosane oyapo.*

<sup>21</sup> Repo Keresoane hemakapuraka, Keresoa paosa aporo hinamo metamo somerakano someane soko kaiyinie.

<sup>22</sup> Hinamo, nómó Unihae Kotiaki hemakapuraka epo someane kakiamara ayíáka ní aporo pusuamo someane soko kakimakanie.

<sup>23</sup> Asiamo Keresoa paosa aporoane Keresomo unihaeaka asekeea area ayíáka, hinamo né soko, ní aporo pusuamo ayíáka unihaeaka asekeea rekenapo. Keresoa paosa aporo hinamoane Keresomo ipi kau asiapo. Iane Keresomo mafasiasiapo.

<sup>24</sup> Arirakan Keresoa paosa aporo hinamomo someraka, "Yasu, né unihaeaka rekenapo. Nómó someane nómó kakimarakanapo." Aiyaka somehora ayíáka hinamo repo soko repo aporo pusuaki someraka, "Né unihaeaka rekenapo. Nómó some suane isiapo kakimarakanapo." Aiyaka hinamo repo somehoanie.

<sup>25</sup> Keresomo ipiaki paosa aporo hinamopoko farimaka kusuapo. Iane himu tumurumo hemakapuraka kusuapo. Asia ayíáka aporo repo soko namina hinamoane himu tumurumo hemakapunie.

<sup>26</sup> Keresoa paosa aporo hinamomo makata watikisane kikisiraka koteaka susu risikiasimo Yasu kusuapo. Aporo hinamomo makata watikisane kosoraka mafahoasimo hea tapukumurikia, arirakan Kotimo someamo soko makata watikisa kosoraka mafanapo.

<sup>27</sup> Arirakan aporo hinamo kau keré, neketasisa arisia ayíáka, isiapo watikiaka hemakapukua rakiane siahoasareapo. Asiane Keresoa paosa aporo hinamo ereketae koteaka susu risikiasimo Kereso kusuapo. Isu pasimokoakosa maiya amo isu faeraka makata eresa wakasema soko risikianafonoraka, kakaro koteaka susu risiane epo pasimokoakosapo.

<sup>28</sup> Asiamo aporo nómó ní kau himu tumurumo hemakapura ayíáka, ní hinamoane soko ayíáka himu tumurumo hemakapunie. Ní hinamo himu tumurumo hemakapuraka né níane soko himu tumurumo hemakapurakanapo.

<sup>29</sup> Aporomo e ipi kauane hisiraka rerapao. E ipiane makata nakosa kaka, ipi kau koteaka asekeea rerapao. Aina ayíáka Keresoa paosa aporo hinamoane soko Keresomo asekeea rerapao.

<sup>30</sup> Kereso ipi korake ipi hokono ipi kau asiane isupo. Asiasamo epo isu asekeea rekenapo.

<sup>31</sup> Kotimo sawia popasane oyapo. "Aporomo ipi ata ipi ama metakarikia hinamo arumaka tati kau hakásaraka risirapo." Aiyaka popahoareapo. (*Stat 2:24*)

<sup>32</sup> Popasa amo takume some kepoane kakaro káraro. Someamo kepoane Kereso ipiaki paosa aporo hinamoane kau hakásaraka risikinapo.

<sup>33</sup> Asiamo aporo repo soko hakásaraka nómó níane himu tumurumo hemaka apura ayíáka ní hinamoane soko himu tumurumo hemakapunie. Hinamo né, ní aporomo né unihaeaka asekeea rekeno, epo someane nómó kaikia eane makotehoanie.

## 6

*"Hokosaki soko ipi atape ama tetaki soko uyáka risikianie," aisane oyapo.*

<sup>1</sup> Hokosao, nómó Unihae Keresoaki hemakapukua kataka marekea reke ní atape ní ama tetapó someane kakimakanie. Kakimaka ainane ereketaesapo.

<sup>2-3</sup> Arirakan Kotimo ipi somemane Moseseki someaka maresane oyapo. "Ní atape ní ama tetáne hemakapukua makotehoanie." Aiyaka someaka maresapo. Somemane one repo metamo kakimaka kekemarakano, Kotimo eane makotehókosapo aisapo. Makotehókosapo aisamo kepoane oyapo. Somemane one metamo kakimaka rekeno, e hauaka wo keremisi karamo koteaka susu rekeakosapo. Arirakan Kotimo makotehókosapo, aisapo. Kotimo somemane one aporomano metamo kekemarakano, Kotimo e makotehókosapo, aisapo. Kotimo somemane one mareasiraka somemane metakira murisiane aporomo kekemarakano Kotimo eane makotehókosapo aisafapo. Kotimo

somemane akiyaki Kotimo makotehokosapo, aisa akiyaki sarimaraka, somemane one fana someaka maresapo.

(Kisim Bek 20:12; Lo 5:16)

<sup>4</sup>Hokosa wafayao, nōmo ní hokusamo sapehoasimo matewa marekea me iriraraka some kakakopo. Ní hokosa sisimaraka koteaka rekeasimo hokusane Unihae Kotimo asekea reke atarira ayiáka, nōmo ní hokusane ayiáka asekea reke tarinie. Hokusane Kotimo maropona ayiáka nōmo soko ayiáka maropohoanie.

*Aporo raipa roposaki soko, aporo raipa roposa amo aporo asekea reaki soko someaka maresane oyapo.*

<sup>5</sup>Aporo raipa roposa repo hauaka wo aporo asekea risiamo someane kakimakanie. Re asekea risia aporo namina kárasasamo, ipu someane kakaro kaikia hemakapukua risikianie. Iaki himu hakásaraka hemakapukua rakinie. Repo Keresopoko arakira ayiáka, repo asekea risira aporopoko ayiáka rakinie.

<sup>6</sup>Aporo asekea risiamo sesehoasimo ipu asekea arisia maiya amo wakapuaka rakikia, arirakano asekea risikinafonona maiya amo wakapuaka rakanafonoranone ane sia-hoasifareapo. Re Keresomo aporo raipa roposa risiasamo maiya suamo koteaka rakinie. Kotimo hemakapusuane kekemaraka himumo seseaka rakinie.

<sup>7</sup>Repo arakira maiya amo seseaka rakiraka kakaro koteaka rakinie. Repo aporopoko hákasa rakiakopo. Unihae Kotipoko rakinie.

<sup>8</sup>Aporo hinamo suamo makata rakirane aporo raipa roposa soko, aporo raipahoanafonosa soko ipu suamo makata rakirane Unihae Kotimo aseakosapo. Asekea koteaka rakirakano asekea, makata ropo kotesa kakakosapo.

<sup>9</sup>Aporo asekea risiao, repo soko aporo raipa roposane koteaka asekea risikianie. Manamona someane somehokopo. Ipu Unihaeane soko repo Unihaeane soko hakásáiyapo. Hakásá nine ipi hepené yapura rekenapo. Aporo meta yano motosa kára ane mahimuraka aporo meta yano motosa kárahoanafonosane mahimuhoanafonoraka Kotimo anafapo.

*Kotimo yunu weakosa makatane mokoanie, aisane oyapo.*

<sup>10</sup>Nōmo some fahokosakipoko some wakasema meta oyapo. Unihae Kotiaki himu hakásaraka hemakapukua risike epo wakapuanne mokoa risikianie. Epo wakapuanne mokoa kakaro paroaka wakapuaka risikianie.

<sup>11</sup>Kotimo ipi yunu weakosa makatane karakáno mokoa risikianie. Satanemo re mahop-eraka wasere morakanone, epo wakapuanne repo rukua mosaka tapiako mokoa risikianie.

<sup>12</sup>Aporomanoyaki weraka risikinafapo. Hauaka wo katosamo unihae Sataneaki soko, ti yapura ho kekepo watikisa risiaki soko, hauaka wo yakasa ho, yatafu risiaki soko, i suaki weraka risikinapo.

<sup>13</sup>Ayiakakosasamo Kotimo yunu wera makatane su mokoa risikianie. Mokoa risi-akipoko watikisa maiya ane fasereaperamo, ipu reyaki werakano, re teketariakosafapo. Re fimiti patera sapea pukusafapo. Yunu wekea faraka paroaka wakapuaka yaiya risikiakosapo.

<sup>14</sup>Weakoana maiya amo ira rokopa mena asi mena tare menu ane mokoa sarimana ayiáka Kotimo yunu weakosa makatane mokoa sarimahoanie. Terakae hira asiane kakaro some ayapo. Kawa karerapaka makata mataina asiane ereketae rera ayapo.

<sup>15</sup>Tamaka osona asiane, Keresomo tau auaraka mapiraraka rerane kakasimo some kotesa some kará ayapo.

<sup>16</sup>Asi asiane Yasuaki himu hakásaraka hemakapura ayapo. Yasuaki himu hakásaraka hemakapukua reke, Satanemo tare ira rufiyaki perakano, asimo rukua topakataeana ayiáka Satanemo kotafe someane repo rukua topakataehokosapo.

<sup>17</sup>Hati parosa karotapira asiane Yasumo re mafasisiane ayapo. Yasumo re mafasisiane kakimaka risikianie. Ira rokopa asiane Kotimo some ayapo. Someane Ho Kotesamo reaki some karakarakano kaikia, yunu aporoane ira rokopamo akarera ayiáka Kotimo someamo yunu aporoane kareanie.

<sup>18</sup>Maiya suamo Kotiaki kurikurihoanie. Kurikuriraka, "Koti nōmo isu ararehoanie," aiyaka kurikurihoanie. Maiya suamo Ho Kotesamo reaki somerakano, somesa hakásá yine Kotiaki kurikurihoanie. Kotimo aporo hinamo suane epo ararehoasimo maiya suamo farimaka kurikurihoanie. Himu hemakapuramo himu hakásaraka hemakapukua wakapuaka risike kurikurihoanie.

<sup>19</sup>Repo apo soko farimaka kurikurihoanie. Kotimo ipi someane anoaki some karakano, nōmo kakama mapiraraka koteaka somehoasimo kurikurihoanie. Yasumo isu mafasiapi. Aisa amo kepoane fana mahamesapo. Mahamesane yumo aporomo Yasuane hemakapusimo some kotesane mapiraraka namonafaraka some kakasimo repo anopoko kurikurihoanie.

<sup>20</sup> Aporo hinamomo Yasuane hemakapusimo some kotesa some kakako Kotimo ano pusiesapo. Yumo ano tipura rekenapo. Some akara maiya amo ano namonafaraka wakapuaka reke some kakasimo repo kurikurihoanie.

*Poremo ayapasane oyapo.*

<sup>21</sup> Tíkikase ane nōmo ní mae asiapo. Epo Unihae Kotimo rakirane rakiraka reke metakari-rafapo. Anoane epo reaki somehoko peakosapo. Nōmo ainane repo hemakapusimo epo reaki somehoko peakosapo.

<sup>22</sup> Isu uyáka risikinapo, aíyaka epo reaki somehoasimo pusierakanapo. Re himu fanapaka paroaka mapiraraka risikiasimo epo somehoko pusierakanapo.

<sup>23</sup> Re auaraka risike himu tumurumo hemakapukua risike, Kotiaki himu hakásaraka hemakapukua risikiasimo Koti Atamo re ararehoasimoripo. Unihae Yasu Keresomo soko re ararehoasimoripo.

<sup>24</sup> Unihae Yasu Keresoaki kakaro yaiya himu tumurumo hemakapukua risira aporo hinamoane Kotimo hemakapukua yaku ararehoasimoripo. Kakaroripo. Ayapa, ano Porepo.

## Firipai

### **Firipai sawi one mahemakapukusa someane oyapo.**

Pore kimisi puraka Masetónia hauaka á Firipai taonea, aporo hinamomo Yasuane hemakapusimo some karakano aporo hinamo yakaimo kakimasapo. Firipai taonea Keresa paosa aporo risiamo Poreane himu tumurumo hemakapuraka, Poreane arareraka mone kasapo.

Keseke Pore Rome sitia tipura makekea reamo, Firipai aporomo mone sarimaraka Pore kakasimo Epafarotaétaseaki karaka maka pusiesapo. Poremo Firipai aporo hinamoaki suseaka sawi one popasapo. Poremo poparaka Epafarotaétaseaki karakano epo maka pusupo.

### **Firipai sawia some kepo parakuraka popasane oyapo.**

1:1-2 Poremo sawi one kepomarekea popasapo.

1:3-11 Poremo iane hemakapukua Kotiaki suseraka, ipoko farimaka kurikurisapo.

1:12-30 Pore tipura reke hemakapuraka, "Ano kurakano Yasuyaki yaiya rekeakosapo. Ano hitafe reke Yasumo makata rakirane yaiya rakiraka rekeakosapo," aiyaka hemakapusuapo.

2:1-11 Yasuane hauaka wo reke epo ipiane makararaka rakisiafapo. Repo soko ayiaka hemakapukua risikianie, aisapo.

2:12-18 Re Keresa paosa aporo hinamo hauaka wo risike, repo faesa kotesane tarinie, aisapo.

2:19-30 Re arisia Timotiane soko Epafarotaétaseane soko pusiehokosapo, aisapo.

3:1-11 Kotafe tisa aporomo somerakano, repo kakimakopo, aisapo.

3:12-21 Keresomo someane kekemaraka kepoa naohokosakipoko yaiya rakiraka risikianie, aisapo.

4:1-9 Makata some metakira repo kaikia hemakapukua risikianie, aisapo.

4:10-20 Firipai aporo hinamomo Poreane mone karakano, Poremo susesapo.

4:21-23 Poremo ayapasapo.

*Keresoa paosa aporo hinamo Firipai taonea risiaki Poremo sawi poparaka makesane oyapo.*

<sup>1</sup> Firipai taonea Keresoa paosa aporo hinamo re su risiaki ano Poremo sawi one poparaka makerakanapo. Re asekeea risira aporoaki\* soko, re tikone aporoaki soko, re suaki ano Poremo sawi one poparaka makerakanapo. Timoti anoyaki hakása reke ano ararerakano sawi one reaki poparaka makerakanapo. Timoti eto Yasu Keresopoko makata rakira aporopo.

<sup>2</sup> Yasu Keresoane isiapo Unihaepo. Kotiane isiapo Atapo. Tetapō re makoteraka re mapiraraka tau auaraka risikiasimo nōmo kurikurirakanapo.

*Keresoa paosa aporo hinamo akipoko Poremo kurikurisane oyapo.*

<sup>3</sup> Re Firipai aporo hinamoane nōmo hemaka apura maiya amo nōmo Kotiaki suserapo.

<sup>4</sup> Nōmo reane hemakapukua kurikuriana maiya amo seseaka kurikurinapo.

<sup>5</sup> Asiamo repo Yasu hemakapusimo nōmo some kotesane kepomarekea some karakano repo kakimasapo. Kakimasa maiya amo repo ano arareraka aporo hinamo metakiraki some karakasupo. Some kotesa ane isina hakása some kape pekea pipu wo paurakanapo. Asiasamo nōmo Kotiaki suserakanapo.

<sup>6</sup> Nōmo hemakapuanne, repo himumo koteaka hemakapukua rakisimo Kotimo reaki kepomarekea tarisiapo. Asiamo repo rakipe pukua Kereso pariapera maiya amo rakikia makasapo. Aiyaka nōmo hemakapurakanapo.

<sup>7</sup> Maiya suamo nōmo reane himu tumurumo hemakapurakanapo. Ano tipura makerakanoo yia soko, ano hukururakano soko, nōmo meaka taeraka someana maiya amo soko, "Kotimo someane kakaro somepo," aiyaka tarikia somesa maiya amo soko, maiya suamo repo anoyaki kikinarako Kotimo makata rakirane isina hakása rakisiapo. Kotimo isu murikimarako epo ipi makata rakirane wakapuaka rakisimo Kotimo isu yaku araresapo.

<sup>8</sup> Yasu Keresomo reane himu tumurumo hemaka apura aiyáka nōmo soko reane himu tumurumo hemakapurakanapo. Ano reyaki hakása rekeakoripo. Aiyaka hemakapurane Kotimo aserakanoo nōmo kakaro somerakanapo.

<sup>9</sup> Asiamo repoko nōmo kurikurirane oyapo. Repo namina yia himu tumurumo hemakapurane káraraka hemakapukua risikiasimo nōmo kurikurinapo. Arirakano repo namina

\* **1:1:** Asekeea risira aporo ane paseto aporopo.

yia himu tumurumo hemakapukua risike, Kotimo makata ainane hemakapukusapo. Kotimo makata ainane hemakapuraka makata ereketaesane soko, makata watikisane soko takekeaa hemakapukusapo.

<sup>10</sup> Ayiáka hemakapuraka, raraponane metakarikia, kakaro makata kotena susuane takekeaa hemakapukua kekemahokosapo. Koteaka susu risina Yasu pari apera maiya amo aporomo reaki hukurusuane kakenafapo aihoasimo kurikurirapo.

<sup>11</sup> Repo makata ainane Yasumo makoteraka ararerakano, Kotimo hemakapura ayiáka, repo ayiáka hemakapukua, ereketaera risikiakosapo. Ayiáka risikino aporo metakiramo asekea Kotiane makáraraka kekerehokosapo. Ayiakasimo nōmo kurikurirakanapo.

*Pore tipura reamo, aporo hinamo yakaimo Yasumo someane kasiane oyapo.*

<sup>12</sup> Keresoa paosa aporo maeo, repo hasaka hemakapukohoamo makata one nōmo reaki somerakanapo. Rome aporomo ano tipura makerakano, aporo hinamomo Yasu Kereso hemakapusimo some kotesane some kayane ipu matasohokosoko asiāne, kakaro mata-sosafapo. Yasumo someane yaiya some karakano, aporo hinamo yakaimo kairakanapo. Some kotesa amo kakaro suaka taerakano,

<sup>13</sup> Rome kamanimo Unihae Sisamo apea ame aporo asekea risiamo soko, aporo metakira Rome sitia risiamo soko, ipu kaiyiāne Yasu Keresoane nōmo some kasasamo ano tipura makesapakano ipu kairakanapo.

<sup>14</sup> Ano tipura makesa area amo, Keresoa paosa aporo maemo himu namoraka fofara faraka, Kotimo someane aporo hinamoaki wakapuaka some karakanapakae. Kotimo some kaiyako hisisa aporoaki ipu karekekeaa namona faraka, some karakanapakae. Ipu aseane, ano Pore tipura reane Kotimo ararerakano, ipu asekea hemakapuraka, "Kotimo Pore ararena ayiáka isu soko ararehosireapo," aiyaka ipu Kotiaki himu hakásaraka hemakapurakanapakae.

<sup>15</sup> Arirakano Keresoa paosa aporo metakiramo anoaki kakanakeraka hemakapuraka, "Pore ipi tarira aporo káraraka reane, isiapo e mahurutapiika isu isina káraraka risikiakosapo," aiyaka hemakapukua, ipu Kotimo someane some karakanapakae. Arirakano Keresoa paosa aporo metakiramo, anoaki koteaka hemakapukua risike, Kotimo someane some karakanapakae.

<sup>16</sup> Ipu aseane, aporo hinamomo Yasu hemakapusimo nōmo some kasakipoko ano tipura makesekeno asekea, ipu anoaki himu tumurumo hemakapukua, Kotimo someane some karakanapakae.

<sup>17</sup> Asiāne aporo metakiramo namina yano motosa makárahokosakipoko, aporo hinamomo Yasu hemakapusimo some kotesane some karakanapakae. Ayiáka some akarane ano tipura rekeno, ipu anoaki makata umisane kakakosakipoko hemakapurakanareapo.

<sup>18</sup> Ane soko siapo. Ayakarie. Ipu namina yano motosane makárahokosakipoko hemakapukua, Yasu hemakapusimo some akarane soko metao, aporo metakiramo namina kakaro Yasuaki himu tumurumo hemakapukua Yasu hemakapusimo some akarane soko metao, ipu suamo Yasu hákasanee some karakanapo. Asiamo ano seseaka mapiraraka rekenapo.

*Poremō hemakapuraka, "Ano hitafe reke, reane ararehoko hemakapurakaripo," aisane oyapo.*

<sup>19</sup> Repo anopoko farimaka Kotiaki kurikurirakano, Yasu Keresomo Ho Kotesamo ano ararerakano ano tipura makesane Kotimo ano makotehokosapo. Asiamo ano seseraka rekenapo.

<sup>20</sup> Asiāne nōmo úyaka hemakapurakanapo. Nōmo ní makata rakira akipoko ano kaiyahoko hisiripo. Ano himu namonafaraka nōmo maiya suamo Keresoane makamafanasa ayiáka, yumo soko ano tipura areamo, Keresoane makamafanarakaa rakiraka rekeakoripo. Yumo soko, keseke soko, yaiya Yasu Keresoane makáraraka rakiraka rekeakoripo. Aiyaka nōmo hemakapurakanapo. Ano akura maiya amo ayiakakosane soko, ano hitafe area amo ayiakakosane soko, Yasu Keresoane nōmo makáraraka makama fanahoko hemakapurakaripo.

<sup>21</sup> Asiamo nōmo hemakapusuane oyapo. Ano hitafe areamo nōmo Yasu Kereso hákasa makamafanahoko hemakapukua rekenapo. Arirakano ano akuramo soko, Kotimo anoane namo kakaro makotehokosapo.

<sup>22</sup> Asiāne ano hauaka wo hitafe area maiya amo, nōmo Keresomo makata rakirane rakiāne, ira wate sakepamo apéra ayiáka perakano, asekea, ano seserakanapo. Asiamo ano kukusane soko hitafe rekeakosane soko kotehoasireapo, aiyaka nōmo hemakapurakanapo. Asiasamo nōmo mayiaka hemakapunarakapo.

<sup>23</sup> Nōmo hemakapusua meta mane kotesare? Ano akuramo Yasu Keresoyaki hepene yapura yaiya rekeakosane namo kakaro kotesapo.

<sup>24</sup> Asiāne ano kau hitafe areamo nōmo reane ararehoko hemakapurakaripo. Nōmo reane ararehoko hemakapusuane kakaro káraro.

<sup>25</sup> Asiamo nōmo hemakapusuane, nōmo re ararehokosakipoko Kotimo ano asekea rekeno, ano yumo kukusafapo. Ano hauaka wo areamo repo Yasuaki himu hakásaraka hemakapurane soko, repo sesenane soko kárahoasimo reane nōmo ararehokosapo.

<sup>26</sup> Asiamo keseke ano tipura reane tonotaerakano, ano re arisia aperamo repo anopoko Yasu Keresoaki kekereraka makárahokosapo.

*Aporo metakiramo reane mokoatikirakano namonafaraka, himu hakásaraka risikianie, aisane oyapo.*

<sup>27</sup> Arirakano repo Yasu Keresoane hemakapukua epo some kotesane kakimaka risi-asamo, re kakimara aporo arisia ayíáka risikianie. Re nōmo aseako peraka soko metao, aseako peanafonoraka soko metao, re su himu hakásaraka risike, Kotimo someane yaiya kekemaraka risikinapakano nōmo kaiyako seseripo. Kotimo some kotesane metakarirapaka repo himu hakásaraka some karakanapakano, nōmo kaiyako seseripo.

<sup>28</sup> Arirakano re mokoatikina aporoane namohokopo. Aporo metakiramo someraka, "Mokoatikina aporomo reane manamorakanafapo," airakano nōmo kaiyako seseripo. Re namohoanafonorakano, ipu asekoae hemakapuraka, "Kotimo isu marutaeraka fa-hoasireapo. Kotimo iane mafasirakanapo," aiyaka Kotiaki yununa aporomo hemakapusapo. Re namohoanafonoraka risikino, Kotimo reane mawakapuraka arareraka mafasiákosapo.

<sup>29</sup> Kaisie, repo Yasuaki himu hakásaraka hemakapusimo, Kotimo re murikimaka maresapo. Arirakano Keresopoko re mokoatikirakano himu nakosane soko Kotimo murikimaka maresapo.

<sup>30</sup> Fana ano Firipai taonea reamo, Kotiaki yununa aporomo ano mokoatikirakano repo asesapo. Yumo soko Kotiaki yununa aporomo ano mokoatikirakanaporakano, repo kairakanapo. Ano mokoatikina ayíáka reane soko ayíáka mokoatikirakanapo.

## 2

*"Repo namina himu hakásaraka risike, aporo hinamo suane makotehoanie," aisane oyapo.*

<sup>1</sup> Re su Yasu Keresoaki kataka marekea risikino, re paroaka risikiasimo Yasu Keresomo re ararenapo. Arirakano Yasu Keresomo reaki himu tumurumo hemaka apuramo re kamenakaraka ararenapo. Ho Kotesane reyaki hakásä reke, re namina kíkinaraka risikiasimo ararenapo. Arirakano repo namina yia kamenakaraka hemakapusimo Ho Kotesamo ararenapo.

<sup>2</sup> Asiamo repo namina yia himu hakásaraka hemakapukua risikianie. Repo himu hakásaraka hemakapukua risike, namina yia himu tumurumo hemakapukua risikianie. Arirakano repo himu hakásaraka hemakapukua rakiraka risikianie. Repo ayíáka rakiraka risikino, nōmo asekoae sesehokosapo.

<sup>3</sup> Arirakano aporo metamo re asekoae kekerahoasimo rakiakopo. Re namina rupiaka makárahoko rakiakopo. Repo úyaka hemakapunie. "Ano kesekepo. Aporo metakirane namina fanapo." Aiyaka hemakapunie.

<sup>4</sup> Repo namina menane hákasa hemakapukua rakiakopo. Aporo metakirapoko soko hemakapukua rakinie.

*Yasu Keresomo ipi yano motosane makárahoanafonoraka reane oyapo.*

<sup>5</sup> Yasu Keresomo hemakapura ayíáka, repo soko ayíáka hemakapukua risikianie.

<sup>6</sup> Yasuane kakaro Kotipo. Koti Yasu tati siasapo. Siasi nine Yasumo ipiane makárasafapo.

<sup>7</sup> Ipi soko Kotiraka reanine ipi fanaraka reafapo. E ipiane aporo raipa pariraka reapo. Aporomanomo kauane maka peakea ipi apororaka reapo.

<sup>8</sup> E ipiane makáraraka unihae pariraka reafapo. E ipiane makárahoanafonoraka reke, Kotimo someane hákasa kakimaka rakiraka rekeno, aporomo e rusua kusuapo. Yasu Keresoane ira matapesa paremarekea rusua kusuapo. Kukusane epo waesafapo.

<sup>9</sup> Yasumo anakano asekoae, Kotimo eane makárasapo. Yasuane hepene yapura káraraka reke makata su asekoae rekenapo, aiyaka Kotimo someaka motosapo. Yasu Keresomo yano motosane fanapo, aiyaka Kotimo makamafanaraka maresapo. Aporo hinamo suamo yano motosane kesekepo, aiyaka Kotimo someaka motosapo.

<sup>10</sup> Asiasamo Yasu yano motosane yano honakano suamo kakuna porokoa toke e kekerehokosapo. Hepene yapura makata risiamo soko, hauaka wo makata risiamo soko, hauaka tamo atura makata risiamo soko, suamo kakuna porokoa toke eane kekerehokosapo.

<sup>11</sup> Ipu kekereraka someraka "Unihae kárane Yasu Kereso ipipo," aihokosapo. Aiyaka Yasuaki kekereraka, Ata Kotimo yano motosane soko makárahokosapo.

*"Hauaka wo aporo hinamo katosa á risikino, repo faesane tarinie," aisane oyapo.*

<sup>12</sup> Asiamo re uyáka risikianie. Hameo, ano reyaki hakása rekesuamo, nōmo someane repo kakaro kakimarakasupo. Kakimasa ayíáka, yumo soko, yaiya kakimaka risikianie. Ano reyaki rekeanafonorakano soko, nōmo reaki fana somerakasuane meraruhokopo. Yaiya rakiraka risikianie. Kotimo re fana mafasisiapo. Mafasisiane metakariakopo. Mafasisiane kakaro makosakipoko wakapuaka rakiraka risikianie. Metakarirapaka namoraka risikianie.

<sup>13</sup> Arirakano Kotimo ipi sesenane repo rakiako hemakapusimo, epo reane mahemakapurakanapo. Repo makata rakirane soko, kakaro rakisimo epo re ararenapo.

<sup>14</sup> Makata rakiniesane mahisiraka me úraka someraka tafatafanafaraka seseaka rakinie.

<sup>15-16</sup> Repo ayíáka rakiraka risikino, repo ereketaeraka rakiraka risikiakosapo. Re Kotimo hokosa risike watikiaka rakiakosafapo. Arirakano hauaka wo aporo hinamoane ereraka katoraka watikiraka risikinapo. Ipu kotafe horaka risikinapo. Iaki repo Kotiyaki yaiya rekeakosa someane repo iaki some karakanapo. Arirakano ti makata faeana ayíáka, repo faesane aporo ereraka katoraka risiamo aseakosapo. Re faeraka yaiya risikino asekea, Yasu pariapera maiya amo ano Poremo someraka, "Re faeraka yaiya risikino, nōmo reyaki fana makata rakisiane, nenakamaka rakiafareapo. Nōmo wakapuamo nenakamaka rakiafareapo," aihokosapo.

<sup>17</sup> Pirisiti aporomo\* makata yaku Kotiaki akara ayíáka, repo himu hakásaraka hemakapurane Kotiaki ayíáka yaku karakanapo. Arirakano ano rusua kurakano ano yapi pusuane Kotiaki ayíáka kakakosapo. Ano yapi pusua akiyaki, repo makata yaku akará akiyaki, Kotiaki kayane siahosaireapo. Ano rukua yapi purakano ano sesehokosapo. Re soko sesehoasimoripo.

<sup>18</sup> Asiamo ano soko re soko sesehokosapo.

*"Poremo Timotiane Firipai taonea pusiehokosapo," aisane oyapo.*

<sup>19</sup> Unihae Yasumo aorakano, maiya wakasema nina, Timotiane re arisia nōmo pusiehokosapo. Timoti pukua, re risiane asekea pariperaka, anoaki somerakano, nōmo kairaka sesehokosapo.

<sup>20</sup> Nōmo re koteaka risikiasimo hemaka apura ayíáka, Timotimo soko reane ayíáka kakaro hemakapurakanapo. Reane hemakapukusa aporo metakira wo risikinafapo.

<sup>21</sup> Aporo metakiramo ipu namina yine háksa hemakapurakanapo. Yasu Keresopoko makata rakirane ipu hemakapurakanafapo.

<sup>22</sup> Timotimo koteaka rakirakanano repo asesapo. Hokosamo ipi wafaya ararena ayíáka Timotimo ano arareraka iti hakasa risike, aporo hinamo metakiramo Yasu hemakapusimo some kotesane some kasapo.

<sup>23</sup> Fana anoaki yakapa fasereperakarihoamo aseakonapo. Asekea marekea Timotiane re arisia pusiehokosapo.

<sup>24</sup> Ano soko Kotimo ararerakano, reane aseako peakosapo, aíyaka hemakapurakaripo.

*Poremo Epafarotaétase ane Firipai taonea pusiehokosaposane oyapo.*

<sup>25</sup> Yumo Epafarotaétaseane re arisia nōmo pusiehokosapo. Epafarotaétaseane Keresoa paosa samo eane nōmo maepo. Eto iti hakasa rakiraka risike, himu hakásaraka Kotimo yunuanre werakanapo. Fana eane repo ano rea pusierakanano perakasupo. Repoko epo ano ararerakasupo.

<sup>26</sup> E pekea o reke, makata takamarakasupo. E makata takamasapakano repo kaisiapo. Repo kairaka, epoko himu nekea risiapakae. Asiamo Epafarotaétasemo kára hemakapukua rekeno, nōmo eane re arisia pusiehokosapo.

<sup>27</sup> Arirakano e makata takamasane namo kakaro kusuahopo. Kotimo ano makata umisa meta kakako hisiraka, e makata takamasane mafasapo. Mafaraka Epafarotaétaseaki soko, anoaki soko Kotimo namo kakaro kára kamenakaraka araresapo.

<sup>28</sup> Asiamo yumo Epafarotaétaseane re arisia nōmo pusierakanapo. E perakano asekea repo sesehokosapo. Repo seserakanano nōmo soko sesehokosapo. E purakano nōmo hisihokosafapo.

<sup>29-30</sup> Asiamo repo Keresoa paosa aporo mae Epafarotaétaseane perakano asekea, seseraka pasimakanie. Epo Yasumo makata rakiraka reane e makata takamaraka kusuahopo. Repo ano ararehoko peakosapoko asiáne, re su peane siahosifareapo. Siahosifasekeno repoko epo ano arareraka pesane, kusuahopo. Arirakano aporomo Unihaeane makama fanaraka hemakapukua, makata rakiraka risiane, i namina kukusane hemakupurafaraka, ayíáka risia aporoane makárahoanie.

\* **2:17:** Yasu peasiraka pirisiti aporomo Kotiaki makata yaku karaka, saro sipi kaua waene he rekemarekea, Kotiaki yaku karapo. Yasu kusua maiya amo makata ane metakarisapo.

**3**

*Aporomo Yasuaki himu hakásaraka hemakapukua rekeno, Kotimo hikumisia aporoane ereketae rekenapo, aisane oyapo.*

<sup>1</sup> Hameo. Nōmo some fahokosakipoko some one poparakanapo. Kotimo re ararerakano repo sesehoanie. Fana nōmo reaki sawi poparaka makesesuane, yumo soko some hakásaya yine popahoko hisirakanafapo. Aporo metakiramo kotafe someane kakimakopo, aiyaka nōmo efera hunia poparakanapo. Repo efera hunia soko kairakano some omo reane ararehokosapo.

<sup>2</sup> Arirakano aporo metakiramo someraka, "Kotimo neaki someraka, 'Ne siareapo,' ai-hoasimo kau hahaeraka patehoanie." Aira aporoamo someane kakimarapaka asekeanie. Aporo aiyaka somerane yao kása asiapo. Ipu mokome watikiaka rakirapo. Watikiaka rakiramo reane mokoatikirapaka asekeanie.

<sup>3</sup> Re kau hahaeraka patehoanafonosa nine, Kotimo hikumisia re siaraka risikinapo. Ho Kotesamo re himua mahemakapurakarakan, repo makata aina watikisane rukupatesapo. Asiasamo Kotimo hikumisia re kakaro Isiraya aporopo. Isu Keresoa paosasamo Ho Kotesa isuyaki hakásaya reke, isu ararerakano isiapo Kotiaki kekererakanapo. Kotimo hikumisia ereketae siaraka risikiano, isiapo isina makata ainane soko makata rakirane soko, makata aki himu hakásaraka hemakapurakanafapo. Yasu kusua akipoko isiapo himu hakásaraka hemakapurakanapo. Arirakano kau hahaeraka patenamo isu ararehokosafapo.

<sup>4</sup> Aporo metakiramo hemakapuraka, "Kaumo makata rakirane" <sup>\*</sup> nōmo rakisisamo, Kotimo anoaki siareapo, aihokosapo," aiyaka ipu hasaka hemakapurakanapo. Aporoamo kaumo menaki himu hakásaraka hemakapusua aiyáka, nōmo soko fana aiyáka hemakapusuapo. Nōmo kaumo rakirane namo kakaro kárapo aiyaka nōmo hemakapusuapo. Aporo metakiramo kaumo rakirane nōmo marokeraka rakisiapo.

<sup>5</sup> Nōmo kaumo rakirane oyapo. Ano honoko maresa maiya amo Isiraya aporo takapesapo. Takapesane menoraka pukua, sere karimo ano kau hahaeraka patesapo. Nōmo ní aporo irane Pénésamene aporo irapo. Nōmo atamo soko, amamo soko, Hipuru meaka somerakano, nōmo soko Hipuru meane kaikia somerapo. Arirakano Kotimo some-maneane Fere se aporomo kekemana aiyáka, nōmo soko kekemahokosakipoko ano Fere se aporo akiyaki paosapo.

<sup>6</sup> Arirakano nōmo hemakapuraka, "Nōmo Kotipoko rakirakanapo," aiyaka nōmo Keresoa paosa aporo hinamoane mokoatikisapo. Asiāne nōmo fana aiyáka sia rakirakanapakasiki rakisiene, yumo hemakapuane nōmo hasaka rakireapo, aiyaka hemakapurakanapo. Arirakano Kotimo somemane suane nōmo kakimarakan, aporomo anoaki someraka, "Somemaneane wakasema soko nōmo kakipayasafapo. Né siareapo," aisapo.

<sup>7</sup> Arirakano fana nōmo kaumo makata rakirane rakiraka, "Ano siareapo," aiyaka nōmo hemakapusuapo. Aiyáka hemakapusuane yumo nōmo metakarisapo. Metakarikia koteaka haku hemakapuraka, "Kaumo makata rakisiene nenakamakayia rakireapo. Asi-amo Yasuaki himu hakásaraka hemakapukua reke, Yasumo someane kakimaka rerane makata fanareapo." Aiyaka nōmo hemakapurakanapo.

<sup>8</sup> Asiamo pipu kaumo makata aki nōmo himu hakásaraka hemakapunafonorka, kaumo makata ane makama kesekerakanapo. Nōmo Yasu Keresoaki himu hakásaraka hemakapurane makama fanarakanapo. Yasu Keresoane nōmo Unihaepo, aiyaka nōmo hemakapurakanapo. Yasu Keresoane nōmo makama fanaraka hemakapukua, makata metakirane su nōmo metakarisapo. Makata ane kakaro makata pepeno ayireapo. Asiamo yumo nōmo Yasu Keresoaki hakásaraka hemakapurakanapo.

<sup>9</sup> Ano eyaki hakásaya rekenapo. Asiamo nōmo kaumo makata rakisiene su metakarisapo. Nōmo Kotimo somemane Mosesaeaki some kasane kakimaka rakiraka reke, Kotimo anoaki someraka, "Ne aporo ereketaesapo," aihokosafapo. Arirakano nōmo Yasuaki himu hakásaraka hemakapuraka rekeno, Kotimo anoaki someraka, "Ne aporo ereketaesapo," aihokosapo.

<sup>10</sup> Asiamo Yasu Keresomo makata ainane nōmo kakaro hemakapurakaripo. Yasu maturikia taesane wakapuaka area aiyáka ano soko aiyáka wakapuaka rekeako hemakapurakaripo. Yasu kau teraka himu nesa aiyáka ano soko kau teraka himu nekea aiyakakoripo. Yasu kusua aiyáka, ano soko kuane siahoasireapo. Asiamo nōmo Yasuane kekemaraka Yasuaki makata ásiene nōmo aseako hemakapurakaripo.

<sup>11</sup> Ano kurakano soko Kotimo ano maturikia tae-hokosapo, aiyaka nōmo hemakapurakanapo.

\* <sup>3:4:</sup> Yu aporomo somemane kekemaraka rakirane, kaumo makata rakira ayapo.

*Kepoa naohokosakipoko Pore foaka pusuane oyapo.*

<sup>12</sup> Keresomo makata aina kotesa suane nōmo hemakapukua fasapo, aiyaka nōmo somerakanafapo. Arirakano Kereso ipi rea aiyáka ano soko, aiyáka rekeako hemakapurakaripo. Yasumo ano pasimasasamo Yasumo hemakapusua aiyáka nōmo hemakapukusakipoko kekemarakanapo. Kekemarakaka, aporo foforaka apura aiyáka ano aiyáka yaiya puraka rekenapo.

<sup>13</sup> Keresoa paosa aporo maeo, nōmo koteaka hemakapukua rakikia rosaka taeraka kepoa naosafapo. Kepoa naoana, aiyáka nōmo rakipe pukua keseke naohokosapo. Nōmo makata hákasa úyaka hemakapurakanapo. Kepoa naohokosakipoko nōmo hemakapurakanapo. Aporo foforaka puraka patera sapea pariaserafapo. Aina aiyáka nōmo fana makata rakisiane kakaro metakarikia efera hunia hemakapurakanafapo. Arirakano kepoa naohokosakipoko nōmo makata wakapuaka rakipe purakanapo.

<sup>14</sup> Ano pukusa híkumisi neneme sapea hákasa asekeea purakanapo. Aporo foaka pukua kepoa naoraka makata ropo marapo. Makata ropo makosane oyapo. Yasu Keresomo ano mafasiasamo ano hepene yapura rekeasimo Kotimo ano pasimakosapo. Pasi amara maiya amo Kotimo ano makoterakano, Yasumo makata aina kotesane nōmo hemakapukua fahokosapo.

<sup>15</sup> Asiamo Yasumo makata aina kotesane kekemahoko nōmo hemaka apura aiyáka, repo soko aiyáka hemakapunie. Koteaka hemakapura aporomo hemaka apura aiyáka repo koteaka hemakapunie. Arirakano repo makata meta hemakapusuane Kotimo maropohokosapo.

<sup>16</sup> Repo kakaro someane kakimarka kakaro yaiya kakimaka risikianie.

<sup>17</sup> Keresoa paosa aporo maeo, nōmo hemakapukua arakira aiyáka, repo soko hakása yineraka hemakapukua rakinie. Ano area aiyáka aporo metakira soko aiyáka risikino, repo asekeea iane kekemarakaka risikianie.

<sup>18</sup> Reaki nōmo wate someaka hisiraka somepe pekea, yumo soko someaka hisiraka namo hiripuhokoripo. Aporo yakaimo Yasu Kereso ira matopesa kusuane hemakapuko hisiraka yunuraka risikinapo.

<sup>19</sup> Yunuraka risike, ipu kaumo hemakapusuane kára rakikia, makata nakosane soko ipu makárarakano, ipu koti parisane ayapo. Arirakano ipu kaumo makata rakisiane hemakapukua kaiyahoafunusa nine ipu namo kakaro manomaka somerapo. Arirakano hauaka wo makatane hákasa hemakapurapo. Aiyáka hemakapura aporoane Kotimo hukurukua heao atura pusiehokosapo.

<sup>20</sup> Arirakano isiaipo namo kakaro hauakane, hepene yapurayapo. Isiaipo Unihae Yasu Kereso hepene yapunaka pekea, isu pasimokoasimo isu asekeea risikinapo.

<sup>21</sup> Yasu ipi fanaraka reke, ipi wakapumo makata su unihaeaka asekeea rekeakosapo. Epo wakapu hakásá yiamo isu amano kauane sanasiraka, ipi kau faesa aiyáka, faesa kauane isuaki kakakosapo.

## 4

*Poremo makata metakira somesane oyapo.*

<sup>1</sup> Keresoa paosa aporo maeo, re Keresopoko paroaka risikiasimo nōmo somerakanapo. Reane nōmo himu tumurumo hemakapukua arirakano reane nōmo kamenakaraka hemakapukua aiyáka rekenapo. Arirakano aporo foaka pukua kepoa naoraka makata ropo masa ásiáne repo. Nōmo reane hemakapuraka namo kakaro seserakanapo.

<sup>2</sup> Hinamo, Yuótia soko, hinamo Sinitíki soko tetooaki nōmo kukunameaka somerakanapo. Tetápó titi sape meaka toke siahoisifareapo. Teto Keresoa paosa hinamosasamo sape merane metakarikia titi himu hakásaraka tokoanie.

<sup>3</sup> Aporo iti hakásá makata rakirao, néaki nōmo makata one somerakanapo. Hinamo tetápó sapesane fahoasimo, nōmo maroporaka ararehoanie. Hinamo tetápó anoyaki hakásá kikinarakaka makata rakiraka aporo hinamomo Yasuane hemakapusimo some kotesane some kakasimo ano araresapo. Tetápó soko, ape Keréménem soko, aporo metakiramo soko, ipu suamo anoyaki hakásá rakisiapo. Arirakano i namina su yano taesane Kotimo yaiya rera sawia Kotimo popasapo.

<sup>4</sup> Arirakano maiya suamo repo Unihae Yasuaki kataka marekea risiasamo seseraka risikianie. Nōmo efera hunia somerakanano soko, seseraka risikianie.

<sup>5</sup> Aporo hinamo suamo asekeasimo aporo hinamo suane kamenakaraka hemakapukua ararehoanie. Kaisie. Unihae Yasuane peakosa maiyane makerakanapo.

<sup>6</sup> Arirakano makata su akipoko re kára hemakapukua himu fahokopo. Makata umisa fasereperakanano Kotiaki kurikurihoanie. Kurikuriraka susehoanie.

<sup>7</sup> Kurikuriraka fahoane, re himua Kotimo auanane fasereperakarakano kaiyakosapo. Kotimo auanane kakaro kotesa hakupo. Isiapo aporomanomo auana asíafapo. Repo Yasu Keresoaki kataka marekea risikino, Kotimo auanamo repo himumo hemakapurane mafairaka asekeea rekeakosapo.

<sup>8</sup> Keresoa paosa aporo maeo, makata hakása meta soko nōmo reaki somerakanapo. Repo himumo makata kotesa susuane hemakapukua risike, arirakano aporomo kekerera makatane soko hemakapunie. Asiamo makata kakaro somerane soko, makata kotehoareapo, aiyaka hemakapurane soko, makata aina ereketaeane soko, makata kaiyahoanafononane soko, makata pikirisa pararekeanafononane soko, makata koteaka somerane soko, aiyáka makata kotesa susuane hemakapukua risikianie.

<sup>9</sup> Nōmo makata somesane repo kaikia, arirakano nōmo makata rakisiane soko repo asesapo. Asiamo nōmo ainane repo kekemaraka rakinie. Kekemaraka rakiraka risikino, Kotimo auanane reaki kaka, eane reyaki hakása rekeakosapo, aiyaka nōmo hemakapurakaripo.

*Firipai aporomo Poreaki mone karakano Poremo moraka susesane oyapo.*

<sup>10</sup> Repo ano hemakapukua makata yaku efera hunia anoaki karakano asekeea, nōmo seseraka Kotiaki suserakanapo. Wate fana repo anoaki mone kaka amo tipia repo anoaki kakanafonosane, repo ano kakako hemakapusua nine, ikia kara fasakeno makata kakakosane metakarirakasupo.

<sup>11</sup> Arirakano “Ano makata forokoa rekeasireapo,” aiyaka nōmo hemakapukua someaka poparakanafapo. Anoaki makata umisa fasereperakano soko, makata ofosa fasereperakan soko, ano yaiya seseraka rekenapo.

<sup>12</sup> Asiamo ano makata faraka fesonorakano soko, makata kemo kara tokeno soko, maiya suamo ano seseraka hemakapukua rekenapo. Maiya suamo hauaka sua ano seseraka rerapo. Meamarakano soko, makata nakosane sia nenaka soko, ano seseraka rerapo. Makata kemo kára tokeno soko, makata kemo fasakeno soko, ano seseraka rerapo.

<sup>13</sup> Yasu Keresomo ano mawakapurakanapo. Asiasamo makata suane ano siaraka rekenapo.

<sup>14</sup> Arirakano makata umisa anoaki fasereperakano repo ano arareraka nōmo makata umisane mafasapo. Repo ano araresane kakaro kotesapo. Asiamo nōmo reaki seserakanapo.

<sup>15</sup> Firipai aporo hinamo reo, aporo hinamomo Yasu hemakapusimo some kotsane nōmo some karakano repo kaisiapo. Wakasema nina ano Masetónia hauakane metakarikia pusuapo. Ano fana reamo soko ano area yumo soko, repo hákasa ano arareraka mone karakasupo.

<sup>16</sup> Arirakano nōmo reane metakarikia pukua Tesaronaeka apea makata fesenoraka rekeno, repo ano mone yape tetu karakasupo.

<sup>17</sup> Repo mone nōmo makosakipoko somerakanafapo. Aiyaka nōmo hemakapurakanafapo. Nōmo reaki, ano mone kasis, aisafapo. Repo ano mone kasasamo, Kotimo reane asekeea reke re makotehokosapo, aiyaka nōmo hemakapurakanapo.

<sup>18</sup> Repo anoaki makata kára kasane Épafarotaétasemo mokoa perakasupo. Mokoa perakano nōmo moraka, reaki kára suseaka poparakanaapo. Repo makata kasá ane nōmo mosasamo, ano siaraka rekenapo. Arirakano Yu aporomo makata wape yamona paikia Kotiaki karakano Kotimo sesesapo. Asia ayiáka, anoaki soko repo mone karakasuane, Kotiaki akara ayiáka kasapo. Kasane Kotimo aseraka kára seserakanapo.

<sup>19</sup> Arirakano Kotipe Yasu Kereso tetane makata su siaraka rekenapo. Asiamo re Keresoa paoraka risike, re fesonoraka risikino Kotimo ipi makata su siaraka reaki kakakosapo. Repo ano araresasamo, Kotimo reane ararehokosapo, aiyaka nōmo hemakapurakaripo.

<sup>20</sup> Kotiane isiapo Atapo. Maiya suamo isiapo epo yano motosane makáraraka kekerakanapo. Kakaroripo.

*Poremo ayapasane oyapo.*

<sup>21</sup> Keresoa paosa aporo hinamo re su Firipai taonea risiane nōmo hemakapukua ayaparakanaapo. Arirakano Keresoa paosa aporo anoyaki hakása risiamo soko, reaki ayaparakanaapo.

<sup>22</sup> Keresoa paosa aporo hinamo Rome siti wo risiamo soko, Sisamo apea makata rakira aporoamo soko, reaki ayaparakanaapo.

<sup>23</sup> Unihae Yasu Keresomo reane yaku arareraka makotehoasimo nōmo hemakapurakaripo.

## Korosi

### **Korosi sawi one mahemakapukusa someane oyapo.**

Yasu Kereso hepene yapura hisiakipoko keremisi teti (30) su faraka, Poremo sawi one Keresoa paosa aporo hinamo Korosi taonea risiaki popasapo. Korosi aporo Epáfárase, sese ape asekea rea aporoane Pore aseako pesapo. Peraka Korosi aporomo kotafe someane kekemasane epo Poreaki somesapo.

Asiamo aporo metakiramo kotafe somesane oyapo. Ipu kotafe someraka, "Yu aporomo somememaneane kekemahoanie. Arirakanó hepene aporoane kekeréhoanie. Ari-rakanó aporomo somemaneane kekemahoanie." Airakanó aporomo hemakapusuane ipu máfaraka, Yasu Kereso unihaeane mawakasemasapo. Asiaporakanó Pore mahisiraka reke, kotafe someane maroporaka sawi one poparaka makesapo. Maiya amo Pore Rome apea tipura reasamo Tíkikasepe Onísímasé tetaki sawi one makesapo.

### **Korosi sawi some kepo parakuraka popasane oyapo.**

1:1-2 Sawi one Poremo kepomareka popasapo.

1:3-14 Poremo Kotiaki suseraka, arirakanó Korosi aporo hinamopoko kurikurinapo.

1:15-23 Kereso fanaraka unihaeaka rekenapo.

1:24-2:5 Keresoa paosa aporo hinamo ararehoasimo Poreane Kotimo murikimasapo.

2:6-3:4 Aporomo kotafe some karakano kakimakopo. Arirakanó Yasu Keresoaki himu hakásaraka hemakapukua risikianie, aisapo.

3:5-17 Makata aina watikisané rukupateraka metakarikia, makata aina kotesane kekemahoanie, aisapo.

3:18-4:1 Kakimara aporo hinamomo ainane popasapo.

4:2-18 Some metakira someaka ayapasapo.

### *Poremo Korosi aporoaki sawi poparaka makesane oyapo.*

<sup>1</sup> Yasu Keresomo tarira aporo rekeasimo Kotimo ipi hemakapukua murikimasane anopo. Ano Poremo reaki sawi poparaka makerakanapo. Isiapo Keresoa paosa aporo mae Timoti anoyaki reke, reane hemakapuraka,

<sup>2</sup> etapo sawi one reaki poparaka makerakanapo, Kotimo aporo hinamo Korosi taonea risia reaki sawi one poparaka makerakanapo. Repo Keresoaki himu hakásaraka risikino, isina su Kereso mae papápo. Etapo hemakapuané, Koti isiapo Atamo re yaku ararerakano, re auaraka risikiasimo hemakapurakaripo.

*Some kotesane Korosi aporo hinamomo kakimaka risikinaporakano Poremo sesesane oyapo.*

<sup>3</sup> Kurikuriana maiya suamo re farimaka Kotiaki wáraka repoko Kotiaki suserakanapo. Kotiane Unihae Yasu Keresomo Atapo.

<sup>4</sup> Asiamo repo Yasu Keresoaki himu hakásaraka hemakapukua risikinapakae. Keresoa paosa aporo hinamo suaki repo himu tumurumo hemakapurakanapakae. Hemakapurakanapakano kaisiasamo etapo repoko Kotiaki suseaka kurikuriraka risikinapo.

<sup>5</sup> Hepene yapura Kotiyaki kakaro yaiya seseaka risikiakosaporakano repo kakimasapakae. Kakimaka hiakosakipoko re seseaka kau risikinapakae. Asiamo repo Yasu Keresoaki himu hakásaraka hemakapukua, arirakanó aporo hinamo suaki soko himu tumurumo hemakapukua ayiáka risikinapakae. Arirakanó kakaro someane some kasa maiya amo hepene yapura makata kotesa repoko Kotimo murikimasane repo kaisiapakae. Kakaro someane Yasu hemakapukusakipoko some kotesa ayapo.

<sup>6</sup> Some kotesa repo kaisia hakásia yine hauaka sua aporo hinamo suamo kairakanapakae. Some kotesane repo kakimasasamo makata watikisa metakarikia makata aina kotesane kekemarakia risikinapakae. Repo aina ayiáka hauaka sua soko aporo hinamo metakira Keresoa paoraka ayiáka risikinapakae. Asiamo some kotesa repo kaisia maiya amo, Kotimo yaku ararenane repo kaikia hemakapuraka, Kotimo aina kotesane repo kekemarakia rakirakanapakae.

<sup>7</sup> Arirakanó Yasu hemakapusimo some kotesane, Epáfárase Keresomo aporo raipa reasamo reaki some kasapakae. Epo Kotiaki himu hakásaraka hemakapukua rakiraka reke, maiya suamo yaiya rakiraka rekenapo. Etapo Kotipoko arakira ayiáka, epo soko hakásia yaiya rakirakanapo. Isina hakásia rakirakanó eaki kára seserakanapo.

<sup>8</sup> Epo etoaki someraka, "Ho Kotesamo ararenane aeyaka Korosi aporo hinamomo namina yia himu tumurumo hemakapurakanapo," airakasupo.

### *Korosi aporo hinamopoko Poremo kurikurisane oyapo.*

<sup>9</sup> Re Keresoa paoraka koteaka risikinaporakano etapo kaisia maiya amo, etapo repoko Kotiaki maiya suamo kurikurirakanapo. Asiamo kurikurinane etapo úyaka kurikurirakanapo. Kotimo takekeha hemakapusua ayíáka repo hemakapukua, arirakano koteaka hemakapurane Ho Kotesamo reaki mahemakapurakarakan kaikia, ayíáka Kotimo hemakapusuane repo kakaro koteaka hemakapusimo etapo kurikurirakanapo.

<sup>10</sup> Asiamo Kotimo reaki uyáka risikianesane re ayíáka risikiasimo kurikurirakanapo. Repo ayíáka arakiramo Koti masesehoasimo kurikurirakanapo. Ira wate pesa kára ana ayíáka repo aporo hinamo metakira makotenean ayíáka kárahoasimo kurikurirakanapo. Kotimo ainane repo hemakapukua kárahoasimo repoko kurikurirakanapo.

<sup>11</sup> Re wakapuaka risikiasimo kurikurirakanapo. Kotimo wakapu kárane repo mokoasimo kurikurirakanapo. Ayíáka wakapuaka risike, reaki makata umisa fasereperakano, repo Kotiane metakarianafonoraka, eaki himu hakásaraka hemakapusuane rosaka taehoasimo kurikurirakanapo. Aporo metakiramo re mokoatikirakan repo aporoaki ropo mokoatikinapaka kurikurirakanapo. Re aporo metakiramo mokoatikiana maiya amo re seseaka risikiasimo kurikurirakanapo.

<sup>12</sup> Kotimo ipi aporo hinamoaki makata kotesa kakakosaposane repo mokoasimo epo re yaku araresapo. Kotimo faesa hauaka á ipi aporo hinamo akiyaki re soko hakasa hiane siahoasireapo, aisapo. Asiamo Ataki susehoanie.

<sup>13</sup> Fana katosa amo unihae Satanemo isu asekea reapo. Asiáne yumo Kotimo isu arareraka mafasikia, ipi hokosamo isu asekea rekeasimo pasimosapo. Arirakano Kotimo ipi hokosane himu tumurumro hemakapurapo.

<sup>14</sup> Kotimo hokosamo isupoko farimaka api kaka marekea isu tonotaesapo. Isiapo watikisane epo mafasapo.

*"Kepo suane Kereso ipipo," aisane oyapo.*

<sup>15</sup> Kotiane aporomo aserafapo. Koti Kereso tati hakása yinesasamo Kotiane Yasu Keresomo isuaki tariako pesapo. Kotimo makata su kepomareasiraka Kereso ipi yaiya reapo. Ipi kakar fanapo. Arirakano makata su rakisiane Kereso ipi fanaraka rekenapo.

<sup>16</sup> Ti yapura makata arisiane soko, hauaka wo makata arisiane soko, Kotimo Yasu aeyaka kepomarekeea faserepepesapo. Makata aserane soko, makata asekeanafonoronane soko, suane Yasu aeyaka kepomarekeea faserepepesapo. Arirakano hauaka wo aporo fanaraka risirane soko, aporo wakapuaka risirane soko, ti yapura hepene aporo risirane soko, makata ane su Kereso aeyaka kepomarekeea faserepepesapo. Arirakano makata suane Keresopoko kepomarekeea faserepepesapo.

<sup>17</sup> Makata suane kepomareasiraka Kereso ipi fana yaiya reapo. Makata suane epo siaraka maka rekeno, makata suane koteaka risikinapo.

<sup>18</sup> Arirakano Keresoa paosa aporo hinamo su ipi kaupo. Ipu unihaeane Kereso ipipo. Kepomaresa kepoane Kereso ipipo. Arirakano kukua turikia puramo kepoane soko Kereso ipipo. Ipi kakaro fanapo. Makata su fanane Kereso ipipo.

<sup>19</sup> Asiamo Kotimo hemakapuraka, "Nómo aina suane Keresoaki karakáno ano siaraka area ayíáka, ipi soko siaraka rekeakosapo. Ipi soko ayíáka siaraka rekeno ano seseripo." Aiyaka Kotimo ipi aina suane Keresoaki karakáno Keresoane Koti ayíáka reapo.

<sup>20</sup> Asiamo Kotimo ipi hokosa pusierakan pesapo. Pekea ira matopesa paremarerakano ipi yapi pusuapo. Yapi purakano aporo suamo asekea Kotiaki himu hakásaraka hemakapusimo e kusuapo. Hepene yapura soko hauaka wo soko Kotiaki yunuraka risiane fahoasimo Kereso kusuapo.

<sup>21</sup> Arirakano fana repo watikiaka hemakapukua, watikiaka rakikia Kotiaki yunuraka fasikia risiapo.

<sup>22</sup> Asiáne yumo Kotimo hokosa Yasu Kereso ira matopesa paremarekeea kususasamo Kotimo reane pasimosapo. Asiamo Kotimo yaku ararena amo re maereketaesapo. Asiamo keseke Yasu pariaperamo e hikumisia re su koteaka ereketaeraka risike, arirakano repo makata watikisane mafasasamo re koteaka risikiakosapo. Repo makata watikisa mafasasamo hukurukusane kakakosafapo.

<sup>23</sup> Arirakano ira kesa paroaka mapoana ayíáka, Yasuane hemakapusakipoko some kotesane kakimaka paroaka risikianie. Yasu hemakapusakipoko some kotesane repo kaisia maiya amo, some kotesane repo kakimasapo. Kakimaka Kotiyaki yaiya risikiakosane hemakapunie. Aporo metamo some haku somerakano, someamo reane kirimanapaka paroaka risikianie. Yasuane hemakapusimo some kotesane repo aporo metakiraki some kaka, arirakano ipu aporo metakiraki some kaka, arirakano aporo metakiramo aporo metakiraki some karakano, ayíáka some kape pusuapo. Hauaka sua aporo hinamo suaki some kape pusuapo. Some kotesane ano Pore Kotimo aporo raipareasamo some kape pusuapo.

*Keresoa paosa aporo hinamopoko Poremo rakisiane oyapo.*

<sup>24</sup> Nōmo Yasuane some kasakipoko aporo metakiramo ano mokoatikirakanapo. Mokoatikirakanō nōmo hisiraka rekenafapo. Keresoa paosa aporo hinamoane nōmo ararehoko seserakanapo. Iane Keresomo kau hakāsa asiapo. Aporo hinamoane ararehokosakipoko Kereso ipi kau teraka himu nesapo. Asiamo Kereso kau teraka himu nesane yaiya rekenapo. Ano soko Kereso asia ayiāka kau teraka himu nena rekenapo.

<sup>25</sup> Keresoa paosa aporo hinamo akipoko rakisimo Kotimo ano murikimasapo. Epo someaka maresane, i suaki nōmo some kakasimo epo ano pusiesapo.

<sup>26</sup> Wate fana Kotimo ipi hemakapusua suane aporoaki tarikia somesafapo. Aporo wainepe pesaki maiya kāramo Kotimo somesafapo. Asiane yumo Kotimo ipi kakisara aporo hinamo suaki tarikia somerakanapo.

<sup>27</sup> Makata kakaro kotesane mahamesapo. Aporo su Yu aporo soko, Yu aporo hoanafonosa soko, i supoko ipi mahamesane hufitaeraka somerane oyapo. Kereso reyaki rekenapo. Reasasamo ipi faesa kotesane repo mokoakosapo.

<sup>28</sup> Arirakano Keresoane hemakapusimo isiapo aporo hinamu suaki some karakanapo. Re Koti rea yapura ahira maiya amo, hokosa manomo hemakapunafonoraka mahimeteraka ahira ayiāka, re ayiāka mahimeteraka hirapaka, nōmo reaki tarikia some karakanapo. Asiamo aporo sisimamo koteaka takekeha hemakapukua ahira ayiāka hiasimo, yumo nōmo some karakanapo. Koteaka takekeha hemakapurane repo koteaka kaikia takekeha hemakapusimo nōmo tarikia some karakanapo.

<sup>29</sup> Aporo su siaraka hiasimo nōmo rakirakanapo. Keresomo ipi wakapu kārane ano himura reasasamo ipi wakapu kāra aeyaka nōmo wafororaka rakiraka rekenapo.

## 2

*Korosi aporomo Kotiaki himu hakásaraka hemakapurane kárahoasimo Poremo hemakapusuane oyapo.*

<sup>1</sup> Repo hemakapusimo nōmo some one somerakanapo. Repoko soko, Keresoa paosa aporo hinamo Reotisia taonea risia akipoko soko, aporo hinamomo ano hikumisi asekeanafonona akipoko soko, re supoko nōmo kāra hemakapukua wafororaka rakanapo.

<sup>2</sup> Asiamo nōmo hemakapusuane repo namina yia suaki himu tumurumo hemakapukua, arirakano repo Keresoaki himu hakásaraka hemakapusuane paroaka wakapuaka risiki-asimo nōmo hemakapurakaripo. Koti menane repo koteaka hemakapukua rosaka tae-hoasimo nōmo hemakapurakaripo. Asiamo repo rosaka taeraka hemakapuraka Kotimo makata kepo mahamesane repo sia hemakapukusapo. Kotimo makata fana mahamesane Kereso ipipo.

<sup>3</sup> Arirakano makata mahimunane maua á kerapo. Kesane mokoako kimo ropanapo. Aina ayiāka Kotimo koteaka hemakapuramo kepoane soko, takekeha hemakapurane soko, Koti ipiyaki tokenapo. Isiapo mokoakosane Yasu Keresoane ipi ki asiapo.

<sup>4</sup> Arirakano aporo metakira pekeha reane kirimahokosakipoko kotafe somerapo. Asiamo kotafe someane repo kakimakopo.

<sup>5</sup> Ano kakaro reyaki rekeasifareapo. Asiāne nōmo reane kakaro kāra hemakapurakanapo. Nōmo himu hemakapurane reyaki hakāsa rekenapo. Repo suamo namina yia kikinarakā risike, arirakano Yasu Keresoaki kakaro himu hakásaraka hemakapukua risikinapakanō ano seseripo.

*"Kotafe someane kakimakopo," aisane oyapo.*

<sup>6</sup> Repo Yasu Keresoaki himu hakásaraka hemakapukua, Yasu Kereso repo Unihaepo, ayiāka hemakapukua epo someane repo kekemarakā risikinapo. Asiamo re Keresoa pao-rraka risike maiya suamo Yasu Keresoaki yaiya himu hakásaraka hemakapukua risikianie.

<sup>7</sup> Arirakano ape kiako ira kesa paroaka mapoana ayiāka repo hemakapusuane ayiāka paroaka hemakapukua risikianie. Keseke ape namo kiki amara ayiāka repo Kotiaki hemakapusuane kárahoasimo. "Kotiaki kakaro himu hakásaraka hemakapunie," ayiāka reaki some kasane meraruhokopo. Maiya suamo Kotiaki susehoanie.

<sup>8</sup> Aporo metakiramo kotafe someane somerakanō repo kakimarakā asekeanie. Hauaka omo makata hemakapurane soko, yatafu yakasa ho menane soko, makasa kauamo makata ainane soko, makata aine ipu máfaraka some karápo. Aporoamo Kereso menane some karáfapo. Asiamo someane repo kekemarakānō, re keresoa paosane hurupeakosapo. Anapaka asekeanie.

<sup>9</sup> Arirakano Yasu Kereso hauaka wo pesane aporomanomo kauane maka pekeha reapo. Asiamo Kotimo wakapuane soko, koteaka hemakapurane soko, Kotimo makata aina suane Yasu Keresoyaki hakāsa reapo. Asiamo Kereso kaua Koti menane su komarukua rekenapo.

<sup>10</sup> Asiamo repo eaki kataka marekea risikino epo menane reaki karáka rekenapo. Arirakano hepene aporo soko, ho soko wakapuaka unihaeaka arisiane Yasu ipi hakásamo marokeraka fanaraka unihaeaka asekeea rekenapo.

<sup>11</sup> Repo eaki himu hakásaraka kataka marekea risikino repo kaumo watikiaka rakirane soko, kaumo hemakapurane soko, Keresomo rukupatesapo. Arirakano Yu aporomo kau hahaeraka patenane, kaumo menane hákasa patenapo. Makata amo aporo himuane ararenafapo. Asiāne aporomo ipi kaumo watikiaka hemakapusua rakirane rukupaterakanano aporoane namo kakaro Kereso aporopo.

<sup>12</sup> Re hea tapukuamurira maiya amo re Keresoyaki kusua hauaka amarera ayíáka hea tapukumurisiapo. Hea tapukumurikia ima yapura ahiramo re Keresoyaki kusuane maturikia taena ayíáka maturikia taesapo. Arirakano repo hemakapuraka, "Kotimo wakapumo Keresoane maturikia taesapo." Aíyaka hemakapuraka repo Kotimo wakapuaki himu hakásaraka hemakapurakanano re soko Keresoyaki hákasa maturikia taeraka re makawesa risikinapo.

<sup>13</sup> Fana re watikiaka risike Kotimo ipi ainane repo hemakapusuafapo. Hemakapunafonraka kaumo hemakapusua watikiaka rakirane repo rukupateraka metakarisiafapo. Asiamo re kusua arisia ayíáka risiapo. Asiāne repo watikisane Kotimo mafasapo. Mafaraka Kereso maturikia taesa ayíáka re soko ayíáka maturikia taesapo.

<sup>14</sup> Kotimo somemanane kekemahoanafonosasamo somemanane motosa amo isu hukuruuapo. Hukurukua api kakanie ayíáka motospo. Asiane somemanane soko, api kakanesane soko, Kotimo maka ira matopesa ikokosapo. Ikokosa maiya amo somemanemo hukurukusakipolo asiane kososapo.

<sup>15</sup> Arirakano Yasu Kereso ira matopesa paremarea kusuapo. Kusua maiya amo makata fanaraka risiane soko, yatafu yakasa ho wakapuaka risiane soko, Yasumo rukua mosakat-erapiraka fasapo.

*"Kereso kusua ayíáka isu ayíáka kusuapo. Kusuasamo somemanemo isu asekeea rekenafapo," aisane oyapo.*

<sup>16</sup> Asiamo he soko makata nakosane soko repo sokoaihoanafonoranone aporo metamo reane hukuruane siahoasifareapo. Arirakano aporo metamo someraka, "Yu aporomo somemanane kekemahoanie. Maiya metakira yapohoanie. Arirakano oko kawe fasereperakanano yapohoanie. Arirakano fenena maiya ane yapohoanie," airapo. Asiamo Yu aporomo somemanane repo kekemahoanafonoranone, aporoamo re hukuruuane siahoasifareapo. Asiamo Yu aporomo somemanane repo metakarisiasamo efera hunia kekemahoane siahoasifareapo.

<sup>17</sup> Hiho aseramo aserane namo kakaroane hiho asera á rekenafapo. Namo kakaroane haku reke hiho aseramo aserane nenakamaka murikimasa ayapo. Asiamo somemanemo Kotimo ainane nenakamaka murikimasa ayapo. Asiāne namo kakaroane Kereso ipipo. Arirakano somemanane fana pesapo. Yasu Kereso keseke pesapo. Kereso pesa maiya amo somemanane fasapo.

<sup>18</sup> Arirakano aporo metamo ipi kituamo asesane kára somerapo. Asiamo aporoamo someraka, "Repo suamo hepene aporoaki kekerehoanie." Aiohane repo waerakanano epo reane makaiyarako hukuruane siahoasifareapo. Aporoamo Kotimo hemakapusuane kekemarakanafapo. Ipi kaumo hemakapusuane kekemaraka ipi yia makáraraka rekenapo. Aporoamo reaki someraka, "Re namina Koti hikumisia mawakasemaraka risikianie," airapo. Aisa nine e ipiane mawakasemaraka rekeafunusa nine epo ainafapo.

<sup>19</sup> Aporoane Yasu Keresoaki kataka marekea rekenafapo. Yasu Kereso isiapo Unihaeapo. Asiane aporoamo Unihaeane metakariikia, eaki kataka marekea rekenafapo. Isu Keresoa paosa aporo hinamoane aporomano kau hakása asiapo. Yasu Kereso ipi unihaeapo. Aporomano unihaea ipi kiki suane kataka risikinapo. Kataka risikino unihae kiki kataka risia memetereane soko sarimarako mawakapunapo. Aina ayíáka isiapo Unihae Keresoaki kataka marekea risikino Kotimo isuane mawakapurakanapo.

<sup>20</sup> Re Keresoyaki kusuasamo hauaka wo makata amo soko yatafumo soko re asekeea rekenafapo. Asekeea rekeanafonrakanano yia, marirakanano makata amo rakiniesane repo yaiya rakiraka risikinare?

<sup>21</sup> Aporomo hauaka omo menane kekemaraka someraka, "Makatane makopo. Makatane nakopo. Makatane sakaihokopo." Aisane marirakanano repo kakimarakanare?

<sup>22</sup> Aporoamo ipi hemakapusua aeyaka somerakanapo. Aporoamo somemanane repo kekemarakanone, ane makata amo reane ararehokosafapo.

<sup>23</sup> Aporomo makata yaposane soko, somemanane motosane soko, epo someanamo kotesa someraka sikiraka somehokosapo. Aporo metakiramo namina yia kaumo rakirane hurutapiasimo mawafororaka rakiraka risirapo. Asiane ipu kaumo hemakapusuane

hurutapirafapo. Aporomo somemanane kekemarakaka kaumo hemakapusuane hurutapirafapo. Asimo asiane somemanamo wakapuanre kekeanafonosasamo kaumo hemakapusuane hurutapirafapo.

### 3

*Yasu kusua maturikia taesa ayíáka, isu soko ayíáka kusua maturikia taesane oyapo.*

<sup>1</sup> Re Keresoyaki risikiasimo Kotimo re Keresoyaki maturikia taesapo. Maturikia taesasamo hauaka omo makata ainane su metakarikia hepene yapura makata ainane makama fanaraka hemakapukua risikianie. Arirakano hepene yapura Koti hokono tumuru takua Yasu rekenapo.

<sup>2</sup> Arirakano hepene hauaka ane hemakapukua, arirakano Yasumo makata ainane su makama fanaraka hemakapukua risikianie. Hauaka wo makatane hemakapukupo.

<sup>3</sup> Asiamo Yasu kusua ayíáka, re soko ayíáka kusuapo. Yasu maturikia taesa ayíáka, re soko ayíáka maturikia taesapo. Yumo re Yasu Keresoyaki paoraka hakása risikinapo. Makata amo kepoane Koti ipipo.

<sup>4</sup> Asiamo re hitaferaka koteaka arisiamo kepoane soko, arirakano keseke yaiya risikakosamo kepoane soko Kereso ipipo. Kereso parapera maiya amo re soko eyaki hakasa faeraaka risikiakosapo.

*Makata patéane soko makata kaweane soko oyapo.*

<sup>5</sup> Hauaka omo makata rakira kaumo hemakapusuane makukunie. Arirakano kaumo hemakapurane oyapo. Hinamo sakura hakimaranre soko, aporo metamo hinamo hakimaranre soko, hinamo mokotokonane soko, metamo hinamo himu purane soko, metamo makata kemo ano makaripi, ayíaka himu purane soko, ayíáka hemakapura aporoamo ipi himu tumurumo hemaka purane makata ayapo. Ayíáka makaripi, ayíaka hemakapurane koti pariraka hemakapukua rerapo.

<sup>6</sup> Aina aporo hinamoamo Kotimo someane koaretaenasamo Kotimo saperaka fanasi-hoko motoakosapo.

<sup>7</sup> Arirakano aporo hinamomo hauaka omo makata ainane kekemarakaka arakira ayíáka repo soko fana ayíáka rakiraka risiapo. Ipu hemakapura ayíáka fana repo soko ayíáka hemakapusuapo. Asiáne pipu yumo makata ane su makukua fasapo.

<sup>8</sup> Arirakano makata aina metakirane soko metakariniesane oyapo. Sape merane soko, nanaerane soko, aporo metaki himumo mahisinane soko, hokomaka somerane soko, ekene merane soko, makatane su rukupateraka metakarikia kusua ayíáka risikianie.

<sup>9</sup> Fana repo kotafe somera ayíáka metaki yaiya kotafe hoakopo. Fana risiane metakarikia yumo

<sup>10</sup> kawe hitafe hakuraka risikianie. Arirakano pasu pate osoraka reane horomaka mamakateraka pasu kawe hitafe haku osona ayíáka wate fana makata rakira makata pateane metakarikia, makata aina hitafe haku maka risikianie. Makata aina kaweane Koti area ayíáka risikiasimo makata ainane Kotimo maiya suamo makaweraka rekenapo. Makaweraka rekeno Kotimo aina kepoane hemakapukusapo.

<sup>11</sup> Asiamo Yu aporoyaki Yu aporo hoanafonosa akiyaki enonosapaka hemakapukupo. Aporo kau hahaeraka patesayaki aporo kau hahaeraka patehoanafonosa akiyaki enonosapaka hemakapukupo. Aporoane Kiriki aporofapo. E aporo meta hakupo. Ayíaka risiane pipu yumo metakarinie. Aporo metaki, "Né aporo raipa pariraka rekeasimo aporo metamo né roposapo." Ayíaka aporo metaki, "Né aporo ropohoanafonosa ayapo." Ayíaka aporo raipayaki aporo raipahoanafonosa akiyaki enonosapaka hemakapukupo. Namina enonosane metakarinie. Makata hakásane Kereso ipipo. Ipiane re su himua rekenapo.

<sup>12</sup> Kotimo murikimasa aporo hinamoane repo. Reane apo himu tumurumo hemakapurakanapo. Asiasamo aporo hinamo metakirane repo kamenakahaoanie. Arirakano aporo hinamo metakirane makotehoko rakinie. Repo namina yano motosane makárahokopo. Tau auaraka risikianie. Aporo metakiramo reane mokoatikirakano repo foaka ropo mokoatikihokopo.

<sup>13</sup> Metakiraki foaka sapehokopo. Repo namina aporo metamo neaki saperaka ne mokoatikirakano ne himu umisane mameraruhoanie. Aporomo ne mokoatikirakano ne sapesane soko hisisanre soko mameraruhoanie. Asiamo nómo watikisane Unihae Kotimo mamerarusapo. Asia ayíáka nómo soko aporo metamo neaki mokoatikirakano mameraruhoanie.

<sup>14</sup> Repo namina aporo metamo aporo metaki himu tumurumo hemakapunie. Asiamo aporo metaki himu tumurumo hemakapura kakaro makata fanapo. Himu tumurumo hemaka apuramo makata aina kotesa suane mawakapunapo. Asiamo makata aina kotesa suane kepo hakása ane metaki himu tumurumo hemaka apura ayapo.

<sup>15</sup> Keresomo ipi auaraka reramo re himua asekeea rekenapo. Asiamo re namina kau hakasasamo tau auaraka risikianie. Repo maiyu suamo eaki susehoanie.

<sup>16</sup> Keresomo somesane koteaka hemakapukua risikianie. Someane káraraka rekerakano metamo hemakapusimo some kakanie. Keresomo someamo reane mawakapurakano repo soko metakiramo hemakapusimo some kakanie. Arirakano aporo metakiramo hasakanapaka repo takekea hemakapukua some kakanie. Kotimo some Same\* sawia popasane kesahoanie. Arirakano Kotimo kesa ane kesahoanie. Ho Kotesamo reaki mahemakapurakano ane kesahoanie. Suseaka ayíaka kesahoanie.

<sup>17</sup> Arirakano Unihae Yasuaki himu hakásaraka hemakapukua risike, makata some karáne soko, makata rakirane soko, makata suane Kotimo sesehoasimo rakinie. Kotimo sesehoasimo somehoanie. Kereso aeyaka Ata Kotiaki suseaka kurikurihoanie.

*"Keresoa paosa aporo hinamo re uyáka risikianie," aisane oyapo.*

<sup>18</sup> Hinamo repo namina aporo pusuamo someane kakimakanie. Kakimarakano Unihae Yasu Keresoa paosa hinamomo anapo.

<sup>19</sup> Arirakano aporo, repo namina hinamoane himu tumurumo hemakapukua koteaka asekeea risikianie. Repo namina hinamoyaki tau auaraka risikianie. Matewaraka sapehokopo.

<sup>20</sup> Arirakano hokosa, repo namina ata ama tetapō someane maiya suamo kakimakanie. Kakimarakano Kotimo sesehokosapo.

<sup>21</sup> Arirakano hokosa wafayao, repo hokosamo hisihokohoamo hokosaki sape marekea matewahokopo. Matewarakan hokosa ane seseaka risikikosafapo.

<sup>22</sup> Arirakano aporo raipa roposao, reane aporo metakiramo roposapo. Aporoamo reane roposasamo repo ipoko makata rakikia marerapo. Ipu someane repo kakimakanie. Ipu asekeea arisia maiya amo hákasa wakapuaka rakinie siahoasifareapo. Maiya suamo repo koteaka wakapuaka rakinie. Aporoamo hákasa asekeea sesehoasimo rakiakopo. Kotiaki hemakapukua Kotimo sesehoasimo rakinie.

<sup>23</sup> Asiamo makata rakira suane repo himu hakásaraka wakapuaka rakinie. Rakiraka risike úyaka hemakapukua, "Aporomo asekeasimo isiaipo makata rakirakanafapo. Unihae Yasu Keresomo sesehoasimo isiaipo epoko rakirakanapo." Aiyaka hemakapukua koteaka rakinie.

<sup>24</sup> Repo úyaka hemakapunie. Re kakaro asekeea rera aporoane Yasu Keresopo. Asiamo repo Yasu Keresopoko makata rakirakanapo. Arirakano epo reane makata ropo kakakoso. Asiamo Yasu Keresomo ipi kakinara aporo hinamo suane makata ropo kakakosapo.

<sup>25</sup> Asiane aporomo watikiaka rakirakan, epo ropo watikisan makosapo. Makata su Kotimo asekeea takekea parakunapo. Aporomo makata rakisia yaiya Kotimo hakásá yine kakakosapo. Kotimo makata ropo karáne ereketae karápo.

## 4

<sup>1</sup> Aporo roposa wafayao repo aporo raipaki koteaka some kakanie. Koteaka asekeea risikianie. Aporo raipamo wafayane repo. Repo wafayane hepene yapura rekenapo, aiyaka hemakapunie.

*Kakimara aporo hinamoaki Poremo someaka motosane oyapo.*

<sup>2</sup> Repo kurikurinane metakariakopo. Wakakoraka sikiraka kurikurihokopo. Koteaka hemakapukua kurikuriraka Kotiaki suseaka kurikurihoanie.

<sup>3</sup> Repo kurikuriana maiya amo isupoko soko farimaka kurikurihoanie. Kurikuriraka úyaka kurikurihoanie. "Kotio, nómó someane, aporo hinamomo kaiyako sesehoasimo Koti, nómó ikia koro ropaka amara ayíaka, kaiyako sesenane aporoaki kakanie. Isiaipo nómó someane aporo hinamooki some kakasimo ikia koro ropakamakanie. Kereso mahamesane isiaipo kakama somehoasimo ikia koroane nómó ropakamakanie." Aiyaka kurikurihoanie. Arirakano aporo hinamomo Keresoane hemakapusimo some ane nómó some karakano, aporo metakiramo ano tipura makesapo.

<sup>4</sup> Ano tipura makerakano yia, Yasuane nómó some kakakoripo. Some kepoane nómó koteaka some kakasimo, repo anopoko farimaka Kotiaki kurikurihoanie.

<sup>5</sup> Arirakano Keresoa paohoanafonosa aporo hinamomo mahisihokohoamo re iyaki koteaka tau risikianie. Re arisia maiya amo nenakamaka risikiakopo. Nena aporo hinamomo Kotiane hemakapusimo repo wakapuaka rakinie. Ipu Kotimo someane kaiyako seserakano, repo someraka, "Isiaipo keseke somehokosapo." Aihokopo. Ipu kairakano pipu yiamo somehoanie.

\* **3:16:** Wate fana tefetemo Kotiaki kesasane Buk Song á popasapo. Buk Song ane Same sawiane ayapo.

<sup>6</sup> Aporo metamo reaki kairakano repo aporoaki some parihinaka kifirimo makata nakosa rusua wapeana ayíáka repo aporo suaki koteaka some parihinie. Aporo metamo makata meta kairakano eaki ereketae koteaka some parihinie. Epo kakaro hemakapusimo koteaka some parihinie.

*Tíkikase soko Onísimase soko Korosi taonea Poremo pusiesane oyapo.*

<sup>7</sup> Isiapo Keresoa paosa aporo mae Tíkikase re arisia peraka anoane epo reaki somehokosapo. Unihae Keresopoko nōmo arakira ayíáka epo soko hakásá yineraka rakirakanapo. Rakirane epo metakarirakanafapo. Eane nōmo himú tumurumo hemakapurakanapo.

<sup>8</sup> Isu uyáka risiane repo hemakapusimo nōmo eaki somehoko pusie airakanapo. Repo someraka, "Pore mayíáka rekenarakapo," aiyaka hemakapukohoamo epo somehoko peakosapo.

<sup>9</sup> Arirakano aporo meta yano motosa Onísimase soko eyaki hakásá pusierakanapo. E Keresoa paosa aporo mae kotesapo. E repo namina ape sumu hakásapo. Ape wo makata rakirane tetapō reaki somehokosapo.

*Poremo ayapasane oyapo.*

<sup>10</sup> Arisítakase anoyaki tipura rekenapo. Epo soko reane hemakapurakaripo, aisapo. Pánapasemo ipi makai hokosa Makamo soko reane hemakapurakaripo, aisapo. Asiamo Maka perakano repo eane pasimakanie. Fana nōmo reaki someaka marerakanapo. Keseke e perakano eane repo tereraka pasimakanie.

<sup>11</sup> Arirakano aporo meta yano motosa Yasu\* Yásatasemo soko reane hemakapurakaripo, aisapo. Aporo isia ane Yu aporopo. Iane Yasu Keresoaki risikiako parisapo. Aporo isia amo anoyaki hakásá rakirakanapo. Ipu Yasu Kereso unihaeaka reane some karapo. Arirakano ipu ano soko ararenapo.

<sup>12</sup> Epáfara semo soko reane hemakapurakaripo, aisapo. E repo namina ape sumu hakásapo. E Yasu Keresomo makata rakira aporo metane épo. Re Yasuaki paroaka risikiasimoripo, aiyaka epo hemakapukua kurikurirakanapo. Repo Kereso menane serekekohokoamo kurikurirakanapo. Kotimo hemakapusua á susu hemakapusimo kurikurirakanapo. Kotimo someane kakaroripo aihoasimo epo kurikurirakanapo.

<sup>13</sup> Epo repoko kára rakirakano nōmo aserakanapo. Arirakano Reotísia aporo hinamo soko Hiráporisi aporo hinamo soko i supoko epo kára rakirakano nōmo aserakanapo.

<sup>14</sup> Isiapo aporo táke mitikoro Rukimo soko reane hemakapurakaripo aisapo. Témasemo soko reane hemakapurakaripo, aisapo.

<sup>15</sup> Arirakano Reotísia aporo Keresoa paosa aporo maeane nōmo hemakapurakanapo. Repo iaki someraka, "Poremo reane hemakapurakanapo." Aiyaka somehoanie. Nimifikasi soko nōmo hemakapurakanapo. Epo apea kakimara aporo hinamo sarimarakanio i suane nōmo hemakapurakanapo. Repo iaki someraka, "Poremo reane hemakapurakanapo," aiyaka somehoanie.

<sup>16</sup> Repo sawi one menoraka faraka, Reotísia sése apea Keresoa paosa aporomo sawi one meno豪asimo iaki makeanie. Arirakano sawi meta Reotísia aporoaki nōmo poparaka makesane repo meno豪anie.

<sup>17</sup> Arirakano Akípaseaki úyaka somehoanie. "Kotimo neaki makata rakisimo kasane rakikia makanie," aihannie.

<sup>18</sup> Arirakano sawi one popana aporomo penesoroane nōmo maka, makata feteraka popana one, "Ano Poremo reane hemakapurakanapo," aiyaka nōmo hokonomo poparakanapo. Ano tipura makesane repo hemakapunie. Arirakano Kotimo re ararehoasimo nōmo hemakapurakaripo.

---

\* **4:11:** Aporoane Yasu Keresofapo. Ane aporo metapo.

## 1 Tesaronaeka 1 Tesaronaeka sawi one mahemakapukusa someane oyapo.

Yasu hepene yapura hisiakipoko keremisi 20 su faraka Poremo sawi one poparaka, Keresoa paosa aporo hinamo Tesaronaeka taonea risia mokesapo. Arirakano Pore Korini taonea reamo sawi one poparaka mokesapo. Fana Tesaronaeka taonea Pore kimisi pukua Yasuane some karakan, Yu aporo metakirane soko, Yu aporo hoanafonosa metakirane soko, Yasu Keresoa paosapo. Asiamo Yu aporo metakira Yasu Keresoa paohoanafonosa aporomo, Yu aporo metakira Yasu Keresoa paosa aporoaki sapesapo. Saperaka risike, ipu Poreane hauaka meta pusiesapo. Arirakano Keresoaki yunuraka risia aporoamo Keresoa paosa aporoane yaiya mokoatikiriaka risiapo. Mokoatikiraka risikino Kereso aporoane paroaka risikiasimo Poremo sawi one poparaka mokesapo. Arirakano Yasu hauaka wo paripeakosane Poremo popasapo.

### **1 Tesaronaeka sawia some kepo parakuraka popasane oyapo.**

1:1 Poremo sawi one kepomarekeia popasapo.

1:2-10 Keresoa paosa aporomo Yasuaki himu hakásaraka hemakapurane paroaka hemakapukua risiasamo Poremo Kotiaki susesapo.

2:13-3:13 Poremo ipi hemakapusua aeyaka iaki somesapo.

4:1-12 Kotimo sesehoasimo Keresoa paosa aporomo makata aina kotesane rakisimo Poremo popasapo.

4:13-5:11 Yasu pariperamo makata ayiakakosane Poremo popasapo.

5:12-28 Poremo some metakira someaka faraka, ayapasane popasapo.

*Tesaronaeka apea Yasu Keresoa paosa aporo hinamoaki Poremo sawi poparaka makesane oyapo.*

<sup>1</sup> Tesaronaeka apea Yasu Keresoa paosa aporo hinamo risia reaki ano Poremo sawi one poparaka makerakanapo. Isiapo Ata Koti arirakano isiapo Unihae Yasu Kereso tetáki repo himu hakásaraka hemakapurane kataka marekea risikinapo. Reane Kotimo makoteraka arirakano re tau auaraka risikiasimo nōmo hemakapurakaripo. Saerasape Timoti tetā soko anoyaki rekeno asekeia, isiapo suamo reane hemakapuraka, sawi one poparaka makerakanapo.

*Tesaronaeka taonea Keresoa paosa aporo hinamo suamo Kotiaki himu hakásaraka hemakapukua risiane oyapo.*

<sup>2</sup> Kurikurina maiya amo isiapo reane hemakapurua farimaka kurikurinapo. Maiya suamo isiapo reane hemakapuraka Kotiaki susenapo.

<sup>3</sup> Suserane kepoane oyapo. Repo Kotimo someane kakimaka Kotiaki himu hakásaraka hemakapurua risiasamo epoko makata rakirakanapo. Arirakano repo aporo hinamo metakiraki himu tumurumo hemakapurane makama fanahokosakipoko repo wafororaka rakirakanapo. Arirakano Unihae Yasu Kereso paripeakosane repo seseraka hemakapurua kau risikanapo. Ayiáka risike repo hemakapuraka, "E paripeakosapo," aiyaka hemakapusuanne metakirakanafapo. Makata akipoko isiapo Kotiaki suseaka kurikuriraka risikinapo.

<sup>4</sup> Maeo, reáne Kotimo himu tumurumo hemakapurakanapo. Reane Kotimo ipi aporo murikimasa pariraka risikiasimo epo murikimayereapo, aiyaka isiapo hemakapurakaripo.

<sup>5</sup> Asiamo Yasuane hemakapusimo some kotesane some kasa maiya amo akai susuamo nena makata some ana aiyáka reaki somesafapo. Ho Kotesamo wakupu aeyaka isiapo reaki somesapo. Isiapo some kasane repo "Ao, kakarorakae," aihoasimo Ho Kotesamo re himura mahemakapusimo tarisiapo. Asiamo repo asekeia Yasuane hemakapusimo isu reyaki hakása risike koteaka rakikia risiapo. Isu reyaki risikisu maiya amo isiapo ainane repo asesapo.

<sup>6</sup> Asiamo isiapo ainane repo asekeia enomaka kekemasapo. Arirakano Unihae Yasumo ipi ainane soko repo enomaka hakása yineraka kekemasapo. Some kotesane isiapo some kasane repo kakimarakano asekeia, aporo metakiramo re mokoatikisapo. Mokoatikirakan yia Ho Kotesamo re ararerakanre re su seseaka risiapo.

<sup>7</sup> Re seseaka risikinapakan Masetónia hauaka á, kakimara aporo hinamo risiamoso, Akaia hauaka a, kakimara aporo hinamo risiamoso soko ipu suamo kaisiapo. Kaisia amo repo iaki tarisiapo.

<sup>8</sup> Unihae Yasuane hemakapusimo some kotesane aporo hinamo suamo hemakapusimo kepomarekeia hauaka metakira somerape pusuapo. Asiamo Masetónia hauaka á soko,

Akaia hauaka á soko, hauaka metakira á soko some kape pusuapo. Some kape purakano repo Kotiaki himu hakásaraka hemakapusuane aporo suamo kaikia fasapo. Ipu suamo sia kaisiasamo isiapo efera hunia iaki maíyaka somehoasifareapo.

<sup>9</sup> Arirakano aporoamo repo asíane isuaki somesane oyapo. Isiapo reaki some kasa maiya amo repo Kotiaki himu hakásaraka hemakapukua risike, aporo metakiraki somesapo. Arirakano repo yatafuaki soko yakasa hoaki soko kekerenane metakarisapiro. Arirakano re Kotiaki risikiako pariraka, Namo Kakaro Yaiya Rera Kotimo makata rakirane repo rakiraka risiapo.

<sup>10</sup> Arirakano Kotimo ipi hokosa hepene aeyaka perakarihoamo re kau risikinapo. Arirakano Kotimo hokosa fana kusuane Kotimo ipi maturikia taesapo. Maturikia taesane Yasu ipipo. Asiamo keseke hukuarura maiya ane fasere aperamo, aporo hinamo watikiaka risiane Kotimo iaki saperaka kara fanasihokosapo. Asiamo isu fanasihokohoamo Yasumo isu mafasiakosapo.

## 2

*Tesaronaeka taonea Poremo makata rakisiane oyapo.*

<sup>1</sup> Maeo, isu perakasuamo isiapo Kotimo someane some kasane repo kakimasasamo, isiapo nenakamaka rakisiafapo. Ane repo hemakapurakanapo.

<sup>2</sup> Isu Firipai taonea risia maiya amo, Firipai aporomo isu hokomaka mokoatikisapo. Mokoatikisane repo hemakapurakanapo. Mokoatikirakano yia, isiapo reane aseako Tesaronaeka taonea pesapo. Peane, aporo metakiramo isuaki hisiraka saperakasupo. Saperakano yia, Kotimo isuaki wakapu kasapo. Kotimo ipi wakapu karakano repo Yasuane hemakapusimo isiapo Kotimo someane wakapuaka some kasapo.

<sup>3</sup> Isiapo Kotimo someane some kasa maiya amo isiapo hasaka some kasafapo. Arirakano isiapo some karakano isiapo hemakapusuane ereketae kakama some kasapo. Reane ikia kara watikisa á pusimo reane isiapo tau kirimaraka soko metao ayíáka some kasafapo. Kotafe hokoa rukua reaki some kasafapo.

<sup>4</sup> Asiamo Kotimo ipi some kotesane isiapo some kakasimo, Kotimo ipi isu aseane isiapo koteaka rakirakano asekea, epo isu murikimasapo. Murikimasasamo ipi some kotesane isiapo some karakanapo. Aporomanomo sesehoasimo some karafapo. Kotimo sesehoasimo some karapo. Epo isiapo himumo hemakapusuane aserapo. Asiamo epo sesehoasimo isiapo some karapo.

<sup>5</sup> Isiapo reane kirimaraka re yano motosane makáraraka rupiaka somesafapo. Repo makata kemoane soko moneane soko mokoakosakipoko isiapo reaki kukunameaka somesafapo. Ane repo hemakapurakanapo. Kotimo soko asekea hemakapurakanapo. Isiapo kotafe somerakanafapo.

<sup>6</sup> Repo soko metao, aporo metakiramo soko metao, isu yano motosane makama fana-hoasimo isiapo rakisiafapo.

<sup>7</sup> Isuane Yasu Keresomo ipi tarira aporo risiasamo isiapo reaki someraka, "Repo isu ararerasis." Aihoafunusa nine isiapo ayíáka somesafapo. Isiapo reaki makata umisa kasafapo. Arirakano hinamomo ipi hokosa kiri tau maka asekea akaya ayíáka, isu reyaki risikisuamo tau auaraka asekea risiapo.

<sup>8</sup> Asiamo isiapo reane hemakapuraka Kotimo some kotesane isiapo reaki some kakako sesesapo. Isiapo re arareraka isu rusua kuane soko siahosireapo. Ayíáka isiapo hemakapusuapo. Masisasamore? Isiapo reane namo kakaro kara himu tumurumo hemakapusasamoripo.

<sup>9</sup> Maeo, isiapo wafororaka rakisiane repo hemakapurakanapo. Isu perakasuamo Kotimo some kotesane some kaka, arirakano isiapo ereketae susu rakiraka risiapo. Rakiraka risike reane mokoatikisafapo. Arirakano isiapo Kotiane hemakapukua rakisiapo.

<sup>10</sup> Isu reyaki hakasa risikisuamo isiapo ainane repo asesapo. Kotimo soko asesapo. Re kakimara aporo hinamoaki isiapo ereketae susu rakiraka risiapo. Rakiraka risike reane mokoatikisafapo. Arirakano isiapo Kotiane hemakapukua rakisiapo.

<sup>11</sup> Asiamo aporomo ipi hokosa asekea area ayíáka, isiapo reane ayíáka hakásaraka asekea risiapo.

<sup>12</sup> Repo hemakapusimo, ereketaeraaka ainane isiapo reaki tarikia, arirakano repo himu hemakapurane soko, isiapo mawakapusapo. Ayíáka wakapuaka hemakapusimo isiapo reaki tarisiapo. Arirakano isiapo reaki someraka "Kotimo sesehoasimo repo koteaka rakiraka risikianie. Kotimo re unihaeaka asekea rekeakosakipoko re faesa a risikiasimo epo reane peaeaka someraka rekenapo." Ayíáka isiapo reaki somesapo.

<sup>13</sup> Arirakano isiapo Kotimo someane reaki some karakasuamo repo hemakapuraka, "Someane aporomo somefareapo. Kotimo some ane namo kakaroreapo," aíyaka hemakapuka repo Kotimo kakaro someane kakimasapo. Kakimaka risikino, Kotimo some aeyaka kakimara aporo hinamomo Kotimo wakapuanne maka risikinapo. Kotimo someamo reane tarirapo. Asiamo maiya suamo isiapo Kotiaki suserakanapo.

<sup>14</sup> Yutía hauaka á Yasu Keresoa paosa aporo hinamo arisia ayíáka, re soko ayíáka risikinapo. Maeo, Yutía hauaka á Yasu Keresoa paosa aporo hinamo risiane Yu aporomo mokoatikisapo. Arirakano Yutía hauaka á mokoatikisa ayíáka Tesaronaeka taone sumu á repo namina hakása risia aporo yiamon reane mokoatikisapo.

<sup>15</sup> Arirakano Unihae Yasuane Yu aporomo rusua kusuapo. Arirakano Yu aporo fana risi-amo porofete aporoane rusua kusuapo. Yumo isu soko rukua mokoatikiraka risikinapo. Arirakano ipu rakirane Kotimo asekeea seserakanafapo. Kotimo some kakimara aporoaki ipu yunuraka risikinapo.

<sup>16</sup> Asiamo Kotimo someane Yu aporo hoanafonosaki isiapo some kakakohoamo Yu aporomo Yasuaki hisisa aporo amo matasosapo. Yu aporo hoanafonosane Yasumo mafasi-akohoamo ipu matasosapo. Matasoraka maiya suamo watikiaka rakiraka risike ipu watikisané káraraka takahinakanapo. Asiamo Kotimo mahisiraka saperaka iaki ropo watikisa karáne kakenapo.

*Efera hunia Tesaronaeka aporoane Poremo aseako sesesane oyapo.*

<sup>17</sup> Maeo, Keresoa paosa aporoane mokoatikisa maiyane fasereperakano, isiapo reane metakarikia purakasu maiya amo, reane himumo hemakapusuapo. Re hikumisiane himo asekeanafonoraka himumo re kára hemakapusuapo. Efera hunia re aseakosakipoko ikia pukusa koraka risiapo.

<sup>18</sup> Isiapo re aseako peakosakipoko hemakapukua risiapo. Reane hemakapuraka ano Poreane efera hunia soko, efera hunia soko aseako peakosapoko asiane Satanemo matasosapo.

<sup>19</sup> Ünihae Yasu pariapera maiya amo epo hikumisi nenemea isu risikiakosapo. Maiya amo isiapo sesehokosane makata yakapare? Isiapo sesehokosane repo. Isiapo kepo nachokosakipoko makata ropoane yakapare? Makata ropoane repo. Reane isiapo Yasuaki tariraka seseaka tariakosapo.

<sup>20</sup> Makata one kakaroripo. Re koteaka risiasamo isu seseraka risike Kotiaki kekerakanapo.

### 3

*Poremo Timoti Tesaronaeka taonea pusiesane oyapo.*

<sup>1</sup> Arirakano isiapo re aseako peakosapoko hemakapusuasamo isu kau risike siahoasi-fareapo. Isiapo hemakapusuane isu su peakosafapo. Isu isiassane,\* tetá metane Átenese taone wo popariraka, hakasa metamo re aseako peakosapo. Aíyaka isiapo hemakapukua somesapo.

<sup>2</sup> Asiamo Timotiane repo apea etapo pusiesapo. Timotiane etapo Keresoa paosa aporo maepo. Ipi isuyaki Kotimo makata rakirane hakasa rakirapo. Repo Kotiaki namo kakaro himu hakásaraka hemakapukua paroaka risikisimo, reane epo ararehokosapo.

<sup>3</sup> Arirakano aporo metakiramo re mokoatikirakan asekeea, re fofaraka wasuaka rurapaka, Timotimo reane ararehoasimo pusiesapo. Arirakano Keresoa paosa aporo hinamoane Kotiaki hisiraka risia aporo amo mokoatikiraka risiapo. Aíyaka mokoatikinane Kotimo ipu fana murikimasane repo namina yiamon hemakapurakanapo.

<sup>4</sup> Fana isu reyaki risikisuamo isiapo reaki úyaka some kasapo. "Keseke makata umisa fasere aperamo aporo metakiramo isu mokoatikihokosapo." Aisane yaiya fasereperakano re apo asesapo.

<sup>5</sup> Arirakano mokoatikina maiyane fasere perakano isiapo re kara hemakapukua, re mayiaka risiarihoamo, nömo Timotiaki re aseako pusiesapo. Keseke kaiyako punie, aihowane siahoasifareapo. Aíyaka hemakapuraka yumo Timotiaki kaiyako pusiesapo. Arirakano repo Kotiaki himu hakásaraka hemakapusuane metakarisare? Kakaro yaiya hemakapukua risikinare? Satanemo re kau aseako kirimarakano repo Koti- tiane metakarisikinone, ane, isiapo fana makata rakirakasuanne nenakamakayia rakirakanareapo, aihokosapo. Asiamo nenakamakayia rakiane siahoasifareapo. Aíyaka hemakapukua Timotiaki reane aseako pusiesapo.

<sup>6</sup> Aseako pusiesane Timotimo re asekeea pariperaka etoaki úyaka somerakasupo. Repo Kotiaki himu hakásaraka hemakapukua risikisupo. Arirakano repo namina yia aporo

\* **3:1:** Aporo isiane Pore, Saerase arirakano Timoti iane Átenese taonea risiapo.

metamo metaki himu tumurumo hemakapurane yaiya risiasusupo. Ayíáka risike repo etoaki soko repo himu tumurumo hemakapurane yaiya kayasusupo. Etapo reane aseako seseana ayíáka, repo soko etoane aseako seseraka hemakapususupo. Áiyáka Timotimo etoaki somerakasupo.

<sup>7</sup> Ayíáka somerakano etapo kairaka reaki kara sesesapo. Maeo, repo Kotiaki himu hakásaraka hemakapusuane paroaka risiasusupo. Asiamo somesa amo isiapo himu hemakapurane mawakapurakanapo. Asiamo isu makata umisa yia hakasa risikino, re soko Yasuaki hakasa paroaka risikinapo, ayíáka somesa amo isuane mawakapurakanapo.

<sup>8</sup> Repo Unihae Kotiaki himu hakásaraka hemakapukua paroaka risikinapakanó fana isu himu umiraka risiane fasapo. Asiasamo isu seseraka risikinapo.

<sup>9</sup> Isiapo reaki kára seseraka risike, Kotiaki kára suserakanapo. Asiamo Kotimo ipi isiapo sesesane aserakanapo.

<sup>10</sup> Isiapo reane efera hunia aseako kakaro hemakapuraka sere soko, ereamo soko, Kotiaki kurikurirakanapo. Repo Kotiaki himu hakásaraka hemakapusua makata meta fesonosa kakenone, re siaraka risikiasimo isiapo reane mawakapuraka ararehokosapo.

<sup>11</sup> Isu re arisia peakosakipoko, isiapo Ata Kotimo soko, isiapo Unihae Yasumo soko, tetapó ikia kara maropohoasimo hemakapurakaripo.

<sup>12</sup> Repo namina yia himu tumurumo hemakapurane, Unihae Yasumo makárahoasimo kurikurirakanapo. Arirakano hauaka sua aporómano suaki himu tumurumo hemakapurane, Unihae Yasumo makárahoasimo kurikurirakanapo. Isiapo reaki himu tumurumo hemaka apura ayíáka re soko ayíáka risikiasimo hemakapurakaripo.

<sup>13</sup> Arirakano repo metaki himu tumurumo hemakapurane káráakanone, Kotimo reane mawakapuhokosapo. Unihae Yasu Kereso pariapera maiya amo epo ereketae koteaka susu risira aporo hinamoane eyaki hakása peakosapo. Yasu pariapera maiya amo re koteaka ereketae susu risiane, isiapo Ata, Koti, ipi hikumisi nenemea makata meta hasakasa kakanafonoraka, re ayíáka risikiasimo isiapo kurikurinapo.

## 4

*Kotimo sesehoasimo úyaka risikianie aisane oyapo.*

<sup>1</sup> Keresoa paosa aporo maeo, re su koteaka risike Kotiane masesehoasimo, isiapo aina kotesane soko, some kotesane soko, reaki some kaka tarisiapo. Tarirakano repo kakimaka koteaka risikinapo. Asiamo yumo re namo kakaro koteaka susu risikiasimo hemakapurakaripo. Isiapo Unihae Yasumo yano motosa aeyaka reaki wakapuaka somerakanapo.

<sup>2</sup> Unihae Yasumo someaka maresane, isiapo reaki some kasapo. Some kasane repo merarusafapo.

<sup>3</sup> Asiamo re koteaka risikiasimo Kotimo hemakapusuane oyapo. Makata watikisane kikisiraka metakarikia, koteaka susu rakiraka risikianie. Arirakano hinamo hakimako hemakapurane faskia risikianie.

<sup>4</sup> Re kaumo rakirane hemakapukua watikiaka risirapaka, koteaka susu hemakapukua risikiakosakipoko, re kauane sisimoraka makisihoanie.

<sup>5</sup> Keresoa paohoanafonosa aporoamo hinamo asekea kaumo hemakapusuane takahira ayíáka repo ayiakakopo.

<sup>6</sup> Repo namina Keresoa paosa aporo maeaki watikiaka rakiakopo. Repo namina maemo hinamoane hakimakosakipoko maserapiraka rakiakopo. Maserapi rakira aporooaki Kotimo fanasiraka makata umisane makakosapo. Fana isiapo reaki hufitaeraka someraka, yumo soko efera hunia paroaka somerakanapo.

<sup>7</sup> Asiamo Kotimo isu pasimosane raraporaka risikiasimo pasimosafapo. Makata watikisa kikisiraka, koteaka susu hemakapukua risikiasimo Kotimo isuane pasimosapo.

<sup>8</sup> Isiapo some one aporo metamo koareaerakanone, ane, aporomanomo someane koareaerakanafapo. Ane, Kotimo someane koareaerakanapo. Arirakano yia Kotimo Ho Kotesane reaki karápo.

<sup>9</sup> Re namina Keresoa paosa aporo hinamoaki himu tumurumo hemakapukua risikianie, ayíáka nōmo reaki somehokosafapo. Asiamo Keresoa paosa aporo hinamoaki himu tumurumo hemakapurane Kotimo ipi yiamo reaki tarisiapo.

<sup>10</sup> Tarisiarie repo kaikia kekemaraka, Masetónia hauaka á Keresoa paosa aporo hinamo suaki repo himu tumurumo hemakapukua risikinapo. Asiamo aporo suaki himu tumurumo hemakapusuane repo namo kakaro kárahoasimo, isiapo reaki wakapuaka somerakanapo.

<sup>11</sup> Re tau auaraka risikiakosakipoko, ayíáka hemakapukua tau risikianie. Repo namina menane asekea risikianie. Kau hisiraka risikiakopo. Repo namina makata rakirane

namina hokono sokinimo kekepo rakipe punie. Some hakasa nine isiapo fana reaki some kasapo.

<sup>12</sup> Isiapo some kasane repo kaikia kekemarakanone, ane, Keresoa paohoanafonosa aporomo reane aseraka, repo yanoane mafaraka, arirakano reane makata meta feseno-hoanafonoraka, aporo metaki "Ano ararehoanie," aiyaka somehokosafapo.

*Yasu paripeakosane oyapo.*

<sup>13</sup> Maeo, aporo kusuane mayiaka risikinarakapo, aiyaka himeteraka risirapaka, repo koteaka hemakapusimo, nōmo kakaro some one reaki somerakanapao. Asiamo aporo kusuane mafarearaka hitaferaka risikiakosane, Kotiaki himu hakásaraka hemakapuna-fonona aporoamo mahimeteraka, himu faraka hihiripuraka risirapo. Ipu himu faraka hihiripura aiyáka, re aiyáka risikiakohoamo, nōmo some one some karakanapao.

<sup>14</sup> Yasu kusua maturikia taesane isiapo kakaro kakimasapo. Asiamo Yasuaki himu hakásaraka hemakapusua aporo hinamo su kukua kesane, Kotimo maturikia taehokosapo. Aporo hinamo maturikia taesane, Yasu pariapera maiya amo, i Yasuyaki hakása Kotimo karikia peakosapo. Aiyaka isiapo hemakapurakanapao.

<sup>15</sup> Unihae Yasumo somesane oyapo. Unihae Yasu pariapera maiya amo, isu metakira hauaka wo hitafe risiamo, aporo hinamo kukua kesane, isiapo marokeraka isu fana-hokosafapo.

<sup>16</sup> Arirakano Kotimo sakepamo wárakano, hepene aporo fanamo soko wáhokosapo. Wa ana yiamo Kotimo pikoro rukusapo. Arura yiamo Yasu hepene yapunaka paripeakosapo. Pariapera maiya amo Keresoa paosa aporo hinamo kukua kesane fana maturikia taehokosapo.

<sup>17</sup> Maturikia taerakano, isu Keresoa paosa aporo hinamo hitafe risiane iyaki paoraka, isu su hakása hikia ti pakae tipia Unihae Yasuane sapenakosapo. Sapenekea maiya suamo Unihaeyaki isu yaiya risikiakosapo.

<sup>18</sup> Asiamo repo namina yia himu mapiraraka risikiasimo some one some kakanie.

## 5

*Yasu paripeakosane oyapo.*

<sup>1</sup> Maeo, Unihae Yasu Kereso paripeakosa sereane soko, yakiane soko, isiapo reaki haku meta somerakanafapo.

<sup>2</sup> Asiamo Yasu pariaperamo repo kaisiane nine aiyakakosapo. Aporo hinamo meraruamo wasákipoko, aporomo makata hakimokoako ereamo tau apera aiyáka, Yasu paripeakosapo.

<sup>3</sup> Aporomo someraka, "Pipu maiya yumo koteaka tau auaraka risikinapo." Aihora maiya amo mokoatikihokosa sereane faserepeakosapo. Hinamo hokosa takapeakosakipoko makeraka mati tuaka apura aiyáka, mokoatikihokosa sereane soko aiyáka faserepeakosapo. Asiamo mokoatikihokosa sereane fasere aperamo fasikia teketariakosafapo.

<sup>4</sup> Asiamo maeo, repo hemakapurane katosa á risikinafapo. Asiamo re katosa á risikianafonasasamo hakimora aporo perakano fofana aiyáka, Yasu pariaperamo re aiyáka fofahoane siahoasifareapo.

<sup>5</sup> Arirakano repo hemakapusuane sere faesa á risikinapo. Ereamo katosa á re soko isu soko risikinafapo.

<sup>6</sup> Asiamo aporo metakira wakakekea warisia aiyáka, isu wayane siahoasifareapo. Isu hi fakirkia himumo koteaka hemakapukua risike siahoasireapo.

<sup>7</sup> Arirakano aporo waráne ereamo warápo. Aporomo he watikisa nekea masuanane ereamo masuanapo. Ane, isiapo hemakapurakanapao.

<sup>8</sup> Asiamo sere faesa á isu risiasasamo, koteaka hemakapukua risike, isu kauane koteaka asekeea risike kakama yia risikiasireapo. Arirakano yunu aporoyaki aporomo weakosakipoko ipi káwa karerapaka mafainapo. Aina aiyáka isiapo Kotiaki himu hakásaraka hemakapukua, arirakano aporo metaki soko himu tumurumo hemakapukua, aiyáka risikino isinane mafairakanapo. Yunu aporomo mokoatikinapaka ipi wamoahati parosa karotapirapo. Aina aiyáka Kotimo isu mafasiakosa hemakapurane hati parosa karotapirapo aiyáko.

<sup>9</sup> Arirakano keseke hukuarura maiya amo Kotimo isuaki saperaka fanasihokosakipoko, epo isu murikimasafapo. Asiane isuane Unihae Yasu Keresoa paorakano isu mafasi-akosakipoko murikimasapo.

<sup>10</sup> Isu hitaferaka arisiamo soko, metakira akuramo soko, Yasuyaki hakasa risikiasimo epo isupoko farimaka kusuapo.

<sup>11</sup> Asiamo yumo repo namina yia metakiramo metakirane arareraka mawakapuraka arisia ayíáka namina maiya suamo yaiya arareraka mawakapuraka risikianie. Asiamo aporo hinamo suane mapiraraka risikiasimo some one some kakanie.

*Poremo some meta some kasane oyapo.*

<sup>12</sup> Maeo, aporo metakirane Unihaemo murikimasa aporoamo reane asekea risikinapo. Ipu Kotimo makata rakirane rakiraka, reane arareraka, makata tarikia, arirakano repo hasakasane ipu maroponapo. Asiamo ipu someane repo kairaka iane makotehoanie.

<sup>13</sup> Ipu koteaka rakirásamo, ipu someane kaikia iane arareraka, iaki himu tumurumo hemakapukua risikianie. Repo namina yia tau auaraka himu hakásaraka hemakapukua risikianie.

<sup>14</sup> Maeo, aporomo kau hisiraka makata rakianafonoraka risikinone maropohoanie. Aporo metakira himu faraka, namoraka risiane, mapirahoasimo ararehoanie. Aporo róraraka risiane, ipu Kotiaki himu hakásaraka hemakapusuane paripurapaka, iane soko ararehoanie. Arareraka risike, aporo suaki foaka sapehoanafonoraka, tau auaraka susu risikianie.

<sup>15</sup> Aporo metamo reaki mokoatikirakano repo ropo mokoatikihokopo. Re Keresoa paosa aporo hinamomo namina yia arareraka makoteraka risikianie. Aporo suane soko makoteraka risikianie.

<sup>16</sup> Asiamo maiya suamo seseraka risikianie.

<sup>17</sup> Maiya suamo Kotiaki kurikuriraka risikianie.

<sup>18</sup> Makata su akipoko repo Kotiaki susehoanie. Makata watikisa fasereperakanō soko metao, makata kotesa fasereperakanō soko metao, maiya suamo Kotiaki suseraka risikianie. Re Keresoa paosa aporo hinamo ayíáka risikinone Kotimo sesehokosapo.

<sup>19</sup> Ira rufiane amanomo kopakataena ayíáka Ho Kotesamo wakapuanē ayíáka kopakatae-hokopo.

<sup>20</sup> Kotimo somerakano kaira aporoamo kaikia reaki some kasane repo koarentae-hokopo.

<sup>21</sup> Asiamo makata suane koteaka takekeea hemakapunie. Takekeea hemakapukua makata kotesa susuane kakimaka rakiraka risikianie.

<sup>22</sup> Makata watikisa kekepo susuane metakarikia kikisiraka fasikia risikianie.

<sup>23</sup> Auanamo kepoane Koti ipipo. Asiamo isiapo repoko úyaka kurikurinapo. Repo watikisané kikisiraka risikiasimo Kotimo reane mafasiraka rekenapo. Repo kaumō koteaka susu rakikia, arirakano himumo soko koteaka susu hemakapukua, arirakano hoane soko koteaka susu risikiasimo, Kotimo asekea rekenapo. Re koteaka susu risikino keseke Unihae Yasu Kereso pariapera maiya amo makata hasakasa metamo reaki hokorehokosapo. Ayíáka re koteaka risikiasimo isiapo repoko kurikurirakanapo.

<sup>24</sup> Asiamo re koteaka risikiasimo reane Kotimo murikimasapo. Murikimasasamo re koteaka susu risikiasimo epo ayiakakosapo. Epo ainane kakaro ereketaesapo.

<sup>25</sup> Maeo, Kotimo isu ararehoasimo kurikurihoanie.

<sup>26</sup> Keresoa paosa aporo hinamo suaki hokono mokoanie.

<sup>27</sup> Arirakano Keresoa paosa aporo hinamo suamo kaiyisimo sawi one meno-hoanie. Re Keresoa paosasamo sawi one meno-hoasimo nōmo someaka marerakanapo.

<sup>28</sup> Arirakano isiapo Unihae Yasu Keresomo re arareraka makotehoasimo hemakapurakaripo.

## 2 Tesaronaeka 2 Tesaronaeka sawi one mahemakapukusa someane oyapo.

Keresoa paosa aporo hinamo Tesaronaeka taonea risiaki Poremo sawi poparaka make-sapo. Wakasema nina keseke, Poremo sawi meta one soko, iaki poparaka makesapo. Aporo metakiramo kotafe someraka, Yasu hauaka wo paripesapo, airakano Tesaronaeka aporo metakira mahimeteraka risiapo. Ayiáka risike i namoraka risiapo. Asiamo Poremo kaikia, Tesaronaeka aporoane himu mapirarakra risikiasimo, Yasu paripeakosane Poremo kakama someaka popasapo.

### **2 Tesaronaeka sawia some kepo parakuraka popasane oyapo.**

1:1-2 Poremo sawi one kepomarekea popasapo.

1:3-12 Reane mokoatikirakan, paroaka risikianie. Mokoatikina aporoane keseke fanasihokoso, aiyaka popasapo.

2:1-17 Yasu haru peasiraka, aporo kakaro watikisane fana peakosapo, aiyaka popasapo.

3:1-15 Repo makata rakirane koteaka susu rakinie, aisane popasapo.

3:16-18 Poremo ayaparaka popasapo.

*Tesaronaeka sawi kepomarekea popasane oyapo.*

<sup>1</sup> Saerase, Timoti, isiapo Tesaronaeka taonea Keresoa paosa aporo hinamo reaki sawi one poparaka makerakanapo. Arirakano isiapo Ata Kotipe Unihae Yasu Kereso tetáki, repo himu hakásaraka hemakapuraka risikinapo.

<sup>2</sup> Isiapo Ata, Koti soko, isiapo Unihae, Yasu Kereso soko, tetapō re kamenakaraka makoterakan, re tau auaraka risikiasimo hemakapurakaripo.

*Yasu Keresoane pariapera maiya amo Kotimo hukurukusane oyapo.*

<sup>3</sup> Maeo, maiya suamo reane isiapo hemakapuraka Kotiaki kara suserakanapo. Suseraka, repo Kotiaki himu hakásaraka hemaka apurane soko, repo namina yia himu tumurumo hemakapurane kárasasamo isiapo Kotiaki suseraka risikinapo.

<sup>4</sup> Arirakano reaki makata umisane soko faserepekea, arirakano aporo metakiramo re mokoatikirakan yia, re Keresoa paosane metakirrafaraka, Kotiaki himu hakásaraka yaiya hemakapurua risikinapo. Re paroaka risiasamo isiapo re yanoane makáraraka someraka, Keresoa paosa aporo hinamo suaki somerakanapo.

<sup>5</sup> Arirakano aporo metakiramo reane mokoatikirakanapo. Mokoatikirakan yia Kotimo isuaki úyaka tarirakanapo. Makata umisa fasereperakan, mokoatikina maiya amo Kotimo re mawakapuraka ararerakanapo. Asiamo re siaraka maroporaka, keseke re Kotiyaki risikino, Unihae Kotimo reane asekeea rekeakosapo.

<sup>6</sup> Arirakano Koti ipi ereketaeraka rerasamo, aporomo reaki mokoatikisa aporoaki Kotimo ipi ropo kakakosapo.

<sup>7</sup> Aporomo re mokoatikirakan yia, re himu nekea risiane, epo reane arareraka, fenena maiya ane kakakosapo. Yasu pariaperoamo reaki soko, isuaki soko, Kotimo arareraka fenena maiya ane kakakosapo. Yasu pariaperoamo hepene yapunaka, ipu hepen aporo wakupu karayaki kakama paripeakosapo. Yasu ipi ira rufiyaki paripeakosapo.

<sup>8</sup> Yasu ira rufiyaki pariapera maiya amo aporo hinamomo Kotiane hemakapunafonosaki soko, isiapo Unihae Yasuane hemakapusimo some kotesane some karakano, kakipayasa aporo hinamoaki soko, ropo watikisane fanasiraka kakakosapo.

<sup>9</sup> Ipu watikiaka rakisia akipoko ropo fanasihokosane oyapo. I Unihae Kotiane fasikia kakaro yaiya risikiakosapo. Eyaki paoraka hakasa risikiakosafapo. Unihae Kotimo fae-sane soko, wakupane soko, marafaraka, forokoa risikiakosapo. Ayiáka risike kakipayasa aporo hinamoamo ropo watikisa yiamo yaiya mokoatikiraka fanasihokosapo.

<sup>10</sup> Yasu pariapera maiya amo Yasumo ereketaeaka koteaka susu risira aporo hinamoamo Yasumo yanoane makárahokosapo. Makáraraka Yasumo ipi faesane asekeea, ipu someraka "Yao watikiane. Siarakarifapo." Aihokosapo. Aihokosa aporoane kakimara aporopo. Arirakano isiapo some kasane repo kakimasasamo repo soko Yasumo yanoane mafaraka kekerehokosapo.

<sup>11</sup> Ayiakakosane hemakapuraka maiya suamo re makotehoasimo isiapo kurikuri-rakanapo. Kurikuriraka, "Kotio, nómó Tesaronaeka aporo hinamoane peaesapo. Peae-sasamo ipu neaki siaraka patera asekeasimo, nómó iane ararehoanie. Iane koteaka risiki-ako seserakanapo. Asiamo i koteaka susu risikiasimo, nómó wakapumo iane ararehoanie. Ipu néaki himu hakásaraka hemakapurua rakirane káraraka hemakapurua naohoasimo nómó wakapumo iane ararehoanie.

<sup>12</sup> Ipu néaki himu hakásaraka hemakapukua rakirane kárarakano, aporo hinamoane nómó aseraka, Unihae Yasu Keresomo yano motosane makárahokosapo. Arirakan Yasu Keresomo aeyaka ipu yano motosane soko makárahokosapo. Kotio, nómó soko, Unihae Yasu Keresomo soko, tetápo iane hemakapukua makoterakano ipu ayiakakosapo." Aíyaka isiapo kurikurirakanapo.

## 2

*Yasu paripeasiraka makata ayiakakosane oyapo.*

<sup>1</sup> Maeo, isiapo Unihae Yasu Keresome pariperamo isu eyaki hakasa sarimahokosane isiapo somerakanapo.

<sup>2</sup> Aporomo some koaka marekea kotafe someraka, "Unihae Yasu paripeakosa maiyane faserepesapo." Aíyaka somerakan someane kakimakopo. "Yasu faserepesapo," aíyaka kotafe porofete aporomo reaki somerakan kakimakopo. Arirakan aporo metakiramo someraka, "Yasu faserepesapo, aíyaka Poremo sawia popasapo." Aíyaka somerakanone, someane kotafe somesasamo repo kakimakopo. Asiamo "Yasu faserepesapo," aíyaka somerakanone wate foakaya himu fahokopo.

<sup>3</sup> Kotafe somerakan someane kakimakopo. Yasu ipi paripeakosa maiya ane makeanamo makata meta fasereperaka reaki tarirakan, repo hemakapukusapo. Unihae Yasu paripeakosa maiyane faserepeasiraka, aporo yakaimo Kotiaki hisiraka patera tariakosapo. Arirakan aporo hakása metamo ipi himua makata watikisan komarurakan, epo Kotimo somemane koaretaeraka Yasuaki fasikia rea aporoane\* fana peakosapo.

<sup>4</sup> Koaretaena Aporoane Yasuaki kakaro yunuraka reeakosapo. E ipi yano motosa makáráraka someraka, "Kotiane soko, arirakan makata metakira suane repo mafanaraka, aíyaka kekererape pusua makatane, nómó marokesapo." Aíyaka kotafe someaka, ipi pukua Kotimo apea kake someraka, "Kakaro Kotiane anopo," aíyaka kotafe somehokosapo.

<sup>5</sup> Ano fana reyaki rekesu maiya amo makata ayiakakosane nómó reaki somesapo. Somesane repo meraruraka soko metao, hemakapuraka soko metao, masiare?

<sup>6</sup> Sere murikimasa á paunafonosasamo Koaretaena Aporoane peakosapoko asiane Kotimo matasorakanapo. Matasoanane repo hemakapurakanapo.

<sup>7</sup> Asiamo Kotimo someane koaretaena wakapuan, yumo mahamekeua tau rakiraka risikinapo. Kotimo someane koaretaeraka watikiaka rakirane makárahokohoamo Ararena Aporomo matasoraka koteaka rakiraka rekenapo. Ararena Aporoane fasikia apuramo,

<sup>8</sup> maiya amo Kotimo someane Koaretaena Aporoane kakama faserepeakosapo. Eane fasereaperia yiamo Unihae Yasuane soko kakama faserepeakosapo. Yasu fasereperaka ipi akai fofo yiamo Koaretaena Aporoane rusua kukusapo. Yasumo faesamo soko eane hurutapikia epo makata ainane su mafahokosapo.

<sup>9</sup> Mafahoasiraka Kotimo someane Koaretaena Aporo fasereaperia maiya amo, Satanemo wakapuanne maka epo makata rakiakosapo. Kotimo wakapumo hemakapukua arakira aiyáka, epo Satanemo wakapuanne maka, epo soko aiyáka hemakapukua rakiako asiane epo kotafe rakiakosapo. Aporomo asekea fofaraka eaki hemakapusimo, epo Satanemo wakapuanne maka kotafe rakiakosapo.

<sup>10</sup> Satanemo wakapuanne Koaretaena Aporomo maka, kotafe rakirane soko, kotafe somerane soko, aporo hinamo metakiramo eane kekemahokosapo. Kekemana aporo hinamoane fanasina hauaka á pukusapo. Kakaroripo. I fanasina hauaka á pukusane kepo oeyapo. Ipu Kotimo kakaro someane hisiraka koaretaehokosapo. Koaretaerakan Kotimo somesane epo aporomano mafasiakosapo, aisane ipu hisiraka kakimakosafapo. Kakimakanafonosamo ipu Satanemo kotafe someane kakimakosapo.

<sup>11</sup> Kakimarakano ipu himuane Kotimo makunututuraka mareakosapo. Makunututuraka marerakan, kotafe someane kakimaka, makata namo kakaro watikisa yine aporo hinamoamo kotehoareapo, aihokosapo.

<sup>12</sup> Asiamo aporo hinamoane parakuraka hukurukusakipoko ayiakakosapo. Ipu kakaro someane koaretaeraka, kotafe someane kakimasasamo Kotimo iane fanashoko someaka motoakosapo.

*"Kotimo re ararehoasimo hemakapurakaripo." Aisane oyapo.*

<sup>13</sup> Maeo, Unihae Kotimo reane himu tumurumo hemakapurakanapo. Isiapo reane hemakapuraka maiya suamo Kotiaki suserakanapo. Arirakan wate fana isiapo kepo

\* 2:3: Aporo hakása ane Koaretaena Aporopo.

marekea rakisia maiya amo, re Keresoa paohoasimo Kotimo murikimasapo. Murikimayane repo Kotimo kakaro someane kakimaka, arirakano Ho Kotesamo re Kotipoko hakasa rakiraka risikiasimo makoterakano, ayíáka Kotimo re mafasikia pasimosapo.

<sup>14</sup> Ayíáka koteaka risikiasimo Kotimo re peaesapo. Yasu Keresoane repo hemakapusimo isiapo some kasá maiya amo Kotimo re peaesapo. Unihae Yasu Keresomo faesane reaki parakuraka kakakosakipoko Kotimo re peaesapo.

<sup>15</sup> Asiamo maeo, re wakapuaka paroaka risikianie. Isiapo reaki tarirakasuane soko, akaimo somerakasuane soko, hokonomo sawi poparaka makerakasuane soko, repo kaki-maka yaiya risikianie.

<sup>16</sup> Isiapo Unihae Yasu Keresomo soko, isiapo Ata Kotimo soko, tetapō isuane himu tumurumo hemakapukua risikinapo. Arirakano isuane kamenakaraka yaku arareraka, isu yaiya koteaka susu risikiasimo, Kotimo ipi mawakapuraka some karapo. Kotimo ayiakakosapo aisane epo kakaro ayiakakosapo. Aiyaka hemakapusimo Kotimo reane ararerakanapo.

<sup>17</sup> Repo himu hemakapurane paroaka risikiasimo Kotipe Unihae Yasu Kereso tetapō reane ararehoasimo isiapo farimaka kurikuriakanapo. Repo makata rakirane soko, makata somerane soko, mapiraraka rakiraka risikiasimo, tetapō reane ararehoasimo isiapo farimaka kurikuriakanapo.

### 3

*"Isupoko kurikurihoanie," aiyaka Poremo somesane oyapo.*

<sup>1</sup> Maeo, isiapo some hakásá meta reaki someana oyapo. Repo isupoko farimaka kurikurihoanie. Isiapo Unihae Yasuane some karakano aporo hinamo yakaimo koteaka kaiyisimo repo farimaka kurikurihoanie. Kotimo someane repo kaisia maiya amo, repo kakimaka, Kotimo someane repo makáraraka hemakapusuapo. Repo Kotimo someane kakimaka makárasa ayíáka hauaka sua aporo hinamo suamo Kotimo someane kakimaka makárahoasimo kurikurihoanie.

<sup>2</sup> Arirakano aporo hinamo metakiramo Kotimo someane kakimarafapo. Asiamo aporo metakira Satanemo ikia kara á puraka ipu watikiaka rakiraka, isuane mokoatikhoko hemakapuraka risikinapo. Isiapo makata rakirane ipu matasonapaka, Kotimo isu ararehoasimo, repo Kotiaki isupoko farimaka kurikurihoanie.

<sup>3</sup> Asiamo Unihae Yasumo makata ayiakakosaposane, epo ipi kotafe hokoa rukua somer-apapo. Epo ipi reaki wakapu kakakosapo. Satanemo re asekeea risirapaka Unihaemo reane mafaihokosopo.

<sup>4</sup> Unihae Yasumo isuaki hemakapurane kasane nōmo popana oyapo. Isiapo reaki some-sane repo kakimaka risikinapo. Keseke soko repo kakimaka yaiya rakiraka risikiakosapo. Aiyaka isiapo reaki himu hakásaraka hemakapurakanapo.

<sup>5</sup> Isiapo repoko úyaka kurikurinapo. Kotimo reane himu tumurumo hemakapurapo. Makata ane repo hemakapusimo Unihae Yasumo reaki tarisimo isiapo kurikuriakanapo. Yasu Keresomo ipi Kotimo makata rakirane metakirafaraka yaiya wakapuaka rakiraka area ayíáka repo soko ayíáka wakapuaka rakikia naohoasimo isiapo farimaka kurikuri-rakanapo.

*"Repo suamo rakinie," aiyaka Poremo someaka maresane oyapo.*

<sup>6</sup> Maeo, Unihae Yasu Keresomo some one isuaki somesapo. Asiamo isiapo some one reaki some karakanapo. Some one isiapo somefapo. Some one Yasu Keresomo ipi somepo. Hao, kaisie. Keresoa paosa aporo hinamoane soko kau hisiraka risike, makata rakiana-fonoraka, arirakano isiapo tariraka somesane soko, ipu kakimakanafonorakanone, iyaki hakásá paoraka risikiakopo.

<sup>7</sup> Arirakano isiapo ainane repo asesapo. Isiapo rakisia ayíáka, repo soko ayíáka rakinie. Isu reyaki hakasa risikisuamo isiapo kau hisiraka rakisiafapo.

<sup>8</sup> Arirakano repo makata nakosa isiapo mosane isiapo nenakamaka mosafapo. Isiapo makata ropo reaki kasapo. Re isupoko nenakamakaya yaku rakiraka waforonapaka, isiapo makata ropoane reaki kasapo. Asiamo isiapo mone mokoakosakipoko sere soko, ereamo soko, makata rakisiaipo.

<sup>9</sup> Arirakano isuane tarira aporosasamo repo isuaki makata nakosa yaku kakafunureapo. Asiane isiapo isina rakisia hakasa nine repo asekeea, murikimaka, isiapo makata rakisia ayíáka repo ayíáka rakiafunupo.

<sup>10</sup> Asiamo ísu reyaki risikisuamo tarikia somesane oyapo. "Aporo hinamo metamo makata rakiako hisiraka nenakamaka rekenone eaki makata nakosa kakakopo." Aiyaka tariraka somesapo.

<sup>11</sup> Arirakano yumo repo metakiramo makata rakiako hisiraka risikinapakae. Asiamo hisiraka risia aporoamo aporo metakiramo koteaka rakiakorakano yia matasorakanapakae.

<sup>12</sup> Asiamo makata rakiako hisiraka risia aporoaki Unihae Yasu Keresomo someane isiapo wakapuaka some karakanapo. Hao, kaisie. Unihaemo someane oyapo. Repo namina makata nenane nako mokoakosakipoko koteaka rakiraka risikianie.

<sup>13</sup> Maeo, repo makata koteaka rakiakosane kau hisiraka yofehokopo.

<sup>14</sup> Isiapo sawi popana one aporo metamo koaretaerakano aporo akiyaki hakasa risikiakopo. Ipiyaki hakasa risikianafonorakano, epo koaretaesane hemakapuraka ipi kafiyahokosapo.

<sup>15</sup> Re eyaki hakasa risikianafonoraka yia, eaki hisiraka somehokopo. Eane repo namina mae hemakapukua maropoana ayíáka eane soko arareraka maropohoanie.

*Poremo ayapasane oyapo.*

<sup>16</sup> Arirakano auanamo kepoane Unihae Koti ipipo. Unihae Kotimo re ararerakano maiya suamo re auaraka risikiasimo isiapo himu hemakapuramo reane kurikurinapo. Makata kotesa fasereperakano soko, makata watikisa fasereperakano soko, maiya suamo re auaraka risikiasimo, hemakapurakaripo. Koti reyaki hakasa rekeasimo hemakapurakaripo.

<sup>17</sup> Ano Porepo. Nōmo nī hokono sīkinimo sawi one wakasema reaki poparakanapo. Sawi suane nōmo poparaka makesane nōmo ainane nōmo nī hokono sīkinimo sawi wakasema popanapo. Asiamo nōmo nī hokono sīkinimo popasane repo asekeha hemakapuraka, “Sawi one Poremo poparareapo.” Aihoasimo nōmo nī hokono sīkinimo popasapo. Nōmo reaki ayaparakanapo.

<sup>18</sup> Re suane Unihae Yasu Keresomo makotehoasimo hemakapurakaripo.

## 1 Timoti

### 1 Timoti sawi one mahemakapukusa someane oyapo.

Sawi one Poremo Timotiaki popasapo. Timotimo kalyia Yu aporo hinamopo. Arirakano Timotimo wafayane kiriki aporopo. Aporo hinamomo Yasuane hemakapusimo Pore kimisi puraka, Timotiane keresoa paoraka rea aporosamo, eyaki hakāsa pukusakipoko Timoti karikia pusuapo.

Keseke Poremo Timotiaki someraka "Keresoa paosa aporo hinamo Efesase sesea risiane, nōmo asekea rekeanie," aisapo. Asiasamo Peremo arare someane some kasapo.

Asiasamo Poremo arare someane Timotiaki some kasapo. Paseto aporo soko tikone aporo soko uyáka risikianie, aisapo. Arirakano kotafe tisamo someane kakimaka kekemahokohoamo asekeanie, aisapo. Arirakano Timotimo ipi koteaka rekeasimo Poremo some kasapo.

### 1 Timoti sawia some kepo parakuraka popasane oyapo.

1:1-2 Poremo sawi one kepomarekea popasapo.

1:3-20 Kotafe tisamo someane asekeanie, Timoti, nōmo Kotimo someane kakaro ereketae somehoanie, aisapo.

2:1-8 Isu koteaka risikiasimo kamani aporopoko kurikurihoanie, aisapo.

2:9-15 Hinamo re, makahinamoraka tokoakopo, aisapo.

3:1-16 Pateso aporoane soko, tikone aporoane soko murikimakanie.

4:1-5 Kotafe tisa peraka makata somehokosane Poremo somesapo.

4:6-16 Timoti ne uyáka rekeanie, aisapo.

5:1-6:21 Keresoa paosa aporo hinamo asekea rekeakakosane Poremo somesapo.

*Poremo Timotiaki sawi fana poparaka makesane oyapo.*

<sup>1</sup> Yasu Keresomo tarira aporo rekeasimo Kotimo mafasikia murikimasa aporoane ano Porepo. Arirakano Yasu Keresomo soko ano murikimasapo. E pariperakarihoamo isu kau risikinapo.

<sup>2</sup> Timoti, néaki nōmo sawi one poparaka makerakanapo. Nōmo néaki Yasu Keresoane some kasane nōmo kakimaka eaki rekeako parisapo. Asiasamo né nōmo hokosa asiapo. Nōmo hemakapusuane Ata Kotipe Unihae Yasu Kereso tetapō auaraka rerane soko, kamenakaraka rerane soko, yaku ararenane soko, néaki kakasimo nōmo hemakapurakaripo.

*"Kotafe someane kakimakopo." Aisane oyapo.*

<sup>3</sup> Fana ano Masetónia hauaka pusua maiya amo, Timoti néaki nōmo someraka, "Né Efesase ape yia rekeanie." Aiyaka nōmo neaki somesapo. Aisa ayíáka pipu soko, "Né Efesase ape yia efera hunia rekeanie." Aiyaka nōmo néaki somerakanapo. Arirakano Efesase apea aporo metakiramo kotafe some karakanano iaki someraka, "Yasuane kotafe some kakakopo." Aiyaka somehoanie. Aiyaka somehokosakipoko né yia rekeanie.

<sup>4</sup> Aporo sisimamo wate ásiapakae aiyaka some kepoane rakupe pesane pipu metakarinie, aihoanie. Ipu makasa kamumamo aporo wainepe pesa yano taesa yakai popasane soko makáranapaka metakarinie, aihoanie. Wate fana ipu makasa kamumamo some kepo rakupe pesane soko, aporo wainepe pesa yano taesane soko somerakanone, aporomo Kotiane hemakapusimo ipu somerakanafapo. Arirakano aporomo Kotiaki himu hakásaraka hemakapurakano, Kotimo ipi hemakapusuane aporoaki karápo.

<sup>5</sup> Nōmo néaki some akara one aporo hinamo suamo kakimaka risikino, i namo kakaro koteaka risikiakosapo. Arirakano makata watikisa metakarisiane efera hunia rakiako hemakapukusafapo. Arirakano Kotiaki kakaro himu hakásaraka hemakapukusapo. Asiasamo Kotiane soko aporo metakirane soko ipu himu tumurumo hemakapukusapo. Asiamo ipu namina yia himu tumurumo hemakapusimo some akara one nōmo reaki some karakanano.

<sup>6</sup> Arirakano some kotesane aporo metakiramo kakipayaraka ikia kara hasaka apura ayíáka purakanapo. Hasaka apura ayíáka nenakamaka me rukua mokome somerakanapakae.

<sup>7</sup> Ipu someraka, "Kotimo somemané motosane some kepo kará aporo tisane isupo." Aiyaka somesa nine Kotimo some kepoane ipu hemakapurakanafapo. Ipu wakapuaka someraka tiki somerakao asiane ipu namina some kepoane hemakapurakanafapo.

<sup>8</sup> Arirakano Kotimo somemaneane Kotimo isuaki some karakano isiapo kakimaka rakirakano, somemaneane kotesapo. Ane isiapo hemakapurakanapo.

<sup>9</sup> Asiamo aporo hinamo ereketaeraka risiakipoko Kotimo somemaneane motosafapo. Arirakano aporo hinamo watikiaka risiakipoko maropohoasimo somemane motosapo. Aporo hinamo úyaka risiakipoko somemaneane motosapo. Somemane mamosona aporo hinamoakipoko soko, somemane koarenta aporo hinamoakipoko soko, Kotiane hemakapunafonana aporo hinamoakipoko soko, aporo hinamo watikisa akipoko soko, Kotimo ikia kara kekemaoanafonoraka hauaka wo makata rakirane kekemana aporo hinamoakipoko soko, ata ama tetä kukusimo rura aporo hinamoakipoko soko, aporomano rura aporo hinamoakipoko soko,

<sup>10</sup> hinamo hakimara aporoakipoko soko, aporo hokosa takéyaki pura aporoakipoko soko, hokosa haki serafo maka karikia nena aporo hinamoakipoko soko, kotafe somera aporo hinamoakipoko soko, kotafe aumana aporo hinamoakipoko soko, kakaro someane metakarikia kakaro some kotesane mawakasemarakira aporo hinamoakipoko soko, ayíáka aporo hinamo watikiaka risiakipoko somemaneane motosapo.

<sup>11</sup> Arirakano kakaro someane soko, Yasuane hemakapusimo some kotesane soko, hakásáa yiyareapo. Arirakano Yasuane some kakasimo Kotimo ano murikimasapo. Koti faeraka reane soko, wakapuaka reane soko, epo someane nōmo some karakanapo. Arirakano sesenamo kepoane Koti ipipo.

*Poremo Kotiaki susesane oyapo.*

<sup>12</sup> Nōmo koteaka rakisimo Unihae Yasu Keresomo anoaki wakapu karakasupo. Wakapu karaka epo hemakapuraka, "Poremo anopoko siaraka rakiraka rekeakosapo." Aíyaka hemakapukua nōmo epoko rakisimo epo ano murikimararakasupo. Murikimasamo nōmo eaki suserakanapo.

<sup>13</sup> Fana nōmo eane mainamareraka mawakasemarakira somesapo. Yasu soko arirakano Yasua paosa aporo hinamoane soko nōmo mokoatikirakan yia, Yasumo ano kamenakarakasupo. Nōmo epo someane kakimakasiraka meraruraka rekeno asekea, epo ano kamenakarakasupo.

<sup>14</sup> Kamenakarakira Unihaemo ano yaku arareraka nōmo Yasu Keresoaki kataka marekea rekeno asekea, eaki himu hakásaraka hemakapurane soko, himu tumurumo hemakapurane soko, anoaki karakasupo.

<sup>15</sup> Arirakano repo soko eaki himu hakásaraka hemakapukusakipoko kakaro some one kakimakanie. Aporo watikisané mafasiako Yasu Keresoane hauaka wo pesapo. Arirakano namo kakaro aporo watikisa fana reane anopo.

<sup>16</sup> Asiane Kotimo ano kamenakarakasupo. Ano kakaro aporo watikisa rekeno, Yasu Keresomo anoaki foaka sapehoanafonoraka ano koteaka rekeasimo ano pasimarakasupo. Asiamo aporo hinamo suamo asekea hemakapusimo Yasumo anoaki foaka sapehoanafonoraka ano koteaka rekeasimo pasimarakasupo. Asiamo ipu hemakapuraka, "Yasumo Poreaki foaka sapehoanafonoraka e koteaka rekeasimo pasimasasamo anoaki soko ayíakosapo." Aíyaka Yasuaki himu hakásaraka hemakapurakan yaiya rerane makosapo.

<sup>17</sup> Asiamo yaiya rera Unihae Kotiaki nōmo kekererakanapo. E kurafaraka reane soko, e isiapo asekeanafonanane soko, Koti hákasa ipipo. Maiya suamo e yano motosane nōmo makáraraka kekererakanapo. Epo faesane soko yaiya faeraka rekeakosasamo eaki kekererakanapo. Kakaroripo.

*"Timoti né paroaka rekeanie." Aíyaka Poremo somesane oyapo.*

<sup>18</sup> Timotio, né Keresoa paosa aporosasamo né nōmo hokosa asiapo. Asiasamo someane one nōmo neáki some karakanapo. Kotimo somerakano kaira aporomo néáki fana some karakasuané kakimaka hemakapukua rekeanie. Nōmo some one hakásáa yiyapo. Ame aporo paroaka wakapuaka risike yunu awera ayíáka, nōmo soko Kotipoko paroaka wakapuaka reke epo yunuane weanie.

<sup>19</sup> Kotiaki kakaro himu hakásaraka hemakapukua rekeanie. Makata watikisa né himura kakerakano kairaka, ní himumo neaki tau somerakano kakipayahokopo. Kakimaka makata watikisané metakarinie. Metakarikia tau himumo hemakapukua kotesa susu hemakapukua someraka rekeanie. Arirakano aporo metakiramo himura tau makata watikisa kakerakano kaikia kakipayaraka, makata watikisané yia kake Kotiaki himu hakásaraka hemakapurane soko metakarisiapo.

<sup>20</sup> Metakarisia ayíáka, aporo tetámo soko Kotiane metakarisiapo. Metakarisiane meta, yano motosa Himeneusepo. Metane yano motosa Arekesátapo. Tetapó himura tau watikisané yia kakerakano kaikia kakipayaraka, tetapó Kotiane mawakasemarakira mainamaresapo. Mainamaresane metakarisiapo aporo tetáne nōmo Sataneaki kasapo.

**2**

*Kotiaki kurikurinane oyapo.*

<sup>1</sup> Re uyáka risikiasimo nōmo hemakapurakaripo. Makata fanane aporo hinamo supoko hemakapukua farimaka kurikurihoanie. Arirakano Kotimo ipi hemakapusuane ayiakasimo eaki kurikuriraka wahoanie. Arirakano aporo hinamo suane Kotimo ararehoasimo kurikurihoanie. Makata supoko Kotiaki susehoanie.

<sup>2</sup> Isiapo Kotiaki himu hakásaraka hemakapukua risike, tau auaraka risikiakosakipoko, kamani aporo unihae fanaraka kaya epoko soko farimaka kurikurihoanie. Arirakano kamaniyaki makata rakira aporo akipoko soko farimaka kurikurihoanie.

<sup>3</sup> Ayíáka kurikuriraka risikino kotehkosapo. Koteaka risikino, Kotimo sesehkosapo. Asiamo Kotimo isu mafasikia ararenapo.

<sup>4</sup> Kotimo aporo hinamo suane hemakapukua mafasiako seserakanapo. Arirakano kakaro someane repo koteaka hemakapusimo ipi hemakapukua rekenapo.

<sup>5</sup> Asiamo Koti hákasa ipipo. Arirakano aporomo ainane soko Kotiaki some kaka, Kotimo ainane soko aporoaki some kaka, ayiakasimo, tipia reane Yasu Kereso ipi hákasa. Yasu Kereso tipia rekeakosakipoko ipi aporomanomo kauane maka hauaka wo pesapo.

<sup>6</sup> Aporo hinamo suamo makata watikisa mafahoko ipi kauane makata ropo akara ayíáka ipi kauane kaka kusuapo. Asiamo aporo hinamo suane Kotimo mafasiasimo ipi kusuapo. Kotimo murikimasa maiya hakasa yíamo Yasu ipi kusuapo.

<sup>7</sup> Ipi kusuasamo eane soko nōmo some kakasimo epo ano tarira aporo rekeasimo murikimasapo. Murikimarakano Yu aporohoanafonosaki Kotimo kakaro someane ipu kakimaka, Kotiaki himu hakásaraka hemakapusimo nōmo tisamo atarira ayíáka tarikia some karakanapo. Nōmo kakaro somerakaripo. Kotafe somerakarifapo.

<sup>8</sup> Asiamo nōmo hemakapusuane ape sumu su aeyaka Keresoa paosa aporo suamo hokono máfaraka<sup>\*</sup> Koti makáraraka eaki kurikurihoanie. Sapesane soko tafatafasane soko metakarikia kurikurihoanie. Aiyáka nōmo hemakapurakaripo.

*"Hinamo re uyáka tokoanie." Aisane oyapo.*

<sup>9</sup> Arirakano Keresoa paosa hinamo reaki nōmo some one some karakanapo. Reane aporomo asekeasimo makahinamohokopo. Pasu siaraka koteaka osohoanie. Arirakano pasu siaraka koteaka makafirinie. Arirakano hinamo repo uni itiane makahinamohoko hemakapukua rakiakopo. Arirakano hinamo repo makahinamohoko hemakapukua ikiare mawia taponane soko, seketenaeya fakaterapinane soko, pasu mone káramo ropo raka osonane soko, aporo metamo asekeasimo kau rakiante siahoasifareapo.

<sup>10</sup> Kau rakirane makárahokopo. Meta arareraka koteaka rakirane makárahoanie. Meta ararenane koteaka kau arakira ayíáka rakirakanapo. Meta ararenane Kotiaki himu hakásaraka hemakapusua hinamo amo anapo.

<sup>11</sup> Kotimo some akara maiya amo Kotimo someane kaikia hemakapukusakipoko, hinamo re me faraka tau tokoanie. Some akarane koteaka kaikia tokoanie.

<sup>12</sup> Hinamo repo aporoaki tisaraka some kaka, arirakano hokotakekea ayiane siahoasi-fareapo. Aiyáka nōmo hemakapurakaripo. Asiamo hinamo re tau tokoanie.

<sup>13</sup> Arirakano Kotimo Atame fana rakiakia Ifi keseke rakisiapo.

<sup>14</sup> Arirakano Satanemo mahoperaka kotafe somesane Atamemo kakimasafapo. Ifimo kakimaka Kotimo someane koarentaesapo.

<sup>15</sup> Koarentaesamo hinamomo hokosa taka apura maiya amo kau terapo. Asiane hinamomo Kotiaki kakaro himu hakásaraka hemakapukua kake, arirakano meta ararehoko hemakapukua kake, arirakano makata watikisané kikisiraka metakarikia kake, arirakano koteaka tau kake, maiya suamo ayíáka kakeno, ipi hokosa taka apura maiya amo Kotimo e mafasiakosapo.

**3**

*"Keresoa paosa aporo hinamoane asekeea rea (paseto) aporo re uyáka risikianie." Aisane oyapo.*

<sup>1</sup> Hao, kaisie, kakaro someane nōmo reaki some karakanapo. Aporomo someraka, "Keresoa paosa aporo hinamo asekeea rea aporoamo arakirane nōmo rakiakaripo." Aiyáka aporo metamo somerakanone, aporoamo makata rakira kotesane rakiako seserakanapo.

<sup>2</sup> Asiamo asekeea rea aporo, né uyáka rekeanie. Né koteaka reke nōmo watikika rakianafonarakano aporo metakiramo né hokomaka somehokosafapo. Né koteaka ereketaeaka reke, Keresoa paosa aporo hinamoane nōmo asekeea rekenone ane, siahokosapo. Nōmo hinamo hakásaraka arumakanie. Né sipiriti he nekeea himu maparitaehokopo. Kaumo

\* <sup>2:8:</sup> Namina kurikurinane honoko máfaraka ayíáka Kotiaki kurikurinapo.

hemakapusuane kekemaraka rakiakopo. Koteaka hemakapurane kekemaraka rakinie. Makata ereketae susu rakinie. Aporo kimisi soko perakano nōmo tereraka pasimakanie. Aporo hinamo suaki nōmo koteaka tisaraka tarinie.

<sup>3</sup> Sipiriti he masuanane kára nakopo. Tapare saperaka weakopo. Tau auaraka rekeanie. Mone kára mokoakosakipoko hemakapukupo.

<sup>4</sup> Nōmo apea, nōmo ní hinamomo soko, nōmo ní hokusamo soko, ipu suamo nōmo someane koteaka kakimakasimo iane koteaka asekea rekeanie. Nōmo someane nōmo ní hokusamo koaretaenafaraka, nōmo ní hemakapusuane kekemaraka koteaka kakimaka risikiasimo nōmo ní koteaka asekea rekeanie.

<sup>5</sup> Arirakano nōmo hinamomo soko, nōmo hokusamo soko, ipu nōmo someane kaki-makanafonorakano, iane nōmo koteaka asekea rekenafapo. Nōmo iane koteaka asekea rekeanafonorakano, Keresoa paosa aporo hinamoane soko, nōmo mayiáka koteaka asekea rekeakosare? Nōmo koteaka asekea rekeasifareapo.

<sup>6</sup> Arirakano né Yasuaki kawe rekeako pariraka he tapukumarerakano, nōmo Keresoa paosa aporo hinamoane asekea rekeane siahokosapo. Né hea kawe tapukumaresasamo, Keresoa paosa aporo hinamoane asekea reke, né níane makáraraka hemakapuprapaka, Keresoa paosa aporo hinamoane nōmo asekea rekeakopo. Arirakano né níane makárarakan, Kotimo fana Sataneaki someraka, "Né metakarikia pusie." Aisa ayiáka, né soko Kotimo metakarikia pusie aihokosapo.

<sup>7</sup> Arirakano Keresoa paohoanafonosa aporomo soko nōmo ainane asekea néane seserakano, nōmo Keresoa paosa aporo hinamoane asekea rekeane, siahokosapo. Asiane Keresoa paohoanafonosa aporomo né asekea hisiraka, néane hokomaka someraka, "Epo watikiaka arakire," airakano né kaiyahokosapo. Ne kaiyanamo, kasipumo pokoa amara ayiáka Satanemo kasipu amo né makosapo. Anapaka Keresoa paosa aporo hinamoane asekea rekeakosa aporo murikimakosakipoko, Keresoa Paohoanafonosa aporomo nōmo ainane asekea someraka, "Epo koteaka rakirapo," aihokosapo.

*"Tikone aporo re uyáka risikianie." Aisane oyapo.*

<sup>8</sup> Tikone aporo re uyáka risikianie. Keresoa paosa aporo hinamoane asekea risia aporo koteaka arisia ayiáka, re soko ayiáka koteaka risikianie. Koteaka ereketae susu hemakapukua rakiraka risikianie. Aporo metaki some meta kaka, aporo metaki some meta kaka, ayiáka some koaka mareakea somehokopo. Sipiriti he soko he watikisa soko nakopo. Makata kemo soko, mone soko, kára mokoako hemakapukupo.

<sup>9</sup> Arirakano Keresoa paosa aporo hinamoaki Kotimo kakaro someane ipi tarisiapo. Asimo ipi kakaro some kotesane kaikia himu hakásaraka hemakapukua paroaka risikianie. Paroaka risike ipu namina himua makata watikisa kakerakano kaiyanafonona aporoane murikimakanie.

<sup>10</sup> Tikone aporoane murikimakosakipoko, haru murikimarafaraka, epo makata rakirane fana asekeanie. Epo koteaka rakirakanare? Epo watikiaka rakirakanare? Ayiáka repo asekeanie. Repo aseane epo koteaka rakiraka rekeno asekea, epo sia tikone aporomo rakirare rakisireapo, ayiáka hemakapukua murikimakanie.

<sup>11</sup> Tikone aporomo koteaka arakira ayiáka, tikonemo hinamo re soko ayiáka koteaka tokoanie. Metane hokomaka somehokopo. Arirakano he watikisa nekea himu maparitaer-aka aina ayiáka tokoakopo. Maiya suamo koteaka susu rakiraka toke, arirakano kakaro ereketae susu someraka tokoanie.

<sup>12</sup> Arirakano tikone aporo nōmo hinamo hakásaraka arumakanie. Nōmo ní hokusamo soko, nōmo ní hinamomo soko, ipu suamo nōmo someane kakimakasimo iane koteaka asekea rekeanie.

<sup>13</sup> Nōmo koteaka rakirakano ne yano motosane kotehokosapo. Arirakano Yasu Keresoaki himu hakásaraka hemakapukua reasasamo epo someane nōmo somehoko kaiyanafaraka mapiraraka wakapuaka somehokosapo.

*Kakaro some kepoane oyapo.*

<sup>14</sup> Yumo nōmo sawi one poparaka reke, nōmo ne foaka aseako peako hemakapuprakaripo.

<sup>15</sup> Ano peakosapoko asiane ano foaka peanafonorakano ane, aporomo koteaka ereketae rakiraka risikiakosane ipu hemakapusimo nōmo poparaka ayiakakosapo. Yaiya rera Kotimo ipi kakaro someane Keresoa paosa aporo hinamomo kakimaka makama fananapo. Aina ayiáka ira warupi paroaka area ayiáka Keresoa paosa aporo hinamomo Kotimo kakaro someane kakimarakan ane ayiáka paroaka risirapo.

<sup>16</sup> Kotimo kakaro some kepoane namo kakaro káraro. Some kepoane aporomo marakoraka hurutapiakosafapo. Kotimo someane isiapo kakimasa kepoane oyapo. Yasu Keresomo aporomanu kau maka perakano isiapo aporo hinamomo asesapo. Arirakano ipiane

ereketae susu reane Ho Kotesamo isuaki tarisiapo. Arirakano hepene aporomo soko eane asesapo. Arirakano hauaka su aeyaka aporo suamo eane hemakapusimo aporo metakiramo some kasapo. Some karakano kaisia aporo hinamomo eaki himu hakásaraka hemakapusuapo. E hepene yapunaka pasimarakano faeraka reke e yano motosa káraraka rekenapo.

## 4

### *Kotafe tisa aporo peakosane oyapo.*

<sup>1</sup> Kotafe tisa aporo peakosapo aíyaka ho Kotesamo hufitaeraka somesane oyapo. Hauaka one fahoko ana maiya amo, aporo metakiramo Yasu Keresoaki hemakapusuane metakarikia, kotafe hora aporoaki patera asekosapo. Patera asekea, kotafe hora hoamo someane soko kakimaka, Satanemo aporo raipa yakasa hope yatafu tetapō some akarane kakimaka rakiraka risikiacosapo.

<sup>2</sup> Arirakano kotafe some kepoane oyapo. Aporomo himu tetáraka hemakapukua risiamo kotafe somerapo. Ipu himu tetáraka risirané mokopayarakanó, ipu himuane Satanemo murikimaka marerapo. Murikimaka mareraka, "Himuane nōmenapo." Aíyaka Satanemo murikimaka marerapo.\*

<sup>3</sup> Murikimaka maresa aporoamo someraka, "Hinamo arumakopo. Arirakano makata nakosa metakira soko sokoaihoanie. Asiamo hinamo arumaraka makata sokoaisane nenakanone ane, re watikiaka risikinapo." Aíyaka ipu kotafe some kakakosapo. Asiamo kotafe someane repo kakimakopo. Makata nakosane Kotimo ipi rakisiapo. Asiamo Kotiaki himu hakásaraka hemakapusuane aporo hinamomo Kotimo kakaro someane kakimarakanó, ipu makata nenane nasimo Kotimo rakisiapo.

<sup>4</sup> Asiamo makata su Kotimo rakiakia maresane namo kakaro kotesapo. Kotesasamo makata nakosa metakira hisiraka sokoaihokopo. Makata nakosa su maka suseaka kurikuriraka neane siahoasireapo.

<sup>5</sup> Asiamo Kotimo someamo soko kurikurianamo soko makata nakosane makotenapo.

### *Yasu Keresomo aporo raipa kotesane oyapo.*

<sup>6</sup> Arirakano nōmo some one neaki tarirakanapo. Keresoa paosa aporo maemo koteaka hemakapusimo nōmo some karakano ane, né Yasu Keresomo aporo raipa kotesane népo. Arirakano né kau kárahokosakipoko, nōmo asipa nenapo. Aina ayíáka nōmo Yasu keresoaki himu hakásaraka hemakapusuane kárahokosakipoko, Kotimo kakaro someane yaiya kaki-maka rekeanie.

<sup>7</sup> Kakimaka reke aporo metakiramo Kotiane metakarikia, aporo sisimamo soko, hinamo sisimamo soko, makata some rakupe pesane kakimakopo. Asiamo someamo Kotiane makáranafapo. Arirakano Kotipoko wakapuaka rakiraka rekeakosakipoko Kotimo ainane koteaka enomaka rekeanie.

<sup>8</sup> Arirakano aporomo makata rakiako kau hisiraka yofenapaka maiya suamo apea karáfapo. Kau mawakapuhokosakipoko aporomo makata rakirapo. Ane wakasema kotesapo. Arirakano namo kakaro kára kotesane oyapo. Himu soko ho soko tetákara yofenapaka, Kotipoko rakiako seseraka, Kotimo ipi ainane enomaka hemakapurunie. Enomaka hemakapurakano yumo soko koteaka rekeakosapo. Keseke soko yaiya koteaka rekeakosapo.

<sup>9</sup> Hao, káisie. Nōmo some akara one kakaro somerakanapo. Some one kaikia, kakaro kakimakanie.

<sup>10</sup> Isiapo Kotiane ipi wate fana reane, yumo soko yaiya rekenapo. Kotimo aporo hinamo suane mafasiakosakipoko hemakapusuane, epo someane kakinara aporo hinamoane hákasa mafasirapo. Asiamo Kotiaki isiapo himu hakásaraka hemakapuraka risikinapo. Isiapo epoko rakiakie isu aporo metakiramo mokoatikirakanó yia, isiapo wafororaka rakiraka risikinapo.

<sup>11</sup> Arirakano some one aporo hinamo suaki some kakanie. Some karaka, "Re uyáka risikianie." Aíyaka maroporaka some kakanie.

<sup>12</sup> Timoti, nōmo some karakano, né hokosa rauasasamo aporo metakiramo néaki someraka, "Né nenakamaka hokosa reapo." Aíyaka aporoamo né makefehoane siahoasifareapo. Keresoa paosa aporo hinamomo néane asekea ipu né kekemahoasimo koteaka someraka, arirakano koteaka reke, arirakano aporo hinamo metakirane himu tumurumo hemakapukua reke, arirakano Kotiaki soko himu hakásaraka hemakapuruka reke, arirakano himura watikisane metakarikia koteaka susu rekeanie. Asiamo né koteaka rekeno, ipu né asekea kekemahoasimo né koteaka rekeanie.

\* <sup>4:2:</sup> Murikimaka marerane aporomo saro senaki pateraka, saroane nōmenapo. Aihokosakipoko pateana ayíáka murikimaka patenapo.

<sup>13</sup> Año peasiraka nōmo uyáka rakinie. Aporo hinamo suamo kaiyisimo Kotimo sawiane kakama menoohanie. Menoraka Kotimo someane some kakanie. Arirakano aporo hinamomo hemakapusimo Kotimo some kepoane tisaraka koteaka some kakanie.

<sup>14</sup> Kotimo ipi wakapu yaku ararenane néaki karakano, nōmo masane metakariakopo. Kotimo somerakano kaira aporomo néaki some kaka, arirakano Keresoa paosa aporo asekea risia aporoamo ipu hokonomo né sakaisa maiya amo, Kotimo ararena wakapuané néaki yaku kasapo. Kasane maka rakinie.

<sup>15</sup> Nōmo someraka one kaika hemakapunie. Hemakapukua reke, some one muriki maka rakiraka rekeanie. Arirakano Kotimo ikia kara koteaka rakipe purakano, néane aporo metakiramo asekea someraka, "E Kotimo ikia kara koteaka apure." Ayíaka néane somehokosapo.

<sup>16</sup> Ipu nōmo makata rakirane asekeasimo nōmo koteaka rakiako hemakapukua rekeanie. Nōmo tisaraka makata some akaramo nōmo hasaka some karápaka asekeanie. Ayíaka koteaka hemakapukua rakiraka rekeno, né níane soko arirakano nōmo someane kakimasa aporo hinamoane soko Kotimo mafasiakosapo.

## 5

### *Kakimara aporo hinamoane maroponane oyapo.*

<sup>1</sup> Aporo sisimamo watikiaka rakirakano, nōmo sakepamo iriraraka somehokopo. Ní ataki somera ayíaka eaki maroporaka tau auaraka somehoanie. Aporo rauaki someraka, ní maeaki somera ayíaka somehoanie.

<sup>2</sup> Arirakano hakama sisimaki someraka, ní amaki somera ayíaka somehoanie. Hinamo rauaki soko, hinamo sakoraki soko, someraka, ní papáki somera ayíaka somehoanie. Hinamoaki maropoana maiya amo nōmo hasaka hemaka purapaka nōmo Kotiaki himu hakásaraka hemakapukua maropohoanie.

### *"Hinamo yaro asekea rekeanie." Aisane oyapo.*

<sup>3</sup> Hinamo yaroane aporo metamo ararehoanafonorakano, nōmo ararehoanie.

<sup>4</sup> Arirakano hinamo yaro ipi hokosamo soko, ipi hokosamo hokosamo soko, eane asekea risikianie. Fana ama, ata, hakamape, makasa kaua, ipu soko hokosa re asekea risiasamo, repo hokosamo soko iane ropo asekea risikianie, aihoanie. Asekea risikino Kotimo sesehokosapo.

<sup>5</sup> Arirakano hinamo yaro meta, aporo metamo asekea rekeanafonoraka, ipi hokosa soko rekeanafonoraka, ipi haku kake, ipi Kotiaki himu hakásaraka hemakapukua kake, maiya suamo Kotiaki kurikuriraka kakeno asekea, eane repo ararehoanie. Asiamo ereamo soko, maýamo soko, maiya suamo ipi Kotiaki kurikuriraka kake, hinamo yaroane koteaka kakakosapo.

<sup>6</sup> Arirakano hinamo yaro metamo kaumohemakapusuane kekemaraka, aporo metakirayaki mokomo purakano, hinamoamo ipi apia kusua ayíaka ipi himuane kurakanapo.

<sup>7</sup> Nōmo some akarane hinamo yaro suamo hemakapusimo some one some kakanie. Iane Keresoa paohoanafonosa aporomo hokomakohoamo some one, Timoti, nōmo some kakanie.

<sup>8</sup> Keresoa paosa aporomo ipi ama, ata, hakamape, makasa kaua, i suane asekea rekeanafonorakano, epo Kotimo someane koarellaakanapo. Epo apea amano hakásaraka risiane asekea rekeanafonorakano, epo Kotiaki soko himu hakásaraka hemakapukua rekenafapo. Epo watikisa amo Keresoa paohoanafonosa aporomo watikisane marokenapo.

<sup>9</sup> Arirakano hinamo yaro sisima meta, keremisi kaeyako namasu (60) amo kayane, e yano motosa popahoane\* siahoasireapo. E yano motosa poparaka ararehokosakipoko hinamo yaro uyáka kayane yano motosa popahoanie. Hinamo yaroane aporo hakásapusuane popahoane siahoasireapo.

<sup>10</sup> Arirakano aporo hakásapusuane hinamo metakiramo asekea someraka "Hinamo amo koteaka rakirapo. Ipi hokosa koteaka asekea kayapo. Arirakano aporo kimisi perakanoso, ipoko ipi apiaki makata nakosa akará ayíaka karápo. Keresoa paosa aporo soko hinamo soko i korake epo kusunapo. Aporo hinamo metakira makata meta tomekesane epo ararenapo. Metapoko epo koteaka kára rakirapo." Airakano hinamo yaro ayíaka koteaka kayane yano motosa popahoane siahoasireapo.

<sup>11</sup> Arirakano hinamo yaro raua yano motosa popahokopo. Asiamo hinamo yaro rauamo maiya suamo Keresopoko makata rakirane metakariakia, aporomo e arumakasimo hemakapukua, aporoyaki puko kára hemakapukusapo. Hinamo rauamo anapo.

\* 5:9: Hinamo yaroane Keresoa paosa aporo hinamomo asekea risikiasimo yano motosa popanapo.

<sup>12</sup> Asiamo fana epo Keresoaki someraka, "Népoko nōmo rakiakosapo." Aisane metakirikia aporo metayaki purakano, aporo metakiramo asekea someraka, "Epo Keresopoko rakiakosapo, aisane metakarirane, hinamoamo kakaro hasakane." Aihokosapo.

<sup>13</sup> Ayíáka hinamo yaromo Kotimo makata rakira ane soko metakarikia, ipi kau hisiraka, masakariaraka kake, ape meta á purakano, ape meta á purakano, ayíáka tipia kotafe somehaeraka koraka rerapo. Makata somehoanafonosane epo hemakapukua tipia kotafe koaka marekea somerapa.

<sup>14</sup> Anapaka hinamo yaromo hemakapusuane oyapo. Hinamo yaro raua aporomo arumayane siahoasireapo. Arumaka hokosa hokono marekea, ipi apia soko, hokosane soko, koteaka asekea tokoanie, aihoanie. Arirakano hinamo yaro rauamo watikiaka rakirakano, Keresoa paohoanafonosa aporomo asekea, isuaki hokomaka someraka, "Re watikirareapo." Airapaka hinamo yaro rauaki nōmo someana one some kakanie.

<sup>15</sup> Arirakano hinamo yaro metakiramo Kereso ane metakarikia Satane ane keke-marakanapakae.

<sup>16</sup> Asiamo hinamo re Keresoa paosasamo hinamo yaro meta repo apea kakeno, hinamo repo namina yiamo hinamo yaroane asekea tokoanie. Arirakano kurikuri apea Keresoa paosa aporo hinamoaki someraka, "Hinamo yaroane repo asekea risikianie." Aihokopo. Í waforonapaka nōmo apea hinamo yaro kakeno, nōmo ní yiamo asekea rekeanie. Hinamo yaro ipi haku tipia kakeno ane, Keresoa paosa aporo hinamo metakiramo asekea risikianie. Nōmo ní apea hinamo yaro meta kakeno, nōmo ní yiamo asekea rekeanie.

*Keresoa paosa aporo hinamo asekea reane oyapo.*

<sup>17</sup> Keresoa paosa aporo hinamo asekea rea aporomo ipi namo kakaro koteaka asekea rekeno, eaki makata ropo karáka, hakásá karáka, hakásá meta soko, yaiya yaku ripaka marekea kakanie. Tetá karáka, tetá meta soko, yaiya yaku ripaka marekea kakanie. Epo Kotimo someane koteaka some kaka, arirakano koteaka tisaraka tarikia, asiamo eaki makata ropo meta soko yaku paoraka kakanie.

<sup>18</sup> Kotimo sawia popasane oyapo. "Saro ponomakaumo witi hae kauane haketarisimo finirape apura maiya amo, witi hae namoane nasimo, ponomakau akaia tapohokopo. Neane siahoasireapo." Ayíáka popahoareapo. *(Lo 25:4)*

Makata meta solo popasane oyapo. "Aporomo makata rakirakano ipi makata rakisi-akipolo makata ropo makasireapo." Ayíáka popahoareapo.

<sup>19</sup> Aporo hakásamo Keresoa paosa aporo hinamo asekea rea aporoaki hukururakano kaiyakopo. Aporo tetámo soko metao, aporo isiamon soko metao, ayíáka ipu suamo hakásá yine asekea hukururakano ane, kaiyinie.

<sup>20</sup> Asekea rea aporo metamo yaiya watikiaka rakiraka rekeno aporo suamo kaiyisimo aporoaki ayiakakopo, aihoanie. Epo ainane aporo suamo kekemarakaka, watikiaka rakiraka eaki kakama metakarisie, aihoanie.

<sup>21</sup> Asiamo nōmo some akarane ereketaeraka kekemahoanie. Aporo meta makama fanaraka aporo meta makama kesekeraka ayíáka rakiakopo. Asiamo Kotimo soko, Yasu Keresomo soko, Kotimo hepene aporo kotesamo soko, nōmo arakirane aserakanapo.

<sup>22</sup> Aporo metamo Unihae kotipoko rakisimo, wate foaka nōmo hokonomo e sakairaka kurikurinane ayiakakopo. Foaka nōmo hokonomo sakairaka kurikurisane, epo watikiaka rakirakano ane, nōmo kererepo. Anapaka nōmo ní koteaka susu rakiraka reke, watikisane metakarikia rekeanie.

<sup>23</sup> Maiya káramo Timoti né himu nenakaraka makata takamasasamo, namo he hákasa nakopo. Waene he soko wakasema nanie.<sup>†</sup>

<sup>24</sup> Arirakano aporo metakiramo makata watikisane aporo suamo wate foaka aserapo. Arirakano aporo metakiramo makata watikiaka rakikia mahamesane repo asekeanafonosane kesekeea mafekemarakano aserapo.

<sup>25</sup> Aina ayíáka aporo metakiramo makata koteaka rakirakano wate foaka repo aserapo. Arirakano aporo metakiramo makata koteaka rakisiane, kakama rakianafonosane repo wate foaka aserafapo. Asekeanafonosane, ipu makata koteaka rakisiane keseke repo aseakosapo. Asiamo ipu koteaka rakisiasamo ipu makata rakisiane keseke faserepeakosapo.

## 6

*Aporo hinamo raipa roposaki "Uyáka risikianie." Aisane oyapo.*

<sup>1</sup> Keresoa paosa aporo hinamo raipa roposao, re roposa wafayane hemakapunie. Epo né roposasamo eane hemakapukua, epo someane kakimaka rakinie. Aporo metakiramo

<sup>†</sup> 5:23: Efesase taonea á namo heane watikisaso, aporomanomo neane makata takamarapaka, ipu waene heane wakasema nenapo.

Kotiane mawakasemahokoamo, isiapo some akarane soko watikirareapo, aíyaka hokomakohoamo, re roposa wafayane hemakapunie.

<sup>2</sup> Arirakan aporo raipa roposa wafayane soko Keresoa paoraka, arirakan aporo raipa roposane soko Keresoa paoraka, tati Keresoa paosa aporo maeraka risike, aporo raipa roposamo someraka, "Eto tetákara Keresoa paosasamo epo someane nōmo kaiyakosafapo." Aíyaka hemakapukupo. Teto titi Keresoa paoraka mae hakásasamo epoko wakapuaka rakinie. Keresoa paosa aporo ararehokosakipoko epoko wakapuaka rakinie. Timotio, nōmo some one ipu kakimaka rakisimo some akarane nōmo tisaraka some kakanie.

*Kotafe tisa aporomo rakirane oyapo.*

<sup>3</sup> Kotimo ainane Unihae Yasu Keresomo isuaki tarikia some kasapo. Some kasane aporo metamo aoraka kakimakanafonoraka, arirakan aporo ipi some meta haku some karáka, ipi Koti kekemana some hakasa yinesa someane karanakána.

<sup>4</sup> Aporoamo koarellaera reke e ipiane makáranapo. Makáraraka reke ipi himeteraka nenakamaka makatane hemakapurapo. Aporoamo tafatafaraka somehoko seseraka, tafatafaraka somerane makáranapo. Nenakamaka tafatafaraka somera aeyaka kakanakeraka rerane fasereperapo. Arirakan saperaka rerane soko, mainamareraka somerane soko, topakamaraka hemakapukua somerane soko fasereperapo.

<sup>5</sup> Maiya suamo ipu namina saperaka tafatafaraka risike namina himu hemaka apuramo koteaka hemakapunafonoraka, kakaro someane hemakapurafapo. Koteaka hemakapunafonoraka ipu hemakapuraka "Kotimo ikia kara kekemarakanone, makata kemo kára mora ayapo." Aíyaka hasaka hemakapukua risikinapo.

<sup>6</sup> Arirakan aporo metamo someraka, "Makata su ano mokoaripi," aíyaka hemakapukua rerafaraka epo someraka, "Hauaka wo makata su ano siaraka rekenapo." Aíyaka hemakapura aporoamo Kotiane kekemarakano eane Kotimo makotenapo.

<sup>7</sup> Arirakan ipi kaýiamo hokosa kiri tak apera maiya amo, makata kemo maka yia takaperare? Wae. Makata kemo maka yia takaperafapo. Kau huyaraka takaperapo. Akura maiya amo soko, makata kemo maka hiakosare? Wae. Makata kemo maka hiakosafapo.

<sup>8</sup> Arirakan hauaka wo aporomo fiti tapirane soko, hinamomo nahuri kerane soko, makata nakosane soko, makatane tokeno repo uyáka somehoanie. "Makata su siareapo. Isu seseraka risikinapo." Aihooanie.

<sup>9</sup> Arirakan aporo metakiramo makata kemo kára mokoaripi, aíyaka hemaka apuramo, aporoane sipinamo makata kayaya maka, hea sokoperaka maka apura ayíáka, aporoane maka sokoperaka maka purapo. Maka purakan aporoamo ipi makata watikisane seseraka rakirakan, makata watikisamo e kirimaraka maka purapo. Puraka koteaka hemakapunafonoraka aporo masusamo arakira ayíáka rakiraka i arupukusapo.

<sup>10</sup> Asiamo makata watikisa su kepoane mone himu tumurumo hemakapura ayapo. Aporo metakiramo mone kára hemakapuraka, Kotimo ikia kara á kekemahoanafonoraka, mone mokoako hemakapura ikia kara á kekemarakaka rakipe puraka, namina himu takunine ferepemo karesa akura ayíáka, himuane kuka risikinapo.

*Poremo Timotiaki someraka, "Né paroaka rekeanie," aisane oyapo.*

<sup>11</sup> Timoti, né Keresoa paosa aporopo. Né monemo ikia kara á kekemarakaka purapaka metakarikia takaripunie. Takaripukua ereketae rera ikia kara á kekemarakaka puraka, Kotimo ainane hákasané rakiako hemakapurane soko, eaki himu hakásaraka hemakapurane soko, aporo metane himu tumurumo hemakapurane soko, makata umisa fasereperakano Koti metakarianafononane soko, irirahoanafonoraka tau auaraka rerane soko, ikia kara á kekemarape punie.

<sup>12</sup> Aporomo winiraka makata ropo makosakipoko foaka apura ayíáka, Kotiaki himu hakásaraka hemakapura ikia kara á kekemarape puraka, yaiya rerane makosakipoko foaka apura ayíáka punie. Winiraka makata ropo amara ayíáka yaiya rerane makosapo. Yaiya rekeasimo Kotimo né murikimasapo. Murikimarakanó nōmo someraka "Nōmo Yasuaki himu hakásaraka hemakapukua rekenapo. Epo kakaro someane soko nōmo kakimarakapanapo." Aíyaka aporo suamo kaiyisimo nōmo hufitaeraka somesapo.

<sup>13</sup> Arirakan makata su hitafe arisia amo kepoane Koti ipipo. Asiamo kotimo ipi kakaro somesane Yasu Keresomo Potiase Pairateaki hufitaeraka somesapo. Asiamo Kotiye Yasu Kereso tetapó kaiyisimo Timoti, néaki nōmo someaka marerakanapo.

<sup>14</sup> Fana néaki nōmo some kasane kakimaka rakinie. Kakimaka rakiraka Kotimo some kasane makata watikisayaki hakása sarimahokopo. Yumo rakipe pukua, keseke Unihae Yasu Kereso haru paripeasiraka, tipia area maiya amo, epo somemananeane koaretaehokopo.

<sup>15</sup> Arirakan Yasu paripeaksane, Kotimo ipi maiya te motosa á paurakano, Yasuane hauaka wo paripusie, aihokosapo. Asiamo isiapo Unihae kárane Koti ipi hákasapo. E yano

motosane isiapo makárarakanapo. Makata su unihaeemo unihaeane Koti ipipo. Makata su hokopukua risiramo hokopusuane Koti ipipo.

<sup>16</sup> È ipi hákasa kurafapo. Faesa kára rekeno e area aporo purafapo. Fana eane aporomo asesafapo. Yumo soko aserafapo. E káraraka yaiya wakapuaka rekeno eane nōmo kekererakanapo. Kakaroripo.

*Hauaka wo makata kemo kára mosa aporoaki Poremo somesane oyapo.*

<sup>17</sup> Timotio, aporomo hauaka wo makata kemo kára mokoa risiaki uyáka somehoanie. Né níane makárahokopo. Aporo meta makeferaka rekeakopo. Yokotae moneaki himu hakásaraka hemakapukupo. Maiya metamo mone kakeno soko maiya metamo mone faseneno soko, moneaki himu hakásaraka hemakapukupo. Kotiaki himu hakásaraka hemakapunie. Kotimo makata su ipimenapo. Ipi aeyaka makata kára kasane isiapo seseraka risikiasimo karápo. Eaki himu hakásaraka hemakapunie, aihoanie.

<sup>18</sup> Arirakano koteaka rakinie, aihoanie. Mone káraraka akaya ayíáka koteaka rakirane káraraka rakinie aihoanie. Makata kemoane taeraka umuhokopo, aihoanie. Aporo metakirane soko arareraka, parakuraka kakanie, aihoanie.

<sup>19</sup> Arirakano ape kiakosakipoko ira kesa parosa maponapo. Aina ayíáka né paroaka rekeasimo ira kesa asiane aporo metane arareraka, makata akara ayapo. Hepene apea keseke koteaka rekeakosakipoko, aporo metakirane arareraka, makata kakanie. Ayíáka makata karakanone, né yaiya rerane maka koteaka rekeakosapo, aihoanie. Aíyaka aporo hokopusuaki some kakanie.

*Poremo Timotiaki some meta some kasane oyapo.*

<sup>20</sup> Timotio, Kotimo ipi kakaro someane néaki some kasane asekea rekeanie. Aporo metakiramo Kotiane hemakupurafaraka nenakamaka makatane somerakano, ane kaiyakopo. Aporo metakiramo someraka, "Hemakupura su kepoane oyapo." Aíyaka kotafe somerakano kaiyakopo.

<sup>21</sup> Aporo metakiramo someraka "Makata su kepoane nōmo hemakupurakanapo." Aíyaka someraka rekeno, aporoamo Kotiaki himu hakásaraka hemakupurane epo fasírakanapo. Ayapa. Kotimo re su yaku ararehoasimo nōmo hemakupurakaripo. Timoti, né ayapa. Ano Porepo.

## 2 Timoti

### 2 Timoti sawi one mahemakapukusa someane oyapo.

Poremo Timotiaki sawi meta one kesekeea poparaka makesapo. Arirakano Efesase sésea Keresoa paosa aporo hinamoane Timotimo asekeea reasamo, Poremo Timotiaki sawi one poparaka makesapo. Arirakano Pore Rome sitia tipura apea makesa reamo sawi one popasapo. Poremo ipi hemakapuraka, Rome aporomo ano rukusa maiya ane makerakanapo, aiyaka hemakapusuapo. Asiamo Poremo Timoti ararehokosakipoko sawi one popasapo.

### 2 Timoti sawia some kepo parakuraka popasane oyapo.

1:1-2 Poremo sawi one kepomarekeea popasapo.

1:3-2:26 Makata umisa fasereperakano soko, kotafe hora aporoamo some karakano soko, Timoti ne paroaka reke, kakaro someane some kakanie, aisapo.

3:1-9 Fahokosa maiya ane makeanamo hauaka wo aporo hinamo watikiaka risikiakosapo.

3:10-4:5 Kotimo some popasane kekemaraka himu hakásaraka hemakapukua reke, kakaro koteaka some kakanie.

4:6-22 Poremo ipi hemakapusuane some metakira some kaka faraka, ayaparaka popasapo.

*Poremo Timotiaki sawi meta kesekeea poparaka makesane oyapo.*

<sup>1</sup> Ano Poreane Yasu Keresomo tarira aporo rekeasimo Kotimo ipi hemakapukua ano murikimasapo. Kotimo someraka, "Yasu Keresoaki kataka marekea rekeno yaiya rekeakosapo." Aiyaka Kotimo someaka maresane nōmo somehoasimo, ano Poreane murikimasapo.

<sup>2</sup> Asiamo Timoti, néaki nōmo sawi one poparaka makerakanapo. Né Keresoa paosa aporosasamo, né nōmo hokosa asiapo. Né nōmo kára hemakapurakanapo. Ata Kotimo soko, isiapo Unihae Yasu Keresomo soko, néaki kamenakanane soko, auanane soko, makata yaku ararenane soko kakasimo nōmo hemakapurakaripo.

*Kotiaki suseaka kurikurinane oyapo.*

<sup>3</sup> Nōmo makasa kaua kekemamo Kotipoko rakisia aiyáka, nōmo soko epoko rakirakanapo. Nōmo himura makata watikisa mahamekeea rerafaraka epoko nōmo rakirakanapo. Rakiraka reke eaki nōmo userakanapo. Ereamo soko, maiyamo soko, kurikuriraka reke, néane hemakapukua, Kotiaki suseaka kurikurirakanapo.

<sup>4</sup> Ano purakasu maiya amo, nōmo anopoko hiripurakasuane pipu nōmo hemakapurakanapo. Nōmo né aseako seseripo. Né asera maiya amo ano kára sesehokosapo.

<sup>5</sup> Nōmo Kotiaki himu hakásaraka hemakapukua rekeno nōmo hemakapurakanapo. Nōmo ní hakamape Roisemo Kotiaki himu hakásaraka hemakapukua, arirakano nōmo ní ama Yunisimo soko, Kotiaki himu hakásaraka hemakapusua aiyáka, nōmo soko Kotiaki kakaro himu hakásaraka hemakapurakanapo. Hemakapurakano nōmo asekeea seseripo.

*Ho Kotesamo yaku ararenane Timotiaki kasane oyapo.*

<sup>6</sup> Asiamo nōmo hokonomo né sakaisa maiya amo, Kotimo néaki makata yaku ararena wakapuanne kasapo. Wakapu kasane metakariakopo. Yaku ararena wakapuanne maka maiya suamo rakiraka rekeanie.

<sup>7</sup> Asiamo Ho Kotesamo Kotimo isuaki kasane, himu karekekeea namona hoane kasafapo. Ho Kotesane karáka isuaki wakapuanne soko kaka, metaki himu tumurumo hemakapurane soko kaka, kaumo hemakapusuane rakirapaka koteaka hemakapurane soko kaka, aiyáka kasapo.

<sup>8</sup> Kasasamo Unihae Yasuane nōmo some akara maiya amo karekekeea namohokopo. Unihae Yasupoko ano tipura makesakipoko karekekeea namohokopo. Nōmo Yasuane some kasakipoko ano mokoatikisa aiyáka, nōmo Yasuane some kayane, né soko mokoatikirakano, né himu mahisihokopo. Kotimo ipi wakapuanne nōmo maka rakinie.

<sup>9</sup> Kotimo makata rakirane rakisimo epo isu mafasisiapo. Mafasisasamo makata watikisané kikisiraka epo ipi aporo ira risikiasimo isu murikimasapo. Asiamo isiapo isina makata rakisia akipoko epo isu murikimaka pasimosapo. Epo ipi hemakapukua isu yaku arareraka murikimaka pasimosapo. Asiamo aporo hinamoaki yaku ararenane kakakosakipoko, Kotimo Yasu Keresoane kasapo. Wate fana hauaka wo makata su kepomarekeea rakiasiraka rea maiya amo, Kotimo Yasu Keresoane murikimaka kasapo.

<sup>10</sup> Kasasamo Yasu Keresoane hauaka wo pesapo. Pesasamo aporo hinamoane mafasirakanapo. Mafasisiane isuaki tarisiapo. Arirakano kura wakapuanne epo rukumosaka

tapisiapo. Epo rukumosaka tapikia yaiya rerane kasapo. Asiamo epo some kotesamo isuaki tarisiapo.

<sup>11</sup> Arirakano Yasuane hemakapusimo some kotesane nōmo some kaka, arirakano tisaraka soko tarikia, tarira apororaka soko rakikia, ayikasimo Kotimo ano murikimarakasupo. Murikimarakano epoko nōmo rakirakanapo.

<sup>12</sup> Rakiraka reakipoko, aporomo ano kawe yumo mokoatikiraka tipura makerakano, Keresoane nōmo some kakako ano karekekeua namorakanafapo. Eaki nōmo himumo kataka marekea reke, eane nōmo kakaro hemakapurakanapo. Epo anoaki someraka, "Nōmo someane nōmo some kakanie." Aiyaka epo anoaki makata rakira kasane, epo asekea rekeane siahoasireapo. Yumo soko, keseke maiya fahokosa sere á pauhokosakipoko tipia apuramo soko, epo anoaki makata rakisimo aisane asekea rekeane siahoasireapo. Asiamo ano siaraka rekenapo.

<sup>13</sup> Yasumo ikia kara ereketaeane nōmo kekemarape pusimo, kakaro some kepoane, nōmo, Timoti, néaki some kasapo. Some kasane kakimaka yaiya rekeanie. Yasu Keresoaki kataka marekea reke, himu hakásaraka hemakapukua, aporo metakirane soko nōmo himu tumurumo hemakapunie.

<sup>14</sup> Arirakano Ho Kotesane isu himua rekerakano, epo ipi yaku ararena wakapu kotesane nōmo maka, Kotimo makata rakisimo néaki kasane, nōmo koteaka asekea reke rakinie.

<sup>15</sup> Esea hauaka aporo suamo ano metakarikia patera tarikia, aporo yano motosa Fisérusepe soko Hemósenese tetapō soko, ano metakarisapo. Aporo suamo ano metakarisiane nōmo kaisiapo.

<sup>16</sup> Arirakano ano tipura rekeno asekea, aporo meta Onésiforusemo karekekeua namonafaraka, maiya káramo epo ano masesehoko pesapo. Asiasamo eane soko epo ipi ape aporo hakasa risiane soko, Unihae Kotimo kamenakaraka asekea rekeasimo hemakapurakaripo.

<sup>17</sup> Arirakano Onésiforuse Rome apea kimisi pesa maiya amo, epo ano kope perakasupo. Kope pekea ano aseraka, ano tipura rekeno epo karekerafaraka, ano ararerakasupo.

<sup>18</sup> Araresasamo fa ana maiya amo, Unihae Kotimo e kamenakahoasimo nōmo hemakapurakaripo. Arirakano fana Efesase taonea soko epo ano kára ararerakasupo. Araresane nōmo soko hemakapurakanapo.

## 2

"Yasu Keresomo ame aporoane népo." Aisane oyapo.

<sup>1</sup> Timotio, né nōmo hokosa asiapo. Nōmo Yasu Keresoaki kataka marekea reke, Yasu Keresomo né yaku araresasamo, nōmo wakapuaka rakiraka rekeanie.

<sup>2</sup> Aporo suamo kaiyisimo, nōmo some kára some kasane, nōmo kaisiapo. Some kaisiane, Yasu Keresoaki himu hakásaraka hemakapura aporoaki, nōmo tisaraka some kakanie. Someane ipu kaikia, ipu aporo metakiraki some kakasimo, nōmo iaki some kakanie, aihoanie.

<sup>3</sup> Yasu Keresomo ame aporo kotesa asiane népo. Makata umisa fasereperakano, ame aporomo rakiraka rera ayíáka, néaki soko makata umisa fasereperakano, Keresopoko paroaka rakiraka rekeanie.

<sup>4</sup> Arirakano aporo amea paorakano ame aporomo rakira ayíáka epo rakirapo. Ame aporomo yunu aporoaki weraka, ape aporomo makata rakira akiyaki hakasa sarimaraka rakirafapo. Asiamo ame aporo satinimo sesehoasimo ayíáka amea paoraka rakiraka koteaka rakirapo.

<sup>5</sup> Aina ayíáka aporo fohokosakipoko karoraka risikino someraka, "Enonosa metakarikia fe taku anaka pukupo. Enonosa tipi anaka punie." Aiyaka somemane motosane aporomo kakipayaraka ipi hemakapukua mokome purakano makata ropo<sup>\*</sup> marafapo.

<sup>6</sup> Aina ayíáka aporomo hemo wafororaka tokoraka, hemoa makata maposane tanuheka, parurakano, hemo wafayamo ipi fana mokoa nenapo.

<sup>7</sup> Asiamo some one nōmo some karakano, Timoti, nōmo kakimaka hemakapunie. Some one kepoane nōmo hemakapusimo, Unihae Kotimo né ararehokoso.

<sup>8</sup> Asiamo nōmo Yasu Keresoane hemakapunie. Kini Tefetemo aporo ira wainepe pesa á Yasu takapesapo. Takapekeua reke makata rakiraka nina kusuapo. Kusuane Kotimo maturikia taesapo. Maturikia taerakano Yasu turikia pusuané nōmo some karakanapo.

<sup>9</sup> Arirakano Yasuane nōmo some karakano aporomo ano mokoatikirakasupo. Aporo metamo aporo meta rurakano, anekeapomo hokonoa rukua karona ayíáka, ano rukua karosapo. Ano amano ane rukua karoraka matasosapo. Matasosa ayíáka Kotimo someane ayíáka matasonafapo.

\* 2:5: Makata ropoane ira ku hahaeraka hatisané karotapirapo. Karotapirakano aporo metakiramo aseraka someraka, "Aporoane aporo kárapo," airapo.

<sup>10</sup> Matasohoanafonosasamo Kotimo aporo hinamo murikimasane mafasiakosakipoko, ano tipura reke ano mokoatikirakan soko hisirakanafapo. Asiasamo Yasu Keresoaki kataka marekea rea aporo hinamoane Kotimo faesa á yaiya risikiakosapo. Kotimo faesa á yaiya risikiasimo, ano mokoatikirakan soko siapo, airakanapo.

<sup>11</sup> Hao, kaisie, kakaro someane oyapo. “Isu Yasuyaki hakása kusuasamo eyaki hakása yaiya risikiakosapo.

<sup>12</sup> Isu mokoatikirakan soko, e metakarianafonoraka, eyaki hakasa unihaeaka risikiakosapo. Iсиапо и е сарапо, аиракано, епо соко исуаки, ре номо асерапо, аиходосапо.

<sup>13</sup> Aiyaka epo some kasane, isiapo metakarirakan, epo someane epo metakariakosafapo. Makata ayiakakosaposane kakaro su yanapo. Epo ainane kotafe horafapo. Epo ayiakakosapo, aiyaka somesane metakarikia some meta somerafapo.” Aiyaka popahoareapo. Popasane kakaro someapo.

*“Kotafe tisa aporomo someane nōmo kakimarafaraka né uyáka rekeanie,” aisane oyapo.*

<sup>14</sup> Nōmo some sawia popana one, aporo suamo hemakapusimo, some kakanie. Kotimo aserakan soko nenakamaka someane tafatafaraka somehokopo, aihoanie. Nena some tafatafaraka somesane, aporo metamo kairakan, aporoane aporo tafatafaraka somesa amo ararehokosare? Wae. Ararehokosafapo. Aporo metamo kairakan eane tafatafaraka somenamo mokoatikinapo.

<sup>15</sup> Timoti, né, Kotimo makata rakira aporo reasasamo nōmo wakapuaka koteaka rakinie. Koteaka rakirakan Kotimo néaki sesehokosapo. Asiamo nōmo makata rakiakosane karekekeea rerafaraka, Kotimo kakaro some kotesane ereketae susu some karakan ane, Koti hikumisia né kaíyahokosafapo.

<sup>16</sup> Aporo metakiramo Koti metakarikia, namina hemakapusua me rukua someraka risikino, nōmo metakarikia koaraka punie. Koti metakarikia me rukua somerakan, someane aporo metamo kakimarakanone, Kotimo ikia kara purafaraka Kotiane koaraka ikia kara meta pukusapo.

<sup>17</sup> Ipu namina hemakapusua me rukua somerakan, someane aporo metamo kakimarakano, aporoane siwaomo nekea mokoatikina aiyáka, someamo aporo kaisiane aiyáka, mokoatikirakanapo. Arirakan tafatafaraka nenakamaka somera tisa aporo tetáne, meta yano motosa Himeneuse, meta Firetuse tetápo.

<sup>18</sup> Tetápo kakaro ereketae somerane metakarikia, kotafe someraka, “Isu maturikia taesa maiya ane fasapo.” Aiyaka somerakan, someane Keresoa paosa aporo hinamo metakiramo kakimarakana, mahimeteraka risike, Kotiaki himu hakásaraka hemakapurakanafapo.

<sup>19</sup> Arirakan Kotimo kakaro someane yaiya rekenapo. Kotimo kakaro someane ira kesa parosa maposane hohohoanafonoraka wakapuaka area aiyáka paroaka rekenapo. Ira kesa á poparaka, “Unihae Koti ipia paosa aporo hinamoane ipi aseraka hemakapurao.” Aiyaka popasapo. Arirakan makata meta soko popasane oyapo. “Ano Unihae Yasuane patera aserakanapo. Aisa aporo hinamo repo watikisane metakarinie.” Aiyaka popasapo.

<sup>20</sup> Ape kára kakarua tisi soko, meraki soko, kapo soko, yakai tokenapo. Metane siufa maka meraki rakikia, meta koróto maka meraki rakikia, meta ira maka ira sorakae rakikia, meta ororo maka meraki rakikia, aiyáka rakikia taenapo. Meraki kapo taenane, metakira siufa soko, koróto soko, kakaro kotesane kikisiraka hakua taeraka, aporo kimisi apera maiya amo, meraki kotesane maka makata nakosa taeraka nenapo. Metakira kakaro kotehoanafonosane ira sorakaea soko ororo merakia soko, maiya suamo makata taeraka nenapo.

<sup>21</sup> Aina aiyáka aporomo ipi watikiaka rakisiane rukupateraka himuane kosoraka rekeno, eaki “Makata kára kotesa rakira rakinie.” Aiyaka Unihae Kotimo mareakosapo. Meraki kotesane kikisiraka hakua taena aiyáka, aporo kotesane Unihae Kotimo kikisiraka hakua murikia “Makata kára kotesane rakinie.” Aiyaka murirapo. Arirakan makata kára kotesa rakiako hemakapura aporoamo ipi watikisane kakaro metakarikia, ipi Unihae Kotimo makata rakirane koteaka rakiako hemakapurao.

<sup>22</sup> Timotio, hokosa rauamo ipi kaumo hemakapusuane kaikia rakira aiyáka nōmo rakiakopu. Kaumo hemakapusuane metakarikia, ereketaeraka reke, Kotiaki himu hakásaraka hemakapukua, aporo metane himu tumurumo hemakapukua reke, weako hisiraka, aiyáka rekeako hemakapukua rekeanie. Aiyáka reke aporo himu koteaka hemakapukua Kotiaki wáraka risira aporo akiyaki kikinaraka rekeanie.

<sup>23</sup> Nōmo hemakapuraka tafatafaraka risiane, keseke aporoamo saperaka weakosapo. Asiamo aporomo koteaka hemakapurafaraka, nenakamaka tafatafaraka somerakan, aporoane metakarikia koaraka punie.

<sup>24</sup> Unihae Kotimo aporo raipamo saperaka tafatafaraka risikiane siahoasifareapo. Kotimo aporo raipamo aporo suaki koteaka hemakapukua ararenapo. Tau koteaka tisaraka tarikia some karápo.

<sup>25</sup> Some kayane ipu kaiyako hisiraka waerakano asekeea, Kotimo aporo raipamo tau auaraka maroponapo. Maroporaka ipu makata watikisane rakiako hisiraka hemakapurane soko, kakaro someane kakimako hemakapurane soko, Kotimo iaki kakasimoripo, aíyaka nómó hemakapunie.

<sup>26</sup> Kakaro someane kakimako hemakapurane Kotimo iaki karakano, i pokoa he fesa kesaka risia tonotaeana ayíáka, i Satanemo pasimosane Kotimo tonotaehoasimoripo, aíyaka hemakapunie. Arirakano fana Satanemo iane pasimokoa epo ipi hemakapusuane iaki kasapo. Kasasamo ipu kakimaka himu mahimeteraka risiapo.

### 3

*Fahoko ana maiya amo makata faserepeakosane oyapo.*

<sup>1</sup> Makata one hemakapunie. Fahoko ana maiya amo makata umisa watikisane kára faserepeakosapo. Makata umisa faserepeakosane oyapo.

<sup>2</sup> Asiamo fahoko ana maiya amo aporo hinamomo soko, hokosamo soko, suamo watikiaka rakiakosapo. Asiamo aporomo makata suane, "Nōmo nímenapo," aíyaka taeraka umuraka, aporo metaki kakakosafapo. Arirakano "Makata su nōmo ní mokoaripi," aíyaka hemakapukusapo. Arirakano e ipi yano motosane rupiraka makárahokosapo. Arirakano aporo metane asekea makefehokosapo. Arirakano aporo metaki mainamareakosapo. Arirakano ipi ata ama tetapō someane koaretaehokosapo. Arirakano suseaka somehosafapo. Arirakano Kotiane soko metakariakosapo.

<sup>3</sup> Arirakano aporo metakiraki himu tumurumo hemakapukusafapo. Arirakano aporo suaki himu mahisiraka sapesane fahokosakipoko api karakano asekeea, makosafapo, sapese soko fahokosafapo, yaiya rekeakosapo, aihokosapo. Arirakano aporo metane hokomako hemakapurane soko, weako hemakapurane soko, fahokosafapo. Ayíáka irirarakaa rekeakosapo. Arirakano makata kotesane asekea hisihokosapo.

<sup>4</sup> Arirakano ipu namina aporo táké nine parakehokosapo. Arirakano ipu namina hemakapusua hákasa aeyaka rakiakosapo. Arirakano ipu namina yano motosane makárahokosapo. Arirakano nenakamaka mokome enaraka koraka tokoako seseraka Kotiane hemakapukusafapo.

<sup>5</sup> Kotiane kaumo kekemaraka rakiraka, eaki akai susumo yaiya wáraka reke, Kotimo wakapuaka rakirane ipu asekea yia someraka, "Kotimo wakapu rekenafapo," aihokosapo. Aiyaka Kotiane kaumo kekererehokosapo. Timotio, aporo ayíáka rakiraka risikino asekea, aporoane koaraka metakariakia punie.

<sup>6</sup> Arirakano aporo metakira ayíáka risiane kema ape meta á yorokoa pukua, some kaka, ayíáka kema ape meta á soko yorokoa pukua, some kaka, ayíáka some kasane hinamo mahimeteraka toamo kakimakasimo, some kakako yorokoa purapo. Ipu hemakapusuane hinamoamo kekemahoasimo yorokoa some karápo. Some karakano hinamoamo himu mahimeteraka koteaka takekeaa hemakapunafonoraka toke ipu watikisane makata fato ayíáka ripape hiakosakipoko hemakapuraka, aporo metamo somerakano á kekemarakan, aporo metamo somerakano soko á kekemarakan, ayíáka mokome hemakapukua torapo.

<sup>7</sup> Hinamo ayíáka toamo makata kaweanne enomako seserakanapo. Aisa nine kakaro someane ipu takekeaa hemakapurafapo. Hemakapunafonorakan ipu kema apea aporo watikisa yorokoa some kakako purapo.

<sup>8</sup> Ayíáka aporo tetá yano motosa meta Yánese, meta Yámipirisi,\* tetapō koaretaeraaka Moseseaki yunuraka risia ayíáka, aporo watikisa risiamoo kakaro someaki yunuraka risikinapo. Yunuraka risike, ipu himumo makata watikisa susu hemakapuraka risike, Kotiahi himu hakásaraka hemakapurane metakariasiapo.

<sup>9</sup> Arirakano aporoamo kotafe rakirane, aporo suamo aseraka "Masuarareapo." Ai-hokosapo. Airakano ipu rakirane rakikia rosaka taehokosafapo. Aina ayíáka wate fana Yánesepé Yámipirisi tetapō makata rakisiane aporo suamo asekea hemakapuraka, "Tetapō ainane kotafehoareapo. Tetapō kotafe rakirane masuarareapo," airakano makata rakirane kakaro rosaka taesafapo.

*Poremo Timotiaki someaka maresane oyapo.*

<sup>10</sup> Kotimo someane nōmo tisaraka some kasane, Timoti, nōmo kaisiapo. Nōmo ainane soko, nōmo asesapo. Nōmo Kotiane kekemaraka rekeako hemakapusuane soko, nōmo

\* **3:8:** Wate fana Yu aporo sisimamo uyáka somesapo. Iyipi aporo tetá, meta Yánese, meta Yámipirisi, tetá, ho kamuna aporopo.

hemakapurakanapo. Nōmo Kotiaki himu hakásaraka hemakapurane soko, iriraraka somehoanafonoraka tau auaraka hemakapurane soko, aporo metaki kamenakaraka hemakapurane soko, makata umisa fasereperakano nōmo yaiya rakiraka rerane soko,

<sup>11</sup> ano mokoatikirakano soko, ano kau tesane soko, anoaki makata waforona maresane soko, nōmo hemakapurakanapo. Anitioka taonea soko, Aikoname taonea soko Risisitara taonea soko, ape á aporomo ano kakaro watikiaka mokoatikisane, Timoti, nōmo hemakapurakanapo. Aporomo ano mokoatikirakano yia, Kotimo ano mafasiasiane nōmo hemakapurakanapo.

<sup>12</sup> Arirakano Yasu Keresoaki kataka marekea risia aporo hinamoane, aporo metakiramo mokoatikihokosapo. Makata ane hemakapunie.

<sup>13</sup> Arirakano mokoatikiana aporoamo soko, kotafe somera aporoamo soko, fana wakasema watikiaka rakiakosapo. Amo tipiyia wakasema káraraka watikiaka rakiakosapo. Amo keseke namo kakaro kára watikiaka rakipe pukusapo. Metakiramo mahimeteraka, ikia kara watikisa á pusimo kotafe some karaka, i namina nine soko mahimeteraka, ikia kara watikisa á purakanapo.

<sup>14</sup> Asiamo Timotio, kakaro someane néaki tisaraka some kasane nōmo kakimaka enomasapo. Enomasane yaiya hemakapuraka rekeanie. Nōmo tisamo<sup>†</sup> ainane nōmo hemakapurakanapo.

<sup>15</sup> Né hokosa rea maiya amo Kotimo sawia popasane néaki some kasapo. Asiamo aporo hinamomo Yasu Keresoaki himu hakásaraka hemakapurakano Kotimo mafasiasimo, Kotimo sawiamo tarirapo. Aporo hinamomo koteaka hemakapusimo Kotimo sawiamo tarirapo.

<sup>16</sup> Kotimo sawi sua popasane Kotimo ipi somerakano kaisia aporomo popasapo. Kotimo sawia popasane aporo hinamo suamo kakaro someane enomakasimo popasapo. Arirakano, "Makatane watikisapo. Ayiakakopo." Aiyaka tariraka makata watikisane metakarisimo, Kotimo someane sawia popasapo. Arirakano hasakasane maropohoasimo popasapo. Arirakano koteaka ereketae susu rerane Kotimo someamo hokotakeasimo popasapo.

<sup>17</sup> Asiamo Kotipoko rakira aporo hinamomo siaraka wakapuaka hemakapukua, Kotipoko koteaka rakira susuane rakisimo Kotimo sawia popasane menoraka kekemaraka rakinie.

## 4

"Timoti né uyáka rekeanie." Aisane oyapo.

<sup>1</sup> Yasu pariperaka unihäeraka area maiya amo aporo su kukua kesane soko, aporo hitafe risiane soko, epo takekea parakuhokosapo. Ayiakakosasamo nōmo some akara one kakimakanie. Kotipe Yasu Kereso tetapō isu aserakano, nōmo néaki paroaka someaka marerakanapo.

<sup>2</sup> Aporo hinamomo Yasuane hemakapusimo Kotimo someane nōmo uyáka some kakanie. Aporo hinamomo kaikia seserakano soko, hisirakano soko, nōmo yaiya some kakanie. Arirakano watikiaka rakira aporoaki, "Ayiakakopo," aihonie. aporo hinamomo watikiaka rakirakano nōmo maropohoanie. Arirakano aporo hinamo koteaka risikiasimo, nōmo some kaka ararehoanie. Arirakano aporo hinamomo makata kotesane enomakasimo tau auaraka tisaraka some kakanie.

<sup>3</sup> Arirakano keseke kakaro someane tisaraka some karakano, aporo hinamomo kaikia hisihokosapo. Ipu namina hemakapusuane kekemaraka tisa metaki soko, "Isu tariako peanie." Aiyaka tisa metaki soko, "Isu tariako peanie." Airakano tisa aporo yakaimo iane maseseraka some kakakosapo.

<sup>4</sup> Arirakano aporo hinamomo kakaro someane kaikia kakipayaraka metakarikia, aporo sisimamo wate asiapakae, aiyaka some kepo rakupe pesane<sup>\*</sup> kaikia kekemahokosapo.

<sup>5</sup> Asiamo Timotio, né maiya suamo ikia kara kotesa á punie. Né mokoatikirakano, himu he keeka namoraka rekeakopo. Yasuane aporo hinamomo hemakapusimo some kotesane some kakanie. Aporo raipamo arakira ayiáka nōmo soko Kotipoko ayiáka rakikia makanie.

<sup>6</sup> Maiya omo ano hauaka wo reane metakarikia kukusapo. Ano kukusa maiya ane makepo. Fana pirisiti aporomo saro ponomakau rukua, yapiane masakurikia Kotiaki kasa ayiáka, aporomo ano rurakanano yapiane nōmo Kotiaki kakakosapo.

<sup>7</sup> Aporomo marokehoko foaka wafororaka apura ayiáka, nōmo Kotipoko koteaka rakiraka wafororaka rakipe pusuapo. Rakipe pukua enonoa naosapo. Asiamo nōmo Kotiaki fana himu hakásaraka hemakapusuane, yumo soko yaiya hemakapuraka rekenapo.

<sup>†</sup> **3:14:** Timotimo kalyia soko, ipi hakamape soko, Pore soko, i Timotimo tisane ayapo. \* **4:4:** Terakaiya matoa kesaka reamo some rakupe pesa asiapo.

<sup>8</sup> Ano ereketae susuraka reasasamo anopoko makata ropo murikimaka motosapo. Motosane Unihae Yasu ipi pariapera maiya amo anoaki makakosapo. Kepo hemakapukua maropona aporoane Yasu ipipo. Epo kakaro ereketaeraka susu maroponapo. Anoaki soko aporo hinamo e perakarihoamo seseraka kau risiaki soko isu suaki makata ropo kakakosapo.

*Poremo Timotiaki ayapasane oyapo.*

<sup>9</sup> Ano area wo foaka peanie.

<sup>10</sup> Arirakano Témasesmo hauaka wo makatane kára hemakapuraka ano metakarisiapo. Metakarikia Tesaronaeka taonea pusuapo. Arirakano aporo meta yano motosa Kerésenese ipi Karésia hauaka á pusuapo. Arirakano aporo meta yano motosa Taetase ipi Taomésia hauaka pusuapo.

<sup>11</sup> Arirakano Rukiane anoyaki hákasa rekenapo. Makamo ano arareraka rakisimo pasimaka peanie.

<sup>12</sup> Aporo meta yano motosa Tíkikaseane nōmo Efesase taonea pusiesapo.

<sup>13</sup> Arirakano nōmo inu pasu Toróase taonea aporo Kapasemo apea motokoa meraruraka pesane, né apera maiya amo nōmo inu pasuane soko, nōmo sawiane soko maka peanie. Arirakano nōmo saro sipi kau sawiane soko maka peanie.

<sup>14</sup> Arirakano Arekesáta ipi makata auri rakira aporo, epo ano kára mokoatikisapo. Epo ipi rakisia yaiya Kotimo soko ipiaki ayiakakosapo.

<sup>15</sup> Asiamo isiapo some kasane, epo rukumosaka tapisiasamo e area pukupo.

<sup>16</sup> Fana hukurusua maiya amo ano tipura makerapaka tafáraka somerakano, aporo suamo ano patera asesafápo. Aporo suamo ano metakarisiapo. Metakarisia akipoko Kotimo hemakapukua rerapaka Kotiaki kurikurirakanapo.

<sup>17</sup> Asiāne hukurusua maiya amo, Unihae Kotimo ano metakarisiafápo. Anoaki epo wakapu karakano, Yu aporohoanafonosamo kaiyisimo Kotimo some suane nōmo siaraka some kasapo. Saro raeonemo akaimo ano rukunenapaka, Kotimo ano mafasisiapo.

<sup>18</sup> Arirakano makata watikisa suamo ano marapaka, Kotimo ano yaiya mafasiakosapo. Mafasikia e hepene yapura unihaeaka area á ano pasimaka karikia hiakosapo. Akipoko maiya suamo nōmo eane makáraraka kekereraka someraka, "Né faesa kárapo," airakanapo. Kakaroripo.

<sup>19</sup> Pirisírape Akuwíra tetáki ayaparakasapo, aihoanie. Onésiforuse soko ipi ape hakasa aporo hinamo hokosa su risiaki ayaparakasapo, aihoanie.

<sup>20</sup> Aporo yano motosa Erásataseane Korini apea parisapo. Arirakano Mairítase taonea aporo meta yano motosa Torófímase ipi makata takamasane, nōmo metakarikia pesapo.

<sup>21</sup> Asiamo né foaka peanie. Yakaru kára apera maiya amo né peane siahoasifareapo. Yakaru kára peasiraka maiya yumo né peanie. Yúpuruse anoyaki reke, reaki aya-parakanapo. Pútenesemo soko, Raínasemo soko, Korótiamo soko, kakimara aporo hinamo metakiramo soko, ipu suamo reaki ayaparakanapo.

<sup>22</sup> Timoti, ne hoane Unihae Kotimo asekea rekeasimo hemakapurakaripo. Re su Kotimo yaku arareraka makotehoasimo nōmo hemakapurakaripo. Timoti, né, ayapa. Ano Porepo.

## Taetase Taetase sawi one mahemakapukusa someane oyapo.

Sawi one Poremo Taetaseaki poparaka makesapo. Taetase ipi Kiriki aporo reke epo Poreane araresapo. Poremo Taetaseaki Kotimo someane somerakano Taetasemo kakimasapo. Arirakano Pore kimisi puraka Yarusarame sitia hisia maiya amo, Taetase soko karikia hisiapo. Arirakano yape tetamo Taetasemo Poreane ararehoko Korini taonea pusuapo. Maiya metamo Porepe Taetase tetu Kiriti he tonoa pukua, Kiriti aporo hinamomo Yasuane hemakapusimo some kasapo. Some kaka wakasema nina Poremo he tono ane metakarikia pukusakipoko Taetaseaki someraka, "Keresoa paosa aporo hinamo wo risiane, nōmo asekea rekeanie," aisapo. Asiamo keseke Taetasemo aporo hinamoane koteaka asekea rekeasimo Poremo Taetaseane arareraka sawi one poparaka makesapo.

Yasu kusua turikia puraka hepene yapura hisiakipoko, keremisi tetu tu (32) faraka, Poremo sawi one popasapo. Pore Korini taonea reke, sawi one Taetaseaki poparaka makesapo.

### **Taetase sawi one parakusane kepoane oyapo.**

1:1-4 Some kepomarekea popasapo.

1:5-9 Kotimo aporo hinamoane asekea risira aporo murikimokoakosakipoko ipu ainane asekea, koteaka takekeea murikimokoanie.

1:10-16 Kotafe tisaraka somera aporoane maropohoanie.

2:1-10 Keresoa paosa aporo sisimamo soko, hinamo sisimamo soko, hokosa rauamo soko enomakasimo Poremo some kasapo.

2:11-15 Kotimo isuane araresasamo isu koteaka risikiasimo Kotimo aina amo tarirapo.

3:1-8 Koteaka risikiakosa someane oyapo.

3:9-11 Repo Kotimo someane metakarisimo aporo metakiramo kirimaraka somerakano repo matasohoanie.

3:12-15 Ayapa aiyaka popasapo.

*Poremo Taetaseaki sawi poparaka makesane oyapo.*

<sup>1</sup> Ano Poremo sawi one poparaka makerakanapo. Nōmo Kotimo makata rakirane rakismo ano murikimasapo. Yasumo ainane tarisimo ano tarira aporo murikimasapo. Kotimo murikimasa aporo hinamomo Kotiaki ereketae hemakapusimo ano murikimarakano nōmo reane arareraka tarirakanapo. Kotimo kakaro someane ipu suamo hemakapusimo nōmo some karakanapo. Kakaro someane kaikia Kotimo ainane kekemahoasimo nōmo reane arareraka tarirakanapo.

<sup>2</sup> Asiamo Kotimo some kasane kakimara aporo hinamomo hemakapuraka, "Isu Kotiyaki aiyaka risikiakosapo," aiyaka hemakapurapo. Kotimo ipi kotafe somerafapo. Wate fana hauaka one soko ti yapurane soko rakiasiraka Koti ipiaki paosa aporo hinamoane eyaki yaiyi risikiakosapo, aiyaka kakaro somesapo.

<sup>3</sup> Someaka marekea ipi hemakapusua anaka epo murikimasa maiya amo, someane Kotimo ipi makata rakira aporoaki kakama tarisiapo. Tarisiane aporo hinamomo kaiyisimo makata rakira aporo repo some kakanie, aisapo. Aiyaka ipi someane aporo hinamoaki somehowasimo ano soko murikimasapo. Ano murikimasa Kotiamo isuane mafasirapo.

<sup>4</sup> Taetase, néaki nōmo sawi one poparakanapo. Kotimo some kasane nōmo kakimasa aiyáka nōmo soko kakimasasamo né nōmo hokosa asiapo. Kotiane isiaipo Atapo. Arirakano Yasu Keresoane isu Mafasira Aporopo. Tetapō né kamenakaraka ararenane soko, né mapiraraka rekeasimo ararenane soko, aiyakasimo nōmo kurikurirakanapo.

*Asekea risira aporomo ainane oyapo.*

<sup>5</sup> Taetase, nōmo né Kiriti he tonoa metakarikia ano pukusakipoko nōmo neaki someraka, "Etapo makata rakisiane rakikimasafapo. Asiamo né yia reke rakikimakanie. Ape sumu sua Yasu Keresoa paosa aporo hinamo asekea risikiakosa aporoane" murikimokoanie." Aiyaka nōmo neaki someaka marekea ano pesapo.

<sup>6</sup> Aporo murikimokoakosane uyáka risiane murikimokoanie. Makata suane asekea takekeea aiyáka murikimokoanie. Aporo hinamo hikumisia makata watikiaka rakiana-fonorakan eane aporo metamo hokomarafapo. Arirakano ipi hinamo hakásá arumaka reke, ipi hinamoane hemakapukua rerapo. Arirakano ipi hokosamo soko Yasumo someane kakimaka risike, arirakano ipi maeyamo soko hinamo hokomarekea somehoanafonona, arirakano ipi farayamo soko aporo mokotokohoanafonona, arirakano ipi

\* <sup>1:5:</sup> Asekea risira aporoane paseto aporo ayapo.

hokosane aporo hinamo metamo hokomakanafonona, arirakano hokosa amo koaretaenafaraka koteaka risira, hokosa amo wafayane murikimokoanie.

<sup>7</sup> Ayíáka asekea risira aporomo Keresopoko Keresoa paosa aporo hinamoane asekea risirapo.<sup>†</sup> Asekea risira aporomo watikiaka rakianafonorakano eane hokomarafapo. Asiasamo asekea risira aporo ayíáka risike aporo murikimayane siahoasireapo. Epo ipiane makama fanahoanafonoraka aporo metakiramo hemakapusuane soko kaikia, arirakano ipi foaka sapehoanafonoraka, arirakano ipi he watikisa nekea rekeanafonoraka, arirakano aporo metane foaka runafonoraka, arirakano mone kára mokoako hemakapunafonoraka ayíáka risira aporoane murikimokoanie.

<sup>8</sup> Arirakano aporo kimisi perakano tereraka pasimaka, arirakano makata koteaka susu hemakapukua risike, arirakano koteaka hemakapukua rakikia risike, arirakano makata watikisane kikisiraka Kotiaki himu hakásaraka hemakapurane makama fanaraka risike, arirakano kaumohemakapusuane makama kesekeraka himumo koteaka hemakapurane makama fanaraka risike, ayíáka risira aporoane murikimokoanie.

<sup>9</sup> Kakaro someane fana eaki some kasane, kakimaka reke, epo aporo hinamo metakiraki some ereketaesane some kaka, arirakano koaretaena aporo hinamoaki soko maroporaka some kaka, ayíáka rakira aporoane murikimayane siahoasireapo.

*Kiríti aporomo kotafe some kaka risiane oyapo.*

<sup>10</sup> Kiríti aporomo watikiaka risirasamo nömo asekea risia aporo kotesane murikimokoanie, aisapo. Asiamo Kiríti aporo yakaimo kakaro someane koaretaeraka, ipu namina nena some koaka marekea kotafe somerapo. Some koaka marekea aporo metakiraki kirimaraka somerapo. Ipu Yu aporomo somemanane “Kau hahaeraka patehoanie,” ayíáka somemanane kekemaraka aporo metakira kirimaraka somerakano mahimeterapo.

<sup>11</sup> Asiamo ipu kotafe someane somehokoamo re asekea risira aporomo iane matasohoanie. Ipu kotafe someane some kakafunufapo. Asiane kotafe someane some karápo. Kotafe some karakano ape hakásia risia aporo hinamo hokosa suamo kaikia, kakaro someane metakarirapo. Metakarirakano asekea mone kára mokoako hemakapuraka kotafe someane karápo. Mone kára mokoako kotafe someane tisaraka some karaka kaiyahoafunureapo.

<sup>12</sup> Arirakano fana Kiríti aporo yano motosa kára reamo someraka, “Kiríti aporomo namina yia kotafe someraka risirapo. Yasaromo irirana ayíáka irirarakaa risike, aporoamo aporo metane ainapo. Ipu makata kára nako sesesa nine makata nenane makosakipoko ipu makata rakirafapo. Yaku mako hemakapurapo.” Aiyaka Kiríti aporomo ainane Kiríti aporo hakásia metamo somehareapo.

<sup>13</sup> Hao, kaisie. Aporoamo somesane kakaro yanapo. Asiasamo kotafe somesane Keresoa paosa aporo hinamomo kakimarapaka, iane maroporaka wakapuaka tarinie. Kotimo kakaro someane ipu kakimaka paroaka risikiasimo nömo koteaka tarinie.

<sup>14</sup> Arirakano Yu aporo sisimamo wate fana ainapakae, ayíáka some rakupe pesane<sup>‡</sup> kakimakopo. Kakaro some koaretaena aporoamo namina hemakapusua somemanemotosane kakimakopo.

<sup>15</sup> Aporo hinamo koteaka risiamo hemakapuraka makata metamo soko metao, makata anenamo soko metao, iane mokoatikinafapo, ayíáka hemakapurapo. Arirakano aporo hinamo watikiaka risiamo ipu Yasu Keresoaki himu hakásaraka hemakapunafonoraka risiamo hemakapuraka makata suamo iane makotenafapo, ayíáka hemakapurapo. Asiamo ipu makata watikisane oyapo, makata kotesane oyapo, ayíáka takekeha hemakapurafapo. Ipu watikiaka rakiraka yia, iane kaíyanafapo.

<sup>16</sup> Ipu someraka, “Kotiane isiapo kakaro hemakapurakanapo,” aisa nine ipu yaiya watikiaka rakiraka risirapo. Arirakano Kotimo someane ipu koaretaeraka, Kotimo hisisa makatane ipu rakiraka risirapo. Ipu koteaka rakiako hemakapurafapo. Asiamo koaretaena aporo hinamomo makata kotesane hemakapukua rakiasifareapo.

## 2

*“Keresoa paosa aporo hinamoane uyáka risikianie,” aisane oyapo.*

<sup>1</sup> Kiríti aporomo kotafe somerakano yia nömo kakaro someane some kakanie. Some karaka Keresomo makata ainane soko makata rakirane soko some kakanie.

---

<sup>†</sup> 1:7: Asekea risira aporo popasa asiáne tikone aporomo ainane ayapo. <sup>‡</sup> 1:14: Wate fana mano hora asiapo.

<sup>2</sup> Aporo sisimaki úyaka some kakanie. "Himu maparitaenapaka he watikisa nakopo. Né yano motosane kotesapo, aihoasimo koteaka risikianie. Arirakano koteaka hemakapunie. Kaumo hemakapusuane makama kesekeraka, himumo koteaka takekeaa hemakapurane makama fanaraka ayíáka risikianie. Kakaro someane kakimaka himu hakasaraka hemakapunie. Kotiaki himu tumurumo hemakapunie. Makata umisa fasereperakanoo paroaka hemakapukua Kotiaki hemakapusuane rosaka taehoko hemakapunie." Aíyaka aporo sisimaki some kakanie.

<sup>3</sup> Aporo sisimaki some kasa ayíáka hinamo sisimaki soko úyaka some kakanie. Kotiaki hemakapukua koteaka tokoanie. Ayíáka toke aporo hinamo metane hokomaka some-hokopo. He watikisamo re kirimarakano, nariraka hemakapurapaka paroaka tokoanie. Makata kotesa susu ainane hinamo metakiramo enomakasimo repo koteaka susu tariraka tokoanie.

<sup>4</sup> Hinamo sisima, repo hinamo aporo aseane maropohoanie. Ipu namina aporo pusuaki soko, hokosaki soko, himu tumurumo hemakapusimo maroporaka some kakanie.

<sup>5</sup> Kotimo someane aporo hinamo metamo mawakasemahokohoamo hinamo aporo aseaki úyaka some kakanie. Kaumo hemakapusuamo watikiaka rakiako hemakapurarakano kakipayarakaa Kotiaki hemakapukua tokoanie. Ní aporoyaki hakása punie. Aporo metayaki mokome pukupo. Hinamomo makata rakirane masakariarakaa tokoakopo. Nómo ní aporo pusuane soko, ní hokosane soko, ní apea hakása risiane soko koteaka hemakapukua ararehoanie. Ní aporo pusuamo someane koaretaehokopo. Aíyaka hinamo sisimamo hinamo aporo aseaki maropohoasimo, Taetase, nómo hinamo sisimaki somehoanie.

<sup>6</sup> Arirakano hokosa rauaki kaumo hemakapusuane makama kesekeraka, makata suane koteaka takekeaa hemakapukua risikianie, aíhoanie. Aíyaka hokosa rauaki some kakanie.

<sup>7</sup> Taetase, nómo soko koteaka takekeaa hemakapukua rakinie. Nómo arakirane asekeaa aporo hokosa rauamo soko koteaka rakismo nómo koteaka rakinie. Aporo hinamo metaki-raki tariraka some watikisane some kakakopo. Nómo some karaka, kakaro someane ereketae some kakanie. Some akara yine kekemaraka rakinie.

<sup>8</sup> Kakaro someane some karakano aporo metamo né hokomakosafapo. Né koteaka reke kakaro someane some karakano, Kotimo some hisisa aporomo isu hokomaka somehokos-apoko asiame, ne koteakareasamo, i namina yia hemakapuraka kaiyahokosapo.

<sup>9</sup> Arirakano aporo raipa roposaki úyaka somehoanie. Re roposa wafayamo sesehoasimo epo someane kaikia kekemaraka rakinie. Repo wafayamo somerakano kakipayarakaa some paripukupo.

<sup>10</sup> Re roposa wafayamo makata kemoane tau hakimakopo. Maiya suamo koteaka risike, makata rakirane himu hakásaraka rakiraka risikianie. Kau hisiraka rakiraka risikiakopo. Koteaka rakiraka risikinone, aporo metakiramo aseraka someraka, "Aporo raipa roposamo Kotimo someane kakimaka koteaka arakire." Aíyaka somerakano asekeaa isu Mafasira Kotiane ipu makárahokosapo. Aíyaka aporo raipa roposaki some kakanie.

"Yasu paripeakosane hemakapukua risike koteaka ereketaeraka risikianie," aisane oyapo.

<sup>11</sup> Hao, kaisie. Aporo hinamo suamo himu watikisane mafahokosakipoko Kotimo yaku ararenane kakama tarisiapo. Aporo hinamo suane mafasiakosakipoko Kotimo ipi Yasu Keresoane hauaka wo pusiesapo. Pusierakano Yasu peraka Kotimo yaku ararenane tarisiapo.

<sup>12</sup> Kotimo hisisa makatane isiapo metakarisimo Kotimo yaku ararenamo isu maroponapo. Arirakano hauaka wo kaumo hemakapusuane soko rukupatehoasimo maroponapo. Arirakano koteaka takekeaa hemakapurane makama fanaraka, arirakano ereketaeraka rakipe pusimo maroponapo. Maiya omo hauaka wo risike makata watikiaka hemakapurane kikisiraka, Kotimo sesehoasimo makata rakirane makama fanaraka ayíáka risikiasimo maroponapo.

<sup>13</sup> Asiamo Yasu paripeakosane hemakapukua kau risiakipoko Kotimo yaku ararenamo isu ararerakanapo. Yasu Kereso faesayaki pariapera maiya amo sesenane mokoakosakipoko isu kau risikinapo. Isu mafasira aporo Yasu Keresoane isiapo Koti káraro.

<sup>14</sup> Isiapo makata watikiaka rakisiane soko, efera hunia watikiaka rakirapaka Yasumo isuane mafasisiapo. Mafasiraka Yasu ipiane isupoko farimaka rusua kukusimo ipi kauane kasapo. Epo aporo hinamo suane makoteraka, epo ipi aporo ira pariraka ayíáka risikiasimo isupoko farimaka kusuapo. Isiapo makata watikisa suane metakarikia, koteaka susu hemakapukua risikiasimo farimaka kusuapo.

<sup>15</sup> Asiamo koteaka ainane nōmo neaki some kasane, maiya suamo aporo hinamoaki nōmo some kakanie. Some one ipu kakimakasimo nōmo wakapuaka some kakanie. Some one kaikia koaretaeraka risia aporo hinamoane maropohoānie. Né makata rakisimo Kotimo maresasamo nōmo someane aporo hinamomo koaretaehoane siahosifareapo. Nōmo some akarane metamo mawakasemaraka koaretaehokopo, aiyaka, Taetase, nōmo wakapuaka some kakanie.

### 3

*"Kotimo reane makotesasamo, repo aporo hinamoane ararehoanie," aisane oyapo.*

<sup>1</sup> Keresoa paosa aporo hinamoaki nōmo úyaka somehoanie. Kamani aporomo someane soko, re asekea risia aporomo someane soko, repo kaiyinie. Asiamo kamanimo somemanemo reane asekea rekenapo. Makata rakira kotesane rakiako hemakapukua risikanie.

<sup>2</sup> Aporo hinamo metane hokomaka somehokopo. Aporo hinamo metamo someane rukumosakatapikia tafatafaraka somehokopo. Aporo hinamo suaki hemakapukua ararehoanie. Aporo hinamo suaki tau auaraka risikanie. Aiyaka aporo hinamo suaki some kakanie.

<sup>3</sup> Fana isu Keresoa paohoasiraka risiane repo hemakapurakanapo. Fana makata watikiaka rakirane isu himua fasere perakarakano isiapo rakikia, arirakano kakaro someane koaretaeraka, arirakano aporo metamo kotafe some karakano isiapo kakimasapo. Arirakano kaumo hemakapusuamo soko, hauaka wo makata rakiako sesenamo soko isu asekea reke, aporo tipura kesa arisia ayiáka isu risiapo. Maiya suamo isiapo aporo metakiraki himu hisiraka mokoatikhoko hemakapukua risiapo. Arirakano isiapo hemakapuraka, "E káraraka area ayiáka ano soko ayiáka rekearipi," aiyaka hemakapusuapo. Aporo hinamo metakiramo isu aseako hisiraka, isiapo soko iane aseako hisiraka, ayiáka rakumarekea risiapo.

<sup>4</sup> Fana isu ayiáka watikiaka risia nine isu Mafasira Kotimo isuane kamenakaraka, hemakapukua arareraka isuane mafasisiapo.

<sup>5</sup> Isiapo isina koteaka rakisiapoko mafasisiafapo. Epo isu kamenakaraka reasasamo mafasisiapo. Isiapo watikisane ipi makikisiraka marekea, kusuna ayiáka isiapo watikisane kusuraka, hokosa kiri taka apera ayiáka, isu epo ipi aporo hinamo pariraka makawesapo. Isu koteaka risikiasimo ipi Ho Kotesamo isu makawesapo.

<sup>6</sup> Isu mafasira aporoane Yasu Kereso ipipo. Yasu Kereso aeyaka Kotimo Ho Kotesa hakása hakásaraka isuyaki rekeasimo pusiesapo. Pusiesane pekeea isiapo tua wakapuaka rakiraka rekenapo.

<sup>7</sup> Kotimo isu kamenakaraka ipi hikumisia ereketaeraka risikiasimo epo maroporaka maresapo. Arirakano atamo ipi hokosapoko makata taesane makoasimo seseaka rekenapo. Seseaka area ayiáka isu Kotiyaki yaiya risikiakosane seseaka kau risikinapo.

<sup>8</sup> Asiamo some one kakaro somepo. Kotiaki himu hakásaraka hemakapura aporo hinamoaki some one wakapuaka some kakanie. Maiya suamo aporo hinamo metakirane ararehoko hemakapusimo iaki some kakanie. Nōmo some kasane some kotesapo. Asiamo someamo aporo hinamoane ararehokosapo.

<sup>9</sup> Arirakano aporomo koteaka hemakapunafonoraka tafatafaraka somerakano kaikia rukupatehoanie. Arirakano Yu aporomo makasa kaua kekemamo wainepe pesa aporo yano motosane mokome somerakano kaikia rukupatehoanie. Arirakano Mosesemo some-manemo kepoane Yu aporo sisimamo tafatafaraka me rukua somerakano kaikia maroporaka mafahoanie. Asiamo tafatafaraka saapeaka some anamo isu ararenafapo. Someane kakimaka isu koteaka risikiakosafapo. Asiamo tafatafaraka somerane metakarinie, aiyaka somehoanie.

<sup>10</sup> Arirakano aporo hinamomo kakaro someane metakarisimo some akara aporo ane nōmo maropohoānie. Some meta some kakakopo, aiyaka somehoanie. Epo some meta yaiya some karakano kaikia yape tetámo maropohoānie. Maroporakano yia epo yaiya koaretaeraka rekeno aporoane kakaro metakarinie.

<sup>11</sup> Aporoamo kakaro someane patera tarikia yaiya watikiaka some karaka, ipi yia ikia kara watikisa á purakanapo. Ipi watikiaka rakisia yiamo ipi yine mokoatikirakanapo. Ane nōmo ní hemakapurakanapo.

*Poremo ayapa aisane oyapo.*

<sup>12</sup> Né area Atémase soko metao, Tíkikase soko metao nōmo pusihokosapo. Pusiesane né area perakano asekea ano Nikoporísi taonea reakipoko, Taetase, né foaka peanie. Yáki ikia aperamo, ano Nikoporísi taonea rekeakosapo. Asiamo né peanie.

<sup>13</sup> Apórose soko, somemane kepo hemakapura aporo Sénase soko, tetā Kiríti he tono metakarikia kimisi purakano, tetane nōmo ararehoanie. Kimisi pukusakipoko makata meta faseneno nōmo arareraka kakanie.

<sup>14</sup> Arirakano maiya suamo Keresoa paosa aporo hinamomo koteaka rakirane rakinie, aiyaka somehoanie. Aporo hinamo metakira fesenoraka risikino, iane ararehoanie, aiyaka somehoanie. Keresoa paosa aporo hinamo nenakamaka risikiane siahoasifareapo.

<sup>15</sup> Aporo su anoyaki hakāsa risiamo néane hemakapuraka ayaparakanapo. Keresoa paosa aporo hinamo suamo isuaki himu tumurumo hemakapusua akipoko nōmo iaki ayaparakanapo. Kotimo re su yaku ararehoasimo hemakapurakaripo. Aiyaka Poremo Taetaseaki popasapo.

## Fairimone Fairimone sawi one mahemakapukusa someane oyapo.

Sawi one Poremo Fairimoneaki poparaka makesapo. Fairimoneane Korosi apea aporo fanaraka reke, epo aporo metakira roporaka, ipu epoko rakisimo murikimasapo.

Poreane Rome apea tipura makesa rea maiya amo epo Fairimoneaki sawi one poparaka makesapo.

Yasu kusua turikia puraka hepene yapura hisiakipoko, keremisi tuaneti sekese su (26) faraka, keremisi tuaneti sewene (27) amo, Poremo sawi one popasapo.

Sawi one popasa amo kepoane oyapo. Fairimonemo aporo raipa roposa hakása meta Onísimaseane takaripusuapo. Arirakan apo raipa takaripusua aporoane kakaro rusua kukunie, aiyaka Rome kamanimo somemane motosapo. Onísimase takaripukua Rome apea pesapo. Pesa maiya amo Poremo Kotimo someane some karakano epo kairaka Yasuaki rekeako parisapo. Maiya amo Pore tati hakása kikinaraka risike, Poremo hokosa pariraka reapo. Asiamo epoko farimaka Onísimasemo makata rakira wafaya, Fairimoneaki sawi poparaka makesapo.

### **Fairimone sawi popasa amo kepoane oyapo.**

1:1-3 Sawi popasane úyaka kepomarekea popasapo.

1:4-10 Fairimonemo Poremo some ane hisinapaka popasapo.

1:11-19 Poremo hemakapusua aiyáka Fairimonemo himu hakásaraka hemakapusimo popasapo.

1:20-21 Fairimonemo kamenakaraka hemakapusimo popasapo.

1:22-25 Ayaparaka popasapo.

### *Fairimoneaki Poremo sawi poparaka makesane oyapo.*

<sup>1</sup> Ano Poremo Yasu Keresopoko rakisiaamo tipura makerakano rekenapo. Tipura reke Fairimone, néaki nōmo sawi one poparaka makerakanapo. Isiapo Keresoa paosa aporo mae Timotimo ano arareraka rekeno, nōmo sawi one poparkanapo. Fairimoneo, neane etapo hemakapurakanapo. Nōmo soko Kotipoko rakiraka, etapo arakira aiyáka rakirakanó néaki seserakanapo.

<sup>2</sup> Yasuaki patera asesa aporo hinamo nōmo ní apea kurikurihoko sarimaraka risiasi soko, nōmo sawi one poparaka makerakanapo. Keresoa paosa hinamo etapo papā Afia aki soko sawi one poparkanapo. Asiamo Akípaseaki soko poparkanapo. Arirakan amo aporomo yunu awera aiyáka Akípase soko isina hakása paoraka Kotimo yunu ane werakanapo.

<sup>3</sup> Isiapo Ata Kotimo soko Unihae Yasu Keresomo soko reane hemakapukua arareraka, arirakan re auaraka risikiاسimo nōmo kurikuriranapo.

<sup>4-5</sup> Fairimoneo, nōmo Unihae Yasuaki himu hakásaraka hemakapukua rekenapakae. Kotimo aporoane nōmo himu tumurumo hemakapurakanapakae. Akipoko népoko farimaka kurikuriana maiya amo nōmo Kotiaki suseaka kurikuriranapo.

<sup>6</sup> Nōmo Yasuaki himu hakásaraka hemakapukua rerasamo, isu kikinaraka risirasamo, isina suamo himu hakásaraka hemakapusua aeyaka Kotimo takekeea hemakapurane neaki kakasimo hemakapurakaripo. Makata kotesa Yasu Keresomo isuaki akarane nōmo makasimo nōmo kurikuriranapo.

<sup>7</sup> Maeo, Keresoa paosa aporo hinamoaki nōmo himu tumurumo hemakapuraka iane masesesapo. Asiasamo ano soko kara seseraka rekenapo. Nōmo ano mawakapusapo. Maeo, nōmo Kotimo aporo hinamo yofesane nōmo iane arareraka reasasamo nōmo néaki kára seserakanapo.

### *Fairimone, nōmo ní apea Onísimaseane karikia punie, aisane oyapo.*

<sup>8</sup> Ano Keresomo tarira aporosasamo nōmo neaki makata aiyakanie, aihoane sia-hoasireapo.

<sup>9</sup> Nōmo aiyakanie, aihoafununine, nōmo neaki himu tumurumo hemakapuraka reke neaki auaraka somerakanapo. Ano Keresomo tarira aporo reasamo neaki somerakanapo. Yumo ano aporo sisimapo. Nōmo Yasu Keresopoko makata rakirane rakisiasamo ano tipura makesa rekenapo.

<sup>10</sup> Néaki nōmo hokosa parisa Onísimasepoko farimaka somerakanapo. Ano tipura rea maiya amo nōmo eaki Yasu Keresoane some kasasamo e Yasuaki rekeako parisapo.

<sup>11</sup> Fana e nenakamaka reke makata koteaka rakirafaraka, ní aporo raipasa yiamo né araresafapo. Asiane yumo e Keresoa paosasamo epo ano soko né soko arareraka koteaka rakiakosapo.\*

<sup>12</sup> Asiamo Onísimaseane néyaki hakása rekeasimo nōmo eane paripusie, airakanapo. Nōmo himu hemakapusuane soko eyaki hakása purakanapo.

<sup>13</sup> Nōmo ano ararehoko makeraka rekeanafonosakipoko epo ano ararehoasimo yu reae aihoko seserakanapo. Yasu hemakapusimo some kotesane some kasapoko ano tipura makesa rekenapo. Tipura makesa rea maiya omo Onísimasemo ano ararehoasimo yu reae aihoko hemakapurakanapo.

<sup>14</sup> Nōmo hemakapusua nine nōmo néaki kaisiafapo. Nōmo neaki Kaiyanafonosasamo nōmo aosafapo. Asiamo eaki yu reae airakanafapo. Fairimone, nōmo ano ararehoasimo nōmo reae aihoane siahoasifareapo. Nōmo ní seseaka hemakapusua anaka ano ararehoane siahoasireapo.

<sup>15</sup> Nōmo hemakapusuane Onísimase e takaripusua maiya wakasemamo neane metakarisiapo. Epo né metakarikia pukua Yasuaki himu hakásaraka hemakapusuapo. Asiamo né maiya wakasemamo metakarikia yumo e takaripusuane paripekea népoko yaia rakiraka rekeakosapo, aiyaka nōmo hemakapurakanapo.

<sup>16</sup> E pariperakano asekea hemakapuraka, "Onísimaseane aporo raipa roposa hákasa yiayapo," aiyaka hemakapukupo. "Onísimaseane isiaapo Keresoa paosa aporo maepo," aiyaka hemakapunie. Eane nōmo hemakapurakanapo. E Keresoa paosasamo nōmo soko eane hemakapukusapo. Onísimaseane nōmo aporo raipa roposa rea nine, e nōmo Keresoa paosa maepo. Asiamo nōmo eaki kakaro hemakapukusapo, aiyaka nōmo hemakapurakanapo.

<sup>17</sup> Nōmo anoaki moresa hemakapurakarakanone ano nōmo apea tereraka karikia apura aiyáka, Onísimaseane soko tereraka karikia punie.

<sup>18</sup> Epo néaki mokoatikisane soko metao, makata hakimasane soko metao, nōmo eane arareraka, epoko makata yānoane neaki kakakosapo, airakanapo.

<sup>19</sup> Aiyaka ano Poremo somerakanapo. Some wakasema one nōmo hokonomo poparakanapo. Epo makata hakimasa akipoko nōmo makata ropo kakakosapo. Arirakanómo some wakasema meta one soko, hemakapunie. Né Keresoa rekeako parisane nōmenapo. Keresomo someane nōmo néaki some kasapo. Asiamo nōmo ano ararehoane siahoasireapo.

<sup>20</sup> Maeo, eto iti Keresoa paosa aporo maesasamo nōmo someane kaiyinie. Nōmo Unihae Kotiaki hemakapuraka anoaki soko hemakapukua masesehoanie. Masesehoasimo Onísimaseane pasimakanie.

<sup>21</sup> Yumo sawi one popana maiya omo "Nōmo someana one nōmo kakimakosapo," aiyaka nōmo hemakapurakanapo. "Nōmo somesane soko nōmo kakimaka nōmo ní hemakapukua makata meta soko koteaka rakiakosapo," aiyaka nōmo hemakapurakanapo.

<sup>22</sup> Ano peakosapoko ape wakakosane makotekoan. Repo anopoko farimaka kurikurisasamo ano tipura makesane tonotaerakan reyaki rekeako paripeakosapo, aiyaka nōmo hemakapurakaripo.

<sup>23</sup> Epáfarasemo Yasu Keresomo makata rakirane rakisiakipoko anoyaki hakása tipura makerakano, epo neane hemakapurakaripo, aisapo.

<sup>24</sup> Makamo soko Témasemo soko Arisítákasemo soko Rukimo soko ipu suamo néane hemakapurakaripo, aisapo. Ipu anoyaki hakása yineraka rakirapo.

<sup>25</sup> Asiamo Unihae Yasu Keresomo yaku ararenane repo hoyaki rekeasimo nōmo kurikurirakanapo.

---

\* **1:11:** Onísimase ipi yano motosa namo meaka Koteaka Rakira Aporopo, aiyaka yano motosapo.

## Hipuru

### Hipuru sawi one mahemakapukusa someane oyapo.

Hipuru sawi one Yu aporo Keresoa paosa aporo hinamoaki poparaka makesa sawi ayapo. Aporoamo meane, Hipuru me airapo. Aisamo maiya metakiramo Yu aporoane Hipuru aporo airapo. Asiamo Hipuru sawi one epamo popasarakapo. Popasa aporoane yano motosa sawi wo popasafapo.

Yasu hepene yapura hisiakipoko keremisi teti sewene su (37) faraka, Rome ame aporomo yunu weraka Yarusarame sitiane namo kakaro mokoatikisapo. Kotimo apeane soko mokoatikiraka, ekemo kisia apeane rukurakaritaesapo. Sereane faserepeasiraka, aporoamo Hipuru sawi one poparaka makesapo.

Yu aporo yakaimo namina makata watikisane mafahoasimo makata kakaya rukua paikia Kotiaki yaiya karaka risiapo. Aporomo makata watikisapoko, makata kakaya Kotiaki karane rukupateraka metakarismo, Yasu kusuane ipu hemakapusuafapo. Asiasamo aporoamo sawi one poparaka makesapo.

### Hipuru sawia some kepo parakuraka popasane oyapo.

1:1-2:18 Yasu Kotimo hokosa reane, namo kakaro káraro. Yasumo hepene aporo yano motosane marokeraka e yano motosa namo kakaro káraro.

3:1-4:13 Moseseane soko Yasumo yano motosa amo marokesapo.

4:14-7:28 Pirisiti aporoane soko Yasumo marokesapo.

8:1-9:28 Fana Kotimo Moseseyaki someaka masane kawe yumo Kotimo Yasuyaki someaka masa amo marokesapo.

10:1-39 Yasumo yapimo makata kakayiamo yapiane marokesapo. Aporomanomo watikisane Yasumo yapiamo namo kakaro mafaraka, makata watikisamo wakapuanne soko mafanapo.

11:1-40 Aporo hinamomo Kotiaki himu hakásaraka hemakapusuane uyáka risiapo, aíyaka popasapo.

12:1-29 Isiapo soko Kotiaki himu hakásaraka hemakapusimo isuaki tarirakanapo.

13:1-19 Yasu Keresoaki himu hakásaraka hemakapukua Yasumo ainane kekemahoasimo somerakanapo.

13:20-25 Sawi one popasa aporoamo ayaparakanapo.

*Kotimo hokosane namo kakaro kárane oyapo.*

<sup>1</sup> Wate fana maiya metamo soko, maiya metamo soko, maiya káramo porofete aporoaki Kotimo some karáka, kekepoaka some kape pusuapo. Some kape pusuane porofete aporoamo kaikia, isiapo makasa kaua kekemaki ipu some kasapo.

<sup>2</sup> Aiyáka some kasane yumo fahoko makeana maiya amo isuaki somehoasimo Kotimo ipi hokosaki some karakano, ipi hokosane hauaka wo pekea, isuaki some kasapo. Asiamo ipi hokosa aeyaka ipi Ata Kotimo hauaka one soko ti yapurane soko makata su kepo marekea faserepepesapo. Arirakano keseke makata su Kotimo ipi menane asekea rekeasimo epo murikimasane ipi hokosa ayapo.

<sup>3</sup> Kotimo ipi faesane ipi hokosaki kasasamo e ipiane faeraka ho piakaeraka reapo. Koti ipi káraro, aíyaka ipi hokosa Yasumo tarikia some kasapo. Kotimo ipi ainane ipi hokosamo soko hakásaraka yineraka rakiraka reapo. Arirakano hauaka one soko ti yapurane soko makata su rakisane siaraka risikiasimo, Kotimo hokosamo some wakapu amo asekea rekenapo. Aporo hinamo suamo himu watikisane mafaraka Koti hikumisia ereketaeraka risikiasimo e hakasa kusuapo. Kusuane maturikia taerakano hepene yapura hikia ipi fanaraka reasasamo ipi Unihae Koti hokono tumuru takua kakenapo.

*Kotimo hokosa Yasumo hepene aporoane marokesane oyapo.*

<sup>4</sup> Yasu ipi Kotimo hokosasamo ipi yano motosane ipi Ata Kotimo makárasapo. Arirakano hepene aporoane Kotimo aporo raipa risiasamo yano motosane. Kotimo makarasafapo. Asiamo iane Yasumo marokeraka hurutapisiapo.

<sup>5</sup> Marokesa kepoane oyapo. Kotimo sawia poparaka ipi hokosane unihaehoasimo murikimaka makararaka someraka, "Né nōmo hokosapo. Pipu nōmo ní Ata ane anopo." (*Buk Song 2:7*)

Aiyáka somesane Kotimo hepene aporoane makararaka somesare? Wae. Hepene aporoaki Kotimo aíyaka somesafapo. Asiamo Kotimo someraka, "Ipi Atane anopo. Nōmo hokosane épo."

Aiyáka hepene aporoane Kotimo makararaka somesafapo. Ipi hokosa Yasuane makararaka somesapo.

<sup>6</sup> Arirakano Kotimo ipi hokosa hakása yine hauaka wo pusiesapo. Pusiesa maiya amo Kotimo hepene aporoaki someraka, "Hepene aporo reo, repo nōmo hokosane kekerehoanie." Aiyaka Kotimo somesapo. (Lo 32:43)

<sup>7</sup> Arirakano hepene aporoane Kotimo ipipoko raiparaka rakisimo someraka, "Ipu anoane somehoko puraka atifo apera ayiáka i perapo. Ipu anopoko rakiraka ira rufiana ayiáka ayiakakosapo." (Buk Song 104:4)

<sup>8</sup> Aiyaka hepene aporoane Kotimo somesa nine ipi hokosa Yasuaki someraka, "Kotio," maiya suamo né yaiya unihaeaka rekeakosapo. Nōmo aporomano asekea areane nōmo kakaro ereketaeraaka asekea rekenapo.

<sup>9</sup> Makata kotesa ereketae susuane nōmo seseraka reke, somemane mamosorane soko ereketae some koaretaenane soko makata watikisa aina suane nōmo hisinapo. Kotio, nōmo ní Ata Koti amo né unihaeaka rekeasimo murikimaka he wera né kaua rekemarekea né maseserakanapo. Hepene aporo ane soko, hauaka wo aporo unihaeaka risiane soko, nōmo marokerakano Koti amo néaki kára maseserakanapo." Aiyaka Kotimo somerakano popahoareapo. (Buk Song 45:6-7)

<sup>10</sup> Asiamo Kotimo ipi hokosa Yasuane makata meta soko someraka, "Unihaeo, Kepomaresa maiya amo nōmo hemakapukua somesa aeyaka hauaka one faserepesapo. Ti yapurane soko nōmo hokonomo rakisiapo.

<sup>11</sup> Asiamo keseke hauaka one soko ti yapurane soko makata one su fahokosapo. Asiamo makata ane su faraka né kakaro yaiya rekeakosapo. Pasu patéana ayiáka makata one su ayiáka patéhokosapo.

<sup>12</sup> Pasu mawerona ayiáka hauaka one soko ti yapurane soko ayiáka mawerohokosapo. Pasu paté metakarira ayiáka, hauaka one soko ti yapurane soko patéane ayiáka metakariakosapo. Metakarikia pasu kawe amara ayiáka hauaka one kawe meta haku faserepeke, arirakano ti yapurane soko ti kawe haku meta faserepeakosapo. Asiane yumo né area yaiya keseke soko ne yaiya rekeakosapo. Nōmo maiyane kakaro fahokosafapo." Aiyaka Kotimo Yasuane somerakano popahoareapo. (Buk Song 102:25-27)

<sup>13</sup> Arirakano Kotimo makata meta Yasuaki someraka, "Né ano hokono tumuru takua kayae. Kakeno nōmo yunuane nōmo hurutapiakosapo." Aiyaka somerakano Kotimo sawia popahoareapo. (Buk Song 110:1)

Aisa ayiáka, hepene aporoane Kotimo makararaka somesare? Wae. Hepene aporoane ayiáka somesafapo.

<sup>14</sup> Arirakano hepene aporoane yakapare? Iane hopo. Ipu Kotipoko rakirapo. Arirakano Kotiyaki yaiya risikiakosa aporo hinamoane ararehoasimo Kotimo iane pusierapo.

## 2

### *Kotimo isu mafasianie oyapo.*

<sup>1</sup> Yasu ipiane karasasamo eane hemakapusimo some kasane isiaipo kaikia koteaka kakimaka kekemahoasireapo. Kekemahoanafonarakano kasu hea takerehaeraka apura ayiáka, isiaipo Kotimo some merarurakanone, kasu ipi haku takerehaeraka apura ayiáka, isu purapaka Kotimo someane paroaka maka risikiasireapo.

<sup>2</sup> Arirakano Kotimo somemane motosane hepene aporomo Moseseki some kasane kakaro somepo. Kakaro someane aporomo koaretaeskipoko, koaretaesa ropo nine masapo. Aporomo ipi watikiaka rakisiakipoko, watikisa ropo hakása nine masapo.

<sup>3</sup> Asiasamo Kotimo isu mafasiakosaposane isiaipo kakimakanafonarakano, ropo kakakosaposane metakariakosare? Wae, metakariakosafapo. Kotimo aporomano yaku arareraka mafasirane namo kakaro kotesapo. Mafasirane Unihae Yasumo ipi fana some kasapo. Some karakano aporo metakiramo kaikia isuaki some kasesupo. Ipu úyaka some karaka, "Yasumo mafasiakosapo airakasuane kakaroripo." Aiyaka Yasumo some kaisia aporoamo isuaki somerakasupo.

<sup>4</sup> Aiyaka somerakano isiaipo kakaroripo, aihoasimo aporoamo Kotimo wakapu aeyaka makata kára rakisiapo. Asia ayiáka Yasumo mafasiakosa somesane Kotimo makama fanaraka tarisiapo. Arirakano Ho Kotesamo wakapumo ararenane soko Kotimo ipi hemakapusua aeyaka isuaki kekepoa kekepoaka kasá amo tarisiapo.

### *"Mafasira kepoane Keresopo," aisane oyapo.*

<sup>5</sup> Hauaka kawe haku Kotimo rakiakosane repo hemakapusimo nōmo somerakanapo. Hauaka ane asekea risikiasimo hepene aporoane Kotimo murikimosafapo.

<sup>6</sup> Arirakano aporo hakásamo Kotimo sawia poparaka, "Kotio, isu aporomanoane epareare? Isuane marirakano nōmo hemakapurakanare? Isu aporomano wakasemasasamo marirakano nōmo isu asekea rekenare?"

\* <sup>1:8:</sup> Yasu ipi Kotipo.

<sup>7</sup> Maiya wakasemamo hepene aporo nōmo makama fanaraka aporomanoane mawakase-maraka ayiáka nōmo maresapo. Maiya wakasemané farakano nōmo aporomanoane makáraraka maresapo.\*

<sup>8</sup> Asiamo aporomanoaki nōmo someraka, ‘Makata suane unihaeaka asekea risikianie,’ aiyaka nōmo somesapo.” Aiyaka Tefetemo somerakano Kotimo sawia popahoareapo. (Buk Song 8:4-7)

Aporomanoaki Kotimo someraka, “Makata su unihaeaka asekea risikianie.” Aiyaka Kotimo mareraka makata hakása meta unihaeaka asekea risikiakopo aisafapo. Arirakano yumo isiapo aseane aporomanomo makata suane unihaeaka asekea risikianafonorakano aserakanapo.

<sup>9</sup> Aporomanomo makata su asekea risikianafonorakano yia, isiapo Yasuane unihaeaka asekea rekeno aserakanapo. Asiane Kotimo hemakapukua ararerakano, Yasuane aporo hinamo supoko farimaka kukusakipoko hauaka wo pesapo. Yasu pesane maiya wakasemamo hepene aporomo yano motosane kárarako risikino, Yasumo ipi yano motosane mawakasemaraka reapo. Mawakasemaraka reke, eane Kotimo ararerakano Yasumo himu nekea, umisa maka kusuasamo Kotimo e makáraraka, eaki faesane soko kasapo.

<sup>10</sup> Kotimo makata su rakisiapo. Asiamo makata su rakisiane epo asekea rekenapo. Asiamo Kotimo hemakapuraka, “Nōmo hokosa parisane hepene apea ano faesa area anoyaki hakása risikiasimoripo,” aiyaka Kotimo hemakapusuapo. Asiamo ipi hokosa parisane karikia hiasimo Yasuane murikimasapo. Murikimaraka iane Yasumo mafasikia, Koti rea faesa á karikia hiakosapo. Karikia hiasimo Yasu himu nekea kau tesane Kotimo maresapo. Yasu ipi umisa maka, kau terakano ipi namo kakaro koteaka ereketae susu ainapo. Asiamo mafasira aporoane isiapo unihae Yasupo.

<sup>11</sup> Arirakano isu koteaka risikiasimo makata watikisane metakarikia kikisiraka Kotiyaki risikiasimo Yasumo ararenapo. Ararena aporoamo soko, araresa aporoamo soko isiapo suamo Atane hakásapo. Hakásasamo Yasumo iaki, “Nōmo maepo, nōmo papāpo,” aiyaka someraka epo hisinafapo.

<sup>12</sup> Epo someraka,

“Kotio, Neane nōmo maeaki somehokosapo. Néaki kekerehoko sarimaraka risia á, nōmo né kekereaka kesahokosapo.” Aiyaka epo somerakano Kotimo sawia popahoareapo. (Buk Song 22:22)

<sup>13</sup> Epo some meta someraka, “Kotio, néaki nōmo kakaro himu hakásaraka hemakapurakanapo.” Aiyaka somesapo. (Aisaia 8:17)

Arirakano some meta soko Yasumo someraka, “Kotio, hokosa† nōmo anoaki kasane anoyaki hakása risikino nōmo aserakanapo.” Aiyaka Yasumo somerakano Kotimo sawia popahoareapo. (Aisaia 8:18)

<sup>14</sup> Asiamo Yasumo hokosa aisane, hauaka wo aporo hinamoane somesapo. Aporomano kau soko yapi soko i risikinapo. Aporomano kau yapi ayiáka Yasumo ipi maka hauaka aporo pariraka reapo. Ayiáka nina kusuapo. E kusuasamo ipi wakapumo kura kepo Sataneane marutaesapo.

<sup>15</sup> Marutaesasamo hauaka wo aporo hinamo arisia maiya amo i kukusane kára namoraka risikino, kura namonane Yasumo mafasapo. Maiya suamo aporo hinamo kukusane namoraka risikino asekea Yasumo iane makokorotaesapo.

<sup>16</sup> Arirakano hepene aporoane ararehoko e pesafapo. Eparahamemo aporo ira wainepe pesa aporomanoane ararehoko e pesapo.

<sup>17</sup> Eparahamemo aporo ira wainepe pesa aporoane Yasumo ipi maepo. Ipi mae ararehokosakipoko i namina aporo kau yasia maka pekea reapo. Reke ipi makata rakirane kakaro rakikia makosakipoko pesapo. Aporoane kamenakahoko e aporomano kau yasia maka pesapo. Maka peraka hauaka wo epo Kotimo pirisiti aporo fanaraka reke, aporo hinamomo makata watikisane mafahokosakipoko epo yapiane kasápo.

<sup>18</sup> E kau asekosakipoko makata umisa fasereperakano epo marokesapo. Asiasamo aporo meta kau asekosakipoko makata umisa fasere apera maiya amo aporoane Yasumo sia ararenapo.

### 3

*Moseseane Yasumo marokesane oyapo.*

\* 2:7: Maresapo aiyaka popasane makatane haru faserepesafapo. Asiane Kotimo keseke ayiakakosane epo hemakapukua fasapo. † 2:13: Yasumo farimaka kusuasamo ipiaki risikiako parisa aporo hinamoane ipi hokosapo, aisapo.

<sup>1</sup> Keresoa paosa aporo maeo, Kotimo isuane ipi hokosa ayíáka risikiasimo re soko ayíáka murikimasapo. Murikimasamo repo Yasuane hemakapunie. Kotimo kawe someaka masane Yasumo tarisimo e Kotimo pusiesapo. Pusierakano pekea pirisiti aporo fanaraka rea ane épo. Epo isupoko farimaka rakirakano isiaipo eaki himu hakásaraka hemakapukua, Yasuane isiaipo some karápo.

<sup>2</sup> Eane Kotimo murikimaka makata rakiako pusierakano pekea, eaki makata rakira kasane, epo kakaro kakimaka rakikia masapo. Arirakano Moseseane Kotimo murikimaka makata rakismos maresane, Kotimo aporo hinamopoko Mosesemo rakikia masa ayíáka, Yasumo soko ayíáka rakikia masapo.

<sup>3</sup> Rakikia marakano Yasu yano motosane Kotimo makárasapo. Arirakano ape kisia wafayane e ipi kárupo. Apeane wakasemapo. Aina ayíáka Kotimo hemakapuraka Yasu ipi ape kira wafaya asia ipi yano motosa kárupo. Moseseane ipi ape áreasamo eane yano motosa wakasemapo.

<sup>4</sup> Ape suane aporomanomo kirapo. Arirakano makata su rakisia wafayane Koti ipipo.

<sup>5</sup> Mosesemo raiparaka rakiraka, Kotimo aporo hinamoane epo koteaka aseke reke ayíáka rakisiapo. Raiparaka rakiraka reke aporo hinamo suamo Kotiane hemakapusimo epo tariraka reapo. Asiamo aporo suaki Kotimo keseke ayiakakosane aporo hinamo suaki Mosesemo maroporaka somesapo.

<sup>6</sup> Arirakano Keresoane ipi Kotimo hokosasamo, Kotimo aporo hinamoane epo kakaro sia koteaka aseke reapo. Arirakano isuane Unihae mo makotehokosaposane kaikia, seseaka kau risike, Kotiaki himu hakásaraka hemakapusuane rosaka taeraka ayíáka risikinone, isuane kakaro Kotimo aporo hinamopo.

*"Kotimo some koaretaesa aporoane eyaki fenakosafapo," aisane oyapo.*

<sup>7</sup> Kotimo aporo hinamo koteaka risikiakosakipoko Ho Kotesamo someane repo kaki-makanie. Asiamo Ho Kotesamo someraka,  
"Pipu Kotimo someane kaikia kakimakanie. Kakimako hisihokopo."

<sup>8</sup> Wate fana ima yaoa repo makasa kaua kekemamo someraka, 'Kotiane metakarikia epo saperakarihoamo murikimaka koaretaeraka aserakapo.' Aiyaka ipu Kotiane metakarikia epo someane koaretaesa ayíáka, repo soko ayíáka koaretaehokopo.

<sup>9</sup> Kotimo someraka, 'Ima yaoa repo makasa kaua kekemamo nōmo saperakarihoamo murikimaka ipu hemakapusua rakisiapo. Keremisi foti amo (40) nōmo wakapu rakirane ipu aseraka asesaneo, asiane nōmo saperakarihoamo ipu koaretaeraka rakisiapo.'

<sup>10</sup> Aiyáka rakiraka maiya suamo ipu himumo watikiaka hemakapuraka, nōmo ainane hemakapunafonoraka, nōmo ikia kara a kekemasafapo. Kekemahoanafonorakano i risia sereamo nōmo iaki sapesapo.

<sup>11</sup> Kára saperaka nōmo iaki aumaraka someraka, "Re kakaro anoyaki fenako peakosafapo. Nōmo hemakapusuane sanasinafapo." Aiyaka Kotimo somesane kakaro yasiapo." (*Buk Song 95:7-11*)

Aiyaka Ho Kotesamo somesapo. Fana aporo ane Koti rea fenako hianafonosasamo, keseke re soko i asia ayíáka, anapaka, re asekeanie, aiyaka Ho Kotesamo somehoareapo.

<sup>12</sup> Keresoa paosa aporo maeo, repo namina yia aporo mae hakásá metamo himu watiki-aka reke Kotimo someane koaretaeraka, Yaiya Rera Kotiane metakariane siahofasifareapo. Koti metakarirapaka asekeanie.

<sup>13</sup> Makata watikisamo kirimaraka Kotimo someane kaiyako hisiraka risikiakohoamo pipu maiya yumo repo namina yia ararehoanie. Maiya suamo sere fasere perakano pipupo airapo. Aiyaka pipuane pipu maiya yuyapo. Pipu yumo repo namina yia ararehoanie.

<sup>14</sup> Fana isiaipo kakimasane yumo soko yaiya kakimaka risike kakimasane rosaka taeraka yaiya risikinone isu Keresoaki hakasa nineraka risikinapo.

<sup>15</sup> Arirakano Kotimo sawia popasane oyapo,  
"Pipu Kotimo someane kaikia kakimakanie. Kakimako hisihokopo. Fana repo makasa kaua kekemamo Kotiane metakarikia, epo someane koaretaeraka risia ayíáka repo ayíáka koaretaeraka risikiakopo." Aiyaka Kotimo sawia popahoareapo. (*Buk Song 95:7, 8*)

<sup>16</sup> Kotimo someane kaikia koaretaesa aporoane epare? Mosesemo aporo karikia Iyipi hauaka metakarikia karikia pusua aporoane koaretaesa aporopo.

<sup>17</sup> Keremisi foti amo (40) Kotimo aporoaki sapesane aporo epaki sapesare? Aporo watikiaka risike ima yaoa kukua kesa aporoaki sapesapo.

<sup>18</sup> Kotimo aumaraka someraka, "Maiya yumo soko keseke soko re anoyaki fenako peakosafapo." Aiyaka aporo epaki Kotimo somesare? Koaretaesa aporoaki somesapo.

<sup>19</sup> Kotimo someane ipu kakimakanafonoraka koaretaesasamo, Kotimo murikimas hauaka á i fenako pusufafapo. Punafonosane isiaipo kaikia hemakapusireapo.

## 4

*Koti rea fenakosane oyapo.*

<sup>1</sup> Kotimo fana somesane someane yumo soko yaiya rekenapo. Fana Kotimo someraka, “Re ano rea fenako peane siahoasireapo.” Aiyaka somesane pipu yumo soko some ane yaiya rekenapo. Repo aporo hakása metamo Kotimo someane koaretaerakan, Kotimo aseraka, “Ne anoyaki fenako peane siahoasifareapo,” aihokosapo. Kotimo airapaka namoraka risikianie.

<sup>2</sup> Kotiane hemakapusimo some kotesane Isiraya aporoaki some kasá ayíáka isuaki soko ayíáka some kasapo. Ipu kairaka kaikia himu hakásaraka hemakapunafonarako Kotimo someamo iane araresafapo. Anapaka isiapo hemakapusireapo.

<sup>3</sup> Arirakan some kotesane isiapo himu hakásaraka hemakapukua kakimaranakanone, Koti rea isu fenakosapo. Fana Kotimo iaki saperaka aumaraka someraka, “Maiya yumo soko, keseke soko, re anoyaki fenako peakosafapo,” aiyaka Kotimo somesapo. Hauaka one kepo maresa maiya amo Kotimo ipi rakirane rakikia masapo. Rakikia maraka fenena maiya ane some kasapo. (Buk Song 95:11)

<sup>4</sup> Arirakan yatipinu sereane Kotimo sawia popasane oyapo. “Yatipinu sereamo Koti ipi fenekea kake, makata hakása meta soko rakisafapo,” aiyaka popahoareapo. (Stat 2:2)

<sup>5</sup> Arirakan fenena maiyane popasane oyapo. Kotimo some koaretaesa aporoaki epo someraka, “Maiya yumo soko keseke soko re anoyaki fenako peakosafapo.” Aiyaka Kotimo somerakan popahoareapo. (Buk Song 95:11)

<sup>6</sup> Kotimo ipi some kotesane some karakan, fana aporomo kaikia yia koaretaesapo. Koaretaesa akipoko, Koti rea i fenako hisiafapo. Arirakan aporo metakiramo kakimaka risiane Kotiyaki fenako hiane siahoasireapo. Koti rea fenako hiakosapo, aiyaka somesane yaiya kakenapo.

<sup>7</sup> Arirakan fana koaretaesa aporo hinamoane fenako hisiafapo. Asiane aporo metakira fenako pukusane keseke Kotimo sere meta murikimasapo. Sere murikimasane Kotimo someraka, “Sereane pipupo.” Aisane ipu koaretaesasamo, keseke sere meta murikimasane Kotimo Tefeteaki some kasapo. Some kasane isuaki soko some karakanapo. Someane oyapo. “Pipu Kotimo someane kaikia kakimakanie. Kakimako hisihokopo.” Aiyaka someaka popasa one repo fana kaisiapo. (Buk Song 95:7-8)

<sup>8</sup> Arirakan Isiraya aporo hinamoane Yosuamo karikia pukua i kakaro fenekea risia satiki, fenakosa sere metane Kotimo somehoafunufapo.

<sup>9</sup> Asiane Koti ipiane fenakosa sere meta murikimasapo. Kotimo ipi makata rakikia maka, yatipinu maiya amo ipi fenekea kaya ayíáka, Kotimo aporo hinamoane soko ayíáka fenasireapo.

<sup>10</sup> Asiamo aporo hinamo Koti rea fenako hiakosakipoko, Kotimo ipi makata rakira rakikia maka fenekea kaya ayíáka, aporo hinamomo namina makata rakirane rakikia maka fenakosapo.

<sup>11</sup> Arirakan aporomo koaretaesa ayíáka, isiapo aporo hakása metamo anapaka asekeanie. Asiamo Kotiyaki fenako hiakosakipoko himu hakásaraka hemakapukua paroaka risikianie.

*“Kotimo someane wakapuaka rerasasamo aporo metakiramo koaretaesa ayíáka repo soko ayíáka koaretaehokopo,” aisane oyapo.*

<sup>12</sup> Kotimo someane some hitafeane soko wakapureapo. Ferepe taku tetákara waresa ayíáka Kotimo someane warepo. Ferepe taku tetákara wareane wakasemapo. Asiane Kotimo someane ware kárapo. Kotimo someane ware kárasasamo, someane akairamo ferepemo patena ayíáka someamo himua patenapo. Kíki kawaka areane ferepemo kikia, kíkiáne kotomaka, ferepemo pateraka, kíkiáne tairaka waiane takekea kíkiáne takekea, aina ayíáka, Kotimo someamo himumo hemakapusua akipe homo hemakapusua tati sarimasane, Kotimo someamo kokoa aserapo. Makata ayíakako hemakapurane soko mahamekeha hemakapurane soko Kotimo someamo takekea aserapo.

<sup>13</sup> Kotimo ipi makata su aserapo. Arirakan aporo hakása metane soko metao, makata hakása metane soko metao, Kotimo asekeanafonarako tau fararea rekenafapo. Kaka-masakipoko makata meta matahoanafonarako makata su asera ayíáka, Kotimo ipi makata su kakama ayíáka risikino aserakanapo. Asekeha hemakurasamo eaki isiapo makata ainane soko, makata rakisiane soko, su eaki somerakan epo takekea parakuhokosapo.

*“Pirisiti aporo fana kárane Yasupo,” aisane oyapo.*

<sup>14</sup> Kotimo hokosa Yasuane hepene yapura hisiapo. Hikia reasasamo isiapo pirisiti aporo fana kárane Yasu ipipo. Asiasamo eaki himu hakásaraka hemakapurakanapo. Paroaka hemakapurane metakariane siahoasifareapo.

<sup>15</sup> Isuaki makata umisa fasereperakano isiapo pirisiti aporo fanamo kamenakaraka hemakapurakanapo. Isu kau aseakosakipoko makata umisa fasere apera ayíáka e soko hauaka wo rea maiya amo kau aseakosakipoko makata umisa faserepepesapo. Fasereperakano yia epo himumo watikiaka hemakapukua rakisiafapo.

<sup>16</sup> Asiamo Yasumo isuane kamenakaraka farimaka kurikuriraka rekeno, isuane Koti makeraka hiane siahoasireapo. Makaka umisa fasere aperamo isu ararehoasimo Koti rea makeraka peraka, mapirarakra himu paroaka hemakapukua risike kurikurihoanie. Kotimo makata suane wakapuaka asekea rekenapo. Arirakano Kotimo isu kamenakaraka reke yaku arareraka makoteraka rekenapo.

## 5

*"Yasu ipi pirisiti aporo fanaraka reamo isu ararehokosapo," aisane oyapo.*

<sup>1</sup> Pirisiti aporo fanaraka rakisimo murikimasane oyapo. Aporo su aeyaka aporo hakása pirisiti aporo fanaraka rakisimo murikimasapo. Murikimaso aporoamo Kotipoko raki-raka, aporo hinamomo su ararenapo. Aporo hinamomo watikisapoko epo saro sipi rukua paikia, Kotiaki kaka, makata meta soko yaku kaka, epo ayíáka rakirapo.

<sup>2</sup> E apororaka reke, e soko wakapuhoaafonoraka wasuaka rusisekeno asekea, aporo hinamomo mahimeteraka risike hasaka hemakapurakano asekea, iane epo sapehoanafonraka tau maroponapo.

<sup>3</sup> E wakapuhoaafonoraka reasasamo epo ipi watikisapoko soko, saro ponomakau rukua paikia kaka faraka, aporo hinamomo watikisapoko soko, saro naníkose rukua paikia Kotiaki karápo.

<sup>4</sup> Pirisiti aporo fanaraka reane yano motosa kárapo. Pirisiti aporo fanaraka reamo rakirane rakiako epo ipiane murikimasafapo. Kotimo Eroneane pirisiti aporo fanaraka reamo rakirane rakisimo Erone murikimaso ayíáka, yumo soko pirisiti aporo fanaraka reamo rakirane rakisimo Kotimo murikimarapo.

<sup>5</sup> Arirakano Keresomo ipi yiamo yano motosane makárahoanafonoraka, pirisiti aporo fanaraka reamo rakirane rakiako epo ipiane murikimasafapo. Kotimo eane murikimasapo. Kotimo eaki someraka, "Né nōmo hokosapo. Pipu neane nōmo makárarakanapo. Nōmo kakaro ní Atane anopo." Aisa Kotiamo e murikimasapo. *(Buk Song 2:7)*

<sup>6</sup> Arirakano epo some meta soko someraka,

"Maiya suamo né pirisiti aporo rekeakosapo. Mekésere pirisiti\* apororaka rea ayíáka, né soko hakása nineraka yaiya rekeakosapo." Aíyaka somerakano Kotimo sawia popahoreapo. *(Buk Song 110:4)*

<sup>7</sup> Yasu ipi hauaka wo rea maiya amo, Kotimo e ararehoasimo epo Kotiaki kurikurisapo. "Kotio, ano kurapaka nōmo ano mafasiane siahoasireapo," aíyaka epo Kotiaki kára wáraka hiripuyaki kurikurisapo. Epo ipiane makárahoanafonoraka Kotiane makárasasamo epo kurikurisane Kotimo kaisiapo.<sup>†</sup>

<sup>8</sup> Yasuane Kotimo hokosapo. E Kotimo hokosa rea nine, makata umisane fasereperakano, epo maka himu nekea kau teraka asia aeyaka Kotimo someane kakimaka kekemasapo. Asiamo kakimaka hemakapurane enomasapo.

<sup>9</sup> Enomaka faraka e kakaro siaraka reapo. Siaraka reasamo epo someane kakimara aporo hinamoe epo mafasirapo. Yaiya mafasira kepoane Yasu ipipo.

<sup>10</sup> Eaki Kotimo someraka, "Né pirisiti aporo fanapo. Mekésere pirisiti apororaka rea ayíáka né hákasa rekenapo," aisapo.

*"Re Kerososane paripurapaka asekeanee," aisane oyapo.*

<sup>11</sup> Mekésere menane isiapo makata kára somehoafunupo. Kepoane wakasemafapo. Arirakano repo foaka hemakapunafonorakano, someraka risike wafororipo.

<sup>12</sup> Fana repo Yasuane hemakapusimo somesane kaikia, maiya káramo kaisiasamo, repo aporo metakiraki tisaraka some kakafunupo. Repo tisaraka some kakafunusa nine, repo tisaraka some karakanafapo. Repo sia hemakapunafonorakano aporo metamo Kotimo some kepo fanane, efera hunia reaki somerakanapo. Asipa nafunusa nine, hokosamo hoko pi hákasa anena ayíáka repo nenaka risikinapo.

<sup>13</sup> Hoko pi nenane hokosa reapo. Hokosasamo ereketaeraka risikiasimo somerane kumukuraka risike takekeaa hemakapurafapo.

\* **5:6:** Wate fana Mekésere pirisiti aporo kára reapo. (Stat 14:18-20 á menohoanie.) † **5:7:** Yasumo kurikurisane Kotimo kaisiapo. Kairaka Yasu kukusane Kotimo araresapo. Arareraka e kurakano Kotimo e maturikia taesapo.

<sup>14</sup> Arirakano asipa ane aporo sisimamo nenapo. Keresoa paosa aporo hinamomo makata kotesane soko makata watikisane soko takekeha hemakapura aporo hinamoane aporo sisima hinamo sisima asiapo.

## 6

*"Makata kakimasane merarunapaka kakimaka risikianie," aisane oyapo.*

<sup>1-2</sup> Repo Keresomo menane some fana somesane hákasa kairaka risike siahoasifareapo. Keresomo kepo suane hemakapuko, Keresoaki himu hakásaraka risira aporo sisimamo kaira ayíáka kaiyinie. Arirakano ape kiakosakipoko ira kesa fana maposane teakamaka efera hunia maponafapo. Keresomo some kepo fana kasane ira kesa asiapo. Keresomo some kepo fana kasane oyapo. Hauaka omo makata watikiaka rakisiante hufitaeraka, Kotiaki rekeako pariraka eaki himu hakásaraka hemakapurane soko, arirakano hea tapukumarerane soko, arirakano hokonomo sakairaka kurikurinane soko, arirakano aporo kusua keseke maturikia taehokosane soko, arirakano fa ana maiya amo aporo hinamo takekeha parakuhokosane soko, arirakano makata ane su ira kesa asiapo. Ira kesane fana maposane efera hunia maponafapo. Aina ayíáka makata kepoane fana somesane, maiya suamo someraka risikiakopo.

<sup>3</sup> Someane kaikia hemakapuraka Keresomo menane karahoasimo Kotimo ararerakano ipi some metakirane soko enomaka paroaka risikiakoso.

<sup>4-5</sup> Arirakano aporo metakiramo Kotiane metakarikia eaki patera tarikia, ipu Kotiaki efera hunia risikiako parihoasimo isiapo mayíáka maropohokosare? Arirakano aporoane Kotimo faesa á risike, Kotiaki himu hakásaraka hemakapuraka, Kotimo yaku ararenane mokoa, Ho Kotesa soko i himua perakano, Kotimo someane kaikia someane kotehoareapo, aíyáka hemakapuraka, keseke Yasu pariaperamo Kotimo wakapuaka rakiakosane ipu koteaka hemakapukua risiane,

<sup>6</sup> asiáne aporoamo Kotiane metakarikia hisirakan akipoko, efera hunia makata watikisane hufitaeraka Kotiaki risikiako parihoasimo, isiapo maropohoaifareapo. Asiamo Kotiane ipu metakarikia eaki patera tarikia, Kotimo hokosa Yasuane ira matopesa paremarea ayíáka, ipu efera hunia Yasuane paremarerakanapo. Aporo metakiramo Yasuane hokomaraka Yasuane mainamarehoasimo e paremarea ayíáka paremarerakanapo.

<sup>7</sup> Asiamo maiya suamo yao hauaka sua perapo. Perakano aporomo makata mano hemoa porosane koteaka tanehekeha wate perapo. Perakano hauakane Kotimo aseraka, "Kotehoareapo," airapo.

<sup>8</sup> Arirakano hauaka meta yao perakano aporomo hemoa makata mano porosane taneheanafonoraka, hemo sunumo aôraka hakapi hinaka makata keta watikisane taneherapo. Taneherakano hauakane Kotimo aseraka, "Watikirareapo," aihokosapo. Hauakane metakarisiane keseke iramo inaka fahokosapo.

<sup>9</sup> Maeo, isiapo reaki paroaka someraka one keseke reane iramo inarapaka ayíáka somerakanapo. Repo Kotiane metakarisireapo, aíyáka isiapo hemakapurakanafapo. Kotimo re mafasikia, keseke re makotehokosapo, aíyáka hemakapurakanapo.

<sup>10</sup> Kotimo mokome aserafapo. Repo makata rakisiante, Kotipoko Keresoa paosa aporo hinamoane hemakapukua araresane yaiya arareraka risikino, epo asekepayarakanafapo. Asekeha fasiakoraka hasaka aserafapo.

<sup>11</sup> Aporo meta repo yaiya arareraka risike, akura maiyamo yaiya arareraka rakisimo isiapo hemakapurakaripo. Repo ayíáka rakiraka risike, repo hemakapuraka, "Kotimo isu pasimokaoakosapo." Aíyáka hemakapukua kau risikino, Kotimo re pasimokoa reaki makata ropo kotesa kakakosaposane, kakakosapo.

<sup>12</sup> Ayiakakosasamo kau hisiraka rakiraka risikiakopo, aíyáka hemakapurakaripo. Kotimo ayiakakosaposane aporo metakiramo kaikia kakimasane metakarianafonoraka risike Kotimo ayiakakosaposane asesapo. Asesa ayíáka re soko ayíáka risikiasimo hemakapurakaripo.

*"Kotimo ayiakakosaposane kakaro ayiakakosapo," aisane oyapo.*

<sup>13</sup> Kotimo ayiakakosaposane epo Eparahameaki somesapo. Kakaro ayiakakosapo, aíyáka Eparahamemo hemakapusimo Kotimo aumaraka somesapo. Metamo e marokehoanafonoraka, Koti ipi kakaro fanapo. Fanasasamo aumaraka epo ipi yano motosane yano hokoa kakaro someane someaka masapo.

<sup>14</sup> Epo Eparahameaki some karáka, "Né nômo makotehokosapo. Nômo aporo ira yakaihoasimo nômo makárahokosapo," aisapo. (Stat 22:17)

<sup>15</sup> Airakano someane Eparahamemo kakimaka, kau reke someane metakarisiafapo. Metakarianafonasasamo fana some kasane kakaro yainakano asesapo.

<sup>16</sup> Arirakano aporo tetámo tafatatafaraka risike, tafatatasane metakarisimo, aporo hakásamo aumaraka somerakano, tetapo tafatatafaraka somesane metakarirapo. Aporoamo epo ipi yano hokoa aumanafapo. Aumahoko aporo meta kára reamo yanoane epo yano hokoa aumarapo.

<sup>17</sup> Isiapo Kotimo kakimara aporo hinamoane Eparahamemo hokosa pariraka risia amo Kotimo ayiakakosaposane, "Kakaro hoareapo," aiyaka isiapo kakimaka hemakapusimo, Kotimo aumaraka somehoareapo. Epo aisane metakariakosafapo, aiyaka aporomo hemakapusimo aumaraka somehoareapo.

<sup>18</sup> Aiyaka Kotimo ayiakakosaposane soko, aumaraka somesane soko, some tetane metakarirafapo. Some tetane kotafe somerafapo. Kotafe somehoanafononasamo isu Kotimo farimakasimo Koti rea makeraka hirapo. Ayíáka aporoamo hemakapuraka "Kotimo ayiakakosaposane kakaro ayiakakosapo." Aiyaka paroaka hemakapukua kau risikinapo.

<sup>19</sup> Paroaka hemakapukua risirané kasu takerehaeraaka maka pukohoamo eke humaresa, ekeane he tua atura kenepkeka kake kasu yia akaya ayíáka, Kotimo ayiakakosaposane kakimaka rosaka taerako hemakapurane eke asiapo. Asiamo isiapo hemakapusuane rosaka taerako hemakapukua risike Koti rea makeraka pekea kurikurihoasireapo. Asia ayíáka pirisiti aporo fana reamo Kotimo ape, Namo Kakaro Kotesa Susu apea Koti rea apepo, aisa á yorokoa aporo hinamosupoko farimaka rakisiapo.

<sup>20</sup> Arirakano hepene apea Yasu isupoko farimaka fana hikia, Koti rea á rekenapo. Mekésere pirisiti aporo fanaraka rea ayíáka, maiya suamo Yasu ipi pirisiti aporo fanaraka rakiraka reraapo.

## 7

*"Fana pirisiti aporo hakásá meta kararaka reane Mekéserepo," aisane oyapo.*

<sup>1</sup> Sareme taonea aporo risiane Mekéseremo unihaeaka asekea reareapo. Unihae Koti Kárapoko epo pirisiti apororaka rakiraka reapo. Ayíáka reane Eparahamemo ipi yunu weraka, yunu aporo unihae yakai rukua faraka, Eparahame ipi apea pariperakano, Mekéseremo e sapenekea eaki makotena someane kayereapo.

<sup>2</sup> Someane karakano eaki Eparahamemo makata yaku kayereapo. Ipi makata su mosane parakuraka kaeyakosu sarimaraaka taehoareapo. Taeraka, tokonusu tokonasuaka Eparahamemo ipi mokoa, kaeyako hakásane su rofaka maka Mekésereki kayereapo. Karakano Mekéseremo moyereapo. Mekésereane yano motosane namo meaka Ereketae Rera Aporo Unihaepon, aiyaka yano motosapo. Sareme taonea aporoane unihaeaka asekea reasasamo ipi yano meta yano motoraka, Tau Rera Aporo Unihaepon, aiyaka yano motosapo.

<sup>3</sup> Arirakano ipi ata soko ipi ama soko fapo.\* Makasa kaua soko makasa kamuma soko makasa kaua kekema soko fapo. Ipi takapesa maiyane soko ipi kusua maiyane soko fapo. Kotimo hokosa yaiya rera ayíáka, Mekésereane pirisiti apororaka yaiya reareapo.

<sup>4</sup> Arirakano isiapo makasa kaua kekema fana Eparahamemo yunu wekea yunuweane marokehoareapo. Marokeraka yunu aporomo makata kemoane epo moyereapo. Mokoa makata su mosane parakuraka, kaeyakoane Mekésereki karakano Mekéseremo moyereapo. Mekésere e kára hokopukua reasasamo Eparahamemo eaki makata yaku kayereapo.

<sup>5</sup> Arirakano Rífafi aporo ira metakira pirisiti apororaka risike Kotimo somerakana, "Isiraya aporo hinamomo ipu makata mosane parakuraka, tokona suane ipu menapo. Kaeyakoane repo mokoanie." Aiyaka Kotimo somemane motorakano, pirisiti aporomo kaeyakoane moyereapo. Makata kasá aporoane soko, makata mosa aporoane soko, i suane Eparahamemo wainepé pusua aporo ayareapo. Asiamo Rífafi aporo iramo pirisiti aporoamo namina aporo tákemo makatane moyereapo.

<sup>6</sup> Arirakano Mekésere ipi Eparahamemo aporo irafapo. Kotimo makoteraka ayíáka kakovaposane Eparahameaki Mekéseremo some kayereapo. Some karakano Eparahamemo Mekésereki makata kaeyakoane kayereapo. Mekésereane Eparahamemo aporo tákemoanafona nine, Eparahamemo eaki makata yaku kayereapo. Makata yaku karakano mokoa, Mekéseremo Eparahameaki makotena someane kayereapo.

<sup>7</sup> Makotena someane kará aporoane kárapo. Makotena someane mará aporoane wakasemapo.<sup>†</sup> Makata ainane isiapo hemakapurakanapo.

<sup>8</sup> Arirakano Rífafi aporo iramo makata kaeyakoane ipu namina morapo. Aporo kura ayíáka Rífafi aporo ira ane i kurapo. Arirakano Mekéseremo makata kaeyakoane moraka

\* <sup>7:3</sup>: Kotimo sawia Mekésereane ipi ata soko, ipi ama soko, yano motosa popasafapo. Ipi makasa kaua soko, makasa kamuma soko, makasa kaua kekema i suane soko, yano motosa popasafapo.      † <sup>7:7</sup>: Mekésere kárapo. Eparahame wakasemapo.

e yaiya rekenapo. Arirakano Mekésereane Kotimo sawia poparaka, "E yaiya rerapo," aiyaka popahoareapo.

<sup>9-10</sup> Arirakano Rífafi aporo ira pirisiti apororaka risiane Eparahamemo aporo wainesa ayareapo. Rífafi aporo ira wainasiraka Eparahamemo, Mekésereaki makata kaeyakoane kayereapo. Eparahamemo Mekéreseaki makata kaeyako kasane, keseke epo hokosa wainenaka Rífafi faserepesareapo. Eparahamemo makata kaeyako kasa aiyáka, Rífafimo soko aiyáka kayereapo. Arirakano Rífafi aporo ira pirisiti apororaka risiane aporo metakiramo karakano, ipu kaeyakoane morapo. Asiamo pirisiti aporomo makata kaeyakoane mora aporoamo, aiyáka Mekésereaki, makata kaeyakoane kayereapo. Asiamo Mekéseremo Rífafiane marokehoareapo. Marokeraka ipi yano motosane namo kakaro kárapo.<sup>‡</sup>

*Pirisiti aporo meta pesane oyapo.*

<sup>11</sup> Kotimo somemane Moiseaki kasá maiya amo, Rífafi aporo ira hákasamo pirisiti aporomo rakirane rakisiareapo. Rífafi aporomo pirisiti apororaka rakiraka risike, aporomo makata watikiaka rakisiane himumo hemakapusuane kakaro kososa satiki, pirisiti aporo meta haku faserepeafunufapo. Kakaro kosohoanafonosekeno, pirisiti aporo meta haku faserepesapo. Aporo meta haku faserepesane Erone<sup>§</sup> aporo ira pirisiti aporoane hakásá yiyyafapo. Mekésere pirisiti apororaka area aiyáka, pirisiti aporo meta haku faserepesane soko hakásá ninesapo.

<sup>12</sup> Arirakano Rífafi aporo ira pirisiti apororaka risiane Kotimo sanasiraka, pirisiti aporo meta haku faserepesa maiya amo, Kotimo pirisiti aporomo rakisimo, somemane motosane soko sanasisapo.

<sup>13-14</sup> Asiamo isiapo Unihae Yasuane somerakanapo. E pirisiti apororaka reane Rífafi aporo irane wainepe pesafapo. E Yuta aporo ira wainepe pesapo. Rífafi aporo ira pirisiti aporomo saro sipi rukua, eke kima taeraka paira aiyáka, Yuta aporomo aiyáka pairafapo. "Yuta aporo iramo pirisiti apororaka rakikosapo," aiyaka Mosesemo somehoafareapo.

*"Mekésere asia pirisiti aporo metane Yasupo," aisane oyapo.*

<sup>15</sup> Somesamo kepoane oyapo. Mekésere asia pirisiti aporo meta haku faserepesapo.

<sup>16</sup> Arirakano pirisiti apororaka rakisimo Mosesemo somemane motoraka, Rífafi aporo ira wainepe pusua aporoane pirisiti apororaka rakirapo. Yasuane Rífafi aporo ira wainepe pusuaafapo. Asiane Yasuane pirisiti apororaka rakisimo Kotimo Mosesemo somemaneane kekemarakা murikimasafapo. Yasu yaiya rerakipoko e pirisiti apororaka rakisimo Kotimo murikimasapo.

<sup>17</sup> Asiamo e pirisiti apororaka rakirane fahokosafapo. Arirakano Yasuane Kotimo sawia poparaka, "Maiya suamo né pirisiti apororaka reeakosapo. Mekéseremo pirisiti apororaka rakiraka rea aiyáka, né soko aiyáka rakiraka reeakosapo," aiyaka popahoareapo. (*Buk Song 110:4*)

<sup>18</sup> Arirakano Rífafi aporo ira pirisiti apororaka rakira somemane fana motosane Kotimo metakarisapiro. Fana pirisiti aporomo rakisimo somemane motosane wakapufapo. Some mane motosa amo aporomo watikisa kepoane kakaro mafasafapo.

<sup>19</sup> Mosesemo somemaneamo aporoane yaiya makotesafapo. Arirakano yumo Kotimo ikia kara meta tarirakanapo. Ikia kara metane oyapo. Yasumo yapimo isiapo watikisane kakaro mafanapo. Isiapo kaikia amaramo Koti rea makeraka hiasireapo. Asiamo kawe someaka masa amo fana somemane motosane marokerakanapo.

<sup>20</sup> Arirakano Yasuane pirisiti aporohoasimo Kotimo aumaraka murikimasapo.

<sup>21</sup> Fana Rífafi aporoane pirisiti apororaka rakisimo Kotimo aumaraka murikimasafapo. Asiane Kotimo Yasuaki someraka, "Ano Koti unihaeaka reke, nōmo aumaraka somerakanapo. Maiya suamo ne pirisiti apororaka reeakosapo. Aiyaka someraka one nōmo metakariakosafapo." Aiyaka Yasu pirisiti apororaka rakisimo Kotimo aumaraka murikimasapo. (*Buk Song 110:4*)

<sup>22</sup> Asiamo Kotimo Yasuyaki kawe someaka masane isu aporo hinamoaki tariako, Yasu ipi pekea kusuapo. Kusuasamo Kotimo kawe someaka masa amo fana Moseseyaki someaka masa ane marokesapo.

<sup>23</sup> Arirakano fana pirisiti aporo yakai risiapo. I meta kurakano, kusuakipoko pirisiti apororaka makata rakirane yaiya rakisiafapo.

<sup>24</sup> Ipu yaiya rakianafonorakano asekeea, yumo pirisiti aporo Yasuane ipi yaiya rerasasamo, maiya suamo e yaiya pirisiti apororaka rakirapo. Yasumo pirisiti apororaka

‡ 7:9-10: Mekéseremo aporo metaki makata kaeyakoane kasafapo. § 7:11: Rífafi aporo ira wainepe pusua á Erone faserepesapo. Eronemo aporo ira aeyaka pirisiti aporo fanaraka reane murikimasapo.

rakiraka reke, kurafaraka yaiya rerasasamo, epo rakirane aporo metamo maka rakirafapo.

<sup>25</sup> Asiasamo yumo soko keseke soko Yasu aeyaka isu Koti rea hiakosasamo epo aporo hinamoane mafasirapo. Maiya suamo ipi yaiya rerasamo, ipoko farimaka Kotiaki someraka rekenapo.

*"Yasu ipi pirisiti aporo fanaraka reamo isu ararenapo," aisane oyapo.*

<sup>26</sup> Yasu ipi pirisiti aporo fanaraka rerasamo, epo isu ararehoane siapo. E namo kakaro koteaka susu rekenapo. Epo watikiaka rakirafapo. Epo makata watikisane hemakapurafapo. Makata watikiaka rakira aporo akiyaki Yasuane hakasa rea maiya amo epo watikiaka rakisiafapo. Asiamo e hepene yapura reke kakaro fanaraka rekeakosane Kotimo maresapo.

<sup>27</sup> Rífafi aporo ira pirisiti aporo fanaraka arisia ayíáka e rerafapo. Maiya suamo hauaka wo pirisiti aporo suamo namina watikisapoko saro ponomakau rukua paikia Kotiaki kaka faraka, aporo hinamomo watikisapoko saro nanikose rukua paikia kasá ayíáka Yasumo ayíáka kasáfapo. Arirakano aporo hinamomo makata watikisane kakaro mafahoasimo yape hakásamo Yasu kuraka ipi kauane soko yapiane soko Kotiaki kasapo. Ayíáka kasasamo eféra hunia makata meta kakakosane kakenafapo.

<sup>28</sup> Fana Kotimo Moseseyaki someaka masa maiya amo, pirisiti aporo fanaraka rakisimo, aporo kakaro koteaka ereketae risikianafonona aporoane murikimasapo. Arirakano keseke Kotimo Moseseyaki someaka masane farakano, Kotimo ipi hokosaki aumaraka someraka, "Né pirisiti apororaka rekeakosapo." Aiyaka ipi hokosa Yasuane murikimaka makoterakano maiya suamo Yasuane kakaro siaraka reapo.

## 8

*"Kotimo isuane Yasuyaki kawe someaka masane fanapo," aisane oyapo.*

<sup>1</sup> Some akara kepoane oyapo. Pirisiti aporo kakaro kotesane Yasupo. Maiya suamo e pirisiti aporo fanaraka reke aporo hinamopoko farimaka rakiraka rekenapo. Hepene yapura Unihae Koti Káramo honoko tumuru takua Unihae Kini Karamo sea kára á, Yasuane isiapo pirisiti aporo fanane kakenapo.

<sup>2</sup> Hauaka wo Kotimo farae ape\* kisia ayíáka hepene hauaka yapura kakaro ape Unihaeanekerekerehoko kisia rekenapo. Aporomo kisiafapo. Unihae Kotimo kisiapo. Apeane kakarua isiapo pirisiti aporo fanaraka rea Yasumo isupoko farimaka makata rakirakanapo.

<sup>3</sup> Arirakano hauaka wo pirisiti aporo fanamo saro sipi rukua paikia Kotiaki kaka, makata meta soko yaku kaka ayíáka rakirapo. Arirakano hepene hauaka yapura, isiapo pirisiti aporo fana Yasu reke, epo soko Kotiaki makata yaku kasapo. Aporomanomo makata watikisane mafahoasimo ipi kauane yaku kasapo.

<sup>4</sup> Asiamo Yasumo pirisiti aporomo makata rakisiane hakureapo. Yasumo makata rakirane, hauaka wo pirisiti aporomo makata rakira aki hakasa yinesafapo. Yasumo pirisiti aporomo makata rakirane hepene apea makata rakirapo. Arirakano hauaka wo pirisiti aporomo Mosesemo somemane kekemaraka rakirapo.

<sup>5</sup> Hauaka wo ipu pirisiti apororaka rakiraka, hepene yapura makata ainane ipu murikimaka rakirakanapo. Aina ayíáka, Mosesemo farae ape Kotiaki kekerehokosa apeane, kiakosakipoko Kotimo eaki someraka, "Ne uri Sainae teraya somemane mako hinakasamo, ape kiakosane nōmo neaki tarisiapo. Tarisia ayíáka murikimaka kinie." Aiyaka somerakano, Kotimo tarisia ayíáka Mosesemo murikimaka kisiapo. (Kisim Bek 25:40)

*"Kawe someaka masane Keresomo asekea rekenapo." Aisane oyapo.*

<sup>6</sup> Arirakano Yasumo ipi pirisiti apororaka rakiraka, hauaka wo pirisiti aporomo rakirane, Yasumo marokeraka rakirakanapo. Kotimo ipi aporoaki kawe someaka masane aporomo kakimakasimo, Yasu pekea tipia asekea rekenapo. Kawe someaka masamo fana someaka masane marokesapo. Fana Kotimo makoteraka ayiakakosaposane wakasemapo. Kawe Kotimo makoteraka ayiakakosaposane namo kakaro kárapo.

<sup>7</sup> Arirakano fana someaka masa amo siasatiki, Kotimo kawe someaka makafunufapo. Siahoanafonosekeno asekea some kawe someaka masapo. Mosesemo somemaneamo aporo hinamomo himu watikisane maereketaenafapo. Asiamo maereketaena wakapuanrekenafapo.

<sup>8</sup> Asiamo fana someaka masane fesenorakano aporomanomo watikisane Kotimo asekea someraka,

\* 8:2: Fana hauaka wo Isiraya aporomo Kotiaki makata yaku paikia kakakosakipoko farae ape kisiapo.

"Ano unihaeaka reasasamo repo kaiyinie. Keseke maiya metamo nōmo aporo hinamoaki kawe someaka makosápo. Asiamo Isiraya aporo iraki soko, Yuta aporo iraki soko, nōmo kawe someaka makosapo.

<sup>9</sup> Someaka makosane kawe haku rekeakosapo. Arirakano fana ipu makasa kaua kekemaki homo someaka masa ayíáka, keseke ayíáka someaka makosafapo. Fana namina Iyipi hauaka metakarikia pusimo, nōmo i karikia pusua maiya amo nōmo someaka masapo. Fana someaka masane ipu kakimaka kekemahoanafonorakano, nōmo iane metakarikia asekea reafapo.

<sup>10</sup> Arirakano nōmo fana someaka masane metakarikia, Isiraya aporo hinamoaki kawe someaka makosane oyapo. Nōmo somemané motosane ipu hemakapusimo i himua keakosapo. I himua kekeia, nōmo somemané kekemahokosane namina seshokosapo. Ipu Kotiane anopo. Nōmo iane asekea rekeno ipu nōmo somemané hemakapukua koteaka risikiakosapo. Ayíáka risikino nōmo aporo hinamoane ipo.

<sup>11</sup> Aporo metamo ipi aporo tákéane sukururaka someraka, 'Unihae Kotiane hemakapunie,' aihokosafapo. Aihokosapoko asiane aporo suamo anoane hemakapukusapo. Aporo kára risiamo soko aporo wakasema risiamo soko, aporo suamo ano hemakapukusapo.

<sup>12</sup> Asiamo ipu watikiaka rakirakano nōmo asekea iane kamenakaraka mafahokosapo. Mafaraka ipu watikisane nōmo eféra hunia hemakapukusafapo."

Aiyaka Kotimo kawe someaka makosane porofete aporomo Kotimo sawia popahoareapo. (*Jeremia 31:31-34*)

<sup>13</sup> Kawe someaka masasamo Kotimo hemakapuraka, "Fana someaka masane patéreapo." Aiyaka Kotimo hemakapurapo. Patéane pasu paté asiapo. Maiya wakasema nina keseke fa ana ayíáka su fahokosapo.

## 9

*Fana pirisiti aporo fanaraka reamo Kotiaki makata kakayia yapiane kasane oyapo.*

<sup>1</sup> Fana Kotimo Moseseyaki someaka masa maiya amo, Koti rea makeraka peasisimo makata rakiakosakipoko somemané motosapo. Asiamo Kotiaki kekerehokosakipoko hauaka wo ape kiakosane, "Uyáka kinie," aiyaka somemané motosapo.

<sup>2</sup> Somemané motorakano Mosesemo farae apeane kisiapo. Apeane tipia pasumo enonosapo. Enonoraka ikia koro sapeane yano motoraka Kotesa Susu apepo. Ape á nafa wiki yatipinusu paikia taeraka, arirakano teboro soko motokoa, teboro kima farawa Kotiaki yaku kakakosane taesapo.

<sup>3</sup> Farae ape kakaru tipia pasu waremaresamo mataisane ape taku ra yano motoraka Namo Kakaro Kotesa Susu apepo,\* aiyaka yano motosapo.

<sup>4</sup> Kotesa Susu apea pasumo enonosane makeraka makata wape yamona paitiyisimo teboro asia rakiraka koroto maka rakikia sekesapo. Arirakano Namo Kakaro Kotesa Susu apea koroto meta maka rakikia, maua kima yapurane soko, fe takua soko, korotomo paikia suakataeraka, ape á motosapo. Koroto metakira mokoa, petoro rakisiapo. Petoro rakisia á Kotimo hepene yapunaka asipa asia<sup>†</sup> kasá ima yaoa hurupepesane, ipu mokoa petoro kakarua kesapo. Petoroane maua kakarua makesapo. Arirakano Eronemo tatia pórásá á ira ku konokosa faserepesane soko, maua kakarua makesapo. Arirakano Kotimo somemané motosane, ekea popasane soko, maua kakarua kesapo.

<sup>5</sup> Maua kima yapura Kotimo faesane hemakapukusakipoko, hepene aporo asia murikimaka tetá rakikia taesane, maua kima taesapo. Tetá toa á auwa petaua maua kima saro nanikose yapiane pirisiti aporomo mareráraka, aporomanomo makata watikisane mafahooasimo wakirusuapo. Arirakano makatane su nōmo yumo yomo somerakanone, someraka kake maiya fahokosapo. Some metakira somehokosapoko asiane somerakanafapo.

<sup>6</sup> Arirakano farae ape kikia, ape kakarua makata su taesakipoko maiya suamo pirisiti aporo Kotesa Susu ape takua pekeia, yaoa pukua ayíáka Kotimo makata rakirane rakisiapo.

<sup>7</sup> Asiane ape kakaru tipia pasumo mataisakipoko Namo Kakaro Kotesa Susu ape taku ra, pirisiti aporo su purafapo. Pirisiti aporo fanaraka reane ipi hákasa purapo. Maiya suamo e purafapo. Keremisi hakásamo yape hakásamo purapo. Nenakamaka purafapo. Esaro nanikose yapi maka pukua Kotiaki kakako purapo. Epo ipi meraruaamo hasaka watikiaka rakisiane Kotimo mafahooasimo yapiane kaka, ayíáka aporo hinamo suakipoko soko, yapi hakásamo nine karápo.

<sup>8</sup> Ayíáka yapi kará kepoane yakapare? Ho Kotesamo kepo tarirane oyapo. Aporomanomo watikisane mafahooasimo, Kotiaki saro sipi rukua paikia Kotiaki yapi kará

\* <sup>9:3:</sup> Aporo meta purapaka apeane yaposapo. Pirisiti aporo fana ipi hákasa apea purapo. † <sup>9:4:</sup> Asipa asiane Hipuru meaka yano motoraka mánapo. Isiapo meaka yakapa airapo.

somemane ane yia rekeno, Namo Kakaro Kotesa Susu ape Koti rea, aporo hinamo suane hiakosane iikia kakenafapo.

<sup>9</sup> Farae apea pirisiti aporomo makata rakisia ayiáka, Yasumo makata rakiakosane isiapo hemakapusimo ayiáka murikimaka tarisiapo. Fana Kotimo Moseseyaki someaka masa maiya amo, ipu farae apea makata yaku kasáne soko, saro ponomakau paikia kasáne soko, makata kasá maiya amo aporo hinamomo himu watikiaka hemakapusuane kakaro mafahoanafonorako yaiya karáka risiapo.

<sup>10</sup> Asiamo makata nená somemaneamo soko, he nená somemaneamo soko, he tapura somemaneamo soko, aporo hinamo koteaka risikiasimo tarirapo. Asiane aporo hinamomo himu hemakapurane maropohoanafonorako yia, namina somemaneanekkekemaraka risiakipoko Kereso pekea maropohokosa maiya ane fasereperakano kawe someaka masapo.

<sup>11</sup> Asiamo yumo Kereso peraka pirisiti aporo fanaraka reamo makata rakisiapo. Hepene yapura Namo Kakaro Kotesa Susu ape Koti rea apea epo rakisiapo. Epo rakisia apeane hauaka wo aporomo kisifapo. Ape hepene yapura reane namo kakaro karasasamo, hauaka wo farae ape aporomanomo muríkima kisiane marokesapo.

<sup>12</sup> Hepene yapura farae ape tipipa yano motoraka, Namo Kakaro Kotesa Susu ape á Yasuane yorokoa saro ponomakau mano yapi soko, saro nanikose yapi soko maka pusuafapo. Yape hakása epo ipi yapiane maka pukua isu Kotiyaki yaiya risikiasimo epo ipi yapiomo roporaka maresapo.

<sup>13</sup> Arirakan fana saro nanikose yapi soko, saro ponomakau apinu yapi soko, saro ponomakau matera mano paikia inaka kosane katema koane soko mosapo. Mokoa aporo hinamomo himu watikisan kusuhoasimo iaki yapi wakiruraka, katema ko soko farurusuapo. Farururakan, Kotimo somemane koarentera risia aporomo kaumo watikiraka rakisiane kususapo.

<sup>14</sup> Arirakan fana pirisiti aporomo makata rakiako somemane kekemasa maiya amo, aporomanomo makata watikisan saro ponomakaumo yapi kusuraka, mafana ane Yasu Keresomo ipi yapi marokeraka, aporomanomo himu hemakapurane namo kakaro kusuraka mafasapo. Yaiya Rera Ho Kotesamo wakapu aeyaka Yasumo epo ipi kau soko, yapi soko, Kotiaki kasapo. E ipi namo kakaro watikihoanafonosasamo, kotesa susuane Kotiaki yaku kasapo. Asiamo isiapo makata watikisan soko, himu watikisa kepoane soko, epo kusuraka mafasapo. Arirakan somemanemo isu tipura ayiáka kesane Yasumo tonotaesapo. Asiasamo isiapo Yaiya Rera Kotipoko isiapo rakísimo epo arareraka mafasapo.

*Kotimo aporomanoyaki kawe someaka masane Yasumo yapiomo kakaro aoraka someaka masane oyapo.*

<sup>15</sup> Kotimo kawe someaka masane tarikia, Yasu ipi tipia reke aporopoko Kotiaki some kaka, arirakan Kotipoko aporoaki some kaka, ayiáka tipia reapo. Arirakan Kotimo fana someaka masa maiya amo, aporomo watikiaka rakirakan aseke, ipoko Yasu kuraka ipu watikisan Yasumo kakaro mafásapo. Asiamo fana soko, yumo soko, aporo hinamoane Kotimo peaerakan, isiapo suamo Kotiane kekemana aporo hinamoaki Kotimo someraka, "Nómo reaki makata kotesa susu kakakosapo," aisapo. Asiamo Yasu kususamo isu su yaiya risikiakosapo.

<sup>16</sup> Arirakan aporo ipi kusuakipoko, epo makata kemoane ipi aporo iramo parakuraka mokoasimo, e kukusiraka area maiya amo, someaka marapo. Epo someaka masakipoko, kukunafonorakan, makata kemoane haru morafapo. Kurakan aseke, epo makata kemoane moyane siahoasireapo.

<sup>17</sup> E hitafe area maiya amo, epo makata kemoane mokoasimo someaka masane morafapo. E kusuakipoko makata kemoane mokoasimo someaka masane sia hakása nine rakirapo.

<sup>18</sup> Aina ayiáka fana someaka masane kakaro ayiakakosapo, aiyaka tariakosakipoko saro ponomakau rusua kusuapo. Rusua kuraka yapi purakano aseraka, Kotimo somemane motosane, kakaro hemakapukua hakása yineraka rakirapo.

<sup>19</sup> Ayiáka fana aporo hinamo suaki Kotimo somemane motosane, Mosesemo some kasapo. Some kaka faraka, saro ponomakau mano yapi soko, saro nanikose yapi soko, mokoa heyaki sarimasapo. Sarimarakira hisopo eyane maka,<sup>‡</sup> saro sipi íti súsa rasamo taporaka, hea kokomarekeea somemane sawia wakirukua, aporo hinamoane soko su wakirusuapo.

<sup>‡</sup> 9:19: Iro hisopo eyane kosa masaria wate asiapo.

<sup>20</sup> Wakirukua Mosesemo someraka, "Someaka maraka ayiakakosaposane kakaro ayiakakosapo. Aiyaka hemakapusimo yapimo tarirakano repo aserakanapo. Someaka masane kakimakanie," aiyaka Mosesemo somesapo. (*Kisim Bek 24:8*)

<sup>21</sup> Someraka reke, yapi maka, farae ape soko, meraki soko, ape kakarua makata taesa akiyaki su, yapimo wakirusuapo.

<sup>22</sup> Asiamo somemane motosa ikia karane makata su kusuhoko yapimo wakirurapo. Aporomanomo makata watikisane mafahoasimo makata kakayia rukua paikia Kotiaki karápo. Yapi punafonorakano aporomanomo makata watikisane Kotimo mafanafapo.

*Isiapo watikisane mafahoko Kereso ipi yapi pusuane oyapo.*

<sup>23</sup> Fana Kotimo Moseseyaki someaka masa maiya amo, aporomo ipi makata watikisane kusuhoko, makata kakayia rukua Kotiaki karáka yapiane wakirusuapo. Hepene yapura makata ainane murikimaka hauaka wo rakisiapo. Asiamo hauaka aporomo ipi makata watikisane kusuraka, Kotiaki makeraka hiasimo, Yasumo ipi yapiane kasapo. Makata kakayia kasá maya amo, yapiamo kau kima hákasane kususa nine, Yasumo yapimo namo kakaro himunane soko kusuraka mafanafapo.

<sup>24</sup> Hauaka wo farae ape aporomo kisia apeane, Namo Kakaro Kotesa Susu ape takua Yasu pusuafapo. Asiamo hauaka wo farae ape kisiane hepene yapura ape Namo Kakaro Kotesane aporomo murikimaka kisiapo. Hepene yapura Namo Kakaro Kotesa apea Yasu hikia aporomanomo makata watikisane mafahoko rakikia masapo. Rakikia maraka, Koti rea makeraka kake isupoko farimaka somerakanapo.

<sup>25</sup> Arirakano hauaka wo pirisiti aporo fanaraká reamo keremisi hakásá faraka, saro ponomakau rukua, yapiane maka, farae apea Namo Kakaro Kotesa Susu ape takua maka purapo. Yapi maka purane pirisiti aporoamo kakaro ipi yapifapo. Arirakano keremisi hakásá meta farakano, efera hunia saro ponomakau rukua yapiane maka, ape kakarua yorokoa purapo. Asiane Yasumo ayiáka rakisiafapo. Yasuane efera hunia kukua, efera hunia kukua asiafapo.

<sup>26</sup> Asia satiki, hauaka wo kepomarekea rakisia maiya amo, ipi hunia soko umisa maka kukua, hunia soko umisa maka kukua ayiakafunureapo. Asiane fahoko mkena maiya amo, aporomanomo makata watikisane kakaro mafahoko Yasu kuraka, ayiáka epo ipi yapiane Kotiaki yape hakásá kasapo. Asiamo makata watikisamo wakapuanie Yasumo rukumosakatapikia epo marokesapo.

<sup>27</sup> Arirakano makata faserepeakosane Kotimo murikimaka maresane oyapo. Aporomano yape hakásá kurapo. Aporomanoane kurakano keseke Kotimo takekea hukurukua parakuuhokosapo.

<sup>28</sup> Asiamo aporomo yape hakásá kura ayiáka, yape hakásá Yasu kusuapo. E kuraka aporomanomo makata watikisane epo maka kusuapo. Arirakano Yasu efera hunia paripeakosapo. Aporomanomo makata watikisane efera hunia mako paripeakosafapo. Yasu perakarihoamo kau risia aporo hinamoane pasimokoako paripeakosapo.

## 10

*"Fana makata yaku kasamo makata watikisane kakaro mafasafapo," aisane oyapo.*

<sup>1</sup> Hihi aseramo amano hikumisi aserane namo kakaroane hihi asera á rekenafapo. Namo kakaroane haku reke, hihi aserane nenakamaka murikimasa ayapo. Aina ayiáka keseke makata kotesa peakosane namo kakaropo. Fana Kotimo somemane motosane nena murikimasa makata ayapo. Keremisi hakásá farakano saro ponomakau rukua paikia Kotiaki kaka, yaiya rukua paikia karakano asia amo aporoane maereketaesafapo.

<sup>2</sup> Arirakano makata kakayia kasámo aporo namo kakaro maereketaesa satiki makata karáne metakariafunupo. Aporomanomo makata watikisane kakaro mafarakanone ipu himumo makata watikisa hemakapurane hemakapufunufapo.

<sup>3</sup> Arirakano ipu makata kakayia akara maiya amo, ipu makata watikisane efera hunia hemakapurapo. Keremisi suamo saro ponomakau rukua paikia karakano asekeea aporoamo ipu makata watikisane hemakapurapo.

<sup>4</sup> Asiamo saro ponomakau apinu yapimo soko, saro nanikose yapimo soko, makata watikisane kakaro mafanafapo.

<sup>5</sup> Makata kakayia yapimo makata watikisane kakaro mafahoanafononasamo, Keresoane hauaka wo apira maiya amo epo Kotiaki someraka,

"Kotio, saro ponomakau rukua akaráne soko, makata meta yaku akaráne soko, nómó asekeea sesenafapo. Ano apororaka rekeasimo aporomo kauane anoaki kasapo."

<sup>6</sup> Saro ponomakau maýa paisiane soko, makata watikisapoko mafahoasimo makata yaku kasane soko, nómó sesenafapo.

<sup>7</sup> Sesehoanafonorakano, fana nōmo sawia anoane popahoareapo. Anoane popasasamo Kotio, nōmo hemakapusuane nōmo rakiako perakayiapo." Aíyaka Keresomo somesapo. (*Buk Song 40:6-8*)

<sup>8</sup> Somemane motosa ikia karane Yasumo someraka, "Saro ponomakau rukua yaku akaráne soko, saro ponomakau malya paikia akaráne soko, aporomanomo makata watikisapoko yaku akaráne soko, suane nōmo sesenafapo." Aíyaka somerakano yia, somemane motosamo paikia kasapo.

<sup>9</sup> Arirakano Yasumo efera hunia someraka, "Nōmo hemakapusua rakiako ano perakayiapo," aisapo. Asiamo fana saro ponomakau rukua paikia kakanie, aíyaka somemane motosane Kotimo fimaraka, akipoko ropoane Keresoane isupoko kukusimo kasane ayapo.

<sup>10</sup> Karakano Yasu Keresomo Kotimo hemakapusuane kekemarakaka rakiraka, ipi kau soko, yapi soko, yape hakása kaka faraka, isiapo makata watikisane namo kakaro mafasapo. Mafaraka isuane maereketaesapo.

*"Kereso ipi kau soko ipi yapi soko kasa amo aporomanomo makata watikisane sia mafasapo," aisane oyapo.*

<sup>11</sup> Sere suamo pirisiti aporo suamo rakiraka, pipu saro ponomakau rukua paikia kaka, arirakano rau efera hunia saro ponomakau rukua paikia karapo. Karakano yia makata kakayia amo aporomanomo makata watikisane kakaro mafanafapo.

<sup>12</sup> Arirakano aporomanomo makata watikisapoko Yasuane yape hakásamo kukua, ipi kau soko, yapi soko kasapo. Asiamo ipi makata kaka faraka, ipi hikia Kotimo hokono tumuru takua kakenapo.

<sup>13</sup> Kake ipi yunuane Kotimo hurutapiasimo ipi kau kakenapo.

<sup>14</sup> Yape hakásamo Yasumo ipi kauane yaku kasakipoko, aporomanomo makata watikisane mafaraka, yaiya koteaka susu risikiasimo maereketaesapo.

<sup>15</sup> Maereketaesane isiapo hemakapusimo, Ho Kotesamo soko isuaki kakaro tarikia some kasapo.

<sup>16</sup> Ho Kotesamo fana some kasane oyapo.

Unihae Kotimo someraka, "Nōmo aporo hinamoaki nōmo kawe someaka makosane oyapo. Nōmo somemaneane ipu hemakapusimo i himua keakosapo. Somemaneane i himua keeka ipu hemakapukua kekemarakaa seseraka risikiakosapo."

Aíyaka Kotimo somerakano Kotimo sawia popahoareapo. *(Jeremaia 31:33)*

<sup>17</sup> Asiamo Unihae Kotimo some meta soko some kasane oyapo.

"Ipu fana makata watikiaka rakisiane nōmo efera hunia hemakapukusafapo." Aíyaka Kotimo somerakano popahoareapo. *(Jeremaia 31:34)*

<sup>18</sup> Asiamo aporomanomo makata watikisane Kotimo kakaro mafasasamo efera hunia makata kakayia rukua paikia Kotiaki kayane siahoasifareapo.

*"Keresomo isu mafasisasamo Koti rea makeraka hiane siahoasireapo," aisane oyapo.*

<sup>19</sup> Keresoa paosa aporo maeo, Yasu kuraka isiapo makata watikisane mafasasamo, Namo Kakaro Kotesa Susu ape Koti rea á isu namonafaraka mapiraraka hiane siahoasireapo.\*

<sup>20</sup> Arirakano fana farae ape kisia maiya amo, pasu waremaresamo Namo Kakaro Kotesa Susu ape takua mataisapo. Mataisekeno, Koti rea apea aporomanoe hirafapo. Yasu kusua maiya yiamo pasu waremaresane Kotimo makoaka taesapo. Makoaka taesasamo Koti rea aporomanoe hirafapo. Asiamo Yasu kusuasamo Koti rea hiakosakipoko, yaiya rera ikia karane Yasumo tarisiapo.

<sup>21</sup> Arirakano Yasu kusuane maturikia taerakano, turikia pukua epo Kotimo aporo hinamoane asekeua reke, pirisiti aporo fanaraka reke, Koti rea makeraka makata rakirapo.

<sup>22</sup> Asiasamo isu Koti rea makeraka pekea, makata watikisa tipia risikianafonorakano, Koti masesehoasimo koteaka risike, eaki kakaro himu hakásarakaa hemakapukua risike Kotiaki somehoko perapo. Isiapo makata watikiaka rakisia yaiya hemakapuraka risirane Yasumo yapimo kusuraka mafasapo. Arirakano isiapo kauane he sirisamo kusuna ayiáka, isiapo ainane soko Yasumo yapimo kususapo. Kusuraka ayiáka risike Kotiaki somehoko perapo.

<sup>23</sup> Arirakano fana isiapo Kotiaki himu hakásarakaa hemakapusua ayiáka yaiya Kotiaki himu hakásarakaa hemakapukua risikinapo. Kotimo ayiakakosaposane ayiakakosapo. Asiamo Kotimo isu arareraka makotehokosaposane, isiapo kaikia himu hakásarakaa hemakapukua paroaka risikinapo.

\* **10:19:** Kotimo kakaro apeane hepene yapura rekenapo. Farae ape hákasa nine takuane, Namo Kakaro Kotesa Susu takuane Koti á rekenapo, aíyaka yapake somerapo.

<sup>24</sup> Arirakano Kotimo isu araresasamo isiapo isina yiamo metamo metane arare, metamo metane arare, ayiáka risike, isina su yiamo ayiáka himu tumutumo hemakapukua risike kotehokosapo.

<sup>25</sup> Arirakano nōmo kaiyiane repo Kotiaki kekerehoko sarimana amo Keresoa paosa aporo hinamomo metakira sarimahoko perakanafapakae. Asiamo peanafonona aporoamo ayianane kekemahokopo. Kotiaki kekerehoko sarimanane metakariakopo. Sarimana maiya amo isiapo isina meta arareraka, ipi himumo Kotiaki paroaka hemakapusimo, some kaka ararehoanie. Unihae peakosa maiya makeanamo, metamo koteaka rakisimo namo kakaro ararehoanie.

*"Kotimo hokosa Yasuane metakarikia patera tarirakopo," aisane oyapo.*

<sup>26</sup> Kotimo kakaro someane isuaki some karakan, isiapo kakimaka yia, someane metakarikia mafasira aporo Yasuane metakarikia, eaki patera tarirakano, efera hunia eaki risikiako parihoasimo makata meta kakakosane kakenafapo.

<sup>27</sup> Aporo hinamomo kakimaka yia, keseke koareaeraka Kotiaki yunuraka risikino, kára fanasihokosane kakenapo. Anapaka namohoanie. Kotimo someane koareaeraka yunuraka risia aporo hinamomo ira rufi káramo paiyakosapo.

<sup>28</sup> Kotimo somemanane Mosesemo some kasane aporo hakása metamo koareaeraka watikiaka rakirakano, aporo tetamo soko metao, aporo isiammo soko metao, aporoamo watikisane ipu asesasamo hukurukua somerakano watikiaka rakisia aporoane kame-nakahoanafonoraka eane rusua kusuapo.

<sup>29</sup> Arirakano Mosesemo some kasane koareaesa aporoane rusua kurakanone, Kotimo hokosa Yasumo some kasane aporomo koareaeraka eaki patera tarirakano, aporoane Kotimo kamenakahokosare? Wae. Eane kakaro kára fanasihokosapo. Aporoamo hemakapura, Yasumo yapiane nenakamaka makata reapo, ayiáka hemakapura aporoane kotimo hukurukusapo. Asiamo Yasumo yapimo Kotimo aporoyaki kawe someaka masane maparosapo. Arirakano aporoane Ho Kotesamo e araresane mainamarerakano, aporoane fanasihokosane kárahokosapo.

<sup>30</sup> Asiamo Kotimo someraka, "Makata watikisakipoko ropoane nōmo kakakosapo. Makata watikisane nōmo roporaka fanasihoko motoakosapo," aisapo. Aisamaso isiapo hemakapuanne epo namo kakaro ropo fanasinane kakakosapo, ayiáka hemakapurakanapo. Kotimo, efera hunia someraka, "Unihae ipia paosa aporo hinamomo someane kaikia hukurukua takekeea parakuhokosapo," aisapo. *(Lo 32:35-36; Buk Song 135:14)*

<sup>31</sup> Asiamo aporomo watikisakipoko Kotimo hukurukua fanasihokosane namo kakaro karahokosapo. Anapaka namoraka risikianie.

*"Repo kakimaka paroaka risikianie," aisane oyapo.*

<sup>32</sup> Re fana risia maiyane hemakapunie. Maiya amo Kotimo someane repo kakimaka, Kotimo faesane hemakapusuakipoko, reaki makata umisa kára fasereperakano, repo Yasuane metakarisafapo.

<sup>33</sup> Arirakano aporo suamo asekeasimo, reane Keresomo yunu aporomo kakama mainamareraka mokoatikisapo. Arirakano aporo metakira soko mokoatikirakano repo ararehoko hemakapukua re pukua hakása risiapo. Hakása risikino re suane mokoatikisapo.

<sup>34</sup> Arirakano Keresoa paosa aporo metakira tipura kesane, repo kamenakaraka hemakapusuapo. Arirakano repo makata kemoane aporo metakiramo hakimokoa farakano, repo mahisihoanafonoraka seseaka risiapo. Asiamo repo hemakapuraka, "Aporomo hauaka kara wo isiapo makata kemoane mokoatikirakano, Kotimo hepene yapura isupoko makata kemo taesane yaiya tokoakosapo. Kotimo makata kakakosaposane fahokosafapo," ayiáka repo paroaka hemakapusuapo.

<sup>35</sup> Ayiáka hemakapusuane yumo metakariakopo. Yaiya himu hakásaraka hemakapukua risikino Kotimo makata ropo kotesa kára kakakosapo.

<sup>36</sup> Kotimo hemakapusua rakiakosane soko, epo reaki ayiakakosaposa mokoakosane soko, himu hakásaraka hemakapurane hemakapukua rosaka taehoanie.

<sup>37</sup> Asiamo Yasu kereso paripeakosane Kotimo sawia popasane oyapo. Kotimo someraka, "Maiya wakasema nina, e paripeakosaposane, yoaenafaraka kakaro foaka paripeakosapo.

<sup>38</sup> Asiamo aporo hinamomo anoaki himu hakásaraka hemakapukua risiane i anoyaki yaiya risikiakosapo. Arirakano aporo hinamomo anoaki himu hakásaraka hemakapurane metakarikia fimiti paripurakano, iane nōmo sesehokosafapo," aisapo. *(Habakuk 2:3-4)*

<sup>39</sup> Arirakano fimiti paripura aporo hinamomo isufapo. Fimiti paripura aporoane marutaehokosapo. Arirakano isiapo Kotiaki himu hakásaraka hemakapurakanepo isu mafasi-akosapo.

## 11

*Kotiaki himu hakásaraka hemakapura kepoane oyapo.*

<sup>1</sup> Kotiaki himu hakásaraka hemakapura kepoane oyapo. Kotimo kakakosaposane mokoakosakipoko kau risike himumo hemakapuraka, “Epo kakakosapo, aisasamo epo namo kakaro kakakosapo.” Aiyaka hemakapukua risikinone, Kotiaki himu hakásaraka hemakapukua risikinapo. Makata ayiakakosapo, aisane himo asekeanafonorakano yia, kakaro rekenareapo, aiyaka hemakapurakanone, Kotiaki himu hakásaraka hemakapurakanapo.

<sup>2</sup> Arirakano wate fana aporo hinamomo Kotiaki himu hakásaraka risikino, iaki Kotimo someraka, “Añoaki himu hakásaraka hemakapukua arisiane kotehoareapo,” aisapo.

<sup>3</sup> Arirakano makata fana kakaro risikianafonosane Kotimo somehoramo faserepeperaka risiapo. Asiamo wate fana makata su fasane Kotimo somehoramo hauakane soko, tiane soko makata suane faserepepesapo. Makata ane isiapo aseraka hemakapuraka, “Makata su fasane Kotimo ayíáka makata su mafaserepepehoareapo,” aiyaka himu hakásaraka hemakapurakanapo.

*Aepo reane oyapo.*

<sup>4</sup> Arirakano Aepomo Kotiaki himu hakásaraka hemakapusuasamo Kotimo somesane kakimaka kekemaraka Kotiaki makata yaku kasapo. Arirakano Kenemo Kotimo somesane kairaka kaikia, ipi himumo koteaka hemakapunafonoraka ayíáka Kotiaki makata yaku kasapo. Ayíáka kasane Kotimo sesesafapo. Arirakano Aepomo Kotiaki himu hakásaraka hemakapuraka makata yaku karakan, Kotimo asekeea sesesapo. Kotimo seseraka someraka, “Nómo koteaka hemakapukua rakisiasamo ne aporo ereketaesapo.” Aiyaka someraka makata yaku kasane Kotimo masapo. Arirakano Aepo ipi kusuapo. Ipi kusuakipoko epo himu hakásaraka hemakapusua ayíáka, isiapo soko ayíáka hemakapusimo, isuaki tarirakanapo.

*Inoke reane oyapo.*

<sup>5</sup> Arirakano Inokemo Kotiaki himu hakásaraka hemakapukua reasasamo e kusuafapo. Kotimo e karikia hisiapo. Karikia hisiakipoko aporomo e kope pusuapo. Kope pusuane asesafapo. E karikia hiasiraka reamo, “Kotimo eane sesesapo,” aiyaka Kotimo sawia popahoareapo. (Stat 5:24)

<sup>6</sup> Asiamo repo Kotiaki himu hakásaraka hemakapunafonorakano Kotimo sesenafapo. Re Koti rea makeraka peraka úyaka hemakapunie. “Kotiane kakaro rekenapo. Eaki kurikurirakan, epo kairaka ano makotehokosapo.” Aiyaka Kotiaki himu hakásaraka hemakapukua kurikurihoanie.

*Noa reane oyapo.*

<sup>7</sup> Arirakano Kotimo Noaki ayiakakosapo aiyaka someraka, yao peakosapo aisane, Noamo asekeanafonosa nine, epo Kotimo someane kakimaka, Kotiaki himu hakásaraka hemakapukua reke, kasu tokohoareapo. Ipi hinamo soko, ipi hokosa soko mafasiakosakipoko, kasu tokohoareapo. Kasu tokorakan hauaka aporo hinamo metakiramo Kotimo someane kakimakanafonoraka risiane, Kotimo fanasinane kayereapo. Noamo himu hakásaraka hemakapusuakipoko Kotimo eaki, “Ne aporo ereketaesapo.” Aiyaka Kotimo ipi ereketae ainane eaki kayereapo.

*Eparahame reane oyapo.*

<sup>8</sup> Arirakano Eparahamemo Kotiaki himu hakásaraka hemakapukua reke Kotimo eaki someraka, “Hauaka one metakarikia, hauaka meta nōmo neaki tarirakan, ne hauaka á punie. Ne rekeakosa hauaka ane nōmo neaki kakakosapo.” Airakano kakimaka e pureapo. Pusuanne hauaka kumukua á e pureapo.

<sup>9</sup> Eparahamemo Kotiaki himu hakásaraka reke, hauaka kakakosaposa á reke, hauaka wafaya area ayíáka reafareapo. Aporo kimisi area ayíáka farae ape kikia reareapo. Aisake soko, Yakope soko, i suane farae apea risiareapo. Kotimo tetáki soko, hauaka ane kakakosapo, aihoareapo.

<sup>10</sup> Kotimo hauaka kakakosapo aisa hauaka á reke, hauaka ane epo kakaro kitimaka reafareapo. Arirakano epo hemakapusuane hepene yapura Kotimo murikimaka, ape kisia á hiakosakipoko hemakapukua reke, hauaka wo farae apea reke himumo hisiraka reafareapo.

*Saramo Kotiaki himu hakásaraka hemakapukua kayane oyapo.*

<sup>11</sup> Arirakano Saramo Kotiaki himu hakásaraka hemakapukua kake, e sakora kaya maiya amo uminafaraka, e sisimaraka kayamo hokosa umisapakae. Ipi hemakapuraka, “Kotimo

ayiakakosaposane epo rakiane siahosireapo. Epo ayiakakosapo aisasamo kakaro ayiakakosapo," aiyaka hemakapureapo.

<sup>12</sup> Arirakano Eparahame sisimarakar reke, epo aporo ira suamo makasa kaua kekemapo, aihosimo kukusa maiya ane makeraka rea maiya amo, hokosa hokono marerereapo. Hokosa hokono marerakano hokosa amo wainepe puraka, ti makata mukisa ayiáka muki-raka wainareapo. Hauaka sakipu he tawara fea mukisa ayiáka, aporo hinamo mukiraka wainareapo.

<sup>13</sup> Ipu Kotiaki himu hakásaraka hemakapusuane metakarisafareapo. Metakarirafaraka kusua maiya amo soko, ipu Kotiaki yaiya himu hakásaraka hemakapureapo. Kotimo ayiakakosapo, aisane ipu haru mokoanafonoraka risike, yameno aeyaka makata asera ayiáka, asekea seseaka risiareapo. Ipu someraka, "Hauaka one isiaipo kakaro hauakafapo. Hauaka wo isu kimisi arisia ayiáka risikinapo. Aporo metamo hauaka ayiáka isu fore meta risikinapo."

<sup>14</sup> Aiyaka aporoamo hauaka meta hepene yapura risikiako hiakosakipoko hemakapukua somehoareapo.

<sup>15</sup> Ipu, "Hauaka metakarisiane isiaipo hauakapo," aisafareapo. Aisa satiki, hauaka á poparipufunureapo.

<sup>16</sup> Asiane hauaka meta haku kakaro kotesa hepene yapura risikiako hiakosakipoko hemakapuraka risiareapo. Ipu Kotiaki himu hakásaraka hemakapuraka someraka, "Isiaipo Kotiane nepo." Aisasamo Kotimo hauaka aporoyaki sarimahoko ipi karekesafareapo. Eyaki i su risikiasimo hepene yapura Kotimo ape kisiaipo.

<sup>17</sup> Arirakano Eparahamemo Kotiaki himu hakásaraka hemakapuraka rekeno asekea, kakaro himu hakásaraka hemakapurakanare? Aiyaka Kotimo Eparahameane kau aseakosakipoko, "Aisake rukua paíkia anoaki kakanie," aihoreapo. Airakano asekea Eparahamemo himu hakásaraka hemakapukua reasasamo Aiskeane Kotiaki kayereapo.

<sup>18</sup> Arirakano fana Kotimo someraka, "Aisakemo hokosa amo hokosa, amo hokosa ayiáka, nómó ní aporo ira wainakosapo," aihoreapo. Airakano yia, Eparahamemo Aiskeane Kotiaki kakako, rukusakipoko eke kima motokoa, ipi hokosa hakása nine kasapo.

<sup>19</sup> Kasa yiámo epo hemakapuraka, "Aporo kusua maturikia taehokosane Kotimo ipi siapo," aiyaka hemakapureapo. Arirakano isiaipo Yu aporomo yapakeraka someraka, "Eparahamemo ipi hokosa rusua kusuane Kotimo maturikia taeraka, Eparahameaki efera hunia kasapo." Aiyaka isiaipo yapakeraka somerakanapo.

*Aisake soko Yakope soko Yosefe soko ipu suamo Kotiaki himu hakásaraka hemakapukua risiane oyapo.*

<sup>20</sup> Arirakano Aisakemo Kotiaki himu hakásaraka hemakapusua aeyaka ipi hokosa Yako-peaki soko, Isoaki soko, keseke tetá koteaka risikiasimo makotena someane someaka kayereapo.

<sup>21</sup> Arirakano Yakopemo Kotiaki himu hakásaraka reke, e akura maiya amo, Yosefemo hokosa makotehosimo makotena someane someaka kayereapo. Ipi tatia maka hauaka maporaka arupekeea asekea reke, aiyáka Kotiaki kekereoareapo.

<sup>22</sup> Arirakano Yosefemo Kotiaki himu hakásaraka hemakapukua reke ipi kukusa maiyane makeraka, amo someraka, "Keseke Isiraya aporomo Iyipi hauaka metakariakosapo. Metakarikia apura maiya amo, ano kikíane maka punie," aihoreapo.

*Mosesemo Kotiaki himu hakásaraka hemakapukua reane oyapo.*

<sup>23</sup> Arirakano Moseso takapesa maiya amo, Iyipi unihae Feromo somemane motoraka, "Aporo hokosa takaperakano su rukua fahoanie," aiyaka somerakano, Mosesemo ipi wafayape kaitya tetapó somepaneane koarentesa akipoko tetá namohoafareapo. Tetapó Kotiaki himu hakásaraka hemakapusua aeyaka, ere maiya isiamo hokosa ane faremar-ereapo.

<sup>24</sup> Arirakano Moseso káraraka sisimarakar reke, Kotiaki himu hakásaraka hemakapusua aeyaka someraka, "Ano kakaro Feromo farayamo hokosafapo. Ano Iyipi aporoane metakarikia, Isiraya aporoyaki paohokosapo," aiyaka hemakapuraka paohoreapo.

<sup>25</sup> Asiamo epo hemakapuraka, "Kotimo aporo hinamoane Iyipi aporomo mokoatikirakano ano soko, iyaki hakása mokoatikihoane siahosireapo. Ano Iyipi hauaka reke Kotiane metakarikia watikiaka hemakapukua enanane seseraka, aiyáka rerane maiya wakasema nina keseke fahokosapo. Aiyáka rekeakosane ano hisiripo.

<sup>26</sup> Keresopoko\* mokoatikihoane soko siahokosapo. Aporo hinamo arareraka rakirane fanápo. Arirakano Iyipi hauaka mone soko, makata kau rakirane soko, enanane soko,

\* **11:26:** Fana aporomo Mosesoane mokoatikisa aiyáka, keseke Keresoane soko aiyáka mokoatikihoane, aiyaka Mosesemo hemakapureapo.

makatane kesekepo. Kotimo rakirane rakirakano, keseke Kotimo makata ropo anoaki kakakosapo," aiyaka hemakapureapo.

<sup>27</sup> Mosesemo Kotiaki himu hakásaraka hemakapukua Iyipi hauaka metakarikia pureapo. Iyipi unihae Feromo saperakano Mosesemo namohoafareapo. Kotiane aporomo himo aserafapo. Asián Mosesemo Kotiaki himu hakásaraka hemakapukua reasasamo, Kotiane himo asera ayíáka asereapo. Ayíáka asesasamo epo Kotiaki himu hakásaraka hemakapukua paroaka reareapo.

<sup>28</sup> Mosesemo Kotiaki himu hakásaraka hemakapusua aeyaka, Isiraya aporoaki someraka, "Repo hokosa hepene aporomo rurapaka, repo Ape Farimareakosakipoko ape tapa saro sipi yapi maka paíyinie. Pairakano Hepene Aporomo Isiraya hokosa fanāne rusua kukusafapo." Aiyaka Mosesemo somehoareapo.

*Isiraya aporo fana risiamo Kotiaki himu hakásaraka hemakapukua risiane oyapo.*

<sup>29</sup> Arirakano Isiraya aporomo, Kotiaki himu hakásaraka hemakapusua aeyaka, He Retea pauraka, he kikisi akaraka kikisi roraka tipia hauaka parosa faserehenakano yaoraka pureapo. Purakano Iyipi aporo kekemarape pesane he yaohoane he nekea kukua kereapo.

<sup>30</sup> Arirakano Isiraya aporomo Kotiaki himu hakásaraka hemakapusua aeyaka, yape yatipinusumo Yariko taonea ekemo rurusa kepoa hahaeraka purakano, ekemo rurusane hurupepehoareapo.

<sup>31</sup> Arirakano Réhape fana aporo rea pura hinamoamo Kotiaki himu hakásaraka hemakapukua kake, Isiraya aporomo Yariko taoneane suti aseako pesane hinamoamo araresakipoko, Yariko taoneane ekemo rurusa hurupepesa sereamo e ruafareapo. Koare-taena aporo hinamoane kukua kerakano eane kuafareapo.

<sup>32</sup> Arirakano aporo meta soko nōmo somehokosare? Kítione soko, Péreke soko, Sámesone soko, Yáfata soko, Téfete soko, Sámio soko, porofete aporo metakira soko, iane nōmo someraka rekeako ayiane maiya fahokosapo.

<sup>33</sup> Aporo metakiramo Kotiaki himu hakásaraka hemakapusua aeyaka i uyáka risiapo. I risike hauaka kára wo aporoaki weraka marokehoareapo. Marokeraka ereketaeraka unihaeaka asekeka risiareapo. Kotimo ayiakakosaposane moyereapo. Arirakano aporo meta saro raeoneyaki hakása rekeno raeone akaiane mapirikia risiareapo.

<sup>34</sup> Arirakano aporo metakiramo ira kára paisiane kopakataehoareapo. Arirakano aporo metakiramo yunu weraka rokopamo i kareakohoamo tekatarireapo. Arirakano metakira roraraka risiane mawakapuhoareapo. Arirakano metakira yunu weako pukua marokeraka yunu aporoane tekatarikia pureapo.

<sup>35</sup> Arirakano hinamomo Kotiaki himu hakásaraka hemakapusuasamo ipi hokosa kusuane maturikia taerakano efera hunia mayereapo.

Arirakano aporo metakira tipura risiamo Koti metakarirakanone yunu aporomo i tonotaehokosapo aihoareapo. Aisane metakarikia, Kotiaki hemakapusuasamo tonotaehokosane hisiraka hemakapuraka, "Isu tipura kesa kusuane, maturikia taerakano hepene yapura Kotiyaki koteaka risikiako seseripo." Aiyaka hemakapukua tipura risiane yunu aporomo iane mokoatikirakano, i kureapo.

<sup>36</sup> Arirakano aporo metakiramo Kotiaki himu hakásaraka hemakapusuasamo, yunu aporomo iaki mainamarekea rureapo. Arirakano aporo metakira senemo taporaka tipura kereapo.

<sup>37</sup> Arirakano aporo metakira ekemo karesa kureapo. Arirakano aporo metakira ferepmo rukua rukturikiraka kureapo. Arirakano aporo metakira ferepmo mawi pateke taerakano kureapo. Arirakano aporo metakiramo saro sipi kau soko nanikose kau soko mokoa osoraka makata forokoa risikino aporomo i mokoatikiraka rureapo.

<sup>38</sup> Rurakano aporo metakira nena yaoa hauaka porasakipoko pukua, úria soko, hikia kuniükia soko, kutua soko, waka risireapo. Ayíáka risíke, i kákarao aporo kotesasamo hauaka wo aporo risia akiyaki hakása risikiane siahoasifareapo.

<sup>39</sup> Ayíáka ipu suamo Kotiaki himu hakásaraka hemakapukua risikino, Kotimo iaki, "Re kotehoareapo," aihoareapo. Aisa nine Kotimo ayiakakosapo aisane i hauaka wo risia maiya amo mosafareapo.

<sup>40</sup> Marirakano mokoanafonosare? Kotimo iane hemakapuraka, isuane soko, hemakapukua, isupoko soko Kotimo makata kakaro kotesane maresapo. Fana ipu Kotiaki himu hakásaraka hemakapukua risia nine, iaki makata kakaro kotesane fana kayefareapo. Maiya hakása yíamo Kotimo i soko isu soko isina su sarimaraka makotehokosapo.

<sup>1</sup> Aporo yakai amo Kotiaki himu hakásaraka hemakapura ikia karane isuaki tarirakano isiapo hemakapurakanapo. Ayíáka hemakapuraka aporo foaka pukusakipoko, aku umisa hatapesane horomaka motokoa, arirakano pasu horopo ososane soko horomaka motokoa, oforaka foaka apura ayíáka, makata umisane soko, makata watikisamo isu masane soko mamakateraka, isu oforaka máka naohoko wakapuraka hemakapukua purakanapo.

<sup>2</sup> Isu puraka himo Yasuane asekea apura ayíáka purakanapo. Puraka himu hakásaraka hemakapura kepoane Yasu ipipo. Ira tanehekeia kárarakar wate perapo. Aina ayíáka isiapo Kotiaki himu hakásaraka hemakapurane kárarakar risikiasimo Yasumo ipi makoteraka asekea rekenapo. Arirakano Yasumo ipi hemakapuraka, "Keseke ano seseaka rekeakasapo." Ipi aíyaka hemakapuraka ira matopesa ipi kukusane namosafapo. Ira matopesa paremarekea kusua maiya amo kaiyanane ipi hemakapusufapo. Kusua maturikia taerakano, hepene yapura hikia Kotimo hokono tumuru takua kakenapo.

*Atamo ipi hokosa maroponane oyapo.*

<sup>3</sup> Yasuane hemakapunie. Aporo watikisamo yunuraka risike Yasuaki mainamareraka hokomaka mokoatikirakano, Yasumo ipi ikia kara kotesane metakirafaraka, Kotiaki yaiya himu hakásaraka hemakapukua reapo. Asia ayíáka aporomo reane mokoatikirakano repo Yasumo ainane hemakapukua risikino, re wakapuaka risikiakosapo.

<sup>4</sup> Makata watikisane rukupatehokosakipoko Yasuane kuraka yapi pusuapo. Asiane repo makata watikisane rukupatehokosakipoko, re kuraka yapi pusuafapo. Asiamo re wakapuaka risikiakosakipoko Yasuane hemakapunie.

<sup>5</sup> Arirakano Kotimo re himu paroaka risikiasimo reaki someraka, "Reane nōmo hokosapo." Aisane repo merarusare? Kotimo reane maroporaka ipi ereketae ainane tariraka someraka,

"Nōmo hokosao, unihaemo ne ereketaeraka rekeasimo maroporakano maroposane ne-nakamaka maroposapo, aíyaka hemakapukopo. Maroposane asekepayahokopo. Unihaemo né ereketaeraka rekeasimo maroporakano himu hisihokopo."

<sup>6</sup> Asiamo Kotimo kára hemakapusua aporo hinamoaki ipu ereketaeraka hemakapusimo Kotimo iane maroponapo. Arirakano aporo hinamo metakirak epo someraka, 'Reane nōmo hokosapo.' Aíyaka maroporaka rurapo," aíyaka Kotimo somesapo. (*Sindaun 3:11, 12*)

<sup>7</sup> Asiamo makata umisa fasereperakano asekea repo someraka, "Ano ereketaeraka rekeasimo Kotimo ano maropoane." Aíyaka someraka Kotiaki himu hakásaraka hemakapurane kakaro rosaka taehoanie. Atamo ipi hokosa ereketaeraka rekeasimo maropona ayíáka, Kotimo re ipi hokosasamo ereketaeraka risikiasimo maroporakanapo. Hokosa meta ipi atamo maropohoanafonona rekenare? Wae. Rekenafapo. Hokosa su maropon-apo.

<sup>8</sup> Hokosaki hokotakekea some karaka kakimakasimo maroponapo. Hokosa su ereketaeraka risikiasimo maroporaka, né hákasa metakarikia maropohoanafonorakano, ane né ipi hokosafapo. Né ikia oto hokosapo.

<sup>9</sup> Isiapo hauaka wo atamo isu ereketaeraka risikiasimo maroporakano, ataki hemakapusuane metakirafapo. Metakarianafonoraka atamo yano motosa makárarakar hemakapurana. Arirakano isiapo Ata hepene yapura reamo isu maroporakano, eane makárarakar hemakapunie. Hemakapuraka isu eyaki yaiya risikiakosapo.

<sup>10</sup> Arirakano maiya wakasemamo hauaka wo atamo ipi hemakapusua aeyaka isu maroponapo. Maroporaka hokosamo watikiaka rakirakano maiya metakiramo atamo saperaka maroponapo. Maiya metakiramo asekepayanapo. Aina ayíáka Kotimo anafapo. Watikiaka rakirakano asekea maiya suamo maroponapo. Isu ereketaeraka risikiasimo Koti ipi watikihoanafonoraka koteaka susu area ayíáka isiapo watikisane kikisiraka koteaka susu risikiasimo epo isu maroponapo.

<sup>11</sup> Maropona maiya yiamo makata umisa karakano isiapo hemakapuraka, "Makata umisane kárapo." Aíyaka mahisiraka hemakapurapo. "Makata umisane kotesapo." Aíyaka hemakapurafapo. Asiamo keseke maroporaka farakano maroporaka tarisiane enomaka risike isu ereketae auaraka risikiakosapo.

<sup>12</sup> Asiamo Kotiaki himu paroaka hemakapunie. Re foforaka pukua máka nao-hokosakipoko wakapuane faraka roraraka risikinapo. Asiamo re hokóno yofesane soko, kakuna hamisisisané soko, mawakapuhoanie.

<sup>13</sup> Korakemo koteaka puko ikia kara ereketaesa á punie. Re ereketae puraka aporo hinamo metakiramo soko re apurane asekea kekemarape pukusapo. Kekemarape puraka, aporo hinamo metakira korake matipusa nine, re apurane asekea i soko ereketae puraka, wakapuane maka, etehoanafonoraka, ereketae pukusapo.

*"Paroaka risikianie," aisane oyapo.*

<sup>14</sup> Aporo hinamo suaki tau auaraka risikianie. Tau auaraka risikiakosakipoko rakinie. Makata watikisane kikisiraka koteaka susu risikiako hemakapukua rakinie. Makata watikisane kikisiraka koteaka susu risikianafonona aporo hinamoamo Unihae Kotiane aseakosafapo.

<sup>15</sup> Repo namina yia aporo hinamo metamo Kotimo yaku ararenane metakariakohoamo e ararehoanie. Arirakano kasoko hakasamo aporo yakai hi fauraka mokoatikinapo. Aina ayíáka aporo hakásá meta watikiaka reamo aporo su kirimaraka watikiraka risirapaka asekeanie.

<sup>16</sup> Arirakano hinamo hakimara aporo arisia ayíáka risikiakopo. Kotiane metakarikia aporo watikiaka arisia ayíáka risikiakopo. Arirakano Isomo Kotiane metakarikia reapo. Isoane Aisakemo ipi aporo hokosa fanasasamo, ipi wafayamo akura maiya amo wafayamo makata kemoane mokoa, ipi wafayamo finihaoa rekeafunupo. Rekeafunusa nine ipi mamanea kesekemo makata nená pairakano asekeea someraka, "Makata nakosane ano makasie. Makata kemoane su nómó mokoa, atamo finihaoa ne rekeanie," aihoareapo. Ayíáka epo nenakamaka makata ane hemakapuraka Kotimo e makotehokosakipoko somesane epo metakarisareapo. Metakarisia ayíáka, repo makata watikisa hakásá meta kekemarakaa rakiakosakipoko Kotiane metakariakopo.

<sup>17</sup> Keseke Isomo ipi wafayamo makoteraka ayiakosapo ayíáka somesane epo metakarisia nine eféra hunia fimakosakipoko hemakapusuareapo. Asiane epo fimayafareapo. Kotimo e makotehokosakipoko murikimasane Isomo metakarisiasamo eféra hunia makosakipoko ipi hiripuyaki reareapo. Asiane epo kakaro himu hakásaraka hemakupunafonosasamo Kotimo makotehokosakipoko somesane eaki kasafareapo.

*"Fana Kotimo Moseseyaki someaka masane hakureapo. Kawe yumo Yasuyaki someaka masane hakureapo," aisane oyapo.*

<sup>18</sup> Isiraya aporo fana risiane üri Sainaé Koti rea makeraka peraka makata himo asekeea, senakimo soko kaikia, i namoraka risiareapo. Arirakano re Koti rea makeraka hinaka, re namoraka risikiakosafapo. Arirakano fana aporoane üri Sainaé makeraka peraka, üria ira rufi soko, kakaro katosa soko asereapo. Aseraka risiane kikirirakanoo soko kaikia, atifo perakanoo soko asekeea, i kakaro namoraka risiareapo.

<sup>19-20</sup> Pikoro rurakarakano soko, Kotimo merakano soko, ipu kaiyireapo. Kaiyiáne Kotimo someraka, "Üria aporo hinakano e kukuismo ekemo kareanie. Saro ponomakau soko, saro sipi soko üria hinakano kukusimo ekemo kareanie," aihoareapo. Airakano i namoraka risike Moseseaki someraka, "Meane isiapo eféra hunia kaiyiáne siahoasifareapo."

<sup>21</sup> Ayíáka i namoraka risikino Mosesemo soko someraka, "Ano soko hamisisiraka namoraka rekenapo," aihoareapo.

<sup>22</sup> Arirakano re maiya yumo risike, Kotimo Yasuyaki kawe someaka masasamo, Kotiane re makeraka hiakosane namoraka risikiakosafapo. Asiamo Yasumo makata rakisia aeyaka üri Saeone<sup>\*</sup> á re hinaka risikinapo. Hepene yapura yaiya rera Kotiane rekenapo. Hepene yapura Kotimo siti Yarusarame sitia hepene aporo hokono u yakai sarimaraka arisia á re hinaka risikinapo.

<sup>23</sup> Re hinaka, fana Kotimo kakimara aporo hinamo sarimaraka i suane Kotimo hokosa fanapo. I yanomotosane hepene yapura sawia popasa i sarimaraka risikino, á re soko hinaka risikinapo. Koti rea á re hinaka risikinapo. Kotimo ipi aporo hinamo su takekeea parakunapo. Arirakano aporo hinamo fana ereketaeraka risiane kurakano i hoane Kotimo makoteraka maereketaesane i soko risikino, á re hinaka risikinapo.

<sup>24</sup> Arirakano Yasu rea a soko re hinaka risikinapo. Kotimo aporo hinamo mafasiakosakipoko kawe someaka masane Yasumo tarirakanapo. Aporo hinamomo makata watikisane mafahoko Yasumo ipi yapi kasapo. Ipi yapiane Aepomo yapi asiafapo. Yasumo yapiamo ikia kara kotesane tarirakanapo.

<sup>25</sup> Tarirakano Kotimo some kotesane kakipayaraka koarellaehokopo. Hauaka wo fana Mosesemo some karakano, koarellaesa aporoane Kotimo i mafasisiafareapo. Asiamo hepene yapunaka Yasu pekea some karakano isiapo koarellaerakanoo isu mafasiakosare? Wae, mafasiakosafapo.

<sup>26</sup> Fana Isiraya aporo uri Sainaé makeraka risikino, Kotimo some aeyaka hauaka wo momani pesapo. Arirakano yumo epo someraka, "Keseke maiya hakásá yiamo hauaka wo soko, ti yapura soko, momani kára nómó kakakosapo," aisapo.

\* <sup>12:22:</sup> Hauaka wo Yarusarame sitiane üri Saeone á kisiapo. Asiane yapake someraka isu Koti rea makeraka hinaka hepene yapura üri Saeone á soko Yarusarame siti á soko isu hinakanapo, ayíáka yapake somesapo.

<sup>27</sup> Kotimo someamo kepoane oyapo. Keseke momani kára perakano, Kotimo makata su epo rakisiane mahohoraka su hurupeperaka fahokosapo. Arirakano makata metakira yaiya risikiakosa murikimasane hurupepehokosafapo.

<sup>28</sup> Kotimo isu unihaeaka asekea rekenapo. Momani kára perakano isu Kotimo aporo hinamoane hurupepehokosafapo. Asiamo isiapo Kotiaki kára suserakanapo. Kotimo isu ararerakano isiapo suseraka epoko maseseraka rakiraka ayíáka, Koti makáráraka kekereraka risikinapo. Kotimo wakapuane isiapo hemakapuraka namoraka risikinapo.

<sup>29</sup> Asiamo makata su ira rufi káramo inakakoana ayíáka, Koti ipiane ira rufi asiapo.

## 13

*"Kotiane masesehoasimo uyáka risikianie," aisane oyapo.*

<sup>1</sup> Ní Keresoa paosa aporo hinamo namina yíamo namina nine himu tumurumo hemakapuka hakásara hemakapukua risikianie.

<sup>2</sup> Arirakano aporo kimisi perakano pasimaka ararehoanie. Nōmo someamo kepoane oyapo. Fana aporo metakiramo aporo kimisi perakano araresane hepene aporopo. Ipu hepene aporoane meraruamo arareraka ipu apea karikia pusuapo.

<sup>3</sup> Arirakano Keresoa paosa aporo hinamo tipura kesane<sup>\*</sup> hemakapukua ararehoanie. Nōmo hemakapuraka, iyaki ano soko hakásara tipura rekenapo, aiyáka hemaka apura ayíáka hemakapukua ararehoanie. Arirakano aporo metakira kaua rukua mokoatikirakano asekea, iane soko hemakapukua ararehoanie. Né soko aporosasamo kau hakásara nine reke ipu umisane hemakapusireapo.

<sup>4</sup> Aporomo hinamo arumaka rerane kotesapo. Titi yia metamo metane mawakasema-hoane siahoasifareapo. Aporomo hinamo meta hemakapukua hakimakopo. Arirakano hinamomo soko aporo metayaki mokome pukupo. Aporomo hinamo hakimarakano aporoane Kotimo fanasihokosapo. Arirakano hinamo aporo metayaki mokome purakano hinamoane Kotimo fanasihokosapo.

<sup>5</sup> Arirakano nōmo mone tokeno moneane himu tumurumo hemakapukua ayíáka rekeakopo. Neane monemo kirimanapaka asekeanie. Mone sakepamo mokoakosakipoko, aiyáka hemakapukupo. Ní menane asekea someraka, "Nōmo ní menane sia tokeno ano siaraka rekenapo," aihoanie. Asiamo Kotimo someraka "Neane nōmo asekea rekeakosapo. Maiya suamo nōmo asekea rekeakosapo. Ne nōmo namo kakaro metakariakosafapo," airapo.

<sup>6</sup> Aisasamo isiapo namonafaraka mapiraraka someraka, "Unihae Kotimo ano araranapo. Ararenasamo ano namohokosafapo. Kotimo ano sia asekea rekeno aporomo anoaki mayíáka mokoatikihokosare?" airapo.

<sup>7</sup> Arirakano fana aporo metakiramo Kotimo someane reaki some kaka reane asekea risiapo. I risia maiya amo ipu Keresomo ainane kekemarape pukua, i kusua maiya amo rakikia rosaka taesapo. Ipu ainane repo hemakapukua meraruhokopo. Ipu Kotiaki himu hakásara hemakapusua ayíáka, repo soko Kotiaki himu hakásara hemakapukua kekemahoanie.

<sup>8</sup> Arirakano fana Yasu Kereso rea ayíáka, pipu soko yaiya hakásara yineraka rekenapo. Pipu e area ayíáka keseke soko maiya suamo hakásara yineraka ayíáka rekeakosapo. Haku hakuraka rekenafapo.

<sup>9</sup> Arirakano aporo metakiramo reaki some meta haku kotafe some kakakosapo. Makata hasaka kotafe someane repo kekemahoasimo reaki some kakakosapo. Kotafe someane kaikia kakimakopo. Hasaka someane kaikia kekemarakanone re ikia kara hasaka pukusapo. Aporo metakiramo hasaka someraka úyaka somerapo. Koti masesehoko makata nakosa nanie, makata nakosa sokoaihoanie, aiyáka somerapo. Aporomanomo makata nena somemane motosa amo iane ararenafapo. Asiane Kotimo yaku ararena amo isuane mawakapunapo.

<sup>10</sup> Fana aporo hinamomo makata watikisane mafahoasimo, farae apea pirisiti aporomo saro sipi rukua paikia Kotiaki kasapo. Arirakano isiapo makata watikisane mafahoasimo, Yasu ira matopesa kusuapo. Arirakano eke kima saro sipi paisia ayíáka, Yasu ira matopesa kusua ayapo. Asiane aporo metamo eke kima saro sipi yaiya paikia karakanone, ane Ÿasu ira matopesa kusua amo ararehokosafapo.

<sup>11</sup> Yu aporo pirisiti aporo fanaraka risiamo aporo hinamomo makata watikisakipoko saro ponomaikau rukua yapi maka, farae ape Namo Kakaro Kotesa Susu ape kakarua yapiane maka pukua Kotiaki karápo. Saro ponomaikau malyane ape ruru yao takua paisiane iramo inakakonapo.

\* <sup>13:3:</sup> Aporo tipura kesa amo watikiaka rakisiafapo. Yasuaki hákasa patera asesasamo i tipura kesapo.

<sup>12</sup> Asia ayíáka Yarusarame siti ruru yao takua Yasuane aporo hinamomo makata umisane epo maka e rusua kusuapo. Ipi yapimo aporo hinamo makoteraka, watikisane makikisir-aka risikiasimo kusuapo.

<sup>13</sup> Yasuane ape ruru yao takua kusuapo.<sup>†</sup> E mainamareraka mokoatikisa ayíáka isu soko ayíáka mokoatikihokosapo.

<sup>14</sup> Arirakano hauaka wo isiaipo kakaro apeane rekenafapo. Arirakano keseke hepene yapura isiaipo kakaro ape á risikiakosane isiaipo hemakapurakanapo.

<sup>15</sup> Isiaipo Yasuaki kataka marekea risiakipoko maiya suamo Kotiaki kekerenapo. Isiaipo Kotiaki kekererane makata yaku akara ayíáka karakanapo. Isiaipo akaimo e yano motosa makáraraka eaki kekererakanapo.

<sup>16</sup> Arirakano koteaka rakiraka, nómenane parakuraka, aporo meta arareraka karáne meraruhokopo. Yaku karáne Kotimo aseraka ipi sesenapo.

<sup>17</sup> Keresoa paosa asekea risia aporoamo reaki some karakano kakimaka kekemahoanie. Repo koteaka hemakapukua risikiasimo ipu asekea risikinapo. Ipu rakisiane koteaka rakisiarioamo Kotimo iaki kaiyakosapo. Ipu seseraka rakisimo koteaka kakimaka risikianie. Koteaka risikianafonorakano, umisane ipu moraka i himu mahisiraka risikino, repo soko umisane mokoakosapo.

<sup>18</sup> Arirakano isupóko kurikuriraka risikianie. Isu himura tau someraka, “Re siaraka risikinapo.” Aiyaka isu siaraka risikirakan kairakanapo. Asiamo isiaipo makata koteaka rakiako hemakapurakaripo.

<sup>19</sup> Re arisia ano foaka peasimo repo kurikurihoanie. Aiyaka kakaro himu hakásaraka kurikurihoasimo hemakapurakaripo.

#### *Isiaipo repoko kurikurisane oyapo.*

<sup>20</sup> Kotimo kawe someaka masane yaiya rekeakosapo. Aiyaka someaka masane motokoa marekea, Yasumo ipi yapiane kasapo. Yasu kurakano asekea Kotimo e maturikia taesapo. Asiamo saro sipi asekea rekeakosa wafaya kárane Yasu ipipo. Ayíáka rakisimo Kotimo eane maresapo. Asiamo tau rera kepoane soko Koti ipipo.

<sup>21</sup> Repoko Kotiaki nōmo kurikuriraka, “Kotio, Nōmo hemakapusuane aporoamo siaraka rakisimo nōmo aina kotesane soko makata su kotesane iaki siaraka kakanie. Isiaipo Yasu Keresoaki kataka marekea risikino, nōmo sesehoasimo rakirane isu himua mareanie. Yumo soko, keseke soko, maiya suamo Yasu ipi yano motosa makárarakanapo. Kakaroripo, iyapo,” aiyaka nōmo kurikurisapo.

#### *Ayapasane oyapo.*

<sup>22</sup> Keresoa paosa aporo maeo, repo Kotiaki himu hakásaraka wakapuraka hemakapusimo some one nōmo poparakanapo. Popasane hisiraka kaiyakopo. Seseraka kaiyinie. Nōmo sawi popasa one wakasemasekeno kakimakanie.

<sup>23</sup> Timotiane soko repo hemakapusimo nōmo poparakanapo. Isiaipo Keresoa paosa aporo mae Timotiane tipura makesa tonotaesapo. Tonotaerakanano ano area wo e foaka perakanone, re risia ano peraka, e soko anoyaki hakása peakosapo.

<sup>24</sup> Re asekea risia aporoaki ayaparakanapo. Kotimo aporo hinamo suaki ayaparakanapo. Itari hauaka aeyaka Keresoa paosa aporo pesa amo soko reaki ayaparakanapo.

<sup>25</sup> Kotimo re hemakapukua ararehoasimo hemakapurakaripo, kakaroripo.

<sup>†</sup> **13:13:** Mosesemo somemaneeane Yasu kusua amo masiasapo. Yasu ape yao takua pusua ayíáka, isiaipo Mosesemo somemaneeane metakarikia Yasuaki kekerenapo.

## Yamese Yamese sawi one mahemakapukusa someane oyapo.

Maria Yosefe tetapō hokosa yakai hokono murisiapo. Hokosa meta yano motosa Yamesepo. Yamese amo sawi one popasapo. Yamese sawi popasa one Yasumo aporo hakasa purafapo.

Yasu hepene yapura hisiakipoko, Keresoa paosa aporo hinamo Yarusarame sitia risiane Yamesemo asekea reapo. Keresoa paosa aporoane Rome kamanimo mokoatikisasamo i yakai teketarikia pusuapo. I teketarikia puraka, koteaka risikiasimo Yamesemo sawi one popasapo.

Yasu hepene yapura hisiakipoko keremisi 20 su faraka Yamesemo sawi one popasapo.

### **Yamese sawia some kepo parakuraka popasane oyapo.**

1:1-18 Makata umisa fasere aperamo Kotiaki hemakapukua paroaka risikianie.

1:19-27 Kotimo someane kairaka hákasa kaiyiane siahoasifareapo. Kaikia hokonomo soko makata rakinie.

2:1-13 Nōmo himo asekea aporo meta makama fanaraka, aporo meta makama kesekeraka ayiáka hemakapuane siahoasifareapo.

2:14-26 Nōmo Kotiaki hemakapukua, aporomano meta ararehoanie.

3:1-18 Nōmo ní akaimo somerane koteaka asekea rekeanie.

4:1-5:6 Hauaka wo kaumo makata rakirane hemakapukua kekemahokopo.

5:7-20 Kereso aporo hinamomo hemakapusimo some metakira one some karakanapo.

### *Yamesemo sawi poparaka makesane oyapo.*

<sup>1</sup> Kotipe Unihae Yasu Kereso tetapō aporo raipane anopo. Ano Yamesemo sawi one poparaka makerakanapo. Re Yu aporo ira kenosua Keresoa paosa aporo hinamo risiaki nōmo sawi one poparaka makerakanapo. Ape sumu kekepo aeyaka re rukua koaka taerakanan teketarikia, hauaka kekepoa pukua risikino asekea, reaki nōmo sawi one poparaka makerakanapo.

### *Yasuaki kakaro himu hakásaraka hemakapurane oyapo.*

<sup>2</sup> Keresoa paosa aporo maeo, re kaua makata umisa kekepo fasereperakano seseaka risikanie.

<sup>3</sup> Re kau aseakosakipoko makata umisa fasereperapo. Fasereperaka repo Yasuaki himu hakásaraka hemakapusuane tipia metakarirakirahoamo fasereperapo. Fasereperakano metakarirafaraka makata umisamo repo Yasuaki himu hakásaraka hemakapusuane mawakapuhokosapo. Ayiáka Yasuaki himu hakásaraka hemakapukua risike rosaka tae-hokosapo.

<sup>4</sup> Hokosa tokopukua, arirakanan hase kakipuraka, arirakanan sinima kanukuniraka aina ayiáka, ayiakakohoamo re su siaraka risikiakosakipoko Yasuaki himu hakásaraka hemakapusuane tipia patekenakopo. Hemakapusuane rosaka taehoanie.

<sup>5</sup> Makata umisa fasereperakano, re aporo metamo makata rakiakosane mahimeteraka reke, Kotiaki himu hakásaraka hemakapukua kurikurihoanie. Aporo metamo koteaka takekeea hemakapurane makasimo Kotiaki kurikurirakan, Kotimo kaikia eaki kakakosapo. Kotimo ipi aporo hinamo suaki seseraka makata yaku siaraka karápo.

<sup>6</sup> Asiamo nōmo Kotiaki kurikurirakan, "Anoaki koteaka takekeea hemakapurane makasie." Aihora maiya amo himu hakásaraka hemakapukua kurikurihoanie. Himu tetáraka hemakapukua kurikurihokopo.

<sup>7</sup> Himu tetáraka hemakapukua kurikurina aporoane he kupa asiapo. He kupa taku aeyaka soko pekea, arirakanan taku aeyaka soko pekea arumaraka mayayaona ayiáka, aporo himu tetáraka risike kurikurinane anapo.

<sup>8</sup> Ayiáka aporo himu tetáraka kurikurirakan reke hemakapuraka, "Kotimo kakakosapo. Arirakanan Kotimo kakakosafapo." Ayiáka himu tetáraka risike kurikurirakan Kotimo kakakosafapo.

### *Makata kemo kára kayane soko, makata kemo forosane soko, somesane oyapo.*

<sup>9</sup> Keresoa paosa aporo né makata foroqua reane Kotimo makárrarakano seseaka rekeanie.

<sup>10</sup> Arirakanan Keresoa paosa aporo né makata kemo kára kayane, Kotimo mawakase-marakano seseaka rekeanie. Ira wate pesane kakaripekefa ana ayiáka, aporomo makata kemoana kara hemakapukua reane kuraka fahokosapo.

<sup>11</sup> Ira wateane maíyamo rukua hisiraka sisipuraka yoferaka kakaripeperaka torenapo. Aina ayiáka makata kemo kára hemakapukua rea aporoamo ipi pisini rakiraka reane e kukusapo.

*Kotimo isuane makoteraka rakirapo. Isiapo makata watikiaka rakisimo Kotimo isuane mokopipinapao, aisane oyapo.*

<sup>12</sup> Makata umisa fasereapera maiya amo, Kotiane metakarianafonoraka, paroaka rea aporoane seseaka rekeakosapo. Epo Kotiaki himu hakásaraka hemakapukua rekeno, aporoane kau asekakosakipoko makata rakirane siarakano, yaiya rera makata ropoane Kotimo eaki kakakosapo. Asiamo Kotimo someraka, “Aporomo anoaki himu tumurumo hemakapukua rekeno, yaiya rera kakakosaposane nōmo kakaro kakakosapo,” aisapo.

<sup>13</sup> Arirakano aporomo watikiaka rakiakosakipoko epo ipi yiamo kirimarakaraka hemakapuparo. Kirimarakaraka watikiaka hemakapukua rakikia faraka, epo someraka, “Watikiaka hemakapukua rakisimo Kotimo anoaki mokopipisapo.” Aihokopo. Asiamo Kotimo watikiaka rakisimo metamo kirimahoasifareapo. Arirakano aporomo watikiaka rakisimo Kotimo mokopipiraka kirimanafapao. Kotimo ipi anafapo.

<sup>14</sup> Asiane aporomo ipi yiamo watikiaka rakiakosakipoko seseaka hemakapusua yiamo kirimanapo.

<sup>15</sup> Kirimarakaraka makata watikisa seseaka hemakapusua aeyaka epo watikiaka rakirapo. Watikiaka rakiraka, watikisane káraranapo. Watikisa kárarakano aporoane kuraka Kotiyaki yaiya rekeakosafapao.

<sup>16</sup> Maeo, aporomo watikiaka rakisimo kirimana kepoane Kotifapo. Repo ayíáka hemakapukupo. Metamo someraka, “Aporomo watikiaka rakisimo Kotimo kirimanapo.” Aíyaka kotafe somerakano, repo kakimakopo.

<sup>17</sup> Kotimo ipi makata kotesa susu karápo. Makata kotesa susu kasane soko, makata yaku siaraka kasane soko, hepene yapunaka Kotimo karápo. Arirakano sere maiya soko, ere maiya soko, ti makata soko, rakisua wafayamo ipi yiamo makata kotesa susuane karápo. Asiamo faesamo kepoane Koti ipipo. Mituru maiya aperamo hoane horoponapo. Maiya tipiamo ho kinakenapo. Kinakeraka nina, maiya tuakeramo efera hunia hoane horoponapo. Ho horoporakano, efera hunia kinakerakano, aina ayíáka Koti ipi anafapo. Maiya suamo Kotimo ipi ainane sanasinafapao.

<sup>18</sup> Kotimo ipi hemakapusua aeyaka, isuaki someraka, “Nōmo kakaro someane repo kakimasasamo, reane nōmo ní hokoso,” aisapo. Asiamo Kotimo kakaro someamo isiapo hoane makawenapo. Asiamo hauaka wo Kotimo makata su rakisiane, epo some kakiimara aporo hinamo fanaraka risiane isupo.

*“Kotimo some kaisia hakásá nine kekemarakaka rakinie,” aisane oyapo.*

<sup>19</sup> Hameo, makata one hemakapunie. Aporo metamo somerakano, repo suamo koteaka kaiyinie. Arirakano wate foaka somerafaraka, koteaka hemakapukua somehoanie. Foaka sapehokopo.

<sup>20</sup> Aporo metamo saperaka rekeno Kotimo ereketae susu ainane rakiraka rekenafapo.

<sup>21</sup> Asiamo makata watikisa aina suane metakarinie. Kotimo ipi someane repo himua makata mano ayíáka poterakanapo. Re mafasiakosakipoko makata mano poterakanano hauaka kotesa ayíáka, repo himumo koteaka hemakapukua Kotimo someane kakiimakanie. Kakimarakano Kotimo reane mafasiakosapo.

<sup>22</sup> Kotimo someane kairaka kaikia hokonomo soko hakásá yineraka kekemarakaka rakinie. Kairaka hakásá kaikia rekeakopo. Repo someraka, “Isiapo Kotimo someane kairapo.” Aíyaka somesa nine, Kotimo someane kekemarakaka rakianafonorakanone, repo namina yia kotafe hokoa rukua somerakanapo.

<sup>23-24</sup> Aporomo hihoa ipi hikumisi asekea, hihohane metakarikia puraka, ipi hikumisi asesane merarunapo. Meraruna ayíáka aporomo Kotimo someane kaisia fasikiraka meraruraka rakirafapo.

<sup>25</sup> Arirakano Keresoa paosa aporo himua Kotimo somerane ane Ho Kotesamo karápo. Someane amo aporoane maumimarerafapo. Asiamo somemananeane aporomo kekemarakaka hemakapukua reke merarunafaraka, kakaro kakimaka rakirakano, aporoane Kotimo makotehókosapo. Makoterakano aporoane seseaka rekeakosapo.

<sup>26</sup> Arirakano aporo metamo someraka, “Ano Kereso aporopo.” Aíyaka somesa nine epo ipi akaiane koteaka asekea rerafapo. Koteaka asekea rerafara, ipi akaimo iriraraka someraka soko metao, saperaka someraka soko metao, kotafe someraka soko metao, meta hokomaka someraka soko metao, ayíáka reke, “Ano Kereso aporopo.” Airakanone aporoamo ipi yia kotafe hokoa rukua somerakanapo. Ipi Koti kekemarakaka rakirapo, aisa nine, aíyaka susuamo somesasamo, Kotiaki hemakapurane kusua area ayíáka rekenapo.

<sup>27</sup> Arirakano Kotimo ipi hemakapukua someraka, “Aporomo ano kakaro kekemarakaka reke, ipi uyáka rakiraka rekeakosapo. Karaiya hokosa soko metao, hinamo yaro makata meta forokoa tokeno soko metao, epo arareraka rakiakosapo. Arirakano hauaka wo makata watikisamo kirimarakaka paripukuhoamo makata watikisane koaraka pukusapo.

Aporomo ayíáka reke rakirakanone, Kotimo ereketae ainane kekemarakanapo." Aíyaka isiapo Ata Kotimo hemakapukua somesapo.

## 2

*"Aporo makata kemo kára toane makama fanaraka, arirakano aporo meta makata kemo forokoa reane makama kesekeraka ayiane siahoasifareapo." Aisane oyapo.*

<sup>1</sup> Keresoa paosa aporo maeo, Unihae Yasu Keresoane ipi wakapu kára faesayaki hepene yapura rekenapo. Ásiamo repo eaki himu hakásaraka hemakapukua risike, aporo meta makata kemo kára toane makama fanaraka, aporo meta makata forosane patera tarikia, ayiakakopo.

<sup>2</sup> Repo Kotiaki kekerehokosakipoko kurikuri apea sarimarakano, aporo tetá peraka, meta kau rakikia pasu kakaro kotesa osoraka pekea, arirakano aporo meta pasu pitikini osoraka perapo.

<sup>3</sup> Perakan aporo pasu kotesa ososaki seseaka someraka, "Né sea kakaro kotesa á kayae," airapo. Arirakano aporo pasu pitikini ososaki someraka, "Né á reae." Airaka soko metao, "Nómo sea makeraka né asukurua kayae."

<sup>4</sup> Aiyaka somerakanone, re namina sarimasa yia aporo meta makama fanaraka, aporo meta makama kesekeraka, ayíáka hemakapurakanapo. Re makata hukurura kepo kaira aporo pariraka, repo aporoane parakurakanapo. Asiane repo koteaka parakurakanafapo. Mokome watikiaka parakurakanapo.

<sup>5</sup> Maeo, kaisie. Aporo makata forokoa risiamo Kotiaki himu hakásaraka hemakapusuane paroaka risikiasimo, Kotimo murikimarapo. Murikimaka someraka, "Re nōmo hokosasamo, repo himu tumurumo anoaki hemakapurakano, reane nōmo unihaeaka asekea rekeakosapo." Aíyaka Kotimo aporo makata forokoa risiaki somerapo.

<sup>6</sup> Kotimo aiyaka somerakanone repo kaikia yia repo koareaeraka, aporo makata forokoa risiane mawakasemarakanapo. Aporo makata forokoa risiane repo mawakasemasa nine, aporo makata kemo kara toamo reane mawakasemanapo. Ipu reaki makata umisa karaka, reane hukurusimo hukurura kepo kaira aporo rea á karikia purapo.

<sup>7</sup> Re Kereso yano motosa yakosane, makata kemo kara toa aporomo reane mainamarerakanapo. Aina aporoane repo makama fanarakanapo.

<sup>8</sup> Arirakano Unihae Kotimo somemane motosane Kotimo sawia poparaka, "Né níane himu tumurumo hemaka apura ayíáka, nōmo ní aporo tákéane ayíáka himu tumurumo hemakapunie." Aíyaka popasane kakimaka rakiraka risikinone, re koteaka risikiakosapo. (*Wok Pris 19:18*)

<sup>9</sup> Asiane repo himo asekea takekea hemakapuraka, aporo meta makama fanaraka, aporo meta makama kesekeraka, repo ainakanone, repo Kotimo somemane motosane koareaerakanapo. Koareaeraka risike, re watikiaka risikiakosapo.

<sup>10</sup> Kotimo somemane motosa suane aporomo kakimaraka tiki kakimasa nineo, Kotimo somemane hakásá meta koareaerakanone, ane Kotimo somemane suane koareaerakanapo.

<sup>11</sup> Arirakano Kotimo somemane motoraka someraka, "Hinamo hakimakopo." Aíyaka someka yia Koti hákasa yiamo someraka, "Aporo kukusimo rukupo." Aíyaka somemane motosapo. (*Kisim Bek 20:13-14; Lo 5:17-18*)

Somemane motosane koareaeraka repo aporo meta kukusimo rurakanone, repo Kotimo somemane motosane koareaerakanapo. Hinamo hakimakanafonosa nine aporo kukusimo rurakanone, repo Kotimo somemane suane koareaerakanapo.

<sup>12</sup> Makata watikisamo reane tipura kesa arisia ayíáka risiapo. Asiane Yasumo wakapumo reane tipura kesa arisia ayíáka risiane, tonotaesapo. Tonotaerakan Ho Kotesamo Kotimo somemaneane re himua murisia risikinapo. Ásiamo somemane ane repo kaikia kekemahoanie. Keseke hukuarura maiya amo Ho Kotesamo somemaneane repo kaikia kekemasarihoamo Kotimo kaiyakosapo.

<sup>13</sup> Ásiamo repo aporo metane kamenakahoanafonorakan Kotimo fanasihoko ayianamo reane kamenakahokosafapo. Arirakano aporo metane repo kamenakaraka ararerakanone reane soko Kotimo kamenakahokosapo. Ayiakakosasamo hukuarura maiya amo re namohokosafapo.

*Kotiaki himu hakásaraka hemakapupe pukusakipoko rakirane oyapo.*

<sup>14</sup> Keresoa paosa aporo maeo. Aporo métamo someraka, "Nómo Kotiaki himu hakásaraka hemakapurakanapo." Aíyaka hemakapuraka tiki hemakapurakao, asiane aporoamo aporo metane koteaka arareraka rakianafonorakanone, e siaraka rekenare? Wae. E siaraka rekenafapo. Epo hemakapurane Kotimo aseraka eane mafasiakosafapo.

<sup>15</sup> Arirakano Keresoa paosa aporo mae soko metao, Keresoa paosa papā soko metao, pasu faraka inuraka reke, makata nakosa soko faraka meamoraka rekeno, nōmo asekea

<sup>16</sup> eaki someraka, "Né koteaka rekeasimo hemakapurakaripo. Né inuraka reane soko meamoraka reane soko fahoasimo hemakapurakaripo." Aiyaka someraka ya aporo metane arareraka pasu soko makata nakosa soko kakanafonoraka, nenakamaka akai susumo somerakanone, siahoasifareapo.

<sup>17</sup> Kotiaki himu hakásaraka hemakapukua reke, aporo meta ararehoanafonorakanone, nōmo Kotiaki himu hakásaraka hemakapurane akura ayiáka kurakayiapo.

<sup>18</sup> Arirakano arareraka rakianafonona aporoamo someraka, "Nōmo Kotiaki himu hakásaraka hemakapukua rekenapo. Arirakano aporo metamo makata koteaka arareraka arakire." Airakano aporoaki úyaka somehoanie. Aporo metamo Kotiaki himu hakásaraka hemakapurane nōmo asekeasimo, epo koteaka arareraka rakirane asesie. Arirakano nōmo koteaka rakirane fasekenone nōmo Kotiaki himu hakásaraka hemakapurane aporo metamo mayiáka aseakosare?

<sup>19</sup> Nōmo ní hemakapukua someraka, "Koti hákasa ipipo. Koti meta rekenafapo." Airakane kakarorakae. Satanemo soko yatafumo soko someraka, "Koti hákasa ipipo. Koti meta rekenafapo." Aiyaka someraka ane ipu kakaroripo, airapo. Asiane ipu Kotiaki namoraka hamisisiraka risikinapo.

<sup>20</sup> Asiamo nōmo akai susuamo somerakanone aporo masuasa area ayiáka rekenapo. Nōmo Kotiaki himu hakásaraka hemakapurane hákasa reke, arirakano makata koteaka rakianafonorakanone, nōmo himu hakásaraka hemakapurane nenakamaka makata asi-apo.

<sup>21</sup> Arirakano nōmo Kotiaki himu hakásaraka hemakapurane soko, hokonomo arareraka rakirane soko, hakása yineraka rakiakosakipoko hemakapuraka, Eparahame ane hemakapunie. Isiapo makasa kaua kekema Eparahamemo ipi hokosa Kotiaki rukukakakosakipoko, eke rakisia eke kima yapura hokosane motorakano, Kotimo asekea Eparahameaki someraka, "Né aporo ereketaerareapo," aihoareapo.

<sup>22</sup> Asiamo Eparahamemo Kotiaki himu hakásaraka hemakapurane soko, hokonomo makata rakirane soko hákasa yineraka rakiraka reareapo. Ayiáka rakiraka reasasamo Kotiaki himu hakásaraka hemakapusuane rosaka taerareapo. Tipia metakarisiasfareapo.

<sup>23</sup> Arirakano Kotimo sawia popasane oyapo. "Kotimo someane Eparahamemo kaki-maka, Kotiaki himu hakásaraka hemakapusuasamo Kotimo someraka, 'Aporo ereketaesane nepo,' aihoareapo." Aisane Kotimo sawia popahoareapo. Arirakano Kotimo Eparahameaki someraka, "Nōmo tákane nepo." Aiyaka somesane Kotimo sawia popahoareapo. (Stat 15:6)

<sup>24</sup> Kotipoko rakianafonora himu hakásaraka hemakapura hákasan Kotimo asekea someraka, "Ne aporo ereketaerareapo," airafapo. Arirakano Kotiaki himu hakásaraka hemakapurane soko, hokonomo rakirane soko sarimarka rakirakano, ane Kotimo asekea someraka, "Ne aporo ereketaerareapo," airapo.

<sup>25</sup> Arirakano hinamo Réhape soko hemakapunie. Réhape ipi aporoyaki mokome pura hinamopo. Asiane Yu aporo tetá suti pesane Réhapemo faremarekeea teta tati apea poparipusimo ikiā kara meta tarisiapo. Tariraka epo Kotimo aporo suti pesane arareraka, ikiā kara tarisiasamo makata araresane Kotimo asekea someraka, "Né hinamo ereketaerareapo," aihoareapo.

<sup>26</sup> Asiamo aporo kusuane soko hemakapunie. Amano kaua hoyaki sarimarka reke hitafe rerapo. Hoane puraka kauane kurapo. Aina ayiáka aporomo Kotiaki himu hakásaraka hemakapurane hákasa hemakapukua reke, arirakano aporo meta arareraka makata rakirane rakianafonorakanone ane, aporoamo ipi Kotiaki himu hakásaraka hemakapurane akura ayiáka kurakayiapo.

### 3

"Nōmo ní akaiane koteaka asekea rekeanie," aisane oyapo.

<sup>1</sup> Keresoa paosa aporo maeo, aporo metamo someraka, "Tisamo rakirane nōmo rakiako seseripo." Aiyaka repo aporo yakaimo somehokopo. Isu tisa aporoane Kotimo aseraka hukuarura maiya amo isiapo makata hasaka tarisiane aseraka isuaki kára hukurukusapo.

<sup>2</sup> Isiapo suamo efera hunia soko, efera hunia soko, hasaka rakirapo. Arirakano aporomo hasaka somehoanafonorakanano, aporoane ipi namo kakaro koteaka rekenapo. Ipi akaimo hasaka somehoanafonoraka rekeno, e kaua makata meta hasakahokosafapo.

<sup>3</sup> Isiapo suamo efera hunia soko, efera hunia soko, hasaka rakirapo. Arirakano aporomo hasaka somehoanafonorakanano, aporoane ipi namo kakaro koteaka rekenapo. Ipi akaimo hasaka somehoanafonoraka rekeno, e kaua makata meta hasakahokosafapo.

tumuru takua purapo. Isiapo hemakapusua takua saro hose á purapo. Saro hosemo ipi hemakapusua takua purafapo.

<sup>4</sup> Arirakano kasu sipi soko hemakapunie. Kasu sipiane kárapo. Arirakano atifo ane soko kárapo. Asiane maropona ira waeane wakasemapo. Ira wae wakasema ane, aporomo maka kasu sipiane táriraka maroporakano, aporomo hemakapusua aeyaka kasu sipiane purapo.

<sup>5</sup> Aina ayíáka isiapo akaimo makata somera ayapo. Akai wakasema yiamo makata someraka kára rupiaka somerapo. Arirakano támō hákasa tonomaka karekea ape kára tosokohoane, ape kára suane inaka fanapo.

<sup>6</sup> Támō hákasa asiane isiapo akai ayapo. Makata watikisa suane isu akaia rekenapo. Akaimo isu hokono soko isu korake soko isu himu soko mokoatikinapo. Sapa pakimaka pekeia ira meta tosokohoane inaka amara ayíáka heao hauaka anakira rufiamo akaia tosokohoane inakamarapo. Amano ipi hokosa rea maiya amo soko, hokosa raua rea maiya amo soko, hinamo apia rea maiya amo soko, aporo sisima rea maiya amo soko, ira inaka amara ayíáka akaimo watikiaka someraka rerapo.

<sup>7</sup> Arirakano makata kakayia yaoa risiane, saro soko, mena soko, kuyare soko, pokoa soko, makata suane su mauahoane sianapo. Mauaraka aporomo karirapo.

<sup>8</sup> Kariraka yia ipi akaiane karirakanafapo. Akai ane watikiaka yia rerapo. Saro rúrua makesa mapíriane forosaka aka, forosaka roraka potoro koraka area ayíáka, amanomo akaiane ayíáka rekenapo. Hesekemo amano kaua nenaka, hesekemo yapiane amano kaua karápo. Aina ayíáka hesekemo yapi asiane amanomo akai ayapo.

<sup>9</sup> Arirakano akaimo Ata Kotiáki kekereraka somerapo. Akai hakásá yiamo, aporo tákeaki soko yakasa ho marekea ekeneraka somerapo. Kotimo e ipi ayíáka rakisia aporoaki yakasa ho marekea ekeneraka somerapo.

<sup>10</sup> Akai hakásá yiamo Kotiane kekereraka, arirakano aporo metaki yakasa ho marekea ekeneraka somerapo. Keresoa paosa aporo maeo, repo aiyaka somerane kakaro watikisapo. Aiyaka somehokopo.

<sup>11</sup> Arirakano he kafa he sirisa kotesa yaki he kukurupisayaki suasuaraka kerafapo.

<sup>12</sup> Arirakano ira fokemo ira kapaku wate perafapo. Sako karepemo ira foke wate perafapo. He towara numua kifiri nenahaoanafonona he pekeia rekenafapo. Asiamo akaimo Kotiane kekereraka someraka yia, akai hakásá yiamo aporo metaki yakasa ho marekea ekeneraka somehoane siahoasifareapo.

#### *Himumo koteaka hemakapurane Kotimo karáne oyapo.*

<sup>13</sup> Repo namina yia aporo hakásá metamo makata kotesa soko, makata watikisa soko, takekeia hemakapuraka rekenare? Ayíáka takekeia hemakapuraka rekenone, aporoane ipi koteaka rekeakosapo. Epo ipiane makarahoanafonorakano, aporo metakiramo asekeia someraka, "Epo makata kotesane takekeia hemaka apure." Aiyaka somehokosapo.

<sup>14</sup> Arirakano nómó himo aporo meta aseraka, epo makata kemo káraserkeno asekeia, eaki kakanakeraka hemakapurakua arirakano né níane hakásá makama fanaraka hemakapurakua, ayíáka hemaka apura maiya amo, nómó someraka, "Nómó koteaka takekeia hemakapurakanapo." Aiyaka nómó kotafe someamo nómó ní himumo hemakapusuan marakoraka somehokopo.

<sup>15</sup> Kakanakeraka hemakapurane soko, né ní makama fanaraka hemakapurane soko, Kotimo hepene yapunaka karáfapo. Asiamo watikiaka hemakapura amo kepoane oyapo. Hauaka wo makata amo soko, kaumohemakapusua makata amo soko, Satanemo ipi soko, aporomanomo watikiaka hemakapurakua rakísimo kirimanapo.

<sup>16</sup> Asiamo aporomo ipi kakanakehoko hemakapurakua, arirakano e ipiane makama fanahoko hemakapurakua, ayíáka rekenone, aporoamo someamo fana aporo hinamo himu hakásaraka koteaka risiane, parakuraka mokokeképohokosapo. Asiamo aporoamo watikiaka somerakano, makata watikisa suane faserepepehokosapo.

<sup>17</sup> Arirakano Kotimo koteaka takekeia hemakapurane hepene yapunaka Kotimo karáne oyapo. Fanane koteaka ereketae susu hemakapura ayapo. Arirakano metane, aporo metakiraki himu hakásaraka hemakapura ayapo. Arirakano metane, aporo metakiraki tau auaraka rera ayapo. Arirakano metane, aporo metamo somerakano epo someane kaira ayapo. Arirakano metane, aporo meta kamenakana ayapo. Arirakano metane, aporo metakira koteaka risikiasimo ararena ayapo. Arirakano metane, aporo meta makama fanaraka aporo meta makama kesekeraka ayíáka hemakapunafonona ayapo. Arirakano metane, himu tetáraha hemakapunafonora rakira ayapo.

<sup>18</sup> Arirakano aporo hinamo tau auaraka himu hakásaraka hemakapurakua risirane, makata mano potesa asiapo. Makata mano potesane keseke káraraka, wate kotesa apera ayíáka, aporo hinamoane koteaka susu ayíáka risikiakosapo.

## 4

*"Aporomo hauaka wo makataki tákera reke, Kotiaki yunuraka rekenapo."* Aisane oyapo.

<sup>1</sup> Repo saperaka tafatatanane soko, werane soko, kepoane manaka fasereperare? Aporomo soko metao, hinamomo soko metao, himo asekea mokoaripi, aíyaka hemakapukua, arirakano makata kára mokoaripi aíyaka hemakapukua, arirakano makata nakosa soko kára naripi, aíyaka nómó ní yiamo himu hemakapuramo, néane kiramaraka sapena amo tafatataraka werane fasereperapo.

<sup>2</sup> Hinamo soko metao, mone soko metao, aporo metamo makatane nómó asekea seseraka makatane makosakipoko wafayane rusua kurapo. Metamo makatane aseraka mokoaripi aíyaka hemakapukua reke, mayane siahoasifasekeno saperaka tafatataraka werapo. Asiane repo makata fesenosane mokoakosakipoko kurikurirakanafapo.

<sup>3</sup> Asiane maiya metakiramo repo makata mokoako kurikurisa nine morakanafapo. Mokoanafonosane mariraka mokoanafonosare? Né niane makárahokosakipoko hemakapukua kurikurisasamo mokoanafonorakayapo. Nómó ní ereketae hemakapunafonoraka, makata mokoakosane hasaka hemakapukua, nómó ní kaumohemakapusuane makáraraka kurikurirakanomo mokoanafonorakayapo.

<sup>4</sup> Repo Kotiane makama fanaraka hemakapunafonoraka risiane, re aporo rea pura hinamo asiapo. "Hauaka wo makataki tákera reke, Kotiaki yunuraka rekenapo." Aisane repo hemakapurakanafare? Nómó ní yiamo hauaka wo makataki tákera reke, nómó ní yiamo Kotiaki yunuraka rekenapo.

<sup>5</sup> Kotimo sawia popasane nenakamaka popasafapo. Isiapo hemakapusimo popasapo. Popasane oyapo. "Kotimo Ho Kotesa pusierakano pekeia isiapo himua rekenapo. Isiapo Kotiane metakarikia makata metaki himu tumurumo hemakapurakanone, Ho Kotesane mahisi mireeka isiapo rakirakanapo," aíyaka popasapo.

<sup>6</sup> Asiamo isiapo Kotiaki himu hakásaraka hemakapukua risikiasimo Kotimo isu ararenapo. Kotimo ararenane kakaro kárapo. Kotimo sawia popasane oyapo. "Aporomo ipi yano motosa makáraraka rea aporoaki Kotimo someraka, 'Né koteaka rekenafapo. Néane nómó ararehokosafapo,' airapo. Arirakano aporomo ipi yano motosa mawakasemaraka rea aporoaki Kotimo someraka, 'Néane nómó ararehokosapo,' airapo." Aíyaka Kotimo sawia popahoareapo. *(Sindaun 3:34)*

<sup>7</sup> Asiasamo Kotiane hemakapukua epo ipi someane kaiyinie. Kotimo someane kakimaka risike, Satanemo reaki mokopipiraka hokokarakano, repo Sataneaki someraka, "Nómó isuaki mokopipiraka hokoakarane, isiapo kaiyakosafapo. Ne metakarikia pusie." Airakano Satanemo reane metakarikia teketarikia pukusano.

<sup>8</sup> Asiamo repo himu hemakapusuane Koti rea hinakano, Kotiane soko re arisia peakosapo. Aporo watikiaka risia aporo reo, repo hokono pikirisekeno kusuana aiyáka, repo watikiaka rakirane metakarinie. Aporo himu tetáraka risia aporo reo, repo himu tetáraka hemakapurane kakaro metakarinie.

<sup>9</sup> Repo watikiaka rakisamaso uýáka hemakapukua risikianie. "Isiapo watikiaka rakisiapo," aíyaka hemakapuraka, himu nekea hihiripuraka risikianie. Kakaro kára hihiripuhoanie. Takuraka sesenane metakarikia hihiripuhoanie. Sesenane metakarikia himu nekea risikianie.

<sup>10</sup> Repo hakásaraka Unihae Kotiaki hufitaeraka someraka, "Kotio, nómó hasakasapo. Nómó watikiaka hemakapukua rakisiane, hunia nómó rakiakosafapo." Aíyaka nómó niane mawakasemaraka rekeno, Kotimo neane arareraka makárahokosapo.

*Repo namina maeane hokomaka mainamarekea somehokopo, aisane oyapo.*

<sup>11</sup> Keresoa paosa aporo maeo, nómó ní Keresoa paosa aporo maeane namina yia hokomaka kotafe topakamaraka mainamarekea somehokopo. Nómó ní maeane mainamarerakanone, ane Kotimo somemaneane soko mainamarerakanapo. Mainamareraka reke Kotimo somemaneane\* (Wok Pris 19:18; Yamese 2:8) koaretaeraka mawakasemarakanapo. Aiyáka nómó ní mae mawakasemaraka rekenone, né hukurura kepo kaira aporo pariraka rekenapo.

<sup>12</sup> Arirakano hukurura kepo kaira aporo hakásaraka ane, Koti ipipo. Kotimo ipi hakásamo somemane motosapo. Epo hakásamo amano parakuraka hepene hauaka yapura karikia hiakosane soko, heao hauaka atura pukusane soko, Kotimo ipi hakásamo motoakosapo.

\* <sup>4:11:</sup> Kotimo somemane motoraka, "Nómó ní hemaka apura aiyáka, nómó ní aporo takeane soko aiyáka hemakapunie," aíyaka somemane motosapo. Asiamo nómó ní maeane mainamarekea somerakano, Kotimo somemaneane koaretaerakanapo. 'R

Asiamo ne aporo epare? Nómó aporo tákéaki fanasina motoakosane soko, fanasina metakariakosane soko, nómó ayiakakopo. Ane nóménafapo.

*"Repo namina makarahoko rupiaka somehokopo," aisane oyapo.*

<sup>13</sup> Hao, kaisie. Repo metakiramo Kotiane hemakapurafaraka, repo namina menane makama fanahoko hemaka apure. Asiamo nómó reane maroporaka somerakanapo. Repo aporo metakiramo someraka, "Pipu soko metao, rau soko metao, ano ape meta pukua keremisi hakásamo á reke, pisinisi rakiraka mone kára mokoakosapo."

<sup>14</sup> Ayíaka repo somerapo. Aisa nine rau ayiakakosane repo asekea hemakapurafapo. Arirakan mituru ako pekea nina maiya tipiamo akaone hinaka fanapo. Ako fa ana ayíáka yumo re hitaferaka arisiamo, kukusa maiyane mahimeteraka risikinapo.

<sup>15</sup> Arirakan repo úyaka somehoanie. "Unihae Kotimo aorakan, isu hauaka wo risike makata metakira rakiakosapo." Ayíaka hemakapunie.

<sup>16</sup> Ayíaka repo hemakapufunusa nine, repo ayíáka hemakapurakarifapo. Repo Kotiane hemakapunafonoraka repo namina yia makáraraka rupiaka somerakanapo. Repo namina yia makáraraka rupiaka somerane kakaro watikisapo.

<sup>17</sup> Asiamo nómó makata koteaka rakiako hemakapusua nine nómó rakianafonoraka metakirakan, ane nómó watikiaka rakirakyapiro.

## 5

*Aporo makata kemo kára toaki some karáne oyapo.*

<sup>1</sup> Aporo makata kemo kára toa reo, nómó some one kakimakanie.\* Reaki makata umisa soko, mokoatikihokosa maiya ane soko faserepeakosapo. Makata ane faserepeakosasamo kara hihiripuhoanie.

<sup>2</sup> Repo makata kemoane toreraka fahokosapo. Arirakan repo pasu soko surisurimo nakosapo.

<sup>3</sup> Repo sekete soko, yokotae soko toreraka fahokosapo. Arirakan repo moneane soko patéraka kemóraka watikihokosapo. Mone mokoatikina ayíáka repo kauane soko, ayíáka mokoatikihokosapo. Iramo apaira ayíáka mone kára mokoako seseaka hemakapura amo repo kauane mokoatikiraka paiyakosapo. Repo mone soko, makata kemo soko, kára taerape apurane mayiakasimo taerakanare? Fahora maiya amo keseke makata suane fahokosapo.

<sup>4</sup> Mone fahokosa nine repo taerakanapo. Taerakanano yia repo aporo raipamo, repo hauaka hemo tokorakan asekea, ipu makata ropoane repo hakimokoa iaki kasafapo. Makata ropo kakanafonoraka hakimosane Kotimo aserapo. Aporo raipamo Koti wárakan Kotimo kaisiapo. Makata suamo Unihaeane soko aporo suamo Unihaeane soko Koti ipipo. Kotimo makata su kairapo.

<sup>5</sup> Kairakanano yia hauaka wo repo makata kára taeraka seseraka enana ayíáka enaraka risikinapo. Saro rukusakipoko saroane makata nakosa kára karaka, saro kaniamoana ayíáka re himuane maseraka karakanapo. Saro rukusa maiya á pauna ayíáka re hukurukusa maiya ane pauhoko makerakanapo.

<sup>6</sup> Arirakanan watikiaka rakianafonasa aporoane repo fanasina motoraka, iane rusua kusuapo. Rusua kurakan ipu reyaki wekea roposafapo.

*"Makata umisane fasereperakanano Unihae Kotimo ararehoasimo kau risikianie," aisane oyapo.*

<sup>7</sup> Keresoa paosa aporo maeo, Unihae Yasu pariperakahoamo asekea risike, himumo wakapuaka hemakapukua kau risikianie. Aporomo hemo tokoraka makata mano porokoa, hemoane metakirrafaraka, makata koteaka paruhoasimo kau risirapo. Kau risike aseane yao soko pekea, maiyamo soko ruraka, makata mano koteaka tanehekeea karaka parusekeno asekea morapo.

<sup>8</sup> Aina ayíáka repo soko, Yasuane metakirrafaraka ayíáka kau risikianie. Makata umisa fasereperakanano soko, himu hakásaraka hemakapukua yaiya wakapuaka risikianie. Unihae Yasu peakosa maiyane makerakanapo.

<sup>9</sup> Keresoa paosa aporo maeo. Yasumo re fanasina motoakohoamo repo namina yia Keresoa paosa aporo maeane saperaka hokomaka somehokopo. Hukurura kepo kaira aporo kára Yasuane ipi peako ikia koroa kau rekenapo.

<sup>10</sup> Keresoa paosa aporo maeo, repo Kotiane metakirrafaraka kau risikiakosane hemakapukosakipoko, porofete aporo fana risiamo ásiáne hemakapunie. Unihae Kotimo some karakan, porofete aporomo kaikia aporo hinamo suaki some kasapo. Some kayane

\* 5:1: Aporoamo moneane makama fanaraka hemakapurafapo. Ipu Kotiane makama fanaraka ayíáka hemakapurakanafapo.

iane aporo metakiramo mokoatikirakano, ipu Kotiane metakarirafaraka, Kotiaki himu hakásaraka hemakapukua risiapo.

<sup>11</sup> Ipu wakapuaka hemakapukua risiakipoko, iane isiapo someraka, "Ipu Kotiaki yaiya himu hakásaraka hemakapukua risikino, Kotimo iane makotesapo," airapo. Yopa soko hemakapunie. E mokoatikirakano Yopamo Kotiane metakarirafaraka, makata takamasane haru fahoanafonosa nine, Kotiaki yaiya himu hakásaraka hemakapukua reareapo. Aipe pukua keseke Kotimo e kakaro makotehoareapo. Asiamo isiapo hemakapusuane kakaro kára hemakapukua kamenakana amo kepoane Unihae Koti ipipo. Ane repo hemakapurakanapo.

<sup>12</sup> Maeo, repo kakaro someraka soko, kotafe someraka soko, aumaraka somerane somehokopo. Hepene yano hokoa soko, hauaka one yano hokoa soko, makata meta yano hokoa ayíáka aumarane aumahokopo. Kotimo re fanasina motoakohoamo repo aohoko hemakapuraka aohoanie. Waehoko hemakapuraka waehoanie. Repo somera amo kakaro ereketaeraka somehoanie.

<sup>13</sup> Arirakano repo namina yia, aporo metamo makata umisa maka himu nekea rekenare? Rekenone ipi yiamo Kotiaki kurikurirasie, aihoanie. Arirakano aporo meta seseraka rekenare? Rekenone, aporoamo ipi yiamo Kotiaki kekereraka kesarasie, aihoanie.

<sup>14</sup> Arirakano aporo meta makata takamasa rekenare? Rekenone, ipi yiamo Keresoa paosa aporo asekea risia aporoane peaerasie, aihoanie. Peaerakano i peraka, ipu aporo makata takamasa kaua wera rekemareke, Unihaemo wakapumo e mafahoasimo kurikurirasie, aihoanie.

<sup>15</sup> Ipu kakaro Kotiaki himu hakásaraka kurikurirakano, aporo makata takamasane Unihaemo mafahokosapo. Arirakano aporo makata takamasamo watikiaka rakisiane soko, Unihae Kotimo mafahokosapo.

<sup>16</sup> Asiamo repo watikiaka rakisiane repo namina yia hufitaeraka somehoanie. Repo namina yia metamo metane farimaka kurikuriraka metamo metane farimaka kurikuriraka, ayiakanie. Arirakano re makata tasane fahokosapo. Arirakano ereketaeraka rea aporomo wakapuaka kurikurinapo. Epo kurikurina aeyaka Kotimo wakapuaka rakirakano, aporoane ararenapo.

<sup>17</sup> Wakapuaka kurikurinane hemakapukusakipoko, porofete aporo Iraiymo kurikurisane hemakapunie. Isu hauaka aporomano arisia ayíáka, Iraiya soko ipi hauaka aporo reareapo. Epo wakapuaka kurikuriraka, "Yao peakopo." Aíyaka kurikurirakano keremisi isia faraka, keremisi kitafa kekemarape pukua titipiámoo yao pesafapo.

<sup>18</sup> Maiya amo Iraiymo efera hunia kurikuriraka, "Yao peanie." Aíyaka kurikurirakano yao pesapo. Yao perakano makata mano koteaka tanehekeea wate pesapo.

<sup>19</sup> Keresoa paosa aporo maeo, repo aporo hakásá metamo Kotimo someane metakarikia paripurakano, epo efera hunia kakimakasimo, nómó aporoane pasimaka maroporaka somerakanone, aporoane nómó ararerakanapo.

<sup>20</sup> Aporo watikiaka reamo ikia kara watikisa kekemaraka puraka reane, nómó pasimarakano, e kuraka fanasina hauaka á purapaka eane nómó mafasirakanapo. Epo watikisa kárane soko Kotimo mafahokosapo. Mafahoasimo nómó eane ararerakanapo.

## 1 Pita 1 Pita sawi one mahemakapukusa someane oyapo.

Yasu hauaka wo koraka reamo Pitane soko Yasuyaki hakāsa koraka reapo. Yasu hepene yapura hisiakipoko, Pitane tarira apororaka rakisiapo.

Yasu hepene yapura hisiakipoko, keremisi 34 su faraka, Pitamo sawi one popasapo. Maiya amo Keresoa paosa aporo hinamoane aporo metakiramo mokoatikirakanano, namina tekatarikia pukua hauaka kekepoa risiapo. Asiasamo Pitamo sawi one popasapo. Keresoa paosa aporo hinamoane paripurapaka, namina Keresoaki himu hakásaraka paroaka risiki-asimo Pitamo sawi one popasapo. Yasuane himu nekea kau tesane hemakapurakano, re paroaka risikiakosapo, aisapo.

Arirakano Pitane Rome sitia reke, Rome aporo metakiramo eane soko mokoatikisapo. "Keseke hepene yapura isu Yasuyaki hakāsa risikiakosapo, aiyaka hemakapunie," aiyaka Pitamo somesapo.

### **1 Pita sawia some kepo parakuraka popasane oyapo.**

1:1-2 Pitamo sawi one kepomarekea popasapo.

1:3-12 Kotimo reane yaku arareraka mafasisasamo Kotiane makáraraka kekeresapo.

1:13-2:10 Keresoa paosa aporo hinamomo makata watikisané kikisiraka koteaka susu risikianie, aisapo.

2:11-3:12 Aporo hinamomo makata aina kotesane kekemahoanie, aisapo.

3:13-4:19 Reane aporo metakiramo mokoatikirakanano paroaka risikianie, aisapo.

5:1-11 Keresoa paosa aporo hinamo asekea risira aporoaki soko, Keresoa paosa aporo hinamo suaki soko, Pitamo tarira someane some kasapo.

5:12-14 Pitamo ayapasapo.

*Pitamo sawi fana poparaka makesane oyapo.*

<sup>1</sup> Ano Pitane Yasu Keresomo tarira aporopo. Re Keresoa paosa aporo hinamo re Kotimo murikimasaki nōmo sawi one poparaka makerakanapo. Re Keresoa paosakipoko reane aporo metakiramo rukua koaka taerakanano, repo namina ape sumuane metakarikia tekatarikia pukua, hauaka metakira risikinapokano nōmo kaikia, nōmo reaki sawi one poparaka makerakanapo. Re metakira Pónetase hauaka á pukua risiaki soko, metakira Karésia hauaka á pukua risiaki soko, metakira Kapatósia hauaka á pukua risiaki soko, metakira Ésea hauaka á pukua risiaki soko, metakira Pitínia hauaka á pukua risiaki soko, re suaki nōmo sawi one poparaka makerakanapo.

<sup>2</sup> Wate fana Koti Atamo ipi hemakapusua aeyaka reane murikimasapo. Re kakaro koteaka susu risikiasimo Ho Kotesamo repo makata watikisané makikisisapo. Arirakano Yasu Keresomo someane repo kakimaka, arirakano Yasumo yapi pusuamo repo makata watikisané kosohokosakipoko Kotimo re murikimasapo. Asiamo Kotimo ipi yaku ararenane soko, ipi auaraka rerane soko, reaki kára kakasimo nōmo hemakapurakaripo.

*Hepene yapura yaiya risikiakosane oyapo.*

<sup>3</sup> Unihae Yasu Keresomo ipi Ata Kotiaki isiapo kekereraka suserakanapo. Kotimo isu kára hemakapurakanapo. Asiamo epo Yasuane maturikia taesasamo epo isuane mafasikia makawesapo. Asiasamo isu eyaki hakāsa yaiya risikiakosapo. Arirakano Kotimo isu makotehokosaposane isiapo paroaka hemakapukua kau risikinapo.

<sup>4</sup> Isu Kotimo hokosa pariraka risiasamo epo hokosaki kakakosapo aisane isiapo mokoakosapo. Asiamo keseke isu Kotiyaki yaiya risikiakosapo. Hepene yapura yaiya risikiakosane metamo mokoatikinafapo. Arirakano Kotiyaki yaiya risikiakosane namo kakaro kotesapo. Kotesane fahokosafapo. Makata ane Kotimo asekea rekeno isiapo mokoakosapo.

<sup>5</sup> Repo Yasu keresoaki himu hakásaraka hemakapurakano, Kotimo wakapumo re mafairaka asekea rekenapo. Asekea reke isu hepene yapura hiasimo mafasirane yumo Kotimo maresapo. Mafasirane maresasamo, keseke fa ana maiya amo Kotimo isu pasimokoa mafasikosane isiapo aseakosapo.

<sup>6</sup> Ayiakakosasamo seseraka risikianie. Seseraka risike yumo maiya wakasemamo aporomo soko metao, makata metamo soko metao, re mokoatikirakanapo. Reane mokoatikirakanano yia, seseaka risikianie.

<sup>7</sup> Re mokoatikirakanano asekea, repo Kotiaki kakaro himu hakásaraka hemakapukua yaiya risikiakosare? O repo Kotiane metakariakosare? Asiamo Kotimo re kau aseakosapo. Repo Kotiaki himu hakásaraka hemakapurane korótó asiapo. Korótó namo susu mokoakosakipoko aporomo korótóane paikia, makata pepeno pará risiane iramo inarapo.

Inaka faseneno koróto namo susuane morapo. Arirakano koróto namo aporomo mokoa sesenapo. Arirakano korótoane hauaka omo menasamo fahokosapo. Korótoane wakasemapo. Repo Kotiaki himu hakásaraka hemakapurane namo kakaro kárapo. Koróto namo mokoako aporomo korótoane pairapo. Aina ayíáka makata umisa fasere aperamo Kotimo reane kau aserapo. Repo Kotiaki kakaro himu hakásaraka hemakapusuariloamo kau aseako makata umisa fasereperapo. Repo kakaro himu hakásaraka hemakapurakanano Kotimo asekeea, ipi reaki sesenane kárahokosapo. Aporomo koróto maraka sesenane wakasemapo. Arirakano Yasu Kereso pariapera maiya amo, Kotimo reaki seseraka kekereraka makárahokosapo.

<sup>8</sup> Arirakano Yasuane hauaka wo koraka reamo repo eane asesafapo. Asiāne repo eaki himu tumurumo hemakapurakanapo. Yumo soko e asekeanafonorakano yia, repo eaki himu hakásaraka hemakapurakanapo. Eaki himu hakásaraka hemakapukua risike, seseaka risikinapo. Hepene yapura sesenane hauaka wo makata meta murikimaka somehoane siahoasifareapo.

<sup>9</sup> Repo Keresoaki himu hakásaraka hemakapukua risikino, Kotimo reane mafasirakanapo. Asiamo re seseaka risikinapo.

<sup>10</sup> Arirakano mafasira kepoane repo hemakapurakanapo. Wate fana porofete aporomo Kotimo mafasira kepoane hemakapukusakipoko ipu kosapo. Ipu kokoa hisiraka asekeea, Kotimo re yaku ararehokosane ipu wate fana somesapo.

<sup>11</sup> Keresomo Ho Kotesa i himua reamo someraka, "Kereso ipi himu nekea kau teraka makata umisane epo maka rekeakosapo. Maka nina faraka Keresoane faesa kára rekeakosapo." Arirakano porofete aporomo akai kairaka, "Maiya mamo faserepeakosare? Fasereaperha maiya amo makata umisa maka rekeakosane epare?" Aiyaka porofete aporomo akai kaisiapo.

<sup>12</sup> Aiyaka akai kairakano ipu hemakapusimo Kotimo someraka, "Re arisia maiya yumo ayiakakosafapo. Keseke aporo metakira wainekeaa arisia maiya amo ayiakakosapo." Aiyaka somesane keseke maiya amo ayiakakosaposane, pipu maiya yuyapo. Keseke aporo metakira wainekeaa risikiakosaposane repo. Arirakano wate fana porofete aporomo Kereso peakosane some kasapo. Some kasane yumo Kotimo some kará porofete aporomo reaki some karakasupo. Arirakano Kotimo Ho Kotesa pusierakan hepene yapunaka Ho Kotesa hauaka wo pesapo. Peeka somerakano kakinara aporomo kaikia aporo hinamo metakiramo Keresoane hemakapusimo ipu some kotesane reaki some karakasupo. Arirakano mafasiakosa kepoane hepene aporomo soko hemakapuko sesenapo.

"*Makata watikisane makikisiraka koteaka susu risikianie,*" *aisane oyapo.*

<sup>13</sup> Kotimo reane araresasamo ereketae susu hemakapukua risikianie. Makata watikisamo repo himu hemakapurane kirimarapaka asekeanie. Maiya suamo koteaka hemakapukua risikianie. Watikiaka hemakapurapaka asekeea risikianie. Yasu Kereso pariapera maiya amo, Kotimo reane ararehokosasamo, repo himu hakásaraka hemakapukua risikianie.

<sup>14</sup> Hokosamo ipi atamo someane akaira ayíáka, repo Kotimo someane kaikia koteaka risikianie. Fana Kotimo someane repo kaiyasilraka himeteraka risike, kaumohemakapusuane kekemasa ayíáka yumo kekemahokopo.

<sup>15</sup> Arirakano Kotimo ainane watikinafapo. Namo kakaro kotesa susupo. Kotimo reane pasimosasamo repo makata watikisane makikisiraka, koteaka susu rakiraka risikianie.

<sup>16</sup> Arirakano Kotimo sawia popasane oyapo. Kotimo someraka, "Repo Kotiane anopo. Nōmo ainane koteaka ereketae susupo. Asiasamo re soko kotesa ereketae susu risikianie." Aiyaka Kotimo somerakano popahoareapo. *(Wok Pris 19:2; 11:44-45)*

*Yasumo yapimo isu roporaka Kotimo isu pasimasane oyapo.*

<sup>17</sup> Aporo hinamo suamo makata rakisiante Kotimo asekeea ereketae takekea parakuhokosapo. Asiasamo Kotimo nenakamaka takekea parakunafapo. Aporo hinamo metane epo nenakamaka seseraka makama fanaraka, arirakano aporo hinamo metane nenakamaka hisiraka makama kesekeraka ayíáka takekea parakunafapo. Arirakano aporo hinamomo makata watikiaka rakisiante Kotimo aseraka takekea fansasinane motoakosapo. Asiamo takekea fansasinane motora kepoane Koti ipipo. Arirakano repo Kotiaki kurikurina maiya amo repo someraka, "Atao," airapo. Arirakano hauaka wo re fore arisia maiya amo, koteaka risike Kotiaki namoraka eane makárahoanie.

<sup>18</sup> Repo fana hauaka wo makasa kamumamo arupusimo rakirane enomaka rakiraka risiapo. Arirakano aporo tipura kekeaa arisia ayíáka re ayíáka risiapo. Re tipura risiane tonotaehoasimo Yasu Keresomo repoko farimaka api Kotiaki kasapo. Hauaka wo aporomo api karane, koróto soko, siufa soko, mone soko karápo. Hauaka wo makata ane fanapo.

<sup>19</sup> Arirakano Yasu Keresomo ipi yapi kasane namo kakaro káraro. Arirakano saro sipi mano makata takamakanafonosa, kau kere karianafonosa ásiáne Yasupo. Saroane rukua makata watikisapoko Kotiaki api akara ayíáka, isiapo watikisapoko Yasu Keresomo farimaka api kasane Yasumo yapi ayapo.

<sup>20</sup> Arirakano hauaka one Kotimo kepomareasiraka, Yasumo ipi yapiane isupoko farimaka api kakakosane, Kotimo ipi fana hemakapukua maroposapo. Maroposane fahokosa maiyane makeanamo Yasuane isupoko hauaka wo pesapo.

<sup>21</sup> Pesasamo eaki repo kataka marekea risikino Kotiaki himu hakásaraka hemakapurakanapo. Kotimo Yasu kusuanne maturikia taeraka eane makáraraka mafaeraka mare-sapo. Maresane hemakapukua repo someraka, "Isu eyaki yaiya risikiásimo isu soko maturikia taehokosapo." Aíyaka repo Kotiaki himu hakásaraka hemakapurakanapo.

*Isiapo isina mae metane himu tumurumo hemakapunie, aisane oyapo.*

<sup>22</sup> Kotimo kakaro someane repo kaikia kekemarakaa risike, makata watikisane metakarikia, Keresoa paosa mae papa ane repo kakaro himu tumurumo hemakapurakanapo. Arirakano repo namina yía soko namo kakaro himu tumurumo hemakapukua risikianie.

<sup>23</sup> Kotimo someane repo kakimasasamo, Kotimo reane makawesapo. Asiamo Kotiane repo Atapo. Koti yaiya rekenapo. Arirakano hauaka wo isiapo atane kurapo. Kotiane ayíáka kurafapo. Arirakano Kotimo someane kakaro somepo. Some ane yaiya rekeakosapo. Fahokosafapo.

<sup>24</sup> Arirakano Kotimo sawia popasane oyapo.

"Aporo hinamo suane hauaka wo yaiya risikiákosafapo. Asane hauaka wo tanehekeea wakasema nina kurapo. Aina ayíáka aporo hinamo suane anapo. Arirakano farafara poraraka yoferaka huruapera ayíáka, aporo yano motosa kárane soko ayíáka fánapo.

<sup>25</sup> Arirakano Unihae Kotimo someane fahokosafapo. Yaiya rekeakosapo." Aíyaka popahoareapo.

*(Aisaia 40:6-8)*

Asiamo aporo hinamomo Yasuane hemakapusimo some kotesa some kasane fahokosafapo.

## 2

*"Ira warupi ásiáne Yasu Kereso ipipo," aisane oyapo.*

<sup>1</sup> Reane Keresoa paoraka makawéssasamo repo aporo metakiraki mokoatikinane su metakarinie. Kotafe somerane soko, himu tetáraka hemakapukua rakirane soko metakarinie. Arirakano kakanakenane soko, aporo meta hokomaka somerane soko metakarinie.

<sup>2</sup> Arirakano hokosa kirimo hoko pi hákasa nako sesena ayíáka, repo Kotimo kakaro someane hákasa ayíáka kakimako sesehoanie. Hokosamo hoko pi kotesa susu nenapo. Aina ayíáka Kotimo kakaro some kotesa susuane hákasa kakimakanie. Kotafe someane kakimakopo. Hokosa kárana ayíáka, repo some kotesa susuane kakimarakan, re Keresoa paosane ayíáka káraraka risikiákosapo. Ayíáka risikino keseke re Kotiyaki hakása yaiya risikiákosapo.

<sup>3</sup> Fana repo Yasu Keresoane hemakapusufapo. Ásiáne yumo re keresoa paoraka Yasu Keresomo re yaku araresan repo hemakapurakanapo. Asiamo Unihae Yasuane namo kakaro kotesapo, aíyaka repo hemakapurakanapo.

<sup>4</sup> Eaki kataka marekea risikianie. Ira warupi ásiáne epo. Ira warupiane aporomo asekeea kamaka makata hemakapura ayíáka mamakatesapo. Arirakano ira warupiane Kotimo aseraka someraka, "Irane kotesapo," aíyaka ira warupiane Kotimo murikimasapo. Murikimaka ira warupiane maposapo.

<sup>5</sup> Arirakano reane Keresoa paosasamo ape kira ira ásiapo. Ira hakása hakásaraka maka ape kirapo. Aina ayíáka isu suane Kotimo ipi ape ayíáka kisia á isu risikinapo. Asiamo repo suamo pirisiti aporomo makata rakirane rakisimo kotimo reane murikimasapo. Arirakano Yasu Keresomo re mafasisasamo repo kauane Kotiaki makata yaku akará ayíáka kakanie. Ayíáka karakano Kotimo reaki sesehokosapo.

<sup>6</sup> Arirakano Kotimo sawia popasane oyapo.

"Uri Saeonea ira warupi Kotimo maporakanapo. Ira warupi murikimaka irane kotesapo. Ira warupi kotesaki himu hakásaraka hemakapura aporo hinamoane kaiyahokosafapo." Aíyaka Aesayamo popahoareapo.

*(Aisaia 28:16)*

Ira warupiane takumeaka popasane Yasu ipipo.

7-8 "E kakaro kotesapo," aiyaka kakimara aporo hinamomo hemakapurapo. Asiāne Kotimo someane koaretaena aporo hinamoane ira warupia terafakaruraka etenapo. Arirakano Kotimo sawia meta popasane oyapo.

"Aporomo ape kiraka, ira warupi mamakatesane Kotimo máfaraka makama fanaraka mapohoareapo. Ira warupia aporo terafaka rurapo. Ira warupia finihoane pariruraka etenapo." Aiyaka popahoareapo. (*Buk Song 118:22; Aisaia 8:14*)

Aiyaka popasane aporo hinamomo Kotimo someane koaretaesakipoko terafakarurapo. Terafakarukusane Kotimo maresapo.

<sup>9</sup> Arirakano kakinara aporo hinamoane Keresomo aporo ira risikiasimo Kotimo murikimasapo. Arirakano Unihae Kotimo pirsiti aporo hinamo parisane repo. Arirakano re Kotimo pasimosa aporo hinamo su risiane Kotimo murikimasapo. Murikimasane namo kakaro koteaka susu risikiasimo Kotimo murikimasapo. Arirakano Kotimo someraka, "Aporo hinamo reane nōmō tākēpo," aihokosakipoko epo reane makikisiraka murikimasapo. Asiamo Kotimo reane kára araresane repo kekereraka somehoasimo epo reane murikimasapo. Fana re katosa á risiane metakarikia, epo faesa kára á risikiasimo Kotimo reane murikimaka peaesapo.

<sup>10</sup> Fana re nena aporo hinamo risiapo. Yumo re Kotimo aporo hinamo risikinapo. Fana repo Kotimo kamenakanane himetesapo. Yumo epo kamenakanane repo hemakapurakanapo.

*"Kamani aporomo somemane kekemahoanie," aisane oyapo.*

<sup>11</sup> Hameo, hepenea hiakosasamo hauaka one kakaro repo hauakafapo. Hauaka wo fore risike, kimisi pariraka risikinapo. Arirakano kaumo hemakapusua amo himumo koteaka hemakapusua tati werakano, kaumo hemakapusuan kakimakopo.

<sup>12</sup> Keresoa paohoanafonosa aporo hinamoamo asekeasimo re koteaka risikianie. Ipu reaki kotafe topakamaraka someraka, "Re watikiaka arises." Aiyaka kotafe topakamaraka somehoko asiāne, re koteaka risikino asekea, Yasuane pariapera maiya amo ipu Kotiane kekehokosapo.

<sup>13</sup> Arirakano Unihae Kotiane hemakapukua risike, hauaka wo kamani aporomo somepane motosane kakimakanie. Kamani aporo unihae e fanaraka reasasamo, epo somepane motosane kakimakanie.

<sup>14</sup> Arirakano kamani aporo metakiramo makata rakisimo kamani aporo unihae mo murikimasapo. Aporoane pukua makata rakiraka risike, somepane koaretaena aporoane ipu fanasiraka, arirakano koteaka risia aporoane ipu makotenapo. Ayiáka rakisimo kamani aporo unihae amo aporo metakirane murikimasapo. Asiamo kamani aporo metakira murikimasa aporoamo ipu somepane motosane soko repo kakimakanie.

<sup>15</sup> Asiamo kamani aporomo somepane ane repo kakimaka koteaka risikino Kotimo sesenapo. Re koteaka risikino asekea, aporo metakiramo reaki kotafe topakamaraka somehokosapoko asiāne somehokosafapo. Re watikiaka risikianafonosasamo ipu kotafe topakamaraka somerane metakariakosapo. Aporoamo himeteraka mokome somehoko hemakapusuan kakimakanie.

<sup>16</sup> Fana re makata watikisamo tipura ayiáka makesane, Kotimo re tonotaesapo. Tonotae-sasamo koteaka risikianie. Repo hemakapuraka, "Isiapo efera hunia makata watikiaka rakirakan, Kotimo efera hunia isu ararehokosapo," aiyaka hemakapukua risikiakopo. Arirakano repo úyaka hemakapunie. "Kotimo aporo raipa ane isupo. Asiamo isiapo Kotimo somepane kaikia kekemahokosapo," aiyaka hemakapukua risikianie.

<sup>17</sup> Aporo hinamo suane koteaka hemakapunie. Kakimara aporo hinamoane soko himu tumurumo hemakapunie. Kotiane namoraka makárahoanie. Kamani aporo unihae fanane soko koteaka hemakapunie.

*"Yasu Keresoane himu nekea kau teraka umisa masa ayiáka, repo soko ayiakasimo tarisiapo," aisane oyapo.*

<sup>18</sup> Aporo raipa roposao, re roposa wafayamo somepane kakimakanie. Kakimaka iane koteaka hemakapunie. Re roposa wafaya metakiramo koteaka auaraka somerakan soko, wafaya metakiramo matewaraka somerakan soko, ipu suamo somepane kaikia i suaki koteaka hemakapunie. Ipu suamo somepane kakimakanie.

<sup>19</sup> Repo koteaka rakikia risikinone, repo namina roposa wafayamo re nenakamakayia rukua kau terakan, himu mahisihoaanafonoraka someraka, "Kotimo isu hemakapukua asekea rekenapo." Aiyaka someraka risikino, Kotimo reane makotehokosapo.

<sup>20</sup> Repo watikiaka rakikia risiakipoko, re roposa wafayamo rurakan, repo sapehoanafonoraka risikino, Kotimo reaki someraka, "Re aporo kotesapo," aihokosare? Wae. "Repo namina yiamo watikiaka rakisiapo," aihokosapo. Arirakano repo koteaka rakikia

risiakipoko, ipu reane mokoatikirakan asekeea, repo sapehoanafonoraka risikino, Kotimo reaki someraka, "Re aporo kotesapo," aihokosapo.

<sup>21</sup> Aporo metakiramo re rukua mokoatikirakan, repo sapehoanafonoraka risikiasimo Kotimo re murikimasapo. Asiamo repoko Yasu Keresoane himu nekea kau teraka umisa maka reapo. Yasu rea ayíáka re soko ayíáka risikiasimo epo tarisiapo.

<sup>22</sup> Asiamo Yasu Keresomo makata watikiaka rakiraka reafapo. Makata watikiaka rakirane wakasema meta soko epo rakisiafapo. Kotafe somerane soko somesafapo.

<sup>23</sup> Aporomo e mainamarerakan epo some parihiisafapo. Aporomo e rukua mokoatikirakan epo someraka, "Keseke nómo reane rukusapo," ayíáka somesafapo. "Kotiane ipi makata hukurura kaira aporo káraro. Epo makata su asekeea ereketaeraka maropohokosapo." Aíyaka Kotiaki hákasa epo hemakapusuapo.

<sup>24</sup> Arirakan siapiro makata watikisane rukupateraka koteaka ereketaeraka risikiasimo, siapiro makata watikisane Yasumo maka, epo ipi kauane ira matopesa paremarestapo. Paremarekea e kaua karekea, hokonoa ikokoraka ayíáka kusuasamo, siapiro umisane epo masapo. Maka mafasapo.

<sup>25</sup> Arirakan saro sipi íkia kara hasaka apura ayíáka, fana re soko ayíáka íkia kara hasaka puraka risiapo. Asiáne yumo Saro Sipi Wafaya rea re pariperakano, repo himuane epo mafairaka asekeea rekenapo.

### 3

*"Aporo hinamo tati arumaka uyáka risikianie," aisane oyapo.*

<sup>1-2</sup> Hinamo repo kaisie. Nómo ni aporo pusuamo someane kakimakanie. Arirakan nómo aporomo Kotimo someane kakimakanafonoraka rekeno nómo eaki himu mahisihaoasimo somehokopo. Aíyaka somerafaraka nómo Kotiane makáraraka koteaka susu kakeno, ni aporo pusuamo nómo arakirane asekeea, e soko Kotiaki rekeako parihiokosapo.

<sup>3</sup> Arirakan hinamo re makahinamoraka ayíáka tokoakopo. Repo namina kaua kau rakirakosane makama fanaraka kára hemakapukopo. Ikiare soko, senaki kera soko, uni iti faturane soko, pasu kotesa kau rakirane soko, makata ane su kaum menapo.

<sup>4</sup> Arirakan re makahinamohoanafonoraka toke repo himuane makotehoanie. Re tau auaraka nanaehoanafonoraka tokeno ane kotehokosapo. Ayíáka tokeno Kotimo asekeea sesehokosapo. Himu koteaka ereketae hemakapuramo kaumo rakirane marokenapo.

<sup>5</sup> Arirakan repo kau rakira asiáne himumo koteaka hemaka apura ayapo. Wate fana hinamomo Kotiaki hemakapukua toamo ipu namina aporo pusuaki tau auaraka toke, namina aporomo someane kakimasapo.

<sup>6</sup> Arirakan Saramo soko Eparahamemo someane kakimaka Eparahameaki someraka, "Ne nómo unihemanopo," aisapo. Arirakan Sara koteaka kaya ayíáka re namonafaraka koteaka tokenone, re Saramo hokosa asia ayíáka tokenapo.

<sup>7</sup> Arirakan aporo repo soko kaisie. Nómo ní hinamoane hemakapukua rekeanie. Hinamomo wakapuane wakasemereasasamo, nómo ní hinamoane koteaka asekeea rekeanie. Teto tetákara Kotimo hokosasamo nómo hemakapuraka, "Hinamo eto Kotimo yaku ararerakan eto Kotiyaki yaiya risikiakosapo." Aíyaka hemakapukua rekeanie. Nómo kurikurinane patekenakohoamo ní hinamoyaki koteaka rekeanie.

*"Keresoa paosa aporo hinamo re uyáka risikianie," aisane oyapo.*

<sup>8</sup> Repo suamo namina yia himu hakásarak ahemakapunie. Metamo metaki himu pukua, metamo metaki himu pukua, ayíáka himu purane maka seseaka risikianie. Repo Keresoa paosa mae papa suane kamenakaraka hemakapunie. Aporo hinamo metane mawakasemaraka, né niane makarahokopo. Arirakan repo namina yia metamo metane arare, metamo metane arareraka risikianie.

<sup>9</sup> Aporo metamo re mokoatikirakan, repo ropo mokoatikihokopo. Re mainamarerakan repo ropo mainamarehokopo. Ropo mainamarenane metakarikia, repo iane makotehoanie. Arirakan iane makotehoasimo Kotimo re murikimasapo. Repo iane makoterakan, Kotimo reane makotehokosapo.

<sup>10</sup> Arirakan Kotimo sawia popasane oyapo.

"Ne koteaka rekeako seseraka, akaimo watikiaka somerane soko, kotafe somerane soko somehokopo.

<sup>11</sup> Makata watikisane metakarikia koteaka rekeanie. Maiya suamo tau auaraka rekeako hemakapunie. Tau rera íkia karane kekemahoanie.

<sup>12</sup> Arirakan aporo hinamo ereketae risiane Kotimo seseraka asekeea rekenapo. Ereketae risia aporo hinamomo kurikurirakan, Kotimo kaikia rekenapo. Arirakan watikiaka rakiraka risia aporo hinamoane Kotimo asekeea, hisiraka rekenapo." Aíyaka popahoareapo. (Buk Song 34:12-16)

<sup>13</sup> Repo koteaka ereketaeraka rakiako seserakano, aporo metakiramo soko re mokoatikihokosafapo.

<sup>14</sup> Arirakano re koteaka risikino, aporo metakiramo re kau mokoatikirakano, Kotimo reane makotehokosapo, aíyaka hemakapunie. Arirakano re mokoatikina aporoaki namoraka himu fahokopo.

<sup>15</sup> Repo himumo hemakapuraka, "Kereso ipi unihaepo," aíyaka e makáraraka hemakapunie. Arirakano aporo metamo someraka, "Ne Keresoyaki yaiya rekeakosaposane kepoane anoaki somesie." Airakano nómo Keresoaki himu hakásaraka hemakapusua kepoane aporoaki kakama somehoanie.

<sup>16</sup> Some ana maiya amo tau auaraka reke Kotiane makáraraka somehoanie. Nómo himua makata watikisane mafáraka reke somehoanie. Ne Keresoa paoraka koteaka susu rekeno, ne mahokoparis aporoane kaíyahokosapo.

<sup>17</sup> Ne watikiaka reakipoko aporo metamo né mokoatikirakano, nómo ní yia hasakarakanaapo. Ne watikiaka reakipoko, aporo metamo ne mokoatikirakano, makata umisa aue nómo Kotipoko marakanafapo. Arirakano Kotimo hemakapusua aeyaka ne koteaka reakipoko, aporo metamo ne mokoatikirakano siapo. Mokoatikina umisa aue Kotipoko maka reke siahoasireapo.

<sup>18</sup> Arirakano aporo hinamomo makata watikisa umisane Yasu Keresomo maka kusuapo. Yape hakásamo makata watikisa suane mafahokosakipoko ipi hákasa kusuapo. E ipi ereketae susu reane, isu ereketae risikianafosakipoko eane kusuapo. Isu Koti rea karikia hiakosakipoko ipi kauane kusuapo. Arirakano ipi hoane yaiya reapo.

<sup>19</sup> Arirakano Yasu ipi hoane pukua aporo kusua ho risia hauaka á iane tipura kesa ayíáka risiakipoko Yasumo some kakako pusuapo.

<sup>20</sup> Aporo hinamo i kusua ho kesane wate fana ipu Kotimo someane koaretaesapo. Arirakano Noa rea maiya amo Kotimo ipi foaka sapehoanafonoraka ipi foaka fanasinane motoanafonoraka kau reapo. Kau rekeno Noamo kasu kára tokoraka aporo hinamo karisuane kasua riparakano, he aeyaka Kotimo mafasisiapo.

<sup>21</sup> He aeyaka mafasisia asíane hea tapukuamarera ayapo. Hea tapukuamarera maiya amo kau pikirisane kusuhoko hea tapukumarerafapo. Isiapo Kotiaki someraka, "Nómo himura makata watikisane mafahoanie," aíyaka hea tapukumarerapo. Yasu Kereso kusuane epo maturikia taesasamo, eaki isiapo someraka, "Isu mafasinie," airakanapo.

<sup>22</sup> Arirakano Yasu hepene yapura hikia, Kotimo hokono tumuru takua rekenapo. Arirakano hepene aporoane soko, hauaka wo makata wakapuaka risiane soko, i suane Yasu Keresomo unihaeaka asekeea rekenapo.

## 4

*"Repo makata aina watikisane metakarikia, Yasumo makata aina kotesane rakinie,"  
aisane oyapo.*

<sup>1</sup> Yasu Keresomo makata umisa masa maiya amo ipi kau soko tesapo. Yasu ipi kau tesasamo repo soko úyaka hemakapunie, "Isu soko makata umisa maráka, kau tehoane siahoasireapo." Aíyaka repo himumo paroaka hemakapukua risikianie. Yasu kau tesa ayíáka, re soko kau teraka risikino, repo makata watikiaka rakirane metakarirakanapo.

<sup>2</sup> Yumo kepomarekea keseke soko hauaka wo arisia maiya amo repo kaumo hemakapusuane kekemaraka risikiakopo. Kotimo hemakapusuane hákasa kekemaraka risikianie.

<sup>3</sup> Keresoa paohoanafonosa aporo hinamomo makata rakiraka risira ayíáka, re fana ayíáka rakiraka risiapo. Repo fana ayíáka watikiaka rakiraka risiane, pipu yumo makata aina watikisane rukupateraka metakarinie. Nena aporo hinamomo makata rakirane oyapo. Hinamo hokomarekea somerane soko, kaumo makata watikiaka rakiako seseraka hemakapurane soko, he watikisa nekeia masuarane soko, aporo yakai sarimarakaa makata kára pakinekea he watikisa nekeia himu koteaka hemakapurane faraka mokome enaraka koraka risirane soko, kakaro Kotiane hemakapurafaraka makata meta koti mapariraka makáráraka kekererane soko, makata ayíáka rakirane nena aporo hinamomo ayíáka rakiraka risirapo.

<sup>4</sup> Ipu watikiaka rakira ayíáka, repo ayíáka watikiaka rakirakanafapo. Repo iyaki hakása watikiaka rakianafonorakano, ipu reane hokomaka mainamarerakanapo.

<sup>5</sup> Asiamo hukuarura maiya amo, ipu makata watikiaka rakisiane hukurura kepo kaira aporo káraki kakama somehokosapo. Arirakano hukurura kepo kaira aporo káramo aporo hinamo kusuane soko, hitafe risiane soko, ipu suamo makata rakisiane asekeea parakuhokosapo. Parakuhokosa maiyane makerakanapo.

<sup>6</sup> Arirakano aporo hinamo kusuane soko, epo hukurukua fanasinane kakakosapo. Arirakano Kotimo some kotesane aporo hinamo kukua kesa hoaki Yasumo some kakako

pusuapo. Hauaka wo aporo hinamo suamo kaumo rakirane hukuarura ayíáka, aporo hinamo kukua kesane hukurusuapo. Ipu hoane Koti area ayíáka kaweraka risikiasimo, Yasumo ipi Kotimo some kotesane somehoko pusuapo.

*"Kotimo reaki wakapu ararena kasane repo mokoa aporo hinamo metakirane arareraka rakinie," aisane oyapo.*

<sup>7</sup> Makata su fahokosa maiyane makepo. Koteaka kurikurihokosakipoko himumo koteaka hemakapukua risikianie. Repo makata ainane koteaka asekea risikianie.

<sup>8</sup> Asiamo makata aina fanane oyapo. Repo aporo hinamo suane himu tumurumo hemakapunie. Asiamo aporo metamo watikiaka rakirakan, repo eaki himu tumurumo hemakapukua risiasamo, aporo amo makata watikisane repo hemakapurafaraka mamer-aruholokoso.

<sup>9</sup> Arirakan Keresoa paosa aporo hinamo meta repo apea kimisi perakano mahisi-hokopo. Repo eane seseaka pasimaka asekea risikiane.

<sup>10</sup> Kotimo re su hakásara epo makata wakapu yaku ararenane kasapo. Asiamo re metaki makata wakapu ararenana meta kaka, arirakan metaki makata wakapu ararenana meta kaka, ayíáka kekepo karakan, neaki kasane nómo koteaka asekea rekeanie. Wakapu ararenana kasane maka repo namina yia aporo hinamo metapoko arareraka rakinie.

<sup>11</sup> Asiamo Kotimo neaki ararenana karakan maka, Kotipoko uyáka rakinie. Kotimo someane nómo some kakasimo Kotimo neaki wakapu karakan, nómo Kotimo someane some kakanie. Arirakan nómo aporo metapoko ararehoko rakirakane Kotimo wakapu karakan, nómo aporo metapoko arareraka rakinie. Yasu Keresope Koti tetá makáráraka kekerehoasimo, tetapó wakapu yaku ararenane neaki kasane, nómo maka rakinie. Arakira maiya amo aporo hinamo suamo Kotiane hemakapusimo rakinie. Ayíáka rakirakan Yasu Keresomo yano motosa aeyaka Kotiane kekereholokoso. Kotimo ipi wakapuanne soko faesane soko yaiya rekeakosasamo eaki kekerehoanie. Kakaroripo.

*Keresoa paosa aporo hinamomo makata umisa makosane oyapo.*

<sup>12</sup> Hameo, repo Kotiaki kakaro himu hakásara hemakapurakanare? Re kau aseakosakipoko, iramo inaka mokoatikiana ayíáka, repo kauane aporo metakiramo mokoatikiraka risikinapo. Re mokoatikirakan asekea, fofaraka namohokopo. Re Keresoa risikiako pariraka risikino asekea, aporo metakiramo re mokoatikihokoso.

<sup>13</sup> Keresomo ipi umisa masa ayíáka, re soko eaki paosasamo, umisane maka seseraka risikianie. Kereso ipi kára faesayaki pariapera maya amo, re kára sesenane komarukua risikiakoso.

<sup>14</sup> Re Keresoaki risikiako parisa akipoko, aporomo reane mainamarerakanapo. Re mainamarerakan Kotimo reane makoterakanapo. Kotimo Ho Kotesamo wakapuanne re risia á pesapo. Pesasamo seseaka risikianie.

<sup>15</sup> Arirakanó aporo meta kukturimo ruraka soko metao, makata hakimarakaa soko metao, aporo metamo watikiaka rakisimo nómo kirimarakaa soko metao, aporo metamo makata rakirane nómo mokoatikiraka soko metao, ayíáka nómo watikiaka rakiraka reakipoko, aporo metamo ne mokoatikirakanó nómo ní yiamo hasakarakanapo. Asiamo aporo ayíáka watikiaka rakiraka risikiakopo.

<sup>16</sup> Arirakan re Keresoa paosa aporo hinamosasamo aporo metakiramo re mokoatikirakan Kotiaki kekerehoanie. Re namohokopo. Re Keresoa paosasamo Kotiaki mapiraraka kekerehoanie.

<sup>17</sup> Arirakan reane mokoatikirakan Kotimo takekea parakuhokosa maiya ane fasere-peakosaposane yumo fasereperaka sikirakan aserakanapo. Kotimo ipi aporo hinamoane fana takekea hukurukua parakurakanapo. Isu kakimara aporo hinamoane yumo ke-pomareeka hukurukuranapo. Keseke namo kakaro kára hukurukusane Yasu pariapera maya amo, koarentaena aporo hinamoane hukurukua kára fanasihokoso.

<sup>18</sup> Kotimo sawia popasane oyapo.

"Aporo hinamo hauaka wo koteaka risiane, makata umisa marakano, keseke Kotimo mafasiakoso. Arirakan Kotiaki patera tarikia watikiaka risia aporo hinamoane Kotimo mayíáka mafasiakosare? Keseke Kotimo iane kára fanasihokoso." Aíyaka popahoareapo. (*Sindaun 11:31*)

<sup>19</sup> Asiamo Kotimo ipi hemakapusua aeyaka reane aporo metakiramo mokoatikirakan, yaiya koteaka rakiraka risike, Kotiaki himu hakásara hemakapukua paroaka risikianie. Asiamo aporo hinamoane soko, makata suane soko, Kotimo rakisiasamo, epo ipi makata suane koteaka asekea rekenapo. Arirakan Kotimo ipi ayiakakosaposane ayiakakoso.

<sup>1</sup> Yasu Keresomo umisa maka kau tesane soko, himu nesane soko, ano Pitamo asesapo. Keseke ipi faesane atarira maiya amo, ipi faesayaki káraraka rea ayíáka, ano soko ayíáka faesayaki rekeakosapo. Yumo nōmo soko Keresoa paosa aporo hinamoane asekea rekenapo. Repo soko Keresoa paosa aporo hinamoane asekea risiasamo nōmo reaki someraka, "Re uyáka risikianie," airakaripo.

<sup>2</sup> Saro sipi wafayamo ipi saro sipi koteaka asekea rera ayíáka, Keresoa paosa aporo hinamoane Kotimo reaki kasane, koteaka asekea risikianie. Aporo hinamoane nōmo seseaka asekea rekeakoripo, ayíáka hemakapukua rakirakanó Kotimo sesenapo. Repo Kotiane sesehoasimo iane seseraka hemakapukua koteaka asekea risikianie. Wákasema hisiraka ayíáka asekea risikiakopo. Makata ropo mokoakosa hákasa akipoko hemakapukua rakiakopo. Kotipoko raiparaka rakiako hemakapukua aporo hinamoane ararehoko rakinie.

<sup>3</sup> Repo aporo hinamoane asekea risike, iaki matewaraka rakiakopo. Ipu neane kekemahosimo nōmo koteaka fana tarikia rakinie.

<sup>4</sup> Ayíáka rakiraka risikino saro sipi wafaya fanaraka reane\* ipi pariapera maiya amo, reaki makata ropo namo kakaro kotesa fahoanafononane kakakosapo.

"*Kotimo someane kaikia, Kotiaki himu hakásaraka hemakapukua risikianie,*" aisane oyapo.

<sup>5</sup> Arirakanó Keresoa paosa aporo hinamo asekea risira aporoamo some karakano, aporo sisimahoanafonosa aporo repo kakimakanie. Repo suamo repo namina yia someraka, "Ano ní aporo kárupo." Ayíáka someraka risikiakopo. "Ano aporo kárafapo." Ayíáka hemakapukua aporo raipamo aporo metapoko arareraka rakira ayíáka rakinie. Arirakanó Kotimo sawia popasane oyapo. "Aporomo someraka, 'Ano aporo kárupo,' aira aporoaki Kotimo sesenafapo. Arirakanó aporo metamo someraka, 'Ano aporo kárafapo,' aira aporoane Kotimo arareraka makotenapo." Ayíáka Kotimo sawia popahoareapo. (*Sindaun 3:34*)

<sup>6</sup> Kotiane ipi wakapuaka unihaeaka rekenapo. Kotiane wakapuaka unihaeaka reasasamo, nōmo eaki someraka, "Ano aporo kárafapo. Né unihaeaka reasasamo nōmo some kotesane nōmo kakimarakanapo." Ayíáka somerakano, Kotimo ipi hemakapukua sere murikimasa amo, epo né makárahokosapo.

<sup>7</sup> Kotimo reane hemakapukua asekea reasasamo re himu nekea, himu tomekeraka risians epo ararehoasimo, eaki kurikurihoanie. Kurikurirakanó epo ararehokosapo.

<sup>8</sup> Re wakako nekeraka arisia ayíáka risikiakopo. Maiya suamo koteaka hemakapukua asekea risikianie. Asiamo saro raeonemo aporo meta rukunakosakipoko, kára meaka koraka rera ayíáka, repo yunu Satanemo re kirimaraka mokoakosakipoko wáraka koraka rekenapo.

<sup>9</sup> Koraka rekeno repo Keresoaki himu hakásaraka paroaka hemakapukua risike Sataneane pusiehoanie. Asiamo re mokoatikirakanó uyáka hemakapunie. "Isu mokoatikina ayíáka, hauaka sua isiapo Keresoa paosa mae papa soko ayíáka mokoatikirakanapo." Ayíáka hemakapukua risikianie.

<sup>10</sup> Maiya wakasemamo reane mokoatikirakanapo. Mokoatikisa maiyane faraka, repo Yasu Keresoaki kataka marekea risiasamo, Kotimo ipi faesane reaki kakakosapo. Asiamo faesane fahokosafapo. Yaku ararena kepoane Koti ipipo. Arirakanó aku potaka pusekeno petokoraka makotena ayíáka, reaki aporomo mokoatikisane Kotimo arareraka makotekohosapo. Repo eaki himu hakásaraka hemakapusuane, himu he kekeha hemakapurapaka, paroaka hemakapusimo epo ararehokosapo. Wakapuané soko reaki kakakosapo.

<sup>11</sup> Kotimo faesane soko wakapuané soko yaiya rekeakosasamo eaki kekeraka risikianie. Kakaroripo.

*Pitamo ayapasane oyapo.*

<sup>12</sup> Saerase ipi Kotiaki yaiya himu hakásaraka hemakapukua rekeno asekea isiapo Keresoa paosa aporo maeane ipipo. Saerase anoyaki hakása reke, ano arareraka, nōmo somerakano epo kaikia sawi one poparakanapo. Re Kotipoko paroaka risikianie, ayíáka nōmo reaki somerakano epo poparakanapo. Kotimo kakaro yaku ararenane repo maka paroaka risikianie.

<sup>13</sup> Arirakanó Keresoa paosa aporo hinamo Pápironé<sup>†</sup> sese apea risia amo reaki ayaparakanapo. Kotimo reane murikimasa ayíáka iane soko ayíáka murikimasapo. Ipu soko reaki ayaparakanapo. Nōmo Keresoa paosa hokosa Makamo soko reaki ayaparakanapo.

<sup>14</sup> Repo namina yia himu tumurumo hemakapukua hokono mokoanie. Keresoaki patera asesa aporo re suane tau auaraka risikiasimo nōmo hemakapurakaripo.

\* <sup>5:4:</sup> Saro sipi wafaya fanaraka reane Yasu ipipo. † <sup>5:13:</sup> Rome sitiane takumeaka Pápironé sitiane somesapo. Asiamo some kepoane Pápironé aporo hinamomo watikiaka rakiraka risia ayíáka, Rome aporo hinamomo soko ayíáka watikiaka rakiraka risiapo.

## 2 Pita 2 Pita sawi one mahemakapukusa someane oyapo.

Pitamo ipi kukusa maiya ane makerakano hemakapuraka, sawi one Keresoa paosa aporo hinamo hauaka kekepoa risiaki popasapo. Maiya amo kotafe tisa fasere pekea some karakano, Pitamo kaikia, Keresoa paosa aporo hinamomo kakimakohoamo sawi one popasapo. Hukuarura maiya amo kotafe tisane hukurukua kára fanasihokosapo, aisapo.

Re Keresoa paosa aporo hinamoane aporo metakiramo mokoatikirakano, repo Yasuane himu nekea kau tesane hemakapunie. Repo ayíáka hemakapurakano re paroaka risiki-akosapo.

Arirakano Yasu paripeakosaposane, kakaro paripeakosapo aisapo.

### **2 Pita sawia some kepo parakuraka popasane oyapo.**

1:1-2 Pitamo sawi one kepomarekea popasapo.

1:3-15 Isu Keresoa paoraka risikiasimo Kotimo isu pasimosapo. Pasimosasamo isiapo Kotimo makata aina kotesane kekemahoanie, aisapo.

1:16-21 Porofete aporomo Kotimo somerakan kaikia some karapo, aisapo.

2:1-22 Kotafe tisamo someane kakimakopo, aisapo.

3:1-18 Yasu pariaperamo makata ayiakakosane popasapo.

*Pitamo sawi meta keseke poparaka makesane oyapo.*

<sup>1</sup> Yasu Keresomo tarira aporo soko ipi aporo raipane soko anopo. Ano Saemone Pitamo reaki sawi one poparaka makerakanapo. Arirakano kakaro ereketaesa susuane Yasu ipipo. Yasu Keresoane isiapo Kotipo. Arirakano isu Mafasira Aporoane Yasu ipipo. Yasumo makata aina ereketae rakisia aeyaka isu mafasiasiapo. Eane ereketae reasasamo, isiapo tarira aporomo Kotiaki himu hakásaraka hemaka apura ayíáka, repo soko Kotiaki himu hakásaraka ayíáka hemakapurakanapo. Himu hakásaraka hemakapurane makata kotesapo. Re himu hakásaraka hemakupura aporo hinamoaki nōmo sawi one poparaka makerakanapo.

<sup>2</sup> Repo Kotiane soko Unihae Yasu Keresoane soko hemakapuraka risikino, tetapō yaku ararenane soko auaraka risirané soko reaki kára kakasimo nōmo hemakapurakaripo.

*Kotimo murikimasa aporo hinamoaki someraka, "Re uyáka risikianie," aisane oyapo.*

<sup>3</sup> Yasumo isuaki someraka, "Ano faesa koteaka area ayíáka, re soko koteaka faeraka risikiako peae." Aiyáka isu koteaka susu risikiasimo, epo wakapuamo isuware siaraka ararerakanapo. Kotimo ipi aina ayíáka isiapo ayiakasimo, Yasumo isuaki arareraka tarirakanapo. Isiapo Kotiane hemakapusimo tarirakanapo.

<sup>4</sup> Tariraka reke, epo isuaki koteaka kára ararehokosaposane, yumo koteaka kára arareraka rekenapo. Arirakano isiapo watikiaka rakisimo makata watikiaka hemaka apuramo isuane kirimanapo. Asiáne Kotimo ararenamo isuane ararerakano isu mawakapuraka risikinapo. Asiáno isiapo makata watikisane metakarirakanapo. Koti ipi koteaka susu area ayíáka, isu soko koteaka susu risikisireapo.

<sup>5</sup> Koti area ayíáka isu risikiakosakipoko, uyáka rakinie. Fana Kotiaki himu hakásaraka hemakapukua risikianie. Aiyáka risike, aporo hinamo suane arareraka makotehoanie. Makoteraka risike, Kotimo ainane hemakapusakipoko rakinie.

<sup>6</sup> Aiyáka risike, hasaka hemakapukua rakirapaka, repo namina kauane koteaka asekea risikianie. Aiyáka risike, makata umisa fasereperakano Yasu Keresoane metakarirafaraka paroaka risikianie. Paroaka risike, Kotiaki hemakapukua ereketae risikianie.

<sup>7</sup> Aiyáka risike, Keresoa paosa aporo hinamo suane repo ararehoanie. Arareraka, aporo hinamo suane himu tumurumo hemakapukua risikianie.

<sup>8-9</sup> Repo makata aina kotesane káraraka ayíáka rakiraka risikino, Unihae Yasu Keresoane repo kakaro koteaka hemakapusapo. Arirakano aporomo makata aina kotesane rakiraka rekeanafonoraka rea, aporoane hi katosa area ayíáka rekenapo. Aporoamo koteaka asekeanafonoraka epo himu watikisane fana Yasumo kosoraka mafasane, epo meraruka reke nenakamaka makata hemaka apura ayíáka himeteraka hemakapurakanapo.

<sup>10</sup> Asiamo Keresoa paosa mae papao, Kotimo re murikimaka pasimosapo. Pasimosane metakarirapaka paroaka risikianie. Re paroaka risikino, re paripukusafapo.

<sup>11</sup> Re paripunafonorakan keseke re hepene yapura hiasimo Yasumo pasimokoakosapo. Asiamo re Yasuayaki hakása yaiya risikiakosapo. Isiapo unihae Yasu Kereso ipipo. Epo isuane mafasirapo.

<sup>12</sup> Arirakano some one fana repo kaikia, kakaro kekemasane merarunapaka, nōmo efera hunia someaka poparakanapo.

<sup>13</sup> Ano hauaka wo area maiya amo, some one repo hemakapusuane merarunapaka nōmo reaki, "Someaka popana one hemakapunie," airakanapo.

<sup>14</sup> Arirakanano ano kukusa maiyane makerakanapo, aiyaka Unihae Yasu Keresomo anoaki kakama somesapo.

<sup>15</sup> Ano kusuakipoko nōmo someane maiya suamo repo hemakapusimo nōmo poparaka taerakanapo.

*"Keresomo faesane ano Pitamo asesapo," aisane oyapo.*

<sup>16</sup> Unihae Yasu Keresoane ipi wakapuyaki paripeakosapo, aisapo. Arirakanano aporo sisimamo wate fana ásiapakae, aiyaka some kepo rakupe pesane kaikia, isiaipo reaki aiyáka some kasafapo. Wae. Isiaipo himo Yasu Keresoane unihaeaka rekeno asesapo.

<sup>17</sup> Isu ūri terayia hikia risiakipoko Yasuane ipi Ata Kotimo makama fanaraka faesane kaka, Kotimo hepene yapunaka someraka, "Eane nōmo nī hokosapo. E nōmo himu tumurumo kára hemakapukua seserakanapo."

<sup>18</sup> Aiyaka hepene yapunaka somerakano, isiaipo kaikia ūri terayia isu Yasuyaki hikia, eyaki hakása risike kaisiapo.

<sup>19</sup> Asiasamo porofete aporomo some kasane isiaipo menoraka hemakapukua risiane, "Some ane kakaro yanakanapo," aiyaka hemakapurakanapo. Porofete aporomo someane kakimankie. Arirakanano katosakipoko nafa faeraka ikia kara tarira aiyáka, porofete aporomo someamo ikia kára koteaka pusimo isuaki tarirakanapo. Arirakanano ti makata meta kara\* faeraka nina fiarakano, sere maiya apera aiyáka, repo himumo hemakapusimo Yasu pesapo. Pesane porofete aporomo makata ayiakakosapo, aisane yasiapo.

<sup>20</sup> Nōmo makata su popasane repo hemakapukua risike, makata hakása meta one soko repo hemakapusimo popana oyapo. Kotimo sawia poparaka keseke makata ayiakakosapo, aiyaka popasane aporomo ipi hemakapusua aeyaka some kepoane koteaka hemakapurafrapo. Arirakanano aporomo ipi hemakapusua aeyaka some kayane siahoasifareapo.

<sup>21</sup> Wate fana porofete aporomo someraka, "Keseke ayiakakosane oyapo," aiyaka porofete aporoamo ipu namina hemakapusua aeyaka somesafapo. Kotimo ayiakakosapo, aiyaka someaka maresane, Ho Kotesamo porofete aporoaki mahemakapurakarakano ipu kaikia, some hakása nine some kasapo.

## 2

*"Kotafe tisa aporomo kotafe someane some kakakosapo," aisane oyapo.*

<sup>1</sup> Wate fana Isiraya hauaka á kotafe porofete aporo pariraka risiaipo. Risike kotafe someane some kasapo. Wate fana ipu kotafe someane some kasa aiyáka, maiya omo soko kotafe tisa aporo pekea reaki kotafe someane somehokosapo. Kotafe someane kakarorakae, aihoa simo kotafe tisa aporoamo yapakeraka some kaka aiyáka, kotafe some akaramo amano mokoatikihokosapo. Ipu Unihae Kotiane hemakapurafaraka, arirakanano Yasumo iane farimaka ipoko api kasá aporoane metakarirakanapo. Asiasamo ipu namina yi foaka marutaehokosapo.

<sup>2</sup> Kotafe tisa aporomo makata aina watikisane aporo hinamo yakaimo kekemahokosapo. Kekemaraka watikiaka rakiraka risikino, aporo metakiramo iane asekeea someraka, "Áporo hinamoane Keresoa paosapo, airapo. Ipu makata koteaka rakiafununine, ipu makata watikiaka rakirakanapo. Ipu aiyaka someraka, Kotimo ikia karane watikirareapo," aiyaka aporo metakiramo mahokopariaraka somehokosapo.

<sup>3</sup> Arirakanano kotafe tisa aporomo mone kára mokoako seseraka, namina tipia hemakapukua somesane repo kaiyisimo somerapo. Aiyáka someraka, repo moneane mokoakosapo. Asiamo ipu makata aina watikisane hukurura kepo kaira aporo káramo hemakapukua rekenapo. I marutaehokosakipoko kotimo fansinane motoakosakipoko kau rekenapo.

<sup>4</sup> Wate fana hepene aporomo watikiaka rakirakanano Kotimo asekepayasafapo. Kotimo i heao hauaka kutu katosa á mokoasusa risikinapo. Kotimo hukurukusa maiyane fasere-peasimo i tipura á kau risikianapo.

<sup>5</sup> Arirakanano wate fana hauaka wo soko aporomo watikiaka rakiraka risike, Kotiane metakarirakanano, Kotimo asekepayasafapo. Noamo aporo hinamoaki some karaka, "Repo makata watikisane metakarikia, ereketae koteaka risikianie." Airakanano aporo hinamoamo kakipayasapo. Kakipayaraka Kotiaki patera tarikia risikino, Kotimo he kára karaka, i suane he nekea kukua kesapo. Asiāne maiya amo Noayaki aporo hinamo yatipinusu hákasa Kotimo mafasisiapo.

\* **1:19:** Ti makata meta kara fiahokoana maiya amo area asiāne Yasu ipipo, aiyaka taku meaka somesapo.

<sup>6</sup> Arirakano Sotome taoneane soko, Komora taoneane soko, Kotimo ira rufi karaka, taone tetane iramo inasapo. Asiamo aporo hinamo taone teta á risiamo Kotimo someane koaretaeraka Kotiaki patera tarikia risiasamo Kotimo iane kakaro marutaesapo. Asiamo keseke aporo hinamomo Kotimo someane koaretaeraka Kotiaki patera tarikia risikino Sotomepe Komora taone teta iramo inasane, repo hemakapunie. I inasa ayíáka, isu soko watikiaka ayíáka rakiraka risikino inakasireapo. Aíyaka hemakapusimo isuaki tarisiapo.

<sup>7</sup> Arirakano Sotome taonea Rote koteaka reke, aporo metakiramo raraporaka risikino, Rotemo asekea mahisispao. Roteane koteaka reasasamo Kotimo eane mafasisiapo.

<sup>8</sup> Arirakano Roteane ereketaeraka, aporo watikisayaki reke, epo aseane ipu raraporaka asekea, arirakano epo kaiyiáne ipu some watikisa somerakano kaisiapo. Maiya suamo ipu makata watikiaka rakirakano, Rote ipi koteaka reasasamo mahisiraka reapo. Epo iaki mahisiraka rekeno Kotimo eane mafasisiapo.

<sup>9</sup> Asia ayíáka aporo ereketae risiane aporo metakiramo mokoatikirakano, Kotimo asekea hemakapuraka mafasiakosapo. Arirakano aporo watikiaka risiane hukuarura maiya amo Kotimo iane kakaro fanasihokosapo.

<sup>10</sup> Arirakano Kotimo someane koaretaena aporo hinamoane soko, rarapona aporo hinamoane soko, Kotimo iane namo kakaro kára fanasihokosapo.

Arirakano kotafe tisa aporoane re arisia perakano, aporoane koaretaena aporopo. Ipu namina yano motosane makáraraka risike, namonafaraka, hepene aporo fanaraka risiane mainamarerapo. Hepene aporoaki mainamarerakano yia,

<sup>11</sup> hepene aporoane Unihae Kotiyaki hakása risia amo Kotimo kaiyisimo hepene aporo metakirane hukururafapo. Kotimo somemanee koaretaena aporoane wakasemapo. Iane hepene aporomo marokesapo. Hepene aporoane kakaro wakapuraka risia nineo, ipu iane hukururafapo.

<sup>12</sup> Arirakano kotafe tisa aporomo makata mahimetesane mainamareraka someraka risikinapo. Yasaro mahimeteraka koraka risira ayíáka, i ayíáka risikinapo. Yasaro mano káraraka rekeako pusuané kakinumo rurapo. Kakinumo arura ayíáka kotafe tisa aporoane mahimeteraka risiane kukua kekeka fahokosapo.

<sup>13</sup> Ipu aporo metakira mokoatikina ayíáka, Kotimo iane fanasiraka mokoatikihokosapo. Sere maíyamo i seseraka risikiakosakipoko kaumo hemakapusuane kekemaraka, raraporaka, watikiaka rakikia risike, makata hakimorane seseripo, aíyaka risirapo. Kotafe tisa aporoane reyaki hakása sarimaraka toke, makata hakása nekea airakanapo. Aporoamo kaiyanafaraka kakama watikiaka rakirapo. Ipu makata watikiaka rakira arakaru tipia re risikinapo. Asiamo repo yano motosane ipu mawakasemanapo.

<sup>14</sup> Maiya suamo hinamo hakimako ipu himo asekehaeraka himumo kára watikiaka hemakapurane rukupatenafapo. Arirakano aporo himu paroaka hemakapunafonosa aporoamo makata watikiaka rakisimo ipu kirimanapo. Aporo metamo makatane mokoako karekerarafaka mokoakosa susunapo. Asiamo makata su akipoko Kotimo iane fanasina hauaka á pusiehokosapo.

<sup>15</sup> Arirakano i ikia kara kotesane metakarikia, ikia kara watikisa hasaka puraka, aporo yano motosa Péamo ipi maeya Péramemo mone mokoako watikiaka rakiako hemakapusua ayíáka, kotafe tisa aporoamo soko, ayíáka watikiaka hemakapurakanapo.

<sup>16</sup> Arirakano Pérameaki saro tokimo someraka, "Nómo watikiaka rakiante siahoasi-fareapo." Aíyaka epo watikisane tariako, saro tokimo mehoanafonona amo eaki somesapo. Aporomo some akáraka ayíáka, saro tokimo eaki someraka, "Ayiakakopo," aisapo. Péramemo watikisane rukupatehoasimo saro tokimo somesapo.

<sup>17</sup> Arirakano he kafane serana ayíáka kotafe tisa aporomo hemakapurafaraka nenakamaka somerane asiapo. Arirakano atifomo ako mokoaa purakano yao perafapo. Yaoane peanafonorakano hemoane makotenafapo. Aina ayíáka ipu someamo aporo ararenafapo. Asiasamo aporoane hauaka watikisa katosá á fanasiraka risikiako pusimo Kotimo maropuraka fasapo.

<sup>18</sup> Arirakano ipu rupiraka nena some karákia, aporo hinamo Yasuaki kawe risikiako parisane kirimahoko someraka, "Hinamo hakimayane siahoasireapo. Makata kára nekea he watikisa kára neane siahoasireapo." Aíyaka aporo hinamo Yasuaki kawe risikiako parisamo watikiaka hemakapusimo ipu kirimanapo.

<sup>19</sup> Ipu someraka, "Isiapo someane repo kaikia kekemarakano, makata metamo reane asekea rekeakosafapo. Repo namina hemakapusuane kekemahoane siahoasireapo," airapo. Asiáne aporoamo makata aina watisane kekemarapo. Makata watikisamo iane asekea rekeno iane makata watikisamo aporo raipa risikinapo. Asiamo makata metamo re asekea rekeno repo makata akipoko raiparaka rakirakanapo.

<sup>20</sup> Asiamo aporomo hauaka omo makata watikisane metakarikia, Unihae Yasu Keresoaki hemakapukua reke, Yasumo mafasisiane hemakapukua, eaki rekeako pariraka, nina,

efera hunia hauaka omo makata watikisane kekemaraka rakirakanone, ane aporoamo watikisane namo kakaro kárahokosapo. Aporoane Yasuaki rekeako parihoasiraka rea maiya amo, ipi makata watikiaka rakisiane, hákasa wakasemapo.

<sup>21</sup> Arirakano aporomo ikia kara ereketaesane hemakapunafonorka watikiaka rakisiane hákasa wakasema watikirareapo. Arirakano aporoane ikia kara ereketaea pukua, Kotimo somemananeane kakimaka nina, keseke metakarirane namo kakaro kára watikirareapo.

<sup>22</sup> Fana aporo metamo yapake someraka, "Kásamo ipi mome pusuan efera hunia nenapo," aisapo. Aiyaka some meta soko yapake someraka, "Saro ororoa yokesane hea tapukua, efera hunia ororoa yokerako paripurapo," aisapo. Aina ayíáka aporomo soko makata watikisa metakarisiane efera hunia rakiako paripurapo.

### 3

*"Yasu paripeakosapo," aisane oyapo.*

<sup>1</sup> Hameo, yape tetamo nōmo reaki sawi amakera oyapo. Repo koteaka hemakapusimo makata fana kaisiane merarunapaka nōmo efera hunia poparakanapo.

<sup>2</sup> Wate fana Kotimo porofete aporo kotesamo someraka, "Makata ayíakakosane oyapo." Aisane repo merarunapaka nōmo poparakanapo. Mafasira aporo Unihae Yasumo some-manane tarira aporomo reaki some karakano, repo kaisiapo. Kaisiane repo merarunapaka nōmo poparakanapo.

<sup>3</sup> Makata one hemakapunie. Fahoko makeana maiya amo, aporo metakira peraka, ipu namina himumo watikiaka hemakapusua aeyaka some karaka, reaki mahokopariraka someraka,

<sup>4</sup> "Yasumo reaki someraka, 'Ano paripeakosapo,' aisane pariapera mayare? Yasu paripeakosaposane, someraka risike yía, isiapo makasa kauamo soko eane asekeanafonorka kukua kesapo. Aiyaka somepe pekea, pipu o paupakanapo. Wate fana Kotimo hauaka one kepomeresa maiya amo makata su risiane pipu yumo soko arisia yuyapo. Makata meta faserepesafapo," ayíáka aporoamo mahokopariraka somehokosapo.

<sup>5</sup> Aporoamo someraka, "Makata suane fana arisia ayíáka yaiya risikiakosapo," airapo. Asíane Kotimo makata ayíakakosaposane ipu kakipayarakanapo. Asiamo ipu some kakipayasane oyapo. Wate fana Kotimo some aeyaka ti yapurane faserepesapo. Heane makikisihoane hauaka parosa faserehesapo. Asiamo hauaka kára one he numu tipia rekenapo.

<sup>6</sup> Wakasema nina keseke Kotimo some aeyaka hauaka kára one he keraka, hemo makasokoperaka makata su he nekea kukua kekefa fasapo.

<sup>7</sup> Asiamo Kotimo ipi akaimo somesa hakásá yinaka, ti yapurane soko, hauaka kára one soko, inaka fahokosapo. Kotimo aiasasamo iramo inakakosa maiyane faserepeasimo ti yapuramo soko, hauaka kára omo soko kau risikinapo. Haru inakanafonorka, hukuarura maiya amo, Kotiaki patera tarisia aporo hinamoane fanasiraka marutaeraka fahokosapo. Maiya amo kotimo ti yapurane soko hauaka kára one soko inakakosapo.

<sup>8</sup> Hameo, makata hakásá one meraruuhokopo. Yáki ane soko, ere maiya ane soko, sereane soko, isiapo menona ayíáka, Kotimo ayíáka menonafapo. Unihae Kotimo hemakapusane sere hakásane keremisi kára wane taosene (1000) asiapo. Arirakano keremisi wane taosene ane sere hakásá asiapo.

<sup>9</sup> Repo hemakapuraka, "Unihae Kotimo keseke ayíakosaposane wate foaka anakari-fapo. Epo masekeame ayíane." Aiyaka hemakapukupo. Re aporo hinamo hakásá meta fanasihokoamo, aporo hinamo suamo ipu namina makata watikisane rukupateraka risikiako parihoasimo, Kotimo iane kau rekenapo. Ti yapurane soko, hauaka kára one soko, inakakosaposane Kotimo wate foaka anakanafapo.

<sup>10</sup> Arirakano aporo ape wafayane meraruamo reakipoko, hakimora aporo apera ayíáka re meraruamo risiakipoko, Unihae Yasuane paripeakosapo. Maiya amo kára urakano ti yapurane fahokosapo. Sere maiya soko, ere maiya soko, ti makata soko, suane iramo inaka fahokosapo. Hauaka kára one soko, makata su hauaka wo risiane soko, su inaka fahokosapo.

<sup>11</sup> Makata su fahokosapo aiasasamo, reane mayíáka risikiakosare? Repo makata watikisane kikisiraka, koteaka susu risike, Kotimo ipi makata ainane susu kekemaraka rakinie.

<sup>12</sup> Asiamo Yasu paripeakosa maiyane repo hemakapukua Yasu foaka paripeasimo seseaka rakiraka risikanie. Yasu pariapera maiya amo ti yapura makata risiane sere maiya soko, ere maiya soko, ti makata soko suane inaka fahokosapo. Arirakano makata su hauaka tamo atura kayane soko, hauaka kima kayane soko suane wariwariraka inaka fahokosapo.

<sup>13</sup> Arirakano Kotimo someraka, "Ti kaweane soko, hauaka kaweane soko, haku kepo-marekea faserepeakosapo. Kawe fasereaperá makata kawe kotesa ereketaesane susu risikiakosapo." Aíyaka Kotimo someaka motosane isiapo kaikia someraka, "Makata su kaweane isiapo asekeariripo." Aíyaka aseakosakipoko kau risikinapo.

<sup>14</sup> Hameo, Yasu paripeakosa maiyane hemakapukua koteaka asekeea risikianie. Kotimo aseane repo makata watikisane metakarikia, koteaka susu risikino Kotimo asekeasimo, eaki yunusane metakarikia, tákera risikino epo asekeasimo koteaka susu risikianie.

<sup>15</sup> Yasu haru peanafonorakano repo hemakapuraka, "Isu aporo hinamoane eaki risikiako parihoasimo e haru perakanafapo." Aíyaka hemakapunie. Asiamo Kotimo Poreaki takekea hemakapurane karakano, Poremo soko some hakásá yine reaki popasapo. Poreane isu Keresoa paosa aporomo maepo. Eane isiapo kára hemakapurakanapo.

<sup>16</sup> Makata keseke ayiakkosane soko Yasuaki risikiako parisane soko, Poremo sawi sua popasapo. Poremo sawi popasa amo kepoane parosasamo aporo metakiramo wafororaka menoraka, kepoane hemakapurafapo. Arirakano aporo metakiramo Kotiaki himu hakásaraka hemakapusue roraraka risiamo, Poremo sawi popasane himeteraka some akara maiya amo hasaka someraka, ipu namina hemakapusua tipia some karápo. Aporoamo Kotimo sawi suane himeteraka kepo mokome some karápo. Aporoamo kotafe some karakano i fanasina hauaka á pukusapo.

<sup>17</sup> Hameo, Kotimo someraka, "Nómo somemané koaretaena aporomo mokome hasaka some kakakosapo." Aisane mahimeteraka risikiakopo. Koaretaena aporomo hasaka some karakano someane repo kakimakopo. Ira maposa horohororaka ruaka apura ayíáka, anapaka paroaka risikianie. Ipu kotafe somerakano repo kakimakopo.

<sup>18</sup> Repo someraka, "Isu Mafasira Aporoane isiapo Unihae Yasu Kereso ipipo. Repo eane kára hemakapusimo ano seseripo. Epo yaku ararenane repo kára hemakapusimo ano seseripo." Aíyaka repo Yasu Keresoaki hemakapusue káraraka risikianie. Yasuane ipi wakapu kárayaki rekenapo. Asiasamo yumo soko, keseke soko, maiya suamo eane kekerehoasimoripo. Kakaroripo.

## 1 Yone

### 1 Yone sawi one mahemakapukusa someane oyapo.

Sawi one popasane Yasumo aporo hakāsa pura Yonemo popasapo. Yasu hepene yapura hisiakipoko keremisi 60 faraka, Yone sisimaraka reke sawi one popasapo. Arirakan Yone Efesase ape sumua reke, Keresoa paosa aporo hinamoane asekeea reapo.

Maiya amo aporo yakai koraka toke, kotafe someane some karaka risiaapo. Kotafe someane Keresoa paosa aporo hinamomo kaikia hemakapurapaka Yonemo sawi one popasapo.

### 1 Yone sawia some kepo parakuraka popasane oyapo.

1:1-4 Sawi popana one Yonemo kepomarekea popasapo.

1:5-2:29 Faesamo kepoane Kotipo. Aporomano faesa á puraka risike Yasumo ipi makata kotesa aina susuane kekemahokosapo. Arirakan makata watikisane kikisiraka hemakapukua risikiakosafapo. Faesane soko katosane soko tati hakāsa nineraka siasafapo.

3:1-24 Kotimo hokosamo namina yia himu tumurumo hemakapukua risike, koteaka siaka rakirapo. Arirakan Sataneane kekemara aporo hinamomo watikiaka rakirapo.

4:1-6 Aporomo somerakano koteaka kaikia takekea hemakapuraka, "Somerakane, Kotimo some kasare? Satanemo some kasare?" Aiyaka kepoane takekea hemakapunie.

4:7-5:4 Metaki himu tumurumo hemakapuramo kepoane Kotipo. Asiamo Kotimo hokosamo namina yia himu tumurumo hemakapupe puane siahoasireapo.

5:5-21 Yasu hauaka wo pesane aporomanomo kau maka pesapo. Arirakan wakinisimo asesasamo someane mawakapusapo. Arirakan yaiya risikiakosane Yonemo some-sapo.

*"Yasu ipi yano motosa meta Somepo," aisane oyapo.*

<sup>1</sup> Kepomaresa maiya amo e yaiya reapo. Yaiya reramo somesane isiaipo kaisiapo. Eane isiaipo himo asesapo. Epo ainane soko isiaipo asesapo. Eane isiaipo hokonomo soko sakaisapo. Yaiya Rera Some amo kepoane e ipipo. Eane nōmo reaki poparaka makerakanapo.

<sup>2</sup> Yaiya Rerane isu risia wo fasereperakasupo. Fasereperakano isiaipo asesapo. Isiaipo e asesane reaki someaka poparakanapo. Yaiya Rera kepoane soko reaki someaka poparakanapo. Fana ipi Atayaki hakāsa reane, hauaka wo kawe fasereperakasupo. Fasereperakano isiaipo asesapo.

<sup>3</sup> Isiaipo asesane soko, epo somerakano isiaipo kaisiane soko, nōmo reaki someaka poparakanapo. Atape ipi hokosa Yasu Kereso tetāki isiaipo kataka marekea risikinapo. Isu isina yia himu hakasaraka kikinaraka arisia ayiáka, re soko isuyaki himu hakasaraka kikinaraka risikiasimo nōmo reaki somerakanapo.

<sup>4</sup> Isu himu seseraka hemakapuramo rosaka taeana ayiáka, re soko himu seseraka hemakapuramo rosaka taehoasimo nōmo sawi one poparakanapo.

*"Faesa á risikianie," aisane oyapo.*

<sup>5</sup> Yasumo isuaki some karakano isiaipo kaisiane reaki poparaka amakera oyapo. "Koti ipi namo kakaro faesa susu rekenapo. Ea katosa wakasema soko rekenafapo," aisapo.

<sup>6</sup> Asiamo isiaipo isina aporo meta himu watikiaka reke yia someraka, "Ano Kotiyaki hakāsa kikinaraka rekenapo." Aisa nine epo himumo watikiaka hemakapukua reasasamo epo kotafe somerapo. Epo kotafe someraka, arirakan epo makata rakirane soko kotafe rakikia anapo. Aporo asiane ipi katosa yia rekenapo.

<sup>7</sup> Asiāne Koti faesa area ayiáka, isu soko faesa á risikino, ane Kotiaki kakaro kataka marekea risikinapo. Kataka marekea risikino, isiaipo makata watikisa suane Kotimo hokosa Yasumo yapimo kosoraka mafasapo. Mafarakano asekeea isu Kotiyaki hakāsa kikinaraka risike, arirakan isu isina yia soko hakāsa kikinaraka risikinapo.

*"Faesa ikia kara á pukusakipoko makata watikisane rukupateraka metakarinie," aisane oyapo.*

<sup>8</sup> Isiaipo aporo metamo someraka, "Ano himu watikisa rekenafapo," aiyaka somerakanone ane, epo ipi yia kotafe somerakanapo. Epo kakaro somerakanafapo.

<sup>9</sup> Asiāne isiaipo makata watikiaka rakisiane Kotiaki hufitaerakan Kotimo mafanapo. Makata watikisa suane kosonapo. Kotimo ainane oyapo. Epo someraka, "Makata watikisane nōmo mafanapo." Aira Koti amo makata watikisane kakaro mafanapo. Epo aiyaka somesane metakarirafapo. Epo ipi ayiáka ereketaeraka susu rakirapo.

<sup>10</sup> Kotimo someraka, "Re aporo hinamo suamo watikiaka rakirapo," airapo. Arirakano isiapo aporo metamo someraka, "Nōmo watikiaka rakianafosasamo Kotimo someane kotafe somerakae." Aisa aporoamo Kotimo someane kaikia hemakapurafapo.

## 2

<sup>1</sup> Hameo, reane nōmo hokosa asiapo. Repo makata watikisane rakiakohoamo nōmo reaki sawi one poparaka makerakanapo. Arirakano repo metamo watikiaka rakirakano, Yasu Keresomo epoko farimaka ipi Ataki someraka rekenapo. Yasu ipi namo kakaro ereketae kotesa susupo.

<sup>2</sup> Isiapo makata watikisa supoko epo farimaka Kotiaki api kakako Yasu kusuapo. Isiapo watikisane soko, aporo hinamo hauaka sua risia amo watikisane soko suane mafahoko Yasumo farimaka kusuapo.

*"Faesa ikia kara á pukusakipoko Kotimo ayiakanie, aiyaka someaka maresane kakiikanie," aisane oyapo.*

<sup>3</sup> Isiapo aporo metamo someraka, "Kotiane eparakapo. Eane ano himeteripo." Aiyaka himetenapaka Kotimo makata ayiakanie, aiyaka someaka maresane isiapo kakaro kakiikanano, ane Kotiane isiapo namo kakaro hemakapurakanapo.

<sup>4</sup> Arirakano aporo metamo someraka, "Kotiane nōmo hemakapurakanapo." Aisa nine Kotimo makata ayiakanie, aiyaka someaka maresane, kakipayaraka rea aporoamo kotafe somerakanapo. Makata kakaroane hemakapurafaraka, epo kotafe somerapo.

<sup>5-6</sup> Arirakano aporo metamo Kotimo makata ayiakanie, aiyaka someaka maresane hemakapupe pukua kakimarakanano, Kotimo ipi himu tumurumo hemakapurane e himua siaraka rekerakano kaiyakosapo. Aporo metamo someraka, "Nōmo Kotiaki kataka mareeka rekenapo," aisa aporoane Yasu Kereso area ayiáka rekeafunupo. Ayiáka reke ipi Kotiyaki hakása rekerakano kaiyakosapo.

<sup>7</sup> Hameo, Keresomo makata ayiakanie, aiyaka someaka maresane nōmo poparaka amakera one some kawefapo. Fana re Keresoa risikiako parisa maiya amo, Keresomo makata ayiakanie aiyaka someaka maresane, reaki some kasapo. Fana Keresomo makata ayiakanie, aiyaka someaka maresane repo kaikia fasapo.

<sup>8</sup> Yumo nōmo popana one Keresomo fana ayiakanie aiyaka someaka maresa hakása yiypao. Asiáne fana ayiakanie aiyaka someaka maresane, some kawe aseraka siki-rakanapo. Some kaweanie oyapo. Yasu Keresomo aporo metane himu tumurumo hemakapukua rekenapo. Yasu ipi area ayiáka re soko ayiáka risikinapo. Asiamo yumo katosane faraka kakaro faeraka risikinapo.

<sup>9</sup> Arirakano aporo metamo someraka, "Faesa á ano rekenapo." Aisa nine epo Keresoa paosa aporo mae metaki hisiraka rekeno ane, e katosa yia rekenapo. Faesa á rekenafapo.

<sup>10</sup> Arirakano epo Keresoa paosa aporo metakiraki himu tumurumo hemakapukua rekeno ane, e faesa á rekenapo. Faesa á reke, e terafaka rukusafapo.

<sup>11</sup> Arirakano epo Keresoa paosa aporo mae metaki hisiraka hemakapukua rekenone, e katosa yia rekenapo. Aporoane hi mesa area ayiáka rekenapo. Hi katosasamo ikia kara pukusane aseraphapo. "Ano ma purakanarakapo." Aiyaka mahimeteaka mokome purapo.

*"Faesa ikia kara á pukusakipoko, hauaka wo makatane kára hemakapukua rakiraka risikiakopo," aisane oyapo.*

<sup>12</sup> Hameo, reane nōmo hokosa asiapo. Yasumo yano motosa aeyaka repo makata watikisane mafasasamo, nōmo reaki sawi one poparakanapo.

<sup>13</sup> Aporo sisima reo, kepomaresa maiya amo Kereso yaiya reane repo hemakapusasamo nōmo reaki poparaka makerakanapo. Hokosa rauao, makata watikisamo kepoane Satane ipipo. Repo e marokesasamo nōmo reaki sawi one poparaka makerakanapo.

<sup>14</sup> Hame, hokosa reo,\* Atane repo hemakapukua risiasamo nōmo reaki sawi one poparaka makerakanapo. Aporo sisima reo, kepomaresa maiya amo, Kereso yaiya reane repo hemakapusasamo, nōmo reaki sawi one poparaka makerakanapo. Hokosa rauao, re wakapuaka risike, Kotimo someane repo kakimaka hemakapukua risike, makata watikisamo kepo Sataneane repo marokesasamo, nōmo reaki sawi one poparaka makerakanapo.

<sup>15</sup> Arirakano hauaka wo makata watikisamo ainane soko, hauaka wo makata kemoane soko, repo kára seseraka hemakapukupo. Asiamo hauaka omo menane repo kára seseraka hemakapukua risike, Atamo hemakapusuane repo kekemarakanafapo.

<sup>16</sup> Asiamo hauaka omo makatane oyapo. Hinamo himu pukua kaum hemakapurane soko, makata makosakipoko himo asekehaeraka hemakapurane soko, makata kemo kára

\* <sup>2:14:</sup> Aporo sisima, hokosa raua, hokosa, iaki susu somesane, Yasumo some hakása nine aporo hinamo suaki someaka maresapo.

wafayarako rekeako hemakapurane soko, ayíáka makata hemakapura suane hauaka omo menapo. Makata ayíáka hemakapusuane Atamo tarirafapo.

<sup>17</sup> Hauaka omo menane soko, hauaka omo sesenane soko, arupukua fahokosapo. Arirakan Kotimo hemakapusua kekemana aporo hinamoane yaiya risikiakosapo.

*“Faesa ikia kara á pukusakipoko Keresomo yununa makatane mokoanie,” aisane oyapo.*

<sup>18</sup> Hameo, re nōmo hokosa asiapo. Hauaka omo makatane fahokosa maiyane makerakanapo. Fahokosa maiyane makeanamo aporo hakása meta ipi káraraka reke, Keresoaki Yunuraka Rera Aporo peakosaposane repo kaisiapo. Kaisia nine, pipu yumo Keresoaki yunu aporo yakai perakano asekea fahokosa maiyane makerakanapo. Aiyaka isiapo hemakapurakanapo.

<sup>19</sup> Keresoaki yununa aporoane isuyaki hakása sarimaraka risiapo. Risia nine isiapo Keresoaki himu hakásaraka hemakapusua ayíáka, ipu himu hakásaraka hemakapunafonraka isu metakarisiapo. Ipu himu hakásaraka hemakapusua satiki, isuyaki yaiya risikiafunureapo. Aporoamo isu metakarirakano isiapo hemakapuraka, “Aporoane kakaro Keresoa paosafapo,” aiyaka hemakapurakanapo.

<sup>20</sup> Arirakan Keresomo re murikimara Ho Kotesane reaki kasapo. Kasasamo Keresomo kakaro someane repo hemakapurakanapo.

<sup>21</sup> Kakaro someane repo hemakapukua risikinapo. Ayíáka risike, kakaro somerane soko, kotafe somerane soko, repo takekeea sia hemakapusireapo. Asiamo repo hemakapuraka, kakaro someyaki kotafe someyaki tati hakása sarimanafapo. Asiamo repo koteaka takekeea hemakapusimo nōmo reaki sawi one poparaka makerakanapo.

<sup>22</sup> Kotafe hora aporoane epare? Aporomo someraka, “Yasuane Kotimo unihaeaka rekeasimo murikimasa aporofapo. Eane Keresofapo.” Aira aporoane kotafe hora aporopo. Kotafe hora aporoane Keresoaki yununa aporo ayapo. Aporoamo Atape ipi Hokosa Yasu Kereso tetáki patera tarirakanapo.

<sup>23</sup> Aporomo Kotimo Hokosaki himu hakásaraka hemakapunafonrakano, Ataki soko himu hakásaraka hemakapurakanafapo. Asiamo aporomo Kotimo Hokosane keke-marakano Atane soko kekemarakanoapo.

<sup>24</sup> Re Keresoa paosa maiya amo some karakano kaisiane yaiya hemakapunie. Ane mer-aruuhokopo. Some kaka maresane hemakapukua risike, Ataki kataka marekea risikinapo. Ataki kataka marekea risike, ipi hokosa Yasuaki soko kataka marekea risikinapo.

<sup>25</sup> Kataka marekea risikino Yasumo someraka, “Maiya suamo re Ata etoyaki hakása yaiya risikiakosapo.” Aiyaka Yasumo someaka motosapo.

<sup>26</sup> Motorakano yia aporo metakiramo kotafe someane repo kekemahoasimo reane kirimaraka risikinapo. Kirimaraka kotafe hokoa some kakakosane, repo kakimarapaka nōmo reaki sawi one poparaka makerakanapo.

<sup>27</sup> Arirakan Ho Kotesane Keresomo reaki kasapo. Ho Kotesane reyaki hakása yaiya reke, makata suane epo reaki tariraka rekenapo. Tariraka rekeno yia, aporo metakiramo reaki makata meta tariako, re peae, aihokosafapo. Makata su kepo suane repo hemakapusimo Ho Kotesamo tarikia some karaka rekenapo. Epo tarikia someraka reke ipi kotafe horafapo. Epo kakaro susu horapo. Epo kakaro horamo someane repo kakimakanie. Kakimaka yaiya Yasuaki kataka marekea risikianie.

<sup>28</sup> Hameo, reane nōmo hokosa asiapo. Yasu pariaperamo re kaíyaraka pesa sapea fimiti purapaka, eaki mapiraraka risikiakosakipoko, yumo eaki kataka marekea risikianie.

<sup>29</sup> Arirakan Kotimo ipi ainane kakaro ereketae susupo. Ereketae susu area ayíáka, aporomano meta ereketaeaka rekeno eane Kotimo hokosapo. Ane repo hemakapukua risikinapo.

### 3

*“Isuane Kotimo hokosapo,” aisane oyapo.*

<sup>1</sup> Isuaki Kotimo himu tumurumo hemakapurakanapo. Kotimo himu tumurumo hemakapurane kakaro káraro. Epo himu tumurumo káraro hemakapuraka isuaki someraka, “Reane nōmo hokosapo,” airakanapo. Aisasamo isuane kakaro ipi hokosapo. Arirakan nena aporomo Kotimo ainane hemakapurafapo. Hemakapunafonasamo isu Keresoa paosa aporomo ainane soko ipu hemakapurakanafapo.

<sup>2</sup> Hameo, Yumo isu Kotimo hokosapo. Asiane keseke isu mayíáka risikianarakapo. Ane yumo kakama hemakapurakanafapo. Makata hakása uyáka hemakapurakanapo. “Keseke Kereso pariapera maiya amo epo ainane kakaro aseakosapo. Asekea e area ayíáka, isu soko ayíáka risikiakosapo.” Aiyaka isiapo yumo hemakapurakanapo.

<sup>3</sup> Hemakapuraka ayiakakoripo, aiyaka hemakapuraka yumo makata watikisane metakarirakanapo. Kereso ipi watikihoanafonoraka koteaka susu area ayiáka, isu soko watikihoanafonoraka koteaka susu risikiako hemakapurakanapo.

*"Kotimo ipi hokosa pariraka risiamo makata watikisane metakarirapo," aisane oyapo.*

<sup>4</sup> Aporo hinamo metamo watikiaka rakiraka reke, Kotimo some maneane koaretaerakanapo.

<sup>5</sup> Aporo hinamomo makata watikisane mafahoko Yasu Kereso hauaka wo pesapo. E pesane watikiaka rakira aporo pesafapo.

<sup>6</sup> Asiamo Kereso patera asesa aporo hinamomo makata watikisane yaiya rakiraka risirafapo. Arirakano makata watikisane yaiya rakiraka rea aporo hinamoamo Yasuane kakaro hemakapurakanafapo. Keresomo ipi ainane ipu kakaro hemakapurakanafapo.

<sup>7</sup> Hameo, reane nōmo hokosa asiaapo. Repo watikiaka rakisimo aporo metamo reane kirimarakano eane kekemahokopo. Aporo metamo ereketaera rakirakano aporoane ereketaesa aporopo. Kereso ereketaera area ayiáka, aporoane soko ereketaera rekenapo.

<sup>8</sup> Asiāne aporo hinamomo yaiya watikiaka rakiraka risikino, iane Satanemo ipi menapo. Asiamo kepomaresa maiya amo, Satane watikiaka rea ayiáka, yumo soko e yaiya watikiaka rekenapo. Satanemo makata watikiaka rakirane marutaeraka fahokosakipoko Kotimo hokosa Yasu hauaka wo pesapo.

<sup>9</sup> Asiamo isuane Kotimo hokosa pariraka risikiasimo isu murikimasapo. Asiasamo isiaapo watikiaka yaiya rakiraka risirafapo. Kotimo ipi ainane soko epo hemakapurane soko, ipi hokosa isuaki kasapo. Kasane isu himua rekerakano kaikia, makata watikisane metakarirapo. Isu Kotimo hokosasamo isiaapo makata watikisane rakiako hemakapuanie siahoasifareapo.

*"Kotimo ipi hokosa pariraka risiamo Kotimo someane kakimarapo." Aisane oyapo.*

<sup>10</sup> Kotimo hokosane epare? Satanemo hokosane epare? Tati kekeposane isiaapo isina yia mayiáka asekeea hemakapukusare? Ereketaera riskianafonoraka, arirakano Keresoa paosa aporo hinamoaki himu tumurumo hemakapunafonoraka ayiáka risia aporo hinamoane Kotimo hokosafapo.

<sup>11</sup> Wate fana Kotimo someane some karakasuane repo kaisiapo. Keresoa paosa maiya amo kaisiapo. Kaisiane oyapo. Repo namina yia aporo metane himu tumurumo hemakapunie. Aiyaka some karakano repo kaisiapo.

<sup>12</sup> Kaisiasamo Atamemo maeya Kene area ayiáka re risikiakopo. Sataneyaki Keneane paoraka reke, epo ipi mamanea rusua kusuapo. Marirakano ipi mamaneane rusua kusuare? Epo ipi watikiaka rakiraka reke, ipi mamaneamo koteaka rakirakano asekeea, ipi mamaneane rusua kusuapo.

<sup>13</sup> Asiasamo Keresoa paosa aporo maeo, Keresoa paohoanafonosa aporomo reaki hisirakanano re fofahokopo.

<sup>14</sup> Isu kukusa ikia karane metakarikia, yaiya rera ikia kara a purakanapo. Puraka isiaapo Keresoa paosa aporo maeane kakaro himu tumurumo hemakapurakanapo. Himu tumurumo hemakapurakarakanio kaikia isiaapo someraka, "Yaiya rera ikia kara á ano kakaro purakanapo." Aiyaka hemakapurakanapo. Arirakano Keresoa paosa aporo maeane ararehoko himu tumurumo hemakapunafonorakanio aporoane kura ikia kara á yaiya purakanapo.

<sup>15</sup> Keresoa paosa aporo mae metaki hisiraka rea aporoane soko, aporo meta kukusimo rura aporoane soko, tati makata ainane hakása yiayapo. Aporo meta kukusimo rura aporoane Kotiyaki yaiya rekeakosafapo. Kotiyaki yaiya rekeakosafapo aisane, repo kaikia fasapo.

<sup>16</sup> Aporo metaki himu tumurumo hemakapura amo kepoane Yasumo isuaki tarisiapo. Isiaapo watikiaka rakisiapoko isu rusua kukufunusa nine epo isupoko farimaka kusuapo. "E kusua ayiáka isiaapo Keresoa paosa aporo maepoko farimaka kuane siahoasireapo." Aiyaka hemakapunie.

<sup>17</sup> Arirakano aporo metamo ipi hauaka wo makata kára taesane makata kemo soko metao, mone soko metao makata nakosa soko metao, makata ane kára taesa aporoamo aseane, ipi Keresoa paosa aporo mae makata forokoa rekeno asekeea arareraka makata kakanafonorakanio, aporoane himua Kotimo ipi makata ainane rekenafapo.

<sup>18</sup> Hameo, aporo metaki himu tumurumo hemakapurane akai susumo somehokopo. Aporo metaki himu tumurumo hemakapuraka namo kakaro arareraka rakinie.

*Re Kotimo hikumisia kaiyanafaraka mapiraraka risikiakosane oyapo.*

<sup>19</sup> Nómó Kotiaki kakaro himu hakásaraka hemakapukua rekenare? Himu hakásaraka hemakapukua reane nómó ní mayíáka hemakapukusare? Nómó ni Keresoa paosa aporo maeaki himu tumurumo hemakapukua rekerakano kairaka, ane nómó Kotiaki kakaro himu hakásaraka hemakapukua rekenapo. Aiyáka himu hakásaraka hemakapurane sia hemakapukusapo. Kakaro himetehokosafapo. Asiamo Kotiaki kurikurinamo kaiyarakana namoraka kurikurinafapo.

<sup>20</sup> Arirakano ne Keresoa paosa aporo reke, nómó ní himu yiamo neaki someraka, “Nómó watikiaka rakisiapo.” Airakano kaikia, nómó kara hemakapukupo. Koti ipi kárasasamo ipi makata su asekea fasasamo neane asekea kamenakahokosapo.

<sup>21</sup> Hameo, nómó ní himumo né níyia hukuruuanafonorakano ane, “Ne siareapo,” airakano Kotiaki kurikurinamo kaiyanafaraka mapiraraka kurikurihokosapo.

<sup>22</sup> Kotimo somemaneane nómó kakimaka rakikia, arirakano epo hemakapusuane keke-maraka rakikia, aiyáka rakiraka reke, eaki kurikuriraka, “Ayiakanie,” airakano epo ayi-akakosapo. “Makanie,” airakano, epo sia makakosapo.

<sup>23</sup> Arirakano Kotimo somemaneane oyapo. “Repo Kotimo hokosa Yasu Keresoaki himu hakásaraka hemakapunie. Arirakano repo namina Keresoa paosa aporo maeaki soko, papáki soko himu tumurumo hemakapunie.” Aiyaka Kotimo somemane motosapo. Asiamo repo kakimaka rakinie.

<sup>24</sup> Kotimo somemane kakinara aporoane Koti himua reke, arirakano Koti soko e himua rekenapo. Koti isu himua reane, isiapo mayíáka kairakanare? Epo Ho Kotesane kasasamo isu himua rekerakano kairakanapo.

## 4

*Kakaro Somera Hoane soko, kotafe somera hoane soko takekea hemakapukusane oyapo.*

<sup>1</sup> Hameo, maiya omo hauaka wo kotafe some kará porofete aporo yakai some kaka koraka tokenapo. Asiamo aporoamo reaki someraka, “Kotimo Ho Kotesamo anoaki some karakano, nómó kaikia reaki some karakanapo.” Airakano someane foaka kaikia hemakapukupo. Fana uyáka hemakapunie. “Aporoaki Ho Kotesamo some kasare? Aporoaki kotafe somera homo some kasare?” Aiyaka hemakapukua reke, aporoamo somerakano repo koteaka takekea hemakapunie.

<sup>2</sup> Aporomo some karakano, Kotimo Ho Kotesamo eaki some kasarihoamo repo uyáka takekea hemakapukusapo. Aporoamo someraka, “Yasu Kereso hauaka wo aporomanomo kauane maka pesapo.” Aiyaka somera aporoaki Kotimo Ho Kotesanereasasamo epo sia some karakanapo.

<sup>3</sup> Arirakano aporo metamo someraka, “Yasu Kereso ipi aporomanomo kauane maka pesafapo.” Aiyaka somera aporoaki kotafe somera homo eaki some karaka rekenapo. Hoane Koti aeyaka pesafapo. Kotafe somera ho hauaka wo Keresoaki yunuhoko Satanemo pusierakano, i hauaka wo pekea risikinapo. Risiane repo hemakapusimo Keresoaki yunu aporo peakosaposane, repo fana kaisiapo. Kaisiane yumo hauaka wo peraka risikino, repo aserakanapo.

<sup>4</sup> Hameo, repo Atane Kotipo. Kotimo Ho Kotesane re himua rekenapo. Asiamo hauaka wo kotafe somera ho reane, Ho Kotesamo marokesapo. Marokesasamo kotafe some kará porofete aporoane repo marokesapo.

<sup>5</sup> Kotafe some kará porofete aporomo hauaka omo makata hemakapusuane some karápo. Asiamo ipu hauaka omo menane some karakano, nena aporomo hauaka wo makataki hemakapukua risia aporoamo some ane kairapo.

<sup>6</sup> Arirakano isuane Kotimo hokosapo. Isiapo some karakano, some ane, Kotimo some kakinara aporomo kairapo. Asiane Kotimo some kakimakanafonona aporomo isiapo somerakano kairafapo. Kaiyanafonorakano asekea isiapo takekea hemakapuraka, “Aporoaki kotafe somera hoane rekenareapo.” Aiyaka hemakapurakanapo. Arirakano isiapo someane aporomo kairakano asekea, “Aporoaki Kakaro Somera Hoane rekenareapo.” Aiyaka isiapo takekea hemakapurakanapo.

*Aporo metaki himu tumurumo hemakapurane oyapo.*

<sup>7</sup> Hameo, aporo hinamo metaki himu tumurumo hemakapurane Kotimo isuaki karápo. Karakano isiapo Keresoa paosa aporo hinamo metaki kakaro himu tumurumo hemakapureapo. Metaki himu tumurumo hemakapura aporo hinamoane Kotimo hokosapo. I Kotimo hokosasamo ipu Kotiane hemakapurapo.

<sup>8</sup> Aporo hinamo metaki himu tumurumo hemakapunafonorakano, Kotiane soko ipu hemakapurakanafapo. Himu tumurumo hemakapuramo kepoane Koti ipipo.

<sup>9</sup> Kotimo himu tumurumo hemakapurane isiaipo asekeasimo, ipi hokosa hakása nine hauaka wo isupoko pusierakano pesapo. Perakano eaki isiaipo kataka marekea risike, e aeyaka yaiya rerane isiaipo masapo.

<sup>10</sup> Himu tumurumo hemakapura kepoane isiaipo Kotiaki himu tumurumo hemakapura ayafapo. Kepoane Kotimo isuaki himu tumurumo hemakapura ayapo. Hemakapura amo isiaipo makata watikiaka rakisiane mafahoko ipi hokosane isupoko farimaka kukuko pusiesapo. Kotimo isuane himu tumurumo hemakapuraka ipi hokosane isupoko hauaka wo pusiesapo.

<sup>11</sup> Hameo, Kotimo isuane himu tumurumo kára hemakapusuasamo isiaipo isina yia himu tumurumo hemakapusireapo.

<sup>12</sup> Kotiane aporomanomo himo aserafapo. Asekeanafonosa nine isiaipo isina yia himu tumurumo hemakapukua risikino, isu himua Koti rekenapo. Arirakano Kotimo himu tumurumo hemakapurane isuyaki rekeno, isiaipo Keresoa paosa aporo maeaki soko, papáki soko, himu tumurumo hemakapurane kakaro siaraka hemakapukua risikakosapo.

<sup>13</sup> Kotimo ipi Ho Kotesa isuaki kasasamo, isiaipo himua e rekenapo. Asiasamo isu soko Kotiyaki hakása risikinapo. Ayíáka risiane isiaipo hemakapurakanapo.

<sup>14</sup> Asiamo hauaka wo aporo hinamo mafasiakosakipoko Atamo ipi hokosa pusierakano pesapo. E pesane isiaipo aporo hakása puramo\* asesapo. Asesane nōmo aporo hinamo suaki some karakanapo.

<sup>15</sup> Some karakanapo metamo someraka, "Yasuane Kotimo hokosapo." Aira aporoane himua Koti rekenapo. Arirakano Koti himua soko aporoane rekenapo.

<sup>16</sup> Asiamo isiaipo úyaka hemakapurakanapo. Kotimo isuaki himu tumurumo hemakapurakanapo, aíyaka isiaipo hemakapurakanapo. Himu tumurumo hemakapura kepoane Koti ipipo. Aporo metamo metaki himu tumurumo hemakapurakanapo, aporoane himua Koti rekenapo. Arirakano Koti himua aporoane rekenapo.

<sup>17</sup> Kotimo himu tumurumo hemakapura ayíáka isiaipo Keresoa paosa aporo maeaki ayíáka himu tumurumo hemakapukua rosaka taerakano, Kotimo isu hukuarura maiya amo isu himu karekekea namoraka risikiakosafapo. Keresomo himu tumurumo hemakapukua area ayíáka isu soko hauaka wo risike himu tumurumo hemakapukua risikino, hukuarura maiya amo isu mapirarakra risikiakosapo.

<sup>18</sup> Aporomo ipi aporo metaki himu tumurumo hemakapukua rekeno, aporo metamo eaki namorakanapo. Asiamo aporo metaki himu tumurumo hemakapurane kararaka wakapuaka hemakapukua reamo namonane mafarakanapo. Aporo namoraka reke, "Ano fanashikosapo." Aíyaka hemakapukua namoraka rekenapo. Namoraka reke aporoamo aporo metaki himu tumurumo hemakapurane rosaka taesafapo.

<sup>19</sup> Asiamo Kotimo isuane fana himu tumurumo hemakapusuasamo isiaipo soko ayíáka himu tumurumo hemakapurakanapo.

<sup>20</sup> Arirakano Keresoa paosa aporo maeaki hisiraka rea aporoamo someraka, "Nōmo Kotiaki himu tumurumo hemakapurakanapo." Aira aporoamo kotafe somerakanapo. Aporo hauaka wo isina himu aseraki himu tumurumo hemakapunafonoraka, Kotiane isiaipo himo asekeanafononaki himu tumurumo hemakapurakanafapo.

<sup>21</sup> Asiamo somemane Keresomo someaka maresane oyapo. "Kotiaki himu tumurumo hemakapuraka ni Keresoa paosa aporo mae papáki soko himu tumurumo hemakapunie." Aíyaka Keresomo someaka maresapo.

## 5

*"Hauaka omo menane rukutopakatapiakosakipoko Kotiaki himu hakásaraka hemakapukua risikianie," aisane oyapo.*

<sup>1</sup> "Yasuane isiaipo Unihae Kotimo murikimasane ipi Keresopo." Aira aporo hinamoane Kotimo hokosapo. Arirakano Koti Atamo hokosa risike, isiaipo Ataki himu tumurumo hemakapura ayíáka, isiaipo Atamo hokosa metakirané, isiaipo mae papa parisa ayíáka, iaki himu tumurumo hemakapurakanapo.

<sup>2</sup> Isiaipo Kotiaki himu tumurumo hemakapukua, arirakano Kotimo somemane motosane soko kakimaka ayíáka risikino Kotimo hokosa suane isiaipo himu tumurumo hemakapurakanapo, aíyaka isiaipo hemakapurakanapo.

<sup>3</sup> Asiamo Kotiaki himu tumurumo hemakapurane oyapo. Kotiaki himu tumurumo hemakapuraka, Kotimo somemaneane soko kakimaka rakiraka rerapo. Asiamo Kotimo somemane amo isuane maumimarerafapo.

<sup>4</sup> Isu Kotimo hokosasamo hauaka omo menane rukutopakatapirapo. Asiamo isiaipo Kotiaki himu hakásaraka hemakapura amo hauaka omo menane rukutopakatapirapo.

\* **4:14:** Yasumo aporo hakása pura metane Yonepo.

*Kotimo ipi hokosa Yasuane kakama pesane oyapo.*

<sup>5</sup> Hauaka omo menane rukutopakatapiakosa aporoane epare? "Yasu ipi Kotimo hokosapo." Aira aporoamo hauaka omo menane rukutopakatapirapo.

<sup>6</sup> Rukutopakatapiakosakipoko Yasu Kereso hauaka wo pesapo. Wate fana Kereso peakosaposane Yasu pesane ipi Keresopo. Aiyaka aporomo asekeasimo hemo soko yapimo soko\* tarisiapo. Yasu hea tapukumaresane soko, ira matopesa paremareraka yapi pusuapo. Aporomo eane asekeasimo he hákasamo tarisiafapo. Hemo soko yapimo soko tetákara tarisiapo. Arirakan Ho Kotesamo soko someraka, "Yasu ipi Keresopo." Aiyaka isiapo hemakapusimo Ho Kotesamo somesapo. Kakaro somera kepoane Ho Kotesa ipipo.

<sup>7</sup> Yasu ipi Kotimo hokosapo, aiyaka isiapo hemakapusimo makata isíamo tarisiapo.

<sup>8</sup> Ho Kotesa soko, he soko, yapi soko, makata isia tarisia amo kepoane hakása yiayapo.

<sup>9</sup> Kepoane Yasu pesane ipi Kotimo hokosapo. Eane Kotimo murikimaka pusierakan e pesapo. Pesane makata isia amo isuaki tarirakanapo. Tarirakan asekea kakimaka hemakapunie. Asesa aporo wilkinisimo somerakan sisiapo kakimarakapo. Asesa aporo wilkinisimo Kotimo hokosa Yasuane tarira aiyáka, sisiapo kakimakasimo Kotimo makata isia amo isuaki tarisiapo. Arirakan hauaka wo asesa aporomo makata tarisiane Kotimo makata isia tarisia amo marokesapo. Ipi hokosane Keresopo. Aiyaka Kotimo makata isia amo isuaki tarisiapo.

<sup>10</sup> Tarirakan Yasu ipi Kotimo hokosapo. Aira aporoamo makata isia ane hemakapuraka, himo asekea hemaka apura aiyáka hemakapurakanapo. Arirakan kakimakanafonona aporoamo Kotiaki someraka, "Nómo isuaki kotafe someaka atarire." Aiyaka Kotimo ipi hokosane Keresopo aiyaka hemakapusimo makata tarisiane asekepayaraka hemakapurafapo.

<sup>11</sup> Arirakan Kotimo makata tarisiane oyapo. Kotimo ipi yaiya rerane isuaki kasapo. Isiapo Kotimo hokosaki kataka marekea risikino yaiya risikiakosapo.

<sup>12</sup> Kotimo hokosa Yasuaki kataka marekea risia aporo hinamoane yaiya risikiakosapo. Arirakan Kotimo hokosa Yasuaki kataka marekea risikianafonona aporo hinamoane i yaiya risikiakosafapo.

<sup>13</sup> Kotimo hokosa Yasu Keresoaki repo himu hakásaraka hemakapukua risikino, re yaiya risikiakosapo. Ane repo hemakapusimo ano Yonemo sawi one reaki poparaka makerakarapo.

*Watikiaka rakisia aporopoko kurikurinane oyapo.*

<sup>14</sup> Isiapo kurikurinamo Kotimo hemakapusua aki, isiapo hemakapusua aki, tati siasekeno ane Kotimo sia kaiyakosapo. Aiyaka isiapo namonafaraka mapirarakura kurikurihokosapo.

<sup>15</sup> Kotimo ipi hemakapusua aeyaka isiapo kurikurirakan, Kotimo kaikia aohokosapo. Aiyaka isiapo hemakapurapo.

<sup>16</sup> Isiapo Keresoa paosa aporo mae metamo makata watikiaka rakisia nine, makata watikisa amo eane kura ikia kara á karikia punafonorakan epoko kurikurihoanie. Kurikurihoane, aporoamo watikiaka rakisia hufitaerakan koteaka rerane Kotimo eaki kakakosapo. Arirakan aporo metamo makata watikisa meta rakiraka reke, ipi kura ikia kara á purapo. Kura ikia kara á pusua aporo akipoko kurikurihoanie, aiyaka nōmo somerakanafapo.

<sup>17</sup> Makata watikiaka rakira kekepo suane kakaro watikisapo. Makata watikisa meta aporo amo rakiraka rekeno, kura ikia kara á pukusapo. Arirakan makata watikisa metakira aporo amo rakisia hufitaerakan Kotimo mafanapo. Mafarakano, aporoane kura ikia kara á pukusafapo.

<sup>18</sup> Aporo hinamo i Kotimo hokosasamo ipu watikiaka rakiraka risirafapo. Aporo hinamoane Kotimo hokosasamo Yasumo mafairaka asekea rekenapo. Asekea rekeno aporo hinamoane Satanemo sakainafapo.

<sup>19</sup> Kotimo hokosane isupo. Asiane hauaka kara wo aporo hinamo Kotimo hokosa risikianafonosane Satanemo unihaeaka asekea rekenapo.

<sup>20</sup> Asekea reanine Kotimo hokosa Yasu hauaka wo pesapo. Pekea isiapo Kotiane hemakapusimo, hemakapura ane epo isuaki kasapo. Kasasamo Yasu Keresoaki kataka marekea risike Kotiaki soko kataka marekea risikinapo. Kotiane ipi namo kakaro Kotipo. Yaiya rera kepoane ipipo.

<sup>21</sup> Hameo, yatafu soko, yakasa ho soko, kotafe hora hoane soko, kotafe kota pariraka risia, i suaki patera tarikia risikianie.

\* **5:6:** Yasu ipi ira matopesa paremarea maiya amo e ketaya ferepemo kareane he yapiyaki hakása pusuapo. (Yone 19:34)

## 2 Yone

### 2 Yone sawi one mahemakapukusa someane oyapo.

Yone rea maiya amo, aporo metakira fana Keresoraka risia amo, Keresomo kakaro someane metakarikia, ipu namina kotafe someane some karaka risiapo. Yonemo paroaka someraka aporoano ararehokopo, aisapo.

Arirakano sawi wo Yonemo ipi yanoane popasafapo. Yonemo ipi yanoane faremarekeia úyaka popasapo. Ano aporo sisima Keresoa paosa aporo hinamo asekea rea aporopo, aíyaka ipiane popasapo.

### 2 Yone sawia some kepo parakuraka popasane oyapo.

1:1-3 Sawi popana one Yonemo kepomarekeia popasapo.

1:4-6 Kakaro someane soko himu tumurumo hemakapurane soko Yonemo someaka popasapo.

1:7-11 Kotafe somera aporoane pasimaka ararehokopo, aíyaka Yonemo somesapo.

1:12-13 Yonemo makata someaka popahokosane o farakanapo.

*Kakaro somerane soko, himu tumurumo hemakapurane soko Yonemo somesane oyapo.*

<sup>1</sup> Hinamo\* né Kotimo murikimasapo. Néaki soko nōmo hokosaki soko nōmo sawi one poparaka makerakanapo. Pipu ano sisimaraka reke Keresoa paosa aporo hinamo asekea reane anosasamo, reaki sawi one poparaka makerakanapo. Reane nōmo himu tumurumo hemakapurakanapo. Arirakano kakaro someane kaikia hemakapura aporo hinamo i suane soko nōmo himu tumurumo hemakapurakanapo.

<sup>2</sup> Maiya suamo Kotimo kakaro someane isiapo kakimaka yaiya hemakapukua risikinapo. Kakaro someane soko, aporo hinamo meta himu tumurumo hemakapurane soko, isiapo kekemaraka risikinapo.

<sup>3</sup> Kekemaraka risike Kotipe ipi hokosa Yasu Kereso tetapō yaku hemakapukua ararenane soko kamenakanane soko auaraka risirane soko isuaki kakasimo hemakapurakaripo.

*Kakaro somerane soko, kakaro himu tumurumo hemakapurane soko amo kepoane oyapo.*

<sup>4</sup> “Kakaro someane kakimaka risikianie.” Aíyaka Atamo somesapo. Somesasamo nōmo hokosa metakiramo kakaro someane kakimaka risikinapakano nōmo kaikia seserakanapo.

<sup>5</sup> Asiamo hinamo, neaki somemanane kawe haku somehoko nōmo poparakanafapo. Kepomarekeia Keresoa paosa maiya amo somemanane some kasa hakása nine reaki poparakanapo. Yumo somemanane nōmo efera hunia poparaka, “Repo namina yia Keresoa paosa aporo hinamoane himu tumurumo hemakapukua risikianie.” Aíyaka nōmo poparakanapo.

<sup>6</sup> Popasa amo kepoane oyapo. Repo namina yia Keresoa paosa aporo hinamoane himu tumurumo hemakapukua risikino, Kotimo somemanane maresane kakaro kakiamara oyapo. Repo namina yia Keresoa paosa aporo hinamoane himu tumurumo hemakapukua risikianie. Aíyaka somesane re Keresoa paosa sereamo kaisiapo.

*“Keresoaki yununa aporoano some kakako koraka risikinapo,” aisane oyapo.*

<sup>7</sup> Kotafe some kará aporo hauaka sua koraka risike kotafe someane some karápo. Ipu someraka, “Yasu Kereso hauaka wo aporomano kau maka pesafapo.” Aíyaka ipu kotafe some karapo. Namina kotafe some karaka risike ipu Keresoaki yunuraka risira aporoane ayapo.

<sup>8</sup> Asiamo Keresoaki yununa aporoane repo kekemanaapaka asekeanie. Repo Keresopoko rakisiakipoko epo makata ropo reaki kakakosaposane metakarirapaka asekeanie. Makata ropo su mokoakosakipoko kotafe someane repo kakimakopo.

<sup>9</sup> Arirakano aporo metamo Keresomo some kasane metakarikia ipu hemakapusua aeyaka some meta paoraka some karakano aporoane Kotiyaki rekenafapo. Arirakano Keresomo some kasane metakarirafaraka someane kakimara aporoaki Ata Kotiane soko ipi hokosa Yasu Keresoane soko hakása rekenapo.

<sup>10</sup> Arirakano aporo metamo Keresomo someane metakarikia some haku kakako perakano aporoaki repo “Maeo,” aihokopo. Eane tereraka pasimaka repo apea karikia pukupo.

\* <sup>1:1:</sup> Hinamoane takume someamo kepoane Yasu Keresoa paosa aporo hinamo sose hakása sarimaraka risikinapo. Hokosa asiane Keresoa paosa aporo hinamo ayapo.

<sup>11</sup> Asiamo kotafe some kará aporoane repo maeaka pasimaka repo apea karikia pukanone, aporoamo watikiaka rakirane repo soko hakásá nineraka hemakapukua watikiaka rakirakanapo. Watikiaka rakirapaka kotafe some kará aporoane pasimaka repo apea karikia pukupo.

*Yonemo ayapa aisane oyapo.*

<sup>12</sup> Nōmo some metakira soko reaki somehokosane kakenapo. Kaya nine someane nōmo hokonomo poparaka makeakosafapo. Arirakano ano re arisia kimisi peraka isu isina hakásá sarimaraka toke, reaki somehokosapo. Isina hakásá sarimaraka toke sesehokosapo.

<sup>13</sup> Nōmo apumo<sup>†</sup> hokosa Kotimo murikimasa amo reaki ayaparakanapo.

---

<sup>†</sup> **1:13:** Apu airakane takume someamo kepoane Keresoa paosa aporo hinamo sose meta á sarimaraka risikinapo.

### 3 Yone 3 Yone sawi one mahemakapukusa someane oyapo.

Sawi one Yonemo aporo hakása meta yano motosa Kaíase, eaki poparaka makesapo. Sése ape hakása meta á Keresoa paosa aporo hinamo risiane Kaíasemo asekeea reapo. Kaíasemo ipi koteaka rakisia nine, Keresoa paosa aporo hinamo asekeea rea aporo meta yano motosa Tiótefesemo ipi watikiaka rakisiapo. Asiamo Kaíaseaki Yonemo, "Asekeanie," aiyáka popasapo.

Arirakano sawi wo Yonemo ipi yanoane popasafapo. Yonemo ipi yanoane faremarekea úyaka popasapo. Ano aporo sisima reke, Keresoa paosa aporo hinamo asekeea rekenapo, aiyáka ipiane popasapo.

#### **3 Yone sawia some kepo parakuraka popasane oyapo.**

1:1-4 Sawi popana one Yonemo kepomarekeea popasapo.

1:5-8 Yonemo Kaíaseane kekereraka somesapo.

1:9-11 Tiótefesomo makata watikisa ainane Yonemo somesapo.

1:12 Timítirasemo makata kotesa ainane Yonemo somesapo.

1:13-15 Yonemo makata someaka popahokosane o farakanapo.

<sup>1</sup> Kaíase, pipu ano sisimara reke, nōmo Keresoa paosa aporo asekeea reamo sawi one néaki poparaka makerakanapo. Né nōmo mae asiapo. Nōmo néane kakaro himu tumurumo hemakapurakanapo.

<sup>2</sup> Hameo, né seseraka reke, nōmo Kotimi himu hakásaraka hemakapukua reke, aiyáka rekeno, ne kau soko makata takamakanafonoraka koteaka siaraka rekeasimo nōmo repoko kurikurirakanapo.

<sup>3</sup> Keresoa paosa aporo metakira ano rea kimisi peraka, nōmo makata ainane anoaki somerakasupo. Nōmo Kotimo kakaro someane himu hakásaraka hemakapukua, kakaro somera ikia kara á kekemarape puraka rekenapakano nōmo kaikia seseraka rekenapo.

<sup>4</sup> Arirakano kakaro someane nōmo some kayane aporo hinamomo kakimarakano ano seserakanapo. Asiamo kakimasa aporo hinamoane nōmo hokosa asiapo. Kakaro someane ipu kakimaka riskinapakano nōmo kaikia ano kára seserakanapo.

*Kaíase koteaka rekenapakano kaisiane oyapo.*

<sup>5</sup> Hameo, Keresoa paosa aporo metakira nōmo apea kumuku perakano, iane fana nōmo asekeanafonosa nine nōmo apea karikia pukua iaki makata nakosa kaka, koteaka asekeea rekenapakae.

<sup>6</sup> Nōmo aporo kimisi pesaki himu tumurumo hemakapusuane, Keresoa paosa aporo hinamo wo risiamo kaisiapo. Asiamo nōmo apea aporo kimisi pekea risina, i ape sumu meta Kotimo someane some kakako purakano, iane koteaka ararehoanie. Kotiane sesehoasimo i makata forokoa risiane ararehoanie. Kotimo sesehoasimo i ararehoanie.

<sup>7</sup> Asiamo aporoamo Keresopoko makata rakiakosakipoko kimisi purakano, ipu Keresoa paohoaafonosa aporomo moneane morafapo.

<sup>8</sup> Mokoanafonasamo isu Keresoa paosa aporomo iane ararehoasireapo. Kakaro someane ipu some kakasimo isiapo iane ararerakano, ane iyaki hakása Unihaemo makata rakirane rakiakosapo.

*Tiótefesomo makata watikiaka rakisiiane oyapo.*

<sup>9</sup> Fana Keresoa paosa aporo hinamoaki nōmo sawi meta poparaka makesapo. Sawi popasane Tiótefesomo ipi unihaeaka rekeako hemakapuraka reke, nōmo sawi poparaka makesane epo menoraka, kakipayaraka rekenapakae.

<sup>10</sup> Ano repo sese apea apera maiya amo, Tiótefesomo ipi makata rakisiiane aporo suaki nōmo somehokosapo. Isuane epo watikiaka hokomaka somesapakae. Hokomaka someaka arirakano Keresoa paosa aporo kimisi pesane ipi apea makata nasimo karikia peaesafapakae. Arirakano Keresoa paosa aporo metakiramo aporo kimisi pesane pasimorapaka epo matasoraka rekenapakae. I kurikuri apea perakano epo pusierakanapakae. Ape hakása yia risia aporoane pusierakanapakae.

<sup>11</sup> Arirakano Kaíaseo, watikiaka ainane kekemaraka rakiakopo. Makata koteaka rakiakano asekeea kekemahoanie. Ereketaeraka rakiraka rera aporoane ipi Kotimo hokosapo. Arirakano watikiaka rakiraka rera aporoamo Kotiane hemakapurafapo.

*Timítirase ipi koteaka reane oyapo.*

<sup>12</sup> Aporo suamo someraka, "Timítiraseane ipi aporo kotesapo." Airakanapakae. Timítirase ipi kakaro koteaka rekeno asekeea nōmo soko "E aporo kotesapo," airakanapo. Kaíase nōmo someraka one kakaropipo. Some one nōmo soko hemakapurakanapo.

*Yonemo ayapa aisane oyapo.*

<sup>13</sup> Nōmo some kára metakira soko somehokosakipoko asiane hokonomo popahokosane hisiripo.

<sup>14</sup> Nōmo né aseako peakoripo. Ano peraka né hikumisi asekea iti somehokosapo.

<sup>15</sup> Né koteaka auaraka rekeasimo hemakapurakaripo. Nōmo aporo táke wo risiamo néaki ayapa airakanapo. Isiapo aporo táke néyaki hakāsa risiaki, “Nōmo reane hemakapurakanapo,” aihoanie. Nōmo iaki hakāsa hakásaraka someraka, “Yonemo reane hemakapurakanapo,” aihoanie.

## **Yuti Yuti sawi one mahemakapukusa someane oyapo.**

Yasu hepene yapura hisiakipoko keremisi fifiti su (50) faraka, Yutimo sawi one popasapo. Mariape Yosefe tetapo hokosa tipiane Yuti ipipo.

Kotafe tisamo someane Keresoa paosa aporo hinamomo kekemanapaka Yutimo sawi one popasapo.

### **Yuti sawia some kepo parakuraka popasane oyapo.**

1:1-2 Some kepomarekeaa popasapo.

1:3-16 Kotafe tisane Kotimo fanasihokosapo.

1:17-23 Keresoa paosa aporo hinamo paroaka risikianie, aisapo.

1:24-25 Kotipe Yasu Kereso tetane makáraraka kekerehoanie, aisapo.

*Yutimo sawi poparaka makesane oyapo.*

<sup>1</sup> Ano Yutimo sawi poparaka makerakanapo. Yasu Keresomo aporo raipane anopo. Yamesemo maéane anopo. Kotimo murikimasa aporo reaki nōmo sawi one poparaka makerakanapo. Reane Ata Kotimo kára hemakapurakanapo. Yasu Keresomo soko reane asekea rekenapo.

<sup>2</sup> Kotimo re kamenakaraka repo aporo hinamo meta kirane himu tumurumo hemakapuranee soko, auaraka risirane soko, Kotimo reaki kára kakasimo nōmo hemakapurakaripo.

*Kotiaki hemakapunafonona aporo pesane oyapo.*

<sup>3</sup> Hameo, Kotimo re soko ano soko isu su mafasiane nōmo kára hemakapuraka popahokosapoko asiane, nōmo metakarikia nōmo reaki some meta one some kakakosakipoko poparakanapo. Popana one Kotiaki hemakapunafonona aporoaki paroaka somehoanie. Ipu hemakapusimo, repo Yasuaki himu hakásaraka hemakapukua epo someane repo hakimasane makama fanaraka hemakapukua risikianie. Repo Yasuaki himu hakásaraka hemakapura someane Kotimo ipi aporo hinamoaki some kasapo. Some kasane makama fanaraka hemakapukua, Kotiaki yununa aporoamo someane kakimakopo, aíyaka nōmo reaki paroaka someaka poparakanapo.

<sup>4</sup> Re Keresoa paosa aporo hinamo sarimaraka risiakipoko, Kotiaki hemakapunafonona aporo\* reyaki hakásaraka sarimaraka risikinapo. I risike ipu hasaka somerakanapo. Ipu hasaka someraka, "Repo someane hasaka somereapo." Aíyaka ipu kotafe someane repo takekeea hemakapurakanafapo. Hemakapunafonorakano ipu Kotimo yaku ararena some kasane, ipu kaíkia risikiyiá, kakaro someane mapariraka kotafe someane some karakanapo. Asiamo ipu some karaka, "Hinamo yaiya hakimarakaa risikino soko siapo. Makata watikisa ane Kotimo sia kosohokosapo," aíyaka ipu hasaka somerakanapo. Aíyaka someraka risike, Yasu Keresoane ipu hisiraka metakarisapi. Isu asekea rera Unihae Yasu Keresoane ipu metakarisapi. Metakarisasamo Kotimo sawia poparaka, "Iane fanashihokosapo," aíyaka popasapo. Popasa hakásaraka nine ayíakakosapo. Popasa ane repo menosapo.

<sup>5</sup> Menoraka kakaro hemakapusua nine, repo koteaka hemakapusimo nōmo someaka poparakanapo. "Wate fana Isiraya aporo hinamomo iyipi hauakane metakarisimo Kotimo iane pasimoyereapo. Pasimosa nine, keseke ipu aporo hinamo metakiramo koaretaeraka risiakipoko, pasimosa aporo hinamoane Kotimo marutaehoareapo," aisapo.

<sup>6</sup> Arirakano hepene aporoane Kotimo fanasisane hemakapunie. Asiamo fana Kotimo hepene aporoaki someraka, "Makata rakira one rakinie." Aíyaka ipu makata rakisimo Kotimo murikimayereapo. Murikimasane ipu koaretaeraka metakarikia, arirakano hepene yapurane soko metakarikia pusureapo. Metakarikia purakano, Kotimo i senemo taporaka taesa warisiareapo. Keseke i hukurukusakipoko, katosa hauaka á i taporaka taesa yaiya wariskisapo.

<sup>7</sup> Arirakano Sotome taone aporo hinamoane soko, Komora taone aporo hinamoane soko, taone makeraka risia aporo hinamoane soko i fanasisane hemakapunie. I watikiaka risia ayíáka, Koti hemakapunafonona aporoane ayíáka risikinapo. Arirakano Sotome aporomo soko, Komora aporomo soko ipu naminha hinamo arumosane metakarikia, hinamo metakira hakimokoa, aporo hokosa takéyaki enaraka ayíáka risiareapo. Ayíáka risikino Kotimo asekea, fanasiraka iramo i paisiane ira ane kopakapurafapo. Kopakapunafononane kepoane ipu makata watikiaka rakisiasamo makata ropoane ayapo. Iane

\* <sup>1:4:</sup> Kotiaki hemakapunafonona aporoane, Yutimo kotafe tisa aporo ayíáka risiane popasapo.

iramo paisiane isiapo kaikia fofaraka namohoasimo popahoareapo. Ipu watikiaka rakisiante isiapo kekemanapaka popahoareapo.

<sup>8</sup> Asiāne Kotiaki hemakapunafonona aporomo kaisia nine, aporo fana risiamo watikiaka rakisia ayiáka, yumo soko ipu watikiaka rakirakanapo. Ipu hasaka hemakapusuane kekemarakaka rakiraka risikinapo. Hinamo hakimaka, arirakano Unihae Kotimo someaka maresane koaretaeraka, arirakano hepene aporoane soko ipu mainamareraka ayiáka risikinapo.

<sup>9</sup> Kotiaki hemakapunafonona aporo kotafe tisa aporo risiramo hepene aporo mawakase-maraka ayiáka, hepene aporo hakásá meta káraraka reane epo yano motosa Maeko, ayiáka reafareapo. Maekomo Moses kusua kau narisane makosakipoko Sataneaki tafatafasareapo. Tafatafasa maiya amo, Maekomo Sataneane hukurukua mainamare-safareapo. Maekomo someraka, "Unihae Kotimo ne hukurukusapo," aíyaka Maekomo someraka, Sataneane mainamaresafareapo.

<sup>10</sup> Arirakano Kotiaki hemakapunafonona aporoamo hauaka wo makatane hákasa hemakapurapo. Kotimo makatane ipu himeteraka hokomaka somerapo. Saromo himu hemakapurafaraka himu mahimeteraka arisia ayiáka, ipu soko himu hemakapurafaraka himu mahimeteraka risikinapo. Mahimeteraka risike iane arupukusapo.

<sup>11</sup> Uao, ipoko enahoasisareapo. Kenemo Kotimo someane koaretaena ikia kara keke-masa ayiáka, i soko koaretaena ikia karane ayiáka kekemarakanapo. Arirakano Péramemo makata ropo mokoako kotafe some kará ikia kara kekemasa ayiáka, i soko makata ropo mokoako, kotafe some kará ikia kara ayiáka kekemarakanapo. Arirakano Mosesemo someane Kóramo koaretaesa ayiáka, ipu Kotimo someane ayiáka koaretaerakanapo. Koare-taeraka i soko kukua keakosapo.

<sup>12</sup> Kotiaki hemakapunafonona aporoane watikiaka risike, iane makata pikirisa asiāpo. Repo Keresoa paosa aporo maeane hemakapukua sarimaraka makata anena maiya amo, i soko pekea reyaki hakásá sarimaraka toke makata nenaka, atoamo ipu watikisane re karáka, re himunane mawatikirakanapo. I naminane hákasa fanaraka hemakapuraka, aporo metakirane hemakapurafapo. Hemakapunafonora risike, i kaiyanafapo. Iane nenakamaka risike, reane arareraka makotenaafapo. Arirakano ti pakae atifomo foaka mokoa puraka yao perafapo. Yao peanafonona ti pakae nenakamaka arisia ayiáka, Kotiaki hemakapunafonona aporo nenakamaka ayiáka risikinapo. Arirakano ira wate peanafonona nenakamaka ira arisia ayiáka, i nenakamaka ayiáka risikinapo. Yakimo ira wate apera ikia amo, ira wate peafunusa nine perafapo. Wate peanafonorakano pikinuyaki fimayane akura ayiáka, i kakaro kukua kerapo.

<sup>13</sup> Arirakano he tawara kupa yaifa peraka reke, he fea he torofae watikisane he kupamo kakaperemokoa pekea taena ayiáka, ipu makáiyasa makata watikiaka rakirane mokoa pekea taerakanapo. Arirakano ti makata metakira mokome koraka arisia ayiáka, Kotiaki hemakapunafonona aporoane ayiáka mokome koraka risikinapo. Ti makata mokome koraka risina katosa a apura ayiáka, mokome koraka risira aporoane ayiáka, katosa á pukusapo.

<sup>14</sup> Arirakano Kotiaki hemakapunafonona aporoaki Kotimo makata ayiakakosane, i faserepeasiraka, wate fana Inokemo somehoareapo. Atamemo hokosa amo hokosa amo hokosa ayiáka wainepé pukua yatipinuane Inokepo. Epo someraka, "Unihae, hepene aporo tene taoseneyaki (10,000)

<sup>15</sup> aporo hinamo suane hukuruko peakosapo. Peakosa ane Koti metakarikia fasikia risia aporoamo watikiaka rakisiante tarikia someraka, 'Repo Kotiane metakarikia watikiaka rakikia, arirakano repo akaimo Kotiaki mokoatikiraka watikiaka someraka risia akipoko, re fansinane motoakosapo,' aíyaka hukurukua somehokosapo." Aíyaka Inokemo popahoareapo.

<sup>16</sup> Kotimo fansinane motoakosapo, airakano yia, ipu kakipayaraka watikiaka rakiraka risikinapo. Unihae Kotiaki ipu me uaka someraka, arirakano nanaeraka risike, arirakano ipu kaumō watikiaka hemakapusuane kekemarakaka rakikia, arirakano i naminane makárahoko rupiaka someraka, arirakano makata ropo mokoakosakipoko aporo metane kotafe kekereraka ayiáka risikinapo.

*Repo Yasuaki himu hakásaraka hemakapukua paroaka risikianie, aisane oyapo.*

<sup>17</sup> Hameo, keseke makata ayiakakosane wate fana Unihae Yasu Keresomo tarira aporomo kakama somesapo. Ipu somesane repo hemakapunie.

<sup>18</sup> Ipu somesane oyapo. "Fahokosa maiyane makeanamo, aporo metakiramo Keresoa paosa aporo hinamoane asekeea hokomareakosapo. Kotiane soko ipu metakarikia ipu namina watikiaka hemakapusuane kekemarakaka rakiakosapo," aíyaka tarira aporomo reaki some kasapo.

<sup>19</sup> Arirakano Kotiaki hemakapunafonona aporoamo Keresoa paosa aporo metakiramo Keresoa paosa aporo metakiraki fasikia risikiasimo ipu kirimarakanapo. Kirimaraka hauaka wo kaumō hemakapusuane ipu kekemarakanaapo. Ho Kotesamo i asekea rekenafapo.

<sup>20</sup> Hameo, aporoane arisia ayiáka re ayiáka risikiakopo. Kotiaki kakaro himu hakásaraka hemakapurane paroaka hemakapunie. Ho Kotesamo hemakapusuane reaki mahemakapurakarakan, repo hakásá nine hemakapukua kurikurihoanie.

<sup>21</sup> Kotimo reaki himu tumurumo hemakapusuasamo eyaki hakásárisiane metakarikia pukupo. Arirakano isiapo Unihae Yasu Keresomo re kamenakaraka ararehokosa anaká, re eyaki yaiya risikiakosapo, aiyáka hemakapukua kau risikianie.

<sup>22</sup> Arirakano aporomo Yasuaki himu hakásaraka hemakapusuane paroaka rekeanafonrakan, aporoane arareraka some kakanie.

<sup>23</sup> Arirakano aporo metakira hukuarura maiya amo iramo inakakohoamo, yumo pasimaka arareraka some kakanie. Aporoane ararena maiya amo makata watikisa amo re soko kirimanapaka fasikia risikianie. Pasu paté pitikinisa watikisekeno hisina ayiáka, ipu makata watikisane repo hisihoanie. Makata watikisane hisiraka risikianie. Asiáne aporoane kamenakaraka ararehoanie.

*Kotiaki kekeraka kurikurisane oyapo.*

<sup>24</sup> Re terafaka rurapaka Kotimo wakapuaka asekea rekenapo. Reane epo faesa hauaka á eyaki risikiako karíkia hiakosane, epo wakapumo siahokosapo. Epo hauaka á re karikia hinaka, repo watikisane mafaraka, re ereketae susu risikiasimo epo wakapuamo reane makotehokosapo. Makoterakano re eyaki risike seleraka risikiakosapo.

<sup>25</sup> Koti hakasa ipipo. Ipi hokosa Unihae Yasu Keresoane ira matopesa paremarekeea kusuasamo, Kotimo isu yaku mafasisiapo. Asiamo ipi yano motosane makáraraka kekeréhoanie. Kerereraka Koti ipi faesane káraro. Ipi fanaraka rekenapo. Ipi unihaeaka rekenapo. Ipi wakapumo aporo su asekea rekenapo. Wate fana hauaka one kepomareasiraka e reapo. Reane yumo soko yaiya rekenapo. Keseke soko yaiya rekeakosapo. Kakaroripo.

## **Kotimo Some Faremaresane Yasumo Yoneaki Tarisiane Oyapo.**

### **Some Faremaresa Tarisia sawi one mahemakapukusa someane oyapo.**

Yasu hepene yapura hisiakipoko keremisi 65 su faraka, Yone Yasumo tarira aporo amo sawi one popasapo. Yonemo sawi one popasa maiya amo, Pátamose he tonoa tipura makesa reapo. Sawi omo kepoane Kotimo hepene aporomo Yoneaki tarisiapo.

Sawi one Yonemo popasa maiya amo, Rome kamani aporomo Keresoa paosa aporo hinamoane mokoatikisapo. Asiamo isu maiya omo arisiamo mokoatikihokosa maiya ane haru fasereperakanafapo. Keseke mokoatikihokosa maiya ane fasereperakan aseraka, isiaipo sawi omo kepoane koteaka hemakapukusapo.

Keseke maiya wakasemamo Satanemo arakiramo epo winihokosakipoko rakiraka sikihokosapo. Asiáne keseke Kotimo Satane soko, Satanemo aporo raipane soko, mokoatikiraka fanasihokosapo.

Sawi popasa one some akárane taku meaka popasapo. Asiamo isiaipo kepo suane koteaka hemakapukusafapo. Keseke mokoatikiana maiya amo isiaipo hemakapukusapo.

Yarusarame siti kawe kisiane Yonemo asesane hauaka wo rekenafapo. Keseke hauaka one fa ana maiya amo, Kotiaki kekemas aporo hinamoane su Yarusarame siti kawea risikiakosapo.

Keseke Kotimo Satane ane soko, Satane patera asesa aporoane soko fanasihokosane motoakosapo. Satanemo Kotiane marokehokosafapo.

Kotimo marokerakano, Koti patera asesa aporo aye yaiya koteaka risikiakosapo.

### **Some Faremaresa Tarisia sawia some kepo parakuraka popasane oyapo.**

1:1-8 Sawi one kepomarekea popasapo.

1:9-20 Yonemo Unihae Yasu Keresoane asesapo.

2:1-3:22 Sese yatipinusua sawi popahoanie, aisapo.

4:1-11 Hepene yapura unihaea sea kayane Yonemo asesapo.

5:1-8:1 Sawi mawerosa ira pimo manakamosa Unihae takomorakano, hauaka wo mokoatikihokosa metakirane faserepesapo.

8:2-11:19 Hepene aporo yatipinusumo pikoro yatipinusuane hakasa hakasaraka rusuapo.

12:1-18 Hinamo soko siapora asia soko Yonemo asesapo.

13:1-18 Yasaro asia fana pesane soko, Yasaro asia keseke pesane soko Yonemo asesapo.

14:1-20 Yonemo makata metakira soko asesapo.

15:1-16:21 Hepene aporo yatipinusumo tisi yatipinusu sakomokoasurakano Yonemo asesapo.

17:1-19:5 Pápirone sitiane Kotimo fanasiraka kakaro marutaesapo.

19:6-20:10 Yasaro asiáne soko, kotafe porofete aporoane soko, Sataneane soko Kotimo hukurukua fanasisapo.

20:11-15 Hukurusua maiya ane Yonemo asesapo.

21:1-22:5 Hepene kaweanie soko, hauaka kaweanie soko, Yarusarame siti kaweanie soko, Yonemo asesapo.

22:6-17 Yasu peakosane makepo, aisapo.

22:17-21 Some one repo sanasinapaka asekeanie, aisapo.

*Yonemo sawi popasane oyapo.*

<sup>1</sup> Kotimo keseke makata ayiakakosane faremaresa. Some faremaresa Yasuaki tarisiapo. Makeana maiya amo makata ayiakakosane, Yasumo ipi aporo raipaki tarisimo, Kotimo Yasuaki tarisiapo. Tarirakano Yasumo ipi aporo raipa Yoneaki tariako hepene aporo pusiesapo.

<sup>2</sup> Asiamo ano Yonemo makata asesane soko, makata kaisiane soko, Kotimo someane soko Yasu Keresomo someane soko suane sawi wo nōmo poparakanapo.

<sup>3</sup> Kotimo makata ayiakakosaposane sawi wo popasane aporo hinamomo kaiyisimo aporo metamo paroaka sakepamo menoraka Kotimo eane makoterakano, e seseaka rekeakosapo. Arirakano sawi wo popasane epo menorakan kaisia aporo hinamoane Kotimo makoterakano i seseaka risikiakosapo. Arirakano sawi wo popasane kakimara aporo hinamoane Kotimo makoterakano i seseaka risikiakosapo. Kotimo makata ayiakakosaposane tarisiane faserepeakosa maiyane makerakanapo.

*Sése ape yatipinusua Keresoa paosa aporo hinamo risiaki Yonemo sawi poparaka make-sane oyapo.*

<sup>4</sup> Esea hauaka á Yasu Keresoa paosa aporo hinamo sése ape yatipinusua risia, reaki ano Yonemo sawi one poparaka makerakanapo. Kotiane fána reane soko, yumo soko yaiya rekenapo. Keseke soko Koti yaiya rekeakosapo. Kotiamo yaku ararenane soko, tau auaraka rerane soko, reaki kakasimo nōmo hemakapurakaripo. Koti ipi unihaeaaka reasasamo hokopusuamo sea kakenapo. Koti hikumisi nene me takua ho yatipinusu risiama Kotimo makata rakirane rakiraka risia amo re makotehoasimo nōmo hemakapurakaripo.

<sup>5</sup> Yasu Keresomo soko reane makotehoasimo nōmo hemakapurakaripo. Aporo hinamomo Kotiane hemakapusimo Yasu Keresomo kakaro someane some kasapo. Aporo kusua fana maturikia taesa fanane Yasu Kereso ipipo. Yaiya reane soko Yasu Kereso ipipo. Hauaka sua unihae suane Yasumo ipi hákasa unihaeaaka asekeea rekenapo. Yasu Keresomo isuane himu tumurumo hemakapuraka isupoko farimaka kusuapo. Isiapo makata watikisa amo isu asekeea Risiane Yasumo yapi pusua amo isuane makokorotaesapo.

<sup>6</sup> Arirakano pirisiti aporomo rakisima ayíáka, ipi Ata Kotipoko isiapo soko ayíáka rakisimo murikimasapo. Murikimaraka isuane ipi aporo irapo, ayíáka epo ipi unihaeaaka asekeea rekenapo. Maiya suamo Yasumo ipi faesane soko ipi wakapuanne soko yaiya rekeakosapo. Maiya suamo Yasumo unihaeaaka asekeea rekeakosapo. Asiamo Yasumo yanoane máfaraka kekereraka risikianie. Kakaroripo.

<sup>7</sup> Hao, kaisie. Yasu akoyaki perakano aporo suamo eane aseakosapo. E ketaya karesa aporoamo soko eane aseakosapo. Yasu perakano, aporo hinamo hauaka sua risiama aseraka kara hemakapuraka hihiripuhokosapo. Keseke ayiakakosapo. Kakaroripo.

<sup>8</sup> Arirakano Unihae Kotimo someraka, "Fanane anopo. Kesekeane soko anopo." Áiyaka kakaro wakapu Koti amo somesapo. Kotiane fana reane yumo soko rekenapo. Keseke soko yaiya rekeakosapo.

*Yonemo Yasu Kereso asesane oyapo.*

<sup>9</sup> Ano Yonepo. Ano soko re soko Keresoa paosasamo isina maepo. Isu suane Yasumo unihaeaaka asekeea rekenapo. Isu Yasu Keresoa paosasamo, reane soko anoane soko isu su nine aporo metakiramo mokoatikirakanapo. Mokoatikirakanó isu Keresoa paosane metakarirapaka paroaka risikiasimo Yasumo wakapuanne isuaki karakanapo. Arirakano aporo hinamomo yasuane hemakapusimo Kotimo someane nōmo some kaka, arirakano nōmo Yasu asekeea eaki himu hakásaraka hemakapukua reke some karakanó, Pátamose he tonoa ano tipura makesapo.

<sup>10</sup> Yatipinu sere metamo Ho Kotesa anoa káraraka reke, pikoro rurakarakano akaira ayíáka, ano patera sápea sakepamo merakano nōmo kaisiapo.

<sup>11</sup> Nōmo kaiyíane someraka, "Néaki nōmo makata tariakosapo. Tarirakanó nōmo aseraka sawia popahoanie. Yasu Keresoa paosa aporo hinamo sése apea risiaki, taone yatipinusua sawi poparaka makeanie. Taone yatipinusue oyapo. Meta Efesase taone, arirakano meta Seména taone, arirakano meta Pékamame taone, arirakano meta Taiataíra taone, arirakano meta Sátisi taone, arirakano meta Firatéfia taone, arirakano meta Reotísia taone ayapo. Á popahoanie."

<sup>12</sup> Áiyaka aporoamo somerakano, meane kairaka, nōmo aseako rekeako parisapo. Rekeako pariraka aseane, korótomo rakisia nafa yatipinusu risiakipoko

<sup>13</sup> tipia nōmo aseane Aporomanomo Táke ásia rekeno nōmo asesapo. Epo pasu horopokara korakee yatipinua faisa osoraka, saro kau terakae korótomo rakisia ane otoa hikia,

<sup>14</sup> ipi uni itiane kakaro pakaesekeno nōmo asesapo. Pakaesane namo kakaro pakaesa ti pakae asisapo. Arirakano e hiane ira rufi faena ayíáka faeraka rekesapo.

<sup>15</sup> E korakeane aine iramo paisia makata pepeno fasokino, ho piákaesa ásia rekeno asesapo. Ipi meane kaiyíane, he si perakarakano akaira ayíáka nōmo kaisiapo.

<sup>16</sup> Ipi hokonoa aseane hokono tumurumo ti makata yatipinusu mokoa rekeno nōmo asesapo. Ipi akaia aseane ferepe taku tetakara waresa horopokara akai aeyaka yaoa pekerekeno nōmo asesapo. Ipi hikumisiane sere maiya tipiamó kára faena ayíáka faerakasapo.

<sup>17</sup> Asiamo eane asekeea, e korakea ano huruperaka kuraka sikisapo. Hurupekeea warekeno ano kaua epo hokono tumurumo sakairaka epo someraka, "Ne namohokopo. Fanane anopo. Kesekeane soko anopo.

<sup>18</sup> Yaiya rerane soko anopo. Ano kusuane maturikia taesasamo yaiya rekeakosapo. Aporo kuramo ikia karane soko, héti hauakane soko ikia koro kiane nōmo maka rekenapo.

<sup>19</sup> Yumo makata aserane soko, keseke makata ayiakakosane soko, makata su nōmo asesane popahoanie.

<sup>20</sup> Korótomo rakisia nafa yatipinusuan kepoane oyapo. Séé ape yatipinusua anoa paosa aporo hinamo arisia ayapo. Arirakano nōmo hokono tumurumo ti makata yatipinusu mokoa rea kepoane oyapo. Ti makata yatipinusuan hepene aporo yatipinusu ayapo. Hepene aporoamo séé ape yatipinusua anoa paosa aporo hinamoane asekea risikinapo." Aiyaka epo anoaki somerakasapo.

## 2

*Keresoa paosa aporo hinamo Efesase séé apea risiaki Yonemo sawi popasane oyapo.*

<sup>1</sup> Yasumo someraka, "Anoa paosa aporo hinamo Efesase séé apea risiane hepene aporomo asekea reaki úyaka popahoanie. Nōmo hokono tumurumo ti makata yatipinusu mokoa rekenapo. Korótomo rakisia nafa yatipinusu risiakipoko tipia ano rekenapo. Reke nōmo reaki somerakanapo.

<sup>2</sup> Repo makata rakisia suane nōmo aserakanapo. Makata rakira metakarirafaraka yaiya rakiraka risikino, nōmo aserakanapo. Aporo watikiaka risiane repo hisiraka arisie. Kotafe tarira aporo peraka someraka, 'Isu tarira aporopo. Isiapo someane kakimakanie,' aiyaka somerakano, repo kaikia ipu someane repo takekeha hemakapuraka, 'Ipu kotafe somerakano, iane tarira aporfareapo,' aiyaka hemakapuraka, ipu someane repo kaki-marakarifapo.

<sup>3</sup> Re anoaki paosakipoko reane aporo metakiramo mokoatikirakano soko, makata umisa fasereperakano soko, re anoaki paosane metakarirakanafapo. Metakarianafonoraka yaiya koteaka rakiraka arisie. Rakiako hisirakano soko metakarirakarifapo. Maiya suamo repo makata koteaka rakiraka arisie.

<sup>4</sup> Re koteaka risikiyia, repo makata hakása meta hasaka watikiaka rakirakano nōmo somerakanapo. Fana repo kepomarekea anoaki himu hakásaraka hemakapusua maiya amo, repo anoaki himu tumurumo hemakapusua kára seserasupo. Asiāne repo himu tumurumo hemakapukua sesesane yumo metakarireapo.

<sup>5</sup> Arirakano aporo huturia hisia eteraka huruapera aiyáka, re aiyáka hurupepe-hoareapo. Asiamo repo hasakasane rukupateraka metakarinie. Metakarikia repo fana anoaki himu tumurumo hemakapusua aiyáka efera hunia aiyáka himu tumurumo hemakapunie. Repo hasakasane metakarikia risikiako parihoanafonorakano repo nafane nōmo makama fearaka nōmo kopakataehokosapo.

<sup>6</sup> Asiāne makata hakása meta kotesane nōmo asekea seserakanapo. Nikorase aporomo makata raraporaka rakirane repo rakiako hisiraka arisie. Nikorase aporomo watikiaka rakisiane nōmo soko hisirakanapo.

<sup>7</sup> Re senaki risiamo Ho Kotesamo anoa paosa aporo hinamoaki somerakano koteaka kaiyinie. Kotimo hemoa ira hakása meta rea amo wateane aporomo nenakano yaiya risikiakosapo. Arirakano nōmo yunuane rukumosakatapira aporo hinamoaki ira wateane nasimo kakakosapo. Aiyaka anoa paosa aporo hinamo Efesase apea risiaki popahoanie." Aiyaka Yasumo somesapo.

*Keresoa paosa aporo hinamo Seména séé apea risiaki Yonemo sawi popasane oyapo.*

<sup>8</sup> Yasumo someraka, "Anoa paosa aporo hinamo Seména séé apea risiane hepene aporomo asekea reaki úyaka popahoanie. Fanane anopo. Kesekeane soko anopo. Ano kusua maturikia taesane hitaferaka rekenapo. Hitaferaka reke nōmo reaki somerakanapo.

<sup>9</sup> Reane makata umisa fasereperakano nōmo aserakanapo. Re yumo makata forokoa risikinapo. Asiāne hepene yapura repo makata ropo kára tokenapo. Aporo metakiramo kotafe someraka, 'Isu Yu aporo pariraka risikinapo. Isu Kotimo aporo ira pariraka risikinapo,' aiyaka somerakano yia, ipu reane mainamarerakanapo. Mainamarera aporoane Sataneaki paoraka reyaki yunuraka risikino nōmo aserakanapo.

<sup>10</sup> Re mokoatikihokosa makatafaserepeako makerakanapo. Fasereperaka kau tehokosane namohokopo. Kaisie. Re anoaki paosane metakarirakarihoamo kau aseakosakipoko Satanemo re metakira tipura keakosapo. Tipura kekeha sere kaeyako sumo mokoatikihokosapo. Mokoatikirakano anoaki hemakapusuan paroaka yaiya hemakapusua risikianie. Aiyáka risina, kurakano repo yaiya risira makata ropo nōmo kakakosapo.

<sup>11</sup> Re senaki risiamo Ho Kotesamo anoa paosa aporo hinamoaki somerakano koteaka kaiyinie. Nōmo yunuane rukumosakatapira aporo hinamoane kurakano, keseke hukuarura maiya amo yape tetá kukuksane aseakosafapo. Asiamo iaki fanasina hauaka

á pusie, aihokosafapo. Aiyaka anoa paosa aporo hinamo Seména sése apea risiaki popahoanie." Aiyaka Yasumo somesapo.

*Keresoa paosa aporo hinamo Pékamame sése apea risiaki Yonemo sawi popasane oyapo.*

<sup>12</sup> Yasumo someraka, "Anoa paosa aporo hinamo Pékamame sése apea risiane hepene aporomo asekeea reaki úyaka popahoanie. Nōmo ferepe taku teta waresa maka reke, reaki somerakanapo.

<sup>13</sup> Repo taonea aporo hinamo yakaimo Satane yano motosane makáraraka risikinapo. Repo taone ane Satanemo asekeea rekeno nōmo aserakanapo. Asiāne repo ano metakarirafaraka ano yano motosane makáraraka risikinapo. Arirakano Keresoa paosa aporo meta Anitipasemo anoane wakapuaka some karakan, Satanea paosa aporo repo taonea risiamo eane rusua kusuapo. Rusua kurakan asekeea, reane anoaki paosane metakarisiapopo. Metakarirafaraka yaiya paroaka risikinapo.

<sup>14</sup> Aiyáka risikiyia, repo makata meta hasaka watikiaka arakirane reaki nōmo somerakanapo. Péramemo fana kotafe some karaka rea aiyáka, repo aporo metakiramo aiyáka some karaka risikinapo. Arirakano Péramemo some kasane oyapo. Péramemo Péraseaki someraka, 'Isiraya aporomo Kotiane metakarisimo úyaka somehoanie. Yatufane máfahaoismo aporomo makata nakosa karápo. Kasáne repo neane siahoasireapo. Kotimo yaposane metakarikia neane siahoasireapo. Arirakano Kotimo yaposane metakarikia hinamoyaki mokome enaraka koraka risike soko siahoasireapo. Aiyaka somehoanie.' Aiyaka Péramemo some kasane repo metakiramo kakimaka Kotimo yaposane repo metakarikia watikiaka rakiraka risikinapo.

<sup>15</sup> Arirakano repo metakiramo Nikorasemo hasaka some karakan kaikia kakimaka raraporaka rakiraka risikinapo.

<sup>16</sup> Asiamo repo watikisane rukupateraka metakarinie. Metakarianafonorakano re arisia ano peraka, ferepe taku tetakara waresa ano akaia reamo reane rukusapo. Ano peakosa maiyane makerakanapo.

<sup>17</sup> Re senaki risiamo Ho Kotesamo anoa paosa aporo hinamoaki somerakan koteaka kaiyinie. Nōmo yunuane rukumosakatapira aporo hinamoaki makata nakosa aporomo asekeanafonona mahamesane hepene yapunaka kakakosapo.\* Aporo hinamo aki eke pakaesa soko kakakosapo. Ekeáne yano motosa kawe popasane aporo hinamo suamo aserapopo. Ekeáne masa aporo hinamo amo ipi hákasa amo aserapo. Aiyaka anoa paosa aporo hinamo Pékamame sése apea risiaki popahoanie." Aiyaka Yasumo somesapo.

*Keresoa paosa aporo hinamo Taiataíra sése apea risiaki Yonemo sawi popasane oyapo.*

<sup>18</sup> Yasumo someraka, "Anoa paosa aporo hinamo Taiataíra sése apea risiane hepene aporomo asekeea reaki úyaka popahoanie. Ano Kotimo hokosamo reaki somerakanapo. Ano hiane faesa ira rufi asiápo. Ano korakeane aine ira paisia ho piakaesa asiápo.

<sup>19</sup> Asiamo repo makata arakirane nōmo aserakanapo. Repo aporo hinamo suaki himu tumurumo hemakapukua risike, anoaki himu hakásaraka risike, makata koteaka arakire. Rea makata umisa fasereperakano repo makata rakisiane metakarirafaraka yaiya rakiraka risikinapo. Fana repo koteaka rakisiane hákasa wakasemapo. Yumo repo koteaka rakisiane kárupo.

<sup>20</sup> Re koteaka aiyáka risikiyia, repo makata meta hasaka watikiaka arakirane nōmo reaki somerakanapo. Hinamo Yesepéaomo someane repo kakimarakapanapo. Yesepéaomo someraka, 'Ano porofete hinamopo.' Aiyaka hinamoamo nōmo aporo raipaki kotafe someane some karakanapo. Aporomo hinamoyaki mokome enaraka koraka risikiasimo epo some karakanapo. Ipu makata nakosa yatafuaki kasane nasimo some karakanapo.

<sup>21</sup> Some kará hinamoamo makata watikisane rukupateraka metakarisimo nōmo kau rekenapo. Kau rekeno hinamoamo makata watikisane metakarirafaraka aporoyaki yaiya mokome enaraka seresera kayapo.

<sup>22</sup> Asiasamo hinamoaki makata takamasa kára kau tenane soko nōmo eaki kakakosapo. Arirakano hinamo akiyaki aporomo mokome enaraka koraka risirasamo makata watikisane metakarianafonorakano, ane iaki nōmo makata tasá kára kaka mokoatikhokosapo.

<sup>23</sup> Asiamo hinamoamo hokosane kukusimo nōmo rukusapo. Rurakano anoa paosa aporo hinamo sese sua risiamo asekeea someraka, 'Aporomo himumo hemakapurane soko, makata rakirane soko Yasumo aserapo,' aihokosapo. Aiyáka nōmo takekea rakirakan ipu aseakosapo. Asiamo repo makata rakisiane nōmo aseraka, koteaka rakisiakipoko makata ropo kotesa nōmo kakakosapo. Arirakano repo makata watikiaka rakisiakipoko makata

\* <sup>2:17</sup>: Fana Isiraya aporo yao kauanea risiamo makata nakosa fasekeno, Kotimo iane ti asipa kasapo. Ti asipa kakaro makata nenapo. Asiāne Kotimo Pékamame aporo makata nakosa kakakosane hakupo. Makata amo namina himu hemakapurane ararehokosapo.

ropo watikisa nōmo kakakosapo. Repo makata rakisia hakāsa nine nōmo asekea takekea reaki hakāsa hakásaraka makata ropo kakakosapo.

<sup>24</sup> Arirakano Taiataíra sése apea repo aporo hinamo metakiramo hinamoamo some watikisane kakimasafapo. Arirakano 'Satanemo some mahamesane repo hemakapuna-fonoraka kakimasafapo. Asiamo some umisa meta reaki somerakanafapo.

<sup>25</sup> Asiamo some kotesa repo kakimasane metakariakopo. Kakimasane paroaka hemakapuka risikianie. Año pariperakarihoamo yaiya paroaka kakimaka risikianie.

<sup>26-27</sup> Nōmo Atamo anoaki wakapu karáká, ano unihaeaka rekeasimo maresa ayiáka, nōmo yunuane rukumosakatapira aporo hinamoane unihaeaka risikiasimo nōmo muriki-makosapo. Asiamo ipu nōmo someane metakarianafonoraka yaiya kakimaka risikino, iaki wakapu kaka unihaeaka risikiasimo nōmo muriakosapo. Murirakano hauaka sua aporo hinamo risiane ipu unihaeaka asekea risikiakosapo. Arirakano aporo waremo ira rokopa mokoa risira ayiáka iane ayiáka wakapuaka risikiakosapo. Arirakano hauakamo orotipi rakisiarie aporomo makasuhoane aroraka fete feteana ayiáka unihaeaka asekea risia aporo hinamomo aporo hinamo metakirane wakapuaka asekea risikiakosapo. Asiamo orotipi hauakamo rakisia aroraka fete fetesa ásiáne aporo hinamo metakirane unhaemo asekea risikiakosa aporo hinamo ayapo.

<sup>28</sup> Arirakano yao fiarakano ti makata hakāsa káramo faeraka rerane, aporo hinamo unihaeaka risiaki nōmo kakakosapo.

<sup>29</sup> Re senaki risiamo Ho Kotesamo anoa paosa aporo hinamoaki somerakano, koteaka kaiyinie. Aiyaka anoa paosa aporo hinamo Taiataíra sése apea risiaki popahoanie," aiyaka Yasumo somesapo.

### 3

*Keresoa paosa aporo hinamo Sátisi sése apea risiaki Yonemo sawi popasane oyapo.*

<sup>1</sup> Yasumo someraka, "Anoa paosa aporo hinamo Sátisi sése apea risiane hepene aporomo asekea reaki úyaka popahoanie. Anoyaki Kotimo ho yatipinusu risikinapo. Ti makata yatipinusu nōmo hokono tumurumo mokoa rekenapo. Nōmo mokoa reke reaki somerakanapo. Repo makata rakirane nōmo aseraka somerakanapo. Aporo metakiramo someraka, 'Keresoa paosa aporo Sátisi sése apea risiamo koteaka rakiraka risikinapo.' Aisa nine Sátisi aporo hinamo, repo kakaro koteaka rakianafonoraka re ho kusua ayireapo.

<sup>2</sup> Re awara ayiáka wasáne turikia tarikia wakapuaka risikianie. Repo makata aina kotesa metakira metakariapi. Ásiáne makata aina metakira wakasema kotesa tokenapo. Asiamo makata aina ane fanapaka mawakapuraka rakinie. Repo makata rakira suane nōmo aseane ereketaesa meta rekerifapo. Kotimo soko aseane repo makata ainane ereketaeraka rekerifapo, airakanapo.

<sup>3</sup> Asiamo repo fana Kotimo someane kakimaka koteaka rakipe pekea tipia watikiaka rakisiarie yumo metakarinie. Metakarikia risikiako pariraka fana koteaka rakisia ayiáka, efera hunia koteaka rakiraka risikianie. Arirakano re meraruamo wakakesakipoko makata hakimora aporo apera ayiáka re meraruamo risiakipoko nōmo reane hukuruko peakosapo.

<sup>4</sup> Arirakano Sátisi sése apea re metakira koteaka risikinapo. Arirakano makata pikirisamo pasu kotesane mapikirinapo. Mapikirina ayiáka makata watikisamo repo himuane mapikirinapo. Ásiáne re namina yia metakira koteaka risiasamo repo pasuane mapikirisafapo. Re metakira koteaka risiasamo reaki pasu pakae kotesane nōmo kakakosapo. Kaka re anoyaki hakāsa risikiakosapo.

<sup>5</sup> Arirakano nōmo yunuane rukumosakatapira aporo hinamoaki pasu pakae kotesane osohoasimo nōmo kakakosapo. Arirakano aporo hinamo yaiya risikiakosa yano taesane Kotimo sawia popasapo. Asiamo nōmo yunuane rukumosakatapira aporo hinamo yano taesa popasane nōmo kosohokosafapo. Aporo hinamoane nōmo Ataki soko, Atamo hepene aporoaki soko, nōmo tarikia someraka, 'Aporoane anoa paosapo,' aihokosapo.

<sup>6</sup> Re senaki risiamo Ho Kotesamo anoa paosa aporo hinamoaki somerakano koteaka kaiyinie. Aiyaka anoa paosa aporo hinamo Sátisi sése apea risiaki popahoanie," aiyaka Yasumo somesapo.

*Keresoa paosa aporo hinamo Firatéfia sése apea risiaki Yonemo sawi popasane oyapo.*

<sup>7</sup> Yasumo someraka, "Anoa paosa aporo hinamo Firatéfia sése apea risiane hepene aporomo asekea reaki úyaka popahoanie. Nōmo ainane kakaro kotesa ereketae susureasamo, nōmo reaki somerakanapo. Kakaro someamo kepoane anopo. Tefetemo kiane\*

\* 3:7: Kiamo Yarusarame siti kawe ikia koroane Yasumo ropakamakosapo.

nōmo maka rekenapo. Ikia koro nōmo ropakamarakano, aporo metamo mapiriakosafapo. Ikia koro nōmo mapirirakano, aporo metamo ropakamakosafapo.

<sup>8</sup> Repo makata rakirane nōmo aserakanapo. Repo kaisie. Nōmo repoko ikia koro ropakamarakano, aporo metamo mapiriakosafapo. Repo wakapu wakasema yiamo, nōmo someane repo kakimaka risike, ano yano motosane mawakasemasafapo.

<sup>9</sup> Repo kaisie. Sataneaki paosa aporo metakiramo kotafe someraka, 'Isu Yu aporo pariraka risikinapo. Isu Kotimo aporo ira pariraka risikinapo,' airapo. Asiāne i Yu aporohoanafonosa yiamo kotafe somerakanapo. Hao, kaisie. Nōmo rakiakosane oyapo. Re korake finisa kepoyia kotafe somera aporoane hurupepehoasimo motorakanapo. I hurupeperaka warisike someraka, 'Reane Yāsumo himu tumurumo hemakapurakanapo,' aihokosapo.

<sup>10</sup> Mokoatikisa maiya amo nōmo someane repo metakarirafaraka, yaiya rakiraka risiapo. Arirakano aporo hinamo hauaka sua risiane nōmo someane metakarirakarihoamo kau aseakosakipoko makata watikisa faserepeakosapo. Fasereperakanano repo nōmo someane yaiya kakimaka risikino reane nōmo asekea rekeakosapo.

<sup>11</sup> Ano peakosa maiyane makerakanapo. Ano aperamo nōmo reane makata ropo kakakosapo. Maiya omo nōmo someane repo kakimaka rakiraka risikinapo. Aporo metamo reane kirimarakanano, some ane repo kakimaka nōmo someane metakarirakano, keseke re nōmo makata ropo kakakosafapo. Anapaka re kirimarakanano someane kaki-makopo. Nōmo someane yaiya kakimaka rakiraka risikianie.

<sup>12</sup> Nōmo yunuane rukumosakatapira aporo hinamoane Kotimo apea ira kesa paroaka arisia ayiāka paroaka risikiakosapo. Ayiāka risike Kotimo iane yaiya unihaeaka asekea rekeakosapo. Kotimo murikimasaporo hinamoane kaua Kotimo yano motosane soko, nōmo Kotimo siti yanoane soko nōmo popahokosapo. Kotimo siti yano popahokosane Yarusarame siti kawe ayapo. Yarusarame siti kaweanie Koti rea hepene yapunaka faserepeakosapo. Arirakano nōmo nī yano motosa kaweanie soko popahokosapo.

<sup>13</sup> Re senaki risiamo Ho Kotesamo anoa paosa aporo hinamoaki somerakanano koteaka kaiyinie. Aiyaka anoa paosa aporo hinamo Firatéfia sése apea risiaki popahoanie," aiyaka Yāsumo somesapo.

*Keresoa paosa aporo hinamo Reotisia sése apea risiaki Yonemo sawi popasane oyapo.*

<sup>14</sup> Yāsumo someraka, "Anoa paosa aporo hinamo Reotisia sése apea risiane, hepene aporomo asekea reaki úyaka popahoanie. Ano Yāsumo reaki somerakanapo. Kotimo ayiakakosaposane kakaro ayiakasimo nōmo rakirapo. Kotimo someane nōmo kakaro somerapo. Nōmo ereketae susu some karápo. Makata su Kotimo rakisiane ano aeyaka kepomarekea rakisiapo. Nōmo reaki somerakanapo.

<sup>15</sup> Repo makata rakirane nōmo aserakanapo. Re he inusa asiafapo. He sisipusa asia soko fapo. He sisipuyaki he inusayaki suasuasa asiane repo. Re he inusa susu ayiāka risikiasimoripo. Re he sisipusa susu ayiāka risikiasimoripo. Asiane re he inusa he sisipuyaki suasuasa ayireapo.

<sup>16</sup> Arirakano aporomo he sisipu he inusayaki suasuaraka nesane wapehoanafonrakanano yokotaenapo. Aina ayiāka nōmo reane metakariakosapo.

<sup>17</sup> Arirakano repo someraka, 'Isiapo makata kemoane káraro. Asiamo isuane aporo hinamo yano motosa káraro. Isu makata meta fasa rekenafapo. Siaraka risikinapo,' airapo. Asiāne Kotimo makata aina kotesane repo asekeanafonoraka re fesonoraka risikinapo. Re watikiaka risikino aporo metakiramo re aseraka kamenakahaoshireapo. Re aporo hinamo makata forokoa arisia asiapo. Re aporo hinamo hi fausa asiapo. Re aporo hinamo pasu faraka, patera yase arisia asiapo.

<sup>18</sup> Asiamo repo koteaka hemakapusimo nōmo hemakapusuane reaki somerakanapo. Repo makata kemo kárahokosakipoko nōmo korótoane ropohoanie. Nōmo korótoane iramo paikia wariwariiraka, makata pepeno toane mokoa mokoateraka, koróto namo susu mosane ayapo. Re patera yase risike kaiyanapaka pasu osohokosakipoko, nōmo pasu pakaesa kotesane ropohoanie. Repo himo koteaka aseakosakipoko hi munamunane ropohoanie.

<sup>19</sup> Arirakano nōmo himu tumurumo hemakapura aporo hinamoane koteaka risikiasimo nōmo maroponapono. Asiamo repo makata watikisane metakarikia, risikiako parihoanie.

<sup>20</sup> Repo kaisie. Ikia koroa ano reke paroparorakanapo. Paroparoraka wárakano, aporo metamo nōmo meane kaikia, ikia koro ropakamarakanano, e rea ano yorokoa eto hakāsa toke makata nakosapo.

<sup>21</sup> Fana Kotimo yunuane nōmo rukumosakatapisiasamo nōmo Ata Unihaemo sea ipiyaki ano hakāsa kakenapo. Asia ayiāka nōmo yunuane rukumosakatpira aporo hinamoane anoyaki hakāsa unihaemo sea tokoakosapo.

<sup>22</sup> Re senaki risiamo Ho Kotesamo anoa paosa aporo hinamoaki somerakano koteaka kaiyinie. Aíyaka anoa paosa aporo hinamo Reotísia sése apea risiaki popahoanie," aíyaka Yasumo somesapo.

## 4

*Hepene yapura Kotiaki kekeresane oyapo.*

<sup>1</sup> Yasumo someaka farakano, nōmo aseane hepene ape ikia koro ropakamarakanó asesapo. Fana pikoro ruraka sikirakano me kaisia hakásá yiamo anoaki someraka, "Né wo peae. Né wo perakano makata su ayiakakosane nōmo néaki tariakosapo."

<sup>2</sup> Airakano Ho Kotesa anoa káraraka reke ano hepene yapura pauraka rekeno asesapo. Pauraka reke nōmo makata asesane oyapo. Aporo uniháemo sea á unihae kakeno nōmo asesapo.

<sup>3</sup> Aseane eke pakaesa yano motosa yásepa faesa ásia soko, eke susa yano motosa koníriane faeraka ho piákaesa ayíáka aporoane kaua faeraka, ho piakaerakanó asesapo. Epo ipi sea hahesa á sawi inimane eke hisukusane yano motosa émarao ásia rekesapo.

<sup>4</sup> Unihaemo seane tipia kayakipoko sea metakira karoraka hahaesane menoraka tuaneti fosesapo (24). Sea á aporo kára tuaneti foane (24) tokesapo. I toane pasu pakaesa osoraka, korótomo rakisia hatiane karoterapiraka tokesapo.

<sup>5</sup> Unihaemo sea aeyaka yamakereraka kikirikasapo. Unihaemo sea hikumisi neneme takua oro kama yatipinusu pakimokoa faeraka risikisapo. Oro kama yatipinusuane Kotimo ho yatipinusu ayapo.

<sup>6</sup> Unihaemo sea hikumisi neneme takua he sirisa namo kakaro kotesa hiho ásia kesesapo.

Unihaemo sea hahesa e kayane makeraka, makata kakayia hitafe kitafasu risikisapo. Makata kakayia kitafasuane hi yakai hikumisi takua soko metakira patera takua soko risikisapo.

<sup>7</sup> Makata kakayia hitafeane menoane saro raeone asisapo. Tetane saro ponomakau apinu asisapo. Isiane aporo hikumisi asisapo. Kitafane mena ariawe aua fakaripukua rekesapo.

<sup>8</sup> Makata kakayia kitafasuane hakásá hakásaraka auane namasu namasuraka risikisapo. Makata kakayiane hi yakai amo namina kauane mokosekesesapo. Kauane soko aua patawiane soko mokosekesesapo. Maiya suamo, sere soko, ereamo soko, makata kakayia kitafasuamo kesarakasapo. Kesanane oyapo.

"Unihae Koti namo kakaro wakapú kára rekenapo. Kotiane namo kakaro koteaka ereketae susu rekenapo. Koti fana reane soko, yumo soko rekenapo. Keseke soko rekeakosapo." Aíyaka ipu kesarakasapo.

<sup>9</sup> Arirakano Unihae Koti sea kayane yaiya rekeakosapo. Makata kakayia kitafasuamo Unihae Kotiaki kekereraka, Unihae Koti yano motosa makáraraka Unihae Kotiaki suseaka kekereraka kesasa maiyi hakasa yiamo,

<sup>10</sup> aporo kára tuaneti foamo (24) soko Unihae Kotiaki kekererako uakapeperaka, hauaka atura wariske Unihae Kotiaki kekererakasapo. Kekereraka ipu korótomo uni hati karotapisane horomokoa, Unihae Kotiaki karáka e kaya seane makeraka mokoasuraka kesarakasapo,

<sup>11</sup> "Né isiapo Unihaepo. Né isiapo Kotipo. Nómó makata su kepomaresapo. Nómó hemakapusua aeyaka makata su rakisiapo. Asiasamo isiapo néaki kekereraka makárarakanapo. Nómó wakapuané kárasasamo né hákasa kekereraka makárarakanapo," aíyaka kesarakasapo.

## 5

*Sawi popasa mawerosa Yonemo asesane oyapo.*

<sup>1</sup> Unihae Koti sea kake sawi taku tetákara poparaka mawerosane ira pi asiamo sawi manakamasimo ira pi yatipinusu sawia paisiane epo hokono tumurumo maka rekesapo.

<sup>2</sup> Maka rekeno hepene aporo wakapú hakásá metamo sakepamo wáraka, "Sawi poparaka mawerosa ira pimo paisia manakamasane, epa koteaka reamo takomokoa fisihoane siahoasireare?" airakasapo.

<sup>3</sup> Arirakano hepene yapura soko, hauaka wo soko, hauaka tamo atura soko, sawi poparaka mawerosane fisiraka asekosa aporo meta rekerifapo.

<sup>4</sup> Asiamo sawi poparaka mawerosane fisiraka asekosa aporo meta koteaka rekeanafonosekeno, ano kára hiripusapo.

<sup>5</sup> Hiripurakano aporo kára hakásá metamo anoaki someraka, "Hiripuhokopo. Hao, kaisie. Yúta aporo ira aporo meta Yasu wareraka rekenapo. Saro raeone wareana ayíáka, eane ayíáka wareraka rekenapo. Tefetemo wainepe pesa aporoane Yasu ipipo. Epo yunu

aporoane Sataneyaki wareraka weke a rukumosakatapisiasamo, ira pi yatipinusu sawia paisiane epo takomokoa sawi popasa mawerosane fisihoane siahokosapo," airakasapo.

*Yonemo Saro Sipi Mano asesane oyapo.*

<sup>6</sup> Tipia Unihae sea kayakipoko makeraka makata kakayia kitafasu risikisapo. Unihae sea kaya hikumisi neneme takua aporo kára toakipoko tipia Saro Sipi Mano rekesapo. Saro Sipi Manoane aporomo rusua kusua aseraka sikiraka, asiáne turikiá pukua rekesapo. Saro Sipi Mano hakásá, mere isi yatipinusu, hi yaiya yatipinusu ayiáka risikisapo. Yatipinusu risia asiane Kotimo ho yatipinusu hauaka sua pusiesa ayapo.

<sup>7</sup> Saro Sipi Manoane pukua, Unihae sea kayakipoko, Unihae hokono tumurumo sawi mawerosa maka reane, epo marakasapo.

<sup>8</sup> Masa yiamo makata kakayia kitafasu soko, aporo kára tuaneti foane (24) soko, Saro Sipi Mano reakipoko eaki kekerehoko uakapeperaka warisikisapo. Aporo káramo hakásá hakásaraka kesañhoko kita asia mokoa, korótomo rakisia tisi soko morakasapo. Korótomo rakisia tisia pauta wape yamona kesa paisisapo. Paisia musu ahirane Kotimo aporo hinamomo kurikurinane asisapo.

<sup>9</sup> Ipu kesá kawe kesásane oyapo.

"Aporo hinamopoko farimaka api kakakosakipoko, né rusua kuraka yapi pusuapo. Yapi pusua amo aporo hinamo Kotipoko risikasimo roposapo. Asiamo sawi popasa mawerosane nómó maka, ira pi sawia paisiane nómó hákasa takomoane siahoasireapo. Aporo ira kekeposane soko, aporo me kekeposane soko, aporo kau kekeposane soko, aporo hauaka kekepoa risiane soko, aporo hinamo suane nómó roposapo.

<sup>10</sup> Roporaka nómó iane asekea reke ipu Kotipoko rakísimo nómó murikimasapo. Arirakano pirisiti aporomo aporo hinamopoko Kotiaki farimaka kurikuriana ayiáka, ipu ayiáka farimak kurikurihoasimo nómó rakísimo murikimasapo. Arirakano ipu hauaka atura aporo hinamo suane unihaeaki asekea risikiakosapo." Aiyaka kesarakasapo.

*Saro Sipi Manoaki kekeresane oyapo.*

<sup>11</sup> Nómó efera hunia aseane, hepene aporo yakai mukisa meno豪asifa risike merakano nómó kaisiapo. Merakano nómó kairaka aseane, Unihae sea kayakipoko makata kakayia kitafa suane soko, aporo kára ane soko, hepene aporo soko su sarimaraka risikisapo. Risike sakepamo kesárakasapo.

<sup>12</sup> Kesáraka úyaka kesárakasapo.

"Saro Sipi Mano né rusua kusuasamo néaki hákasa kekerehoane siahoasireapo. Nómó wakapuanie kárapo. Nómó makata kemo kárapo. Nómó hemakapurane kotesa ereketaesapo. Nómó wakapuaka rakirapo. Né yano motosane kárapo. Né faesane kárapo. Isiapo néaki suseraka kekererakanapo." Aiyaka kesárakasapo.

<sup>13</sup> Arirakano hepene yapura makata risiamo soko, hauaka wo makata risiamo soko, hauaka tamio atura makata risiamo soko, he tawara numua makata risiamo soko, makata amo suamo kesá meta kesárakasapo. Ipu úyaka kesárakasapo.

"Unihae Koti né sea kayaki soko, Saro Sipi Mano néaki soko isiapo makáraraka kekererakanapo. Tetápo faesane soko wakapuanie soko kárapo. Asiasamo tetooaki maiya suamo isiapo kekereraka risikiakosapo."

<sup>14</sup> Aiyaka kesarakano, makata kakayia kitafasuamo someraka, "Kakaroripo." Airakano aporo kára amo Unihaeaki kekerehoko uakapeperaka kekererakasapo.

## 6

*Sawi poparaka mawerosa ira pi yatipinusumo paisiane namasu takomosane oyapo.*

<sup>1</sup> Saro Sipi Manomo ira pimo paisia menoane takomarakasapo. Takomarakano nómó kaiyíane, makata kakayia kitafasuane menomo meraka, kikiriraka sikirakano kaisiapo. Epo someraka, "Peae."

<sup>2</sup> Airakano nómó aseane saro hose hakesa matia aporo hakásá meta terakaiya maka ripaka perakasapo. Epo yunu aporoane rukumosakatapikia marokerakano aporoaki uni hati akara ayiáka, eaki ayiáka uni hati karakasapo. Karakano, Kotimo yunu aporo metakirane hauaka wo risiane soko, rukumosakatapiako pusuapo.

<sup>3</sup> Arirakano Saro Sipi Manomo ira pimo paisia teta ane takomarakasapo. Takomarakano nómó kaiyíane, makata kakayia kitafasuane tetá amo\* someraka, "Peae."

<sup>4</sup> Airakano nómó aseane, saro hose honesa matia aporo hakásá meta ripaka perakasapo. Arirakano hauaka wo aporo hinamo su tau auaraka risirane epo fimaka, aporomo aporo metakiraki werane mareasimo, wakapuanie eaki karakasapo. Werane mareasimo ferepe waresa soko eaki karakasapo.

\* 6:3: Makata kakayia tetá ane napa tu (2) ayapo.

<sup>5</sup> Arirakano Saro Sipi Manomo ira pimo paisia isía ane takomarakasapo. Takomarakano nōmo kaiyáne, makata kakayia kitafasuane isia amo someraka, “Peae.” Airakano nōmo aseane, aporo hakasa makata sikerinane maka, saro hose eresa matia ripaka perakasapo.

<sup>6</sup> Perakano nōmo kaiyáne, makata kakayia kitafasu risia arakaru tipia aeyaka somerakan, me hákasa kaisiapo. Memo someraka, “Ne pukua aporo hinamomo makata nakosa mokoatikiraka mareanie. Asiamo makata nakosa wakasema aporomo mone karamo roporaka nakosapo. Mone hae tanariase hakásamo orotipi wakasema witi hae kesa ropohokosapo. O, mone hae tanariase hakásamo orotipi wakasema isia raesi ásia kesa ropohokosapo. Ásiáne ira orofe heane soko, waene heane soko mokoatikihokopo,” aiyaka somerakasapo.

<sup>7</sup> Arirakano Saro Sipi Manomo ira pimo paisia kitafa ane takomarakasapo. Takomarakano nōmo kaiyáne, makata kakayia kitafasuane kitafa amo someraka, “Peae.”

<sup>8</sup> Airakano nōmo aseane, saro hose keamesa aporo hakásá matia ripaka perakasapo. Aporo ripasa ane Kura aiyaka yano motosesapo. E patera anaka aporo meta peraka, e ipi yano motosesa Hétisi Hauakapo, aiyaka yano motosesapo. Arirakano hauaka wo aporo hinamo risiane, tetapó paraku kitafasurakasapo. Parakusane isia metakarikia, kitafane makukusimo wakapuanne tetáki karakasapo. Karakano aporo hinamo metakira kukusimo ferepemo rukua, arirakano meta, makata nakosa fahoasimo marekea, arirakano meta makata tará kaka kukua keasimo marekea, arirakano meta yasaro ásimo rusua kukusimo marekea, ayíáka tetapó rakisimo tetáki wakapu karakasapo.

<sup>9</sup> Arirakano Saro Sipi Manomo ira pimo paisia kakorea ane takomarakasapo. Takomarakano aseane, Kotiaki makata yaku kakakosakipoko eke taesa asesapo. Eke karoraka taesa tepora ásia nōmo asesapo. Teporo ásiáne tamo atura Kotiaki patera asesa aporo hinamomo epo someane some kasasamo, aporo metakiramo rusua kurakano, ipu hoane risikisapo.

<sup>10</sup> Risike ipu sakepamo wáraka, “Unihaeo, hepene wo soko hauaka atura soko né unihaeaka rekenapo. Né kotesa susu rekenapo. Nōmo someane kakaro somepo. Nōmo someane isiapo some karakano, aporomo isu rusua kusuapo. Hauaka atura aporomo isu rusua kusuane, maiya yakapasu faraka, nōmo aporoane hukurukua ropo mokoatiki-hokosare?”

<sup>11</sup> Airakano aporo hinamo hakásara pasu pakae kotesa karakasapo. Karáka someraka, “Re maiya wakasemamo kau risikianie. Repo nōmo someane some kasasamo, re rusua kusua ayíáka, repo Keresoa paosa aporo mae papáne soko ayíáka rusua kukusapo. Rusua kurakano i hoane soko o risikiako peakosapo. Pekea sarimarakano re rusua aporoane Kotimo ropo mokoatikihokosapo,” airakasapo.

<sup>12</sup> Arirakano Saro Sipi Manomo ira pimo paisia nama ane takomarakasapo. Takomayane momani kára perakasapo. Sere maiyane pikirisa inakasokesa ásia rekesapo. Ere maiyane susa yapi ásia rekesapo.

<sup>13</sup> Arirakano atifo kára peraka ira foke mahohohoane foke wate kakaripepena ayíáka, ti makata ti aeyaka hauaka atura hurupeperakasapo.

<sup>14</sup> Arirakano sawi popasa mawerosa ayíáka, ti yapurane ayíáka maweroraka farakasapo. Uri suane soko, he tonoane soko su kikisiraka purakasapo.

<sup>15</sup> Hauaka wo aporo unihaeane soko, aporo yano motosa kárane soko, ame aporo satiniane soko, aporo makata kemo kárasane soko, aporo wareane soko, aporo raipane soko, aporo raipaoanafonosane soko, aporo su tekatarikia úria hikia, kunikia soko, eke kakarua soko, fara risikisapo.

<sup>16-17</sup> Fararisikiakosakipoko ipu úriaki soko, ekeaki soko wáraka, “Isu mokosekerasie. Unihae sea akaya amo soko, Saro Sipi Manomo soko, saperaka fanasihokosa maiyane faserepesapo. Tetapó saperakano epamo isu matasohokosare? Asiamo tetapó isu aseako-hoamo isu matairaka mokosekerasie,” airakasapo.

## 7

*Isiraya aporo hinamo yakai Kotimo murikimaka hikumisia popasane oyapo.*

<sup>1-2</sup> Saro Sipi Manomo ira pimo paisia namasu takomokoa faraka, nōmo makata asesane oyapo. Hepene aporo kitafasu amo hauake one soko, he tawara soko mokoatikihosimo, Kotimo iaki wakapu karakasapo. Wakapu karakano hauaka wo atifo perapaka, hepene aporo kitafasu amo mafairaka asekeea risikisapo. Risike meta fari sape ro, meta fari sape aka, meta fari taku ra, meta fari taku atura, ayíáka mafairaka asekeea risikisapo. I mafairaka asekeea risiane tapikia tipia atifo perakasafapo. Peanafonoraka irane soko hohorakasafapo. He tawarane soko he kupa perakasafapo. Arirakano maiya apera taku aeyaka hepene aporo meta perakasapo. Pekea Yaiya Rera Koti amo kakimara aporo

hinamo hikumisia popahoko makata popana maka perakasapo. Maka peraka epo hepene aporo kitafasuaki wáraka,

<sup>3</sup>“Hauakane soko, he tawarane soko, irane soko haru mokoatikihokopo. Fana isiaipo hepene aporo suamo Kotimo kakimara aporo hinamoane ipu hikumisia, Kotimo máka motosa ane poparaka farakan, maiya amo hauaka kara one mokoatikihohane siahoasireapo.”

<sup>4</sup>Airakano nōmo kaiyíane, “Isiraya aporo irane aporo hinamo wane harote foti fo taosene ane (144,000)\* murikimaka hikumisia popahokosapo,” airakasapo.

<sup>5</sup>Poparaka Yúta aporo irane aporo hinamo tuaro taosene (12,000) poparakasapo. Arirakano Rúpene aporo irane soko, aporo hinamo tuaro taosene (12,000) poparakasapo. Arirakano Kátá aporo irane soko, aporo hinamo tuaro taosene (12,000) poparakasapo.

<sup>6</sup>Airakano Ása aporo irane soko, aporo hinamo tuaro taosene (12,000) poparakasapo. Arirakano Náfatarí aporo irane soko, aporo hinamo tuaro taosene (12,000) poparakasapo. Arirakano Manásá aporo irane soko, aporo hinamo tuaro taosene (12,000) poparakasapo.

<sup>7</sup>Airakano Simione aporo irane soko, aporo hinamo tuaro taosene (12,000) poparakasapo. Arirakano Rífafí aporo irane soko, aporo hinamo tuaro taosene (12,000) poparakasapo. Arirakano Ísaka aporo irane soko, aporo hinamo tuaro taosene (12,000) poparakasapo.

<sup>8</sup>Airakano Sépuru aporo irane soko, aporo hinamo tuaro taosene (12,000) poparakasapo. Arirakano Yósefe aporo irane soko, aporo hinamo tuaro taosene (12,000) poparakasapo. Arirakano Pénesamene aporo irane soko, aporo hinamo tuaro taosene (12,000) poparakasapo.

*Aporo hinamo yakai mukisa meno hoasifa sarimasane oyapo.*

<sup>9</sup>Nōmo efera hunia keseke asesane oyapo. Aporo hinamo yakai mukisa sarimaraka sapo. Aporo hinamo yakai mukisa sarimasane meno hoahe siahoasisesafapo. Iane hauaka su aeyaka pesane, aporo ira kekeposane soko, aporo kau kekeposane soko, aporo me kekeposane soko, i sú pekea Unihae Koti sea kaya á Saro Sipi Mano soko reakipoko, hikumisia sarimaraka sapo. Aporo hinamo sarimasamo pasu pakae horopokara osoraka, hokonomo asipa hu asia mokoa risike mapurupururaka seseraka risikisapo. Ayíáka risike Kotipe Saro Sipi Mano tetáne kekereroasimo sakepamo wáraka,

<sup>10</sup>“Koti sea kayamo soko, Saro Sipi Mano amo soko isu mafasikia pasimosasamo isiaipo tetáne kekererakanapo.” airakasapo.

<sup>11</sup>Airakano hepene aporo soko, aporo kara suane soko, makata kakayia kitafasuane soko, i suane Unihaemo sea makeraka hahaeraka risikisapo. Ayíáka risike Koti hikumisia uakapeperaka Kotiaki kekererakan soteraka,

<sup>12</sup>“Some one kakaroripo. Kotio, isiaipo néaki kekererakanapo. Nōmo faesane káraro. Nōmo hemakapurane kotesa ereketae susupo. Isiaipo néaki suserakanapo. Né yano motosa kakaro káraro. Nōmo wakapuauka rakirapo. Né maiya suamo yaiya rekeakosapo. Kakaroripo,” aiyáka Kotiaki kekererakan sapo.

<sup>13</sup>Airakano aporo kárá hakásá metamo anoaki someraka, “Aporo hinamo pasu pakae horopokara ososane epare? I manaka pesare? Nōmo hemakapurakarire?”

<sup>14</sup>Airakano nōmo someraka, “Ape neo, ano himeteripo. Nōmo hemaka apure. Nōmo anoaki somesie.” Airakano epo someraka, “Aporo hinamo pasu pakae horopokara ososane, aporo metakiramo kárá mokoatikirakan, ipu Kotiaki hemakapusane metakarisafapo. Ipu pasuane Saro Sipi Mano yapimo kusuraka pakaesesapo.

<sup>15</sup>Asiamo Kotimo apea Koti Unihae sea kaya aki kekereraka, sere soko ereamo soko, epoko kekereraka risikisapo. Ayíáka risikino Koti Unihae sea kaya epo iane asekea rekesapo.

<sup>16</sup>Asekea reke i efera hunia meamohokosafapo. I he nariripo, aihokosafapo. Sere maíyamo kaua ruraka kau konokohokosafapo. Makata metamo soko i kaua inakakosafapo.

<sup>17</sup>Airakano saro sipi wafayamo ipi saro sipi asekea area ayíáka, Saro Sipi Mano Kotimo sea makeraka rea amo iane ayíáka asekea rekeakosapo. Asekea reke i he nasimo karikia pekea, he fuaka taenane nasimo karikia peakosapo. Pekea ipu nenakano, i yaiya risikiakosapo. Arirakano ipu hiripusane Kotimo hokehokosapo.” Aiyáka aporo kárá hakásá metamo anoaki somerakan sapo.

## 8

*Sawi mawerosa ira pimo paisiane namasu takomosakipoko, yatipinu ane takomasane oyapo.*

<sup>1</sup>Saro Sipi Manomo ira pimo paisiane yatipinu ane takomarakano, maiya hi hafo awamo hepene yapura me faraka risikisapo.

\* 7:4: Napa su popasa one taku meaka popasapo.

<sup>2</sup> Maiya hi hafo awa ane faraka, nōmo makata asesane oyapo. Hepene aporo yatipinusu Koti hikumisi neneme takua risiaki pikoro yatipinusu karakano mokoa risikisapo.

<sup>3</sup> Hepene aporo metamo korótomo rakisia tisiane maka pekea, Kotiaki pauta wape yamona paikia Kotiaki kakakosakipoko teboro eke taesa ásiáne makeraka pekea rekesapo. Rekeno eaki pauta wape yamonane kára karakasapo. Aporo hinamomo Kotiaki kurikurisane pauta wape yamona paisia musu hisiane hakása sarimaraka Kotiaki karakasapo. Korótomo rakisia teboro eke taesa ásiáne Koti kaya hikumisi neneme takua taerakasapo.

<sup>4</sup> Taesa kima á hepene aporomo pauta wape yamona paisia musu hisiane, aporomanomo kurikurisa akiyaki sarimaraka Koti kaya hikumisi nenemea hinakasapo.

<sup>5</sup> Hinakano eke kima pauta paisia ira rufiane hepene aporomo maka tisia taeraka komarukano, hauaka atura sakomakasurakasapo. Sakomakasuhane yamakere kikiriane soko, hauaka atura rukusane momani soko sarimaraka perakasapo.

*Hepene aporo kitafa sumo pikoro rurakano nōmo asesane oyapo.*

<sup>6</sup> Hepene aporo yatipinusumo pikoro rukusakipoko mokoa asekea risikisapo.

<sup>7</sup> Asekea risike, hepene aporo hakásamo pikoro ruane, yaóane eke ásiá soko, ira rufi soko yapiyaki hakása hauaka atura hurupeperakasapo. Hauaka parakuraka isíasane tetáne risike, isía hákasane iramo inarakasapo. Arirakano ira parakuraka isía parakusane meno tetáne risike, isía hákasane iramo inarakasapo. Arirakano asane soko su ínaka farakasapo.

<sup>8</sup> Arirakano hepene aporo hakása meta tetá amo pikoro rurakano, makata meta úri kára ásiáne iramo inaraka rufiraka, he tawara numua huruperakasapo. Huruperakano he tawara ane soko yaiya parakuraka isíasane tetáne yaiya risike, isía hákasane yapi parirakasapo.

<sup>9</sup> Arirakano he tawara makata risiane soko yaiya parakuraka isíasane tetáne risike, isía hákasane kurakasapo. Arirakano kasu sipi suane soko, yaiya parakuraka isíasane tetáne risike, isía hákasane rukua arorakasapo.

<sup>10</sup> Hepene aporo hakása meta isía amo pikoro rurakano, oro kama pakimaka rufina ayíáka, ti makata hakása kára rufiyaki ti yapunaka fauraka fetefeteraka hauaka pekea hea hurupeperakasapo. He pekereane soko, he fuaka taenane soko, parakuraka isíasane meno tetáne risike, isía hákasane ti makata hurupeperakasapo.

<sup>11</sup> Ti makata yano motosa Kisane yano motosapo. Kisane hea hurupeperaka heane soko Kísesapo. He kisane aporo hinamomo nesane yakai kuka kerakasapo.

<sup>12</sup> Arirakano hepene aporo hakása meta kitafa amo pikoro rurakano, sere maiya soko yaiya parakuraka isíasane tetáne faeraka, isía hákasane faerakasafapo. Oko soko yaiya parakuraka isíasane meno tetáne faeraka, isía hákasane faerakasafapo. Ti makata soko yaiya parakuraka isíasane tetáne faeraka, isía hákasane faerakasafapo. Arirakano sere maiya faesa awa ane soko yaiya parakuraka isíasane, tetáne faeraka, isía hákasane katorakasapo. Ere maiya faesa awa ane soko yaiya parakuraka isíasane, tetáne faeraka risike, isía hákasane katorakasapo.

<sup>13</sup> Arirakano nōmo aseane mena ariawe ti yapura koraka reke sakepamo meraka, "Uao, itiflasisfareapo. Hepene aporo isíamo pikoro rukurakano, aporo hinamo hauaka risiane mokoatikihokosapo. Mokoatikirakano i himu nekea mayakaepi aihokasapo." Airakano nōmo kaisiapo.

## 9

*Hepene aporo hakása meta kakorea amo pikoro rusuane oyapo.*

<sup>1</sup> Hepene aporo hakása meta kakorea amo pikoro ruane ti makata hakása meta hepene yapunaka hauaka atura hurupekeea, ti makataki ki karakasapo. Hauaka watikisa kutu mato kunututu kakanafonosa kutuane, ikia koro ropakamakasimo kiane ti makataki karakasapo.

<sup>2</sup> Karakano ikia koroane ropakamaka, kutu mato kunututu kakanafonosa aeyaka ira musu kára perakasapo. Kára peraka ira musumo yao sua karotapiraka sere maiyane matairaka, faerakasafapo. Ererakasapo.

<sup>3</sup> Ira musu arakaru aeyaka fonai yakai mukisa hauaka sua perakasapo. Hanutanomo amano rukuanena ayíáka, fonaimo ayíáka rukunasimo pusierakasapo.

<sup>4</sup> Fonai mukisa aki someraka, "Asane soko, ira ku soko, hemo makata soko, makata suane nakopo. Aporomano hákasa rukunanie. Koti yano motosa hikumisia popahaonafonosa aporo hinamoane rukunanie.

<sup>5</sup> Asiáne aporo hinamoane kakaro kukusimo rukunakopo. Kauane hákasa tehoasimo ere maiya kakorea sumo rukunanie." Airakano fonai mukisamo aporomano rukunenaka, hanutanomo rukuanena, ayíáka rukunenakano kau kára terakasapo.

<sup>6</sup> Ere maiya kakorea suamo fonai mukisamo aporo hinamo rukunenakano, aporo hinamo amo someraka, "Isu kau teraka risike namo kakaro hisiripo. Isu wate foaka kukuripo." Aisa nine kurakasafapo.

<sup>7</sup> Arirakano fonai otoane saro hose yunu weako pura oto asisapo. I wamoaa korótomo rakisia hatiane karotapisisapo. I hikumisiane aporo hikumisi asisapo.

<sup>8</sup> I uni iti horopokarane hinamo uni iti asisapo. I mereane saro raeone mere asisapo.

<sup>9</sup> I kāwa nenepeone funu asisapo. Arirakano weako puraka saro hosemo wakone kita kiraka, weako fofoka puraka kikiriraka sikina ayíáka, fonai mukisamo auamo haphehaperaka airakasapo.

<sup>10</sup> Fonai keno hanutano keno asisapo. Ere maiya kakorea sumo aporomano rukunenane i kenomo rukunenakasapo.

<sup>11</sup> Arirakano fonaimo mukisamo unihaeane kutu mato kunututu kakanafonosa asekeea rea hepene aporo watikisa ayapo.\* Hepene aporo watikisane yano motosa Hipuru meaka Apátonepo. E yano motosa Kiriki meaka Apórionepe. E yano motosa namo meaka Makata Su Mokoatikina Aporopo. Aiyáka yano motorakasapo.

<sup>12</sup> Asiamo makata watikisa faserepeakosaposane menoane ayapo. Arirakano makata watikisa tetáne soko ísiáne soko keseke faserepeakosapo, airakasapo.

*Hepene aporo hakásá meta nama amo pikoro rusuane oyapo.*

<sup>13</sup> Hepene aporo hakásá meta nama amo pikoro rurakano, nōmo kaiyíane Koti kaya hikumisi neneme takua korótomo rakisia teporo eke taesa ásia, sapea ke tetá, arirakano sapea ke tetá, á mere isi kitafasu reakipoko anaka merakano, nōmo kaisiapo.

<sup>14</sup> Hepene aporo namamo pikoro maka reaki memo someraka, "He kára he yano motosa he Yuferétisia hepene aporo kitafasu senemo taposane fisihohanie."

<sup>15</sup> Airakano hepene aporo kitafasu senemo taposane fisirakasapo. Aporo parakuraka isia parakusane meno tetáne metakarikia, isía hákasané rusua kukusimo, hepene aporo kitafasuane fisiraka pusie, airakasapo. Arirakano wate fana hepene aporo kitafasuamo ayíáka rakismo muríkimasapo. Murikimaka keremisiane soko, oko soko, maiya teane soko, maiya awane soko pauhoasimo hepene aporo kitafasuane kau risikisapo. Aporomano rusua kukusimo kau risikisapo.

<sup>16</sup> Arirakano nōmo kaiyíane, "Ame aporo weako puraka saro hosea ripasane menoraka, tu harote mirionepo."† Airakano nōmo kaisiapo.

<sup>17</sup> Airakano nōmo kituamo aseane, aporo saro hosea riparakano asesapo. Aporo káwa karerapaka funumo káwa mafaisane susa soko hekenosa soko keamesa soko asisapo. Saro hose wamoane saro raeone wamo asisapo. Saro hose akai aeyaka ira rufi soko, ira musu soko ira musu keamesa watiki yamosa soko perakasapo.

<sup>18</sup> Aporo hinamo risiane parakuraka isia parakusane meno tetáne metakarikia, isía hákasané ira rufi soko, ira musu soko, ira musu keamesa watiki yamosa soko, saro hose akai aeyaka pesamo isia hákasané rusua kurakasapo.

<sup>19</sup> Saro hose akaimo soko kenomo soko amano rukunenakasapo. I kenoane kuyare asisapo. Keno turuane kuyare namo asisapo. Kuyare wamoamo amano rukunenakasapo.

<sup>20</sup> Saro hosemo amano mokoatikiraka rusua kurakasapo. Rusua kurakano asekeea, aporo hinamo metakira rusua kukunafonosamo namina watikiaka rakisiane rukupateraka metakarirakasafapo. Ipu yatafu yaoka hoaki hemakapuraka, makata watikisane rukupateraka metakarirakasafapo. Metakarianafonoraka ipu kotafe koti kekepo hokonomo rakirakasapo. Metakira korótomo rakikia, metakira siufamo rakikia, metakira aine parosa mopesamo rakikia, metakira ekemo rakikia, metakira iramo rakikia, ayíáka ipu rakirakasapo. Hokonomo rakisisamo kotafe kotiamo himo aserafapo. Senakimo kairafapo. Korakemo purafapo. Kotafe kotiaki ipu kekererakasapo.

<sup>21</sup> Ipu aporo kukusimo rurane soko, ira hamí rurane soko, ho kamunane soko, hinamo hakimarane soko, makata kemo hakimarane soko, suane rukupateraka metakarirakasafapo. Ipu makata kotesane rakiakosakipoko risikiako parirakasafapo.

## 10

*Sawi meta popasa mawerosa wakasemané hepene aporomo Yoneaki kasane oyapo.*

<sup>1</sup> Hepene aporo wakapu meta hepene aeyaka perakasapo. Peraka ako e kaua karotapikia e wamoaa sawi inima hahaeraka rekesapo. E hikumisiane sere maiya faesa asisapo. Ira paisia inaraka rufiana ayíáka ipi korakeane asisapo.

\* <sup>9:11:</sup> Wate fana hepene aporo watikisamo Kotimo soneane koarentasamo, Kotimo iane fanasiraka kutu matoa pusiesapo. † <sup>9:16:</sup> Tu harote mirione ane hokono uane menoane mahimetesapo. Napa ane namo kakaro káraro.

<sup>2</sup> Sawi meta popasa mawerosa wakasemané fisiraka, ipi hokonomo maka rekesapo. Ipi korake tumuruane he tawara kima finiraka reke, korake kasakaiane hauaka á finiraka reke, ayiáka rekesapo.

<sup>3</sup> Epo sakepamo wáraka saro raeonemo sakepamo merakano akaira ayiáka kaisiapo. Ti yapura yape yatipinusu kikirirakasapo.

<sup>4</sup> Kikiriraka kikirimo somesane nōmo popahoko ayiane, hepene aeyaka memo someraka, "Kikirimo somesane popahoko. Mahameanie," airakasapo.

<sup>5</sup> Airakano nōmo aseane, hepene aporo korake tumuruane he tawara kima finiraka reke, korake kasakaiane hauaka á finiraka reke, hokono tumuruane máfarakasapo.

<sup>6</sup> Máfaraka epo someraka, "Kotio, né maiya suamo yaiya rekeakosapo. Hepene yapurane soko, hepene yapura makata risiane soko, hauakane soko, hauaka wo makata risiane soko, he tawarane soko, he tawara makata risiane soko, su nōmo kepomarekeea rakisiapo. Nōmo someane nōmo some karakanapo. Fahokosa maiyane makerakanapo. Makesasamo yumo Kotimo kau rekeakosafapo.

<sup>7</sup> Koti Karao, hepene aporo hakásama meta, yatipinu hakásama pikoro kepomarekeea ruane makata faserepeakosane foaka faserepeakosapo. Asiamo wate fana Kotimo aporo raipa porofete aporoaki mafekemaraka ayiakakosapo aisane, kakaro ayiakakosapo," airakasapo.

<sup>8</sup> Fana hepene aeyaka somerakano me kaisia me hakásama yiamo anoaki efera hunia someraka, "Hepene aporo korake tumuru he tawara kima finiraka reke, korake kasakai hauaka finiraka rea, epo hokonomo sawi meta popasa mawerosa fisiraka maka reane makao pusie."

<sup>9</sup> Airakano ano pukua hepene aporoaki someraka, "Sawi wakasemané anoaki makasie." Airakano epo someraka, "Ao, masie. Maka nesie. Akaimo neane sao nenaka sikhokosapo. Neketuane mome pukuhokosapo."

<sup>10</sup> Airakano nōmo maka, akaimo neane sao nenaka sikisapo. Nōmo neketuane mome pukuhooapo.

<sup>11</sup> Arirakano anoaki someraka, "Aporo kau kekepo risiaki soko, aporo hauaka kekepo risiaki soko, aporo me kekepo risiaki soko, aporo unihae kekepo risiaki soko, Kotimo aiyakakakosaposane efera hunia some kakanie," airakasapo.

## 11

*Kotimo some kará aporo tetámo somesane oyapo.*

<sup>1</sup> Anoaki ira rura tatia ásia, Kotimo karáka someraka, "Né takahikia, hauaka atura pukua nōmo apeane soko, eke kima taesane soko, ruramo murikimakanie. Nōmo apea aporomo anoaki kekereraka risiane menohoańie.

<sup>2</sup> Asiāne nōmo ape hauaka moroane nōmo ruramo murikimakopo. Arirakano nōmo ape hauaka moroa Yu aporo hoanafonosa anoaki kekerehokosakipoko perapo. Arirakano ere maiya foti tu amo (42) hauaka wo nōmo ape Yarusarame apeane Yu aporohoanafonosamo mokoatikiraka rakaritaehokosapo.

<sup>3</sup> Arirakano nōmo some kará aporo tetá pusierakano peraka, aporo tetá amo himu kára nekea pasu pitikini osoraka, sere wane taosene tu harote sekesete amo (1,260)\* nōmo someane some kakakosapo," airakasapo.

<sup>4</sup> Arirakano hauaka wo unihae hikumisi neneme takua ira orofe tetá risiane soko, nafa tetá risiane soko, some kará aporoane ásiapo.

<sup>5</sup> Arirakano aporo metamo tetáne mokoatikihokosapoko asiāne, tetá akai aeyaka ira rufimo aporoane inaka kurapo. Mokoatikina aporo ayiáka kukusapo.

<sup>6</sup> Arirakano tetapō Kotimo someane some akara maiyamo yao perapaka tetapō hemakapukua, ti yapura yaoane matasohokosapo. Arirakano he fuaka taenane yapi parihoasimo, tetapō hemakapukua rakiakosapo. Aporomano hauaka wo risiane makata tarane kakasimo, tetapō hemakapukua ayiáka rakiakosapo. Efera hunia soko efera hunia soko tetapō aiyáka wakapuaka rakiakosapo.

<sup>7</sup> Tetapō some kaka faraka, hauaka kutu mato kunututu kakanafonosa aeyaka, aporo yasaró ásia peraka, aporo tetáyaki yunu weraka tetá rusua kukusapo.

<sup>8</sup> Tetá rusua kusuane siti kára<sup>†</sup> ikia kara á warisikiakosapo. Arirakano siti kárane takumeaka Sotome taone ane soko, Iyipi hauaka ane soko ásiapo, aihokosapo. Asiamo siti kára á tetapō unihaeane soko, ira matopesa paremarekeea rusua kusuape.

<sup>9</sup> Sere isia faraka, sere kitafane haforaka maiya amo, aporo tetá rusua kusua warisikino, aporo hinamo yakai pekea, himo aseraka risiliákosapo. Aporo kau kekepomo soko, aporo

\* **11:3:** Ere maiya 42 amo soko, sere maiya 1260 soko hakásama yiyapo. Maiya ane keremisi isia faraka, keremisi kitafane hafo pauraka ásiapo. † **11:8:** Siti kárane Yarusarame sitipo.

hauaka kekepo aeyaka pesamo soko, aporo me kekepomo soko, aporo ira kekepomo soko, ipu suamo himo aseraka risikiakosapo. Ayíáka risike ipu someraka, "Aporo tetâne hauaka mareakopo," aihokosapo.

<sup>10</sup> Aporo tetâne kusikino, hauaka sua aporo risiamo asekea sesehokosapo. Seseraka sirá ayakarie, aíyaka mainamareraka risike, ipu kesahokosapo. I su seseraka, aporo metamo aporo metaki makata yaku kaka, aporo metamo aporo metaki makata yaku kaka, ayiakakosapo. Kotimo some kará porofete aporo tetâmo makata umisane aporo hinamo watikisaki kasasamo, tetâ rusua kusuakipoko aporo hinamo suamo sesehokosapo.

<sup>11</sup> Airakano sere isia faraka sere kitafa hafoamo tetâ rusua kusuane himuha ane Kotimo fôraka makerakasapo. Makerakano tetâ turikia tarirakasapo. Turikia tarirakano aporo hinamo suamo asekea namorakasapo.

<sup>12</sup> Namoraka risikino, hepene aeyaka wáraka, "Teto wo peae," Airakano kaikia, tetâne turikia tarikia risikino, ako pekea maka hinakasapo. Hinakano aporo hinamo suamo aserakasapo.

<sup>13</sup> Teta maka ahira maiya amo, momani kára peraka, Yarusarame siti parakuraka kaeyakosu parakusane, tokonasu risike, kaeyakoane rakaripurakasapo. Rakaripuraka aporomano sewene taosene (7,000) sitia risiane rusua kurakasapo. Aporo hinamo rusua kukunafonosamo fofaraka namoraka Koti hepene yapura reaki someraka, "Né káraro," airakasapo.

<sup>14</sup> Asiamo makata watikisa faserepeakosapo aisane, tetâne faserepesane ayapo. Arirakano makata watikisa isia ane faserepeako makerakanapo, airakasapo.

*Hepene aporo hakásá meta yatipinu amo pikoro rurakano kaisiane oyapo.*

<sup>15</sup> Hepene aporo yatipinumo pikoro rurakano, me yakaimo sakepamo someraka, "Isiapo Unihae Kotipe Mafasira aporo Yasu Kereso tetapō hauaka kára one unihaeaka risikiakosa maiyane faserepesapo. Tetâ maiya suamo unihaeaka risikiakosapo."

<sup>16</sup> Airakano aporo kára tuaneti foane (24) Koti hikumisi neneme takua arupeperaka wamomo hauaka atura kataka risike Kotiaki kekereraka someraka,

<sup>17</sup> "Unihae Kotio, nómó wakapuanie kakaro káraro. Né fana reane yumo soko rekenapo. Nómó wakapuanie tarikia, unihaeaka reke kepomarerakano, isiapo néaki suserakanapo.

<sup>18</sup> Neaki paóhoanafonosa aporo hinamomo néaki saperakano, nómó soko, iaki saperaka hukurukua fanasihokosa maiyane maiya yuyapo. Aporo hinamo kusuane soko, hukurukusa maiyane maiya yuyapo. Arirakano nómó aporo hinamo raipaki soko, nómó some kará porofete aporoaki soko, né patera asesa aporo hinamoaki soko, né yano motosa makáraraka somera aporo hinamoaki soko, nómó aporo hinamo yano motosa káraki soko, nómó aporo hinamo yano motosa wakasemaki soko, makata ropo kakakosa maiyane maiya yuyapo. Hauaka wo watikiaka rakira aporo hinamoane fanasihokosa maiyane soko maiya yuyapo," airakasapo.

<sup>19</sup> Airakano hepene yapura Kotimo ape ikia koro ropakamarakano aseane, Kotimo maua kakeno nómó asesapo. Arirakano Kotimo maua kakarua Kotimo fana someaka masa popasane makesapo. Kotimo ape ikia koro ropaka amara maiya amo yamakere kikiri soko, momani soko yao eke asíane soko, hakásá perakasapo.

## 12

*Hinamope tarékone tetâ Yonemo asesane oyapo.*

<sup>1</sup> Hepene yapura makata tarisiañe oyapo. Tariraka hinamomo pasu osona ayíáka sere maiyane osoraka kakesapo. E korakemo óko kima finiraka kakesapo. E wamoan uni hati ti makata kenoso risiane karotapikia kakesapo.

<sup>2</sup> Hinamoane hokosa umisa kayane hokosa takapeakosakipoko, püraka sakepamo wáraka kakesapo.

<sup>3</sup> Arirakano hepene yapura makata tarisia metane oyapo. Tariraka tarékone siapora asía\* kau susa wamo yatipinusu rekesapo. Wamo yatipinusua unihaemo hati yatipinusu karoterapiraka reke, mere isi kaeyakosu risia rekesapo.

<sup>4</sup> Tarekonemo kenomo ti makata hepene yapura risiane isia parakusane tetâne risike, isia hákasane rukua, kakapere mokoa hauaka atura mokoasurakasapo. Hinamoane hokosa takaperakano, tarékone hokosane nakosakipoko hinamoane híkumisi neneme takua kau rekesapo.

<sup>5</sup> Kau rekeno, hinamoane aporo hokosa takaperakasapo. Keseke aporo hokosa amo aporo hinamo hauaka sua risiane, paroaka unihaeaka asekea rekeakosapo. Asiamo hokosane takaperakano, wate foaka Koti sea kaya á hokosane maka hinakasapo.

\* **12:3:** Isiapo hauaka wo tarékone rekenafapo. Pisini meaka kuyare popasa ane, kuyarefapo. Siapora asia tarékone ane popasapo.

<sup>6</sup> Maka hinakano, hinamoane ima yaoa e kakakosane Kotimo maroporakano, á takaripukua sere wane taosene tu harote sekeseti amo (1,260) Kotimo e asekea rekesapo.

<sup>7</sup> Arirakano maiya amo hepene yapura yunu kára werakasapo. Hepene aporo yano motosa Maeko ipi hepene aporo kotesayaki sarimaraka peke, tarékoneyaki werakasapo. Werakano tarékone ane ipi hepene aporo watikisayaki sarimaraka Maekoyaki werakasapo.

<sup>8</sup> Weraka Maekoane wareraka tarékone ane rukukoakataerakasapo. Rukukoakataeraka tarékone ane ipi hepene aporo watikisayaki waseremokoa hepene yapunaka mokoasurakasapo.

<sup>9</sup> Asiamo tarékone ane kuyare fana mokopipiraka hokokakako pesa hakásá ayapo. Aporo hinamo hauaka sua risiamo watikiaka rakísimo kirimanané e hákasapo. E yano motosane Satanepo. Kotafe someraka mokopipiraka reane e hákasapo. Asiamo Satane soko ipi hepene aporo watikisane soko hepene yapunaka waseremokoa hauaka wo mokoasurakasapo.

<sup>10</sup> Arirakano nōmo kaiyíane hepene yapura memo sakepamo someraka, "Sere soko, ereamo soko, maiya suamo isiapo Keresoa paosa aporo maeane Satanemo Kotiaki kotafe topakamaraka hukururaka reapo. Kotafe hukurura aporoane hauaka atura makasusapo. Makasusasamo yumo isiapo Kotiaki kekererakanapo. Kotiane soko, ipi hokosa Yasu Keresoane soko, tetapó aporo hinamoane mafasikia wakapuaka unihaeaka asekea risikinapo.

<sup>11</sup> Saro Sipi Manomo isiapo Keresoa paosa mae papápoko farimaka kukua ipi yapi pusuasamo, ipu himu hakásaraka hemakapukua, Saro Sipi Manoane some karaka, Satane makama keskesapo. Asiamo i hitafe hauaka wo risikiakosane hemakapurafaraka, Yasuaki himu hakásaraka hemakapukua someraka, 'Isu kuane soko siahoasireapo. Isu aporo watikisamo rurakano soko siahoasireapo,' aiyaka hemakapukua somerakasapo.

<sup>12</sup> Satane hauaka atura makasusasamo, re hepene yapura risia repo suamo Kotiaki suseaka sesehoanie. Asiáne hauaka atura aporo hinamo risia re soko, he tawara makata risia re soko namohoanie. Re risia makata umisa fasereperakanapo. Sataneane re arisia a makasusasamo, ipi reaki kára saperaka rekenapo. Fahokosa maiyane makesasamo, ipi reaki saperaka kára mokoatikihokosapo." Aiyaka memo somerakasapo.

<sup>13</sup> Arirakano hepene aeyaka tarékone makasurakano hauaka wo pauraka reke, aporo hokosa takapesamo kaiyíane pürakano mokoatikihokosakipoko kekemarakasapo.

<sup>14</sup> Kekemarakano hinamoane takaripukua, ima yaoa pusimo mena ariawe ásia aua ane hinamoaki karakasapo. Karakano hinamoane mena anaká aua amo haphehaperaka takariapura ayiáka, takaripurakasapo. Takaripukua ima yaoa pauraka kakesapo. Kakeno keremisi isia faraka keremisi kitafa haforaka amo metamo e asekea rekesapo.

<sup>15</sup> Arirakano tarékonomo hinamoane kekemarakano, hinamoane he nesa kukusimo, tarékonomo akai aeyaka he kára perakasapo.

<sup>16</sup> He kára peraka, hinamoane maka pukusakipoko kekemarakano, hauakamo hinamoane arareraka, kutu koparua mapirisiane ropakamayane he su kutu matoa purakasapo.

<sup>17</sup> Asiamo tarékonomo hinamoaki kára saperaka, hinamoamo hokosa metakiraki weako purakasapo. Arirakano Kotimo someane kakimaka Yasuaki himu hakásaraka hemakapura aporo hinamoane hinamoamo hokosane ayapo.

<sup>18</sup> Arirakano he tawara fea tarékone pauraka rekesapo.

## 13

### *Yasaro ásia tetá pesane oyapo.*

<sup>1</sup> Nōmo aseane he tawara aeyaka yasaro ásia perakasapo. Yasaro ásia wamo yatipinusu risikisapo. Risiakipoko mere isi kaeyakosu risikisapo. Mere isi kaeyakosua hakásá hakásaraka unihae hati kaeyakosu karoterapisapo. Wamo yatipinusua yano motosa watikisa popasesapo. Yano popasane Kotiane mawakasemaraka popasesapo.

<sup>2</sup> Yasaroane saro répate aseraka sikisapo. E korakeane saro pea korake asisapo. E akaiane saro raeone akai asisapo. Yasaroamo unihaeaka asekea rekeasimo siapora ásiamo someraka, "Nōmo unihae sea á né kayae," aiyaka epo unihae wakapuane eaki karakasapo.

<sup>3</sup> Yasaroamo wamo namasuane risike, wamo yatipinuane kára rusisapo. Kára rusua kukufunusa nine umurusesapo. Umuruane aporo hinamo hauaka sua risiamo asekea someraka, "Eane kukufunusa nine, kukunafonosasamo itifiasifareapo." Aiyaka yasaroane patera asekea somerakasapo.

<sup>4</sup> Yasaromo unihaeaka asekea rekeasimo tarékonemo maresasamo aporo hinamoamo tarékoneaki kekererakasapo. Kekereraka yasaro ásiá soko kekereraka someraka, "Yasaro ásiáne ipi fanapo. E area ayiáka meta rekenafapo. Eyaki weraka epamo wareraka rukukoakataehokosare? Metamo wareraka rukukoakataehoane siahoasifareapo," airakasapo.

<sup>5</sup> Ere maiya foti tu amo (42) yasaro ásiá amo epo ipi yano motosane makáraraka reke, Kotiane hokomaka mawakasemarako somerakano, Kotimo matasorakasafapo.

<sup>6</sup> Arirakano yasaro ásiá amo Koti yano motosane soko, hepene yapura Koti rea hauakane soko, hepene yapura makata su risiane soko, mawakasemarako ekeneraka, ho mareraka somerakasapo.

<sup>7</sup> Yasaro ásiá amo Keresoa paosa aporo hinamo akiyaki weraka, iane rukukoakataera-akasapo. Ane Kotimo matasorakasafapo. Aporo ira kekepoane soko, aporo kau kekeposane soko, aporo me kekeposane soko, aporo hauaka kekepoa risiane soko, yasaro ásiá amo unihaeaka wakapuaka asekea rekeno Kotimo matasorakasafapo.

<sup>8</sup> Matasohoanafonorakano aporo hinamo hauaka sua risiamo yasaro ásiá kekererakasapo. Ásiáne yasaro ásiá kekerehoanafonosa aporo hinamoane oyapo. Aporo hinamo metakiramo hemakapukua Saro Sipi Manomo ipoko farimaka kusuapo, ayiáka hemakapusua aporo hinamoamo yano motosane Kotimo sawia popasesapo. Arirakano hauaka one kepomreasiraka maiya amo, yaiya risikiakosa aporo hinamoamo yano taesane Kotimo sawia popasesapo.

<sup>9</sup> Re senaki risiamo koteaka kaiyinie.

<sup>10</sup> Aporo meta tipura makeakosapo aisane aporoane tipura makerakasapo. Aporo metane ferepemo rukusapo aisane aporoane ferepemo rurakasapo. Ayiakkakosapo ásiá amo kakinara aporo hinamo repo Kotiaki himu hakásaraka hemakapusuane metakarirapaka, yaiya paroaka risikianie.

<sup>11</sup> Arirakano yasaro ásiá meta hauaka aeyaka perakasapo. Pesane Saro Sipi Mano mere isi tetá arisia ayiáka, yasaro ásiá keseke pesane mere isi tetá ayiáka risikisapo. Meane kotafe maraka, siapora ásiámo meraka sikirakasapo.

<sup>12</sup> Yasaro ásiá keseke pesane, yasaro ásiá fana pesa akiyaki hakásä reke, fana pesamo wakapuaka someaka maresa ayiáka, keseke pesamo ayiáka wakapuaka someaka marerakasapo. Someaka marerakano yasaro ásiá fana pesane wamo rusua umurusa, eaki aporo hinamo hauaka sua risiamo kekerehoasimo, yasaro ásiá keseke pesamo someraka, "Yasaro ásiá fana pesaki kekerehoanie," airakasapo.

<sup>13</sup> Áiyaka yasaro ásiá keseke pesamo ipi wakapumo hemakapukua rakirane rakisiapo. Aporo hinamomo asekeasimo ira rufi hepene aeyaka hauaka wo peasimo rakirakasapo.

<sup>14</sup> Yasaro ásiá keseke pesamo yasaro ásiá fana pesa akiyaki reke, Kotimo matasohoanafonorakano, ipi wakapumo hemakapukua rakirane rakirakasapo. Yasaro ásiá keseke pesamo kotafe rakirakan, aporo hinamo hauaka sua risiamo kotafe rakisiarie kekemarakasapo. Kekemasa aporo hinamoaki yasaro ásiá keseke pesamo someraka, "Yasaro ásiá fana pesane ferepemo rusua fareasane amo yano motosane makárahokosakipoko, e kauane muríkimaka hakásä yineraka hokonomo kotafe koti pariraka yasaro ásiáne rakinie." Áiyaka somerakano ipu muríkimaka hokonomo yasaro ásiáne kotafe koti pariraka rakirakasapo.

<sup>15</sup> Yasaro ásiá hokonomo kotafe koti pariraka rakisiaki yasaro ásiá keseke pesamo himuha karakan, Kotimo matasosafapo. Matasohoanafonorakano, hokonomo kotafe koti pariraka rakisia yasaro ásiá amo akaimo somesapo. Akaimo someraka, "Anoaki kekerehoanafonona aporoane rusua kukunie," airakasapo.

<sup>16</sup> Yasaro ásiá keseke pesamo someraka, "Aporo hinamo yano motosa kára soko, aporo hinamo yano motosa wakasema soko, aporo hinamo raipa soko, aporo hinamo raipa-hoanafonosa soko, i su hikumisia soko metao, hokono tumurua soko metao, yasaro ásiá fana pesamo yano motosane popahoanie.

<sup>17</sup> Arirakano epo yano motosa popahoanafonosa, epo napa ane popahoanie. Epo yano motosa soko metao, napa soko metao popahoanafonosa aporo hinamoamo makata ropohoane siahoasifareapo," áiyaka yasaro ásiá keseke pesamo yapo motorakasapo.

<sup>18</sup> Arirakano aporo hinamomo koteaka hemakapurakano, kepoane hemakapukusapo. Yasaro ásiá fana pesamo napa sekese harote sekeseti sekesepo (666). Napa ane takumeaka aporo yano motosa popasesapo. Napa ane aseraka aporoamo yano motosane hemakapukusapo.\*

\* **13:18:** Wate fana Rome unihae Sisa yano motosa Nero reapo. E yano motosane menoraka napa 666 ayapo. Aporoamo Keresoa paosa aporoane kara mokoatikisapo. E watikiaka area ayiaka, aporo keseke peakosa amo watikiaka rakiakosapo.

**14**

*Aporo hinamo yakaimo kesasane oyapo.*

<sup>1</sup> Nōmo aseane, Saro Sipi Mano ūri Saeone terayia rekesapo. Saro Sipi Manoyaki aporo hinamo wane harote foti fo taosene (144,000) sarimaraka risike, i hikumisia Saro Sipi Mano yano motosane soko ipi Ata yano motosane soko popasesapo.

<sup>2</sup> Nōmo kaiyiane hepene aeyaka meraka he kára peraka sikiraka, kikiriraka sikiraka aporo yakaimo kita ruraka sikirakan kaiyiapo.

<sup>3-4</sup> Koti unihaeaka sea kaya soko, makata kakayia kitafasu risia soko, aporo kára risia soko, i hikumisi nememe takua aporo hinamo wane harote foti fo taosene amo (144,000) kesarakasapo. Ipu kesasane hauaka su aeyaka Kotimo pasimosa aporo hinamo amo kesa kawe kesarakasapo. Kesanane ipu hákasamo enomasesapo. Aporo hinamo metakiramo enomakasisesafapo. Asiamo aporo kesasane hinamoyaki mokome purasesafapo. Hinamo hakimarasesafapo. Saro Sipi Mano purakano i soko hakása eyaki sarimaraka purasesapo. Kotimo aporo ira fanāne ipo. Ipu Kotiane soko, Saro Sipi Manoane soko, makáraraka kekerehoasimo Kotimo iane fana pasimosesapo.

<sup>5</sup> Pasimosa aporo hinamoamo makata kotafe somerafapo. Hasaka hemakapuraafapo. I namo kakaro kotesa susupo.

*Hepene aporo isia pesane oyapo.*

<sup>6</sup> Hepene yapura hepene aporo hakása meta koraka rekesapo. Koraka reke aporo hauaka kekepo risiai soko, aporo ira kekepoaki soko, aporo me kekeposaki soko, aporo kau kekeposaki soko, Yaiya Rera Kotimo someane some kakakosakipoko koraka rekesapo.

<sup>7</sup> Koraka reke epo sakepamo someraka, "Koti ipi kárasasamo eaki kekereraka makárahoanie. Kotimo aporo hinamo su takekepa parakuraka hukurukusa maiyane fasereapere. Hepene yapurane soko, hauaka one soko, he tawarane soko, he fuaka taenane soko, su Kotimo kepomaresapo. Asiamo eaki kekerehoanie," airakasapo.

<sup>8</sup> Asiakipoko hepene aporo hakása meta, tetá ane kekemaraka pekea someraka, "Pápirone taone kárane rakaripureapo. Pápirone taone fareapo. Aporo hinamomo himu mapari-taehoasimo epo iaki waene he nasimo kaka kirimaraka kayereapo. Aporo hinamo Pápirone taonea risiamo namo kakaro watikiaka rakireapo. Ipu kaumo hemakapusuane kara raraporaka risike, arirakano ipu kotafe Koti parisane makararaka risiapo. Ayíáka risike aporo hinamo hauaka sua risiamo watikiaka rakisimo kirimasapo. Kirimasasamo Pápirone taone kárane rakaripusuapo," airakasapo.

<sup>9-10</sup> Asiakipoko hepene aporo hakása meta, isia ane kekemaraka pekea sakepamo someraka, "Yasaro ásia fana pesane soko, yasaro ásia murikimaka kotafe koti pariraka hokonomo rakisiane soko, aporo hinamomo kekereraka risike, yasaro yano motosa i hikumisia soko metao, hokona soko metao, popasa aporo hinamoaki Kotimo sapehokosapo. Namo kakaro kára saperaka rekeakosapo. Apromo aporo metaki waene he nasimo kapoa komarukua akara ayíáka, Kotimo sapenane káraraka komarukua ayíáka aporo hinamoaki kakakosapo. Waene he namo heyaki sarimahoanafonoraka waene he susu akara ayíáka Kotimo sapenane ayíáka kakakosapo. Asiamo Kotimo sapenane mauahokosafapo. Saro Sipi Mano soko, hepene aporo kotesa soko i risia, hikumisi nememe aporo hinamoane Kotimo fanasihokosapo. Fanasina hauaka á eke yano motosa saofa ane rufiraka, musuane yamohoane, mena hae kapuosa yamohora ayíáka yamohoapo. Eke saofa rufimo soko, ira rufimo soko iane inakakosapo.

<sup>11</sup> Inaraka ira musuane yaiya hinaka rekeakosapo. Ira rufiane fahokosafapo. Yasaro ásia fana pesane soko, yasaro ásia murikimaka kotafe koti pariraka hokonomo rakisiane soko aporo hinamomo makáraraka risike, yasaro ásia yano motosa popasa aporo hinamoane Kotimo fanasirakano ira rufimo inakakosapo. Inaraka risike maiya metamo yapa mareakosafapo. Maiya suamo sere soko ereamo soko inaraka risikiakosapo," airakasapo.

<sup>12</sup> Asiamo Kotimo someane kakimaka risia aporo hinamo re soko anapaka Kotimo someane kakimaka, Yasuaki himu hakásaraka hemakapukua paroaka risikianie. Paripukupo Yasuaki himu hakásaraka hemakapusuane rosaka taehokosakipoko hemakapunie.

<sup>13</sup> Arirakano hepene aeyaka memo someraka, "Úyaka popahoanie. Maiya yumo soko, keseke soko Unihae Yasu Keresoaki himu hakásaraka hemakapusua aporo hinamo kusuane Kotimo makoterakano sesehokosapo." Airakano Ho Kotesamo soko someraka, "Kakarorakae. I wafororaka rakiraka risiane metakarikia fenenakanapo. I nena hinakanafapo. Ipu makata koteaka rakisiane iyaki hakása hinakanapo," airakasapo.

*"Hauaka wo makata mano porosa namo nakosa susekeno ferepemo pateke mokoanie," aisane oyapo.*

<sup>14</sup> Nōmo aseane, ako pakaesa kima yapura Aporomanomo Táke kakesapo. Kake korótomo rakisia hati ane karotapikia, hokonomo ferepe maka kakesapo.

<sup>15</sup> Kakeno, hepene aporo meta Kotimo ape aeyaka pekea, aporo ako kima yapura kayaki someraka, "Hauaka atura makata mano tanehesane surakanapo. Susane ferepemo popateraka mokoanie. Susasamo makata nako mokoakosa maiyane faserepesapo," airakasapo.

<sup>16</sup> Airakano aporo ako kima yapura kayamo ferepemo hauaka atura makata nakosa susane popateraka morakasapo.

<sup>17</sup> Airakano hepene yapura Kotimo ape aeyaka hepene aporo meta peraka, epo soko ferepe waresa maka perakasapo.

<sup>18</sup> Maka perakano, hepene aporo meta ira rufi asekea reane, Kotiaki kakako pauta wape yamona paikia teporo eke taesa ásiáne metakarikia perakasapo. Peraka hepene aporo ferepe waresa maka reaki sakepamo someraka, "Hauaka atura sako karepe wate surakano, ferepemo popateraka karepe wateane mokoanie," airakasapo.

<sup>19-20</sup> Airakano hepene aporomo ferepe maka rea amo, hauaka atura sako karepe wateane popateraka, karepe wateane morakasapo. Mosane ape yao takua reakipoko maua ásiá á motosakipoko, á mokoasurakasapo. Mokoasusane finiraka tairakasapo. Tairaka he pekearea ayíáka perakasapo. Peraka, maua motosa a komarukua yaoa sakopeperaka hauaka sua komarurakasapo. Komaruraka saro hose akai humaresa huturua paurakasapo. He namo pesane hauaka yamenoa komarukua purakasapo. Asiamo maua sako karepe wate taisamo kepoane Kotimo saperaka fanasihokosane murikimarakasapo. Sako waté he pusuane amano yapi pukusane murikimaka purakasapo.

## 15

*Hepene aporo yatipinusu pesane oyapo.*

<sup>1</sup> Hepene yapura makata meta haku asekeanafonona tarisiane oyapo. Hepene aporo yatipinusumo makata meta amano mokoatikina makatane, yaiya yatipinusu mokoa risikisapo. Mokoatikiraka faraka, efera hunia amano mokoatikihokosafapo. Mokoatikiraka faraka Kotimo sapenane soko fahokosapo.

<sup>2</sup> Asiamo he tawara hiho ásiá akiyaki ira rufiyaki sarimasa asisapo. Yasaro ásiá fana pésaki soko, yasaro murikimaka kotafe kota pariraka hokonomo rakisiaki soko, yasaro yano motosa napa popasaki soko, yunu wekeea wareraka rukumosakatapisia aporo hinamoane he tawara hiho ásiáne he fea risikisapo. Risike kita asia Kotimo kasane hokonomo mokoa risikisapo.

<sup>3</sup> Mokoa risike Kotimo aporo raipa Mosesemo kesasane soko, Saro Sipi Manomo kesasane soko ipu murikimaka kesaraka,

"Unihae Koti, nōmo wakapuané namo kakaro káraro. Nōmo makata rakirane namo kakaro káraro. Uao, ya watikihoareapo. Aporo hinamo hauaka sua risiane nōmo unihaeaka asekea rekenapo. Nōmo ainane ereketae kotesa susupo. Nōmo kakaro somerapo.

<sup>4</sup> Né hákasa namo kakaro kotesa susu rekenapo. Asiasamo aporo epamo né yano motosane makárarako kekerehoko hisihokosare? Wae, aporo metamo néaki kekerehoko hisihokosafapo. Aporo hinamo hauaka sua risiamó néaki kekerehokosapo. Nōmo makata rakirane ereketae kotesa susuane aporoaki tarisiapo," aiyaka kesarakasapo.

<sup>5</sup> Kesaraka faraka hepene yapura Kotimo ape kakarua Namo Kakaro Kotesa Susu ape ikia koroane ropakamarakano, ape kakarua nōmo asesapo.

<sup>6</sup> Kotimo ape kakarua aeyaka hepene aporo yatipinusuamo makata meta amano mokoatikina makatane mokoa perakasapo. Hepene aporoamo pasu pakae faesa kotesa osoraka, korótomo rakisia saro kau terakae ásiá hikia perakasapo.

<sup>7</sup> Perakano makata kakayia kitafasuamo hakásamo hepene aporo yatipinusuaki korótomo rakisia tisi hakásamo hakásaraka karakasapo. Yaiya Rera Kotimo kára saperaka fanasihokosane tisia kekea komarupe pusuane, hepene aporo yatipinusuaki hakásamo hakásaraka karakasapo.

<sup>8</sup> Hepene yapura Kotimo ape kakarua Kotimo faesane soko wakapuané soko ira musu ásiá ape kakarua komarukua rekesapo. Komarukua rekeno, aporo meta soko Kotimo ape kakarua yoroane siahoasisafapo. Ape kakarua yorokoa pukusakipoko fana hepene aporomo amano mokoatikinane kaka fahoasimo aporo meta soko asekea rekesapo.

## 16

*Hepene aporomo amano mokoatikina makatane tisia kekea komarusua masakurisiane oyapo.*

<sup>1</sup> Nōmo kaiyīane, hepene yapura Kotimo ape aeyaka hepene aporo yatipinusuaki memo someraka, "Kotimo kára saperaka fanashokosa tisia komarusuane hauaka atura masakurisie," airakano nōmo kaisiapo.

<sup>2</sup> Asiamo hepene aporo hakásamo tisia makata kekeea komarusuane hauaka atura masakurirakasapo. Masakuriiane yasaro ásia yano motosa amano kaua popasa aporo hinamoamo yasaro ásia murikimaka hokonomo kotafe koti pariraka rakisiaki kekerahoane, i kaua neketasi susurakasapo. Neketasiraka ikiki yamohoapo.

<sup>3</sup> Arirakano hepene aporo hakásamo meta tetá amo tisia makata kekeea komarusuane he tawara á masakurirakasapo. Masakuriiane he tawarane aporo kusua yapi ásia parirakasapo. Yapi pariraka makata su hea risiane kukua kerakasapo.

<sup>4</sup> Arirakano hepene aporo hakásamo meta isia amo tisia makata kekeea komarusuane he pekerea á soko, he fuaka taena á soko masakuriiane heane yapi parirakasapo.

<sup>5</sup> Yapi parirakano nōmo kaiyīane, he asekeea rea hepene aporoamo someraka, "Kotio, né fana reane, yumo soko yaiya rekenapo. Né kotesa ereketaesa susu rekenapo. Aporo watikisané nōmo aseraka, iane takekeea fanasina ropoane siareapo.

<sup>6</sup> Asiamo né patera asesa aporo hinamoane soko, porofete aporoane soko ipu rusua kusuapo. Rusua kuraka, yapi pusuapo. Asiamo yumo aporo watikisamo he yapi parisane nasimo karakanapo. Karaka, "Sirá," airakasapo.

<sup>7</sup> Arirakano Kotiaki kakako pauta wape yamona teporo eke taesa aeyaka memo wáraka, "Ao, kakarorakae. Unihae Kotio, né kárapo. Nōmo kakaro susu anapo. Nōmo ereketae takekeea fanasinapo," airakasapo.

<sup>8</sup> Arirakano hepene aporo hakásamo meta kitafa amo tisia makata kekeea komarusuane sere maiya á masakuriiane, sere maiyamo iramo inara ayiáka, amano inarakasapo.

<sup>9</sup> Inarakano Kotimo ayiakarie, airakasapo. Aisane takekeea fanasina Kotiane aporomo mawakasemaraka ekeneraka mokoatikirakasapo. Mokoatikiraka Kotiane kekerahoanafonoraka Kotiaki risikiaki parirakasafapo.

<sup>10</sup> Arirakano hepene aporo hakásamo meta kakorea amo tisia makata kekeea komarusuane yasaro ásia unihaeaka asekeea kará sea á masakurirakasapo. Á masakurirakano yasaro ásiamo ipi asekeea rea aporo hinamoane su makatorakasapo. Makatoraka risike aporo hinamo kau teraka risiasamo, namina arúane nenakasapo.

<sup>11</sup> Kau teraka neketasi susuraka risiasamo, yakasa ho marera ayiáka, Koti hepene yapura reaki airakasapo. Ayiáka ipu watikiaka rakisiiane soko, rukupateraka metakarirakasafapo.

<sup>12</sup> Arirakano hepene aporo hakásamo meta nama amo tisia makata kekeea komarusuane he Yuferétisi á masakuriiane, heane serarakasapo. Asiamo sere maiya apera taku aeyaka aporo unihae yakai peasimo heane serarakasapo.

<sup>13</sup> Arirakano siaporamo akai mato aeyaka soko, yasaro ásiamo akai mato aeyaka soko, kotafe porofete aporomo\* akai mato aeyaka soko, yatafu isia kuti ásia perakasapo.

<sup>14</sup> Yatafuane pekea hauaka sua pukua aporo unihae risiaki ipu wakapumo hemakapukua rakirane tarirakasapo. Tarirakano aporo unihae suane sarimaraka, Koti Namo Kakaro Wakapu Karaki yunuraka weako sarimarakasapo. Weakosa maiya sereane Koti Káramo murikimasesapo.

<sup>15</sup> Arirakano kesekeea peakosa aporo Keresomo ipi someraka, "Kaisie, ape wafaya meraruamo wasakipoko, hakimora aporo apera ayiáka, ano ayiáka peakosapo. Ano perakarihoamo asekeea risikianie. Aporo wakanafonoraka hitafe kayane, kenare pasu makeraka kayane, ano apera maiya amo aporoane patera yase kaiyarakaka pukusafapo. Ipi sesera mapirarakaka pukusafapo," airakasapo.

<sup>16</sup> Arirakano Hipuru meaka hauaka yano motosa Amakétone hauaka á aporo unihae yakaiyaki yatafu kuti ásiamo someraka, "Sarimahoko peae." Airakano pekea sarimarakasapo.

<sup>17</sup> Arirakano hepene aporo hakásamo meta yatipunu amo tisia makata kekeea komarusuane atifoá masakurirakasapo. Masakuriiane, Kotimo apea unihae kará sea aeyaka memo sakepamo someraka, "Fapo. Yiyapo."

<sup>18</sup> Airakano yamakereraka kikiriraka soko, hauaka rukusane momani namo kakaro kára perakasapo. Hauaka wo fana amano kepomarekeea wainepe pesa maiya amo momani kára ayiáka pesafapo.

<sup>19</sup> Momani kára peraka, Pápirone siti kára ane koarakaka isírákasapo. Arirakano hauaka sua taone kekepoa ape kisiane rakaritaerape purakasapo. Pápirone sitia aporo hinamo risiane fanasinane Kotimo metakarirakasafapo. Waene he kapoa takamasane ipu nasimo karakasapo. Waene heane taku meaka Kotimo sapenane ayapo.

\* <sup>16:13:</sup> Kotafe porofete aporoane yasaro ásia kesekeea pesa ayapo.

<sup>20</sup> Momani peraka he tono suane soko, hemo karekeraromaka purakasapo. Uriane soko risiane farakasapo.

<sup>21</sup> Eke yao asia ti yapunaka peraka, aporomano kaua hurupeperakasapo. Eke hurupepesane eke popake kakaro umisa asia hurupeperakasapo. Eke hurupeperaka aporo hinamoane kára mokoatikisasamo ipu Kotiane yakasa ho marera ayíáka, Kotiaki airakasapo.

## 17

*Aporo rea pura hinamoamo makata ropo watikisa masane oyapo.*

<sup>1</sup> Hepene aporo yatipinusumo tisi yatipinusu mokoa risike hakásá meta ano rea pekea, anoaki someraka, "Né peae. Néaki nōmo makata tariako peae. Aporo rea pura hinamo he tawara kima yapura kakenapo. Kake epo makata watikiaka rakisiasamo fanashikosane nōmo néaki tariakosapo.

<sup>2</sup> Airakano hauaka wo aporo unihaeaka risiamo aporo rea pura hinamoane hakimarakasapo. Aporomo waene he nenaka himu maparitaena ayíáka, hauaka wo aporomo hinamo hakimaraka\* ayíáka, himuane mawatikinapo," airakasapo.

<sup>3</sup> Airakano Ho Kotesamo ano maka yao kauanea maka hinakasapo. Maka hinaka hepene aporo soko hakásá hisiapo. Hikia aseane, yasaro asia kau honesa matia hinamo ripaka rekesapo. Yasaro asíane kau sua Kotiane mainamarekea mokoatikiraka popasesapo. Yasaro asíane wamo yatipinusu mere isi kaeyakosu ayíáka risikisapo.

<sup>4</sup> Hinamoane kau rakikia pasu susa soko hekenosa soko osoraka, sekete mawia motokoa, korótomo rakisia ikia reane mawia taporaka, korótomo rakisia wayane honko sikinia hikia, korótomo rakisia senaki kera senakia kekeea, eke mone káramo roponane soko hatiraka mawia karotapikia, ayíáka kau rakisisapo. Ayíáka kau rakikia, korótomo rakisia kapo he komarukua maka kakesapo. He komarusuanne takumeane Koti hikumisia epo makata watikiaka rakisiane soko, epo aporo rea purane soko kapoa kekeea komarusisanpo.

<sup>5</sup> Hinamoamo hikumisia yano motosa popasane yapake someaka popasesapo. Popasane oyapo. "Pápirone siti kára asíane anopo. Aporo rea pura hinamo suamo amá ane anopo. Yatafu yakasa hoaki kekerena aporoamo amá ane anopo," ayíáka popasesapo.

<sup>6</sup> Airakano Koti patera asesa aporo hinamo rusua kusuane soko, Yasumo some kará aporo hinamo rusua kusuane soko, amano rusua kuramo kepoane hinamo ayapo. Waene he nenaka himu maparitaena ayíáka, hinamoamo aporo rusua kusua yapi nenaka himu maparitaesapo. Hinamoane nōmo aseraka ano fofasapo.

<sup>7</sup> Fofarakano hepene aporomo anoaki someraka, "Marirakano ne fofarkanare? Yasaro asíamo wamo yatipinusu, mere isi kaeyakosuane matia hinamoane ripaka rekesapo. Hinamoamo kepoane soko, yasaroa siamo kepoane soko, yumo nōmo néaki somerakanapo. Kepoane oyapo.

<sup>8</sup> Yasaro asia nōmo asesane fana reane, yumo kusua rekenapo. Keseke hauaka kutu mato kunututu kakanafonosa aeyaka e pekea, yaiya fansiraka rekeasimo fanasina hauaka á pusierakanopukusapo. Asiamo yasaro asia fana reane, yumo e kusua rekenapo. Keseke e peakosapo. Arirakano wate fana Kotimo hauaka one kepomareasiraka, aporo hinamo yaiya risikiakosane Kotimo sawia yano taesa popahoanafonosa aporo hinamoamo yasaro asia keseke perakanose asekeea fofahokosapo.

<sup>9</sup> Asiamo aporo hinamomo koteaka hemakapukua risike, makata kepoane suane hemakapukusapo. Yasaro asia wamo yatipinusuane, üri yatipinusu ayapo. Üri yatipinusuha hinamoane kayapo.

<sup>10</sup> Asiamo yasaro asia wamo yatipinusuane, aporo unihae yatipinusu ayapo. Aporo unihae kakoreasu fana unihaeaka risiane rukufasapo. Rukufarakano asekeea, nama ane pekea unihaeaka rekenapo. Nama patera yatipinuane pekea unihaeaka rekeakosapo. Maiya wakasemamo e unihaeaka rekeakosapo.

<sup>11</sup> Yasaro asia fana reane, yumo kusua rekenapo. Kusua reane, keseke peakosane unihae kari ayapo. Kariamo yasaro asia yatipinusu fana unihaeaka risiane ípi tékeane hakásá yiayapo. E soko fanasina hauaka á pukusapo.

<sup>12</sup> Mere isi kaeyakosuane aporo unihae kaeyakosu ayapo. I yumo unihaeaka risikiasimo murikimasafapo. Keseke murikimaraka, yasaro asia unihaeaka reakipoko, iane soko maiya hi wane awa hakásamo unihaeaka risikiakosapo.

<sup>13</sup> Asiamo aporo unihae kaeyakosuamo himu hakásarakha hemakapukua yasaro asia aki someraka, 'Isiapo hauakane, nōmo unihaeaka asekeea rekeasimo, né murikimarakanapo.'

\* <sup>17:2:</sup> Aporomo ipi asea metakarikia aporo rea pura hinamoane hakimako apura ayíáka, aporomo Kotiane metakarikia, yatafu yakasa hoaki soko kotafe koti parisaki soko kekerehoko purapo. Aiyaka takume kepoane ayapo.

<sup>14</sup> Aiyaka i su sarimarakা, Saro Sipi Mano akiyaki yunuraka weakosapo. Weraka Saro Sipi Manomo iane rukukoakataehokosapo. Asiamo aporo kára suamo kárane, Saro Sipi Mano ayapo. Aporo unihae suamo unihaeane, Saro Sipi Mano ayapo. Arirakano Saro Sipi Manomo pasimokoa murikmosa aporoamo Saro Sipi Manoane patera asekeea eyaki hakáska weakosapo. Saro Sipi Manomo pasimosa aporoamo Saro Sipi Manomo kakaro someane kekemarakা eaki himu hakásaraka hemakapukua risikiakosapo." Aiyaka hepene aporomo somerakasapo.

<sup>15</sup> Arirakano hepene aporomo anoaki efera hunia someraka, "He tawara kima yapura aporo rea pura hinamo kakeno, nómō fana asesapo. Asesa he tawara kepoane oyapo. Aporo kau kekeposane soko, aporo ira kekepoane soko, aporo hauaka kekepoane soko, aporo me kekeposane soko, amano sú sarimarakа he tawara asiapo.

<sup>16</sup> Arirakano mere isi kaeyakosu nómō asesane aporo unihae kaeyakosu ayapo. Aporo unihae kaeyakosuamo soko, yasaro asiamo soko, aporo rea pura hinamoane hisihokosapo. Hisiraka hinamoane rukua mokoatikiraka, epo pasu ososane horomarakano, e patera yase rekeakosapo. Patera yase rekeno kauane soko maíya ane soko nakosapo. Nekea siaraka, metakira yia tokeno ira paifyakosapo.

<sup>17</sup> Asiamo aporo unihae kaeyakosuamo namina himu hakásaraka hemakapukua, ipu hauaka yasaro asiamo unihaeaka asekeea rekeasimo hemakapurane, Kotimo mahemakapukua marerapo. Kotimo ayiakakosaposane ayikasiraka aporo unihae kaeyako suamo yasaro asiánē makama fanahokosapo.

<sup>18</sup> Arirakano hinamo nómō asesane kepoane siti kára ane ayapo. Siti kára a aporo unihaeaka reamo hauaka sua aporo unihaeane epo asekeea rekeakosapo." Aiyaka hepene aporomo somerakasapo.

## 18

*Pápirone sitia aporo hinamo fanasisane oyapo.*

<sup>1</sup> Hepene aporomo someaka farakano, hepene aeyaka hepene aporo meta perakasapo. Peraka e wakapu kárayaki peraka, epo faesamo hauaka wo mafaerakasapo.

<sup>2</sup> Epo sakepamo wáraka, "Pápirone siti kárane rukukoakataerakasapo.\* Sitiane kakaro rukukoakataeraka farakasapo. Rukukoakataeraka farakano, sitia yatafu soko, yakasa ho soko, kurakaya hinamo soko, wafe soko, ira wafe soko risikinapo.

<sup>3</sup> Asiamo sitiane rukukoakataehosiraka makata watikisane aporo hinamo hauaka sua risiamo rakismo Pápirone siti aeyaka tarisiapo. Aporomo waene he nenaka himu māparitaeraka hemaka apura ayíáka, aporo hinamo hauaka sua risiamo makata watikisane rakiraka watikiaka susu hemakapusuapo. Hinamo aporo Pápirone sitia risiane takumeaka someraka hinamo asiapo. Hinamoane aporo unihae hauaka sua risiamo hakimaraka risiapo. Pápirone sitia aporo suamo pisinisi watikisa rakiraka, yokotae mone kára mosapo. Asia ayíáka aporo hauaka sua risiamo pisinisi watikisane murikimaka rakikia mone kára mosapo." Aiyaka hepene aporomo somerakasapo.

<sup>4</sup> Arirakano nómō kaiyíane, hepene aeyaka me metamo someraka, "Ano patera asesa aporo reo. Hinamoamo makata watikiaka arakira ayíáka, repo rakirakanone hinamoane fanasisiraka, re soko fanasihokosapo. Fanasinapaka kikisiraka risikianie.

<sup>5</sup> Hinamoamo makata watikisane namo kakaro káraro. Kárasasamo Kotimo e fanasihokosapo. Fanasihokosane kakaro metakariakosafapo.

<sup>6</sup> Hinamoamo re mokoatikisa ayíáka, repo ropo mokoatikihohanie. Hinamoamo re yape hakáska mokoatikisakipoko, repo eane yape tetá mokoatikihohanie. Hinamoamo aporo yakkaimo watikiaka rakismo tarisiasamo, repo eane namo kakaro kára mokoatikihohanie.

<sup>7</sup> Hinamoamo kára watikiaka rakisiasamo eane kára fanasisiraka mokoatikihohanie. Hinamoamo fana watikiaka rakiraka epo yano motosane makárarakaa seseraka kayapo. Asiánē epo watikiaka rakisia ayíáka eane ropo ayíáka kakanie. Asiamo hinamoamo himumo hemakapuraka, 'Ano hinamo kára kuinipo. Hinamo yaroane ipi apia kurakano hiripuraka akaya ayíáka, ano ayíáka kakenafapo. Ano akaya makata umisa faserepeakosapo. Hiripuna kepoane anoa kakenafapo,' aiyaka hemakapusuasamo

<sup>8</sup> sere hakásamo e mokoatikihoko makata watikisane su faserepeakosapo. Fasereperaka, makata takamarane soko, himu nenane soko, makata nakosa fahokosane soko, makata suane faserepeakosapo. Ira rufimo soko eane inakakosapo. Aiyaka Unihae Kotimo hinamoane takekeea fanasihokosane motosesapo. Koti ipi wakapuanie namo kakaro káraro." Aiyaka memo somerakasapo.

\* **18:2:** Tanio rea maiya amo Pápirone siti yaiya reapo. Pápirone sitia aporo hinamomo namo kakaro watikiaka rakisiasamo, Kotimo iane fanasisiraka, sitiane rakaritiaesapo. Asiamo Pápirone siti takumeaka siti meta namo kakaro watikisane Kotimo kára fanasihokosapo.

<sup>9</sup> Asiamo aporomo hinamo hakiamara ayíáka, aporo unihae hauaka sua risiamo, aporo hinamo Pápírone sitia risiamo makata watikiaka rakisiane enomaka, ipu soko watikiaka rakirakasapo. Rakisia akipoko Pápírone sitiane iramo inaraka, ira musu hinakano aserakasapo. Aseraka i kára hihiripuraka risikisapo.

<sup>10</sup> Hihiripuraka yamenoa risike mokoatikisane aseraka fofaraka namoraka someraka, "Pápírone siti kárapo. Kárane iramo inaka fane asekeea kamenakaripo. Maiya hi awa hakásamo Pápírone siti kárane inaka fane," airakasapo.

<sup>11</sup> Asiamo sitiane fanasiraka, iramo inaka fasekeno, hauaka sua pisinisi rakira aporoamo aseraka hihiripurakasapo. Hihiripuraka ipu makata ropona apeane iramo inaka fasekeno asekeea someraka, "Isiapo menane epamo ropohoanapi. Pápírone sitia ropohoasifareapo," airakasapo.

<sup>12</sup> Arirakano ipu fana makata roponane oyapo. Koróto soko, siufa soko, eke kotesa mone káramo roponane soko, sekete ásiá soko, pasu kotesa soko, pasu hekenosa soko, pasu susa soko, ira wape yamona soko, saro érefane mere isi pakaesane mokoa makata metakira honokomo rakisiane soko, ira honokomo rakisiane soko, eke keamesa makata rakisiane soko, funu soko, eke kotesa soko,

<sup>13</sup> samanu ásiá soko, káre ásiá soko, pauta wape yamona soko, pauta meta yano motosa mua soko, pauta meta yano motosa ferékesese soko, waene he soko, wera soko, farawa soko, witi hae soko, saro ponomakau soko, saro sipi soko, saro hose soko, wakone soko, aporo raipa roposa soko, makata suane ayíáka roporakasapo. Roporaka aporo raipa kakaro aporomanopo, ayíáka hemakapurakasafapo. Makata fato ropona ayíáka, aporomanoane soko ayíáka roporakasapo.

<sup>14</sup> Arirakano Pápírone sitiane takumeaka yano motoraka hinamopo. Hinamoaki pisinisi rakira aporomo someraka, "Nómo makata kotesa ropohoko seseaka hemakapusuane yumo fareapo. Fasasamo efera hunia né káraraka unihaeaka kakakosafapo," airakasapo.

<sup>15</sup> Asiamo pisinisi rakira aporomo Pápírone sitia makata kotesa roporaka mone kára mosapo. Asiáne Pápírone sitiane iramo inaka fasekeno aseraka, namoraka yamenoa risike hihiripurakasapo.

<sup>16</sup> Hihiripuraka someraka, "Pápírone siti kárane fane. Kamenakaripo. Pápírone sitia hinamo aporo risiane, takumeaka someraka hinamo ásiápo. Hinamoane kau rakiraka, pasu hekenosa soko, pasu susa soko ososapo. Osoraka mawia sekete motokoa, korótomo rakisia senaki kera senakia kekea, eke mone káramo roponane hatiraka mawia koakatapikia, ayíáka kau rakisiapo. Mone káramo roporaka ayíáka kau rakisiane,

<sup>17</sup> maiya hi wane awa hakásá yiamo makatane su fane," ayíáka hihiripurakasapo. Arirakano kasu sipi wafayamo soko, kasu sipi maropona aporomo soko, aporomo pisinisi makata rakiraka kasu sipia makata fato ripaka koraka risira aporoamo soko, he tawara aeyaka aseane,

<sup>18</sup> sitiane inaraka ira musu hinakano aseraka risikisapo. Aseraka risike ipu someraka, "Sitiane kárapo. Siti ásiá meta rekerifapo."

<sup>19</sup> Áiyaka siti inasane aseraka, mahisiraka hauaka kokotonomoane mokoa wamoia paikia, hihiripuraka someraka, "Pápírone siti kárane fane. Kamenakaripo. Aporomo pisinisi makata rakiraka kasu sipia makata fato ripaka koraka risira aporoamo pisinisiante káraraka máfasapo. Máfasane maiya hi wane awa hakásá yiamo pisinisiante fane," airakasapo.

<sup>20</sup> Arirakano Pápírone sitiane iramo inarakano aseraka hepene yapura risiamo soko, Keresoa paosa aporo hinamomo soko, tarira aporomo soko, porofete aporomo soko, repo suamo sesehoanie. Hinamoamo re mokoatikirakano Kotimo aseraka, repoko hinamoane ropo mokoatikisapo.

<sup>21</sup> Arirakano hepene aporo wakapumo eke kára maka, he tawara numua makasuraka someraka, "Nómo eke he tawara makasuraka, he numua kenepesa asekeanafonoma ayíáka, Pápírone siti iramo inasane aporomo efera hunia asekosafapo.

<sup>22</sup> Pápírone sitia aporomo kita rurakarakano soko, wiroke takirakarakano soko, pikoro rurakarakano soko, efera hunia kaiyakosafapo. Pápírone sitia efera hunia aporomo makata rakirakarakano kaiyakosafapo. Aporomo farawa rakiakosakipoko ekemo witihae tainane efera hunia tairakarakano kaiyakosafapo.

<sup>23</sup> Nafa pakimarakaa faenane efera hunia nafa pakimarakaa faerakano asekosafapo. Aporomo hinamo fitu parakuraka kesanane efera hunia kesarakarakano kaiyakosafapo. Asiamo fana Pápírone sitia pisinisi rakira aporo risiane aporo kárapo. Hauaka kára wo i hokopusuapo. Pápírone sitia aporomo kamurakano, aporo hauaka sua risiamo kaikia, makata kotafe hasakasane ipu kákimarakasapo," ayíáka hepene aporomo somerakasapo.

<sup>24</sup> Arirakano porofete aporo rusua kusuane soko, Keresoa paosa aporo hinamomo rusua kusuane soko, hauaka sua aporo rusua kusuane soko kepoane Pápírone sitia aporo hinamo

risia ayapo. Asiasamo makata watikisa su akiyaki Pápirone sitia aporo hinamo risiane soko su sarimaraka fanasirakasapo.

## 19

*Hepene yapura Kotiaki kekeresane oyapo.*

<sup>1</sup> Pápirone siti fanasisane someaka farakano, nōmo kaiyíane hepene yapura aporo hinamo yakai mukisamo sakepamo somerakano kaisiapo. Ipu someraka, "Harerúyia.\* Kotimo yano motosane káraro. Kotimo isu pasimosapo. Kotimo faesane káraro. Kotimo wakapuane káraro.

<sup>2</sup> Kotimo kakaro somerapo. Kotimo takekeea ereketae susu hemakapurapo. Hauaka sua aporo hinamo risiamo watikiaka rakismo, aporo rea pura hinamoamo kirimarakano ipu watikiaka rakiraka, Kotimo makata rakira aporo hinamoane rusua kusuapo. Rusua kusuasamo hinamoane Kotimo takekeea fanasiraka ropo mokoatikiane," airakasapo.

<sup>3</sup> Arirakano ipu efera hunia someraka, "Harerúyia. Kotimo yano motosane káraro. Pápirone sitiane iramo inaraka ira musu maiya suamo hinaka rekeakosapo," airakasapo.

<sup>4</sup> Airakano aporo kára tuaneti foane (24) soko, makata kakayia kitafasuane soko, Koti unihaeaka kaya sea áwamomo hauaka atura kataka risike kekereraka someraka, "Kakaroripo. Kakaroripo. Harerúyia. Kotimo yano motosane káraro," airakasapo.

<sup>5</sup> Airakano Koti kaya sea aeyaka memo someraka, "Re Kotimo makata rakira aporo hinamu su risiane, re metakira wakasemamo soko, metakira káramo soko Kotiane hemakapuraka kekerehoanie," airakasapo.

*Saro Sipi Manomo hinamo arumarakano asesane oyapo.*

<sup>6</sup> Nōmo kaiyíane aporo hinamo yakaimo meraka siki, he kára peraka siki, kikiriraka siki, airakano nōmo kaisiapo. Kaiyíane ipu someraka, "Harerúyia. Kotimo yano motosane káraro. Isiapo Unihae Kotimo isu unihaeaka asekea rekenapo. Kotiane namo kakaro wakapu káraro.

<sup>7</sup> Asiamo isiapo seseraka e yano motosane makárarakana. Arirakano Saro Sipi Manomo<sup>†</sup> hinamo arumakosa maiyane maiya yuyapo. Hinamoane aporo puko makeraka kakenapo.

<sup>8</sup> Kakeno hinamoane pasu osohoasimo pasu pakae kotesa faesa Kotimo kasapo," airakasapo. Arirakano pasu pakae kotesa kasa kepoane Keresoa paosa aporo hinamomo makata koteaka rakisia ayapo.

<sup>9</sup> Arirakano hepene aporomo anoaki someraka, "Úyaka popahoanie. Saro Sipi Manomo hinamo arumaraka makata paikia nenaka, aporo hinamo su sarimahoko peae airakano, pesa aporo hinamoamo kára sesehokosapo. Aiyaka popahoanie. Someane Kotimo kakaro somepo," airakasapo.

<sup>10</sup> Airakano nōmo hepene aporoaki kekerehoko e korakea ano kakopesapo. Kakopekeea kakeno, epo anoaki someraka, "Anoaki kekerehokopo. Né soko, nōmo ní Keresoa paosa aporo mae soko, re Kotimo aporo raipa arisia ayíáka, ano soko Kotimo aporo raipa rekenapo. Repo Yasumo someane kakimaka aporo metakiraki some akara ayíáka, nōmo soko ayíáka some karakanapo. Asiamo nōmo Kotiaki hákasa kekerehoanie," aiyaka hepene aporomo anoaki somerakasapo. Ho Kotesamo porofete aporoaki himura mahemakapurarakarano, ipu kaikia some akara ayíáka, Yasuane aporomo some kakasimo Ho Kotesamo i ararerakano ayíáka some karápo.

*Saro hose hakesa matia aporo ripaka pesane oyapo.*

<sup>11</sup> Hepene aporomo someaka farakano, nōmo aseane hepene yapura tiane kikisi aka hikia, kikisi ro pukua, asiakipoko tipia saro hose hakesa matia aporo ripaka rekesapo. Ripaka reane e yano motosa tetá yano motosesapo. E yano motosa metane Himu Hakásaraka Koteaka Rakira Aporopo. Arirakano e yano motosa metane Kakaro Somera Aporopo. Aiyaka yano motosesapo. Arirakano hukurura maiya amo aporoamo koteaka takekeea ereketae susu hukururapo. Asiamo e yunu aporo yaki awera maiya amo, aporo watikisamo kakaro someane koaretaesa aporo akiyaki epo werapo.

<sup>12</sup> E hiane ira rufi asisapo. Epo aporo hinamo yakaijane unihaeaka asekea reasasamo napa rea hati yakai karotapisisapo. E kaua ipi yano motosa meta popasane ipi hákasamo aserasesapo. Aporo metamo aserasesafapo.

<sup>13</sup> Ipi pasu ososane yapi sususesapo. E yano motosane Kotimo Somepo, aiyaka yano motosesapo.

\* 19:1: Harerúyia airane namo meaka Kotiane makárarakaka kekerena ayapo. † 19:7: Saro Sipi Mano aisane Yasu Keresoa ipipo. Hinamo aisane Yasu Keresoa paosa aporo hinamo ayapo.

<sup>14</sup> Asiamo saro hose hakesa matia ripasa aporoane purakano, hepene yapura ame aporo yakai pasu pakae kotesa susu osoraka risiamo, e patera asekea purakasapo.

<sup>15</sup> Arirakano aporo unihae saro hosea ripaka fana pusuane, e akaia ferepe taku teta waresa horopokara akaia rekesapo. Hauaka sua aporo risia akiyaki epo weraka, ferepe taku teta waresamo rurakasapo. Rukua faraka, epo unihaeaka wakapuaka paroaka asekea rekesapo. Asekea reke aporomo sakō karepe wate he pusimo finiraka taiana aiyáka, aporo unihaeamo aporo hinamo hauaka wo risiane aiyáka finiraka tairakasapo. Koti Namo Kakaro Wakapo Karamo saperakan aporo unihaeamo finiraka tairakasapo.

<sup>16</sup> Aporoamo pasu ososa á soko, e korakea soko, e yano motosa úyaka popasesapo. "Aporo unihae suamo unihaeane anopo. Aporo yano motosa kára suamo yano motosa kárane anopo," aiyaka popasesapo.

<sup>17</sup> Arirakano nōmo aseane hepene aporo meta sere maiya á rekesapo. Reke mena koraka toraki sakepamo wáraka, "Kotimo reaki makata nakosa kára kakakosapo. Nako peae.

<sup>18</sup> Pekeaa amano rusua kusua małyane nanie. Amano rusua kusuaney oyapo. Aporo unihae soko, ame aporo satini soko, ame aporo soko, saro hose soko, saro hose matia aporo ripasane soko, aporo raipane soko, aporo raipahoanafonanose soko, aporo kára soko, aporo wakasema soko, aporo su rusua kusua małyane nanie," aiyaka hepene aporomo mená koraka toraki wárakasapo.

<sup>19</sup> Hepene aporomo someaka farakano, nōmo aseane yasaro ásiáne soko, aporo unihae hauaka sua risiane soko, ipu ame aporo yakaiane soko, su sarimaraka sapo. Sarimaraka aporo saro hosea ripasaki soko, epo ame aporoaki soko weakosakipoko sarimaraka sapo.

<sup>20</sup> Sarimaraka werakano, yasaro ásiá soko, kotafe porofete aporoane soko, waseremorakasapo. Fana kotafe porofete aporo yasaro ásiyaki hakása rea maiya amo, epo hemakapukua wakapuaka rakisisupo. Aiyáka rakiraka epo kotafe rakirane aporo hinamo yakaimo kakimaka yasaro ásiá himu hakásaraka kekemasapo. Aporo hinamoamo yasaro ásiámo yano motasane i kaua popasa risikisapo. Ipu yasaro ásiá murikimaka hokonomo kotafe koti pariraka rakisiaki kekeresesupo. Kekereraka aiyáka kotafe porofete aporomo wakapuaka rakisiiane soko kekemasesupo. Arirakano yasaro ásiáne soko, kotafe porofete aporoane soko, tēta hitafe risiane fanasiraka, ira rufi he kekeea kaya ásiá, ira rufiyaki, saofa rufiyaki, wariwarisa tuiya ásiá arakarua mokoasurakasapo.

<sup>21</sup> Mokoasuraka aporo saro hose matia ripaka pesane akaia ferepe taku tetakara waresa e akaia reamo yasaro ásiámo ame aporoane rukufarakasapo. I rusuane maiyane menamo nekea katukunu kaporakasapo.

## 20

*Keremisi wane taosene amo (1,000) Satane taporaka tipura makerakano asesane oyapo.*

<sup>1</sup> Arirakano hepene aporo hepene yapunaka pekeaa hokonomo ki maka rekesapo. Kiane hauaka kutu mato kunututu kakanafonosa kutuane ikia koro ki maka rekesapo. Sene kára soko epo maka rekesapo.

<sup>2-3</sup> Maka reke siapora ásiáne waseremaka, seneamo taporaka keremisi wane taosene amo (1,000) rekeasimo, hauaka kutu mato kunututu kakanafonosa a makasuraka, kutuane ikia koro mapirikia roko motorakasapo. Roko motokoa keremisi wane taosene amo reke, aporo hinamo hauaka sua risiamo watikiaka rakisimo kirimaraka somehoko-hoamo tipura makerakasapo. Makekea keremisi wane taosene ane faraka, siapora ásiáne tonotaerakano maiya wakasemamo e koraka rekesapo. Wate fana kuyaremo aporoaki kirimaraka kotafe someane kakimakasimo hokokakako pesane eane hákasa yiayapo. E Satanepo.

<sup>4</sup> Arirakano nōmo aseane, unihaeamo sea ásiá risiá aporo tokesapo. Aporo toaki Kotimo someraka, "Aporo suane takekea parakuhoanie." Aiyaka Kotimo someaka marerakasapo. Someaka marerakano nōmo aseane, aporo hinamomo Kotimo someane kakimaka Yasuakí himu hakásaraka hemakapukua risiasamo i mawi pateketaesa kusuane ho risikino nōmo asesapo. Aporo hinamoamo fana yasaro ásiá aki soko, yasaro murikimaka hokonomo kotafe koti pariraka rakisiaki soko, kekeresefap. Kekerehoanafonoraka yasaro ásiámo yano motosane i hikumisia soko metao, hokona soko metao popasesafapo. Popahoanafonosa aporo hinamoane maturikia taeraka, keremisi wane taosene amo Yasu Keresoyaki hákasa unihaeaka risikisapo.

<sup>5-6</sup> Arirakano aporo hinamo kusuane fana maturikia taesane oyapo. Aporo hinamo fana rusua kusua maturikia taesane Kotimo makikisiraka makoterakasapo. Asiamo aporo hinamo fana maturikia taesane, efera hunia kukusafapo. Pirisiti aporomo Kotimo makata rakirane arakira aiyáka, ipu aiyáka Kotimo makata rakirane soko, Yasu Keresomo makata rakirane rakirakasapo. Rakiraka keremisi wane taosene amo, Yasu Keresoyaki hákasa

unihaeaka risikisapo. Arirakano keremisi wane taosene ane faraka, aporo hinamo fana maturikia taehoaanafonosane i su maturikia taerakasapo.

*Satane fanasisane oyapo.*

<sup>7</sup> Keremisi wane taosene ane faraka, Satane tipura makesa reane tonotaerakano aporo hinamo hauaka sua risiamo watikiaka rakisimo kirimarakaasapo.

<sup>8</sup> Kirimaraka aporo ira yano motosa Koke soko, aporo ira yano motosa Makoke soko, ipu weakosakipoko sarimarakasapo. Sarimasane hauaka sakipu menohoanafonona ayiáka i aporo sarimasane asisapo.

<sup>9</sup> Ipu weakosakipoko hauaka sua pukua, Keresoa paosa aporo hinamo arisiane soko, Kotimo sesena siti Yarusarame sitiane soko ipu kauraka hahaeraka topereOTOSesapo. TopereOTOSekeno Kotimo saperaka hepene yapunaka ira rufi makasurakano, ira rufi-amo i suane inarakasapo.

<sup>10</sup> Satanemo i kirimasakipoko he kekeka kaya asia saofa rufi wariwarisa tuiya asia arakarua Sataneane makasurakasapo. Yasaro ásiáne soko, kotafe porofete aporoane soko, fana mokoasusa risia á, Sataneane soko makasurakasapo. Makasusane maiya suamo sere soko ereamo soko yaiya i kau terakasapo. Kau tenane farakasafapo.

*Aporo hinamo hukurukua fanasihokosakipoko takekeka parakurakanómo asesane oyapo.*

<sup>11</sup> Nōmo aseane unihae sea pakaesa kotesa á Unihae kakesapo. Kakeno nōmo aseane, tiane soko hauaka ane soko pukua farakasapo. Purakano asesane hunia asesafapo.

<sup>12</sup> Arirakano unihae sea kaya hikumisi neneme takua aporo hinamo kára soko, aporo hinamo wakasema soko, kusua maturikia taesane risikisapo. Risikino sawi yakai Unihaeemo tetaorakasapo. Aporo hinamo kusua maturikia taesane, kukusiraka risia maiya amo, ipu makata rakisiane sawia popasane, Unihaeemo tetaorakasapo. Arirakano sawi meta á aporo hinamo yaiya risikiakosane yano motosa popasa sawiane taorakasapo. Taoraka menoraka faraka, fanasina motoakosakipoko takekeka parakurakasapo.

<sup>13</sup> Maiya amo he tawara aporo he nekea kukua kesane maturikia taerakasapo. Arirakano aporo hinamo kusua hoane kuramo asekea rea hétisi hauaka aeyaka Kotimo poparipae, aiyaka maturikia taerakasapo. Maturikia taeraka, Kotimo sawia popasane tetaoraka menoraka, fana i kukusiraka hauaka wo risia maiya amo, ipu makata rakisiane menoraka hakása hakasaraka takekeka parakurakasapo.

<sup>14-15</sup> Asiamo aporo hinamomo yano motosane Kotimo sawia aporo hinamo Kotiyaki yaiya risikiakosane popahoanafonosekeno aporo hinamoane parakuraka, he kekeka kaya asia saofa rufi wariwarisa tuiya asiakipoko arakarua mokoasurakasapo. Kurane soko Hétisi hauakane soko mokoa, he kekeka kaya asia saofa rufi wariwarisa tuiya asia arakarua mokoasurakasapo. Yape teta akura ayiáka kurakasapo.

## 21

*Ti kawe soko hauaka kawe soko nōmo asesane oyapo.*

<sup>1</sup> Ti fana reane soko, hauaka fana reane soko fasakipoko, ti kawe soko hauaka kawe ane soko nōmo asesapo. Nōmo aseane he tawarane fasesapo.

<sup>2</sup> Asiamo siti kotesane Yarusarame siti kawe metane, hepene yapunaka Koti rea hauaka aeyaka perakasapo. Pesane hinamo aporo motoako apura ayiáka, kau rakisia kotesa ayiáka Yarusarame sitiane kakaro kotesesapo.

<sup>3</sup> Asiamo nōmo kaiyáne unihae sea anaka memo sakepamo someraka, "Kotimo apeane aporo hinamoyaki hakása are. Aporo hinamoyaki Kotiane soko hakása are. Aporo hinamo suane Kotimo aporo hinamopo. Aporo hinamoamo unihaeane Koti ipipo. Koti iyaki hakása are.

<sup>4</sup> Aporo hinamo suamo hiripu heane Kotimo ipi hokeane. Hokeraka faraka amano kurakanómo hiripunane kakaro fane. Efera hunia i hiripuhokosafapo. Amano kurane soko kakaro fane. Faraka efera hunia kukusafapo. Kau teraka himu nenakarane soko fane. Faraka efera hunia kau tehokosafapo. Himu nakosafapo. Makata fana ainane su fane," airakasapo.

<sup>5</sup> Airakano unihae sea á kayamo someraka, "Kaisie, makata suane nōmo makawenapo. Úyaka popahoanie. Nōmo someane kakaro somepo. Nōmo someraka ayiakakosaposane kakaro ayiakakosapo. Asiamo repo kakimakanie," airakasapo.

<sup>6</sup> Epo efera hunia someraka, "Fanane soko anopo. Arirakano kesekeane soko anopo. Makata su kepomarerane soko anopo. Arirakano rakikia marane soko anopo. Asiamo aporo metamo someraka, 'Ano he nariripo,' airakano he fuaka taena ane nasimo yaku kakakosapo. Karakano heane nenaka e yaiya rekeakosapo.

<sup>7</sup> Yaiya rekeakosane yunu rukumosakatapisia aporoamo makosapo. Aporoane nōmo hokosapo. Ipi Kotiane anopo.

<sup>8</sup> Arirakano aporomo Kotimo yunu aporoyaki weraka namoraka fimiti pura aporoane soko, aporo anoaki himu hakásaraka hemakapunafona aporoane soko, watikiaka rakira aporoane soko, aporo kukusimo rura aporoane soko, hinamo hakimara aporoane soko, ira hamu rura aporoane soko, kamuna aporoane soko, ho kamuna aporoane soko, yatafu yakasa hoaki kekereaka somera aporoane soko, fofo mora aporoane soko, kotafe somera aporoane soko, i suane he keke a kaya ásia saofa rufi wariwisa tuiya ásia arakarua mokoasurakasapo. Mokoasusane yape tetá akura ayíáka kurakanapo," ayíáka unihae sea á kayamo somerakasapo.

*Yarusarame siti kaweaney oyapo.*

<sup>9</sup> Arirakano hepene aporo yatipinu sumo tisi yatipinusu mokoa risia amo, hepene aporo hakásá metamo anoaki someraka, "Ne anoyaki peae. Saro Sipi Manomo hinamo arumakosane néaki tariakosapo."

<sup>10</sup> Airakano Ho Kotesa ano himua káraraka reke, hepene aporomo ano ūri teraya karikia hinakasapo. Hikia pauraka risike, hepene aporomo anoaki tariraka someraka, "Kotimo siti kotesa Yarusarame sitiane Kotimo hauaka hepene yapunka aperane asesie," ayíáka tarirakasapo.

<sup>11</sup> Tarirakano nōmo aseane, Kotimo faesamo apeane kakaro faesesapo. Faesane eke yano motosa yásepa ho piakaesa ásia, arirakano he sírisa kotesa asera ásia, sitiane faesa ho piakaesapo.

<sup>12</sup> Arirakano Yarusarame sitiane rurusesapo. Rurusane huturusakipoko ikia koro kenosua hepene aporo keno sumo asekea risikisapo. Ikia koro kenosua Isiraya aporo ira yano motosa kenosu popasesapo.

<sup>13</sup> Sere maiya apera takua anaka, ikia koro isia risikisapo. Arirakano sere maiya apura takua anaka, ikia koro yaiya isia risikisapo. Arirakano ketayia takua soko, ikia koro yaiya isia risikisapo. Arirakano ketayia takua soko, ikia koro yaiya isia risikisapo.

<sup>14</sup> Arirakano ruruane parohoasimo ruru kepao eke kenosu taesanesapo. Eke kenosua Saro Sipi Manomo tarira aporo kenosu yano taesane popasesapo.

<sup>15</sup> Arirakano hepene aporoamo anoaki fana somesa hakásá yiamo korótomo rakisia rura honokomo maka rekesapo. Sitiane soko, siti ikia koroane soko, sitiane ruruane soko, murikimakosakipoko, rura ane maka rekesapo.

<sup>16</sup> Rura amo siti murikimarakaka, siti horopokarane soko, siti parauane soko, siti hutruane soko, murikimasane hakásá yinesesapo. Horopokarane soko kakaro yameno tu taosene tu harote kiromita (2,200), arirakano parauane soko kakaro yameno, tu taosene tu harote kiromita (2,200), arirakano huturuane soko kakaro huturu, tu taosene tu harote kiromita (2,200), ayíáka murikimarakasapo.

<sup>17</sup> Arirakano siti ruru parauane murikimarakaka, wane harote foti fo (144) ayíáka murikimarakasapo. Murikimarakaka aporomo ape kiako murikiamara ayíáka hepene aporomo murikimarakasapo.

<sup>18</sup> Ape rurusane eke yano motosa yásepa faesa kotesamo ape rurusesapo. Siti kisiane korótomo kisisapo. Korótomo kisiane karási faesa asisapo.

<sup>19</sup> Ruruane parohoasimo eke taesa risikisapo. Eke risiane siti ruruane makotehoasimo eke mone káramo roponane eke paremurisisapo. Paremurisiane menoane eke faesa yano motosa yásepa, tetáne eke hekenosa yano motosa sáfaea, isíane eke pakaesa yano motosa ákete, kitafane eke hisukusa yano motosa émarao, kakoreane eke pakaesa susayaki yano motosa satónikisa,

<sup>20</sup> namane eke susa yano motosa koníriane, yatipinuane eke keamesa yano motosa kirisoraete, kariane eke hisukusa yano motosa péreo, tokonane eke keamesa yano motosa topase, kaeyakoane eke hisukusa soko keamesa soko yano motosa kirisoperése, kinuane eke hekenosa yano motosa háyasmine, kenoane eke susa yano motosa ametíse, ayíáka eke yano taesane paremurisisapo.

<sup>21</sup> Arirakano ikia koro keno suane sekete ásia keno sumo rakisisapo. Ikia koro keno suane sekete ásiamo hakásaraka ayíáka rakipe pusisapo. Ásiamo siti ikia karane korótomo rakisisapo. Korótomo rakisiane karasi faesa asisapo.

<sup>22</sup> Arirakano Yarusarame siti kawea Kotiaki kekererekohosa apeane fasesapo. Koti Namo Kakaro Unihae Kara ane soko, Saro Sipi Manoane soko, á risiasamo maiya suamo tetáki kekererakasapo.

<sup>23</sup> Yarusarame siti kawea sere maiyamo soko, ere maiyamo soko, faerakasafapo. Kotimo ipi faesa hákasamo faerakasapo. Ásiamo nafa faena ayíáka Saro Sipi Manoane ayíáka faerakasapo.

<sup>24</sup> Arirakano Yarusarame sitia faesa amo aporo hinamo su hauaka kekepoa risiane faehokosapo. Hauaka sua aporo unihemo Yarusarame siti kawea makata kotesa mahimuraka taesane mokoa hiakosapo.

<sup>25</sup> Arirakano Yarusarame siti kaweane erehokosafapo. Ayiakakosasamo ikia koroane mapiriakosafapo. Mapirianafonoraka, maiya suamo ikia koroane ropakataeraka risikiakosapo.

<sup>26</sup> Asiamo hauaka kekepo aeyaka aporomo makata kotesa mahimuraka taesane, Yarusarame siti kawea mokoa hiakosapo.

<sup>27</sup> Arirakano makata watikisane Yarusarame siti kawea mokoa hiakosafapo. Yatafu yakasa hoaki kekerena aporoane soko, kotafe somera aporoane soko, Yarusarame siti kawea hiakosafapo. Arirakano Saro Sipi Manomo sawia aporo hinamo yaiya risikiakosane, yano motosa popasa aporo hinamoane hakasa Yarusarame siti kawea hiakosapo.

## 22

### *Yarusarame siti kawea nōmo makata asesane oyapo.*

<sup>1</sup> Hepene aporomo anoaki makata tarisiane oyapo. Kotimo sea aeyaka soko, Saro Sipi Manomo sea aeyaka soko he pekerekedesapo. He Pekereane ho piakaerakasapo. Aporo hinamo yaiya risikiakosakipoko he nenane he ayapo.

<sup>2</sup> Heane Yarusarame siti ikia kara tipia pekerekedesapo. Pekerekedipoko ira tetá meta he fe taku ra, arirakano meta he fe taku wo, ayíáka risikisapo. Ayíáka risiane ira wateane aporo hinamo yaiya risikiakosakipoko ira wate nenane ayapo. Keremisi hakásamo ira wateane yape keno sumo perakasapo. Ere maiya hakásamo irane wate yape hakásamo peke, yaiya ere maiya metamo irane wate yape hakásamo peke, ayíáka ere maiya keno suane murikimaka, ira wateane yaiya yape kenosu perakasapo. Arirakano hauaka sua aporo hinamo fana risia maiya amo makata umisa masane, ira kuamo mafaraka iane makotehokosapo.

<sup>3</sup> Arirakano Yarusarame siti kawea makata watikisane rekeakosafapo. Sitia Kotipe Saro Sipi Mano tetá unihemo sea á tokoakosapo. Tokeno Kotimo aporo hinamo raipamo eaki kekerehokosapo.

<sup>4</sup> Kekereraka Koti hikumisi ipu aseakosapo. Aserakano i hikumisia Koti yano motosane popahokosapo.

<sup>5</sup> Arirakano efera hunia erehokosafapo. Kotimo ipi faesane kárasasamo, nafamo soko sere maiyamo soko faehokosafapo. Kotimo ipi faesa hakásamo faehokosapo. Faerakano Kotimo aporo hinamo raipa ane maiya suamo unihaeaka risikiakosapo.

### *Yasu paripeakosane oyapo.*

<sup>6</sup> Hepene aporomo anoaki someraka, "Nōmo someane kakaro somepo. Kakaro some-sasamo kakimakanie. Unihae Kotimo makata ayiakakosane ipi porofete aporoaki māhemakapurakarakano, ipu some kasesupo. Yumo makata ayiakáko makesane, Kotimo aporo hinamo raipamo hemakapusimo Kotimo ipi hepene aporomo tariako pusiesapo. Pusierakano nōmo somehoko pesapo," airakasapo.

<sup>7</sup> Airakano Yasumo someraka, "Hao, kaisie. Ano paripeakosa maiyane makepo." Aiyaka Yasumo somerakasapo. Arirakano Kotimo someane sawi wo popasane kakimara aporo hinamoane Kotimo makoterakano iane seseaka risikiakosapo.

<sup>8</sup> Arirakano ano Yonemo makata su sawi wo popasane nōmo asekeea nōmo kaikia asiapo. Asiamo hepene aporomo anoaki makata tarikia somerakano, nōmo kaikia asekeea asiasamo, hepene aporoaki kekerehoko e korakea ano kakopesapo.

<sup>9</sup> Kakopekea kakeno epo someraka, "Nōmo ayiakakopo. Né Kotimo aporo raipa ayíáka, ano soko Kotimo aporo raipapo. Né soko, nōmo Keresoa paosa aporo mae porofete aporoane soko, sawi wo popasane kakimara aporoane soko, isia po suamo makata raki-rane hakásia yiyapo. Asiasamo nōmo anoaki kekerehokopo. Koti ipiaki hakasa kekerehoanie," aiyaka hepene aporomo somerakasapo.

<sup>10</sup> Hepene aporoamo anoaki efera hunia someraka, "Sawi wo ayiakakosapo, aiyaka popasane nōmo mahameakopo. Makata ayiakakosa maiyane makesasamo mahameakopo.

<sup>11</sup> Asiamo aporo watikiaka risiane yaiya watikiaka risikiakosapo. Aporo yatafu yakasa hoaki kekereraka aporoamo yaiya kekereraka risikiakosapo. Aporo ereketaeraka risiane yaiya ereketaeraka risikiakosapo. Aporo Kotiaki kekerenamo yaiya Kotiaki kekereraka risikiakosapo," airakasapo.

<sup>12</sup> Airakano Yasumo someraka, "Hao, kaisie. Ano paripeakosa maiyane makepo. Aporo hinamomo makata rakisiene nōmo asekeea makata ropo hakásia nineraka takekeaa kakakosapo. Asiamo aporo hinamomo watikiaka rakisiaki, makata ropo watikisane kakakosapo. Arirakano aporo hinamomo koteaka rakisiaki, makata ropo kotesane kakakosapo.

<sup>13</sup> Kakaro fanane anopo. Arirakano kesekeane soko anopo. Fana reane anopo. Arirakano keseke rekeakosane soko anopo. Makata su kepomarerane soko anopo. Arirakano rakikia marane soko anopo.

<sup>14</sup> Arirakano aporo hinamomo namina pasu pikirisane kusuraka makotena ayika, aporo hinamomo namina himu pikirisa watikisane metakarikia mafaraka risiane seseraka risikiakosapo. Seseraka risike, yaiya risikiakosakipoko ira wateane nakosapo. Aporo hinamoane Yarusarame siti kawea ikia koroa yorokoa siti kakarua hiakosapo.

<sup>15</sup> Asiāne kásamo rakira ayíáka aporoane soko, aporo ira hamí rurane soko, aporo ho kamunane soko, aporo makata kamunane soko, aporo ho pairane soko, aporomo fofo morane soko aporomo hinamo hakimarané soko, aporo kukusimo rura aporoane soko, yatafu yakasa hoaki kekerena aporo hinamoane soko, kotafe koti parisaki kekerena aporo hinamoane soko, kotafe somehoko sesena aporo hinamoane soko, kotafe hokoa rura aporo hinamoane soko, aporoane su Yarusarame siti kawe ape kakarua yorokoa hiakosafapo.

<sup>16</sup> Ano Yasupo. Nōmo hepene aporo re arisia pusiesapo. Re Keresoa paosa aporo hinamo sése apea risiamo makata ayiakakosane hemakapusimo, hepene aporoamo reaki tarirakanapo. Ano Tefetemo aporo irapo. Tefetemo aporo ira aeyaka wainepe pesane anopo. Mituru fiahoko makeanamo ti makata kára faena ayíáka faenane anopo,” ayíáka Yasumo somerakasapo.

<sup>17</sup> Arirakano Ho Kotesamo soko, Saro Sipi Manomo hinamo arumakosamo soko tetapō someraka, “Né peae,” airakano kaisia aporo hinamoamo hakásaraka someraka, “Né peae,” aihokosapo. Arirakano aporo meta he narirakano he nako peae. Heane nenaka yaiya risikiakosapo. Heane Kotimo yaku karápo. Karakano heane narirakano nanie.

<sup>18</sup> Arirakano sawi wo Kotimo ayiakakosapo ayíáka popasane kaisia aporo hinamo reaki ano Yonemo paroaka somerakanapo. “Hao, kaisie. Kotimo sawi wo makata ayiakakosane popasapo. Popasa akiyaki nōmo ní hemakapuraka ayiakasireapo, ayíáka hemakapusua akiyaki sarimaraka some kakakopo. Sarimaraka some karakano, Kotimo né fanasinane motoakosapo. Kotimo saperaka mokoatikina makata sawi wo popasane su néaki kakakosapo.

<sup>19</sup> Arirakano Kotimo ipi ayiakakosapo, ayíáka sawi wo popasane repo aporo metamo asekea, sape metane some kaka, sape metane mahamekea kakaro metakarirakano, aporoane Kotimo fanasinane motoakosapo. Arirakano sawi wo popasa some kará aporoane Yarusarame siti kawea hinaka, yaiya risikiakosakipoko ira wate nakosapo. Arirakano Kotimo aporoane fanasina motoraka someraka, ‘Yarusarame siti kawea hiakopo. Ira wateane soko tumaka nakopo,’ aihokosapo. Asiamo re ayiakakohoamo ano Yonemo reaki somerakanapo,” ayíáka Yonemo somesapo.

<sup>20</sup> Arirakano Yasumo someraka, “Sawi wo popasane kakaro someane popasapo. Ano paripeakosa maiyane makepo. Nōmo kakaro somerakaripo,” airakano nōmo someraka, “Kakarorakae. Unihae Yasu né peae,” aisapo.

<sup>21</sup> Keresoa paosa aporo hinamo re suane Unihae Yasumo hemakapuraka ararehoasi-moripo. Kakaroripo.

## Read the New Testament daily

*January*

date	Scripture
1	Matiu 1:1-2:12
2	Matiu 2:13-3:6
3	Matiu 3:7-4:11
4	Matiu 4:12-25
5	Matiu 5:1-26
6	Matiu 5:27-48
7	Matiu 6:1-24
8	Matiu 6:25-7:14
9	Matiu 7:15-29
10	Matiu 8:1-17
11	Matiu 8:18-34
12	Matiu 9:1-17
13	Matiu 9:18-38
14	Matiu 10:1-23
15	Matiu 10:24-11:6
16	Matiu 11:7-30
17	Matiu 12:1-21
18	Matiu 12:22-45
19	Matiu 12:46-13:23
20	Matiu 13:24-46
21	Matiu 13:47-14:12
22	Matiu 14:13-36
23	Matiu 15:1-28
24	Matiu 15:29-16:12
25	Matiu 16:13-17:9
26	Matiu 17:10-27
27	Matiu 18:1-22
28	Matiu 18:23-19:12
29	Matiu 19:13-30
30	Matiu 20:1-28
31	Matiu 20:29-21:22

*February*

date	Scripture
1	Matiu 21:23-46
2	Matiu 22:1-33
3	Matiu 22:34-23:12
4	Matiu 23:13-39
5	Matiu 24:1-28
6	Matiu 24:29-51
7	Matiu 25:1-30
8	Matiu 25:31-26:13
9	Matiu 26:14-46
10	Matiu 26:47-68
11	Matiu 26:69-27:14
12	Matiu 27:15-31
13	Matiu 27:32-66
14	Matiu 28:1-20
15	Maka 1:1-28
16	Maka 1:29-2:12
17	Maka 2:13-3:6
18	Maka 3:7-30
19	Maka 3:31-4:25
20	Maka 4:26-5:20
21	Maka 5:21-43
22	Maka 6:1-29
23	Maka 6:30-56
24	Maka 7:1-23
25	Maka 7:24-8:10
26	Maka 8:11-9:1
27	Maka 9:2-29
28	Maka 9:30-10:12

date	Scripture
1	Maka 10:13-31
2	Maka 10:32-52
3	Maka 11:1-26
4	Maka 11:27-12:17
5	Maka 12:18-37
6	Maka 12:38-13:13
7	Maka 13:14-37
8	Maka 14:1-21
9	Maka 14:22-52
10	Maka 14:53-72
11	Maka 15:1-47
12	Maka 16:1-20
13	Ruki 1:1-25
14	Ruki 1:26-56
15	Ruki 1:57-80
16	Ruki 2:1-35
17	Ruki 2:36-52
18	Ruki 3:1-22
19	Ruki 3:23-38
20	Ruki 4:1-30
21	Ruki 4:31-5:11
22	Ruki 5:12-28
23	Ruki 5:29-6:11
24	Ruki 6:12-38
25	Ruki 6:39-7:10
26	Ruki 7:11-35
27	Ruki 7:36-8:3
28	Ruki 8:4-21
29	Ruki 8:22-39
30	Ruki 8:40-9:6
31	Ruki 9:7-27

date	Scripture
1	Ruki 9:28-50
2	Ruki 9:51-10:12
3	Ruki 10:13-37
4	Ruki 10:38-11:13
5	Ruki 11:14-36
6	Ruki 11:37-12:7
7	Ruki 12:8-34
8	Ruki 12:35-59
9	Ruki 13:1-21
10	Ruki 13:22-14:6
11	Ruki 14:7-35
12	Ruki 15:1-32
13	Ruki 16:1-18
14	Ruki 16:19-17:10
15	Ruki 17:11-37
16	Ruki 18:1-17
17	Ruki 18:18-43
18	Ruki 19:1-27
19	Ruki 19:28-48
20	Ruki 20:1-26
21	Ruki 20:27-47
22	Ruki 21:1-28
23	Ruki 21:29-22:13
24	Ruki 22:14-34
25	Ruki 22:35-53
26	Ruki 22:54-23:12
27	Ruki 23:13-43
28	Ruki 23:44-24:12
29	Ruki 24:13-53
30	Yone 1:1-28

date	Scripture
1	Yone 1:29-51
2	Yone 2:1-25
3	Yone 3:1-21
4	Yone 3:22-4:3
5	Yone 4:4-42
6	Yone 4:43-54
7	Yone 5:1-23
8	Yone 5:24-47
9	Yone 6:1-21
10	Yone 6:22-40
11	Yone 6:41-71
12	Yone 7:1-29
13	Yone 7:30-52
14	Yone 7:53-8:20
15	Yone 8:21-30
16	Yone 8:31-59
17	Yone 9:1-41
18	Yone 10:1-21
19	Yone 10:22-42
20	Yone 11:1-53
21	Yone 11:54-12:19
22	Yone 12:20-50
23	Yone 13:1-30
24	Yone 13:31-14:14
25	Yone 14:15-31
26	Yone 15:1-27
27	Yone 16:1-33
28	Yone 17:1-26
29	Yone 18:1-24
30	Yone 18:25-19:22
31	Yone 19:23-42

date	Scripture
1	Yone 20:1-31
2	Yone 21:1-25
3	Tarira Aporo 1:1-26
4	Tarira Aporo 2:1-47
5	Tarira Aporo 3:1-26
6	Tarira Aporo 4:1-37
7	Tarira Aporo 5:1-42
8	Tarira Aporo 6:1-15
9	Tarira Aporo 7:1-29
10	Tarira Aporo 7:30-50
11	Tarira Aporo 7:51-8:13
12	Tarira Aporo 8:14-40
13	Tarira Aporo 9:1-25
14	Tarira Aporo 9:26-43
15	Tarira Aporo 10:1-33
16	Tarira Aporo 10:34-48
17	Tarira Aporo 11:1-30
18	Tarira Aporo 12:1-23
19	Tarira Aporo 12:24-13:12
20	Tarira Aporo 13:13-41
21	Tarira Aporo 13:42-14:7
22	Tarira Aporo 14:8-28
23	Tarira Aporo 15:1-35
24	Tarira Aporo 15:36-16:15
25	Tarira Aporo 16:16-40
26	Tarira Aporo 17:1-34
27	Tarira Aporo 18:1-21
28	Tarira Aporo 18:22-19:12
29	Tarira Aporo 19:13-41
30	Tarira Aporo 20:1-38

date	Scripture
1	Tarira Aporo 21:1-16
2	Tarira Aporo 21:17-36
3	Tarira Aporo 21:37-22:16
4	Tarira Aporo 22:17-23:10
5	Tarira Aporo 23:11-35
6	Tarira Aporo 24:1-27
7	Tarira Aporo 25:1-27
8	Tarira Aporo 26:1-32
9	Tarira Aporo 27:1-20
10	Tarira Aporo 27:21-44
11	Tarira Aporo 28:1-31
12	Rome 1:1-17
13	Rome 1:18-32
14	Rome 2:1-24
15	Rome 2:25-3:8
16	Rome 3:9-31
17	Rome 4:1-12
18	Rome 4:13-5:5
19	Rome 5:6-21
20	Rome 6:1-23
21	Rome 7:1-14
22	Rome 7:15-8:6
23	Rome 8:7-21
24	Rome 8:22-39
25	Rome 9:1-21
26	Rome 9:22-10:13
27	Rome 10:14-11:12
28	Rome 11:13-36
29	Rome 12:1-21
30	Rome 13:1-14
31	Rome 14:1-23

date	Scripture
1	Rome 15:1-21
2	Rome 15:22-16:7
3	Rome 16:8-27
4	1 Korini 1:1-17
5	1 Korini 1:18-2:5
6	1 Korini 2:6-3:4
7	1 Korini 3:5-23
8	1 Korini 4:1-21
9	1 Korini 5:1-13
10	1 Korini 6:1-20
11	1 Korini 7:1-24
12	1 Korini 7:25-40
13	1 Korini 8:1-13
14	1 Korini 9:1-18
15	1 Korini 9:19-10:13
16	1 Korini 10:14-11:1
17	1 Korini 11:2-16
18	1 Korini 11:17-34
19	1 Korini 12:1-26
20	1 Korini 12:27-13:13
21	1 Korini 14:1-17
22	1 Korini 14:18-40
23	1 Korini 15:1-28
24	1 Korini 15:29-58
25	1 Korini 16:1-24
26	2 Korini 1:1-11
27	2 Korini 1:12-2:11
28	2 Korini 2:12-17
29	2 Korini 3:1-18
30	2 Korini 4:1-12
31	2 Korini 4:13-5:10

date	Scripture
1	2 Korini 5:11-21
2	2 Korini 6:1-13
3	2 Korini 6:14-7:7
4	2 Korini 7:8-16
5	2 Korini 8:1-15
6	2 Korini 8:16-24
7	2 Korini 9:1-15
8	2 Korini 10:1-18
9	2 Korini 11:1-15
10	2 Korini 11:16-33
11	2 Korini 12:1-10
12	2 Korini 12:11-21
13	2 Korini 13:1-14
14	Karesia 1:1-24
15	Karesia 2:1-16
16	Karesia 2:17-3:9
17	Karesia 3:10-22
18	Karesia 3:23-4:20
19	Karesia 4:21-5:12
20	Karesia 5:13-26
21	Karesia 6:1-18
22	Efesase 1:1-23
23	Efesase 2:1-22
24	Efesase 3:1-21
25	Efesase 4:1-16
26	Efesase 4:17-5:2
27	Efesase 5:3-33
28	Efesase 6:1-24
29	Firipai 1:1-26
30	Firipai 1:27-2:18

date	Scripture
1	Firipai 2:19-3:6
2	Firipai 3:7-4:1
3	Firipai 4:2-23
4	Korosi 1:1-20
5	Korosi 1:21-2:7
6	Korosi 2:8-23
7	Korosi 3:1-17
8	Korosi 3:18-4:18
9	1 Tesaronaeka 1:1-2:9
10	1 Tesaronaeka 2:10-3:13
11	1 Tesaronaeka 4:1-5:3
12	1 Tesaronaeka 5:4-28
13	2 Tesaronaeka 1:1-12
14	2 Tesaronaeka 2:1-17
15	2 Tesaronaeka 3:1-18
16	1 Timoti 1:1-20
17	1 Timoti 2:1-15
18	1 Timoti 3:1-16
19	1 Timoti 4:1-16
20	1 Timoti 5:1-25
21	1 Timoti 6:1-21
22	2 Timoti 1:1-18
23	2 Timoti 2:1-21
24	2 Timoti 2:22-3:17
25	2 Timoti 4:1-22
26	Taetase 1:1-16
27	Taetase 2:1-14
28	Taetase 2:15-3:15
29	Fairimone 1:1-25
30	Hipuru 1:1-14
31	Hipuru 2:1-18

date	Scripture
1	Hipuru 3:1-19
2	Hipuru 4:1-13
3	Hipuru 4:14-5:14
4	Hipuru 6:1-20
5	Hipuru 7:1-19
6	Hipuru 7:20-28
7	Hipuru 8:1-13
8	Hipuru 9:1-10
9	Hipuru 9:11-28
10	Hipuru 10:1-18
11	Hipuru 10:19-39
12	Hipuru 11:1-16
13	Hipuru 11:17-31
14	Hipuru 11:32-12:13
15	Hipuru 12:14-29
16	Hipuru 13:1-25
17	Yamese 1:1-18
18	Yamese 1:19-2:17
19	Yamese 2:18-3:18
20	Yamese 4:1-17
21	Yamese 5:1-20
22	1 Pita 1:1-12
23	1 Pita 1:13-2:10
24	1 Pita 2:11-3:7
25	1 Pita 3:8-4:6
26	1 Pita 4:7-5:14
27	2 Pita 1:1-21
28	2 Pita 2:1-22
29	2 Pita 3:1-18
30	1 Yone 1:1-10

date	Scripture
1	1 Yone 2:1-17
2	1 Yone 2:18-3:2
3	1 Yone 3:3-24
4	1 Yone 4:1-21
5	1 Yone 5:1-21
6	2 Yone 1:1-13
7	3 Yone 1:1-14
8	Yuti 1:1-25
9	Some Faremarea Tarisia 1:1-20
10	Some Faremarea Tarisia 2:1-17
11	Some Faremarea Tarisia 2:18-3:6
12	Some Faremarea Tarisia 3:7-22
13	Some Faremarea Tarisia 4:1-11
14	Some Faremarea Tarisia 5:1-14
15	Some Faremarea Tarisia 6:1-17
16	Some Faremarea Tarisia 7:1-17
17	Some Faremarea Tarisia 8:1-13
18	Some Faremarea Tarisia 9:1-21
19	Some Faremarea Tarisia 10:1-11
20	Some Faremarea Tarisia 11:1-19
21	Some Faremarea Tarisia 12:1-18
22	Some Faremarea Tarisia 13:1-18
23	Some Faremarea Tarisia 14:1-20
24	Some Faremarea Tarisia 15:1-8
25	Some Faremarea Tarisia 16:1-21
26	Some Faremarea Tarisia 17:1-18
27	Some Faremarea Tarisia 18:1-24
28	Some Faremarea Tarisia 19:1-21
29	Some Faremarea Tarisia 20:1-15
30	Some Faremarea Tarisia 21:1-27
31	Some Faremarea Tarisia 22:1-21

## Some Kepo Tariakosane Oyapo.

### *Aporo Hinamo Yakosane Oyapo.*

Yu aporomo aporo hinamo yakoraka yano motorapo. Asiamo sawi wo aporo hinamo metakira yakosane popasapo. Aporo hinamo yakosa amo yanoane oyapo. Maria, Yone, Yamese, Yosefe, Saemone, arirakano metakira soko yakosane risikinapo.

### **Yasu**

Yasu hauaka wo rea maiya amo, aporo metakira Yasu yano taesa risiapo. Yasu yano yakaisa risiasamo Yasu Keresoaki Nasare aporo, airapo. Sawi wo popasane Yasu Parápase tipura makesa reapo. Asiáne Nasare aporo Yasuane rusua kurakano, Yasu Parápaseane tonotaesapo. (Matiu 27:15-26)

### **Herote**

Yu aporomo hauaka ane Rome kamani aporomo asekea reapo. Herotemo Yu aporoane unihaeaka asekea rekeasimo Rome kamanimo murikimasapo. Ipu someraka, Heroteane unihae kárapo, airapo. Yu aporoane sesehoasimo, Kotimo ape rakaritaesane Herotemo efera hunia kisiapo. Asiáne Herotemo Yu aporo yakai rusua kususamo, ipu eane hisisapo. Arirakano Yasu takapesa maiya amo, Herotemo Yu aporomo aporo hokosa fete suane rukua fasapo. (Matiu 2:1-22)

Herote ane kusuakipoko, epo hokosa kitafusuane e finihaoa risiapo. Arirakano epo hokosa meta yano motosa Herote Atipasemo Kariri hauaka asekea reapo. Herote ipi ata yakosa amo Yone he tapukumarerane mawi patesapo. (Maka 6:14-29) Arirakano Herote hakásá yiamo Yasu hukurusuapo. (Ruki 23:6-12) Arirakano Herote meta ipi makasa kaua yakosa ane Yutia hauaka á reke, Keresoa paosa aporoane mokoatikisapo. Mokoatikiraka Yonemo mamanea Yamese ane rusua kukua, Pitane soko tipura makesapo. (Tarira Aporo 12:1-23)

### *Aporo Kekepo Risia amo Yanoane Oyapo.*

### **Aporo Raipa Roposa**

Isiapo hauaka wo aporo raipamo aporo posepoko makata rakisiapoko makata ropo marapo. Arirakano hauaka metakira aporo metakiramo ipoko makata rakismo, aporo makata forosane soko, aporo tákheoanafosane soko, roponapo. Aporo roposa amo roposa wafaya akipoko wafororaka rakirapo. Wafororaka rakisiane makata ropo marafapo. Aporoane aporo posemo roposasamo, kamenakanafaraka matewanapo. Aporo raipa roposa amo ipi hemakapusua anaka ainafapo. Aporo posemo ipi hemakapusua hákasané kekemanapo.

### **Aporo Unihae**

Isiapo aporo fanane Unihaeapo, airapo. Iyipi hauaka á aporo hinamomo unihaeane Feropo, airapo. Arirakano Rome aporomo unihaeane Sisapo, airapo. Ikirisi meaka Kinipo, airapo. Asiamo Fero soko, Sisa soko, Kini ayíáka yano horane namo kakaro ipu yanoane ayafapo. Ipu makata rakismo ayíáka yano kasapo.

### **Fere Aporo**

Yu aporo metakira namina susu parakuraka kikisiraka risiapo. Kotimo somemane Moseseki kasane aporoamo koteaka kekemahoasimo somemane metakira ripaka marekeia someraka risiapo. Asiamo aporomo somemaneane ipu makárasapo. Ipu somemaneane Yasumo kekemahoanafonorakano ipu Yasuaki rakumarekeia risiapo.

### **Pirisiti Aporo**

Mosesemo ipi mae Erone reapo. Maiya amo Kotiane kekerehoasimo Kotimo Farae ape kiniesapo. Kinierakano Yu aporomo Farae Apeane kisiapo. Arirakano Kotimo Farae Apea rakismo Eronemo pirisiti aporo fanaraka rakismo murikimasapo. Asiamo Eronemo wainepe pusua aporoane su pirisiti aporo risiapo.

Fana pirisiti aporomo Kotimo Farae Apea makata rakiraka risiapo. Arirakano Yasu hauaka wo rea maiya amo, pirisiti aporo yakaimo Kotimo ape Yarusarame sitia makata rakiraka risiapo.

Pirisiti aporomo aporo hinamo supoko farimaka kurikuriraka risiapo. Arirakano aporo hinamomo makata watikisane Kotimo mafahoasimo, makata kakayia mokoa pesane, pirisiti aporomo rukua paikia Kotiaki karaka risiapo.

### **Rifai Aporo**

Wate fana Yakopemo aporo hokosa kenosu hokono murisiapo. Aporo hokosa kenosu á hokosa metane Rifai yano motosapo. Rifaimo wainepe pesane Rifai aporo ira yano motosapo. Rifai aporo ira amo Kotimo apea raiparaka rakisiapo. Arirakano ipu pirisiti aporomo rakirane rakisiafapo.

**Satusi Aporo**

Satusi aporo airakane, namo kakaro aporo ira yanofapo. Satusi aporo airakane, namina kikisiraka haku kepomarekea rakiraka risiapo. Satusi aporo metakira piristi aporo rakisiapo. Satusi aporo airakane metakira mone kára toa aporopo. Metakira yano káraraka risike, Yu aporomo kanisororaka rakiraka risiapo. Satusi aporomo hemakapuraka, aporo kusuane turikia pukusafapo, aíyaka hemakapusuapo.

**Porofete Aporo**

Wate fana Ho Kotesa hauaka wo peasiraka, Kotimo ipi hemakapusuane aporo hinamo suaki some kakasimo, ipi some kará porofete aporoaki somesapo. Porofete aporoamo kaikia, aporo hinamoaki kakama some kasapo. Porofete aporo metakira risiane Aesaya, Iraiya, Tanio, arirakano Yona ayapo. Arirakano aporo metakira soko porofete apororaka risiapo. Maiya omo soko Kotimo aporo hinamoaki ipi hemakapusuane somehoasimo, porofete aporoaki somerapo.

*Hauaka Yano Motosa Amo Kepoane Soko, Aporo Yano Taesa Amo Kepoane Soko Oyapo.*

**Isiraya**

Aporo hinamo su hauaka kara wo Kotimo ainane hemakapusimo, Eparahamemo soko epo wainepe pesa aporoamo soko iaki tarisimo murikimasapo. Arirakano Eparahamemo maeya Aisakepo. Aisakemo maeya Yakopepo. Yakopemo aporo hokosa kenosupo. Aporo kenosu amo aporo ira kenosu faserepesapo. Yakope sisimaraka rea maiya amo, Kotimo e yanoane sanasiraka, Isiraya yano motosapo. Asiamo Yakopemo wainepe pesa aporo hinamoane Isiraya aporo hinamopo, airapo.

Yasu hepene yapura hisiakipoko, Rome ame aporomo Yu aporo hinamoane rukua mokoatikisapo. Rukua mokoatikirakano Yu aporo hinamomo ipu namina hauaka ane metakarikia teketarikia pusuapo. Amo patera Yu aporomo hauaka ane yunu aporo metakiramo asekeea risiapo. Ayipe pukua, keremisi 1948 amo kepomarekea, hauaka ane Isiraya hauakapo, aíyaka hauaka kara wo kamani yakaimo aoraka someaka masapo. Asiamo Isiraya aporo hinamo hauaka kekepo arisiane metakarikia, Isiraya hauaka á pukua risikinapo. Asiamo Isiraya ane yano motosane hauaka soko, aporo hinamo soko, Isiraya aíyaka yano motosapo.

**Yu Aporo**

Wate fana Yosuamo aporo hinamo karikia peraka, iane Kenane hauaka á pauraka risiapo. Hauaka ane parakuraka, sape meta yano motosa Yuta hauakapo. Asiamo aporo Yuta hauaka á risiane, aporo metakiramo someraka, iane Yu aporopo. Keseke aporo ira keno suane aporomo someraka, iane Yu aporopo, airapo. Maiya omo soko isiapo someraka, iane Yu aporopo, airapo.

**Hipuru**

Hipuru aporoane Yu aporopo, airapo. Wate fana Eparahame rea maiya amo, ipu someraka Eparahame Hipuru aporopo, aisapo. Epo makasa kaua wainepe pusua maiya amo, i Iyipi hauaka risia maiya amo iane Hipuru aporopo, aisapo. Maiya omo Yu aporoane isiapo Hipuru aporopo, airafapo. Asiâne Isiraya hauaka á Isiraya aporo risikino ipu Hipuru meane somerapo.

*Hauaka Soko Taone Soko Yano Taesane Oyapo.*

**Sameria**

Sameria taoneane soko, Sameria hauaka ane soko, Yarusarame sitiane makama ra, he Kariri ane makama roraka, titipia rekenapo.

Wate fana Yu aporoane Sameria hauaka á risiapo. Aporo yakaimo Kotimo somemanee metakarisiasamo Kotimo iane fanasisapo. Asiria aporo unihae, ipi ame aporoyaki peraka, Sameria aporoyaki yunu wekea, Sameria aporoane marokesapo. Marokeraka, Sameria aporo hinamo yakai Asiria hauaka á karikia pukua, i risikiasimo murisiapo. Arirakano Asiria aporo unihaeamo Asiria aporo hinamo metakira karikia pukua, Sameria hauaka á risikiasimo murisiapo.

Asiasamo Asiria aporo hinamoane Sameria aporo hinamoyaki sarimaraaka sua-suaraka risiapo. Asiasamo Sameria aporomo Kotimo somemaneeane koteaka keke-masafapo. Arirakano Kotiaki kekerehoasimo Kotimo ape Yarusarame sitia kisiane ipu metakarisapiro. Ipu Kotiaki kekerehoko ape meta Sameria taoneane makeraka kisiapo. Yu aporomo hemakapuraka, "Sameria aporoamo Kotimo somemaneeane kekemarakarfapiro," aíyaka hemakapuraka rakumarekea risiapo.

**Yarusarame**

Wate fana Tefete unihaeaka reamo, epo ape soko Kotimo ape soko kiakosakipoko Yarusarame sitiane murikimasapo. Asiasamo Yarusarame sitiane Tefetemo sitipo, airapo. Arirakano Yasu hepene yapura hisiakipoko, Rome aporomo Yarusarame sitiane

rakaritaesapo. Rakaritaesa amo patera, aporo metakiramo Yarusarame sitiane efera hunia kisiapo. Arirakano maiya metakiramo yunu aporomo pekea, Yarusarame sitiane mokoatikisapo. Maiya omo Isiraya aporomo Yarusarame sitiane asekeea risikinapo.

Yarusarame siti tipia ape yakai kisiiane, ekemo rururaka topereOTOSAPO. TopereOTOSAMO tapesekeno, yao takua ape yakai kisiapo. Aporomo someraka Yarusarame siti Pate soko, Yarusarame siti Kawe soko kisiapo, airapo. Yarusarame siti Kawe kisiiane hauaka wo aporomo kisiapo. Arirakano Yarusarame siti Kaweane Kotimo hepene yapura maroposan hakupo. Kotimo sitiane aporo hauaka wo risiamo aserafapo. Yonemo hakasa asekeea, Some Faremaresa Tarisia sawia popasapo. Yarusarame siti Kawe Kotimo kisiiane hepene yapunaka peakosapo.

### Rome

Rome aporo unihae Sisamo hauaka sua yunu wekea winiraka, aporo hinamoane epo unihaeaka asekeea reapo. Asiāmo hauaka suane epo asekeea rekeasimo, kamanī aporo yakai murikimasapo. Murikimaka, Pairatemo Yutia hauaka ane asekeea rekeasimo murikimasapo. Hauaka wafayamo Rome kamaniyaki werapaka, epo Rome ame aporo yakai amo asekeea risikiasimo pusiesapo. Epo Herotemo unihaeaka asekeea rekeasimo murikimasapo. Asiasamo Yu aporomo saperaka Rome kamaniane metakarikia pusimo ipu hemakapusuapo. Arirakano Yu aporomo hemakapuraka, "Yasumo isu unihaeaka asekeea reke, Rome kamaniane metakarikia pusiehokosapo," aiyaka hemakapusuapo.

### Yutia

Wate fana Tefete unihaeaka rea maiya amo, epo Yu aporo hinamo suane asekeea reapo. Maiya amo, Yarusarame siti makeraka hauaka ane yano motosa Yūta hauakapo. Arirakano hauaka sape metane Isiraya hauakapo. Arirakano Yasu hauaka wo pekea rea maiya amo, Yu aporomo hauaka ane parakusapo. Parakuraka Yarusarame siti makeraka reane Yutia hauakapo, airapo. He Kariri makeraka reane Kariri hauakapo, airapo. Tipiane Sameria hauakapo, airapo.

### Hauaka Watikisane

Fana Kiriki meaka Nu Tesetamane popasa aporoamo Hétisi hauaka ane soko, Kehéna hauaka ane soko popasapo. Arirakano aporomo Kiriki meane maparitaeraka Ikirisi meaka maroporaka popasapo. Maroporaka popasane Hétisi hauaka yano motosane soko, Kehéna hauaka yano motosane soko, popasafapo. Hauaka tetane watikisamō ipu Heao hauaka yano motosane popasapo. Arirakano maiya omo aporomo Heao hauaka popasane koteaka takekea hemakapuraka, fana Hétisi hauaka popasane efera hunia Hétisi hauaka poparakanapo. Asiāne Kehéna hauaka ane Heao hauakapo, aiyaka poparakanapo.

### Hétisi Hauaka

Hétisi hauaka ane aporomano kusua hoane i hukurukusa maiya ane fasere peasimo hauaka á kau risikinapo. Yu aporo metakiramo someraka, Hétisi hauaka ane sapea aporomano watikiaka risia kusua hoane kau risikinapo. Arirakano enonoraka sapea aporomano koteaka risia kusua hoane sape meta kotesa á kau risikinapo, airapo.

### Heao Hauaka

Heao hauaka ane Kiriki meaka Kehéna airapo. Kehéna kepoane oyapo. Yarusarame ruru yao takua Kehéna hauaka reapo. Wate fana Kehéna hauaka á, Yu aporo unihae metakiramo namina hokosa rukua, eke kima á paikia, kotafe kotaiki kasapo. Keseke makata aina watikisane Yu aporo unihae metamo rukupatesapo. Asiamo hauaka ane watikisamō ipu makata pepeno soko makata kusuae soko mokoateraka, iramo pairapo. Kehéna hauaka á ira paisia ane kopakapurafapo.

Kaisie. Kehéna hauaka Yarusarame siti makeraka reane namo kakaro Heao hauaka ayafapo. Kehéna hauaka ane watikisamō aporomo someraka, Kotimo fanasina hauaka ane Kehéna asiāpo, airapo. Keseke hukuarura maiya amo, Kotimo aporo hinamo takekea parakuraka, aporo hinamo watikisane Heao hauaka á fanasihoko pusiehokosapo. Heao hauaka á ira rufi kopakapurafarakia yaiya inaraka rekeakosapo.

*Kotiaki Kekerena Apeane Oyapo.*

### Farae Ape

Wate fana yao kauanea Mosesemo Yu aporo hinamo su karikia pusua maiyamo, Kotimo Moseseaki someraka, "Anoaki kekerēhoko repo Farae Ape kinie," aisapo. Asiamo repo Farae Apeane hemakapuko Hipuru sawia sapota 9 á menohoanie. Arirakano Farae Apeane Pisini meaka, "Haus sel," aiyaka popasapo.

### Kotimo Ape

Yarusarame sitia Kotimo apea pirisiti aporomo rakisiapo. Aporo hinamomo ipu makata watikisane mafahoasimo, saro ponoma kau soko metao, saro sipi soko metao

maka perakano, pirsiti aporomo rukua paikia Kotiaki kasapo. Ayíáka Kotiaki rukua kará ape meta kisiafapo. Yarusarame sitia hákasa pirsiti aporomo paikia Kotiaki kasápo. Arirakano Yasu hepene yapura hisiakipoko, keremisi 37 su faraka, Rome ame aporomo Yarusarame sitiane rakaritaesapo. Rakaritaeraka Kotimo apeane soko rakaritaesapo. Rakaritaerakan Yu aporomo Kotimo apeane efera hunia kisiafapo. Arirakano Kotimo apeane Pisini meaka, "Tempel," aíyaka popasapo.

### **Sésé Ape**

Yasu Kereso hepene yapura hisiakipoko, Keresoa paosa aporo hinamo sarimaraka, toa apeane sésé apepo, airapo. Asiamo sésé apea Kotiane soko, Yasu Keresoane soko, makáraraka kekerenapo. Arirakano sésé ape yano metane kurikuri apepo, airapo.

### **Yu Aporomo Sarimana Ape**

Yu aporomo hauaka sua, apea soko, taonea soko, Yu aporomo Kotiaki kekerehoko Yu aporomo sarimana apea perapo. Ape á Yu aporo sisimamo soko, Somemane Tisa aporomo soko rakirapo. Fenena maiya amo ipu Kotimo sawi popasane menoraka, Kotiaki kekereraka kesaraka, ayíáka Kotiaki kurikurinapo. Apea sere metakiramo Somemane Tisa aporomo Yu aporomo hokosane sukurnapó. Arirakano makata meta fasereperakano soko, apea i sarimaraka me rurapo. I su auarakaka risikiasimo, apea makata hukururaka soko hukururapo. Arirakano Yu aporomo sarimana apeane Pisini meaka, "Haus lotu," aíyaka popasapo. Asiáne Yu aporomo sarimana apea ipu Yasu Keresoane makáraraka kekerehoanafononasamo, isiapo kurikuri apepo, aíyaka popasafapo.

*Kotimo Aporo Hinamoyaki Someaka Masane Oyapo.*

### **Kotimo Fana Someaka Masane**

Fana Kotimo Yu aporo hinamoaki someaka masapo. Kotimo ipi somemane Moseseki somerakano, Mosesemo aporo hinamo suaki somesapo. Yu aporomo Kotimo somemane ane kaikia kekemarakanone, ane Kotimo iane asekeea rekeakosapo, aisapo. Airakano Yu aporomo someraka, "Isiapo Kotimo somemaneane kekemahokosapo," aisapo. Airakano Mosesemo makata kakayia yapimo aporo hinamoane wakirusuapo. (Kisim Bek 24:6-8) Asiamo Kotimo Fana Someaka Maraka ayiakakosapo aisane yapimo murikimaka tarisiapo.

### **Kotimo Kawe Someaka Masane**

Kotimo aporo hinamo su ararehokosane Kawe Someaka Masapo. Aporo hinamomo Yasu Keresoaki himu hakásaraka hemakapukua risikinone, Kotimo iane mafasiakosapo. Asiamo aporo hinamomo hemakapusimo Yasu ira matopesa paremarekeea kusua maiya amo, Yasumo yapimo tarisiapo. (Hipuru 7:22, 8:6, 10:16, 12:24)

*Yasumo Yano Motosa Metakirane Oyapo.*

### **Aporomanomo Tákeane**

Yasu hauaka wo pekea reke, aporo hinamo suaki Yasumo kakama someraka, "Ano Kotimo hokosapo," aíyaka somesafapo. Epo some akara sereamo, epo ipiane someraka, "Ano Aporomanomo Tákepo," aisapo. Yasuane ipi kakaro Kotipo, arirakano eane kakaro aporopo.

### **Kereso**

Isiapo Yasu yano horaka Yasu Kereso airapo. Epo yano motosa kakaroane Yasupo. Keresoane epo makata rakira yano motosapo. Arirakano aporo metakiramo makata rakira aporo ayíáka somerapo. Paseto, Tikone, Kanisoro aihora aíyaka airapo. Kereso kepoane aporo unihaeaka rekeasimo Kotimo murikimasa aporoane Keresopo. Wate fana Kotimo Yu aporo ararehoasimo epo murikimasa aporoane pusiehokosapo, aisapo. Asiamo e perakarihoamo Yu aporomo kau risiapo. Aporo ane, Yu aporomo namina meaka "Mesaya," airapo. Arirakano aporo ane Kiriki meaka, "Keresopo," airapo.

*Yu Aporomo Hokono Kesane Oyapo.*

### **Ape Farimaresane Hemakapuko Hokono Kesane Oyapo.**

Fana Mose rea maiya amo, Yu aporo hinamo Iyipi hauaka risia maiya amo, Iyipi aporomo Yu aporo hinamoane rukua mokoatikisapo. Iyipi hauakane metakarikia pusimo, Kotimo Yu aporo hinamoane araresapo. Yu aporomo saro sipi yapi ane ipu ape ikia koroa paisiapo. Paisokino, ipu hokosane Kotimo hepene aporomo rusuafapo. Arirakano ipu apeane hepene aporomo farimaresapo. Asiáne Iyipi aporomo apea saro sipi yapi paíyanafonosekeno, ipu hokosa fana hákasané Kotimo hepene aporomo rupe pusuapo. Asiamo Kotimo Yu aporo hinamo mafasisiane hemakapukua namina yáki suamo hokono kerapo.

### **Farawa Pirianafonosane Hemakapuko Hokono Kesane Oyapo.**

Yu aporo hinamo Iyipi hauaka aeyaka foaka teketarikia pukusasamo, maiya hi faseskeno, farawa pirianafonosane paikia nesapo. Asiamo yáki suamo Yu aporomo Ape Farimaresane Hemakapuko hokono keraka, Farawa Pirianafonosane soko, hemakapuko hokono kerapo.

### **Penekose Hokono Kesane Oyapo.**

Yu aporomo Ape Farimaresane hokono keraka, sere fifiti su (50) menoraka Penekose hokono kerapo. Penekose hokono akera maiya amo, Yu aporomo makata nakosa súrakanó Kotiaki súseka karapo. Arirakano Yu aporomo Penekose Hokono keraka risia maiya amo, Kotimo ipi Ho Kotesane hauaka wo pusierakano pesapo.

### **Ape Mano Kisiane Hemakapuko Hokono Kesane Oyapo.**

Yu aporo hinamo Iyipi hauaka metakarikia, yao kauanea koraka risia maiya amo, ipu ape mano kikia waka risiapo. Keseke i Kenane hauaka á pauraka namo kakaro apeane kisiapo. Kotimo araresane ipu hemakapuko hokono kesapo. Asiamo yáki suamo ipu apea makeraka ape mano kikia, sokó hakásamo Kotiaki súseraka risike, hokono kerapo.

*Yu Aporomo Makata Ainane Oyapo.*

### **Aporo Kau Hahaeraka Patenane Oyapo.**

Wate fana Eparahameaki Kotimo someraka, 'Ne soko nōmo aporo ira wainepe pukusane soko nōmo murikimaka, aporo hinamo suane hauaka wo risiamo nōmo ainane hemakapusimo, neane nōmo murikimarakanapo. Asiamo repo hemakapusimo, aporomo tumuru makata ane kau hahaeraka patehoanie. Keseke Kotimo somemaneane Moseseaki kasa maiya amo, epo someraka, "Aporo hokosa fete takapesa maiya ane menorape hikia sere karia paurakano, epo tumuru makata ane kau hahaeraka patehoanie," aisapo.

Asiamo Kotimo somemane ane Yu aporomo kekemaraka, ipu hemakapuraka, "Isuane Kotimo murikimasa aporopo," aiyaka hemakapuraka, ipu namina yia makáranapo. Arirakano keseke aporomo Yasuane hemakapusimo, Poremo some karakano, Yu aporo hoanafonosane Keresoa paosapo. Asiamo Yu aporo Keresoa paosa aporomo someraka, "Yu aporo hoanafonosane Keresoa paosane ipu tumuru makata ane kau hahaeraka patehoanie," aisapo. Airakano Poremo someraka, "Yu aporo hoanafonosane Yu aporo parihoasimo, epo tumuru makata ane kau hahaeraka patehoafunupo. Asiáne Yu aporo hoanafonosane Keresoa paohoasimo, epo tumuru makata ane kau hahaeraka patehoane siaoasisareapo. Keresoa paohoasimo, Yasu Keresoaki himu hakásaraka hemakapurane káraro," aisapo. Some one repo hemakapusimo Tarira Aporo 15:1-35 á soko, arirakano Karesia 2:1-6 á soko, arirakano Karesia 5:1-15 á soko menohoanie.

### **Fenena Maiya**

Kotimo hauaka kara one rakisia maiya amo, epo sere namasumo rakikia, sere yatipinumo e fenesapo. Asiamo Yu aporomo sere yatipinuane hemakapuraka fenenapo.

Arirakano Yasu kukua turikia pusuané menomo e turikia pusua. Asiamo Keresoa paosa aporomo sere ane hemakapukua fenenapo.

Arirakano Yu aporomo sere menonane soko, isiapo Namo aporomo sere menonane soko, hakupo. Maiya omo Yu aporomo fenena maiya sere yatipinuane isiapo namapo, airapo. Arirakano Yu aporomo sere meno airakano, isiapo yatipinupo, airapo.

Yu aporomo fenena maiya ane kakoreamo sere maiya tuakeramo kepomarekea, namamo sere maiya tuakeramo fanapo.

*Aporomo Someraka, "Ne Ano Hokono Tumuru Takua Kayae," Aira Amo Kepoane Oyapo.*

Aporo uniháemo aporo metaki someraka, "Ne ano hokono tumuru takua kayae," airakanone, aporoane epo makáraraka marerakanapo.

### **Yu Aporomo Kanisoro**

Yu aporomo kanisoro airakane, kamani aporomo kanisoro ayafapo. Pirisiti aporo fanane soko, pirisiti aporo kára yakai ane soko, Yu aporo sisima ane soko namina sarimaraka, Yu aporomo kanisoro, airapo. Kanisoro aporo sarimasane, aporo yakai ane Satusi aporopo. Makata maroponane soko, makata hukururane soko kanisoro aporoamo somerapo. Asiamo Yasu wasere masa maiya amo kanisoro aporo suane sarimaraka, Yasuane hukurusuapo.

*Some Metakirane Oyapo.*

### **Koróto**

Koróto hauaka tamo atura hauakayaki hakásá suasuaraka torapo. Aporomo kokoa, hauaka raea aseraka morapo. Koróto namoane makosakipoko aporomo ira pairapo. Ira paikia makata pepeno ane paikia fanapo. Koróto namoane aporomo mokoa yokotae hae soko, ikiare menane soko rakirapo. Korótomo makata rakisiane mone káramo

roponapo. Arirakano korótó ane keamerakayia ho piakaenapo. (1 Pita 1:7) Korótó mokoako aina ayiáka, siufa soko mokoakosakipoko yainapo. Arirakano siufa ane pakaerakayia ho piakaenapo.

### **Kiriki**

Hauaka meta yano motosa Kiriki hauakapo. Kiriki aporo hinamomo Kiriki meaka somerapo. Kotimo Kawe Someaka Masa sawi ane wate fana aporo metakiramoo Kiriki meaka popasapo. Popasane sanasiraka Ikirisi meane soko, Pisini meane soko, Namo Meane soko popasapo. Popasa amo kepoane Kiriki me ayapo. Arirakano Kiriki aporo airane Yu aporo hoanafanosaki airapo.

### **Hauaka**

Pisini meaka "kantri," soko, "provins" soko aiyaka popasane, isiapo Namo meaka maparitaeraka popahoasifasekeno "hauaka" aiyaka popasapo. Repo hemakapuraka, hauaka aiyaka popasane hauaka wakasemarakanaareapo, aiyaka hemakapukupo. Hauaka aiyaka popasane, "kantri" soko, "provins" soko isiapo hauaka popasapo.

### **Taone, Siti**

Isiapo "taone" aiyaka popasekenone, ane tesene hákasa popasapo. Arirakano "siti" aiyaka popasekenone, namo kakaro tesene kára ane popasapo.

### **Kingdom Bilong God**

Pisini meaka "Kingdom bilong God" aiyaka popasapo. Popasa amo kepoane oyapo. Kini aporoane Namo meaka aporo unihaeapo, airapo. Aporo unihaeamo ipi aporo hinamo unihaeaka asekea reane soko, ipi hauaka asekea reane soko, Pisini meaka "kingdom" airapo. Asiomo "kingdom bilong God" airakane, Kotimo aporo hinamo unihaeaka asekea reane soko, epo hauaka asekea reane soko, kepoane ayapo. Arirakano Matiumo Kotimo yano motosane mawakasemanapaka, epo "kingdom bilong God" aiyaka popasafapo. Matiumo "kingdom bilong heven" aiyaka popasapo. Makata tetane hasása yiypao.

### **Pikinini Bilong Man**

Pisini sawia Yasumo somesane úyaka popasapo, "Mi Pikinini bilong man." Aiyaka popasane repo hemakapuraka, "Ano aporomo hokosareapo," aiyaka hemakapukopo. Repo Yu aporomo ainane hemakapusua satiki, repo Yasumo some kepoane hemakapuraka, "Eane kakaro aporopo, aiyaka hemakapufunureapo.

Arirakano Yasuane Pisini meaka, "Mi Pikinini bilong Man," aiyaka popasane, Yu aporomo kaikia hemakapuraka, "Yasuane Kotimo murikimasa apororeapo," aiyaka hemakapusuapo. Asia ayiáka wate fana Kotimo ipi porofete aporoaki someraka, "yu, pikinini bilong man" aiyaka somerakano Kotimo Fana Someaka Masa Sawia popa-hoareapo.

### **Yis**

Makata pirira Pisini meaka yano motosa "yis" airapo. Yisimo ainane oyapo. Yisimo makata torenapo. Toreraka makáranapo. Hinamo farawa paikinako yisi wakasema farawayaki kekeroraka, motokoa asekea nina, yisimo rakiraka reke farawa suane makáranapo. Arirakano yisimo makata torenasamo Kotimo sawia taku meaka makata watikisane yisipo. Asiáne Matiu 13:33 á Yasumo yisiane someraka, yisiane makata kotesa asiápo.

### **Glori**

Pisini meaka "glori" aiyaka popasa kepoane oyapo. Kepo meta, faesa kotesane, airapo. Asiomo Koti hepene yapura reke faesayaki rekenapo. (Ru 2:9, 9:32; TA 22:11, SFT 21:23)

Arirakano kepo meta, wakapu kara ane, airapo. (Yo 1:14, 2:11, 11:40; 2 Te 1:7; SFT 18:1) Asiomo Yasu paria peramo ipi wakapu kára faesayaki peakosapo. (Mt 24:30; Ru 21:27; Mk 13:26)

Arirakano kepo metane oyapo. Koti ipi kárasasamo isiapo e yano motosane makáraraka kekereraka somerapo. (Mt 25:31; Ru 2:14; Yo 11:4; SFT 1:6, 4:11)

### **Holi**

Pisini meaka "holi" aiyaka popasa kepoane oyapo. Kotimo ipi ainane namo kakaro ereketae kotesa susupo. Makata meta watikisa rekenafapo. Asiasamo Kotimo ipi ainane "holi" airapo. Asiasamo Kotimo ipi ainane "holi" airapo. (Yo 17:11; SFT 3:7, 4:8, 15:4)

Arirakano makata watikisane kikisiraka, Kotipoko koteaka susu rakira ane "holi" airapo. Arirakano Ho Kotesane ipi "holi" airapo. Ho Kotesayaki makata watikisane rekenafapo. Ho Kotesane kakaro kotesa susupo. (Ru 1:35; TA 4:27; 2 Ti 3:15; 2 Pi 1:21)

Arirakano Kotimo makata ane rakisimo Ho Kotesane murikimasasamo eane "holi" airapo. Arirakano makata meta yakapa "holi" airare? Aporomano soko, ape soko, makata metakira makata watikisane kikisiraka, Kotipoko murikimaka kotesa susu ane "holi" airapo. (Mk 6:20; TA 6:13; Ro 12:1, Ta 1:8, 2 Pi 3:11; SFT 21:10, 22:11)